


Ew Testamento:
Chipay Tawkquiztan



New Testament in Chipaya (BL:cap:Chipaya)

**Ew Testamento: Chipay Tawkquiztan
New Testament in Chipaya (BL:cap:Chipaya)**

copyright © 2009 Wycliffe Bible Translators, Inc.

Language: Chipaya

Translation by: Wycliffe Bible Translators, Inc.

Chipaya [cap], Bolivia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chipaya

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022

baea6d6-fcc1-578f-afbd-04a9c5c14184

Contents

SAN MATEO	1
SAN MARCOS	65
SAN LUCAS	104
SAN JUAN	175
HECHOS	228
ROMANOS	293
1 CORINTIOS	321
2 CORINTIOS	349
GÁLATAS	366
EFESIOS	376
FILIPENSES	386
COLOSENSES	393
1 TESALONICENSES	400
2 TESALONICENSES	406
1 TIMOTEO	409
2 TIMOTEO	418
TITO	424
FILEMÓN	428
HEBREOS	430
SANTIAGO	451
1 SAN PEDRO	458
2 SAN PEDRO	466
1 SAN JUAN	471
2 SAN JUAN	478
3 SAN JUAN	479
JUDAS	480
APOCALIPSIS	482

EL SANTO EVANGELIO SEGUN SAN MATEO

¹ Jesucristuqui Davidž majchmajtquiztan, nižaza Abrahamž majchmajtquiztan tjoñitača. Jesucristuž tuquita atchi ejpnacača tinacaqui.

² Abrahamqui Isaacž ejptača. Isaacqui Jacobž ejptača. Jacobqui Judaž ejptača, niž jilanacžtanpacha.

³ Judaqui Fares ejptača, Zaratanpacha. Tamarqui Fares Zara maatača. Faresqui Esromž ejptača. Esromqui Aramž ejptača.

⁴ Aramqui Aminadabž ejptača. Aminadabqui Naasonž ejptača. Naasonqui Salmonž ejptača.

⁵ Salmonqui Booz ejptača. Rahabqui Booz maatača. Boozqui Obedž ejptača. Rutqui Obedž maatača. Obedqui Isaíž ejptača.

⁶ Isaíqui David cjita chawc jilirž ejptača. Davidqui Urías tjunatan zalžcu Salomonž ejptača.

⁷ Salomonqui Roboamž ejptača. Roboamqui Abías ejptača. Abiasqui Asaž ejptača.

⁸ Asaqui Josafatž ejptača. Josafatqui Joramž ejptača. Joramqui Uzías ejptača.

⁹ Uziasqui Jotamž ejptača. Jotamqui Acaž ejptača. Acazqui Ezequías ejptača.

¹⁰ Ezequiasqui Manasés ejptača. Manasesqui Amonž ejptača. Amonqui Josías ejptača.

¹¹ Josiasqui Jeconías ejptača, niž jilanacžtanpacha. Nii timpuqui Israelit žoñinacaqui preso chjitztatača Babilonia cjita yokquin.

¹² Jalla nekztanaqui Jeconiasqui Salatielž ejptača. Salatielqui Zorobabelž ejptača.

¹³ Zorobabelqui Abiudž ejptača. Abiudqui Eliaquimž ejptača. Eliaquimqui Azorž ejptača.

¹⁴ Azorqui Sadocž ejptača. Sadocqui Aquimž ejptača. Aquimqui Eliudž ejptača.

¹⁵ Eliudqui Eleazarž ejptača. Eleazarqui Matanž ejptača. Matanqui Jacobž ejptača.

¹⁶ Jacobqui Josež ejptača. Josequi María lucutača. Mariiqui Jesús majtchinča. Nižaza Jesusaqui Yooz cuchanžquita Cristo cjitazakazza.

¹⁷ Tunca pusin atchi ejpnacaž kamta wachquichiča Abrahamž timpuquiztan Davidž timpucama. Nižaza tsjii tunca pusin atchi ejpnacaž kamta wachquichiča Davidž timpuquiztan Israel žoñinacaž Babilonia cjita yokquin preso chjichta timpucama. Nižaza tsjii tunca pusin atchi ejpnacaž kamta wachquichiča Babilonia yokquin chjichta timpuquiztan Cristuž nasta tjuñicama.

JESUCRISTUZ NASTA

¹⁸ Jalla tužuča Jesucristuž nastaqi. Niiž maa María cjitiqui Josižtan zalzjapa kazzintača. Ima lucžtan kamcan ica cjissinča Yooz Espíritu Santuž cjen.

¹⁹ Naaža lucu José cjitaqui Yooz kuzcama kamñitača. Niiž tjun María icaž cjen Josequi kuz turwaysi cjissiča. Nekztan jamazit jaljtis pecatča. Kjanacama ultimu jaljtisaž niiqui, Maríiqui žoñiž chjaawjkatta cjitasača, ana honorchiz.

²⁰ Jalla nuž jaljtis pinsan, Yooz Jilirž anjilaqui wiiquin nižquiz tjonziča, tuž cjican:
—José, Davidž majchmaati, Yooz Espíritu Santuqui am maataka t'icziča. Jalla nižtiquiztan ana jiwjata naatan zalzqui.

²¹ Nižaza majtanaqui, wawž tjuuqui Jesús cjitaž cjequiča. Jalla niiqui niž wajtchiz žoñinaca ujnacquiztan liwriyaquiča. —Nuž cjichiča anjilaqui.

²²⁻²³ Tuqui timpuquiztanpacha Yooz Jiliri qui profetžquiz chiikatchiča, tuž cjican:

“Tsjaa tunsill turqui icaquiĉha. Nekztan lucmajch wawa mataquiĉha. Nii wawaqui Emanuel cjitaĉ cjequiĉha”.

Emanuelqui tuĉ cjiĉha: uĉhumnacatanĉha Yoozqui. Nii profetĉ takucama cumplissiĉha Jesucristuĉ nastanaqui.

²⁴ Jalla nekztan Josequi tjaji wajtĉcu, Yooz anjilaĉ mantitacama ojkchiĉha. Mariatan zalĉiĉha. Niĉaza persun tjunjapa ricujchiĉha.

²⁵ Naaĉa majtĉ tjuĉnicama Josequi Mariatan anapan ultimu lucutiĉni paasiĉha. Jalla niĉtiquiztan ana zalĉi cjichucataĉha, pero chicapan kamĉitaĉha. Wawa majttan, Jesuĉs cjita tjuuĉztan tjuuĉzkachiĉha.

2

MAGONACA RISPITI TJONCHICHA

¹ Belĉn cjita wajtquiz niĉaza Judea cjita yokquin Jesusaqui majttataĉha. Nii nacionĉ chawjc jiliriĉtaĉha Herodes cjitaqui. Jalla nii tuquita timpuquiz jalla tuĉu watchi-takalĉha. Nii nacionquin Jerusalĉn cjita wajtquin tuwanchuctan tsjii kjaĉ ŉoĉinacaqui irantiĉquichiĉha. Mago cjita ŉoĉinacataĉha ninacaqui, warawar puntu istutiĉni.

² Jerusalĉn wajtquiz irantiĉcu pewcpewcziĉha tuĉ cjican:

—Uzca nassiĉha judio ŉoĉinacĉ chawjc jiliriĉqui. ĉJakziĉuintaya? —jalla nuĉ cjican pecunchiĉha. Niĉaza cjichiĉha, —Wejrnacqui tuuna ŉejlcan niĉĉ nastiquiztan warawara cherchinĉha. Jalla niĉtiquiztan nii rispiti tjonchinĉha, —jalla nuĉ cjican mazziĉha.

³ Herodes cjita jiliriĉqui magonacaĉ quint'ita nonĉcu, ancha pinsamintu apazziĉha persun kuzquiz. Niĉaza Jerusalĉn wajtquiz kamĉi ŉoĉinacami ancha kuzquiz pinsatĉha.

⁴ Jalla nekztanaqui nii rey jiliriĉqui timplu chawjc jilirinaca, niĉaza lii tjaajiĉni maestrunaca kjawziĉha. Ninacĉquiz pewcziĉha:

—ĉJakziĉuint Cristuĉqui majtta cjesaya? —jalla nuĉ cjican pewcziĉha.

⁵ Ninacaqui kjaaziĉha tuĉ cjican:

—Belĉn wajtquinĉha, Judea yokquin. Tsjii profetaqui cjiĉrchiĉha, tuĉ cjican:

⁶ “Judá yokquinĉha Belĉn watjaqui. Jalla nii watjapanĉha chekanaqui, parti watjanac-quiztan Judá yokquin. Jalla nekztan tsjii chawc jiliriĉqui ulnaquiĉha. Jalla niiqui wejt Israel ŉoĉinacaĉ mantaquiĉha; niĉaza cwitaquiĉha”.

⁷ Jalla nekztanaqui Herodes jiliriĉqui magonaca jamazit kjawziĉha. Nekztanaqui zumpacha pewcziĉha, ĉhjul timpuquiztan nii warawaraqui paristĉhaja, jalla nii.

⁸ Jalla nekztanaqui Herodesqui magonaca cuchanchiĉha Belĉn watja, jalla tuĉ cjican: —Nii Belĉn watja oka, niĉaza nii wawĉ puntu zumpacha pjurwiit'aqueiĉha. Wawa watĉcuqui, wejtquiz mazcaquiĉha. Wejrmĉi zakal ojkĉ pecuĉha, wawa rispiti.

⁹ Jalla nekztan Herodes jiliriĉ ŉiĉĉinta taku nonĉcu, magonacaqui ojkchiĉha. Jerusalĉn watja ulantan, nii tuuna cherta warawaraqui ninacĉ tucquin wilta okatĉha. Jakziĉquin nii wawa ŉelatĉhaja, jalla nii juntuĉ tsijtsiĉha warawaraqui.

¹⁰ Nii warawara tsijtsi cherĉcu, magonacaqui ancha wali cuntintutaĉha.

¹¹ Nekztanaqui kjuya luzcu, wawa cherchiĉha Marii maatanpacha. Jalla nekztanaqui ninacaqui quillziĉha wawa rispitsjapa. Paaz caja cjetĉcu, wawĉquiz zuma cusasanaca onanchiĉha, kori, insinzu, mirra. Jalla nuĉ nii wawĉquiz rispitiĉha.

¹² Jalla nekztanaqui wiĉquin Yoozqui magonacĉquiz ĉiĉĉinchiĉha, ana Herodes kjutĉni quepajo. Jalla niĉtiquiztan persun watja quejpchiĉha yekja jicĉ kjutĉni.

EGIPTO YOKQUIN ATIPASSICHA

¹³ Jalla nekztanaqui nii magonacaĉ ojktan tsjii Yooz Jilirĉ anjilaqui wiĉquin Joseĉquiz parisiquichiĉha. Nekztan tuĉ cjichiĉha:

—Zaazna, tii wawa ĉhjiĉha maatanpacha. Egipto yokquin oka, atipasjapa. Herodes jiliriĉqui tii wawaĉ kjuraquiĉha conĉjapa. Jalla nii Egipto yokquin am ŉelaquiĉha,

čhjlorat wejrqui amquiz wilta chiyačhaja, jalla niicama. —Jalla nuž wiiquin chiichiča anjilaqui.

¹⁴ Jalla nuž anjilaž chiitiquiztan Josequi nii orapacha žaaziča. Nekztan wawžtan maatan chjitchiča. Nii weenpacha ulanchiča Egipto yok kjutñi.

¹⁵ Jalla nicju kamchiča Herodes ticzama. Niiž tuquitanpacha Yooz Jiliri qui profetžquiz chiikatchiča, tuž cjican: “Egipto yokquiztan wejt persun Maati kjawznacha”. Jalla nii profetž chiita takuqui cumplissiča.

HERODESQUI JESUSA CONKATZ PECATCHA

¹⁶ Herodesqui kuzquiz tantiyassiča, “Magonacaqui wejttanž burlaskalak” cjican. Jalla nižtiquiztan walja žawjziča. Jesucristo majtta timpu tantiichiča magonacaž maztiquiztan. Jalla nuž tantižcu mantichiča Belén wajtquin nižaza nii wajtž tjiyaran tjapa lucmajch wawanaca pizc watquiztan kozzuc conajo.

¹⁷ Jalla nuž cumplissiča Jeremías cjita profetž cjiirta takuqui.

¹⁸ Tuqui timpuqui Jeremiasqui cjiirchiča, tuž cjican: “Ramá cjita wajtquin wali chawc llaqui želaquiča nižaza alto joržtan kaaquiča. Raquel cjitiqui ancha kaaquiča naaža maatinacžquiztan. Ana wira kuztami ch'uj cjequiča. Nižaza naaža maatinacaqui ticziž cjequiča”. Jalla nuž cjiirchiča Jeremías cjita Yooz taku paljayñi profetaqui.

¹⁹ Wiruñaquí Herodes cjita jiliri qui ticziča. Jalla nekztanaqui tsjii Yooz Jiliriž anjilaqui Josežquin wilta parisiquichiča wiiquin. Nii oraqui Josequi Egiptuquin tira želatča. Anjilaqui cjichiča:

²⁰ —Zaazna, tii am uza chjicha maatanpacha. Israel yoka quepa. Am wawa conz pecñi Herodes jazic ticziča.

²¹ Jalla nuž cjen Josequi žaažcu Israel yokquin nii uztan maatan chjitchiča.

²² Israel yokquin Judea provinci quin Arquelao cjita jiliritiča mantiñiqui. Jalla niiča Herodes majchqui. Niiž ejpž puestuquizpacha luzzitāča. Josequi nii quintu zizcu, Judea yokquin kamz jiwjatchiča. Nekztan tsjii anjilaqui wiiquin Josežquiz paljaychiča, Judea yokquiz ana kamajo, antiz Galilea yokquin okajo. Jalla nekztan Galilea yok kjutñi ojkchiča.

²³ Jalla nii yoka irantižcu, Nazaret cjita wajtquiz kamchiča. Tuqui timpuqui Yooz cuntiquiztan chiiñi profetanacaqui mazinchiča, Jesusaqui “nazareno” cjitazakaz cjequiča, jalla nuž cjican mazinchiča. Nazaret wajtquiz kamcan profetanacaž chiita taku cumplissiča.

3

JUAN BAUTISTA YOOZ TAKU PALJAYÑI

¹ Niiž wiruñaquí Juan Bautistaqui Judea provinci quin želatča, ch'ekti yokquin. Yooz taku paljayatča,

² tuž cjican:

—Kuznacaž campiya. Arajpach Yoozqui waj mantaquiča. Nii timpuqui žcatžinžquiča.

³ Tuqui timpuqui Isaías cjita profetaqui Juanž puntuquiztan cjiirchiča, tuž cjican: “Ch'ekti yokquin tsjii žoñž joraž nonžta cjequiča. Alto jorquiztan tuž cjican chiyaquiča: ‘Tsjii chawjc Jiliriž tjonaquiča. Jazi qui zuma kamañ jicz tjaczna. Tsjii jicztakaz ančuca kuznaca zumpacha azquicha, nižaza zuma lijitumapanž cjee’ ”.

Jalla nuž cjiirratača Juanž puntuquiztan.

⁴ Juanž zquitiqui camello cjita animalž chomquiztan watstatača. Niiž cinturonaqui zkizitača. Nižaza langosta cjita kolta animalanaca lujlñitača. Munti misq'uinaca lujlñizakaztača.

⁵ Walja žoñinacaqui Juanž taku nonžñi tjonñitača, Jerusalén chawc wajtquiztan, nižaza Judea yokquiztan, nižaza Jordán cjita pujžcatirantan. Walja žoñinaca tjonñitača.

⁶ Jakziltat niiž persun ujnaca mazzaja jalla ninacžquiz Juanqui bautissiča Jordán cjita pujquiz.

⁷ Nii tama žoñinacžtanpacha walja fariseonacami, nižaza saduceonacami jalla nii jilirinacami Juanžquin tjonchizakazza bautista cjisjapa. Jalla ninaca cheržcu, Juanqui tuž chiižinchiča:

—Zkoražtakaz incallñi žoñinaca. Yooz Ejpqui ujchiz žoñinaca wajillaž casticaquiča. ¿Ject ančucaquiz nii mazzejo? ¿Nii casticu atipzjapa wejtquinž tjonkaya?

⁸ Kuz campiichinčucžlaj niiqui, zumapankaz kamaquiča, ančuca campiita kuz kjanapacha tjeezjapa.

⁹ Ančucqui anaž mit kuzziz porapat chiyasaquiča, tuž cjican: “Wejrnacqui Abrahamž majchmaatinacžquiztanpacha tjoniča, Yoozqui anaž wejrnaca casticasača”. Jalla nižta ana chiichiž waquisiča. Yoozqui tii maznacquiztan žoñiž cjiskatasacha, Abrahamž majchmaatinaca cjisjapa.

¹⁰ Ančucqui tsjii frut muntižtakazza. Ana zuma fruta pookñi muntiqui k'aatztaž cjequiča jir achžtan. Jalla nuž k'aatztiquiztanaqui, ujtaž cjequiča. Jalla nižta irataž ančucaquiz wataquiča. Ana zuma kamañchiz žoñinaca casticta cjequiča.

¹¹ Wejrqui weraral chiyuča. Kjaztankal bautisuča, ančuca kuznaca campiitiquiztan. Tsjiiqui wejt wirquin tjonča. Jalla niiqui Espiritu Santužtanami nižaza arajpach ujžtanami bautisaquiča. Jalla niča wejtquiztan tsjan juc'ant poderchizqui. Niižquiz atintisjapa anal waquisuča, niiž čhjata jeržcu chjojkinimi. Inakaztča wejrqui.

¹² Ančucqui trigo zkalažtakazza. Nii tjoñi jiliričiqi trigonaca kjojaquiča. Nekztan itzanacami zuma trigumi pjalznaquiča. Nii zuma triguqui ricujtaž cjequiča. Niiž persun kjuyquin majtaž cjequiča. Nii itzanacazti liwj ujtaž cjequiča, ana wira tjesñi ujquiz. Jalla nižta irataž ančucaquiz wataquiča.

JESUSAQUI BAUTISTATAČHA

¹³ Niiž wiruñaqi Jesusaqui Galilea yokquiztan Jordán cjita pujquin ojkchiča, jakz-iquint Juan želatčaja, jalla nicju. Bautiskatzjapa Juanžquin ojkchiča.

¹⁴ Jesusiž irantitan, Juanqui ana nii bautis pecatča. Jalla tuž cjichiča:

—Amž wejr bautis waquiziča. ¿Am wejtquiz tjonkaya? ¿Weriž bautista cjisjapaya? —Jalla nuž cjichiča Juanqui.

¹⁵ Nekztan Jesusaqui kjaaziča, tuž cjican:

—Anzikam wejr bautisaquiča. Yooz mantitacama liwj cumplis waquiziča učumqui. —Jalla nuž kjaaztiquiztan Juanqui “iyaw” cjichiča.

¹⁶ Nekztanaqui Juanqui Jesusa bautissiča. Kjazquiztan ulnan, nii orapacha arajpacha cjetziča. Nekztan Jesusaqui cherziča Yooz Espiritu Santo palomažtakaz chjiwžquiñi. Jalla niiž juntuñpacha Espiritu Santuqui irantižquičiča.

¹⁷ Nekztanaqui arajpachquiztan tsjii jora paljayžquiñi nonziča, jalla tuž cjiñi:

—Tiiča wejt ultim k'ayi Maatiqui. Tiiž cjen ancha cuntintuča wejrqui. —Jalla nuž cjichiča nii tsewctan chiižquiñi joraqui.

4

JESUSAQUI DIABLUZ YANZTA

¹ Jalla nekztanaqui Jesusaqui Jordán cjita pujquiztan ojkchiča. Nuž okan, Espiritu Santuqui Jesusa chjitchiča ch'ekti yokquin, Satanás diabluž yanzta cjisjapa. Satananasqui Jesusa ujquiz tjojtskatz pecatča.

² Jalla nijwc žejlcan, Jesusaqui pusi tunc tjuñi pusi tunc arama ana čhjeri lujlchiča. Jalla nii pusi tunc tjuñi wattiquiztan ancha čhjeri eecskatchiča.

³ Jalla nekztanaqui diabluqui Jesusižquiz macjatchiča ujquiz tjojtskatz yanzjapa. Jalla tuž cjichiča:

–Amqui ultim Yooz Maatimžlaj niiqui, tii maznacquiztan t'anta tuckatalla.

⁴ Jesusaqui kjaaziča, tuž cjican:

–Cjijrta Yooz takuqui tuž cjiča: “Zoñinacaqui anaž čhjeržtan alaja žetasača. Yooz takuča chekanaqui, jalla niiča ultim čhjerižtakazqui”. Jalla nuž kjaaziča Jesusaqui.

⁵ Jalla nekztanaqui diabluqui Jesusa chjitchiča Jerusalén, Yooz illzta chawjc watja. Jalla nicju timplu tsewcta pjurniguin yawkatchiča.

⁶ Nekztan diabluqui cjichiča:

–Cjijrta Yooz takuqui tuž cjiča:

“Yooz Ejpqui niiz anjilanaca mantaquiča am cwitajo. Ninacž persun kjaržtan am cwitaquiča, ana am kjojcha chjojričta cjeyajo mazquizimi”.

Jazic, ultim Yooz Maatimžlaj niiqui, tsewctan kozzuc tii yokquiz layzca. –Jalla nuž cjichiča nii diabluqui.

⁷ Nekztanaqui Jesusaqui kjaaziča tuž cjican:

–Cjijrta Yooz takuqui zakaz cjiča: “Zoñiqui ultim arajpach Yooz ana inakaz nuž yanznaquiča”. Jalla nuž cjijrtača.

⁸ Jalla nekztanaqui wilta ujquiz tjojtskatz yanzjapa, diabluqui Jesusa chjitchiča pajk cur puntiquin. Jalla niwjc chjitzcu, diabluqui tjapa tii muntuquiz žejlñi nacionanaca nižaza tjapa ninacž cusasanacžtanpacha, nižaza tjapa ninacž honoranacžtanpacha jalla ninaca diabluqui Jesusižquiz tjeeziča.

⁹ Nekztan nii diabluqui cjichiča:

–Tjapa tinaca amquiz tjaasača, wejtquizim quillzaja, nižaza wejr rispitchaja, niiqui.

¹⁰ Jalla nižtiquiztan Jesusaqui kjaaziča, tuž cjican:

–Satanás, wejtquiztan zaraka amqui. Cjijrta Yooz takuqui tuž cjiča: Yooz Jiliržquinkaz rispita, nižaza nii alaja sirwa. Niikazza am Yooz Jiliriqui.

¹¹ Jalla nuž Jesusiž chiitiquiztan diabluqui Jesusižquiztan zarakchiča. Nekztan tsjii kjaž anjilanacaqui Jesusižquin atinti tjonchiča.

JESUSAQUI GALILEA YOKQUIN OJKCHICHA

¹² Niiz wiruñaquí Jesusaqui quintu nonchiča, Juan carsilquiztača, jalla nii. Jalla nii quintu nonžcu, Galilea yokquin ojkchiča.

¹³ Pero Nazaret wajtquin ana kamchiča; antis Capernaum wajtquin kami ojkchiča. Capernaum watjaqui kot atquiztača, Zabulón yokquin nižaza Neftalí yokquintača.

¹⁴ Jalla nuž ojktiquiztan Isaías profetaž cjijrta taku cumplissiča.

¹⁵ Jalla tuž cjijrchiča Isaías profetaqui:

“Zabulón, nižaza Neftalí, am yokaqui kot atquizza, nižaza jiczquizza Jordanquiztan tuwanchuc. Nižaza Galilea yokquinča. Jalla nii Galiliiquinaqui yekja wajtchiz žoñinacaž kamča.

¹⁶ Am yokquin žejlñi žoñinacaqui zumchiquiz kamča, ana zuma kamañquiz. Ninacaqui tsjii žoñi cheraquiča. Nii žoñiqui zuma kamaña tjeeznaquiča, zuma kjanažtakaz. Ticzi žoñinacažtakaz kamča; anaž Yooz kamaña zizza. Pero kjanapachaž Yooz zuma kamaña tjeezta cjequiča.”

¹⁷ Jalla nekztanaqui Jesusaqui Yooz puntu kjanzt'i kallantichiča, tuž cjican:

–Kuznaca campiya. Arajpach Yooz waj mantaquiča. Jalla nii timpuqui žcatžinžquiča. –Jalla nuž paljaychiča.

PAJKPIC CH'IZ TANŃI ZOŃINACA JESUSIZ KJAWZTA

¹⁸ Jesusaqui Galilea cjita kot at tjiyaranž okatča. Jalla nuž ojkcán pucultán jilazullca zoñinaca cherchiča. Tsjiiqui Simón cjitatača, nižaza Pedro cjitazakaztača. Tsjiiqui Andrés cjitatača. Jalla ninacaqui ch'iz tanñinacatača. Nii oraqui ninacaqui ch'iz tanz kjazquiz tjojtsi želatča.

¹⁹ Jalla ninaczquiz Jesusaqui tuž cjican paljaychiča:

—Wejttan chica ojklayñi cjee. Jaknuž ch'iz juntichamžlaja, jalla nižta irata ančhucqui Yooztajapa zoñinaca juntaquiča.

²⁰ Jalla nuž chiitiquiztan nii pucultán zoñinacaqui nii orapacha ch'iz tanz eccu, Jesusižtan chica ojklaychiča.

²¹ Jalla nekztanaqui tsjii koloculla najwajapa ojkcžu Jesusaqui tsjii pucultán jilazullca zoñinaca cherchizakazza. Tsjiiqui Jacobo cjitatača. Tsjiiqui Juan cjitatača. Zebedeož majhtača. Niiž ejpžtanpacha warcuquiz želatča, ch'iz tanz azquichcan. Jalla nii cheržcu, Jesusaqui ninaca kjawziča.

²² Nekztan nii orapacha warcumi niiž ejpmi eccu, Jesusižtan chica ojklaychiča.

ZOÑINACA JESUSA APZA

²³ Tjapa nii Galilea cjita yokaran ojklaychiča, zapa ajcz kjuyquiz Yooz puntu tjaa-jincan. Nižaza paljaychiča, Yooziž mantita zoñinacaž cjee, cjican. Nižaza tjapaman laanaca čhjetinchiča.

²⁴ Jesusiž ojklayta, jalla nii quintuqui tjapa Siria yokquin ojkičiča. Jalla nižtiquiztan, tjapaman conchiz zoñinacami, nižaza tjapaman laa ayiñi zoñinacami, nižaza zajraž tanta zoñinacami, nižaza t'ucur zoñinacami, nižaza ana ojklayi atñi zuch zoñinacami, tjapaman laanaca Jesusižquin chjitzatača. Nekztanaqui Jesusaqui nii laanaca čhjetinchiča.

²⁵ Galilea zoñinacaqui niižquin walja apžquichiča, nižaza Decápolis watjanacquiztan zoñinacami, nižaza Jerusalén wajtquiztan zoñinacami, nižaza Judea yokanacquiztan zoñinacami, nižaza Jordán pužž tuwanchuctan zoñinacami. Tjapa nii zoñinacami jalla nuž Jesusa apziča.

5

JECNACAT CUNTINTU ZOÑINACA

¹ Walja tama zoñinaca cheržcu, Jesusaqui tsjii kolta curulla yawchiča. Jalla nekztan nii curullquin julziča. Nižaza niiž kjawžta zoñinacaqui niiž muytata ajcziča.

² Jalla nekztan Jesusaqui ninaczquiz tjaañi kallantichiča, tuž cjican:

³ —Jecnacat “wejrqui ujchizpanča” cjican persun kuzquiz sint'ichaja, jalla ninacaž Yooz wajtchiz zoñinaca cjequiča. Nekztanqui cuntintuž cjequiča.

⁴ Jecnacat persun ujquiztan llaquita žejlčhaja, jalla ninaczquiz Yoozqui kuznaquiča. Nekztan cuntintuž cjequiča ninacaqui.

⁵ Jecnacat humilde kuzziz cječhaja, jalla ninaczquiz Yoozqui irinsaž tjaaquiča, ew yoka. Nekztan cuntintuž cjequiča.

⁶ Jecnacat Yooz kuzcamakaz kamz ancha pecčhaja, jalla ninaczquiz Yoozpanž zuma kamzjapa yanapaquiča. Nekztan cuntintuž cjequiča.

⁷ Jecnacat parti zoñinacžtajapa oksñi kuzziz cječhaja, jalla ninaczquiz Yoozqui zakaz oksnaquiča. Nekztan cuntintuž cjequiča.

⁸ Jecnacat ancha zuma kuzziz cječhaja, jalla ninacaqui Yooz cheraquiča. Nekztan cuntintuž cjequiča.

⁹ Jecnacat pasinsis kuzziz kamñi cječhaja, jalla ninacaqui Yooz maati cjitaž cjequiča. Nekztan cuntintuž cjequiča.

¹⁰ Jecnacat Yooz kuzcama kamtiquiztan chjaawjta sufrachaja, jalla ninacaž Yooz wajtchiz zoñinaca cjequiča. Nekztan cuntintuž cjequiča.

¹¹ Jecnacat weriž cjen zoñinacaž chjaawjta cječhaja, nižaza kijchta cječhaja, nižaza tjapaman toscar tawkžtan quintra ch'aanita cječhaja, jalla ninacami cuntintuž cjequiča.

¹² Jecnacat weriž cjen jalla nižtanaca sufrichi cječhaja, jalla ninaczquiz Yoozqui arajpachquin wali pajk honora tjaaquiča. Jalla nižtiquiztan tii muntuquiz kamcan, cuntintukaž cjee. Ančhucqui cjuñzna. Yooz cuntiquiztan chiiñi profetanacaqui nižta zakaz sufrichiča tuqui timpuquiztanpacha.

CRIICHINACZ PUNTU

¹³ Jesusaqui tjaaajinchizakazza:

—Ančhucqui tii muntuquiz kamcan yacu cuntažtakazza, parti zoñinacžtajapa. Pero yacuqui lak'až cjesaž niiqui, ¿kjažpant wilta walipan cjisnasajo? Anapanž cjesača. Nekztan anaž čjuljapami sirwasača; tjojtapanž cjesača; nekztan zoñinacaž tjecžtaž cjequiča.

¹⁴ 'Ančhucqui tii muntuquiz kamcan, parti zoñinacžtajapa kjana cuntažtakaz cjesača, zuma kamaña zizajo. Tsjii curquiz kjuyta watjaqui, ana chjojžta cjesača.

¹⁵ Tsjii lamparaqui tjeežtaž cječhaj niiqui, anapanž cajón koztan nonžta cjesača. Lamparaqui tjeežtaž cječhaj niiqui, tsewc tsijiptapanž cjesača, tjapa nii kjuyquiz žejlñi zoñinacžtajapa kjanajo.

¹⁶ Jalla nuž ančhucqui lamparažtakaz cjee, zoñinacžtajapaqui. Kjanapacha zuma kamañchiz cjee. Nekztan zoñinacaqui ančuca zuma kamaña cheržcu, ančuca arajpach Yooz Ejpžquin honora tjaaquiča.

LII PUNTU

¹⁷ Jesusaqui tjaaajinchizakazza:

—Wejrqui ana tjonchinča Moisés lii tjatanskatzjapa, nižaza profetanacaž tjaaajintanaca tjatanskatzjapami. Jalla nižta anaž pinsa ančhucqui. Wejrqui ana tjonchinča nii tuquita Yooz tjaaajintanaca tjatñiqui; antis tjonchinča cumpliskatzjapa.

¹⁸ Weraral chiižinuča. Tuquita Yooziž tjaata liiquiztan tjapa puntumi tjapa letrami anaž tjatanta cjequiča, tjappacha cumpliscama. Ima tii muntumi arajpachami tučužinžnan, nii liiqui anapanž tjatantaž cjequiča.

¹⁹ Jalla nižtiquiztan jequit tuquita Yooziž tjaata liiquiztan tsjii mantita, kolta lii cjenami, ana pajz pecčhaj niiqui, nižaza yekjap zoñinaczquiz nižtapacha tjaaajinchaja, jalla nii zoñiqui arajpach Yooz wajtquin anaž čjul honorchiz cjequiča. Pero jequit nii tuquita lii mantita cazačhaja, nižaza yekjap zoñinaczquiz nižtapacha tjaaajinchaja, jalla nii zoñiqui arajpach Yooz wajtquin chekan honorchiz zoñiž cjequiča.

²⁰ Ančucaquiz wejr chiižinuča. Lii tjaaajiñi maestruncami, nižaza fariseo zoñinacami žejlča. Pero ančhucqui ninaczquiztan anaž juc'anti Yooz mantitacama kamačhaj niiqui, anapanž arajpach Yooz wajtquin luzasača. Yooz mantitacama kamstanča, arajpach Yooz wajtquin luzjapa.

ZAWJZ PUNTU

²¹ Jesusaqui tjaaajinchizakazza:

—Ančhucqui tuquita atchi ejpnaczquiztan tuž nonzinčhucča. Ninacaqui cjiñitača, tuž cjican: “Anača zoñi conzqui. Jequit zoñi conačhaja, niiqui juzjitaž cjequiča”.

²² Pero wejr chiižinuča, jequit tsjii jilžjapa žawjwačhaj niiqui, jusjitaž cjequiča. Nižaza jequit tsjii jilžtan ch'aačhaj niiqui, Junta Suprema cjita chawjc jilirinacaž jusjitaž cjequiča. Nižaza jequit tsjii jilžquiz “ana zumamča” cjican ch'aančhaj niiqui, infiernuquin chjatkattaž cjequiča.

²³ Nižaza tii puntu zakal cjeeča. Jequit niž ofrenda Yooz yujcquin chjichačhaj niiqui, nižaza chjichcu niž jilžtan quintra tanasta cjuñsnačhaj niiqui,

²⁴ Jalla nekztan ima ofrenda tjaacan, nii timpluquizpacha ecla. Nekztanaqui niiz jilžquin pertuna mayiza ojkla. Niižtan jilžtan walikaz cjila. Jalla nekztanaqui timpluquin quejpžcu, ofrenda Yoozquin tjaasača.

²⁵ Jequit am quintra quijchi cječhaj niiqui, nižaza jilirž kjuya chjichačhaj niiqui, jalla nii quijchi žoňžquiz pertunam mayizaquiča ana enenzcu, ima jilirž kjuya irantican. Pertunazta cjequiž niiqui, anam juez jiliržquin intirjita cjequiča jusjita cjisjapa. Amqui ultimpacha juez jiliržquin intirjita cjesaž niiqui, nii juez jiliri qui am tsjii policiiquin zakaz intirjasača; carsilquiz chawjcta cjesača.

²⁶ Weraral chiižinuča. Carsilquiz chawjctam cjesaž niiqui, anam ulanasača, liwj pacañcama.

ADULTERIO PUNTU

²⁷ Jesusaqui tjaajinchizakazza:

—Ančhucqui tuqita atchi ejpnacžquiztan tuž nonzinčhucča: “Anača adulteriquiz ojklayzqui”.

²⁸ Pero wejrqui tuž chiižinuča, jakzilta luctakat yekja maataka “wejt maatakaj cjejaa” cjican pinsičhaja, jalla niiqui persun kuzquiz niwjctanaqui adulterio paachizakazza Yooz yujcquiziqui.

²⁹ Am žew latu čhujquiqui ujquiz tjojtskatčhaj niiqui, nii čhujqui leczna, nižaza nawjk tjojtta. Jalla nuž tsjii čhujquiqui pertissi cjenaqui am parti curpuqui ana infiernuquin tjojtta cjesača. Jalla nuž waliž cjesača.

³⁰ Nižaza am žew kjaraqui ujquiz tjojtskatčhaj niiqui, nii kjara pootzna, nižaza nawjk tjojtta. Jalla nuž tsjii kjaraqui pertissi cjenaqui am parti curpuqui ana infiernuquin tjojtta cjesača. Jalla nuž waliž cjesača.

TJUNATAN JALJTIS PUNTU

³¹ Jesusaqui tjaajinchizakazza:

—Ančuca tuqita atchi ejpnacaqui tuž cjiñitača: “Jecmiž niiz persun tjunatan jaljtasaž niiqui, primiruqui tsjii ultim jaljtita cjiřta papel certificado tjaasa”.

³² Pero wejrqui tuž chiižinuča, jakziltamiž persun tjunatan jaljtasaž niiqui, nižaza ana čjul adulterio motivo želan, jalla niwjctanaqui naa ultimu jaljtita tjunqui adulterio cjiskatasača. Nižaza jakziltami naa ultimu jaljtita tjunatan zalznačhaj niiqui, adulterio ujpnaž paača.

JURAMENTO PUNTU

³³ Jesusaqui tjaajinchizakazza:

—Nižaza ančhucqui tuqita atchi ejpnacžquiztan tuž nonzinčhucča: “Anača toscar tawkžtan juramento paazqui. Juramento paaquiž niiqui, tjapa nii juramentužtan compromitta takupanž cumplisnaquiča Yooz yujcquiziqui”.

³⁴ Pero wejrqui tuž chiižinuča, anaž čjulquiztanami juramento paasača, werara chiižpanča. Nižaza anača “arajpacha zizza” cjican juramento paazqui. Yooztajapača arajpachaqui.

³⁵ Nižaza anača “tii yoka zizza” cjican juramento paazqui. Yooztajapača tii yokaqui. Nižaza Jerusalén wajtž tjuu aynakan anača juramento paazqui. Chawjc Yooz Jiliržtajapača nii watjaqui.

³⁶ Nižaza anača “wejt persun acha zizza” cjican juramento paazqui. Amqui anam zinta tsok charquiztan chiw charquin tuckatasača. Nižaza anam zinta chiw charquiztan tsok charquin tuckatasača.

³⁷ Jalla nižtiquiztan, “Jesalla” cjicanaqui, “Jesalla” cjispanča; nižaza “Anaž” cjicanaqui, “Anaž” cjispanča. Zajra diabluz cjen juramento paazqui žejlča.

ANA WALI TJEPUNTA PUNTU

³⁸ Jesusaqui tjaajinchizakazza:

—Ančhucqui tuquta atchi ejpnacžquiztan tuž nonzinčhucča: “Tsjii žoñiqui yekja žoñž čhujqui pjatžinasacča, nekztan nii pjatñi žoñž čhujqui pjatžintazakaz cjesacča. Nižaza tsjii iżke chjatkatžinasadž niiqui, nii chjatkatñi žoñž iżke chjatkatžintazakaz cjesacča”.

³⁹ Pero wejr chiižinuča, anača kijtzñi žoñiqui nižtapacha kijtzqui. Nižaza am quintra tsjii yujc latu kijchasaž niiqui, kijchta cjiskazza, tsjii yujc latužtanpachami.

⁴⁰ Nižaza jakziltamiž am tanžcu am almilla kjanž pecčhaj niiqui, kjañaj cjiskazza, irztanpachami.

⁴¹ Jakziltamiž niiz kuzi tsjii tupucama, amquiz chjitskatasadž niiqui, juc'anti tupucama chjichna.

⁴² Jakziltamiž amquiztan mayasaž niiqui, tjaa amqui. Nižaza jakziltamiž amquiztan tomzñi tjonasaž niiqui, onzna amqui.

QUINTRA ŽOÑINACŽTANAMI ZUMA MUNAZIZA

⁴³ Jesusaqui tjaaajinchizakazza:

—Nižaza ančhucqui tuquta atchi ejpnacžquiztan tuž nonzinčhucča: “Mazinacžtan zuma munaziza. Nižaza am quintra žoñinacžtan chjaawjkata”.

⁴⁴ Pero wejr chiižinuča, am quintra žoñinacžtanami zuma munaziza. Nižaza am quintra laykiñi žoñinacžtajapa zuma kuztan Yoozquiztan maynaquiča. Nižaza am quintra chjaawjkatñi žoñinacžquin zumapan paa. Nižaza am quintra ch'aañinacžquinami kichñinacžquinami zumapan Yoozquiztan mayt'ižina.

⁴⁵ Jalla nuž zuma kamcan ančhucqui tjeeža, arajpach Yooz Ejpž maatičhucča, nii. Yoozqui zuma žoñinacžquizimi ana zuma žoñinacžquizimi liwj tsjiikaz niiz paata tjuñi tewkkatča. Nižaza niiz kuzcama kamñinacžquizimi nižaza ana niiz kuzcama kamñinacžquizimi tjapa ninacžquiz chijñi apayžquiča.

⁴⁶ Ančhucqui persun okzñi žoñinacžquizkaz okznaquiž niiqui, jalla nuž paatiquiztan ¿chjul premio Yoozquiztan tanznaquejo? Jalla nižtazakaz kamča ana wali impuesto cobriñinacami.

⁴⁷ Nižaza ančhucqui persun jilanacžquizkaz tsaanaquiž niiqui, jalla nijwctan ¿chjul zumaž ančhuc paaajo? Jalla nižtazakaz paača ana Yooz pajñinacami.

⁴⁸ Ančhucqui walja zuma kuzziz kama, jaknužt ančhuc arajpach Yooz Ejp walja zuma kuzzizpančhalaja, jalla nuž.

6

ZUMA KAMZ PUNTU

¹ Jesusaqui tjaaajinchizakazza:

—Ančhucqui anača persunpacha honorchizkaz cjis peczqui. Anača žoñinacž yujcquiz ančuca Yooz custurumpinaca paazqui, žoñinacžquiztan honorchiz cjisjapa. Ančhucž jalla nuž persun honorchizkaz cjis pecaquiž niiqui, nii honorchiz kaz cjequiča. Ančuca arajpach Yooz Ejpqui ana iya honora tjaaquiča.

² Ana zum kuzziz žoñinacaqui t'akjir žoñinacžquiz onanžcu žoñi žoñinacžquin mazmazñiča, “onanchinča” nuž cjicanaqui. Ajcz kjuyaranami calliranami jalla nižta paañiča, žoñinacaž ninacžjapa zuma chiyajo. Pero wejrqui weraral chiižinuča. Jalla nižta paañi žoñinacaqui nii honorchizkaz cjequiča. Ančhucqui anača nižta iratapacha kama.

³ Ančhuczti t'akjir žoñinacžquiz onanžcu, jalla nii ančuca onantaqui anaž jeczquizimi mazmaznaquiča, “onanchinča”, cjicanaqui.

⁴ Nižaza t'akjir žoñinacžquiz jamazit onaquiča. Aunquimi ančucaž jamazit paachiž cjenami, ančuca Yooz Ejpqui cherča. Jalla nuž cheržcu ančucaquiz kjanacama honora tjaaquiča, tsjii premiužtakaz.

MAYIZIZ PUNTU

⁵ Nižaza nii ana zum kuzziz žoñinacaqui Yoozquin mayizican jalla tuž jutzazñiča. Ajcz kjuyquizimi call isquiquizimi tsijtchi Yoozquin mayiziñiča, tjapa žoñinaca cherajo. Wejrqui weraral chiižinuča, jalla nuž paažcu ninacaqui nii honorchizkaz cjequiča. Ančhucqui anača nižta irata mayizizqui.

⁶ Ančhuczti Yooz Ejpžquin mayizizjapaqui, kjuyquiz luz waquiziča, nižaza kjuy chawjcz waquiziča. Jalla nekztan ančuca Yooz Ejpžquin mayizasacha. Jalla nuž zinalla mayizan ančhucatan chicaž cjequiča Yooz Ejpqui. Jalla nuž jamazit mayizitiqiztan Yooz Ejpqui ančucaquiz honora tjaaquiča, tsjii premiužtakaz.

⁷ Yoozquin mayizcan, anača wiltan wiltan takunaca quejpžcu quejpžcu mayizizaqui. Jalla nuž mayizaquiž niiqui, inapanikazza. Jalla nižtaž mayizza ana Yooz pajñi žoñinacaqui. Jalla nuž wacchi chiican mayizitiqiztan “nonznaqueeka Yoozqui” cjican.

⁸ Jalla nižta anaž ančhuc cjeella. Ančuca Yooz Ejpqui zizza, čhjulut ančhuc pecčhaja, jalla nii. Ima ančucaž mayizan, panž zizza Yooz Ejpqui.

⁹ Jaziqui ančhucqui jalla tuž mayizaquiča:

“Yooz Tata, amqui arajpachquin žejlča. Am tjuu honorchiz aptitaj cjilalla.

¹⁰ Nižaza am mantiz timpu tjonchej cjilalla. Nižaza tii muntuquiz žejlñi žoñinacaqui am kuzcamaj kamlalla. Jaknužt am kuzcama kamčhaja arajpachquin žejlñinaca, jalla nižta.

¹¹ Nižaza tonjiqui čhjeri tjaažcalla čhjeržtan kamzjapa.

¹² Nižaza wejtnacaž paata ujnaca pertunalla, jaknužt wejrnacqui wejtnaca quintra paañi pertunučhaja, jalla nižaza.

¹³ Nižaza anaž anawalinacžquiz tjojtskatalla, antis anawalinacquiztanž liwriyalla. Amča wiñaya juc'ant mantiñamqui, nižaza amča wiñaya juc'ant azzizqui, nižaza amča wiñaya juc'ant honorchizqui. Jalla nužoj cjila. Amén.”

¹⁴ Ančuca quintra paañinacžquiz pertunaquiča. Nekztan Yooz Ejp zakaz ančuca ujnaca pertunaquiča.

¹⁵ Ančuca quintra paañinacžquiz ana pertunaquiž niiqui, nekztan ana zakaz Yooz Ejpqui ančuca ujnaca pertunaquiča.

AYUNAS PUNTU

¹⁶ –Ančhucqui ayunascan anaž llaquit chercherchiz cjee. Ana zum kuzziz žoñinacaqui llaquit chercherchiz ayunasñiča, žoñinaca ninaca ayunasñi cherajo. Wejrqui weraral chiižinuča, jalla nuž paatiquiztan ninacaqui inapanikaz cjequiča.

¹⁷ Ančhuczti ayunascanaqui zumpacha yujcmiž awjzna, nižaza zumpacha achami čhjijczna,

¹⁸ žoñinaca ančhuc ayunasñi ana nayajo. Yooz Ejpqui ana cherta cjenaqui tjappacha cherča, jamazit paatami. Yooz Ejpqui ančucaquiz zuma honoraž tjaaquiča, tsjii premiužtakaz.

CUSASANAC PUNTU

¹⁹ Jesusaqui tjaajinchizakazza:

–Tii muntuquiz kamcanaqui anača muzpa cusasanaca juntizqui. Kjurinacakaz ančuca juntita cusasanaca lulaquiča. Nižaza parti ančuca juntita cusasanaca inapankaz chjijtaquiča. Nižaza tjañiqui kjuyaž luzasača, ančuca cusasanaca tjangzjapa.

²⁰ Nonžna, arajpachquin muzpa cusasanaca juntaquiča. Arajpachquin cusasanaca lujlñimi, nižaza cusasanaca akziñimi, nižaza cusasanaca tjangziñimi ana žejlča.

²¹ Jakziquizt ančuca cusasanaca juntita žejlčhaja, jalla nicjukaž ančhuc kuz tjaača.

ZUMA KAMAÑCHIZ, ANA ZUMA KAMAÑCHIZ PUNTU

²² Jesusaqui tjaajinchizakazza:

—Zoňž čhjujquiqui persun curpuž lamparažtakazza. Jaziqui zoňž čhjujqui zuma cjequiz niiqui, zuma cheraquičha. Jalla nižtakaz zoňž kuzqui zuma cjequiz niiqui, zuma kamaquičha.

²³ Zoňž čhjujquizti ana zuma cjequiz niiqui, zumchiquiztakaz ojklayaquičha. Ančuca kamaña zumchiquiz panž cjequiz niiqui, juc'anti juc'anti zumchiquiz cjisnaquičha. Nekztan ĵaknužt zuma kamasajo?

PAAZ PUNTU

²⁴ Jesusaqui tjaajinchizakazza:

—Anaž jakziltami pizc patruna sirwasačha. Pizc patrunchiz cjesaž niiqui, tsjii patrunchiz ana pectaž cjesačha. Tsjii patrunchiz pectaž cjesačha. Tsjii patrunchizkaz zuma sirwasačha. Jalla nižtiquiztan Yoozquiz sirwican anaž ancha paazquiz kuz tjaasačha. Nižaza paazquiz kuz tjaaquiz niiqui, anaž Yoozquin ancha kuzziz cjesačha.

YOOZ EJPQUI NIIZ MAATINACA CWITICHA

²⁵ Jesusaqui tjaajinchizakazza:

—Ančucaquiz tuž chiižinučha, žejtzjapaqui kjaz liczmi lujlz čhjerimi pecčha. Jalla nuž cjenami ančucqui anačha kuzquizic čhjerquiztan llaquita cjisqui. Nižaza curpu wali cjisjapa zquiti pecčha. Jalla nuž cjenami ančucqui anačha zquitquiztan llaquita cjisqui. Čjul čhjerquiztanami zoňž žetiž juc'anti importičha. Nižaza čjul zquitquiztanami persun curpuž juc'anti importičha.

²⁶ Laylayni wežlanacaž chernza. Jalla nii wežlanacaqui ana zkalami čhjacačha, nižaza ana zkalquiztanami ricujčha, nižaza ana čhjeri yaaz zquitchizza. Jalla nuž cjenami ančuca arajpach Yooz Ejpqui wežlanaczquiz čhjeri tjaačha. Yooz yujcquiziqui ančucqui čjul wežlanacquiztanami juc'antiž importičha.

²⁷ Anaž jec kolta zoňimi persunpacha tsjan lajcha paki atasacna, llaquiziñi kuzziz cjenami ancha lajcha pecni kuzziz cjenami.

²⁸ ‘ĵKjažtiquiztan ančucqui zquitquiztankaz llaquit kuzziz cjesajo? Plantanacz pajkjallaž chernza, jaknužt pajkčhaja, jalla nii. Ninacaqui anaž langza, nižaza anaž kawančha.

²⁹ Jalla nuž cjenami nii pajkjallanacaqui ancha c'achjallačha. Finu zquiti cujtžcumi ricachu Salomón cjita jiliriqui anaž juc'ant c'achja nii pajkjallanaczquiztanami.

³⁰ Plantanacaqui tsjii upacamakaz žejlčha. Nekztanaqui jakatažu kattažu jurnuquiz tjutjunzjapa ujžtačha. Jalla nižta cjenami Yooz Ejppacha nii plantanaca cwitičha. Ančucqui čjul plantaquiztanami juc'antipanž importičha. Jalla nižtiquiztan Yoozqui ančuc juc'ant cwitičha, Yoozquin ana tjapa kuzziz cjenami.

³¹ Jalla nižtiquiztan ančucqui anačha llaquita kuzziz cjisqui, čjul čhjerquiztanami, nižaza kjaz liczquiztanami, nižaza čjul zquitquiztanami.

³² Ana criichi zoñinacaqui tii muntu cucasanaczquin kuzziz ojklayčha. Ančuczti ana nižta kuzziz cjeella. Ančucačha arajpach Yooz Ejpchizqui. Čjultakičha ančucqui pecchaj niiqui, liwj zizza Yooz Ejpqui.

³³ Jalla nižtiquiztan Yooz Ejpžquinpankaz walja kuzziz cjee. Nižaza niž mantita zuma kamañquiz kuzziz cjee. Jalla nekztanaqui ančucaltaqui cawalikaz cjequičha čjulumi.

³⁴ Jakatan čjulut anawalinaca watačhaj niiqui, jalla nii ana juyzu paa tonjiqui. Jakaqui čjulut watačhaj niiqui, jakapachaž jaknužquinami wataquičha. Zapuru čjul anawalinacaqui žejlñipančha.

7

ZOÑINACŽTAN ZUMA KAMA

¹ Jesusaqui tjaajinchizakazza:

—Ančucalaqui anačha zoñinacz uj chii chiizqui. Jalla nuž zoñinacz uj chii chiyauiz niiqui ančucqui juc'ant ujchiz cjequičha Yooz yujcquiziqui.

² Nižaza žoñinacžquizimi “Amqui Yooziž castictaj cjila”, cjican chiyaquiž niiqui ančucqui Yooziž casticta zakaz cjequiča. Zoñinacžtan zuma kama. Nekztan Yooz Ejpqui ančucatan zumaž cjequiča.

³ Nižaza amqui am jilž čhjujcquiz tsjii cjujchilla cherasaž niiqui, ¿kjažtiquiztan am persun čhjujcquiz pajk cjujchi ana cherjo?

⁴ Am persun čhjujcquiz nii pajk cjujchi ana cherasaž niiqui, ¿kjažtiquižtan am jilžquiz chiijo, “Jila, am čhjujcquiztan cjujchilla apakžinača”, cjicanajo?

⁵ Ana zum kuzziz žoñimča amqui. Am persun čhjujcquiztan pajk cjujchi apakalla. Nekztan zuma cherasača, y nižaza am jilž čhjujcquiztan cjujchilla apakasača.

⁶ Yoozquin criichi žoñinaca, ančucqui Yooz taku anapan nonz pecñi žoñinacžtan Yooz puntu ana paljayaquiča. Ninacaqui pacunacažtakazza. Nižta žoñinacaqui ančucaltan ch'atñi pacužtakaz cjesača. Nižaza nii Yooz taku anapan nonz pecñi žoñinacaqui cuchinacažtakazza. Yooz puntu nonžcu, kuzquizkaz žawjča.

YOOZQUIN MAYIZIZQUI

⁷ Jesusaqui tjaajinchizakazza:

–Yooz Ejpžquiztan mayaquiž niiqui, Yooz Ejpqui tjaaquiča. Nižaza Yoozquin kjuraquiž niiqui, Yooz wachaquiča. Nižaza kjuy zanquiztan t'oc t'ocaquiž niiqui, cjetžintaž cjequiča.

⁸ Jequit mayačhaja, risiwaquiča. Nižaza jequit Yoozquin kjuračhaja, wachaquiča. Nižaza jequit kjuy zanquiztan t'oc t'ocačhaja, cjetžintaž cjequiča. Jalla nužučha Yoozquiz mayizizqui.

⁹ Anaž jakziltami ančuca majch t'anta mayanaqui maz chjalznasača.

¹⁰ Nižaza anaž jakziltami ančuca majch ch'iz mayanaqui zkora chjalznasača.

¹¹ Ančucqui ana zum kuzziz cjenami zuma cusasanaca tjayinčucčha persun maatinacžquiz. Jaziqui ančuca arajpach Yooz Ejpqui mayñi maatinacžquiz juc'ant zumaž tjaasača.

¹² Jaknužt ančucqui parti žoñinaca ančucatan zuma munaziz pecčhaj niiqui, jalla nižtapacha parti žoñinacžtan zuma munaziz waquiziča ančucqui. Jalla niipan Moisés liiquiz chiichiča, nižaza Yooz cuntiquiztan chiiñi profetanacaž cjiirtanacami.

ZKOZ JICZ, PAL JICZ

¹³ Jesusaqui tjaajinchizakazza:

–Yoozquin ojkz pecčhaj niiqui, zkoz zanquiztan luzza. Infiernuquin ojkñi jicz palača, nižaza pal zanchizza. Jalla nijwcchuc ojkñi žoñinacaqui muzpača.

¹⁴ Tsjiic zakaz žejlča. Arajpachquin ojkñi jicz zkozača, nižaza zkoz zanallchizza. Nižaza c'ujlcullača arajpachquin ojkñi jiczqui. Jalla nii jiczquinaqui koluckaz žoñi ojkča.

KAMAÑQUIZTAN PAJTA CJESACHA ŽOÑINACAQUI

¹⁵ Jesusaqui tjaajinchizakazza:

–Ančucqui zumpacha cwitasaquiča toscar taku chiichiiñi žoñinacžquiztanami. Jalla ninacaqui “Yooziž tjaata taku chiyučha” cjiñizakazza. Ninacaqui ančucaquiz tjonža, tsjii uuzi zkizi tjutžta kitižtakaz. Ninacž kuzqui anawira zumača.

¹⁶ Ninacž ana zuma kamañquiztan pajtaž cjequiča, ultimu ana zum žoñinacaqui. Tsjii ch'ap muntiqui uwas frutchiz anaž cjesača. Nižaza tsjii ch'ap plantaqui higo frutchiz anaž cjesača. Jalla nižtapanča ana zum kuzziz žoñinaca. Zuma kamañchizqui anapanž cjesača.

¹⁷ Tjapa zuma muntinacaqui zuma fruta pookñiča. Nižaza tjapa ana zuma muntinacaqui ana zuma fruta pookñiča.

¹⁸ Zuma muntiqui anapanž ana zuma frutchiz cjesača. Nižaza ana zuma muntiqui anapanž zuma frutchiz cjesača.

¹⁹ Jakzilta muntit zuma fruta ana pookzaja, k'atžtaž cjequičha nižaza ujtaž cjequičha.

²⁰ Jalla nižtanacquiztan ančhucqui ana zum kuzziz žoñinaca pajaquičha, ninacaž ana zuma kamañquiztan.

ANA YOOZ WAJTQUIN OJKŇI ZOŇI

²¹ Jesusaqui tjaajinchizakazza:

—Yekjap žoñinacaqui wejtquiz “wejt Jiliri, wejt Jiliri” paljayčha. Pero nuž chiicanami, anaž wejt arajpach Ejpž mantuquiz kamaquiž niiqui, anapanž arajpach wajtquin okasačha, nižaza anapanž arajpach Yooz Ejpž mantuquiz želasačha.

²² Ultim žoñi pjalz tjuñquiziqui wacchi žoñinacaqui wejtquiz paljayaquičha, tuž cjican: “Wejt Jiliri, wejt Jiliri, am tjuu aynakcan Yooz taku paljaychinčha, nižaza am tjuu chiican zajranaca chjatkatchinčha, nižaza am tjuu aynakcan wacchi milajrunaca paachinčha”. Jalla nuž cjican wejtquiz paljayaquičha.

²³ Jalla nuž paljaytiquiztanami wejrqui cjeečha, “Ančhuc anawira pajchinla pero. Wejtquiztan zaraka. Ančhucčha ana zuma paañinacaqui”.

PIZC PUNTA ZOŇINACAQUI

²⁴ Jesusaqui tjaajinchizakazza:

—Jakziltami weriž chiita taku nonžaja, nižaza weriž chiita tawk jaru kamčhaja, jalla niiqui zuma intintazñi žoñinacačha. Intintazñi žoñiqui jalla tužučha. Tsjii maz lum juntuñ kjuya kjuyčha.

²⁵ Nekztanaqui chijñi chijinchičha. Nekztan puj kjazqui walja tsijtchičha, nižaza pjatzičha, nižaza tjamiQUI walja tjamchičha nii kjuya quintra. Pero nii chijñimi, tjamimi, kjazmi ana nii maz juntuñ kjuyta kjuyaqui pali atchičha.

²⁶ Jaziqui jakziltami weriž chiita taku nonzcanpacha ana wejt tawk jaru kamčhaja, jalla niiqui zumzu žoñičha. Zumzu žoñiqui jalla tužučha. Ana zuma yokallquiz pjil yok juntuñ kjuya kjuychičha.

²⁷ Nekztanaqui chijñi chijinchičha. Jalla nekztan puj kjazqui walja tsijtchičha, nižaza pjatzičha, nižaza walja tjamchičha nii kjuya quintra. Jalla nekztanaqui nii pjil yok juntuñ kjuyta kjuyaqui muzpa tsucchuca pajlzičha.

²⁸ Jesusaž jalla nuž tjaajñi žeržtan, nonžñi žoñinacaqui walja ispantichičha niž tjaajintiquiztan.

²⁹ Jesusaqui walja zizñi zizñi tjaajinchičha. Li tjaajñi maestrunacaqui ana nižta tjaajñitačha.

8

MOJKCHI JANCHICHIZ LAA ZOŇI CHJETINTA

¹ Jalla nekztanaqui Jesusaqui curquiztan chjijwžquichičha. Nižaza muzpa žoñinaca apzičha.

² Tsjii mojkchi janchichiz laa žoñiqui Jesusižquiz macjatžquichičha. Jesusiž yujcquiz quillžcu, tuž cjichičha:

—Wejt Jiliri, tii laaquiztanž čhjetnalla. Am wejr čhjetinzim pecčhaj niiqui, wejr čhjetinzim atčha.

³ Jalla nekztanaqui Jesusaqui kjaržtan lanžcan, tuž cjichičha:

—Wejr am čhjetnasachiya. Chjetintam cjissa.

Jesusaž jalla nuž chiitiquiztan, nii mojkchi janchichiz žoñiqui laaquiztan žejtchi quirchičha.

⁴ Nekztanaqui Jesusaqui nižquin chiižinchičha, tuž cjican:

—Wejr am tsjii cjesačha. Jalla tii čhjetintiquiztanaqui anam jecžquizimi maznaquičha. Timpluquin oka. Jalla nicju timplu jiliržquin persunpacha tjeežca, žejtchi,

jalla nii. Nižaza Moisés mantita ofrenda tjaaquiča, tjapa žoñinaca zizajo, laaquiztan čhjetinta, jalla nii.

TSJII CHJETINTAQUI

⁵ Jalla nekztanaqui Jesusaqui Capernaum cjita watja luzziča. Jalla nuž luzan tsjii roman sultat capitán jiliri qui nižquin macjatžquichiča. Nekztanaqui roct'ichiča,

⁶ tuž cjican:

—Wejt Jiliri, kjuyquiz wejt piyuna ajpzquiz žejlča, ana tsijtñi. Nižaza walja ana wali ayińča.

⁷ Nekztanaqui Jesusaqui cjichiča:

—Nii čhjetñi okasača.

⁸ Nii sultat capitán jiliri qui kjaaziča, tuž cjican:

—Wejt Jiliri, anal wejt kjuyquiz am tjonžca cjiyi atasacha. Wejrqui amquiztan inakaztča. Jaziqui takukaz chiya čhjetinzjapa. Nekztan wejt piyunaqui čhjetinta cjequiča.

⁹ Wejrpacha wejt pajk jilirž mantuquiz želuča. Niiž mantitacama ojklayińča. Nižaza wejt mantuquiz sultatunaca žejlča, čhjulut wejr mantučhaja, jalla nuž cjen zultatunaca ojkča. Nižaza zultatu kjawznučhaja, zakaz tjonča. Nižaza wejt piyuna čhjulupaajumi mantučhaja, zakaz paača.

¹⁰ Jalla nuž nonžcu, Jesusaqui nii jiliri ancha zuma kuzziz naychiča. Nekztanaqui nuž nayžcu Jesusaqui niž apzñinaczquiz cjichiča:

—Wejrqui wereral cjiwča. Chekapan tii žoñiqui juc'ant Yoozquin kuzzizza, tjapa Israel wajtchiz žoñinaczquiztanami.

¹¹ Nižaza wejrqui cjiwča, tuwantan tajatan muzpa žoñinacaqui tjonaquiča, arajpach Yooz wajtquin luzjapa. Jalla nii Yooz wajtchiz žoñinacaqui Abrahamžtan, Isaacžtan, Jacobžtan, jalla ninacžtan juntupacha cuntintuž cjequiča.

¹² Israel žoñinacazti arajpach Yooz wajtquin žejlchucatača. Pero Yooz wajt zawntan zumchiquiz chjatkattaž cjequiča. Jalla nicjuž kaaquiča, nižaza iżke jojcan želaquiča.

¹³ Jalla nekztanaqui Jesusaqui capitán jiliržquiz tuž cjichiča:

—Am kjuya oka. Jaknužt am tjapa kuztan criičhaja, jalla nižtapachaž cjequiča.

Jalla nii orapacha niž piyunaqui žejtchi quirchiča.

ZOÑINACA CHJETINTA

¹⁴ Nekztanaqui Jesusaqui Pedruž kjuya ojkchiča. Jalla nicju ajpzquiz Pedruž ajmuž maa cherchiča ch'ujlñi conžtan laa cjichi.

¹⁵ Naaža kjara lanžinchiča. Nuž lanztiquiztan nii ch'ujlñi conquiztan žejtchinča. Nii orapacha žaažcu, ninaca atinti kallantichinča.

¹⁶ Nii čhjetinta quintu nonžcu tjuñiž kattan muzpa zajraž tanta žoñinaca Jesusižquiz zjičtatača. Jesusaqui tsjii taku chiižcu zajranaca chjatkatchiča. Nižaza tjapa laanaca čhjetinchiča.

¹⁷ Nii čhjetintanacaqui Isaías profetaž chiita taku cumplissiča. Isaiasqui cjiirchiča tuž cjican: “Tsji žoñiqui učum laa curpunaca tjupi cjiskataquiča, nižaza conanacquiztan učum čhjetnaquiča”.

JESUCRISTUZTAN CHICA OJKLAYZ PUNTU

¹⁸ Wiruńaqui tsjii noojiqui muzpa žoñinacaqui walja muytata Jesusižquiz ajcziča. Jalla nižta cheržcu, Jesusaqui mantichiča, kotž tsjii latuquiztan okajo.

¹⁹ Jalla nekztanaqui tsjii lii tjaažiñi maestruqui Jesusižquiz macjatžquichiča, tuž cjican:

—Tjaažiñi Maestro, jakzitchum okačhaja, amtan chicapachal ojklayasača.

²⁰ Jesusaqui nižquin kjaaziča, tuž cjican:

—Kitinacami kjuychizza. Nižaza wežlanacami tjurchizza. Wejrzi anal kjuychizza, tjazjapami.

²¹ Tsjiiqui nižquiz apzñi žoñinacžquiztan zakaz paljaychiča, tuž cjican:

—Wejt Jiliri, amtan chica ojklayasača. Pero wejt ejpča ticziqui. Nekztan iyal wejt ejp tjatsñi okaž cjeella.

²² Jesusaqui kjaaziča, tuž cjican:

—Wejttan chicaka am ojklaya. Ticzižtakaz žoñinacaqui, jalla ninacaj ticzinaca tjažlani.

JESUSAQUI TJAMIMI KJAZ LJOJKIMI MANTICHA

²³ Jalla nuž chiyžcu Jesusaqui warcuquiz luzziča. Niiž tjaajinta žoñinacaqui luzzizakazza.

²⁴ Ninacaž kotquiz okan, tjamiqiu walja tjamchiča. Jalla nuž tjaman kjaz ljojkiqui warcu tjananz pecatča. Jesusazti tjabatča.

²⁵ Nii kjaz ljojkiž cjen tjaajinta žoñinacaqui Jesusa žinchiča, tuž cjican:

—¡Wejt Jiliri! ¡Liwriyalla! Tii warcu kjazquiz julzmayača. Ticznačhani učumqui.

²⁶ Jesusaqui kjaaziča, tuž cjican:

—¿Kjažtiquiztan ančhucqui ancha tsuctsucjo? Ančhucqui anača wejtquin tjapa kuzziz.

Jalla nekztan Jesusaqui žaažcu, tjamimi kjaz ljojkimi ujziča. Jalla nuž chiitiquiztan tjamimi kjaz ljojkimi apaltichiča.

²⁷ Nii apaltiñi cheržcu nižtan ojklayñi žoñinacaqui ispantichiča, nižaza tuž cjichiča:

—¿Čhjul žoñit teejo? Tjamimi tii kot kjaz ljojkimiž tiiž chiita takukaz cazla.

ZAJRAZ TANTA ŽOÑINACA

²⁸ Nii kotž nawjctuñtan irantižcu, Jesusaqui Gadara cjita yokquin ulanchiča. Ulan-tan pucultan žoñinacaqui campu santuquiztan tjonchiča. Nii pucultan žoñinacaqui zajraž tantatača walja ana walinacatača, žoñinacžtan kichasñipanikaztača. Jalla nižtiquiztan nii jiczquiz ana jecmi ojklayñitača.

²⁹ Jesusižquiz macjatžcu nii zajranacaž tanta žoñinacaqui kjawchiča, tuž cjican:

—¿Kjažtiquiztan wejtnacaquiz mitisejo? Ima casticz timpu irantižcan amqui tekz tjonchamča, wejrnaca sufriskatzjapa. ¿Kjažtatajo? —Nuž cjican kjawchiča.

³⁰ Nižaza nii nawjkchuc cuchinacaqui ojklayča lujlcan.

³¹ Zajranacaqui Jesusižquiz rocchiča tuž cjican:

—Amqui wejrnaca chjatkataquiž niiqui, nii cuchinacžquin wejrnaca luzkatalla.

³² Jalla nekztanaqui Jesusaqui cjichiča:

—Nižtaqui, oka. Cuchinacžquin luzca.

Jalla nuž chiitiquiztan zajranacaqui žoñinacžquiztan ulanchiča; cuchinacžquin luzziča. Zajranacaž luztiquiztan cuchinacaqui tsjii barranc k'awquin tjojtsiča, kotquizpachatača. Jalla nužquiz kjaztan tsamžcu, ticziča nii cuchinacaqui.

³³ Jalla nii cuchi itzñinacaqui ancha tsucchi zajtchiča. Watja irantižcu, nii pucultan zajraž tanta žoñinacž puntuquiztan quint'ichiča, nižaza tjapa nižta watchinacami.

³⁴ Jalla nii quintu nonžcu tjapa nii wajtquiz žejlñi žoñinacaqui ulanchiča, jakziquin Jesusa želatčhaja, nicju. Jesusižtan zalžcu, ninacaqui rocchiča, ninacž yokquiztan okajo.

9

ZUCH ŽOÑI ČHJETINTA

¹ Jalla niiž wiruñpachaqui Jesusaqui wilta warcuquiz luzziča. Nekztan kotž tsjii latuquiztan kajkchiča. Nižaza niiž persun watja irantichiča.

² Jalla nijwc zoñinacaqui Jesusižquin tsjii zuch zoñi chjitchiĉha. Tjajz zquiti-nacžtanpacha ajpchi chjitchiĉha. Ninacž tjapa kuz cjicjiñi cheržcu, Jesusaqui laa zoñžquiz paljaychiĉha, tuž cjican:

–Jila, ana llaquisa; tjup kuzziz cjee. Am ujnacac pertuntaĉha.

³ Jalla nižta chiiñi nonžcu yekjap lii tjaajiñi maestrunacaqui kuzquiz tuž pinsichiĉha: “Yooz quintrala; tii zoñž takuqui anawalipanla”.

⁴ Pero Jesusaqui ninacž kuzquiz pinsita zizatĉha. Jalla nekztan ninacžquiz cjichiĉha:

–¿Kjažtiquiztan anĉhucqui nižta ana zuma pinsamintuchiztajo?

⁵ ¿Jakzilta takut pjasila chiiz cjesajo? ¿“Am ujnaca pertuntaĉha” chiiz pjasila cjesaya? Už ¿“Tsijsna, oka”, jalla nuž chiiz pjasila cjesaj?

⁶ Tsewctan cuchanžquita Yooz Zoñtĉha wejrqui. Tii muntuquiz jiliritĉha, ujnaca pertunzjapami. Razunal chiyuĉha. Nuž zizjapa, anĉhucqui tiiž chera.

Jalla nekztanaqui nii zuch zoñžquiz cjichiĉha:

–Tsijsna, am tjajz zquiti apta; nižaza am kjuya oka.

⁷ Jalla nii orapacha tsijsiĉha, nižaza niiž kjuya ojkchiĉha.

⁸ Zoñinaca nii cheržcu, tsucchi quirchiĉha, nižaza “Yoozqui honorchiz cjilalla” cjican chiichiĉha. Yoozqui zoñinacžquiz nižta ĉhjetinñi azi tjaachiž cjen, nuž chiichiĉha.

MATEO KJAWZTA

⁹ Nii kjuyquiztan ulanžcu Jesusaqui Mateo cjita zoñi cherchiĉha. Mateoqui impuesto cobriñi puestuquiz julzi želatĉha. Jesusaqui nižquiz cjichiĉha:

–Wejttan chica ojklaya.

Jalla nekztan Mateoqui tsijscu, Jesusižtan ojkchiĉha.

¹⁰ Niiž wiruñ Jesusaž Mateož kjuyquin lulan, muzpa impuesto cobriñinacami nižaza ujchiz zoñinacami irantichiĉha. Nižaza ninacaqui Jesusižtan niiž tjaajinta zoñinacžtan chica julziĉha tsjii mizquiz.

¹¹ Fariseo zoñinacazti jalla nii cheržcu, Jesusiž tjaajinta zoñinacžquiz pewcziĉha, tuž cjican:

–¿Kjažtiquiztan anĉhuca tjaajiñi maestruqui impuesto cobriñinacžtan nižaza ujchiz zoñinacžtan ĉhjeri lujljo?

¹² Jesusaqui jalla nižta pewczñi nonžcu ninacžquiz cjichiĉha:

–Zuma wiw zoñinacaqui anaž medicu kullñimi pecĉha. Antiz laa zoñinacaž medicu kullñimi pecĉha.

¹³ Yooz takuqui tuž cjiĉha: “Oksñi kuzziz zoñinaca juc'antil pecuĉha wilana jawkñi zoñinacžquiztan”. Tantiya ĉhjul puntut tii Yooz taku chiĉhaja, nii zumpacha intintaza. Jaziqui wejrqui “Zuma kamuĉha” cjiñi zoñinacžquiz anal kjawsñi tjonchinĉha. Antiz “Ujchizpanĉha” cjiñi zoñinacžquiz kjawsñi tjonchinĉha, ninacž kuz campiita cjisjapa.

AYUNAS PUNTU

¹⁴ Juan Bautistaž tjaajinta zoñinacaqui Jesusižquiz macjatžquichiĉha. Nekztan pewcziĉha, tuž cjican:

–Wejrnacmi fariseo zoñinacami walja ayunasiñĉha. Amiž tjaajinta zoñinacazti ana ayunasñipanla. ¿Kjažtiquiztan nižtajo?

¹⁵ Nekztanaqui Jesusaqui kjaaziĉha, tuž cjican:

–¿Kjažt weriž tjaajinta zoñinaca llaquit kuzziz ayunasasajo, weriž želanpachajo? Wejrqui zalz kazzi tjowažtakaztĉha. Ninacaqui zalz pijstiquiz invittanacažtakazza. Zalz kazzi tjowaž želan, niiž zalz pijstiquiz invittanacaqui ana llaquit kuzziz ayunasasaĉha. Pero tsjii timpuž tjonacuĉha. Jalla nii timpuquiz zalzñi tjowa kjañtaž cjequiĉha; jalla nekztanž ayunasasaĉha.

¹⁶ Anaž jakziltami tsjel zquiti ew rimintužtan rimintasacĉha. Ew rimintuqui jaljta-pasacĉha, nižaza nii ach zquitiqui juc'anti wjajržcu tsjelanznasacĉha.

¹⁷ Nižaza anaž jakziltami ach zkiz luuzquiz ew vinu alznasača. Jalla nižtaž alznasaž niiqui, zkiz luuz panž wjajrskatasacha ew vinuqui. Nekztan vinumi zkiz luuzmi pertisnasača. Ew vinu ew zkiz luuzquiz panž alznasača. Jalla nuž zumpacha cjesača vinumi zkiz luuzmi.

JESUCRISTUCHA LAA ZOŇI CHJETINŇIQUI

¹⁸ Jesusaž tjaajnan, tsjii judío zoñinacž jiliriQUI irantichiča. Jesusiž yujcquin quilziča, tuž cjican:

—Wejt majtqui ticzñil jitča. Amqui wejt kjuya okasaž niiqui, naaquiz am persun kjaržtan lanznasača. Nekztan naaqui žetaquiča.

¹⁹ Nekztanaqui Jesusaqui tsijtsu nii jiliržtan ojkchiča tjaajinta zoñinacžtanpacha.

²⁰ Jalla nuž okan, tsjaa laa maatak žonqui Jesusižquiz wirquiztan macjatžquichinča. Tunca paan wata ljok tjawksñi laakaz t'akjiri želintača. Jesusižquiz macjatžcu Jesusiž zquit puntallquiz lanzinča.

²¹ Ima macjatcan pinsichinča, “Wejrqui niž zquitilla lanžcu žetaka wejrqui” cjican.

²² Jalla nuž lanztiquiztan Jesusaqui jalla naaža kjutñi kjutžcu naa maatak zoñ cherziča. Nekztan tuž cjichiča:

—Cullaca, tjup kuzziz cjee. Amiž tjapa kuztan criichiž cjen, žejtchi cjissamča.

Jalla nii orapacha žejtchin cjissinča.

²³ Jalla nekztanaqui Jesusaqui tira ojkchiča. Nii jilirž kjuya irantican Jesusaqui cherchiča, nii jilirž majt tjazjapa banda pjujñinacaqui listutakalča, jalla nii. Nižaza zoñinacaqui ančaž kaacan aranchiča.

²⁴ Nuž cheržcu Jesusaqui ninacžquiz cjichiča:

—Ančhucqui tekztanž ulna. Taa uzqui anača ticzinqui, antiz tjajča.

Jalla nuž Jesusiž chiitiquiztan, zoñinacaqui nižquin tjassiča.

²⁵ Nekztanaqui Jesusaqui ninaca ulanskatchipanča. Nekztan luzcu, naaža ticzi uza kjarcu tanžcu, žinziča; žejtchinpacha.

²⁶ Jalla nekztanaqui tjapa kjutñi nii yokquin nii milajru quintu ojkchiča.

ZUR ZOŇINACA CHJETINTA

²⁷ Jalla nijwctan ulanžquitiquiztan pucultan zur zoñinacaqui nižquin apžquichiča, kjawcan:

—Davidž majchmaatquiztan tjoñi, wejrnača okznalla, —cjican.

²⁸ Nekztan Jesusaž kjuya luztan nii zur zoñinacaqui nižquin macjatchiča. Nekztan Jesusaqui ninacžquiz pewcziča, tuž cjican:

—Wejrqui ančhuc cherkatasacha, žjalla nii crii ančhucya?

Ninacaqui kjaaziča, tuž cjican:

—Wejt Jiliri, criyuča.

²⁹ Jalla nekztanaqui Jesusaqui ninacž čhujqui lanlanžinchiča. Nižaza cjichiča:

—Ančucaž tjapa kuztan criitiquiztan cherñi cjisna.

³⁰ Nii orapacha ninacž čhujquiqui cherñi cjissiča. Nekztanaqui Jesusaqui ninacžquiz zumpacha chiižinchiča, tuž cjican:

—Tii čhjetintaqui anaj jecmi zizla; ančhucmi anaž jeczquizimi chiichiyaquiča.

³¹ Jesusaž nuž chiižinchiž cjenami, ninacaqui ulanžcu, tjapa yokaran nii čhjetinta quintu parličiča.

ANA CHIIŇI ZOŇI CHJETINTA

³² Nii kjuyquiztan ulnan yekjap zoñinacaqui tsjii zajraž tanta zoñi zjijcchiča. Zajraž tantiquiztan ana chiiñi atatča.

³³ Nekztanaqui Jesusaqui nii zajra chjatkatchičha. Jalla nuž chjatkattiquiztan nii ana chiiñi žoñiqui chiyi kallantichičha. Zoñinacazti jalla nii cheržcu walja ispantichi cjissičha, tuž cjican:

—Tii Israel yokquiz ana wira tižtanaca cheriñtača wejrnacqui.

³⁴ Pero fariseo nžoñinacazti tuž cjetča:

—Tiiqui zajranacž jilirž aztankaz zajranaca chjatkatñičha.

³⁵ Jesusaqui tjapa wajtquiztan watja nižaza jochquiztan jochi ojklaychičha, judío ajcz kjuyquizimi tjaajincan. Yooz mantuquiz kamz puntu chiižinchiča. Nižaza tјapaman laanacami nižaza jallc'a curpuchiznacami čhjetinchiča.

³⁶ Zoñinaca cheržcu, ninaca okziča. Ana awatirchiz uuzanacažtakaz želatča.

³⁷ Zoñinaca okzcu, Jesusaqui niiž tjaajinta žoñinacžquiz paljaychičha, tuž cjican:

—Weraral cjiwča. Zkalaqui walja žejlča. Pero zkala ajžñi žoñinacača upaqui.

³⁸ Yooz Ejpqui zkal Patrunača. Jalla nižtiquiztan Yooz Patrunžquiztan mayiza, zkala ajžñi žoñi cuchnajo.

10

TUNCAPAN APOSTOLONACA ILLZTA

¹ Jalla nekztanaqui Jesusaqui niiž tuncapan illzta žoñinaca kjawziča. Nekztan ninacžquiz mantiz poder tjaachiča, zajranaca chjatkatzjapa, nižaza tјapaman laanacami jallc'a curpuchiznacami čhjetnajo.

² Nii tuncapan illzta apostolonacaqui jalla tižta tjuuchiznacatača: Primiruqui Simonatača, nižaza niiž tsjii tjuuqui Pedro cjitazakaztača. Nekztan niiž lajктаča, Andrés cjita. Nekztan Jacobotača, nižaza niiž jila Juan. Nii pucultanaqui Zebedeož majchwichtača.

³ Nekztan Felipitača, Bartolometača, Tomastača, nižaza Mateotača. Nii Mateozti impuesto cobriñitača. Nekztan Jacobotača, Alfeož majchtača. Nekztan Lebeotača nižaza niiž tsjii tjuuqui Tadeo cjitazakaztača.

⁴ Nekztan Simonatača, niiqui cananista cjita partiquiztantača. Ultimquiziqui Judas Iscariotetača, jalla niiqui Jesusiž quintra tarasunchičha.

ILLZTA ZOÑINACA CUCHANTA

⁵ Jesusaqui nii tuncapan illzta žoñinaca cuchanžquichiča, niiž cuntiquiztan ojklayajo. Ima cuchanžcan tuž chiižinchiča:

—Judío yokquinpanž ojklayaquiča, Samaria yokquin nižaza yekja yokanacquin ana ojklayaquiča.

⁶ Israel wajtchiz žoñinacžquinkaz okaquiča. Jalla ninacaqui katchi uuzinacažtakaz žejlča.

⁷ Arajpach Yooz mantuquiz kamz timpu žcatžinžquičha. Jalla nii paljaycan ojklayžcaquiča.

⁸ Nižaza laanaca čhjetnaquiča. Nižaza ticzinaca jacatatskataquiča. Nižaza mojkchi janchichiz žoñinaca čhjetnaquiča. Nižaza zajranaca chjatkataquiča. Tii mantiz poderaqui ančhucacquiz nužukaz tjaatača. Jalla nižtiquiztan tii poderžtan žoñinacžquiz yanapžcu anaž čhjulumi mayaquiča pacajo.

⁹ Paaz ana čhjichaquiča, kor paazmi, chiw paazmi, cobre paazmi.

¹⁰ Nižaza ana čhjichaquiča žak quelzmi. Tsjii almilla alaja čhjichaquiča. Nižaza ana iya čhjulumi čhjichasača, ana yekja čhjatami, nižaza atsmi. Yooztajapa langžñinacžquiziqui čhjeriqui tjaata cjis waquiziča.

¹¹ Ančhucqui wajtquizimi jochquizimi irantižcuqui, zuma žoñipanž kjurznaquiča. Nuž zuma žoñi wachcuqui, niiž kjuyquiz alujasaquiča, nii wajtquiztanami jochquiztanami ulanzcama.

¹² Tsjii kjuya luzcu, tsaanaquiča, “Ančhuc walipaj cjila”, cjican.

¹³ Nii kjuychiz žoñinaca zumažlaj niiqui, jalla ninacžtaqui walipanž cjequiča. Yekjapa žoñinacaqui ana zumažlaj niiqui, jalla ninacžtaqui čjulumi anawalikaz cjequiča.

¹⁴ Jakziltat ančhuc ana risiwaquiž niiqui, nižaza ančhuc ana nonz pecaquiž niiqui, ninacžquiztan okaquiž ančhucqui. Nii kjuyquiztan ulnaquiča nižaza nii wajtquiztanaqui. Nekztan nii wajtquiztan kjojchquiz žcatchi pulpunaca tsajt tsajtsnaquiča. Jalla nii tsajt tsajttaqui siñalaž cjequiča ninacž quintra, ančhuc ana risiwchiž cjen.

¹⁵ Weraral cjiwča. Casticz tjuñquiziqui nii ančhuc ana zuma risiwñi žoñinaczi juc'anti castictaž cjequiča, Sodoma cjita Gomorra cjita, jalla nii wajtchiz žoñinacžquiztan.

CHJAAWJKATŇINACA ZELAQUICHA

¹⁶ Jesusaqui tjaajinchizakazza:

–Tii weriž chižinta taku nonžna. Wejrqui ančhuc cuchnuča. Ančhucqui kitinacž taypiquiz ojklayaquiča, uzanacažtakaz. Jalla nižtiquiztan ančhucqui walja kuzziz cjee. Listuž cjequiča žkoražtakaz, pero zuma paazjapa.

¹⁷ Ančhucqui persunpachaž walja cwitazaquiča. Ančhucqui jilirinacžquin intirjita cjequiča; nižaza ajcz kjuyquiz wjajttaž cjequiča.

¹⁸ Nižaza ančhucqui wejt puntuquiztan parlichiz cjen chjichtaž cjequiča perfec-tonacžquinami, nižaza tsjan chawjc jilirinacžquinami. Nekztan ančhucqui wejt puntuquiztan chiyaquiča, nii jilirinacž yujcquizimi, nižaza ana judío wajtchiz žoñinacž yujcquizimi.

¹⁹ Jilirinacžquiz intirjitaž cjenami, ana kuz turwaysi cjequiča, čjulut ančhuc kjaaznačhaja, nižaza jaknužt kjaaznačhaja, jalla nii. Jilirinacž yujcquiz prisintiz ora, Yoozqui ančuca kuzquiz chiiz taku tjaaquiča, jaknužt chiizalaj, nii.

²⁰ Ančuca persun kuzquiztan anaž chiyaquiča. Antiz ančuca Yooz Ejpž Espíritu Santuqui ančhuc chiikataquiča.

²¹ Nii timpuquiziqui žoñinacaqui persun jilž quintra aptjapznaquiča persun jila conkatzjapa. Nižaza ejpnacaqui persun maatinacž quintra aptjapznaquiča. Maatinacazti persun maa ejpnacž quintra zakaz aptjapznaquiča, persun ejpnaca conkatzjapa.

²² Tjapa ana criichi žoñinacaqui ančucaquiz ch'aanaquiča wejt puntu parliñiz cjen. Pero jakziltat ticzcama wali tjurt'iñi kuzziz cječhaj niiqui, liwriitaž cjequiča, Yooztan wiñaya kamzjapa.

²³ Tsjii wajtchiz žoñinacaqui ančhuc chjatkataquiž niiqui, ninacžquiztan yekja wajtquin okaquiča. Weraral cjiwča, wejrqui arajpachquiztan cuchanžquita Žoñtča. Ima weriž tii muntuquiz wilta tjonan, ančhucqui tjapa Israel watjanacžquin anaž iranti atasacha.

²⁴ Tjaajinta žoñiqui niž tjaajiñizquiztan anaž juc'anti cjesača. Nižaza piyunaqui niž patrunžquiztan anaž juc'anti cjesača.

²⁵ Tsjii tjaajinta žoñiqui niž tjaajiñiz irata, jalla nižta tjaajiñiz cjisnaquiž niiqui, cuntintuž cjis waquiziča. Nižaza tsjii piyunaqui niž patrunž irata, jalla nižta patrunaž cjisnaquiž niiqui, cuntintuž cjis waquiziča. Nonžna ančhucqui, quintra žoñinacaqui “Beelzebú” cjican zajra jilirž tjuužtan wejtquiz tjuuskataquiž niiqui, ančucaquiz juc'ant anawal tjuužtanž tjuuskataquiča. Wejrqui kjuychiz patrunžtakaztča, ančhuczi wejt kjuy familiažtakazza.

²⁶ Jalla nižtiquiztan ančhucqui anaž žoñi eksna. Tjapa chjojzakuñ tjaajintami zuma kjana ziztaž cjequiča. Nižaza tjapa jamazit tjaajintami nižtakaz zuma kjana zizta-pankaz cjequiča.

²⁷ Tjapa weriž chjojzaka tjaajintanacami ančhucqui žoñinacž yujcquiz kjanacama paljayaquiča. Nižaza tjapa weriž jamazit tjaajintanacami ančhucqui paljayaquiča, tjapa žoñinaca nonzjapa.

²⁸ Nonžna ančhucqui, anača eksqui tii curpu alaja conñinacžquizimi. Ninacaqui animuqui anaž conasača. Antiz Yoozquizpan eksna. Jalla niicha curpumi animumi infiernuquin wiñaya t'akjisiskatñiqui.

²⁹ 'Tsji paaztan pizc wežlanaca kjayasača. Jalla nuž koluc valorchiz kjayžcumi ančuca Yooz Ejpqui ninaca cwitiča. Yooz Ejpž ana munan, tsjii wežlaqui anaž ticznasača.

³⁰ Jilanaca, Yooz Ejpqui tjapa ančuca ach charanaca kanžintača.

³¹ Jalla nižtiquiztan anaž čjulquiztanami eksna. Wežlanacžquiztan ančhucča juc'ant valorchizqui. Yooz Ejpqui ančhuc juc'anti cwitaquiča wežlanacžquiztan.

³² 'Jakziltat parti žoňž yujcquiz wejt favora cječhaj niiqui, nižazakal wejrqui wejt arajpach Yooz Ejpž yujcquiz nii žoňž favora chiyača.

³³ Nižaza jakziltat parti žoňž yujcquiz wejr ana pajñi nicačhaj niiqui, nižaza wejrqui wejt arajpach Yooz Ejpž yujcquiz nii žoňž quintra ana pajñi zakal chiyača.

³⁴ 'Tii taku nonžna. Weriž tjontiquiztan žoñinacaqui ana zumquin cjequiča; quintrasñi cjequiča. Nekztan aptjapznaquiča. Ana criichinacaqui criichi žoñinacž quintra cjequiča.

³⁵ Weriž tjontiquiztan tsjii maatiqui persun ejpžjapa quintraž cjequiča. Nižaza tsjaa majtqui persun maajapa quintra cjequiča. Nižaza tsjaa wazmi persun kjan maajapa quintra cjequiča.

³⁶ Jalla nižta zapa mayni familianacaqui ninacporaž quintraž cjequiča.

³⁷ Jakziltat persun maa ejpžquizkaz kuzziz cječhaja, jalla niiqui anaž wejt partiquiz cjichuca cjesača. Nižaza jakziltat persun ocjalžquizkaz kayazt'ačhaja, jalla niiqui anaž wejt partiquiz cjichuca cjesača.

³⁸ Jakziltat wejt partiquiz cjis pecčhaj niiqui, tjapa kuztanž wejtquiz cjistanča. Sufrijsapaqui listoj cjila, ticzcama. Ana nižta wejtquin tjapa kuztan cječhaj niiqui, anaž wejt partiquiz cjichuca cjesača.

³⁹ Jakziltat weriž cjen persun anazum kamañquiztan ana jaytačhaja, jalla niiqui ultimquiziqui ana liwriita cjesača. Nižaza jakziltat weriž cjen persun anazum kamañquiztan jaytačhaja, jalla niiqui ultimquiziqui liwriitaž cjequiča; Yooztan wiñaya zuma kamaquiča.

⁴⁰ Jequit ančhuc risiwčhaja, nižaza wejrmi zakaz risiwča. Nižaza jequit wejr risiwčhaja, jalla niiqui nižazakaz wejt Yooz Ejpmi risiwča.

⁴¹ Jequit tsjii Yooziž cuchanta profeta risiwaquiž niiqui, jalla niiqui profetažtakaz honorchiz zakaz cjequiča. Nižaza jequit tsjii Yooz kuzcama kamñi žoñi risiwačhaja, jalla niiqui Yooz kuzcama kamñiž premio, jalla nižtakaz honorchiz cjequiča.

⁴² Nižaza jequit tsjii wejtquin kuzziz žoňžquiz yanapačhaja, jalla niiqui honorchiz zakaz cjequiča. Jequit wejtquin criichi žoňžquiz tsjii tasa kjaz onačhaja, jalla niiqui honorchiz zakaz cjequiča. —Jalla nuž chiichiča Jesusaqui.

11

JUAN BAUTISTAZ CUCHANZQUITA ŽOŇI

¹ Niiž tuncapan illzta žoñinacžquiz tjaažinz žeržcu, nekztan Jesusaqui ojkchiča, yekja watjanac kjutñi. Wajtquiztan watja ojklaychiča, žoñinacžquiz tjaažñi, nižaza Yooz taku paljayi.

² Juanqui nii oraqui carsilquiztača. Jalla nicju Cristuž ojklaytanaca quintu nonchiča. Nekztanaqui Juanqui tsjii kjažt mazinaca Jesusa pewczñi cuchanzquichiča. Nekztan irantižcu Jesusižquiz

³ pewcziča, tuž cjican:

—Cristuqui tjoniz cjispacha; ¿Amj Yoozquiztan cuchanzquita Cristumkaya? ¿Už yekjaž tjewznasa, jaa?

⁴ Jesusaqui ninacžquiz kjaazičha, tuž cjican:

—Jaknužt cherčhaja nonžaja, jalla nii tjappachaž Juanžquiz quint'ižcaquičha ančhucqui.

⁵ Zur žoñinacac cherčha, Zuch žoñinacaqui ojklayčha. Mojkchi janchichiz žoñinacaqui čhjetintačha. Oñi žoñinacaqui nonža. Nižaza ticzi žoñinacaqui jacatatskattačha. Nižaza pobre žoñinacžquiz Yooz liwriiñi taku paljaytapančha.

⁶ Jakziltat weriž paatanaca cheržcu, nižaza weriž chiitanaca nonžcu, ana kuz turwayizlaj niiqui, walipanikaz cjequičha.

JUAN BAUTISTA PUNTU

⁷⁻⁸ Jalla ninacaž ojktan, Jesusaqui chiyi kallantichičha Juanž puntuquiztan. Zoñinacžquiz tuž cjichičha:

—Ch'ekti yokquin, čhjululu cherzñi ojkchinčhuctaya? ¿Tjamiž tjizinta caña cherzñi ojkchinčhuctajo? Anačhay. ¿Fino zquiti cujtchi žoñi cherzñi ojkchinčhuctajo? Chawjc jilirž kjuyquin zuma zquiti cujtchi žoñi žejlčha. Jalla nii zizza ančhucqui.

⁹ ¿Čhjululu cherzñi ojkchinčhuctaya? ¿Yooz cuntiquiztan chiiñi profeta cherzñi ojkchinčhuctaya? Jesalla, ultim werara nuž ojkchinčhucčha. Juanqui tuquita profetanacžquiztan juc'ant chekančha.

¹⁰ Juanž puntuquiztan Yooz takuqui tuž cjičha:

“Yooz Ejpqui tsjii žoñi cuchanžcaquičha ima Cristuž Yooz taku paljayi ojklayan. Nii žoñi qui Israel žoñinacžquiz Cristu zuma tjewskataquičha”.

¹¹ Weraral cjiwčha. Juan Bautistačha parti žoñž maatinacžquiztan tsjan juc'antiqui. Pero chjul Yooz maatimi žoñž maatiquiztan tsjan juc'antičha. Arajpach Yoozquin kuzziz žoñinacačha Yooz maatinacaqui.

¹² 'Juanž tjontiquiztan anzama muzpa žoñinacaqui ts'acjazcan arajpach Yooz mantuquiz luz pecčha; walja tjapa aztan nižaza tjapa kuztan luz pecčha.

¹³ Juanž tjonzcama, tjapa tuquita profetanacž chiitanacami nižaza Moisés liinacami arajpach Yooz cuchanžquita puntuquiztan chiičha.

¹⁴ Elías cjita profetaqui wilta tjoniz cjispatcha; nii Elias tjonz cuntiquiztančha Juan Bautistaqui. Jalla niic weraračha. Nuž criiz waquizičha.

¹⁵ Jakziltačhalaj nonžni cjunčhiz, jalla niiqui tii chiitaqui nonžna.

¹⁶ '¿Kjažtat tii timpuquiz žejlñi žoñinacajo? ¿Jecnaca iratat tinacajo? Jalla tižta ocjalanacažtakazza tinacaqui. Yekjap ocjalanacaqui palazquin julzi uzinčha, nižaza ninacž mazinaca kjawkjawža, tuž cjican:

¹⁷ “Tsajtsjapa pincallu pjujchinčha. Ančhuczti ana tsajtchinčhucčha. Nižaza kaayikaayi wirzu itzinčha. Ančhuczti ana kaachinčhucčha”. Jalla nuž cjichičha ocjalanacaqui. Jalla nižta iratačha tii timpuquiz žejlñi žoñinacaqui.

¹⁸ Juan tjonchičha. Niiqui zumanaca ana lujlñičha, nižaza ana licñičha. Jalla nižtiquiztan ančhucqui tuž cjiñčhucčha, “Juanqui zajraž tantačha” cjican.

¹⁹ Niiž wiruñiqui wejrqui tjonchinčha, arajpach Yooz Ejpž cuchanžquita Zoñi. Wejrqui zumanaca lulučha, nižaza licučha. Jalla nižtiquiztan ančhucqui wejt puntuquiztan cjičha: “Niičha ancha lujlñiqui, nižaza licñiqui, nižaza niičha ujchiz žoñinacž mazi qui, nižaza anawali impuesto cobriñinacž mazi qui”. Jalla nuž cjiñčhucčha wejt puntuquiztan. Tuž zakal cjiwčha: Yooz puntu zuma zizñi žoñinacaqui Yooz tjaajintacama kamčha.

ANA YOOZQUIN KUZZIZ ZOÑINACA

²⁰ Jalla nekztanaqui Jesusaqui chiichičha, chojrú kuzziz žoñinacž puntu. Tsjii watanacquiz ancha milajrunaca paachičha. Pero nii wajtchiz žoñinacazti persun uj ana pajchičha; nižaza kuznaca ana campiichičha. Jalla nižtiquiztan Jesusaqui ninacžquiz ayjatchičha, tuž cjican:

²¹ —Corazín wajtchiz zoñinaca, ančhucaquiz ancha anawaliž wataquiča. Nižaza Betsaida wajtchiz zoñinaca, ančhucaquiz ancha anawalizakaz wataquiča. Ančhuca watjanacquiziqui walja milajrunaca paachinča. Tiro cjita nižaza Sidón cjita watjanacquiz nii milajrunaca paataž cjitasaž niiqui, nii ortanpacha nii wajtchiz zoñinacaqui Yoozquin kuzziz cjitasača; nižaza “ujchizpanča wejrnacqui, pertunalla”, cjitasača. Nižaza uj zint'izcu nii wajtchiz zoñinacaqui llaquita kuz kjanapacha tjeezni cjitasača, lutu zquiti cujtžcu, nižaza achquiz kjupžtan tjalžcu.

²² Jalla nižtiquiztan ančhucqui juyzu casticz tjuñquiziqui juc'anti castictaž cjequiča nii Tiro cjita nižaza Sidón cjita watjanacchiz zoñinaczquiztan.

²³ Capernaum wajtchiz zoñinaca, ¿kjažtiquiztan ančhucqui pinsejo, “Yoozqui učhum honorchiz cjizkataquiča”, cjicanajo? Anaž nuž cjesača. Pero ančhuczti kozzuc tjojttaž cjequiča infiernuquin sufrisjapa, ujchiz zoñinacztan chica. Ančhuca wajtquiziqui walja milajrunaca paachinča. Sodoma cjita wajtquiz nii milajrunaca paataž cjitasaž niiqui, nii watjaqui anz tii tjuñinaca žejltašača.

²⁴ Jalla nižtiquiztan nii juyzu casticz tjuñquiziqui ančhucqui juc'anti castictaž cjequiča, Sodoma wajtchiz zoñinaczquiztan.

YOOZQUIN KUZUZ ZOÑINACA

²⁵ Jalla nii orazakaz Jesusaqui chiichiča:

—Wejt Yooz Tata, amqui honorchizam cjilalla. Arajpachquin žejlñinacami tii muntuquiz žejlñinacami amča mantiñamqui. Amqui humilde zoñinaczquiz chjojkaca tjaajinta tjeezamča. Zizni zoñinaczquizimi intintazni zoñinaczquizimi nii chjojkaca tjaajintanacami ana zizkatchamča.

²⁶ Yooz Tata, amiž muntaqui nužuča.

²⁷ Yooz Tata, tjapa amiž ziztanacaqui wejtquiz tjaajinchamča. Ultimquiziqui anaž jecmi wejr am Majch zumpacha pajča. Am alaja wejr zumpacha pajča. Nižaza anaž jecmi am Yooz Ejp zumpacha pajča. Wejr alaja am zuma pajuča. Nižaza jakziltizquiz wejrqui zizkatz pecačhaja, jalla ninacazakaz am zuma pajasača.

²⁸ Ančhucqui jakziltat ana zumanacquiztan otchižlaj niiqui, wejtquizza macjatžca. Nižaza jakziltat persun aztan Yooz watja irantiz otchižlaj niiqui, wejtquizza macjatžca. Weril ančhucaquiz jeejkatača.

²⁹ Wejrqui pasinsis kuzziztča, nižaza humilde kuzziztča. Jalla nižtiquiztan weriž tjaata kamaña catoka; nižaza wejt puntuquiztan zizni cjee. Nekztan persun kuz jeejz wachaquiča.

³⁰ Weriž tjaata kamañaqui anača ch'ama, nižaza wejt manta paazqui cježakazza.

12

JEEJZ TJUÑI QUINTU

¹ Tsjii jeejz tjuñquiziqui Jesusaqui niž tjaajinta zoñinacztan čjacta zkalanac taypiranž okatča. Tjaajinta zoñinacaqui čjjeri eecskatchiča. Nekztan ninacaqui tric oz chjojlunaca kjajpžcu, tricu lujlchiča.

² Fariseo zoñinacaqui jalla nižta paañi cheržcu, Jesusižquiz cjichiča:

—Chera, tii amiž tjaajinta zoñinacaqui trabajla. Jeejz tjuñquiziqui nižta trabajzqui učhum lii quintrala. —Jalla nuž chiican ujchiz jwes pecatča.

³ Nekztanaqui Jesusaqui ninaczquiz kjaaziča, tuž cjican:

—Ančhucqui tuž liichinčhucča, ¿anajaa? Čjjeri eecznanacqui David cjita zoñiqui niž mazinacztan tižta paachiča.

⁴ Niiqui Yooz timpluquin luzcu Yooz yujcquin nonžta t'antanaca lujlchiča. Chjul žoñimi anapantača permitta nii t'antac lujlzqui. Lii quintrala niiqui. Timplu jilirinacapankaz lulasača. Pero nii Davidzti lujlchipanča. Nižaza niž mazinacaqui nii t'anta lujlchizakazza.

⁵ Nižaza Moisés liiquiz tižta liichinčucž, ¿ana jaa? Jeejz tjuñquiziqui timplu jilirinacaqui ana jeežla. Jalla nuž ana jeejztiquiztanaqui, ninacžtajapa anaž ujchiz cjesača.

⁶ Ančhucaquiz cjiwča. Tekz tsjiiča timpluquiztan juc'ant chekanaqui.

⁷ Nižaza ančhucqui cijirta Yooz taku ana intintazzinčucča. Yooz taku tuž cjiča: “Wejrqui wilana jawkñi žoñinaca anal pecuča. Okzñi kuzziz žoñinacapan pecuča”. Tii Yooz taku intintaztasaj niiqui, anaž ančhucqui tii žoñinaca ujchiz jwes pectasača. Tii žoñinacaqui jaziqui anaž uj paača.

⁸ Wejrqui tsewctan cuchanžquita Yooz Zoñtča. Wejrpanikal jeejz tjuñquizimi mantasača.

KJARA KJONCHI ZOÑI CHJETINTA

⁹ Jalla nekztanaqui najwcchuc ojkžcu judío ajcz kjuyquiz luzziča.

¹⁰ Jalla nicju tsjii žoñi želatča kjara kjonchi. Tsjii quintra žoñinacaqui uj jwesjapa Jesusižquiz pewcziča tuž cjican:

—¿Jeejz tjuñquiziqui žoñi čhjetinz cjesaya, už anapan cjesaj? nuž cjican pewcziča.

¹¹ Jesusaqui ninacžquiz kjaaziča tuž cjican:

—Jeejz tjuñquiziqui uuzac tujquiz tjojtsiž cjesaj niiqui, ¿kjaža ančhuczi tujquiztan uuzaa joožni ana okasajo?

¹² Pero žoñiqui uuzižquiztan juc'antiž walča. Jalla nižtiquiztan jeejz tjuñquizimi anača lii quintra zuma paazqui.

¹³ Jalla nekztanaqui Jesusaqui laa žoñžquiz cjichiča:

—Am kjara zjijca.

Nekztan žejtchi cjissiča, nii tsjii kjara wiwuž nižtapacha.

¹⁴ Jalla nekztanaqui fariseo žoñinacaqui ulanžcu, Jesusiž conzjapa kazziča.

¹⁵ Jalla nii zizcu Jesusaqui najwcchuc ojkchiča. Nižaza muzpa žoñinacaqui Jesusižquiz apziča. Jesusaqui tjapa nii apžni laanaca čhjetinčiča.

¹⁶ Nekztan ninacžquiz mantichiča, ana jeczquizimi Jesusiž čhjetinñi puntuquiztan parlajo, nii.

PROFETAŽ CHIITA TAKU CUMPLITA

¹⁷ Jalla nižta ojklaycan, Jesusaqui Isaías profetaž cijirta taku nužquiz cumplissiča. Yoozqui Isaíasquiz tuž cijirkatchiča:

¹⁸ “Jalla tiiča weriž illzta žoñiqui, weriž mantitacama ojklayni žoñi. Jalla nižquin kayazt'uča. Niiž cjen cuntintuča wejrqui. Jalla nuž cjiča Yoozqui. Wejt Espíritu Santuqui niiž kuzquiz cjequiča. Niiqui yekja watjanacchiz žoñinacžquin Yooz liwriiñi taku paljayaquiča.

¹⁹ Žoñinacžquizimi ana ch'anaquiča, nižaza ana kjawaquiča. Calliran alto joržtan ana paljayaquiča.

²⁰ Tsjii tjuwanta cañami anaž kjolaquiča. Nižaza ch'aman asñi michami anaž tjesaquiča, niiž ultimpacha legal mantiz tjuñicama.

²¹ Niiž cjen yekja watjanacchiz žoñinacaqui zuma liwriiz tjuñi tjewznaquiča”. Jalla nuž Jesusiž puntuquiztan Yooz takuqui cjiča.

JESUSIZ QUINTRA CHIICHA

²² Jalla nekztanaqui tsjii laa žoñiqui Jesusižquin chjichtatača. Nii žoñiqui zajraž tantaž cjen zuratača, nižaza ana chiiñitača. Jesusaqui nii žoñi čhjetinčiča. Jalla nižtiquiztan cherñi chiiñi cjissiča.

²³ Jalla nuž čhjetintiquiztan tjapa žoñinacaqui ispantichiča tuž cjican:

—¿Tij Davidž majchmajtquiztan tjonñi cjesaya? ¿Tiipan Cristo cjesaya?

²⁴ Nii nonžcu fariseo žoñinacaqui tuž cjichiča:

—Tiiqui ana wal žoñikalala. Zajranacž Beelzebú jilirž aztankaz yekja zajranaca chjatkatča.

²⁵ Jesusaqui ninacž pinsitanaca zizziča, jalla nižtiquiztan ninacžquiz cjichiča:

—Jakzilta nacionamiž partira partira t'akznaquiž niiqui, nižaza t'aka t'aka kichasaquiž niiqui, k'ala t'atantaž cjequiča. Tsjii watjamiž nižaza tsjii kjuya familiamiž nižta t'aka t'aka cjisnaquiž niiqui, anaž tjurasacha.

²⁶ Jalla nižta irata Satanás diabluqui persun partira chjatkatasaž niiqui, niipacha t'akztasacha. Jalla nuž t'akžtiquiztan niž mantiz azi anaž tjurasacha.

²⁷ Ančhucqui wejt puntuquiztan cjiñchucča, “Beelzebú diabluž aztan zajranaca chjatkatča”. Jalla nuž cjiñchucča. Jalla nužuzlaj niiqui, ¿ject ančuca partira žoñinacžquiz azi tjaazjo, zajranaca chjatkatzjapajo? Jalla nižtiquiztan kjanapachaž wejt puntuquiztan tsjii kjutñi chiichinčucča, nii.

²⁸ Wejrzi Yooz Espíritu Santuž aztan zajranaca chjatkatiniča. Jalla niicž cjiča, Yooz mantiz timpu ančucaquiz žcatžinžquiča, nii.

²⁹ ‘Tsjilla cjesacha. Anaž jecmi tsjii azziz žoñž kjuyquiziqui luzi atasacha; nižaza anaž niž kinakunacami jwesi atasacha, ima čejlcanaqui. Nii čejlžcu, nekztan tjapa kinakunaca jwesi luzasacha.

³⁰ ‘Jecchalaj ana wejt favora, niiqui wejt quintrača. Nižaza jequit wejttan chica Yooz kjutñi žoñinaca ana macjatskatčaja, jalla niiqui žoñinacaž Yoozquiztan tirkatča.

³¹ ‘Jazic ančucaquiz chiyuča, tuž cjican: tjapa ujnacami nižaza tjapa ana zum takunacami pertuntaž cjesacha. Pero jakzilta žoñit Yooz Espíritu Santuž quintra chiyachaj niiqui, anaž pertuntaž cjesacha. Nii žoñiqui wiñaya ujchiz cjequiča.

³² Jakzilta žoñit wejt quintra chiyachaj niiqui, pertuntaž cjesacha. Pero jakzilta žoñit Yooz Espíritu Santuž quintra chiyachaj niiqui, anaž pertuntaž cjequiča. Nii žoñiqui wiñaya ujchiz cjequiča; anawira pertuntaž cjequiča.

FRUTANAC PUNTU

³³ Nekztan Jesusaqui tjaajinchiča, tuž cjican:

—Zuma muntižlaj niiqui, zuma frutaž pookča. Nižaza ana zuma muntižlaj niiqui, ana zuma frutaž pookča. Jalla nižtiquiztan muntiqui niž frutquiztan pajza, zuma ana zuma, jalla nii.

³⁴ Zkoražtakaz ančhucqui, ana zum žoñchucča. ¿Kjažža ančhucqui zumanaca chiyasajo? Ančuca kuzquiz pinsitaqui ana zuma parijula. Jaziqui ančhucča anazumanacapan chiiñinacaqui.

³⁵ Tsjii zuma žoñiqui zuma chiiča, niž zuma kuzquiztan. Nizaza tsjii ana zum žoñizti ana zumapaž chiiča, niž ana zuma kuzquiztan. Jaknužt kuzquiz pinsičaja, jalla nuž chiiča žoñinacami.

³⁶ Ančucaquiz cjiwčha, juyzu casticz tjuñquiziqui zapa mayni cwinta tjaastanča, tjapa ana zuma chiitanacami.

³⁷ Ančucaž chiitiquiztan jama jusjitaž cjequiča, ujchiz cječhaja, ana ujchiz cječhaja, nuž.

ANA CRIICHI ŽOÑINACA

³⁸ Jalla nekztanaqui yekjap fariseo žoñinacaqui lii tjaajiñi maestruncžtan Jesusižquiz cjichiča:

—Maestro, am milajru paañi cherz pecučha.

³⁹ Jesusaqui ninacžquiz kjaaziča tuž cjican:

—Ana zum žoñinacčhucča. Ana Yoozquin kuzziz žoñinacčhucča. ¿Kjažt tsjii milajru mayčha, zinalažtakaz? Jonáz cjita profetž zinala, niikaz ančucaquiz tjaata cjequiča.

⁴⁰ Jonasqui pajk ch'iz pjuchquiz žejlchiča čhjep majžtan čhjep aramžtan. Jalla nižta irata wejrqui tii yok koztan kamača čhjep majžtan čhjep aramžtan.

⁴¹ Juyzu tjuñquiziqui, jalla nii casticz tjuñquiziqui Nínive wajtchiz žoñinacaqui jacatataquiča. Nekztan ninacaqui tii timpuquiz kamñi žoñinacž uj tjeeskataquiča. Jonás Yooz taku paljaytiquiztan ninacaqui Yoozquin kuzziz cjissiča. Pero wejrtča Jonasquiztan juc'ant chekanaqui. Tii timpuquiz kamñi žoñinacazti anaž Yoozquin kuz tjaača.

⁴² Nižaza casticz tjuñquiziqui tsjaa waruta maatak jilirqui jacatataquiča. Nekztan naaqui tii timpuquiz kamñi žoñinacž uj tjeeskataquiča. Naaqui najwkta yokquiztan tjonchinča Salomonžtan zali, nižaza niž zuma razunchiz taku nonžni. Pero tejkz wejrtča Salomonquiztan tsjan juc'ant chekanaqui. Pero tii timpuquiz kamñi žoñinacazti wejt taku anaž nonz pecča.

ZAJRA PUNTU

⁴³ 'Tsjii zakal quint'asača. Tsjii zajraqui žoñžquiztan ulanžcu kjoñ yokaran ojk-layñitača, jeejzjapa kjurcan. Ana jeejz watžcuqui, kuzquiz pinsichiča, tuž cjican:

⁴⁴ "Jaziqui wejr quepaka jakziquiztan ulanzquitučhaja, jalla nicju". Jalla nuž quejpžcu nii žoñžtan wilta zalchiča. Nii žoñiqui pewžta kjuyažtakaztača, cuza žcayi, azquitzta, pero laachitača.

⁴⁵ Jalla nuž zaltiquiztan nii zajraqui pakallak juc'ant anawali zajranaca zjijqui ojkchiča. Zajranaca zjijčcu, tjappacha nii žoñž kuzquiz luzziča. Jalla nižtiquiztan nii žoñiqui juc'ant ana waliž cjissiča tuquita kamzquiztan. Jalla nižta irata tii ana zum žoñinacžquiz wataquiča. —Jalla nuž quint'ichiča Jesusaqui.

JESUSIZ FAMILIA

⁴⁶ Jesusaqui iyapanž žoninacžquiz chiyatča. Jalla nuž chiyan niž maaqui lajknacžtan irantižquichiča. Žoñinacž tjiuquin želan, nižtan parlis pecatča.

⁴⁷ Tsjii žoñiqui Jesusižquiz mazziča, tuž cjican:

—Am maa lajknacžtanpacha tii tjiuquiz žejlča. Am kjawž, amtanž parlis pecča.

⁴⁸ Jesusaqui mazni žoñžquiz kjaaziča, tuž cjican:

—¿Ject wejt maaya? ¿Ject wejt jilanacaya?

⁴⁹ Jalla nuž chiižcu tjaajinta žoñinacž kjutni kjaržtan tjeeziča, nižaza cjichiča:

—Tinacača wejt maami, wejt jilanacami.

⁵⁰ Jecnacami wejt arajpach Yooz Ejpž kuzcama kamčhaja, jalla ninacača wejt jilanacami, wejt cullaquinacami, wejt maami.

13

ZKALA CHJACZ QUINTU

¹ Nii noojpacha Jesusaqui kjuyquiztan ulanchiča. Kot kjutni ojkžcu kot atquiz julziča.

² Jakziquin nii želatčhaja, jalla nicju žoñinacaqui walja ajcziča. Jalla nižtiquiztan tjaajinzjapa tsjii warcuquiz luzziča. Nekz julziča. Tjappacha žoñinacaqui kot at tjiuquiz žejlchiča.

³ Jalla nekztanaqui Jesusaqui žoñinacžquiz walja Yooz puntunaca tjaajinchiča, tjapan quintunacžtan. Jalla nuž tjaajincan tuž cjichiča:

—Tsjii žoñiqui zkal čhjaqui tewcchiča.

⁴ Zkala čhjaccan, parti simillaqui jicz latuquiz tjojtsiča. Nekztan wežlakaz nii simillac ilziqui.

⁵ Parti simillazti maz yokaran tjojtsiča. Nekziqui anaž wacchi pjila želatča. Nekztan koloculla pjila želan ratulla jecziča.

⁶ Jalla nuž jecztiquiztan sii kjakiqui ujchiča; koluc sep'allchiztača nekztan. Ratulla kjonchiča.

⁷ Parti simillazti ch'ap ch'ap yokaran tjojtsiča. Ch'apinacakazza ancha pajkchiqui, nižaza atipchiqui.

⁸ Parti simillazti zuma yokquiz tjojtsiča. Nekztan zuma pookchiča. Yekjap simillaqui patac čhjerchiz zapa zkal ozquiz pookchiča; nižaza yekjap simillaqui sojta tuncan čhjerchiz zapa zkal ozquiz pookchiča; yekjap simillaqui quinsa tuncan čhjerchiz pookchiča.

⁹ Jakziltažlaja nonžni cjuñchiz niiqui, nonžla.

¹⁰ Jalla nekztanaqui tjaajinta žoñinacaqui Jesusižquiz macjatchiča, nižaza pewcziča, tuž cjican:

—¿Kjažtiquiztan am nižta quintunacžtankaz žoñinacžquiz tjaajinya?

¹¹ Jesusaqui kjaaziča tuž cjican:

—Arajpach Yooz mantuquiz kamz puntuquiztan ch'aman intintazzuca quintunacžtan tjaajnuča. Ančhucaquizkaz Yoozqui zizkatz munča nii puntunacquiztanaqui. Parti žoñinacžquiziqui Yoozqui ana zizkatz munča.

¹² Jequit zizačhaja, jalla nižquiziqui juc'ant tjaajinz tjaataž cjequiča. Nekztan zumpacha zizniž cjequiča. Jequit ana zizačhaja, jalla niž kuzquiztan kjañtaž cjequiča nii ana intintaztanacaqui.

¹³ Jalla nižtiquiztan wejrqui tižta quintunacžtan paljajuča. Parti žoñinacaqui weriž paata cheržcumi ana cherchižtakaz cjissa. Nižaza weriž chiita taku nonžcumi, ana nonžnižtakaz tucča; ana intintazni žoñinacača ninacaqui.

¹⁴ Jalla nižta cjissiz cjen, Isaías profetž taku cumplissa. Jalla tuž Isaiasqui cjiirchiča: “Ančhucqui nonznaquiča. Nonžcu, ana intintazaquiča. Nižazaž cheraquiča. Cheržcu, anaž tantiyasaquiča.

¹⁵ Tii žoñinacž kuznacaqui chojru cjissiča; ana zumaž nonža. Nižaza čhjujčchiz cjenami ana cheržni atča, zur žoñižtakaz. Jalla nuž cjisnaquiča, ana cheržni cjisjapa, nižaza ana nonžni cjisjapa, nižaza ana kuzquiz intintiñi cjisjapa, nižaza ana wejtquin macjatzjapa. Ana wejtquin tjontiquiztan, ana liwriita cjesača”.

¹⁶ ‘Ančhucča cuntintu. Ančhucqui cheržni žoñinacčhucča. Nižaza nonžni žoñinacčhucča. Ančhucča Yooziž wintižtaqui.

¹⁷ Weraral cjiwča. Wacchi profetanacami nižaza zuma kuzziz žoñinacami ančhucaž chertanaca cherz zakaz pecatča. Pero ana cherchiča. Nižaza ančhucaž nonžtanaca nonz zakaz pecatča. Pero ana nonziča. Ančhuczti cherchinčhucča, nižaza nonz-inčhucča.

¹⁸ Jazic ančhucž nonžnalla. Jalla tuž cjiča nii zkala čhjacz quintuqui.

¹⁹ Nii jicz latuquiz tjojtsi simillaqui jalla tižta žoñinacača. Ninacaqui arajpach Yooz mantuquiz kamz puntuquiztan nonzcanpacha, ana intintazza. Diabluqui ninacž kuzquiz tjonžcu, ninacaž intintazta kjañča.

²⁰ Nižaza nii maz yokquiz tjojtsi simillaqui jalla tižta žoñinacača. Ninacaqui Yooz taku nonžcu nii ora cuntintuž nonža; cuntintuž catokča.

²¹ Pero ninacaqui ana tjapa kuztan catoktiquiztan zkoluc zep'ichiz zkalažtakazza. Jalla nižtiquiztan ana tjuraquiča. Yooz taku criichiž cjen, sufraquiča; nižaza ch-jaawjkattaž cjequiča. Jalla nekztan orallaž quejpsnaquiča.

²² Nižaza nii ch'ap yokquiz tjojtsi simillaqui jalla tižta žoñinacača. Ninacaqui Yooz taku nonžcu, catokča. Pero nekztan juc'anti kuz tjaacha tii muntu cusasanacquiz. Wali jiru kamzpanž pecča. Persun kuzquiz pectiquiztanaqui Yooz taku tjažta ninacž kuzquiz. Jaziqui ana zuma kamča; ana pookni zkalažtakaz kamča.

²³ Nižaza nii zum yokquiz tjojtsi simillaqui jalla tižta žoñinacača. Ninacaqui Yooz taku nonžcu, zuma tjapa kuz catokča; zuma intintiča. Jalla nižtiquiztan zuma

kamañchiz cjissa, zuma pookchi zkalažtakaz. Nii zuma pookñi žoñinacaqui zuma kamañchizpanž cjissa, jaknužt tsjii simillaqui patac čhjerchiz, sojta tunc čhjerchiz, quinsa tunc čhjerchiz pookčhaja, jalla nižtača.

ANA WAL PASTU QUINTU

²⁴ Tsjii quintužtan quint'ichiča Jesusaqui, tuž cjican:

—Arajpach mantiñi Yooz puntuqui jalla tužuča. Tsjii žoñiqui zuma similla čhjaczhiča zkal yokquiz.

²⁵ Tjapa niž kjuychiz žoñinacaž tjajan, tsjii quintra žoñiqui tjonchiča. Nekztan zkalquiz ana wal pastunaca čhjaczhiča. Jalla nuž ana wal čhjaczcu, ojkchiča.

²⁶ Nii tric zkala jecztan, chicapacha pajkchiča nii ana wal pastunacaqui. Nižaza pizcpacha pookchiča.

²⁷ Jalla nii cheržcu, nii piyunanacaqui patrunžquin mazñi ojkchiča. Niižquin mazziča, tuž cjican: “Wejt Patruna, amiž čhjacta simillaqui zumažlaj niiqui, ¿jakziquiztan tii ana wal simillanaca pajkchitaya?”

²⁸ Patrunaqui kjaaziča, tuž cjican: “Tsji quintra žoñiqui nižta paačhani”. Jalla nekztanaqui piyunanacaqui pewcziča tuž cjican: “¿Wejrnacqui nii ana wal pastunaca k'achasaya?”

²⁹ Nii patrunaqui cjichiča: “Ana k'achaquiča. Ana wal pastu k'achcan yekjap tricžtanpachaž k'achnasacha.

³⁰ Antiz pizcpacha pajkla, kujich timpu tjonzcama. Jalla nekztan wejt piyunacnacaqui cuchantaž cjequiča. Ninacaqui anawal pastunaca ricujaquiča. Nekztan kojchquiz čhejlznaquiča ujzjapa. Jalla nekztanaqui tricuz ricujžcu, wejt tiric yaaz kjuyquiz majcznaquiča”.

³¹ Nižaza Jesusaqui tsjii puntuzakaz quint'ichiča, tuž cjican:

—Arajpach Yooz mantiz puntuqui tužuča. Tsjii žoñiqui niž yokquiz mostas similla čhjaczhiča.

³² Mostas simillaqui parti simillquiztan juc'ant zkoltallača. Jalla nuž cjenami pajkžcuqui tjapa zkalanacquiztan tsjan pakjiča. Pajk muntižtakaz cjissa. Nekztan wežlanacaqui nii mostas munti itzquiz tjuraž tjacñiž tjonča.

LIWATUR QUINTU

³³ Jesusaqui tsjii quint'ichizakazza, tuž cjican:

—Arajpach Yooz mantiz puntuqui jalla tužuča. Tsjaa maatak žonqui čhjep medida tupžcu nii liwatura jac'uquiz utchinča; nižaza t'ajzinča, tjapa nii t'anti maza tsijtkatzjapa.

³⁴ Tjapa tjaajintanacami quintunacžtan paljaytatača. Arajpach Yooz puntuquiztan tjaajincan, Jesusaqui quintunacžtankaz tjaajinchiča.

³⁵ Jalla nuž tjaajincan, Jesusaqui tuqita profetaž chiita takuqui cumplissiča. Profetaqui jalla tuž cijrchiča:

“Quintunacžtankaz chiyuča. Tii muntu kallantitiquiztan weriž chiita tjaajintanaca ana intintazzucača. Jalla nii ana intintaztanaca paljajuča”.

ANA WAL PASTU QUINTU INTINTAZKATTA

³⁶ Jalla nižta puntunaca chiiz žeržcu, Jesusaqui žoñinacžquiztan ojkchiča; kjuyquiz luzziča. Jalla nicju niž tjaajinta žoñinacaqui macjatchiča, tuž cjican:

—Nii zkal yokquiz čhjacta ana wal pastu, jalla nii puntuquiztan wejtnacaquiz intintazkatalla.

³⁷ Jalla nekztanaqui Jesusaqui intintazkatchiča tuž cjican:

—Wejrqui tsewctan cuchanzquita Yooz Zoñtča. Wejrtča zuma similla čhjaciñtqui.

³⁸ Nii zkal yokaqui tii muntuča. Nii zuma zkalanacaqui cjiča, arajpach Yooz mantuquiz kamñi žoñinacača nii. Ana zuma pastunacaqui diabluž mantuquiz kamñi žoñinacača.

³⁹ Nii ana wal pastu čhjacñimi diablupachača. Zkala ajz timpuqui tii muntu tucužinz timpuča. Nii zkala ajzñi piyunanacaqui Yooz anjilanacača.

⁴⁰ Jaknužt nii ana wal pastunaca ricujžcu, ujquin ujzjapa tjojttaž cječhaj niiqui, jalla nižta irataž wataquiča tii muntu tucužinžcan, ultim juyzuž nekz.

⁴¹ Jalla nii oraqui wejt anjilanaca cuchanžcača, tii muntuquiztan tjapa ana wal žoñinaca ricuji. Wejt anjilanacaqui tjapa ujnaca paakatñi žoñinacami, nižaza tjapa ana wali paañinacami ricujaquiča.

⁴² Jalla nuž ricujžcu, infienuquin tjojttaž cjequiča kjakchi jurnuquiztakaz. Jalla nekzi ančaž kaaquiča, nižaza waljaž izke kjojznaquiča.

⁴³ Yooz kuzcama kamñi žoñinacazti arajpach Yooz wajtquiz želaquiča, tjuñižtakaz kjančan. Jakziltat nonžni cjuñchizčhucžlaja, nonžna.

IYA QUINTUNACA

⁴⁴ Arajpach Yooz mantuquiz kamañaqui jalla tužuča. Tsjii yokquiz pajk paaz čhjojztatača. Tsjii žoñi qui nii čhjojzta paaz wajtchiča. Nii wajtžcu, wilta čhjojziča nekzpacha. Anča cuntintutača. Nekztanaqui tjapa niž cusasanaca tuyi ojkičiča. Niiž cusasanaca tjujžcu, nii yoka kjaychiča. Jalla nužuča arajpach Yooz kamañquiz luzqui. Nii kamañaqui čhjulquiztanami juc'anti valorchizza.

⁴⁵ Nižaza arajpach Yooz mantuquiz kamañaqui tužuča. Tsjii tintichiz žoñi qui zuma valorchiz perlanaca kjayi ojkičiča.

⁴⁶ Nekztan tsjii anča zuma valorchiz perla wajtchiča. Jalla nekztanaqui tjapa niž cusasanaca tuychiča, nii perla kjayzjapa.

⁴⁷ Nižaza arajpach Yooz mantiz puntuquiz tužuča. Tsjii ch'iz tanñi žoñinacaqui niž ch'iz tanz pajk kotquiz tjojtziča. Jalla nuž tjojtžtiquiztan tjapaman ch'iznaca tanchiča.

⁴⁸ Nekztan ch'iz tanz chjiipztanaqui, kot at tjiiquin jwessiča. Jalla nekztanaqui ninacaqui nijwc julžcu, ch'iz pjalziča. Zuma ch'iznaca canastiquiz yaaziča. Ana zuma ch'iznacazti tjojtchiča.

⁴⁹ Jalla nižta irataž tii muntu tucužinžtanaqui wataquiča. Anjilanacaqui ulanžcaquiča žoñinaca pjali, zuma žoñinaca ana zuma žoñinaca, nii.

⁵⁰ Nii ana zuma žoñinacaqui infienuquin tjojttaž cjequiča tsjii kjakchi jurnuquiztakaz. Jalla nekzi anča kaaquiča, nižaza izke kjojaquiča.

⁵¹ Jalla nekztanaqui Jesusaqui žoñinacžquiz pewcziča, tuž cjican: —¿Ančhucqui tjapa tii weriž chiita quintunaca intintiya?

Nii žejlñi žoñinacaqui kjaaziča, tuž cjican:

—Wejt Jiliri, wejrnacqui intintasuča.

⁵² Nekztan Jesusaqui cjichiča:

—Tsjii lii tjaajiñi maestruqui arajpach Yooz mantuquiz cjisnaquiž niiqui, tsjii kjuya patružažtakaz cjissa. Jalla nuž cjistiquiztan niž ziztanacquižtan zuma tjaajintanaca zizkatasuča, tuquita tjaajintami nižaza anzta tjaajintami.

⁵³ Jalla tii arajpach Yooz mantiz puntuquiztan chiiz žeržcu, jalla nekztan Jesusaqui ojkičiča, niž persun yoka.

⁵⁴ Jalla nicju irantižcu, ajcz kjuyquiz tjaajñi kallantichiča. Nii nonžni žoñinacaqui ispantichiča tuž cjican: —¿Jakziquin tii žoñizti anča tižtanaca zizni cjissitajo? ¿Kjažt anča tižta milajrunaca paasajo?

⁵⁵ Carpinterož majchkazza tiiqui. Tiiž maaqui María cjitiča. Nižaza tiiž lajknacaqui Jacobočha, Joseča, Simonača, nižaza Judassa.

⁵⁶ Nižaza tiiž cullaquinacaqui učumnacžtan kamča. Jalla nižtiquiztan, ¿jakziquin tiiqui tižtanaca zizzitajo?

⁵⁷ Jalla nižta pinsitiquiztan ninacaqui Jesusižjapa quintra cjissiča. Pero Jesusaqui ninacžquiz cjichiča:

—Persun wajtchiz žoñinacami, nižaza persun kjuychiz žoñinacami tsjii Yooziž uchta profetžquiz ana rispitcha. Parti žoñinacazti nižquiz rispitcha.

⁵⁸ Jalla nižtiquiztan nekzi ana ancha milajrunaca paachiča, nii wajtchiz žoñinacaqui Jesusižquiz ana criichiž, nekztan.

14

JUAN BAUTISTA CONTA

¹ Jalla nii oranaca Herodes cjita jiliriqiu Jesusiž quintu nonchiča.

² Jalla nuž nonžcu, niž piyunanacžquiz cjichiča:

—Juan Bautistala tiqiu. Ticziquiztan jacatatchila. Jalla nižtiquiztan walja milajrunaca paazjapa poderchizlani.

³ Jalla nuž tsucchiča Herodes jiliriqiu. Tuquiqui Herodesqui Juan tankatchiča. Chejlžcu carsilquin chjitchiča. Jalla nuž paachiča, niž tjunaž cjen. Niiž tjunqui Herodías cjitiča. Tuquiqui naaqui niž jilž tjuntača. Felipe cjitatača Herodes jilaqui.

⁴ Jalla nižta anawali zalziž cjen, Juanqui Herodižquiz chiižinchicha tuž cjican:

—Naa maatak žon anaž am tjun cjichuca. Felipež tjunča naaqui.

⁵ Jalla nuž chiižintiquiztan Herodes Juan conz pecatča. Pero žoñinaca ekskcu ana atchiča. Tjapa žoñinacaqui Juanžquiz rispitchiča tuquta Yooz taku parliñi profetažtakaz.

⁶ Nii Herodesqui niž persun cumpleañ tjuñquiziqui pjijsta paachiča. Jalla nuž pjijsta paan, naa Herodías majtqui ulanžquichinča, invittaž žoñinacž yujcquiz tsati. Jalla nuž tsatan ancha justassiča Herodesqui.

⁷ Zuma tsattiquiztan Herodesqui taku onziča, tuž cjican:

—Chjulum mayčhaja, jalla nii tjaasača.

⁸ Ima mayan maaqui mataquiz mantichinča, Juanž acha mayzjapa. Jalla naaža maaž chiita takucama Herodesquiztan maychinča, tuž cjican:

—Tsjii chuwquiz Juan Bautistaž acha tjaalla.

⁹ Jalla nuž maytiquiztan Herodesqui llact'azziča. Pero invittaž žoñinacž nonznan taku onziča. Jalla nižtiquiztan naaža maytacama mantichiča.

¹⁰ Juanqui carsilquiz želatča. Jalla nijwc cuchanchiča, Juanž acha pooti.

¹¹ Jalla nekztanaqui tsjii chuwquiz acha zjičžcu, naaquiz tjaatatača. Nekztan naaqui maaquinž tjaachinča.

¹² Jalla nii quintu nonžcu, Juanž tjaajinta žoñinacaqui Juanž curpu chjichi tjonchiča. Nekztanaqui nuž chjichcu niž curpu tjatziča. Jalla nuž tjažžcu, Jesusižquin mazñi ojkchiča.

LUJLZ CHJERI TJAATA

¹³ Nii quintu nonžcu Jesusaqui najwk ojkchiča, ana žoñi žejlž yokquin. Warcuquiz ojkchiča. Pero žoñinacaqui nuž ojkchi quintu nonchiča. Jalla nekztanaqui ninacaqui nii yokaranpacha wajtanacquiztan ulanchiča. Jesusižquin wilta zali kjojchin ojkchiča.

¹⁴ Warcuquiztan ulanžcu Jesusaqui tama žoñinaca cherchiča. Jalla nuž cheržcu niž kuzquiz sint'ichiča ninacžtajapa. Nekztan zjičta laanaca čjetinchiča.

¹⁵ Waj zezi cjisnan niž illzta žoñinacaqui Jesusižquin tjonchiča, tuž cjican:

—Waj zezilla. Chjeri pecča. Tii yokquiziqui anaž čhjeri žejl-la. Jalla nižtiquiztan tii žoñinaca cutzna. Okaj cjee, joch kjuyaran čhjeri kjayžcumi lulačhani tinacacni.

¹⁶ Jesusaqui ninacžquiz cjichiča:

—Anaž cuchta cjesača. Ančhucaž čhjeri tjaaquiča.

¹⁷ Nekztanaqui ninacaqui kjaaziča, tuž cjican:

—Wejtnacalta ana lujlž chjeri žejlčha. Pjijska t'antalla pizc ch'iztankaz žejlčha.

¹⁸ Jesusaqui ninacžquiz cjichičha:

—Nii chjeri wejtzquiz zjijca.

¹⁹ Jalla nekztanaqui Jesusaqui žoñinacžquin mantichičha, pasturan julzna cjee. Jalla nuž julzkatžcu nii pjijska t'anta nii pizc ch'iz persun kjaržtan tanzičha. Tanžcu tsewcchuc arajpach kjutñi cherzičha, nižaza Yooz Ejpžquin gracias cjican čiichičha. Nekztanaqui t'anta kjolžcu tjaajinta žoñinacžquiz tojunchičha. Nekztan ninacaqui parti žoñinacžquin partir paychičha.

²⁰ T'antanaca ch'iznaca lujlžcu liwjpačha nii žoñinacaqui chjekchi cjissičha. Nižaza nii t'antiquiztan nii ch'iznacquiztan žejtchinacaqui tuncapan canasta chjijpi ricujtačha.

²¹ Jalla nii t'anta ch'iz lujlchi žoñinacaqui pjijska warank luctakanacatačha. Maatakanacami ocjalanacami ana kantatačha nii oraqui.

JESUSAQUI KJAZ JUNTUÑ OJKCHA

²² Nekztanaqui Jesusaqui niž tjaajintanaca warcuquiz luzkatchičha, niž tuqui kota kakjayajo tsjiu latu kotquin irantizcama. Jesusazti nii žejlñi žoñinacžquiz persun kjuyquin okaj cjican nijwctan najwkchuc cuchanchičha.

²³ Jalla nuž cuchanžcu Jesusaqui curulla yawchičha, zinalla Yooz Ejpžtan parlisjapa. Jalla nuž mayizan ween cjissičha. Nicju zinatačha Jesusaqui.

²⁴ Nii oraqui niž tjaajinta žoñinacaqui kotž taypiquin okatčha. Tjamiqiu warcuž quintra walja tjamatčha. Nižaza kjaz ljojkimi warcu waljaž aytinguiskatatčha.

²⁵ Wali chawc kjantati Jesusaqui ninacžquin žcatžinchičha, kjaz juntun ojkcan.

²⁶ Niž tjaajinta žoñinacaqui, Jesusa kjaz juntun tjoñi cheržcu, ancha tsucchičha, nižaza kjawchičha, tuž cjican:

—Cuntinažlani —cjican kjawchičha.

²⁷ Pero ninacaž kjawan Jesusaqui ninacžquiz paljayžquichičha, tuž cjican:

—Tjup kuzziz cjee. Wejrpančha. Anaž tsuca.

²⁸ Nekztanaqui Pedruqui paljaychičha, tuž cjican:

—Wejt Jiliri, amžlaj niiqui, wejr kjawznalla kjaz juntun ojkzjapa am irantiscama.

²⁹ Jesusaqui nižquiz cjichičha:

—Pichalla amqui.

Nekztanaqui Pedruqui warcuquiztan ulanžcu, kjaz juntun oki kallantichičha, Jesusa jakziquin tjenatčhaja, jalla nicju.

³⁰ Nii walja tjamiž cjen tsucchičha. Tsucžcu, kjazquiz luzi kallantichičha. Nekztan kjawchičha, tuž cjican:

—Wejt Jiliri, wejr yanapalla, wejr žejtkatalla.

³¹ Nii orapacha Jesusaqui Pedruž kjara tanzičha, nižaza nižquiz cjichičha:

—Ancha upa kuzzizamčha amqui. ¿Kjažtiquiztan am kuz turwayskatchamtaya?

³² Ninacaž warcuquin luztan, tjamiqiu zekchičha.

³³ Jalla nii cheržcu warcuquiz žejlñi žoñinacaqui Jesusiž yujcquiz quillzičha, tuž cjican:

—Chekapan werara Yooz Maatimkalala amqui.

LAANACA CHJETINTA

³⁴ Jalla nuž kota kajkžcu, Genesaret cjita yoka irantichičha.

³⁵ Nii yokchiz žoñinacaqui Jesusa pajchičha. Jalla nekztan “Jesusa tekz žejlčha”, cjican liwj nii yokaran mazmazzičha. Nii quintu maztiquiztan tjapa laanaca zjijcchičha, jakziquin Jesusa želatčhaja, jalla nicju.

³⁶ Nii žoñinacaqui Jesusižquiz walja rocchičha, tuž cjican: —Am zquit puntalla mekaz lanzkatžinalla. Tjapa lanzñi žoñinacaqui žejtchi cjissičha.

15

UJ PUNTU

¹ Jalla nekztanaqui tsjii kjaž fariseo žoñinacaqui nižaza tsjii kjaž lii tjaajiñi maestruncztanpacha Jesusižquiz macjatchičha. Ninacaqui Jerusalén wajtquiztan tjonchičha. Jesusižquiz pecunchičha, tuž cjican:

² —¿Kjažtiquiztan amiž tjaajintanacaqui učhum tuquita atchi ejpnacž custurumpi ana cazjo? Ana kjara awjžcu, lujl-la.

³ Pero Jesusaqui ninacžquiz pewczičha, tuž cjican:

—Ančhuczi, ¿kjažtiquiztan Yooz mantita lii ana cazjo? Nii lii caz cjenpacha persun custurumpinacaz paala ančhucqui.

⁴ Yoozqui tuž cjichičha: “Am maa ejpmi rispitaquičha”. Nižaza cjichičha: “Jequit persun maa ejpž quintra chjaawjkatačhaja, jalla niiqui contaj cjila”.

⁵ Pero ančhuczi tuž tjaajiñchucčha: Zoñiqui persun maa ejpžquin chiyasačha, tuž cjican: “Am anal yanapasačha. Tjapa wejt cusasanaca Yoozquin tjaatačha nekztan”.

⁶ Jequit nižta chiyachaj niiqui, niž persun maa ejpžquiz anaž yanapchuca cjesačha. Jalla nuž tjaajincan ančhucqui Yooz mantita ana walkatchinčhucčha, persun custurumpi jarukaz ojkzjapa.

⁷ Ana wal kuzziz žoñinaca. Isaías cjita profetaqui ančhucua puntuquiztan zuma kjana cijrchičha, tuž cjican:

⁸ “Tii žoñinacaqui atžtankaz wejtquiz rispitičha. Pero tinacž ultim kuzzi wejtquiztan ažquinčha. Nižaza wejr anaž rispitičha.

⁹ Tinacaqui inakaz wejtquin custurumpi paačha. Tinacž tjaajintanacaqui žoñiž mantitakazza”.

¹⁰ Jalla nekztanaqui Jesusaqui žoñinaca kjawzičha, nižaza tuž cjichičha:

—Nonžna, nižaza intintazni kuzziz cjee.

¹¹ Anaž zawnctan kjuylchuc žoñž atquiz luzniiqui uj cjesačha žoñžquiziqui. Antiz žoñž atquiztan ulanñi, jalla niž uj cjesačha žoñžquiziqui.

¹² Jalla nuž chiitiquiztan Jesusiž tjaajinta žoñinacaqui nižquin macjatchičha, nižaza cjichičha:

—Nii fariseo žoñinacaqui am chiita taku nonžcu ancha žawjwatčha. ¿Nii ana naychamjo?

¹³ Pero Jesusaqui ninacžquiz kjaazičha, tuž cjican:

—Jakzilta zkalat wejt arajpach Yooz Epiž ana čjacta cječhaja, jalla nii zkalaqui zep'ižtanpacha kajlžtaž cjequičha.

¹⁴ Ninacžquiz ana chjijquiza. Ninacaqui zur žoñinacžtakazza. Yekja zuranacžquiz irpican, pucultanpacha wali ojtquiz tjojtsnasačha.

¹⁵ Pedruqui Jesusižquiz cjichičha:

—Tii puntuquiztan wejtnacaquiz tjaajznalla.

¹⁶ Jesusaqui cjichičha:

—¿Ančhucqui zakaz ana intintiya?

¹⁷ Tjapa atquiz luzni čjeriqui pjuchquiz luzza, nekztan wir kjutniž ulančha. ¿Jalla nii ana intintiya?

¹⁸ Pero atquiztan ulanñi chiitaqui kuzquiztan tjončha. Jalla nii žoñžquiziqui uj cjesačha.

¹⁹ Kuzquiztanpanž ulančha tižtanaca, ana wali pinsisnacaqui, nižaza žoñi conzqui, nižaza adulteriuquiz ojklayzqui, nižaza yekja maatakžtan žejlzqui, nižaza cusasanaca kjañzqui, nižaza toscar taku chiizqui, nižaza ana wal taku joojoozqui.

²⁰ Jalla nižtanaca uj cjesačha žoñžquiziqui. Pero ana kjara awjžcu, jalla nižta lujlžcu, anapan uj cjesačha. Jalla niiqui žoñž custurumpikazza.

YOOZQUIN KUZZIZ MAATAKA

²¹ Jalla nekztanaqui Jesusaqui nijwctan ojkchiĉha Tiro niĉaza Sidón cjita yokquin.

²² Jalla nijwc Źelan tsjaa cananea yokchiz Źoñqui Jesusiĉquiz tjonzinĉha, kjawcan:

—Wejt Jiliri. Davidĉ majchmajtquiztan tjonñi. Wejr oksnalla. Wejt majtqui zajraĉ tantachiĉha. Jalla niĉtiquiztan ana wira wali laaĉha.

²³ Jesusaqui ana ĉjulumi kjaaziĉha. Jalla nekztan niĉĉ tjaajinta Źoñinacaqui roqui tjonchiĉha, tuĉ cjican:

—Tsjiiika oka cjee. Uĉhum wirquiz kjaw jawi apĉquiĉha.

²⁴ Nekztanaqui Jesusaqui cjichiĉha:

—Yooz Ejpqui wejr cuchanĉquichiĉha Israel wajtchiz Źoñinacĉquin, ninacĉquinkaz. Nii Israel Źoñinacaqui katchi uuzanacaĉtakazza.

²⁵ Pero naa maatak Źoñqui macjatĉquichinĉha, niĉaza niĉĉ yujcquiz quillzinĉha, tuĉ cjican:

—Wejt Jiliri, wejr yanapt'alla.

²⁶ Nekztan Jesusaqui naaquiz cjichiĉha:

—Maatinacĉ t'anta ana kjañasaĉha, pawcĉquin tjaazjapaqui. Jalla niiqui ana wali cjesaĉha.

²⁷ Jalla nuĉĉ chiiĉzinta cjenami naaqui cjichinĉha:

—Jesalla, wejt Jiliri. Pero pacunacami patrunaĉ mizquiztan tjawkzi ĉhjerilla lujlĉha.

²⁸ Jalla nekztanaqui Jesusaqui cjichiĉha:

—Cullacalla, walja Yoozquin kuzzizamĉha. Jaknuĉzum am pecĉhaja, nuĉoj cjila.

Jalla nii orapacha naaĉa majtqui Źejtchi cjissinĉha.

LAANACA CHJETINTA

²⁹ Jalla nekztanaqui Jesusaqui nijwctan ulanchiĉha, Galilea cjita kot ata watchiĉha. Nekztan tsjii curulla yawĉcu julziĉha.

³⁰ Tama Źoñinacaqui irantiĉquichiĉha, jakziquin nii Źelatĉhaja, jalla nicju. Ninacaqui laanaca zijcchiĉha, zuch Źoñinaca, zur Źoñinaca, ana chiiñi Źoñinaca, ĉhjojritĉta Źoñinaca, tjapaman laanaca, jalla ninaca zijctataĉha, Jesusiĉ yujcquin. Jesusaqui ninaca liwĉ ĉhjetinchiĉha.

³¹ Jalla nuĉĉ cherĉcu, Źoñinacaqui ancha ispantichiĉha. Ana chiiñi Źoñinacaqui chiiñi cjissičha. ĉhjojritĉta Źoñinacaqui Źejtchi cjissičha. Zuch Źoñinacaqui ojklajni cjissičha. Zur Źoñinacaqui cherñi cjissičha. Jalla nuĉĉ cherĉcu Źoñinacaqui walja Yooz honora waytichiĉha, "Israel Źoñinacĉ Yooz ancha honorchiz cjilalla", cjican.

JESUSAQUI CHJERI TJAACHA

³² Jalla nekztanaqui Jesusaqui niĉĉ tjaajinta Źoñinaca kjawĉcu, tuĉ cjichiĉha:

—Tii Źoñinacĉtajapa kuzquiz anchal sint'uĉha. ĉhjep maj wejttan chica Źejlĉha, niĉaza ana ĉjul ĉhjerchizza. Persun kjuyanacquin anal cutz pecuĉha ana lujlchi cjen. Tinacaqui ana lujlchi okaquiĉ niĉqui, jiczaranĉ tismayasaĉha.

³³ Nekztan niĉĉ tjaajinta Źoñinacaqui cjichiĉha:

—ĉJaknuĉt ĉhjeri cunsicas, tii wacchi Źoñinacĉtajapajo? Tii yokquizic anaĉ kjayzmi Źejlĉha.

³⁴ Jesusaqui ninacĉquiz pewcziĉha, tuĉ cjican:

—ĉKjaĉ t'antichizt anĉhucjo?

Ninacaqui kjaaziĉha, tuĉ cjican:

—Pakallak t'antaĉha, niĉaza tsjii kjaĉ ĉ'iznacĉtan.

³⁵ Jalla nekztan Jesusaqui nii Źoñinacĉquiz mantichiĉha, yokquiz julznajo.

³⁶ Nekztan persun kjarĉtan nii pakallak t'anta ĉ'iztanpaĉha tanzičha. Jalla nekztan Yoozquin gracias cjican tjaachiĉha. Nekztan nii t'antanaca ĉ'iznaca kjolkjolziĉha.

Nekztan niiz tjaajinta zoñinaczquiz toj tojziča. Nekztan ninacazti partir paychiča nii tama zoñinaczquiz.

³⁷ Tjapa nii tama zoñinacazti čhjeri lujlžcu chjekchi cjissiča. Nižaza žejtchinacaqui pakallak canasta chjijpi ricujtatača.

³⁸ Pusi warank luctak zoñinacatača lujlchiqui. Nižaza nii oraqui maatakami ocjalami muzpa želatčhay, pero ana kantatača.

³⁹ Jalla nekztanaqui Jesusaqui nii zoñinaczquiz liwj cuchanchiča okajo. Niimi warcuquin luzziča. Nekztan Magdala cjita yokquin ojkchiča.

16

JESUSIZ QUINTRA ZOÑINACA

¹ Fariseo zoñinacami, saduceo zoñinacami Jesusa chertzni ojkchiča. Jesusiž quintra uj jwes pecatča. Jalla nižtiquiztan Jesusižquiztan maychiča, arajpach milajru tjeeznajo, tsjii sinalažtakaz.

² Jesusaqui ninaczquiz kjaaziča, tuž cjican:

—Zezilla arajpach tsjiri ljoc cjissi cjen, “Jakac zuma tjuñiž cjequiča” cjiñchucča.

³ Nižaza wentan tjuñi tjewktan arajpach tsjiri ljoc cjissi cjenaqui, walja tsjiri cjenaqui, “Tonjiqui ana zum tjuñiž cjequiča” cjiñchucča. Ana zum kuzziz zoñinaca. Ančhucqui tsewcta tsjiri chertzcu, zuma tjuñi ana zuma tjuñi cječhaja, jalla nii zumpacha zarayiñchucča. Pero ančhucqui weriž paata sinalanaca chertzcu, ana zuma zarayiñchucča.

⁴ Ana zum kuzziz zoñinacaqui Yoozquiztan zarakchiž cjen, sinala sinala mayča. Ančhucztajapa Jonás puntuqui siñalažtakaz žejlča. Ana iya tjeežta cjequiča. —Jalla nuž chiižcu Jesusaqui ninaczquiztan zarakchiča.

⁵ Niiz tjaajinta zoñinacaqui kotquin tsjii latu kajkchiča. Nižaza t'anti žaka chjitz tjatstkalča.

⁶ Nekztanaqui Jesusaqui ninaczquiz cjichiča:

—Tii taku nonžna. Fariseo zoñinacz liwaturžquiztanami nižaza saduceo zoñinacz liwaturžquiztanami zumpacha cwitasaquiča.

⁷ Jalla nii chiita nonžcu, tjaajinta zoñinacaqui ninacpora parlassiča, tuž cjican:

—Učhumqui ana t'anta zjijtača, jalla nižtiquiztan nižta chiča.

⁸ Jesusaqui ninacz pinsita zizcu, ninaczquiz paljaychiča tuž cjican:

—¿Kjažtiquiztan ančhucqui t'antiquinkaz pinsejo? Ančhucqui ancha upa kuzzizčhucča.

⁹ Anapanž ančhucqui wira intintas, žtižta ana cjuñzjo? Pjijska t'antiquiztan pjijska warank luctak zoñžquiz partir payžcu lujlkatchinla. Nekztan ¿kjaž canasta nii žejtchi t'antanaca ricujtataya?

¹⁰ Nižaza pakallak t'antiquiztan pusi warank luctak zoñžquiz partir payžcu lujlkatchinla. Nekztan ¿kjaž canastat nii žejtchi t'antanaca ricujtataya?

¹¹ Fariseo zoñinacz puntuquiztanami nižaza saduceo zoñinacz puntuquiztanami, jalla nii liwatur puntu chiichinča. Jalla nii chiitaqui anača ultim t'anti puntuquiztanaqui. ¿Anaž nii intintas, ančhucya?

¹² Jalla nekztanaqui ninacaqui zumpacha intintazziča. Jesusaqui ultim t'anti liwaturquiztan ana nii puntu chiižinchiča. Pero fariseož tjaajinta puntuquiztan nižaza saduceož tjaajinta puntuquiztan, jalla nii puntu chiižinchiča, jalla nii tjaajintanacquiztan cwitasaquiča, cjican.

¿JECT JESUSAQUI?

¹³ Jalla nekztanaqui Jesusaqui Cesarea de Filipino cjita yokquin ojkchiča. Nii irantižcu, niiz tjaajinta zoñinaczquiz pewcziča, tuž cjican:

–Wejrqui tsewcta cuchanžquita Yooz Zoñtča. Zoñinacaqui wejt puntuquiztan ¿kjažt cjeejo?

¹⁴ Ninacaqui kjaaziča, tuž cjican:

–Yekjapanacaqui am puntuquiztan tuž cjicha: “Juan Bautistača niiqui”. Yekjapanacaqui cjicha, “Eliassa niiqui”. Nižaza yekjapanacaqui cjicha, “Jeremiassa niiqui”. Nižaza yekjapanacaqui cjicha, “Tsjii yekja profetača niiqui”.

¹⁵ Jalla nekztanaqui Jesusaqui ninaczquiz pewcziča, tuž cjican:

–Ančuczti wejt puntuquiztan ¿kjažzaž cjeejo?

¹⁶ Simón Pedruqui tuž cjichiča:

–Yooziž uchta Cristumča amqui, žejtñi Yooz Maatimča.

¹⁷ Jesusaqui nekztan cjichiča:

–Simón, Jonás maati, jalla nuž chiitiquiztanaqui cuntintum cjee amqui. Anaž jakzilta žoñimi amquiz nii tjaajinchiqui. Wejt arajpach Yooz Ejppankazza am zizkatchiqui.

¹⁸ Amquiz cjiwča. Tekztan najwkchuc amqui Pedro cjitam cjequiča. Nižaza tii maz simintuchiz wejrqui wejt icliza kjuyača. Wejt iclizaqui wejtquin kuzziz žoñinacača. Ticzmi wejt iclizquiztan ana atipasača.

¹⁹ Wejrqui amquiz llawižtakaz poder tjaača žoñinaca arajpach Yooz mantuquiz luzkatzjapa. Tii muntuquiz amqui jequit Yooz mantuquiz luzkatačhaja, jalla niiqui arajpach Yooz wajtquin luzkatta zakaz cjequiča. Nižaza tii muntuquiz jequit Yooz mantuquiz ana luzkatačhaja, jalla niiqui arajpach Yooz wajtquin ana luzasača.

²⁰ Jalla nekztanaqui Jesusaqui niž tjaajinta žoñinaczquiz mantichiča, tuž cjican:

–Anaž jeczquizimi maznaquiča, “Niiča Cristuqui” cjicanaqui.

JESUSAQUI NIIZ TICZ PUNTU CHIICHA

²¹ Nekztan najwkchuc Jesusaqui tjaajinta žoñinaczquiz niž ticz puntuquiztan paljaji kallantichiča, tuž cjican:

–Wejrqui Jerusalén watja ojkstanča. Jalla nicju nii wajtchiz jilirinacami, nižaza timplu jilirinacami, nižaza lii tjaajiñi maestrunacami jalla ninacaqui wejr walja sufriskataquiča. Ultimquiziqui wejr conaquiča. Jalla nuž contiquiztan čhjep majquiztan jacatatača.

²² Nekztanaqui Pedruqui Jesusa tsjii latu chjitchiča, chiižinzjapa. Chiižinzcan, tuž cjichiča:

–Wejt Jiliri, amiž nuž chiitacama Yooz Ejpqui anaj niic nuž munlalla. Amquiz anaj nižta watlalla.

²³ Jalla nuž chiitiquiztan Jesusaqui Pedruž kjutñi kjutziča, tuž cjican:

–Satanás, wejtquiztan zaraka. Amqui wejr ujquiz tjojtskatz pecča. Am kuz pinsitaqui anaž Yooz pinsita, antiz žoñiž pinsitakazza.

²⁴ Jalla nekztanaqui Jesusaqui niž tjaajinta žoñinaczquiz cjichiča:

–Jequit wejttan chica kamz pecčhaj niiqui, primiruqui persun kamañ wiraqui tjazla. Sufrijsjapaqui listoj cjila, ticzcama. Nekztan wejttan chicaž kamaquiča.

²⁵ Jakzilat persun kamañ wira ana tjats pecčhaj niiqui, arajpach kamañuqui ana tjaataž cjequiča. Jakzilat wejt laycu persun kamañ wira tjaznačhaja, jalla niiqui arajpachquin wiñaya kamaquiča.

²⁶ Tsjii žoñiqui tjapa tii muntuquiz žejlñi cusasanaca kanasača. Pero nekztan in-fiernuquin okaquiž niiqui, tjapa nii kanta cusasanaca, ¿čhjulpapat sirwejo? Inakaz cjequiča. Arajpachquin Yooztan kamzqui persun liwriizqui anaž paaztanac kjayasača.

²⁷ Wejrqui tsewctan cuchanžquita Yooz Zoñtča. Tsjii noojiqui wejrqui wejt anjilancžtan quejpžcača; wejt Ejpž wali aztan quejpžcača. Jalla nuž quejpžcu, wejrqui zapa maynižquiz tjaača, jaknužt kamčhaja, jalla nii jaru tjaača.

²⁸ Wereral cjiwča. Tsjii noojiqui wejrqui mantiz poderžtan tjonača. Yekjap tekzi žejlñi žoñinacaqui nii noojcama ana ticznaquiča.

17

JESUSAQUI TSJEMATAZ CJISSICHA

¹ Sojta tjuñquiztan Jesusaqui Pedružtan, Jacobžtan, Juanžtan, Jacobož lajk, jalla ninaca chjitchiċha. Ninacžtan alaja nuž pajk curquin ojkžcu, yawchiċha.

² Jalla nicju ninacž yujcquin tsjemat chercherchiz cjissiċha. Jesusiž yujcqui walja c'ajñi cjissiċha tjuñižtakaz. Nižaza niž zquitimi muzpa llijñi cjissiċha, nižaza ancha chiwi.

³ Nii orapacha Moiestan Eliastan parizichiċha. Nii pucultan žoñiqui Jesusižtan parlican želatċha.

⁴ Jalla nekztan Pedruqui Jesusižquiz cjichiċha:

–Wejt Jiliri, tekz žejlžqui walikazza. Am pecaquiž niiqui, ċhjep ċhjujlli kjuyaž kjuyaċha wejrnacqui, tsjiiqui amta, tsjiiqui Moiesta, tsjiiqui Eliasta.

⁵ Pedruž nuž chiyān, zuma kjañi tsjiriċqui ninacžquiz urpuntichiċha. Tsjirquiztan tsjii jora chiižquichiċha, tuž cjican:

–Tiiċha wejt k'ayi Maatiqui. Tiiž cjen anchal cuntintutċha. Jalla tiiž takunaca catoka.

⁶ Jalla nii chiižquita nonžcuqui, nii ċhjep tjaajinta žoñinacaqui yokquiz tuzi t'okziċha. Muzpa tsucchiċha.

⁷ Jalla nuž tuzi t'okzi želan, Jesusaqui ninacžquiz macjatžquichiċha. Ninacžquiz kjaržtan lanlanžinchiċha, tuž cjican:

–Tsijsna. Anaċha tsuca.

⁸ Ninacaqui aċha waytižcu Jesusa alajakaz cherziċha, ana iya jecmi cherchiċha.

⁹ Nekztanaqui curquiztan ċhjiwžcan, Jesusaqui ninacžquiz mantichiċha, tuž cjican:

–Anaž jeczquizimi nii anċucaž ċherta maznaquiċha, weriž ticziquiztan jacatatta, jalla niicama.

¹⁰ Nekztanaqui niž tjaajinta žoñinacaqui Jesusižquiz pewcziċha, tuž cjican:

–Lii tjaajiñi maestrunacaqui cjiñiċha, primero Elías profetaqui tjonstanċha, nii. ĆKjažtiquiztan nii maestrunacaqui nižta chiiya?

¹¹ Jesusaqui kjaaziċha, tuž cjican:

–Ultimupanž Eliasqui wejt tuqui tjonchiċha. Niiqui tjappachaž tjacziċha, wejr tjonzjapa.

¹² Wejrqui cjiwċha. Eliasqui tjonchitala. Pero lii maestrunacaqui nii Elías ana pajchila. Antiz ninacž kuzcama nii Elías ċhjulumi sufriskatchiċha. Nižaza ninacaqui wejrzakaz ancha sufriskataquiċha.

¹³ Jalla nuž Jesusiž ċhiitiquiztan nii tjaajinta žoñinacaqui tantiyazziċha, Juan Bautistaċha Eliasqui, nii.

TSJII MAJCHQUI ZAJRAZ TUCKATTA

¹⁴ Jalla nekztanaqui curquiztan ċhjiwžcu, parti žoñinacžquiz irantižquichiċha. Nekztan tsjii žoñiqui Jesusižquiz macjatžcu, niž yujcquiz quillziċha. Nižaza tuž cjichiċha:

¹⁵ –Wejt Jiliri, wejt majchquiz okžnalla. Niiqui t'ucñipanċha. Ancha sufriċha. Avisac ujquiz tjojtsa, nižaza kjazquiz zakaz tjojtsa.

¹⁶ Tekz zjiċchinċha am tjaajinta žoñinacžquiz. Ninacaqui ana ċhjetñi atchiċha.

¹⁷ Jesusaqui kjaaziċha, tuž cjican:

–Tii timpuquiz kamñi žoñinacaqui ana Yoozquin kuzzizza, ana zumaċha. ĆĤjulorcamat wejr anċucatan želaqui? ĆĤjulorcamat anċucaquiz awantaqui? Wejtquin zijca nii am majch.

¹⁸ Jalla nekztanaqui Jesusaqui nii majch tanñi zajra ujziċha; nekztan ċhjatatchiċha. Jalla nii orapacha žejtċi cjissiċha.

¹⁹ Jalla nekztanaqui tjaajinta žoñinacaqui Jesusižquiz zinapora pewcziċha, tuž cjican:

–ĆKjažtiquiztan wejrnacqui zajraž tanta žoñi ana ċhjetñi atċhintaya?

²⁰ Jesusaqui kjaaziča, tuž cjican:

—Ančhucqui anača Yoozquin tjapa kuzziz. Jalla nižtiquiztan ana chjatkati atča. Weraral cjiwča. Tsji mostasa cjita simillaqui koltallača. Chjactiquiztan walja pakjiž pajkča. Yoozquin tjapa kuzzizčhuc cječhaj niiqui, jalla tuž paasača. Tii curumiž mantasača, tuž cjican: “Tekztan najwk oka”. Jalla nuž mantitiquiztan curucž okasača. Tjappacha čhjulumi paasača ančhucqui, ultimu Yoozquin tjapa kuztan cječhaj niiqui.

²¹ Pero tii punta zajra chjatkatzjapa, Yoozquin mayiziz waquiziča. Nižaza ayunas waquiziča.

²² Galilea yokaran juntupacha ojklaycan, Jesusaqui niž tjaajinta žoñinacžquiz chichiča, tuž cjican:

—Wejrqui tsewctan cuchanžquita Yooz Zoñtča. Wejrqui žoñinacž kjarquin intirjital cjeeča.

²³ Nižaza contal cjeeča. Nižaza čhjep majquiztanzi jacatatača.

Jalla nuž chiitiquiztanaqui ancha llaquisiskatchiča nii tjaajintanacžquiz.

TIMPLU IMPUESTO

²⁴ Nekztan Jesusižtan niž tjaajintanacžtanpacha Capernaum watja irantichiča. Nekztan timplujapa impuesto cobriñinacaqui Pedružquin chertzni ojkchiča. Jalla nižquin zalžcu pewcziča tuž cjican:

—¿Ančuca tjaajiñi maestruqui timplu impuesto ana pacñikaya?

²⁵ Pedruqui kjaaziča, tuž cjican:

—Impuesto pacñipančhay.

Jalla nekztanaqui Pedruqui kjuyquiz luzziča, jakziquin Jesusac želatčhaja, jalla nicju. Ima Pedruž chiyen, Jesusaqui nižquiz paljaychiča, tuž cjican:

—Simón, ¿tii tantiya? Tii muntuquiz žejlñi jilirinacaqui impuesto cobriñiča. ¿Jakziltižquiztan cobriya? ¿Persun wajtchiz žoñinacžquiztankaya? už ¿yekja wajtchiz žoñinacžquiztan, ja'?

²⁶ Pedruqui kjaaziča tuž cjican:

—Yekja wajtchiz žoñinacžquiztanpanča.

Nekztan Jesusaqui cjichiča:

—Jalla nižtiquiztan nii jilirinacž persun wajtchiz žoñinacaqui impuesto ana pacasača.

²⁷ Jalla nuž cjenami, anaž jecmi učum quintra iñiziñi cjiskatz pecuča. Jaziqui kotquin oka. Nekztan ch'iz tanzjapa kjazquiz anzuelo tjojtznaquiča. Primiru tanzi ch'iz leznaquiča. Nii ch'iz ata waakatžcu, tsji paaz wachaquiča. Nii paazqui wejt impuestojapa, nižaza am impuestojapa wacaquiča. Nii paaz chjicha, učum impuesto ana paczjapa.

18

¿JECT TUCQUIN CJES?

¹ Jalla nii orapacha tjaajinta žoñinacaqui Jesusižquiz macjatžcu pewcziča, tuž cjican:

—Arajpach Yooz wajtquiz, ¿ject juc'ant pajk puestuquin uchtaž cjeequi?

² Jalla nekztanaqui Jesusaqui tsji uza kjawziča. Nii uza ninacž taypiquiz tsjtskatchiča.

³ Nekztanaqui Jesusaqui cjichiča:

—Weraral cjiwča. Ančhucqui tii ocjalž kuz irata, nižta kuzziz pecča. Ančuca kuz ana campiita cječhaj niiqui, arajpach Yooz wajtquiz anapan luzasača.

⁴ Jalla nižtiquiztan tii ocjalž kuz irata, jalla nižta humilde kuzziz cjis waquiziča. Jakzilat nižta kuzziz cjisnaquiž niiqui, jalla niiča arajpach Yooz wajtquiz juc'ant honorchizqui. Juc'ant zuma puestuquiz uchtaž cjequiča.

⁵ Jequit weriž cjen tsjii ocjalažtakaz humilde kuzziz žoñi risiwčhaja, jalla niiqui wejrzakaz risiwčha.

PAAZQUIZTAN CWITASA

⁶ Nižaza jakzilta humilde kuzziz žoñit wejtquin tjapa kuztan criyačhaja, jalla nižquiz ana jakziltami ujquiz tjojtskatz waquizičha. Ujquiz tjojtskataquiž niiqui, nii ujquiz tjojtskatñi žoñž jorquiz tsjii pajk molinu tjaa mokžcu, koz kotquiz jacuntiz waquizičha. Jalla nii tsjan cusaž cjesačha nii ujquiz tjojtskatñi žoñžtaqui.

⁷ ¡Zoñinacajay! Ujquiz tjojtaquičha, nižaza ujquiz tjojtskataquičha. Pero nekztan ana walinaca tjonaquičha. Tii muntuquiz ujquiz tjojtskatñinaca panž želaquičha, pero nii ujquiz tjojtskatñinacaqui ninacžtajapa ana waliž cjequičha.

⁸ Jalla nižtiquiztan am kjarazłaj už kjojchažłaj ujquiz tjojtskatčhaja, nii uj paañi kjara cjicu už kjojcha cjicu pootzna, nižaza najwk tjojta. Jalla nuž tsjii kjara cjicu už tsjii kjojcha cjicu pertissi cjenami am parti curpuqui ana infiernuquin tjojttaž cjesačha. Jalla nuž waliž cjesačha.

⁹ Nižaza am čhjujcquiqui ujquiz tjojtskatčhaja, jalla nii čhjujcqui lecžna, nižaza najwk tjojta. Yooztan wiñaya kamzjapaqui tsjii čhjujquiqui pertissiž cjequiž niiqui, waliž cjequičha. Tjapa curpuqui infiernuquin tjojttaž cjequiž niiqui, ana waliž cjequičha.

ZARAKCHI UUZA QUINTU

¹⁰ Humilde kuzziz žoñinacžtan ana chjaawjkata. Ančhucaquiz cjiwčha, ninacž anjilanaqui wejt arajpach Yooz Ejpž yujcquiz žejlñipančha.

¹¹ Wejrqui tsewctan cuchanžquita Yooz Zoñtčha. Wejrqui tii muntuquiz tjonchinčha, ujquiz kamñi žoñinaca liwriizjapa.

¹² ¿Jalla tii tantiya? Tsjii žoñiqui patac uuzichiztačha. Patac uuziquiztan tsjiillaqui yekjaquin zaraktan, nii žoñiqui nii llatuntunc llatuncani uuzinaca curquin ecaquičha, zarakchi uuzajuržquizjapa.

¹³ Nižaza katchi uuzajuržquiz niiqui, nekztan walja chipznaquičha ana zarakchi uuzanacžquiztan juc'anti.

¹⁴ Jalla nižta irata ančhuca arajpach Yooz Ejpqui humilde kuzziz žoñinacžquiztan anapan jakziltami pertita cjis munčha.

UJ PERTUNZ PUNTU

¹⁵ Am jilaqui am quintra ana wali paaquiž niiqui, jalla nižtan zinapora palt'a, niž ana wali paata ujquiztan "ujchizpančha" cjican cjeequi. Jalla nuž amiž chiižintiquiztan catokaquiž niiqui, nii jilaqui ricujta cjequičha.

¹⁶ Zinapora chiižintiquiztan ana nonz pecaquiž niiqui, nii uj paañi jilžquiztan okaquičha. Nekztan iya pucultan jila kjawžcu, wilta nii uj paañi jilžquin okaquičha, niž paata uj tjeezjapa. Jalla nuž paažcu pucultan cjicu už čhjepultan cjicu testič žaypiz niž paata uj tjeežta cjequičha.

¹⁷ Nii uj paañiqui anapanž niž uj maz pecaquiž niiqui, jalla nii puntuquiztan tjapa icliz jilanacžquin maznaquičha. Anapan niž uj maz pecaquiž niiqui, ana Yoozquin criichi jilažtakaz čhejlinaquičha, nižaza impuesto cobriñi žoñižtakaz.

¹⁸ Ultim weraral cjiwčha. Tii muntuquiz jequit am čhelačhaja, jalla niiqui arajpach Yooziž čhejlta zakaz cjequičha. Nižaza tii muntuquiz jequit am cutznačhaja, jalla niiqui arajpach Yooziž cutžta zakaz cjequičha.

¹⁹ Tii zakal chiižinučha. Tii muntuquiz pucultan ančhucqui tsjiikaz Yoozquiztan mayaquiž niiqui, ančhucaquiz tjaataž cjequičha. Wejt arajpach Yooz Ejpqui ančhucž mayta tjaaquičha.

²⁰ Nižaza tsjii pucultanami čhjepultanami wejtquin kuzziz cjen wejt tjuuquiz ajcnaquiž niiqui, jalla ninacž žaypiz wejrzakaz želačha.

²¹ Wiruñiqui Pedruqui Jesusižquin pewczñi ojkcichičha. Zalžcu, jalla tuž pewczičha:

—Wejt Jiliri, ¿Kjaž wiltamiž wejt jilaqui wejt quintra uj paažcu pertuna mayisasaya? ¿Nižaza wejrqui kjaž wiltat pertunasaya? ¿Pakallak wilta pertunasaya?

²² Jesusaqui nižquiz kjaaziča, tuž cjican:

—Wejrqui cjiwča, anaž pakallak wilta cjesača. Antiz pakallak tunc pakallakuni wiltan wiltan pertunasača.

KAJCHIZ ZOŇI QUINTU

²³ Arajpach Yooz mantiz puntuquiztan jalla tuzuča. Tsjii chawc jiliri qui piyunanacžquiz kaja packatz pecatča.

²⁴ Jalla nuž packatan tsjii kajchiz zoñi qui zijictatača. Nii zoñi qui walja kajanacchiztača, tsjii kjaž millona.

²⁵ Nii piyunžtaqui anaž pacz paaz želatča. Nekztan patrunaqui jalla tuž mantichiča: “Tii zoñi tuya, paaz cunsiczjapa. Nižaza niž tjunmi, ocjalanacami, tjapa niž cusasanacami liwj tuyła kaja pacz paaz cunsiczjapa”.

²⁶ Nekztanaqui nii piyunaqui patrunž yujcquiz quillziča, nižaza roct'ichiča, tuž cjican: “Wejt patruna, pertunalla. Tjappachal pacača”.

²⁷ Nižtami patrunaqui ancha okziča; nižaza nii kaja ana cobrichiča. Jalla nižtiquiztan liwrii cjissiča nii kajquiztan.

²⁸ Wajilla nii piyunaqui nijwctan ulanžcu tsjii piyun maztan zalchiča. Nii piyun mazi qui tsjii kjažtalla kajatača nii pertunta piyunžquiz. Nekztan nii pertunta piyunaqui jor t'ullcu tanchiča, nii packatzjapa, tuž cjican: “Kajquiztan tjappacha paca”.

²⁹ Jalla nekztanaqui nii piyun mazi qui niž yujcquiz quillziča, nižaza roct'ichiča, tuž cjican: “Pasinsis kuzziz cjee. Nii kajallquiztan tjappachakal pacača”.

³⁰ Nii kaja cobriñizti ana munchiča. Antiz carcilquin uchantichiča, jalla nii kaja paczcama.

³¹ Parti piyunanacaqui nižta paañi cheržcu ancha sint'ichiča. Nekztan patrunžquiz mazñi ojkchiča. Jalla nicju tjappacha quint'ichiča, jaknužt watčhaja, nii.

³² Jalla nekztanaqui patrunaqui nii pertunta piyuna wilta kjawžkatchiča. Nekztan cjichiča: “Ana zum kuzziz piyuna, wejrqui tjapa am kajanaca pertunchinča, amiž roct'iñiz cjen.

³³ Jaknužt wejrqui am kajquiztan, pertunchinčhaja, jalla nužuzakaz amlaqui am piyun mazquiz pertunstanča”.

³⁴ Jalla nekztanaqui patrunaqui juc'anti žawjziča. Nižaza mantichiča, nii piyuna casticzjapa, tjapa niž kaja paczcama.

³⁵ Jesusaqui nii quintu quint'ican jalla tuž žerziča:

—Jakzilta ančhucaquiztan niž jilžquiz kuzquiztan ana pertunačhaja, jalla nužuzakaz wejt arajpach Yooz Ejpqui ančhucaquiz ana pertunaquiča.

19

MAATAKZTAN JALJTIZ PUNTU

¹ Jalla nuž tjajinžcu Jesusaqui Galilea yokquiztan ojkchiča. Judea yokquin iran-tichiča, Jordán cjita puž tuwanchuc.

² Muzpa žoñinacaqui nižquiz apziča. Jalla nicju muzpa laanaca čhjetinchiča.

³ Jalla nekztanaqui yekjap fariseo žoñinacaqui Jesusižquiz macjatchiča, ujquiz tjojt-skatzjapa. Nekztan tuž pewcziča:

—¿Čhjul uj paatiquiztanaqui persun maatakžtanaqui jaljtasaya?

⁴ Jesusaqui ninacžquiz kjaaziča, tuž cjican:

—Yooz qui tii muntu paacan, luctakžtan maatakžtan paachiča. ¿Cjijrta Yooz takuqui ana liichinčhucjo?

⁵ Yooz takuqui tuž cjiča: “Jalla nižtiquiztan tsjii žoñiqui tjunatan zalzjapa, maa ejpžquiztan zarakstanča. Zalžcu pucultan tsjii lucutiñi cjiša”.

⁶ Jalla nuž kjanapacha tjeeža, anaž iya pucultan žoñi, pero tsjiikazza. Jalla nižtiquiztan anaž jaljtasača. Yoozza tsjii luctakžtan tsjaa maatakžtan chjalziqui, tsjii lucutiñi cjisjapa. Yooz chjalžtaqui ana jaljta cjesača.

⁷ Nekztanaqui pewcziča tuž cjican:

—Moisesqui jalla tuž mantichiča. Tsjii certificado de divorcio tjaaquiz niiqui, tjunatan jaljtasača. ¿Kjažtiquiztan nižta mantichejo, ana jaljtiz želanajo?

⁸ Jesusaqui ninacžquiz kjaaziča, tuž cjican:

—Ančucaž chojru kuzziz cjen Moisesqui tjunatan jaljtis lii tjaachiča. Primirquiztanpacha anataž nižta.

⁹ Wejrqui ančucaquiz chiizinuča. Adulteriuquiz ojklayñiž cjenkaz am maatakžtan jaljtasača. Jequit ana adulterio paachiž cjenaqui niž persun maatakžtan jaljtačhaja, nižaza yekja maatakžtan zalznačhaja, jalla niiqui adulterio uj paača. Nižaza jequit divorcita maatakžtan zalznačhaja, nii zakaz adulterio paača.

¹⁰ Tjaajinta žoñinacaqui nižquiz cjichiča:

—Luctakžtan persun maatakžtan jalla nižta cjesaž niiqui, anaž cumpinča zalzqui.

¹¹ Jesusaqui nekztan cjichiča:

—Tjapa žoñinacaqui tii tjaajinta anaž catokaquiča. Jakziltižquiz Yoozqui tjaajnačhaja, jalla niiqui tii tjaajintaqui catokaquiča.

¹² Žoñinacaqui punta punta ana zalzi cjiča. Yekjapanacaqui nastiquiztanpacha ana zalzuača. Yekjapanacazti capunapantača, jalla nižtiquiztan ana zalžni atasača. Yekjapanacazti ana zalz pecča, arajpach Yooz Ejpžtajapa langzjapa. Jecmiž tii takucama kami catokaquiz niiqui, paj kamla.

OCJALANACZ PUNTU

¹³ Žoñinacaqui ocjalanaca Jesusižquiz zjičchiča, ocjalanacžquiz kjaržtan lanznajo, nii ocjalanacžtajapa Yoozquin mayižinajo. Pero tjaajinta žoñinacaqui zjičči žoñinacžquiz atajchiča.

¹⁴ Nekztan Jesusaqui cjichiča:

—Tii ocjalanaca wejtquin tjonaj cjee, ana ataja. Tii ocjalanacž kuz irata jalla nižta kuzzizza arajpach Yooz mantita kamañchiz žoñinacaqui.

¹⁵ Nekztan Jesusaqui ocjalanacžquiz kjaržtan lanziča. Jalla nekztan nii yokquiztan ojkchiča.

RICACH TJOWAQUI TJONCHICHA

¹⁶ Wiruñaquei tsjii tjowaqui Jesusa chertzni ojkchiča. Nekztan pewcziča, tuž cjican:

—Zuma Maestro, Yooztan wiñaya kamzjapa, ¿čhjul zumanacat wejr paasaya?

¹⁷ Jesusaqui kjaaziča, tuž cjican:

—¿Kjažtiquiztan “Zuma Maestro” cjee amjo? Tsjii alajača zumaqui. Yoozkazza niiqui. Yooztan wiñaya kamz pecchaj niiqui, Yooz Epiž mantitanac jaru kama cjee.

¹⁸ Nii tjowaqui jalla nekztan kjaaziča, tuž cjican:

—¿Čhjul mantitanacaya?

Jesusaqui nižquiz cjichiča:

—Anača žoñi conzqui. Anača adulteriuquiz ojklayzqui. Anača tjangzqui. Anača toscara chiizqui, jecžquizimi.

¹⁹ Am maa ejpmi rispitaquiča. Jaknužum persunpachquiz okzñamžlaja, jalla nižta okzñi kuzziz cjispanča žoñinacžquizimi, lijitum mazižtakazza.

²⁰ Nii tjowaqui nekztan cjichiča:

—Tjapa nii mantitanacami cumpliñča koltiquiztanpacha. ¿Jaziqui čhjulut wejtta pjaltasa?

²¹ Jesusaqui tuž cjichiča:

—Ancha wali cjissim pecčhaj niiqui, oka, nižaza amta žejlñi cusasanaca tuyzna. Jalla nii tuyžcu, porinacž ona. Jalla nižtiquiztan arajpachquin cusasanacažtakaz zuma honora tjaatam cjequiča. Jalla nii cumpliscu wiltam tjonaquiča wejttan chica ojklayzjapa.

²² Jalla nižta chiita nonžcu, nii tjowaqui walja llaquita kuzziz ojkchiča. Ancha ricachutača.

²³ Jalla nekztanaqui Jesusaqui niž tjaajinta žoñinacžquin cjichiča:

—Weraral ančhucaquiz cjiwča. Tsji ricachu žoñi arajpach Yooz mantuquiz luzjapa ancha ch'amaž cjesača.

²⁴ Tsjii camello cjita animala žejlča. Nii camelluqui ch'aman acuj cjuñ pjetquiz luzasača. Jalla nižtaž ricachunacaqui tsjan ch'amača Yooz kamañ jiczquiz luzqui, Yooz wajtchiz žoñi cjisjapa.

²⁵ Jalla nuž nonžcu, tjaajinta žoñinacaqui walja ispantichiča. Nekztan ninacpora pewcsarassiča, tuž cjican:

—¿Jectpan liwriita cjesajo?

²⁶ Jesusaqui ninacž kjutñi cherziča. Jalla nekztan cjichiča:

—Žoñinacaqui anaž persunpacha liwrii atasacha. Yoozpankazza liwriiñiqui. Yoozqui jecmi liwrii atasacha.

²⁷ Jalla nekztanaqui Pedruqui Jesusižquiz cjichiča:

—Wejt Jiliri, wejrnacqui tjapa persun cusasanaca jaytichinča, amtan chica ojklayzjapa. ¿Jalla nižtiquiztan wejrnacqui čhjulut canas?

²⁸ —Jesusaqui kjaaziča, tuž cjican:

—Weraral ančhucaquiz cjiwča. Ew muntuquiz želan, wejrqui poderchiz puestuquiz luzača. Ančhuczakaz poderchiz puestunacquiz luzaquiča, tuncapan Israel partira mantizjapa.

²⁹ Jakzilta žoñit weriž cjen kjuyanaca, jilanaca, cullaquinaca, maa ejp, tjun, ocjalanaca, yokanaca ecačhaja, jalla ninacaž walja zuma kamañ wirchiz cjequiča. Nižaza arajpachquin Yooztan wiñaya kamaquiča.

³⁰ Arajpachquin Yoozqui wacchi tii timpuquiz tucquin cjiñi žoñinaca wirquin cjiskataquiča. Nižaza Yoozqui wacchi tii timpuquiz wirquin cjiñi žoñinaca tucquin cjiskataquiča.

20

PIYUNANACZ QUINTU

¹ 'Arajpach mantiñi Yooz puntuquiztan jalla tužuča. Wentanalla tsjii yokchiz wali pajk patruaqui piyunanaca kjuri ulanchiča, uwas frut zkala ajzjapa.

² Piyunanacžtan acuerduquiz luzziča, zita langžtan tsjii denario cjita paaz paczjapa. Jalla nekztanaqui langžni cuchanžquichiča.

³ Nekztan wenzlaka wilta ulanchiča. Palazquin inakaz žejlñi žoñinaca cherchiča.

⁴ Ninacžquiz paljaychiča, tuž cjican: “Ančhucqui wejt zkal yokquin langžni oka. Wejrkal zumpacha pacača”. Nekztanaqui ninacaqui ojkchiča.

⁵ Taypuru patruaqui wilta ulanchiča, iya piyunanaca kjuri, nižaza langznajo. Nižaza taypuru zezi cjeella wilta ulanchiča, piyunanaca kjuri, nižaza langznajo.

⁶ Nii noojpacha zezi cjee wilta palaz kjutñi ulanchiča. Nižaza palazquin inakaz žejlñi žoñinacžtan zalchiča. Ninacžquiz paljaychiča tuž cjican: “¿Kjažtiquiztan ančhucqui tonj zita ana langž žejljo?”

⁷ Ninacaqui patružquiz kjaaziča, tuž cjican: “Anaž jecmi wejrnac langznajo rocchiča”. Nekztanaqui patruaqui cjichiča: “Ančhucqui wejt yokquin zakaz langžni oka. Wejrkal jaknižlaj niil pacača”.

⁸ Tjuñiž kattan nii yokchiz patrunaqui niž langzkatñi encargado mantichiča, tuž cjican: “Kjawžca langzñi piyunanaca, paczjapa. Primiruqui wiri tjonchi piyunanacžquiz pacaquiča; wirquin, tuqui tjonchi piyunanacžquiz pacaquiča”.

⁹ Jalla nekztanaqui nii wiri luzzi piyunanacaqui langzkatñižquiz macjatchiča. Zapa mayni ninacžquiz pactača, tsjii nooj lanžtaž nižtapacha. Tsjii denario cjita paaz tanzicha.

¹⁰ Jalla nekztanaqui wirquin paczquita primiru piyuna luzzi žoñinaca kjawžtatača. Jalla nii primiru piyuna luzzi žoñinacaqui pinsichiča jila paca tanzjapa wiri piyuna luzzi žoñinacžquiztan. Jalla nekztanaqui pacchiča tsjii denario cjita paaz zakaz.

¹¹ Jalla nii paca tanžcu patronž quintra quijchiča,

¹² tuž cjican: “Tii wirquin piyuna luzzi žoñinacaqui tsjii orakaz langziča. Wejrnaczi primirquiztanpacha langzinča, nižaza zita ancha sii kjakquiz otžcan langzinča. Ninacžquizimi wejtnacaquizimi tsjiikaz pacchamča”. Jalla nuž cjican quijchiča.

¹³ Nii patrunaqui tsjii ninacžquiz kjaaziča, tuž cjican: “Jila, amquiz anal incallchinča. Jalla nuž tsjii acuerduquiz luztapanla, tsjii denario paaz paczjapa.

¹⁴ Tii paca tanzna, nižaza oka. Tii wirquin piyuna luzzi žoñinacžquiz nižazakaz pacz pecuča, amquiz pactala, jalla nuž zakaz.

¹⁵ Wejt persun paaztan jaknužut wejr pinsučhaja, jalla nuž wejt munañpiquiz pacasača. Weriž zuma pacñi kuzziz cjen amqui iñiziñi kuzziz cjissamla”.

¹⁶ Jalla nižta irataž wirquin cjiñinacaqui tucquinž cjequiča. Nižaza tucquin cjiñinacaqui wirquinž cjequiča. Kjawžta žoñinacaqui wacchiča. Illza žoñinaczi kolucullača.

JESUSAQUI NIIZ TICZ MAZZICHA

¹⁷ Wiruñnaqui Jesusaqui niž tjaajinta žoñinacžtan Jerusalén ojkchiča. Jalla nuž jiczquiz ojkan, Jesusaqui tsjii latu niž tuncapan illza žoñinaca chjitchiča, nižaza ninacžquiz tuž cjichiča:

¹⁸ –Ančhucqui zizza, tii jiczqui Jerusalén kjutñiž ojkča, nii. Jerusalén wajtquin wejrqui intirjital cjeeča timplu jilirinacžquizimi lii tjaajiñi maestrinacžquizimi. Jalla ninacaqui wejr conaquiča. Wejrqui tsewctan cuchanžquita Yooz Zoñtča.

¹⁹ Nižaza wejrqui yekja wajtchiz žoñinacžquiz intirjital cjeeča, ana wali burla paata cjisjapa. Nižaza wejrqui wjajttal cjeeča. Ultimquiziqui cruzquiz ch'awcta contal cjeeča. Jalla nekztan čhjep majquiztanzti jacatatača.

TSJII FAVORA MAYTA

²⁰ Jacobžtan Juanžtan ninacž maaqui Jesusižquiz macjatžquichinča. Jacobžtan Juanžtan ninacž ejpqui Zebedeo cjitatača. Jalla naa maaqui maatinacžtanpacha Jesusižquin macjatchinča. Nekztanaqui naaqui Jesusiž yujcquiz quillzinča, tsjii favora mayzjapa.

²¹ Nekztan Jesusaqui naaquiz cjichiča:

–¿Amqui čhjulum pecya? –cjican.

Naaqui kjaazinča, tuž cjican:

–Amqui am mantis puestuquin luzcu tii wejt pucultan majchnaca am latuquiz uchnalla, tsjiiqui žew latuquiz nižaza tsjiiqui zkar latuquiz.

²² Jesusaqui tuž kjaaziča:

–Ančhucqui čhjulut mayčhaja ana intintazza. Wejrqui walja sufris tanča. ¿Nižtapacha ančhuc sufrasaya? Nižaza tsjii nooj ancha sufrican watača tsjii bautismožtakaz. ¿Jalla nižtapacha ančhuc sufrasaya?

Ninacaqui tuž kjaaziča:

–Nii sufris watimi atasača.

²³ Nekztan Jesusaqui cjichiča:

—Weraral cjiwcha. Ančhucpacha sufris tanznaquiča, tsjii licz wazužtakaz. Nižaza sufris wataquiča, tsjii bautismožtakaz. Pero wejrqui mantis puestuquin luzcu, žew latuquizimi zkar latuquizimi ana jecmi uchasača. Wejt Yooz Ejpkaz nii puestunaca tjaaquiča jeczta japa tjacžtakazlani, jalla ninacžta.

²⁴ Parti nii tuncapan illzta žoñinacaqui nii mayta puntu nonžcu nii pucultan jilazullcaž quintra žawjchiča.

²⁵ Pero Jesusaqui tjappacha nii tjajintanaca kjawziča, nekztan tuž cjichiča:

—Ančhucqui zumpacha zizza, jalla tužu. Tii muntuquiz naciön jilirinacaqui patrunažtakaz mantiñiča, nižaza chawc jilirinacaqui parti žoñinacžquiziqui niž mantita cazkatñipankazza.

²⁶ Ančhucqui ana nižta irata cjee. Tsjii kjutñiča nii irat kuzqui. Ančhucaquiztan jequit chawc jilirižtakaz cjis pecčhaja, jalla niiqui piyunažtakaz cjis waquiziča parti žoñinacžquiziqui.

²⁷ Nižaza jequit ančhucaquiztan tucquin mantiñi cjis pecčhaja, jalla niiqui wirquin cjis waquiziča, parti žoñinacaž mantitacama cjisjapa.

²⁸ Wejrqui tsewctan cuchanžquita Yooz Zoñtča. Wejrpacha tii muntuquiz ana tjonchinča, sirwita cjisjapa. Antiz wejrča tjonchinqi, žoñinacžquiz sirwisjapa, wejr ticzcama. Jalla nuž ticžcu walja preciochiztakal cjeeča, žoñinaca liwriizjapa. —Jalla nuž cjichiča Jesusaqui.

ZUR ZOÑINACA CHJETINTA

²⁹ Jalla nekztanaqui Jericó wajtquiztan ulnan, muzpa žoñinacaqui Jesusižquiz apziča.

³⁰ Jicz latuquin pucultan zur žoñi julzi želatča. Ninacaqui Jesusaž watñi nonžcu, kjawchiča tuž cjican:

—Wejt Jiliri, Davidž majchmajtquiztan tjonñi, wejrnacž okznalla.

³¹ Nekz žejlñi žoñinacaqui ninacžquiz ujziča, ch'uj cjeajajo. Ninacazti juc'anti kjawchiča, tuž cjican:

—Wejt Jiliri, Davidž majchmajtquiztan tjonñi, wejrnacž okznalla.

³² Jalla nekztan Jesusaqui tsijtscu, ninaca kjawziča. Kjawžcu ninacžquiz tuž pewcziča:

—¿Čhjuluž werj paaj cjii ančhucya?

³³ Nii zur žoñinacaqui kjaaziča, tuž cjican:

—Wejt Jiliri, wejtnaca čhujquiz čhjetinžinalla.

³⁴ Nekztanaqui Jesusaqui ninacžquiz sint'izcu čhujquiqi lanlanžinchiča. Jalla nii orapacha cherñi cjissiča. Jalla nekztanaqui Jesusižquiz apziča.

21

JESUSAQUI JERUSALEN WAJTQUIN LUZZICHA

¹ Jerusalén watja žcatžincan, Betfagé watja irantichiča. Betfagé watjaqui Olivos cjita curu žcatitača. Nicju irantican Jesusaqui pucultan tjajinta žoñinaca cuchanchiča, tuž cjican:

² —Jalla nii najwkta watja oka. Jalla nicju mokta ljat azni wachaquiča, nižaza pajk zjijc maltum wawchizza naa azniqui. Mokta jeržcu wejtquin akžcaquiča.

³ Jakzilta žoñimiž atajasaz niiqui, nižquiz ančhucqui “Wejt Jiliriž pecča. Wajilla tjepunta cjequiča tii azniqui”, nuž cjican nii žoñžquiz cjequiča. —Jalla nuž mantichiča Jesusaqui.

⁴ Jalla nii watchiqui profetaž cjiirta taku cumplissiča. Tuquitan nii profetaqui tuž cjiirchiča:

⁵ “Sión wajtchiz žoñinacžquiz tuž chiya: Chera, ančhuca chawc Jiliri tjončha, humilde kuzziz. Nižaza zjič maltum aznuquiz yawchi tjonacuičha, nižaza nii zjič aznuž maatanpacha tjonacuičha. Jalla ninacacui carga kuzñi aznunacačha”.

Jalla nuž cjičhičha nii profetaqui.

⁶ Jalla nekztanaqui nii pucultanaqui ojkchičha. Nižaza jaknužt Jesusaqui mantičhaja, jalla niicama paachičha.

⁷ Ninacacui ljat azñi naaža pajk zjičtanpacha akžquichičha. Jalla nuž akžcu, zquiti-naca aznunacž juntun caruntichičha. Nekztan Jesusaqui yawchičha.

⁸ Niiž ojkz jicz latuquiz muzpa žoñinaca želatčha. Ninacž zquiti jiczquiz chjinzičha. Yekjapaqui ramuz čhjañinaca murchičha jiczquiz chjinzjapa.

⁹ Tucquin ojkñi žoñinacami wirquin tjonñi žoñinacami chipcan walja wiwi kallantichičha, tuž cjičan:

—¡Viva tii Yooz tjuuquiz tjonchi žoñi! ¡David cjita chawc Jilirž majchmajtquiztan tjonñi! ¡Amqui rispittaj cjila! ¡Amquiz honora tjaataj cjila! ¡Yooz Ejpžquin zakaz honora tjaataj cjila! —Jalla nuž wiwchičha.

¹⁰ Jesusaž Jerusalén watja luztan, tjapa nii chawjc wajtchiz žoñinacacui walja ispan-tichi tjojknačhičha. Nižaza walja pewcpewczičha, tuž cjičan:

—¿Jectpan teejo?

¹¹ Žoñinacacui tuž kjaazičha:

—Tiiqui Jesusa cjita profetala. Nazaret de Galilea, jalla najwktan tjonchičha.

JESUSAQUI TIMPLU PEWZICHA

¹² Jalla nekztan Jesusaqui Yooz timpluquin luzzičha. Jalla nicju tuyñinacami kjayñinacami timpluquiztan liwj tirkatchičha zancchuccama. Nižaza paaz campiiñi žoñinacž mizami pjocžinchičha; paloma tuyñinacž sillami pjocžinchizakazza.

¹³ Jalla nuž paažcu tuž cjičhičha:

—Yooz Takuqui tuž cjičha: “Wejt kjuyaqui Yoozquin mayiziz kjuyačha”. Ančhuczi tjañinacž kjuyažtakaz paachinčhucčha.

¹⁴ Jalla nicju tsjii kjaž zur žoñinaca Jesusižquiz macjatžquichičha, nižaza tsjii kjaž zuch žoñinaca. Jesusaqui ninaca čhjetinchičha.

¹⁵ Pero timplu jilirinacami lii tjaajiñi maestruncami jalla nii čhjetiñi milajru cheržcu, žawjchičha. Nižaza ocjalanacacui timpluquin Jesusižquiz tuž wiwchičha: “¡David cjita chawc jilirž majchmajtquiztan tjonñi! ¡Rispittaj cjila!” Jalla nuž nonžcu timplu jilirinacami lii maestruncami ancha žawjchičha Jesusiž quitra.

¹⁶ Nekztan Jesusižquiz paljaychičha, tuž cjičan:

—¿Tinacž čhiita taku ana nonžjo?

Jesusaqui ninacžquiz kjaazičha, tuž cjičan:

—Nonznučha. Nižaza nii puntu Yooz takuqui tuž cjičha:

“Ocjalanacami piz itzñi wawanacami wejtajapa honora zumpachaž tjaacuičha. Jalla nuž paaquičha Yoozqui”.

¿Jalla nii cjičrta Yooz taku liichinčhuckaya; ana jaa?

¹⁷ Jalla nekztanaqui ninacžquiztan ojkchičha. Betania watja ojkchičha. Jalla nicju alujassičha.

ANA FRUTCHIZ MUNTI

¹⁸ Jakatažuqui wenzlaka Jerusalén watja quejpcan čhjeri eecskatchičha.

¹⁹ Jicz latuquiz higo munti cherchičha. Jalla nii muntiquin macjatchičha, fruta apakžcu lujljapa. Pero fruta ana wajtchičha, čhjañchiz alajatačha. Jalla nižtiquiztan Jesusaqui nii muntiquiz cjičhičha:

—Jazic anam iya fruta pookñi cjequičha.

Jalla nii orapacha nii muntiqui kjonchičha.

²⁰ Jalla nižta munti kjonni cheržcu, tjaajinta žoñinacaqui ispantichiča, nižaza Jesu-sižquiz pewcziča, tuž cjican:

—¿Kjažtiquiztan nii higo munti ratulla kjonja?

²¹ Jesusaqui tuž kjaaziča:

—Weraral ančhucaquiz cjiwča. Ančhucqui Yoozquin tjapa kuztančucčhalaj niiqui, nižaza ana payznakni kuzzizčucčhalaj niiqui, tii irata zakaz paasača. Nižaza juc'ant pajk milajru paasača. Tii curumi mantasača, tuž cjican: “Tekžtan oka. Pajk kotquin tjojtsna”. Jalla nuž mantižcu nižta zakaz okasača.

²² Nižaza ančhucqui čjulumi tjapa kuztan Yoozquiztan mayačhaja, jalla niit jama ančhucaquiz tjaataž cjequiča.

¿JEC JESUSIZQUIZ MANTICHI?

²³ Jerusalén irantižcu Jesusaqui wilta timpluquin luzziča. Jalla nicju tjaajnan, timplu jilirinacami wajtchiz jilirinacami nižquiz macjatžquichiča. Nekžtan pewcziča, tuž cjican:

—¿Jec am mantichi tii paazjapajo? ¿Jec jilirit am utchi jilirižtakaz cjisjapajo?

²⁴ Jesusaqui ninacžquiz tuž kjaaziča:

—Wejrzal ančhucaquiz tsjii pewcznača. Ančhucqui wejtquiz kjaaznaquiž niiqui, wejrzakal ančhucaquiz maznača, jec wejr mantichi, nii.

²⁵ Wejtquiz kjaaznalla. ¿Ject Juan mantižquichi bautisjapaya? ¿Yoozkaya, žoñinaca, ja'?

Jalla nekžtanaqui ninacpora parlatča, tuž cjican:

—¿Jaknužum cjeequi? Učhumž “Yoozqui Juan mantichiča” cjicanž kjaaznaquiž niiqui, jalla tiicni učumnacaquiz kjaaznačan, cjican: “Nižtiquiztan ¿kjažtiquiztanž ančhucqui ana nii criichinčhucta?”

²⁶ Nižaza učumž “Žoñiqui Juan mantichiča” cjicanž kjaaznaquiž niiqui, žoñinacaqui učumnacaquiz ¿kjaž cjiqjejo? —Jalla nuž parlatča. Žoñinacaqui Juanž puntu cjiñiča, Yooz parti parliñi profetača niiqui. Jalla nižtiquiztan ninacaqui žoñinaca eksiča, “Učum conačhani”, cjican.

²⁷ Jalla nuž parližcu ninacaqui Jesusižquiz cjichiča:

—Ana zizuča wejrnacqui.

Jalla nižta kjaaztiquiztan Jesusaqui cjichiča:

—Wejrmi ana zakal ančhucaquiz maznača, jec wejr mantichi tii paazjapa.

PUCULTAN MAJCHWICH QUINTU

²⁸ Wiruñacqui Jesusaqui tsjii puntu čhiichiča, tuž cjican:

—Tii puntu tantiya. Tsjii žoñiqui pucultan majchwichtača. Tsjižquiz cjichiča: “Wejt maati, tonjiqui uwas frut ajžni oka”.

²⁹ Nii mantita maatiqui tuž kjaaziča: “Anača”. Jalla niž wiruñalla niž kuz campiichiča. Nekžtan uwas frut langžni ojkiča.

³⁰ Nižaza nii ejpqui tsjii maati cheri ojkiča. Niižtan zalžcu, nižtakaz uwas frut ajžni mantichiča. Jalla niiqui kjaaziča, tuž cjican: “Tata, okasača”. Ultimquiziqui nuž cjiscuqui ana ojkiča.

³¹ Nii pucultanquiztan ¿jakzilta maatit niž ejpž mantitacama paachiya?

Ninacaqui kjaaziča tuž cjican:

—Primiru mantitaž, jalla niiča.

Jalla nekžtanaqui Jesusaqui cjichiča:

—Weraral ančhucaquiz cjiwča. Impuesto cobriñinacami, nižaza ujchiz maatakanacami arajpach Yooz wajtquiz ančhucž tuqui luzaquiča.

³² Juan Bautistaqui tjaajñi tjonchiča, jaknužt ančucalaqui kamžtažlaja, jalla nii tjaajinchiča. Pero ančucqui niž tjaajinta ana criichinčucča. Impuesto cobriñinacazti nižaza ujchiz maatakanacazti niž tjaajinta criichiča. Jalla nii cherchinčuča ančucqui. Jalla nižtanaca cheržcumi, ančucqui ana Yoozquin cjisjapa kuz campiichinčucča. Ančucča niž taku ana criichinčucqui.

ANA WAL PIYUNANACZ QUINTU

³³ Jalla tii quintu zakaz nonžna. Tsjii yokchiz patrunaqui uwas zkala čhjacchiča. Nekztan uwas zkal muytata pirka pirkichiča. Nižaza tsjii maz ojt paachiča, uwas kjaz spjiitzjapa. Nižaza tsjii campanturiž cherchi kjuychiča, nii zkala itzjapa.

‘Nekztan nii patrunaqui zkal yoka alquilchiča piyunanaczquiz. Nekztan jicz ojkchiča.

³⁴ Zkala ajz timpu irantižcan, patrunaqui tsjii kjaz piyuna cuchanzquichiča, niž parti zkala ricujajo.

³⁵ Pero nii zkala alquilñi žoñinacazti nii cuchanzquita piyunanaca tanchiča. Tsjiiqui kitžtača. Tsjiiqui contača. Tsjiiqui maztan čhajtača.

³⁶ Nekztanaqui patrunaqui wilta piyunanaca cuchanzquichiča, primirquiztan juc'anti. Pero nii zkala alquilñi žoñinacazti nižtapacha ana wali paachizakazza.

³⁷ Ultimquiziqui patrunaqui niž persun majch cuchanzquichiča, tuž tantiican: “Wejt ultim maatiqui rispitzinaa” cjican.

³⁸ Niž majch cheržcu, nii alquilñi žoñinacaqui ninacpora palt'ichiča, tuž cjican: “Jalla tiikat liwj tii irinsa tanznačhani. Jalla nižtiquiztan ž-conla, učumnacaltajapa tii yok irinsa cjeajajo”.

³⁹ Jalla nekztanaqui nii žoñinacaqui majch tanchiča; nekztan yokquiztan jwescu conchiča.

⁴⁰ Jalla nekztanaqui Jesusaqui pewcziča, tuž cjican:

—Jalla nii patrumpacha tjonžcu, ččjulukat nii alquilñi žoñinacžtajapa paačhani?

⁴¹ Žoñinacaqui kjaaziča tuž cjican:

—Nii ana wal žoñinacaqui contaž cjequiča, ana importayžcu. Nekztan nii zkal yoka yekja piyunanaczquiz alquilaquiča, zkala ajz timpu niž parti zkala ricujžcu nižquiz tjaata cjisjapa.

⁴² Nekztan Jesusaqui ninaczquiz cjichiča:

—Yooz takuqui tuž cjiča:

“Kjuy pirkiñinacaqui tsjii maz tjojtchiča. Nii tjojta mazqui isquinqiz cjissiča. Juc'ant chekan mazqui cjissiča. Yoozqui nuž utchiča. Učumqui jalla nii cheržcu ispantichiča”.

Jalla nuž cjiča cijjrta Yooz takuqui. Ančucqui nii Yooz taku liichinčucča, ¿ana jaa?

⁴³ Ančucaquiz chiižinuča, ančucqui nii ana wal alquilñi žoñinacžtakazza. Jalla nižtiquiztan ančucqui Yooz kjuychiz famillquiztan chjatkattaž cjequiča. Yekja žoñinacaqui Yooz famillquiz luzaquiča. Yooz kuzcama kamñi žoñinacaqui luzaquiča.

⁴⁴ Nonžna. Maz puntuquiztan zakal chiyuča. Jakziltat nii maz cjen ujquiz tjojt-snačhaja, jalla niiqui pirasužtakaz t'okuntaž cjequiča. Nižaza jakziltiž juntuñ nii mazqui tjojtsnaquiž niiqui, pulpužtakaz t'okuntaž cjequiča. Nii žoñinacaqui k'ala akžtaž cjequiča.

⁴⁵ Jalla nii Jesusiž chiita takunaca nonžcu, timplu jilirinacami, fariseo parti jilirinacami tantiichiča, ninacz puntu chiiñi, nii.

⁴⁶ Jalla nuž tantižcu, Jesusa tanz pecatča. Pero ana atchiča, parti žoñinaca ekscu. Parti žoñinacaqui Jesusiž puntu tantiyatča, Yooz taku parliñi profetača, nii.

1 Jalla nekztanaqui Jesusaqui wilta tjaajinchizakazza. Jalla tuž cjican quint'ichiča:

2 –Arajpach Yooz kjuychiz familiaqui jalla tužuča. Tsjii chawjc jiliriqui niž majch-tajapa zalz pijjsta paachiča.

3 Niiž piyunanaca cuchanchiča, invitta žoñinaca kjawzñi. Nii kjawžta žoñinacaqui ana tjonz pecchiča.

4 Nekztanaqui yekja piyunanaca cuchanchizakazza, tuž cjican: “Invitta žoñinaczquin mazca, ‘Chjeri lujlz tjacztača. Wejt wacanaca conkatchinča, nižaza cjew animalanacami. Tjappacha listuča, jaziqui pijjistiquin tjonla’ ”.

5 Jalla nuž chiyanami nii invitta žoñinacaqui ana cazquichiča. Tsjiiqui zkal yoka ojkchiča. Tsjiiqui tuyžtan ojkchiča.

6 Parti invitta žoñinacaqui kjawzñi cuchanta piyunanaca tanziča. Nekztan kitchiča, conañcama.

7 Jalla nekztanaqui nii chawc jiliriqui ninacz quintrazawjziča. Nekztan zultatunaca cuchanzquichiča, nii piyuna conñinaca conžcajo. Nižaza, ninacz watja ujžcajo.

8 Jalla nižta paažcu chawc jiliriqui piyunanaczquiz cjichiča: “Tjappacha zalz pijjstac listuča. Nii primir invitta žoñinacaqui ana tjonz waquiziča.

9 Jalla nižtiquiztan ančhucqui pajk calliranz ojklayžca. Jecnacžtanami zalačhaja, jalla ninaczquiz tjonajum cjequiča tii zalz pijjistiquin”.

10 Jalla nekztanaqui piyunanacaqui call kjutñi ulanchiča, nižaza tjapa niž zaltanaca kjuyquiz ajcskatžquichiča, zuma žoñimi, ana zuma žoñimi. Jalla nekztanaqui pijjsta paaz kjuyaqui chjijsi cjissiča.

11 Jalla nekztanaqui chawjc jiliriqui luzquichiča invitta žoñinaca cherzñi. Tsjii žejlñi žoñi naychiča, ana pijjsta paaz zquiti cutchi želatča.

12 Jalla nuž nayžcu nii chawjc jiliriqui nižquin paljaychiča tuž cjican: “Jila, ¿kjažtiquiztan amqui ana pijjsta paaz zquiti cujtchi luzquichamtajo?” Nii žoñiqui ch'uj quirchiča.

13 Nekztanaqui chawjc jiliriqui pijjsta atintiñi žoñinaczquiz mantichiča, tuž cjican: “Kjojchanacami kjaranacami čhejlžina. Zawnc zumchiquiz tjojta, jalla nicju kaala, nižaza niž izke kjojla”.

14 Jesusaqui cjichizakazza:

–Kjawžta žoñinacaqui tamača. Illzta žoñinacaqui kolucullača.

IMPUESTO PACZ PUNTU

15 Jalla nekztanaqui fariseo žoñinacaqui ojkchiča. Ninacaqui acuerduquiz kazziča, Jesusiž quintratsjii ujchiz cjiskatzjapa. Jaknužumi Jesusa tsjii ana wali chiikataquiča; jalla nii ujchiz cjiskatz pecatča.

16 Jalla nekztan ninacz partiquiztan yekjap žoñinaca cuchanzquichiča, Herodes parti žoñinacztanpacha. Jalla nii cuchanta žoñinacaqui Jesusižquiz cjichiča:

–Maestro, wejrnac zizuča, amqui werarapan chiiča, nižaza Yooz kamañ puntuquiztan weraram tjaajiñamča, kjažtami žoñiqui chiičhani, nižaza kjažta žoñimi želačhani.

17 Jaziqui amqui tii tantiižinalla. ¿Roman chawc jiliržquin impuesto pacz wali cjesaya? už žanaž wali cjesaj? Jalla nii ziz pecuča.

18 Pero Jesusaqui ninacz ana zuma pinsita intinzuna zizziča. Jalla nižtiquiztan ninaczquiz kjaaziča tuž cjican:

–Ana zum kuzziznaca, ¿kjažtiquiztan ančhucqui wejt quintrazawjz pecjo?

19 Impuesto pacz paaz tjezna.

Jalla nekztan tsjii denario cjita paaz zjičchiča.

20 Jalla nii paaz cheržcu, Jesusaqui ninaczquiz pewcziča, tuž cjican:

–Tii paazquiz ¿jecz yujctaya? Nižaza tii cjižta tjuu, ¿jecz tjuutaya?

21 Nii quintranacaqui kjaaziča, tuž cjican:

—Roman chawc jiliržtača.

Jesusaqui nekztan cjichiča:

—Roman chawc jiliržtaqui jalla nii jiliržquin tjaasa. Nižaza čhjulut Yooztaqui Yoozquinpan tjaasa.

²² Jalla nuž nonžcu, nii quintranacaqui ispantichiča. Nekztan Jesusižquiztan zarakžcu ojkchiča.

JACATATZ PUNTU

²³ Jalla nii noojpacha yekjap saduceo parti zoñinacaqui Jesusa cheri ojkchiča. Saduceo parti zoñinacaqui ana criiñitača, ticziquiztan jacatatz, nii. Jalla nuž cjenami Jesusižquiz pewcziča. Tii quintu quint'ican, pewcziča, tuž cjican:

²⁴ —Maestro, Moisesaqui učumnacalta cjiyrkalča, tuž cjican: “Tsjii zoñi ticznasaž niiqui, niiz tjun ana ocjalchiz cjesaž niiqui, nekztan nii ticzi zoñž jilaqui naa žewatan zalz waquiziča, nii ticzi jilž cuntiquiztan ocjala paazjapa”.

²⁵ Jaziqui wejrnapcorquiz pakallak jilazullca želatča. Jilir jilaqui zalsiča. Nekztan ticziča ana ocjalchiz. Jalla nekztan jilirž jar jilaqui naa žewatan zalsizakazza.

²⁶ Nii jilaqui ticzizakazza ana zinta ocjala ecžcu. Nekztan yekja taypir jilžtan nižtakaz watchiča. Nižaza tjappach nii pakallak jilazullquiziz nižta watchiča.

²⁷ Tjapa nii pakallak jilazullcaž ticztan, naa žewqui ticzinzakazza.

²⁸ Jaziqui ticziquiztan jacatatzcu, naa žewqui ¿jakziltiz tjun cjequejo? Tjappacha naatancama zalzitača.

²⁹ Jesusaqui ninacžquiz tuž kjaaziča:

—Ančhucqui tsjii kjutñi kiwkchinčhucča. Ančhucqui Yooz takumi ana zuma zizza. Nižaza Yooz azimi ana pajča.

³⁰ Ticzi zoñinacaž jacatattanaqui zalzqui ana želaquiča. Zoñinacami zoñž maatinacami ana zalznaquiča. Nii timpuquiz zoñinacaqui arajpach Yooz anjilanacažtakaz cjequiča.

³¹ Pero nii ticziquiztan jacatatz puntu, ¿Yooz tawkquiz ana tuž liichinčhucjo? Tii puntuquiztan Yoozpachaž chiichiqui. Jalla tuž cjican Yoozqui cjichiča:

³² “Wejrqui Abrahamž Yoozza, nižaza Isaacž Yoozza, nižaza Jacobž Yoozza”. Anača ticzi zoñž Yoozqui. Antiz žejtñi zoñž Yoozza.

³³ Jalla nuž chiita nonžcu, nekz žejlñi zoñinacaqui Jesusiž chiitiquiztan ispantichiča.

JUC'ANT CHEKAN MANTITAQUI

³⁴ Jalla nuž chiižcu Jesusaqui saduceo parti zoñinaca ch'uju paachiča. Jalla nuž ch'uj paatiquiztan fariseo parti zoñinacaqui wilta ajcziča.

³⁵ Tsjii lii maestruqui nižaza fariseo partinacžquiztan uj jwesjapa yanz pecatča. Jesusižquiz pewcziča, tuž cjican:

³⁶ —Maestro, učum liiquiztanaqui ¿čhjul mantitat juc'ant chekanaaya?

³⁷ Nekztan Jesusaqui kjaaziča, tuž cjican:

—Tii mantitača juc'ant chekanaqui. “Ančuca Yooz Ejp Jiliržquiz sirwa, tjapa kuztanami, tjapa animužtanami, tjapa pinsamintužtanami”.

³⁸ Parti mantitanacquiztan cjenauqui jalla niiča chekanaqui.

³⁹ Niiž jaru tii mantitaqui žejlča. “Jaknužum persunpachquiz okzñamžlaja, jalla nižta okzñi kuzziz cjistanča zoñinacžquizimi, liijitum mazižtakaz”.

⁴⁰ Jalla nii pizc mantitanacača chekanaqui. Nižaza tjapa Moisés tjaata liimi, nižaza tjapa profetanacaž tjaajintanacami nii pizc mantitanacž partiquiztan chiča.

CRISTUZ PUNTU

⁴¹ Fariseo zoñinacaž ajczi želan, Jesusaqui ninacžquiz pewcziča tuž cjican:

—Ančhucqui Cristumž puntuquiztan tantiya. ¿Cristuqui jecž majch niiqui?

⁴² Nekztanaqui ninacaqui Jesusižquiz kjaaziča, tuž cjican:

—Davidž majchmajtquiztan tjonñiĉha niiqui.

⁴³ Jalla nuž kjaaztiquiztan Jesusaqui ninacžquiz cjichiĉha:

—David jiliriĉqui Cristuž puntuquiztan chiican, “Chawc Jiliri” cjichiĉha. Jalla nuž chiižcu, Yooz Espíritu Santuž chiikatchiqui.

⁴⁴ Davidaž cjiĉrta Yooz takuqui tuž cjiĉha:

“Yooz Jiliriĉqui wejt chawjc Jiliržquiz cjichiĉha: ‘Wejrqui am kjojch koztan am quintri žoñinaca tjeczkataĉha. Nii oracama wejt žew latuquiz julzna’.”

⁴⁵ Jaziĉqui Davidaqui “chawjc Jiliri” cjichiĉha Cristuž puntuquiztan. Jalla nižtiquiztan ĉjaknužt nii chawjc Jiliri Davidž majchqui cjesajo? —Jalla nuž pewcziĉha Jesusaqui.

⁴⁶ Anaž jecmi kjaazñi atĉiĉha, ana zinta takumi. Jalla nužquiztanpacha ana ĉhjulumi pewcziĉha atĉizakazza iya. Jalla nii orquiztanpacha pecunz eksipanĉha nii quintra žoñinacaqui.

23

ANA ZUM TJAAJINACŽ PUNTU

¹ Jalla nekztanaqui Jesusaqui nekz žejlñi žoñinacžquizimi niiž tjaajinta žoñinacžquizimi tuž cjiĉiĉha:

² —Lii tjaajiñi maestrunacami nižaza fariseo žoñinacami persun puntuquiztan tuž tantiiĉha, tjaajinz puestuquiz uchtaĉha Moisés liiquiztan punta punta tjaajinzjapa, nii. Jalla nuž tantiiĉha persun amtiquiziqui.

³ Anĉhucqui ninacaž tjaajintacama oka. Nižaza ninacaž chiitacama paa. Pero ninacž kamz jaru, ana kama. Ninacaqui tjaajinĉha, pero persun tjaajinta jaru ana ojkĉha, ana cumpliĉha.

⁴ Ninacaqui walja mantitanaca paaĉha, walja kuzižtakaz žoñinacžquiz jepĉha. Tjapa ninacž mantitanacaqui anapan atĉucaĉha. Jalla nuž cjenami tjapa mantitanaca žoñinacžquiziqui tirapanž ijsijĉha. Pero ninacapacha anaž ĉhjulquizimi yanapĉha nii cumplisjapa.

⁵ Ninacaqui ĉhjulu paatami paaĉha, žoñinacakaz cherajo. Yujc ayquizimi kjarquizimi cjiĉrta Yooz taku jweranĉiž ojklajĉha, nižaza parti žoñinacžquiztan juc'anti lajch ĉhajlĉhiz zquti cujtĉiž ojklajĉha. Jalla nižtaž ojklajž jutztazza.

⁶ Pjijstiquiz cjen tucquin panž julz pecĉha. Nižaza ajcz kjuyquiz cjen tucquin panž julz pecĉha honorĉhiz cjisjapa.

⁷ Ninacaqui žoñinacž taypiquiz cjen rispitižtan tsaanta cjis pecĉha, nižaza “Maestro” cjita cjis pecĉha.

⁸ ‘Anĉhucqui anaĉha žoñinacžquiz “maestro” cjita cjis peczqui. Tjapa anĉhucqui jilazullquiĉhucĉha. Tsĉii Maestruchizĉhuckazza. Cristuĉha nii Maestruqui.

⁹ Nižaza anĉhucqui tii muntuquiz kamcan anaž jeczquizimi “ejp” cjican chiiž waquiziĉha. Tsĉii Ejpĉhizĉhuckazza. Arajpach Yooz Ejpĉha niiqui.

¹⁰ Nižaza anĉhucqui anaĉha žoñinacžquiz “jiliri” cjita cjis peczqui. Tsĉii jilirĉhizĉhucĉha. Cristuĉha niiqui.

¹¹ Anĉhucquiztan jequit jilirižtakaz cjis pecĉhaja, jalla niiqui piyunažtakaz cjis waquiziĉha parti žoñinacžquiziqui.

¹² Jequit persun honora waytiz pecĉhaja, ultimquiziqui ana honorĉhiz cjequiĉha. Nižaza jequit humilde kuzzizlaja, jalla niiqui ultimquiziqui honorĉhiz cjequiĉha.

¹³ ‘Lii tjaajiñi maestrunaca, nižaza fariseo parti žoñinaca, ana zuma kuzziz žoñinacĉhucĉha. Anĉhucqui anawalipanž cjisnaquiĉha. Žoñinaca atajiñĉhucĉha, arajpach Yooz wajtĉhiz ana luzajo. Anĉhucpachaž ana luzza, nižaza pecĉhi cjenami parti žoñinacžquizimi ana luzkatiñĉhucĉha.

¹⁴ Lii tjaajiñi maestrunaca, nižaza fariseo žoñinaca, ana zuma kuzziz žoñinacĉhucĉha. Anĉhucqui anawalipanž cjisnaquiĉha. Žew maatakanacžquiztan kjuy cusasanaca

kjañiñchuccha. Jalla nuž paažcumi nii maataka incallzjapa ažka ažka Yoozquin maytažoka payiñchuccha ninacžtajapažtakaz. Jalla nuž paatiquiztan ančhucqui juc'anti castictaž cjequiča.

¹⁵ 'Lii tjaajiñi maestrunaca, fariseo žoñinaca, ana zum kuzziz žoñinacchuccha. Jaziqui ančhucqui anawalipanž cjisnaquiča. Ančhucqui jaknužumi ančuca cuzturumpi jaru žoñinaca ojkkatzkaz pecča. Jalla nuž ojkkatžcuqui ančhucqui nii žoñinaca ančucaquiztan pizc wilta wilta juc'anti anawaliž cjiskatča, infernuquin casticta cjisjapa.

¹⁶ 'Ančhucqui anawalipanž cjisnaquiča, zur žoñižtakaz irpiñinaca. Ančhucqui cjiñchuccha: "Jakziltat timplu tistiwcchiz juramintu paaquiž niiqui, jalla nii juramintuqui anaž walča. Pero jakziltat timplu kor paaz tistiwcchiz juramintu paaquiž niiqui, jalla nii juramintuqui walča".

¹⁷ Zumzu zur žoñinaca. ¿Jakziltat juc'ant chekanaqui, timpluquin žejlñi korinacakaya, už timplupanej? Timpluž cjen nii korinacaqui walča.

¹⁸ Nižaza ančhucqui cjiñchuczakazza: "Jakziltat timplu altar tistiwcchiz juramintu paaquiž niiqui, jalla nii juramintuqui anaž walča. Pero jakziltat altarquin uchta ofrenda tistiwcchiz juramintu paaquiž niiqui jalla nii juramintuqui walča".

¹⁹ Zumzu zur žoñinaca. ¿Jakziltat juc'ant chekanaqui, ofrendakaya, už altarapanej? Altaraž cjen nii ofrendaqui walča.

²⁰ Jakziltat altar tistiwcchiz juramintu paaquiž niiqui, nižaza tjapa nii altar juntuñ žejlñinaca tistiwcchiz juramintu paača.

²¹ Nižaza jakziltat timplu tistiwcchiz juramintu paaquiž niiqui, nižaza timpluž Yooz tistiwcchiz juramintu paača.

²² Nižaza jakziltat arajpach tistiwcchiz juramintu paaquiž niiqui, nižaza arajpach Yooz tistiwcchiz juramintu paača. Yoozqui arajpachquin žejlča, nižaza arajpachquiztan mantiča.

²³ 'Lii tjaajiñi maestrunaca, nižaza fariseo žoñinaca, ana zum kuzziz žoñinacchuccha. Ančhucqui anawalipanž cjisnaquiča. Ančhucqui diezmos tjaayiñchuccha mentquiztan, anizquiztan, cominquiztan. Jalla nii kolta plantanacquiztan ančhucqui diezmos tjaayiñchuccha. Pero ančhucqui liiž chekan mantitanac jaru ana kamiñchuccha. Yooz kuz jaru ana kamiñchuccha, nižaza ana okžni kuzzizchuccha; nižaza ana Yoozquin kuzzizchuccha. Jalla nižta chekan lii jaru ana kamiñchuccha. Jalla nižta jaru kamz waquiziča, diezmos tjaacanami.

²⁴ Ančhucqui zur irpiñinaca. Tižta irata paayiñchuccha. Tsjii žoñiqui kolta zmoyalla culchiča ana lujljapa. Jalla nuž cjenami pajk ana wali animala ana culžcu lujlchiča. Jalla nižta irata paayiñchuccha.

²⁵ 'Liy tjaajiñi maestrunaca, nižaza fariseo žoñinaca, ana zum kuzziz žoñinacchuccha. Anawalipanž cjisnaquiča ančhucqui. Wazumi chuwami zawnctanaqui ajuntaž cjesača. Jalla nuž cjenami kjuyltan cjujchiž cjesača. Jalla nižtaž ančhucqui. Zawncta curpuqui walikaz chercherča. Ančuca kuzquizzti cjujchinacažtakaz žejlča. Tjañi zaazmi anawali paazmi jalla nižta kuzzizchuccha ančhucqui.

²⁶ Zur fariseo žoñinaca, primiruqui zuma kuzziz cjisna ajunta chuwažtakaz; nekztanaqui zuma žoñiž tsijtchizakaz cjequiča.

²⁷ 'Lii tjaajiñi maestrunaca, nižaza fariseo žoñinaca, ana zum kuzziz žoñinacchuccha. Anawalipanž cjisnaquiča ančhucqui. Chiw ljocžtan tjarta sipulturužtakazza ančhucqui. Ančuca tsitiqui walikazza. Ančuca kuzzti ana walipanča. Sipultura ticzi žoñinacž tsijnacžtan chjijsi, nižta ana waliča.

²⁸ Jalla nižtaž ančhucqui. Žoñinacaqui ančhuc zuma žoñižtakaz nayča. Pero ančuca persun kuzquizzti juc'ant anawalinaca žejlča.

²⁹ 'Lii tjaajiñi maestrunaca, nižaza fariseo žoñinaca, ana zum žoñinacħucħa. Anawalipanž cjisnaquiħa. Anħucqui profetanacž sipulturunaca azquichiñħucħa, nižaza Yooz kuzcama kamñita žoñinacž monumentunaca c'achjalla cjiskatiñħucħa.

³⁰ Nižaza nii zuma žoñinacž puntuquiztan tuž cjiñħucħa: “Uħum tuquita atchi ejpnacaqui anawali kamchiħa. Wejrnacqui nii tuqui timpuquiz kamtasaz niiqui, anaž profetanaca conzjapa yanaptasaħa”.

³¹ Jalla nuž chiican, anħucpacha chiiħa, profeta conñi žoñinacž majch-maatiħucħa, nii.

³² Jaknužt anħuca tuquita atchi ejpnacaqui anawali paatħaja, jalla nižtakaz payiñħucħa.

³³ 'Zkoražtakaz žoñinaca. Zkoražta sarchiz žoñinaca. Anħucqui anapanž wira atipasaha infiernuquin casticzquiztanaqui. Castictapanž cjequiħa.

³⁴ Anħuc juc'ant casticta cjisjapa, anħucaquiz cuchanžcaħa profetanaca, nižaza Yooz puntu zuma zizñinaca, nižaza Yooz puntu tjaajinñinaca. Jalla nii žoñinaca cuchanžquichiž cjen, anħuczti tsjii yekjanaca conaquiħa, yekjanaca cruzquiz ch'awcznaquiħa, yekjanaca ajcz kjuyquizpacha wjajtaquiħa. Nižaza yekjanaca wjtquiztan watja tanzjapa apznaquiħa.

³⁵ Jalla nuž paatiquiztan anħuca ujnacquiztanami nižaza anħuca tuquita atchi ejpnacž ujnacquiztanami caztictaž cjequiħa. Anħuca atchi ejpnacaqui zuma žoñi conchiħa, Abelquiztanpacha asta Berequías majch Zacarías, jalla niicama. Zacariasqui timpluquizpacha contataħa, altar žcati.

³⁶ Anħucaquiz weraral cjiwħa. Tjapa nii uj paatanacquiztan casticta cjequiħa tii timpuquiz kamñi žoñinacaqui.

JERUSALEN WAJTCHIZ ZOÑINACŽ PUNTU

³⁷ Nekztan Jesusaqui chiichiħa, tuž cjican: Jerusalén wajtchiz žoñinaca, Jerusalén wajtchiz žoñinaca. Profetanaca coničħucħa. Nižaza Yooz cuchanžquita profetanaca maztan ħaciñħucħa. Kjaž wilta wejrqui tii žoñinaca juntis pecchinħa, cwitisjapa. Jaknužt wallpiquei kjar koztan ozmachanaca cwitiħaja, jalla nižta irata tii žoñinaca cwitis pecchinħa. Tii žoñinacazti wira ana nuž cwitiskatz pecchiħa.

³⁸ Tii taku nonžna. Anħuca kjuyanacaqui jaytitaž cjequiħa.

³⁹ Anħucaquiz cjiwħa. Tsjii noojiquei anħucqui wejt puntuquiztan chiyacquiħa, tuž cjican: “Yooz Jilirž tjuuquiz tjonñi, amqui honorchiz cjila”. Jalla nii noojcama anħucqui ana wej wilta cheraquiħa.

24

JUDIO TIMPLU PUNTU

¹ Nekztanaqui Jesusaqui timpluquiztan ulanchiħa. Nekztan niž tjaajinta žoñinacaqui nižquin macjatžcu, tuž cjichiħa:

—Cherzna. Ancha c'achjaħa tii timplu kjuyanacaqui.

² Jesusaqui kjaaziħa, tuž cjican:

—Tjapa tii timplu kjuyanaca zumpacha chernza. Anħucaquiz weraral cjiwħa. Tsjii noojiquei tii kjuyanacaqui k'ala pajltaž cjequiħa. Ana zinta tii maznaca pirkita želaquiħa.

TII MUNTU TUCUZINZ PUNTU

³ Nekztan ninacaqui Olivos cjita curullquin ojkiħa. Nicju Jesusaž julzi želan, tjaajinta žoñinacaqui nižquiz jamazit tuž cjichiħa:

—Maznalla. Ćħjulorat nii amiž chiita wataqui? Nižaza am tjonz siñala, Ćjakziltat cjeequiya? Nižaza tii muntu tucuzinz siñala, Ćjakziltat cjeequiya?

⁴ Nekztanaqui Jesusaqui kjaaziħa tuž cjican:

—Ančhucž cwitaza, ana jecmi ančhucaquiz incallskata.

⁵ Muzpa žoñinacaqui wejt tjuužtan tjonacuicha, “Wejrtča Cristutqui” cjican. Jalla nuž chiižcu tama žoñinaca incalltaž cjequicha.

⁶ Nižaza ančhucqui quira žejlž quintunaca zizaquicha; nižaza yekja quira quintunaca arawasaquicha. Jalla nuž cjenami anaž tsuca. Nuž watstanča. Imaziča tii muntu tucuzinzqui.

⁷ Nacionpora talznaquicha; nižaza quira paaquicha. Nižaza mach'a želaquicha, nižaza conanaca ojklayaquicha, nižaza walja yoka chekjincan terremotož wataquicha, wacchi yokaran.

⁸ Tjapa tii wattanaqui juc'anti t'akjiziz želaquicha.

⁹ Jalla nekztanaqui ančhucqui jilirinacžquiz intirjitaž cjequicha sufriskatzjapa. Nižaza contaž cjequicha ančhucqui. Nižaza ančhucaž wejtquiz criichiž cjen, tjapa ana criichi žoñinacaqui ančhuca quintraz cjequicha.

¹⁰ Jalla nuž watan, muzpa Yoozquin criichi žoñinacaqui quejpsnaquicha. Yoozquin criichi žoñinacž quintraj cjisnaquicha, jilirinacžquin intirjizcama. Criichi žoñinacžquiz ancha chjaawjkataquicha nii quejpsñinacaqui.

¹¹ Muzpa toscara chiiñinaca ojklayaquicha, tuž cjican: “Yooziž tjaata takuča tiiqui”. Nii toscar takunacžtan muzpa žoñinacžquiz incallaquicha.

¹² Anawalinacaž miraquicha. Žoñinacpora ana zuma munasaquicha.

¹³ Jakziltat wejt tjonzcama tjurt'iñi kuzziz želačhaja, jalla niiqui ultimquiziqui liwri-itaž cjequicha.

¹⁴ Yooziž liwriita žoñinacača Yooz kjuychiz familiaqui. Jalla nii zuma taku tjapa kjutñi tii muntuquiz parlitaž cjequicha, tjapa žoñinaca zizajo. Jalla nii wattanaqui tii muntuquiz tucuzinznaquicha.

¹⁵ Tii zakal cjiwča. Tii puntuquiztan Daniel cjita profetaqui cjiirchiča: “Tsjii noojiqui tsjii juc'ant ana wali akñi žoñi parizaquicha. Yooz chekan kjuyquinkaz luzaquicha”. (Tii taku liñiqui intintaza.)

¹⁶ Jalla nuž cheržcu Judea yokquin žejlñi žoñinacaqui curunacžquin atipz waquiziča.

¹⁷ Nižaza nuž cheržcu kjuy juntuñ žejlñi žoñinacaqui chjujžcu ana kjuya luzla, cusasanaca chjitzjapa.

¹⁸ Nižaza pampiquin žejlñi žoñinacaqui persun zquiti apti ana quejpžquila.

¹⁹ Nii tjuñquiziqui ic maatakanacami k'azllu wawchiz maatakanacami ancha t'akjiri želaquicha.

²⁰ Yoozquinča mayiza ančhucqui, anaj zac timpuquin nižtanaca watsjapa, nižaza anaj jeejz tjuñquiz nižtanaca watsjapa.

²¹ Tii sufris timpu juc'anti sufris cjequicha yekja sufrisnacquiztanami. Yooz tii muntu paatiquiztan jecchuc anapanča tižta sufrisnacaqui watchiqui. Nižaza tekžtan najwcchuc anaž iya juc'anti sufrisqui cjequicha.

²² Yoozqui anaž tii sufrisnaca tucuskatasaz niiqui, tjapa žejlñi žoñinacaqui ticznasača. Yoozqui niž illžta žoñinacž laycu nii sufrisnaca tucuskataquicha.

²³ Nižaza yekjap žoñinacaqui ančhucaquiz chiyasača, tuž cjican: “Tekziča Cristuqui”. Yekjapac chiyasača, “Nii nacjuča Cristuqui” cjican. Jalla nuž chiyanami anapanča nii taku criaquicha ančhucqui.

²⁴ Incallñi žoñinacaž tjonacuicha. Yekjapaqui “Cristutča wejrqui” cjequicha. Yekjapaqui “Yooziž tjaata taku mazniñtča wejrqui” cjequicha. Ninacaqui walja ispan-tichuca milajrunacaž paaquicha, incallzjapa. Tjapa žoñinacaž incallz pecaquicha, asta Yooziž illžta žoñinacami.

²⁵ Ima tižtanacaž tjonan wejrqui ančhucaquiz ultim wereral maznuča, ana incallta cjisjapa.

²⁶ Zoñinacaqui “Ch'ekti yokquin cheržquilalla, nicjuča Cristuqui” cjequiča. Jalla nii quintu nonžcu, anapanž okaquiča. Nižaza “Tii kjuyquizza Cristuqui” cjequiča. Jalla nii quintu nonžcu, anapan criyaquiča.

JESUCRISTUQUI WILTA TJONAQUICHA

²⁷ 'Ančhucaquiz cjiwča. Jalla tižtal irata tjonacha wejrqui. Wejrqui tsewctan cuchanžquita Yooz Zoñtča. Jaknužt lliwjlliwjñi tuwantan tajachuc lliwjčhaja, jalla nuž tjonacha.

²⁸ Jakziquin zerwi žejlčhaja, jalla nekzi zkaranacaž ajcznaquiča.

²⁹ 'Nekztanaqui tii sufris timpu wattan, tjuñiqui zumaquiča; kataquiča, ana iya kjanaquiča. Jiizmi nižazakaz ana iya kjanaquiča. Warawaranacami pachquiztan tjojtснаquiča. Nižaza tseecu azziz žejlñinacaqui chjekinskattaž cjequiča.

³⁰ Jalla nekztanaqui arajpachquin wejt siñalaqui parisaquiča. Wejrqui tsewctan cuchanžquita Yooz Zoñtča. Jalla nuž wejt siñala cheržcu tjapa ana criichi žoñinacaqui kaaquiča. Ninacaqui wejt tjonz cheraquiča. Wejrqui tsjir taypiquiz tjonacha walja aztan, nižaza Yooz Epiž aziž tjeežcan.

³¹ Nižaza wejt anjilanaca cuchanžcača weriž illzta žoñinaca juntjapzjapa, trompeta tjawžcu. Illztanacaqui tjapa tii muntuquiztanpacha juntaptaž cjequiča.

³² 'Ančhucqui higuera munti puntuquiztan zizza, jalla tuž. Higuera muntiqui ch'ojñantiz kallantaquiž niiqui, waj kutunz timpuž kallantaquiča. Jalla nii zizza ančhucqui.

³³ Jalla nižta irataž tjapa weriž chiita wattan, tii muntuqui waj tucuzinznaquiča. Jalla nuž ančhucaquiz zizkatz pecuča. Jaknužt tsjii žoñiqui kjuy zana žcatžinčhaja, luzjapa, jalla nižta irataž žcatžinchiča tii muntu tucuzinzqui.

³⁴ Ančhucaquiz weraral cjiwča. Ima tii timpuquiz kamñi žoñinacaž ticznán, tjapa weriž chiitanaca wataquiča.

³⁵ Arajpachami tii yok muntumi liwj tucuzazuquiča. Wejt takunacazti wiraž ana tucuzazuquiča.

³⁶ 'Pero wejt tjonz tjuñimi, wejt tjonz orami anaž jecmi zizasača, anaž arajpach Yooz anjilanacami, anaž Yooz Majchmi. Yooz Ejp alajakaz zizza.

³⁷ 'Jaknužt Noež timpu watčhaja, jalla nuž wataquiča wejt tjonz tjuñquiziqui.

³⁸ Noež timpuquiz ima tii muntu kjaztan tuzkatta cjen, žoñinacaqui tuž kamñitača, lujlan, liccan, zalzcan, zalzjapa majtnaca tjaacan. Jalla nuž kamñitača Noež warcuquiz luz tjuñicama.

³⁹ Kjaz juyzu tjonzcama žoñinacaqui ana čjul tantiyassi žejlchiča. Nekztan kjaz tjon-tiquiztan tjappacha žoñinacaqui kjazquiz kuzta ticziča. Jalla nižta irataž wataquiča wejt tjonž tjuñquiziqui.

⁴⁰ Jalla nii noojiqui pucultan žoñiqui pampiquin cječhani. Tsjiiqui arajpach kjutñi waytižcu chjitžtaž cjequiča. Tsjiiqui ectaž cjequiča.

⁴¹ Nižazakaz pucultan maatakanacaqui jawuncan želačhani. Tsjaaqui arajpach kjutñi waytižcu chjitžtaž cjequiča. Tsjaaqui ectaž cjequiča.

⁴² 'Jalla nižtiquiztan ančhucqui walja naynay želaquiča. Čjulorat wejr, am Yooz Jiliri, tjonachaja, jalla nii ora ana zizzuca.

⁴³ Ančhucqui tii zizza. Kjuychiz žoñiqui tjañi tjonz ora ziztasaz niiqui, walja naynay žejltasača, niž kjuya ana tjañiž luzta cjisjapa.

⁴⁴ Jalla nižta irataž ančhuqui naynay želaquiča. Tiripintit, ana pinsita orquiz tjonacha. Wejrqui tsewctan cuchanžquita Yooz Zoñtča.

PIZC PUNTA PIYUNANACA

⁴⁵ Tsjii kjuychiz žoñiqui piyunanaczquiz kjuya tjiisiča, cwitisjapa, nižaza lujlz ora čhjeri tjaazjapa. ¿Jakzilta piyunat zuma cumpliñi, nižaza zuma cwitiñiya? Nii tantiya.

⁴⁶ Jalla tižtaž piyunanacaqui. Kjuychiz žoñiž irantižcan tsjii piyunaqui cwitican žejlchiča, jaknužt cumpjiitažlaja, jalla nuž cumplican žejlchiča. Jalla niiča zuma piyunaqui. Nižaza nii piyunaqui cuntintuž cjequiča.

⁴⁷ Ančhucaquiz weraral cjiwča. Nii kjuychiz žoñiqui tjapa niž cusasanaca cumpjiyaquiča nii zuma piyunž kjarquiz.

⁴⁸ Nii kjuy cumpjiita piyunaqui ana zuma cječhaj niiqui, pinsasača jalla tuž: “Aaaa, wejt patrunaqui ana uri tjonasaka”, cjican cjequiča.

⁴⁹ Jalla nekztan parti piyunanaczquiz wjajtasacha. Nižaza ana zum žoñinacztan cumpant'asacha, lujlcanami liccanami.

⁵⁰ Jalla nuž kaman, nii kjuychiz patrunaqui tiripintitž tjonaučiča, tsjii ana zizta orquiz.

⁵¹ Jalla nekztanaqui nii ana zum piyunaqui zuma castictaž cjequiča. Nižaza nii ana zuma piyunaqui chjatkattaž cjequiča. Nižaza infiernuquin žejlcan, kaaquiča, nižaza ižke kjojaquiča.

25

TUNCA TURTAKANACZ QUINTU

¹ ‘Tii zakal chiyuča. Arajpach Yooz mantis puntuqui jalla tužuča. Tunca turtakanacaqui micha tanžcu tsjii zalzñi tjowžquin ojkchiča.

² Pjijskaltanaqui ima ojkcan ana zuma tantiichiča. Tsjii pjijskaltanaqui zuma listu tjaczitača.

³ Nii pjijskaltan ana zuma tantiitazzi turtakanacazti michaka chjitchiča, ana iya parafina chjitchiča, tsjiižtan camzjapaqui.

⁴ Nii pjijskaltan zuma listu ojkchinacaqui wilta camzjapami parafina chjitchiča.

⁵ Nii zalzñi tjowaqui ana uri tjonchiča. Jalla nižtiquiztan tjaji tjonkatchiča tjap-pacha. Nižaza tjajchiča.

⁶ Jalla nekztanaqui chica arama kjawñi jora nonziča, tuž cjican: “Cherzna. Zalzñi tjowa tjonžca. Ulanžca nižaza risiwžca”.

⁷ Tjapa nii turtakanacaqui žaaziča, nižaza micha teezjapa tjacziča.

⁸ Niiž upaquiztanalla nii pjijskaltan ana zuma tantiyazzi turtakanacaqui tsjii pjijskaltan turtakanaczquiz cjichiča, “Parafina tojnalla, wejtnaca parafina upziča. Nižaza wejtnaca micha tjessa”.

⁹ Pero nii walja tantiitazzi turtakanacaqui tuž kjaaziča: “Ana atchuca. Wejtnacaltami ančhucaltami anaž wacasača. Jalla nižtiquiztan ančhucaž oka, jakziquin parafina tuyčaja, jalla nicju. Ančhucaltajapa kjayžca”.

¹⁰ Nii pjijskaltan turtakanacaz parafina kjayi ojktan, zalzñi tjowaqui irantižquichiča. Nekztan nii tantitazzi turtakanacaqui zalzñi tjowžtan kjuyquiz luzziča, zalz pijjsta paazjapa. Jalla nekztanaqui kjuya chawcziča.

¹¹ Wiruñauqui nii kjayi ojkchi turtakanacaqui quejpžquichiča, tuž cjican: “Wejt Jiliri, Wejt Jiliri, cjetznalla, cjetznalla”.

¹² Pero niiqui kjaaziča, tuž cjican: “Ančhuc anal pajuča”.

¹³ Jalla nižtiquiztan Jesusaqui ninaczquiz chiižinchiča tuž cjican:

—Anchucqui walja zuma listu tjacziz cjequiča. Wejt tjonz tjuñi orami ana zizza.

TJAATA PAAZNACA QUINTU

¹⁴ ‘Arjapach Yooz kamañauqui jalla tužuča. Tsjii žoñiqui jiczquin ojkz cjen, niž piyunanaca kjawziča. Piyunanaczquiz paaz tjiiziča.

¹⁵ ‘Tsjii tsjižquiz pjijska warank paaznaca tjaachiča. Tsjižquiz paa warank paaznaca tjaachiča. Tsjižquizqui tsjii warank paaznaca tjaachiča. Zapa maynižquiz ninacz negocio paaz atñi jama tjaachiča. Jalla nekztanaqui ojkchiča.

16 Nii tsjii pjijska warank paaznaca tanzñi piyunaqui paaztan negocio paachiča. Jalla nuž paažcu tsjii pjijska warank paaznacžtan canchiča.

17 Nižazakaz nii tsjii paa warank paaznaca tanzñi piyunaqui paaztan negocio paachiča. Jalla nuž paažcu tsjii paa warank paaznacžtan canchizakazza.

18 Nii tsjii warankalla paaznaca tanzñi piyunazti patrunž paaz chjojziča. Yokquiz ojt jwetžcu, jalla nezk chjojziča.

19 'Ažktan niž wiruñ nii paaz kajžñi patruaqui quejpžquichiča. Jalla nekztanaqui piyunanacžquiztan kaja cobrichiča.

20 Primiruqui nii tsjii pjijska warank paaznaca tanzñi tjonchiča. Jalla niiqui patrunžquiz paaznaca intirjichiča, tuž cjican: “Wejt Jiliri, wejtquiz pjijska warank paaznaca tjaachamča. Nii paaztan trabajžcu, iya pjijsk warank paaztan canchinča. Jalla tiiča amiž tjaatami nižaza weriž cantami”.

21 Patruaqui nižquiz cjichiča: “Walikazza. Amqui ancha zuma piyunamča. Zuma trabajchamča. Zkoluc paaz zuma trabajtiquiztan, jaziqui juc'anti paaznaca amquiz cumpjiyača”. Nižaza cjichiča: “Luzca. Wejttan chica chjipzna. Cuntintum cjee”.

22 Jalla niž wiruñ nii tsjii paa warank paaznaca tanzñi piyunaqui tjonchiča, tuž cjican: “Wejt Jiliri. Wejtquiz paa warank paaznaca tjaachamča. Iya tsjii paa warank paaztan canchinča. Jalla tiiča amiž tjaatami nižaza weriž cantami”.

23 Niiž patruaqui nižquin cjichiča: “Walikazza. Amqui ancha zuma piyunamča. Zuma trabajchamča. Zkoluc paaz zuma trabajtiquiztan, jaziqui juc'anti paaznaca amquiz cumpjiyača”. Nižaza cjichiča: “Luzca. Wejttan chica chjipzna. Cuntintum cjee”.

24 Pero nekztan nii tsjii warank paaznaca tanzñi piyunaqui tjonchiča. Niiqui patrunžquiz cjichiča: “Wejt Jiliri. Amqui c'ar patruamča. Jalla nii zizzatuča. Amqui ana čjulumi paažcum i canñamča. Nižaza ana čjacžcum i, ajžñamča.

25 Jalla nižtiquiztan ekzinča, nižaza ojkžcu am paaznaca yokquiz chjojchinča. Pero tekziž am paazqui”.

26 Patruaqui nii piyunžquiz tuž kjaaziča: “Ana zum piyuna. Jayri piyuna. Wejrqui ana čjacžcu ajžñinpanča, nižaza ana čjulumi paažcu canñinpanča. Jalla nižtapanim zizla amqui.

27 Jalla nižtiquiztan wejt paaz bancuquiz mekaz uchanchucataž, jalla. Jalla nuž paatasaz niiqui, wejrqui quejpžcu bancuquiztan paaz majchtanpacha ricujtasača”.

28 Jalla nekztanaqui nii patruaqui nekzi žejlñi žoñinacžquiz cjichiča: “Tii piyunžquiztan nii warank paaznaca kjaña. Nii tunca warank paaznacchiz piyunžquiz tjaa.

29 Jakziltat želinchižlaja, jalla nižquiz iya tjaataž cjequiča, jilacama. Nižaza jakziltat zkoluc želinchižlaja, nižaza ana zuma trabajchižlaja, jalla nižquiztan tjappacha kjañtaž cjequiča.

30 Tii ana zum piyuna chjatkata, zawncta zumchiquin. Jalla nicju kaaquiča, nižaza ižke kjojaquiča”.

ZOÑINACA PJALZTAZ CJEQUICHA

31 'Wejrqui tsewctan cuchanžquita Yooz Zoñtča. Tsjii noojiqui wejrqui wilta tjonacha, wejt azi tjeežcan. Rey cjita Jiliri cjeeča. Tjapa wejt anjilanacžtanpacha tjonacha. Poderchiz tjonacha žoñinaca pjalzjapa. Tsjan chekan juez Jiliritča wejrqui.

32 Wejt yujcquin tjapa tii muntuquiz kamñi žoñinaca juntjaptaž cjequiča. Jalla nekztanaqui wejrqui ninaca pjalznača, jaknužt tsjii awatiriqui uza yekja nižaza cabra yekja pjalznačhaja, jalla nuž.

33 Pjalžcu uzanacaqui žew latuquiz cjequiča, cabranacazti zkar latuquiz cjequiča.

³⁴ Wejrtča chekan juez jiliritqui. Nekztanaqui wejt žew latu pjalžtanacžquiz tuž cjeeča: “Wejt Epiž k'aachita žoñinaca, pichalla ančhucalta tjaczta kamaña tanzjapa. Tii muntu paata ora, niwjctanpacha ančhucalta nii kamaña tjacztača, Yooztan kamzjapa, nii kjuychiz familia cjisjapa”.

³⁵ Nižaza cjeeča, “Ančhucqui zumanaca paachinčhucča. Weriž čhjeri eecsiž cjen, ančhucqui wejtquiz čhjeri tjaachinčhucča. Nižaza weriž kjaz pecan, ančhucqui wejtquiz kjaz onanchinčhucča. Nižaza yekja yokquin ojklayan, ančhucqui wejtquiz tjajz kjuyquiz kjawzinčhucča.

³⁶ Weriž ana zquitchiz cjen ančhucqui zquiti onanchinčhucča. Nižaza laaquichi cjen, wejtquin tjonzinčhucča. Nižaza carsilquiz chajwcta cjen, ančhucqui wejtquin cherzñi tjonchinčhucča”.

³⁷ Jalla nekztanaqui zuma kamañchiz žoñinacqui wejtquin cjequiča: “Wejt Jiliri, ěchjulora am čhjeri eecsi cherchintaya? Nižaza čhjeri lujljzjapa, ěchjulora onanchintaya? ěChjulora am kjaz pecan, onanchintaya?

³⁸ ěChjulora am yekja yokquin ojklayan tjajz kjuyquiz kjawzintaya? ěChjulora am ana zquitchiz cjen, zquiti onanchintaya?

³⁹ Nižaza ěchjulora am laaquichi cjen, tjonzintaya? ěChjulora am carsilquiz cjen, amquin tjonzintaya?”

⁴⁰ Jalla nekztanaqui zuma kamañchiz žoñinacžquiz kjaaznača, tuž cjican: “Anchucaquiz weraral cjiwča. Wejrtča chekan juez Jiliritqui. Chjulora wejt jilanacžquiz yanapčhaja, humilde jilanacaž cjenami, jalla niiqui wejtquiztakaz yanapchinčhucča”. Nuž chiyacha pjalz tjuñquiz.

⁴¹ Jalla nekztanaqui wejrqui, chawc juez Jiliri cjican, nii zkar latu pjalžtanacžquiz cjeeča: “Ančhucqui, Yoozqui ančuca quintrača. Jaziqui wejtquiztanž infiernuquin oka. Diablužtami niž anjilanacžtami tjacztača nii infiernuqui. Ančhucqui zakaz nii infiernuquin wiñaya sufraquiča.

⁴² Weriž čhjeriž eecsiž cjen, ančhucqui ana wejtquiz čhjeri onanchinčhucča. Weriž kjaz pecan, ančhucqui ana wejtquiz kjaz onanchinčhucča.

⁴³ Weriž yekja yokquin ojklayan, ana tjajz kjuyquiz kjawzinčhucča. Weriž ana zquitchiz cjen, ana zquiti onanchinčhucča. Weriž laa cjen, nižaza carsilquiz cjen, ančhucqui ana wejr cherzñi tjonzinčhucča”.

⁴⁴ Jalla nekztanaqui ninacaqui cjequiča: “Wejt Jiliri, ěchjulora am čhjeri eecsi cjen, kjaz pecchi cjenami, yekja yokquin ojklaychi cjen, ana zquitchiz cjen, laa cjen, carsilquiz chawcta cjen, jalla čhjulora am nižta cherchintaya? Nižta chertučhaja, yanaptasača”.

⁴⁵ Jalla nektanaqui wejrqui, chawc juez Jiliri cjican, ninacžquiz kjaaznača, tuž cjican: “Anchucaquiz weraral cjiwča. Chjulora wejt jilanacžquiz humilde cjenami ana yanapchižlaja, wejtquiztakaz ana yanapchinčhucča”.

⁴⁶ Jalla nekztanaqui nii ana zuma kamañchiz žoñinacqui infiernuquin cuchantaž cjequiča, wiñaya casticta cjisjapa. Nii zuma kamañchiz žoñinacasti Yooztan chica wiñaya kamzjapa okaquiča.

26

JESUSA TANZ TANTIITA

¹ Tjappacha nii chiitanaca žeržcu, Jesusaqui niž tjaajinta žoñinacžquiz cjichiča:

² –Ančhucqui zizza, puc majča pascua pijjstaqui. Jalla nii pijjsta ora wejrqui intirjital cjeeča cruzquiz ch'awcta cjisjapa. –Jalla nuž cjichiča Jesusaqui.

³ Jalla nii oraqui timplu jilirinacami, liy tjaajiñi maestrunacami judío wajtchiz jilirinacami ajcziča, Caifás jilirž kjuy patiuquiz. Caifás cjitaqui timplu jilirinacžquiztan chawc jiliritča.

⁴ Jalla nicju ninacaqui palt'ichiča, nižaza kazziča mañžtan Jesusa tanzjapa. Jalla nuž tanžcu, Jesusa conzjapa kazziča.

⁵ Nuž kazcu tuž cjichiča:

—Pjijsta paan Jesusa tanz anaž cjichuca. Zoñinacaqui aptjapznasača.

JESUSIZ ACHQUIZ ASIITI ALZTA

⁶ Jesusaqui Betania wajtquiz želatča, Simonž kjuyquiz. Niiž tuquiqui Simonaqui janchi mojkchi laatača.

⁷ Jalla nekz želan, tsjaa maatak žonqui Jesusižquiz macjatžquichinča. Naaqui tsjii putilla chjitchinča. Nii putillquiz cuza mazk'a ulurchiz asiiti želatča, ancha jila walurchiz. Nii putillača zuma alabastro cjita maztan paataqui. Jesusa mizquiz želan naa maatak žonqui niiž achquiz zuma asiiti alžinčinča.

⁸ Niiž tjaajintanacaqui nii cheržcu, žawjziča, naa žoña quintra. Jalla nekztan tuž cjichiča:

—¿Kjažtiquiztan tii walurchiz asiiti pertejo?

⁹ Jalla tiiqui antis tuchucatača walja jiluñ, nižaza pori žoñinacžquiz yanapzjapa.

¹⁰ Jesusaqui nii chiiñi nonžcu tjaajintanacžquiz ujziča:

—¿Kjažtiquiztan taa žonatan chjijcisejo? Anača taa žon kjaž cjisqui. Jalla tuž taa žoñaž paataqui wejtquiztan walikazza.

¹¹ Porinacžquiz yanapz pecaquiž niiqui, porinacaqui ančhucatan panž želaquiča. Wejrzi ančhucatan ana žejlztanpanča.

¹² Jalla taa maatak žoñqui wejtquiz tii zuma ulurchiz asiiti alžinžcu, wejt curpu tjaczinča, tjatta cjisjapa.

¹³ Ančhucaciz weraral cjiwča. Jakziquinami tii muntuquiziqui liwriñi Yooz taku parlita cječhaja, jalla nižtazakaz taa maatak žonaž paataqui parlita zakaz cjequiča, jalla naaquiztan cjuñta cjisjapa.

JUDASQUI JESUS TARAZUNAQUICHA

¹⁴ Tuncapan illzta žoñinacžquiztan tsjiiqui Judas Iscariote cjitatača. Jalla niiqui ojkchiča timplu jilirinacžtan parli.

¹⁵ Jalla nuž parlican cjichiča:

—Ančhucaciz Jesusal intirjasaž niiqui, ančhucqui ¿kjaž paaz pacas?

Jalla nii orapacha quinsa tunc paaznaca Judasquiz pacchiča.

¹⁶ Jalla nužquiz Judasqui čhjulatorat Jesusa tankatchuca cječhaja, jalla nii ora walja kjurchiča.

SANTA CENA PAACHICHA

¹⁷ Jalla nekztanaqui ana liwaturžtan t'anta lujlz pjijzta, jalla nii pjijztaž primir tjuñquiz tjaajinta žoñinacaqui Jesusižquin macjatžcu tuž pewcziča:

—¿Jakziquin wejrnacqui tjaczñi ojkz pecya, pascu čjjeri lujlzapaya?

¹⁸ Jesusaqui tuž kjaaziča:

—Watja oka. Tsjii žoñžtan zalaquiča. Niižquiz cjee, “Maestruqui ž-cjiča. ‘Wejt ticz ora wajillača. Am kjuyquiz pascua pjijzta paacha wejt tjaajinta žoñinacžtan’ ”.

¹⁹ Nekztanaqui Jesusaž mantitacama ojkchiča. Nii tokinzt'ita kjuyquiz pascu čjjeri tjaczčiča.

²⁰ Weenjapa cjistan Jesusaqui nii kjuyquiz žejlcan mizquiz julziča niiž tuncapan tjaajinta žoñinacžtan.

²¹ Jalla nuž čjjeri lujlcan, ninacžquiz cjichiča:

—Ančhucaciz weraral cjiwča. Tsjii tsjii ančhucqui wejt quintra paaquiča, nižaza tarazunaquiča.

²² Jalla nuž čhiitiquiztan tjaajinta žoñinacaqui walja llaquita cjissiča. Jalla nekztan ninacaqui tsjiiza tsjiiza pewcziča, tuž cjian:

—Wejt Jiliri, ¿wejr cjesajo?

²³ Nekztanaqui Jesusaqui tuž kjaaziča:

—Anziqui wejttan chicaž tii chuwquiztan lujlča nii tarazunñi žoñiqui.

²⁴ Wejrqui tsewctan cuchanzquita Yooz Zoñtča. Jaknužt cijjrta Yooz takuqui cjičhaja, jalla niicama okača. Nii tarazunñi žoñiqui anaj maa pjuchquiztan nastčhaja, waliž cjitasača niižtaqui. Wejr tarazuntiquiztan wali chawc ujchiz cjequiča.

²⁵ Jalla nekztanaqui Judasqui, nii tarazunñi žoñiqui, tuž cjichiča:

—Maestro, ¿wejr cjesajo?

Jesusaqui tuž kjaaziča:

—Jesalla, amchiya.

²⁶ Jalla nuž pascua čhjeri lujlcan Jesusaqui niiz persun kjaržtan t'anta tanziča. Nekztan Yooz Ejpžquin gracias cjican tjaažcu, t'anta kjolziča. Jalla nuž kjolžcu, niiz tjaažinta žoñinaczquiz tjaachiča, tuž cjican:

—Lujlzna. Jalla tiicha wejt curpu cuntaqui.

²⁷ Jalla nekztan persun kjaržtan tsjii wazu tanziča. Yooz Epžquin gracias cjican tjaachizakazza. Nekztan tjaažinta žoñinaczquin čhjalžcu zapa mayni licchiča. Jalla nuž čhjalžcu, tuž cjichiča:

—Tii wazquiztan tjapa ančhucqui liczna.

²⁸ Wejt ljocquiztanž cjiča tiiqui. Wejt ljocztan tsjii ew acta tjulžtaž cjequiča. Wacchi žoñinacz laycu wejt ljocqui tjawktaž cjequiča ninacz uj pertunta cjisjapa.

²⁹ Wejr cjiwča. Uwas kjaz ana iya licača, čhjulorcama wejt Yooz Ejp tjapa mantachaja, jalla nekztan ančhucatan wilta uwas kjaz licača.

TJAAJINTA ŽOÑINACAQUI WICHANZNAQUICHA

³⁰ Nekztan Yooz wirzu itzcu, Olivos cjita curulla ojkchiča.

³¹ Jalla nekztanaqui Jesusaqui niiz tjaažinta žoñinaczquiz tuž cjichiča:

—Jalla tii weenqui tantal cjeeča. Nekztan tjapa ančhucqui ana wejtquin kuzziz tucaquiča. Jalla nuzpan cijjrta Yooz takuqui cjiča: “Uza awatiri contanaqui uuzanacaqui wichanznaquiča”.

³² Wejr jacatadžcuqui ančuca tuqui okayača Galilea cjita yoka.

³³ Nekztanaqui Pedruqui cjichiča:

—Tjappacha ana amquin kuzziz tucačhani. Wejrzi ana wira nižta cjesača.

³⁴ Jalla nuž chiitiquiztan Jesusaqui tuž kjaaziča:

—Amquiz weraral cjiwča. Jalla tii weenpacha čhjep wilta amqui ana wejr pajñi chiican k'otaquiča, ima wallpaž kjawan.

³⁵ Nekztan Pedruqui Jesusižquiz kjaaziča, tuž cjican:

—Wejrqui amtan chicami waztal ticznasača. Anapan amquiztan k'otasača.

Nižaza tjapa nii tjaažintanaqui tsjiika chiichiča.

JESUSAQUI GETSEMANI CJITA YOKQUINCHA

³⁶ Jalla nekztan Jesusaqui niiz tjaažintanacztan Getsemaní cjita yoka irantichiča. Jalla niwjc irantižcu, ninaczquiz cjichiča:

—Tekz julzna ančhucqui. Wejrqui nii nawcju Yooz Ejpžtan parli okača.

³⁷ Jalla nekztan Pedružtan nižaza Zebedeož pucultan majchnacztan chjitchiča. Nekztanaqui Jesusaqui kuzquiz walja llaquisatča, nižaza ančaž llactazatča.

³⁸ Jalla nižtiquiztan Jesusaqui nii čhjepultan chjichta tjaažintanaczquiziqui cjichiča:

—Wejt kuzqui anča llaquissa, ticzmayača. Ančhucqui tekzi žela. Wilaquiča, anača tjajaquiča.

³⁹ Jalla nekztanaqui Jesusaqui tsjii koluc nawjcchuc ojkchiča. Yokquizkaz tuzi t'okžcu Yoozquin mayizichiča, tuž cjican:

—Wejt Yooz Ejp. Tii juc'ant sufris timpu anal watz pecučha. Tii sufrisquiztan liwriichucažlaj niiqui, amqui wejr liwriyalla. Pero anal wejt kuzcama cjis pecučha. Antiz jaknužt am kuz amtičhaja, am munañpakaj cjila.

⁴⁰ Jalla nekztanaqui tjaajintanacžquin quejpžquichiča. Tjajchi zalchiča. Jaziqui Jesusaqui Pedružquiz cjichiča:

—¿Ančhucqui anapanz wejttan tsjii orami wilasi atya?

⁴¹ Tjaji watzi žela, nižaza wilazaquiča. Yoozquin mayizaquiča, ana ujquiz tjojtsjapa. Chekapan, ančhuca kuzqui wilasača. Pero ančhuca curpuzti anaž awantasača.

⁴² Nekztan Jesusaqui wilta Yooztan parli ojkchiča. Tuž cjican, mayizichiča:

—Wejt Yooz Ejp, tii sufrisquiztan ana liwriita cjichucažlaj niiqui, am kuz munañpakaj cjila.

⁴³ Nekztan wilta tjaajintanacžquin quejpžcu tjajchi zalchiča. Ancha tjaji tjonatča.

⁴⁴ Chjepquiziqui wilta ninacžquiztan ojkchiča, Yooz Ejpžquin parli. Primiru jaknužt parličhaja, jalla nuž zakaz parličhiča.

⁴⁵ Jalla nekztanaqui tjaajintanacžquin quejpchiča. Ninacžquin paljaychiča, tuž cjican:

—Jaziqui tjajchinčhucča ančhucqui, nižaza jeejinčhucča. Nužukazza. Wejrqui ujchiz žoñinacž kjarquiz intirjital cjeeča. Anz nii ora irjatžquičha.

⁴⁶ Zaazna. Ojkla. Wejr tankatni žoñiqui nii najwcž tjonča.

JESUSA PRESO CHJICHTA

⁴⁷ Jesusa nuž chiyan, Judasqui irantižquichiča. Niitača Jesusiž tuncapan illzta žoñinacžquiztanqui. Judastan tama žoñinacaqui tjonchiča pajk cuchillunacchiz, nižaza wjajtz carotinacchiz. Timplu jilirinacami wajt jilirinacami ninaca cuchanžquichiča.

⁴⁸ Tarazunni Judasqui niž tuquilla nii žoñinacžtan kazzitača, tuž cjican:

—Wejrqui nii žoñžquiz chjulznača. Jalla niž cjequičha nii žoñiqui. Jalla nekztan zuma tanžcu chjichaquičha.

⁴⁹ Jalla nuž kazcu Judasqui Jesusižquiz macjatchiča, tuž cjican:

—Tjaajiñi Maestru, ¿walikazkay?

Jalla nuž tsaanžcu, chjulziča.

⁵⁰ Jesusaqui nižquiz kjaaziča, tuž cjican:

—Jila, ¿chjulquin am tjonjo?

Jalla nekztanaqui žoñinacaqui žcatžinžquichiča, nižaza preso chjichi tanchiča.

⁵¹ Jalla nuž paan, tsjii tsjii Jesusiž tjaajinta žoñiqui pajk cuchillu joožcu, quintri žoñž cjuñi čhajtzinchiča. Nii cjuñi chjajtzinta žoñiqui timplu jilirž piyunatača.

⁵² Jalla nekztan Jesusaqui tuž cjichiča:

—Am pajk cuchillu čhjojzna, nii cuchill čhjojzquiz. Jakziltat pajk cuchillu joojoočhaja, jalla ninacaqui pajk cuchillžtan conta zakaz cjequičha.

⁵³ Wejt Yooz Ejpžquiztan mayasača, wejtquiz yanapzjapa. Jalla nuž maytiquiztan wejt Yooz Ejpqui anzpachaž wacchi anjilanaca cuchanžcasača, tuncapan walja tama ejércitonacacama. ¿Nii ana zizya?

⁵⁴ Pero jalla nižta anal mayača. Jalla tižta watstanča, jaknužt cijirta Yooz taku chiičhaja, jalla nii cumplistanča.

⁵⁵ Jalla nekztanaqui Jesusaqui nii tjonchi žoñinacžquiz cjichiča:

—Ančhucqui pajk cuchillunacžtan wjajtz carotinacžtan wejr tani tjonchinčhucča, wejr tjañi cjes, nižtažtakaz. ¿Kjažtiquiztan nižta tjonchinčhuctajo? Zapurupan ančhucatan žejlchinča, timpluquiz tjaajincan. Jalla nii oranacaqui anaž wejr tanchinčhucča.

⁵⁶ Tjapa tii watñinacaqui jaknužt tuquita profetanacaž cijjrtčhaja, jalla niit jama cumplistanča.

Jalla nekztanaqui tjapa Jesusiž tjaajinta žoñinacaqui tsucaña wichanziča. Jesusa zinalla ecchiča.

CHAWC JILIRINACZ YUJCQUIN CHJICHTA

⁵⁷ Jalla nii Jesusa tanñi žoñinacaqui Caifás cjita jiliržquin chjitchiča. Caifasqui timplu jilirinacz chawc jiliritača. Caifás kjuyquin liy tjajjiñi maestruncami wajt jilirinacami ajczitača.

⁵⁸ Pedruqui nii chawc jilirž kjuy patiucoma apziča ažquiztanalla. Nii patiuquin luzcu, julzi želatča wijilñi policianacztan. Jaknužt Jesusa watčhaja, jalla nii chertzjapa želatča.

⁵⁹ Timplu jilirinacami, wajt jilirinacami, tjapa mantiñi jilirinacami Jesusiž quintra uj jwes pecatča, toscaraz cjenacui, conkatzjapa.

⁶⁰ Wacchi žoñinacami toscar tawkžtan prisintižquichiča Jesusiž quintra uj tjojtunzjapa. Pero ana čjul uj jwesi atchiča. Ultimquiziqui pucultan toscar tisticunacaqui apantižquichiča,

⁶¹ tuž cjican:

—Tii žoñiqui cjiñiča, “Yooz timplu t'ezinžu, čhjep majquiz wital tsijtsnasača”.

⁶² Jalla nekztanaqui timplu chawc jiliriui tsijtsiča. Jesusižquiz cjichiča:

¿Kjažtiquiztan am ana kjaazjo? ¿Kjaž cjican tii žoñinacaqui am quintra chiijo?

⁶³ Jalla nuž chiižinanami Jesusaqui ch'uju žejlchiča. Jalla nekztanaqui nii timplu chawc jiliriui nižquiz cjichizakazza:

—Zejtñi Yooz tjuuquiz am juramintu paakatača, werara chiizjapa. Mazna. ¿Amqui Cristumkaya? ¿Nižaza Yooz Majchpanikaya?

⁶⁴ Jesusaqui kjaaziča, tuž cjican:

—Wejrčhay. Amqui jaknužum chiičhaja, jalla nužuča. Wejr zakal ančhucaquiz cjeeča. Wejrqui tsewctan cuchanžquita Yooz Zoñtča. Tsjii noojiqui ančhucui wejr cheraquiča, juc'anti azziz Yooz žew latuquiz julzi. Nižaza arajpachquiztan tsjir taypiquiz wilta tjonacha.

⁶⁵ Jalla nuž kjaaztiquiztan timplu chawc jiliriui niž persun zquiti wjajržinchiča, žawjchi kjanapacha tjeezjapa. Nižaza cjichiča:

—Tii žoñiqui persun tawkžtan Yooz quintra chiichiča. ¿Kjažt iya tisticunaca pecznasajo? Ančhucpacha tiiž ana wal takunaca nonzinčhucča.

⁶⁶ ¿Kjažtat cjees?

Ninacaqui kjaaziča, tuž cjican:

—Tiiui ujchizpanča. Paj ticzla.

⁶⁷ Jalla nekztanaqui Jesusiž yujcquiz llawzižtan tjujti kallantichiča, nižaza wjajtchiča. Partinacaqui yujcquiz čhajcziča,

⁶⁸ tuž cjican:

—Amqui Cristumžlaj niiui, jazic ¿jequit am čhajczjo? Jalla nii pajalla.

PEDRUQUI K'OTCHICHA

⁶⁹ Nii ora Pedruqui zancu kjuy patiuquin julzi želatča. Nekz želan tsjaa piyuniui nižquiz macjatžcu paljaychinča, tuž cjican:

—Amqui ojklajñamla nii Galilea yokchiz Jesusižtan, ¿ana jaa?

⁷⁰ Pedruqui parti žoñinacz yujcquiz k'otchiča, tuž cjican:

—Čjulquiztankam chiičhani, anal intintazuča.

⁷¹ Nekztanaqui Pedruqui zan kjutñi žcatžinchiča. Nekztan tsjaa piyuniui nii cheržcu parti žoñinaczquiz cjichinča:

—Tii žoñipan ojklayatla tii Nazaret wajtchiz Jesusižtan chica.

⁷² Pedruqui wilta k'otchiča. Juramintužtan tuž cjichiča:

—Nii žoñi anapan pajuča.

⁷³ Jalla niž upaquiztan nekz žejlñi žoñinacaqui Pedružquiz macjatžcu, cjichizakazza:

—Chekapan, amqui zakaz Jesusiž parti žoñinacžtan chica ojklayñamla. Am takuqui kjanapachala, ninacaž takukam chiila.

⁷⁴ Nekztanaqui Pedruqui wilta k'otchiča, juramintu paacan.

—Anapal nii žoñi pajuča. Toscara chiichinžlaj niiqui, Yooz wejr casticačhani. —Nuž cjichiča Pedruqui. Jalla nii orapacha tsjii wallpi jora kjawchiča.

⁷⁵ Jalla nii wallpa kjawñi nonžcu, Pedruqui Jesusiž chiita taku cjuñziča. Niiž tuqui qui Jesusaqui cjichiča: “Ima wallpaž kjawan, čhejp wilta amqui ana wejr pajñi chiican k'otaquiča”. Jalla nuž cjuñžcu Pedruqui nekztan ulanchiča. Nižaza walja kuzquiz sint'ican kaachiča.

27

JESUSAQUI CHAWC JILIRIZQUIN CHJICHTA

¹ Kjanžquitan tjapa timplu jilirinacami, wajtchiz jilirinacami tsjii acuerduquiz luzziča Jesusa conkatzjapa.

² Jalla nekztan Jesusa chejlžcu chjitchiča Poncio Pilato cjita chawc jiliržquin. Nii oraqui naciona mantiñi gubernutača Pilatuqui.

JUDASQUI TICZICHA

³ Jesusa tarazunñi Judasqui Jesusa conata cheržcu, kuzquiz walja sint'ichiča. Jalla nuž sint'ižcu nii quinsa tunc tjaata paaz tjepunchiča timplu jilirinacžquizimi wajtchiz jilirinacžquizimi.

⁴ Paaz tjepunžcu, tuž cjichiča:

—Wejr uj paachinča. Ana čhjul ujchiz žoñi tarazunchinča.

Ninacazti niižquiz tuž kjaaziča:

—Jalla niiqui, ¿čhjul importejo wejtnacaquiztanajo? Niiqui amtakazza.

⁵ Jalla nekztanaqui Judasqui timpluquinpacha nii paaz tjojtunchiča. Nekztan ojkiča. Persunpacha jora mokžcu, tsjijscu ticziča.

⁶ Nekztanaqui timplu jilirinacaqui paaz ricujžcu, tuž cjichiča:

—Tii paazqui anaž učumqui ofrend cajquiz uchašača. Tiča žoñž ljok kajyta paazqui.

⁷ Nekztanaqui ninacaqui kazziča nii paaztan yoka kjayzjapa. Nii yokaqui Campo del Alfarero nižta cjita tjuuchiztača. Yekja wajtchiz ticzi žoñinaca tjazjapatača nii yokaqui.

⁸ Nužquiz tii timpucama nii yokž tsjii tjuuqui Campo de Sangre cjitazakaztača.

⁹ Jalla nuž Jeremías profetž takuqui cumplissiča. Tuqui timpu Jeremiasqui cji-rchiča, tuž cjan: “Israel žoñinacaqui nii žoñi tankatz precio utchiča, quinsa tunc paaznaca, jalla nii.

¹⁰ Nii quinsa tunc paaznacžtan Campo del Alfarero cjita yoka kjayaquiča, jaknužt Yooz Jiliriž mantičaja, jalla nuž”.

JESUSAQUI CHAWC JILIRZ YUJCQUIN ZEJLCHA

¹¹ Nekztanaqui Jesusaqui naciona mantiñi chawc jiliržquin chjichtatača. Nii mantiñi jiliri qui Jesusižquiz tuž pewcziča:

—¿Amqui judionacž chawc jilirimkaya?

Jesusaqui tuž kjaaziča:

—Am jaknužum chiičhaja, nužuča.

¹² Timplu jilirinacami wajtchiz jilirinacami, jalla ninacaž uj tjojtuntan, Jesusaqui anaž čhjulumu kjaaziča.

¹³ Jalla nekztanaqui Pilato jiliri qui tuž cjichiča:

—¿Anam am kjaaznaquiya tjapa tii am quintra chiyanaqui?

14 Jesusazti jalla nuž chiyanami ana čhjulumi kjaaziča. Jalla nižtiquiztan nii mantiñi chawc jiliriqui ispantichiča. Ana čhjul pinsimi atchiča.

15 Jalla nii pascu pjiztiquiz Pilato chawc jiliriqui tsjii cuzturumpichiztača. Tsjii priz zoñiqui cutzpanikaztača zoñinacaž chiitacama.

16 Tsjii ana wal zoñiqui Barrabás cjita prisu zakaztača.

17 Zoñinaca ajcziž cjen Pilatuqui ninacžquiz pewczyča, tuž cjican:

—¿Jakzilta tii tanta zoñinacat liwrii cutžta cjeequi? ¿Barrabás cjeequi? už ¿Jesús, Cristo cjita cjeeja?

18 Pilato jiliriqui zizziča, Jesusa chjaawjcu judío zoñinacaqui nii intirjichiča, jalla nii.

19 Pilatuqui niž jusjiis mizquiz julzi želatča. Jalla nicju želan niž tjunqui tsjii zoñi mazni cuchanžquichinča. Nii mazni zoñiqui tuž chiichiča: “Am tjun cjiča: 'Nii zuma zoñžquiz ana mitisaquiča. Nii zoñiž cjen tižwan juc'ant ana wali čhjuuzinča. Nii zoñžquiz ana mitis waquiziča”.

20 Pero timplu jilirinacami wajtchiz jilirinacami, nii žejlñi zoñinacžquiz intintiskatchiča, Barrabás cutzna cjeyajo, nižaza Jesusa contaj cjila cjeyajo.

21 Jalla nekztanaqui nii mantiñi jiliriqui wilta zoñinacžquiz pewczyča, tuž cjican:

—¿Jakzilta pirit tii pucultan tantanacquiztan liwrii cutznaqui?

Zoñinacaqui kjaaziča, tuž cjican:

—Barrabás cutzna.

22 Pilato jiliriqui wilta ninacžquiz pewczyča, tuž cjican:

—Tii Cristo cjita Jesusižquiz, ¿čhjulut wejr paa-aqui?

Tjappacha nii zoñinacaqui kjaaziča, tuž cjican:

—¡Cruzquiz ch'awczna!

23 Nekztanaqui Pilato jiliriqui cjichiča:

—¿Čhjul uj paachi teejo?

Nii zoñinacazti juc'anti kjawchiča:

—¡Cruzquizka ch'awczna! —cjican.

24 Jalla nekztanaqui Pilato jiliriqui naychiča, nii zoñinaca ana intintiskatchuca. Nii zoñinacaqui walja žawjchiž ch'ajrapatča. Jalla nekztanaqui Pilato jiliriqui kjaz zjijckatchiča. Nii zjijcta kjazquiz kjara awziča zoñinacž yujcquiz, tuž cjican:

—Tii zuma zoñž ticzqui anaž wejt uj cjequiča. Ančuca ujž cjequiča.

25 Tjapa nii zoñinacaqui kjaaziča, tuž cjican:

—Wejtnacaltazat uj cječhani, nižaza wejtnaca ocjalanacžtami.

26 Jalla nekztanaqui Pilato jiliriqui Barrabás liwrii cutziča. Nekztanaqui Jesusa wja-jtzjapa mantichiča. Nižaza cruzquiz ch'awcta cjeyajo, zultatunacžquiz intirjichiča.

27 Jalla nekztanaqui nii mantita zultatunacaqui jilirž palacio kjuyquin Jesusa chjitchiča. Nekztanaqui tjapa nii zultatž tropanaca kjawsassiča, Jesusa muytata.

28 Nekztanaqui Jesusa čhjojkchiča. Jalla nuž čhjojkžcu tsjii ljoc murat zquti tjutziča.

29 Nekztan niž achquiz ch'ap pillužtakaz paažcu scaržinchiča, nižaza žew kjarquiz wara tanskatchiča. Jalla nuž paažcu niž yujcquiz quillziča, tuž cjican:

—¡Viva tii judío zoñinacž chawc jiliri! —Jalla nuž čhiican burla paachiča.

30 Nižaza llawzižtan nižquiz tjujtchiča. Niž kjarquiztan wara kjañcan, achquiz wjajtchiča.

31 Jalla nuž burla paažcu, nižquiztan ljoc murat zquti čhjojkchiča. Nekztan wilta niž persun zquti tjutziča. Jalla nekztanaqui cruzquiz ch'awczjapa Jesusa chjitchiča.

JESUSAQUI CRUZQUIZ CH'AWCTA

32 Jalla nuž Jesusa chjichcan tsjii Cirene wajtchiz zoñi zalžquichiča. Simón cjitatača. Jalla nii zoñiqui Jesusiž cruza kuzkatchiča.

³³ Jalla nuž Gólgota cjita yokquin irantichiča. Nii yokaqui “Ach Tsij yoka” cjitazakaztača.

³⁴ Jalla nicju tsjii vinžtan jaržtan t'ajžta lickatchiča. Pero nii mallžcu, ana licz pecchiča.

³⁵ Cruzquiz ch'awčcu, zultatunacaqui Jesusiž zquti tanzjapa surtiassiča. Jalla nuž paatan profetž takuqui cumplissiča. Nii tuquta profetaqui tuž cjichiča: “Wejt zquti tanzjapa surtiasaquiča”.

³⁶ Jalla nekztanaqui nijwcpacha ninacaqui wilzjapa julziča.

³⁷ Kjažtiquiztan Jesusa cruzquiz ch'awctatažlaja, jalla nii tabliquiz cjjrtatača, tuž cjican, “Tiiča Jesusaqui, judío žoñinacž chawc jiliri”. Jalla nuž cjjržcu ach tsewctuñ nii tabla ch'awčzinchiča.

³⁸ Nižaza pucultan tjañinaca cruzquiz ch'awctatača, tsjiiqui žew latu tsjiiqui zkar latu.

³⁹ Nekz watñi žoñinacaqui iñarcan, acha wewcžiñitača.

⁴⁰ Nižaza tuž cjichiča:

—Amqui cjiñamla, “Timplu t'ezinžcu čhjep majquiztan tsijtsnasača”. Jalla nižta payi atasaz niiqui, jazic persunpacha liwriisalla. Yooz Maatimžlaj niiqui, cruzquiztan apakscu, chjijwžcalla.

⁴¹ Jalla nižta irata zakaz iñarchiča timplu jilirinacami, liy tjaajiñi maestruncami, fariseo parti žoñinacami, wajtchiz jilirinacami. Jalla ninacaqui porapat parlassiča tuž cjican:

⁴² —Tiiqui yekja žoñinaca liwriichiča, pero persunpacha anaž liwrii atča. Israel žoñinacž chawc jilirižlaj niiqui, cruzquiztan apakscu, chjijwžquila. Nekztan nižquiz criyasacha.

⁴³ “Tiiča cjiñiqui, Yoozquin tjapa kuzziztča. Wejrtča Yooz Maatiqui”, cjican. Yoozqui tii k'aachichižlaja, jaziqui anzpacha Yooz tij liwriila.

⁴⁴ Nii cruzquiz ch'awcta tjañinacami Jesusižquiz quontra chiichizakazza.

JESUSAQUI TICZICHA

⁴⁵ Taypurquiztan majña kak oracama tjapa nii yokaqui zumchi cjissiča.

⁴⁶ Jalla nii orapacha Jesusaqui tjapa aztan kjawchiča, tuž cjican:

—Elí, Elí, ¿lama sabactani? —Jalla nii takuqui cjiča: “Wejt Yooz, wejt Yooz, ¿kjažtiquiztan wejr jaytichamtajo?”

⁴⁷ Yekjap nekz žejlñi žoñinacaqui jalla nii kjawñi nonžcu, cjichiča:

—Nonžna. Tiiqui Elías profetaž kjaw kjawla.

⁴⁸ Nekztan tsjii tsjiiqui esponja cjita kjaz ch'umñi apti zajtchiča. Jar vinu ch'umkatžcu zjijcchiča. Nekztanaqui war puntižtan chjapžcu, Jesusižquin chjalziča, liquinzjapa.

⁴⁹ Parti žoñinacaqui cjichiča:

—Zela cjee. Antiz chekžla, Elías tii liwrii cunamit tjonačan.

⁵⁰ Nekztanaqui Jesusaqui altu joržtan wilta kjawchiča. Jalla nuž kjawžcu ticziča.

⁵¹ Jalla nii orapacha pajk timplu cortina chicatquiz juystokaz wjajrziča, tsewctan kozzuc. Nižaza yokac chjekinchiča. Nižaza cur akjinacaqui c'acchiča.

⁵² Nižaza sipulturanacaqui cjetsi cjissiča. Muzpa Yoozquin criichi ticzi žoñinacaqui jacatatchiča.

⁵³ Jesusaž jacatattiquiztan nii parti jacatatchi žoñinacaqui Jerusalén wajtquiz luzquichiča. Jalla nicju muzpa žoñinacaqui ninaca cherchiča.

⁵⁴ Zultat capitanaqui nii Jesusa wijilñi zultatunacžtanpacha yoka chjekiñi cheržcu, nižaza tjapa nii watñi cheržcu, walja tsucchiča. Jalla nekztan cjichiča:

—Chekapan tii žoñiqui werar Yooz Maatitakalala.

⁵⁵ Jalla nicju wacchi maatakanacaqui želatča, ažquiztan chekžcan. Nii maatakanacaqui Galilea yokquiztanpacha Jesusa apziča, nii atintizjapa.

⁵⁶ Jalla nii maatakanacaqui tuž cjita tjunchiztača: María Magdalenatača; nižaza Mariiqui Jacob Josež maatača; nižaza Zebedeož tjun želatča. Naaqui majchwichchiztača.

JESUSIZ CURPU TJATZTA

⁵⁷ Waj zumznan, tsjii ricach žoñi, José cjita tjonchiča. Arimatea wajtchiz žoñitača. Nižaza Jesusa cumpaň'iñi žoñitača.

⁵⁸ Jalla nii žoñiqui Pilato jiliržquin zali ojkchiča. Nuž zalžcu, Jesusiž curpu maychiča. Nekztan Pilato jiliriqiu mantichiča nii curpu intirjajo.

⁵⁹ Josequi Jesusiž curpu chjichcu, limpu saban paňžtan capziča.

⁶⁰ Niižta ew sipultura želatča, mazquiztan jwetta. Jalla nii sipulturquiz Jesusiž curpu tjatchiča. Jalla nuž tjatžcu, sipultur zana pajk maztan pjuczicha. Nekztan ojkchiča.

⁶¹ Jalla nicju María Magdalena, nižaza tsjaa María julzi želatča, sipulturž yujcquiz.

SIPULTURA ZUMPACHA PJUCZTA, NIZAZA WIJILTA

⁶² Jakatažuqui, jeejz tjuñijapa tjaczc, timplu jilirinacami, fariseo parti žoñinacami Pilato jiliržquin zali ojkchizakazza.

⁶³ Jalla nuž zalžcu tuž cjichiča:

—Wejt jiliri, wejrnacqui tuž cjuñznuča. Tii toscar chiiñi žoñiqui, žejtcanaqui, tuž cjichiča: “Chjep maj ticziquiztan jacatatača wejrqui” cjican chiiñitača.

⁶⁴ Jalla nižtiquiztan mantižinalla čjep majcama sipultura zumpacha wijilta cjila. Ana zuma wijilta cjequič niiqui, niž tjaajinta žoñinacaqui ween niž curpu chjichi tjonasača. Jalla nekztanaqui žoñinacžquiz k'otasacha: “Jesusaqui ticziquiztan jacatatchiča” cjican. Nižta toscara juc'ant anawaliž cjesača, primira toscara chiiitiquiztan.

⁶⁵ Jalla nekztanaqui Pilato jiliriqiu ninacžquiz cjichiča:

—Jalla tekz zultatunaca žejlča wijilñijapaqui. Ančhucqui oka, nii sipultura zumpachaž chawjczca, jaknužt atčhaja, jalla nuž.

⁶⁶ Jalla nekztanaqui ojkžcu, sipultura zumpacha chawjczquichiča. Nižaza nii chawjczta maz latuquiz sinalt'izcu ecchiča. Nižaza nekzpacha nii sipultura wijilñi zultatunacami ecchiča.

28

JESUSAQUI JACATATCHICHA

¹ Kjantati jeejz tjuñi watžcu María Magdalena cjitiqui tsjaa Mariatan sepultura chertzni ojkchiča, primir siman tjuñi kallznan.

² Tsjii Yooz anjilaqui arajpachquiztan chjijwžquichiča. Nekztan yoka walja chjekinchiča. Anjilaž nii sipultura pjuczta maz cjewžinchiqiu. Nekztan Yooz anjilaqui nii maz juntuñ julziča.

³ Anjilaqui ancha kjañchiča liwjlwñižtakaz. Nižaza ancha chiwitača niž zquitiqui, kjañižtakaz.

⁴ Jalla nuž cheržcu wijilñi zultatunacaqui walja tsucchiča chjekinzcama. Ticzi žoñižtakaz cjissiča.

⁵ Jalla nekztanaqui nii anjilaqui maatakanacžquiz cjichiča:

—Anaž ančhuc eksna. Wejrqui zizuča, ančhucqui Jesusaž kjurča, cruzquiz ch'awcta Jesusa.

⁶ Anaž tekz žejlča. Niiqui jacatatchiča, jaknužt chiitčhaja, jalla nuž. Pichay, tii sipultura chertzna.

⁷ Nekztanaqui apuraž oka. Niiž tjaajinta žoñinacžquiz mazca, tuž cjican: “Jesusaqui ticziquiztan jacatatkalča. Ančuca tuqui Galilea yokquin okaychiča. Jalla nicjuž

ančhucqui Jesusa jacatatchi cheraquiča”. Wejrqui cuchanžquitača tii puntuquiztan ančucaquiz maznajo. —Nuž cjican paljaychiča anjilaqui.

⁸ Jalla nekztanaqui sipultur kjuya cheržcu, maatakanacaqui apura ojkchiča, ispan-tichi nižaza walja cuntintu. Zati pariju ojkchiča tjaajintanacžquin mazni.

⁹ Jalla nuž okan Jesusaqui ninacžquiz parizichiča. Nekztan ninacžquiz tsaanchiča. Nii maatakanacaqui Jesusižquiz macjatžcu rispitan, quilljatchiča, Nekztan niž kjo-jcha žcojrziča.

¹⁰ Jalla nekztanaqui Jesusaqui cjichiča:

—Anaž ančhucqui eksna. Wejt jilanacžquin mazca, Galilea yok kjutni ojkla ninacaqui. Jalla nicju ninacaqui wejr cheraquiča. Jalla nii maznaquiča.

ZULTATZ QUINTU

¹¹ Jalla nuž nii maatakanacaž okan wijilni zultatunacaqui watja ojkchiča. Nekztan timplu jilirinacžquin tjapa watchinaca quint'ichiča.

¹² Jalla nekztanaqui timplu jilirinacaqui wajtchiz jilirinacžquin parli ojkchiča. Nuž parližcu tsjii acuerduquiz luzziča. Jalla nekztanaqui nii quint'ini zultatunacžquiz paaz tjaachiča,

¹³ tuž cjican:

—Ančhucqui tii wajtchiz žoñinacžquiz cjequiča: “Ween wejtnacaž tjan, niž tjaajinta žoñinacaqui Jesusiž curpu kjañžcu chjitchiča”. Jalla nuž cjequiča.

¹⁴ Chawc jiliri qui ančucaž quint'ita nonznaquiz ni qui, wejrnacqui nižtan parlača ančhucqui ana casticta cjisjapa.

¹⁵ Jalla nekztanaqui nii zultatunacaqui nii ch'iizinta paaz tanžcu, ojkchiča. Jalla nekztan nii paaz laycu toscara chiichiča. Jalla nižta toscar quintu judío žoñinacaqui chiichiniča anz tii timpuquiziqui.

JESUSIZ MANTITANACA

¹⁶ Jalla nii maatakanacaž maztiquiztan nii tuncaman tjaajinta žoñinacaqui Galilea yoka ojkchiča, Jesusaž t'okinzt'ita curquin.

¹⁷ Jalla nicju Jesusa cheržcu, nižquiz rispitchiča. Yekjapa kuz turwaysi zelatča, ultimu werara Jesucristo, už anaj Jesucristo.

¹⁸ Jalla nekztanaqui Jesusaqui ninacžquin macjatžcu, tuž cjichiča:

—Wejtquizpacha tjapa mantiz poder tjaatača, arajpachquin žejlñinaca mantizjapami, nižaza tii yok muntuquiz žejlñinaca mantizjapami.

¹⁹ Jaziqui ančhucqui cuchnuča. Tjapa tii muntu nacionanacžquin oka. Tjapaman nacionchiz žoñinacžquiz wejtquin kuzziz cjisjapa tjaajinžca. Nižaza Yooz Ejp, Yooz Majch, Yooz Espiritu Santo, jalla wejtnaca tjuužtan criichi žoñinaca bautizaquiča.

²⁰ Nižaza tjapa weriž mantitanaca nii žoñinacžquiz tjaajnaquiča ninaca cazajo. Zapuru wejrqui ančhucatan chica cjeeča, tii muntu tucuzinžcama. Jalla nii ančhucqui tiraž cjuñaquiča. Jalla nužoj cjila. Amén.

EL SANTO EVANGELIO SEGUN SAN MARCOS

¹ Liwriiñi takuqui Jesucristo Yooz Majch puntuquiztan jalla tužuča. Jesucristuča Yooz Majchqui.

JUAN BAUTISTAZ PUNTU

² Tuqui timpuqui tsjii Yooz cuntiquiztan chiiñi profeta želatča, Isaías cjita. Nii profetaqui cjiŕchiča tii takunaca:

“Nonžna. Yoozqui Jesucristuž tuqui tsjii žoñi cuchanžcaquiča, tjappacha tjacznao.

³ Jaziqui ch'ekti yokquin nii žoñž joraqui altu tawkžtan paljayaquiča, tuž cjican: ‘Tsjii chawc jiliriŕqui tjonauquiča. Jaknužt jicz zuma tjacznačhaja, jalla nižta ančuca kuznaca zuma tjaczna. Ančuca kamañanacaqui zuma lijitumapanž cjee’ ”.

Nuž cjiŕchiča Isaías cjita žoñiqui.

⁴ Jalla nižtapan Juan Bautistaqui ch'ekti yokquin parizizquichiča. Nižaza žoñinaca bautissiča. Nižaza paljaychiča, tuž cjican:

–Kuznacaž campiya, ujnaca pertunta cjisjapa. Nekztan ančhuc bautisasača.

⁵ Tama žoñinaca Juanžquin ojkchiča, Judea cjita yokquiztan, nižaza Jerusalén cjita wajtquiztan. Jakzilta žoñit persun ujnacquiztan “ujchizpanča” cjican kuzquiz zint'ichaja, jalla niiqui bautistatača Jordán cjita puj kjazquiz.

⁶ Juanž zquitiqui camello chomquiztan watstatača. Nižaza Juanqui zkiz tsjaychiztača. Niiž čheriqui tižtatača: langosto cjita kolta animalanaca, nižaza misq'ui. Jalla nii lujlñitača.

⁷ Juanqui ojklaycan žoñinacžquiz paljaychiča, tuž cjican:

–Tsjiiqui wejt wirquin tjonča. Jalla niiča wejtquiztan tsjan juc'anti poderchizqui. Niižquiz atintisjapa anal waquisuča, niiž čhjata jeržcu chjojkinimi. Inakaztča wejrqui.

⁸ Kjaztangkal bautisuča. Nii tjonñi jilirizti Espíritu Santužtan bautisaquiča.

JESUSAQUI BAUTISTATAČHA

⁹ Nekztanaqui Jesusaqui Nazaret cjita wajtquiztan ojkchiča. Nazaaret watjaqui Galilea cjita provinciŕquintača. Jesusaqui Juanžquin ojkchiča, Jordán cjita pujquin. Nekz Juanqui Jesusa bautissiča.

¹⁰ Jesusaqui kjazquiztan ulancan arajpacha cjetzi cherchiča, nii orapacha. Yooz Espíritu Santo palomažtakaz chjiwžquiñi cherziča. Niiž juntuñpacha irantižquichiča.

¹¹ Nekztan arajpachquiztan tsjii jora paljayžquiñi nonziča, tuž cjican:

–Amča wejt k'ayi Maatimqui. Amiž cjen ancha cuntintutča wejrtqui.

JESUSIZTAN DIABLUZTAN

¹² Nekztanaqui Espíritu Santuqui ch'ekti yokquin Jesusa ojklayskatchiča.

¹³ Jalla nicjuž pusi tunc tjuñi kamchiča Jesusaqui. Nekziŕqui q'uit animalanaca zakaz želatča. Jaziqui Satanás cjita diabluqui Jesusižquiz tjonziča; ujquiz tjojtskatz pecatča. Pusi tunc tjuñi ujquiz tjojtskatz yanznatča. Nekztan Yooz anjilanacaqui tjontjonžquiñitača Jesusa atintizjapa.

JESUSAQUI TJAAJINCHICHA

¹⁴ Wiruñauqui Juanqui carsilquiz chawjctatača. Nekztan Jesusaqui Galilea cjita yokquin ojkchiča. Nii yokquin Yooz liwriiñi taku paljaychiča, jaknužt žoñinaca Yooz wajtchiz žoñi cjisaja, nii.

¹⁵ Tuž cjican, paljaychiča:

—Tii timpumiž otča. Anzpacha zoñinacaqui Yooz wajtchiz zoñi cjesača. Kuznaca campiya, “ujchizpanča”, cjican. Nekztan tii liwriiñi takuž tjapa kuztan catoka. Tii takuž criya.

CH'IZ TANÑI ZOÑI KJAWZTA

¹⁶ Tsjii pajk kota želatča, Galilea cjita. Jesusaqui kot ataran ojklaycan pucultan jilazullca cherchiča; Simón, nižaza Andrés cjitatača. Ninacatača ch'iz tanñinacaqui. Nii ora ch'iz tanz kjazquiz tjojtznatča.

¹⁷ Nekztan Jesusaqui ninacžquiz cjichiča, tuž cjican:

—Ančhucqui, wejttan chicaž ojklayñiž cjee. Anziqui ch'iz tanz langzzizza. Pero wejrqui ančhucquiz yekja langzquin utznača, Yooztajapa zoñinaca kjawzqui, nii.

¹⁸ Nekztanaqui nii orapacha ninacaqui ch'iz tanz eccu, Jesusižtan chica ojklayñi cjišiča.

¹⁹ Jesusaqui tsjii koloculla nawjcjapa ojžcu, tsjii pucultan zoñinaca cherchizakazza; Jacobo, nižaza Juan cjitatača. Ninacž ejpqui Zebedeo cjitatača. Nii pucultan zoñinaca warcuquiz želatča, ch'iz tanz azquichcan.

²⁰ Jaziqqui Jesusaqui ninaca kjawziča, niižtan chica ojklayñi cjisjapa. Ninacž ejp warcuquiz želatča, piyunanacžtan. Pero Jacobžtan Juanžtan ejp ecchiča, Jesusižtan ojklayzjapa.

ZAJRAZ TANTA ZOÑI

²¹ Nekztanaqui jeejz tjuñi Capernaum cjita watja luzziča Jesusižtan ninacžtan. Nekziqqui judío zoñinacž ajcz kjuyquiz luzziča. Nekztan Jesusaqui tjaačinčiča.

²² Chawc jiliri irata tjaajnatča, zuma zizñi. Judiuž lii tjaajiñinacažtakaz ana nuž tjaajnatča. Jesusiž tjaajintiquiztan zoñinacaqui ispantichiča:

—¡Ancha cuzala! —cjican.

²³ Nii ajcz kjuyquizpacha tsjii zajraž tanta zoñi želatča. Nii zoñiqui kjawchiča, tuž cjican:

²⁴ —Jesusa, Nazaret wajtchiz zoñimla. ¿Kjažtiquiztan am wejtnacaquiz mitizi? Wejrnaca aki tjonchamžlani. Jaziqqui am pajuča. Zuma Yooz Zoñimla. —Nuž cjican, kjawchiča.

²⁵ Nekztan Jesusaqui zajrižquiz ujziča, tuž cjican:

—¡Ch'uj žela! Tii zoñžquiztan ulna.

²⁶ Nekztan zajraqui nii tanta zoñi chekjinskatžcu, nižaza altu tawkžtan kjawžcu, ulančiča.

²⁷ Nižta cheržcu, zoñinacaqui ancha tsucchiča. Ninacpora parlassiča, tuž cjican:

—¿Čhjulut nižta teejo? Tsjemataž tjaajinla. Walja azziz tawkchizla. Tii zoñiqui zajramiž mantila. Nižaza zajrami tiiž taku cazla. —Nuž ispantichi parlassiča.

²⁸ Oralla Jesusiž paataqui mazmztatača tjapa nii yokaran.

SIMON PEDRUZ AJMUZ MAA

²⁹ Nekztanaqui ajcz kjuyquiztan ulanžcu, Jesusaqui Simón, nižaza Andrés, jalla ninacž kjuyquiz luzziča, Jacobžtan Juanžtan, nuž.

³⁰ Simónž ajmuz maaqui ajpsquiz ch'ujlñi conchiz laaquichi želatča. Tjapa curpu walja kjabatča. Jaziqqui Jesusižquiz mazziča.

³¹ Jesusaqui macjatžcu, naaža kjara tanžcu, tsijtskatchiča. Nekztanaqui naaža jakñi cona zarakchiča. Nekztan naa žonqui ninaca atintichinča.

ANCHA ZOÑINACA CHJETINTA

³² Nekztanaqui nii zez tjuñiž kattan Jesusižquiz tjapa laaquichi zoñinacami, nižaza zajraž tanta zoñinacami zjižtatača.

³³ Nižaza Jesusaž alujta kjuy zanaran tjapa nii wajtchiz zoñinacaqui ajcziča.

³⁴ Nekztanaqui Jesusaqui tjpaman laa zoñi čhjetinchiča. Zoñinacžquiztan muzpa zajranaca chjatkatchiča. Zajranacaqui Jesusa pajchiča; pero Jesusaqui ana chikatchiča.

YOOZ TAKU PARLITA

³⁵ Jakawenz tažuqui ima kjanžcan Jesusaqui žaaziča, iya zumchi zumchi cjican. Wajtquiztan ulanžcu, ana zoñž žejlz yokquin ojkchiča, Yooz Ejpžtan parli.

³⁶ Wiruñaqi Simonaqui niž mazinacžtan Jesusa kjuri ojkchiča.

³⁷ Jesusižquiz zalžcu cjichiča:

—Tjapa zoñinacaqui am pewc pewcža.

³⁸ Nekztan Jesusaqui cjichiča, tuž cjican:

—Nacjuñž ojkla, visin watjanacquin. Nicju zakaz Yooz taku paljayzquiztanča wejrqui. Jalla niijapa tii muntuquiz tjonchinča.

³⁹ Nekztanaqui Galilea yokaran ojklaychiča, ajcz kjuyanacquin Yooz taku paljaycan, nižaza zajranaca chjatkacan.

MOJKCHI JANCHICHIZ ZOÑI

⁴⁰ Tsjii mojkchi janchichiz zoñi želatča. Niiqui Jesusižquiz tjonchiča. Quillžcu, rocchiča, tuž cjican:

—Wejr čhjetinzim pecčhaj niiqui, wejr čhjetinzim atča amqui.

⁴¹ Nekztan Jesusaqui nii zoñi okžcu, nižquiz lanziča, tuž cjican:

—Wejr am čhjetnasachiya. Jaziqi čhjetintam cjissa.

⁴² Jalla nuž chiitiquiztanaqui nii orapacha nii zoñiqui žejtchi cjissiča, mojkchi janchi laa cjitiquiztan.

⁴³⁻⁴⁴ Nekztanaqui Jesusaqui nii zoñžquiz iwjt'ichiča, tuž cjican:

—Jaziqi tii čhjul am chiichijay! Anača jeczquizimi chiichiizqui. Timpluquin oka amqui. Nekztan timplu jiliržquin persuna tjeežca. Nižaza čhjetintiquiztan Moisés mantitacama paa. Jaknužt Moisesqui ofrenda uchajo mantičaja, jalla nuž ofrenda uchaquiča. Jalla nižtiquiztan zoñinaca am žejtchi zizaquiča. Jazic oka amqui. —Nuž mantičiča Jesusaqui.

⁴⁵ Nekztan nii žejtchi zoñiqui tjapa kjutñi ojklaychiča, nii žejtta quintu parlican. Tjapa zoñinacžquin nii quint'ichiča. Jalla nekztanaqui tjapa zoñinacaqui Jesusižtan zalz pecatča. Jalla nižtiquiztan Jesusaqui anaž jakzi wajtquizimi luzi atchiča, zoñiž zizan. Ana zoñž žejlz yokuñ ojklaychiča. Nižtami tjapa kjuttan zoñinacaqui nižquin tjonñitača.

2

ZUCH ZOÑI CHJETINTA

¹⁻² Tsjii kjaž majquiztan Jesusaqui Capernaum wajta quejpciča, persun kjuyquiz. Nii zizcuqui, tama zoñinacaqui ajcziča, kjuya chjijspcama. Nižaza anatača campo kjuy zanaran. Nekztan ajczi zoñinacžquiz Jesusaqui Yooz taku tjajinchiča.

³ Nuž tjajnan, pakpaltan zoñinaca tjonchiča, tsjii zuch zoñi kuzi.

⁴ Muzpa zoñi ajcziž cjen, Jesusižquin ana macjati atchiča. Nekztanaqui tsewctan kjuya pjetžcu, pjetquiztan zuch zoñi kjuylchuc chjijunžquichiča, niž tjajz zquitquiziqui.

⁵ Ninacaqui Jesucristužquin tjapa kuztan tjonchiča. Nii nayžcu, Jesusaqui zuch zoñžquiz paljaychiča, tuž cjican:

—Jilala. Jaziqi am ujnaca pertuntača.

⁶⁻⁷ Kjuyquiz julzi yekjap zoñinaca želatča, judiuž lii tjajjiñi zoñinaca. Ninacaqui kuzquiz pinsatča, tuž cjican:

—¿Kjažtiquiztan tiiqui nižta chiijo? Anawalipanča tiiž takuqui. ¿Ject ujnaca pertunasajo? Yoozpanikazla ujnaca pertunñiqui. —Jalla nuž pinsichiča lii tjaajiñi žoñinacaqui.

⁸Jesusaqui persun kuzquiz ninacž pinsita zizziča. Nekztan ninacžquiz paljaychiča, tuž cjican:

—¿Kjažtiquiztan ančuca kuz nižta pinsejo?

⁹¿Jakzilta takut pjasila chiiz cjesajo? Tii zuch žoñžquiz chiižinsjo, “Am ujnacami pertunta”, ¿cjis pjasila cjesaya? už “Tsijsna. Am tjajz zquiti aptižcu oka”, ¿nuž chiiz pjasila cjesaj?

¹⁰Tsewctan cuchanžquita Yooz Zoñtča wejrqui. Tii muntuquiz jiliritča, ujnaca pertunzjapami. Jalla nii zizjapa, ančhucqui tiiž chera.

Nekztanaqui zuch žoñžquiz cjichiča:

¹¹—Amquiz cjiwča, tsijtsna. Am tjajz zquitinaca aptaza. Oka am kjuya. —Nuž cjican chiichiča Jesusaqui.

¹²Nekztanaqui nii zuch žoñiqui tsijtsiča. Tjajz zquiti aptichiča. Liwj tjappachaž cheran, ulanchiča. Jalla nižta cheržcu tjapa žoñinacaqui walja ispantichi quirchiča, tuž cjican:

—Tižta wira ana cheriñča.

Nekztanaqui Yoozquin honora waytichiča.

LEVI CJITA ZOÑI

¹³Nekztanaqui Jesusaqui wajtquiztan ulanžcu, pajk kot ataran wilta ojklayatča. Nuž ojklayan, žoñinacaqui nižžquin macjatžquichiča. Nekztan Jesusaqui ninacžquiz tjaajinchiča.

¹⁴Wiruñaquei nawjcjapa ojkchiča. Jiczquiz ojkan, Leví cjita žoñi cherchiča, aduanž kjuyquiz julznan. Levíž ejpqui Alfeo cjitatača. Jesusaqui nižžquiz paljaychiča, tuž cjican:

—Wejttan chica ojklayñim cjequiča.

Nekztan tsijtsu, Jesusižtan ojkchiča Leviqui.

¹⁵Nižaza Levíž kjuya luli ojkchiča. Nicju Jesusižtan nižž tjaajintanacžtan nuž lulan, aduanerunacžtan nižaza ujchiz žoñinacžtan nekzizakaz lulatča. Muzpa žoñinacaqui Jesusižquin apzitača.

¹⁶Tsjii kjažt judiuž lii tjaajiñi žoñinaca zakaz želatča, fariseož partinacami. Jaziqqui Jesusižtan anazum žoñinacžtan juntu lulan, naychiča. Nekztan pewcziča nižž tjaajinta žoñinacžquiz, tuž cjican:

—¿Kjažtiquiztan tii Jesusa aduanerunacžtan nižaza ujchiz žoñinacžtan lujljo?

¹⁷Ninacž chiita nonžcu, Jesusaqui kjaaziča, tuž cjican:

—Zuma žejtchinacaqui anaž kullñi pecasača. Laa žoñinacaž kullñic pecča. Wejrqui “Zumal kamuča” cjiñi žoñinacžquiziqui ana kjawzñi tjonchinča. Antiz “ujchizpanča” cjiñi žoñinacžquiz kjawzñi tjonchinča.

AYUNAS PUNTU

¹⁸Juanž tjaajintanacžtan fariseož parti žoñinacžtan, jalla ninacaqui ayunasñipantača. Jaziqqui žoñinacaqui Jesusižquiz pewczñi tjonchiča, tuž cjican:

—¿Kjažtiquiztan Juanž tjaajintanacžtan nižaza fariseož tjaajintanacžtan ayunasñejo? Amiž tjaajintanacžti ana ayunasñipanla.

¹⁹Nekztan Jesusaqui ninacžquiz tuž cjichiča:

—Zalz pijstiquiz impittaž cjenaqui, ¿kjažt ayunasasajo? Zalsñi žoñžtan pijjstaž paača. Zalsñi žoñi želanpacha, anaž ayunasasača.

²⁰Tii jarquin nii zalsñi žoñiž kjantaž cjequiča. Nekztanž ayunasasača.

²¹Jesusaqui tii takuzakaz chiichiča:

—Anaž jakziltami zijzi zquitquiziqui ew rimintižtan rimintasača. Nižta rimintasaž niiqui, zijzi zquiti juc'anti wjajrskatasacha. Ewqui zijziquiztan jaljiznasača. Nekztan juc'antiž tsjelanznasača.

²² Nižaza anaž jakziltami zijzi zkiz luusquiz ew vino alznasača. Nižta alznasaž niiqui, zkiz luus wjajrskatasacha ew vinuqui. Nekztanaqui zkiz luusmi vinumi pizc-pacha pertisnasača. Ew vinuqui ew zkiz luusquizpanž alznasača. —Nuž cjichiča Jesusaqui.

JEEZ TJUŇI QUINTU

²³ Nekztanaqui tsjii jeez tjuŇi Jesusaqui tiric zkal taypiran okatča tjaajintanacžtan. Zkal taypiran ojkan tjaajinta žoŇinacaqui tiric oza kjajpchiča.

²⁴ Nii cheržcu, yekjap fariseonacaqui Jesusižquiz paljaychiča, tuž cjican:

—Cherzna. ¿Kjažtiquiztan nižta paajo? Jeez tjuŇquiziqui nižta anapanča paazqui. Učhum lii quintrala, ¿ana jaa?

²⁵ Nekztan Jesusaqui kjaaziča, tuž cjican:

—Ančhucqui Yooz taku liichinčhucča, ¿ana jaa? Cjirta Yooz takuqui tuž cjiča: učhum tuquita atchi ejp, David cjitaqui, niž mazinacžtan čjjeri eeskatčiča. Ana čjul čjjerchiz cjen,

²⁶ Yooz timpluquiz luzziča. Nii ora timplu chawc jiliritača Abiatar cjitaqui. Timpluquin Yooz yujcquiz nonžta t'antanaca želatča. Jalla nii t'anta aptižcu, lujlchiča David cjitaqui. Nižaza niž mazinacžquiz tojunchiča. Anapantača permitta nii t'anta lujlzqui ina žoŇžlaqui. Nižta lujlžcuqui lii quintrala niiqui. Timplu jilirinacažtapankaz nii t'anta lulaj cjitaqui.

²⁷ Nekztanaqui Jesusaqui ninacžquiz chiižinchizakazza:

—ZoŇž laycu jeez tjuŇiqui uchtatača. Nii jeez tjuŇquiztanaqui žoŇiča juc'ant chekanaqui.

²⁸ Wejrqui tsewctan cuchanžquita Yooz ZoŇtča. Jeez tjuŇquizimi čjulu paaz cjenami weril mantasača. —Nuž cjichiča Jesusaqui.

3

KJARA KJOŇCHI ZOŇI

¹ Nekztanaqui Jesusaqui wilta tsjii judionacž ajcz kjuyquiz luzziča. Nekz tsjii kjara kjoŇchi žoŇi želatča.

² Ujchiz jwesjapa quintri žoŇinacaqui Jesusa awayt'atča, jeez tjuŇquiz čhjetnaquiya, už anaž čhjetnasaj.

³ Nekztanaqui Jesusaqui kjara kjoŇchi žoŇžquiz paljaychiča, tuž cjican:

—Tsijsna. Tii taypiquin cjisna.

⁴ Nekztan parti žoŇinacžquiz paljaychizakazza, tuž cjican:

—¿Jeez tjuŇquiziqui učhum liiqui kjažt cjeejo? ¿ŽoŇžquiz zuma paasaya uz žoŇžquiz ana zuma paasaja; žoŇž wira livriyasaya uz žoŇž wira ticskatasaja? —Nuž pewcziča Jesusaqui.

Ninacazti ch'ujukaz želatča.

⁵ Nekztan Jesusaqui niž muytata žejlŇi žoŇinacž kjutŇi chercherziča. Ninacžjapa žawjchiča; nižaza ninacž chojru kuzziz cjen, llaquitatača. Nekztan laa žoŇžquiz paljaychiča, tuž cjican:

—Am kjara chjinzna.

Nuž kjara chjinžcu, žejtchi quirchiča.

⁶ Nekztanaqui fariseo žoŇinacaqui ulanchiča. Ulanžcu Herodes partinacžtan Jesusiž quintra parličiča:

—¿Jaknužt Jesusa conas? —cjican.

JESUSAQUI TJAAJINCHICHA

⁷ Nekztanaqui Jesusaqui niiz tjaa jintanacžtan ojklaychiča pajk kot ata. Muzpa tama žoñinacaqui apziča.

⁸ Tjapa kjuttan yokquiztan tjonchiča, Galilea yokquiztan, Judea yokquiztan, Jerusalén wajtquiztan, Idumea yokquiztan, Jordán pujž najwctan yokquiztan, Tiro Sidón wajtanac kjuttan, tjapa tii yokanacquiztan Jesusizquin tjonchiča, niiz ancha wali paatanaca cheri.

⁹ Nekztanaqui Jesusaqui niiz tjaa jintanacžquiz chiižinchiča:

–Wejtta warcuž tjaczina, tii tama žoñinaca ana wejtquiz ts'acjasajo.

¹⁰ Muzpa žoñinacž čhjetintaž cjen, tjapa laa žoñinacaqui Jesusizquin tjonchiča. Niizquiz lanzjapa, ancha ts'acjassiča.

¹¹ Nižaza čhjulorami zajranacaqui nii cherčhaja, niiz yujcquiz quillziča. Kjawcan, chiichiča:

–Yooz Matimča amqui, –cjican.

¹² Jalla nekztanaqui Jesusac ninacžquiz walja iwjt'ichiča, tuž cjican:

–Wejtquiztanac anača ančhucqui chiizqui, “Yooz Maatimča”, cjican.

TUNCAPAN APOSTOLONACA ILLZTA

¹³ Nekztanaqui Jesusaqui tsjii curullquin yawchiča. Niiz kuz pecta žoñinaca illžcu ninaca kjawziča. Nekztan niizquin macjatchiča illzta žoñinacaqui.

¹⁴ Tuncapan žoñi utchiča niiztan kamajo, nižaza Yooz taku parlajo.

¹⁵ Ninacžquiz poderchiz cjiskatchiča, Yooz aztan laa žoñinaca čhjetnajo, nižaza zajrami chjatkatajo.

¹⁶ Nii illzta žoñinacaqui tinacatača; Simonatača; niiqui Pedro cjitazakaztača.

¹⁷ Jacobotača; Zebedeož majhtača niiqui. Juantača; Jacobož lajkača niiqui. Jacobžtan Juanžtan altu jorchiz cjen Boanerges cjitazakaztača.

¹⁸ Andrestača. Felipitača. Bartolomitača. Mateotača. Tomastača. Yekja Jacobotača; Alfeož majhtača niiqui. Tadeotača. Yekja Simonatača; tsjii politicutača niiqui, cananiž partitača.

¹⁹ Judas Iscariotitača; Jesusiz quintra tarazunchiča niiqui. Jalla nužuča Jesusiz illzta žoñinacaqui.

JESUSIZ QUINTRA CHIICHICHA

Nekztanaqui Jesusaqui kjuyquin ojkičiča niiz illzta tjaa jintanacžtan.

²⁰ Nekziqui muzpa žoñinacaqui ajcsizakaztača. Jesusaqui niiz tjaa jintanacžtanaqui ana čhjeri luli atchiča, žoñinacž muzpa ajcziž cjen.

²¹ Nekztanac yekjap žoñinacaqui cjichiča:

–Lucurataž niiqui, –cjican.

Jaziqui žoñiž lucurata cjiñiž cjen Jesusiz parintinacaqui tjonchiča Jesusa chjichi.

²² Nižaza Jerusalenquiztan judiuž lii tjaa jiñinacaqui tjonchiča, tuž cjican:

–Jesusaqui Beelzebú cjita zajraž tantača. Nii zajriž jilirž aztan yekja zajranaca chjatkatniča tiiqui. –Nuž cjichiča.

Beelzebú cjitaqui zajriž jiliritača.

²³ Nekztanaqui nižta chiiñi žoñi kjawžcuqui, Jesusaqui paljaychiča, tuž cjican:

–¿Jaknužt Satanás cjita zajraqui persunpacha chjatkatasajo?

²⁴ Tsjii wajtchiz žoñinacaqui pizcquiz t'aknsasaž niiqui, tsjiimi tsjiimi quintrasasaž niiqui, nii wajtaqui tjatantaž cjequiča.

²⁵ Nižaza tsjii kjuychiz žoñinacaqui pizcquiz t'aknsasaž niiqui, tsjiimi tsjiimi quintrasasaž niiqui, nii kjuychiz žoñinaca wichansnasača.

²⁶ Satanasaqui persuna t'aknsasaž niiqui, ezasača. Niiz aziqui miransnasača. Anaž azziz cjesača.

²⁷ Jaziqui anaž jecmi tsjii azziz žoňž kjuyquiziqui luzi atasacha, ima azziz žoňi čejlcanaqui. Anaž niiž kinakunacami jwesi atasacha. Čejlžcu, nekztan kinakunaca jwesi luzasacha.

²⁸ Čeka ultimu werara chiyuča, tjapa ujnacami tjapa anazum takunacami pertuntaž cjesača.

²⁹ Pero jakzilta žoňit Yooz Espirituž quintra chiičhaj niiqui, anaž pertunta cjesača. Nii žoňiqui wiňaya ujchiz cjequiča.

³⁰ Žoňiž “Zajraž tantamča amqui,” cjiňiž cjen, nuž paljayčiča Jesusaqui.

JESUSIZ MAATAN LAJKNACZTAN

³¹ Nekztanaqui Jesusiž maatan lajknacžtan tjončiča. Kjuy zanquiztan tsjitscu, Jesusa kjawskatchiča.

³² Kjuyltan žoňinacaqui Jesuižquiz muytata julzi želatča. Ninacaqui Jesusižquiz mazziča:

—Tekz am maa tjonchinča am lajknacžtan. Am kjawža, —cjican.

³³ Nekztanaqui Jesusaqui kjaaziča:

—¿Ject wejt maajo, wejt jilanacajo?

³⁴ Nii muytata julzi žoňinacž kjutňi cheržcu, Jesusaqui cjichiča:

—Tinacača wejt maaqui, wejt jilanacaqui.

³⁵ Jakziltat Yooz mantitacama ojčhaja, niiča wejt jilaqui, wejt cullaqui, wejt maaqui.

4

ZKALA CHJACZ QUINTU

¹ Wilta Jesusaqui kot atquiz tjaajinčiča. Nekztanac muzpa žoňinacaqui niižquiz macjatžquichiča. Jalla nekztan Jesusaqui walsiquiz luziča kot kjutňi. Žoňinacazti kot atquiz žejlchiča.

² Nekztan nii walsiquiztan žoňinacžquiz muzpa tjaajinčiča, tuž cjican:

³ —Nonžna ančhucqui. Tsjii žoňiqui zkal čhjaqui tewcchiča. Nekztan zkal semilla wichcan wichcanka čhjacciča.

⁴ Nuž čhjacan, parti semillanacaqui jicz latuquiz tjojtsiča. Nekzi wežlanacaqui tjončiča nii semilla luli.

⁵ Parti semillanacaqui maz yokaran tjojtsiča. Maz juntuňaqui ljawallatača yokaqui. Nekztan ratulla jecziča nii čhjactaqui.

⁶ Pero sii kjakiqui nii čhjactaqui ujsiča. Ana kozi zep'i atžcu, ratulla kjoňčiča.

⁷ Parti semillanacaqui ch'ap yokaran tjojtsiča. Nekztan ch'apinacakaz pajkchi, nii čhjactaqui tjatanchiča. Ana pookčiča.

⁸ Parti semillanacazti zuma yokquiz tjojtsiča. Nekztan cuza jecziča, pajkchiča, čhjerchiča. Jaziqui nii semillanacaqui quinsatunca sojtatunca, patac čhjerchiz zapa zkal ozquiz, nuž pookčiča.

⁹ Jalla nekztanaqui Jesusaqui chiižinčiča:

—Jakziltažlaja nonžni cjuňchiz niiqui, nonžla.

CHJACZ QUINTU INTINTISKATTA

¹⁰ Wiruňaqui Jesusa zinalla želan, niiž tuncapan tjaajinta žoňinacžtan nekž žejlňinacžtan, ninacaqui Jesusa pecunchiča čhjacz quintu.

¹¹ Nekztanaqui Jesusaqui kjaaziča, tuž cjican:

—Ančucaquiz Yooz tjaajnaquiča ančuca kuzquiz, niiž mantita kamaña puntuquiztan zizjapa. Yekjap žoňinacžquizzti quintunacžtankaz nii puntuquiztan chiyuča, ana criichi kuzziz cjen.

¹² Jalla nižta chiyuča, chercanpacha ana zizajo, nonzcanpacha ana intintajo, ana kuz campiizkatajo, ujquiztan ana pertunta cjisjapa.

¹³ Nekztanaqui Jesusaqui tjaajinta žoñinacžquiz pewcziča, tuž cjican:

—¿Anača tii zkala čhjacz quintu ziz, ančhucjo? ¿Jaknužt parti weriž chiita quintunaca zizasajo?

¹⁴ Ančhucacquiz tjaajnuča. Zkala čhjacz quintuqui jalla tuž cjiča: Jakziltat Yooz taku paljayčhaja, jalla niiča nii zkala čhjaczni žoñiqui.

¹⁵ Tsjii semillanacaqui jicz latuquiz tjojtsičha. Chjulorat tsjii žoñinacaqui Yooz taku nonžaja, oralla Satanasaqui tjonča, kuzquiztan nonžta taku kjañzjapa. Jalla nižtača nii jicz latuquiz yokažtakaz žoñinacaqui.

¹⁶ Nižaza tsjii semillanacaqui maz yokaran tjojtsičha. Nii maz yokažtakaz žoñinacaqui Yooz taku nonžcu, orallaž catokča. Pero tsjii upacamakaz Yooz tawk jaru kamča.

¹⁷ Ana koz zep'ichiz zkalažtakazza ninacaqui. Yooz taku catoktiquiztan yekjap žoñinacaqui quintrassa, ninaca chjaawjča. Nižaza pruebanacac tjonča. Nekztan ratulla Yooz taku tjažta, quejpsa.

¹⁸ Nižaza tsjii semillanacaqui ch'ap yokaran tjojtsičha. Nii ch'ap yokažtakaz žoñinacaqui Yooz taku nonža.

¹⁹ Nekztanaqui čhjulquinami pinsičha. Wali jiru cjis pecča; čhjultakimiž pecča. Nekztan kuzqui turwaysa. Nižta kuzziz cjen, Yooz taku tjatanñičha. Ch'ap yokaran čjacta semillanaca ch'apiž atipta, anaž pakji atča. Jalla nižtaž nii ch'ap yokažtakaz žoñinacaqui. Nužquiz nii žoñž kuzquiz Yooz takuqui anaž pookča.

²⁰ Tsjii semillanacaqui zuma yokquiz tjojtsičha. Nii zuma yokažtakaz žoñinacaqui Yooz taku nonžcu, tjapa kuztan catokča. Nekztanaqui ninacž kuzquiz Yooz takuqui cusaž pookča. Nii zum yokquiz čjactaqui cusaž čhjerča —quinsatunca, sojtatunca, patac čhjerchiz zapa zkal ozquiz. Jalla nižta Yooz takuqui pookča zuma žoñinacž kuzquiziqui.

MICHA TJEEZ QUINTU

Jesusaqui tsjiižtan quint'ichiča, tuž cjican:

²¹ —Micha ana tjeeznasača cajun kjuyltan nonzjapa, nižaza tjajz zquit koztan nonzjapa. ¿Jalla nižta cjesajo? Anaž cjesača. Micha tjeezqui iztacž juntuñ nonznasača, zuma kajajo.

²² Chjulu čhjojžtami wažtapanikaz cjequiča. Nižaza Yooz puntu ana ziztanacami kjanapacha ziztapanikaz cjequiča.

²³ Jakziltažlaj nonžni cjuñchiz niiqui, nonžla.

²⁴ Jesusaqui cjichizakazza:

—Weriž chiita taku zuma nonžnalla ančhucqui. Jaknužt ančhuc tjaačhaja, jalla nižtažtakaz Yoozqui ančhucacquiz tjaasača; iya zakaz yapznasača Yoozqui.

²⁵ Jakziltažlaj catokni kuzziz niiqui, juc'anti zuma kuz tjaataž cjequiča, Yooz taku intintajo. Jakziltažlaj ana catokni kuzziz niiqui, juc'anti turwayskattaž cjequiča. Jalla nižtiquiztan Yooz takuqui anapan intintiñiž cjequiča. —Nuž tjaajinčiča Jesusaqui.

ZKAL QUINTU

²⁶ Nižaza Jesusaqui iya tjaajinčiča, tuž cjican:

—Yooz wajtchiz žoñinacaqui jalla tužuča. Tsjii žoñiqui zkala čhjaczča.

²⁷ Nekztan ween tjačha, majiñ žaaza. Jaknužt zkalaqui jeczaja, pajkčhaja, nii ana zizza žoñiqui.

²⁸ Zkal yokaqui juyžtokaz pookča. Primiruqui zkalaqui jeczča, nekztan pjajkjallča, nekztan ozziz cjissa, nekztan čhjerchizza. Nuž pookča.

²⁹ Nekztan zkala wejlziž cjen pajk cuchillžtan zkala ajza. Zkala ricujz timpuča.

MOSTAZA CJITA SEMILLA PUNTU

³⁰ Jesusaqui tsjii quintužtan tjaajinčiča.

—Yooz wajtchiz žoñinaca, ¿jalla nii puntu irata čhjulut cjesajo? Ančhucaquiz cjiwčha, tii quintu irata cjesačha, mostaz quintu.

³¹ Tsji semillaqui mostaza cjitačha. Tjapa semillquiztan juc'ant zkoltallačha.

³² Pero čjacta mostaz semillaqui walja pakji pajkčha, čhjul zkalquiztanami juc'anti. Pajk itzzizza. Layñi wežlanacami itzquiz julžcu, ziwžquiz jeejznasačha. —Nuž tjaa-jinchičha Jesusaqui.

³³ Jalla nižta quintunacžtan žoñinacžquiz tjaa-jinchičha, quintu nonžñi otčañcama.

³⁴ Quintunacžtankaz tjaa-jinchičha. Nekztan niž persun tjaa-jinta žoñinacžquiz zapa quintumi intintiskatchičha, parti žoñinacaž ana želan.

JESUSAQUI TJAMIMI KJAZ LJOJKIMI MANTICHA

³⁵ Tsji nooj tjuñiž kattan, Jesusaqui niž tjaa-jinta žoñinacžquiz paljaychičha, tuž cjican:

—Tii kotž najwktuñtanž ojklay, —cjican.

³⁶ Nekztan parti žoñinaca eccu, Jesusaqui tsji walsiquiz ojkchičha niž tjaa-jin-tanacžtan. Nižaza yekja walsanacaqui ninacžtan chica ojkchičha.

³⁷ Nekztanaqui tsji wali pjursanti tjami zalchičha. Jaziqui juc'anti tjamiž cjen walsiquiz ancha kjaz luzzičha. Walsaqui jozipan kjaz chjijsičha.

³⁸ Jesusaqui walsa kjuyltan tsji azquiz tjajatčha, wirquin. Tjaa-jinta žoñinacaqui Jesusa žiñzičha, tuž cjican:

—¡Tjaajiñi Maestro! ¡Ticzmayala učhumqui! ¿Anam llaquisya?

³⁹ Wajtžcuqui Jesusaqui tjami mantichičha, apaltajo. Kjaz ljojki mantichizakazza:

—¡Ch'uj žela! —cjican.

Nekztanac tjamimi nižaza kjaz ljojkincami apaltichičha.

⁴⁰ Nekztan Jesusaqui ninacžquiz cjichičha:

—¿Kjažtiquiztan ancha tsucchinčuctajo? ¿Ana wejtquiz kuzzizčhuckaya?

⁴¹ Tjaa-jinta žoñinacaqui ancha ispantichi cjišičha. Ninacpora parlassičha, tuž cjican:

—¿Čhjul žoñit teejo? Tiiž takucama tjamimi nižaza kjaz ljojki casla.

5

ZAJRAZ TANTA ŽOÑI

¹ Nekztanaqui kotž najwctuñtan irantichičha Gadara cjita yokquin.

²⁻³ Jesusaqui walsiquiztan ulantan, tsji zajraž tanta žoñiqui campu santuquiztan tjonchičha. Campu santuquin kamñitačha. Nižaza anaž jecmi nii zajraž tanta žoñi čeli atatčha, jir carinžtanami.

⁴ Kjaž wilta kjojchami kjarami carinžtan čhejlžinzpantačha. Čhejlžtiquiztan carinaqui kjoksñipankaztačha; t'una kjolžñipankaztačha. Anaž jecmi nii žoñž azquiziqui alcansatčha, nii atipzjapaqui.

⁵ Ween majiñ campu santuran cururan ojklayñitačha kjawcan. Maztan persun janchi chjojritsñitačha.

⁶ Ažquiztan nii žoñiqui Jesusa cheržcu, zajtžquichičha, Jesusiž yujcquiz quillzlaki.

⁷ Nekztan altu joržtan chiichičha, tuž cjican:

—Jesusa, Arajpach Yooz Maati, ¿kjažtiquiztan am wejtquiz mitisi? Am roct'učha, anaž wejr tjatnalla, anaž wejr sufriskatalla.

⁸ Tuquiqui Jesusaqui mantichičha, tuž cjican:

—Zajra, tii žoñžquiztan ulna.

Nuž mantitiquiztan zajraqui chiichičha.

⁹ Nižaza Jesusaqui pewczičha:

—¿Čhjul tjuuchizamta? —cjican.

Nii zajraqui kjaazičha, tuž cjican:

—Tama cjitaž wejt tjuuqui. Tamača wejrnacqui.

¹⁰ Nekztan nii zajranacaqui Jesusižquiz ancha rocchiča, ana najwcuñ ojklayskatajo.

¹¹ Nekziqiu tsjii lumquiz tama cuchinacaqui lulatča.

¹² Nižtaqui Jesusižquiz rocchiča, tuž cjican:

—Cuchinacžquin wejrnac cuchnalla. Cuchinacžquizkaz luzkatalla.

¹³ Nekztanac Jesusac cjichiča:

—Oka nižtaqui.

Ulanžcu zajranacami cuchinacžquiz luzziča. Tsjii pizc waranka cuchinaca želatča. Zajranacaž luztan cuchinacaqui ispantichiča. Kot kjutñi jira pariju chjucuntichiča. Kjazquiz luzcu, ticziča.

¹⁴ Nekztanaqui nii cuchi itzñi žoñinacaqui tsucaña zajtchiča. Wajtquinami jochquinami cwint'ichiča cuchi kjazquiz katta quintu. Nekztan žoñinacaqui ojkchiča, nii paatanaca chertzñi.

¹⁵⁻¹⁶ Jesusižquin irantižcu, zajraž tanta žoñi žejtchi cherchiča. Julzi, zquitimi cujzi, žejtchi, nižta cherchiča. Jalla nuž cheržcu nii žoñinacaqui ancha tsucchiča. Ispantichiča. Nekztan nii chertzñi žoñinacaqui yekja žoñinacžquiz mazziča. Jaknužt nii zajraž tanta žoñi watčhaja, jaknužt nii cuchinacami watčhaja, nii mazmazziča.

¹⁷ Nekztanaqui žoñinacaqui Jesusižquiz rocatča:

—Tii yokquiztan okalla amqui, —cjican.

¹⁸ Nekztan Jesusa walsiquiz luznan nii žejtchi žoñiqui Jesusižquiz rocatča:

—Amtanpan tira žejlz pecuča, —cjican.

¹⁹ Jesusaqui ana munchiča, tuž cjican:

—Am kjuya oka amqui, am jamillanacžquin. Ninacžquiz mazca, “Wejr okziča Yoozqui. Yooz čhjetintitča wejrqui”, cjican.

²⁰ Nekztanaqui Tunca Wajtanaca cjita yokaran ojklaychiča nii žejtchi žoñiqui. Nicjuñ jaknuž Jesusaqui nii čhjetinchižlaja, jalla nii mazmazquichiča. Jalla nekztanaqui nii maztiquiztan tjapa žoñinacaqui tsucchiča.

JESUCRISTUCHA LAA ZOÑI CHJETINŃIQUI

²¹ Nekztanaqui Jesusaqui kot najwctuñtan quejpžquichiča walsiquiz. Kot ataran želan, nekziqiu muzpa tama žoñinacaqui niž muytata ajcziča.

²² Jalla nekztan tsjii Jairo cjita žoñiqui tjonchiča. Judionacž ajcz kjuy jiliritacha niiqui. Jesusa cheržcu niž yujcquiz ezlaki quillziča.

²³ Nekztan Jesusižquiz ancha rocchiča, tuž cjican:

—Ticzmayaž wejt kolta uzqui. Tjonžcalla amqui. Wejt uzaquiz am persun kjaržtan lanžinalla, wejt uz žetajo, ana ticznajo.

²⁴ Nekztanac Jesusaqui nižtan chica nii žoñž kjuya ojkchiča. Okan tama žoñinacaqui Jesusiž wirquiz apziča, ts'acjascan tejwc tejwewarascan.

²⁵ Žoñinacž taypiquiz tsjaa laa žon želatča. Tuncapan wata ljoc okiñtača.

²⁶ Tsjii kjaž kullñi žoñinacžquin ojkchinča. Juc'anti sufriskatchiča ninacaqui. Nužquiz inapankaz tjappacha naaža cusasa castassinča. Naa žonqui juc'anti laa cjisnatča; ana wira žeti atatča.

²⁷⁻²⁸ Jesusiž paata quintunaca nonchinča. Nekztan Jesusiž wirquiztan macjatchinča. Tama žoñinacž taypiquiz želan, tuž cjican pinsichinča:

—Niiž zquitikaj lanžnučhaj niiqui, žetaka.

Nekztan niiž zquiti lanžinča.

²⁹ Lanžcu nii orapacha tsijtsiča naaža ljoc ojkñiqui. Žejtchinča. Persun janchiquiz naychinča, nii laaquiztan žejtchi.

³⁰ Jesusaqui persun kuzquiz naychiča, niž aztan naa žon čhjetinchiča, nii. Nayžcu wir kjutñi cherziča. Nekztan pewcziča, tuž cjican:

—¿Ject wejt zquti lanzejo?

³¹ Nekztanac niž tjaajinta žoñinacaqui cjichiča:

—Cherzna. Tama žoñinaca ancha amquiz ts'acjassa. ¿Kjažtiquiztan am nuž pewczjo, “Ject wejr lanzejo?” cjicanajo.

³² Nekztan Jesusac žoñinacž kjutñi chercherziča, jectčhalaj nii lanzi, nii pajzjapa.

³³ Nekztan naa žonqui persun curpu žejtchi nayžcuqui, eekscan cjarcatcan mac-jatchinča, Jesusiž yujcquiz quillzinča. Nekztan naaqui tjapa werara mazzinča.

³⁴ Nekztan Jesusaqui cjichiča:

—Cullacalla. Tjapa kuztan criichiž cjen, čhjetinta cjissamča. Jaziqui žejtchipanim cjequiča. Cuntintum okaquiča.

³⁵ Nekztanaqui Jesusiž naa žonaquiz chiyan, tsjii žoñinacaqui tjonchiča; Jairo cjita judio jilirž kjuyquiztan tjonchiča. Nii jiliržquiz cjichiča:

—Am uzqui ticzinča. Anam iya tii maestružquiz molistis waquiziča.

³⁶ Jesusazti nii žoñinacž chiita taku ana catokchiča. Nekztan nii jiliržquiz cjichiča:

—Ana am niic kuz turwayskata. Yoozquin tjapa kuztanpan cjeella.

³⁷ Nekztan Jesusaqui Pedružtan Santiagužtan Juanžtan (Santiaguž lajk) ninacakaz apskatchiča. Partinaca ana apskatchiča Jesusaqui.

³⁸ Nekztan judío jilirž kjuyquin irantižquichiča. Nekzi žoñinacaqui ancha kjawcanž kaatkalča. Nižta cherchiča Jesusaqui. Ancha arnatča nii kaañi žoñinacaqui.

³⁹ Kjuyquin luzcu, Jesusaqui cjichiča:

—¿Kjažtiquiztan ancha aranjo, nižaza kaajo? Taa uzqui anača ticzin, tjajča.

⁴⁰ Nekztan nii žejlñi žoñinacaqui tjassiča, nii nonžcu. Jesusazti zancuñ nii žoñinaca ulanskatchiča. Nekztanaqui Jesusaqui maa ejpžtan niž mazinacžtan luzziča, jakz-iquin naa uz želatčhaja, nicju.

⁴¹ Nekztan Jesusaqui naa uza kjara tanziča. Nižaza altu tawkžtan chiichiča:

—Talita cumi, —cjican.

Nii takuqui cjiča, “Usalli, žaazna”.

⁴² Nekztanac nii orapacha naa uzqui žaaziñča. Ojklaychiñča. Tuncapan watchiz-tača naa uzqui. Nekztanaqui nii žoñinacaqui kuz kata tsucchiča. Ancha ispantichiča.

⁴³ Nekztan Jesusaqui zuma iwjt'ichiča, tuž cjican:

—Ana jeczquizimi tii čhjetinta quintu chii chiyaquiča.

Nuž mantiču, ninacžquiz mantichizakazza, naa uzaquiz čhjeri tjajjo, nii.

6

NAZARET CJITA WAJTQUIN OJKCHICHA

¹ Nekztanaqui Jesusaqui najwctan persun wajtquin ojkchiča niž tjaajintanacžtan.

² Jeejz tjuñquiziqui judionacž ajcs kjuyquiz tjaajinchiča. Nii nonžcuqui žoñinacaqui ispantichiča, tuž cjican:

—¿Jakziquin zizzit tii žoñi tii tjaajinznacaya? ¿Jaknuž zizzit tii tjaajinznacaya? ¿Jaknuž paachit tii milajrunacaya? ¿Jaknužupan teejo?

³ Tiiqui carpintirukazla, María majchča tiic, ¿ana jaa? Tiiž lajknacaqui Jacobo, José, Judas, Simón cjitača. Ninacžtan tiiž cullaquinacžtan tii wajtquiz učumnacžtan kamča. —Nuž cjichiča.

Nekztanaqui nii wajtchiz žoñinacaqui Jesusiž quintra muzpa žawziča.

⁴ Nekztan Jesusac chiichiča:

—Tjapa žoñinacaqui Yooziž uchta profetžquiz rispitle. Pero persun wajtchiz žoñinacami persun parintinacami persun familianacami profetžquiz anaž rispitz pecñiča.

⁵ Nekziqui nii wajtquiz tsjii kjažultan žoñi čhjetinchiča, kjaržtan lanžcu. Ana iya milajru paayi atchiča.

⁶ Ana criiñiz cjen Jesusaqui cjichiča:

—¿Kjažtiquiztan tii žoñinacaqui ana criijo? ¿Kjažt cjisnaquejo?

Nekztanaqui nii wajtquiztan ulanžcu, visinunacž wajtquiztan wajta tjaa jinñi ojklay-chičha Jesusaqui.

TJAAJINTA ZOÑINACA CUCHANTA

⁷ Jesusaqui niiz tuncapan tjaa jinta žoñinaca kjawžcu, pucultan pucultan cuchanchičha:

—Ančhucqui Yooz aztan zajranaca chjatkataquičha, —cjican.

⁸ Jalla nekztanac mantichičha, tuž cjican:

—Ančhucqui anaž čhjulumi chjichaquičha jiczjapaqui, anaža žak quelzmi anaza čherimi anaza paazmi. Tsjii atskaz chjichaquičha.

⁹ Čhjata čhjatžcučha okaquičha. Nižaza tsjii zquitillchizkaz okaquičha, ana pizc zquitichiz.

¹⁰ Ančhucqui jakziquinž alujasačhaja, nekziž kamaquičha, čhjulatorat nii wajtquiztan ulnačhaja, niicama.

¹¹ Jakzilta watjat ančhuc ana chertz pecčhaja, nižaza ančhuca takumi ana nonz pecčhaja, jalla nii wajtquiztan ulnaquičha. Nekztan nii yok pulpu ančhuca kojochquiztan tsajt tsajtsnaquičha, ninacž uj tjeezjapa. Ultim weraral cjiwčha, juyzu tjuñquiziqui Sodomo nižaza Gomorra cjita watjanacchiz žoñinacaqui castictaž cjequičha. Pero nii ana ančhuc pecni žoñinacazti juc'anti castictaž cjequičha. —Nuž cjichičha Jesusaqui.

¹² Jalla nekztanaqui niiz tuncapan tjaa jinta žoñinacaqui Yooz taku paljayi ulanchičha, tuž cjican:

—Ančhucqui tjappacha kuz campiya. Ančhuca uj paaznacaqui eca.

¹³ Nekztanaqui zmali zajranaca chjatkatchičha. Nižaza asiitižtan achquiz tjawkžcu, muzpa laanaca čhjetinčičha.

JUAN BAUTISTA CONTA

¹⁴ Tjapa kjutni nii yokaran žoñinacaqui Jesusiž ancha wali paata milajrunaca zizzičha. Herodes cjita nacionž chajwc jilirimi zizzizakaztačha. Nii Jesusiž paata milajrunacž puntu nonžcuqui, Herodesaqui cjichičha:

—Juan Bautistala tiiqui. Ticziquiztan jacatatchižlani. Jalla nižtiquiztan walja milajrunaca paazjapa poderchizlani.

¹⁵ Yekjap žoñinacaqui cjichičha:

—Elías cjita profetila tiiqui.

Yekjapaqui cjichičha:

—Tuquitan Yooz taku parliñi profetažtakazla tiiqui.

¹⁶ Jesusiž quintu nonžcu Herodes cjita nacionž chawc jiliriqui cjichičha:

—Juan Bautistala tiiqui. Wejrqui tiiž acha pootkatchinčha. Anziqui jacatatchila tiiqui. —Nuž cjichičha Herodesaqui.

¹⁷ Tuquiqui tužu watchičha. Herodiy cjita žonqui Felipiž tjuntačha. Felipitačha Herodes jilaqui. Nekztan Herodesaqui Felipiž tjunatan zalsičha. Nekztan Herodiy cjita tjunqui Herodižquiz paljaychičha:

—Nii Juan tankata. Carsilquiz chawjczna. —Nuž cjichinčha naaqui.

¹⁸ Tuquitan Juanqui Herodes cjita jiliržquiz chiižinčičha, tuž cjican:

—Am persun jilž tjunatan zalsamčha amqui. Nuž ana waquisičha. Jaziqui liy quintram kamčha amqui.

¹⁹ Nekztanaqui naa Herodiiqui Juanž quintra ancha žawjchinčha. Conkatzpan pecatčha. Pero ana atchinčha.

²⁰ Juanqui zuma kuzziztačha, ana ujchiz žoñi. Nekztan Herodesaqui Juanžquiz eksičha. Nekztan Herodiyqui ana conkati atchinčha. Herodesaqui Juanž taku nonžcu, walja paysnakchičha. Jalla nuž cjenami Juanž taku jutzaznižipankaztačha.

²¹ Wiruñaquí niiz cumpliaños pijztiquiz Herodesaquí cusa čherinaca luli kjawziča. Wajt jilirinaca, sultatz jilirinaca, Galilíquiztan ricach zoñinaca, ninaca kjawziča. Nii tjuñquíz naa Herodiyquí ancha kuz tjutzinča, Juan conkatzjapaquí.

²² Nii nooj jakziquin čheri lujlčhaja, nicju Herodiyž turquí tsati luzzinča. Nekztanaquí naa turaž ancha tsajtchinča. Nii cheržcu, jutzazziča Herodižtan niiz invitta zoñinacžtanaquí. Nekztan nii Herodes jiliriquí naa turaquíz paljayčiča, tuž cjican:

—Chjulum pecchaj niíquí, wejtquiztan mayaquíča. Amquíz tjaača.

²³ Jaziquí Herodesac turaquíz juramentužtan čiichiča, tuž cjican:

—Chjulu pecanami amiž maytacama chicat wejt nacionami amquíz tjaašača.

²⁴ Nekztan ulanžcu naa turquí maa pewczinča:

—¿Čhjulut wejr mayas, mama? —cjican. Maaquí kjaazinča:

—Juan Buatistiž ača maya.

²⁵ Nekztan apura jiliržquíz luzquichinča naa turquí. Maychinča maaž mantitacama, tuž cjican:

—Anzpacha tsjii chuwquíz Juan Bautistiž achal pecuča.

²⁶ Nekztanaquí nii jiliriquí ancha llactazziča. Juramentužtan čiichiž cjen, nižaza niiz mazinacaž nonziž cjen, ana kjaž cjiyi atčiča.

²⁷ Nekztan sultatu cuchanchiča Juanž ača zijjcajo.

²⁸ Carsila ojkčiča mantita sultatuquí. Nekztanaquí Juanž ača pootžcu chuwquíz zijjččiča. Naa turaquíz ača tjaatatača. Nekztan naaquí maaquin ača tjaažquichinča.

²⁹ Jalla nekztanaquí Juanž ača poota nonžcuquí, Juanž tjaajintanacaquí niiz curpu mayi tjončiča, chjitzjapa, yokquíz tjatzjapa.

LUJLZ ČHERI TJAATA

³⁰ Wiruñaquí Jesusiž cuchanta zoñinacaquí quejpžquichiča. Jesusižquíz cwint'ichiča tjapa ojklayanacami tjapa tjaajintanacami. Nekztan Jesusaquí ninacžquíz paljayčiča, tuž cjican:

³¹ —Jakziquint ana zoñinaca žejlčhaja, nicju tjappachaž ojklalla. Nicju jeejžcaquíča. Ancha zoñinacaž tjontjonžtiquiztan wira ana čherimi lujlucatača.

³² Nekztanaquí Jesusižtan niiz tjaajinta zoñinacžtan, jalla ninacakaz ojkčiča; ana žejlz yokquin walsiquíz ojkčiča.

³³ Pero eclichi zoñinacaquí ninaca ojkñi cherčiča. Zoñinacaquí ninaca pajžcu tjapa wajtquiztan kjojčuñ zajtčiča. Jaziquí nii zoñinacaquí Jesusiž tuquí irantichiča.

³⁴ Jesusaquí nii yokquin irjatžcuquí walsiquíztan ulanchiča. Nekztan tama zoñinaca cherziča. Nii zoñinaca okziča. Ana awatirchiz uuzanacažtakaz nii zoñinaca želatča. Nekztanac Jesusac walja tjaajinčiča.

³⁵ Ima tjuñ katalla Jesusiž tjaajintanacaquí tjončiča, tuž cjican:

—Ana žejlz yokquízla učumquí. Tjuñiqui wajillaž kataquíča.

³⁶ Jaziquí tii zoñinacaquí joch kjutñimi wajt kjutñimi cuchnalla, nicju čherimi kjayžcajo. Ninacžta čheri ana žejlča.

³⁷ Jesusaquí kjaaziča:

—Ančhucča tinacžquíz čheri tjaa.

Ninacaquí cjichiča:

—¿Tinacžquíz čheri tjaazjapa, paa patac paaztan t'anta kjayi okas?

³⁸ Nekztan Jesusac kjaaziča:

—¿Kjaž t'antat ančhucalta žejljo? Cheržca ančhucquí.

Nekztan cheržcu quejpžquichiča ninacaquí. Nekztan čiichiča, tuž cjican:

—Pjijska t'anta pizc ch'iz žejlča.

³⁹ Jalla nekztanaquí Jesusaquí ninacžquíz cjichiča:

—Jaziquí pastu yokaran t'aka t'aka tii zoñinaca tjulžna,

⁴⁰ patacquiztan pataca, pjijska tuncquiztan pjijska tunca.

Nekztan nužupan julziča žoñinacaqui.

⁴¹ Nekztanaqui Jesusaqui nii pjijska t'anta pizc ch'iz niiž kjarquiz tanzcuqui, tsewcchuc cherziča. Nekztan Yooz Ejpžquin gracias cjican chiichiča. Nekztan t'anta kjolziča. T'una t'una kjolžcu, tjaajintanacžquiz tojziča, parti žoñinacžquiz onajo. Nižaza nii pizc ch'iz tojzizakazza žoñinaca lulajo.

⁴² Nekztan tjapa žoñinacaqui chjeki cjissiča.

⁴³ Nekztanaqui žejtchi t'anti t'unanacami ch'iz t'unanacami tuncapan canasta chjijpi ricujchiča.

⁴⁴ Nii t'anta lujlñi luctak žoñinacaqui pjijska warankatača.

JESUSAQUI KJAZ JUNTUÑ OJKCHICHA

⁴⁵ Nekztanaqui Jesusaqui niiž tjaajintanaca walsiquiz luzkatchičha, nii kota kakajo, Betsaida cjita wajtquin kotž najwcchaktan. Ninacž ojktan Jesusaqui parti žoñinacžquiz cjichiča:

—Ančhuca kjuyaž okaquiča.

⁴⁶ Žoñinaca cuchanžcuqui Jesusaqui cur kjutñi yawchiča, Yooz Ejpžtan parlisjapa.

⁴⁷ Nii oraqui zumchitača. Curquin Jesusaqui zinallatača. Pajk kotquiziqui nii tjaajinta žoñinaca walsiquiz kjaz kot taypiguintača.

⁴⁸ Jesusaqui curquiztan walsa cherchiča. Tjamiqiu pjursantitača. Nii tjaajinta žoñinacaqui tjapa aztan langznatča, najwcchaktan walsa tjakzjapa. Ima kjantatiž cjen ninacžquin ojkchiča Jesusaqui. Kjaz juntun ojkchiča, tsjii latu watzjapa.

⁴⁹ Nii tjaajintanacazti Jesusa kjaz juntun ojkñi cherchiča. Nekztanac kjawchiča:

—Cuntinaž caa, almaž caa, —cjican.

⁵⁰ Ancha tsucchiča. Nekztanaqui Jesusaqui paljaychiča, tuž cjican:

—Anača tsuca ančhucqui. Wejrtča. Tjup kuzziz cjee.

⁵¹ Nekztanaqui walsiquiz luzziča Jesusaqui. Nii oraqui tjamiqiu zekziča. Jalla nekztanaqui tjaajintanacaqui ispantichiča. Inakaz cjissiča.

⁵² Ninacatača ana nii t'anta milajru intintazñinacaqui. Imazi ninacž kuznacatača zizñi.

JESUSAQUI LAA ŽOÑINACA CHJETINCHICHA

⁵³ Nekztanaqui pajk kota kajkžcuqui Genesaret cjita yokquiz irantichiča. Nekztan walsa kjaz kot atquiz mokžcu ecchiča.

⁵⁴ Walsiquiztan ulnan žoñinacaqui Jesusa pajchiča.

⁵⁵ Jalla nekztanac nii žoñinacaqui tjapa kjutñi ojkchiča, laanaca zjiiczjapa. Jakziquint Jesusa želatčhaja, nicju laa žoñinaca zjiicchiča zquitquiz callžcu.

⁵⁶ Jochiran kolta watjaran pajk watjaran ojklayatča Jesusaqui. Jakziquint ojklayatčhaja, nekzi laa žoñinaca zjiicñipankaztača. Nižaza žoñinacaqui Jesusa rocchiča, laa žoñinaca Jesusiž zquiti lanznajo. Jesusiž zquiti lanzñinacaqui žejtchiča.

7

¿CHJULUT UJ CJES ŽOÑŽQUIZQUI?

¹ Nekztanaqui fariseo žoñinacaqui Jesusižquiz macjatchičha, tsjii kjažt judiuž lii tjaajinacžtan Jerusalenquiztan tjonchi. Jakziquin Jesusa želatčhaja, jalla nicju ajcsiča.

² Nižaza nekzi Jesusiž tjaajinta žoñinacaqui čhjeri lulatča, kjara awjz costumbre ana paažcu. Nuž ana kjara awjžcu lulan, cherchiča parti žoñinacaqui. Nekztan quintra chiichiča.

³ Nii fariseo žoñinacaqui ana kjara awjžcu, wira ana lujlñitača. Parti judio žoñinacaqui nižtazakaztača. Jaziqui tuquita žoñinacž costumbre nužupan chjojñitača.

⁴ Nižaza čhjeri kjayžcu ana kjara awjz costumbre paažcu, ana wira lujlñipantača. Nužupan ancha costumbre cumpliñinacatača. Wazunacami mazcanacami jir mazcanacami catrinacami nižtanaca ajunñipankaztača.

⁵ Nuž cjen nii fariseo žoñinacaqui judiuž lii tjaajiñinacžtan Jesusižquiz pewcziča, tuž cjican:

—¿Kjažtiquiztan am tjaajintanacaqui tuquita costumbre ana cumplejo? Ana kjara ajwžcu lujl-la.

⁶ Jesusaqui ninacžquiz kjaaziča, tuž cjican:

—Anazum kuzziz žoñinacčhucča ančhucqui. Ultim werara ančhuca puntuquiztan chiichiča tuquita Isaías cjita žoñiqui. Tuž cjican cjiirtkalča:

“Tii žoñinacaqui tawkžtankaz Yooz rispitiča; juntuñkazza. Ultimu kuzquiz ana Yooz rispitiča.

⁷ Inapankaz Yooz sirwiča tii žoñinacaqui. Tinacaqui žoñž taku tjaajiñiča, “Tiiča Yooz takuqui”, cjican”.

—Nuž cjiirtkalča Isaías cjita žoñiqui.

⁸ Jesusaqui cjichizakazza:

—Nižtapan ančhucqui Yooziž mantita ana cumpliñčhucča. Žoñž cuzturumpi cumpliñčhucpankazza. Mazcanacami wazunacami ajunz nižta costumbrenaca cumpliñčhucpankazza.

⁹ Ančhucqui Yooziž mantita tjanča. Ančhuca costumbrekaz tucquin utča.

¹⁰ Tuquita Moisés cjita žoñiqui chiižinchiča:

“Am maa ejp rispita. Nižaza jakziltami nižž maa ejpž quintra chjaawjkatačhaja, jalla niiqui, contaj cjila”. Nuž mantichiča Moisesaqui.

¹¹ Ančhuczi tuž cjiñčhucča: “Jakzilta žoñit nižž maa ejpžquiz chiyasača, tuž cjican, ‘Wejrqui amquiz anal yanapi atasacha. Tjapa wejt cusasanaca, Yoozquiz tjaatača’.

¹² Nuž chiyachaj niiqui, maa ejp yanapz anaž waquisiča”. Nuž cjiñčhucča ančhucqui.

¹³ Nižtiquiztan ančhuca costumbre ana tjaztñiž cjen, Yooz mantitaqui tjazta. Jalla nižta paayiñčhucpankazza ančhucqui. —Nuž chiižinchiča Jesusaqui.

¹⁴ Nekztanaqui Jesusaqui wilta žoñinaca kjawziča, tuž cjican:

—Ančhucqui, tjappacha nonžna. Wejt taku intintazñi cjee.

¹⁵ Anaž zawncan kjuylchuc luzñiqui uj cjesača žoñžquiziui. Žoñž kuzquiztan ulanñi nižž uj cjesača žoñžquiziui.

¹⁶ Jakziltažlaj nonžni cjuñchiz niiqui, nonžla.

¹⁷ Nekztanac Jesusac žoñinaca eccu kjuya ojkchiča. Kjuya luzcu nižž tjaajintanacaqui Jesusižquiz nii ana intintazta takunaca pewcziča.

¹⁸ Jalla nekztan Jesusaqui kjaaziča, tuž cjican:

—¿Ančhucqui nižtazakaz anaž naazya? ¿Anapanž intintiya? Tužuča niiqui. Anača zawncan kjuylchuc luzñiqui uj cjesača žoñžquiziui.

¹⁹ Nii lujltaqui kuzquiz ana luzasača; pjuchquizpanž luzza. Nekztan pjuchquiztan wir kjutñi ulanča zawncchuc. Jalla nižtiquiztan čhjul čhjeripankaz lulasacha žoñinacaqui.

²⁰ Nekztan cjichizakazza:

—Kuzquiztan ulanñi nižž uj cjesača žoñžquiziui.

²¹ Žoñž kuzquiztan tižta ana walinaca ulanča: anawali pinsiz, adulteriuquiz ojklayz, yekja maatakžtan žejlz, žoñi conz,

²² tjañi cjis, wali jiru cjis pecz, uj paaz, incallz, anawali kamañchiz cjis, čhjultaki zmaz, anazum takunaca joojooz, mita cjis, anazum kuzziz cjis.

²³ Nižtanaca kuzquiztan ulanča. Jalla nižtanaca uj cjesača žoñžquiziui.

JESUSIZQUIN KUZUZ MAATAKA

²⁴ Nekztanaqui Jesusaqui tsijtsičha. Jakziquin Tiro Sidón cjita watjanaca žejlčhaja, nijcchuc ojkchiča. Nicju tsjii kjuyquiz alujassiča. Ana žoñiž pajta kamz pecatča. Pero ana pajta kamzqui anapantaž atchuca.

²⁵ Jesusiž tjonta zizcu nii orapacha tsjaa žonqui Jesusiž yujcquiz quillzlaki macjatžquichinča. Naaža uzqui zajraž tantatača.

²⁶ Sirofenicia cjita yokchiz žontača naaqui. Grecia cjita taku chiyiñtača. Jaziqum naa žonqui Jesusa rocchinča:

—Wejt uzaquiztan zajra chjatkatžinalla, —cjican.

²⁷ Nekztan Jesusaqui kjaaziča:

—Primiru maatinaca čhjeri chjeki lujlsa. Maatinacž čhjeriqui kjañžcu pawcžquin tjojtanz anaž waquiziča.

²⁸ Naaqui kjaazinča, tuž cjican:

—Nužupanzača. Weraram chiičha. Pero pacunacami mis koztan ocjalž tajwkta čhjerinaca lujlča.

²⁹ Nekztanac Jesusac chiichiča:

—Amiž zuma chiitiquiztan zajraqui ulanskatchinča am uzaquiztanaqui. Jaziqum am kjuya quepa.

³⁰ Nekztanaqui kjuya quejpchinča naa žonqui. Nii kjuyquin naaža uz ajpsquiz želanami, zajraqui chekapanž ulantkalča.

OÑ ZOÑI CHJETINTA

³¹ Nekztan Jesusaqui Tiro cjita yokquiztan quejpžquichiča. Sidón cjita watja, Decápolis cjita yoka watžcu Galilea cjita kot ataran ojklaychiča.

³² Nicju tsjii oñ žoñi Jesusižquiz zjičtatača. Cjacija chiiñizakaztača. Nekztan žoñinacaqui Jesusižquiz rocatča:

—Am kjaržtan tii žoñi lanžinalla, —cjican.

³³ Nekztanaqui Jesusaqui nii žoñi chjitchičha tsjii latu. Nekztan nii oñ žoñž cjuñquiz loc'anžtan čhjažpziča. Nekztan llawsižtan tjujtžcu nii žoñž las lanziča.

³⁴ Nižaza Jesusaqui tsewcchuc cheržcu:

—Aayj, —cjican llactazziča.

Nekztan chiichiča,

—Efata, —cjican.

Nii tsjemat taku cjiča, “Cjetzi cjee”, nii.

³⁵ Nekztanac nii žoñž cjuñinacaqui cjetzi cjissiča. Niiž lasqui žejtchizakazza. Cusa chiiñi cjissiča.

³⁶ Nekztanaqui Jesusaqui mantichiča, tuž cjican:

—Tii anam jeczquizimi maznaquiča.

Nekztanaqui žoñinacaqui nii taku ana cassičha. Nekztan Jesusaqui juc'anti ana chiychiyajo mantichiča. Nekztan nii žoñinacazti juc'anti mazmazziča tjapa kjutñi.

³⁷ Jaziqum walja ispantichiča nonžni žoñinacaqui, tuž cjican:

—Tjapa niiž paatanacaqui ancha zumača. oñ žoñimi nonskatñiča. Up žoñimi chiikatñiča. Ancha cusača.

8

JESUSAQUI CHJERI TJAACHICHA

¹ Tsjii nooj muzpa žoñinacaqui wilita ajcsiča. Chjeri miranzcama žejlchiča. Nekztan Jesusaqui niiž tjaajintanaca kjawžcu, ninacžquiz paljaychiča, tuž cjican:

² —Chjep maj tii žoñinacaqui wejtan kamchiča. Jaziqum tinacaqui ana čhjerchizza. Tinacžquiz okžnuča.

³ Ana čhjeri tjaažcu kjuya cuchnasaž niiqui, jiczquiz čhjerž kjara tismayasača. Yekjap žoñinacaqui ažquiztan tjonchiča.

⁴ Jesusiž tjaajintanacaqui kjaaziča:

—Wazquizza učumqui; anaž čhjulumi žejlča tekziqui. Ćhjul čhjeri tii žoñinacžquiz tjaasajo, wejrnacjo?

⁵ Nekztan Jesusaqui ninacžquiz cjichiča:

—Ķjaž t'antat ančhucalta žejlya?

Tjaajintanacaqui kjaaziča:

—Pakallaku.

⁶ Jaziqui Jesusaqui nii žoñinacžquiz chiichiča:

—Ančhucqui, yokquiz julzna.

Nekztanaqui t'anta tanžcu Yooz Ejpžquin gracias cjican chiichiča. Nekztan t'anta kjolkjolžcu, niž tjaajintanacžquiz tjaachiča, žoñinacžquiz tojznajo. Nekztan partir paychiča tjaajinta žoñinacaqui.

⁷ Nii tjaajintanacaqui tsjii kjaž chi'iznacchiztača. Nii tanžcu Jesusaqui wilta Yooz Ejpžquin gracias cjican chiichiča. Nekztan tjaajintanacžquiz chiichiča:

—Tii žoñinacžquiz tii ch'iznaca tojzna, ančhucqui.

⁸ Nii žoñinacaqui lujlchiča, chjekañcama. Nekztan žejtchi čhjerinaca tjappacha juntižcu, pakallaku canasta chjijpsiča.

⁹ Nii lujlñi žoñinacaqui tsjii pusi warankatača. Nekztan Jesusaqui žoñinaca cuchanchiča, kjuya okajo.

¹⁰ Jesusaqui tjaajintanacžtan walsiquiz luzcu, Dalmanuta cjita yokquin ojkchiča.

JESUSIZ QUINTRA ZOÑINACA

¹¹ Fariseo žoñinacaqui tjonžcu, Jesusižquiz ch'ayi kallantichiča, tuž cjican:

—Amqui Yooztamčhalaj niiqui, milajru tekz paalla nižtaqui.

¹² Nekztan Jesusaqui walja llactazcan ujrsiča. Nekztan chiichiča, tuž cjican:

—Ķjažtiquiztan milajrukaz pecjo? ĶTii žoñinacajo? Weraral cjiwča, milajru ana paasača.

¹³ Nii žoñinaca eccu, walsiquiz luzcu, ojkchiča, wilta kot nawjktuñtan kajkjapa.

¹⁴ Jesusiž tjaajintanacaqui t'anta chjitz tjatsiča. Tsjii t'antakaz želatča walsiquiz.

¹⁵ Nekztan Jesusaqui ninacžquiz chiižinchiča:

—Cwitazaquiča fariseož liwaturžquiztan nižaza Herodiž liwaturžquiztan.

¹⁶ Nekztan nii tjaajinta žoñinacaqui Jesusiž chiižintiquiztan palt'ichiča, tuž cjican:

—Učumqui ana t'anta zjijctala. Ķjaž cjeequejo?

¹⁷ Nekztan ninacaž nuž parlan, Jesusaqui pewcziča:

—Ķjažtiquiztan t'antiquiztan parli ančhucjo? ĶAnapanž intintiy? Ķjažtat ančhucjo? ĶAnčuca kuzqui ana naazñipan, kjažtatajo?

¹⁸ ĶAnčuca čhjujquiqui anaj cherchiya? ĶAnčuca cjuñimi anaj nonziya? ĶTii anapanž cjuñkaya?

¹⁹ Wejrqui pjijska t'antižtan pjijska warank luctak žoñinaca lulunchinča. ĶNekztan kjaž canastat nii žejtchi t'anta ricujtatajo?

Ninacaqui kjaaziča:

—Tuncapani.

²⁰ Nekztan Jesusaqui pewczizakazza:

—Wejrqui pakallaku t'antižtan pusi warank žoñi lulunchinča. ĶNekztan kjaž canastat nii žejtchi t'anta ricujtatajo?

Ninacaqui kjaaziča:

—Pakallaku.

²¹ Nekztan Jesusaqui pewczizakazza:

—ĶAnapanž zuma intintas, ančhucjo?

ZUR ZOÑI CHJETINTA

²² Nekztan Betsaida cjita yokquin irantichiča. Nekzi tsjii kjažu žoñinacaqui Jesu-sižquiz tsjii zur žoñi zjijcchiča. Zjijcžcu rocchiča:

—Tii lanžinalla, —cjican.

²³ Nekztan Jesusaqui nii zur žoñž kjarcu tanžcu, wajtž tjiya chjitchiča. Nekztan niž čhjucquiz llawsiztan t'awziča. Kjaržtan lanžcu pewcziča:

—¿Jaziqui čhjultakinacam cherya?

²⁴ Zur žoñiqui acha waytižcu chercherziča. Nekztan kjaaziča:

—Žoñi cherchuchača, ojklayñi. Pero ana cusal cherucha; muntinacažtakaz nii žoñinaca cherucha.

²⁵ Jesusaqui nii žoñž čhjucquiz wilta kjaržtan lanziča, zuma cherajo. Nekztan niž čhjucquiz zuma žejtchiča. Nii žoñiqui zuma calaru cherchiča ažkquin.

²⁶ Jesusaqui čhjetinžcu niž kjuya cuchanchiča, tuž cjican:

—Anam wajtquiz luzaquiča. Anaž jecžquizimi tii čhjetinta chiyaquiča.

¿JEC JESUSAQUI?

²⁷ Nekztan Jesusaqui tjaažintanacžtan ojkiča, Cesarea de Filipo cjita yok kjutñi. Ojkcan Jesusaqui pewcziča:

—¿Ject wejrjo? ¿Kjažt cji žoñinaca wejt puntuquiztanajo?

²⁸ Niž tjaažinta žoñinacaqui kjaaziča:

—Yekjap žoñinaca, “Juan Bautistala”, cjiča. Yekjapac, “Eliasla”, cjiča. Yekjapac, “Tsji Yooz taku parliñi profetala”, cjiča.

²⁹ Nekztan Jesusaqui pewcziča:

—¿Ančhuczi, jaknuž cji wejt puntuquiztanajo?

Pedruqui kjaaziča:

—Yooziž cuchanžquita Cristumča amqui, —cjican.

³⁰ Nekztan Jesusaqui mantichiča:

—Anaž jecžquizimi nii maznaquiča.

JESUSAQUI MAZINCHICHA NIIZ TICZ

³¹ Nekztan niž tjaažinta žoñinacžquiz wilta tjaažni kallantichiča, tuž cjican:

—Wejrqui tsewctan cuchanžquita Yooz Zoñtča. Jaziqui ancha t'akjisača. Wajt jilirinacami timlu jilirinacami judio tjaažniñinacami, ninacaqui wejtquiz chjaawjkataquiča. Wejrqui contal cjeeča. Nekztan čhjep majquiztan jacatatača.

³² Jesusaqui nuž kjanacama niž ticz mazinchiča. Tii mazintiquiztan Pedruqui tsjii latu Jesusa chjitchiča. Nekztan paljaychiča, tuž cjican:

—¿Kjažtquiztan nižta chiijo? Anapan nižta chiyalla amqui.

³³ Jesusaqui wir kjutñi parti tjaažinta žoñinacžquin cherziča. Nekztan Jesusaqui Pedro ujziča, tuž cjican:

—Satanás, zaraka wejt yujcquiztan. Amiž pinsita anača Yooziž pinsita, žoñiž pinsitakazza.

³⁴ Nekztan Jesusaqui nekz žejlñi žoñinaca kjawžcu, chiižinchiča, tuž cjican:

—Jequit wejttan chica ojklayz pecchaj niiqui, primiraqui persun kamañ wiraqui tjažla. Sufrijsapaqui listoj cjila, ticzcama. Nekztan wejttan chicaž kamaquiča.

³⁵ Jakziltat persun kamañ wira ana tjažt pecchaj niiqui, arajpach kamañaqui ana tjaažt cjequiča. Jakziltat tii muntuquiz Yooz tawk laycu nižaza wejt laycu persun kamañ wira tjažznačhaja, jalla niiqui arajpachquin wiñaya kamaquiča.

³⁶ Tsji žoñiqui tjapa tii muntuquiz žejlñi cusasanaca canasača. Pero nekztan infiernuquin okaquiž niiqui, tjapa nii canta cusasanaca, ¿chjuljapat sirwasajo? Inakaz cjequiča.

³⁷ Arajpachquin Yoožtan kamzqui persun liwriizqui anaž paaztanac kjayasača.

³⁸ Wejrqui cjiwča, tii muntuquiz žoñinaca žejlča, ana Yooz kuzcama ojklayñi, persun kuzcama ojklayñi, ujchizza. Nii žoñinacžtan želan, jakziltat wejtquiztan nižaza

wejt tawkquiztan asačhaja, nižaza ana pajñi chiyačhaj niiqui, jalla nižquiztan wejrzal ana pajñi chiyača. Tsjii nooj wejrqui wejt Ejpž aztan tjonacha zuma arajpach Yooz anjilanacžtan. Nii ora wejtquiztan asñi ana pajñi žoñinacžquiztanaqui wejrzal ana pajñi chiyača. Wejrqui tsewctan cuchanzquita Yooz Zoñtča. –Nuž cjichiča Jesusaqui.

9

¹ Jesusaqui cjichizakazza:

–Ultimu werara wejr cjiwča, tsjii nooj Yoozqui aztan mantaquiča. Ima nii tjuñi tjonan yekjap tekzta žoñinacaqui anaž ticznaquiča.

JESUSAQUI TSJEMATA CJISSICHA

² Sojta tjuñquiztan Jesusaqui čhjepultan tjaajinta žoñinaca chjitchiča, Pedro, Jacobo, Juan, jalla ninacžtan. Pakpaltan tsjii curu yawchiča. Nicju nii čhjepultanž yujcquiz Jesusaqui tsjemat chercherchiž cjissiča.

³ Niiž zquitiqui ancha llijatča. Ancha chiw kjatñižtakaztača. Anaž jec žoñimi nižta chiwi zquiti cjiskati atča.

⁴ Nekztan pucultan žoñinaca jeczquichiča; Elías nižaza Moisés cjitatača ninacaqui. Jesusižtan parličiča.

⁵ Nekztan Pedruqui Jesusižquiz paljaychiča:

–Wejt Tjaajiñi. Walikazza tekz žejlžqui. Čhjep chjujlli kjuya kjuyznasača, tsjiiqui amta tsjiiqui Moiesta, tsjiiqui Eliasta.

⁶ Nekztan nii tjaajinta žoñinacaqui ancha tsucchiča. Pedruqui čhjulut chiyi ana zuma tantiichucatača.

⁷⁻⁸ Nekztan ninacžquiz tsjiriqui urpuntichiča. tsewctan tsjirquiztan tsjii joraqui chiižquichiča:

–Wejt k'ay Majchča tiiqui. Tiižquiz nonžna.

Nekztan tjaajinta žoñinacaqui tjapa kjutñi chercherziča. Anazaka čhjulumi tjenčiča. Jesusapankaz želatča nii čhjepultan žoñinacžtan.

⁹ Jesusaqui nii curquiztan chjiwžquican ninacžquiz paljaychiča, tuž cjican:

–Ančucaž cherta ana jeczquizimi chiichiyaquiča. Weriž jacatattan, nekztan chichiyaquiča ančhucqui. Wejrqui tsewctan cuchanzquita Yooz Zoñtča.

¹⁰ Ninacpora pewcsarassiča:

–Čhjulut tii jacatatz puntu cjeejo?

Nižtami Jesusiž chiitacama ojkchiča.

¹¹ Nekztan Jesusižquiz pewcziča:

–Judiuž lii tjaajiñinacaqui cjiñiča, “Primiruqui Elías profetaqui tjonstanča”, nii. ĆKjažtiquiztan nižta chiiya?

¹² Jesusaqui kjaaziča, tuž cjican:

–Ultimupan Elías profetaqui primiru tjonchiča, tjappacha tjaczjapa. Nižaza cijjrta Yooz takuqui tuž cjiča, wejr tsewctan cuchanzquita Yooz Zoñž puntuquiztan. Tekziqui ancha sufrača wejrqui. Čhjaawjtaza iñartaza cjeeča.

¹³ Jaziqui wejr cjiwča, Eliasaqui tjonchila. Nekztan žoñinacaqui Elías ninacž muñañparu paachiča. Nužupan cijjrta Yooz takuqui cjiča Elías puntuquiztan. –Nuž cjichiča Jesusaqui.

ZAJRAZ TANTA UZA CHJETINTA

¹⁴ Nekztan parti tjaajinta žoñinacžquiz irantichiča. Nekzi muzpa žoñinacaqui želatkalča. Parti tjaajintanacžtan judiuž lii tjaajiñinacžtan ch'aazatkalča.

¹⁵ Tjappacha Jesusa cheržcu ispanti ch'uj cjichiča. Nekztan tsaani zajtchiča.

¹⁶ Jesusaqui pewcziča, tuž cjican:

ĆNinacžtan čhjulut chiyas?

¹⁷ Tsjii žoñiqui kjaaziča:

—Tjaajiñi Maestro, wejrqui wejt uza amquiz zjijcchinča. Zajraž luztan, upa cjissiča.

¹⁸ Jakziquinami zajraqi wejt uzquiz pankaz luzza. Nekztan t'uckatča. Nekztan yokquiz tjojtša. Atquiztan čh'utukaž jup'okiča. Izkekaž jojča. Ljajtikaž cjissa. Jaziqui amiž tjaajintanacžquiz rocchinča, zajra chjatkatajo. Ninacaqui ana chjatkati atchiča.

¹⁹ Jaziqui Jesusaqui kjaaziča:

—Ančhucqui, ana criiñi žoñinacčhucpanča. Ćhjuloracamat ančhucatan kamac wejrjo? Ćhjuloracamat ančhucatan awantac wejrjo? Nižtac nii uza zjijcžca.

²⁰ Nekztan nii uzac zjijctatača. Nii zajraqi Jesusa cheržcu uza t'uckatchiča. Nekztan nii uzaqui yokquiz tjojtšiča. Yokquizpacha zunt'ichiča, atquiztan čh'utu jup'okcan.

²¹ Jesusaqui ejpžquiz pewczyča:

—Ćhjuloratanpacha am uza laacjichitajo?

Niiž ejpqui kjaaziča:

—Koltallquiztanpacha.

²² Tii zajrapan wilta wilta tjojt tjojtskatčhani ujquizimi kjazquizimi ticskatzjapaqui. Am cunam atčhani. Tii kullžinalla. Okžnalla wejrnacqui.

²³ Nekztan Jesusaqui nii ejpžquiz chiichiča:

—Ćkjažtquiztan am nuž cjeejo, “Am cunam atčhan”, cjicanajo? Yoozquin tjapa kuzziz žoñiqui čhjulumipankaz atasacha.

²⁴ Nii uz ejpqui altu joržtan chiichiča:

—ĵTjapa kuzziz wejrqui! ĵJuc'anti Yoozquin kuzziz cjis yanapt'alla!

²⁵ Jesusaqui naychiča, muzpa žoñinaca ajcsquiñi. Nekztan zajra ujziča, tuž cjican:

—Zajra, amqui tii uza upa oñi cjiskatchamča. Wejrqui am mantuča. Tiižquiztan ulna. Anam iya tii uza tanaquiča.

²⁶ Nii zajraqi uza wilta t'uckatchiča. Nekztan ancha kjawcan, ulanchiča. Nii uza ticzižtakaz cjissiča. Nekztan jila parti žoñinacaqui chiichiča:

—ĵTiczila tii uzaqui!

²⁷ Nekztan Jesusac kjarallcu tanžcu žinziča. Nekztan nii uzaqui tsijtsiča.

²⁸ Nekztanac tjaajinta žoñinacaqui kjuy luzcu jamazit Jesusižquiz pewczyča, tuž cjican:

—Ćkjažtquiztan wejrnacqui ana nii zajra chjatkati atajo?

²⁹ Jesusaqui kjaaziča:

—Ana Yooztan parliscu ana ayunascu, anaž tii zajranacaqui chjatkati atasacha.

JESUSAQUI NIIŽ TICZ MAZINCHICHA

³⁰ Nekztanaqui Jesusaqui niiž tjaajintanacžtan ojkchiča Galilea yoka nuž. Ana žoñiž zizan nekz žejlz pecatča, niiž tjaajinta žoñinacžquiz iya tjaajinzjapa.

³¹ Tuž cjican tjaajinchiča:

—Wejrqui tsewctan cuchanžquita Yooz Zoñtča. Tsji žoñiqui wejr tarazunaž paaquiča, wejr tankatzjapa. Nekztan tantapal cjeeča. Contal cjeeča. Nekztan čhjep majquiztan jacatatača.

³² Tjaajintanacaqui Jesusiž takunaca ana cusa intintazi atchiča. Nižaza Jesusa iya pewcz eksiča:

—Ćkjažt cjiy, nii am takunacajo? —Nuž cjican, pewcz pecatča, pero.

ĶJEC ZOÑIT TUCQUINAQUI?

³³ Nekztan Capernaum cjita wajta irantichiča. Kjuyquiz luzcu Jesusaqui niiž tjaajintanaca pewczyča:

—ĶOjkcan ančhuc čhjuluča parliya?

³⁴ Nekztan anaž čhjulumi kjaaziča. Ojkcan tii puntu parlatča, “Ķject tucquinaqui cjes?” cjican.

³⁵ Nekztan Jesusaqui julziča. Niiž tuncapan tjaajinta zoñinaca kjawžcu, paljaychiča: —Jakzilat tucquinac cjis pecčhaj niiqui, wirquinpankaz cjis waquiziča. Mantapaaz-pankaz waquiziča.

³⁶ Jesusac tsjii uza kjawžcu, taypiquiz tsijtskatchiča. Nii uza žcojrziča, tuž cjican:

³⁷ —Jakzilta zoñit wejt laycu tsjii ocjala sirwičhaja, jalla niiqui wejr sirwiča. Nižaza anaž wejr alaja sirwiča; wejrž cuchanžquiñi nii zakaz sirwiča.

CRISTUZ FAVORA PAAÑI ZOÑI

³⁸ Nekztan Juanqui cjichiča:

—Tjaajiñi, am tjuužtan tsjii zoñiqui zajranaca chjatkatatča. Niiqui ana učumtan chica ojklayñiča. Nekztan wejrnacqui ujzinča, “Nižta anača paazqui”, cjican.

³⁹ Jesusaqui cjichiča:

—Ana nižta chiya. Jakzilta zoñit wejt tjuužtan tsjii milajru paačhaj niiqui, wejt quintra ana pjazila chiyaquiča.

⁴⁰ Jakzilta zoñižlaja ana učum quintra niiqui, učumnaca partizakazza.

⁴¹ Weraral chiyučha, ančhucqui Cristuž illzta zoñinacpančhucča. Jakzilta zoñit weriž cjen ančhucquiz tsjii kjazllami onančhaja, jalla niiqui nekztan ultimu juc'ant zamanaca tanznaquiča arajpachquin.

UJQUIZTAN CWITASA

⁴² Nekztan Jesusaqui tjaajinchiča, tuž cjican:

—Wejtquiz criichi zoñinaca žejlča, humilde kuzziz cjiñi. Jakzilta zoñit nižta criichi zoñinaca ujquiz tjojtskatačhaja, jalla niiqui ana wali paača. Nii paañi zoñž jorquiz pajk tjaaj mokžcu, koz kotquiz jacuntiz waquiziča. Jalla nižta tsjan cusaž cjesača nii zoñžtaqui.

⁴³ Am kjarat ujquiz tjojtskatz pecčhaj niiqui, pootzna. Infiernuquin pizc kjarchiz ojkzqui, nii ana waliž cjesača. Juc'anti cusaž cjesača tsjii kjarchizkaz arajpachquin luzqui. Infiernuquin ujqui wira ana tjesnasača.

⁴⁴ Infiernuquiziqui zoñi lujlñi lak'unacami anaž ticznaquiča. Nii asñi ujqui anaž wira tjesnaquiča.

⁴⁵ Nižaza am kjojchat ujquiz tjojtskatz pecčhaj niqiii, pootzna. Infiernuquin pizc kjojchchiz Yooz cuchnasaž niiqui, ana waliž cjesača. Juc'anti cusaž cjesača tsjii kjojchchizkaz arajpachquin ojkzqui. Infiernuquin ujqui wira ana tjesnasača.

⁴⁶ Infiernuquiziqui zoñi lujlñi lak'unacami anaž ticznaquiča. Nii asñi ujqui ana wira tjesnaquiča.

⁴⁷ Am čhujquit ujquiz tjojtskatz pecčhaj niiqui, leczna. Infiernuquin pizc čhujcchiz Yooz cuchnasaž niiqui, ana waliž cjesača. Juc'anti cusaž cjesača tsjii čhujcchizkaz arajpachquin ojkzqui.

⁴⁸ Infiernuquiziqui zoñi lujlñi lak'unacami anaž ticznaquiča. Nii asñi ujqui ana wira tjesnaquiča.

⁴⁹ Tjapa zoñinacaqui ujžtan tjacžtaž cjequiča. Zapa wilananacaqui yawcžtan tjacžtapanča, jalla nižta.

⁵⁰ Yacuqui zumača. ¿Yacuž lak'anznasaž niiqui, kjažt wilta ch'uyi cjisnasa? Yawcchizpanž ančhuc želaquiča. Porapat zumaž kamaquiča.

10

JALJTIZ PUNTU

¹ Nekztan Jesusaqui Capernaum wajtquiztan ulanžcu, Judea yokquin ojkchiča; nižaza Jordán cjita pujž najwctuñtan ojkchiča. Nicju muzpa zoñinacaqui wilta ajesiča. Nekztan Jesusaqui wilta tjaajinchiča, jaknužt tjaajiñitažlaj, nii.

² Fariseo žoñinacaqui tjonchiča, Jesusa ujquiz tjojtskatzjapa. Nekztan pewczyča, tuž cjican:

—¿Učhum liiqui kjažt cjeejo? ¿Tsjii luctakaqui persun tjunatan jaljtiz waquizasaya? Tjaajnalla.

³ Jesusaqui ninacžquiz pewczyča:

—¿Moisés cjita žoñiqui, jaknužt ančhucaquiz mantichiya?

⁴ Nekztan ninacaqui kjaaziča:

—Moisesaqui tuž mantichiča, “Tsjii luctakaqui certificado de divorcio tjaasača tjunatan jaljtizjapa. Nekztan jaljtasača.”

⁵ Nekztanaqui Jesusaqui chiižinchiča:

—Ančhuca chojru kuzziz cjen nuž mantitatača.

⁶ Niž tuquiqui ana nižta mantitatača. Tuqui timpuqui Yoozqui tjappacha paacan, žoñi paachiča luctaka maataka.

⁷ “Nižtiquiztan žoñiqui maa ejpžquiztan zarakaquiča, tjunatan kamzjapa.

⁸ Nekztan nii lucutiñi žoñiqui tsjiikaz cjissa”. Anaž iya pucultan žoñi, pero tsjiikazza.

⁹ Yoozqui tsjii lucutiñi cjiskatchiča. Nekztan lucutiñi žoñiqui anapan jaljtiz waquiziča.

¹⁰ Wiruñaquei niž tjaajinta žoñinacaqui kjuyquiz Jesusa jamazit pewczyča nii jaljtiz puntuquiztan.

¹¹ Jesusaqui kjaaziča:

—Jakzilta žoñit tjunatan jaljtizcu yekja maatakatan zalžaj niiqui, už paača, tuquita tjuna quintra.

¹² Nižaza jakzilta žont persun luctakžtan jaljtizcu, yekja luctakžtan zalžaj niiqui, użakaz paača, tuquita lucž quintra.

JESUSAQUI OCJALANACA K'AACHICHA

¹³ Tsjii nooj žoñinacaqui Jesusižquin ocjalanaca zjičchiča, kjaržtan lanznajo. Nuž zjičcan Jesusiž tjaajintanacaqui nii ocjala chjaawjchiča.

¹⁴ Nižta chjaawjñi nayžcu Jesusaqui žawjchiča. Nekztan tjaajinta žoñinacžquiz chiižinchiča, tuž cjican:

—Tii ocjalanacaqui wejtquiz tjonaj cjee. Anaž chjaajwa. Tii ocjalanacž kuzziz irata, jalla nižta žoñinacača Yooz wajtchiz žoñinacaqui.

¹⁵ Ultim wereral chiyučha, ocjalanacaqui maa ejpž mantitanaca cazza. Jalla nižta irata žoñinacaqui Yooz mantitanaca caz waquiziča. Ana cazaquiž niiqui, wira ana Yooz wajtchiz žoñinaca cjequiča.

¹⁶ Nekztan Jesusaqui ocjalanaca žcojržcu k'aachichiča. Zapa maynižquiz kjaržtan lanžcu:

—Yooz am wintijla, —cjichiča.

RICACH ZOÑIŽ QUINTU

¹⁷ Nekztanaqui žoñinacžquiztan Jesusaž zarakatan tsjii žoñiqui zati pariju tjonchiča, niž yujcquiz quillslaki. Nii žoñiqui cjichiča:

—Tjaajiñi Maestro, zumamž amqui. Yooztan wiñaya kamzjapaqui, ¿čhjul zumanacat wejr paasaya?

¹⁸ Jesusaqui kjaaziča:

—¿Kjažtiquiztan, “Zumamž amqui”, cjeejo? Anaž jec žoñimi zumaqui, Yoozpankazza zumaqui.

¹⁹ Amqui Yooz mantitanaca zizñamča: “Anača adulteriuquiz ojklayzqui. Anača conzqui. Anača tjañi cjisqui. Anača toscara chiizqui. Anača incallzqui. Am maa ejpča rispitzqui”.

²⁰ Nii žoñiqui kjaaziča:

—Tjaajiñi Maestro, koltallquiztanpacha tjapa tinaca caziñcha.

²¹ Jesusaqui nii zoñž kjutñi cherziča, k'aachtican. Nekztan cjichiča:

—Tsji cusasa pjaltiča amtaqui. Tjappacha am čhjultaki žejlñinaca tuzna. Poris zoñinaczquiz nii paaz ona. Oka jaziqui. Nekztan am arajpachquin juc'anti ricachum cjequiča. Nuž paažcu wejtquin tjona. Sufrijsjapa listu cjee. Nekztan wejttan chica ojklayñi cjequiča.

²² Walja ricachutača nii zoñiqui. Nekztan nii chiitiquiztan ancha upa kuz cjissiča. Llaquita ojkiča.

²³ Nekztan Jesusaqui tjapa kjutñi chercherziča. Nekztan tjajintanaczquiz paljaychiča, tuž cjican:

—¡Ricahunacztaqui walja ch'amača Yooz wajtchiz zoñinaca cjisqui!

²⁴ Niiž tjajintanacaqui Jesusaž chiitiquiztan ancha tsucchiča. Nekztanaqui Jesusaqui wilta paljaychiča, tuž cjican:

—Jilanaca. ¡Jakzilta zoñit tii wir cusasanaczquiz kuz tjaačhaja, jalla ninacztaqui walja ch'amača Yooz wajtchiz zoñinaca cjisqui!

²⁵ Tsjii camello cjita animala žejlča. Nii camelluqui ch'aman acuj cjuñquiz luzasača. Ricahunacazti tsjan ch'aman Yooz wajtquiz luzasača, Yooz mantita zoñinaca cjisjapa.

²⁶ Nii chiitiquiztan tjajinta zoñinacaqui juc'anti tsucchiča.

—¿Jequit liwriita cjesajo? —cjican, pewcsassiča.

²⁷ Jesusaqui ninaczquiz cherziča. Nekztanac cjichiča:

—Zoñiqui anaž persunpacha liwrii atasacha. Yoozpankazza liwriiñiqui. Yoozqui jecmi liwrii atasacha.

²⁸ Nekztan Pedruqui Jesusižquiz paljaychiča:

—Nonžna. Wejrnacqui tjappacha ecchinča, amtan chica ojklayzjapaqui.

²⁹ Nekztan Jesusaqui cjichiča:

—Weraral ančucaquiz cjiwča. Jakzilta zoñit Yooz tawk laycu wejt laycu kjuya, jilanaca, cullacanaca, maa, ejp, maatinaca, zkananaca, jalla ninaca ecačhaj niiqui,

³⁰ tii muntuquiz kjuyanaca, jilanaca, cullacanaca, maanaca, maatinaca, zkananaca, nižtanaca patac wilaž ninacztajapa želaquiča. Pero chjaawjta iñartazaž cjequiča. Jalla nuž cjenami, arajpachquin wiñaya Yooztan zuma kamaquiča.

³¹ Walja anzič tucquin zoñinacaqui wirquin cjisnaquiča ultimquiziqui. Nižaza walja anzič wirquin zoñinacaqui tucquin cjisnaquiča ultimquiziqui.

JESUSAQUI NIIŻ TICZ MAZINCHICHA

³² Nekztan Jesusaqui Jerusalén cjita wajtquin okatča tjajintanacztan. Jesusača ninacz tuqui ojkičiqui. Nii tjajinta zoñinacaqui tsucchi okatča. Nii parti apzñinacaqui ekscan okatča. Nekztanac Jesusac niiž tuncapan tjajintanaca kjawžcu, tsjii kjutñi chjitchiča. Nekztan jaknužt nižquiz watačhaja jalla nii mazinchiča.

³³ Jesusac cjichiča:

—Nonžna. Wejrqui tsewtan cuchanzquita Yooz Zoñtča. Jerusalén watjaž ojkiča učhumqui. Jalla nii wajtquin tarazuna paatal cjeeča. Timlu jilirinaczquiz nižaza judío tjajiniñaczquiz tantal cjeeča. Nekztan ninacaqui, “Ticzla tiiqui”, cjequiča. Nekztan yekja wajtchiz zoñinaczquiz intirjital cjeeča.

³⁴ Nekztan wejr munu paatal cjeeča. Llawsižtan tjujttal cjeeča. Wjajttal cjeeča. Ultimquiziqui contal cjeeča. Nekztan ticžcuqui čhjep majquiztanac jacatatača.

JACOBZTAN JUANZTAN

³⁵ Nekztanaqui Zebedeož majchnacaqui Jacobžtan Juanžtan Jesusižquin macjatchiča tuž cjican:

—Tjaajiñi Maestro, čhjulut amquiztan pecučhaj niiqui, tjaalla.

³⁶ Jesusaqui pewcziča:

—¿Ĉhjuluz pecya?

³⁷ Nii pucultan zoñiqui kjaaziĉha:

Ĉjuloram am tjappacha mantaĉhaj niiqui, wejrnac julskatalla, tsjiiqui žew kjuttan, tsjiiqui zkar kjuttan.

³⁸ Nekztan Jesusaqui cjichiĉha:

—Anĉhucqui tii mayta ana intintichiñĉhucĉha. Wejrqui tsjii wasu licznaĉha. Nižaza tsjii bautismo bautista cjeeĉha. ¿Jalla nižtapacha anĉhuc sufri atasajo?

³⁹ Ninacaqui kjaaziĉha:

—Atasaĉhay.

Nekztan Jesusaqui cjichiĉha:

—Wejr irata anĉhucqui tsjii wasu licznaquiĉha. Nižaza tsjii bautismo bautista cjequiĉha.

⁴⁰ Pero žewquiztan nižaza zkarquiztan julznaj cjiĉhaj niiqui, wejr ana nii atasaha. Jakziltižtažlaj nii julz tjacžta niiqui, ninacžtaž cjequiĉha.

⁴¹ Nekztan nii parti tunca tjaa jintanacaqui nuž nonžcu, žawjĉiĉha Jacobuž nižaza Juanž kjutni.

⁴² Nekztan Jesusaqui tjaa jinta zoñinaca kjawziĉha, tuž cjican:

—Anĉhucqui zizza. Tsjii nacionž chawjc jiliriĉqui nacion nužpachaž cazkatĉha. Tsjii c'ari patrunažtakaz cjissa jilirinacaqui. Jilirinacaqui tjapa zoñinaca rispitskatĉha.

⁴³ Anĉhuczi anaĉha nižta cjisqui. Jakziltat anĉhucaquiztan juc'ant chekan zoñi cjis pecĉhaj niiqui, partinacž piyuna cjis waquiziĉha.

⁴⁴ Jakziltat anĉhucaquiztan anĉha tucquin cjis pecĉhaj niiqui, tjapa zoñinacž man-tuquizpanž cjis waquiziĉha.

⁴⁵ Jalla nižtijapa wejr tjonĉinĉha. Tsewtan cuchanžquita Yooz Zoñtĉha. Pero ana zoñiž sirwita cjisjapa tjonĉinĉha. Antiz zoñinaca sirwisjapa tjonĉinĉha. Zoñinacž cuntiquiztan ticzjapami, zoñinaca liwriizjapami, niijapa tjonĉinĉha wejrqui.

ZUR ZOÑI ĈJETINTA

⁴⁶ Nekztan Jesusaqui Jericoquiztan ulanžquichiĉha tjaa jinta zoñinacžtanami tama zoñinacžtanami. Jicz latuquiz tsjii zur zoñi julzi želatĉha, tomangžcan. Bartimeo cjitataĉha, Timeož majch.

⁴⁷ Nii Nazaret wajtĉiz Jesusa macjatžquiñi nayžcu, nii zur zoñiqui kjawĉiĉha, tuž cjican:

—¡Jesusa, Davidž Majĉimĉha! ¡Wejr okžnalla!

⁴⁸ Nekztan zoñinacaqui nii zur zoñi ujsiĉha:

—¡Ĉh'uj žela! —cjican.

Nekztan nii zur zoñiqui juc'anti kjawĉiĉha:

—¡Davidž Majĉ, wejrpanž okžnalla!

⁴⁹ Nekztan Jesusaqui tsijtsiĉha.

—Nii zoñi kjawžca, —cjichiĉha. Zoñinacaqui nii zur zoñi kjawziĉha, tuž cjican:

—Tsijsna. Zuti cjee. Jesusaž am kjawža.

⁵⁰ Nekztan niiž zquiti kujtžcu, tjojtĉiĉha. Jesusižquin macjatiĉha.

⁵¹ Nekztan Jesusaqui nii zoñi pewciĉha:

—¿Ĉhjuluz pecya? ¿Kjažum wejr paljay-ya?

Nii zur zoñiqui kjaaziĉha:

—Tjaajiñi Maestro, anĉha zurtĉha wejrqui. Ĉerz pecuĉha.

⁵² Jesusaqui cjichiĉha:

—Am tjapa kuztan cjen žejtĉamĉha. Jazic oka.

Nii orapacha nii zoñž ĉhujquiqui cjetsiĉha. Ĉerñi cjissiĉha. Nekztan Jesusaž okan nii zoñiqui apziĉha.

11

JESUSAQUI JERUSALEN WATJA LUZZICHA

¹ Nekztanaqui pizc wajtquin irantichiča Tsjiiqui Betfagé cjitača, tsjiiqui Betania cjita. Jerusalén wajtž zcatillatača, Olivos cjita cur zanquiz. Jesusaqui tsjii pucultan tjaajinta žoñinaca tuqui cuchanchiča,

² tuž cjican:

—Jerusalén watja oka. Irantižcu tsjii mokžta aznu cheraquiča. Nii aznuqui ana zinta žoñiž yawztača. Jalla nii aznu jweržcu wejtquin zjijcaquiča.

³ Yekjap žoñiž pewcznanaqui, “¿Kjažtiquiztan nižta paa?” cjenaqui, ančhucqui tuž kjaaznaquiča, “Chawjc jiliriž pecča”, cjican. “Upaquiztan tii aznuc tjepuntaž cjequiča”.

⁴ Nekztan nii pucultanaqui ojkchiča. Tsjii aznu cherchiča, kjuy zanquiz mokžta; callquiztača. Nekztan ninacaqui aznu jwersiča.

⁵ Yekjap nekz žejlñi žoñinacaqui pewcziča:

—¿Kjažtiquiztan ančhuc nii aznu jwerjo?

⁶ Jesusiž chiitacama kjaaziča. Nužquiz nii žoñinacaqui cutziča.

⁷ Jesusižquin nii aznu zjijcchiča. Nekztan zquitinaca carunsiča, Jesusiž yawzjapa.

⁸ Yekjap žoñinacaqui ch'ojña ramuzanaca pootžcu, nii jiczquiz chjinchiča. Zquitinaca chjinchizakazza. Nuž paachiča rispitsjapa.

⁹ Jesusiž tucquin ojkñi žoñinacami Jesusiž wirquin apzñi žoñinacami tjappacha wiwchiča, tuž cjican:

—¡Viva tii Yooz tjuuquiz tjonchi žoñi! ¡Yooz wintijla!

¹⁰ ¡Tiiž mantaquiča, učum tuquita žoñiča David cjita, jalla nižta! ¡Yooz wintijla! ¡Viva učum Yooz!

¹¹ Jalla nužu Jesusaqui Jerusalén watja luzziča. Nižaza timpluquiz luzziča. Tjapa kjutñi chercherchiča. Nekztan tjuñiž zeziž cjen Betania cjita wajtquin ojkchiča niž tuncapan tjaajinta žoñinacžtan.

ANA FRUTCHIZ MUNTI

¹² Jakatažuqui Jesusaqui Betania wajtquiztan ulanžcan, čhjeri eecskatchiča.

¹³ Ažquiztan higer munti cherchiča, ch'ojña chjañchiz. Nii munti cherzñi ojkchiča, “Frutaj žejlž”, cjican. Nii munti irantan, chjañkaz želatča. Anatača frut timpu.

¹⁴ Nekztan Jesusaqui nii muntiž quintra chiichiča:

—Tii muntiquiztan anaž jecmi iya fruta lulaquiča.

Niž tjaajintanaqui nii chiita nonziča.

JESUSAQUI TIMPLU PEWZICHA

¹⁵ Nekztan Jesusaqui niž tjaajinta žoñinacžtan Jerusalén watja irantižcu timpluquiz luzziča. Nekztan timpluquiztan zawncchuc liwj tuyñi žoñinacami kjayñi žoñinacami tjirkatchiča. Paaz campiiñi žoñinacž mizami paloma tuyñiž zillami k'ala pjokžinchiča.

¹⁶ Jesusaqui nii timplu patiuran kužñi žoñinaca k'ala jarq'uichiča.

¹⁷ Nekztanac chiižinchiča, tuž cjican:

—Cjijrta Yooz takuqui tuž cjiča: “Wejt kjuyača Yooztan parlis kjuyaqui. Jakzilta žoñimi Yooztan parlasača tekziqui.” Ančhucqui tii timplu tjangz kjuyažtakaz paachinčhucča.

¹⁸ Nekztan timplu chawjc jilirinacaqui judio lii tjaajiñinacaqui nii quintu zizcu parličiča:

—¿Jaknužt tii Jesusa conas? —cjican.

Tjapa žoñinacazti Jesusiž tjaajintiquiztan ispantichiča:

—Ancha cusala, —cjican.

Nižtiquiztan nii quintri žoñinacaqui Jesusižquiztan eksñitača.

¹⁹ Tjuñiž kattan Jesusaqui wajtquiztan ulanchiĉha niž tjaajinta žoñinacžtan.

ANA FRUTCHIZ MUNTIQUI KJOÑCHIĉHA

²⁰ Jakawenztažuqui nii higer cjita munti wilta watchiĉha. Waaa, kjoñchi cherĉiĉha, žep'anacžquiztanpacha.

²¹ Pedruqui Jesusiž tuquita chiita taku cjuñžcu cjichiĉha:

—Tjaajiñi Maestro, cheržca. Amqui tii muntiž quintra chiichamĉha. Jaziqui kjoñchiĉha.

²² Jesusaqui kjaaziĉha:

—Yoozquiz tjapa kuztan cjee.

²³ Weraral cjiwĉha, jakzilta žoñit nii najwc curquiz, “Curu, tekztan zaraka. Pajk kotquiz luzca”, nuž cjican chiyasaž niiqui, nižtapachaž curu okasaĉha, ana paysnakasaž niiqui, tjapa kuztan cjesaž niiqui.

²⁴ Jaziqui anĉucaquiz chiyuĉha, ĉhjulumi Yoozquiztan mayizaquiz niiqui, tjaataž cjequičha, Yoozquin tjapa kuztanž cjee.

²⁵ Nižaza anĉucqui ĉhjulator Yoozquiztan mayisaja, nii orac anĉuca quintra žoñinacž uj pertunaquičha. Nekztan anĉuca Yooz Ejpqui anĉuca ujmi zakaz pertunaquičha.

²⁶ Anĉucqui ana žoñž uj pertunasaž niiqui, nižaza arajpach Yooz Ejpqui anĉuca ujnaca anazakaz pertunasaĉha.

¿JECT JESUSIZQUIZ MANTICHI?

²⁷ Nekztanaqui Jesusaqui Jerusalén watja wilta quejpcĉiĉha niž tjaajinta žoñinacžtan. Jesusaž timpluran ojklayan timplu jilirinacžtanami lii tjaajiñinacžtanami wajt jilirinacžtanami jalla ninacaqui Jesusižquin tjonĉiĉha.

²⁸ Nekztan pewcziĉha:

—¿Ject jilirit am mantichi, tii paazjapajo? ¿Jec jilirit am utchi jilirižtakaz paazjapajo?

²⁹ Jesusac nekztan kjaaziĉha:

—Wejrmi jazic anĉucaquiz zakal pewcznaĉha. Anĉucaž kjaaztan, wejr zakal anĉucaž pewcžtac kjaaznaĉha, jec jilirit wejr utchi, nii.

³⁰ Tiil pewcznaĉha anĉucaquiz. ¿Ject Juan mantichi, bautisjapajo? Yoozkaya už žoñej. Jazicž kjaazna.

³¹ Nekztanac ninacpora ancha ch'aasi kallantichiĉha, tuž cjican:

—¿Kjažum kjaaznaquejo? “Yooz mantitaĉha”, cjequiz niiqui, nekztan “¿Kjažtiquiztan anĉuc nii Juan ana criichinĉhuctajo?” nuž cjeĉhan tiicni.

³² Uĉhumqui anapanĉha chiyi atasaĉha, “Žoñiž mantitacha”, cjican.

Žoñinacaqui walja nii Juanžquin rispittiquiztan, cjichiĉha:

—Werara Yooz taku parliñi profetaĉha Juanqui.

Nižtiquiztan nii jilirinacaqui žoñinaca ekscu,

³³ ana kjaazñi atĉiĉha. Ninacaqui ĉiichiĉha:

—¿Jaknužukazlan? Nekztanac Jesusac cjichiĉha:

—Nižaza wejr ana zakal maznasaĉha, jec jilirit wejr utchi, nii.

12

ANA ZUM PIYUNANACZ QUINTU

¹ Nekztan Jesusaqui tsjii quintu paljayĉiĉha, tuž cjican:

—Tsjii žoñi želatĉha, patruna. Nii žoñiqui uwas zkala ĉhjacĉiĉha. Nekztan pajk uyu pirkichiĉha nii zkal muytata. Nižaza maz ojt paachiĉha, uwas kjaz spjiitzjapa. Nekztan campanturi cherĉi torre pirkichiĉha, zkala itzjapa.

‘Nekztan nii patrunaqui zkala partira tjaachiĉha piyunanacžquiz. Nekztan ažkquin ojĉiĉha.

² Nekztanaqui zkala ricujz timpuž tjontan nii patrunaqui tsjii piyuna cuchanžquichiča, niž partir zkala ricujzjapa.

³ Nii partira tanzñi žoñinacaqui patrunaž cuchanžquita piyuna tanžcu kijtchiča. Wjajtchiča. Ana čhjulchiz cuchanchiča patrunžquin.

⁴ Nekztan nii patrunaqui tsjižtan wilta cuchanžquichiča. Nii partira tanzñi žoñinacaqui nii patrunž piyuna maztan čhajcchiča. Achquiz chjojritchiča. Čhjaawjkatchiča.

⁵ Nekztan nii patrunaqui wilta tsjii piyuna cuchanžquichiča. Čhjep wiltiquiziqui piyuna conchiča. Nižta anawali paachiča tsjii kjaž cuchanta piyunanacžquiz. Partiqui wjajttatača. Partiqui contatača.

⁶ 'Iya tsjii želatča nii patrunž k'ay majch. Ultimquiziqui nii patrunaqui k'ay majch cuchanžquichiča, "Wejt majch rispitta cjequiča", cjican.

⁷ Nii partira tanzñi žoñinacazti ninacpora parlassiča tuž cjican, "Tsjii nooj tii majchqui ejpž irinsa tanznasača. Tii zkal yokanaca k'alaž ricujasača. Ojklay tiiž conla. Nekztan tsjii nooj učumnacaltaž tjappacha tii zkal yokanaca cjequiž, jalla".

⁸ Nekztanaqui nii majch tanžcu conchiča. Nekztan nii yokquiztan niž ticzi curpu jwescu, tjojtchiča.

⁹ Nekztan Jesusaqui pewcziča:

—¿Nii uwas zkalchiz patrunaqui, čhjulut paačhaja? Wejr cjiwcha, nii patrunaqui tjonaquiča. Nekztan nii partira tanzñi žoñinaca conaquiča. Nekztan niž uwas zkal yokanaca yekjanacžquiz tjaaquiča.

¹⁰ 'Ančhucqui Yooz taku liichinčhucča, ¿ana jaa? Tsjii Yooz takuqui tuž cjiča: "Kjuy pirkiñinacaqui tsjii maz tjojtchiča. Nii tjojta mazqui isquinqiz cjissiča. Ultimquiziqui tucquin cjissiča.

¹¹ Yoozqui nuž cjiskatchiča. Nii cheržcu ancha ispantichinčhumča". Nuž cjiča cijirta Yooz takuqui.

¹² Nekztanaqui nii quintri žoñinacaqui Jesusa tanz pecatča:

—Tii quintu wejtnaca quintraž, —cjican.

Nekztan nii žejlñi žoñinaca ekscu, quintri žoñinacaqui Jesusa ecchiča, ana kjaž cjiscu. Nužquiz ojkchiča.

TASA TJAAZ PUNTU

¹³ Yekjap fariseo žoñinacaqui Herodes žoñinacžtan cuchanžquitatača, Jesusa pewczñi. Niž čhiitiquiztan tsjii anazum taku jwes pecatča.

¹⁴ Jaziqui cjichiča:

—Tjaajiñi Maestro, zizuž wejrnacqui, am werarapan chiiñamča, žoñinacaž am quintra čhiichiz cjenami. Nižaza am taku anaj tsjii tsjii čhiichila žoñinacž laycu. Yooztan kamz puntuquiztan werarapan tjaajiñamča. Jazic tjaajznalla tii puntu. Wejrnacqui César cjita jiliržquiz tas paaz tjaayiñča. ¿Nuž walikazkay už anaž wali cjesaj? ¿Nii tas paaz tjaaz waquizasaya, už anaž waquizasaj, jaa?

¹⁵ Jesusaqui ninaca pizc kuzziz zizatča. Nekztan kjaaziča:

—¿Kjažtiquiztan ančhucqui wejr ujchiz jwes pecjo? Tsjii paaz zjijca, cherzjapa.

¹⁶ Tsjii paaz zjijcchiča. Nekztan Jesusac pewcziča:

—¿Tii paazquiz, jecz yujctaya? ¿Jecz tjuu cijjrtataya?

Ninacaqui kjaaziča:

—César cjita jilirž tjuučha. Niž yujcča niiqui.

¹⁷ Nekztan Jesusaqui čhiichiča.

—Čhjulumi jiliržta cjenauqui jiliržquiz tjaa. Nižaza čhjulumi Yoozta cjenauqui Yoozquiz tjaa.

Nuž čhiitiquiztan ninacaqui ancha ispantichiča.

JACATATZ PUNTU

¹⁸ Nekztan yekjap saduceo žoñinacaqui Jesusa chertzni ojkchiča. Jacatatz puntu ana criiñipantača. Jesusižquin macjatžcu pewcziča:

¹⁹ –Tjaajiñi Maestro, Moisesaqui učumnacalta cijjrtkalča, tuž cjican: “Tsjii žoñi ticnasaž niiqui, niž tjun ana ocjalchiz cjesaž niiqui, nekztan nii ticzi žoñž jilaqui naa žewatan zals waquiziča, nii ticzi jilž cuntiquiztan ocjala paazjapa”.

²⁰ Jaziqui pakallak jilazullca želatča. Nii jilir jilaqui zalsiča. Nekztan ticziča ana ocjalchiz.

²¹ Nekztan tsjii taypir jilaqui naa žewatan zalsizakazza. Nekztan ana ocjalchiz ticzizakazza. Nekztan yekja taypir jilaqui naa žewatan zalsizakazza. Nekztan ana ocjalchiz ticzizakazza.

²² Tjappach nii pakallak jilazullcanacaqui naa žonatan zalsiča. Nekztan tjappacha ana ocjalchiz ticziča. Ultimquiziqui naa žonqui ticzinča.

²³ Jaziqui žoñinaca jacatattanaqui wilta žeti tantanaqui ¿jakzilta jilž tjun naa žon cjequejo? Pakallakuqui naa žonatan zalsiča.

²⁴ Jesusaqui kjaaziča:

–Ančuca takuqui tsjii kjutni chiyiñchucpanča. Ančucqui Yooz takumi Yooz azimi anapan zizza.

²⁵ Ticzi žoñinacaž jacatattanaqui anaž zals želaquiča. Anaž tjojowami tur-takanacami zalznaquiča. Arajpach anjilanaca irataž kamaquiča.

²⁶ Jacatatz puntuquiztan Moisesaqui liwruquiz cijjrtkalča. Liichinčhucča, ¿ana jaa? Tsjii ujsni kalquiztan Yoozqui Moisesquiz paljaychiča, tuž cjican: “Abrahamž Yooztča wejrtča. Nižaza Isaacž Yooztča, nižaza Jacobž Yooztča”.

²⁷ Yooz Ejpqui anača ticzi žoñž Yoozqui, žejtñi žoñž Yoozqui. Nižtiquiztan ančuca takuqui ancha tsjii kjutni pankazza.

¿JAKZILTA YOOZ MANTITAT CHEKANAQUI?

²⁸ Nekztanaqui žoñinacžtan Jesusižtan ch'aasni nonžcu tsjii judiuž lii tjaajiñi žoñiqui macjatžquichiča. Jesusaž zuma kjaaztiquiztan nii žoñiqui pewczizakazza, tuž cjican:

–¿Jakzilta Yooz mantitat chekanaqui?

²⁹ Jesusaqui kjaaziča:

–Tii Yooz mantitača chekanaqui: “Nonžna ančucqui, Israeli wajtchiz žoñinaca. Tsjan chawjc jiliriča učum Yoozqui. Ana iya yekja Yooz žejlča. Yoozqui Jiliripanča.

³⁰ Ančucqui tii ančuca Yoozquiz tjapa kuztan sirwaquiča, nižaza tjapa animužtanami, nižaza tjapa pinsamintužtanami, nižaza tjapa aztanami”. Jalla nii Yooz mantitača chekanaqui.

³¹ Nižtazakaz nii jaru tii Yooz mantitac žejlča. Tuž cjiča: “Jaknužum persunpachquiz okžnamžlaja, jalla nižta okžni kuzziz cjistanča žoñinacžquizimi, lijitum mazižtakaz”. Tii pizc mantitanacača juc'ant chekanaqui čjul mantitanacquiztanami.

³² Nekztan nii judío tjaajiñiqui cjichiča:

–Tjaajiñi Maestro, werara chiichamča. Am chiitaqui cusača. Tsjii Yoozpankaz žejlča; ana iya želasača.

³³ Tii Yoozquiz sirwispanž waquizila, tjapa kuztan, nižaza tjapa animužtan, nižaza tjapa pinsamintužtan nižaza tjapa aztan. Nii jaruqui jaknužum persunpachquiz okžnamžlaja, jalla nižta okžni kuzziz cjistanča žoñinacžquizimi, lijitum mazižtakaz. Yoozquin ujta wilana puntu mantitami nižaza ofrenda tjaaz mantitami jalla nii mantitanacžquiztan tii pizc Yooz mantitanacača juc'ant chekanaqui.

³⁴ Nii judío tjaajiñi žoñiqui zuma intintazzi razunchiz čičiča. Nižta nayžcu Jesusaqui čičiča:

–Amqui Yooztan kamz jicz cježullača, Yooz mantita žoñi cjisjapa.

Nekztan žoñinacaqui iya pecunchi Jesusižquiz pewczni anaž atatča.

¿CRISTUQUI JECZ MAJCHTATA?

³⁵ Jaziqui Jesusaqui timpluquiz tjaajincan, cjichiča:

—Nii judío tjaajiñinacaqui tuž cjiča: “Davidž majchkazza Cristuqui”. ¿Kjažtiquiztan nuž cjeejo?

³⁶ Arajpach Yooz Espirituqui David chiikatchiča, tuž cjican:

“Yooz Ejpqui wejt chawjc jiliržquiz cjichiča: ‘Tsji ora wejrqui am kjojch koztan am quintri žoñinaca t'okskatača. Nii oracama wejt žew latu julzna’”.

³⁷ Jaziqui Davidaqui persunpacha cjichiča: “Chawjc jiliriča tiiqui”. ¿Nižtiquiztan jaknužt niž chawjc jiliri niž majchqui cjesajo? —Nuž cjichiča Jesusaqui.

Nii tama žejlñi žoñinacaqui Jesusiž taku nonz jutztziča.

JUDIO LII TJAAJIÑINACA

³⁸ Nižaza tjaajincan Jesusaqui cjichiča:

—Judío lii tjaajiñinaczquiztan cwitazaquiča. Ninacac tol zquitchiz ojklazj juz-tazñiča. Ninacaqui palazquiz tsaanskatzmi rispitskatzmi jalla niika pecñiča.

³⁹ Ninacaqui ajcz kjuyquiz tucquin julz pecñiča. Nižaza pjijstiquiz lujlcan ancha tucquin cjičjis pecñiča.

⁴⁰ Ninacpacha žewžewanaca t'akjiri cjiskatñiča. Nižaza žoñinaca incallzjapa ažka Yooztan parlitazoka cjiñiča. Jaziqui ninacaž juc'anti casticta cjequiča.

OFRENDA PUNTU

⁴¹ Nekztan Jesusaqui ofrenda tjaaz cajun yujcquin julziča. Nekzi žoñinaca paaz uchan cherchiča. Yekjap ricachunacaqui muzpa paaz utchiča.

⁴² Nekztan tsjaa poris žewqui tjonchinča. Pizc paazalla utchinča, koluculla.

⁴³ Jalla nekztanaqui Jesusaqui niž tjaajinta žoñinaczquiz kjawziča. Nekztan intintiskatchiča:

—Weraral chiyuča, naa poris žewqui nii cajunquiz juc'anti utchinča, tjapa nii parti žoñinaczquiztan cjen.

⁴⁴ Nii parti žoñinacaqui čhjetinta paaz utchiča. Naa poris žewzti tjappacha naatan kamñi paaz utchiča.

13*JUDIO TIMPLUZ PUNTU*

¹ Nekztan timpluquiztan ulnan tsji tjaajinta žoñiqui Jesusižquiz paljaychiča, tuž cjican:

—Tjaajiñi Maestro, cheržca. Tii pajk maznacami tii pajk kjuyanacami ancha cusača.

² Jaziqui Jesusaqui nižquiz chiichiča:

—Tii pajk kjuyanaca cherča amqui. Wejrqui cjiwča, tsji nooj ana zinta tii maznacaqui pirkita želaquiča. Tjappacha pajlžtaž cjequiča.

TII MUNTU TUCUZINZ PUNTU

³ Nekztan Olivos cjita curu ojkičiča, timpluž zanquiz. Nekzi Jesusac julzi želatča; ana iya žoñi želatča. Nekztan Pedružtan, Jacobožtan, Juanžtan, Andrestan, ninacaqui Jesusižquiz pewcziča, tuž cjican:

⁴ —Maznalla wejtnacaquiz. ¿Čhjulorat nii amiž chiita wataquejo? ¿Ima amiž chiita watan, čhjulunacat wataquejo?

⁵ Nekztan Jesusaqui kjaaziča:

—Ančhucqui persunpachquiz cwitaza, anača jeczquizimi incallskata.

⁶ Žoñinacaqui wejt tjuu aynakcanž tjonaquiča, tuž cjican: “Wejrtča Cristutqui”, Jalla nekztanaqui muzpa žoñinacaqui incallskataquiča.

⁷ 'Ančhucqui quintunaca nonznaquiča, quira žejlz quintunaca, ch'ajwa quintunaca. Nekztan anača tsucaquiča ančhucqui. Nižtapanž wataquiča. Tii muntu tucuzinzqui imaž irjatžquiča.

⁸ Nacionporaž kichjasaquiča. Wajtporaž kichjasaquiča. Tjapa kjutni yokac chjeknaquiča. Mach'anaca želaquiča. Zoñipora kichjasaquiča. Ancha zoñinaca t'akjisaquiča tjapa kjutni. Sufrišnaca uzcakaž kalla. Wiruñac juc'ant sufrišnaca želaquiča.

⁹ 'Ančhucqui persuna waljaž cwitazaquiča. Zoñinacaqui ančhuc tanžcu jilirinacžquin chjichaquiča. Nekztan ajcz kjuyquiz wjajszakaz cjequiča ančhucqui. Weriz cjen chawjc jilirž yujcquizimi wajt jilirž yujcquizimi apantitaž cjequiča. Nekztan wejt puntuquiztan ninacžquiz maznaquiča ančhucqui.

¹⁰ Ima tii muntuž tucuzan, Yooz takuqui tjapa nacionquin maz maztaž cjequiča.

¹¹ Chjulorat ančhucqui jiliržquiz apantita cječhaja, jalla nii ora anača eksnaquiča, ¿kjažt wejr cjeequejo? —cjicanaqui. Nižaza anača ancha čhjulu chiismi pinsaquiča ančhucqui. Nii oraqui Yooz ančhucaquiz tjaajznaquiča, čhjul takut chiyačhaja, nii. Ančhuca persun pinsita inapankazza. Nii oraqui Yooz Espirituqui ančhucaquiz chikataquiča.

¹² Tsjii jilaqui persun jila tarasunaquiča conkatzjapa. Ejpnaqui persun maati tarasunaquiča conkatzjapa. Maatinacami maa ejpž quintra tsijtsnaquiča conkatzjapa.

¹³ Ančhuc weriz cjen tjapa zoñinacaž chjaawjtaž cjequiča. Jakzilta zoñit ticzcama wejtquiz tjurt'ačhaja jalla niiqui liwriitaž cjequiča.

¹⁴ 'Daniel cjita Yooz taku parliñi profetaqui cjiirtkalča, tuž cjican: "Tsjii nooj tsjii juc'ant anawal akni zoñi želaquiča". Jakziquin niiqui ana žejlsalaja, nicjuñ želaquiča tii anawaliqui. Chjulorat ančhucqui nižta cheračhaja, nii ora curunacquin atipas waquiziča tjapa Judea yokquin žejlñinacaqui. Liiñi zoñiqui intintazla.

¹⁵ Nii kjuy juntuñ žejlñi zoñinacaqui chjijwžcu ana kjuya luzla, čhjulumi chjichi jwesjapa.

¹⁶ Nii zkalquin žejlñi zoñinacaqui ana kjuya quejpla, zquiti apti.

¹⁷ Nii timpuquiziqui ic maatakanacami k'azllu wawchiz maatakanacami ancha t'akjiri cjequiča.

¹⁸ Yoozquinča mayiza ančhucqui, anaj zak timpuquin tižtanacac tjonla, nii.

¹⁹ Tii sufriš timpu yekja sufrišnacquiztan juc'anti sufriš cjequiča. Tuqui timpuqui Yoozqui tii muntu paachiča. Nekztan jecchuc anapanž tižta sufrišnacac watchiqui. Tekztan najwčhuc anaž iya juc'anti sufrišqui cjequiča.

²⁰ Yoozqui anaž tii sufrišnaca tucuskataquiž niiqui, tjapa zoñinacaž ticznaquiča. Yoozqui niž illzta zoñinacž cjen tii sufrišnaca tucuskataquiča.

²¹ 'Nižaza yekjap zoñinacaqui ančhucaquiz chiyaquiča: "Chera. Ticjuča Cristuqui". Yekjapac chiyaquiča: "Nacjuča Cristuqui" cjican. Nuž chiichiž cjenami, anapanča nii taku criyaquiča ančhucqui.

²² Incallni zoñinacaž tjonaquiča. Tsjii incallñinacaqui: "Cristutča wejrqui", cjequiča. Yekjapazti: "Yooz taku parliñtča wejrqui", cjequiča. Ninacaqui walja ispantichuca milajrunacaž paaquiča, incallzjapa. Tjapa zoñinacaž incallz pecaquiča, Yooz illzta zoñinacami.

²³ Ima tižtanacaž tjonan wejrqui ančhucaquiz mazinchiñča. Nižtiquiztan walja cwitazaquiča ančhucqui. Nižta kuzziz cjee.

¿JAKNUŽT CRISTUQUI TJONAQUI?

²⁴ 'Nekztanaqui tii sufriš timpu wattan, tjuñiqui zumaquiča. Nižaza jizmi anaž iya kjanaquiča.

²⁵ Warawaranacami tsewctan tjojtsnaquiča. Tseecu azziz žejlñinacaqui chjekinskataž cjequiča.

²⁶ Jalla nekztanaqui zoñinacaqui tii tsewctan cuchanžquita Yooz Zoñiž cheraquiča. Wejrqui tsjir taypiquiz tjonacha, walja aztan, ancha ispantichuca.

²⁷ Nekztanaqui tjapa kjutni nii arajpach Yooz anjilanacaqui cuchanta cjequiča, weriž illztanaca juntjapžcajo. Tjapa yok tjiyquiztanpacha tjapa arajpach tjiyquiztanpacha juntjapžtaž cjequiča.

²⁸ 'Ančhucqui tii puntu zizaquiča higuera cjita muntiquiztan. Chjulorat nii muntiqui ch'ojñantis cjissaja, jalla nii ora waj kutunz timpu žcatiča. Nužupanž zizza ančhucqui.

²⁹ Jalla nižtapacha tii weriž chiita watan, ančhucqui tuž zizaquiča; tii tsewctan cuchanžquita Yooz Zoñiqui wajillaž tjonacuica, nii. Nižaza tii muntu tucuzinzqui žcatillača.

³⁰ Weraral cjiwča, tjapa tii timpuquiz žejlñi zoñinacaqui ana ticznaquiča, ima tii weriž chiita watan.

³¹ Arajpachami yokami tucuzacuica. Wejt takunacazti wiraž ana tucuzacuica. Nužupanž cumplisnacuica.

³² 'Wejt tjonz tjuñimi wejt tjonz orami anaž jecmi zizasacha, anaž nii arajpach Yooz anjilanacami, anaž Yooz majchmi. Yooz Ejp alajakaz zizza.

³³ 'Ančhucqui, persuna naazna, cwitaza, Yoozquin mayiza. Chjulorat nii tjuñi tjonachaja, nii ora ana zizza ančhucqui.

³⁴ Jalla tii quintuž iratača wejt tjonz tjuñi. Tsjii zoñiqui ažkquin ojkz tantiichiča. Ima niž kjuyquiztan zarakcan zapa mayni niž piyunanacžquiz langz tjaača. Kjuy cwitiñi zoñžquiz zuma cwitajo mantiča.

³⁵ Nekztan ojkžcu, čjulorat nii kjuychiz zoñiqui quepačhaja, jalla nii ora, piyunanacaqui ana zizza, niit už zeztan tjonachaja, niit už chica arama tjonachaja, niit už kjantat ora tjonachaja niit už wentan tjonachaja. Chjulorat tjonachaja, ninacaqui anaž zizza. Nižtiquiztan piyunanacaqui listuž cjila.

³⁶ Jalla nii irata ančhucqui listuž cjee. Tiripintit ančucaž tjajan tjonasacha.

³⁷ Wejrqui ančhucquizimi tjapa zoñinacžquizimi chiyuča, listupanča cjee.

14

¿JAKNUŽUM JESUSA TANAS?

¹ Puc majkaz pjaltiča pascu pijztiquinaqui. Nii orazakaz yekja pijztaqui kalltiznatča, ana liwaturchiz t'anta lujlž pijzta. Jalla nii ora timplu jilirinacžtan judio tjaajiñinacžtan palt'ichiča, tuž cjican:

—¿Jaknužum Jesusa incallžcu tanas?

Nižaza nuž tanžcu, Jesusa conzjapa kazziča.

² Ninacaqui tantiižcu, cjichiča:

—Pijztiquiz anaž tanz waquizasacha. Zoñinacaqui učhum quintraž cjisnasacha.

JESUSIZ ACHQUIZ ASIITI ALZTA

³ Jesusaqui Betania cjita wajtquiz želatča, Simonž kjuyquiz. Nii Simonaqui tuquitan mojkchi janchichiz žejlñitača. Nekzi lulan tsjaa maatak žonqui tsjii putillžtan tjonzinča. Nii putillquiz cusa mazk'a ulurchiz asiiti želatča, nardo cjita, ancha jila walurchiz. Nii putillaqui zuma alabastro cjita maztan paatatača. Nekztan naa maatak žonqui putilla kjolžcu Jesusiž achquiz asiiti alsinča.

⁴ Yekjap nekz žejlñi zoñinacaqui žawjziča. Ninacpora palt'ichiča, tuž cjican:

—¿Kjažtiquiztan nii mazk'a ulurchiz asiiti pertejo?

⁵ Naalaqui asiiti tuysalani quinsa patac denario cjita paazuñ. Nekztan nii paazqui poris zoñinacžquiz onansalani.

Naaža quintra chutchiča.

⁶ Nekztan Jesusaqui chiichiča:

—¿Kjažtiquiztan taa žonatan chjiicjisejo? Anača taa žon kjaž cjisqui. Wejtquiziqui walika paachinča.

⁷ Poris žoñinacami panž žejlča. Chjulorami ninacžquiziqui yanapasača. Wejrqui anal ančucatan tira želača.

⁸ Taa žonqui jaknužt payi atčhaja, nii paachinča. Ima wejt curpu tjatan asiitižtan alsinča.

⁹ Chekpacha weraral cjiwča, jaksiquinami tjapa kjutñimi Yooz taku parlita cječhaja, jalla nicju taaža paata parlita cjequiča, taa maatak žon cjuñznajo.

JUDASQUI JESUSA TANKATZ PINSICHICHA

¹⁰ Nekztanaqui Judas Iscariotiqui timplu jilirinacžquin palt'i ojkchiča. Jesusiž tuncapan tjaajinta žoñinacžquiztantača Judasqui.

¹¹ Judas taku nonžcu jilirinacaqui ancha chipchiča:

—Paaz tjaasača, —cjican.

Nekztanaqui Judasqui tantiichiča, čhjulorat wali cječhaja, Jesusa tankatzjapa, nii.

PASCU ČJERI LUJLCHICHA

¹² Pjijzta kallni tjuñi, ana liwaturžtan t'anta lujlz pjijzta, nii tjuñi judio wajtchiz žoñinacaqui pascu uuza conñiča. Nii nojpacha tjaajinta žoñinacaqui Jesusižquiz pewcziča:

—¿Jakziquin wejrnacqui ojkz waquiziya, pascu čhjeri luli tjaczjapaya?

¹³ Nekztan Jesusaqui pucultan tjaajintanaca cuchanchiča, tuž cjican:

—Wajtquin oka. Nekzi tsjii žoñžtan zalaquiča kjaz luuz kužži. Nii žoñž wirquiz apznaquiča.

¹⁴ Jakziquin nii žoñiqui luzačhaja, jalla nicju nii kjuychiz žoñžquiz paljayaquiča, tuž cjican: “Tjaajiñiqui cjichiča: ¿Jakziquin wejt tjaajintanacžtan pascu čhjeri lulasaya? ¿Jaknit nii kjuyajo?”

¹⁵ Nekztan nii kjuychiz žoñiqui tsewcta pisuquin tsjii pajk kjuya tjeeznaquiča ančucaquiz. Nii kjuya listu tjaczta cjequiča. Jalla nicju učhumqui čhjeri kismaquiča. —Nuž mantichiča Jesusaqui.

¹⁶ Nužquis nii pucultan tjaajintanacaqui zarakchiča. Watja ojkchiča. Jesusiž chiitacama nižtapacha watchiča. Nekztanaqui pascu čhjeri kissiča.

¹⁷ Tjuñiž kattan Jesusaqui tjonchiča tuncapan tjaajintanacžtan.

¹⁸ Čhjeri lujlcan Jesusaqui chiichiča:

—Weraral cjiwča, ančucaquiztan tsjii wejttan lujlñiqui wejr tarazunaquiča.

¹⁹ Ninacaqui nužquiz llaquita cjissiča. Nekztan ninacaqui Jesusižquiz pewcziča. Tsjiiqui:

—¿Wejrkay? —cjichiča.

Tsjiiic:

—¿Wejrkay? —cjichizakazza.

²⁰ Nekztanac Jesusac kjaaziča:

—Tuncapaniž ančucqui tsjiiqui wejr tarazunaquiča. Anziqui niiča wejttan chica čhjeri lujlchi.

²¹ Wejrqui tsewctan cuchanžquita Yooz Zoñtča. Wejr okača, Yooz taku cjiirtacama. Jakziltat wejr tarazunačhaja, jalla niiqui juc'anti castictaž cjequiča. Nii tarazuñi žoñiqui anaj maa pjuchquiztan nastčhaj niiqui, juc'ant cusaž cjitasacha.

²² Nekztanaqui čhjeri lujlcan, Jesusaqui t'anta tanžcu Yoozquin gracias cjican chiichiča. Nekztan t'anta kjolžcu, tjaajintanacžquiz tojziča, tuž cjican:

—Tanzna. Tii t'antača wejt curpu cuntaqui.

²³ Nekztan tsjii wazu tanziča. Yoozquin gracias cjican chiichizakazza. Nekztan ninacžquiz tjaatan, tjappacha ninacaqui nii wazquiztan licziča.

²⁴ Jesusaqui chiichiča:

—Wejt ljocquiztan cjiča tiiqui. Wejt ljocžtan tsjii ew acta tjulžta cjequiča. Wejt ljocqui tjapa žoñinacz cuntiquiztan tjawktaž cjequiča.

²⁵ Weraral cjiwčha, uwas kjaz ana iya licača, čjulorat Yooz tjapa mantachaja, jalla nii oracama.

PEDRUQUI JESUSA ANA PAJŇI TUCAQUICHA

²⁶ Tsjii Yooz wirsu itscu ojkchiča Olivos cjita curullquin.

²⁷ Nekziqui Jesusaqui chiichiča:

—Tii weenaqui tjapa ančhucqui ana wejtquin kuzziz tucaquiča. Nižtapan cijjrta Yooz takuqui cjiča:

“Wejr arajpach Yoozqui awatiri conača. Nekztan uuzanacaqui wichansnaquiča”.

²⁸ Jesusaqui cjichizakazza:

—Nekztan jacatatžcuqui ančuca tuqui okjayača Galilea cjita yokquin

²⁹ Nekztan Pedruqui chiichiča:

—Tjappacha ana amquin kuzziz cječhani. Wejrqui ana wira nižta cjesača.

³⁰ Jesusaqui kjaaziča:

—Weraral cjiwčha, tii weenpacha amqui ana wejr pajñi tucaquiča, Ima wallpaž pizc wilaž kjawan, amqui čjep wila wejr ana pajñim chiyaquiča.

³¹ Pedruqui juc'anti tjurt'ichiča, tuž cjican:

—Wejrqui amtan chicami waztal ticznasača. Anapan amquiztanac zarakasača.

Tjapa nii tjajintanacaqui nižtapacha tjurt'ichiča.

JESUSAQUI YOOZTAN PARLICHICHA

³² Nekztan Getsemaní cjita yokquin ojkchiča. Nicju Jesusaqui niž tjajinta žoñinaczquiz chiichiča:

—Tekzi julzna. Wejrqui Yooztan parli okača.

³³ Nekztan Pedružtan Jacobžtan Juanžtan čjitchiča. Jesusaqui walja llaquita kuzziz turwaysiča.

³⁴ Niž tjajintanaczquiz paljaychiča:

—Wejt kuzqui ancha llaquita, ticzucača. Ančhucqui tekzi žela. Wilazaquiča; anača tjajaquiča.

³⁵ Nekztan tsjii koluc tuquinalla ojkchiča Jesusaqui. Yokquizkaz tuzi t'okziča. Yoozquiztan mayizichiča, tuž cjican:

—Tii juc'ant sufris timpu anal wats pecučha. Tii sufrisquiztan liwriychucažlaj niiqui, amquiž liwriyalla.

³⁶ Tira maycan cjichiča:

—Yooz Ejp, amqui čjulumpipankam atasacha. Tii sufrisnacquiztan liwriyalla. Pero anal wejt kuzcama paaz pecučha. Jaknužt am kuz amtičhaj niiqui, jalla nuž am munañpaj cjila.

³⁷ Nekztanaqui tjajintanaczquin quejpžquichiča. Tjajchi zalchiča. Nekztanaqui Jesusaqui Pedružquiz cjichiča:

—¿Simona, amquim tjajya?

³⁸ ¿Anam tsjii orami wilazi atya? Wilaza. Yoozquiztan mayiza, ana ujquiz tjojtzjapa. Ančhucqui ancha kuztanča. Pero ančuca curpužti anaž awantasača.

³⁹ Nekztan Jesusaqui wila Yooztan parli ojkchiča. Tuquiqui jaknužt parlichaja, nižtazaka parlichica.

⁴⁰ Wila tjajintanaczquin quejpžquichiča. Wila tjajchi zalchiča. Ancha tjaji atipskatchiča. Ninacaqui Jesusižquiz ana kjaazñi atchiča.

⁴¹ Jalla nekztan Jesusac čjep wila ojkžcu quejpžquichiča. Nekztan chiichiča:

—Jaziqui tjaichinčhucča, ančhucqui, nižaza jeejzinčhucča. Nužukaz. Wejrqui tsewctan cuchanžquita Yooz Zoñtča. Wejrqui ujchiz zoñinacž kjarquiz tankattal cjeeča. Nii ora anziqui irjatžquichiča.

⁴² Zaazna. Ojkla. Cheržna. Wejr tarazuñi zoñiqui nii nacjuž tjonča.

JESUSAQUI TANTATACHA

⁴³ Nii ora Jesusaž nuž chiyen, tsjiiqui tuncapan tjaajinta zoñinacžquiztan tjonchiča, Judas cjita. Tama zoñinacaqui Judastan tjonchiča pajk cuchillunacchiz, nižaza wjajtz carotinacchiz. Timplu chawjc jilirinacžtan judío lii tjaajiñinacžtan wajt jilirinacžtan ninacaž cuchanžquita tjonchiča.

⁴⁴ Tuquitan nii tankatñi Judasqui kazziča Jesusa tankatzjapa. Nuž kazcu, cjichiča:

—Tsjii zoñil chjulznača. Niiž niic cjequiča. Nekztan zuma tanžcu chjichaquiča.

⁴⁵ Nii ora Judasqui Jesusižquiz macjatchiča:

—Tjaajiñi Maestro, —cjican.

Nekztan nii chjulziča.

⁴⁶ Nekztan zoñinacaqui Jesusa tanchiča, preso chjitzjapa.

⁴⁷ Tsjii nekz tsijtchi zoñiqui pajk cuchillu jwessiča. Jalla nekztan tsjan chawjc jilirž piyuna chjojritchiča. Tsjii cjuñi pootžcu apakchiča.

⁴⁸ Nekztan Jesusac chiichiča:

—Ančhucqui cuchillunacžtan carotinacžtan wejr tani tjonchinčhucča, tsjii tjañi cjes, nižtažtakaz.

⁴⁹ Zapuru ančhucaltan žejlchinča, timpluquiz tjaajincan. Wira ana wejr tanchinčhucča. Pero anziqui jaknužt Yooz taku chiičhaja, nužupanž cumplita cjila.

⁵⁰ Nekztanaqui tjapa niiž tjaajinta zoñinacaqui tsucaña wichanziča. Jesusa zinalla eclichiča.

⁵¹ Tsjii tjowaqui Jesusa apziča, tsjii zquiti irzi. Nii tjowac tantazakaztača.

⁵² Nekztan nii zquiti cutžcu, k'alapacha tsucaña atipchiča.

JESUSA CHAWJC JILIRINACZQUIN CHJICHTA

⁵³ Nekztanaqui Jesusaqui chjichtatača timplu tsjan chawjc jilirž kjuya. Nekziqui timplu chawjc jilirinacžtan wajt jilirinacžtan judío lii tjaajiñinacžtan ajczitača.

⁵⁴ Pedruqui ažquiztan apziča, chawjc jilirž kjuy patio luzcama. Nii patiuquiz zultatunacžtan julzi želatča, uj latuquiz kutuncan.

⁵⁵ Kjuyquiziqui timplu jilirinacaqui tjapa jiliri mazinacžtan Jesusiž quintra chiiñi zoñi kjuratča, Jesusa conta cjisjapa. Ana zinta uj wajtchiča.

⁵⁶ Muzpa tama zoñinacaqui Jesusiž quintra toscara chiichiča. Pero ninacž toscar takuqui anaž wira casatča.

⁵⁷ Yekjap zoñinacaqui tsijtscu toscara chiichiča, tuž cjican:

⁵⁸ —Wejr nonziñča, tii zoñi tuž chiiñi, “Tii zoñiž kjuyta timplu pajlznača. Nekztan čhjep majquiztan yekja timplu kjuyača, ana zoñiž kjuyta”. Nuž chiiñi nonzinča wejrqui.

⁵⁹ Anaž nižtami zoñinacž takuc casatča.

⁶⁰ Ultimquiziqui nii timplu chawjc jiliri qui tsijtsiča zoñinacž taypiquiz. Jesusižquiz pewcziča:

—¿Anam kjaazñi at, kjažtatajo? ¿Kjaž cjican am quintra chii tii zoñinacajo?

⁶¹ Jesusaqui ana čhjulu tawkžcu, želatča, ana kjaaziča. Nekztan nii tsjan chawjc jiliri qui wilta pewcziča:

—¿Amqui Cristumkaya? ¿Arajpach Yooz Machimkaya?

⁶² Jesusaqui kjaaziča:

—Jesalla. Wejrtča Cristutqui. Wejrqui tsewctan cuchanžquita Yooz Zoñtča. Tsjii nooj ančhucqui wejr cheraquiča, juc'anti azziz Yooz latuquiz julzi. Nekztan arajpachquiztan tsjirquiz tjonča.

63 Nižta chiitiquiztan nii timplu chawjc jiliriqúi niž zquiti wjajrzinchiča, zawjchi tjeezjapa. Nekztan cjichiča:

—¿Kjažtiquiztan iya quintra chiiñi žoñi pecasajo?

64 Ančhucqui nonzinčhucča. Tiiž takuqui Yooz quintrača. Ana walipanča. ¿Chjulučhum paaqui, kjažum cjeequi? ¿Tantiyalla?

Nekztan tjappacha quintra chiichiča:

—Tii žoñi contaj cjila, —cjican.

65 Nekztan yekjapaqui Jesusižquiz llawsižtan tjujtchiča, wjajtchizakazza. Nekztan niž yujc pañžtan tjožinžcu, cjichiča:

—¡Pajalla, jaziqúi! ¿Ject am wjajtchejo?

Nižaza zultatunacaqui Jesusiž yujcquiz čhajcziča.

PEDRUQUI JESUSA ANA PAJÑI TUCCHICHA

66 Nii ora Pedruqui kjuy patiuquiz želatča. Nekzi tsjaa žonqui tjonchinča. Naa žonqui timplu tsjan chawjc jilirž piyunitača.

67 Pedruž uj latuquiz kutnan, cherchinča. Nekztan paljaychinča:

—Amqui nii Nazaret wajtchiz žoñžtan chica ojklayñamla, nii Jesusižtan.

68 Pedruqui Jesusa ana pajñi chiichiča:

—Nii žoñi anal pajuča. Am takumi anal intintučha.

Nuž chiižcu, zancu ulanchiča.

69 Nicju naa žonqui wilta cherchinzakazza. Nii žejlñi žoñinacžquiz maazinča, tuž cjican:

—Tii žoñi ninačžtan chica ojklayñi.

70 Pedruqui wilta Jesusa ana pajñi chiichiča. Nekztan tsjii upaquižtan nii žejlñi žoñinacaqui Pedružquiz cjichizakazza:

—Chekapan amqui ninačžtan chica ojklayñi žoñimla. Amqui Galilea wajtchiz žoñimla. Nii žoñinacž irataž chiiñamla.

71 Nekztan Pedruqui juramintužtan chiichiča, tuž cjican:

—Wejr toscara chiichinžlaj niiqui, Yooziž castictal cjila. Tii amiž chiita žoñi ana wira pajuča.

72 Pizcquizic nii orapacha tsjii wallpaqui kjawchiča. Nekztanaqui Pedruqui Jesusiž chiita taku cjuñziča. Tuž mazinchitača, “Ima wallpaž pizc wлтаž kjawan, amqui čhjep wлта wejr ana pajñim tucaquiča”. Nekztanaqui Pedruqui nii cjuñžcu, ancha llaquita cjissiča. Nekztan ancha kaachiča.

15

JESUSA PILATUZQUIN CHJICHTA

1 Kjantati timplu chawjc jilirinacžtan wajt jilirinacžtan judío lii tjaajiñinacžtan tjap-pacha jilirinacžtan ajczitača. Nekztan Jesusa čhejlžcu Pilato jiliržquin chjitchiča. Nekztan nižquiz intirjichiča.

2 Nekztan Pilatuqui pewcziča:

—¿Am judionacž chawjc jilirimya?

Jesusaqui kjaaziča:

—Nužupanzača, amiž chiitacama.

3 Nekztan nii timplu jilirinacaqui Jesusiž quintra čhjultaki tjojtunchiča.

4 Pilatuqui pewczizakazza:

—¿Kjažtiquiztan am ana kjaazñi atjo? Tjapamanaž am quintra chiila, pero.

5 Jesusaqui ana čhjulu tawkžcu želatča. Nužquiz Pilatuqui ana iya čhjulumi chiižiñi atchiča.

ZOÑINACAQUI JESUSIŽ QUINTRA CHIICHICHA

⁶ Pilatuqui pascu pjiiztiquiz tsjii piriz zoñi cutzñipantača zoñinacaž chiitacama.

⁷ Carsilquiz tsjii kjažultan gobierno quintri zoñinacaž chawjcta želatča. Barrabás cjita ujchiz zoñi carsilquiz chawjctazakaztača. Revolucionquiz zoñi conchiča Barrabás cjita zoñiqui.

⁸ Jaziqui zoñinacaqui Pilatu pewczñi tjonchiča, tuž cjican:

—Wejtnacalta tsjii zoñi cutžinalla. Tuquitanpacha nuž cutzñampanla amqui.

⁹ Pilatuqui kjaaziča:

—¿Ančhucqui pecya, tii judionacz chawjc jiliri cutzta cjisjapajo?

¹⁰ Jesusa čhaawjcu, nii timplu jilirinacaqui Pilatužquiz intirjichiča; nii zizziča Pilatuqui.

¹¹ Nekztan nii timplu jilirinacaqui Jesusiž quintra zoñinaca aptjapchiča. Nekztan zoñinacaqui maychiča, Barrabaspakaz cutzta cjisjapa.

¹² Pilatuqui wilta pewziča:

—¿Tiizti? ¿Jaknužt wejr paaj cji ančhucjo? Ančhucqui tii judionacz jiliriča cjinčucla.

¹³ Nii zoñinacaqui kjawchiča:

—¡Tii zoñi conzna! ¡Cruzquiz ch'awczna!

¹⁴ Nekztan Pilatuqui chiichiča:

—¿Kjažtiquiztan, čjul uj paachit teejo?

Nii zoñinacazti juc'anti kjawchiča:

—¡Cruzquiz ch'awczna!

¹⁵ Pilatuqui nužquiz zoñinacz kuz wali cjisjapa Barrabás cutziča. Jesusa cusa wjajtkatžcuqui, Pilatuqui zultatunaczquiz intirjichiča, cruzquiz ch'awcta cjisjapa.

¹⁶ Nekztan nii zultatunacaqui jilirž kjuy patiuquin Jesusa chjitchiča. Nekzi parti zultatunaca ajcznajo kjawziča.

¹⁷ Nekztan Jesusižquiz tsjii morat zquiti tjutziča. Nižaza tsjii ch'apirar pillu irata nižtižtan Jesusiž achquiz scarzinchiča.

¹⁸ Nekztan ararcan kjawchiča:

—¡Viva tii judío nacionž chawjc jiliri! —cjican.

¹⁹ Nekztan tsjii paržtan Jesusiž achquiz t'etkatchiča; llawsižtan tjujtchiča; rispitažoka quillsiča.

²⁰ Nekztan burla paažcuqui Jesusižquiztan nii morat zquiti chjojkžinchiča. Niiž persun zquiti tjutziča. Nekztanaqui Jesusa chjitchiča cruzquiz ch'awczjapa.

JESUSAQUI CRUZQUIZ CH'AWCTATAČHA

²¹ Tsjii Cirene wajtchiz zoñi želatča, Simón cjita. Pucultan zoñž ejptača niiqui, Rufo, nižaza Alejandruž ejp. Jochquiztan kajkžcatča. Nekz watan mantichiča, Jesusiž cruza kužajo. Nužquiz uytissiča.

²² Nekztan Jesusaqui Golgota yokquin chjichtatača. Golgota cjitaqui tuž cjiča: “Ach Tsjič Yokača”.

²³ Nekztan Jesusižquiz vinu mirržtan t'ajžta tirinchiča. Jesusazti ana licz pecchiča.

²⁴ Jalla nekztanaqui cruzquiz ch'awczcu, sultatunacaqui zurtiychiča niiž zquitinaca tanzjapa, jakzilta sultatut nii zquiti tanznačhaja, nii zizjapa.

²⁵ Wenzlaka Jesusaqui cruzquiz ch'awctatača.

²⁶ Kjažtiquiztan tii zoñi cruzquiz ch'awctatažlaja, niiqui cjičrchiča tsjii tawliquiz, tuž cjican: “Tiiqui judionacz chawjc jiliriča”.

²⁷ Jesusižtan chicapacha tsjii pucultan tjañinaca yekja cruzanacquiz ch'awctazakaztača, tsjiic žew kjuttan tsjiic zkar kjuttan.

²⁸ Nužupan tuquitan cjičrta Yooz taku cjiča. Nii Yooz taku tuž cjiča: “Ujchiz zoñinacztan chica uchtača”. Nužquiz nii Yooz takuqui cumplissiča.

²⁹ Zoñinacaqui nekz watcan acha wewczinchiča; ancha žawjchi, tuž cjican:

—¡Aaj! Amqui timplu pajltasača. Nekztan čhjep majquiziqui wilita kjuytasača, jalla nuž cjičhamča, ¿ana jaa?

³⁰ Jaziqui persunpacha am cruzquiztan zarakalla. Persunpacha liwriyalla amqui.

³¹ Nižaza nii timplu chawjc jilirinacžtan judío tjaajiñinacžtan parlassičha, Jesusa iñarcan, tuž cjičan:

—Yekjapanacžquiz liwriičičha tiiqui. Persunpachazti anaž liwrii atča.

³² Cristužlaj niiqui, Israel nacionž chawjc jilirizlaj niiqui, persunpachaj cruzquiztan apakscu, chjiwžquila. Nekz criyaquiz učumqui.

Zoñinacaqui Jesusa iñarčičha. Niižtan chica ch'awcta zoñimi iñarčizakazza.

JESUSAQUI TICZICHA

³³ Taypurquiztan tjapa nii yokac zumchi cjissičha, majñakak oracama.

³⁴ Nii ora Jesusaqui tjapa aztan kjawčičha:

—Eloi, Eloi ¿lama sabactani? —Tii takuqui cjiča: “Wejt Yooz, wejt Yooz ¿kjažtiquiztan wejr ecchamtajo?”

³⁵ Yekjap nekz žejlñinacaqui nii taku nonžcu cjichičha:

—Nonžna. Elías kjawža tiiqui, nii tuquitan Yooz taku parliñi profetaqui.

³⁶ Tsjiiqui ninacžquiztan zajtčičha. Nekztan tsjii esponja cjita kjaz licñiquiz jar vinu licskatchičha. Nekztan quejpžcu tsjii parquiz tsjiipchi Jesusižquiz macjatskatchičha nii jar vinu ch'umznajo. Nekztan nii zoñiqui parti zoñinacžquiz chičičha:

—Tjewžla učumqui. Jaknužukat Eliasac cruzquiztan apaki tjonachani, niž chekžla.

³⁷ Jesusaqui juc'anti kjawčičha. Nužquiz ticziča.

³⁸ Nii oraqui pajk timplu pañu juystokaz chicatquiz wjajrsičha, tsewctan kozzuc.

³⁹ Nii romanž sultatunacž jiliričiqui Jesusiž yujc kjuttan želatča. Tjappacha niž wattanaca cheržcu cjichičha:

—Chekapan Yooz Majchtakalča tii zoñiqui.

⁴⁰ Nižaza tsjii kjažultan maatakanacaqui ažquiztan chekziča. Nii maatakanacaqui tinacatača: María cjititača, Magdalena wajtchiz žonqui. Nekztan María cjitizakaztača, Josež maa, nižaza Jacobž maa (lajktača Jacoboqui). Nekztan Salomé cjititača.

⁴¹ Nii maatakanacaqui Jesusa apzitača, nižaza yanapchitača, Jesusa Galilea yokaran ojklayan nii ora. Nekztan ninacaqui Jesusižtan chica Jerusalenquin tjončičha. Nii cruzaž nekzičiqui muzpa maatakanaca želatča.

JESUSAQUI TJATZTATACHA

⁴² Nii noojičiqui pijzta tjacz tjuñitača. Jeejz tjuñi ispirazakaztača.

⁴³ Nižtiquiztan tjuñiž kattant tsjii José cjita Arimatea wajtchiz zoñiqui walja tjup kuzziz Pilatužquin ojkičičha. Nekztan Jesusiž curpu mayčičha. Walja rispitta jiliritača nii Josiqui. Yooz tjapa mantiz timpu tjewznatča.

⁴⁴ Niž tjontiquiztan, Pilatučiqui ispantichičha, tuž cjičan:

—¿Kjažt waj ticzi cjesajo?

Nekztan zultatž jiliri kjawziča, nii pewczjapa.

⁴⁵ Nii zultatž jiliričiqui kjaaziča:

—Jesalla, ticziča, —cjičan.

Nekztan Pilatučiqui Jesusiž curpu chjitzjapa permiso tjačičha José cjita zoñžquiz:

—Nižtaqui niž curpu chjičhalla, —cjičan.

⁴⁶ Nekztan Josiqui zuma chiw pañu kjayčičha. Jesusiž curpu chjiunžcu nii pañquiz tejlziča. Nekztan tsjii sipulturquiz majkziča. Nii sipulturaqui pajk mazquiz pjetatača. Nii sipulturž zana tsjii pajk maztan pjuczīča.

⁴⁷ Pucultan maatakanacaqui Jesusiž curpu tjatñi cherčičha. Tsjaaqui María Magdalena cjititača. Tsjaac María cjitizakaztača, yekja Josiž maa.

16

JESUSAQUI JACATATCHICHA

¹ Judionacž jeejz tjuñi jakatažu María Magdalenatan Jacobž maa Mariatan Salomatan, nii čhjepultan maatakanacaqui cusa ulurchiz asiiti kjaychiča, Jesusiž ticzi curpu tjajlinzjapa.

² Ancha wentan ninacaqui sipultura cherzñi ojkchiča tjuñiž tewctanalla.

³ Sipultura ojkcan ninacpora parlassičha tuž cjican:

—¿Jequit učumtaqui cjetžinaquejo? ¿Nii pjucžta pajk mazjo?

⁴ Nekztan irantižcu, nii pajk pjucžta mazqui cjetžta cherziča.

⁵ Sipultura luzcu, žew latu kjuyltan tsjii tol chiw zquitchiz tjowa julzi cherchiča. Nužquiz nii maatakanacaqui ancha tsucchiča.

⁶ Nii tjowaqui paljaychiča, tuž cjican:

—Anaž tsuca maataka. Ančhucqui Jesusaž kjurča, nii cruzquiz ch'awcta žoñi. Niiqui jacatatchičha jaziqui. Anača tekzi. Cherznalla. Tii sipulturquiz ana žejlča.

⁷ Jazic ančhucqui oka. Niiž tjaajinta žoñinacžquin mazca. Pedružquizimi zaka mazna. Tuž cjican ančhuc maznaquiča: “Jesusaqui ančucaž tuqui okjayaquiča Galilea cjita yokquin. Nekzi Jesusižtan zalaquiča ančhucqui. Jaknužt tuquitan chiižinchipančhaja, jalla nužuča”.

⁸ Nekztanaqui nii maatakanacaqui sipulturžquiztan ulanžcu, zati pariju quejpchiča, tsucaña chjekincan. Tsucaña ana čhjulumi chiyi atchiča jeczquizimi.

JESUSAQUI MARIA MAGDALENAQUIZ PARIZICHICHA

⁹ Jesusaqui kjantatilla jacatatžcuqui primiraqui María Magdalenaquiz parizichiča. Tuquitan Jesusaqui naaquiztan pakallaku zajranaca chjatkatchitača.

¹⁰ Naa žonqui Jesusiž mazinacžquin mazñi ojkchinča. Ninacaqui llaquita želatča, kaacan.

¹¹ Nekztan mazzinča:

—Jesusaqui jacatatchičha. Wejrqui nii cherchinča, —cjican.

Nii nonžcu nii tjaajinta žoñinacaqui ana criichiča. Inapanka chiitažoka naychiča.

¹² Wiruñaquei pucultan tjaajinta žoñinacaž wajtquiztan okan, Jesusaqui parizichizakazza, tsjemata cjissi.

¹³ Nekztan quejpcu, nii pucultanaqui parti tjaajintanacžquiz mazziča. Nii mazta ana zakaz criichiča.

JESUSAQUI WILTA PARIZICHICHA

¹⁴ Wiruñaquei Jesusaqui nii tuncamani tjaajinta žoñinacžquiz parizichiča, čhjeri lulan. Ninacaqui jacatatta maztaqui ana criichiča. Nekztan ninacž ana criiñi kuzziz cjen ninacžquiz iwjt'ichiča Jesusaqui.

¹⁵ Nižaza Jesusaqui mantichiča, tuž cjican:

—Jazic ančhucqui okaquiča tjapa kjutñi tii muntu intiru. Tjapa žoñinacžquizimi liwriiñi taku paljayaquiča.

¹⁶ Jakziltat tii taku criičhaja, jalla niiqui liwriitaž cjequiča; nižaza bautista cjequiča. Jakziltat tii taku ana criičhaj niiqui, ancha castictaž cjequiča.

¹⁷ Yooz taku criichinacaqui tii milajrunaca paaquiča. Wejt tjuuquiz zajranaca chjatkataquiča. Yekja takunaca chiyaquiča.

¹⁸ Zkora tanžcu zkoržquiz ana chjojrictaž cjequiča. Tsjii veneno licžcu, ana ticznaquiča. Kjaržtan lanžcu, laa žoñinaca čhjetnaquiča. Nižta paaquiča Yooz taku criichi žoñinacaqui.

JESUSAQUI ARAJPACHA OJKCHICHA

¹⁹ Nii taku chiižcu chawjc jilir Jesusaqui arajpacha ojkchiča. Nekzi Yooz žew latuquiz julziča.

²⁰ Nekztanaqui nii tjaajinta zoñinacaqui ulanžcu, tjapa kjutñi Yooz liwriiñi taku paljay-chiĉha. Chawjc jiliripanĉha Jesucristuqui. Jalla niiĉha ninacžquiz yanapñiqui. Nii Yooz aztan paata milajrunacaqui tuž cjiĉha: “Tii Yooz takuqui werarapanĉha”. Nužupanž cjila. Amén.

EL SANTO EVANGELIO SEGUN SAN LUCAS

¹⁻² Ancha zuma Teófilo, tii cartal amquin cjiřzcuĉha, Jesucristuř puntuquiztan. Jesucristuř nasta tjuñquiztanpacha jaknuřt watĉhaja, jalla niiqui ana tjatziĉha cherchi Źoñinacaqui. Nii cherchi Źoñinacaqui wejtnacaquiz tjaajinĉiĉha. Niřaza yekja Źoñinacřquiz tjaajinchizakazza Jesucristuř puntuquiztan. Nekztan tsjii kjař Źoñinacaqui Jesucristuř puntuquiztan cjiřchiĉha niiř jaru niiř jaru.

³ Niřaza wejrqui zumpacha pewcpewczinĉha jaknuřt Jesucristuř nasta tjuñquiztanpacha watĉhaja, jalla nii. Jalla nuř pewcpewczcu wejrqui pinsichinĉha Jesucristuř puntuquiztan cjiřzjapazakaz niiř jaru niiř jaru. “Jalla niic waliř cjesaĉha”, cjian pinsichinĉha wejt kuzquiz. Jaziqui walja zuma Teófilo, amquin tii cartal cjiřzcuĉha,

⁴ Jesucristuř puntu tjaajintanaca zumpacha zizajo.

JUAN BAUTISTAZ NASTAQUI

⁵ Ima Juan Bautistař nasan jalla tuř watchiĉha. Judea yokquin Herodes cjita pajk jiliriĉi mantiñitaĉha. Niřaza Zacarías cjita timplu cwitiñi Źoñi řelatĉha. Niiqui Abías cjita t'akquiztantaĉha. Niiř tjun cjititaĉha Elisabet. Ninacaqui Aarón cjita tuquita atchi ejpřquiztan tjonñitaĉha.

⁶ Nii pucultan lucutiñ Źoñiĉi Yooz yujcquiziqui zuma kamañchiztaĉha. Yooz Epiř mantitacama kamñitaĉha. Jalla nuř kaman ana ĉjul ujmi ninacř quintra tjeezñi atasaĉha jecmi.

⁷ Ninacaqui ana zinta majchchiztaĉha. Elisabet cjitiqui ana wira matiñitaĉha. Nii oraqui pucultan lucutiñi chawc chawcwataĉha.

⁸ Tsjii nooj Zacarías t'akquiztan turnuř tjonatĉha, Yooz sirwizjapa timpluquiz. Jalla niřtiquiztan Zacariasqui Yooz sirwatĉha timpluquiz.

⁹ Nii timplu cwitiñinacaqui tsjii Źoñi inzinzu tjaazñi illzñipantakalĉha. Nekztan Zacariřquiz illziĉha. Jalla nuř illztař cjen Zacariasqui Yooz timpluquiz luzziĉha, inzinzu tjaazñi.

¹⁰ Jalla nii inzinzu tjaazñi oraqui tama Źoñinacaqui Yoozquin mayizican řelatĉha timplu zancu.

¹¹ Jalla nekztanaqui tsjii Yooz anjilaqui Zacariřquiz parisquichiĉha timpluquiz. Nii anjilaqui inzinzu altarř řew latuquiz tsijtsiĉha.

¹² Anjila cherřcu Zacariasqui kuz turwaysi cjissiĉha, ancha tsucchiĉha.

¹³ Anjilaqui cjichiĉha:

–Zacarías, ana am tsuca. Yoozqui amiř mayizitaqui nonziĉha. Jalla niřtiquiztan Yoozqui am Elisabet cjeti tjunaquiz lucmajch wawař majtkataquiĉha. Jalla nuř majttan am wawaqui Juan cjita tjuuchiz cjequiĉha.

¹⁴⁻¹⁵ Jalla nii am majchqui walja pajk jiliriř cjequiĉha Yooz Ejpř yujcquiziqui. Jalla nii majttiquiztanaqui, amqui cuntintum cjequiĉha, walja chipsnaquiĉha. Niřaza walja Źoñinacami chipsnaquiĉha, am tjunař majttiquiztanaqui. Am majchqui vinumi awarintimi ana licaquiĉha. Ima maa pjuchquiztan ulnan Yooz Espiritu Santuqui am majch kuzquiz luzaquiĉha.

¹⁶ Am majchqui walja Israel wajtchiz Źoñinaca Yooz Ejpřquin wilta sirwizkataquiĉha.

¹⁷ Niřaza am majchqui ima Jesucristuř ojklayan ojklayaquiĉha, Yooz taku paljaycan. Cjuñzna. Tuqui timpuqui tsjii Yooz puntu paljayñi profeta řelatĉha, Elías cjita. Yooz Espiritu Santuqui nii Elíasquiz Yooziř tjaata taku paljayskatchiĉha. Jalla nii tjaata taku paljaychiĉha Elíasqui, ana eksk. Yoozquin tjurt'iñi kuzziztaĉha. Jalla niřtapacha

Yooz Espíritu Santuqui am majchquiz Yooziž tjaata taku paljayskataquiča. Niiž paljaytiquiztan ejpžtanami maatinacžtanami wilta zumanskataquiča. Nižaza am majch paljaytiquiztan ana Yooz kuzcama kamñi žoñinacami Yooz kuzcama kamñi cjisnaquiča. Jalla nižtiquiztan Israel wajtchiz žoñinacaqui Yooz Majch tjonz tjuñi tjewznaquiča. Zuma kamcan, ninacaqui tjewznaquiča, Yooz Majch zuma risiwt'isjapa. —Jalla nuž Zacarižquiz paljaychiča nii Yooz anjilaqui.

¹⁸ Nekztan Zacariasqui anjilžquiz pewcziča, tuž cjican:

—¿Ultim werara amiž chiitajo? ¿Jaknužt zizasajo? Wejrqui walja chawc žoñtla pero. Wejt maatakami chawc žon zakazza.

¹⁹ Nii anjilaqui kjaaziča, tuž cjican:

—Wejrqui Gabriel cjititča. Yooz manta payiñtča. Yoozqui wejr mantizquiča amquiz tii zuma takunaca maznajo.

²⁰ Amqui weriž chiita ana criitiquiztan, upam cjisnaquiča, am maati majtcama. Yooziž pinsita tjuñquiz weriž chiita takuqui cumplisnaquiča. —Jalla nuž chiichiča anjilaqui.

²¹ Zacarías timplu kjuyltan ažka želatča, ulanžquiz oraqui watatča. Jalla nižtiquiztan tjewžni žoñinacaqui kuzquiz pinsichiča, kjažtiquiztan ana ulanžquejo, jalla nii. Žoñinacaqui zancu muzpa tjewznatča, Zacarías ulanžquizcama.

²² Nekztanaqui Zacariasqui ažktanalla ulanžquichiča. Pero ana jaknužt chii atchiča. Jalla nižtiquiztan nii zawnc žejlñi žoñinacaqui ispantichiča. “Timplu kjuyltan anjilžtan zalzizlani”, jalla nuž cjeassiča. Upa cjissiž cjen Zacariasqui žoñinacžquiz kjaržtan paljaychiča.

²³ Tsjii kjaž majquiztan Zacariasqui timplu cwitis turnu cumplichiča. Nii tjuñinaca žeržcu, persun kjuya ojkcichiča.

²⁴ Wiruñaqi niiž Elisabet cjiti tjunqui ica cjissinča. Nekztan Elisabet tsjii pjijska jiiz kjuyaran želatča. Ana kjuyquiztan kjuya ojklaychinča. Naaqui persun kuzquiz pinsichinča tuž cjican:

²⁵ “Yooz JiliriQUI wejr cjuñžcu, wejtquiz ickatchiča. Jaziqui žoñinacaqui anaž iya wejr iñarasača”.

JESUCRISTUZ NASTAQUI MAZINTACHA

²⁶ Nekztanaqui sojta jiizquiztan Elisabet ickattanaqui, Yoozqui Gabriel cjita anjila cuchanžquichiča Galilea cjita yokquin, Nazaret cjita wajtquiz.

²⁷ Nii wajtquiz tsjaa tunsill tur želatča María cjiti. David cjita atchi ejpžquiztan tjoniñtača. Mariiqui José cjita žoñžtan kazzintača zalzjapa. Yoozqui naa Mariaquiz anjila cuchanžquichiča.

²⁸ Naaquiz tjonžcu, anjilaqui paljaychiča, tuž cjican:

—Cullacalla, Yooz k'ayamča amqui. Yooz kjarquizza. Nižaza Yoozqui amtan chicapachača. Yoozqui tjapa maatakžquiztanam amquiz juc'ant wali favoraž paaquiča. —Jalla nuž tsaanchiča anjilaqui.

²⁹ Anjilž taku nonžcu Mariiqui ispantichinča. Kuzquiz pinst'ichinča, nii tsaantaqui anal intintasača, cjican.

³⁰ Nekztanaqui anjilaqui naaquiz cjichiča:

—María, ana tsucaquiž amqui. Yoozqui amquiz wali pajk favora paaquiča.

³¹ Jalla nižtiquiztan amqui icaquiča. Lucmajch wawchizim cjequiča. Nii wawaqui Jesús cjita tjuuchiz cjequiča.

³² Tsjii noojiqui nii am majchqui wali pajk jiliriž cjequiča. Arajpach Yooz Ejpž Majchpanča niiqui. Werar Yooz Ejpqui niiž Majchquiz pajk mantiñi cjiskataquiča, Israel wajtchiz žoñinacžjapa. Am David cjita atchi ejptača tuquita pajk mantiñiqui. Jalla nižta pajk mantiñi cjequiča am majchqui.

³³ Israel wajtchiz žoñinaca wiñayaž mantaquiča. Niiž mantitaqui wiñayaž želaquiča. Anaž tucuzinzasača. —Nuž paljaychiča anjilaqui.

³⁴ Nekztanaqui Mariiqui anjilžquiz pewczinča, tuž cjican:

—¿Jaknužt tii cjesaya? Wejrqui ana luctaka pajuča.

³⁵ Nii anjilaqui kjaaziča, tuž cjican:

—Yooz Espíritu Santuqui amquiz tjonznaquiča. Jalla nuž tjonan arajpach Yoozqui niiž aztan tsjirižtakaz wezcaquiča am juntuč. Nii oraqui Yooz Espíritu Santuqui am t'icznaquiča. Jalla nižtiquiztan nii am maatiqui juc'ant zuma lijitum kamañchiz cjequiča. Yooz Majchpanča niiqui.

³⁶ Nižaza amquiz maznuča tuž, am jamillquiztan Elisabet cjitiqúi ickatchitača, chawc žon cjenami. Tuquiqui žoñinacaqui Elisabet puntuquiztan cjiñitača: “Naa žonča ana matiñqui” cjicanaqui. Jaziqui sojta jiižkaz icchinča.

³⁷ Yoozqui čhjulumpankaz paasača. —Jalla nuž chiichiča anjilaqui.

³⁸ Nekztanaqui Mariiqui cjichinča:

—Wejrqui Yooz Jiliriž mantitacama kamiñ žontča. Yoozqui wejtquizimi amiž chiitacama paaj cjila.

Jalla nuž Mariaž chiitan, anjilaqui ojkičiča.

MARIAZ ELISABETAQUIN OJKTA

³⁹ Nekztanaqui tsjii kjaž majquiztan Mariiqui zati pariju ojkičinča Judea cjita kolta curunacchiz yokquin.

⁴⁰ Jalla nicju Zacarías kjuya luzzinča. Kjuya luzcu Elisabetaquiz tsaanchinča.

⁴¹ Nuž Mariaž tsaanan Elisabeta wawaqui pjuch kjuyl cjenpacha kissiča. Nekztanaqui nii oraqui Espíritu Santuqui naa Elisabetaquiz luzziča nižaza chiikatchiča.

⁴² Jalla nekztan naaqui alto tawkžtan Mariaquiz paljaychinča, tuž cjican:

—Yoozqui amquiz tjapa maatakžquiztanami wali pajk favora paachiča. Nižaza nii am majchqui walja honorchiz cjesaž cjila.

⁴³ ¿Kjažtiquiztan taa arajpach Jilirž maaqui wejtquin tjonžquejo? Wejrqui inakaztča. Anal waquisuča.

⁴⁴ Amiž tsaanta taku nonžcu, wejt wawaqui pjuchquiz ancha cuntintu kis kissiča.

⁴⁵ Yooziž apayžquita taku criichamča, nii Yooziž chiita takucama cumplisnaquiča, jalla nii criichamča. Jalla nižtiquiztan zuma cuntintum cjequiča. Nuž cjichinča Elisabetqui.

⁴⁶ Nekztanaqui Mariiqui chiichinča, tuž cjican:

“Wejt Yooz Jiliriž honoral waytača.

⁴⁷ Wejt Liwriiñi Yooziž cjen, wejt kuzmi ančaž chipča.

⁴⁸⁻⁴⁹ Wejrqui inakaztča. Yooz mantitacama kamiñ žontča. Yoozqui wejtquiz cjuñzquichiča. Jaziqui walja azziz Yooz Ejpqui wejtquiz t'icziča. Jalla nuž wejtquiz pajk obra paachiča. Tekztan nawjcchuc tjapa žoñinacaqui wejt puntuquiztan parlaquiča: ‘Yoozqui naaquiz zuma favora paachiča’, cjican. Werar Yoozqui jeczquiztanami juc'anti zumapankazza.

⁵⁰ Yoozqui tjapa nižžquin rispitiñi žoñinacžquiz okžñipanča, watay wata okžñipanča.

⁵¹ Yoozza walja pajk obranaca paañiqui. Mit kuzziz žoñinacaž pinsitanaca inakaz cjissa.

⁵² Walja azziz jilirinaca jwessa ninacž puestuquiztan. Antiz humilde kuzziz žoñinaca honorchiz cjiskatča.

⁵³ Nižaza jakziltat ana cusasanacchiz t'akjiri žejlčhaja, jalla nii t'akjirinacžquiz walja cusasanaca tjaaquiča Yoozqui. Antiz ricachunzcazti laachi kjarquiz ana čhjulchiz quejpkataquiča.

54-55 Nižaza Yoozqui uĉhum tuquta atchi ejpnacžquizimi, Abrahamžquizimi, Abrahamž majchmaatinacžquizimi, jalla ninacžquizimi taku tjaachiĉha, ninaca tirapan okznajo. Jalla nuž okžcu Yoozqui walja yanapĉha Israel wajtchiz Yooz sirwiñi žoñinacžquin, ninaca ana tjatsñiĉha”.

Jalla nuž chiichinĉha Mariiqui.

56 Tsjii ĉhjep jiiž Mariiqui Elisabetatan kamchinĉha. Nekztan quejpcchinĉha naaža persun kjuya.

JUAN BAUTISTAZ NASTA

57 Naa Elisabeta majtz tjuñiqui irantižquichiĉha. Nekztan lucmajch wawa majtchinĉha.

58 Jalla nuž cjen, Yoozqui Elisabetaquiz ancha zuma favora paachiĉha. Jalla nii quintu zizcuqui, Elisabeta wisinunacami jamillanacami naaquin tjonzñi ojkchiĉha. Nekztan ninacaž tjonžtan, Elisabetaqui ancha cuntintutakalĉha. Ninacami cuntintuzakaztaĉha.

59 Jalla nekztan quinsakal tjuñquiztan Zacariastan Elisabetatan timplu ojkchiĉha wawa chimpus cuztrumpi paakatžjapa. Nii cuztrumpi paatan ejpž tjuužtan tjuuzkatž pecatĉha, Zacarías cjican.

60 Wawž maaqui cjichinĉha:

—Anaž. Tii wejt maatiqui Juan cjita tjuuchizpanž cjequiĉha.

61 Partinacazti pewcziĉha:

—¿Kjažtiquiztan nižta tjuuskatz pecjo? Am jamillanacquiztan anaž nižta tjuuqui žejlĉha.

62 Jalla nekztanaqui wawž ejpžquiz kjaržtan pewcziĉha, ĉhjul tjuuchizim pecas, jalla nii.

63 Ejpqui tsjii maychiĉha, tjuu cijržjapa. Nekztanaqui cijrchiĉha, tuž cjican: “Wejt maatiqui Juan cjitaž cjequiĉha”. Nekztanaqui tjappacha ispantichiĉha nii puntuquiztan.

64 Nii orapacha Zacariasqui wilta chiiñi cjissiĉha. Jalla nuž wilta chii atcan, Yooz honora paljaychiĉha.

65 Jalla nuž cjen wisinunacami ispantichi quirchiĉha. Tjapa kjutñi nii Judea yokaran nii quintu ojkchiĉha.

66 Tjappacha nii quintu zizñi žoñinacaqui kuzquiz pinsichiĉha: “¿Tii uzaqui ĉhjulut cjisnaquejo?” cjican. Yooz kjarquizpantaĉha nii wawaqui.

67 Nekztanaqui Yooz Espíritu Santuqui Zacarižžquiz chiikatchiĉha. Jalla nižtiquiztan Zacariasqui Yooziž tjaata takucama paljaychiĉha, tuž cjican:

68 “Yooz Jiliri honorchiz cjilalla. Niiĉha Israel žoñinacž Yoozqui. Uĉhum Yoozqui niž mantitacama kamñi žoñinacžquin cjuñziĉha. Jaziqui liwriita cjequiĉha uĉhumqui.

69 Yoozqui walja azziz Liwriiñi cuchanžquichiĉha, uĉhumnacaquiz. Davidž majch maatinacžquiztanpacha majttaĉha nii Liwriiñiqui. David cjitaqui Yooz mantitacama kamñitaĉha.

70 Tuqui timpuquiztanpacha jalla nužupan Yoozqui taku tjaachiĉha. Yooz taku paljayñi žoñinacaqui niž jaru niž jaru nii Yooziž tjaata taku mazmazziĉha.

71 Nii maztaqui tužutaĉha: ‘Liwriitaĉhumž cjequiĉha, uĉhum quintra žoñinacžquiztanami, uĉhum ĉjaawjkatñi žoñinacžquiztanami’.

72 Yooz Ejpqui uĉhum tuquta atchi ejpnacžquiz taku tjaachiĉha, tuž cjican: ‘Wejrqui anĉhucaquiz tira okzniiĉha. Weriž zuma tjaata taku anal tjatsnaĉha’.

73 Nižaza Yooz Ejpqui uĉhum tuquta Abraham ejpžquiz taku juramintužtan tjaachiĉha, nijapami uĉhumjapami.

74 Uĉhum quintra žoñinacžquiztanami liwriitanaqui, uĉhumqui ana ekskcu Yoozquin sirwasaĉha.

⁷⁵ Nižaza učhumqui Yooz kuzcamakaz zuma lijituma kamaquiča. Jalla nuž kamcan učhumqui Yooz sirwaquiča ticzcama”.

⁷⁶⁻⁷⁷ Nižaza Zacariasqui tira paljaychiča, tuž cjican: “Juan, wejt maati, amqui Jesús Jilirž tjonz tuqui ojklayaquiča, Israel žoñinaca nii zuma tjewznajo. Amqui jaknužt žoñinacž ujnacami pertunta cječhaja, jalla nii intintiskataquiča. Zoñinacž ujnaca pertunta cjen, liwriitaž cjequiča. Jalla nuž intintiskattiquiztanaqui profeta cjitam cjequiča amqui, arajpach Yooziž tjaata taku paljayni profeta.

⁷⁸ Yoozqui učhum ancha okzñiž cjen učhum liwriyaquiča. Tsewctanpacha tsjii Liwriiñi cuchanžquichiča, učhum kuzquiz tjuñižtakaz kjanajo. Jalla nižtiquiztan ew timpužtakaz cjequiča.

⁷⁹ Jalla nii Liwriiñiqui zuma kjanacamapanž Yooz zuma kamañ jicz tjeeznaquiča, zumchiquiztakaz kamñi žoñinacžquizimi, ticzquiztan eksñi žoñinacžquizimi. Nižaza nii Liwriiñiqui učhum zuma irpaquiča, Yooz Ejpžtanami učhumtanami zumanznajo”. Jalla nuž cjichiča Zacariasqui.

⁸⁰ Nekztanaqui nii Juan cjita uzaqui pajkchiča. Zapuru juc'anti Yoozquin tjurt'iñi kuzziztača. Jalla nekztanaqui tsjii ch'ekti yokquin ojklayatča, Israel wajtchiz žoñinacžquiz niž obra tjeezcama.

2

JESUCRISTUZ NASTA

¹ Jalla nii timpuquiz tsjii walja chawc jiliri želatča, Augusto cjita. Nii chawc jiliriqui mantichiča, tuž cjican:

–Tjappacha žoñinacaqui tjuu apuntiskataquiča.

² Nii timpuquiz Cirenio cjita jiliri želatča, Siria yokchiz žoñinaca mantiñi. Jalla nii timpuquiz primir censuqui watchiča.

³ Nekztanaqui tjapa žoñinacaqui persun watja ojkspantača, persun tjuu apuntiskati.

⁴ Jalla nuž cjen José cjita žoñiqui Galilea cjita provinsiquiztan, Nazaret cjita wajtquiztan ulanžquichiča. Judea cjita provinsiquin, Belén cjita wajtquin ojkičiča. Jalla nicju David cjita tuquita atchi ejpqui nassitača. Davidž majchmaatquiztan tjonñitača Josequi.

⁵ Jalla nuž cjen nicju ojkičiča, tjuu apuntiskati. María cjiti turatan zalzjapa kazzitača Josequi. Nii oraqui naa Mariiñi Espiritu Santuž t'icžtatača. Juztan Mariatan pucultan ojkičiča, tjuu apuntiskati.

⁶ Belén wajtquin irantižcu, María majts oraqui tjonchiča.

⁷ Jalla nicju Mariiñi primir wawa majtchinča, Belén wajtquiz, animalž tjajz kjuyquiz. Wawaqui pañ awallžtan capžtatača. Jalla nuž capžcu animalž tjajz kjuyquiz t'apžtatača. Anaž iya alujamintu wajtchucatača.

AWATIRINACAQUI JESUSIZQUIZ RISPITI TJONCHICHA

⁸ Belén wajt žcatiran uuzi itzñi awatirinaca želatča. Awatirinacaqui pakara uuzi itzñitača pamparanpacha.

⁹ Jalla nuž želan tiripintit Yooz anjilaqui jeczquichiča. Tsewctan ninacž kjutñi walja kjanžquichiča. Nuž cheržcu ninacaqui ancha tsucchiča.

¹⁰ Jalla nekztanaqui nii anjilaqui cjichiča:

–Ana tsuca ančhucqui. Zuma quintul zjijcžcuča. Tsjii Liwriiñiqui tjapa žoñinacžtajapa cuchanžquitača. Jalla niž cjen žoñinacaqui zuma cuntintuž cjequiča.

¹¹ Tii zeziqui Davidž wajtquiziqui tsjii wawa majttača. Jalla niiñi Jesucristo Yoozza, ančhuc Liwriiñi.

¹² Ančhucqui nii wawa wachaquiča pañ awallžtan capžta; nižaza animalž tjajz kjuyquiz t'apžta wachaquiča. Jalla nuž wažtaž cjen siñala cuntažtakaz cjequiča.

Jalla nuž cjenacui ančhucqui zizaquičha, chekapan wereraž chiitkalala, niiqui. —Nuž cjichiča anjilaqui.

¹³ Jalla nekztan anjilžtan chica tama Yooz anjilanacacui tsewctan jeczquichizakazza. Yooz anjilanacacui Yooz honora waytichiča, tuž cjican:

¹⁴ —Tsewcta arajpach Yooz honorchiz cjilalla. Nižaza tii yokquiziqui Yooz okžta žoñinaca zuma cuntintu kuzziz cjilalla.

¹⁵ Jalla nuž chiižcu, Yooz anjilanacacui tsewc arajpacha quejpchiča. Nekztan nii awatirinacacui porapat parlassiča, tuž cjican:

—Anjilaž maztaqui arajpach Yoozquiztan tjonchikalala. Tsjii Liwriiñi majttakalala. Jalla nii cheriž Belén watjaž ojklalla.

¹⁶ Jalla nekztanaqui awatirinacacui zati pariju ojkičiča. Belén wajtquin animalž tjaz kjuyquiz luzziča. Nekzpacha awatirinacacui zalchiča Mariatan Juztan wawa t'apzi.

¹⁷ Ninacžtan zalžcu tjappacha Yooz anjilaž chiitanaca nii wawž puntuquiztan quint'ichiča.

¹⁸ Awatirinacaž nuž maztiquiztan, tjappacha nonžñi žoñinacacui ispantichiča.

¹⁹ Mariizti persun kuzquiz nii mazta chjojchinča. Nii mazta puntuquiz pinsican walja pinsamintu aptazzinča.

²⁰ Awatirinacacui uuzi ichi quejpchiča. Nižaza Yooz honora paljaychiča, tuž cjican: —Yoozza chekanaqui. Ancha waliča učumž nonžtanaca, učumž chertanacami. Yooz anjilaž chiitacama nižtapacha cherchinčhumla. —Jalla nuž cjican Yooz honora waytissiča awatirinacacui.

JESUSAQUI TIMPLUQUIN CHJICHTACHA

²¹ Majttiquiztan quinsakal tjuñquiziqui jalla nekztan nii wawžquiz chimpuz cuztrumpi paachiča. Ima Mariaž ican, Yooz anjilaqui Mariaquiz chiichiča, “Jesús cjita cjequicha amiž primir majtta wawaqui”. Jalla nižtiquiztan nii anjilaž chiita tjuužtan tjuuzkatchiča.

²² Tuquitanpacha tsjii taku mantichiča Moisesqui, tuž cjican: “Majtžcu ima pusi tunc tjuñiž cjen, maatakanacacui Yooz sirwiz cuzturumpinaca ana payi atasacha. Pusi tunc tjuñiž tjonan, timpluquiz tsjii cuztrumpi paazpanča. Jalla nekztanaqui wilta Yooz sirwiz cuztrumpiž paasača”. Jalla nižtiquiztan majtta tjuñquiztan pusi tunc tjuñi pjojkan Juztan Mariatan ninacž wawa chjitchiča Jerusalén cjita watja. Jalla nicju timpluquin ojkičiča wawa Yoozquin cumpjii.

²³ Tsjii Yooz liiqui tuž cjichiča, “Primir lucmajch wawa majtžcu, Yoozquin cumpjitaž cjequičha Yooz sirwajo”. Nuž Yooz lii ut'aysiž cjen lii jaru cumpliciča.

²⁴ Yooz mantita lii jaru nii lucutiñiqui ojkičiča. Yooz liiqui zakaz cjiča: “Tsjii pariza paluma uz tsjii pariza wežla palomažtakaz Yoozquin tjaaspanča”. Jaziqui nužupan Yoozquin tjaachiča.

²⁵ Nii timpuqui Jerusalenquiz tsjii Simeón cjita žoñi želatča. Nii žoñiqui Yooz kuzcama kamñitača; Yooz lii jaru kamñitača. Nižaza Israel wajtchiz žoñinacž Liwriiñi tjewziča. Simeonqui Espíritu Santuž irpita žoñipantača.

²⁶ Espíritu Santuqui Simeonžquiz taku tjaachiča, tuž cjican: “Ima ticzcan, amqui Yooz cuchanžquita Liwriiñi Jiliri cheraquičha”.

²⁷ Jalla nuž taku tjaatiquiztanaqui Espíritu Santuqui Simeón irpichiča timplu kjutñi. Nii oraqui Jesusiž maa ejpqui nii timpluquin chjitchiča. Nekziqui Jesusižquiz mantita lii jaru cumpliciča.

²⁸ Jesusa cjita wawa cheržcu, Simeonqui kjaržtan kaaziča. Jalla nuž kaažcu, Yooz honorchiz cjejado, tuž cjichiča:

29 –Yooz Tata, wejrqui amiž mantitacama kamiñ zoñt'cha. Tuquiqui wejtquiz taku tjaacham'cha. Anziqui amiž chiita taku cumplicham'cha. Jaziqui tižtiquiztanaqui cuntintul ticznasa'cha.

30 Jaziqui wejt persun čhjujcztan tii amiž cuchanzquita Liwriiñi cherchin'cha.

31 Tjappacha tii muntuquiz žejlñi zoñinacztajapa tii Liwriiñi cuchanzquicham'cha.

32 Tii Liwriiñiž cjen, Israel zoñinacžquizimi parti zoñinacžquizimi Yooz kamañ jicz tjeežtaž cjequi'cha, liwriita cjejajo. Nižaza tii Liwriiñiž cjen, Israel wajtchiz zoñinacaqui zuma honorchiz cjisnaqui'cha. –Jalla nuž chiichi'cha Simeonaqui.

33 Simeonž chiitiquiztan Jesusiž maa ejpqui ninacž kuzquiz ispantichi'cha.

34 Nekztanaqui Simeonaqui ninacžta Yoozquin mayizichi'cha walikaz cjejajo. Nižaza Jesusiž maaquiz paljaychi'cha, tuž cjican:

–Werarapan'chay, tii wawaž cjen walja Israel wajtchiz zoñinaca liwriitapanž cjequi'cha. Nižaza tii wawaž cjen yekjapa Israel wajtchiz zoñinaczi ujquin tjojtznaqui'cha. Tiiqui walja chawc jiliripanž cjequi'cha. Pero walja zoñinacaqui nii anaž rispitaqui'cha, Yooziž cuchanzquita cjenami.

35 Tii wawaž cjen zoñinacaž kuzquiz pinsitanacaqui pajtaž cjequi'cha. Nižaza María, amqui tii wawaž cjen ancha llaquitam cjequi'cha. –Jalla nuž mazzi'cha Simeonaqui.

36-37 Nii oraqui tsjaa Ana cjiti žon želat'cha, timpluquiz zakaz. Naata'cha Yooz taku paljayiñ profetqui. Jalla naaqui Fanuelž majtta'cha, Aser cjita t'akviztan. Pakallawkw wata zalztiquiztan, naaža lucuqui ticzi'cha. Anziqui walja chawc žonta'cha. Quinsakalc tunca pusin watchizta'cha naa žewqui; timpluquiztan anapan ulniñta'cha. Ayunascan Yoozquin mayizican, Yooz Ejpžquin sirwiñta'cha majiñami weenami.

38 Jesús cjita wawa timpluquiz želan, nii orapacha Ana cjiti žonqui nii wawžtan zalchin'cha. Nuž zalžcu Yoozquin sparaquiž cjichin'cha. Nekztan nii wawž puntu paljayi kalltichin'cha Jerusalén watja liwriiž tjuñi tjewžñinacžquiz.

JESUSAQUI PAJKCHICHA

39 Tjapa Yooz mantita lii cumplizcuqui Jesusiž maa ejpqui Galilea yokquin quejpchi'cha. Niiž persun watja Nazaret cjita quejpchi'cha.

40 Jalla nii wajtquinaqui nii uzaqui pajkchi'cha. Tsjan tjupi y nižaza tsjan čhjultaki zizñi cjissi'cha. Yooz Ejpqui nii walja cwitichi'cha, nižaza yanapchi'cha.

41 Zapa wata niiž maa ejpqui Jerusalenquin ojkchi'cha, pascua pijista payi.

42 Jesusaqui tuncapan wajtchiz cjen, niiž jamillžtan Jerusalenquin ojkchi'cha pascua pijista cuztrumpi payi.

43 Jalla nekztan pijista žeržcuqui, quejpchi'cha ninacaqui. Jesús uzazti Jerusalén wajtquiz eclichi'cha. Niiž maa ejp ana eclini naychi'cha.

44 Niiž maa ejpqui pinsat'cha, “Niiž mazinacžtanž caa”, cjican. Jalla nuž cjen niiž maa ejpqui ojkchi'cha tsjii nooj intiru. Pero tjuñi kattan, Jesusa kjurchi'cha jamillanacžquin nižaza ocjalž maziran.

45 Maa ejpqui Jesusa ana wači atchi'cha. Jalla nekztanaqui Jerusalén watja quejpchi'cha, jalla nicju kjurzjapa.

46 Tsjii čhjep majquiztan, maa ejpqui Jesús watchi'cha timplu kjuyula. Timpluquiz Israel lii tjaajiñi maestruncžtan želat'cha. Maestruncž takunaca nonznat'cha. Y nižaza maestruncžquiz pewcznat'cha Jesusaqui.

47 Nii uzaž paljayta taku nonžcu tjapa zoñinacaqui ispantichi'cha, nii uzaž nuž čhjulumiz zizñiž chiyan.

48 Jalla nekztanaqui nuž žejlñi cheržcu, ispantichi cjissi'cha maa ejpmi. Nekztanaqui niiž maaqui chiižinchin'cha:

–Aay, tii wejt uza jay. ¿Kjažtiquiztan am nižta eclichamta? Am ancha llaquita kjurchin'cha wejrnaqui. –Jalla nuž maaqui niižquiz chiižinchin'cha.

49 Jalla nekztanaqui Jesusaqui maaquiz kjaazi'cha, tuž cjican:

—¿Wejr tjapa kjutñi kjurchamkaya? Wejt persun Ejpž kjuyquiz žejlstanpantača wejtlaqui. ¿Jalla nii ana zizzat amya?

⁵⁰ Jalla nuž chiyan niž maa ejpqui ana intintazziča.

⁵¹ Nekztanaqui Jesusaqui maa ejpžtan Nazaret cjita watja ojkchiča. Nicju iran-tižcu maa epiž mantitanaca cazñipanikaztača. Maaqui jalla niž nuž wattanacquiztan kuzquiz chjojchinča.

⁵² Jalla nekztan Jesusaqui tsjan pajkchiča. Nižaza tsjan zizñi pinsamintuchiztača. Yooz Ejpmi žoñinacami niž cjen cuntintutača.

3

JUAN BAUTISTAQUI YOOZ TAKU PALJAYCHICHA

¹ Zacarías Juan cjita majchqui Yooz taku paljayi kallantichiča. Jalla nii timpuquiz tii jilirinaca želatča. Tsjiiqui Tiberio cjitatača, juc'ant chawc jiliritača niiqui. Tunca pjijskan wata jiliri cjican mantichiča. Nižaza tira mantiñipantača. Tsjiižuñqui Poncio Pilato cjitatača. Niiqui mantichiča Judea cjita yokquin. Tsjiižuñqui Herodes cjitatača. Niiqui Galilea yokquin chawc jiliritača. Niiž lajkqui Felipe cjitatača. Nii Felipiqui Iturea cjita yoka, Traconite cjita yoka, jalla nii pizc yokquin mantiñitača. Tsjiižuñqui Lisanas cjitatača. Niiqui Abilinia cjita yokquin mantiñitača. Nii timpuqui ninacatača pajk jilirinacaqui.

² Nižaza nii timpuqui Anastan Caifastan timplu chawc jilirinacatača. Nii timpuqui Juanqui želatča tsji ch'ekti yokquin. Jalla nuž želan Yoozqui Juanžquiz takunaca paljaychiča.

³ Nekztan Juanqui tjapa kjutñi Jordán puj yokaran ojklaychiča. Nicju žoñinacžquiz paljaychiča, tuž cjican:

—Ančhucqui kuznacaž campiya; Yoozquin kuzziz cjisna. Nekztan ančhuca ujnaca pertunta cjequiča. Jalla nekztanaqui bautistaž cjesača. —Jalla nuž paljaychiča Juanqui.

⁴ Tuquita tsjii Isaías cjita Yooz taku paljayñi profeta želatča. Niiž cijirta takucama watchiča. Jalla tuž cjican, cijirchiča:

“Ch'ekti yokquin tsjii žoñiqui altu tawkžtan paljayžcaquiča, tuž cjican: ‘Tsjii chawc jiliriž tjonaquiča. Jaziqui zuma kamañ jicz tjaczna. Tsjii zuma jicztakaz ančhuca kuznaca zumpacha tjaczna, y nižaza zuma lijitumapanž cjee.

⁵ K'awanaca liwj tjattjatzna. Curunacami lumanacami zumpachaž wjajržna, nii jicz zuma zok'o okajo. Nižaza nii t'ojonacaqui zumpacha kjujzcatzna. Jalla nuž zuma kamañ jicz tjacznaquiča.

⁶ Nii chawc jiliriž tjontan, tjapa tii muntuquiz žejlñi žoñinacami Yooz Epiž cuchanžquita Liwriiñiž cheraquiča’ ”.

Jalla nuž cjican cijirchiča nii Isaías cjita žoñiqui.

JUAN BAUTISTAQUI ŽOÑINACŽQUIZ CHIIZINCHICHA

⁷ Nekztanaqui žoñinacaqui tjapa watjanacquiztan ulanžquichiča, Juanž bautista cjisjapa. Juanqui nii žoñinacžquiz cjichiča:

—Zkora irata incallñi žoñinaca. Yooz Ejpqui ujchiz žoñinaca wajillaž casticaquiča. ¿Ject ančhucaquiz nii mazzejo? ¿Nii casticu atipzjapa wejtquinž tjonya?

⁸ Kuz campiichinčuczłaj niiqui, zumapankaz kamaquiča, ančhuca campiita kuz kjana tjeezjapa. Ančhucqui anaž mit kuzziz porapat chiyasaquiča, tuž cjican: “Wejrnacqui Abrahamž majchmaatinacžquiztanpacha tjoniñča. Yoozqui anaž wejrnaca casticasača”. Jalla nižta ana chiichiiz waquisiča ančhucqui. Yoozqui tii maznacquiztan Abrahamž majchmaatinaca paasača.

⁹ Ančhucqui tsjii frut muntižtakazza. Ana zuma fruta pookñi muntiqui k'aačhtaž cjequiča jir ačtan. Jalla nuž k'aačhtiquiztanaqui, ujštaž cjequiča. Jalla nižta irataž ančhucaquiz wataquiča. Ana zuma kamañchiz žoñinaca castictaž cjequiča. —Nuž cjican paljaychiča Juanqui.

¹⁰ Jalla nekztanaqui žoñinacaqui Juanžquiz pewcziča:

—¿Jaziqui čhjulut paaqui wejrnacjo?

¹¹ Nekztanaqui Juanqui kjaaziča, tuž cjican:

—Jequit pizc almillchiz cjechaj niiqui, tsjii almillaqui ana almillchiz žoñžquin tjaasača. Tsjii wacchi čhjerchiz žoñiqui tsjii ana čhjerchiz žoñžquin niž čjeri tojnaquiča. —Nuž cjichiča Juanqui.

¹² Jalla nekztanaqui tsjii impuesto cobriñi žoñinacaqui Juanžquin tjonchiča, bautista cjisjapa. Nekztanaqui Juanžquiz pewcziča, tuž cjican:

—Tjaajiñi, ¿wejrnacqui čhjulut paaquiya?

¹³ Juanqui kjaaziča, tuž cjican:

—Lii jaruž cobraquiča. Anaž juc'anti cobraquiča ančhucqui.

¹⁴ Nižaza tsjii zultatunacaqui Juanžquiz pewcziča, tuž cjican:

—¿Wejrnaczi čhjulut paaquiya?

Juanqui kjaaziča, tuž cjican:

—Ančhucqui žoñžquiztan anaž čhjulumi kjañasača. Nižaza anaž fuerziyasača. Nižaza žoñžquizimi ana inapankaz tjojtñasača, tsjii cusasa packatzjapami. Nižaza ančhuc persun suelduchiz cuntintupanž cjee. —Jalla nuž cjican kaaziča Juanqui.

¹⁵ Tjapa žoñinacaqui Yooziž cuchanžquita Cristuž tjonz ancha tjewznatča. Jalla nižtiquiztan žoñinacaqui kuznacquiz pinsichiča: “Juanqui Cristužlani” cjican.

¹⁶ Pero Juanqui tjappacha nii žoñinacžquiz cjichiča:

—Nonžna. Wejrqui kjaztankal bautisuča. Tsjiizuñ wejt wirquin tjonča. Jalla niiqui Espiritu Santužtanami arajpach ujžtanami bautisaquiča. Jalla niča wejtquiztan tsjan juc'ant poderchizqui. Anal niž čhjata chjojkinimi atasacha, nižquiz atintisjapa. Inakaztča wejrqui.

¹⁷ Juanqui tira paljaychiča, tuž cjican:

—Ančhucqui trigo zkalažtakazza. Nii tjoñi jiliriQUI trigonaca kjojaquiča. Nekztan itsanacami zuma trigumi pjalznaquiča. Nii zuma triguQUI ricujtaž cjequiča. Niž persun kjuyquin majcžtaž cjequiča. Nii itsanacazti liwj ujžtaž cjequiča, ana tješni ujquiz. Jalla nižta irataž ančhucaquiz wataquiča.

¹⁸ Jalla nuž žoñinacžquiz chiižinchiča Juanqui. Nižaza yekja chiižintanacami paljaychiča, zuma Yooz taku paljaycan.

¹⁹ Nižaza wiruñauqui Juanqui Herodes cjita jiliržquiz iwjt'ichizakazza. Herodes cjita jiliriQUI niž jilž tjunatan zalsiča. Felipe cjitatača niž jilaqui. Nižaza Herodesqui iya anawalinaca paachitakalča. Nekztan Juanqui Herodesquiz iwjt'ichiča tjapa niž anawali paatiquiztan.

²⁰ Herodeszti ana nonziča. Juc'anti anawalinaca paachiča, Juan carsilquiz chawjczcama.

JESUCRISTUZ BAUTISTA

²¹ Juanqui ima carsilquiz chawceta želan, walja žoñinaca bautissiča. Nižaza Jesusa bautissizakazza. Jesusaqui bautista cjiscu Yooz Ejpžquin mayizatča. Nii orapacha arajpacha cjetziča.

²² Yooz Espiritu SantuQUI tsjii palumažtakaz chjiwžquichiča Jesusiž juntuñ. Nižaza arajpachquiztan tsjii altu jora paljayžquiñi nonziča. Nii joraqui tuž cjican chiižquichiča:

—Amča wejt ultim k'ayi Maatimqui. Amič cjen anchal cuntintutča wejrtqui.

JESUCRISTUZ TUQUITA ATCHI EJPNACACHA TINACAQUI

²³ Jesusaqui nii oraqui quinsatunc watchiztača. Jalla nekztanaqui niiž Yooz Epiž tjaata trabajo kallantichiča. Jesusiž tuquita atchi ejpnacaqui tinacača. Primero Josež maati cjitažtakaztača. Josequi Eliž majhtača.

²⁴ Eliqui Matatž majhtača. Matatqui Leviž majhtača. Leviqui Melquiž majhtača. Melquiqui Janaž majhtača. Janaqui Josež majhtača.

²⁵ Josequi Matatías majhtača. Matatiasqui Amós majhtača. Amosqui Nahumž majhtača. Nahumqui Ešliž majhtača. Ešliqui Nagaiž majhtača.

²⁶ Nagaiqui Maatž majhtača. Maatqui Matatías majhtača. Matatiasqui Semeiž majhtača. Semeiqui Josež majhtača. Josequi Judaž majhtača.

²⁷ Judaqui Joanaž majhtača. Joanaqui Resaž majhtača. Resaqui Zorobabelž majhtača. Zorobabelqui Salatielž majhtača. Salatielqui Neriz majhtača.

²⁸ Neriqui Melquiž majhtača. Melquiqui Adiz majhtača. Adiqui Cosamž majhtača. Cosamqui Elmodamž majhtača. Elmodamqui Erž majhtača.

²⁹ Erqui Josuež majhtača. Josuequi Eliezerž majhtača. Eliezerqui Jorimž majhtača. Jorimqui Matatž majhtača.

³⁰ Matatqui Leviž majhtača. Leviqui Simeonž majhtača. Simeonqui Judaž majhtača. Judaqui Josež majhtača. Josequi Jonanž majhtača. Jonanqui Eliaquimž majhtača.

³¹ Eliaquimqui Meleaž majhtača. Meleaqui Mainanž majhtača. Mainanqui Matataž majhtača. Matataqui Natanž majhtača.

³² Natanqui Davidž majhtača. Davidqui Isaiž majhtača. Isaiqui Obedž majhtača. Obedqui Booz majhtača. Boozqui Salmonž majhtača. Salmonqui Naasonž majhtača.

³³ Naasonqui Aminadabž majhtača. Aminadabqui Aramž majhtača. Aramqui Esromž majhtača. Esromqui Fares majhtača. Faresqui Judaž majhtača.

³⁴ Judaqui Jacobž majhtača. Jacobqui Isaacž majhtača. Isaacqui Abrahamž majhtača. Abrahamqui Tarež majhtača. Tarequi Nacorž majhtača.

³⁵ Nacorqui Serugž majhtača. Serugqui Ragauž majhtača. Ragauqui Pelegž majhtača. Pelegqui Heberž majhtača. Heberqui Salaž majhtača.

³⁶ Salaqui Cainanž majhtača. Cainanqui Arfaxadž majhtača. Arfaxadqui Semž majhtača. Semqui Noež majhtača. Noequi Lamecž majhtača.

³⁷ Lamecqui Matusalenž majhtača. Matusalenqui Enocž majhtača. Enocqui Jaredž majhtača. Jaredqui Mahalaleelž majhtača. Mahalaleelqui Cainanž majhtača.

³⁸ Cainanqui Enós majhtača. Enosqui Staž majhtača. Setqui Adanž majhtača. Adanqui Yooziž paatiquiztan Yooz maatitača.

4*SATANAS CJITA DIABLUQUI JESUSA UJQUIZ TJOJTSKATZJAPA PECATCHA*

¹ Jesusiž kuztan Yooz Espíritu Santuž kuztan tsjii kuzziztača. Jalla nuž cjen Jesusaž Jordán cjita pujquiztan okan, Espíritu Santuqui Jesusa chjitchiča ch'ekti yokquin.

² Jalla nii ch'ekti yokquin žejlchiča pusi tunc tjuñi. Jalla nuž želanaqui nii Satanás cjita diabluqui Jesusa ujquiz tjojtskatzjapa pecatcha. Jalla nii pusi tunc tjuñi Jesusaqui ana čjjeri lujlchiča. Jalla nižtiquiztan pusi tunc tjuñiquiztan ana lujlchiž cjen čjjeri eecskatchiča.

³ Jalla nekztanaqui nii diabluqui cjichiča:

—Ultim Yooz Maatimžlaj niiqui, amqui tii mazquiztan t'anta tuckatalla. —Nuž diabluqui chiichiča.

⁴ Jesusaqui kjaaziča, tuž cjican:

—Cjijrta Yooz takuqui tuž cjiča: “Zoñinacaqui anaž čhjeržtan alaja žetasača. Yooz takuča chekanaqui, jalla niiča ultim čhjerižtakazqui, Yooztan wiñaya žetjapaqui”.

⁵ Jalla nekztanaqui nii diabluqui Jesusa chjitchiča tsjii pajk cur puntiquin. Jalla nicju tjapa tii muntuquiz žejlñi yokanaca tjeeziča tsjii ratukaz.

⁶⁻⁷ Nekztanaqui diabluqui Jesusižquiz cjichiča:

—Wejt yujcquiz quillsnaquiž niiqui, nižaza wejr rispitaquiž niiqui, tjapa tii yokquiz žejlñinaca amquiz tjaataž cjequiča. Wejrqui tjapa tii yokanaca tjaača, am mantisjapa. Tii yokquiz žejlñinaca amtaž cjequiča tjappacha. Tii tjappacha wejtquiz tjaatatača. Jaziqui wejrqui jakziltižquiz tjaaz pecučhaja, jalla nižquin tjaasača. —Jalla nuž cjichiča diabluqui.

⁸ Nekztanaqui Jesusaqui kjaaziča, tuž cjican:

—Satanás, wejtquiztan zaraka. Cjijrta Yooz takuqui tuž cjiča: “Ultim arajpach Yoozquinkaz rispita. Nižaza nii alaja sirwa. Niikazza Yooz Jiliriča”, nuž cjican cjijrtača.

⁹⁻¹¹ Nekztanaqui nii diabluqui Jesusa chjitchiča Jerusalén cjita watja. Nicju timplu pjurniquin chjitchiča. Nekztan cjichiča:

—Cjijrta Yooz takuqui tuž cjiča: “Yooz Ejpqui niž anjilanaca mantaquiča, am cwitisjapa. Ninacž kjaržtan am cwitaquiča, ana am kjojcha čhjojritžta cjeyajo čhjul mazquiztanami”. Nuž cjijrtača. Jaziqui ultim Yooz Maatimžlaj niiqui, tsewctan kossuc tii yokquiz layžcalla.

¹² Nekztanaqui Jesusaqui kjaaziča, tuž cjican:

—Cjijrta Yooz takuqui tuž cjiča: “Zoñiqui ultim arajpach Yooz ana inakaz nuž yanznaquiča”.

¹³ Jalla nekztanaqui diabluqui ana čhjulu iyas pinsiñi cjissiča, Jesusa ujquiz tjojtskatzjapaqui. Nekztanaqui tsjii kjažtapacha nižquiztan zarakchiča. Wiruñ wilta ujquiz tjojtskatz yanznaquiča.

JESUCRISTUQUI YOOZ PUNTU PALJAYCAN OJKLAYCHICHA

¹⁴ Nekztanaqui Jesusaqui quejpžquichiča Galilea cjita yokquin. Walja Espíritu Santuž azziztača. Tjapa yok kjutñi niž quintuqui ancha ojkchiča.

¹⁵ Galilea yokquin želan judío ajcz kjuyanacquizimi tjaajiñitača. Niiž tjaajintiquiztan tjapa zoñinacaqui niž honora waytichiča.

NAZARET CJITA WAJTQUIN OJKCHICHA

¹⁶ Nekztanaqui niž persun watja ojkchiča, Nazaret cjita. Jalla niitača niž pajkta watjaqui. Jeejz tjuñ nojiqui ajcz kjuyquin luzziča, niž cuztrumpi jaru. Jalla nii ajcz kjuyquin žejlcan, tsijtsiča Yooz taku liizjapa.

¹⁷ Nekztanaqui Isaías cjita profetaž cjijrta Yooz taku, jalla nii libruqui chjalžtatača Jesusa liyajo. Nii libro cjetžcu wajtchiča tii cjijrta taku. Nekztan liichiča, tuž cjican:

¹⁸ “Yooz Espíritu Santuqui wejt kuzquiz žejlča. Wejrqui illztača, pori zoñinacžquiz zuma taku maznajo. Nižaza wejrqui cuchanžquitača llaquizñi zoñinaca ana llaquiz llaquizajo. Nižaza wejrqui cuchanžquitača tanta zoñinacžquiz maznajo, ‘Liwriitaž cjequiča ančhucqui’ cjican. Nižaza wejrqui cuchanžquitača zur zoñinacž čhujqui čhjetnajo. Nižaza wejrqui cuchanžquitača ana zuma langzkatta zoñinaca liwriyajo.

¹⁹ Yooz Ejpqui zoñinacžquiz zuma favora paaquiča. Jalla nuž nii zumanaca paazjapa Yooz Espíritu Santuqui wejttan chicapachača”.

Jalla nuž Yooz taku cjijrtača.

²⁰ Jalla nekztanaqui Jesusaqui nii libro pjucžcu ajcz kjuya atintiñi zoñžquiz intirjichiča. Nekztan nužquiz julziča. Tjappacha nekz žejlñi zoñinacaqui tira nižquin chekznatča.

²¹ Nekztanaqui paljayi kallantichiča, tuž cjican:

—Tonjpacha tii cjiirta Yooz taku cumplissičha ančhucaž nonžnan.

²² Nekztanaqui žoñinacaqui chiichiča, tuž cjican:

—Walikazza tii Jesusaqui.

Niž zuma chiita takunacquiztan ispantichiča. Ninacpora parlassičha, tuž cjican:

—¿Anaj tiic Juz maatiya?

²³ Nekztan Jesusaqui tuž chiichiča:

—Ančhucaquiztan žoñi wejtquiz chiyačhani, “Am kullñi žoñimžlaj niiqui, ima wejr kullcan, am persunpacha kullalla”. Wejrqui Capernaum wajtquin milajrunaca paachinča, jalla nii quintu nonzinčucča. Jaziqui ančhucqui wejtquiz tuž chiyačhani: “Nižtapacha tii am persun wajtquin paažinalla”. Nuž wejtquiz chiyačhani.

²⁴ Jesusaqui tirapan paljaychiča, tuž cjican:

—Wereral chiyučha. Yekja wajtchiz žoñinacaqui tsjii Yooz taku paljayñi profeta zuma risiwasača. Persun wajtchiz žoñinacazti nii Yooz taku paljayñi profetžquiz anaž juyzu paača.

²⁵ Tuquiqui tsjii Elías cjita Yooz taku paljayñi profeta želatča. Nii timpuqui walja žewžew maatakanaca želatča Israel wajtquinaqui. Čjep wata sojta jüzziz ana wira chijinčiča. Jalla nižtiquiztan walja mach'atača. Ana čjheri želatča nii wajtquinaqui.

²⁶ Israel wajtquin walja žewžew maatakanaca želanami, Eliasqui ninacžquin ana cuchantatača. Pero Sarepta cjita wajtquin tsjaa žew želatča, Sidón cjita wajtž žcati. Jalla naa yekja wajtchiz žewaquin cuchantatača Eliasqui. Jalla nužupan cjetča.

²⁷ Nižaza tuqui timpuzakaz tsjii Eliseo cjita Yooz taku paljayñi profeta želatča. Nii timpuqui walja mojkchi janchichiz laa žoñinaca želatča; lepra cjita conača niiqui. Pero Eliseuqui persun wajtchiz laa žoñinacžquiz ana čhjulumí čhjetinčiča. Antiz tsjii Naamán cjita Siria wajtchiz žoñžquiz čhjetinčiča. —Jalla nuž chiichiča Jesusaqui.

²⁸ Jalla nuž chiita nonžcu, tjappacha nii ajczñi žoñinacaqui muzpa žawjchiča Jesusiž quintra.

²⁹ Ninacaqui walja tsijsičha. Nekztanaqui wajtquiztan Jesusa ulanskatchičha. Nii watjaqui pajk waranc k'aw žcati želatča. Jalla nuž k'aw kjutñi Jesusa chjitchičha, nii k'awquiztan kossuc tjojtsjapa.

³⁰ Ultimquiziqui Jesusazti ninacž taypi watchičha. Ana čhjulumí kjaž cjita ojkchiča.

TSJII ZAJRAZ TANTA ŽOÑI ČHJETINTA

³¹ Nekztanaqui Jesusaqui ojkchiča Capernaum cjita watja Galilea cjita yokquin. Jalla nicjuqui jeejz tjuñ nooj Jesusaqui tjaajinčiča ajcz kjuyquin.

³² Niž tjaajintiquiztan žoñinacaqui walja ispantichiča. Jesusaqui pajk jilirž tawkžtan tjaajinčiča.

³³ Jalla nii ajcz kjuyquiz tsjii zajraž tanta žoñi želatča. Nii žoñiqui kjawchiča, tuž cjican:

³⁴ —¡Ay! Jesusa, Nazaret wajtchiz žoñimča. ¿Kjažtiquiztan am wejtnacaquiz mitizi? ¿Kjažtiquiztan wejrnac aki tjon amjo? Wejrqui am pajuča. Yooziž zuma cuchanžquita Žoñimča amqui. —Jalla nuž cjichiča nii zajraqui.

³⁵ Nekztanaqui Jesusaqui nii zajrižquiz ujziča, tuž cjican:

—¡Ch'uj žela! ¡Tii žoñžquiztan zaraka!

Jalla nekztanaqui žoñi tjojtcu zajraqui ulanchičha žoñinacaž cheranpacha. Ana nii žoñi čhjojritžcu, ecchiča.

³⁶ Nekztan tjapa žoñinacaqui ispantichiča. Jalla nekztan parlassičha, tuž cjican:

—¿Čhjul mantiñi takumekaz čiila tiiqui? Walja azziz tawkchizza. Tii žoñiqui zajramiž mantila. Tiiž mantitiquiztan zajramiž ulanla. —Nuž ispantichi parlassičha.

³⁷ Tjapa kjutñi nii yokaran Jesusiž ispantichuca paatanacquiztan walja parlasñitača.

SIMON PEDRUZ AJMUZ MAA CHJETINTA

³⁸ Nekztanaqui Jesusaqui nii ajcz kjuyquiztan ulanžcu ojkchiča. Nekztan Simonž kjuyquin luzziča. Jalla nekz Simonž ajmuž maa ch'ujlñi cona laacjichi želatča. Tjapa curpu walja kjakchi želatča. Nii žejlñi žoñinacaqui Jesusižquiz roct'ichiča:

—Chjetinžinalla, —cjican.

³⁹ Nekztanaqui Jesusaqui naa laa žona kjutñi chutjatchičha. Nekztan laa žon čhjetinchiča. Ch'ujlñi conaqui apaltichiča nužquiz. Nii orapacha naa žonqui žaazinča, nekztanaqui ninaca atinti kallantichinča.

TJAPAMAN LAA ŽOÑINACA CHJETINTA

⁴⁰ Nekztanaqui tjuñiz kattan, žoñinacaqui tjapaman laa žoñinaca zjicchiča, Jesusa čhejtnažo. Nekztan Jesusaqui zapa maynižquiz persun kjaržtan lanziča. Jalla nuž lanžcu čhjetinchiča.

⁴¹ Nižaza tsjii kjaž laa žoñinacžquiztan zajranaca ulanskatchičha. Jalla nuž ulanskatan zajranacaqui kjawchiča:

—Yooz Maatimča amqui, —cjican.

Nii zajranacaqui zizatča, Yooziž cuchanžquita Cristupankazza Jesusaqui, jalla nii. Jalla nižtiquiztan Jesusazti zajranacžquiz ujziča, tuž cjican:

—Jalla wejt puntuquiztan anapanča chiichiisqui.

JESUSAQUI YOOZ ZUMA KAMAÑ PUNTU PALJAYCHICHA

⁴² Niiž jakakattaž wentan Jesusaqui wajtquiztan ulanchičha, ana žoñž žejlz yokquin. Pero nii wajtchiz žoñinacazti walja nii kjurchičha. Nižtami kjurñi žoñinacaqui iran-tichičha jakziquin Jesusa želatčhaj, jalla nicju. Nii žoñinacaqui Jesusaž atajs pecatča, ana jakziquinami okajo.

⁴³ Pero Jesusaqui ninacžquiz cjichičha:

—Yekjap watjanacquin jaknužt žoñinacaqui Yooz zuma kamañchiz kamz waquizičhaja, jalla nii paljayzquiztanča wejrqui. Jalla nijapa wejrqui tii muntuquiz cuchanžquitača.

⁴⁴ Jalla nuž paljaycan Jesusaqui ojklaychiča Galilea yokaran. Jalla nuž ojklaycan ajcz kjuyquizimi paljayñitača.

5*JESUCRISTUQUI MILAJRU PAACHICHA*

¹ Tsjii nooj Jesusaqui tsjii pajk kot atquin želatča. Genesaret cjitača nii pajk kotaqui. Jalla nekz želan walja žoñinacaqui nižžquin tjonchiča. Yooz taku nonzjapa nižž muytata anča ts'acjasatča.

² Jesusaqui pizc laachi warcu cherchiča kot atquiz. Tsjii ch'iz tanñi žoñinacaqui warcunaca ecchitača. Ninacaqui ch'iz tanz rednaca awjnatča.

³ Jalla nekztanaqui Jesusaqui Simón cjita žoñž warcuquiz luzziča. Simonžquiz nii warcu koluc atskatchičha kot mor kjutñi cheechi. Jesusaqui warcuquiz julžcu, žejlñi žoñinacžquin tjaajñi kallantichičha.

⁴ Jalla nuž žoñinacžquiz tjaajñi žeržcu, Simonžquiz cjichičha:

—Tii warcu am chjicha tsjan kos kjutñi. Jalla nekztan am ch'iz tanz rednaca tjojtžna.

⁵ Simonaqui kjaaziča tuž cjican:

—Wejt Tjaajñi Maestro, zeziqui wejrnacqui pakara langzinča, pero ana zinta ch'iz tanchinča. Nižtaqui amiž mantanaqui wejt ch'iz tanznaca tjojtžnača.

⁶ Nekztanaqui ch'iz tanz tjojtžcu, walja muzpa ch'iz tanchi jooziča, redmi wjajrzñi kallantichičha.

⁷⁻⁸ Nii oraqui ninacž mazinaca yekja warcuquintača koluc ažkquinalla. Ch'iz tanz wjajrzñi kallantiquiztan mazinaca kjaržtan wilžcu, kjawziča yanapi tjonajo. Nii

mazinacaqui irantižcu, nii pizc warcuquiz ch'iztan chjijsiŋa. Ch'iztan jos nii kotquiz kos julzñi tjurchiŋa nuž wacchi ch'iz tanziž cjen. Nii cheržcu, Simón Pedruqui Jesusiž yujcquiz quillziŋa. Nekztan cjichiŋa:

—Wejt Yooz Jiliri, ancha ujchiz zoñtŋa wejrqui. Amtan chica ojklazqui anal waquizuŋa.

⁹ Jalla nii wacchi ch'iz tanchiž cjen, Simonaqui walja ispantichiŋa, nižaza niž mazinacami.

¹⁰ Tsjii pucultan mazinacaqui Jacobžtan Juanžtan cjitataŋa. Ninacaqui Zebedeož majchnacataŋa. Jacobžtan Juanžtan nižaza ispantichi cjissiŋa. Jesusaqui Simonžquiz cjichiŋa:

—Ana am tsuca. Jalla tekztan nawjkchuc jaknuž ch'iz juntichamžlaja, jalla nižta irata amqui zoñinacam juntaquiŋa Yooztajapaqui.

¹¹ Jalla nekztanaqui warcunaca yokquin irantiskatžcu, ninacaqui tjappacha ecchiŋa. Nižaza nii ch'iz tanz langz jaytichiŋa Jesusižtan chica ojklazjapa.

MOJKCHI JANCHICHIZ LAA ZOÑI CHJETINTA

¹² Tsjii noojiqui Jesusaž tsjii wajtquiz želan, tsjii mojkchi janchichiz laa zoñi tjonchiŋa. Jesusa cheržcuqui, niž yujcquiz puct'ichiŋa yokquizpacha. Jalla nekztanaqui rocchiŋa, tuž cjican:

—Wejt Jiliri, wejr čhjetnalla. Am wejr čhjetinzim pecčhaj niiqui, wejr čhjetinzim atča amqui.

¹³ Nekztanaqui Jesusaqui kjaržtan lanziŋa, tuž cjican:

—Wejr am čhjetnasachiya. Jaziqui čhjetintam cjissa.

Jalla nuž čhiitiquiztanaqui nii orapacha nii zoñiqui žejtchi cjissiŋa mojkchi janchi laaquiztan.

¹⁴ Nekztanaqui Jesusaqui nii zoñi mantichiŋa ana jeczquizimi nuž nii čhjetinta puntu čhiichiyajo. Nižaza cjichiŋa:

—Timpluquin oka amqui. Timplu jiliržquin persuna tjeežca. Nižaza čhjetintiquiztan Moisés mantitacama paa. Jaknužt Moisesqui ofrenda uchajo mantičhaja, jalla nuž ofrenda uchaquiŋa. Jalla nižtiquiztan zoñinaca am žejtchi zizaquiŋa. Jazic oka amqui.

—Nuž mantichiŋa Jesusaqui.

¹⁵ Jalla nuž ana chiyajo mantichiž cjenami, Jesusiž paata puntu juc'anti juc'anti parlita cjissiŋa tjapa kjutñi zoñinaczquin. Jalla nii quintu nonžcuqui, ju'anti zoñinacaqui ajcsquichiŋa Jesusiž taku nonžjapa. Nižaza laanacami ajczquichiŋa Jesusaž čhjetinta cjisjapa.

¹⁶ Jalla nižtiquiztanaqui Jesusaqui nii zoñinaczquiztan zarakžcu ana zoñinacz žejlz yokquin ojkiŋa. Jalla nii yokquin Yooz Ejpžquin mayizichiŋa.

ZUCH ZOÑI CHJETINTA

¹⁷ Tsjii nooj niž wiruñ Jesusaqui tjaažnatčha. Jalla niiran fariseo cjita zoñinacaqui julzi želatčha, nižaza judiuž kamañ lii tjaajiñi zoñinaca želatčha. Jalla ninacaqui tjapa Galilea watjanacquiztan tjonchiŋa, nižaza Judeaquiztan, nižaza Jerusalenquiztan. Nižaza Jesusaqui laa zoñinaca čhjetincan, Yooz azi tjeeziŋa.

¹⁸ Jalla nekztanaqui tsjii kjaž zoñinacaqui tsjii zuch zoñi zjicchiŋa tjajz zquitquiz callžcu. Irantižcu kjuyquiz majcz pecatčha. Jesusiž yujcquiz nonzinz pecatčha.

¹⁹ Pero muzpa zoñinacacz ajcsiž cjen, ana Jesusižquin macjati atchiŋa. Nekztanaqui kjuya yawžcu, tsewctan kjuya pjetčiŋa, tejanaca apakžcu. Pjetquiztan nii zuch zoñi tsewctan kjuyłchuc majcchiŋa tjajz zquitquiz callžcu. Kjuyltan žejlñi zoñinacz taypi nuž Jesusiž yujcquin apjatchiŋa.

²⁰ Ninaca tjapa kuztan tjonchi nayžcu Jesusaqui laa zoñžquiz cjichiŋa:

—Jilala, jaziqui am ujnacaqui pertuntačha.

21 Jalla nekztanaqui judiuž kamañ lii tjaajiñinacžtan fariseonacžtan kuzquiz pinsi kallantichiča, tuž cjican: “¿Ject tii žoñejo? ¿Kjažtiquiztan nižta chiijo? Yooz quintra anawalipanla tii žoñž takuqui. ¿Ject ujnaca pertunasajo? Yoozpanikazla ujnacaqui pertunñiqui”. Jalla nuž pinsichiča nii žoñinacaqui.

22 Jesusaqui persun kuzquiz ninacaž pinsita naychiča. Nekztan ninacžquiz paljay-chiča, tuž cjican:

—¿Kjažtiquiztan anchuca kuz nižta pinsejo?

23 ¿Jaksilta takut pjasila chiiz cjesajo? Tii zuch žoñžquiz chižinsjo, “Am ujnacami pertunta”, ¿cjis pjasila cjesaj? už “Tsijsna. Am tjaz zquti aptižcu oka”, ¿nuž chiiz pjasila cjesaj?

24 Tsewctan cuchanžquita Yooz Zoñtča wejrqui. Tii muntuquiz jiliritča, ujnaca pertunjapa. Razunal chiyuča. Jalla nii zizjapa ančhucqui tiž chera.

Nekztanaqui zuch žoñžquiz cjichiča:

—Amquiz cjiwča, tsijtsna. Am tjaz zquitinaca aptaza. Oka am kjuya. —Nuž cjican chiichiča Jesusaqui.

25 Nii orapacha nii zuch žoñiqui tsijtsiča, žoñinacaž cheranpacha. Tjaz zquti aptižcu, persun kjuya ojkchiča. Yooz honora waytican ojkchiča.

26 Jalla nižta cheržcu tjapa žoñinacaqui walja ispantichi quirchiča. Ekeksan ninacaqui Yooz honora waytichizakazza. Nižaza ninacpora parlassizakazza:

—Tonj tjuñiqui walja ispantichucanaca cherchinčhumča.

LEVI CJITA ŽOÑIQUI JESUSIZQUIN KUZIZ CJISSICHA

27 Jalla nekztanaqui Jesusaqui ulanchiča. Jalla nuž ulanžcu tsjii Leví cjita žoñi cherchiča. Impuesto cobriñi žoñitača niiqui. Impuesto cobriñi puestuquiz julzi želatča žoñinacžquiz cobrican. Jesusaqui nii žoñžquiz cjichiča:

—Wejttaž ojkla.

28 Nekztanaqui Leví cjita žoñiqui tsijtsiča. Impuesto cobriz langz apatatžcu, Jesusižtan chica ojkchiča.

29 Nekztanaqui Jesusižtan pijista paazjapa, Leviqui persun kjuyquiz zuma čjeri tjacziča. Čjeri lujlcan Jesusaqui impuesto cobriñinacžtan nižaza yekja ujchiz žoñinacžtan chica julzi želatča.

30 Jalla nii cheržcu, fariseo žoñinaca nižaza judiuž lii tjaajiñi maestrnaca jalla ninacaqui Jesusiž tjaajinta žoñinacžquiz chuchi kallantichiča, tuž cjican:

—¿Kjažtiquiztan impuesto cobriñinacžtanami ujchiz žoñinacžtanami čjeri lujl ančhucjo?

31 Nekztanaqui Jesusaqui nuž nonžcu kjaaziča ninacžquiz, tuž cjican:

—Wiw žoñinacaqui kullñi žoñi anaž pecasača. Antiz laa žoñinacaž pecchiya.

32 Wejrqui “zumal kamuča” cjiñi žoñinacžquiziqui anal kjawzñi tjonchinča. Antiz “ujchizpanča” cjiñi žoñinacžquiz kjawzñi tjonchinča, ninaca Yoozquin kuzziz cjisjapa.

AYUNAS PUNTU

33 Jalla nekztanaqui žoñinacaqui Jesusižquiz chiichiča, tuž cjican:

—Juanž tjaajintanacami fariseož tjaajintanacami walja ayunasñiča. Y nižaza ninacž cuzturumpi jaru walja Yoozquin mayiziñiča. Pero amiž tjaajinta žoñinacazti ana ayunasñipanla. ¿Kjažtiquiztan nižtajo? Čjeriž lujlžla, nižaza mazk'a kjaz licžla, nižtakazla. —Nuž cjican uj tojtunz pecchiča nii žoñinacaqui.

34 Nekztanaqui Jesusaqui ninacžquiz kjaaziča, tuž cjican:

—Zals pijstiquiz žoñinacaž impittaž cjenacqui, ¿kjažt zalsñi žoñžtajapa ayunasasajo? Nii zalsñi žoñi želanpacha anaž ayunasasača.

35 Tii jarquin nii zalsñi žoñiž kjañtaž cjen, jalla nekztanž ayunasasača.

³⁶ Tsjii taku chiichizakazza, tuž cjican:

—Anaż jecmi tsjii ew zquitquiztan riminta apakasača, tsjelanzi zquti rimintisjapa. Jalla nuž paaquiz niiqui, nii ew zquti pertisnaquičha. Nižaza nii ew riminta apjattaqui tsjel zquitquiztan tsjemata cjequičha.

³⁷ Nižaza anaž jecmi tsjii zijzi zkiz luusquiz ew vino alznasača. Nižta alznasaž niiqui, zkiz luus wjajrskatasacha ew vinuqui. Nekztanaqui zkiz luusmi vinumi pizcpacha pertisnasača.

³⁸ Ew vinuqui ew zkiz luusquizpanž alznasača. Nekziqui zkiz luusmi vinumi zumapanž cjesača.

³⁹ Y nižaza t'amchi vinu licžcu, anaž ew vinu pecasača. “Wejtta t'amchi vinuqui walikazza”, cjican cjequičha. Nižtazakaz žoñinacaqui Yooziž tjaata ew kamaña ana pecasača.

6

TSJII JEEJZ TJUŃQUIZ WATTA

¹ Tsjii jeejz tjuñ nooiqui Jesusaqui zkal taypiranž okatča niž tjaajinta žoñinacžtan. Jalla nuž ojkcan niž tjaajinta žoñinacaqui tric oza kjajpchiča. Nuž kjajpžcu kjaržtan kjojchiča. Nekztan lujlchiča.

² Nii cheržcu tsjii kjažultan fariseo žoñinacžti ninacžquiz pewcziča, tuž cjican:

—¿Kjažtiquiztan ančucqui nižta paajo? Jeejz tjuñquiziqui nižta anapanča paazqui. Učhum lii quintrala, ¿ana jaa?

³ Nekztanaqui Jesusaqui ninacžquiz kjaaziča, tuž cjican:

—Ančucqui Yooz taku liichinčucpanča, ¿ana jaa? Cjijrta Yooz takuqui tuž cjiča: učhum David cjita tuquita atchi ejpqui niž mazinacžtan čhjeri eecskatchičha.

⁴ Čhjeri eeczanaqui arajpach Yooz timpluquin luzziča. Nicju Yooz yujcquiz nonžta t'antanaca želatča. Jalla nii t'anta aptižcu, lujlchiča. Nižaza niž mazinacžquiz tojunchiča. Anapantača permitta nii t'anta lujlsqui ina žoñžlaqui. Nižta lujlžcuqui, lii quintrala niiqui. Timplu jilirinacžtapankaz nii t'anta lulaj cjitaqui.

⁵ Nižaza Jesusaqui ninacžquiz cjichiča:

—Wejrqui tsewctan cuchanžquita Yooz Zoñtča. Jeejz tjuñquizimi čhjulu paaz cjenami mantasača. —Nuž cjichiča Jesusaqui.

KJARA KJOŃCHI ZOŃI ČHJETINTA

⁶ Niž wiruñ jeejz tjuñquiziqui Jesusaqui luzziča judionacž ajcz kjuyquiz. Jalla nii ajcz kjuyquin tjaajni kallantichiča. Nicju tsjii žoñi želatča žew kjara kjoñchi.

⁷ Nižaza judiuž lii tjaajiñinacžtan, fariseonacžtan želatča. Nii žoñinacaqui Jesusaž awayt'atča, jeejz tjuñquiziqui čhjetnaqui anaž čhjetna, jaa, jalla nii. Jalla nuž awayt'atča, Jesusiž quintra nii jaru aptisjapa.

⁸ Pero Jesusaqui nižta ana wali pinsitanaca kuzquiz naychipanča. Jalla nekztanaqui kjara kjoñchi žoñžquiz paljaychiča, tuž cjican:

—Tsijsna. Tii taypiquin cjisna.

Nuž chiitiquiztanaqui nii žoñiqui nii taypiquin tsijtsičha.

⁹ Nekztanaqui Jesusaqui parti žoñinacžquiz paljaychizakazza, tuž cjican:

—Wejrqui ančucaquiz tsjii pewcsnasača. ¿Jeejz tjuñquiziqui učhum liiqui kjažt cjeejo? žoñžquiz zuma paasaya uz žoñžquiz ana zuma paasaja. Žoñž wira liwriyasaya uz žoñž wira ticskatasaja. Ančucqui zumpacha zizza, zuma paazqui učhum lii jaručha jeejz tjuñquizimi. —Jalla nuž cjican, chiižinchiča Jesusaqui.

¹⁰ Jalla nekztanaqui Jesusaqui niž mytata žejlñi žoñinacž kjutni chercherziča. Nekztan kjara kjoñchi žoñžquiz cjichiča:

—Am kjara chjinzna.

Nii žoñiqui nuž kjara chjinžcu niž kjara žejtchi quirchiča.

¹¹ Quintra žoñinaczi ni cheržcu walja žawjchiča Jesusiž quintra. Jalla nekztanaqui ninacpora pewcsarassiča, jaknužt Jesusiž quintra paa-as, jalla nii.

TUNCAPAN APOSTOLONACA ILLZTA

¹² Niiž wiruñiqui Jesusaqui tsjii curullquin ojkchiča Yooz Ejpžquin mayizi. Ween pakara Yooz Ejpžquin mayizichiča.

¹³ Tjuñiž tjewctanalla, niž tjaajinta žoñinaca kjawziča. Kjawžcu, Jesusaqui tunca-pani illziča niž mantita apostolonaca cjisjapa.

¹⁴ Nii illzta apostolonacaqui tuž cjita tjuunacchiztača: Simonatača; nižaza niž tsjii tjuuqui Pedro cjitazakaztača. Andrestača, Simonž lajk Jacobotača. Juantača. Felipetača. Bartolometača.

¹⁵ Mateotača. Tomasatača. Jacobotača; niiqui Alfeo cjita žoñž majchtača. Simonatača, nižaza niiqui Canaan t'akquiztantača.

¹⁶ Judastača, Jacobž lajk; nižaza Judas Iscariotitača; jalla niiqui Jesusiž quintra tarazunchiča.

¹⁷ Jalla nekztanaqui Jesusaqui niž illztanacžtan chjijwžquichiča curullquiztan. Pampiquin irantižcu, niž tjaajinta žoñinacžtan tsijsiča. Nicju wacchi žoñinaca želatča, tjapa kjuttan Judea yokquiztan, nižaza Jerusalén wajtquiztan, nižaza Tiro yokquiztan, nižaza Sidón yokquiztan, jalla nii yokanacquiztan tjonchiča. Nii žoñinacaqui Jesusiž takunaca nonzñi irantižquichiča. Yekjapanacaqui tjonchiča laanacquiztan čhjetinta cjisjapa.

¹⁸ Nižaza yekjapanacaqui tjonchiča zajranacaž tantiquiztan liwriita cjisjapa. Jalla nekztanaqui Jesusaqui ninaca čhjetinchiča.

¹⁹ Jesucristuqui čhjetinz azziztača. Nižaza Jesusaqui tjapa nii žejlñi laanaca čhjetinchiča niž aztan. Tjappacha laa žoñinacaqui Jesusa lanz pecatča, čhjetinta cjisjapa.

JESUSIZ TJAAJINTANACA

²⁰ Nekztanaqui Jesusaqui niž tjaajinta žoñinacž kjutñi cherziča. Nekztan paljay-čiča, tuž cjican:

–Ančhucqui porinaca, Yooz mantita zuma kamañiqui ančhucaltajapača. Jalla nižtiquiztan cuntintuž cjee.

²¹ 'Chjeri eecsñinaca, wiruñ Yoozqui ančhucaquiz wali cjiskataquiča, tsjii čhjeržtan chjekchižtakaz. Jalla nižtiquiztan cuntintuž cjee.

'Llaquitanaca, anzič ančhuc kaačan. Wiruñiqui ananiiž chipchipaquiča. Jalla nižtiquiztan cuntintuž cjee.

²²⁻²³ 'Ančhucqui, Yooz Majchquin sirwiñi žoñinacčhucča. Quintra žoñinacaqui ančhucaquiz chjaawjkatča. Nižaza jakurpayaquiča. Nižazaž ch'aanaquiča. Nižaza iñaraquiča. Ančhucaquiz ana zumapanž nayaquiča. Jalla nuž cjenami ancha cuntintuž cjee. Ančhuczi arajpachquin ojkžcu, wali kamañ wira tanznaquiča, tsjii chawc premiužtakaz. Nižtapan tuquitanpacha tii žoñinacž tuquita atchi ejpnacaqui Yooz sirwiñi profetanacžquiz chjaawjkatñipantača. Jalla nižtiquiztan anzič cuntintuž cjee.

²⁴ 'Ančhucqui ricachunaca, cuntintukaz tii wirquiz kamchinčhucča. ¡Wiruñ anawali-panž ančhucaquiz wataquiča!

²⁵ 'Ančhucqui zuma cusasanacchiz kamchinaca, porižtakaz cjisnaquiča. Yoozquin ana cjuñiž cjen t'akjiriž cjisnaquiča. Ana walnacquiztan chipchinaca tsjii noojiqui ananiiž kaaquiča nižaza llaquitaž cjequiča.

26 'Ančhucqui, Yooz taku chiitažoka cjiñi žoninacčhucča. Tjapa žoñinacaqui ančuca honora waytaquiz̄ niiqui ančucaquiz̄ juc'ant anawaliž cjequiča. Tuquitapacha tii žoñinacž tuquita atchi ejpnacaqui nižtapan honora waytichiča toscara chiichiñinacžquiz̄.

QUINTRA ZOÑINACŽTANAMI ZUMA KUZZIZPANŽ CJEE

27 'Ančhucqui, wejt taku nonzñinaca, ančucaquiz̄ tuž cjiwča: Ančuca quintra žoñinacžtanami zuma kuzzizpanž cjee. Y nižaza zumapanž ninacžtan paa, nižaza ančuca chjajwkatñinacžtanami zumapanž cjee.

28 Nižaza ančuca quintra laykiñi žoñinacžquiz̄ zuma tawkžtan paljaya ančhucqui. Nižaza ančhuc iñariñi žoñinacžtajapa zuma tawkžtan Yoozquin mayt'izina.

29 Jakziltamiž am yujcquiz̄ kichasaž niiqui, ana nižtapacha amqui kicha. Anača cutjatzqui. Nižaza jakziltamiž am ira kjañasaž niiqui, nii kjañaj cjee.

30 Nižaza jakziltamiž amquiztan mayi tjonasača, nuž tjaa. Jakziltamiž amquiztan kjañasača, nuž kjañaj cjee. Anam amqui quijasača.

31 Jaknužt ančhucqui parti žoñinaca ančhucatan zuma kamz pecchaj niiqui, jalla nižtapacha ančhucqui žoñinacžtan zuma kama.

32 'Yekjapanacaqui ančhucatan zumaž munaziča. Ančhucqui ninacžtan alajapankaz zuma munazaquiz̄ niiqui, ¿kjažtiquiztan ančhucqui "Zumal paa-uča" cjican chiyasajo? Nižta iratazakaz paača anawal kuzziz žoñinacami.

33 Yekjapanacaqui ančucaquiz̄ yanapča. Ančhucqui ninacžtan alajapankaz yanapaquiz̄ niiqui, ¿kjažtiquiztan ančhucqui "Zumal paa-uča" cjican chiyasajo? Nižta iratazakaz paača anawal kuzziz žoñinacami.

34 Yekjapanacaqui ančucaquiz̄ onza. Ančhucqui ninacžtan alajapankaz onznaquiz̄ niiqui, ¿kjažtiquiztan ančhucqui "Zumal onznuča" cjican chiyasajo? Nižta irata zakaz paača anawal kuzziz žoñinacami. Nekztan tsjii onzñizakaz tjewza.

35 Pero ančhucqui quintra žoñinacžtanami zuma munazizpanž waquiziča. Nižaza ančhucqui quintra žoñinacžquizimi yanapz panž waquiziča. Nižaza ančhucqui onžcum̄ anaž tjewz waquiziča "Niimiž onz, jaa" cjicanaqui. Jalla nuž kamtiquiztan tanaqui Yoozqui ančucaquiz̄ tsjii pajk honora tjaaquiča. Nižaza nuž kamtiquiztan ančhucqui tjeeža werar arajpach Yooz maatinacaž, nii. Nižaza nuž kamcanaqui Yooz irataž kamča. Yoozqui okzñizakazza quintra žoñinacžquiziqui.

36 Yooz Ejpqui walja okzñipanča. Nižta irata ančhucqui okzñi kuzziz cjee.

ZUMA KAMAQUICHA

37 'Ančhucalaqui anača žoñinacž uj paatanaca chii chiizqui. Jalla nuž žoninacž uj paatanaca chii chiyaquiz̄ niiqui ančhucqui juc'ant ujchiz cjequiča Yooz yujcquiziqui. Nižaza žoñinacžquizimi "Amqui Yooziž castictaj cjila", cjican chiyaquiz̄ niiqui ančhucqui Yooziž casticta zakaz cjequiča. Nižaza jakzilta žoñit ančuca quintra uj paačhaja, jalla nižquiz̄ pertunz waquiziča. Nekztan Yoozqui ančucaquiz̄ ujnaca zakaz pertunaquiča.

38 Ančhucqui okzñi kuzziz žoñinacžquizimi tjaa. Jalla nuž tjaan Yoozqui ančucaquiz̄ juc'anti tjaaquiča. Jalla tuž Yoozqui tjaaquiča. Ančuca quelzquiz̄ chjijpi tjaaquiča. Tsajtscu tsajtscu nižaza walja kala ts'aczu tjaaquiča. Jakziltat tuptalla tjaačhaja, jalla nižquiz̄ nuž tuptalla zakaz Yoozqui tjaaquiča. Nižaza jakziltat čjuñi kuzziz tjaačhaja, jalla nižquiz̄ nuž čjuñi zakaz Yoozqui tjaaquiča.

39 Jesusaqui tsjii takunacžtan chiichiča, tuž cjican:

—¿Jaknužt zur žoñiqui yekja zur žoñi irpiñižtakaz zuma chjichasajo? Pucultanpachaž ojtquiz̄ tjojtsnasača. Jalla nižtaž ana zuma cjicjiñi žoñinacaqui.

⁴⁰ Tsjiilla cjesača. Tsjii tjaajinta žoñiqui niiz tjaajiñizquiztan anaž juc'anti cjesača, aunquimi istutiižcu tjaajiñi maestrupanikaz cjequiča. —Jalla nuž tjaajinchiča Jesusaqui.

UJ PUNTUQUIZTAN

Nižaza Jesusaqui tjaajinchiča, tuž cjican:

⁴¹ —Amqui am jilž čhujcquiz tsjii cjuchilla cherasaž niiqui, ¿kjažtiquiztan am persun čhujcquiz pajk cjuchchi ana cherjo?

⁴² Am persun čhujcquiz nii pajk cjuchchi ana cherasaž niiqui, ¿kjažtiquiztan am jilžquiz chiijo, “Jila, am čhujcquiztan nii cjuchilla apakžinača”, cjicanajo? Ana zum žoñiča amqui. Primeruqui am persun čhujcquiztan pajk cjuchchi apakalla. Nekztan zuma cherasača. Y nižaza am jilž čhujcquiztan cjuchilla apakasača. —Jalla nuž tjaajinchiča Jesusaqui uj puntuquiztan.

ZOÑINACAQUI PAJTAZ CJESACHA NINACZ KAMTIQUIZTAN

⁴³ Nižaza žoñinacž kamañ puntuquiztan Jesusaqui tjaajinchiča tuž cjican:

—Tsji zum muntiquiztan ana zum frutanaca anawira pookasača. Nižaza tsjii ana zum muntiquiztan zum frutanaca anazakaz pookasača.

⁴⁴ Nižaza zapa muntinaca niiz frutanacquiztan pajza. Jalla nižtiquiztan tsjii ch'ap muntiquiztan higo fruta anaž pooki atasacha. Nižaza tsjii ch'ap muntiquiztan uwas fruta anaž pooki atasacha.

⁴⁵ Tsjii zuma kuzziz žoñiqui zuma takunaca paljayñipanča. Tsjii ana zuma kuzziz žoñizti ana zuma takunaca paljayñipanča. Jaknužt kuzquiz pinsičaja, jalla nuž chiiča žoñinacami.

⁴⁶ Jesusaqui cjichizakazza:

—Ančhucqui anaž weriž chiitacama kamča. Jaziqui, ¿kjažtiquiztan ančhucqui wejt tjuu aynakjo, wila wiltajo, “Wejt Jiliri, wejt Jiliri”, cjicanajo?

⁴⁷ Yekjap žoñinacazti wejtquin tjonžcu wejt takunaca tjapa kuz nonža Nižaza weriž chiitacamaž kamča. Jalla tižtaž nii žoñiqui.

⁴⁸ Jalla nii žoñiqui kjuya kjuychiča. Primeraqui yoka jwetchiča, maz zalzjapa. Nii mazquin zalžcu, jalla nii maz juntuñ chjucziča nii kjuy simintu. Nekztan kjuya pirkichiča. Wiruñiqui tsjii puju kjaz chjippi ojkchiča, walja pjatsi. Nekztanaqui nii kjazqui ojkchiča, kjuya t'eznata. Pero anapan t'ezni atchiča. Nii kjuyaqui maz juntuñ kjuytatača.

⁴⁹ Yekjap žoñinacazti wejt taku ana tjapa kuz nonža. Nižaza weriž chiitacama anaž kamča. Jalla tižtaž nii žoñiqui. Jalla nii žoñiqui kjuyazakaz kjuychiča, ana maz simintuchiz. Wiruñiqui nižazakaz tsjii puju pjatzi, kjazqui kjuya t'ezinsjapa ojkchiča. Nekztanaqui nii kjuyaqui ezziča. K'ala kuztača. Jalla nižtaž nii ana weriž chiitacama kamni žoñiqui.

7

TSJII CHJETINTAQUI

¹ Jesusaqui nuž paljayz žeržcuqui, Capernaum cjita watja ojkchiča.

² Nicju tsjii romano zultat jiliri želatča. Niiž ancha zuma piyunaqui ancha laatača, ticzmayatača.

³ Nii zultat jiliri qui Jesusiž quintu zizcu, tsjii kjažultan judionacž jilirinaca cuchanžquichiča, Jesusižquiz rocžcajo niiz piyuna čhjetnajo.

⁴ Jalla nekztanaqui mantita žoñinacaqui Jesusižquiz macjatchiča. Nekztanac ancha roct'ichiča, tuž cjican:

—Tii zultat jiliri qui ancha zumača. Jalla nižtiquiztan yanapchucapanča.

⁵ Učhum watja walja rispitiča. Nižaza tsjii učhumž ajcz kjuya kjuykatchiča niiqui.

6-7 Nekztanaqui Jesusaqui nii rocñinacžtan ojkchiča. Kjuya žcati cjisnan, nii zultat jiliriqiu tsjii niž mazinaca cuchanžquichiča, Jesusižquiz chii, tuž cjican:

—Wejt jiliri, am yujcquizic anal waquizuča, am wejt kjuyquiz luzajo. Wejrqui persunpacha eksinča am kjuri ojkzjapa. Am ojkzqui ch'amaž cjesača. Tekztanpacha tsjii taku chiyalla. Nuž amiž chiitiquiztanac žetaquiča wejt piyunaqui.

8 Wejrmi wejt jiliriž mantitacama ojklayiñča. Nižaza wejt zultatunacaqui weriž mantitacama ojklayiñča. Jaziqiu tsjiimil mantuča, “Oka” cjican. Nekztan ojkča. Nižaza tsjiimil kjawznuča. Nekztanac tjonča. Nižaza tsjiimil mantuča, “Tižta paa” cjican. Niimi zakaz paača. Nižtazakaz amqui mantasača, wejt piyuna žetajo.

9 Jalla nižta taku nonžcu, Jesusaqui, chiichiča:

—Cusapachaž chiiča nii žoñiqui, —cjican.

Nekztanaqui apsni žoñinacž kjutni chersiča. Cheržcu tuž cjichiča:

—Chekapan tii žoñiqui juc'ant Yoozquin kuzzizza tjapa Israel wajtchiz žoñinacžquiztanami.

10 Nii jiliriž cuchanta žoñinacaqui jilirž kjuya irantižcu chekapan laa piyuna žejtchi zalchiča.

TSJII ZOŃI JACATATCHI

11 Wiruñaqiu Jesusaqui tsjii Naín cjita watja ojkchiča, niž tjaajinta žoñinacžtan nižaza tama žoñinacžtan.

12 Wajt žcati irantižcu, tsjii alma callni cherchiča. Jalla nii ticziqiu zinta maatitača. Niž maaqiu žewtača. Walja nii wajtchiz žoñinacaqui cumpaňtatča.

13 Cheržcu, Jesucristu jiliriqiu naa maatak žonaquiz okziča, tuž cjican:

—Ana kaa amqui.

14 Nekztanaqui Jesusaqui žcatžinchiča. Almiž cajuna lanziča. Alma callñinacaqui nužquiz tsijtsiča. Nekztanaqui Jesusaqui ticzi žoñžquiz cjichiča:

—Jilala, amquiz cjiwča, “Zaažna”.

15 Jalla nii chiitiquiztanaqui nii ticzi žoñiqui žaaziča. Nekztanac chii kallantichiča. Nekztanaqui Jesusaqui niž maaquiz intirjichiča.

16 Jalla nuž cheržcu, tjappacha tsucchiča. Nižaza tjappacha Yoozquin honora waytichiča, tuž cjican:

—Učhum wajtquizpacha tsjii chawc Yooziž cuchanžquita žoñiqui jecsila, oré. Yoozqui niž wajtchiz žoñinaca yanapi tjonchiča.

17 Jalla nekztanaqui tjapa Judea yokaran nižaza nii yok tjiyaran Jesusiž zuma paata quintu ojkchiča.

JUAN BAUTISTAQUI JESUCRISTUZ PUNTU ZIZ PECCHICHA

18 Juan Bautistaž tjaajinta žoñinacaqui nii žoñi jecatatchi quintu quint'ichiča Juanžquiz. Jalla nižtiquiztan Juanqui Jesusiž quintu zizzizakazza. Nekztanaqui pucultan niž tjaajintanaca kjawziča.

19 Nekztan Jesusižquin cuchanžquichiča, nižquin pewcznajo, tuž cjican:

—Cristuqiu tjonitaž cjila. ¿Amqui Yoozquiztan cuchanžquita Cristumpankaya; uz yekjaž tjonasaj?

20 Juanž cuchanta žoñinacaqui Jesusižquin žcatžinchiča. Jalla nekztanaqui irantižcu, cjichiča:

—Juan Bautistaqiu wejrnacž cuchanžquiča amquiz pewcznajo: “Cristuqiu tjonitaž cjila. ¿Amqui nii Cristumkaya, uj yekjaž tjonasaj?”

21 Nii orapacha nuž irantitiquiztan Jesusaqui walja žejlñi laanaca čjetinchiča. Nižaza zajraž tanta žoñinaca čjetinchiča. Nižaza zur žoñinacž čhujqui čjetinchiča.

22 Jalla nekztanaqui Jesusaqui ninacžquiz kjaaziča, tuž cjican:

—Juanžquin quepa. Amiž chertanaca nonžtanaca quint'ižca. Weriž paatanaca mazca. Zur žoñinaca cheržni cjissila. Nižaza coj žoñinaca zuma kjojchchiz ojklayiñi

cjissila. Nižaza mojkchi janchichiz žoñinacami zuma janchichiz žejtči cjissila. Nižaza oñ žoñinacami nonžni cjissila. Nižaza ticzi žoñinaca jacatatchi cjissila. Nižaza pori žoñinacžquiz Yooz liwriiñi taku paljaytapanča.

²³ Jakziltat weriž paatanaca, chiitanaca nonžcu ana kuz turwayzižlaj niiqui, wali-panikaz cjequiča.

JUAN BAUTISTAZ PUNTU

²⁴ Juanž cuchanžquita žoñinacž ojektan, Jesusaqui Juanž puntuquiztan chiichiča. Tjapa žoñinacžquiz tuž cjichiča:

—¿Chjulu ch'ekti yokquin chertzni ojkchinčhuctaya? ¿Tsjii tjamiž tjizinta kalu chertzni ojkchinčhuctaya? Anapanž jaz.

²⁵ ¿Tsjii finu zquitchiz žoñi chertzni ojkchinčhuctaya? Anapanž, jaz. Finu zquitchiz žoñinaca chawc jilirž kjuyquiz žejlča. Nižaza wali jiru kamñi cusasanacchiz žoñinaca chawc jilirž kjuyquiz žejlča.

²⁶ Nekztanac, ¿chjulu chertzni ojkchinčhuctajo? Yooz taku paljayni profeta chertzni ojkchinčhucča. Nužupancha. Juanqui Yooz yujcquiz juc'antiča parti Yooz taku paljayni profetanacžquiztanaqui.

²⁷ Juanž puntuquiztan Yooz tawk libruquiz cijjrtača tuž cjican:

“Yooz Ejpqui tsjii žoñi cuchanžcaquiča ima Cristuž Yooz taku paljayi ojklayan. Nii žoñiqui Israel žoñinacžquiz Cristo zuma tjewskataquiča”.

²⁸ Juan Bautistača parti žoñž maatiquiztan tsjan juc'antiqui. Pero tjapa Yoozquin kuzziz žoñimi Yooz maati cjequiča. Chjul Yooz maatimi žoñž maatiquiztan tsjaa juc'antiča. —Jalla nuž cjichiča Jesucristuqui.

²⁹ Jalla nuž nonžcuqui tjapa Juanž bautistaž žoñinacami cjichiča:

—Zumapanča Yooz Ejpqui, —cjicanaqui. Nužuzakaz cjichiča impuesto cobriñi žoñinacami, Juanž bautista cjicanaqui.

³⁰ Pero fariseo žoñinacazti judiož lii tjajjiñinacžtanpacha Yoozquin kuzziz puntuquiztan chižzinta ana juyzu paachiča. Nižaza Yooziž cuchanžquita Juan Bautista ana rispitchicha. Nižtiquiztanaqui ana Juanž bautistatača.

³¹ Jesucristo Jiliriqui cjichiča:

—¿Kjažtat tii timpuquiz žejlñi žoñinacajo? ¿Jectnaca iratatajo tinacajo?

³² Ocjala irataž tiinaca, ¿ana jaa? Ocjalanacaqui palazquin uzincan nižž mazinacžquiz altu tawkžtan kjaw kjawča, tuž cjican: “Wejrnacaz pincallu pjujtan, ana tsajtchinčhucča ančhucqui. Wejrnacaz llaquita itsan, ana kaachinčhucča”. Jalla nižta ocjala iratača tii timpuquiz žejlñi žoñinacaqui.

³³ ¿Kjažtiquiztan nižta iratajo? Juan Bautistaqui tjonchiča. T'anta ana lujlñitača. Vinumi ana licñitača. Jalla nižtiquiztan ančhucqui chiichinčhucča: “Zajriž tantača niiqui”, cjican.

³⁴ Wiruñaquei wejrqui tjonchinča. Chjulumi lujlchinča. Nižaza chjulumi licchinča. Jalla nižtiquiztan ančhucqui wejt quintra chutča: “Walja lujlñiča licñiča tiiqui. Jalla tiipanča ujchiz žoñinacž maziQUIYA, nižaza impuesto cobriñinacami”. Nuž chiyiñchucča.

³⁵ Tuž zakal cjiwča: Yooz puntu zuma zizni žoñinacaqui Yooz tjaažinta puntu tjeeža.

JESUSAQUI TSJII FARISEO ŽOÑŽ KJUYQUIN LUJLCHICHA

³⁶ Wiruñaquei tsjii fariseo žoñiqui Jesusa luli kjawziča. Nekztanaqui nižž kjuya ojkchiča Jesusaqui. Nižž kjuya irantižcu misquiz julziča lujljapa.

³⁷ Nii wajtquizpacha tsjaa ancha ujchiz maatak žonqui želatča. Jesusa luli ojkchi quintu zizcu, fariseo žoñž kjuya irantižquichiñča alabastro cjita maz putillžtan. Nii putillaqui zuma uluraz aceiti chjijpitača.

³⁸ Nižaza naaqui ancha kaacan Jesusiž kjojch latuquiz julzinča. Jalla nekztanaqui naaža čhujc kaj čhjojcan Jesusiž kjojcha awjzñi kallantichinča. Nekztan naaža persun charžtan Jesusiž kjojcha chjujzinčinča, zuma kjoñipacha. Nekztan Jesusiž kjojcha chjulsinča. Nekztanaqui Jesusiž kjojchquiz nii zuma uluraz aceitižtan tjajlzinčinča.

³⁹ Jalla nuž cheržcuqui, fariseo impitñi žoñiqui persun kuzquiz pinsichiča, tuž cjican: “Tii žoñiqui ultim werar Yooz taku paljayñi žoñižlaj niiqui, tiiqui zizkalal, taa maatak žoñ ancha uj payiñča, jalla nii. Taa žoñzti tiiž kjojcha zakal lanlanžla”.

¿JAKZILTAT JUC'ANTI YOOZQUIN K'AACHIÑI CJESAYA?

⁴⁰ Jalla nekztanaqui Jesusaqui fariseo žoñžquiz cjichiča:

—Simona, amquiz tsjii taku chiyasača.

Nekztan nii Simón cjita fariseuqui kjaaziča, tuž cjican:

—Tjaajiñi, wejtquiz chiyalla.

⁴¹ Jalla nekztanaqui Jesusaqui cjichiča:

—Tsji pucultan žoñiqui denario cjita paaz kajatača. Tsji žoñiqui 500 denario cjita paaz kajatača. Tsjiizuñzti 50 denario kajatača.

⁴² Jalla nekztanaqui nii pucultanaqui ana wira pjojki atchiča. Nižtami ana wira pjojki atchiž cjen nii kajñi žoñiqui nii pucultan žoñinacžquiz cjichiča: “Ančucaž kajžta paazqui anal cobrača. Jaziqiu nužquizpanikal pertunača”.

Nekztanaqui Jesusaqui fariseo žoñžquiz pewcziča, tuž cjican:

—Jaziqiu kjaaznalla amqui. ¿Jakziltat nii pucultan žoñžquiztan nii ana cobriñi žoñžquiz juc'anti k'aachiiñi cjesaya?

⁴³ Jalla nekztanaqui Simón cjita fariseuqui kjaaziča, tuž cjican:

—Nii pajk kaja ana cobrita žoñiqui juc'ant k'aachiñi cječhani.

Nekztanaqui Jesusaqui cjichiča:

—Razunam chiiča.

⁴⁴ Nekztanaqui naa maatak žona kjutñi cheržcu Jesusaqui Simonžquiz cjichiča:

—Wejrqui am kjuya luzquichinča. Amqui anam kjaz onanchamča, tii wejt kjojcha awjzjapa. ¿Taa maatak žon cherkay? Taa maatak žonzti persun čhujc kajlližtan wejt kjojcha awjzinča. Nekztanaqui persun charžtan chjujzinča.

⁴⁵ Amqui wejtquiz anam chjulzamča. Naazti nuž luzcu wejt kjojchami chjul chjulžinčinča.

⁴⁶ Amqui wejt achquiz ana aceitimi alžinchamča. Naazti wejt kjojchquizimi zuma uluraz aceite alzinča.

⁴⁷ Jalla nižtiquiztan amquiz chiižinuča tužu. Walja naaža ujnaca pertuntiquiztan taa maatak žonqui juc'anti wejr k'ayachtiča. Jakziltat ujlliquiztan pertunta cječhaja, jalla niiqui anaž juc'anti k'ayachtiča.

⁴⁸ Jalla nekztanaqui Jesusaqui naa maatak žonaquiz cjichiča:

—Am ujnacaqui pertuntača.

⁴⁹ Nekztan parti impitta žoñinacaqui nii nonžcu ninacpora parla kallantassiča, tuž cjican:

—¿Ject tii žoñejo? Wali ujnacamiž pertunla. Ujquiztan žoñinacamiž pertunča.

⁵⁰ Jesusaqui naa maatak žonaquiz cjichiča:

—Amiž criitiquiztan jaziqiu amqui liwriitača. Jaziqiu cuntintum okaquiča.

8

MAATAKANACAQUI JESUSIZQUIZ YANAPCHICHA

¹ Wiruñaquei Jesusaqui wacchi watjanacaran jochinacaran ojklaychiča. Jalla nuž ojklaycan Yooz mantita zuma kamaña, jalla nii puntu paljaychiča. Niiž tuncapan illzta apostolonaca nižtan chicapachatača.

² Nižaza tsjii kjažultan niiž čhjetinta maatakanaca cumpañtichiča, ninacžtan chica. Niiž tuquiqui nii maatakanacaqui zajraž tantatača, y nižaza conanacchiztača. Jalla nii maatakquiztan tsjaaqui María Magdalena cjititača. Jalla naaquiztan pakallak zajranaca ulanchitača.

³ Nižaza tsjaa žon želatča, Juana cjiti, Chuza cjita žoñž tjuntača. Naaža lucuqui Herodes cjita jiliri yanapñi secretariotača. Nižaza tsjaa Susana cjiti žon želatča. Nižaza tsjii kjažultan iya maatakanacaqui apsñitača. Nii maatakanacaqui persun cusastan atintiñitača Jesusižquiz.

CHJACZ QUINTU

⁴ Walja žoñinacaqui watjanacquiztan Jesusa cheri ulanžquichiča. Walja žoñinacaž nuž juntazziž cjen, Jesusaqui tsjii quintu quint'ichiča, tuž cjican:

⁵ —Tsji zkala čhjaci žoñiqui zkal čhjaqui ojkchiča. Nekztan zkal semilla wichcan wichcan čhjacciča. Čhjaccan, parti semillanacazti jiczaran tjojtsiča. Nii tjojtsi semillaqui tjecantatača, y nižaza wežlanacaž lujltatača.

⁶ Tsjii parti zkal semillanacazti maz yokaran tjojtsiča. Nii tjojtsi semillanacaqui jeczcanpacha nužquiz kjoñchiča. Anaž umit yoka želatča.

⁷ Parti zkal semillanacazti ch'ap yokaran tjojtsiča. Nužuntu pakan ch'apinacakazza atipchiqui.

⁸ Parti zkal semillanacazti zum yokquiz tjojtsiča. Nekztan pajkchiča. Nuž pajkžcu, zuma čhjeri pookchiča, patac čhjerchiz zapa chjojlluquiz. —Nuž quint'ižcu Jesusaqui altu tawkžtan cjichiča:

—Jecčhalaj cjuñchiz niiqui, ž-nonžna.

⁹ Jalla nekztanaqui niiž tjaajinta žoñinacaqui Jesusižquiz pewcziča:

—¿Jaknužt čhii tii am takojo? —cjican pewcziča.

¹⁰ Jalla nekztanaqui Jesusaqui kjaaziča tuž cjican:

—Ančhucaquiz Yoozpachaž tjaajnaquiča ančhuca kuzquiz, niiž mantita kamañ puntuquiztan, nii. Yekjap žoñinacžquizzti quintunacžtankaz chiyuča Yooz mantita kamaña puntuquiztan. Jalla nužquiz weriž čhiita quintu nonžcuqui parti žoñinacaqui ana wira intintiñiž cjissa. Weriž čhiitiquiztanaqui ana wira tantiiñiž cjissa.

¹¹ Nekztanaqui Jesusaqui niiž tjaajinta žoñinacžquiz cjichiča:

—Jalla tižta puntunacquiztanž čhiča wejt zkala čhjacz quintuqui. Yooz takuča nii zkal semillanacaqui.

¹² Nii jiczaran žejlñi žoñinacaqui Yooz taku nonziča. Yooz taku nonžtanaqui, diablu cjita zajraqui tjonza, ninacž kuz turwayžinzjapa. Jalla nuž paača diabluqui, nonžñi žoñinacaž Yooz taku ana criyajo, y nižaza ninacaž ana liwriita cjejajo.

¹³ Nižaza nii maz yokaran žejlñi žoñinacaqui Yooz taku nonziča. Yooz taku nonžcupacha cuntintuž catokča. Pero Yoozquin tjapa kuzzizpan ana nonža. Tsjiipacamakaz catokča. Čhjul pruebaž tjonanami ratullaž quejpsa.

¹⁴ Nižaza nii ch'ap yokaran žejlñi žoñinacaqui Yooz taku nonziča. Yooz taku nonžcu anaž tjapa kuztan catokča. Cusasanacapankaz cherza; nižaza wali jiru kamspanž pecča; nižaza pijistanacapankaz pecča. Jalla nižtiquiztan čhjul ana walinaca tjontan, ninacž kuznaca turwayskatča. Persun kuzquiz pectiquiztanaqui Yooz taku tjažža. Jalla nižtiquiztan ana zuma kamasacha. Ana pookñi zkalažtakaz kamča.

¹⁵ Nii zum yokquiz žejlñi žoñinacaqui Yooz taku nonziča. Tjapa kuztan Yooz taku nonža. Tjapa kuztanž catokča. Nižaza Yooz takucama zuma kamča Yoozquin tjurt'iñi kuzziz. Jalla nižtiquiztan zuma pookñi zkalažtakaz kamča, zumapankaz kamča.

MICHA TJEEZ QUINTU

¹⁶ Jesusaqui tjaajinchiča tuž cjican:

—Anaž jecmi micha tjeeznasača cajun kjuyltan nonzjapa, už tjajz zquit koztan nonzjapa. Micha tjeez nonzuntuñpanž nekzipan tewznasača kjuyquiz luzni žoñinačzquin kjanajo.

¹⁷ Chjulu čhjojztami wažtapanikaz cjequiča. Nižaza ana Yooz puntu ziztanacami kjanapacha ziztapanikaz cjequiča.

¹⁸ Weriž chiita taku zuma nonžnalla ančhucqui. Jakziltažlaj catokni kuzziz niiqui, juc'anti zuma kuz tjaataž cjequiča, Yooz taku intintajo. Jakziltažlaj ana catokni kuzziz niiqui, juc'anti turwayskattaž cjequiča. Jalla nižtiquiztan Yooz takuqui anapan intintiž cjequiča, “intintuča wejrqui” chiichiž cjenami. —Jalla nuž tjaajinchiča Jesusaqui.

JESUCRISTUZ FAMILIA PUNTU

¹⁹ Wiruñaquí Jesúsiz maatan niž lajknacžtan irantižquichiča, jakziquin Jesusac želatčhaja, jalla nicju. Pero nižžquin ana macjati atchiča. Kjuyquiz walja žoñinaca želatča.

²⁰ Jalla nekztanaqui tsjii žoñiqui Jesúsizquiz mazziča, tuž cjican:

—Am maami am jilanacami kjuj zancu žejlča. Am chertz pecča.

²¹ Jesusaqui nekztan kjaaziča, tuž cjican:

—Yooz taku nonžni žoñinacaqui y nižaza Yooz takucama kamni žoñinacaqui, ninacapanča wejt familia cuntaqui, wejt maa cuntaqui, y nižaza wejt jilanaca cuntaqui.

JESUSACHA TJAMIMI KJAZ LJOJKIMI MANTIŃIQUI

²² Tsjii nooj Jesusaqui niž tjaajinta žoñinacžtan luzziča tsjii warcuquiz. Nekztanaqui tuž cjichiča:

—Tii kotž nawjktuñtanž ojklaj.

²³ Jalla nuž ojkan Jesusaqui tjajchiča. Nekztanaqui tiripintit wali pjursanti tjami zalchiča. Jalla nii tjamiž cjen warcuqui kjaz ljojkižtan julzmayaž cjisnatča, kjaz chjijpi.

²⁴ Nekztanaqui Jesúsiz tjaajinta žoñinacaqui Jesusa žinchiča, tuž cjican:

—Tjaajiñi Maestro, Tjaajiñi Maestro, kotquiz julzmayaž cjis učumqui. Ticznačan učumni. —Jalla nuž chiitiquiztanaqui Jesusaqui žaaziča. Nekztanaqui tjamžquiz nižaza kjaz ljojki mantichiča apaltajo. Jalla nuž mantitiquiztanaqui tjamimi kjaz ljojki apaltichiča. Ch'ujupan cjissiča. Nužquiz walikaztača.

²⁵ Jalla nekztanaqui Jesusaqui niž tjaajinta žoñinačzquiz chiižinchiča, tuž cjican:

—¿Ana wejtquin kuzziz cjissinčhuckaya? —Nuž pewcztiquiztan, nii tjaajinta žoñinacazti tsucchi ispantichi cjissiča. Nižtiquiztan ninacpora parlassiča, tuž cjican:

—¿Ject tii žoñejo? Tjamimi kjazmi tiž mantitacamaž ojčka, tiž chiita takukaz cazza.

TSJII ZAJRAZ TANTA ZOŃI CHJETINTA

²⁶ Nižtami Gadara cjita yokquin irantichiča, kotž nawjktuñtan, Galilea cjita yokž nawjktuñtan.

²⁷ Jesusa yokquiz chjijwžtan tsjii nii wajtchiz žoñiqui macjatžquichiča. Ažk watanaca zajraž tantapantakalča nii žoñiqui. Zajraž tantiquiztan ana zquiti cutñitakalča. Nižaza ana kjuyquizimi kamñitakalča. Campu santuran kamñitakalča.

²⁸⁻²⁹ Jesusa chertzcu, niž yujcquiz tuzi t'okziča yokquizpacha; kjawcan puct'ichiča. Nekztanaqui Jesusaqui žoñi tanñi žajra mantichiča žoñžquiztan ulnajo. Nii chiitiquiztan zajraqi kjawchiča, tuž cjican:

—Jesusa, Arajpach Yooz Maati, ¿kjažtiquiztan am wejtquiz mitisi? Am roct'uča, anaž wejr tjatnalla, anaž wejr sufriskatala.

Tuquiqui wilta wilta zajraqui nii zoñi tanñitakalcha. Nižaza nii wajtchiz zoñinacaqui zajraž tanta zoñi chejlñitakalcha, y nižaza carinžtan mokñitakalcha. Jalla nuž moktiquiztanami chejltiquiztanami carina kojžcu atipasñipankasztakalcha. Jalla nekztan zajraqui nii zoñi ch'ekti yokaran zajt zajtskatchiča.

³⁰ Nekztanaqui Jesusaqui nii pewcziča, tuž cjican:

—¿Chjul tjuuchizzamta?

Nii zajraqui kjaaziča:

—Tama cjitaž wejrqui, —cjican.

Tama zajranacaqui nii zoñžquiz lusñitakalcha.

³¹⁻³² Zcati cururan wacchi cuchinacaqui lujlcan žejlñitakalcha. Jalla nižtiquiztan zajranacaqui Jesusižquiz rocchiča, tuž cjican:

—Anaž wejrnac casticta cjeyajo mantalla. Nii cuchinacžquin luzkatalla. —Jalla nuž mantiskatz pecchiča zajranacaqui. Nekztanaqui Jesusaqui nuž mantichiča.

³³ Jalla nekztanaqui nuž mantitiquiztan zajranacaqui zoñžquiztan ulanžcu cuchinacžquin luzi ojkchiča. Cuchinacžquin luzcuqui cuchinaca tjiiranchiča tsjii k'aw kjutñi. Nekztanaqui nii cuchinacaqui kossucpacha tjojtsiča nii barranc k'awquiz. Nižaza kotquin tjojtsiča. Jalla nužquiz tjapa ticziča.

³⁴ Cuchi itzñinacaqui nii cheržcu walja tsucchi zajtchiča. Watjaran jochiran quintu quint'ican ojklaychiča.

³⁵ Nii quintu nonžcu walja zoñinacaqui ojkchiča nii paatanaca cheri. Jesusižquin irantižcu, nii zajraž tanta zoñi žejtchi cherchiča. Nii zoñiqui julzi želatča Jesusiž kojch latuquiz, zquti kujtchi. Nižaza zuma tawkchiztača, ana lucuratžtakaztača. Jalla nuž cheržcu, nii cheri tjonchi zoñinacaqui nužquiz ispanitichiča.

³⁶ Nii zoñi čhjetiñi cherchi zoñinacaqui quint'ichiča parti zoñinacžquiz, jaknužt Jesusaqui zoñi čhjetinčaja, jalla nii.

³⁷ Nii quintu nonžcu, tjapa Gadara cjita yokquiz žejlñi zoñinacaqui Jesusižquiz roqui kallantichiča nawjk okajo. Nii zoñinacaqui cuchinacaž pertisiž cjen waljaž eksnatča. Jalla nižtiquiztanaqui Jesusaqui tsjii warcuquiz luzziča, ojkzjapa.

³⁸ Nii zajriquiztan čhjetinta zoñiqui Jesusižquiz rocchiča, tuž cjican:

—Amtan chical ojkkatalla.

Pero Jesusaqui kjaaziča, tuž cjican:

—Tekz am žela.

³⁹ Am kjuya oka. Zoñinacžquizim amqui quint'aquiča jaknužt Yoozqui am čhjetinčaja, jalla nii.

Nekztanaqui nii zoñiqui ojkchiča. Jalla nuž ojkžcu tjapa kjutñi watjaran quint'ichiča, jaknužt Jesusaqui nii čhjetinčaja, jalla nii.

JESUCRISTUCHA LAA ZOÑI ČHJETINŃI

⁴⁰ Jalla nekztanaqui Jesusaž kotž nawjktuñtan quejpžquitan, žejlñi zoñinacaqui tjapa kuz risiwchiča. Tjappacha Jesusiž tjonz tjewsitača. Nekztanaqui niž tjontiquiztan cuntintutača.

⁴¹ Jalla nekztan tsjii Jairo cjita zoñiqui irantižquichiča; ajcz kjuy jiliritča. Nii zoñiqui Jesusiž yujcquiz puct'ichiča. Nekztanaqui rocchiča niž kjuya okajo.

⁴² Nii oraqui nii zoñž zinta majtqui ticzmayatača. Tuncapan watchiztača naa majtqui. Nekztan Jesusaqui jilirž kjuya ojkchiča. Jesusaž okan, walja zoñinacaqui ts'acjascan apziča.

⁴³ Jalla ninacžtan juntu tsjaa laa maatak žonqui okatča. Tuncapan wata inturu ljok ojknii laa t'akjisichintakalcha. Nižaza medicunacžquiz kullkatjawi ancha castassinča, ana čhjulchiz cjissintača. Nuž kullkatžcumi ana wira žetatča.

⁴⁴ Nekztanaqui naa laa žonqui Jesusiž wir kjuttan macjatchinča. Niž zquit tjiiquiz lanzinča. Nii orapacha nuž lanžcuqui žejtchinča. Nižaza ljok ojknimi tsijtsiča.

⁴⁵ Jalla nekztanaqui Jesusaqui pewcziča, tuž cjican:

—¿Ject wejr lanzejo?

Tjappacha ninacaqui ana zizni chiichiča, nuž pewcztiquiztan. Jalla nuž cjen Pedruqui niž mazinacžtan cjichiča:

—Tjaajiñi Maestro, tii žoñinaca ancha amquiz ts'acjassa, nižaza tjapa kjuttanž am tewjctewjcča. Jaziqui ¿kjažtiquiztan am nuž pewcžjo, “¿Ject wejr lanzejo?” cjicanajo?

⁴⁶ Nekztanac Jesusaqui cjichiča:

—Tsjii tsjiiqui wejr lanziča. Wejr persun kuzquiz naychinča wejt aziqui tsjii čhjetinchiča, jalla nii.

⁴⁷ Naa maatak žonqui waj nuž Jesusiž kuzquiz pajta ziztiquiztan, cjarcatcan macjatchinča. Nekztan Jesusiž kojchquiz quillzinča. Tjapa žoñinaca želan naaqui mazzinča, nii orac lanzintaž naaqui, jalla nii. Nižaza nii lanžcu nii orapacha žejtchi quirchinča naaqui. Jalla nuž cjican mazzinča Jesusižquiz.

⁴⁸ Jalla nekztanaqui Jesusaqui cjichiča:

—Cullacalla, tjapa kuztan criichiž cjen čhjetinta cjissamča. Jaziqui cuntintum am okaquiča.

⁴⁹ Jesusaž ima naatan parla žeržnan, tsjii žoñiqui tjonchiča Jairo cjita žoñž kjuyquiztan. Nii Jairuqui ajcz kjuy jiliritača. Tjonchi žoñiqui Jairužquiz cjichiča:

—Am majtqui ticzinpanča. Anam iya tii Maestružquiz molistis waquiziča.

⁵⁰ Jalla nii takunaca nonžcuqui, Jesusaqui Jairužquiz cjichiča:

—Ana am nic kuz turwayskata. Yoozquin tjapa kuzziz cjee. Nekztan am uzqui žetaquiča.

⁵¹ Jairuž kjuya irantižcu, Jesusaqui anaž jecmi kjuyquiz luzkatchiča. Jesusižtan Pedružtan, Jacobžtan, Juanžtan, naa uza maa ejpžtan jalla ninacakaz luzkatchiča.

⁵² Nii kjuyquiz žejlñi žoñinacaqui tjappachaž kaatkalča. Nižaza naa uzaž ticziž cjen walja llaquitatakalča. Pero Jesusaqui ninacžquiz cjichiča:

—Anaž kaa. Taa uzqui anača ticzin, antiz taa uzqui tjajča.

⁵³ Nuž Jesusiž chiitiquiztan nii žejlñi žoñinacaqui tjassiča nii nonžcu. Ticzinpanča nuž zizziča parti žoñinacaqui.

⁵⁴ Jalla nekztanaqui Jesusaqui naa uza kjara tanzinchiča, y nižaza altu tawkžtan chiichiča, tuž cjican:

—Kolta cullacalla, žaazna.

⁵⁵ Nii orapacha wilta žejtchin cjissinča. Nižaza nii orapacha tsijtsinča. Nekztan Jesusaqui mantichiča naa uzaquiz čhjeri tjaažnajo.

⁵⁶ Naaža maa ejpqui nuž jacatatchiž cjen ancha ispantichiča. Nekztanaqui Jesusaqui ninacžquiz paljaychiča:

—Anaž jeczquizimi chiichiyaquiča tii čhjetinta quintu, —nuž cjichiča Jesusaqui.

9

APOSTOLUNACA CUCHANTA

¹ Jalla nekztanaqui Jesusaqui niž tuncapan illzta apostolonaca kjawziča. Nekztan ninacžquiz mantiz azi tjaachiča, tjapaman zajranaca chjatkatzjapa, nižaza tjapaman laanaca čhjetinzjapa.

² Nižaza Jesusaqui ninacžquiz mantichiča Yooz zuma kamañ puntuquiztan paljayajo, y nižaza laa žoñinaca čhjetnajo.

³ Nižaza cjichiča:

—Ančhucqui anaž čhjulumi chjichaquiča, jiczquin ojkan. Anaza ajtsmi, anaza žak quelsmi, anaza čhjerimi anaza paazmi. Nižaza zinta zquitikaz chjichaquiča.

⁴ Jakzi kjuyquinami irantižcuqui nii kjuyquin alujasaquiča. Jalla nicjuž kamaquiča, nii yokquiztan ojkcama.

⁵ Yekjap wajtchiz zoñinacaqui ančhuc anaž risiwz pecaquiž niiqui, nii wajtquiztanž ulnaquiča. Nižaza ančhuc kjojchquiz zcatchi pulpunaca tsajt tsajtsnaquiča. Jalla nii tsajt tsajtstaqui siñalaž cjequiča ninacž quintra, ančhuc ana risiwchiž cjen.

⁶ Jalla nekztanaqui Jesusiž nuž taku tjaatiquiztan apostolonacaqui niž mantitacama ojkchiča. Tjapa jochinacž kjutñi ojkchiča, liwriñi Yooz taku paljaycan, y nižaza laanaca čjetincan.

JUAN BAUTISTAZ PUNTU

⁷ Tsjii chawc jiliriqui Herodes cjita želatča. Jesusiž quintu zizcu, ana čhjulumi naazipanča nii oraqui. Inakaz želatča. Jesusiž quintu nonžcu yekjapanacazti cjichiča:

–Juanqui ticziquiztan jacatatchižlani.

⁸ Yekjapanacazti chiichiča tuž cjican:

–Tiila Eliasqui; jeczquichila.

Elías cjitaqui tuquita Yooz taku paljayñi profetatača. Yekjapanacazti Jesusiž puntu chiichiča, tuž cjican:

–Tiila tsjii tuquita Yooz taku paljayñi profetaqui, jacatatchila.

Jalla nuž cjenami Herodes cjita jiliriqui inakaz cjissiča.

⁹ Nii Herodesqui tuž cjichiča:

–Wejrpanča mantichintqui, Juanž acha muržcajo. Anziqui wacchi milajru paata quintunaca nonznuča. ¿Jectpan nii milajrunaca paañejo? ¿Juanpan cjesajo?

Jalla nekztanaqui Herodesqui Jesusižtan walja zalz pecchiča.

ZOÑINACŽQUIZ CHJERI TJAAZ MILAJRU

¹⁰ Wiruñaquei Jesusiž illzta apostolonacaqui cutjatchiča. Nekztan Jesusižquiz quint'ichiča jaknužt kamtčhaja, jalla ninaca. Jalla nekztanaqui Jesusaqui ninaca chjitchiča tsjii ana žejlz yokquin, Betsaida cjita wajtž žcati.

¹¹ Nuž ojka zizcu, zoñinacaqui walja apziča. Nekztanaqui nuž apžtiquiztan Jesusaqui zuma risiwchiča. Ninacžquiz paljaychiča Yooz mantita zuma kamañ puntu. Nižaza laanaca čjetinchiča.

¹² Zezi cjee ora Jesusiž tuncapan illzta apostolonaca nižžquin macjatchiča, tuž cjican:

–Tii zoñinaca cuchna joch kjutñi wajt kjutñi okaj cjee; tjajz kjuya kjuržcaj cjee; nižaza lujlz čhjeri kjuržcaj cjee. Tekziqui anaž čhjulumi žejlča. Jalla nuž cuch waquiziča amqui.

¹³ Pero Jesusaqui niž illzta apostolonacžquiz chiižinchiča, tuž cjican:

–Ančhucž antiz čhjeri tjaa.

Ninacaqui kjaaziča, tuž cjican:

–Anaž wejtnacalta čhjulumi žejlča. Pjijska t'antallžtan pizc ch'izlliztan, nižtallakaz wejtnacalta žejlča. Tinacžquiz tjaažjapa anapan wacasača. Tinacžquiz tjaažjapa, ¿čhjeri kjayi okasaya?

¹⁴ Nii žejlñi zoñinacaqui pjijska warank luctakatača. Nekztanaqui Jesusaqui niž tjaažjantanacžquiz cjichiča:

–Tjulžna tii zoñinacaqui pjijska tuncquiztan pjijska tunca jalla nuž t'aka t'aka tjulžna.

¹⁵ Jalla nuž niž mantitacama paachiča. Nekztan tjappacha julziča.

¹⁶ Nekztanaqui Jesusaqui persun kjarquiz nii pjijska t'anta nii pizc ch'iz tanzicha. Nuž tanžcu arajpach kjutñi cherziča. Nekztan Yooz Ejpžžquin sparaquiž cjichiča, jalla nii t'antiquiztan, ch'izquiztan. Jalla nekztanaqui t'unžcu niž tjaažjantanacžquiz chjalziča, parti zoñinacžquiz tojnajo.

¹⁷ Nekztanaqui tjapa nii zoñinacaqui chjekañcama lujlchiča. Jalla nuž lujltanaqui žejtchi t'anta ch'iz t'unanaca tuncapan canasta chjijpi ricujchiča.

JESUSACHA YOOZIZ CUCHAÑŽQUITA CRISTUQUI

18 Tsjii nooj ana zoñinaca želan, Jesusaqui Yooz Ejpžquin mayizatča. Niiž tjaajinta zoñinacapanatča niižtan chicapachaqui. Jesusaqui ninacžquiz pewcziča:

—¿Jaknužt pinsi zoñinacaqui wejt puntuquiztanajo?

19 Nekztanaqui nii tjaajintanacaqui kjaaziča, tuž cjican:

—Yekjap zoñinacaqui cjiča, Juan Bautistaž amqui. Yekjapanacazti zakaz cjiča, Elías amqui. Yekjapanacazti cjiča, tuquita Yooz taku paljayñi profetažlani jacatatchini, — jalla nuž cjiča.

20 Jaziqui nekztanaqui Jesusaqui wilta pewcziča, tuž cjican:

—Ančhuczti, ¿wejt puntuquiztan kjažzaž cjeejo?

Pedruqui kjaaziča, tuž cjican:

—Yooziž cuchanžquita Crustumča amqui.

21 Jalla nekztanaqui Jesusaqui zumpacha niiž tjaajintanacžquiz iwjt'ichiča, ana jecžquizimi nižta maznajo.

JESUSAQUI NIIZ PERSUN TICZ MAZZICHA

22 Nižaza Jesusaqui cjichiča:

—Yooz cuchanžquita zoñtča wejrqui. Pero walja sufristanča; nižaza wajt jilirinacami timplu chawc jilirinacami judiož lii tjaajiñinacami wejr ana jilirižtakaz nayaquiča. Nižaza wejr conta cjistanča. Nižaza čhjep majquiztan jacatatača.

23 Wiruñaquei tjapa nii žejlñi zoñinacžquiz paljaychiča, tuž cjican:

—Jequit wejttan chica kamz pecčhaj niiqui, primiraqui persun kamañ wira tjažla. Nižaza čjul pruebanaca watanami zapuru wejttan chicapacha cjee, aunquimi persun wirami apt'ačhani.

24 Jakziltat persun kamañ wira ana tjats pecčhaj niiqui, arajpach kamañaquei ana tjaataž cjequiča. Jakziltat wejt laycu persun kamañ wira tjažnačhaja, jalla niiqui arajpachquin wiñaya kamaquiča.

25 Arajpachquin wiñaya kamañ wira pertaquiz niiqui, ¿tii muntuquiz žejlñi cusasa čjuljapat sirwasajo?

26 Nižaza quintra zoñinacaž želan, jakziltat wejtquiztan wejt tawkquiztan ana pajñi chiyaquiz niiqui, wejrqui nižtakal niižquiztan ana pajñi chiyača wejt mantiz timpuquiz, nekziqui. Tsjii noojiqui walja poderchiz quejpžcača wejt Yooz Ejpž aztan, nižaza wejt Yooz Ejpž anjilanacžtanpacha. Mantizjapa quejpžcača.

27 Weraral cjiwča. Tsjii zoñinaca tekz žejlcanpacha anaž ticznaquiča ima Yooz mantiz timpuquiz kallantan.

JESUSAQUI TSJEMATAZ CJISSICHA

28 Tsjii quinsakal tjuñquiztan Jesusaqui curulla yawchiča Yooz Ejpžtan parli. Nižaza čhjepultan niiž illzta zoñinaca čhjitchiča, Pedružtan, Jacobžtan, Juanžtan; jalla ninaqui Jesusižtan chica ojkchiča.

29 Yooz Ejpžtan parlican, Jesusiž yujcni niiž cujtta zquitimi walja llijñi kjanapanikaz cjissiča, chiwicamatača.

30 Nii orapacha pucultan luctak žoñiqui parisizquichiča, Jesusižtan parlisjapa. Nii pucultanaqui Moisestan Eliastantača.

31 Nii pucultanaqui walja chiw kjana llijñi taypiqueiz tjonatča. Jesusiž ticz puntu parlatča. Jerusalén wajtquiz jaknužt ticznačhaja jalla nii puntu.

32 Nii oraqui Pedružtan niiž mazinacžtan ančaž tjaji tjonkatatča pero nii cheržcu ninacž tjajimi zajtchiča. Jesusiž tjeēžta honora cherchiča nii pucultan zoñinacaž niižtan želan. Walja chiwi llijñi kjanñi cherchiča.

33 Pucultan zoñinacaž Jesusižquiztan zarakan, Pedruqui cjichiča:

—¡Wejt Tjaajiñi Maestro, tekz žejlzqui walipankazza! Jaziqui čhjep chjujlli kjuya kjuysla, tsjiiquei amta, tsjiiquei Moisesta, tsjiiquei Eliasta, jalla nuž.

Pedruqui ana zuma tantiizcu chiichiča.

³⁴ Jalla nuž Pedruž chiyān, tsjii tsjirižtakaz macjatžquichiča. Nekztan ninacžquiz urpuntichiča. Jalla nuž urpuntitiquiztan nii čhjepultan illzta žoñinacaqui walja tsucchiča.

³⁵ Tsjirquiztan tsjii jora chiižquiñi nonziča, jalla tuž cjican:

—Jalla tiiča wejt k'ayi Maatiqui. Jalla tiiž chiita taku nonžna.

³⁶ Jalla nuž nii joraž chiitan, Jesusaqui zinalla želatča. Nii čhjepultan illztanacaqui nužquiz ch'uju quirchiča. Ana jeczquizimi nii cherta puntu chiichiča.

TSJII ZAJRAZ TANTA ZOÑI CHJETINTA

³⁷ Niiž jaka tažu curquiztan chjijwžquichiča. Walja žoñinacaqui Jesusižtan zali tjonchiča.

³⁸ Nii tama žoñinacžquiztan tsjii žoñiqui altu tawkžtan paljaychiča, tuž cjican:

—Wejt Tjaajiñi Maestro, wejt zinta majch cheržinžcalla.

³⁹ Wilta wilta zajraž tantača. Nii zajraqui ančaž kjaw kjawkatča. Nižazaž t'uckatča. Atquiztan ch'utuž jupokskatča. Persun janchiž čhjojriskatča. Niižquiztan ana zarakz pecča.

⁴⁰ Amiž tjaajinta žoñinacžquiz rocchinča, wejt majch čhjetžinajo. Ana atchipanča.

⁴¹ Jalla nekztanaqui Jesusaqui kjaaziča, tuž cjican:

—Tii žoñinacajay ana criiñipanča. ¡Walja ujnacchizčhucpanča ančhucjay! ¿Čhjul oracamat ančhucatan wejr želaquiya? ¿Čhjul oracamat ančuca ujquiztan wejr awan-taquiya? Nižtaqui am majch zjijcžcalla.

⁴² Nii žoñž laa majch Jesusižquiz macjatan, zajraqui yokquiz tjojtchiča. Wilta t'uckatchiča. Jalla nekztanaqui Jesusaqui zajra ujziča. Nii žoñž majch čhjetinžcu, niiž persun ejpžquiz intirjichiča.

⁴³ Nii Yooz aztan paata obra cheržcu tjapa žoñinacaqui ispantichiča. Žoñinacaž ispantichi želan, Jesusaqui niiž tjaajinta žoñinacžquiz paljaychiča, tuž cjican:

⁴⁴ —Tjapa kuztanž tii weriž paljayta nonžna ančhucqui. Anaž tjazna. Wejrqui tsewtan cuchanžquita Yooz Žoñtča. Quintra žoñinacžquiz wejr intirjital tarazuntal cječa.

⁴⁵ Jalla nuž chiyān niiž tjaajinta žoñinacaqui ana intintazziča. Nižaza nii chiitaqui ana kjanzt'itatača, ninaca intintajo. Ana intintazcumi, pewcz eksnatča niiž chiita taku kjana intintisjapa.

YOOZ YUJCQUIZ, ¿JECT TUCQUIN CJES?

⁴⁶ Wiruñaquei niiž tjaajinta žoñinacaqui ninacpora ch'aassi kallantichiča, jakziltat ninacžquiztan tucquin cjes, jalla nii.

⁴⁷ Ninacž kuz pinsita zizcu Jesusaqui tsjii uza tsijtskatchiča niiž latuquiz.

⁴⁸ Nekztan ninacžquiz paljaychiča:

—Jequit wejt cuntiquiztan tsjii uza risiwčhaj niiqui, wejrpacha risiwča. Nižaza jequit wejr risiwčhaja, nižaza risiwča wejr cuchanžquiñi. Jakziltat ančucaquiztan wirquin nayta cjicjiyačhaja, jalla niiča tucquin zuma honorchizqui.

⁴⁹ Wiruñaquei Juanqui cjichiča:

—Wejt Tjaajiñi Maestro, tsjii žoñiqui am tjuu chiican zajranaca chjatkatchiča. Nii cheržcu wejrnaqui ujzinča, “Ana nižta paa”, cjican. Nii žoñiqui anača učumnacatan ojklayñi.

⁵⁰ Pero Jesusaqui cjichiča:

—Anaž nuž atajča, jalla. Nižta paañiqui anača učumnacatan quintra. Jakziltazlaja ana učumnacatan quintra, jalla niiqui učum favoraž paača.

TSJII OJKTA PUNTU

⁵¹ Jalla nekztanaqui Jesusiž arajpacha ojkz tjuñi žcatžinžcatčha. Jalla nižtiquiztan walja p'ektichiča Jerusalén watja ojkzjapa.

⁵² Niiž tuqui žoñinaca cuchanchiča, alujamint kjuya kjuržcajo. Jalla nekztanaqui nii cuchanta žoninacaqui Samaria cjita yokquin tsjii watja macjatchiča.

⁵³ Nii Samaria wajtchiz žoñinacasti ana kjuyquiz kjawz pecatčha Jesusaž Jerusalén watja ojkz cjen.

⁵⁴ Nii quintu nonžcu Jacobžtan Juanžtan Jesusižquiz cjichiča:

—Wejt Jiliri, žkjažt cjes? Wejrnacqui arajpachquiztan uj mantižquila, cjiwčha, ninaca tjabatanzjapa. Jaknužt tuqui timpu Elías cjita Yooz taku paljayñi profeta paatčhaja, jalla nuž. Jalla nuž waliž cjesaž, žana jaa?

⁵⁵ Jalla nuž čhiitiquiztan Jesusaqui ninacaž kjutñi cherziča. Nekztanaqui ujziča, tuž cjican:

—Ančhuca kuzqui ana waliča. Anaž tantiyassa ančhucqui.

⁵⁶ Wejrqui tsewctan cuchanžquita Yooz Žoñtčha. Wejrqui tsewctan tjonchinča, ujchiz žoñinaca liwriizjapa. Ana tjonchinča ujchiz žoñinaca tjabatanzjapa.

Jalla nekztanaqui yekja watja ojkchiča.

JESUCRISTUŽTAN CHICA OJKLAYZ PUNTU

⁵⁷ Jiczquiz okan, tsjii žoñiqui Jesusižquiz cjichiča:

—Wejt Jiliri, jakziquinam ojkčhaja amqui, wejrqui chicapachal ojklayz pecučha.

⁵⁸ Nekztan Jesusaqui niižquiz kjaaziča, tuž cjican:

—Kitinacami kjuychizza. Nižaza wežlanacami tjurchizza. Wejrzi anal kjuychizza, tjajzjapami.

⁵⁹ Wiruñaquei Jesusaqui yekja žoñžquiz tuž cjichiča:

—Wejttan chicaž ojklaya.

Nii žoñiqui kjaaziča, tuž cjican:

—Wejt Jiliri, primiraqui wejt ticzi ejp tjabatnača.

⁶⁰ Nekztan Jesusaqui kjaaziča, tuž cjican:

—Ticzižtakaz ana zuma kamañchiz kamñi žoñinacaqui, jalla ninacaj ticzinaca tjabatla. Amqui ojkla, Yooz mantita zuma kamañ puntuquiztan paljayzjapa.

⁶¹ Wiruñaquei yekja žoñiqui Jesusižquiz cjichiča:

—Wejt Jiliri, amtan chica ojklayz pecučha. Pero primiraqui wejt familianacžquiz wejt ojklayz puntu mazinžquiz pecučha.

⁶² Nekztan Jesusaqui kjaaziča, tuž cjican:

—Jakziltat Yooztajapa langžñi kalltičhaja, jalla niiqui tirapan Yoozta langz waquiziča, ana wir kjutñi cheržcu. Jakziltat wir kjutñi chernasaž niiqui, nižaza tuquita kamañ wirquiz quejps pecasaž niiqui, jalla niiqui anaž Yooz mantita zuma kamaña tanznasača.

10

JESUSAQUI YOOZ LANGZQUIN ŽOÑINACA CUCHANCHIČHA

¹ Jalla wiruñaquei Jesusaqui pakallak tunc žoñinaca illziča. Jalla nuž illžcu Jesusaqui niiž tuqui tjapa kjutñi pucultan pucultan cuchanchiča, jakziquint okačhaja, jalla nii.

² Ima cuchancan ninacžquiz cjichiča:

—Tsjii puntul čhižinasasča. Zkalaqui walja žejlčha. Pero zkala ajžñi žoñinacača upaqui. Yooz Ejpqui zkala Patrunača. Jalla nižtiquiztan Yooz Ejpžquiztan mayiza, zkala ajžñi žoñinaca cuchanžcajo.

—Jalla nuž paljaychiča Jesusaqui, žoñinacača zkalažtakaz.

³ Nižaza Jesusaqui niiž cuchanžquita žoñinacžquiz cjichiča:

—Ančhucqui uzanacažtakaz cuchnuča. Tanñi kitinacaž cheechi žoñinacž taypiquin ojklayaquiča ančhucqui. Jaziqi persunpachaž cwitazaquiča.

⁴ Nižaza anaza quelsmi chjichaquiča, anaza paaz pulsami. Ana enenžcu jiczquizic okaquiča.

⁵ Tsjii kjuya luzcu, ančhucqui tsaanaquiča, tuž cjican: “Tii kjuychiz žoñinacaqui walipankaj cjila”.

⁶ Nicju zuma kamñi žoñinaca želaquiž niiqui, walipankaz cjequiča nii kjuychiz žoñinacaqui. Nižaza nii kjuyquiz zuma kamñi žoñinaca ana želaquiž niiqui, ančucaž tsaanta takuqui nužquizkaz cjequiča.

⁷ Kjuyquiztan kjuya ana ojklayaquiča. Tsjii kjuya irantižcu, nekzpachapan kamaquiča. Chjulut nii kjuychiz žoninacaqui onačhaja jalla niicz lujlznaquiča. Langžñi žoñinaca pacta cjis waquiziča.

⁸ Tsjii watja irantižcu nii wajtquiz jakziltakat ančhuc kjawžnačhaj niiqui, jalla nekzi lujlznaquiča čhjulu onanami.

⁹ Nižaza nekž žejlñi laanaca čhjetnaquiča. Nižaza paljayaquiča, tuž cjican: “Yooz mantita zuma kamaña ančucaquiz žcatžinžquiča”.

¹⁰⁻¹¹ Nižaza tsjii wajtquiz irantižcuqui, jalla nii wajtquiz anaž ančhuc kjawznaquiž niiqui, calli kjutñiž ulnaquiča, nii wajt žoñinacžquiz tuž cjican: “Tii wajt pulpu wejtnaca kjojchquiz zcatchipan cjen, jalla tii wajt pulpu tjappacha tsajt tsajtsnača. Jalla tii tsajtstaqui siñalaž cjequiča ančuca quintra. Pero ančhucqui tuž zizla, Yooz mantita zuma kamaña ančucaquiz žcatžinžquichitača”. Jalla nuž čhižcuqui, nii ana ančhuc kjawžñi wajtquiztan okaquiča.

¹² Wejr cjiwčha ančucaquiz; casticz tjuñquiziqui nii wajtchiz žoñinacaqui juc'anti castictaž cjequiča, nii tuquita Sodoma cjita wajtchiz žoñinacžquiztanaqui.

YOOZQUIN ANA JUYZU PAAÑI ŽOÑINACŽ PUNTU

¹³ ¡Corazín wajtchiz žoñinaca, ančucaquiz anawaliž wataquiča! ¡Nižaza Betsaida wajtchiz žoñinaca, ančucaquiz anawaliž wataquiča! Ančuca watjanacquiziqui walja milajrunaca paatatača. Tiro Sidón cjita watjanacquiz nii milajrunaca paataž cjitasadž niiqui, walipan nii wajtchiz žoñinacaqui werar Yoozquiz cjuñžñiž cjitasacha, “Ujchiz-pantča; pertunalla”, cjicanaqui. Nižaza ninacž uj sint'ižcu nii wajtchiz žoñinacaqui llaquita kuz kjanapacha tjeesñi cjitasacha, lutu zquitchiz cujtžcu, nižaza achquiz kjupžtan tjajlžcu, jalla nuž.

¹⁴ Jalla nižtiquiztan ančhucqui casticu tjaaz tjuñquiziqui juc'anti castictaž cjequiča nii Tiro Sidón cjita watjanacchiz žoñinacžquiztanaqui.

¹⁵ Capernaum wajtchiz žoñinaca, ¿kjažtiquiztan ančhucqui pinsejo, “Yoozqui učhum honorchiz cjiskataquiča”, cjicanjo? Anaž nuž cjesacha. Pero ančhuczti kozzuc tjojttadž cjequiča infiernuquin sufrisjapa, parti ujchiz žoñinacžtan chica.

¹⁶ Nekztan Jesusaqui niž tjaajinta žoñinacžquiz tuž cjichiča:

—Jakziltat ančuca taku nonžaj niiqui, nižaza wejt takumiž nonža. Nižaza jakziltat ančuca taku ana nonz pecčhaj niiqui, nižaza wejt taku anaž nonz pecča. Nižaza jakziltat wejt taku ana nonz pecčhaj niiqui, nižaza werj cuchanžquiñi Yooz Ejp anaž nonz pecča.

CUCHANTA ŽOÑINACAQUI QUEJPZQUICHICHA

¹⁷ Wiruñahui nii pakallak cuchanta žoñinacaqui ancha cuntintu quejpžquichiča, tuž cjican:

—Wejt Jiliri, am tjuu čhižcu, am aztan zajranacami ulanskatchinča.

¹⁸ Nekztanaqui Jesusaqui ninacžquiz cjichiča:

—Jesalla, tsjii rayužtakaz Satanás cjita diabluqui arajpachquiztan tjojtsiča. Jalla nuž cherchinča.

¹⁹ Wejrqui ančhucaquiz wejt azi tjaazinča. Jalla nižtiquiztan ančhucqui zkorami yek'achuncami tjecznaquič niiqui anaž kjaž cjisnasača. Nižaza nii wejt aztan tjapa quintranaca atipaquiča.

²⁰ Zajranacaž ulantiquiztan ančhucqui anaž ancha chipchipasača. Antiz ančuca tjuunaca arajpachquin apuntitiquiztan, nekztanž ančhucqui chipchipz waquiziča.

CUNTINTU ZOÑINACA

²¹ Nii orapacha Jesusaqui ancha cuntintutača Yooz Espiritu Santuž cjen. Nekztan cjichiča:

—Yooz Tata, arajpachquinami yokquizimi ampanča wali chawc jilirimqui. Am puntunaca humilde žoñinacžquiz tjeezamča, intintajo. Pero tii muntuquiz wali estudiantinacami zizñinacami am puntunaca anaž intintazziča, čhjojžtažtakaz ninacžquizi. Jalla nužupanča am munañpaqui, Yooz Tata. Jalla nižtiquiztan am honora waytuča.

²² Nižaza Jesusaqui cjichiča:

—Yooz Tata, tjapa amiž ziztanacami wejtquiz tjaajinchamča. Anaž jecmi wejt kuz zizza. Yooz Tata, am panikaz wejt kuz zizza. Nižaza am kuz anaž jecmi zizza. Wejr panikal zizuča. Nižaza Yooz Tata, jakziltižquiz wejrqui am kuz zizkatz pecučaja, jalla ninacazakaz am kuz zizaquiča.

²³ Jesusaqui niž tjaajinta žoñinacžtan zina želatča. Ninacžquiz cheržcu cjichiča:

—Anchucqui zuma paatanaca cherchinčhucča. Jakziltat weriž paatanaca persun čhjučžtan cherchižlaja, cuntintuž cjesača.

²⁴ Wacchi tuquita Yooz taku paljayñinaca nižaza tuquita chawc jilirinaca, jalla ninacaqui weriž zuma paatanaca cherz pecatča. Pero ana cherchiča. Nižaza ninacaqui Yooz puntu takunaca nonz pecatča. Pero ana nonziča. Jaztankaz ančhucqui tii cherchinčhucča, nižaza nonzinčhucča. Jaziqui cuntintuž cjee.

ZUMA KUZIZ ZOÑINACA

²⁵ Wiruñaquei tsjii judiož lii tjaajiñi žoñiqui tsijtsiča. Nekztanaqui Jesusižquiz paljayčiča, Jesusa lii quintra chiikatzjapa. Nekztan pewcziča, tuž cjican:

—Wejt Tjaajiñi Maestro, Yooztan wiñaya kamzjapa ¿čhjulut paaz waquizisaya?

²⁶ Nekztanaqui Jesusaqui nižquin kjaaziča, tuž cjican:

—¿Kjaž cijrtat učum liiquiziya? ¿Jaknuž liichamtajo?

²⁷ Nii lii tjaajiñiqui kjaaziča, tuž cjican:

—Žoñinacžlaqui Yoozquin tjapa kuzziz cjistanča. Yoozquin tjapa animužtanami sirwistanča, nižaza tjapa aztanami, nižaza tjapa pinsamintužtanami. Tjapa kuzziz Yoozquin cjistanča. Nižaza jaknužt persunpachquiz okžñamžlaja, jalla nižta okžñi kuzziz cjistanča žoñinacžquizimi, lijitum mazižtakaz.

²⁸ Jalla nekztanaqui Jesusaqui cjichiča:

—Walikam kjaaza. Jalla nuž amiž kjaaztacama kamaquič niiqui, Yooztan wiñayam kamaquiča.

²⁹ Jesusiž čhiitiquiztan nii lii tjaajiñiqui atipz pecatča. Jalla nekztanaqui Jesusižquiz pewcziča, tuž cjican:

—¿Jec žoñinacžquiz wejrloqui okstankaya?

³⁰ Nekztanaqui Jesusaqui kjaaziča, tuž quint'ican:

—Tsji žoñiqui Jerusalén wajtquiztan okatča, Jericó cjita wajt kjutñi. Nuž jiczquiz okan, tsji kjažultan tjañinacžtan zalziča. Tjañinacaqui nii žoñi kijtčiča, nižaza tjapa niž zquitinaca niž paaznaca kjañičiča. Nekztanaqui zuma chjojricama ana žaañipacha ecchiča. Nužquiz ticzmaya želatča.

³¹ Nekztan tsji icliz jiliri. Nii jicziñpacha okatča. Pero chjojrichta žoñi cheržcu, tsji latu chjužcu watchiča.

³² Niiž jarupachaqui tsjii timpluquiz sirwiñi žoñiqui nii jicziñpacha ojkchizakazza. Nižaza nii chjojricta žoñi cheržcu, nawcjuñ zakaz chjuuziča.

³³ Jalla nekztanaqui tsjii Samaria wajtchiz žoñiqui nii jicziñpacha tjonchizakazza. Jalla nuž nii kijcta chjojricta žoñi cheržcu, ancha okziča.

³⁴ Jalla nekztanaqui kijcta žoñžquiz macjatchiča. Chjojrictama cheržcu kullz-inchiča aceitižtan vinžtan. Nuž kullžcu chjojricta jeržinchiča zumpacha. Nekztanaqui persun aznuquiz tewžcu chjitchiča, tsjii alujamintuquin. Jalla nicju cwitichiča.

³⁵ Jaka tažquui ima wilita jicz ojkcan nii Samaria wajtchiz žoñiqui persun paaz jescu, pizc billete pacchiča alujamintuchiz žoñžquiz. Nekztan cjichiča, “Tii chjojricta žoñi am cwitižinalla. Tii paaz ana alcansaquiz niiqui, wejrqui pjojkača, quejpžcuqui”.

³⁶ Jaziqui, ¿jakziltat nii čhjepultiquiztan chjojricta žoñžquiz zuma okzikaya, lijitum mazižtakazya? ¿Jaknužum am tantii? Kjaaznalla.

³⁷ Jalla nekztanaqui nii lii tjaajiñiqui kjaaziča, tuž cjican:

—Nii oksni žoñipanča zuma mazižtakazqui.

Nekztanaqui Jesusaqui cjichiča:

—Jaziqui oka, nužuzakaz ammi paalla.

³⁸ Jalla nekztanaqui Jesusaqui tira ojkchiča. Ojkcan tsjii wajtquin luzziča. Jalla nicju Marta cjiti žonqui naaža kjuyquiz Jesusa kjawzinča.

³⁹ Martiqui cullacchiztača, Marija cjititača. Mariiqui Jesusiž kjojch latuquiz julzinča, nii chiiñi nonzjapa.

⁴⁰ Martizti naaža kjuy lurañquiz kuz tjaatča. Nekztan Jesusižquiz macjatchinča, tuž cjican:

—Wejt Jiliri, taa cullaquiqui wejr zinallakal tii kjuya lurañanacquiz jakjurpayča. Ana wejr yanapča. ¿Anam wejtquiztan sint'iya? Am chiižinžinalla, wejr yanapajo.

⁴¹ Nekztanaqui Jesusaqui naaquiz kjaaziča, tuž cjican:

—Marta, Marta, kjuy lurañanacžquiz kuz tjaachiž cjen am kuzqui turwayzikalala. Jalla nižtiquiztan ancha llaquitamkalala amqui.

⁴² Tsjii zintallapanikaz žejlča chekanaqui. Mariiqui nii zuma illzinča. Naaqui kuz tjaatča wejt taku nonzjapa. Anaž jecmi taa cullaqui wejt taku nonžtiquiztan apaki atasača.

11

YOOZ EJPŽQUIN MAYIZIZ PUNTU

¹ Tsjii nooj tsjii yokquin Jesusaqui Yooz Ejpžquin mayizatča. Nuž mayiziz žeržtanaqui niiž tjaajintanacžquiztan tsjii tjaajinta žoñiqui pewcziča tuž cjican:

—Jaziqui wejt Jiliri, Yooz Ejpžquin mayiziz tjaajznalla. Jaknužt Juanqui niiž tjaajinta žoñinacžquiz Yooz Ejpžquin mayiziz tjaajinchižlaja, jalla nuž.

² Nekztanaqui Jesusaqui tjaajinchiča, tuž cjican:

—Yoozquin mayizizqui tužuča:

“Učhum arajpach Yooz Ejp, am tjuuqui zuma honorchiz cjilalla. Nižaza am mantiz timpu irantižquilalla. Nižaza am munañpaj cjilalla tii yokquizimi tsewc arajpachquinami.

³ Nižaza tonjtijapa nižaza zapurutijapa čhjeriž tjaazcalla, azziz cjisjapa.

⁴ Wejrnacqui pertunchinča wejtnacaquiz ana zuma paañi žoñinaca. Jalla nižtiquiz amqui wejtnaca ujnacaž pertunalla. Nižaza čhjul anawalinacami wejtnacaquiz ana watkatala. Antiz čhjul anawalinacquiztanami liwriyalla”.

⁵ Nekztan Jesusaqui ninacžquiz cjichizakazza:

—Tsjii žoñiqui amiguchiztača. Nii amiguqui chica aramaž kjuyquiz tjonchiča, tuž cjican: “Amigo, čhjep t'antaž kajznalla.

⁶ Wejt kjuyquiz tsjii zoñi irantižquichiča jiczquiztan. Anaž wejttac čhjulumi žejlča nižquiz tjaazjapa”.

⁷ Nekztanaqui nii zoñiqui kjaaziča kjuyltan, tuž cjican: “Anaž wejr chiižina. Kjuyami zuma chawjcztacha. Nižaza wejt ocjalanacaqui ajpžquiz wejttan chicaž tjajča. Anaž žaazñi atasacha. Nekztan anal čhjulumi tjaayi atasacha”.

⁸ Amiguž cjenami ana tjaayi žaaz pecchiča. Pero nižtami tjaayi žaaziča, ana iya molistita cjeajajo.

⁹ Jaziqui cjiwča, Yooz Ejpžquiztan maya, nekztan Yooz Ejpqui ž-tjaaquiča. Nižaza zuma kamaña kjurzna, nekztan wačaquiča. Nižaza kjuy chawjczquiztan t'oc t'ocžcaquiča, nekztan cjetžtaž cjequiča.

¹⁰ Mayñi zoñinacami ninacž mayta tjaataž cjequiča. Nižaza kjurñi zoñinacami nuž kjuržcu wachaquiča. Nižaza chawjczquiztan t'oc t'ocñi zoñinacžquizimi cjetžtaž cjequiča. Jalla nužuča Yooz Ejpžquin mayizizqui.

¹¹ ¿Kjažt tsjii ejpqui ančhucporquiz t'anta mayñiž majchquiz “Tiž t'antaqui” cjican tsjii maz chjalznasajo? Anapanž nuž cjesača. Nižaza, ¿kjažt ejpqui ch'iz mayñi majchquiz “Tiž ch'izqui” cjican zkorakaz chjalznasajo? Anaž nužupan chjalznasacha.

¹² Nižaza ¿kjažt ejpqui wallpi ziñi mayñi majchquiz “Tiž wallpi ziñiqui” cjican yek'achunca chjalznasajo? Anaž nužupan chjalznasacha.

¹³ Jaziqui ančhucqui ana zum kuzziz cjenami zuma cusasapanikaz tjaasacha persun maatinacžquiziqui. Ancha zuma kuzziz Yooz Ejpqui juc'ant zumanaca ančhucquiz tjaasacha. Jakziltat Espiritu Santo mayachaja, jalla nižquiz arajpach Yooz Ejpqui Espiritu Santo cuchanžcaquicha, nii mayñinacž kuzquiz.

JESUSIZ QUINTRA CHIICHICA

¹⁴ Wiruñaquei zajraqui tsjii zoñi upa cjiskatchiča. Nekztanaqui Jesusaž nii zajra ulanzkattan, nii upa ana chiiñi zoñiqui chii kallantichiča. Nekztan nuž paatiquiztan nekž žejlñi zoñinacaqui walja ispantichiča.

¹⁵ Yekjap zoñinacaqui Jesusiž quintra chutchiča, tuž cjican:

—Tiiqui anawal zoñikalala. Zajranacž Beelzebú jilirž aztan yekja zajranaca ch-jatkatča.

¹⁶ Yekjap quintra zoñinacaqui yanz pecatča, arajpach Yooz aztan milajru paañi, ana arajpach Yooz aztan paañi, jalla nii. Yanzjapa pewcziča:

—Jaziqui arajpach milajru paala, —cjican.

¹⁷ Pero Jesusaqui ninacž kuz zizziča. Jalla nižtiquiztan paljaychiča, tuž cjican:

—Tsjii nacionchiz zoñinacaqui t'aka t'aka cjisnaquiž niiqui, ninacž kichassiž cjen, nii nacionaqui tjatantaž cjequiča. Nižaza tsjii famillchiz zoñinacaqui chaasaquiž niiqui, ninacž kichassiž cjen nii familiaqui tjatantaž cjequiča.

¹⁸ Nižaza Satanás cjita zajraž partimi t'aka t'aka cjesaž niiqui, ultimu tjatantaž cjesača. ¿Kjažt nii zajranacž azi tjurasajo? Anaž azziz cjesača. Anapanž tjurasacha. Jaziqui ančhucqui tuž cjiča, wejrqui zajranacž Beelzebú cjita jilirž aztan yekja zajranaca ch-jatkatča, jalla nuž cjiča ančhucqui.

¹⁹ Pero wejrqui anaž nužu jalla. Nonžna. Ančhuca partinacami zajranaca ch-jatkatñizakazza. ¿Jecž aztan ninacac ch-jatkatjo? ¿Beelzebú cjita zajriž aztan ch-jatkatjo? Anaž cjesača. Ančhuca parti zoñinacaz paatiquiztan intintiz waquiziča, zajriž aztan anapan zajranaca ch-jatkatasača, jalla nuž intintiz waquiziča. Jalla nižtiquiztan ančhucqui kjanapachača ana zuma razunchizqui.

²⁰ Jaziqui ultim werara Yooz aztanpankal wejrqui zajranaca ch-jatkatuča. Yooz aztan ch-jatkatiquiztan, kjanapacha tjeeža, Yooz mantiz kamañ timpu irantižquiča, jalla nii.

²¹ Tsjilla quint'asacha. Tsjii walja armichiz zoñiqui persun kjuya walja tjurt'iñitača. Jalla nižtiquiztan kjuyquiz chjojtanaca segurotača.

²² Nuž armichiž cjen cuntintu želatčha. Nekztanaqui tsjii tsjan tjup žoñiqui tjonchičha. Armichiz žoñi atipžcu, tjapa niž armanaca kjañchičha. Nekztan tjapa niž chjojta cusasanaca kjañchizakazza. Nekztan tjup žoñiqui niž mazinacžquiz kjañta cusasanaca tojunchičha.

²³ Nonžna. Jakziltat ana wejt favora cječhaj niiqui, wejt quintracha. Nižaza jakziltat Yooztajapa žoñinaca ana juntjapi yanapčhaj niiqui, wejt quintr Yoozquiztan žoñinacž wichanskatčha.

ZAJRIZ PUNTU

²⁴ Nižaza Jesusaqui cjichičha:

—Tsji zakal quint'asacha. Tsji zajraqui žoñžquiztan ulanžcu kjoñ yokaran ojklaychičha, jeejzjapa kjurcan. Ana jeejz watžcuqui, niž kuzquiz pinsichičha, tuž cjican: “Jaziqui wejr quepaka jakziquiztan ulanžquitučhaja, jalla nicju”.

²⁵ Jalla nuž quejpžcu niž ulanta žoñžquiz zalchičha. Nii žoñž kuzqui tsji zuma pewžta kjuyažtakaztakalčha, nižaza zuma žcayi azquitžta kjuyažtakaztakalčha.

²⁶ Jalla nuž zaltiquiztan nii zajraqui pakallak juc'ant anawali zajranaca zjiqqui ojkchičha. Ninaca zjičžcu, tjapa nii zajranacaqui žoñž kuzquiz luzzičha. Jalla nižtiquiztan nii žoñiqui juc'ant anawaliž cjissičha tuqita kamzquiztan, tsjan ana zuma.

²⁷ Jesusaž nuž quint'an, tsjaa maatak žonqui nii žejlñi žoñinacžquiztan altu joržtan paljaychičha, tuž cjican:

—Honorchiz cjila am matiñ maaqui, am jwessinž cjen.

²⁸ Nekztanaqui Jesusaqui cjichičha:

—Juc'ant honorchiz cjila Yooz taku nonžñinaca. Nižaza Yooz tawk jaru kamñinaca.

ZOÑINACAQUI SIÑALA CHERZKAZ PECATCHA

²⁹ Tsjan tsjan žoñinacaqui Jesusiž muytataž ajcizatčha. Nekztanaqui Jesusaqui paljayi kallantičhičha, tuž cjican:

—Jazta timpu žoñinacaqui ana zum kuzzizza. Milajru siñala paañipankaz pecčha. Tuqui timpuqui Jonás cjita žoñiqui želatčha, Yooz taku paljayni. Jalla nižta paljayzqui tsji siñalažtakazza, Yooziž cuchanžquita cjican. Wejrzakal Yooz taku paljayučha. Anaž iya čjul siñalami želasačha tii žoñinacžtaqui.

³⁰ Yooz Ejpqui Nínive cjita wajtchiz žoñinacžquiz Jonás cjita žoñi cuchanžquichičha, casticu tjaaž tjuñi maznajo. Jalla niitačha siñalaqui, nii timpuquiz kamñi žoñinacžtaqui. Nižaza Yooz Ejpqui arajpachquiztan wejr cuchanžquichičha. Jalla wejrtčha siñalaqui, jazta timpuquiz kamñi žoñinacžtaqui. Anaž iya čjul siñalami tjaataž cjequičha.

³¹ Pjalz tjuñquiziqui, jazta timpuquiz kamñi žoñinacaqui pjaltaž cjequičha, zuma, ana zuma, jalla nii. Ana zuma žoñinacaqui castictaž cjequičha. Nonžna. Tuqui timpuqui tsjaa maatak jilir želatčha, wartuñtan watja mantiñ. Pjalz tjuñquiziqui naaqui jakatatžcu jazta timpuquiz kamñi žoñinacž uj kjana tjeznaquičha, jazta žoñinaca casticta cjejajo. Naaqui muzpa ažkquiztanpacha tjonchinčha Salomón cjita jiliržquiz zali, niž zuma razun taku nonžni. Pero tekzi wejrqui želučha Salomonžquiztan tsjan chekan jiliriqiu. Pero jazta timpuquiz kamñi žoñinacaqui wejt taku anaž nonž pecčha. Nižtiquiztan juc'ant ujchizza, nižaza juc'ant castictaž cjequičha.

³² Nižaza pjalz tjuñquiziqui Nínive wajtchiz žoñinacaqui jacatatžcu jazta timpuquiz kamñi žoñinacž uj kjana tjeznaquičha. Jonás cjita žoñiž Yooz taku paljaytiquiztan, nii Nínive wajtchiz žoñinacaqui Yoozquin kuzziz cjissičha. Pero tekzi wejrqui želučha Jonasquiztan tsjan chekan jiliriqiu. Nižaza wejrtčha tsjan chekan Yooz taku parliñtqui. Pero jazta timpuquiz kamñi žoñinacžti anal Yoozquin kuzziz cjissičha, weriž paljayta Yooz taku nonžcu. Nižtiquiztan juc'ant ujchizza. Nižaza juc'ant castictaž cjequičha.

KJANQUIZ KAMZ QUINTU

³³ Nekztanaqui Jesusaqui quint'ichičha tuž cjican:

—Anaž jecmi tsjii lámpara tjeecu, chjojzakquiz nonznasača, nižaza anaž tsjii cajon kjuylami nonznasača. Nii lamparaqui tseecupanž tsjijpsnasača, kjuyquiz luzni žoñinacžquiz kjanajo.

³⁴ Zoñž čhujquiqui persun kuz lamparažtakazza. Zoñž čhujqui zumažlaj niiqui nižaza žoñž kuzmi zumazakazza, zuma kjanquiztakaz kamča. Pero žoñž čhujqui ana zumažlaj niiqui, kuzmi ana zumazakazza, zumchiquiztakaz kamča.

³⁵ Zuma kjanquizim kamčhaj niiqui, persun kamaña zumaž cwitazaquiča, ana zumchi kamañchiz cjisjapa.

³⁶ Tsjii žoñiqui kjanquiztakaz zumapankaz kamčhaj niiqui, nižaza ana čjul ana waliquiz kamčhaj niiqui, liwj niž kamtanaca zumaž cjequiča, jaknužt tsjii lámpara wali kjančhaja, jalla nuž.

ANA ZUM KUZIZ ZOÑINACŽ PUNTU

³⁷ Jesusaž chyan, tsjii fariseo žoñiqui Jesusa čjheri luli kjawziča, niž kjuyquin. Pucultanaqui kjuya irantižcu, kjuya luzziča. Nekztan mizquiz julziča.

³⁸ Jesusaqui kjara awjz custurumpi ana cumplichiča ima lujlan. Jalla nii cheržcu fariseo žoñiqui ispantichiča. Jesusaqui persun kuzquiz naychiča fariseo žoñiz ispantita.

³⁹ Nekztanaqui Jesusaqui nižquiz paljaychiča, tuž cjican:

—Tsji žoñiqui tasanaca chuwanaca zawnctankaz awjza, nižaza chjujža. Nižta iratača ančhucqui fariseonaca. Ančhucqui zawnctankaz limpuča. Pero kjuyltanaqui ančuca kuzqui walja cjujchinacchizpanča. Ančuca kuzquiz tjangz zizza, nižaza čjul anawali paazmi zizza.

⁴⁰ ¡Zumzu žoñinaca! Yoozqui curpumi kuzmi paachiča. ¿Jalla ančhucqui anaž nii zizjo?

⁴¹ Ančuca cusasanacquiztan žoñinacžquiz tjaaz waquiziča. Ančhucqui tjapa žoñinacžtan okžni kuzziz cjesaž niiqui, ančuca kuzmi zumapanž cjesača Yooz Ejpž yujcquiziqui, ana kjara awjz cuzturumpi paažcumi.

⁴² ¡Ayii pori fariseonaca! Ančhucqui Yoozquin diezmos tjaayiñchucča, nižaza tjapa plantanacquiztanami diezmos tjaayiñchucča. Jalla nuž paacan walikazza. Pero nuž tjaacanami ančhucqui ana lijituma zuma kamañquiz kamchinčhucča, nižaza ana Yoozquin kuzzizčhucča. Zuma kamzqui, nižaza Yoozquin kuzzizqui, jalla niiča chekanaqui. Pero diezmos tjaazmi zakaz cumpliz waquiziča.

⁴³ ¡Ayii pori fariseonaca! Ajcz kjuyquiziqui tucquin julzkaz pecča, nižaza honorchizkaj cjiw cjiča ančhucqui. Nižaza ančhucqui jakzi calliranami zuma rispitchizkaž wejr tsaanja cjiča ančhucqui.

⁴⁴ ¡Ayii pori fariseonaca! Nižaza ¡ayii pori lii tjaajiñinaca! Ana lijitum kuzzizčhucča. Ančuca liiqui cjiča jakziltat tsjii sipulturuntuñ ojkchaja jalla niiqui Yoozquin ana macjatasacha. Jalla nižta irata ančhucqui žoñinacžquiz ana Yoozquin macjatskatča. Pero žoñinacaqui ančucaž puntu cjiñča, “Yooz žoñinacača ninacaqui”. Ančhucqui ninaca incallča, ana zuma kuzziz cjen. Ančhucqui ana pajta sipulturažtakazza.

⁴⁵ Jalla nuž chiitiquiztan tsjii lii tjaajiñiqui kjaaziča, tuž cjican:

—Tjaajiñi Maestro, jalla nuž chiižcu, wejtnacaquiz ana zumam chiiča.

⁴⁶ Nekztanaqui Jesusaqui cjichiča:

—¡Ayii pori lii tjaajiñinaca! Ančhucqui parti žoñinacžquin niž jaru niž jaru ch'ama cuzturumpinaca yapchinčhucča: kuzi cuntažtakaz jepzinčhucča. Ch'ama cuzturumpinaca yapchiž cjenami, ančhucqui anaž tsjii loc'anžtanami yanapz pecča, žoñinaca nii cuzturumpinaca cumplajo.

⁴⁷ ¡Ayii! Ančhucqui ancha t'akjiriča. Ančuca tuquita atchi ejpnacaqui Yooz taku paljayni profetanaca conchiča. Ančhucpacha nii paljayñinacž sipulturanaqui kjuyñicha, niwjtanaqui ančhucqui rispittažokaz cjiča. Pero ančhucqui anaž ultimu rispitcha.

⁴⁸ Tuquiqui ančhuca ejpnacaqui nii Yooz taku paljayñinaca conchiča. Nuž conchi cjenami ančhucaquiztan walikazza. Anzimi ančhucqui sipulturanaca kjuyča, zuma žoñižtakazza. Pero ultimquiziqui ančhucqui ninacaž paljayta Yooz taku anazakaz nonz pecča.

⁴⁹ Jalla nižtiquiztan Yooz Ejpqui ančhuca puntuquiztan zuma razun taku chiichiča, tuž cjican: “Wejrqui wejt taku paljayñi profetanacami apostolonacami cuchanžcača. Nekztanaqui yekjapanaca nii Yooz taku paljayñinaczquiztan contaž cjequiča. Yek-japazti kijčtaž cjequiča”.

⁵⁰ Tii muntu kalltiz, niwctanpacha Yooziž cuchanžquita žoñinaca conchiča ančhuca tuquita atchi ejpnacaqui. Ančhucqui nižta ana wal kuzzizzakazza. Jaziqui Yoozqui jazta timpuquiz žejlñi žoñinaczquiz zakaz casticaquiča.

⁵¹ Tsji Zacarías cjita žoñiqui altaržtan timplužtan, jalla nii taypiquiz contatača. Abel contiquiztanami Zacarías contiquiztanami nižaza tjappacha contanacquiztanami Yooz Ejpqui jazta timpuquiz žejlñi žoñinaczquiz casticaquiča.

⁵² ‘Ayii pori lii tjajjiñinaca! Liwriiñi Yooz taku liižcu, zizcu, žoñinaczquiz ana nii tjajjinchinčhucča. Yooz taku tsji llave irata tanzinčhucča. Nii llave tanžcanpacha ančhucmi liwriiñi Yooz jiczquiz ana luzzinčhucča. Y nižaza nii llave tanžcu, ana cjetžinčinčhucča, liwriiñi Yooz jiczquiz žoñinaca luzajo.

⁵³ —Jalla nuž chiižinžcu Jesusaqui ojkchiča.

Nii lii tjajjiñinacztan nii fariseonacztan, jalla ninacaqui muzpa žawjchi cjissiča Jesusiž quintra. Nižaza ninacaqui Jesusižquiz wiltan wiltan pewcziča,

⁵⁴ Jesusiž quintra tsji ujchiz jwezjapa. Jesusiž kjaaztiquiztan uj tjojtunz pecatča.

12

FARISEO ŽOÑINACA

¹ Jesusaž nuž tjajnan, zmali wacchi žoñinacaqui tjonchiča, waranka waranka. Nižaza zmali porapat tewksascaan tewksascaan tjonchiča. Primeraqui Jesusaqui niž tjajjinta žoñinaczquiz paljaychiča, tuž cjican:

—Fariseo žoñinacaqui anaž ultimu Yoozquin kuzzizza. Anaž lijitum Yooz žoñinacača, aunquimi lijitum žoñižtakaz cjicjiñi cjenami. Ninaczquiztan zumpachaž cwit'azaquiča, ana ninaca irata cjisjapa.

² Tsji noojiqui tjapa chjojkakuñ paatami tjeežtaž cjequiča. Nižaza tjapa chjojkakuñ pinsitami ziztaž cjequiča. Tsji noojiqui žoñž ultim kuz tjeežtaž cjequiča.

³ Nižaza jamazit chiitanacami kjana ziztaž cjequiča. Chjojkakuñ chiitanacami tjapa žoñinacaqui zizaquiča.

¿JECŽQUIN EKS WAQUIZIYA?

⁴ Jaziqui ančhucqui, wejt mazinaca, tuž wejr chiižinuča. Anača eksqui tii curpu alaja conñižquiziqui. Curpu conžcu anaž iya čjulumi payi atasacha.

⁵ ¿Jecžquin antiz ančhucqui eks waquiziya? Yooz Ejpžquin eks waquiziča. Yooz Ejpqui žoñž curpu žeti tucuzinskatžcu žoñž animumi infiernuquin tjojtjapa azzizza. Jalla nižquizza chekanaqui eksqui.

⁶ Tsji pjijska wežlaqui pizc paazkaz cwističa. Anača juc'ant valorchiz cjen, Yooz Ejpqui zapa wežlallami cjuñča.

⁷ Pero zapa žoñžquiz juc'anti cjuñča. Nižaza ančhuca ach charami kanžintača, zintallquiztan zintalla. Anaž ančhucqui tsuca. Nii wežlanaczquiztan ančhucča juc'ant valorchizqui. Yooz Ejpqui ančhuc juc'ant cwitaquiča wežlanaczquiztan.

JESUCRISTUZ FAVORA CJEE

⁸ Ančhucaquiz cjiwča: Jakziltat parti žoñž yujcquiz wejt favora cječhaj niiqui, nižaza wejrqui Yooz anjilanacz yujcquiz nii žoñž favorazakal chiyacha.

⁹ Jakziltat parti žoňž yujcquiz wejr ana pajñi nicačhaj niiqui, nižaza wejrqui Yooz anjilanacž yujcquiz nii žoňž quintra ana pajñi zakal cjeeča.

¹⁰ 'Jakzilta žoňit Yooz Epiž cuchanžquita Zoňž quintra chiyačhaj niiqui, pertuntaž cjesača. Pero jakzilta žoňit Yooz Espíritu Santuž quintra chiyačhaj niiqui, anapanž wira pertuntaž cjequiča.

¹¹ 'Wiruñaqi ančhucqui juezanacž yujcquin nižaza jilirinacž yujcquin chjichtaž cjequiča, ajcz kjuyquiz. Jalla nuž chjichtiquiztan ana kuz turwaysi cjequiča, jaknužt chiyačhaja, nižaza jaknužt tjurt'azalaja, jalla nii.

¹² Ančuca chiiz ora Yooz Espíritu Santuqui ančuca kuzquiz chiizjapa tjaaž-naquiča, jaknužt chiizalaj, jalla nii.

CWITAZA, ZMAZŇI KUZIZ ANA CJISJAPA

¹³ Tsji žoňiqui Jesusižquiz paljaychiča, tuž cjican:

—Wejt Tjaajiñi Maestro, wejt jilžquiz chiinalla, wejt parti irinsa tjaa-ajo.

¹⁴ Nekztanaqui Jesusaqui nižquiz cjichiča:

—Jila, ¿kjažtiquiztan amqui wejr jilirižtakaz cheržjo? Anapanž wejr juez partirtqui, ančuca quija azquitzjapaqui.

¹⁵ Nižaza Jesusaqui ninacžquiz cjichiča:

—Persun kuzquiz naazna, nižaza cwitaza ana zmazñi kuziz cjisjapa. Zoňž wira kamañaqi anaž niž wacchi cusasanacquiztan yatisinsa.

¹⁶ Jalla nekztanaqui Jesusaqui tii quintu quint'ichiča, tuž cjican:

—Tsji ricach žoňi želatča. Nii žoňž yokquiziqui zkalanacaqui anča cusa pookchiča.

¹⁷ Jalla nuž pooktiquiztan nii ricach žoňiqui kuzquiz pinsichiča, tuž cjican: “¿Kjažt wejr cjequejo? Wejt yaaz kjuyanacaqui tii ajzta zkal čhjeri anaž wacasacha”.

¹⁸ Jalla nekztanaqui pinsichiča, tuž cjican: “Aaaa. Tuž jazic cjeeka. Wejt zkala yaaz kjuyanaca pajlnaka. Nekztanaqui tsjan pajk kjuyanaca kjuysnaka. Jalla nekz tjappach zkal čhjeri yaaznaka, nižaza tjapa wejt cusasanaca”.

¹⁹ Jalla nekztanaqui nii ricach žoňiqui niž persun kuzquiz cjichiča: “Aaaa. Wejrqui zmali cusasanaca yaazinča, nižaza zmali čhjerinaca yaazinča, ažk wata tjurñipacha. Jeeznaka, nižaza cusa lujlsnaka, licsnaka. Nižaza cuntintul cjeeka”.

²⁰ Pero Yoozqui nii žoňžquiz cjichiča, “Zumzu žoňimča amqui. Tižwanpacha amqui ticznaquiča. Am zkal čhjerimi am cusasanacami nii yaaztanacami inamayaž cjequiča, ¿chjuljapat cjeequi neejo? ¿Jecztapan cjeequi neejo?”

²¹ Jaknužt nii ricach žoňžquiz watchižlaja, jalla nižta irataž wataquiča persunjapankaz cusasa juntjapñi žoňinacžquiziqui. Nižta žoňinacaqui Yooz yujcquiziqui poripanž cjisnaquiča.

YOOZ EJPQUI NIIZQUIN KUZIZ ZOŇINACA CWITICHA

²² Jalla nekztanaqui Jesusaqui niž tjaažinta žoňinacžquiz cjichiča:

—Ančucaquiz tuž cjiwča. Zoňiqui žejtzjapaqui lujlz čhjeri pecča. Jalla nuž cjenami, ančhucqui anača čhjerinacžquiz kuzqui llaquizizkatzqui. Nižaza žoňiqui curpu wali cjisjapa zquiti pecča. Jalla nuž cjenami ančhucqui anača zquitinacžquiz kuzqui llaquizizkatzqui.

²³ Zoňž žetiqui čhjerquiztan juc'anti importiča. Nižaza persun curpumi zquitquiztan ju'canti importiča.

²⁴ Wežlanacžquiz chernazna. Anaž zkalam čhjáčča. Nižaza anaž ajza. Nižaza ana čhjeri yaaz quetallchizza. Nižaza ana čhjeri yaaz kjuychizza. Jalla nuž cjenami nii wežlanacžtaqui lujlz čhjerinacami panž žejlča. Yooz Ejpkaž čhjeri tjaača. Pero ančhucqui Yooz yujcquiziqui wežlanacžquiztan juc'antiž importiča. Jaziqui ančucaquiz zakaz Yoozqui lujlz čhjeri tjaaquiča, žejtzjapaqui.

²⁵ Anaž jec kolta zoñimi persunpacha tsjan lajcha paki atasacha, llaquiziñi kuzziz cjenami ancha lajcha pecñi kuzziz cjenami.

²⁶ Jalla nižta ana atchucažlaj niñqui, ¿kjažtiquiztan lujlz čhjerinacžquizimi zquiti-nacžquizimi ančuca kuzqui llaquizizkatjo?

²⁷ 'Plantanacž pjajkallaž cherna. Anaž langza. Anaž kawanča. Yoozqui nii pjajkallanacaž pajkkačča. Zmali finu zquiti cujtžcumi anaž jecmi pjajkallquiztanami juc'ant c'achalla cjesača. Nižaza finu zquiti cujtžcumi nii ancha ricachu Salomón jiliriqui anača pjajkallquiztan juc'ant c'achaqui.

²⁸ Plantanacaqui tsjii upacamakaz c'achallača. Nekztanaqui jakatažu kattažu tsjii jurnuquiz tjutjunzjapa ujžtača. Jalla nuž cjenami Yooz Ejpkaž nii plantanacami nižta cwitiča. Ančhucča Yoozquin ana tjapa kuzziz zoñinaca. Ančhuczi Yooz yujcquiziqui čjul plantaquiztanami juc'antiž importiča. Jalla nižtiquiztan Yoozqui ančhuc juc'anti cwitiča; zquitchiz panž cjequiča.

²⁹ Jalla nižtiquiztan ančhucqui ana ancha llaquiziñi kuzziz ojklaya, čjul čjeri kjurzquiztanami.

³⁰ Tii muntuquiz ana Yoozquin criichi zoñinacaqui ancha llaquiziñi kuzziz ojklayča nižta cusasanaca kjurcan. Ančhucqui anača nižta llaquiziñi kuzziz ojklayzqui. Werar Yooz Ejpchizčhucča. Yooz Ejpqui zizza, čjulut ančhuc pecčhaj, jalla nii. Ančhucqui čjeri, zquiti, cusasanaca pecča, zejtjapa, jalla nii zizza Yooz Ejpqui.

³¹ Nižtiquiztan ančhucqui Yooz Ejpžquinpankaz walja kuzziz cjee. Nižaza niž mantita zuma kamañquiz kuzziz cjee. Nekztanaqui Yooz Ejpqui ančucaquiz čjulumi cawalikaz tjaaquiča.

ARAJPACHQUIN CUSASANACCHIZ ZOÑINACA

³² 'Nižaza Yooz Ejpqui ančuca uchaquiča mantiñi puestuquiz. Jalla nužuča Yooz munañpaqui. Tii muntuquiz žejlcan anaž eksna, ančhucqui wejt uuzanacčhucča, aunqui kolucullami.

³³ Ančuca cusasa žejlñinaca tuysna. Nekztan t'akjiri kamñi zoñinacžquiz tojna. Tii muntuquiz žejlcan jaknužt ančucaqui zuma žak quels tjaczaja, jalla nižta irata zuma munaziñi kuz tjacz waquiziča wiñaya zuma kamzjapa. Arajpachquin zuma cuntintu kamzjapa, ančuca kuz tjaczna, zuma azquicha. Tii muntuquiziqui tjañ žoñiqui ančuca cusasanaca kjañasača. Arajpachquin tjañ žoñinaca ana luzasača. Nižaza tekziqui tjujami cjurimi ančuca zquitinaca lulasača. Arajpachquin tjujami cjurimi ana želasača.

³⁴ Jakziltat tii muntuquiz walja cusasanachizlaja, tii muntuquiz kamañ wirquiz kuz tjaača. Pero jakziltat arajpachquin kamañ wirquiz kuz tjaačhaja jalla niñqui arajpachquin walja cusasanacchiz cjequiča.

KUZ TJACZI CJEE

³⁵ Nižaza Jesusaqui tii quintu quint'ichiča, tuž cjican:

—Arajpachquin ojczjapa ančhucqui kuz zuma tjaczi tjewžna, tsjii tjeežta lama-paraztakaz.

³⁶ Tižtažtakaz cjee. Tsjii patrunaqui zalsñi pjijstiquin ojkiča. Piyunanacaqui patrunž cuttižquiz tjewža, niž irantižquitan kjuy zan chawjcz cjetžinzjapa. Jalla nižta irata ančhucqui Yooz tjonz tjuñi zuma tjewžna.

³⁷ Weraral cjiwča. Patrunaž tjonz oraqui jakzilta piyunanacat tjaji wajtsi tjewznačhaja, jalla ninacaqui cuntintuž cjee. Jalla nii piyunanacaqui patrunž misquiz jul-skattaž cjequiča. Nekztanaqui nii patrunapachaž čjeri tjaaquiča, nižaza ninacžquiz atintaquiča. Jalla nižta irata Yoozqui paaquiča niž tjonz tjewžñinacžquiz.

³⁸ Chica aramami, kjantatimi, čjulorakat nii patrunaqui irantižquičhani. Nii oraqui jakzilta piyunanacat tjaji wajtsi tjewz tjewznačhaja, cuntintuž cjequiča.

³⁹ Tsjiilla zakaz cjiwča, ančhucaž zizjapa. Tsjii kjuychiz zoñiqui čhjulatorat tjañi tjonachaja, jalla nii ora zizaquiz niiqui, tjaji wajtsipan tjewznaquičha, nii tjañi ana luzkatzjapa, nižaza ana tjangskatzjapa. Tjañi tjonz ora zizcu, anapan niž kjuya nužkaz ecasača.

⁴⁰ Ančhucmi nižaza Yooz tjonz tjuñi walja listu tjacziž tjewžna. Tiripintit tsjii ana pinsita oraqui wejrqui quejpžcača. Wejrtča tsewctan cuchanžquita Yooz Zoñtqui.

PIZC PUNTA PIYUNANACA

⁴¹ Jalla nekztanaqui Pedruqui Jesusižquiz pewcziča, tuž cjican:

—Wejt Jiliri, ¿tii quintu quint'ichamča wejtnacaltajapakazkaya? už ¿tjapa zoñinacžtajapa, jaa?

⁴² Jesús Jiliriqui kjaaziča, tuž cjican:

—Tsjii kjuy cwitiñi zoñi želatča zuma cumpliñi, nižaza zuma intintiñi. Nii kjuychiz tuyñuqui zuma zoñž kjarquiz niž kjuya ecchiča, tjapa nii kjuyquiz žejlñinacžtan. Chjeri tjaaz ora čjeri tjaajo, jalla nuž zakaz ecchiča nii zoñž kjarquiz. ¿Ject nii zuma cumpliñi zoñejo?

⁴³ Jalla tiičha nii zoñiqui. Kjuy tuyñu quejpsquizcama jakzilta zoñit niž kjuya zuma cwitican žejlčhaja, jalla niičha zuma cumpliñi zoñiqui. Nižaza cuntintuž cjequičha nii zuma cwitiñi zoñiqui.

⁴⁴ Wejrqui wereral cjiwča. Kjuya tuyñuqui cumpliñi zoñž kjarquiz tjapa kjuy cusasanaca ecasača.

⁴⁵ Tsjemata cwitiñi zoñi zakaz želatča. Nii zoñiqui kuzquiz pinsichiča, “Kjuychiz tuyñuqui anaž uri tjonasaž, jaz”, cjican pinsichiča. Jalla nekztanaqui nii kjuychiz luctaka cjiñi maataka cjiñi piyunanaca wjajtñitača. Nižaza nii zoñiqui persun lujlsquin licsquin kuz tjaachiča.

⁴⁶ Tiripintit tsjii ana pinsita nooj kjuychiz tuyñuqui quejpžquichiča. Tsjii ana zizta ora quejpžquichiča. Jalla nižtiquiztan kjuychiz tuyñuqui nii ana zuma cwitiñi zoñžquiz juc'anti anawaliž casticu tjaaquicha. Nii ana zuma zoñiqui jaknužt ujchiz zoñinacž castictaž cječhaja, jalla nižtapacha castictaž cjequičha.

⁴⁷ Tsjii piyunaqui zumpacha niž patrunaž pecta langz zizziča. Niiž patrunž langz zizcanpacha, ana langziča. Jalla nuž zizcanpacha, ana langztiquiztanaqui juc'anti castictaž wjajtzaž cjequičha.

⁴⁸ Nižaza jakzilta piyunat ana niž patrunaž pecta langz zizzaja, jalla nižta cjenpacha ana cumpličhaja, jalla niiqui upa casticta cjequičha. Jakzilta zoñžquiz wacchi cusasanaca cwitajo tjaatčhaja jalla nii zoñiqui tjapa nii cusasanacquiztan quint'istanča. Jakzilta zoñžquiz wacchi cusasanaca cwitajo cumpjiita cječhaja, jalla nii zoñiqui cusasanacchiz tuyñužquiz quint'istanča tjapa cumpjiita cusasanacquiztan.

IYA TJAAJINTA

⁴⁹ Tsjiilla zakaz quint'ichiča Jesusaqui, tuž cjican:

—Tekz werjqui tsjii uj peksñižtakaz tjonchinča. Nii uj peks oraqui wajiž cjila.

⁵⁰ Wejrqui tsjii wali pajk prueba watača bautismužtakaz. Nižaza nii watscama, ancha llaquital cjeeča.

⁵¹ Werič tjontiquiztan zoñinacaqui anazumquin cjequičha; t'aka t'akaž cjequicha, wejtquiz criichinaca, ana wejtquiz criichinaca, jalla nuž.

⁵² Tii timpuquiztan nawjkchuc tsjii famillanacami t'aka t'akaž cjequičha. Tsjii familquiz pjijskaltan cječhani, čhjepultanac quintraž cjequičha pucultan zoñžjapaqui.

⁵³ Nižaza ejpžtan persun majchtan quintraž cjequičha. Nižaza majchžtan persun ejpžtan quintraž cjequičha. Nižaza maatan persun tjunmat matatan quintraž cjequičha. Nižaza naa tjunmat matatan persun maatan quintraž cjequičha. Nižaza kjan maatan wazatan quintraž cjequičha. Nižaza wazatan kjanatan quintraž cjequičha. Jalla nuž cjisnaquičha, wejtquiz criichinacžtan ana wejtquiz criichinacžtan.

KUZ CAMPIYA, ANA CASTICTA CJEYAJO

⁵⁴ Jalla nekztanaqui Jesusaqui zoñinacžquiz cjichiča:

—Ančhucqui cjiñchucča, wacchi tsjirinaca tajatan ulanžcaquiž niiqui, “chijnačhani”, nuž cjiñchucča. Nekztan jalla nuž chijñiž watča.

⁵⁵ Nižaza wartan quera queržcaquiž niiqui, “kjutñit cječhani”, nuž cjinčhucča. Nekztan jalla nuž kjutñiž watča.

⁵⁶ ¡Hipócrita cheechi zoñi! Ančhucqui ¡ana lijitum kuzziz zoñinaca! Tjamž puntu tsjirž puntu walja zizñi chiiñchucča. ¿Kjažtiquiztan Yooz siñalanaca ana tantiyasajo? Kuz campiya, ima casticz ora irantan.

⁵⁷ Nižaza ¿kjažtiquiztan kamz puntu ana tantiyasajo, jaača zuma kamčhaja, jaača ana zuma kamčhaja, jalla nii?

⁵⁸ Jakzilat am quižcu jiliržquin chjichačhaja, jalla nižquiztan pertunam mayizaquiča ana enenžcu, ima jiliržquin irantican. Am quija ana pertunazta cjenauqui, nii jiliriqiu policiiquiz am intirjasača. Nekztanaqui nii policiaqui am carsilquiz chawcwasacha.

⁵⁹ Nekztanaqui wejrqui cjiwča, carsilquiztanaqui anapanim ulnasača, liwj tjap-pacha paczcama. Anziqiu kuz campiya; Yoozquiztan pertuna maya, ana casticta cjeajajo.

13*YOOZQUIN KUZUZ CJEE*

¹ Nii orapacha tsjii kjaž zoñinacaqui quintu zjicchiča, Jesusižquiz mazñi. Tuž cjican quint'ichiča. Pilato cjita jiliriqiu tsjii Galilea wajtchiz zoñinaca conkatchiča. Nii conta zoñinacž ljocqui animal ljocnacžtan t'ajziča. Tuquiqui animala contkalča, Yoozquin ofrenda tjaazjapa.

² Jalla nuž nonžcu Jesusaqui cjichiča:

—¿Kjažtiquiztan Galilea wajtchiz zoñinacžquiz nuž anawali watchitajo? ¿Parti Galilea wajtchiz zoñinacžquiztan juc'ant ujchiz ninacajo? ¿Jalla nižtazaž ančhuc pinsiya?

³ Ančhucqui anača nižta pinsa. Ančhucqui Yoozquin kuzzizpan cjee. Ana nižta cjisnaquiž niiqui, ančhucaquiž juc'ant anawaliž watasacha.

⁴ Jesusaqui quint'ichizakazza, tuž cjican:

—Tsjii tunca quinsakalcuni zoñinacaqui ticziča Siloé cjita wajt campanturi jalla ninacž juntuñ pajlžtiquiztan. ¿Kjažtiquiztan nižta watchitajo? ¿Parti Jerusalén wajtchiz zoñinacžquiztan juc'ant ujchiz ninacajo? ¿Jalla nižtazaž ančhuc pinsiya?

⁵ Ančhucqui anača nižta pinsa. Ančhucqui Yoozquin kuzzizpan cjee. Ana nižta cjisnaquiž niiqui, ančhucaquiž juc'ant anawaliž watasacha.

ISRAEL ZOÑINACŽ PUNTUQUIZTAN

⁶ Jalla nekztanaqui Jesusaqui tsjii quintu zakaz quint'ichiča, tuž cjican:

—Tsjii zoñiqui niž yokquiz jiws muntinaca čhjacchiča. Tsjii nooj ojkchiča “jiwsa pookchižcaa” cjican, ojkchiča. Irantižcu, muntinacquiz ana čhjul jiws frutanaca watchiča.

⁷ Jalla nižtiquiztan nii yoka cwitiñi zoñžquiz cjichiča: “Chera, čhjep wata jiws frutanaca kjuri tjonchinča. Ana jiws frutanaca pookchikalča. Jaziqiu tii muntinaca k'atzna. Inapanikaz žejlča.”

⁸ Jalla nekztanaqui nii yoka cwitiñi zoñiqui patrunžquiz cjichiča: “Wejt patruna, tii watcamakaz žela cjee. Wejrqui yokal zumpacha kjullznača, nižaza wanžtan wanit'ača.

⁹ Jalla nižtiquiztanaqui jiws frutanaca pookz atčhani. Anapan pookaquiž niiqui, nekztanaqui k'atžtaž cjequiča”. —Jalla nuž quint'ichiča Jesusaqui.

TSJAA MAATAK ZONQUI CHJETINTATACHA

¹⁰ Tsjii jeejz tjuñquiziqui, Jesusaqui ajcz kjuyquiz tjaajnatča.

¹¹ Jalla nekz želatča tsjaa laa maatak žon. Tunca quinsakalcun watanaca laatača. Tsjii zajraqui naa žon taj chutu paatkalča. Nižtiquiztanaqui anawira ts'iru tsijt-sniñtača, ana čhju lu paazjapami.

¹² Jesusaqui naa žon cheržcu, kjawziča, nekztan tuž cjichiča:

—Cullacalla, am laaquiztan liwriita cjequiča.

¹³ Nekztanaqui Jesusaqui niž kjaržtan lanziča naa žonaquiz. Jalla nii orapacha naa žonqui ts'iru cjissinča. Nižtiquiztan Yooz Ejpžquin honora paljaychiñča.

¹⁴ Nii ajcz kjuy jilirizti Jesusižjapa žawziča, nii jeejz tjuñquiz čhjetintiquiztan. Nekztanaqui nii jiliriqui zoñinacžquiz cjičhicha:

—Sojta tjuñikaz langz waquiziča. Jalla nii langz tjuñiran laanacaqui tjonsa čhjetintaž cjisjapa. Anača jeejz tjuñquiziqui tjonzqui.

¹⁵ Jalla nekztanaqui Jesús Jiliriqui nii jiliržquiz cjichiča:

—Ana zum kuzziz žoñinaca. Jeejz tjuñquiziqui tjapa ančhucanacaqui wacami aznumi cutzniñčhucča, kjaz liqui okajo, ¿ana jaa?

¹⁶ Taa maatak žonqui Abrahamž majch maatquiztan tjoniñča. Tunca quinsakalcun wata chututača, Satanás cjita zajraž nuž chutu paañiž cjen. ¿Kjažt tii jeejz tjuñquiziqui taa laa žonqui ana čhjetinta cjesajo? Jeejz tjuñquizmi čhjetinzpanikazza.

¹⁷ Jesusiž nuž čhiitiquiztanaqui tjapa niž quintra žoñinacaqui azzi quirchiča. Parti žoñinacazti cuntintutača, Jesusaž nuž pajk milajrunaca paachiž cjen.

YOOZ MANTAPARU OJKŇI ZOŇINACŽ PUNTU

¹⁸ Jalla nekztanaqui Jesusaqui cjichiča:

—Tižtača Yooz mantaparu ojkn̄i žoñinacž puntuqui. Jalla nii puntuqui intintazkatasacha, mostaz cjita semillž puntu čhiitiquiztan. Jalla tužuča.

¹⁹ Tsjii mostaza cjita semilla žejlča, ancha zkoltalla. Zoñiž čhjectan, walja pakjiž pajkča, tsjii pajk muntiž, nizta pakji. Nižaza nii mostaz muntiquiz wežlanacaqui tjuraž paasača. Jalla nužupan Yooz mantaparu ojkn̄i žoñinaca yapaquiča, mostaz munti pajkñila, jalla nižta irata.

²⁰ Nižaza Jesusaqui cjichiča:

—Tii takunacžtanzakaz Yooz mantaparu ojkn̄i žoñinacž puntu intintazkatasacha. Jalla tužuča.

²¹ Tsjaa maatak žonqui čhjep tupu jac'užtan levaturžtan t'ajzinča. Nekztanaqui tjappacha nii t'anti masaqui t'amchiča. Jalla nižta iratača, tjapa kjutñi tii muntuquiz žoñinacaqui Yooz mantita kamañchiz cjisnaquiča.

LIWRIITA ZOŇŽ PUNTU

²² Wiruñaquei Jerusalén jiczquiz ojkan, Jesusaqui tjaajinchiča. Jakziran watatčhaja, jalla nii watjaran jochiran tjaajinchiča.

²³ Nuž tjaajnan, tsjii žoñiqui Jesusižquiz pewcziča, tuž cjican:

—Wejt Jiliri, ¿koluckaz liwriita žoñinacajo?

Nekztanaqui Jesusaqui kjaaziča, tuž cjican:

²⁴ —Ančhucqui tjapa kuz cjee, arajpach ojkn̄i zkoz jicz zanquiz luzjapa. Wejrqui ančhucacuz cjiwča. Casticz tjuñquiziqui tjapa žoñinacaqui luz pecaquiča. Nii oraqui anaž ataquiča. Jalla nižtiquiztan anziqui liwriiñi zanquiz luzjapa, tjapa kuz cjee.

²⁵ Tsjii noojiqui arajpach kjuychiz tuyñuqui tsijtsnaquiča liwriiñi zana chawjczjapa. Ančhucqui, zawnctan cjiñinaca, nii chawjczta zanquiz t'ok t'okaquiča, tuž cjican: “Wejt jiliri, cjetznalla, cjetznalla”. Kjuychiz žoñiqui kjaaznaquiča, tuž cjican: “Anal ančhuc pajuča. ¿Jecnactčhuckazlaj ančhucqui?”

²⁶ Jalla nuž čhiitiquiztan ančhuczi zakaz chiyačhani, tuž cjican: “Amtan chica lujlchinča. Nižaza wejtnaca wajt calliran tjaajinchamča”.

²⁷ Pero nii arajpach kjuychiz tuyñuqui kjaaznaquiča, tuž cjican: “Ančhucqui anapal pajuča, cjiwla. Wejtquiztan oka, tjapa ančhucqui ana zuma kuzzizčhucča”.

²⁸ Nekztan Jesusaqui cjichiča:

—Abrahamžtan, Isaacžtan, Jacobžtan, tjapa Yooz taku paljayñi profetanacžtan, tjap-pacha ninacaqui arajpach Yooz kjuyquiz želaquiča. Ančhuczi zawnctanpanikaz želaquiča. Jalla nuž zawnctan žejlcan ančhucqui kaaquiča, nižaza izkež jojaquiča, ana luzzucaž cjen.

²⁹ Tjapa kjuttan criichi žoñinacaqui arajpach Yooz kjuyquin luzaquiča, užatan, wartan, tajatan, tuwantan, nuž tjapa kjuttan. Nižaza nii luzzi žoñinacaqui arajpach Yooz kjuyquiz cusa atintitaž cjequiča. Yooz čhjeri luli julznaquiča.

³⁰ Nižaza Yoozqui arajpachquin yekjap tii muntuquiz wirquin cjiñi žoñinaca tucquin cjiskataquiča. Nižaza yekjap tii muntuquiz tucquin cjiñi žoñinaca wirquin cjiskataquiča.

JERUSALEN CJITA WAJTQUIN TICZ PUNTU

³¹ Jesusiž taku žeržtan, nii noojpacha, tsjii kjaž fariseo žoñinacaqui tjonchiča, tuž cjican:

—Tekztan am oka. Herodes cjita jiliriqi am conz pecča.

³² Jalla nekztanac Jesusaqui kjaaziča, tuž cjican:

—Ančhucqui nii mañus Herodesquin oka. Niižquin chiižca, tuž cjican: “Tsjii kjaž tjuñi tirapal Yooz obranacal paa-uča, zajranaca chjatkatcan, laanaca čhjetincan. Nekztan tsjii kjaž tjuñquiztan wejt obra žerznača”.

³³ Pero wejrqui tsjii kjaž tjuñi tiral kamača, Jerusalén wajtquin ticzcama. Jerusalén wajtquin Yooz taku paljayñi profetanacaqui ticstanča.

³⁴ ‘Jerusalén, Jerusalén wajtchiz žoñinaca! Ančhucqui Yooz taku paljayñinaca coničhucča. Nižaza Yooziž cuchanžquita žoñinaca maztan čhjaquiñčhucča. Wallpiquei persun ozmachanaca kjarž koztan juntiñil, jantey. Jalla nižta irata wejrqui tii wajtchiz žoñinaca juntiz pecuča. Ančhuczi ana wira wejtquin tjonz pequiñčhucča.

³⁵ Jalla nižtiquiztan ančhuca wajt yokaqui ana Yooz kjarquiz žejlča. Nižaza wejrqui cjiwča. Tsjii noojiqui ančhucqui wejt puntuquiztan chiyaquiča, “Honorchiz cjila, tii Yooziž cuchanžquita žoñiqui”. Jalla nii oracama, ančhucqui wejr ana wilta cheraquiča.

14

TSJII CURPU TJUUCHI ZOÑIQUI CHJETINTATACHA

¹ Tsjii jeejz tjuñquiziqui Jesusaqui tsjii fariseo jilirž kjuya luli ojkchiča. Yekja fariseo žoñinacaqui Jesusa awayt'atča.

² Nižaza nii kjuyquiz želatča tsjii curpu tjuuchi žoñi. Jesús žcati želatča.

³ Nii cheržcu Jesusaqui fariseo žoñinacžquiz lii tjaajiñinacžquiz, jalla ninacžquiz pewcziča, tuž cjican:

—¿Jeejz tjuñquiziqui tsjii laa žoñi čhjetnasaj? už ¿ana čhjetnasaj?

⁴ Ninacazi ch'ujukaz cjissiča. Nekztanaqui Jesusaqui laa žoñi kjawžcu, čhjetinchiča. Nekztan laa žoñžquiz cjichiča:

—Oka amqui —cjicanaqui.

⁵ Nekztanaqui Jesusaqui fariseo žoñinacžquiz tuž cjichiča:

—Jeejz tjuñquiz cjenami aznumi wacami tujquiz tjojtsiž cjen okžcu, ¿anaž jooznasajo?

⁶ Jalla nuž chiitiquiztanaqui ana jaknuž kjaazñi atchiča.

PJIZTA PUNTU

⁷ Nekztanaqui Jesusaqui nii kjuyquin lujlcan jalla tižta cherchiča. Kjawžta žoñinacaqui tucquin julz kjuratča, nižaza honorchiz cjis pecatča. Jalla nižta cjićjiñi cheržcu, Jesusaqui, tuž cjichiča:

⁸—Amqui tsjii zalzñi pjiiztiqiz kjawzta cjesaž niiqui, anača tucquinpan julzqui. Am jarupacha tsjii juc'ant jilir žoñiqui tjonasaž niiqui, am tucquin julzpantaž cjesača.

⁹Jecčhalaj pucultan ančhucqui kjawzi, jalla nii kjawzñi žoñiqui amquiz chiyasača, “Am julz tii juc'ant jiliržquin tjaa”, cjican. Jalla nižtiquiztanaqui amlaqui azanpanti wirquin julz cjesača. Am aziž cjesača.

¹⁰Ana nižta paa. Antiz tuž cjee. Tsjii zalzñi pjiiztiqiz kjawztaž cjesaž niiqui, wirquinpankaz julzqui. Nekztan nii kjawzñi žoñiqui irantižcuqui, amquin chiyasača, tuž cjican: “Wejt k'ayi jila, ticchuc watžca, tucquin julžca”. Jalla nuž kjawzcu tucquin tjulžtiquiztan parti žoñinacž čhujcquiziqui honorchizim cjesača.

¹¹Jakzilta žoñit parti žoñinacžquiz persun honora chii chyačhaj niiqui, wiruñiqui nii žoñiqui ch'ujukaz cjesača. Pero humilde kuzziz žoñizti honorchiz cjiskattaž cjequiča.

¹²Nižaza Jesusaqui nii kjawzñi žoñžquiz cjichiča:

—Chjeri tjaasim pecčhaj niiqui, anam kjawznaquiz am persun mazinacžquiz, nižaza am persun jilanacžquiz, nižaza am persun famill parintinacžquiz, nižaza am ricach visinunacžquiz, jalla ninacžquiz alaja anam kjawznaquiča. Ninaca čhjeri luli kjawznasaž niiqui, ninacaqui am zakaz kjawznasača. Nižtiquiztan amzakam čhjeri tanznaquiča. Nižtiquiztan ana gastichim cjequiča.

¹³Ana nižta paa. Antiz tuž cjee. Chjeri tjaasim pecčhaj niiqui, kjawznaquiča pori žoñinaca, zuch žoñinaca, coj žoñinaca, zur žoñinaca, jalla ninacžquiz kjawznaquiča.

¹⁴Nuž paažcu cuntintum cjequiča. Ninacaqui anaž čhjulumi tjepñi atasacha. Yooz zuma kamañchiz žoñinacž jacatatž tjuñiž tjontan, jalla nekzim amqui tjepuntam cjequiča.

¹⁵Jalla nuž Jesusiž chiita taku nonžcu, tsjii julzi žejlñi žoñiqui Jesusižquiz cjichiča:

—Arajpach Yooz Ejpž kjuyquin lujlñinaca cuntintuž cjequiča.

¹⁶Jalla nekztanaqui Jesusaqui nii žoñžquiz quint'ichiča, tuž cjican:

—Tsjii nooj tsjii žoñiqui pajk pjiizta paachiča. Tuquiqui walja žoñinaca kjawskatchiča pjiiztiqiz.

¹⁷Pjiizta čhjeri lujlz ora piyunaqui kjawzta žoñinacžquiz cuchanžquitača, tuž cjeyajo: “Tjappacha listu tjacztača, jaziqui ž-tjona”.

¹⁸Nekztanaqui kjawzta žoñinacaqui pasinza mayizichiča. Tsjii žoñiqui cjichiča: “Anzilla yoka kjaychinča. Jalla nii cheržquistanča. Jalla nižtiquiztan amqui wejr pasinzt'alla”.

¹⁹Tsjiizti cjichiča: “Anzilla tunca waca kjaychiñča. Jalla nii waca yanstanča. Jalla nižtiquiztan zumaž pasinzt'alla”.

²⁰Tsjiizti cjichiča: “Anzilla tjunatan zalzinča. Nižtiquiztan anal oki atasacha”.

²¹Nii cuchanžquita piyunaqui quejpžcu patrunžquiz tjappacha quint'ichiča, jaknuž žoñinacat kjaaztčhaja, jalla nii. Nuž quint'itiquiztan nii patrunaqui walja žawjchi cjissiča. Nižaza piyunžquiz cjichiča: “Uri ojklayžca calliran nižaza wajt tjiyaran. Pori žoñinaca zjiyczna, nižaza zuch žoñinaca, cojonaca, zuranaca, jalla ninaca kjawzca”.

²²Wiruñiqui nii piyunaqui mazziča tuž cjican: “Wejt patruna, amiž mantitacama ojklaychinča. Nižaza iya julz campo žejlča”.

²³Nekztanaqui patrunaqui cjichiča piyunžquiz: “Wilta ojklayžca callinacaran jicznacaran. Žoñinaca kjawkjawcan ojklayžca kjuyquiz chjijsnajo. Kjawzta žoñinacžquiz tjonkatžca”.

²⁴Nekztan Jesusaqui cjichizakazza:

—Wejrqui cjiwča. Weriž primira kjawzta žoñinacaqui anapan čhjeri lulasača wejt arajpach pjiiztiqiziqui. —Jalla nuž cjichiča Jesusaqui.

JESUCRISTUZQUIN KUZUZ PUNTU

²⁵Walja žoñinacaqui Jesusa apziča. Nekztanaqui Jesusaqui tsijtsu žoñinacž kjutñi quejpciča, tuž cjican:

²⁶ –Jakzilta žoñit wejtquin kuzziz cječhaj niiqui, niž persun ejpmi, maami, tjunmi, maatinacami, persun jilanacami, persun cullaquinacami, nižaza niž persun kamañ wirami, jalla ninacžquiztanami wejtquin juc'anti kuzziz cjistanča. Anaž wejtquin juc'anti kuzziz cjequiž niiqui, anaž wejt partir žoñi cjichuca cjesača.

²⁷ Jakzilta žoñit wejt partir žoñi cjis pecčhaj niiqui, tjapa kuztanž wejtquiz cjistanča niž persun wira apt'iz cjenami.

²⁸ Tsjilla cjesača. Jequit tsjii campanturi kjuyz pecčhaj niiqui, primiruqui gasto zumpacha tantiistanča, paaz wacata ana wacata, jaknuž nii campanturi tsajczjapa, jalla nii.

²⁹ Ana zumpacha tantiižcu kallantaquiž niiqui, nekztan ana tsaqui atchucaž cjesača. Jalla nuž ana tsajcni cheržcu parti žoñinacaqui nii žoñžquiz iñarasača,

³⁰ tuž cjican: “Nii žoñiqui campantur kjuyi kallantichiča. Nekztan ana tsaqui atchiča. Ana zuma tantiichiča”. Jalla nuž tjasaquiča.

³¹ Nižaza jakzilta chawc jilirit quira zalz pecačhaj niiqui, primiruqui zumpacha tantiistanča, niž tunca warank zultatunaca tsjiizuñž paatunc warank quintra zultatunacžquiz atipata, ana atipata, jalla nii.

³² Ana atipchucažlaj niiqui, quintra jiliržquin ažquin cjen cumisiuna cuchansa, nužquiz pasinza paajo, acuerdo luzjapa.

³³ Jalla nižta, ima wejtquiz kuzziz cjen, zumpacha tantiiz waquiziča. Jakzilta žoñit čhjultakquiztanami anaž wejtquiz juc'anti kuzziz cjequiž niiqui, anapanž wejt parti žoñi cjesača.

³⁴ Yacuqui zumača. Yacuqui lak'ansnasaž niiqui, ¿jaknuž wilta zuma cjesajo?

³⁵ Anapanž cjesača. Anaž yokjapa sirwasača, nižaza anaž yok kulljapa sirwasača. Jalla nuž ana sirwanami tjojtspanikazza. Jakziltažlaj cjuñchiz niiqui, zumpacha nonžna Yooz puntu intintisjapa.

15

KATCHI UUZU QUINTU

¹ Impuesto cobriñi žoñinaca nižaza ujchiz žoñinaca Jesusižquiz macjatžquichiča, niž taku nonzjapa.

² Jalla nižtiquiztanaqui fariseo žoñinacžtan lii tjaajiñinacžtan jalla ninacaqui Jesusiž quintra chutchiča, tuž cjican:

–Tii žoñiqui ujchiz žoñinacami risiwñipanikazza, nižaza ninacžtan chica čhjeri lujlñiča.

³ Jalla nižtiquiztan Jesusaqui ninacžquiz quint'ichiča tuž cjican:

⁴ –Tsjii žoñiqui patak uuzichiztača. Nekztanaqui tsjiilla katchiča. Jalla nekztanaqui parti uuzinaca ilakz yokquin ecchiča, katchi uuzi wajtzcama. ¿Jakziltat ančhucaquiztan ana nižta paajo?

⁵ Nižaza katchi uuzi wajtžcuqui, azkar juntuñ tjojtžcu, awatiriqui tjonchiča, ancha cuntintu.

⁶ Nižaza kjuya irantižcuqui žcatinta visinunacžquiz nižaza mazinacžquiz kjawziča, tuž cjican: “Wejttan cuntintuž cjee. Wejt katchi uuziqui wajtchinča”.

⁷ Nižaza wejrqui cjiwča, jalla nižta iratača arajpachquinaqui. Tsjii ujchiz žoñiqui Yoozquin kuzziz cjesaž niiqui, arajpachquin žejlñinacaqui ancha cuntintuž cjisnaquiča. Llatunc tunc llatuncani ana Yoozquin kuzziz žoñinaca želačhani: “Wejrnacqui zuma kamok”, cjicanaqui. Pero arajpachquinaqui ninacžquiztan juc'anti cuntintuž cjequiča nii zinta Yoozquin kuzziz žoñiž cjen.

KATCHI PAAZ QUINTU

⁸ Jesusaqui quint'ichizakazza, tuz cjican:

—Nižaza tsjaa tunca paazziz žon želatča. Nekztanaqui tsjii paaz tjatanchinča. Paaz tjanžcu, lámpara pekzinča. Nižaza kjuya pewchinča, zumpacha. Nuž zuma pewcan, katchi paaz wajtchinča.

⁹ Nii paaz wajtžcu, mazinacžquiz nižaza žcatinta visinunacžquiz kjawzinča, tuž cjican: “Wejttan cuntintuž cjee. Wejt katchi paaz wajtchinča”.

¹⁰ Wejrqui cjiwča. Nižaza arajpachquinaqui Yooz anjilanacaqui cuntintuž cjequiča čhjulorami tsjii ujchiz žoñiqui Yoozquin kuzziz cjisnačhaja, jalla nii oraqui.

EJPZQUIZTAN ZARAKCHI MAJCH QUINTU

¹¹ Nižaza Jesucristuqui tii quintu zakaz quint'ichiča, tuž cjican:

—Tsjii žoñi želatča, pucultan lucmajch ocjalchiz.

¹² Nii upañažta majchqui ejpžquiz cjichiča: “Tata, irinsaž wejtquiz tjaall amqui”. Jalla nekztanaqui ejpqui irinsa t'akžinčiča pucultan majchnacžquiz.

¹³ Tsjii kjaž majquiztan upañažta majchqui irinsa tuychiča. Nekztan tjappacha niž cusasanaca juntjapžcu, ažkquin ojkchiča yekja nacionquin. Nekztan nii nacionquin tjappacha niž cusasanaca gastichiča, ana zuma kamcan.

¹⁴ Nužquiz tjappacha cusasanaca miržcuqui, upañažta majchqui ana čhjulchiz cjis-sičha, žoñi maya. Nižaza nii nacionquiz čhjeri upsičha. Upañažta majchqui čhjerž kjara passiča.

¹⁵ Nekztanac niiqui langz kjuri ojkchiča. Tsjii žoñžquiz langz wajtchiča. Nii patruaqui jochi mantichiča, cuchu ichajo.

¹⁶ Anča čhjeri eeczatchiča nii ejpžquiztan zarakchi majchqui. Ana čhjulu lulimi onantaž niiqui. Jalla nekztanac cuch lulinacami čhajpinacami lujlnatakaztača.

¹⁷ Jalla nekztanaqui kuzquiz pinsiskatchiča, tuž cjican: “Tjappacha wejt ejpž piyunanacaqui cusa čhjerinaca lujlčhani. Nižaza žejtchinacami žejlčhani. Wejrzi tekzi t'akjiri želuča; čhjerž kjara pascu, ticz atučhani.

¹⁸ Quepaž wejrqui, tira wejt ejpžquin. Nižaza wejt ejpžquin cjeeča: ‘Wejt Tata, Yooz quintra am quintra uj paachinča.

¹⁹ Wejrqui anam am maati cjichucača. Kjažllami tsjii am piyunažtakaz uywalla’ ”. Jalla nuž cjican pinsichiča.

²⁰ Nekztanaqui ejpžquin zarakchiča; ejpž kjuy kjutñi ojkchiča. Ažkquin cjen ejpqui niž majch pajchiča. Kuzquiz anča okziča, anča k'aaztichiča. Nekztan majch zali zajtchiča. Majch žcojržcu, čhjulziča.

²¹ Nekztanaqui majchqui ejpžquiz cjichiča: “Tatay, wejrqui Yooz quintra, am quintra uj paachinča. Jaziqui wejr am maati anaž cjichuca”.

²² Jalla nekztanaqui ejpqui piyunanacžquiz cjichiča: “Uri, jila walurchiz zquiti jwesanzca. Nii zquitžtan wejt majch tjutžna. Niiž loc'anquiz zurtija majczina. Nižaza zapato tjutžna.

²³ Nekztanac ančhucqui walipunt cjew wacaž zjijczca conzjapa. Pjijztaž paaquiča. Zuma čhjeriž lulaquiča.

²⁴ Wejt majch ticzižtakaz katchitača. Jaziqui ticziquiztan jacatatchižtakaz tjonchiča. Nižtami nižtan zalchinča”. Jalla nekztanaqui pjijzta payi kallantichiča.

²⁵ Jalla nuž upañažta majch tjonz ora, niž jilaqui joch yokquintača. Kjuy žcati irantižcan, pjijzta nonziča, tsajtñi wayliž jora.

²⁶ Jalla nižtiquiztanaqui jilir majchqui tsjii tsjii piyuna kjawziča. Nuž kjawžcu, “čhjulut wat?” cjican, pewziča.

²⁷ Piyunaqui kjaaziča, tuž cjican: “Am lajkqui tjonchila. Wiwusa anazak kjaž cjissi tjonchiča. Nižtiquiztan am ejpqui walipunt cjew wac conkatchiča, pjijzta paazjapa”.

²⁸ Jalla nii quintu zizcu, jilir majchqui walja žawjchiča. Pjijztiquiz ana luz pecatča. Nuž cjen ejpžakazza nii roqui ulanžquichi luzcajo.

²⁹ Nekztanaqui jilir majchqui ejpžquiz cjichiča: “Kjaž watanaca wejrqui am sirwichinča. Nižaza am mantitacama okintača. Jalla nuž cjenami ana wira tsjii cabrallami onanñamtača, wejt mazinacžtan pjijzta paazjapami.

³⁰ Anziqui tii am ana cazñi majchqui tjonchiča. Tiiqui ana zuma kamcan am paaz gastichila, ana zum maatakanacžtan zejlcan. Nuž paata cjenami, nižtajapa tsjii walipunt cjew waca conchamča”.

³¹ Jalla nekztanaqui niž ejpqui kjaaziča, tuž cjican: “Wejt maati, amqui wejt chicaž kamñampanla. Tjapaž wejttac žejl-la, niic amtacamača.

³² Tii am lajkqui ticzižtakaztača. Jaziqui ticziquiztan jacatatchižtakaz tjonchiča. Nižaza katchitača. Jaziqui wažtača. Jalla nižtiquiztan ancha cuntintuž cjen pjijzta paaz waquiziča”.

16

CUSASANACA CWITIÑI PIYUNA QUINTU

¹ Nižaza Jesusaqui niž tjaažinta žoñinacžquiz tsjii quintu zakaz quint'ichiča, tuž cjican:

—Tsji ricach žoñi želatča. Niž kjuy cusasanaca cwitajo tsjii piyuna utchiča. Wiruñaquei yekja žoñinacaqui nii patrunžquiz mazziča, tuž cjican: “Tii am piyunaqui am cusasanaca ancha anawali gastiñiča”.

² Jalla nekztanaqui patrunaquei piyunžquiz kjawziča, tuž cjican: “¿Čhjul quintut am puntuquiztan nonojo? Jaziqui jaknužum amqui wejt cusasa cwitižinčhaja, jalla nii wejtquiz quint'alla. Amiž ana zuma cwitichiž cjen anam iya wejt cusasa cwitasacha”.

³ Nekztanaqui nii piyunaqui pinsichiča, tuž cjican: “¿Jaziqui kjažt wejr cjisnaquejo? Wejt patrunaquei wejrž jakjurpayla nii wejt langzquiztanaqui. Jaziqui ana ancha langziž cjisnula wejrqui. Wejtta azi ana žejlča, zkal yokquiz langzjapa. Nižaza žoñžquiztan tomangz eksnuča, azuča.

⁴ ¿Jalla nuž ana langzñi atchiž cjen, čhjulut paa-as?” Nekztan piyunaqui cjichiča: “Aaaa. Čhjulut paa-as, nii zizuča wejrqui. Nekztan žoñinaca wejr atintiñiž želačan. Wejr kjawznačan ninacž kjuyquizimi”.

⁵ Jalla niž pinsita jaru piyunaqui zina zina patrunž kajchi žoñinaca kjawziča. Tsji primira kajchi žoñžquiz pewcziča, tuž cjican: “¿Kjažum wejt patrunžquiz kajchamta?”

⁶ Kajñi žoñiqui kjaaziča, tuž cjican: “Patac turril aceite kajchinča”. Jalla nekztanaqui piyunaqui cjichiča: “Tiž am factura. Uri julzna. Yekja factura paa. Pjijska tunca turril aceitekaz cjižrna”.

⁷ Wiruñaquei tsjiizuñ kajchi žoñžquiz pewcziča, tuž cjican: “Am, ¿kjažum kajchamta wejt patrunžquiz?” Kajñi žoñiqui kjaaziča, tuž cjican: “Patac quintal tiricu”. Nii piyunaqui cjichiča: “Tiž am factura. Nižaza yekja factura paa, quinsakal tunca quintal tiricukaz cjižrna”.

⁸ Jalla nii piyunaž nuž paan patrunaquei nii anawal piyuna c'uñchi pajchiča, niž cusasanaca cwitiñi. Jalla nižtažtakaz anawali kamñi žoñinacaqui tii muntuquiz cusasquin kuzziz kamča. Jalla nuž kamcan ninacaqui c'uñchi tjojknakñiča zuma kamñi žoñinacžquiztan juc'anti.

⁹ Wejrqui cjiwča. Tii ujchiz muntuquiz kamcanaqui žejlñi cusasanaca gastis waquiziča, zuma paacan tsji zuma amigo tanzjapa. Jalla nekztan ticžcu ančhucqui kjawztaž cjequiča niž arajpach kjuyquin.

¹⁰ Jakzilta žoñit koluc cusasanaca zumpacha cwit'ačhaj niiqui, nižaza wacchi cusasanaca zumpachazakaz cwit'aquiča. Nižaza jakzilta žoñit koluc cusasanaca ana zuma cwit'ačhaj niiqui, nižaza wacchi cusasanaca ana zuma cwit'ichiž cjequiča.

¹¹ Nižaza jakzilta žoñit tii ujchiz muntuquiz žejlñi cusasanaca ana zumpacha cwit'asačhaj niiqui, jalla nižta ana zuma kamchiž cjen, Yoozqui werar arajpach cusasanaca nii cwitiñijapa ana tjaasača.

¹² Jakzilta žoñit Yooziž tjaata cusasanaca ana zuma cwit'ačhaj niiqui jalla nižta ana zuma kamchiž cjen, Yoozqui arajpach cusasanaca tjaaz cjen pacha ana tjaasača.

¹³ 'Anaž jakzilta piyunami pizc patruna sirwi atasača. Piyunaqui tsjii patrunžquizkaz kuz tjaasača. Tsjiizuñ patrunaž jaytaquiča. Nižaza nii piyunaqui tsjii patrunžquizkaz zumpacha sirwaquiča. Nii tsjii patrunžquiz anapan zuma sirwi atasača. Yoozmi paazmi žejlča pucultan patrunažtakaz. Pero žoñinacaqui pucul-tižquiz kuz ana tjaasača. Tsjii patrunžquizpankaz zuma sirwasača.

¹⁴ Ancha paaz pecñi fariseo žoñinacaqui tjapa Jesusiž chiita taku nonziča. Jalla nuž nonžcu Jesusa iñarchiča.

¹⁵ Jesusaqui nižtiquiztan cjichizakazza:

—Ančhucqui cusa žoñižtakaz ojklayiñchucča žoñž yujcquiziqui. Yoozti ančuca kuz zizza. Tii muntuquiz žejlñi žoñinacaqui ana zuma kuzziz žoninacž honorakaz waytiča. Yooz Ejpzti nii ana zuma kuzziz žoñinaca chjaawjñipanča.

LII PUNTU

¹⁶ Nižaza Jesusaqui cjichiča:

—Juan Bautistaž tjonzcama, Moisés mantita lii azziztača. Nižaza Yooz taku paljayñi profetž tjaajintanacami azziztača, Juan Bautistaž tjonzcama. Nii timpuqui jalla nii mantita takunaca azziztača. Pero Juan Bautistaž tjontiquiztan, liwriiñi Yooz taku nižaza Yooz mantita kamañ puntu paljayzqui, jalla niiča tsjan chekanaqui. Jaziqui walja žoñinacaqui Yooz mantita kamañquiz luzjapa tjapa kuz tjaacha.

¹⁷ 'Jalla nuž cjenami tjuñimi warawarami yokami katasacha. Pero tjapa nii arajpach Yooz liizti anaž wira katasacha.

JAKJURPAYZ PUNTU

¹⁸ Nižaza Jesusaqui cjichiča:

—Jakzilta žoñit niž maataka jakjurpayžcu yekja maatakžtan zalsnačhaj niiqui, jalla nuž cjenacqui adulterio uj paača. Nižaza jakzilta žoñit jakjurpayta maatakžtan zalsnačhaj niiqui, adulterio uj zakaz paača.

RICACH ZOÑŽTAN PORI ZOÑŽTAN QUINTU

¹⁹ Nižaza Jesusaqui tsjii quintu zakaz quint'ichiča, tuž cjican:

—Tsjii wali jiru ricach žoñiqui želatča. Zuma finu zquiti cujtžñitača. Nižaza zapuru pijžtakaz ancha cusa čhjeri lujlchiča.

²⁰ Nii oraqui tsjii pori žoñi želatča Lázaro cjita. Niiž janchiqui walja zkira cjičhitača. Zapuru ricach žoñž kjuy zanquiz julzi žejlñitača.

²¹ Nii ricachuqui žejtchi čhjerinaca tjojtñitacha. Nii pori žoñizti tjojtta žejtchi čhjerinaca lujlz pecñitača. Pacunacaqui pori žoñžquiz macjatžcu niž zkiranaca issañitača.

²² Tsjii noojiqui nii pori žoñiqui ticziča. Nekztanaqui Yooz anjilanacaqui nii chjitchiča Yooz illzta zuma yokquin, Abraham cjita žoñžtan chica želajo. Wiruñacuqui nii ricachu žoñiqui ticzizakazza. Nekztanaqui yokquiz tjatžtatača.

²³ Nii ricachu žoñiqui infiernuquin sufrican želatča. Nicju sufrican, tsewc kjutñi cherchiča. Ažquiztan cherchiča Abrahamžtan Lazaružtan.

²⁴ Jalla nuž cheržcu, kjawchiča, tuž cjican: “Abraham tatay, wejr okznalla. Lázaru cuchanžca, niž loc'ana kjaztan t'awžcu, wejt lasquiz lanznajo, ch'uñkatajo. Tii asñi ujquiz anchal sufruča”.

²⁵ Abrahamzti cjichiča: “Jila, cjuñznalla, muntuquiz kamcan, ancha cusa kamchamča. Lazaruzti t'akjiri kamchiča. Jaziqui anziqiu Lazaruqui kuztača, ancha cuntintuča. Amzti ancha sufriča.

²⁶ Nižazakaz Yoozqui pajk pal k'awa utchipanča wejtnacquiztanami amquiztanami. Jaziqui tekztan nawjkchuc ojkz pecñinacaqui anaž okasača. Nižaza nawjktan tjonz pecñinacaqui anaž tjonasača”.

²⁷⁻²⁸ Jalla nekztanaqui nii ricuqui cjichiča: “Abraham tatay, wejtta pjijskaltan jilanaca žejlča. Jaziqui am rocuča, wejt ejpž kjuyquin Lázaro cuhanžinžcalla, ninacžquiz paljayajo, nižaza tii infiernuquiz ana tjonajo”.

²⁹ Pero Abrahamqui nižquiz kjaaziča, tuž cjican: “Ninacžta žejl-la Moisés cjiirtami nižaza Yooz taku paljayni profetanacž cjiirtami. Nii cjiirtanacquiz cazla, kuz tjaala”.

³⁰ Jalla nekztanaqui nii ricuqui kjaaziča tuž cjican: “Razunam chiiča, Abraham tatay. Pero tsjii žoñiqui ticziquiztan ninacžquin okačhaj niiqui, Yoozquin kuzziz cjskatačani”.

³¹ Nekztanaqui Abrahamqui cjichiča: “Ninacaqui Moisés mantita taku nižaza Yooz taku paljayninacž taku ana criyačhaj niiqui, tsjii ticziquiztan jacatatchi žoñž takumi ana zakat criyačhani”. –Nuž quint'ichiča Jesusaqui.

17

UJQUIZ TJOJTTA PUNTU

¹ Nekztanaqui Jesusaqui niž tjaajinta žoñinacžquiz cjichiča:

–Ujquiz tjojtskatni žoñinaca žejlñipantača. Pero Yoozqui nii ujquiz tjojtskatni žoñinacaqui anawaliž watkataquiča.

² Jakzilta žoñit Yoozquin kuzziz žoñi ujquiz tjojtskatačhaj niiqui, nižta ana zum žoñinacaqui koz kot kjazquin tjojttaž waquiziča, tsjii pajk taj maztan jorquiz mokžinta. Jalla nuž tsjan cusaž cjesača nii ujquiz tjojtskatni žoñžtaqui.

³ Nižta žoñinacžquiztan ančhucqui walja cwitassa, ana ujquiz tjojtsjapa. Tsjii am jilanacžquiztan am quintra uj paačhaj niiqui, jalla nižquiz žumpacha chiižina, niž kuz campiita cjeyajo. Nekztan niž kuz campiita cječhaja, jalla nii uj paañi žoñžquiz pertunaquiča amqui.

⁴ Zapa wiltami nii am quintra uj paañi žoñiqui pertuna mayizičhaj niiqui, amqui pertunaquiča, tsjii nooj pakallawk wilta am quintra uj paanami.

YOOZQUIN KUZUZ PUNTU

⁵ Wiruñiqui Jesusiž illzta žoñinacaqui Jesusa jiliržquiz paljaychiča tuž cjican:

–Juc'anti Yoozquin kuzziz cjisjapa yanapalla.

⁶ Nuž maytiquiztan Jesusaqui kjaaziča, tuž cjican:

–Tsji mostaz semillaqui aunqui koltallami wali pakji pakniča. Jalla nižta iratača ančhucqui. Yoozquin walja kuzzizčhucčhalaj niiqui, milajrunacami zakaz paasača. Walja Yoozquin kuzziz želanaqui, tii sicómoro cjiita muntiquiz cjesača, tuž cjican, “Tekztan pajlta cjee, nižaza kotquin tjojtta cjee”. Jalla nuž chiitiquiztan nižtapachaž cjesača.

PIYUNZ PUNTU

⁷ Jesusaqui cjichizakazza:

–Tsjiilla chiyasača. Ančucaquiztan piyunchiz žoñi želasača. Piyunaqui joch yokquiztan tjonasača, uywanaca itzcu, nižaza zkala yoka kjullžcu. Jalla nuž langzquiztan tjonanaqui, anapanž ančhucqui cjesača, “Watžca, julzna, tiiča lujlzna” cji-canaqui.

⁸ Ančhucqui antiz piyunžquiz cjesača, “Chjeriž apura kisna. Nižaza wejr atintisjapa, zumpacha tjaczna. Wejrqui lulača, licača. Nekztanž amqui lulaquiča, nižaza licaquiča”. Jalla nuž tsjii piyunžquiz cjesača.

⁹ Jakzilta piyunat niiz patrunž mantitanaca paačhaj niiqui, patrunaqui sparaquiz cjesajo?

¹⁰ Ančhucqui Yooz piyunažtakazza. Jalla nižtiquiztan tjapa Yooz mantitacama kamcan, ančhucalaqui chiiz waquizičha, tuž cjican, “Wejrnacqui am piyunitčha. In-akaztčha wejrnacqui. Jaknužt paaz waquizičhaja, jalla niikaz paayinčha”.

MOJKCHI JANCHICHIZ ZOÑINACA CHJETINTATACHA

¹¹ Jalla nekztanaqui Jesusaqui Jerusalén watja ojkan, Samaria cjita yoka Galilea cjita yoka nii taypiquin watchičha.

¹² Nekztanaqui tsjii watjallquiz, waj irantawc cjen, tuncaltan mojkchi janchichiz zoñinacaqui Jesusizquin zali tjonchičha. Ažkquiztan Jesusizquiz chiižinchičha.

¹³ Altu tawkžtan tuž cjichičha:

—Jesusa, Jiliri, wejtnacaquiz okznalla!

¹⁴ Jalla nii laanaca cheržcu, Jesusaqui cjichičha:

—Icliz jiliržquin persun janchi tjeezñi oka.

Jalla nuž ojkan, laanacaqui žejtchi quirchičha.

¹⁵ Tsjii tsjiiqui persun janchi žejtchi cheržcu cuttichičha, Jesusiz kjutñi, altu joržtan Yooz honora waytican quejpčhičha.

¹⁶ Jalla nuž Jesusizquin wilta zalžcu, niiz yujcquiz quillzičha, nižaza tuzi t'okzičha yoka iranta. Jesusizquiz ancha sparaquiz cjichičha. Nii zoñiqui Samaria wajtchiz zoñitačha.

¹⁷ Nekztanaqui Jesusaqui cjichičha:

—¿Ančhucqui anataj tuncaltanpacha žejtchinčhucjo, tii laaquiztanajo? ¿Jakziqint tsjii partinacajo?

¹⁸ Amqui anaž tii wajtchiz zoñila. Am zinakaz quejpžquila Yoozquin honora wayticanacqui.

¹⁹ Nekztan Jesusaqui nii zoñžquiz cjichičha:

—Tsijsna, oka. Amiž tjapa kuz criitiquiztan, jaziqui čjetintamčha.

YOOZ MANTIZ TJUÑI PUNTU

²⁰ Nekztanaqui fariseo zoñinacaqui Jesusizquiz pewczičha, tuž cjican:

—¿Čhjulorat Yooz Epiž mantiz tjuñi irantižcaquiya?

Nekztanaqui Jesusaqui kjaazičha, tuž cjican:

—Yooz Epiž mantiz tjuñiqui anačha cherchuca.

²¹ Anačha “tekzipan” cjican nii tjuñi tjeeznasačha. Nižaza anačha “nii nawjk” cjican nii tjuñi tjeeznasačha. Yooz mantizqui zoñinacž kuzquizpachačha. Jalla nižtiquiztanac Yooz mantizqui anaž cherchuca cjesačha.

²² Jalla nekztanaqui Jesusaqui niiz tjaa jintanacžquiz cjichičha:

—Tsjii sufris timpuqui irantižcaquičha ančhucquiz. Jalla nekztanac ančhucqui wejr arajpachquiztan quejpsquiñi cherz pecaquičha, tsjii noojillami. Pero weriž arajpachquin želan, anaž wejr cheri atasačha. Wejrqui tsewctan cuchanžquita Yooz Zoñtčha.

²³ Nižaza nii sufris timpuquiziqui zoñiqui Cristuž puntuquiztan parlaquičha, tuz cjican: “Arajpachquiztan chjiwžquichičha. Tekzi žejlčha”. Tsjiizti zakaz chiyaquičha, “Nii nacjučha Cristuqui” cjican. Pero ančhucqui anaž nicju okaquičha, nižaza nii chiita taku anaž criyaquicha.

²⁴ Tsjii liwjlwjiñi rayu cjita tjonñila, jantey, jalla nuz liwjtayžcaquičha, liwjpacha irantaž kjanžnaquičha. Jalla nižta irata wejrqui arajpachquiztan wilta tjonacčha. Weriž tjonan, tjappacha zizasachha. Jalla nižtaž wejt tjonz tjuñiž cjequičha.

²⁵ Anziqui primiraqui wejrqui walja sufristančha. Nižaza tii timpuquiz kamñi zoñinacžquiztan anapan criital cječha. Ana werj cherz pecaquičha.

²⁶ Jaknužt Noež kamta timpuquiz watčhaja, jalla nižtazakaz wataquiča ima weriž tjonan. Wejrqui tsewctan cuchanžquita Yooz Zoñtča.

²⁷ Noež timpuquiz jalla tuž kamñitača zoñinacaqui. Zuma čhjeri lujlñitača, nižaza licñitača. Nižaza zalzñitača, nižaza zalzjapa tjaañitača. Jalla nuž zoñinacaqui kamchiča asta Noež pajk warcu kjuyquiz luzcama. Yooz kamañquiz kamzqui ana importayñitača. Jalla nekztanaqui kjaz juyzuqui tjonchicha. Jalla nii juyzuquiziqui tjappacha anawali kamñi zoñinacaqui ticziča.

²⁸ Nižaza jaknužt Lot cjita zoñž timpuquiziqui watčhaja, jalla nižtazakaz wataquiča ima weriž tjonan. Lujlñitača, licñitača, kjayñitača, tuyñitača, čhjacñitača, y nižaza kjuya kjuyñitača. Yooz kamañquiz kamzqui ana importayñitača.

²⁹ Jalla Lotž Sodoma cjita wajtquiztan ulantan, tiripintit uj azupri chijñi tjonchiča. Nuž chijintiquiztan tjappacha ujžcu ticziča.

³⁰ Wejt tjonz tjuñquiziqui nižta iratazakaz wataquiča. Wejrqui tsewctan cuchanžquita Yooz Zoñtča.

³¹ 'Nii wejt tjonz tjuñquiziqui jakziltat kjuy zawncu želačhaja, anaž kjuy cusasanaca aptiñi luz waquiziča. Nižaza jakziltat joch yokquin želačhaja, anaž wajt kjuya cuttis waquiziča.

³² Lotž tjuna puntuquiztan cjuñzna.

³³ Jakziltat persun kamañquiztan ana jaytačhaja, jalla niiqui anaž arajpachquin kamaquiča. Nižaza jakziltat persun kamañ wira jaytičhaja, jalla niiqui arajpachquin wiñaya kamaquiča.

³⁴ 'Nižaza wejrqui cjiwčha. Weriž tjonan nii arama pucultan tsjii kjuyquiz tja-jaquičha. Jalla nuž tjajan, tsjiiqui arajpach kjutñi waytižcu chjichtaž cjequiča, tsjiizti pachpiquiz nii kjuyquiz ectaž cjequiča.

³⁵ Nižaza pucultan maatakanaca chica jawuncan, tsjaaqui arajpach kjutñi waytižcu chjichtaž cjequiča. Tsjaazuñzi pachpiquiz ectaž cjequiča.

³⁶ Nižaza pucultan luctakanaca joch yokquin želan, tsjiiqui arajpach kjutñi waytižcu chjichtaž cjequiča, tsjiizuñzi nii joch yokquinpacha ectaž cjequiča.

³⁷ Jalla nižta tjaajinta takunaca nonžcu, niiž tjaajinta zoñinacaqui pewcziča, tuž cjican:

—Wejt Jiliri, ¿jakziquin tižtanaca wataquiya?

Jalla nekztanaqui Jesusaqui kjaaziča, tuž cjican:

—Jakziquin ticzi janchi žejlčhaja, jalla nicju cunturinacaqui muzpa ajcsñičha. Jalla nižta irata jakziquin ana wali paañinacaqui žejlčhaja, jalla nicju ana walinaca wataquiča.

18

ZEW ZONATAN JUEZ JILIRZTAN QUINTU

¹ Nekztanaqui Jesusaqui tjaajinchiča, zoñinacžlaqui Yoozquin mayizizpanča, ana upa kuzcan, jalla nuž tjaajinchiča.

² Tjaajincan jalla tuž quint'ichiča:

—Tsjii juez jiliri tsjii wajtquiz želatča. Yooz ana rispitiñitača, nižaza ana čhjul zoñimi rispitiñitača.

³ Nii wajtquizpacha želatča tsjaa žew maatak žon. Tsjii nooj naa žonqui juez jiliržquin ojkchinča, tsjii quija quijsquizjapa, nižaza naaža quinrižtan naa zumpacha azquichajo.

⁴⁻⁵ Ažkapan juez jiliri qui ana naaža quija nonz pecchiča. Niiž wiruñ nižtami pinsichiča, tuž cjican: “Taa žew žonqui tirapanikal quijžtan wejr molističa. Yoozmi zoñimi wejtta anaž importičha. Jalla nuž cjenami taaža quija nonznača, wejtquiz ana

tira molistajo tii quijžtan. Wejrqui ana azquichačhaj niiqui, naaž tjontjonanaqui wejt žawjwat zjijcnačhani”.

⁶⁻⁷ Nekztanaqui Jesús Jiliriqui cjichiča:

—Jalla nuž čhiichiča nii anawal juez jiliriqui. Nižaza Yooz Ejpqui niž illzta žoñinacž quijanaca azquichaquiča. Ninacaqui majiñami weenami Yoozquinkaz mayiziča. Ninacž mayizitiquiztan Yoozqui ana enenžcu ninacž quintranaca azquichaquiča.

⁸ Wejrqui cjiwča, tsjii noojiqui Yooz Ejpqui niž illztanacž quija apuraž atintaquiča. Yooziž tsewctan cuchanžquita Zoñi tjontan, Yoozqui ultimupan niž illztamiž quija azquichaquiča. Nii tjonz tjuñquiziqui, ¿tii yokquiz žejlñi žoñinacaqui Yoozquin kuzziz želasaya?

YOOZQUIN MAYIZIZ PUNTU

⁹ Tsjii žoñinacaqui želatča, persun honora waytican, nižaza parti žoñinaca iñarcan. Jalla nii žoñinacžquiz tii quintu quint'ichiča Jesusaqui, tuž cjican:

¹⁰ —Pucultan žoñinacaqui timpluquin ojkchiča, Yoozquin mayiza. Tsjiiqui fariseo partiquiztantača. Tsjiizuñqui impuesto cobriñi žoñitača.

¹¹ Fariseo žoñiqui tsijtchi mayiziñitača, tuž cjican: “Yooz Tata, amquiz sparaquiz cjiwča. Wejrqui anača nii yekja žoñinaca iratitqui. Ninacača tjañinacaqui, nižaza ninacača ñejonacaqui, nižaza ninacača adulteriuquiz ojklayñinacaqui. Nižaza wejrqui anača tii impuesto cobriñi iratitqui.

¹² Wejrqui pizc wilta simanquiz ayunasiñča. Nižaza tjapa weriž cantiquiztan tsjii tunca parti tjayiñča”.

¹³ Jalla nii impuesto cobriñi žoñizti wirquin acha colzi želatča. Ana tsewcchuc chertzipanž želatča. Jalla nuž persun ujchiz cjen persun tuzi čhajccan želatča. Nižaza cjichiča: “Yooz Tatay, wejr ujchizpantča. Wejr okznalla”.

¹⁴ Jaziqui ančhucaquiz cjiwča. Nii impuesto cobriñi žoñiqui Yooz Epiž yujcquiziqui niž ujquiztan liwriitača. Niiž kjuya pertunta ojkchiča. Nii fariseo žoñizti Yooz Epiž yujcquiziqui tira ujchizpantača. Ana pertunta cjissiča. Persun honora waytiñi žoñinacaqui ultimquiziqui azipanž cjesača. Nižaza ultimquiziqui humilde kuzziz žoñinacazti honorchiz cjiskattaž cjequiča.

OCJALANACZ KUZ PUNTU

¹⁵ Tsjii nooj žoñinacaqui Jesusižquin ocjalanaca zjijcchiča, kjaržtan lanznajo. Nuž zjijcan, Jesusiž tjaajinta žoñinacaqui ocjala zjijcñi žoñinaca užiča.

¹⁶ Nuž nonžcuqui Jesusaqui kjawziča, tuž cjican:

—Ocjalanaca wejtquin tjonaj cjee, ana chiižina. Tii ocjalanacž kuz irata jalla nižta kuzzizza Yooz Epiž mantita kamañchiz žoñinacaqui.

¹⁷ Tii razunazakal chiyuča. Ana tii ocjalanacž kuz irata Yoozquin kuzzizzalaj niiqui, ana Yooz Ejpž arajpach watja luzasača.

LIWRIITA CJIS PUNTU

¹⁸ Wiruñiqui tsjii jiliriqui Jesusižquiz pewcziča, tuž cjican:

—Tjaajiñi Maestro, zumača amqui. Arajpach wajtquin wiñaya kamzjapa, ¿čhjulut paasaya?

¹⁹ Nekztanaqui Jesusaqui kjaaziča, tuž cjican:

—¿Kjažtiquiztan amqui wejtquiz “zumačham” cjeejo? Anaž jecmi zumaqui, Yooz-pankazza zumaqui.

²⁰ Amqui Yooz mantitanaca zizza: “Anača adulteriuquiz ojklayzqui. Anača žoñimi conzqui. Anača tjañi cjisqui. Anača toscarami chiizqui. Am maa ejpča rispitzqui”.

²¹ Nekztanaqui nii jiliriqui cjichiča:

—Wejrqui koltallquiztanpacha tjapa nii lii jaru cumpliñča.

²² Jalla nuž nii žoñiž čhiita nonžcu, Jesusaqui cjichiča:

—Tsjillakaz pjaltiĉha amtaqui. Tjappacha am ĉhjultak cusasanaca tuysna. Nekztan porinacžquiz nii paaz ona. Jalla nuž onanžcuqui tsewcta arajpachquin juc'ant ricachum cjequiĉha. Jaziĉui nekztan wejttan chica ojklayñi cjesaĉha.

²³ Nii oraqui walja ricachutaĉha nii žoñiqui. Jalla nuž Jesusiž chiitiquiztan nonžcu, walja llactazziĉha.

²⁴ Nii žoñi llaquita cheržcu, Jesusaqui cjichiĉha:

—Ricachunacžtaqui walja ch'amaĉha Yooz kamañ jiczquiz luzqui, Yooz mantita kamañquiz cjisjapaqui.

²⁵ Tsjii camello cjita pajk animalaqui ch'aman acuj cjuñquiz luzasaĉha. Ricachunacžtaqui tsjan ch'amaĉha Yooz jiczquiz luzqui, Yooz mantita kamañquiz cjisjapaqui.

²⁶ Jalla nii nonžcu, nonžñi žoñinacaqui cjichiĉha:

—¿Jequit liwriita cjesajo?

²⁷ Nekztanaqui Jesusaqui cjichiĉha:

—Žoñiqui anaž persunpacha liwrii atasāĉha. Yoozpankazza liwriiñiqui. Yoozqui jecmi liwrii atasāĉha.

²⁸ Nekztanaqui Pedruqui cjichiĉha:

—Wejt Jiliri, wejrnacqui tjappacha ecchinĉha, amtan chica ojklayzjapa.

²⁹ Jalla nekztanaqui Jesusaqui kjaaziĉha, tuž cjican:

—Weraral chiyuĉha. Jakzilta žoñimi kjuya, maa ejp, jilanaca, cullaquinaca, tjun, maatinaca, jalla ninaca ecĉhaj niiqui, Yooz mantita kamañquiz ojklayzjapa,

³⁰ tii muntuquiz žejlcan juc'anti tjaataž cjequiĉha. Y nižaza arajpachquin ojkžcu, Yooztan wiñaya cuntintu kamaquiĉha.

JESUSAQUI NIIŻ PERSUN TICZ ORA MAZZICHA

³¹ Nekztanaqui Jesusaqui niiž tuncapan tjaajintanaca tsjii latu kjawziĉha, tuž cjican:

—Jaziĉui Jerusalén watjaž ojkla. Wejrqui tsewctan cuchanžquita Yooz Žoñtĉha. Tuquitantpacha Yooz taku paljayñi profetanacaqui wejt puntuquiztan mazincan cji-rĉhiĉha. Jalla nii Jerusalén wajtquin ninacž mazinta taku tjappacha cumplisnaquiĉha.

³² Yekja wajtchiz žoñinacžquiz intirjital cjeeĉha. Nižaza ancha iñartal cjeeĉha; arartal cjeeĉha. Nižaza llawzižtan tjujtal cjeeĉha.

³³ Nižaza wjajtal cjeeĉha. Nekztanaqui contal cjeeĉha. Pero ticžcuqui ĉhjep majquiztan jacatataĉha.

³⁴ Jalla nii tjaajinta žoñinacaqui Jesusiž chiita ana zinta intintazatĉha, ĉhjul puntuquiztan chiiĉhaja, jalla nii. Nii takuqui ana intintichuc takužtakaztaĉha.

ZUR ŽOÑI ĆHJETINTA

³⁵ Jalla nekztanaqui Jesusaqui Jericó cjita wajt žcati irantatĉha. Jalla nuž irantan tsjii zur žoñi jicz latuquiz julzi želatĉha, niiqui kjaraž ĉjinchjinatĉha onajo.

³⁶ Walja žoñinaca watwatñi nonžcu, zur žoñiqui pewcziĉha, tuž cjican:

—¿Kjažtiquiztan tama tama žoñinaca watwat?

³⁷ Nekztanaqui žoñinaca kjaaziĉha, tuž cjican:

—Jesusa, nii Nazaret wajtchiz žoñiqui watĉha tii jiczquiz.

³⁸ Jalla nii zizcu, zur žoñiqui altu joržtan kjawĉhiĉha, tuž cjican:

—jJesusa, Davidž maati, wejr okznalla! Ana wali želuĉha.

³⁹ Nii Jesusiž tuqui ojknñi žoñinacaqui nii zur žoñi ujziĉha, ch'uj želajo. Zur žoñizti juc'anti altu joržtan kjawĉhiĉha, tuž cjican:

—jDavidž majch, wejr okznalla!

⁴⁰ Nekztanaqui altu joržtan chiiñi nonžcu, Jesusaqui tsijtsiĉha. Zur žoñi zjijqui cuchanchiĉha. Zur žoñi žcatžinžcu Jesusaqui pewcziĉha, tuž cjican:

⁴¹ —¿Ćhjulut amta wejr paaquiya?

Nii zur žoñiqui kjaaziĉha, tuž cjican:

—¡Wejt Jiliri, čhjujcquiž cjetžinalla!

⁴² Nekztanaqui Jesusaqui cjichiča:

—Am čhjujcqui cjetžtaj cjsla. Amiž tjapa kuz criitiquiztanaqui, čhjetintamča.

⁴³ Nii orapacha zur žoñiqui cherñi cjissiča. Nekztanaqui Jesusižtan chica ojklayatča, Yoozquin honora waytican. Jalla nižta paata cheržcu, tjapa žoñinacaqui Yoozquin honora waytichizakazza.

19

JESUSIZTAN ZAQUEOZTAN

¹ Jalla nekztanaqui Jerusalén wajt kjutñi ojkcan Jesusaqui Jericó cjita watja luzziča; nekztan nii wajt taypiquiz watchiča.

² Nicju tsjii ricach žoñi želatča Zaqueo cjita. Nii žoñiqui impuesto cobriñiz jiliritacha, ancha ricachutača.

³ Nižaza nii žoñiqui Jesusa pajz pecatča. Kolta žoñitacha. Jalla nižtiquiztan wacchi žoñinacz taypiquiz cjen, Jesusižquin anatača cherchuca.

⁴ Nekztan Zaqueoqui tucquin žajtžcu tsjii sicómoro cjita munti yawchiča, Jesusa cherzjapa. Nii munti, jicz latuquiz želatča, Jesusiž watz žcatipan.

⁵ Nii munti nuž watcan, Jesusaqui tsewcchuc cherziča. Nuž cheržcu cjichiča:

—Zaqueo, apura chjijwžca. Tonj tjuñi am kjuyquiz kamstanča.

⁶ Jalla nuž čhiitiquiztan Zaqueoqui apura chjijwžquichiča. Ancha cuntintu Jesusa risiwchiča.

⁷ Jalla nii cheržcu, tjappacha nii žoñinacaqui Jesusiž quintra chuchchiča, tuž cjican:

—Jesusaqui nii ujchiz žoñž kjuya kami ojkča.

⁸ Jalla nekztanaqui Zaqueoqui tsijtscu, Jesusa Jiliržquiz cjichiča:

—Wejt Jiliri, tii zizza. Porinaczquiz tjaa-ača chicata wejt cusasa žejlñinaca. Nižaza jakzilta žoñžquiztan wejr incalltučhaja, jalla nii žoñžquiz wejr tjepnača pajkpic wiltiquiztan juc'anti.

⁹ Nekztanaqui Jesusaqui cjichiča:

—Tonj tjuñi tii kjuychiz žoñinacaqui liwriitacha, Yooz kamañquiz luzjapa. Tii žoñiqui Abraham cjita majchmaatiquiztanpacha tjonñiča.

¹⁰ Wejrqui tsewctan cuchanzquita Yooz Žoñtča. Wejrqui tii muntuquiz tjonchinča, ujchiz žoñinaca kjawzñi, nižaza ninaca liwrii.

PIYUNANACZQUIZ PAAZ INTIRJITA QUINTU

¹¹ Jerusalén wajtž žcati želan, žejlñi žoñinacaqui pinsichiča, tuž cjican: “Anzilla Yooz mantiz tjuñiqui tjonačhani”. Jalla nuž pinsitiquiztan, nižaza nii žejlñi žoñinaca niž čhiita taku nonznan, Jesusaqui tii quintu paljaychiča,

¹² tuž cjican:

—Tsji žoñi želatča rispitta famillquiztan. Nii žoñiqui ažkquin yekja wajtquin ojkchiča, chawc jilir nombramiento tanzjapa. Nuž tanžcu quejpžcaquiča.

¹³ Ima ojkcan, nii žoñiqui tunca niž piyunanaca kjawziča. Kjawžcu zapa maynižquiz tsjii pajk valorchiz paaz intirjichiča. Nižaza ninaczquiz cjichiča: “Tii paaztan negociož paaquiča, wejt quejpsquizcama”.

¹⁴ Nii žoñž persun wajtchiz žoñinacaqui nii walja chjaawjkatchiča. Jalla nižtiquiztan niž wirquin tsjii cumizuna mantichiča, tuž cjeyajo: “Tii žoñi anaž pecča učhum chawc jiliri cjisjapa”.

¹⁵ Nižtami chawc jiliri nombritatača. Nekztan niž yoka quejpchiča, mantizjapa. Niiž irantižcuqui, kjawzñi cuchanchiča niž paaz intirjita žoñinaczquin, jaknužt zapa mayni paaztan cančhaja, jalla nii zizjapa.

¹⁶ Primir piyunaqui prisintichiča, tuž cjican: “Wejt patruna, am paaztan canchinča tunca wiltan wiltan juc'anti”.

¹⁷ Nii chawc jiliriqúi nii piyunž honora paljaychiča, tuž cjican: “Ancha waliča. Zuma piyunamča amqui. Nii zkoluc paaztan zumpacha trabajchamča. Jaziqui amqui jilirim cjequiča, tunca watja mantiñim cjequiča”.

¹⁸ Tsji piyunazti prisintichizakazza, tuž cjican: “Wejt patruna, am paaztan canchinča pjijska wiltan wiltan juc'anti”.

¹⁹ Nii chawc jiliriqúi paljaychiča, tuž cjican: “Jaziqui jilirim cjequiča. Pjijska wajtquiztan mantiñim cjequiča”.

²⁰ Nekztanaqui tsji piyunazti prisintichizakazza, tuž cjican: “Wejt patruna, tiž am paazqui. Tsji pañquiz žcucžcu chjojchinča.

²¹ Amqui walja cumpliskatñi patronamča. Jalla niztiquiztan am eksinča. Ricujñamča ana amiž nonztaqui. Nižaza ajzñamča ana amiž čhjactaqui”.

²² Nekztanaqui nii chawc jiliriqúi chiižinchiča, tuž cjican: “Ana zum piyunamča amqui. Am persun chiita takuqui am uj tjeeža. Amqui zizzamča, wejrqui kjanapanžlani cumpliskatiñ žoñtni, jalla nii. Ana weriž nonztaqui ricujiñčhalani. Ana weriž čhjactaqui ajzniñčhalani.

²³ Nižtiquiztanaqui, ¿kjažtiquiztanam amqui wejt paaz ana bancuquiz majcžinjo? Bancuquiz majcžintiquiztan wejrqui paaz machtanpacha ricujtasacha, tekz quejpžcu”.

²⁴ Nekztanaqui nii patron jiliriqúi parti žoñinacžquiz mantichiča, tuž cjican: “Intirjita paaz kjažzna. Nii tunca paazziz žoñžquiz tjaa”.

²⁵ Žoñinacaqui cjichiča: “¡Wejt Jiliri! Tunca paazzizza nii žoñiqui”.

²⁶ Patron jiliriqúi kjaaziča, tuž cjican: “Ančhucaquiz tii razunal cjiwča. Jakzilta žoñit niž wacchi tjaata cusasa zuma cwitača, jalla nižquiz juc'anti tjaata cjequiča. Nižaza jakzilta žoñit niž koloculla tjaata cusasa ana zuma cwitačhaja, jalla nižquiztan asta nii zkolocullami kjañtaž cjequiča”.

²⁷ Nižaza nii jiliriqúi mantichiča, tuž cjican: “Nii wejt quintra žoñinacaqui ana wejr pecchiča ninacž chawc jiliri cjisjapa. Jaziqui zjičzna ticju. ¡Zjičžcu wejt yujcquiz conzna!” Jalla nuž mantichiča nii jiliriqúi.

JESUSAQUI JERUSALENQUIN LUZZICHA

²⁸ Jalla nuž quint'izcu, Jesusaqui Jerusalén watja tira ojkchiča.

²⁹ Betfagé cjita nižaza Betania cjita watjanaca žcatžincan, nižaza Olivos cjita curulla žcati želan, jalla nekztan pucultan niž tjaažinta žoñinaca cuchanchiča,

³⁰ tuž cjican:

—Nii nawjka watja oka. Jalla nicju ančhucqui mokta aznu wačhaquiča. Anaž jecmi nii aznuqui yawchi. Jalla nekztanaqui moktiquiztan jweržcu, tekz zjičja.

³¹ Jalla nuž jweržcu zjičcawc cjen cunamit žoñimiž pewcznačan, “¿Kjažtiquiztan tii aznu jwerjo?” cjicanaqui. Jalla nii puntu pewcztiquiztan ančhucqui kjaaznaquiča, tuž cjican: “Jesusa Jiliriž tii aznu pecča”.

³² Nekztanaqui nii pucultan tjaažintanacaqui ojkchiča. Jaknužt Jesusa chiitčhaja, jalla nuž cjitacama watchiča. Jalla nuž tsji mokta aznu watchiča.

³³ Jalla nuž jweran, nii aznuž tuyñunacaqui pewczicha, tuž cjican:

—¿Kjažtiquiztan nii aznu jwer ančhucjo?

³⁴ Tjaažintanacaqui kjaaziča, tuž cjican:

—Jesusa Jiliriqúi tii aznuž pecča.

³⁵ Nekztanaqui Jesusižquiz chjitchiča. Nekztan zquitinaca jepžcu ninacaqui Jesusižquiz yawkatchiča.

³⁶ Nii aznuquiz Jesusaž jicžquiz okan, žoñinacaqui zquiti chjinchiča, zquitinac juntuñ okajo chawc jilirižtakaz.

³⁷ Olivos cjita curulla watan, Jerusalén watja tjenziča. Jalla nekztanaqui tjapa niž tjaažinta žoñinacaqui altu joržtan Yooz honora wayti kallantichiča. Chipchipcan Yooz honora waytichiča, tjapa Jesusiž paata milajrunaca cherčhiz cjen.

³⁸ Nižaza cjichiča:

—¡Chawc Jiliri! ¡Yooz tjuuquiz tjonchi jiliri! ¡Honorchiz cjila! ¡Arajpacha žejlñinaca cuntintuž cjee! ¡Arajpach Yoozquin wali honorchiz cjila!

³⁹ Jalla nuž Jesusižquiz honora waytitiquiztan tsjii žejlñi fariseo žoñinacaqui paljaychiča, tuž cjican:

—Tjaajiñi Maestro, tii am apzñi žoñinaca ujnna ch'uj želajo.

⁴⁰ Nekztan Jesusaqui kjaaziča, tuž cjican:

—Ančucaquiz cjiwča, tii žoñinacaž ch'uj cjisnaquila niiqui, tii maznacamiž altu joržtan chiyasača, wejt honora waytizjapa.

⁴¹ Jerusalén watja žcatžincan, jalla nii watja cheržcu, Jesusaqui nii wajtchiz žoñinacaž cjen kaachiča,

⁴² tuž cjican:

—Jerusalén wajtchiz žoñinaca, tonj tjuñquiziqui wejt puntuquiztan intintaztasaj niiqui, zuma cuntintuž cjitasača. Walipankaz kamtasača. Ančuca kuznaca jeejskatz pecuča. Pero wejt puntuquiztan ančucaquiztan čhjojžtača. Jaziqui ančucqui Yooz zumanaca anaž cherasača.

⁴³ Wejt puntu ana intintazziž cjen walja anawali tjuñinacaž tjonaquiča. Nii tjuñinacquiziqui ančuca quintra žoñinacaqui tii wajtž tjiya tsjii pirka quintra paaquiča. Tjapa kjuttanž ančuca wajt muytata quintrarionacaqui želaquiča.

⁴⁴ Nižaza ančuca wajt pirkami k'ala pajltaž cjequiča. Tii wajtchiz žoñinaca ocjalanacžtanpacha contaž cjequiča. Nižaza tjappacha k'ala pampa nonžtaž cjequiča, anaž maz tawkitami želaquiča. Yoozqui ančucaquiz tsjii liwriiñi cuchanžquichiča; ančuczti nii liwriiñiqui ana pajchinčucča. Jalla nižtiquiztan tii wataquiča. —Jalla nuž cjichiča Jesusaqui.

JESUSAQUI TIMPLU PEWZICHA

⁴⁵ Jerusalén watja irantižcu, Jesusaqui timpluquiz luzziča. Timpluquiztan zawncchuc liwj tuyñinacami kjayñinacami tjirkatchiča.

⁴⁶ Ninacžquiz cjichiča:

—Cjijrta Yooz takuqui tuž cjiča: “Wejt kjuyaqui Yoozquin mayiziz kjuyača”. Ančuczti tii wejt kjuya tjañi žoñinacž kjuyažtakaz paachinčucča.

⁴⁷ Jalla nekztanaqui zapuru Jesusaqui tjajjnatcha timpluquiz. Pero timplu jilirinacami lii tjajjiñi maestrinacami wajt jilirinacami, jalla ninacazti jaknužt Jesusa coni atas, jalla nii kaznatča.

⁴⁸ Pero tjappacha nii wajtchiz žoñinacaqui Jesusiž taku nonzjapa kuz tjaatča. Jalla nižtiquiztan ana jaknužquiztanami nii conz puntuqui asiptiskatz atatča.

20

¿JECT JESUSIZQUIZ MANTICHI?

¹ Zapuru Jesusaqui timpluquiz žoñinacžquiz tjajjnatcha, y nižaza liwriiñi Yooz taku paljayatča. Jalla nuž tjajjan, tsjii nooj timplu jilirinaca, lii tjajjiñi jilirinaca, wajt jilirinaca, jalla ninacaqui Jesusižquiz macjatchiča.

² Nuž macjatžcu Jesusižquiz paljaychiča:

—Jaziqui am chiyaquiča. ¿Jec am mantichi tii paazjapajo? Nižaza ¿jec jilirit am utchi jilirižtakaz cjisjapajo?

³ Nekztanaqui Jesusaqui kjaaziča, tuž cjican:

—Wejrmi jazic ančucaquiz zakal pewcznača.

⁴ ¿Ject Juan mantižquichi bautisjapajo? ¿Yoozkaya uz žoñinaca, ja? Kjaazna.

⁵ Jalla nuž čhiitiquiztanaqui ninacpora ch'aasi kallantichiča, tuž cjican:

—¿Jaknužum cjeequi? “Yooz mantitača” cjican učhum kjaaznaquiž niiqui, “¿Kjažtiquiztan ančuc nii Juan ana criichinčuctajo?” jalla nuž cječhan tiicni.

⁶ “Zoñiž mantitacha Juanqui” cjican učum kjaaznaquiž niiqui, tjapa zoñinacaqui učum conačhani maztan čhjajawi. Tii zoñinacaqui Juanž puntuquiztan cjiñičha, niiqui werarapanča Yooz taku paljayñi profetaqui, jalla nii.

⁷ Nuž palt'izcu nii jilirinacaqui kjaaziča, tuž cjican:

—Wejrnacqui anal zizuča, jequit Juanqui bautisajo mantizquitčhaja, nii.

⁸ Nekztanaqui Jesusaqui cjichiča:

—Nižaza wejrqui ana zakal maznasača, jec jiliriž mantita paa-učhaja wejrqui, nii.

ANA WAL PIYUNANACA QUINTU

⁹ Nekztanaqui Jesusaqui zoñinaczquiz paljayi kallantichiča. Paljaycan tii quintu quint'ichiča, tuž cjican:

—Tsjii patrun zoñiqui uwasanac zkala čhjaczica. Nekztan nii zkala partira tjaachiča piyunanaczquiz. Nekztanaqui azkquin ojkičiča ažk tjuñi kami.

¹⁰ Uwasa ajz kujicha timpu tjontan patrunaqui piyuna cuchanzquichiča niiz partir zkala ricujzjapa. Nii pachpiquiz partira langzñi zoñinacazti patrunaž cuchanzquita piyuna kijchcu chjatkatchičha. Ana čhjulchiz cuchanchičha.

¹¹ Nekztanaqui patrunaqui wilta tsjiiztan piyuna cuchanzquichiča. Nekztan partir yokquiz kamñi zoñinacaqui patrunaž cuchanzquita piyuna ch'aanchičha, nižaza ki-jtchiča, nižaza ana čhjulchiz cuchanchičha patrunžquin.

¹² Nekztanaqui patrunaqui tsjiiztan cuchanzquichiča. Nii partira zoñinacaqui cuchanzquita piyuna chjojritičha, nižaza chjatkatchičha.

¹³ Nižtami nii yokchiz patrunaqui pinsichiča, tuž cjican: “¿Čhjulut wejr paas? Wejt k'ayi majch cuchnača. Jalla nuž cheržcuqui nii partira zoñinacaqui rispitačhani”.

¹⁴ Pero partira zkala langzñi zoñinacazti cuchanzquita majch cheržcu, ninacpora parlassičha, tuž cjican: “Tiiqui tjappacha tii irinsa tanznačhani. Jaziqi ticž conžla. Nekztan učumž tii zkal yokac tanznaquiča”.

¹⁵ Nuž pinsitiquiztan partira langzñi zoñinacaqui cuchanzquita majch yok tjiya jwescu conchiča.

Jaziqi pewcznuča:

—Nii zkal yokchiz patrunaqui čhjulukat nii zoñinacztanac paačhani?

¹⁶ Wejrqui cjiwča. Tjonžcu zkal yokchiz patrunaqui partira langzñi zoñinaca conaquiča. Nekztanaqui patrunaqui niiz zkal yoka yejkžquin tjaaznaquiča.

Jalla nuž nii quintu nonžcu, zoñinacaqui cjichiča:

—jYooz munañpaqui anaj nii cjila!

¹⁷ Jesusaqui ninacz kjutñi cheržcu cjichiča:

—Wejt puntuquiztanaqui cjiirta Yooz takuqui tuž cjiča:

“Kjuy pirkiñinacaqui tsjii maz tjojtchiča. Nekztanaqui tjojtta mazqui isquinquiz cjis-sičha. Ultimquiziqui tucquin cjissiča”.

¹⁸ Nii maz cjen jakziltat ujquiz tjojtснаčhaja, jalla niiqui pirasužtakaz t'okuntaž cjequiča. Nižaza jakziltiž juntuñ nii mazqui tjojtснаquiž niiqui, pulpužtakaz t'oknaquiča.

—Jalla nuž cjichiča Jesusaqui.

TASA PACZ PUNTU

¹⁹ Jesusaqui nii quintu chiyatča quintra zoñinacz puntu. Jalla nižtiquiztan timplu jilirinaca, nižaza lii tjaajiñi maestrunaca, jalla ninacaqui Jesusaqui tanz pecatča nii orapacha. Pero parti žejlñi zoñinaca ekskcu, ana tani atchiča.

²⁰ Pero nii quintranacaqui Jesusižquiz tiraž awayt'atča. Nižaza tsjii kjažt awayt'ini zoñinaca mantichiča, Jesusižtan ojklajajo zuma zoñižtakaz. Nuž chica ojklajcan Jesusižquiztan ana zuma taku jwes pecatča, uj tjojtunzjapa. Jalla nuž uj jwezanzcu nii wajt chawc jiliržquiz intiriz pecatča.

²¹ Jalla nuž awayt'ican Jesusižquiz pewczičha tuž cjican:

—Tjaajiñi Maestro, zizuž wejrnacqui, am werarapan tjaajiñamča. Kjažtam parti žoñinacac chiyaj cjee, amqui werarapankaz chiiñamča Yooz kamañ puntuqui.

²² Jaziqui tjaajznalla tii puntuquiztan. Wejrnacqui César cjita chawc jiliržquiz tas paaz tjaayiñča. ¿Jalla nuž tas paaz tjaazqui wali cjesaya, uz anaž wali cjesaj?

²³ Pero nuž pewcztiquiztan nonžcu Jesusaqui ninacž pizc kuzziz naychiča. Nekztanaqui cjichiča:

—¿Kjažtiquiztan ančhucqui chawc ujquin wejr tjojtskatz pecjo?

²⁴ Tsji paaz zjijca, chertzjapa.

Paaz zjijcžcu, Jesusaqui cjichiča:

—¿Tii paazquiz jecž yujcta? ¿Nižaza tii paazquiz jecž tjuu cjiirtata?

Ninacaqui kjaaziča:

—César cjita jilirž yujcča, niž tjuuzakazza.

²⁵ Nekztanaqui Jesusaqui ninacžquiz cjichiča:

—Chjulumi jiliržta cjenauqui jiliržquiz tjaa. Nižaza čjulumi Yoozta cjenauqui Yoozquiz tjaa.

²⁶ Anaž jecmi Jesusižquiztan ana wal taku jwesi atasacha nii žejlñi žoñinacž yujcquiz cjicanpachaqui. Jalla nuž Jesusiž kjaaztiquiztanaqui ninacaqui ispantichiča; ch'uju cjissiča.

ZOÑINACA JACATATZ PUNTU

²⁷ Wiruñauqui tsjii kjažt saduceo cjita žoñinacaqui Jesusižtan zali ojkchiča. Nii saduceo žoñinacaqui tjaajiñitača, ticzi žoñiqui anapan jacatatasacha, nuž cjiñitača. Jalla nii jacatatz puntuquiztan Jesusižquiz paljaychiča,

²⁸ tuž cjican:

—Tjaajiñi Maestro, Moisesaqui učumnacalta cjiirtkalča, tuž cjican: “Tsji žoñi ticznasaž niiqui, niž tjun ana ocjalchiz cjesaž niiqui, nekztan nii ticzi žoñž jilaqui naa žew žon tjunatan zals waquiziča, nii ticzi jilž cuntiquiztan ocjala paazjapa”.

²⁹ Jaziqui pakallak jilazullca želatča. Jilir jilaqui zalsiča. Nekztan ticziča ana ocjalchiz.

³⁰ Nekztanaqui tsjii taypir jilaqui žew žon tjunatan zalsizakazza. Nekztan ticzizakazza ana ocjalchiz.

³¹ Nekztanaqui yekja taypir jilaqui žew žon tjunatan zalsizakazza. Niiž jaru niž jaru naa tjunatan zalsiča tjapa nii pakallak jilazullcanacaqui. Nižaza tjappacha ticziča jilazullcanacaqui. Ana ocjala ecchipanča.

³² Ultimquiziqui naa maatak žonqui ticzinča.

³³ Jaziqui žoñinaca jacatattanaqui, ¿jakzilta jilž tjunt cjequejo naa žonjo? Tjappacha nii pakallak jilazullcaqui naa žonatan zalsiča. —Jalla nuž pewcziča saduceo quintra žoñinacaqui.

³⁴ Jalla nižta puntuquiztanaqui Jesusaqui kjaaziča, tuž cjican:

—Tii muntuquiz žejlcanaqui luctakami maatakami zalza; nižaza maatinaca zalsjapa tjaača.

³⁵ Jakziltat Yoozquin kuzzizlaj niiqui ticziquiztan jacatatzcu, arajpach wajtquin želaquiča. Nicju žejlcan ana zalznaquiča. Nižaza anaž zalzmi želasača.

³⁶ Arajpachquin žejlcan, žoñinacaqui anjilažtakaz cjequiča; ana ticznasača. Nižaza jalla nuž jacatattiquiztanaqui Yooz žejtñi maatinacapanča.

³⁷ Yooz tawk libruquiz tsjii ujsñi kal quintu žejlča. Nii quintu quint'ican Moisespachača učum zizkatchi, žoñinaca ticziquiztan jacatatñi, jalla nii. Nii Yooz tawk libruquiz Moisesqui cjiirchiča, tuž cjican: “Yooz jiliriqiu Abrahamž Yoozza. Nižaza Isaacž Yoozza. Nižaza Jacobuž Yoozza”.

³⁸ Nii zoñinacž curpu ticziž cjenami, žejtča. Yoozqui anača ticzi zoñž Yoozqui. Niiča žejtñi zoñž Yoozqui. Tjapa Yoozquin kuzziz zoñinacaqui žejtchipan žejlča.

³⁹ Jalla nekztanaqui tsjii kjaž lii tjajjiñi maestrunacaqui cjichiča:

—Zuma Tjajjiñi Maestro, walim chiichamča.

⁴⁰ Jesusiž walja zizñi zizñi chiican quintra zoñinacaqui eksiča iya pewczjapaqui. Panž atiptatača ninacaqui.

JESUSAQUI TSJII PEWCZICHA

⁴¹ Nekztanaqui Jesusaqui cjichiča:

—Zoñinacaqui tuž cjiñiča: “Cristuča Davidž Majchqui”. ¿Kjažtiquiztan nuž cjeejo?

⁴²⁻⁴³ Davidpachača cjichi Salmos cjita libruquiz, tuž cjican:

“Yooz Ejpqui wejt chawjc jiliržquiz cjichiča: ‘Am kojch koztan am quintri zoñinaca t'oksnacha, jalla nii t'okscama wejt žew latuquiz julzi žela amqui’”.

⁴⁴ Davidpachača Cristuž puntuquiztan “Wejt chawjc jiliriča” cjican chiichiča. Jalla nižtiquiztan, ¿jaknužt Cristo chawjc jiliri cjicanpacha Davidž majch cjesajo?

JUDIO LII TJAJJIÑI MAESTRUNACZ PUNTU

⁴⁵ Tjapa zoñinacž nonznan, Jesusaqui niž tjajjinta zoñinacžquiz paljaychiča, tuž cjican:

⁴⁶ —Lii tjajjiñi maestrunacžquiztan cwitaza. Ninacaqui tol zquitchiz ojklayz justasñiča, walja honorchiz cjisjapa. Nižaza palazquiz ojklaycan zuma rispitchiž tsaan-skatz pecñiča. Nižaza ajcz kjuyquiz tucquin julz pecñiča. Nižaza pijstiquiz lujlcan ancha tucquin julzcu honorchiz cjiskaz pecñiča.

⁴⁷ Nižaza ninacapacha žew maatakž cusasanaca tanzjapa, incallča. Zoñinaca incallz-japa Yooztan ažka ažka parlitazoka cjiñiča. Yoozquin tjapa kuzziz zoñinacžtakaz tjeez pecča. Jalla nižtiquiztan ninacaqui juc'ant tsjan anawaliž castictaž cjequiča.

21

OFRENDA PUNTU

¹ Tsjii nooj timpluquiz žejlcan, Jesusaqui wali jiru ricach zoñinaca cherchiča ofrend cajquiz paaz uchñi.

² Nižaza tsjaa poris žew maataka cherchiča. Naa žewqui pizc paazalla utchiñča.

³ Jalla nii cheržcu Jesusaqui cjichiča:

—Tii razunal cjiwča. Taa poris žew žonqui ofrend cajquiz juc'ant jila utchiñča, tjapa parti zoñinacžquiztan.

⁴ Parti zoñinacaqui žejtchi paaz utchiča. Naa poris žewzti tjappacha naža paaz utchiñča; ana iya žejlča, čhjeri kjayzjapa.

JUDIUZ TIMPLU PUNTU

⁵ Yekjap zoñinacaqui timplu puntuquiztan parlatča, nižaza nii timpluquiz žejlñi c'achja maznac puntuquiztan parlatča, nižaza nii Yoozquiz ofrenda tjataa puntuquiztan parlatča. Jalla nuž nonžcu timplu puntuquiztan Jesusaqui chiichiča, tuž cjican:

⁶ —Tsjii nooj tjapa tii timplu pajltaž cjequiča. Ana zinta tii maznaca pirkita želaquiča.

TII MUNTU TUCUZINZ PUNTUQUI

⁷ Jalla nekztanaqui Jesusižquiz pewcziča, tuž cjican:

—Tjajjiñi Maestro, ¿čhjulator tii amiž chiita wataquejo? Ima amiž chiita takunaca watan, ¿čhjulut siñalažtakaz cjequejo?

⁸ Nekztanaqui Jesusaqui cjichiča:

—Ančhucqui persunpachquiz cwitaza, anača incallskata. Walja zoñinacaqui wejt tjuu aynakcanž tjonaquiča, tuž cjican: “Wejrtča Cristutqui”. Nižaza “Wajillaž Cristuž

tjonaquiĉha”. Nuŝ cjicanŝ ojklayaquiĉha. Jalla nuŝ chiyamani anĉhucqui anaĉha criya, niŝaza anaŝ ninacŝtan apznaquiĉha.

⁹ Chjulorat quira zalz quintumi niŝaza kichas zalz quintumi ŝelaĉhaj niiqui anĉhucqui wiraŝ ana tsucaquiĉha. Nuŝ: watanami imaŝ tii muntu tucuzinzqui ir-jatŝcaquiĉha. Jalla niŝta ana walinacaĉha primiraqui watstanqui.

¹⁰ Jesusaqui tira paljaychiĉha, tuŝ cjican:

—Tsjii nacionŝtan tsjii nacionŝtan kichasaquiĉha nacionpora. Nacionanacquiztan quiranaca zalassaquiĉha.

¹¹ Niŝaza pajk terremotonacaŝ wataquiĉha, yokaŝ chjekinskatcan. Niŝaza parti yokaran wali chawc mach'a ŝelaquiĉha. Niŝaza parti yokaran anawal cona ŝelaquiĉha. Niŝaza arajpachquin anawali ispantichucanacaŝ parizaquiĉha, pajk siŝalaŝtakaz wataquiĉha.

¹² 'Pero ima tiŝtanaca watcan anĉhucqui tantaŝ cjequiĉha, niŝaza kijĉtaŝ cjequiĉha. Niŝaza ajcz kjuyquin chjĉtaŝ cjequiĉha uj jwesanzjapa. Niŝaza carsilquiz chawĉtaŝ cjequiĉha. Niŝaza wali chawjc jilirŝ yujcquin chjĉtaŝ cjequiĉha. Jalla niŝtanacaŝ anĉhucaquiz wataquiĉha, anĉhucaŝ wejtquin kuzziz cjen.

¹³ Jilirŝ yujcquiz chjĉta cjen, anĉhucqui wejt favoraŝ tjurt'aquiĉha.

¹⁴ Ima jilirŝ yujcquiz tjurt'ican anĉhucqui anĉhuca kuzquiz ana tantiiz waquiziĉha, jaknuŝt tjurt'aĉhaja, jalla nii.

¹⁵ Tjurt'iŝni chiiz oraqui weril zizŝni taku tjaaŝŝcaĉha anĉhuca kuzquiz. Nii anĉhucaŝ zizŝni taku chiitiquiztan anaŝ jecmi anĉhuca quintra kjaazŝni atasacĉha. Inakaz cjis-naquiĉha.

¹⁶ Anĉhucqui tarasuntaŝ cjequiĉha. Maa ejp, jilanaca, famillanaca, mazinaca, jalla ninacŝquiztanami tarasuntaŝ cjequiĉha anĉhucqui. Nekztan yekjap anĉhucaquiztan contaŝ cjequiĉha.

¹⁷ Niŝaza wacchi tii muntuquiz kamŝni ŝoŝinacaqui anĉhucaquiz chjaawjkataquiĉha, weriŝ cjen.

¹⁸ Jalla nuŝ cjenami anaŝ zinta anĉhuca ach charami pertiskatta cjequiĉha.

¹⁹ Niŝaza sufrichiŝ cjenami jakziltat zumpacha Yoozquin tjurt'ichi cjeĉhaja, Yooztan wiŝaya cuntintu kamaquiĉha.

²⁰ Jesusaqui cjichizakazza:

—Jerusalén watja zultatuz muyuntita cjen, anĉhucqui naaznaquiĉha, ultimu nii watjaqui t'ezintaŝ cjeekalaka, jalla nuŝ cjequiĉha anĉhucqui.

²¹ Jalla nuŝ naazcan, Judea yokquin ŝejlŝni ŝoŝinacaqui cur kjutŝni zajtcu atipz waquiziĉha. Niŝaza Jerusalén wajtchiz ŝoŝinacaqui wajtquiztan ulanz waquiziĉha. Niŝaza joch yokquin ŝejlŝni ŝoŝinacaqui ana wajtquin quejpsquiz waquiziĉha, atipz waquiziĉha.

²² Nii noojiqui Yoozqui Israel ŝoŝinaca casticaquiĉha. Casticz puntuquiztan tjapa Yooz tawk libruquiz cjirtaqui cumplisnaquiĉha.

²³ ¡C maatakanacajay! ¡Wawa t'ichiŝni maatakanacajay! Ancha ana wali sufraqueiĉha. ¡Tjapa tii yokquiz ŝejlŝni ŝoŝinacajay! Anĉaŝ llact'azaquiĉha, castictaŝ cjequiĉha.

²⁴ ŝoŝinacaqui quirquiz ticziŝ cjequiĉha. Yekjap ŝoŝinacacasti tanŝcu chjĉtaŝ cjequiĉha yekja nacionquin. Niŝaza yekja wajtchiz ŝoŝinacaqui tii wajtchiz ŝoŝinaca mantaquiĉha, nii yekjanacŝ timpu tucuzinŝcama, niŝaza Yooz munaŝpa timpucama.

²⁵ 'Jalla nekztanaqui tjuŝquizimi jiiizquizimi warawarquizimi, jalla ninacŝquiz siŝalanaca wataquiĉha. Niŝaza pajk kot ljoikiŝ kjawaquiĉha. Jalla niŝtiquiztan tii yokquiz ŝejlŝni ŝoŝinacaqui walja tsucchi kuzziz cjequiĉha, niŝaza turwayŝinta kuzziz cjequiĉha.

²⁶ Arajpachquin žejlñi kjananacami čhjekinskattaž cjequiča. Jalla nii cheržcu žoñinacaqui pinsaquiča, tii muntu kjažt wataquejo, jalla nii. Tii muntu tucuzinz tjewznaquiča. Jalla nižta watan žoñinacaqui tsucscukaz tismayaquiča.

²⁷ Jalla nekztanaqui žoñinacaqui wejr, nii tsewtan cuchanžquita Yooz Zoñi, quejpžquiñi cheraquiča. Walja kjancan wejt azi tjeežcan tsjir taypiquiz tjonača.

²⁸ Jalla nižta anawalinaca wati kallantan, ančhucqui walja Yoozquin kuzziz cjee. Achamiž wayta, tsewcchucča cherzna. Wajillaž ančuca ultim liwriiz tjuñi tjon-aquiča.

²⁹ Nižaza Jesusaqui tii quintu quint'ichiča tuž cjican:

—Higo muntiquiztan naazna; čhjul muntimi naazna.

³⁰ Ančhucmi tsjii munti ch'ojñapachaž c'ajan tuž zizza, kjutunz timpu žcatžinča, jalla nii.

³¹ Jalla nižta irataž tii weriž chiitanaca watan, ančhucqui tuž zizaquiča, Yooz mantiz tjuñi žcatžinča, jalla nii.

³² Tii razunal cjiwča. Ima tjapa tii timpuquiz kamñi žoñinacaž ticznan, tjapa weriž chiitanaca wataquiča.

³³ Arajpachami yokami tucuzinznaquiča. Wejt takuzti anapanž tucuzinznaquiča, panž cumplisnaquiča.

³⁴ Ančhucqui persunpachquiz cwitaza. Ančhucqui anaž turpi kuzziz cjee. Ana wali kamz cjen, nižaza licz cjen, nižaza tii wir cusasanacžquiz kuz tjaaaz cjen, jalla nuž cjen žoñinacaqui turpi kuzzizza. Ana zuma kaman Yooz tjonz tjuñi tiripintit ančhuc tanaquiča

³⁵ tsjii trampaqui tiripintitž tanža, jalla nižta irataž Yoozqui tii muntuquiz ana wali kamñi žoñinaca tiripintit tanaquiča, casticzjapa.

³⁶ Ančhuczti listu tjaczi tjewzñi cjee. Zapuru ančhucqui Yoozquiztan azziz cjisjapa mayiza, tjapa watñi anawalinacquiztan atipzjapa, nižaza tsewtan cuchanžquita Yooz Zoñž yujcquiz zuma prisintizjapa.

³⁷ Jalla nuž tjaajinčiča Jesusaqui. Majiñqui Jesusaqui timpluquiz tjaaajnatača zapuru. Weenqui Olivos cjita curullquin želi okatča.

³⁸ Tjapa žoñinacaqui wentan timpluquiz tjonatača Jesusiž taku nonžñi.

22

JESUSA TANZ TANTIITA

¹ Jalla nekztanaqui ana liwaturchiz t'anta lujlz pjijsta irantižcatča. Nii pjijstaqui pascua cjitatača.

² Nii oraqui timplu jilirinacami lii tjaažiñi maestrunacami, “¿Jaknužt Jesusa conas?” cjican kazziča. Pero ninacaqui parti žoñinaca walja ekscu, ana coni atčiča.

³ Jalla nekztanaqui Satanás cjita zajraqui Judas kuzquiz luzziča. Judasqui Iscariote cjitazakaztača. Judasqui parti tuncapan illzta žoñinacžquiztan nekztantača.

⁴ Judasqui timplu chawc jilirinacžtanami, timplu zultatž jilirinacžtanami parli ojkčiča. Ninacžtan zalžcu, parličiča, jaknužt ninacž kjarquiz Jesusa intirjas, jalla nii.

⁵ Jalla nuž Judas parlitiquiztan quintra žoñinacaqui ancha cuntintutača. Paaz tjaaaz compromitchiča.

⁶ Jalla nižtiquiztan Judasqui asiptičiča, “Way” cjican. Nekztanaqui tantiya kallan-tičiča, jaknužt ana tama žoñi želan Jesusa intirjas, jalla nii.

SANTA CENA PAACHICHA

⁷ Jalla nekztanaqui ana liwaturchiz t'anta lujlz pjijstaqui irantižquičiča. Nii pjijstiquiz tsjii uuzi wilana conspantača, pascua pjijsta paazjapa.

⁸ Nekztanaqui Jesusaqui pucultan niiz tjaajintanaca cuchanchiicha. Pedružtan Juanžtan ninacatacha. Ima cuchancan ninaczquiz tuž cjichiicha:

—Anchucquiz oka, uchumnacaž pascua chjeri lujljapa, tjaczca.

⁹ Nekztanaqui nii pucultan tjaajintanacaqui Jesusižquiz pewcziča, tuž cjican:

—¿Jakziquin wejrnacqui chjeri tjacznaquiya?

¹⁰ Jesusaqui kjaaziča, tuž cjican:

—Anchucqui watja luzcu, tsjii žoñžtan zalaquiča kjaz luuz kuzzi. Nii žoñž wirquiz apznaquiča, jakziquin luzačhaja, jalla nekz.

¹¹ Jalla nekz luzcu nii kjuychiz žoñžquiz paljayaquiča, tuž cjican: “Wejt Tjaajiñi cjiča: ¿Jakziquin visitz kjuya žejlya, wejt tjaajintanacztan pascu chjeri lujljapaya?”

¹² Nekztanaqui tsewcta pisuquiz tsjii pajk kjuya tjeznaquiča anchucaquiz. Nii kjuya listu tjaczta cjequiča. Jalla nekz chjeri lujlj tjacznaquiča.

¹³ Jalla nekztanaqui nii pucultanaqui ojkchiča. Nekztan Jesusiž chiitacama watchiča. Jaziqui nekziqui pascu chjeri kissiča.

¹⁴ Pascu chjeri lujlj ora cjen, Jesusaqui niiz illzta žoñinacztan misquiz julziča.

¹⁵ Jalla nuž julžcu Jesusaqui ninaczquiz cjichiicha:

—Wejrqui anchucatan tii pascu pijista chjeri lujljapa ancha pecchinpanča, ima ticzcan.

¹⁶ Anchucaquiz cjiwča, anchucatan ana iya tii pijista paača, chjuloracamat Yooz ultimu tjapa mantačhaja, jalla nii oracama. Nekztan tii pijista wilta paa-ača.

¹⁷ Jalla nekztanaqui Jesusaqui persun kjaržtan wasu tanziča. Nekztan Yooz Ejpžquin sparaquiz cjichiicha. Nekztanaqui niiz illztanaczquiz cjichiicha:

—Tii wasu tanžna. Anchuccama tojžcuqui liczna.

¹⁸ Tekztan nawjkchuc wejrqui uwas kjazqui anal iya licača, chjuloracamat Yooz tjapa mantačhaja, niicama.

¹⁹ Jalla nii licžcuqui, Jesusaqui persun kjaržtan t'anta tanziča. Nekztan Yooz Ejpžquin sparaquiz cjichiicha. Nekztanaqui t'anta kjolžcu niiz illztanaczquiz tjaachiča, tuž cjican:

—Tiiča wejt curpuž cuntaqui. Tii wejt curpuqui intirjitaž cjequiča anchuca laycu. Nižaza wejr cjuñžcu, tii lujlznaquiča.

²⁰ Nekztan chjeri lujlžcu, wasu tanziča. Nekztan niiz tuqui chiita taku irata chichizakazza, tuž cjican:

—Wejt ljocqui anchuca laycu tjawktaž cjequiča. Wejt ljocžtan ew žejtz kamaña ut'aytaž cjequiča. Tii wazuquiztan liczqui wejt ljoc cuntiquiztanča.

²¹ Wejt quintra tarasunñi žoñiqui wejtan chicapachača tii misquiz.

²² Wejrqui tsewctan cuchanzquita Yooz Žoñtča. Wejrqui Yooz Epiž munañpi jaru jalla nii kamañ jiczquiz okača. Wejt quintra tarasunñi žoñžquizzti anawaliž cjisnaquiča.

²³ Jalla nuž chiitiquiztan tjaajinta žoñinacaqui ninacpora pewcsassiča:

—¿Jequit wejrnacquiztan nii tarasunñi žoñi cjes? —Nuž cjican ninacpora pewcsassiča.

¿JEQUIT TUCQUIN CJEEQUI?

²⁴ Jalla niiz wiruñiqui nii tjaajintanacaqui ch'aassiča, ject tucquin naazi cjeequi, jalla nii.

²⁵ Pero Jesusaqui ninaczquiz cjichiicha:

—Chawc jilirinacaqui persun wajtchiz žoñinaca mantiñiča anawal patrunažtakaz. Nižaza nii jilirinacaqui mantita žoñinaczquiz jilirž honorakaz waytiskatča, “walipan paača tii jiliriqi”, cjican.

²⁶ Ančhuczti anaž nižta paaz waquiziča. Antiz ančhucqui tižta paaz waquiziča. Jakziltat tsjan chawc jilirižlaj niiqui, tjowažtakaz cjis waquiziča. Nižaza jakziltat mantiñizlaj niiqui, piyunažtakaz cjis waquiziča.

²⁷ ¿Ject tucquin chekan žoñejo? ¿Misquiz julzñi žoñej chekanaqui? Už ¿nii misquiz atintiñi žoñej, jaa? Tii razunal cjiwča: Misquiz julzñi žoñičha tucquin chekanaqui. Jalla nuž cjenami wejrqui ančhucaporquiz atintiñi žoñižtakaztča.

²⁸ 'Ančhucqui wejttan chica žejlchinčhucpanča wejtquiz anawali watanami. Wejtquiztan ana zarakchinčhucča.

²⁹ Jalla nižtiquiztan wejrqui ančhuc uchača, mantiñi jilirinaca cjisjapa. Jaknužt wejt Yooz Ejpqui mantiñi jiliri cjisjapa wejr utčhaja, jalla nižta.

³⁰ Jalla nuž cjen ančhucqui arajpach wajtquin wejttan chica želaquiča, nižaza wejttan chica lujlznaquiča. Nižaza nekziqui wejttan chica jilirž sillquiz julznaquiča tuncapan Israel t'akquiz žoninaca pjalzjapa.

SIMON PEDRUQUI JESUSA ANA PAJÑI CHIYAQUICHA

³¹ Nekztan Jesusaqui cjichiča:

—Simona, Simona, tiim zizaquiča amqui. Satanasqui am pecča, niž parti cjiskatzjapa. Trigožtakaz layinz pecča, ujquiz tjojtskatzjapa.

³² Simona, am laycu tjurt'izinčinča ana juc'anti upa kuzziz cjeyajo. Amqui Yoozquin tjapa kuztan quejpžcu am jilanaca yanapaquiča tjup kuzziz tjurt'ajo.

³³ Nekztanaqui Simonaqui cjichiča:

—Wejt Jiliri, wejrqui listučha amtan chica ojkzjapa; carsilquizimi lusasača; nizaza amtan chicapachami ticsnasača.

³⁴ Jalla nuž chiitiquiztanaqui Jesusaqui cjichiča:

—Pedro, amquiz chiyučha, ima wallpaž kjawan, amqui wejt puntuquiztan nicaquiča. Chjep wilta wejr ana pajñim chiyaquiča.

JESUSIZ CHIIZINTA TAKUNACA

³⁵ Jalla nekztanaqui Jesusaqui paljaychiča, tuž cjican:

—Tuquiqui wejrqui ančhuc cuchanchinča ana quelzziz, nižaza ana paazziz, nižaza ana yekjat čhjatchiz. Jalla nuž okan ¿ančhucaquiz čhjulut pjaltichiya?

Nekztanaqui ninacaqui kjaaziča:

—Anaž čhjulumu pjaltichiča, —cjican.

³⁶ Nekztanaqui Jesusaqui ninacžquiz cjichiča:

—Anziqui jakziltat quelzziz cječhaja, nii quelzqui čjicha. Nižaza jakziltat paazziz cječhaja, nii paazqui čjicha. Jakziltat ana armichiz žejlčhaja, persun chaquita tuyžla, arma kjayžjapa.

³⁷ Ančhucaquiz chiyučha. Wejt puntuquiztanaqui Yooz takuqui tuž cjiča: “Castictaž cjequiča anawal žoñinacžtan chica”. Wejt persunquiz cumplistanča nii cijjrta Yooz takuqui. Nižaza tjapa cijjrta Yooz takuqui wejt puntuquiztan cumplistanča.

³⁸ Jalla nekztanaqui ninacaqui cjichiča:

—Wejt Jiliri, tekzi pizc arma žejlča.

Jesusaqui kjaaziča:

—Nužquizka cjila, —cjican.

JESUSAQUI YOOZ EJPZQUIN MAYIZICHICHA

³⁹ Jalla nekztanaqui Jesusaqui ulanchičha. Olivos cjita curullquin ojkchiča, jalla nicju ojkñipantača. Tjaajinta žoñinacaqui Jesusižquiz apziča.

⁴⁰ Olivos cjita curulla irantižcu, Jesusaqui cjichiča:

—Yooz Ejpžquin mayiza ana ujquiz tjojtsjapa.

⁴¹ Nekztanaqui Jesusaqui niž tjaajintanacžquiztan žoñiž maz čhjacta, jalla nužullquin ojkchiča. Jalla nicju quillsičha Yooz Ejpžquin mayizizjapa.

42 Mayizican cjichiča:

—Yooz Tata, amqui munaquiž niiqui, wejr liwriyalla tii sufrisquiztan. Pero anal wejt kuzcama ojkz pecuča. Jaknuž am kuz munčhaja, jalla niicama ojkz pecuča.

43 Jalla nii oraqui arajpachquiztan tsjii Yooz Epiž cuchanžquita anjilaqui jeczquichiča, Jesusa azi tjaazjapa.

44 Jesusaqui jalla nuž ancha llact'azcan, tjapa aztan Yoozquin mayizatča. Jalla nuž mayizan ancha pjalñi pjatziča ljocztakaz čhjujatča yok kjutñi.

45 Yoozquin mayiziz žeržcu, tsijtsiča Jesusaqui. Nekztanaqui niiz tjaajintanaczquiz quejpchiča. Ninaca llaquizinpantiž tjajatča. Nuž cjen Jesusaqui tjañi zalchiča.

46 Jalla nekztanaqui Jesusaqui cjichiča:

—¿Ančhucqui kjažtiquiztan tja-j-o? Zaazna, Yoozquin mayiza ana ujquiz tjojtsjapa.

JESUSA PRESO TANTA

47 Jesusaž ima parla žerznan, walja žoñinaca tjonchiča. Judas cjita žoñiqui tucquinpan tjonchiča. Judasqui nii tuncapan illzta žoñinacz partiquiztantača. Nekztan Jesusižquin macjatchiča chjulzjapa.

48 Jesusaqui Judasquiz cjichiča:

—Judas, ¿wejr tsjii chjulžcum amqui tarazunaquiya? Wejrtča Yooz cuchanžquita žoñtqui.

49 Jesusižtan žejlñi žoñinacaqui jalla nižta cheržcu, pewcziča, tuž cjican:

—Wejt Jiliri, ¿cuchillu armižtan tjurt'aquiya?

50 Tsjii nii tjaajintanaczquiztan timplu jilirž piyuna čhjojritchiča, žew cjuñi chja-jtžinchiča.

51 Pero Jesusaqui cjichiča:

—Nužquizkaz cjee. Armižtan ana iya tjurt'aquiča.

Nekztanaqui nii orapacha Jesusaqui nii piyunž cjuñi lanžcu čhjetinchiča.

52 Timplu chawc jilirinacami nižaza timplu zultatž jilirinacami, nižaza wajt jilirinacami, jalla ninacami Jesusa preso chjichi tjonchiča. Ninaczquiz paljaychiča Jesusaqui, tuž cjican:

—¿Kjažtiquiztan ančhucqui cuchillu armižtan, nižaza tuñžtan tjonchinčhuca, wejr tanzjapaya? ¿Wejrqui tjañ žoñtkaya?

53 Zapuru timpluquiz kamchinča ančhucatan chica. Nii oraqui wejr ana kjaž cjichinčhucča. Pero anziča ančhuca tanz oraqui. Tii orakaz zumchiquiz kamñinacaqui mantasača.

PEDRUQUI JESUSA ANA PAJÑI CHIICHICHA

54 Jalla nekztanaqui žoñinacaqui Jesusa preso tanchiča. Tanžcu timplu chawc jilirž kjuya chjitchiča. Pedruqui ažkquiztanalla apziča.

55 Jalla nii jilirž kjuy patio taypiquiz tsjii uj luminaru taaziča. Zoñinacaqui uj muytata julzi želatča. Nižaza Pedruqui ninacztan chica julzi želatča.

56 Jalla nuž uj kjanquiz julzi želan, tsjaa piyun žonqui Pedro žejlñi cherchinča. Nekztan naaqui cjichinča:

—Tii žoñiqui nii žoñžtan chica ojklayñitala, niiz tiic, ¿ana jaa?

57 Pedruzti nuž cjitiquiztan nicchiča, tuž cjican:

—Cullaca, nii žoñi anal pajuča.

58 Jalla niiz wiruñpacha, tsjiizuñ Pedro cherchizakazza. Jalla nuž cheržcu, cjichiča:

—Amqui nii parti žoñimla.

Nekztanaqui Pedruqui kjaaziča; tuž cjican:

—Anapanča wejrqui.

59 Tsjii orquiztanaqui yekja žoñiqui paljaychizakazza, tuž cjican:

—Ultim werara, tii zoñiqui nii zoñžtan chica ojklayñipantala. Tiiqui Galilea wajtchiz zoñizakazla.

⁶⁰ Jalla nekztanaqui Pedruqui cjichiča:

—Jila, čjulukam nižta chiičhani, anal zizuča.

Jalla nuž chiyani nii orapachaqui tsjii wallpi jora kjawchiča.

⁶¹ Jalla nuž wallpi jora kjawan, Jesusaqui Pedruž kjutñi kjutžcu cheržquichiča. Jalla nižtiqiztan Pedruqui, Jesús Jilirž tuqui chiita cjuñziča. Tuqui Jesusaqui cjichiča: “Ima wallpaž kjawan, amqui wejt puntuqiztan nicaquiča. Čjep wilta wejr ana pajñim chiyaquiča”.

⁶² Jalla nuž watžcu, Pedruqui ulanchiča. Nuž ulanžcu ancha kaachiča, Jesusa ana pajñi chiižcu.

⁶³ Jesusa itzñi zoñinacaqui walja iñarchiča. Nižaza Jesusa wajtchiča.

⁶⁴ Nižaza Jesusiž čhjujcuqui chawjczinžcu yujcquiz kijtchiča, tuž cjican:

—¡Tantiyalla! ¿Ject am kijchjo?

⁶⁵ Nižaza niž quintra čjul anawalinacami chiichiča, nuž iñarchiča.

JESUSA JILIRINACZ YUJCQUIZ CHJICHTA

⁶⁶ Tjuñiž tjewctanalla, tjapa judío jilirinacaqui juntassiča, wajt jilirinacami, timplu jilirinacami, lii tjaaiñinacami, jalla ninacami. Jalla nekztanaqui Jesusa chawjc parliz kjuya chjitchiča. Nicju ajczi jilirinaczquin apantichiča. Nekztan jilirinacaqui nižquiz pecunchiča, tuž cjican:

⁶⁷ —Jaziqum am chiya, ¿ampanim Cristumpanikaya?

Jesusaqui kjaaziča, tuž cjican:

—Wejrqui “jesalla” cjež niiqui, anaž wejr criyaquiz ančhucqui.

⁶⁸ Nižaza wejrqui ančhucquiz pewcznaž niiqui, anaž wejr werara kjaazta cjeeča. Nižaza wejr anaž cujtznaquiča

⁶⁹ Wejrqui tsewctan cuchanžquita Yooz Zoñtča. Tekztanpacha wejrqui tjapa azziz Yooz Ejpž žew latuquiz julzil cjeeča. —Jalla nuž kjaaziča Jesusaqui.

⁷⁰ Jalla nekztanaqui tjapa nii žejlñi zoñinacaqui pecunchiča, tuž cjican:

—¿Am Yooz Majchimpanikaya?

Nekztan Jesusaqui kjaaziča, tuž cjican:

—Wejrpanča, ančhucž pecunča, jalla nužupanča.

⁷¹ Jalla nekztanaqui ninacaqui cjichiča:

—¿Čhjul juc'antiž tisticu tumpasajo? Učhumpachala niž persun ata chiiñi nonztaqui, ana wali chiichiča, “Yooz Majchča wejrqui” cjican.

23

JESUSIZTAN PILATO CJITA JILIRZTAN

¹ Jalla nekztanaqui tjapa nii žejlñi jilirinacaqui tsijsiča. Nekztanaqui Jesusa chjitchiča Pilato cjita jiliržquin.

² Jalla nicju uj tjojtñi kallantichiča, tuž cjican:

—Wejrnaqui tii zoñi wajtchinča, tii wajtchiz zoñinaczquiz anawaliž aptjapcan zelatča. Jalla nuž wajtchinča. Tii zoñizakaz cjiča: “Učhumqui Romanž jilirž tasa ana tjaaz waquiziča” jalla nuž cjiča tiiqui. Nižaza cjiča, “Wejrtča Yooz cuchanžquita Cristutqui”. Nuž cjican, cjiča, “Wejrtča chawc jiliritqui”.

³ Jalla nekztanaqui Pilato cjita jiliriqum tuž pewziča:

—¿Judío wajtchiz zoñinacz chawc jilirim amya?

Nekztan Jesusaqui kjaaziča, tuž cjican:

—Jalla nužupanča, am nuž chiita, jalla nii.

⁴ Nekztanaqui Pilatuqui timplu chawc jilirinaczquiz, nižaza žejlñi zoñinaczquiz cjiča:

—Anal tii žoňžquiz čhjul ujmi wačuča.

⁵ Nii žoňinacazti ancha ujquiz tjojtscatz pecatča. Jalla nižtiquiztan cjichiča:

—Tii žoňiqui niž tjaajintižtan waljaž tjojktila tjapa Judea yokquin žejlňi žoňinacaqui. Primiraqui Galilea yokquinž nižta paatča tiiqui. Jaziqui tekzi nižtazakaz paača.

JESUSA HERODIZQUIZ CHJICHTA

⁶ Jalla nuž nonžcu, Pilatuqui pewcziča, tuž cjican:

—¿Tiiqui Galilea yokchiz žoňikaya?

⁷ “Jesalla” cjican kjaaztan, Pilatuqui Herodes cjita Galilea chawc jiliržquin nii Jesusa cuchanchiča. Herodesqui Jerusalén wajtquiz želatča nii ora.

⁸ Jesusa cheržcuqui Herodesaqui ancha cuntintutača. Walja niž puntuquiztan quintunaca nonchiča. Jalla nižtiquiztan ažkanaca Jesusižtan zalz pecatča. Jesusa milajru paaňi cherz pecatča.

⁹ Herodesaqui walja pewcňi kallantichiča. Pero Jesusazti ana kjaazňi žejlchiča.

¹⁰ Jalla nicju zakaz timplu jilirinacami lii tjaajiňinacami chicapacha želatča. Ni-nacaqui walja Jesusiž quintra chiichiča, uj tjojtunzjapa.

¹¹ Herodesaqui zultatunacžtan Jesusa iňarchiča. Burla paachiča. Zultatunacaqui Jesusižquiz chawc jilirž punchu tjutziča. Jalla nekztanaqui Herodesaqui wilta Pilatužquin cuchanžquichiča.

¹² Nii oraqui Herodestan Pilatužtan amigo pajassitača. Niiž tuquiqui quintratača.

JESUSA PILATUZQUIN CUCHANTA

¹³ Jalla nekztanaqui Pilatuqui juntjapchiča timplu jilirinacami wajt jilirinacami, nižaza žoňinacami.

¹⁴ Juntjapžcu, cjichiča:

—Ančhucqui wejtquiz tii žoňi zjijcchinčhucča, tuž cjican: “Tii žoňiqui žoňinacaž aptjapňicha”. Nekztanaqui ančuca yujcquiz tiižquiz pecunchinla. Jalla nuž pecun-tiquiztan tii žoňž ujqui ana watchinpanla, anchucaž tii žoňžquiz uj tjojtuntiquiztanaqui.

¹⁵ Herodesaqui nižazakaz ana čhjul ujmi watchiča. Jalla nižtiquiztan wilta wejtquin cuchanžquitača. Ziza ančhucqui, tii žoňiqui anapanž ticz waquiziča.

¹⁶ Jaziqui cunkal casticača, nekztanaqui cutsnača.

¹⁷ Nii pijstiquiz cjenaqui Pilat jiliričiqui cuzturumpichiztača, tsjii pres žoňi liwrii cuts, jalla nii. Nii cuzturumpi paaňitača žoňinacž kuz wali cjisjapa.

¹⁸ Jalla nuž Pilatuž čhiitiquiztanaqui tjappacha nii žoňinacaqui kjawi kallantichiča, tuž cjican:

—¡Panž chjichla tiiqui! ¡Antiz Barrabás cutsla!

¹⁹ Jalla nii Barrabasqui carsilquiz chawctatača, nii wajtquin jilirž quintra žoňinaca aptjaptkalča, y nižaza žoňiž contkalča. Jalla nižtiquiztan carsilquiz chawjctatača.

²⁰ Pilatuqui Jesusa cuts peccan žoňinacžquiz wilta paljaychiča.

²¹ Nii žoňinacazti juc'anti altu joržtan kjawchiča, tuž cjican:

—¡Cruzquiz ch'awczna! ¡Cruzquiz ch'awczna!

²² Chjep wiltiquiz Pilatuqui paljaychiča tuž cjican.

—Tii žoňi, ¿čhjul anawali paachejo? ¡Wejrqui tii žoňž uj ana wachula! ¡Anaž ticz waquiziča tiiqui! ¡Jaziqui cunkal casticača, nekztanac cutsnača!

²³ Pero nii žoňinacazti juc'anti kjawchiča, “Cruzquiz ch'awczna” cjican. Timplu jilirinacami žoňinacami ancha kjawchiča, Pilatuž kuz atipscama.

²⁴ Jalla nuž kjawtiquiztan Pilatuqui ninacž kuzcama paachiča. Jesusa cruzquiz ch'awczcajo mantichiča.

²⁵ Nižaza Pilatuqui Barrabás cjita žoňi cutziča žoňinacž kuzcama. Nii Barrabasqui carsilquiztača, jilirž quintra žoňinaca aptjaptiquiztan, nižaza žoňi contiquiztan. Pilatuqui Jesusa intirjichiča nii žoňinacž kuzcama wali cjeajo.

JESUSA CRUZQUIZ CH'AWCTA

²⁶ Jalla nekztanaqui zultatunacaqui Jesusa chjitchiicha, cruzquiz ch'awczjapa. Jalla nuž chjichan tsjii žoñi tanziča cruza tjuzjapa. Nii žoñiqui Cirene wajtchiztača, Simona cjitatača. Jochquiztan tjonatča. Jalla nuž Simona tanžcu zultatunacaqui Jesusiž cruza tjuzziča. Nekztan Jesusiž wirquiz ojkkatchiča.

²⁷ Walja žoñinacaqui apznatča. Walja maatakanaca kaacan kjawcan ancha llaquita apzicha.

²⁸ Pero Jesusaqui maatakanaczquiz cheržcu paljaychiča, tuž cjican:

—Jerusalén wajtchiz maatakanaca, wejtquiztan ana kaa. Ančuca persunjapa nižaza ančuca maatinaczquiztan kaa.

²⁹ Tsjii ora tjonaciča. Nii oraqui žoñinacaqui sufris cjen chiyaquiča, “Ana majtñi maatakanacaqui cuntintuž cjequiča. Nižaza anaž icchi maatakanacaqui cuntintuž cjequiča. Nižaza anaž piz t'ichiñi maatakanacaqui cuntintuž cjequiča”.

³⁰ Nii ora zakaz žoñinacaqui walja sufris cjen curunaczquiz paljayaquiča, tuž cjican: “Wejtnac juntuñ tjojtžca”. Nižaza lumanaczquiz cjequiča, “Wejrnacž chjojsna, tsjii tjatta cunta”.

³¹ Tsjii ch'ojñi muntiquiz tižta paaquiž niiqui, kjoñ muntiquiz juc'ant ana wali paaquiča. —Jalla nuž paljaychiča Jesusaqui.

³² Zultatunacaqui pucultan tjañinaca cruzquiz ch'awczjapa chjitchiicha Jesusižtan chica.

³³ Calavera cjita yoka irantižcu, Jesusa cruzquiz ch'awcchiča. Nižaza nii pucultan tjañinaca cruzquiz ch'awctazakaztača, tsjii tjañizti žew latuquiztan, tsjii tjañizti zkar latuquiztan.

³⁴ Cruzquiz ch'awctan, Jesusaqui cjichiča:

—Yooz Tatay, tii žoñinaca pertuna, čhjulut paačhaja, anaž intintiča ninacaqui.

Nii ora zultatunacaqui Jesusiž zquiti tanzjapa, zurtiyassiča.

³⁵ Jalla nekzi žoñinacaqui walja chekznatča. Jilirinacami ancha burla paachiča, tuž cjican:

—Tiiqui yekjanaca liwriichiča. Ultim werar Cristumčhalaj niiqui, Yooziž illz-tamčhalaj niiqui, persunpacha liwriyalla.

³⁶ Nižaza zultatunacaqui burla paachiča. Macjatžcu jar vinu tirinchiča.

³⁷ Nižaza cjichiča:

—Amqui judionacž chawc jilirimčhalaj, niiqui, persunpacha liwriyalla.

³⁸ Nižaza cruzquiz Jesusiž ach juntuñ litranaca cijirtatača. Chjep tawkquiztan cijirtatača, griego taku, latín taku, hebreo taku. Jalla tuž cijirtatača: “Tiiča judionacž chawc jiliriqi”.

³⁹ Tsjii ch'awcta tjañi žoñiqui Jesusižquiz ana wal taku chiichiča, tuž cjican:

—Amqui Cristumčhalaj niiqui, persunpacha liwriyalla. Nižaza wejrnacmiž liwriya.

⁴⁰ Tsjii ch'awcta tjañizti nii tjañ mazquiz ujziča, tuž cjican:

—Amqui cruzquiz ch'awctazakazza. ¿Am anam Yooz eks, kjažtatajo?

⁴¹ Učhumqui ujquiztan sufristanča. Cruzquiz ch'awcta cjispanz waquiziča. Tii žoñizti ana čhjul ujchizza.

⁴² Nekztan nii tsjii tjañ žoñiqui Jesusižquiz paljaychiča, tuž cjican:

—Jesusa, čhjulorat amqui mantiz kallantačhaja, jalla nii ora wejr cjuñznalla.

⁴³ Nekztanaqui Jesusaqui kjaaziča, tuž cjican:

—Weraral amquiz cjiwča, tonjtanpacha amqui wejttan chica cjequiča, Paraíso cjita zuma yokquinaqui.

JESUSAQUI TICZICHA

⁴⁴ Nii oraqui taypuruž cjisnatča. Tjapa nii yokaqui zumchi cjissiča, majñakak oracama.

⁴⁵ Tjuñiqui zumchi cjissizakazza. Nižaza pajk timplu cortina chicata wjajrzyča.

⁴⁶ Jalla nekztanaqui Jesusaqui altu joržtan kjawchiča, tuž cjican:

—Yooz Tatay, am kjarquiz wejt animu cumpjiyuča.

Jalla nuž chiižcu, ticziča.

⁴⁷ Jalla nuž watchi cheržcu tsjii romanž zultat jiliriqiu Yooz honora paljaychiča, tuž cjican:

—¡Ultim weraratakalča, tiiqui lijitum žoñitakalča! Ana ujchiztakalča.

⁴⁸ Nižaza nuž watchi cheržcu tjapa nii cherñi žoñinacaqui ancha llaquita ojkchiča.

⁴⁹ Jesusiž mazinacami nižaza nii Jesusa Galilea wajtquiztan apzi maatakanacami ažkquiztan chekzcan quirchiča. Tsijsucakaz cheksiča nii watñiqui.

JESUSIZ CURPU SIPULTURQUIZ TJATZTA

⁵⁰ Tsjii zuma žoñi želatča José cjita. Yooz mantitacama kamñitača. Judea yokquin Arimatea wajtchiz žoñitača. Judiuž jilirinacž partitača.

⁵¹ Nii zuma Josequi Yooz mantiz tjuñiž tjewsñipantača. Nižaza niiqui anatača Jesusa konz kuzzizqui parti jilirinacžtanaqui.

⁵² Nekztan Pilatužquin ojkchiča Jesusiž curpu mayi.

⁵³ Nekztanaqui Josequi Jesusiž curpu cruzquiztan apakžcu tsjii wali pajk pañužtan capziča. Nekztanaqui sipulturquiz tjazziča. Nii sipulturuqui wali pajk mazquiz pjettatakalča. Anatakalča yekja almami tjatta niiqui.

⁵⁴ Jeejz tjuñi žcatžintiquiztan, žoñinacaqui tjacznatča jeejz tjuñquiz žejlzjapa.

⁵⁵ Nii Galilea yokquiztan Jesusižtan chica tjonchi maatakaqui Juzquiz apziča, Jesusiž sipulturu cheri, jaknužt tjazžtažlaja, nii cheri.

⁵⁶ Jalla nekztanaqui persun kjuya quejpžcu, zuma ulurchiz aceitenaca nižaza tjajlinz cremanaca jalla nii tjacziča. Nekztanaqui jeejz tjuñquiziqui jeejziča, judiuž lii jaru.

24

JESUSAQUI JACATATCHICHA

¹ Tumincuqui simana kalltiznan maatakanacaqui Jesusiž sipultura ojkchiča walja wentan. Tjaczta ulurchiz aceitenaca chjitchiča, Jesusiž curpu tjajlinzjapa. Jalla nuž okan yekja maatakanacaqui cumpant'ichizakazza.

² Jalla nicju irantižcu nii sipulturu pjuczta mazqui cjetžta cherziča.

³ Nekztanaqui sipulturquiz luzziča. Pero Jesusiž curpuqui ana wajtchiča.

⁴ Jalla nižtiquiztan ninacž kuz turwayskatatča. Ana jaknužquin zizi atchiča, čhjulu paachuca, jalla nii. Nuž želan pucultan luctak žoñižtakaz tsijsi cherziča. Ninacž zquiti walja llijatča. Maatakanacžtan chica cjissiča.

⁵ Jalla nuž cheržcu walja tsucchiča maatakanacaqui. Tuzi t'okziča. Jalla nuž cjen pucultan luctakžtakaz anjilaqui chiižinchiča maatakžquiz, tuž cjican:

—¿Kjažtiquiztam ančhucqui ticzinacporquiz žejtñi žoñi kjurjo?

⁶ Anaž tekz žejlča niiqui. Jacatatchiča niiqui. Ančhucž cjuñzna, Galilea yokquiz ojklayan Jesusaqui nižta mazinchipanla, jalla nii.

⁷ Nicju Jesusaqui mazinchiča, “Yooz Epiž cuchanzquita Zoñtča wejrqui. Ujchiz žoñinacž kjarquiz intirjital cjeeča. Nižaza cruzquiz ch'awcžcu contal cjeeča. Pero čhjep majquiztanaqui jacatatača”. Jalla nuž Jesusaqui mazinchitača.

⁸ Jalla nuž chiyan maatakanacaqui cjuñziča Jesusiž mazintanaca.

⁹ Jalla nekztanaqui sipulturquiztan quejpžcu, tjappacha quint'ichiča niiž tuncamani illzta žoñinacžquiz, nižaza tjapa nekz žejlñi žoñinacžquiz.

¹⁰ Jalla nii quint'iñi maatakanacaqui tižta tjuuchiztača: María Magdalenatača, Juanatača, Jacobuž maatača Mariiqui, nižaza tsjii kjaž yekja maatakanacatača. Jalla ninacaqui Jesusiž illzta žoñinacžquiz quint'ichiča, jaknužt watchi, jalla nii.

11 Jalla nii maatakanacž quint'ita anapan criichiča Jesusiž illzta žoñinacaqui.

—¿Ĉjulukat lucuratažtakaz chiichani nii maatakanacaqui? —jalla nuž cjichiča Jesusiž illzta žoñinacaqui.

12 Jalla nuž ana criižcumi Pedruqui ulanžcu sipulturu chertzni zajtchiča. Colžcu sipulturu kjuylchuc chertzicha. Nii capžta pañunaca tsjii latu chjojžta želatča. Jalla nii chertzcu, walja kuzquiz pinsican ojkchiča, ĉjulut watčaja, jalla nii.

EMAUS CJITA WAJTQUIN OJKTA

13 Nii noojpacha pucultan Jesusiž tjajinta žoñinacaqui Emaús cjita watjaž okatča. Emaús watjaqui tsjii tuncaman kilometrotiča Jerusalén wajtquiztan.

14 Jiczquiz ojkcan, ninacpora parlassatča, tjapa Jesusiž puntu watchinaca, jalla nii.

15 Nuž parlasan, Jesusapachača žcatžinžquichi. Nekztan ninacžtan chica ojkchiča.

16 Jesusižtan chica ojkcanami, nii pucultanaqui anapan pajni cjišiča.

17 Jalla nekztanaqui Jesusaqui ninacžquiz pewcziča, tuž cjican:

—Jiczquiz ojkcan, ĉjul puntu ančhucqui parlasjo? ¿Kjažtiquiztan llaquita ančhuc ojkjo?

18 Tsjiizuñqui Cleofás cjitatača. Jalla niiqui kjaaziča, tuž cjican:

—Tjapa žoñinacaqui Jerusalén wajtquiz wajtchi quintu zizza. Am nekz žejlcan, ¿nii watchinaca anam ziz, jaa?

19 Nekztanaqui Jesusaqui kjaaziča, tuž cjican:

—¿Ĉjulu watchitaya?

Nekztanaqui nii pucultanaqui cjichiča:

—Tii quintu žejlča. Tsjii Jesusa cjita žoñi želatča, Nazaret wajtchiz žoñi. Yooz taku paljayni profetatača niiqui. Yooz Ejpž yujcquizimi žoñinacž yujcquizimi walja Yooz aztan milajrunaca paachiča. Nižaza Yooz taku zumapan parličiča.

20 Jalla nekztanaqui učhum timplu jilirinacami učhum wajt jilirinacami nii Jesusa intirjichiča cruzquiz ch'awczjapa, conzjapa.

21 Wejrnacqui cjetuča, “Niiqui Israel wajtchiz žoñinaca liwriyaa” cjichintača. Nižaza tonjtanpacha ĉjep majča, tižta watchiqui.

22-23 Wejtnacaquiztan tsjii kjaž maatakanacaqui wentan Jesusiž sipulturu chertzni ojkchiča. Jalla nekztanac “Jesusiž curpu ana žejlča” cjican tjončiča. Tjonžcu quint'ichiča, tižta. Sipulturquin anjilanaca chertkalča. Anjilanacaqui cjitkalča “Jesusaqui vivo žejtchiča” cjican. Jalla nuž quint'itkalča maatakanacaqui. Jalla nuž quint'itiquiztan tsucchinča wejrnacqui.

24 Jalla nii quintu nonžcu tsjii kjažt wejtnaca mazinacaqui sipulturu chertzni ojkchiča. Nii maatakaž quint'ita, jalla nižtapacha chertzicha. Pero Jesusa ana chertčiča.

25 Jalla nekztanaqui Jesusaqui cjichiča:

—Ancha ana intintiñi ančhucqui. ¿Kjažtatajo? ¡Ancha ch'aman criichinčhucča tjapa Yooz taku paljayni profetanacž cijirtaqui!

26 Ima honorchiz mantican, Cristuqui nuž sufrispantaž niic, ¿ana jaa?

27 Jalla nekztanaqui Jesusaqui ninacžquiz tjajni kallantichiča, tjapa cijirta Yooz takunaca niž puntuquiztan, jalla nii. Tjaajincan, Moisés cijirta libruquiztan kallantichiča. Nižaza tjappacha Yooz taku paljayni profetanacž libruquiztan tjaajinčiča niž persun puntuquiztan.

28 Jalla nekztanaqui jakziquin ojtčaja, jalla nicju irantitan, Jesusaqui tira wajtz cjichitača.

29 Nii pucultan žoñinacaqui Jesusižquiz rocatča, tuž cjican:

—Wejtnacatan žela. Tjuñi zezillaž cjišsa, joz zumča.

Nekztanaqui Jesusaqui ninacžtan chica tsjii kjuyquiz želi luzziča.

³⁰ Nekztanaqui tjapa ninacaqui misquiz julziča. Nuž julžcu Jesusaqui t'anta tanziča niž kjaržtan. Nekztanaqui Yooz Ejpžquin sparaquiz cjichiča. Nekztan ninaczquiz tojziča.

³¹ Nuž paan nii pucultan žoñinacaqui Jesusa pajñiž cjissiča, čhujgui cjetzintažtakaz. Pero nii orapacha Jesusaqui liwj katchiča.

³² Nii pucultanaqui ninacpora parlassiča, tuž cjican:
—Učumnacatan jiczquiz okan nižaza Yooz taku tjaajnan, učumnaca kuzqui ancha zint'atča. Jalla nižtataž, ¿ana jaa?

³³ Jalla nekztanaqui ana tjewžcu Jerusalén watja quejpciča. Jalla nicju Jesusiž tuncaman illzta žoñinacžtan zalchiča, yekja mazinacžtan juntazzi.

³⁴ Ninacaqui cjichiča:
—Ultim werara jacatatchipanča Jesusa Jiliriqui. Simonaqui zakaz cherchiča.
³⁵ Nekztanaqui nii pucultanaqui zakaz quint'ichiča, jaknužt jiczquiz okan, ninaczquiz watchaja, jalla nii. Nižaza jaknužt Jesusižquiz pajtčhaja t'anta tojznan, nii quint'ichizakazza.

JESUSAQUI TIRIPINTIT PARIZICHICHA

³⁶ Jalla nuž parlan, Jesusapachača ninacz taypiquiz tsijtsiqui. Jesusaqui ninaczquiz tsaanchiča, tuž cjican:

—¿Zuma kuzziz cjee!

³⁷ Ninacaqui ancha ispantichi cjissiča, ancha tsucchiča. Pinsichiča, “Almaž caa” cjican.

³⁸ Pero Jesusaqui cjichiča:
—¿Kjažtiquiztan ančhucqui tsucchinčhucta? ¿Kjažtiquiztam wejt puntuquiztan ančuca kuzquiz turwaysita?

³⁹ Wejt kjaraž cherna. Wejt kjojčaž cherna. Wejrpachača. Lanzna. Chera. Tsjii alma animuqui ana janchichizza, nižaza ana tsijichizza. Ančhucqui cherča, wejrtča janchichizmi tsijichizmi.

⁴⁰ Jalla nuž chiican, Jesusaqui kjaranaca kjojchanaca tjeeziča.

⁴¹ Jalla nekztanaqui nii žejlñi žoñinacaqui kuzquiz pinsichiča, “Jesusaqui žejlča werara, ana werara”, nii. Nižtami cuntintutača. Ispantichi želan, Jesusaqui ninaczquiz cjichiča:

—Ančhucalta ¿čhjulut lujlžjapa žejl?

⁴² Nekztanaqui Jesusižquiz tjaachiča ch'iz canca, nižaza mazk'a.

⁴³ Jesusaqui nii čhjeri tanžcu lujlchiča ninacaž cheran.

⁴⁴ Nekztanac cjichiča:
—Tuquiqui ančhucaltan žejlcan ančucaquiz mazinchintača, jaknužt wejtquiz watstantažlaja, jalla nii. Jaziqui cumplispantača tjapa wejt puntuquiztan cijjrta Yooz takunaca. Moisesqui wejt puntuquiztan cijjrchiča, nižaza tuquita Yooz taku paljayñi profetanacaqui cijjrchizakazza wejt puntuquiztan. Nižaza salmos cjita liwruquiz cijjrta zakaztača wejt puntuquiztan. Jalla nii tjapa cumplispantača.

⁴⁵ Jalla nekztanaqui Yooz taku tjaajincan zumpacha intintiskatchiča.

⁴⁶ Nižaza cjichiča:
—Jalla tuž cijjrtatača. Cristuqui ticspantača. Nižaza čhjep majquiztan jacatatspantača.

⁴⁷ Nekztan Cristuž mantita kamañquiz kamcan žoñinacaqui tjapa kjutñi nacionanacaran liwriñi taku paljajstanča. Jerusalén wajtquiztan liwriñi taku paljayi kallantistanča. Jalla tuž cjican, paljayaquiča, “Yoozquin kuzziz cjee, nižaza kuznaca campiya, ujnaca pertunta cjisjapa”.

⁴⁸ Ančhucqui jalla nižtapacha paljayaquiča. Tisticunacača ančhucqui.

⁴⁹ Yooz Ejpqui ančucaquiz taku compromitchičha ančuca kuzquiz Espíritu Santu cuchanzjapa. Wejrqui ančucaquiz wajilla cuchanzcača nii wejt Yooz Epiž compromitta Espíritu Santo, jalla nii. Nižaza tii Jerusalén wajtquizpachaž kamla, tsewctan cuchanzquita Espíritu Santuž azi tanzcama.

JESUSA ARAJPAHQIN CHJICHTA

⁵⁰ Jalla nekztanaqui Jesusaqui ninaca chjitchičha wajtž tjiya, Betania cjita watjacama. Jalla nicju kjara waytižcu, ninaczquiz cjichiča:

—Yooz Ejpqui ančucaquiz zuma yanapla.

⁵¹ Jalla nuž chiižcuqui, Jesusaqui ninaczquiztan zarakchiča. Tsewcchucpacha waytiscu chjichtatača.

⁵² Nii ecta žoñinacaqui Jesucristuž honora paljayžcu Jerusalén cjita watja ancha cuntintuž cuttižquichiča.

⁵³ Jalla nicju ninacaqui timpluquiz pan žejlchiča, Yooztajapa honora waytican. Jalla nužoj cjila. Amén.

EL SANTO EVANGELIO SEGUN SAN JUAN

YOOZ TAKU CJITACHA JESUCRISTUQUI

¹ Ima tii muntu želan Jesucristo želatča. Jalla niiča Yooz Taku cjita. Nižaza Yooz Ejpžtanča. Niimi Yoozzakazza.

² Primirquiztanpacha niiqui Yooz Ejpžtanpanča.

³ Jalla niž cjen Yoozqui tjappacha paachiča. Tjapa niž paatacamača. Anaž yekjaž paataqui žejlča.

⁴ Jalla nižakazza žeti tjaachiqui. Nižaza žejtcan žoñinacaqui persun kuzquiz zuma kamaña zizasacha. Tsjii kjanažtakaz Jesucristuqui Yooz zuma kamaña žoñž kuzquiz zizkatñiča.

⁵ Jaknužt tsjii kjanaqui zumchiquiz kjančhaja, jalla nižta Jesucristuqui zumchiquiz ojklayñi žoñinacž kuzquiz zuma kamaña zizkatča. Nii zumchiquiz ojklayñi žoñinacača ana zuma kamañchizqui. Pero Jesucristuž cjenpankaz Yooz zuma kamaña zizasacha.

⁶ Tsjii Yooziž cuchanžquita žoñi želatča, Juan cjita.

⁷ Nižaza Jesucristuča zuma kamaña zizkatñiqui. Juanqui Jesucristuž puntuquiztan mazni tjončiča, tsjii kjanažtakaz. Nižaza testicu cunta Jesucristuž puntu werara mazzinčiča. Tjapa žoñinacžquiz nuž mazzinčiča, Jesucristužquiz criyajo.

⁸ Juanqui anača ultim Yooz zuma kamaña zizkatñiqui. Antiz tsjii testicu cunta tjončiča, nii Yooz zuma kamaña zizkatñiž puntuquiztan mazzinzjapa.

⁹ Jesucristuča ultim Yooz zuma kamaña zizkatñiqui. Jalla niiča zapa žoñinacž kuzquiz Yooz zuma kamaña zizkatñiqui. Nižaza Jesucristuqui tii muntuquiz tjončiča.

¹⁰ Jalla nuž tjonžcu tii muntuquiz kamčiča. Nižaza niiča tjapa tii muntuquiz žejlñinaca paañiqui. Niiž paataž cjenami tii muntuquiz žejlñi žoñinacaqui Jesucristo ana pajz pecčiča.

¹¹ Jesucristo Yooz Majchqui niž persun wajtchiz žoñinacžquiz tjončiča. Pero nii žoñinacasti Jesucristo ana pajz pecčiča.

¹² Pero jakziltami nii Jesucristo pajz pecčhaja, nižaza nižquin tjapa kuztan criičhaja, jalla ninacaqui ultim Yooz maatinacapanž cjissa.

¹³ Jalla nuž muñčiča Yoozqui. Anaž persun maa ejpž kuzcama, nižaza anaž persun kuzcama, nižaza anaž žoñiž pinsitacama, antiz Yooziž pinsitacama žoñinacaqui Yooz maatinaca cjissa.

¹⁴ Yooz Taku cjita Jesucristuqui tii muntuquiz tjonžcu, žoñž curpuchiz wejtnacatan juntu kamčiča. Jalla tii muntuquiz kamcan Jesucristuqui Yooz zuma okzñi kuz tjeeziča. Nižaza Yooz lijitum kamañ puntunacami werara tjeeziča. Tii muntuquiz kaman, wejrnacqui niž ancha zuma arajpach kamaña cherchinča. Niiča Yooz Ejpž zinta Majchqui. Jalla nižtquiztan niž tjeežta arajpach kamañaqui niž kamañapankalča.

¹⁵ Juanqui nii Yooz Majch puntu mazzinčiča, tuž cjican:

–Jalla tiiž puntuquiztan tuqui chiichinča, tuž cjican: “Tsjiiqui tjonča wejt jarupacha. Jalla niiča wejtquiztan juc'ant chekanaqui. Ima weriž nasana pan želatkalča niiqui”.

¹⁶ Nii Yooz Majchqui tsjan juc'ant zuma kuzziz cjen učumnacaquiz zuma arajpach kamañchiz cjiskatchiča juc'anti juc'anti.

¹⁷ Tuqui timpu Moisesqui lii mantitanaca žoñinacžquiz tjaachiča. Jaziqui Jesucristuqui Yooz zuma okzñi kuz žoñinacžquiz tjeeža. Nižaza žoñinacžquiz Yooz zuma kamañchiz cjiskatča, nižaza Yooz puntunaca zizkatča.

¹⁸ Jesucristučha Yooz Majchqui. Anapanž jec žoñimi Yooz cherchiqui. Niiž zinta Majch alajakazza Yooz cherchiqui. Nii Yooz Majchqui Yooz Ejpžtan tsjii kuzzizpankazza. Jalla nižtiquiztan niičha Yooz puntunacami werara zizkatñiqui.

JUAN BAUTISTAZ CHIITA TAKU

¹⁹ Juanž mazzintaqui Jesucristuž puntuquiztan jalla tužučha. Jerusalén wajtchiz judío žoñinacaqui Juanž puntuquiztan iya ziz pecatčha. Nekztan timplu jilirinacami timpluquiz sirwiñinacami Juanžquin pewczñi cuchanžquitatačha. Ninaca pewczičha, tuž cjican:

—¿Amqui jequimtaya?

²⁰ Juanqui zumpacha mazzinchičha. Nii pewczñi žoñžquiz ana nicchičha. Mazzincan tuž cjichičha:

—Wejrqui anačha Cristutqui, ančhucaž tjewžtaqui.

²¹ Jalla nekztanaqui nii pewczñi žoñinacaqui wilta pewczičha tuž cjican:

—¿Jequimt amjo? ¿Elías cjita profetamkaya?

Juanqui kjaazičha, tuž cjican:

—Anačha Eliastqui.

Nekztanaqui ninacaqui pewczičha, tuž cjican:

—Nii profeta tjoniz cjizpacha, ¿niimi amya?

Juanqui kjaazičha, tuž cjican:

—Wejr anačha niitqui.

²² Jalla nekztanaqui ninacaqui cjichičha:

—¿Jecpant amjo? Wejrnacqui quintu chjitstančha wejrnac cuchanžquiñinacžquin. Am persun puntuquiztan ¿kjažum cjii?

²³ Nekztan Juanqui tuž kjaazičha:

—Wejrtčha alto joržtan ch'ekti yokquin paljajiñtqui. Tuž paljajiñčha: “Yooz Jiliržtajapa zuma kamañ jicz tjaczna”. Jaknužt Isaías cjita profeta chiitčhaja, jalla nuž paljajiñčha.

²⁴ Nii pewczñinacaqui fariseo žoñinacaž cuchanžquitatačha, Juanžquin.

²⁵ Ninacaqui pewczizakazza tuž cjican:

—Nižtaqui amqui anaž Cristumni, nižaza anaž Eliasni, nižaza anaž nii tjonni profetamni. Ana nižta žoñimžlaj niiqui, ¿kjažtiquiztan am judio žoñinaca bautisjo?

²⁶ Juanqui ninacžquiz kjaazičha tuž cjican:

—Wejrqui kjaztankaz bautisiñčha. Judío žoñinacžquiztan tsjiiqui žejlčha, jalla niiqui ančhucqui anaž pajčha.

²⁷ Jalla niiqui wejt jaruž tjončha. Jalla nuž cjenami niičha wejtquiztan juc'ant tsjan chekanaqui. Jalla nii atintizjapa wejrqui anal waquizučha, niž zapat chiqui jwerzinimi, anaž cjichuca.

²⁸ Betábara cjita yokquin nuž Juanžquiz pecuntatačha. Betábara cjita yokaqui Jordán cjita puž tuunačha. Jalla nicju Juanqui bautisatčha.

UZI WILANAZTAKAZZA JESUCRISTUQUI

²⁹ Jakatažuqui Juanqui Jesusa tjonni cherchičha. Jalla nuž cheržcu, tuž cjichičha:

—Cherzna. Tiičha Yoozquiztan cuchanžquita žoñi, uzi wilanažtakaz. Jalla tiiqui tii muntuquiz žejlñi žoñinacž cuntiquiztan ticznaquičha. Ujchiz žoñinacž laycu ticznaquičha, ninacaž ujnacquiztan ana casticta cjeyajo.

³⁰ Wejrqui tiiž puntuquiztan mazzinčinčha tuž cjican: “Wejt wirquin tjončha tsjiiqui. Jalla niičha wejtquiztan juc'ant tsjan chekanaqui. Ima weriž nasan, niiqui želatkalčha”.

³¹ Wejrqui persunpacha tii žoñi anal zizaytučha, jecčhalaj, jalla nii. Wejrqui Yooz mantita jaru kjaztan bautisiñčha, Israel wajtchiz žoñinacžquiz nii pajkatta cjisjapa.

³² Nižaza Juanqui Jesusiž puntuquiztan tuž chiichizakazza:

—Wejrqui arajpachquiztan Yooz Espíritu Santo palumažtakaz chjijwžquiñi cherchinča. Nekztan nii palumaqui Jesusiž juntunpacha cjisquichiča.

³³ Tuquiqui wejrqui persunpacha tii žoñi anal zizaytuča, jecčhalaj, jalla nii. Pero Yoozqui wejr mantichiča kjaztan bautisajo. Nižaza wejtquiz tuž cjichiča: “Espíritu Santuqui jecžquiz chjijwžcačhaja, nižaza nižquiz želačhaja, jalla niičha Espíritu Santužtan bautisñiqui. Jalla nii cheržcu nižquiz pajaquiča”.

³⁴ Jaziqui nižtapan cherchinča, jalla nižtiquiztan wejrqui ančhucaquiz maznuča, tiiča werar Yooz Maatiqui, cjican.

ANDRESTAN PEDRUZTAN

³⁵ Jakatažuqui Juanqui pucultan niž tjaajinta žoñinacžtan tsijsi želatča.

³⁶ Jesusaž nijcchuc ojklayan, Juanqui nižquin cheržcu tuž cjichiča:

—Cherzna. Tiiča Yoozquiztan cuchanžquitaqui. Uuzi wilanažtakaz cjequiča.

³⁷ Nii pucultan Juanž tjaajintanacaqui jalla nuž chiiñi nonžcu Jesusižquiz apziča.

³⁸ Jalla nekztanaqui Jesusaqui wir kjutñi cheržcu, ninaca apzquiñi naychiča. Ninacžquiz cjichiča:

—¿Čhjuluž ančhuc kjurya?

Nii apzñi žoñinacaqui tuž kjaaziča:

—Rabbí. (Rabbí cjita takuqui Tjaajiñi Maestro cjiča ninacž tawkquiztan.) ¿Jakz-iquinam am kama?

³⁹ Jesusaqui ninacžquiz cjichiča:

—Picha. Wejttan oka, cherzjapa.

Jalla nekztanaqui tjonzñi ojkiča, jakziquin kamchitažlaja, jalla nicju. Tjuñi zezi cjen nii pucultanaqui Jesusižtan kamchiča nii zeztan ween pakara.

⁴⁰ Tsjii pucultiquiztan Andrés cjitatača, Simón Pedruž lajkača. Jalla niiqui Juanž čiita nonžcu Jesusa apziča.

⁴¹ Pero Andresqui ima Jesusižtan ojklayan niž Simón cjita jila kjuri ojkiča. Jalla nižtan zalžcu, tuž mazziča:

—Wejrqui Mesiastan zalchinča. (Ninacž tawkquiztan Mesías cjita tjuuqui Cristuž cjicha. Cristo cjita tjuuqui “Yooz illzta” cjiča.)

⁴² Jalla nekztanaqui Andresqui niž jila Jesusižquiz zjijcchiča. Jesusaqui nii cheržcu, tuž cjichiča:

—Amqui Simona cjitamča, Jonás majch. Tekztan najwcchuc Cefas cjita cjequiča. (Cefas cjita tjuuqui Pedro cjiča, ninacž tawkquiztan. Pedro cjita tjuuqui “maz” cjiča.)

FELIPZTAN NATANAELZTAN

⁴³ Jakatažuqui Jesusaqui Galilea yokquin ojcz pinsichiča. Jalla nuž okawk cjen, Felipe cjita žoñžtan zalchiča. Nižquiz tuž cjichiča:

—Wejttanpanim chica ojklayaquiča.

⁴⁴ Nii Filipiqui Betsaida wajtchiz žoñitača. Andrestan Pedružtan nii wajtchiz žoñinacžkaztača.

⁴⁵ Jalla nekztanaqui Filipiqui Natanael kjuri ojkiča. Jalla nižtan zalžcu cjichiča: —Tsjii žoñžtan zalchinča. Niž puntuquiztan Moisesqui cjičchipantala Yooziž tjaata liy librunacquiz. Nižaza niž puntu profetanacaqui cjičchizakaztača. Niiqui Jesusa cjitača, Josež majch. Nazaret wajtchiz žoñičha nii Jesusaqui.

⁴⁶ Jalla nuž nonžcu Natanaelqui tuž cjichiča:

—¿Nazaret wajtquiztan zuma žoñi želasajo? Anaž jaz.

Felipiqui nižquiz tuž kjaaziča:

—Cheržquily.

⁴⁷ Jesusaqui Natanael cjita žoñi macjatžquiñi cheržcu, tuž cjichiča:

—Cheržca. Nii žoñičha lijitum Israel wajtchiz žoñiqui, ana incallñiqui, nižaza zuma kuzzizza.

⁴⁸ Jalla nekztanaqui Natanaelqui Jesusižquiz pewczičha tuž cjican:

—¿Jaknužum am wejr pajjo?

Jesusaqui nižquiz kjaazičha tuž cjican:

—Ima Felipe am kjawznán, wejrqui am cherchinčha, higo munti koztan.

⁴⁹ Natanaelqui tuž cjichičha:

—Tjaajiñi Maestro, am Yooz Maatimkalala, Israel žoñinacž chawc Jilirimkalala.

⁵⁰ Nekztanaqui Jesusaqui nižquiz cjichičha:

—Wejrqui chiichinčha, am higo munti koztan žejlñi cherchinčha, nii. Jalla nižta chiitiquiztan alaja wejtquizim kuzziz cjissamčha. Pero wiruñiqui juc'ant pajk obranaca cheraquičha amqui.

⁵¹ Nižaza Jesusaqui cjichizakazza:

—Ančhucaquiz weraral cjiwčha. Ančhucqui arajpacha cjetsi cheraquičha, nižaza Yooz anjilanacaqui wejt juntuñ chjijwžquiñi yawžquiñi cheraquičha. Wejrtčha tsewc-tan cuchanžquita Yooz Zoñtqui.

2

ZALZ PJIJZTA

¹ Chjep majquiztan tsjii zalz pjiizta želatčha Caná wajtquin, Galilea yokquin. Jesusiž maa nicju želatčha.

² Nižaza Jesusaqui niž tjaajinta žoñinacžtanpacha nii zalz pjiiztquiz kjawžtatačha.

³ Jalla nuž pjiizta paan vino upzitačha. Jalla nekztanaqui Jesusiž maaqui nižquiz cjichinčha:

—Vino upzičha.

⁴ Jesusaqui naaquiz tuž kjaazičha:

—Maataka, ¿kjažtiquiztan nii puntu wejtquiz chiijo? Wejt langz ora imazičha.

⁵ Pero naaqui nekz atintiñi sirwizunacžquiz cjichinčha:

—Tiiž mantitacama ančhucž paaquičha.

⁶ Jalla nicju sojta pajk maz luuznaca želatčha. Judío žoñinacaqui ajunz cuzturumpi paazjapa luuznaca joojooñitačha. Zapa luuzquiz quinzakal tunc litro, patac litro, nuž kjaz luzñitačha.

⁷ Nekztan Jesusaqui nii pjiizta paañi sirwizunacžquiz mantichičha, tuž cjican:

—Tii luuznacquiz ančhucqui kjaz chjijpznaquičha.

Nekztanaqui luuz joracama kjaznaca chjijpzičha.

⁸ Jalla nekztanaqui Jesusaqui cjichičha:

—Jaziqui tsjii zkoluculla coožna. Nekztan pjiizta paañi patrunžquiz chjicha.

Jalla nuž niž chiitacama chjitchičha.

⁹ Nii pjiizta paañi patrunaqui mallzičha nii kjazquiztan vino tucchi. Jakziquiztan tjonchi nii vino, jalla nii ana zizatčha. Sirwizunacakaz zizatčha. Ninacaž kjazqui cootkalčha. Jalla nuž nii vino mallžcu pjiizta paañi patrunaqui nii zalzñi tjowa kjawzičha.

¹⁰ Nekztan tuž cjichičha:

—Chjul žoñimi zuma vino panž tjaacha primiraqui. Nekztan kjawžta žoñinacaž zuma vino lictan nii jaru ana zuti zuma vino zakaz tjaacha. Amzti tii oracama tii ancha zuma vino čhojcham, ¿kjažtatajo?

¹¹ Jalla niitačha Jesusaž primer paata milajruqui. Caná de Galilea wajtquiz paachičha. Jesusaqui nii milajru paacan, niž arajpach kamañami azimi tjeezičha. Jalla nižtiquiztan nižtan chica ojklayñi žoñinacaqui nižquizimi tjapa kuz cjissičha, nižaza criichičha.

¹² Jalla niiz wiruñ Capernaum wajtquin ojkchiča. Niiz maatan, niiz lajknacžtan, niiz tjaajinta žoñinacžtan, jalla ninacaqui niiztan chica ojkchiča. Jalla nicju tsjii kjaž maj kamchiča.

TIMPLU PEWZA JESUCRISTUQUI

¹³ Judío žoñinacž pascua pjizta wajillatača. Jalla nižtiquiztan Jesusaqui Jerusalén watja ojkchiča.

¹⁴ Jalla nicju timplu patiuquiz luzcu, animala tuyñinaca cherchiča. Vacanaca, uuzinaca, nižaza palumanaca jalla nižtanaca timplu patiuquiz tuyñi cherchiča. Nižaza paaz campiiñinaca ninacž puestuquiz julzi cherchizakazza.

¹⁵ Jalla nižtanaca cheržcu Jesusaqui poota zkizquiztan lazu paachiča. Jalla nekztanaqui nii laztan zancchuc liwj tirkatchiča vacanacami, uuzinacami tjapa nii tuyñinacžtanpacha. Nii paaz campiiñi žoñinacž paazmi k'ala witzinchiča, nižaza ninacž mizanacami pjokžinchiča.

¹⁶ Nekztan paluma tuyñi žoñinacžquiz ujziča tuž cjican:

—Tjapa tinaca jwesa. Wejt Yooz Ejpž kjuya anača tuyz kjuya tjaczqui.

¹⁷ Jalla nekztanaqui niiz tjaajinta žoñinacaqui cjiirta Yooz taku cjuñziča. Yooz tawk libruquiz tuž cjiirtkalča: “Am kjuya rispitta cjiskatz pecuča. Nuž pectiquiztan akztal cjeeča”.

¹⁸ Jalla nekztanaqui judío žoñinacaqui niizquiz pewcziča tuž cjican:

—Jalla nižtanaca paazjapa, ¿ject am mantichejo? Yoozqui am mantichizlaj niiqui, tsjii siñala milajruž tjeežna.

¹⁹ Jesusaqui tuž kjaaziča:

—Tii timplu pajlžta cjequiča. Nekztan čhjep majquiz wilta tsijtsnača.

²⁰ Jalla nižta chiiñi nonžcu judío žoñinacaqui cjichiča:

—Tii timplu kjuycanaqui pusi tunc sojtan wata kjuytala pero. ¿Amqui čhjep majquizkaz tii timplu tsijtsnasajo? Anapan niim atasacha amqui.

²¹ Jalla nuž nii timplu puntuquiztan chiican Jesusaqui niiz persun curpu puntuquiztanž chiyatča.

²² Jesusaž ticziquiztan jacatattan niiz tjaajinta žoñinacaqui nii chiita cjuñziča. Nekztan Yooz takumi criichiča, Jesusaž jacatatz punto cjiirta. Nižaza Jesusiž chiitanacami criichizakazza.

²³ Pascua pjiztiquiz Jesusaqui Jerusalén wajtquiz želatča. Jalla nicju želan walja žoñinacaqui niizquin criichiča. Niiz paata milajrunacami siñalanacami, nii cheržcu criichiča.

²⁴ Jesusaqui niiz persun kuzquiz žoñinacž kuz, jaknužt cječhaja, jalla nii zizatča. Jalla nižtiquiztan Jesusaqui nii juntuñ criichi žoñinacžquiz ana juyzu paachiča.

²⁵ Jesusaqui persunpacha žoñinacž kuz jaknužt cječhaja jalla nii zizatča. Jalla nižtiquiztan niiqui anaž jec tjaajžñimi pecatča žoñinacž kuz puntuquiztanaqui.

3

JESUSIZTAN NICODEMUZTAN

¹ Tsjii fariseo žoñi želatča, Nicodemo cjita, judío žoñinacž jiliritača.

² Jalla nii Nicodemuqui tsjii ween Jesusižquin tjonžñi ojkchiča. Nekztan Jesusižquin paljaychiča, tuž cjican:

—Tjaajiñi Maestro, žoñiqui ana Yooz poderžtanžlaj niiqui, nekztan ana milajrunaca paasača, amiž paata milajru, nižtanacami. Jalla nižtiquiztan wejrqui zizuča, Yoozquiztan tjonchamča, Yooz obra tjeežñi nižaza Yooz puntu tjaajñi.

³ Jalla nekztanaqui Jesusaqui niizquiz cjichiča:

—Amquiz weraral cjeeča. Jequit ana pizc wilta nassi cječhaja, jalla niiqui arajpach Yooz wajtquiz ana kamasacha.

⁴ Jalla nižta chiitiquiztan nii Nicodemo cjita žoñiqui tuž pewcziča:

—Pero, ¿kjaž tsjii žoñiqui wilta majtta cjesajo? Wilta majtta cjisjapa, ¿maa iczquiz wiltaž luzasajo?

⁵ Jesusaqui tuž kjaaziča:

—Ultimu werarapal cjiwča. Jequit kjazquiztanami Espíritu Santužquiztanami ana nassi cječhaja jalla niiqui arajpach Yooz wajtquiz ana luzasača.

⁶ Jequit maa ejpžquiztankaz nassaja, jalla niiqui žoñž kamañchizkazza. Pero jequit Yooz Espíritu Santuquiztan zakaz nassaja, jalla niiqui Yooz Espíritu Santuž kamañchizza.

⁷ Weriz chiitiquiztan anam am ispantaquiča. Tjapa žoñinacaqui pizc wilta nastanpanča cjiwča.

⁸ Nicjumi ticjumi tjamiqui tjamča. Nii tjamž jora nonžcanami jakziquiztan tjamžquičhaja, jakzitchuc ojkčhaja, jalla nii ana zizzuca. Jalla nižta irataž Yooz Espíritu Santuqui jecz kuzquizimiž luzasača. Nižaza ana Yoozquin criichi žoñinacaqui criichi žoñinacz kamaña cherča. Pero nii Espíritu Santuž tjaata kamaña ana intintazuča.

⁹ Jalla nekztanaqui Nicodemuqui wilta pewcziča, tuž cjan:

—¿Jaknužupan cjes teejo?

¹⁰ Jesusaqui nižquin tuž kjaaziča:

—Amqui Israel žoñinaczquiz tjaajiñi maestrumla. ¿Jalla tii weriz chiita ana intintazzucakaya?

¹¹ Ultimupan wejr cjiwča. Wejrqui tii puntuquiztan intintazcu chiyuča. Weraraž chiyuča, tii weriz zizta nižaza cherta puntunacami. Jalla nuž cjenami amqui weriz chiita anam catokča.

¹² Tii muntuquiz watñi puntuquiztan chiyan ana intintazza amqui. Jaziqi juc'ant altu razunžtan arajpach Yooz puntuquiztan chiyanami, ¿jaknužt am intintasasajo?

¹³ 'Anaž jecmi arajpachquin yawchiqui. Wejrpankal arajpach Yooz puntuquiztan zumpacha zizuča. Wejrqui arajpachquiztan chjijwžquichinča. Wejrqui arajpachquiztan cuchanžquita Yooz Zoñtča.

¹⁴ Nižaza wejrqui cruzquiz waytital cjistanča. Jaknužt Moisesqui tsjii korquiztan paata zkora pajk tuñquiz waytitčhaja, jalla nižta wejrqui waytital cjistanča,

¹⁵ wejtquin criichi žoñinaczquiz ew kamaña tjaazjapa, ninaca Yooztan wiñaya kamajo, ana infernuquin sufrajo.

YOOZ EJPCHA ZOÑINACŽQUIZ OKZÑIQUI

¹⁶ Yooz Ejpqui tii muntuquiz žejlñi žoñinaczquiz ancha okžquichipanča. Jalla nižtiquiztan niž zinta Majch cuchanžquichiča, žoñinaczquiz ew kamañchiz cjiskatzjapa. Jakziltat niž zinta Majchquiz criyačhaja, ew kamañchiz cjequiča Yooztan wiñaya kamzjapa ana infernuquin sufrajo.

¹⁷ Yooz Ejpqui niž Majch tii muntuquiz cuchanžquichiča. Niž cjen žoñinaca liwriita cjesača infernuquin ana casticta cjisjapa.

¹⁸ 'Jakziltat Yooz Majchquiz criyačhaja, jalla niiqui ana infernuquin castictaž cjequiča. Pero jakziltat Yooz Majchquiz ana criyačhaja, jalla niiqui infernuquin castictapanž cjequiča, Yooz zinta Majchquiz ana criitiquiztan.

¹⁹ Yooz zinta Majchča Yooz kamaña tjeezñiqui zuma kjanažtakaz. Jalla nuž cjenaqui tii muntuquiz tjontan, žoñinacaqui ana wali kamañchiz kamzpanž pecatča, zumchiquiz kamzpanž pecatča. Nižaza ninacaž ana wali kamtanacaž cjen Yooz kamañchiz cjis ana pecchipanča. Jalla nižtiquiztan castictapanž cjequiča.

²⁰ Tjapa ana wali kamñinacaqui Yooz kamaña tjeezñizjapa quintrača. Nižaza Yooz kamaña tjeezñizquiz anaž chertz pecča, ninacz ana wali kamtanaca ana tjeezta cjisjapa.

²¹ Pero jakziltat werar Yooz kamañ jaru kamz pecčhaja, jalla niiqui Yooz kamaña tjeezñizquiz macjatžquiča kjanapacha tjeezjapa, niž zuma kamtanaca Yooz aztan kamtača, nii. —Jalla nuž cjichiča Jesusaqui.

JUAN BAUTISTAZ CHIITA

²² Jalla nuž Nicodemužtan parližcu, Jesusaqui tjaajintanacžtan Judea yokquin ojkchiča. Jalla nicju niž tjaajintanacaqui bautiscan žejlchiča.

²³ Nižaza Juan bautiscan zakaz želatča. Salim cjita wajt žcati Enón cjita wajtquin želatča. Jalla nicju wacchi kjaz želatča. Nekztan žoñinacž tjonatča bautista cjisjapa.

²⁴ Jalla nižtanaca watchiča, ima Juanqui carsilquin chawcta cjen.

²⁵ Jalla nekztanaqui Juanž tjaajinta žoñinacžtan tsjii kjaz judío žoñinacžtan ch'aassiča, ajunz cuzturumpi puntuquiztan.

²⁶ Juanž tjaajintanacaqui nižquin mazni tjonchiča, tuž cjican:

–Tjaajiñi maestro, tsjiiqui amtan chica želatča Jordán pujž tuuna. Amqui niž puntuquiztan mazzinchamča. Jalla niiqui tekz žejlča bautiscan. Nižaza tjapa žoñinacaqui nižtan ojkzpanž cjissa.

²⁷ Juanqui ninacžquiz tuž cjichiča:

–Yooz Ejpqui wejtquiz tsjii kamaña tjaachiča; nižaza tsjii puestuquiz wejr utchiča. Jaknužt Yoozqui žoñžquiz kamaña tjaatčaja, jalla nii jaru žoñiqui kamz waquiziča.

²⁸ Ančhucpacha weriž chiita nonzinčucča. Wejr cjichinča: Anača wejr Cristutqui. Wejrzi niž tuqui cuchanžquita žoñtča.

²⁹ Tsjii zalz pjijztiquiz zalzni tjowaqui yanapni mazinacžquiztan tsjan importantiča. Nii zalzni tjowaqui tjunchizza. Yanapni mazinacaqui jalla nii nonžcu cuntintuča, nižaza chipchipča. Jalla nižta iratača anziqiu. Wejrqui Jesusiž quintu nonžcu ancha cuntintuča.

³⁰ Niiqui juc'anti juc'anti tucquin cjistanča. Wejrzi nižquiztan juc'anti juc'anti wirquin cjistanča.

JESUSACHA TSEWCTAN TJONCHI ZOÑI

³¹ Nii tsewctan tjonchi žoñiča tjapa žoñinacžquiztan juc'anti chekanaqui. Tii yok muntuquiz kamni žoñinacaqui tii yokjapakaz kamañchizza. Nižaza tii yokjapa kamaña puntuquiztankaz parliča. Nii tsewctan tjonchi žoñizti tjapa žoñinacžquiztan juc'antiča.

³² Nii tsewctan tjonchi žoñiqui arajpachquin čjulut chertčaja, nonžtčaja, jalla nii žoñinacžquiz mazziča. Jalla nii zumanaca maztiquiztanami žoñinacaqui anaž wira criiz pecča.

³³ Jakziltat niž mazta criičaja, niiqui tjurt'aquiča, Yooziž chiita takuqui werarapankalala, cjican.

³⁴ Yooziž cuchanžquita žoñiqui Yooz takupanž parliča. Yooz Espíritu Santuča niž kuzquiz žejlñipan, yanapzjapa. Jalla nižtiquiztan Yooz takupanž parliča.

³⁵ Yooz Ejpqui niž Majch k'aachiča. Jalla nižtiquiztan tjappacha tjaachiča niž Majch kjarquiz.

³⁶ Jalla nižtiquiztan jakziltat Yooz Majchquiz criyačaja, jalla niiqui Yooztan wiñaya kamaquiča. Nižaza jakziltat ana Yooz Majchquiz criyačaja nižaza ana cazačaja, jalla niiqui anapanž Yooztan kamasuča. Nižaza Yooz Ejpqui cjiča, nii žoñiqui castictaž cjequiča.

4*JESUSIZTAN SAMARIA WAJTCHIZ MAATAKZTAN*

¹ Žoñinacaqui Jesusižquiz walja tjonchiča nižtan chica ojklayzjapa, Juanžquiztan juc'ant tama. Nižaza Juanžquiztan juc'anti žoñinaca bautissiča. Jalla nii quintu ojklayan, fariseo žoñinacaqui nii quintu nonchiča. Nekztan Jesusižtan quintrazi kallantichiča. Nii zizziča Jesusaqui.

² Jalla nuž nii Jesusiž bautis quintu ojklaychiž cjenami, Jesusaqui anaž bautissiča. Antiz niž tjaajinta žoñinacakaz bautisatča.

³ Pero fariseo žoñinacaqui Jesusiž puntuquiztan nonžcu, Jesusižtan quintrazi kallantichiča. Jalla nižtiquiztan Jesusaqui Judea yokquiztan zarakchiča, Galilea yokquin quejpžquizjapa.

⁴ Jalla nii jiczquiz ojkan, Samaria yoka nuž watstantača.

⁵ Jalla nuž Samaria yokquin ojkan Sicar cjita wajtquin irantichiča. Tuqui timpu Jacob cjita žoñiqui niž José cjita majchquiz tsjii yoka tjaachitača. Nii yok žcati Sicar cjita watja želatča.

⁶ Jalla nicju tsjii kjaz tuj želatča, Jacobž tuj cjitatača. Jesusaqui jiczquiz ojktiquiztan otchiča. Nekztan tuj latuquiz julziča. Nii oraqui taypur wajitača.

⁷⁻⁸ Nekztanaqui niž tjaajinta žoñinacaqui watja luzziča lujlz čhjeri kjayzjapa. Jesusaž nuž zinalla želan, tsjaa Samaria wajtchiz maatakqui nii tujquin kjaz cooyi tjonchinča. Jesusaqui naaquiz paljaychiča:

—Kjaz onalla, —cjican.

⁹ Jalla nuž kjaz tomangztiquiztan naa Samaria wajtchiz maatak žonqui cjichinča:

—Amqui judío žoñimla. Wejrqui Samaria wajtchiz žontča. ¿Kjažtiquiztan amqui wejtquiztan kjaz mayjo?

(Judío žoñinacžtan Samaria wajtchiz žoñinacžtan porapat ana parliñipanla, pero.)

¹⁰ Jalla nekztanaqui naa maatakaž chiitiquiztan Jesusaqui tuž kjaaziča:

—Wejrqui amquiztan kjaz maychinča. Pero amzti wejt puntuquiztanami nižaza Yooziž tjaaz puntuquiztanami intintitasaz niiqui, jalla nekztan wejtquiztan žejtñi kjaz maytasacha. Nižaza nii žejtñi kjaz tjaatam cjitasača.

¹¹ Jalla nekztanaqui naa maatakqui tuž cjichinča:

—Señor, am anaj kjaz coozizzamla. Tii tuj koziča. ¿Jakzictanam nii žejtñi kjaz tjaasajo?

¹² Učhum Jacob cjita tuquita ejpqui tii tuj ecanchiča. Nižaza tii tujquiztan kjaz licñitača, nižaza niž maatinacami, nižaza niž animalanacami. ¿Amqui nižquiztan juc'antim cjes, kjažtatajo?

¹³ Jalla nekztanaqui Jesusaqui naaquiz cjichiča:

—Jakziltat tii tuj kjazquiztan licčhaja, jalla niiqui wiltaž kjaz pecaquiča.

¹⁴ Pero jakziltat weriž tjaata kjaz licčhaja, jalla niiqui anaž iya kjaz pecñiž cjequiča. Weriž tjaata kjazqui niž persun kuzquiz tsjii jalzurižtakaz cjisnaquiča wiñaya žejtzjapa.

¹⁵ Jalla nekztanaqui naa maatak žonqui nižquiz cjichinča:

—Señor, nii kjaz tjaalla, ana iya kjaz peczjapa, nižaza tii tujquiz ana iya kjaz cooyi tjonzjapa.

¹⁶ Nekztanaqui Jesusaqui naaquiz cjichiča:

—Oka, am luctaka kjawžca. Nekztan wiltam wejtquin tjonaquiča.

¹⁷ Naa maatak žonqui tuž kjaaziča:

—Ana luctakchiztča.

Jalla nuž kjaaztiquiztan Jesusaqui tuž cjichiča:

—Amqui weraram chiiča, “Ana luctakchiztča” cjicanaqui.

¹⁸ Amqui pjijska luctakchiztakalala amqui. Jalla nižtiquiztan anziqui am lucum cjičhaja, jalla niiqui anaž am ultim lucuqui. Jaziqui weraram chiiča.

¹⁹ Jalla nekztanaqui naa maatak žonqui Jesusižquiz tuž cjichinča:

—Señor, amča profetaqui, nuž tantiyuča.

²⁰ Wejtnaca tuquita ejpnacaqui tii curquiz Yooz rispitiča. Ančhuc judío žoñinacžti cjiñchucča, Jerusalén wajtquin Yooz rispitsa, nii.

²¹ Nekztanaqui Jesusaqui naaquiz tuž kjaaziča:

—Maataka, weriž chiita taku criya. Tsjii tjuñi tjonča. Jalla nii tjuñquiziqui anaž tii curquizimi nizaza anaž Jerusalén wajtquizimi Yooz Ejp rispitaquiča.

²² Ančucqui Yooz ana zuma pajžcu rispitcha. Wejrnaczi Yooz lijituma pajžcu rispituča. Judío partiquiztanž Yooziž cuchanžquita Liwriñiqui tjonča.

²³ Nii tjonz tjuñquiziqui, nižaza anzimi, werar Yooz Ejp rispitiñinacaqui kuztanami animužtanami Yooz rispitaquiča. Nižaza Yooz Ejpž kuzcama weraraž rispitaquiča. Jalla nižta rispitiñinacaž Yooz Ejpqui pecča.

²⁴ Yoozza ana janchichizqui, animužtakaz. Jalla nižtiquiztan nižquin rispitiñinacaqui kuztanami animužtanami nii rispitanča. Nižaza Yooz kuzcama werara rispitanča.

²⁵ Jalla nekztanaqui naa maatak žonqui Jesusižquiz cjichinča:

—Tsjii noojiqui tsjii Yoozquiztan cuchanžquita cjitaqui tjonaciča. (Mesías, nižaza Cristo cjitazakazza niiqui.) Jalla nii tjonžcu wejtnacaquiz tjapa Yooz puntuquiztan tjaajnaquiča.

²⁶ Nekztanaqui Jesusaqui naaquiz tuž cjichiča:

—Werjtča niitqui, amquiz paljajuča.

²⁷ Jalla nuž parlan Jesusiž tjaajinta žoñinacaqui quejžquichiča. Nuž Jesusaž tsjaa Samaria wajtchiz žonatan parliñi cheržcu, ispantichiča. Ancha ispantižcu tjapa nii tjaajintanacaqui ana pewczñi atchiča, “Naaquiztan ¿chjulum pec?” cjican, už “¿Kjažtiquiztan naa žonatan parli?” cjican ana pewczñi atchiča.

²⁸ Nekztanaqui naa maatak žonqui kjaz luuz eccu, watja ojkchinča. Nekztan žoñinacžquin tuž quint'ichinča:

²⁹ —Ojklay, tsjii žoñiž cheržquily. Niiqui tjapa weriž kamta puntu zizza. Wejtquiz nii puntu chiichiča. ¿Anaj tii Yooz cuchanžquita Cristo cjesaya?

³⁰ Nekztanaqui žoñinacaqui wajtquiztan ulanžquichiča, jakziquin Jesusa želatčaja, jalla nicju.

³¹ Ima nii žoñinacaž irantižcan, niž tjaajintanacaqui Jesusižquiz chiižinchiča, tuž cjican:

—Tjaajiñi Maestro, čhjullu mekaz lujlžnalla.

³² Jesusazti ninacžquiz cjichiča:

—Wejtac yekja lujlž žejlča. Jalla nii lujlžqui ančucqui anaž pajča.

³³ Jalla nuž chiitiquiztan niž tjaajintanacaqui ninacpora pewcsasiča, tuž cjican:

—¿Jequit tižquiz lujlž čhjeri zjižcanchi cjesajo?

³⁴ Jesusaqui ninacžquiz cjichiča:

—Wejrqui wejt cuchanžquiniž kuzcama kamuča. Nižaza niž pecta langz cumpluča. Jalla niiča wejtta lujlž čhjeri cuntaqui.

³⁵ Ančucqui cjinčucča, “Zkala ajzquinaqui pajkpic jiiz pjaltiča”, jalla nuž cjinčucča. Pero wejr ančucaquiz cjiwča, “Nii žoñinacžquin cherna. Pookchi zkalanacažtakaz ninacaqui. Ricujz pecča.

³⁶ Jakzilat nii pookchi zkalanaca ricujačaja, jalla niiqui pactaž cjequiča. Nižaza nii ricujta žoñinacaqui Yooztan wiñaya kamaquiča. Jalla nižtiquiztan zkala čhjaciñimi ajžñimi nuž chicapacha cuntintuž cjequiča.

³⁷ Tii zkala puntuquiztan chiitaqui werarapanča. Jalla tuž cjiča: “Zkala čhjaciñiqui tsjiča. Nižaza zkala ajžñiqui yekjača”.

³⁸ Wejrqui ančuc cuchanžquichinča, ana amiž trabajta zkala ricujzjapa. Yekjanacača nii zkalac trabajchi Yooz taku paljayan. Ančucqui nii trabajtiquiz yapžinčucča, ultimquiziqui Yooztajapa ricujta cjisjapa.

³⁹ Jalla nekztanaqui wacchi Samaria wajtchiz žoñinacaqui nižquiz criichiča, naa maatak žonaž maztaž cjen. “Niiqui tjapa weriž kamta puntu zizza”, jalla nuž cjican mazzinča naaqui.

⁴⁰ Nižaza Jesusižquiz tjonžcu, nii Samaria wajtchiz žoñinacaqui Jesusižquiz rocchiča, tuž cjican:

—Wejtnacatan kamt'alla.

Nekztanaqui Jesusaqui ninacžtan puc maj kamchiča.

⁴¹ Jalla nuž niž persuna tjaajintiquiztan iya juc'anti nii žoñinacaqui nižquiz criichiča.

⁴² Ninacaqui naa maatak žonaquiz tuž cjichiča:

—Wejrnacqui criyuča. Anaž amiž maztiquiztankaz criyuča. Antiz niž taku persuna nonžcupan criyuča. Chekapan, tiiqui Yooz cuchanžquita Cristukalča, žoñinacžquiz liwriñiqui. Anzil nii zizuča wejrnacqui, niž tjaajinta taku nonžcu.

TSJII CHJETINTAQUI

⁴³ Puc majquiztan Jesusaqui Galilea yokquin ojkchiča.

⁴⁴ Jalla nekztanaqui Jesusaqui tuž chiichiča:

—Tsjii Yooz cuntiquiztan chiiñi profetaqui niž persun wajtchiz žoñinacžquiz ana rispittača.

⁴⁵ Jalla nekztanaqui Galilea irantitan, nii žoñinacaqui Jesusa zuma risiwchiča. Nii žoñinacaqui Jerusalén ojkchizakaztača, pascua pijzta payi. Jalla nicju žejlcan tjapa Jesusaž paatanaca cherchiča. Jalla nižtiquiztan nii žoñinacaqui Jesusa zuma risiwchiča.

⁴⁶ Galilea yokquin žejlcan, Jesusaqui Caná cjita watja wilta ojkchiča. Tuquiqui nii wajtquiz kjazquiztan vino tuckatchiča. Tsjii pajk jilirž secretariuqui Capernaum wajtquiz želatča. Nii secretariuž majchqui laatača.

⁴⁷ Jesusaž Judea yokquiztan Galilea tjonchi quintu zizcu, nii secretariuqui Jesusa roqui ojkchiča niž kjuyquin tjonžcajo, nižaza niž majch čhjetnajo. Niiž majchqui ticzmayatača.

⁴⁸ Jalla nekztan Jesusaqui nižquiz cjichiča:

—Ančhucqui sinalanacami milajrunacami ana cheraquiž niiqui, ana criyasača.

⁴⁹ Nekztan nii secretariuqui cjichiča:

—Señor, ima wejt majch ticznán wejt kjuyquin tjonžcalla.

⁵⁰ Jesusaqui nekztan cjichiča:

—Am kjuya quepa, am majchqui žetaquiča.

Nekztan nii secretariuqui jalla nuž Jesusaž chiitan nii criichiča. Jalla nekztan kjuya quejpchiča.

⁵¹ Jalla nuž niž kjuya okan, niž piyunanacaqui nižquin zalžquichiča, tuž cjican:

—Am majchqui žejtchiča.

⁵² Jalla nuž chiitiquiztan nii secretariuqui pewcziča, čhjulora niž majch žeti kallantichi, jalla nii. Niiž piyunanacaqui cjichiča:

—Zezcu taypuruž paztanalla nii kjakñi ch'ujlñiqui apaltichiča.

⁵³ Nii ejpqui cjuñziča, nii orapacha Jesusaqui cjichiča, “Am majchqui žetaquiča”. Jalla nižtiquiztan nii ejpqui tjapa kuztan Jesusižquiz criichiča, tjapa niž kjuychiz žoñinacžtanpacha.

⁵⁴ Judea yokquiztan Galilea quejpžcu, Jesusaqui nii milajru paachiča. Jalla nižtanaqui pizc wilta milajru paachiča.

5

LAA ZOÑI CHJETINTA

¹ Wiruñaquei judío žoñinacaqui pijzta paatča. Jalla nuž paan, Jesusaqui Jerusalén watja quejpžquichiča.

² Jerusalén wajtquiz tsjii pajk zana želatča, uuzi zana cjita. Jalla nii žcati tsjii žoñiž paata cocha kjazjapa želatča. Nii cochaqui Betesda cjitatača Hebreo tawkquiztan. Nii coch muytata pjijska kjuyallanaca želatča.

³ Jalla nekzi wacchi laanaca želatča, zuranaca, zuch žoñinaca, ana tsijtñinaca. Nii laa žoñinacaqui kjaz kizkiz tjewznatča.

⁴ Awiz awizaqui tsjii anjilaqui nii cochquiz tjoñičha kjaz tjarñi. Jalla nuž nii kjaz tjarnan, primera kjazquiz luzzi žoñiqui žejtchi cjisñitača, čjul laaquiztanami.

⁵ Tsjii laa žoñiqui quinsa tunc quinsakalcun wata laa želatča.

⁶ Jesusaqui nii laa žoñi cherchiča. Nekztan Jesusaqui zizzi cjissiča, nii žoñi ažk watanaca laachitača, nii. Jalla nuž zizcu nii laa žoñžquiz pewczyča tuž cjican:

—¿Žejtchi cjissim pecya?

⁷ Nii laa žoñiqui kjaaziča tuž cjican:

—Señor, anaž jecmi tii kjaz tjarnan wejr luzkatñi žejlča. Luz pecučha, pero yekjakaz wejt tuqui luzza, tii kjazquizqui.

⁸ Nekztanaqui Jesusaqui nižquiz cjichiča:

—Zaazna, am tjajz zquti apta, ojklaya.

⁹ Jalla nii orapacha žejtchi cjissiča. Niiž tjajz zquti aptižcu ojkchiča. Jeejz tjuñquiz nii čjetintaqui watchičha.

¹⁰ Jalla nižtiquiztan judío žoñinacaqui nii čjetinta žoñžquiz tuž chiižinčiča:

—Jeejz tjuñquiziqui, anača tjajz zquti joojooz cjitaqui. Li quintrala niiqui.

¹¹ Nii čjetinta žoñiqui tuž kjaaziča:

—Jalla nii wejr čjetiñi žoñiqui wejr mantichiča, tuž cjican: “Tjajz zquti aptižcu, oka”. Jalla nuž cjichiča.

¹² Nii judío žoñinacaqui pewczyča tuž cjican:

—¿Ject amquiz nuž cjichejo, “Tjajz zquti aptižcu oka”, cjicanajo?

¹³ Jesusaqui nii oraqui walja nekz žejlñi žoñinacž tayıquiztan katchičha. Jalla nižtiquiztan nii žoñiqui ana pajchiča, ject nii čjetinčhaja, jalla nii.

¹⁴ Niiž wiruñ Jesusaqui nii laaquiztan žejtchi žoñžtan zalchiča timpluquin. Nekztan nižquiz cjichiča:

—Jila, amqui žejtchamča. Jaziqui ana wilta uj paaquiča. Uj paaquiž niiqui, amquiz juc'ant anawalim cjisnasača.

¹⁵ Jalla nekztanaqui nii žoñiqui judío žoñinacžquin mazñi ojkchiča, Jesusača nii čjetiñi žoñiqui, jalla nii mazziča.

¹⁶ Nii Jesusaž nižta jeejz tjuñquiz čjetintiquiztan judío žoñinacaqui Jesusiž quintra cjissiča; conz pecatča.

¹⁷ Ninacžquiz Jesusaqui tuž cjichiča:

—Wejt Yooz Ejpqui tiraž langža, wejrmi nižtapachal langznuča.

¹⁸ Jalla nižta čhiitiquiztan nii judío žoñinacaqui juc'ant žawjchiča, nižaza juc'anti conz pecatča. Jesusaqui jeejz tjuñquiz ana permitta langz mantichiča, judío žoñinacž lii quintra. Nižaza “Yooz Ejpča wejt persun Ejpqui” cjican čhiichiča. Nuž cjican “Wejrmi Yooz zakaztča” cjichiča. Jalla nižtiquiztan nii judío žoñinacaqui Jesusiž quintra juc'anti aptichiča, conzjapa.

JESUCRISTUCHA YOOZ MAJCHQUI

¹⁹ Nižaza Jesusaqui tuž cjichiča:

—Ančucaquiz weraral chiyučha. Wejrtča Yooz Majchqui. Pero persun kuzcama anal paasača. Yooz Epiž tjaata obranacal paa-uča. Jaknužt Yooz Ejpqui obra paačhaja, jalla nužuzakaz wejr Yooz Majchqui obra paa-uča.

²⁰ Yooz Ejpqui wejr k'aachiča, nižaza tjapa niž paata obranacami wejtquiz tjeeža. Nižaza Yooz Ejpqui juc'anti pajk obranacaz tjeeznaquiča, ančhuc ispantichi cjeyajo.

²¹ Jaknužt Yooz Ejpqui ticzinaca jacatatskatčhaja, nižaza wilta žeti tjaačhaja, jalla nižta zakaz wejrqui žeti tjaača, wejt munañpicama.

²² Yooz Ejpqui persunpacha ana casticu tjaača. Pero wejtquiz tjapa niž mantiz poder intirjichiča castictu tjaačhaja.

²³ Jalla nuž intirjichiča, tjapa žoñinaca wejtquiz rispitažo, jaknužt Yooz Ejpžquin rispitchaja, jalla nuž. Jakziltat wejtquiz ana rispitchaja, jalla niiqui wejr cuchanžquiñi Yooz Ejpžquin ana zakaz rispitcha.

²⁴ 'Ančucaquiz weraral chiyuča. Jakziltat weriž chiita taku nonžcu tjapa kuztan catokčhaja, nižaza wejr cuchanžquiñižquiz kuz tjaačhaja, jalla niiqui Yooztan wiñaya kamča. Nižaza ana casticta cjequiča. Infiernuquin ojkñi jiczquiz eccu, arajpach ojkñi jiczquiz kamča, Yooztan wiñaya kamzjapa.

²⁵ Ančucaquiz weraral chiyuča. Tsjii timpu tjonča, nižaza anzimi nii timpuča. Anziqi ticzižtakaz kamñi žoñinacaqui wejt taku nonznaquiča. Jakziltat wejt taku nonžcu tjapa kuztan catokačhaja, jalla niiqui ew kamañchiz kamaquiča. Yooz Majchtča wejrqui.

²⁶ Yooz Ejpqui persunpacha žejtkatz poderchizza. Nižaza wejt Yooz Ejpqui nii poder wejtquiz intirjichiča.

²⁷ Wejrqui tsewtan cuchanžquita Yooz Zoñtča. Jalla nižtiquiztan Yooz Ejpqui pjalz puestuquiz wejr utchiča. Jaziqi arajpachquin kamzmi nižaza infiernuquin casticmi jalla nii mantiznaca wejtquiz intirjichiča.

²⁸ Tii weriž chiitiquiztan ana ispanta. Tsjii timpu tjonča. Jalla nii timpuquiz tjapa ticzinacaqui wejt joraž nonznaquiča. Nekztan sipulturniquiztanž žaaznaquiča.

²⁹ Zuma kamchinacaqui jacatataquiča Yooztan wiñaya kamzjapa. Ana zuma kamchinacazti jacatataquiča infiernuquin casticta cjisjapa.

YOOZ EJPZTAN YOOZ MAJCHTAN

³⁰ 'Wejrqui persun kuzquiztanac anal pjalznasača. Jaknužt wejt Yooz Ejp mantichaja, jalla niicamal pjalznuča. Anal wejt kuzquiztan pjalz pecuča. Antiz wejr cuchanžquiñiž kuzcama pjalz pecuča. Jalla nižtiquiztan weriž pjaltaqui lititumača.

³¹ Wejrkal persunpacha wejt favora chiyasaž niiqui, weriž chiita taku anaž walasača.

³² Pero yekja tisticu wejt favora žejlča. Jalla niiča Yooz Ejpqui. Niiž wejt puntuquiztan chiita takuqi werarapanča. Jalla nii zizuča.

³³ Ančucqui Juanžquin pewczñi cuchanžquichinčhucča wejt puntuquiztan. Niiž kjaaztaqui werarapanča.

³⁴ Zoñiž wejt favora werara chiiñiž cjenami, wejtquiz anaž ancha importiča. Yooz Ejpča wejt favora ultim werara chiiñiqui. Nuž cjiwča, ančuc wejtquiz criyajo, ančuc liwriita cjisjapa.

³⁵ Juanqui tsjii tjeezta lamparažtakaz kjanatča. Jalla nuž kjančan nii Juanqui wejt puntu kjanzt'ichiča. Nižaza tsjii upacamakaz niiž kjanquiz ančucqui cuntintu kamchiča.

³⁶ Juanqui wejt favora chiičiča. Pero tsjiiqui žejlča Juanžquiztan juc'anti. Jalla niiča Yooz Ejpqui. Niiqui wejt favora zakaz chiiča. Nižaza wejt Yooz Ejpqui wejr mantichiča obranaca cumplizjapa. Tii obranacquiztan wejr pajtapan cjesača, Yoozquiztan tjonchin, ana Yoozquiztan tjonchin, nii. Tii weriž paata obranaca kjanapacha tjeeža, Yooz Epiž wejr cuchanžquita, jalla nii.

³⁷ Wejr cuchanžquiñi Yooz Ejppacha wejt favora chiiča. Ančucqui niiž persun jora ana nonznasača nižaza niiž tsiti ana cherasača.

³⁸ Yooz Ejpqui wejr cuchanžquichiča. Pero ančucqui wejtquiz ana criiča. Jalla nižtiquiztan niiž takumi ančuca kuzquiz ana zakaz catokča.

³⁹ Ančucqui cjiirta Yooz taku ančaž istutiiča. Nekztan ančucqui tantiiča, "Yooz taku istutiichiž cjen wejrnacqui Yooztan wiñaya kamaka," cjančan. Pero nii cjiirta Yooz takunacaqui wejt puntuquiztanž chiiča.

⁴⁰ Jalla nuž istutiižcupacha, ančuczti anaž wejtquiz macjatz pecča, Yooz Ejpžtan wiñaya kamzjapaqui.

⁴¹ 'Zoñinacaž tjaata honora wejtquiz anaž importiča.

⁴² Ultimu ančucqui ana Yoozquin kuzzizčucča. Nii zizuča.

⁴³ Wejt Yooz Ejpž cuntiquiztan tjonchi cjenami, ančucqui anaž wejr criiča. Pero yekja zoñiqui persun kuzcama ančucaquiz tjonasaž niiqui, nižquiz criyasaž, jaz.

⁴⁴ Ančucqui ančucporaž honorchiz cjeyas pecča. Ančucqui Yooziž tjaata honorchiz cjisjapa anaž importiča. Jaziqumi, ¿jaknužt ančuc wejr criyasajo?

⁴⁵ Ančucqui Moisés liiquiz kuz tjaachiž cjen, pinsaquiča, Yooztan wiñaya kamaka, jalla nii. Pero nii Moisespacha ančuca ujnacaž tjeznaquiča, Yooz Ejpž yujcquiziqui. Anača wejrqui Yooz Ejpž yujcquiz ančuca ujnaca tjezniñtqui.

⁴⁶ Moisesqui wejt puntuquiztan cijrchiča. Jalla nižtiquiztan ančucqui Moisés cijrta criitasaž niiqui, wejtquiz zakaz criitasača.

⁴⁷ Ančucqui nii Moisés cijrtanaca ana criičaj niiqui, ¿jaknuž weriž chiitanaca criyasajo?

6

JESUSAQUI CHJERI TJAACHA

¹ Jalla nuž chiižcu Jesusaqui Galilea cjita kotž nawjctuñtan ojkchiča. Nii kotaqui Tiberias, cjitazakaztača.

² Walja zoñinacaqui nižquin apziča, milajrunaca paañi cheržcu nižaza laanaca čhjetinchi cheržcu.

³ Pero Jesusaqui tsjii curu yawchiča niž tjaajintanacžtan. Jalla nicju julziča.

⁴ Nii oraqumi judío zoñinacž pascua pjijzta žcatitača.

⁵ Acha waytižcu, Jesusaqui walja zoñinaca apžquiñi cherchiča. Nekztanaqui Felipžquiz paljaychiča, tuž cjican:

—¿Jakziquiztan lujlz čhjerinaca kjayžcaqui, tii tama zoñinacžquiz luli tjaazjapaya?

⁶ Jesusaqui nuž chiichiča Felipe yanzjapa, jaknužt kjaazñi, jalla nii. Nii ora Jesusa persun kuzquiz zizatča, jaknužt nii zoñinaca luli tjaachaja, jalla nii.

⁷ Nekztanaqui Felipiqui kjaaziča, tuž cjican:

—Paa patac pajk paaz walurchiz t'anta anaž alcansasača, zapa mayni zkoluccama lujlz cjenami.

⁸ Tsjii tjaajintaqui, Andrés, cjitatača, Simón Pedruž lajk. Jalla niiqui tuž cjichiča:

⁹ —Tekz tsjii uza žejlča, pjijska siwat t'antichiz, pizc ch'izziz. Pero ¿tama zoñinacžquiz wacas teejo?

¹⁰ Nekztanaqui Jesusaqui mantichiča:

—Tjappacha nii zoñinaca, julznajo.

Jalla nii yokaqui walja pastu yokatača. Nekziqumi tsjii pjijska warank luctak zoñinaca julziča.

¹¹ Jalla nekztanaqui Jesusaqui nii t'anta tanžcu, Yoozquin gracias cjican cjichiča. Nekztanaqui tjaajintanacžquin tjaachiča. Jalla nii tjaajintanacaqui partir paychiča nii julzi zoñinacžquiz. Nužzakaz nii pizc ch'iztan tojžcu, lujlkatchiča, jaknužt zapa mayni pecatčaja, jalla nuž.

¹² Jalla nuž nii zoñinacaž chjekchiž cjen, Jesusaqui niž tjaajintanaca mantichiča, tuž cjican:

—Nii žejtchi t'unanaca ricuja, ana čhjulumi pertita cjeyajo.

¹³ Nekztanaqui zoñinacaž lujlz žeržtan, niž tjaajintanacaqui nii pjijska siwat t'antiquiztan žejtchinaca ricujchiča. Tuncapan canasta chjippi ricujchiča.

¹⁴ Nekz žejlñi zoñinacaqui Jesusiž paata milajru cheržcu, tuž cjichiča:

—Chekapani, tiikalala nii tjonñi profetaqui.

¹⁵ Jesusaqui ninacž kuzquiz naychiča. Ninacaqui Jesusa pgorzaž majkz pecatča, ninacž chawc jiliri cjeajajo. Jalla nižtiquiztan Jesusaqui ninacžquiztan zarakžcu cur punt kjutni yawchiča, zina žejlzjapa.

JESUSAQUI KJAZ JUNTUÑ OJKCHA

¹⁶ Tjuñiž kattan niž tjaajinta žoñinacaqui kot atquin chjijwžquichiča.

¹⁷ Nii curquiztan chjijwžcu warcuquiz luzziča, Capernaum watja irantizjapa. Jalla nekztanaqui kotquiz oki kallantichiča. Ween zumchitača. Jesusaqui imapanž ninacžquin tjonatča.

¹⁸ Kotquiz okan tsjii pjursant tjamiqi tjamžquichiča. Jalla nižtiquiztan kjaz ljojki-nacaqui waljaž ljojkinžquichiča.

¹⁹ Tsjii tupu zkoluc jilalla ojkchiž cjen, ninacaqui Jesusaž warcuquin žcatžinžquiñi cherchiča. Jesusaqui kjazuntuñ tjonatča. Pero Jesusižquiz ana pajatča nii zumchiquiz cjen. Jalla nekztan ninacaqui ancha tsucchiča.

²⁰ Nekztan Jesusaqui ninacžquiz tuž cjichiča:

—Werjtča. Anača tsuca.

²¹ Jalla nuž chiitiquiztan ninacaqui Jesusa warcuquiz cuntintu luzkatchiča. Kot taypiquiztača. Pero nii ratupacha kot atquin cjissiča, jakzi wajtquin okatčaja, jalla nicju.

ZOÑINACAQUI JESUSA KJURCHA

²² Jakatažuqui nii kotž nawjctuñtan ecta žoñinacaqui Jesusa ana cherchiča. Zezcu zeztan tsjii warcukaz želatča. Jesusaqui warcuquiz ana luzziča. Niiž tjaajinta žoñinacakaz warcuquiz ojkchiča. Pero jakziquin Jesusaqui želatčaja, ana zizziča nii ecta žoñinacaqui.

²³ Nekztan yekja warcunacaqui irantižquichiča Tiberias cjita wajtquiztan. Jakzi-quin nii žoñinaca t'anta lujlchižlaja, jalla nicju irantižquichiča. Ima lujlkatcan, Jesús Jiliriqui Yoozquin parličiča gracias cjican.

²⁴ Nekzi ecta žoñinacaqui Jesusami niž tjaajintanacami ana nekz cheržcu warcunac-quiz luzziča. Capernaum watja ojkchiča Jesusa kjuri.

JESUCRISTUZ CHIITA TAKU

²⁵ Kot tsjii latuquin irantižcu, žoñinacaqui Jesusižtan zalchiča. Jalla nuž zalžcu nižquiz pewcziča tuž cjican:

—Tjaajiñi Maestro, ¿čhjulora tekz irantižquichamtajo?

²⁶ Jesusaqui ninacžquiz tuž kjaaziča:

—Ančhucaquiz ultim weraral chiižinuča. Zezcu ančhucqui t'anta lujlchinčucča chjekjañcama. Jalla nižtiquiztanž ančhucqui wejr kjurča. Werič paata milajru anaž intintazza ančhucqui. Jalla niž intintaztasaz niiqui anaž wejr kjurtasača čheri lujlzapakaz. Antiz wejr kjurtasača, Yooz puntu tsjan zizjapa.

²⁷ Anača miranzni čherquinaqui kuz tjaazqui. Tsjii ratujapakazza niiqui. Antis ana miranzni Yooz čherquiñča kuz tjaa. Yooz Ejpžtan wiñaya kamzjapača niiqui. Nii Yooz čheriqui wejrqui ančhucaquiz tjaasača. Yooz Ejpqui niijapa wejr utchipanča. Wejrqui tsewctan cuchanžquita Yooz Zoñtča.

²⁸ Jalla nekztanaqui nii žoñinacaqui pewcziča tuž cjican:

—¿čhjululu obranacat paaz waquisasaya, Yooz munañpa cumplisjapaya?

²⁹ Jesusaqui ninacžquiz kjaaziča, tuž cjican:

—Yooz cuchanžquita Zoñžquiz kuz tjaa; nižquiz criya. Jalla niiča Yooz munañpaqui.

³⁰ Nekztanaqui ninacaqui cjichiča:

—¿Amqui čhjul milajrum tjeeznas, wejrnac cherzjapajo? Nekztan amquin criyasača. ¿čhjul obram paa-as?

³¹ Učhum tuquita atchi ejpnacaqui ch'ekti yokquin maná cjita čhjeri lujlchiča. Nižaza nii puntuquiztan Yooz tawk libruquiz tuž cjijrtača: “Moisesqui ninacžquiz arajpachquiztan tjonñi čhjeri tjaachiča”.

³² Jalla nuž chiitiquiztan Jesusaqui tuž kjaaziča:

—Ančucaquiz ultim weraral chiižinuča. Moisesqui ančuca atchi ejpnacžquiz čhjeri tjaachiča. Pero Moisesqui anača tjaachiqui ultim werar arajpach t'anta čhjeriqui. Wejt Yooz Ejpča ultim werar arajpach t'anta čhjeri tjaachiqui.

³³ Jalla nii Yooziž tjaata t'antaqui arajpachquiztan chjijwžquichiča. Jalla niiča tii muntuquiz žejlñi žoñinacžquiz arajpach žeti tjaañiqui.

³⁴ Nekztanaqui ninacaqui Jesusižquiz cjichiča:

—Señor, nii t'anta chjeri panž tjaalla.

³⁵ Jalla nekztanaqui Jesusaqui tuž cjichiča:

—Wejrtča arajpach žeti tjaañi t'antitqui. Jequit wejtquin tjonachaja jalla niiqui ana wira čhjeri eeczñiz cjequiča; nižaza jequit wejtquiz criyačhaja, jalla niiqui ana wira kjaz kjara pasñiz cjequiča.

³⁶ Tuqui wejrqui ančucaquiz chiichinča, “Ančhucqui wejr cheržcumi wejtquiz ana criichinčhucča”.

³⁷ Yooz Ejpqui wejt mantuquiz cjisjapa žoñinaca intirjichiča. Tjapa nii intirjita žoñinacaqui wejtquiz tjonachiča. Nižaza jakziltat wejtquiz tjonachaja, jalla niiqui ana weriž čhjatkataž cjequiča.

³⁸ Wejrqui arajpachquiztan ana wejt persun kuzcama payi tjonchinča. Antiz wejrqui wejr cuchanzquini Yooz Ejpž kuzcama payi tjonchinča.

³⁹ Jalla tiiča wejt Yooz Ejpž kuzqui. Niiž kuz tuž pecča, wejr ana zinta niiž intirjita žoñinaca pertiskatajo, nižaza ninaca jacatatskatajo.

⁴⁰ Nižaza tiiča wejt Yooz Ejpž kuzqui. Niiž kuz tuž zakaz pecča, jequit wejr pajachaja, nižaza wejtquin criyačhaja, jalla niiqui Yooztan wiñaya kamaquiča. Nižaza wejrqui ninaca ticziquiztan jacatatskatača ultim juyzu pjalz tjuñquiziqui. Jalla nužuča wejt Yooz Ejpž kuzqui.

⁴¹ Tuqui Jesusaqui chiichiča, tuž cjican:

—Wejrtča arajpachquiztan tjonchi t'antitqui. Jalla nii chiitiquiztan judío žoñinacaqui niiž quintra chutchiča.

⁴² Ninacaqui cjichiča:

—¿Anaj tii Jesusac Jus maatejo? Učhumqui niiž maa ejpžquič pajla. ¿Kjaž tiizti “Arjapachquiztan tjonchinča” cjican chiyasajo?

⁴³ Jalla nekztanaqui Jesusaqui ninacžquiz cjichiča:

—Ančhucqui anaž nuž wejt quintra chucha.

⁴⁴ Yooz Ejpqui wejr cuchanzquichiča. Nižaza niiča wejtquiz macjatskatñiqui. Jakziltat wejt Epiž macjatskatta cječhaj niiqui jalla ninacakaz wejtquiz tjonasača. Anažlaj wejt Epiž macjatskatžquitaqui, wejtquiz anaž tjonasača. Nižaza jacatatz tjuñquiziqui wejtquiz criichinacaqui jacatatskatača, ninaca Yooztan wiñaya kamzjapa.

⁴⁵ Profetanacaqui tuqitan tuž cjijrchiča: “Yoozqui tjapa niiž partir žoñinacžquiz tjajnaquiča”. Jalla nižtiquiztan jequit wejt Epiž tjajinta nonžaja, nižaza catokčhaja, jalla niiqui wejtquiz tjonča, nižazaž criiča.

⁴⁶ Jalla nuž wejt Yooz Epiž tjajinta cjenami, anaž jecmi persun čhjujčztan Yooz Ejp cherchiqui. Wejr alajača Yooz Ejp cherchintqui. Wejrqui Yooz Ejpžquiztan tjonchinča.

⁴⁷ Ančucaquiz ultim weraral chiyuča. Jequit wejtquiz criyačhaja, jalla niiqui Yooztan wiñaya kamča; nižaza arajpachquin žejtñiz cjequiča.

⁴⁸ Wejrtča arajpach žeti tjaañi t'antitqui.

49 Ančuca tuquita atchi ejpnacaqui ch'ekti yokquin maná cjita t'anta lujlchiča. Pero nii t'anta lujlchiž cjenami, ninacaqui ticzizakazza.

50 Wejrtča arajpachquiztan tjonchi t'antitqui. Jequit wejt t'antiquiztan lulačhaja, jalla niiqui Yooztan wiñaya kamaquiča; arajpachquin žejtñiž cjequiča.

51 Wejrqui arajpachquiztan tjonchinča. Jaziqui wejrpanča žeti tjaañi t'antitqui. Jequit tii t'antiquiztan lulačhaja, jalla niiqui Yooztan čica wiñaya kamaquiča. Tii wejt curpuqui t'anta cuntača. Wejt curpuqui tjaa-ača, tii muntuquiz žejlñi žoñinaca Yooztan wiñaya kamajo.

52 Jalla nuž čhiitiquiztanaqui nii judío žoñinacaqui ninacpora ch'aazi kallantichiča, tuž cjican:

—¿Kjaž tiiž persun curpu učum lulajo tjaasajo?

53 Jesusaqui nekztanaqui cjichiča:

—Ančucaquiz weraral chiyuča. Jequit ančucaquiztan wejt curpu ana lulačhaj niiqui, nižaza wejt ljoc ana licačhaj niiqui, jalla niiqui anapanž ultimu arajpach žejtz wirchiz cjesača. Anapan Yooztan wiñaya kamasacha.

54 Jequit wejt curpu lulačhaj niiqui, nižaza wejt ljoc licačhaj niiqui, jalla niiča Yooztan čica wiñaya kamñiqui. Nižaza nii žoñinacaqui tsjii tjonz tjuñquiziqui weriž jacatatskattaž cjequiča, Yooztan wiñaya kamzjapa.

55 Wejt curpuqui ultimu arajpachquin žejtkatñi čheriča. Nižaza wejt ljocča ultimu arajpachquin žejtzjapa liczqui.

56 Jequit wejt žejtkatñi curpu lujlčhaja, nižaza wejt žejtkatñi ljoc licčhaja, jalla ninacača wejtan tsjii kuzzizqui. Nižaza wejrtča ninacžtan tsjii kuzzizqui.

57 Wejr cuchanzquiñi Yooz Ejpča arajpach žejtñi kamañchizqui. Wejrmi niž cjen arajpach žejtñi kamañchiztča. Nižaza jequit wejtquiztan lujlčhaja, jalla niiča weriž cjen arajpach žejtñi kamañchizqui.

58 Wejrtča nii arajpachquiztan tjonchi t'antitqui. Jalla tii t'antaqui anača nii maná cjita t'anta irataqui. Nii maná t'anta lujlchiž cjenami, ančuca tuquita atchi ejpnacaqui ticziča. Jequit tii wejt t'anta lulačhaja, jalla niiqui arajpachquin wiñaya žetaquiča.

59 Jalla nuž Jesusaqui tjaajinčiča Capernaum wajtquiz ajcz kjuyquiz.

TSJII ŽOÑINACAQUI ANAZ CRIIČHA

60 Jalla nižta tjaajinta nonžcu walja nižquiz apžñinacaqui tuž cjichiča:

—Tii čhiitaqui ch'amača intintazqui. ¿Jequit tiiž tjaajintižquiz criyasajo?

61 Jesusaqui persun kuzquiz zizziča, tsjii apžñi žoñinacaqui niž čhiitiquiztan chutchiča jalla nii. Jalla nižtiquiztan tuž cjichiča:

—¿Tii čhiitiquiztan chuchya, wejtquiztan zarakz pecya?

62 Tuquiqui arajpachquin wejr želatča. Ančhucqui wejr wilita arajpachquin ojknī cheraquičz niiqui, nekztan žaknužt ančhuc cjeequi?

63 Tsjii žoñiqui animuž cjen žejtča. Niiž curpuqui curpukazza, ana wiñaya žejtñiča. Nižaza weriž čhiita takuqui ančuca animunaca arajpachquin žetñi cjiskatasacha, Yooztan wiñaya kamajo.

64 Yekjapanacaqui ančucaquiztan wejtquiz ana criiča.

Jesusaqui primirquiztanpacha zizziča, jequit nižquin ana criiči cječhaja, jalla nii Nižaza zizziča, jequit niž quintra tarazuna paačhaja, jalla nii.

65 Jalla nekztanaqui Jesusaqui tuž cjichiča:

—Wejrqui cjichinpanča, “Yooz Ejppankazza žoñinaca wejtquiz macjatskatñiqui, wejtquiz criizjapa. Jequit wejtquiz macjatžquichi cječhaja, jalla niiqui wejtquiz tjonča, nižaza criiča. Pero jequit ana macjatžquichi cječhaja, jalla niiqui anapan wejtquiz tjonasacha, criizjapa”.

⁶⁶ Jalla nekztanaqui walja nii apzñinacaqui Jesusižquiztan zarakchiča. Niižtan chica ana iya ojklaychiča.

⁶⁷ Nekztanaqui Jesusaqui niiž tuncapan tjaajintanaczquiz pewcziča, tuž cjican:

—¿Ančhuczakaz zarakz pecya?

⁶⁸ Nekztanaqui Simón Pedruqui kjaaziča, tuž cjican:

—Wejt Jiliri, ¿jecžquin wejrnac okasajo? ¿Yooz puntu tjaajinta cjisjapajo? Am taku-nacakazza werara tjaajintaqui, jaknužt Yooztan wiñaya kamčhaja, nii.

⁶⁹ Wejrnacqui amquiz criichinča. Nižaza zizñi cjissinča, amqui Yooz cuchanžquita Cristumpanča; wiñaya žejtñi Yooz Ejpž Maatimča.

⁷⁰ Jesusaqui nekztan tuž cjichiča:

—Wejrqui ančhuc illzinča, tuncapani. Jalla nižta cjenami tsjii ančhucaquiztan diabluž mantuquiz žejlča.

⁷¹ Jalla nuž chiican Jesusaqui Judas Iscariote, niiž puntuquiztan chiichiča. Simonž majhtača niiqui. Judasqui tuncapan illzta žoñinaczquiztanpachača. Niiqui tara-sunažcu, Jesusa intirjaquiča quintra žoñinacz kjarquiz.

7

JESUSIZ LAJKNACAQUI NIIŽQUIN ANA CRIICHA

¹ Jalla nekztanaqui Jesusaqui Galilea yokaran ojklaychiča. Judea yokquin ana ojklayz pecatča. Jalla nicju judío žoñinacaqui Jesusa conz pecatča.

² Nii timpuqui tsjii judío žoñinacz pjijztaqui žcatitača. Nii pjijzta paazjapa chjujlla kjuyanaca kjuychiča.

³ Jalla nižtiquiztan Jesusiž lajknacaqui niižquiz paljaychiča, tuž cjican:

—Ana tekz žela amqui. Judea yokquin oka. Jalla nicju am apzñinaca žejlča. Jalla ninaczquiz amiž paata obranaca cherskata.

⁴ Jakziltami žoñinaczquiz persun poder cherskatz pecčhaja, jalla niiqui anaž chjo-jzacuñ obranaca paača. Jaziqui amqui obranaca paaz poderchizzamžlaj niiqui, kjanapacham žoñinaczquiz tjeeznaquiča.

⁵ Jesusiž lajknacami ana niižquin criichiča.

⁶ Nekztan Jesusaqui ninaczquiz cjichiča:

—Ančhucqui čhjulorami pjijzta okasača. Wejt ojcz oraqui imaziča.

⁷ Tii muntuquiz žejlñi žoñinacaqui ančhucatan ana chjaawjkatasača. Wejttanzi chjaawjkatča. Wejrqui kjanapacha tjeeznuča ninacaž ana wali paatanaca. Jalla nižtiquiztan wejttan quintrača.

⁸ Ančhuckaz pjijzta oka. Wejrqui anal okasača. Wejt ojcz oraqui imaziča.

⁹ Jalla nuž chižcu, nii Galilea yokquin eclichiča.

JESUSAQUI PJIJZTA OJKCHICHA

¹⁰ Niiž lajknacaž pjijzta ojktanaqui Jesusaqui chjozacuñ ojckhizakazza, žoñinaca ana cherajo.

¹¹ Judío žoñinacazti Jesusa kjurchiča nii pjijzta paañi žoñinaczporquiz, tuž cjican:

—¿Jakziquin nii žoñi želasaya?

¹² Wacchi nii pjijztiquin žejlñi žoñinacaqui Jesusiž puntu parlatča. Yekjap žoñinacaqui cjetča: “Niiča zuma žoñiqui”. Yekjap žoñinacazti cjetča: “Niiča ana zuma žoñiqui. Žoñinaczquiz tsjii kjutñi tjaajincan incallñiča”.

¹³ Pero judío jilirinaca ekskcu, anaž jecmi Jesusiž favora cuza kjana parlatča, antiz jamazitž parlatča.

¹⁴ Pjijzta taypi cjisnan, Jesusaqui timpluquin luzcu tjaajinchiča.

¹⁵ Jesusaž nuž tjaajnan judío žoñinacaqui ispantichiča, tuž cjican:

—¿Kjaž tii žoñiqui zizñi zizñi tjaajnasajo, ana instutiižcojo?

¹⁶ Jalla nuž nii judío žoñinacaž parlitiquiztan Jesusaqui tuž kjaazičha:

—Weriž tjaajintaqui anačha wejt kuzquiztan jwesta. Antiz wejr cuchanžquiñiž kuzquiztan tjončha.

¹⁷ Jakziltat Yooz kuzcama kamz pecčhaj niiqui, nii žoñiqui zizaquičha, weriž tjaajintaqui Yoozquiztan tjonchičha, nii. Anačha wejt persun kuzquiztan tjonchiqui.

¹⁸ Jakziltat persun kuzcama tjaajinčhaja, jalla niiqui persun honorakaz waytiz pecčha. Pero wejrqui Yooz kuzcama tjaajnučha. Yooz Ejpqui wejr cuchanžquichičha. Jaziqui Yooz honora waytiz pecučha. Weriž tjaajintami kamtami Yooz kuzcama-pankazza. Werarapančha. Ana zinta toscara chiyasačha.

¹⁹ Moisesqui ančhucaltajapa lii ecchičha, žana jaa? Jalla nuž ecchiž cjenpacha, anaž jecmi ančhucacuziztan nii lii jaru kamchinčhucčha. Žkjažtiquiztan ančhucqui wejr conz pecjo, ančhucqui lii quintrajo?

²⁰ Jalla nižtiquiztan nii žoñinacaqui kjaazičha tuž cjican:

—Amqui zajraž tantamčha. Žject am conz pecjo?

²¹ Jesusaqui ninacžquiz kjaazičha tuž cjican:

—Tsjii pajk obra paachinčha jeejz tjuñquiz. Jalla nižta paatiquiztan ančhucqui ispan-tichinčhucčha. Pero weriž paata obra ana intintazzinčhucčha.

²² Nonžna. Moisesqui janchiquiz chimpuz cuzturumpi ančhucacuziz mantichičha. Primirquiztanpacha ančhucqui atchi ejpnacatačha nuž mantichiqui. Wiruñiqui Moisés zakaz nuž mantichičha, nii jaru. Jalla nižtiquiztan ančhucqui nii lii jaru žoñž janchiquiz chimputa cjiskatiñčhucčha, jeejz tjuñquizimi.

²³ Moisés lii rispittapanž cjisjapa, ančhucqui jeejz tjuñquiz cjenami žoñž janchiquiz chimputa cjisiñčhucčha. Jalla nižtiquiztan žkjažtiquiztan ančhucqui wejt quintra žawj-jo, weriž jeejz tjuñquiz žoñž curpu čhjetintiquiztanajo?

²⁴ Ančhucqui, Yooz kuzmi nižaza žoñž kuzmi ana zizcuqui, anačha uj jwez peczqui. Ujchiz jwez peccuqui zuma ujchiz jwezpančha.

ŽJAKZIZTAN TJONCHI JESUSAJO?

²⁵ Jalla nekztanaqui yekjap Jerusalén žejlñi žoñinacaqui pewczičha, tuž cjican:

—Tiičha nii conz pecta žoñi, žana jaa?

²⁶ Pero tekz žejl-la, anaž chjojzacuñ tjaajinla; kjanaž tjaajinla. Niiž quintra žoñinacaqui ana kjažmi cjila. Jaziqui, žjilirinacami pajkay, tiiqui Yooz cuchanžquita Cristokay? Anapanž cjesačha.

²⁷ Wejrnacqui zizučha, jakziquiztan tii žoñi tjonchižlaja, jalla nii. Pero Cristuž tjonžcuqui anaž jecmi zizaquičha jakziquiztan tjončhaja, jalla nii.

²⁸ Jalla nekztanaqui Jesusaqui timpluquin tjaajincan, alto tawkžtan tuž cjichičha:

—Ančhucqui cjiñchucčha, nii žoñi pajučha, nižaza jakziquiztan tjonchižlaja, nii. Ultimu ančhucqui wejr ana pajčha. Wejrqui persun kuzquiztan ana tjonchinčha. Antiz cuchanžquita tjonchinčha. Nii wejr cuchanžquiniqui zuma lujitumačha. Nižaza ančhucqui nii ana pajčha.

²⁹ Pero wejrqui niižquiztan tjonučha. Nižaza niiqui wejr cuchanžquichičha. Jalla nižtiquiztan wejrqui nii pajučha.

³⁰ Jalla nižta chiitiquiztan ninacaqui preso tanz pecatčha. Jesusiž preso tanta cjis oraqui imazitačha. Jalla nižtiquiztan ana jakziltami tanzñi atchičha.

³¹ Jalla nuž tanz pecñi žoñinaca želanami walja žoñinacaqui Jesusižquin criichičha. Nii criichinacaqui tuž cjichičha:

—Yooz cuchanžquita Cristo tjonžcuqui, žtii žoñžquiztan juc'ant cuza milajrunaca paasajo?

ZULTATUNACA CUCHANTA

³² Jalla nekztanaqui fariseo žoñinacaqui Jesusiž puntu chiitanaca nonžcu, ninacaqui timplu jilirinacžtanpacha Jesusa preso tani zultatunaca cuchanžquichiča.

³³ Jalla nižtiquiztan Jesusaqui cjichiča:

—Wejrqui tsjii kjaž jizkal ančucatan želača, jalla nekztan wejr cuchanžquiñizquin quepača.

³⁴ Jalla nekztan ančucqui wejr kjuraquiča. Jalla nuž kjurcan anaž wejr wachi ataquiča. Nižaza ančucqui anaž oki atasača, jakziquint wejr želačaja, jalla nicju.

³⁵ Jalla nekztanaqui nii judío žoñinacaqui ninacpora pewcsassiča, tuž cjican:

—¿Jakziquint tii okas, ana watžta cjisjapajo? ¿Yekja yokquin kamñi judío žoñinacžquin nižaza nekž žejlñi žoñinacžquin okas teejo, ninacžquin tjaajinzjapajo?

³⁶ ¿Čhjulut tiiž chiitac cjes? “Ančucqui wejr kjuraquiča, pero wejr ana wachi ataquiča”, cjican. Nižaza “Ančucqui anaž oki atasača, jakziquint wejr želačaja, jalla nicju” cjican. Jalla nuž chiyanaqui, ¿čhjulut cjes?

³⁷ Jalla nekztanaqui pjijzta tucužinž tjuñquiziqui wali chawc tjuñitača. Jalla nii tjuñquiziqui Jesusaqui tsijtsu, alto tawkžtan paljaychiča:

—Jakzilat kjaz kjara passaja, jalla niiqui wejtquiz macjatžca, wejt wiñaya žejtkatñi kjaz liczjapa.

³⁸ Jequit wejtquiz criyačaja, jalla niiz kuzquiztan walja zumanaca ulnaquiča jaknužt tsjii zuma jalzurquiztan zuma kjaznaca ulančaja, jalla nižta. Jalla nuž Yooz tawk libruquiz cijrtača.

³⁹ Jalla nuž chiican Jesusaqui Espíritu Santuž puntuquiztan chiichiča. Wiruñaquei Yooz Espíritu Santuqui Jesusižquiz criichinacž kuzquiz luzaquiča. Pero Jesusaqui imaž ticznatča, nižaza imaž tsewc arajpacha okatča. Jalla nižtiquiztan imazitača Espíritu Santo tjaataqui.

CRISTUZ PUNTU PARLITA

⁴⁰ Jalla nuž Jesusaž chiita nonžcu yekjap žoñinacaqui cjichiča:

—Chekapan tiiča nii tjonñi profetaqui.

⁴¹ Yekjapazti tuž cjichiča:

—Tiiča Yooziž cuchanžquita Cristuqui.

Yekjapanacaqui cjichiča:

—¿Kjaž Galilea žoñinacžquiztan Cristuc nasasajo? Anaž cjesača.

⁴² “Cristuqui Davidž majchmajtquiztan naspanča, nižaza Belén cjita wajtquin nasaquiča. Nii watjaqui Davidž watja cjitača”. Jalla nuž cjiča Yooz takuqui.

⁴³ Jalla nuž parližcu nii žoñinacaqui t'aka t'aka cjissiča, Cristuž puntuquiztan ch'aazcu.

⁴⁴ Yekjapanacaqui Jesusa preso tanz pecatča. Jalla nuž peccanami, ana jaknužumi payi atchiča.

⁴⁵ Timplu zultatunacaqui timplu jilirinacžquinami fariseonacžquinami quejpchiča, ana Jesusa preso tani atžcu. Nii jilirinacaqui zultatunacžquiz cjichiča:

—¿Kjažtiquiztan ančuc nii ana zjijcjo?

⁴⁶ Nii žultatunacaqui kjaaziča, tuž cjican:

—Anaž jecmi chiiča, jaknužt nii žoñi chiyatčaja, jalla nužuqui. ¿Yooziž cuchanžquita nii žoñejo?

⁴⁷ Jalla nekztanaqui fariseo žoñinacaqui tuž cjichiča:

—¿Ančuczakaz incallskatchinčucz, jaz?

⁴⁸ Tjapa učum jilirinacami nižaza tjapa fariseo žoñinacami nižquinaqui ana cri-ichipanla.

⁴⁹ Tii ana lii pajñi žoñinacaqui, jalla ninacakazza nižquin criichiqui. Ninacaqui Yooziž castictapanž cjequiča.

⁵⁰ Nicodemo cjitatacha tsjiiqui ninaczquiztan. Tuquiqui ween chjozacuñ Jesusižquin zina ojkchiča. Jalla niiqui ninaczquiz cjichiča:

⁵¹ —Učhum liiqui tuž cjiča, “Tsjii žoñiqui ima casticta cjican, primero kjawžta cjequiča, niž persun razuna nonžta cjisjapa”. Nuž cjiča učhum liiqui, ¿ana jaa?

⁵² Nekztanaqui ninacaqui kjaaziča tuž cjican:

—¿Am zakaz Galileaquiztanajo? Yooz taku istutiya. Anaž jec profetaqui Galileaquiztan tjonasača. Jazim zizaquič, jaz.

⁵³ Jalla nekztanaqui tjappacha persun kjuya ojkchiča.

8

ADULTERIUQUIZ OJKLAYŃI ZON

¹ Jesusaqui Olivos cjita curulla ojkchiča.

² Jakatažugui kjantati timpluquin quejpžquichiča. Tjapa nekz žejlñi žoñinacaqui nižquin tjonchiča. Jesusaqui julžcu wilta tjajinchiča.

³ Jalla nuž julzi tjajnan, lii tjajinacami fariseonacami tsjaa maatak zon zjijcchiča. Jalla naa maatak žonqui adulterio paachiž cjen tanstkalča. Žoñinacaqui jalla nuž tanžcu naa maatak žon Jesusiž yujcquiz zjijcchiča. Nižaza nii žejlñi žoñinacz taypiquiz tsijtskatchiča naa žonqui.

⁴ Nekztanaqui ninacaqui Jesusižquiz tuž paljaychiča:

—Tjaajiñi Maestro, taa maatak žonqui adulterio paañipacha tanassinča.

⁵ Moisés liiquiz tuž mantitača, “Tižta adulteriuquiz cjicjiñi žoñinacaqui čhajc jawi conz cjitača”. Am, ¿kjažum cjiy?

⁶ Jalla ninacaqui nuž paljaychiča, Jesusa kjaz cjiñit cjes, jalla nii zizjapa. Nižaza Jesusiž chiitiquiztan ujchiz jwez pecatča, niž quintra tsjii uj tjojtunzjapa. Jalla nekztanaqui Jesusaqui pachpiquiz colžcu yokquiz cijri kallantichiča, niž loc'anžtan.

⁷ Pero ninacaqui tirapanž Jesusižquiz pewcnatča, “Am, ¿kjažum cjii?” cjican. Jalla nekztan Jesusaqui zumpacha acha waytižcu, ninaczquiz cjichiča:

—Ančhucaquiztan jakziltapirižlaj ana ujchiz, niiqui primiru taa maatak žonaquiz maztan čhajczkazza.

⁸ Jalla nuž chiižcu wilta colžcu yokquiz tira cijjratča.

⁹ Jalla nuž Jesusiž chiitiquiztan nii žoñinacaqui persun ujquiztan sint'ichiča. Nekztanaqui mayat mayat ch'uju ulñi kallantichiča. Chawc žoñinacz primiraqui ulanchiqui. Nekztan tjappacha nii žoñinacz ulantan, Jesusaqui naa maatak žonatan, nuž pucultankaz, eclichiča.

¹⁰ Jalla nekztanaqui Jesusaqui wilta acha waytichiča. Anaž jecmi želatča. Naa maataka alajakaztača. Nekztan naaquiz cjichiča:

—Cullaca. ¿Jakziquin amquiz uj tjojtunñi žoñinacajo? ¿Ana jakziltami am castiqui atchikaya?

¹¹ Naa maatak žonqui cjichinča:

—Wejt Jiliri, anaž jakziltami wejr castiqui atchiča.

Nekztanaqui Jesusaqui naaquiz cjichiča:

—Wejrmi anal am ujquiztan casticača. Jaziqui oka amqui, anam iya uj paaquiča. —Nuž pertunchiča Jesusaqui.

KJANAZTAKAZ JESUCRISTO

¹² Wiruñaquí Jesusaqui žoñinaczquiz wilta paljaychiča, tuž cjican:

—Wejrqui tii muntuquiz žejlñi žoñinaczquiz zuma kamaña tjeeznuča, tsjii kjanažtakaz. Jakziltat wejt kamañ jaru kamačhaja, jalla niiqui anawal zumchiquiz anaž kamaquiča. Nižaza nii zuma kamañchiz žoñinacača wiñaya Yooztan kamñinacaqui.

¹³ Jalla nekztanaqui nii fariseo žoñinacaqui cjichiča:

—Am alaja am persunjapa chiiča. Jalla nižtiquiztan anaž walča.

14 Jesusaqui kjaaziča, tuž cjican:

—Tii weriž chiitaqui wejt persunjapa cjenami walča. Wejrqui zizuča jakziquiztan tjontučhaja, nižaza jakzit wejr okačhaja, jalla nii. Anchuczti anaž nii zizza.

15 Ančhucqui zoñiž pinsita jarukaz wejtquiz uj tjojtz pecča. Pero wejt kuz ana zizza. Wejrzi anal nižta uj tjojtiiča.

16 Pero weril tsjii zoñžquiz “Uj paachamča” cjeež niiqui, wejrqui weraral chiyučha nii zoñiž uj paañiž cjen. Anal wejt kuzquiztankaz chiyučha. Wejr cuchanžquiñi Yooz Ejpž kuzcamakal wejrmi chiyučha. Wejrmi wejt Yooz Ejpmi tsjiikaz chiyučha.

17 Ančuca liiquiz tuž cjiirtača: “Pucultan tistic zoñinacaqui tsjiikaz chiyauiz niiqui ninacž chiitaqui walča”.

18 Wejrqui persun puntuquiztan chiyučha. Nižaza wejr cuchanžquiñi Yooz Ejpqui wejt puntuquiztan zakaz chiiča. Jaziqui weriž chiitaqui panž walča.

19 Jalla nekztanaqui ninacaqui Jesusižquin cjichiča:

—¿Jakziquint am Ejpjo?

Jesusaqui tuž kjaaziča:

—Ančhucqui wejr anaž ultimu pajča, nižaza wejt Ejpmi anaž pajča. Wejr ultimu pajchaj niiqui, wejt Ejp zakaz pajasacha.

20 Nuž tjaajincan Jesusaqui timpluquiz želatča. Jakziquin ofrenda utz cajanaca želatčhaja, jalla nekz želatča. Nuž želan, anaž jecmi Jesusa preso tanchiča. Jesusa preso tanta cjis oraqi imazitača.

JESUSA OJKZ PUNTU

21 Jalla nekztanaqui Jesusaqui wilta ninacžquiz cjichiča:

—Wejr okača. Jalla nekztanaqui ančhucqui wejr kjuraquiča. Pero jakziquint wejr okačhaja, jalla nicju ančhucqui anaž oki atasacha. Ančhucqui ticznaquiča persun ujquiztan ana pertunta.

22 Nekztanaqui nii judío zoñinacaqui cjichiča:

—Tiiqui chiiča, “Jakziquint wejr okačhaja, jalla nicju ančhucqui ana oki atasacha”, cjicanž chiiča. ¿Tiiqui persunpacha curpu conasaya?

23 Nekztanaqui Jesusaqui tuž cjichiča:

—Ančhucqui tii kozta yokchiz zoñčuckazza. Wejrzi tsewcta yokchiz zoñtča. Ančhucqui tii yokquiz žejlñi zoñž kuzcama kamiñčucča. Wejrzi ana tii yokquiz žejlñi zoñž kuzcama kamiñča.

24 Jalla nižtiquiztan wejrqui ančucaquiz chiichinča, ančhucqui ticznaquiča, persun ujquiztan ana pertunta. Ultimupan ančhucqui weriž chiitaqui ana catokaquiz niiqui, ticznaquiča, persun ujquiztan ana pertunta.

25 Jalla nekztanaqui ninacaqui pewcziča, tuž cjican:

—¿Jequimt amjo?

Jesusaqui tuž kjaaziča:

—Jaknužt wejt persun puntuquiztan chiintčhalaja, jalla nižta zoñtpanča wejrqui.

26 Ančuca puntuquiztan wejtta walja chiiz žejlča, ančuca uj tjeezjapa. Pero wejt chiizqui anača wejt kuzquiztanqui. Antiz wejr cuchanžquiñiž kuzcamapankazza. Wejr cuchanžquiñiwerara chiiñipanča. Wejrqui nižžquiztan nonžtanaca maznuča tii muntuquiz žejlñi zoñinacžquiz. Jalla nižtiquiztan weriž chiitaqui ančuca puntuquiztan ultim werarača. —Jalla nuž chiichiča Jesusaqui.

27 Jalla nuž Yooz Ejpž puntuquiztan chiyauiz, nii judío zoñinacaqui ana intintazziča.

28 Jalla nekztan Jesusaqui cjichiča:

—Wejrqui tsewctan cuchanžquita Yooz Zoñtcha. Chjulorat ančhucqui wejr tsewcchuc waytita cheračhaja, jalla nii ora ančhucqui zizaquiča, werarača wejt persun puntuquiztan chiitaqui, nii. Wejrqui anal wejt persun kuzquiztan kamuča. Antiz wejt Yooz Epiž kuzcama kamuča. Wejt waytiz oraqui jalla niizakaz zizaquiča.

²⁹ Wejr cuchanžquiñiqui wejttan chicaž žejlča. Wejrqui niiz kuzcamapan kamuča. Jalla nižtiquiztan wejt Ejpqui anaž wejr zina ecča.

³⁰ Jalla nuž Jesusiž chiitiquiztan muzpa žoñinacaqui niizquin criichiča.

LIWRIIZ PUNTU

³¹ Jalla nekztanaqui Jesusaqui niizquiz criichi judío žoñinacžquiz cjichiča:

—Ančhucqui weriž chiita tawkquiz tjapa kuztan tjurt'aquiž niiqui, ultim werara wejt partir žoñinaca cjequiča.

³² Nižaza Yooz takuča ultim weraraqui, nii zizaquiča. Jalla nuž werara zizcu liwriitaž cjequiča.

³³ Nii ana criichi judío žoñinacaqui Jesusižquiz kjaaziča, tuž cjican:

—Wejrnacqui Abrahamž majchmajtquiztan tjonińča. Jaziqui Yooz wajtchiz žoñinactča wejrnacqui. Yekjaž mantuquiz anaž wira žejlchinča. Amzti, ¿kjažtiquiztan chiichamta, “Ančhucqui liwriitaž cjequiča” cjicanajo?

³⁴ Jesusaqui ninacžquiz cjichiča:

—Ančhucquiz weraral chiyuča. Jakziltat uj paacan kamčhaja, jalla niiqui uż mantuquiz kamča.

³⁵ Tsji mantita piyunaqui patrunž kjuyquiz kamchi cjenami ultimu anaž nii kjuychiz famillž partiquiz želasača. Antiz nii famillž majchqui jalla niiča famillž partiquiz žejlñipanča.

³⁶ Jalla nižtiquiztan ančhucqui Yooz Majchiž liwriita cjequiž niiqui ultim werara liwriita cjequiča, Yooz kjuychiz famillquiz cjisjapaqui.

³⁷ Wejr zizuča, ančhucqui Abrahamž majchmajtquiztan tjonińchucča, nii. Pero jalla nuž cjenami, ančhucqui weriž chiitanaca anapan catokča. Jalla nižtiquiztan ančhucqui wejr konz pecča.

³⁸ Wejrqui chiyuča, wejt Yooz Epiž chiitanaca, jalla nii. Ančhuczi ančuca epiž chiita jaru paača.

³⁹ Ninacaqui tuž kjaaziča:

—Wejtnaca atchi ejpča Abrahamqui.

Pero Jesusaqui ninacžquiz cjichiča:

—Ančhucqui ultimu Abrahamž majchmajtčhuc cjičhaj niiqui, niiz kamta irataž kamčhani.

⁴⁰ Yoozquiztan nonžtanac jaru werara chiichinča. Jalla nuž werara chiitiquiztan ančhuczi wejr konz pecča. Abrahamqui ana nižta paachiča.

⁴¹ Ančhucqui persun epiž kamta irataž kamča.

Nekztanaqui ninacaqui cjichiča:

—Wejrnacqui anača adulteriuquiz kamñi maa ejpžquiztan tjoniñqui. Wejtnaca maa ejpnaca zizuča. Nižaza wejrnacqui tsji arajpach Ejpchizkazza. Yoozza niiqui.

⁴² Jesusaqui nekztan cjichiča:

—Ančuca ejpqui Yoozalaj niiqui, ančhucqui wejttan zuma munazitasacha. Wejrqui Yooz Ejpžquiztanča; niizquiztan tjonuča. Niiž pinsitiquiztan tekz tii muntuquiz želuča. Anal wejt kuzcamakaz tjonchinča. Wejt Yooz Ejpqui wejr cuchanžquichiča.

⁴³ ¿Kjažtiquiztan ančhucqui weriž chiitanaca ana intintazasajo? Ančhucqui weriž chiitanaca anapanž kuztan nonz pecča, nekztan.

⁴⁴ Ančuca ultim ejpqui diabluča. Niiž kuzcama kamz pequińchucča. Prim-irquiztanpacha niiča žoñi conñiqui. Nižaza diabluqui werara chiizquiztan ana juyzu

paañičha. Anapančha werar taku chiiñi niiqui. Niiž ana zum kuzcamapan toscar takunaca chiičha. Niipankazza toscara chiiñiqui. Nižaza niičha toscar chiiñinacz ejpqui.

⁴⁵ Wejrqui ančhucaquiz weraral chiyučha. Ančhuca diablu ejpchiz cjen, weriž werara chiitanaca ana criiñčhucčha.

⁴⁶ ¿Ject ančhucaquiztan tsjii weriž paata uj tjeesnasajo? Wejrqui Yooz taku werarapan chiyučha. ¿Kjažtiquiztan wira ana wejtquiz crii ančhucjo?

⁴⁷ Yooz partir žoñinacaqui Yooz takuž nonža. Ančhuczti anapančha Yooz partira. Jalla nižtiquiztan ančhucqui Yooz taku ana nonz pecčha.

IMA ABRAHAM ZELAN, JESUCRISTUQUI ZELATCHA

⁴⁸ Nekztan judío žoñinacaqui Jesusižquiz kjaazičha tuž cjan:

—Amqui anawal Samaria wajtchiz žoñimžlani. Zajraž tanta žoñimžlani. Nužupančha.

⁴⁹ Jesusaqui ninaczquiz tuž kjaazičha:

—Wejrqui anačha zajraž tantitqui. Wejt Yooz Ejpž honora waytučha. Ančhuczti wejr iñarcan wejtquiz anaž honora tjačha.

⁵⁰ Wejrqui persun honora ana waytiz pecučha. Tsjiiqui žejlčha. Jalla niičha wejt honora waytiz pecñiqui. Jalla niičha lijituma pjalzñiqui.

⁵¹ Wejrqui ančhucaquiz weraral chiyučha. Jequit weriž chiitacama kamčhaja, jalla niiqui ana ticzñiž cjequičha; Yooztan wiñaya kamaquičha.

⁵² Jalla nuž chiitiquiztan judío žoñinacaqui tuž kjaazičha:

—Jalla nuž amiž chiitiquiztan wejrnaacaqui zizzinčha, zajraž tantapanimkalal amqui. Abraham ticzičha; profetanacami ticzizakazza. Amzti cjičha, “Jequit weriž chiitacama kamčhaja, ana ticzñiž cjequičha”, nii.

⁵³ Amqui wejtnacaž ticzi Abraham ejpžquiztan tsjan jilirim cjes, ¿kjažtatajo? Yooztajapa chiiñi profet žoñinacami ticzičha. ¿Chjul žoñipanim amzt cjesajo?

⁵⁴ Jesusaqui tuž kjaazičha:

—Wejt persun honora waytaž niiqui, jalla nuž waytita honoraqui anaž walčha. Wejt Yooz Ejpčha wejt honora waytiñiqui. Jalla niiž puntu ančhucqui “Wejtnaca Yoozza” cjiñčhucčha.

⁵⁵ Ančhucqui nii Yoozqui anapan pajčha. Wejrkal nii pajučha. “Wejrqui Yooz Ejp anal pajučha”, cjesaž niiqui, wejrqui toscaral cjesačha, ančhuc irata. Yooz Ejp pajučha; nižaza niiž chiitacama kamučha.

⁵⁶ Tuquita atchi Abraham ejpqui wejt tjonž tjuñi nonžcu, walja cuntintutačha. Nižaza wejt tjonž tjuñi zizcu, walja chipchičha.

⁵⁷ Jalla nuž chiitiquiztan nii judío žoñinacaqui Jesusižquiz cjichičha:

—Amqui imazi pjijzka tunc watchizzam pero. ¿Jaknužt amzti Abraham pajcham cjesajo?

⁵⁸ Jesusaqui ninaczquiz tuž kjaazičha:

—Ančhucaquiz ultim weraral cjiwčha. Ima Abraham želan, wejrqui žejlchinčha.

⁵⁹ Jalla nuž chiitiquiztan judío žoñinacaqui maznaca aptichičha. Jesusa maztan čhajc pecatčha. Jesusazti chjojzičha. Nekztan timpluquiztan ulančičha. Nekz žejlñi žoñinacz taypiquiztan atipassičha.

9

ZUR ŽOÑI CHJETINTA

¹ Jalla nekztanaqui Jesusaqui jiczquiz ojkičha. Nii jicz latuquiz tsjii zur žoñi želatčha. Majttiquiztanpacha zuratačha.

² Jalla nii žoñi cheržcu Jesusiž tjaajinta žoñinacaqui pewczičha, tuž cjan:

—Tjaajiñi Maestro, ¿kjažtiquiztan zurapan majttata? ¿Niiž maa ejpž ujquiztan nižta zura majtta cjesaya? Už ¿persunž ujquiztan cjesaj?

³ Jesusaqui ninaczquiz tuž kjaazičha:

—Anaž niž persun ujquiztanami, nižaza anaž niž maa ejpž ujquiztanami zura majttatača. Antiz zura žejlča, niž zuržquiz Yooz obra tjeežta cjisjapa.

⁴ Jaknužt zoñinaca majiñ langzaja, jalla nižta irata wejrnacqui tii muntuquiz žejlcan langstanča. Wejt cuchanžquiñiz tjaata obranaca langstanča. Zumz timpu wajillača. Zumchi cjenacqui anaž jecmi langzuca.

⁵ Tii muntuquiz žejlcan wejrqui zoñinacžquiz Yooz zuma kamaña tjeeznuča, tsjii kjanažtakaz.

⁶ Jalla nuž chiižcu, Jesusaqui yokquiz tjujtzicha. Nekztan nii tjujtzta llawsa yok pjilžtan tjarziča. Jalla nii aptižcu nii zur zoñž čhujcquiz tjajlžinčiča.

⁷ Nekztanaqui nii zur zoñžquiz cjichiča:

—Siloé cjita coch paata kjazquin oka. Jalla nicju čhujcqui awjžca.

Siloé cjita tjuuqui “Cuchanžquita” cjiča ninacž tawkquiz. Jalla nekztanaqui nii zur zoñiqui ojkžcu čhujcqui awjziča. Nekztan cherñi cjissiča. Cherñi quejpžquichiča.

⁸ Jalla nekztan niž žcati kamñi zoñinacami nižaza nižquiz pajñi zoñinacami nii žejtchi cheržcu, tuž cjichiča:

—¿Anaj tiiqui nii paaz tomtomangzñi zoñiya? Tuquiqui julzi žejlñitala.

⁹ Yekjapanacaqui cjetča:

—Niipansala.

Yekjapac cjetča:

—Anapanž nii tiiqui. Nižtažtakazla, pero.

Pero nii žejtchi zoñipachača cjichiqui:

—Wejrpantča.

¹⁰ Jalla nekztanaqui nižquiz pewcunchiča:

—¿Kjažum am jazic cher, kjažtatajo?

¹¹ Niiqui ninacžquiz kjaaziča tuž cjican:

—Nii Jesusa cjita zoñiqui llawsiztan yok pjilžtan tjarziča. Jalla nuž tjaržcu wejt čhujcquiz tjajlžinčiča, tuž cjican: “Siloé cjita kjazquin oka. Jalla nicju ajunžca”. Jalla nekztanaqui ojkchinča wejrqui. Čhujcqui ajunžcu cherñi cjissinča.

¹² Jalla nekztanaqui nii žejtchi zoñžquiz pewczizakazza tuž cjican:

—¿Jakziquin nii zoñiya?

Niiqui tuž kjaaziča:

—Anal zizuča.

¹³ Jalla nekztanaqui jakatažuqui nii zurquiztan čhjetinta zoñiqui fariseo partinacžquin chjichtatača.

¹⁴ Jeejz tjuñquiz Jesusaqui nii milajru paachiča.

¹⁵ Fariseo zoñinacaqui nii zurquiztan čhjetinta zoñžquiz wilta pecunchiča, tuž cjican:

—¿Anziqui kjažtam cherya?

Nii zoñiqui tuž kjaaziča:

—Llawsiztan pjilžtan tjaržcu, wejt čhujcqui tjajlžinčiča. Jalla nekztan wejt čhujcqui ajunžcu, cherñi cjissinča. Jaziqui cheruča.

¹⁶ Tsjii fariseo zoñinacaqui nii Jesusižjapa quintra chiichiča, tuž cjican:

—Nii zoñiqui anaž Yooz partiquiztan cjesača. Niiqui ana jeejz tjuñimi rispitchila.

Yekjapazti cjetča:

—¿Kjažt ujchiz zoñiqui nižta milajrunaca paasajo? Anaž cjesača.

Jalla nižtiquiztan Jesusiž puntuquiztan t'aka t'aka cjissiča.

¹⁷ Jalla nuž t'aka t'aka cjiscu, wilta nii zurquiztan čhjetinta zoñžquiz pecunchiča, tuž cjican:

—¿Amqui kjažum cji, am čhujcqui čhjetiñi zoñž puntu?

Nii zoñiqui tuž kjaaziča:

—Wejrqui cjiwča, jalla niča Yooz cuntiquiztan chiiñi profet zoñipanqui.

18 Tuquiqui nii zoñiqui zuratacha, jaziqui cherñi cjissicha. Pero nii judío zoñinacaqui nii milajru ana criiz pecatcha. Jalla nekztan nii zoñž maa ejp kjawziča, pewczjapa.

19 Jalla tuž pewczicha:

—¿Tiic am majchkaya? ¿Tiic zurapan majttatakaya? ¿Kjažt tiizti cherñi cjesajo?

20 Nii maa ejpqui kjaaziča, tuž cjican:

—Tiipanča wejtnaca majchqui. Nižaza zurapan majttatača. Jalla niikal chiyasača.

21 Anziqui cherñi cjissizlani, jalla nii puntuquiztanaqui anal zizuča. Nižaza jecčhalaj tiiz čhujqui čhjetinchi anal zizuča. Tiika pewcnani. Pajk zoñiča tiiqui. Tiipachaž razunaqui tjaasača.

22 Nii judío zoñinacaqui tsjii acuerduquiz parlassitača, jakziltat Jesusiž puntuquiztan “Tiicha Cristuqui” cjican chiyachaja, jalla niiqui ajcz kjuyquiztan chjatkataž cjistanča. Jalla nii acuerduquiz parlassitača. Jalla nižtiquiztan nii zur zoñž maa ejpmi ekziča; ana kjanacama chiiz pecatcha.

23 Jalla nižtiquiztan ninacaqui kjaaziča, tuž cjican:

—Tiika pewcnani. Pajk zoñiča tiiqui.

24 Jalla nekztanaqui nii judío zoñinacaqui nii zurquiztan čhjetinta zoñi wilta kjawziča. Nekztan tuž cjichiča:

—Yooz honora wayta. Anača Jesusiž honora waytizqui. Wejrnaca zizuča, nii čhjetinñi cjita zoñiqui walja uj paañipanča.

25 Jalla nekztan nii zurquiztan čhjetinta zoñiqui tuž kjaaziča:

—Wejrqui anal zizuča, uj paañi ana uj paañi, nii. Pero wejrqui zuratača. Jaziqui cheruča. Jalla nužupan zizuča.

26 Wilta nižquin pecunchiča, tuž cjican:

—¿Jaknužt paachitajo? ¿Jaknužt am čhujqui čhjetintajo?

27 Nii zoñiqui tuž kjaaziča:

—Ančhucacuz chiichinsala. Weriž chiita ana nonz pecča. ¿Kjažtiquiztan wilta wilta wejr chiiyaj cjeejo? ¿Ančhucacakaz nižtan chica ojklayñi cjis pecjo?

28 Jalla nekztanaqui nii judío zoñinacaqui nii zurquiztan čhjetinta zoñžquiz ch'aanichiča tuž cjican:

—Amqui nii zoñž jaru ojkča. Wejrnaczi Moisés jaru okuča.

29 Yoozqui Moisesquiz chiichiča. Jalla nii zizuča. Tii zoñžquiztanaqui anal zizuča, jakziquiztan tjončhaja, jalla niimi.

30 Jalla nekztanaqui nii čhjetinta zoñiqui tuž cjichiča:

—Tiicha ispantichuca. Ančhucqui jakziquiztan tjončhaja, nii ana zizza. Wejtquiz pero čhujqui čhjetinžinchiča.

31 Učhumqui zizla. Yoozqui ujchiz zoñinacž mayiztaqui anaž nonznasača cjiča. Yooz rispitiñi zoñinacžquizimi nižaza Yooz kuzcama kamñi zoñinacžquizimi, jalla ni-nacžquiz nonznasača Yoozqui cjiča.

32 Anawira tsjii zur zoñž čhujqui čhjetinta quintu žejlñitala, tuquitanpachami.

33 Nii zoñiqui ana Yooz partiquiztanžlaj niiqui, ana čhjul pajk obrami paačhani.

34 Jalla nekztanaqui nii judionacaqui tuž cjichiča:

—Amqui ujchizpan majttamtača. ¿Jaziqui wejtnacaquiz tjaajinzim pec, kjažtatajo?

Jalla nekztan nii zurquiztan čhjetinta zoñi ajcz kjuyquiztan chjatkatchiča.

ZURANZ PUNTUQUIZTAN

35 Jalla nuž chjatkattiquiztan Jesusaqui zizziča. Jalla nekztan nii zoñžtan wilta zalžcu, tuž cjichiča:

—¿Tsewctan cuchanžquita Yooz Zoñžquizim criya?

36 Nii čhujqui čhjetinta zoñiqui tuž kjaaziča:

—Señor, maznalla, ¿ject niiqui? Wejrqui nižquin criyasača.

37 Jesusaqui nižquin kjaaziča, tuž cjican:

—Anziqum werim chercha. Niiča wejrtqui, amtan parliñtqui.

³⁸ Jalla nekztanaqui nii žoñiqui Jesusiž yujcquiz rispitan quillziča, tuž cjican:

—Wejt Jiliri. Amquiz criyuča.

³⁹ Jesusaqui nižquiz cjichiča:

—Wejrqui tii muntuquiz tjonchiča, žoñinaca pjalzjapa. Tsjii žoñinaca žejlča ana zuma kamañchiz. Pero ninacž ujquiztan kuz zint'iča, “ujchizpanča wejrqui” cjican. Wejrqui tjonchinča ninaca zuma kamañchiz cjiskatzjapa. Tsjii žoñinaca žejlča. Jalla ninacaqui ana zuma kamañchizakazza. Pero “Yooz puntu zuma zizuča” cjiñiča. Jalla nuž chiichiyanami ninacača zur žoñinacažtakaz. Jalla nii tjeezjapa, tii muntuquiz tjonchinča.

⁴⁰ Jesusaž nuž chiyan yekjap fariseo žoñinacaqui niž žcati želatča. Ninacaqui nii chiita nonžcu, pewcziča tuž cjican:

—¿Wejrnamci zur žoñinacažtakaz cjesajo? Anaž cjesača.

⁴¹ Jalla nekztanaqui Jesusaqui ninacžquiz tuž cjichiča:

—Ančhucqui persun kuzquiz zur žoñižtakaz naytasaj niiqui, ančhucqui anaž ančuca ujquiztan casticta cjitasača. Pero “Wejrnamqui Yooz puntu zuma zizuča” cjicanž chiila. Jalla nižtiquiztan ančuca ujquiztan casticta cjequiča.

10

UZANACZ QUINTU

¹ Jesusaqui zakaz cjichiča:

—Ančucaquiz weraral chiyuča. Jakziltat uuzi uyquiz ana zan kjutan luzzaja, yekja latuquiztan chjojzacuñ luzzaja, jalla niiča ana wal tjañiqui. Uzanaca kjañzjapa luzza.

² Pero jakziltat uuzi uy zanzquiztanpan luzzaja, jalla niiča uuzi itzñi awatiriqui.

³ Nižaza uy zana cwitiñi žoñiqui uy zana cjetžiñiča nii uuzi awatiri luzjapa. Nižaza nii uzanacaqui awatirž jora pajča. Nii awatiriqui uuzi tjuucu tjuucu kjawža, nižaza uyquiztan jwessa.

⁴ Jalla nuž tjapa niž uzanaca jwescu, niž uzanacž tucquinž ojkča. Nižaza nii uzanaca niž wirquiz apža, jora pajžcu.

⁵ Tsjii ana pajta žoñž wirquiziqui anaž apža, antiz nii ana pajta žoñžquiztan zajtča, niž jora ana pajžcu.

⁶ Jalla nuž Jesusaqui quint'ichiča. Pero nonžñi žoñinacasti ana wira intintazziča, čjul puntuquiztan chiichaja, jalla nii.

ZUMA AWATIRI

⁷ Jalla nekztanaqui Jesusaqui wilta ninacžquiz chiichiča, tuž cjican:

—Ančucaquiz weraral chiyuča. Wejrtča uuzi uy zantqui.

⁸ Ima weriž tjonan, žoñinacaqui tjonchiča, “Yoozquiztan tjonuča”, cjicanaqui. Pero tjañicamača tjapa nii tjonchi žoñinacaqui. Uuzi tjangžñinacača ninacaqui. Pero ninacž wirquiziqui wejt uzanacaqui ana apziča.

⁹ Wejrtča uuzi uy zantqui. Jakziltat weriž cjen Yooz jamillquiz luzzaja jalla niiqui liwriitaž cjequiča. Jalla niiqui Yooz uuzi cuntaž cjequiča. Uuzi uyquiz luznaquiča, zaž ulnaquiča, zuma pastu watzjapa. Liwriitapaž cjequiča.

¹⁰ Tjañi cjićiñi žoñinacaqui tjonča, cjišni, coni, nižaza tirkati, jalla nii alaja tjonča. Wejrti tjonchinča, zuma kamaña tjaazjapa, ančhuc anča zuma kamañchiz cjiskatzjapa.

¹¹ Wejrtča zuma awatirtqui. Tsjii zuma awatiriqui niž uzanacž laycu ticznasača.

¹² Pero yekjapanacaqui paca tanzjapakaz uuzi ichñiča. Jalla ninacaqui tsjii uuzi tanñi animalaž tjonan uuzi eccu zatasacha. Nii uuzi anača persun uzanaca. Jalla nuž uzanaca ectan nii anawal animala tjonchiqui uzanacaž tanča, nižaza witča. Anača nižta zuma awatiriqui.

¹³ Nii anawal awatiriqui paca tanzjapakaz uuzi ichñiicha. Ana nii uuzanacžjapa juyzu paañiicha, čhjulunacat watačhaja, jalla nii. Jalla nižtiquiztan uuzanaca eccu, anawal animalquiztan zatasacha.

¹⁴⁻¹⁵ Wejrtča zuma awatirtqui. Jaknužt wejt Yooz Ejpqui wejtquiz pajčhaja, nižaza wejrmi wejt Ejpžquiz pajučhaja, jalla nižtača wejrqui wejt uuzanacžquiz pajuča, nižaza wejt uuzanacaqui wejtquiz pajča. Wejrqui wejt uuzanacž laycu ticznača.

¹⁶ Wejtta zakaz žejlča yekja uuzanaca ana tii uyquiz cjiñiqui. Wejrqui nii uuzanaca ricujzquiztanzakaztča. Jalla ninacaqui wejt taku cazaquiča. Tjapa wejt uuzanacaqui tsjii tamaž cjequiča, nižaza tsjii awatirchiz.

¹⁷ Wejt uuzanacž laycu ticznača, nižaza jacatatača. Jalla nižtiquiztan Yooz Ejpqui wejr k'aachiča.

¹⁸ Anaž jecmi wejr ticzkatasacha. Antiz wejrqui persun kuzquiztan ticznača. Nižaza poderchiztča jacatatzjapa. Jalla nii poder wejt Yooz Ejpqui wejtquiz tjaachiča.

¹⁹ Jalla nuž Jesusiž chiita taku nonžcu judío žoñinacaqui wilta t'aka t'aka cjissiča.

²⁰ Tsjii žoñinacaqui cjichiča:

—Zajraž tantala. Lucuratala tiiqui. ¿Kjažtiquiztan tiiž chiita ančhucqui nonžjo?

²¹ Yekjapac cjichiča:

—Tiiqui anaž zajraž tanta žoñižta chiiča. ¿Nižaza zajraž tanta žoñiqui tsjii zur žoñi čhjetnasajo? Anaž cjesacha.

TSJII ŽOÑINACAQUI JESUSA ANA NONZ PECCHA

²² Zac timputača. Nižaza Jerusalén wajtquin timplu cumpleañ pjijzta paatča.

²³ Jalla nii oraqui Jesusaqui timpluquin ojklayatča, Salomón cjita kjuy patiuran.

²⁴ Jalla nuž ojklayan judío žoñinacaqui Jesusiž muytata ajcziča, tuž cjican:

—¿Čhjulorcama amqui wejtnaca kuz turwayskataquejo? Amčhalaj Cristumž niiqui, tsjiika kjanacama chiižna.

²⁵ Jesusaqui ninacžquiz tuž kjaaziča:

—Ančhucquiz nuž cjichinča. Pero weriž chiitami ana criichinčhucča. Jaknužt wejt Yooz Ejp mantachaja, jalla nii mantita jaru zuma obranacal paa-uča. Jalla nii obranacaž cjen, ančhucqui zizasacha, werjtča Cristo už anažlaj Cristo, nii.

²⁶ Ančhuczi ana wejtquiz criiñčhucča. Ančhucqui anača wejt uuzažtakazi, jaknužt tuquiqui chiitučhaja, jalla nii.

²⁷ Wejt uuzanacaqui wejt jora pajča, nižaza wejrqui wejt uuzanaca pajuča. Nižaza nii wejt uuzanacaqui wejtquiz apžquiñipanča.

²⁸ Wejrqui ninacžquiz zuma kamaña tjaa-uča, Yooztan wiñaya kamzjapa. Anapan infiernuquin okasacha. Nižaza anaž jecmi wejt kjarquiztan ninaca kjañasacha.

²⁹ Wejt Yooz Ejpqui wejt kjarquiz tjaachiča. Jalla niiqui tjappachquiztanami juc'ant azzizza. Jalla nižtiquiztan anaž jecmi Yooz Ejpžquiztan wejt uuzanaca kjañasacha.

³⁰ Wejttan wejt Yooz Ejpžtan tsjii kuzziztča.

³¹ Jalla nuž chiitiquiztan nii judío žoñinacaqui maztan aptižcu wilta Jesusižquiz čhajcz pecatča.

³² Nekztan Jesusaqui ninacžquiz cjichiča:

—Wejrqui Yooz Ejpž aztan zuma obranacal ančhucquiz tjezinča. Nii zuma obranaca Yooz kuzcama paachinča. ¿Jakziltat nii zuma obranacquiztan wejr maztan čhajcz pecjo?

³³ Nii judío žoñinacaqui tuž kjaaziča:

—Anal am čhacača, zuma obriquiztan. Yooz quintra chiitiquiztan am čhacača. Amqui žoñimkazza. Pero Yooztakam cjiicjiča.

³⁴ Jalla nekztanaqui Jesusaqui ninacžquiz tuž cjichiča:

„ —Ančuca liiquizpacha tuž cjiirtapanča: “Yoozqui cjiča: ‘Ančucqui Yooztakazza.’”

³⁵ Cjiirta Yooz takuqui anaž niqúi atasacha. Jalla nii zizza učumqui. Yoozqui niiz taku catokni žoñinacž puntuquiztan cjičiča, “Ančucqui Yooztakazza”, cjičanaqui.

³⁶ Yoozqui wejr ut'ayčiča tii muntuquiz cuchanžquizjapa. Jalla nižtiquiztan wejrqui cjičinča, “Wejrtča Yooz Majchtqui”. Jalla nuž čhiitiquiztan, ¿kjažt ančucqui Yooz quintra čhiini cjeejo?

³⁷ Wejrqui wejt Yooz Epiž mantita obranaca ana paayin cjitasaž niqúi, wejtquiz criiz ana waquziča.

³⁸ Pero wejt Yooz Epiž mantita obranaca paayinča. Jalla nižtiquiztan wejtquin criya. Weriž čhiitiquiztan anača wejtquiz criyačaj niqúi, weriž paata obranacquiztan mekaž wejtquiz criyalla. Wejtquin criyaquiž niqúi, ančucqui intintazaquiča, wejtta Yooz Ejpžtan tsjiikazza, jalla nii. Wejt Yooz Ejpqui wejt kuzquiz žejlča, nižaza wejrqui wejt Yooz Ejpž kuzquiz želuča. —Jalla nuž čhičiča Jesusaqui.

³⁹ Nekztanaqui wilta Jesusa preso chjitz pecatča. Pero Jesusaqui ninacžquiztan atipassiča.

⁴⁰ Jalla nekztanaqui Jesusaqui Jordán puž tuuna ojkčiča. Jakziquin Juanqui primero bautistčaja, jalla nicju želatča.

⁴¹ Walja žoñinacaqui nižtan zali ojkčiča. Ninacaqui tuž cjičiča:

—Chekapan, tjapa Juanž čhiita tiiž puntuquiztan werarapanča. Ana čjul milajru paachi cjenami, Juanqui tiiž puntuquiztan werarapan čhiinitalala.

⁴² Jalla nicju želan walja nekž žejlči žoñinacaqui Jesusižquiz criičiča.

11

LAZARO TICZICHA

¹ Tsji laa žoñi želatča, Lázaro cjiča. Betania wajtchiz žoñitača. María, nižaza naaža cullaqui, Marta, jalla nii pucultanaqui Betania wajtchizzakaztača.

² Marii qui nii laa Lazaruž cullaquitača. Nižaza Marii qui Jesusa Jilirž kjojchquiz zuma ulurchiz asiiti alžinchintača. Nekztan naaža persun ach charžtan Jesusiž kjojchanaca chjužinchintača.

³ Jalla nuž nii pucultan maatakanacaqui Jesusižquiz mazni cuchanžquičiča, tuž cjičan:

—Wejt Jiliri, amiž pecta k'aachita amigo laa cjičiča.

⁴ Jesusaqui nii mazta nonžcu, cjičiča:

—Niiž laacjitiquiztan ana ticznaquiča. Antiz niiž laacjitiquiztan Yooz azi tjeežtaž cjequiča. Nižaza Yoozqui honorchiz cjequiča. Nižaza Yooz Majchqui honorchiz zakaz cjequiča.

⁵ Jesusaqui Martaquiz, naaža cullaqui Mariaquiz, nižaza ninacž jila Lazaružquiz, jalla ninacžquiz ančaž k'aachičiča.

⁶ Jalla nuž cjenami Lazaruž laa quintu nonžcu, Jesusaqui iya puc majžtan kamčiča, jakziquin kamatčaja, jalla nicju.

⁷ Jalla nii puc majquiztan niž tjaajintanacžquiz cjičiča:

—Wiltaž Judea yokquin okla.

⁸ Nekztanaqui niiž tjaajintanacaqui cjičiča:

—Tjaajiñi Maestro, ažk tsji kjaž majkaz nekžta žoñinacaqui am maztan čhajcz pecatla, conžjapaqui. ¿Wilta am nicju ojkz pecya?

⁹ Jesusaqui ninacžquiz tuž kjaaziča:

—Tsji noojiqui tuncapan orchizza, majiñqui. Jakzilat kjanquiz ojkčaja, anaž eza-sača. Jalla nižta iratača wejt kjanquiz ojkni žoñinacaqui. Ima niiž ticz ora irantižcan, walikaz cjequiča.

¹⁰ Jakziltat ween zumchiquiz ojkčhaja, jalla niiqui ezasačha, kjanaž ana želanaqui. Jalla nižtačha ana wejt kjanquiz ojkñi žoñinacaqui. Ana Yooz kuzcama kamtiquiztan anawalquiz tjojtšnasačha.

¹¹ Nekztanaqui Jesusaqui ninacžquiz cjichičha:

—Učhum Lázaro amiguqui tjajčha. Pero wejrqui Lázaro tjajil wajtskatačha.

¹² Jalla nekztanaqui niž tjaajintanacaqui cjichičha:

—Jiliri, tjajčhaj niiqui, nuž cjenauqui upallat cjissani; žetaquiž, jaz.

¹³ Niž tjaajintanacaqui tsjii kjutñi intintazzičha. Jesusaqui Lázaro ticz puntuquiztan chiichičha. Niž tjaajintanacaqui ultimu tjajz puntuquiztan intintazzičha.

¹⁴ Jalla nižtiquiztan Jesusaqui kjanapacha chiichičha tuž cjican:

—Lazaruqui ticzičha.

¹⁵ Ana nicju žejlchiž cjen wejrqui cuntintučha. Jalla nuž cjenčha ančhucaltajapaqui waliqui, wejtquiz juc'anti criichi cjisjapa. Jazic nii cheriž ojkla.

¹⁶ Nekztanqui Tomasaqui, niž mazinacžquiz cjichičha:

—Učhumnac zakaz ojkla, tiižtan chica ticzñi.

Tomasaqui “Pacha” cjita žoñizakaztačha.

JESUSACHA JACATATSKATŃIQUI

¹⁷ Betania watja irantižcu, Jesusaqui zizzičha, Lazaruž ticžtaqui nižaza tjattaqui pajkpic tjuñitačha.

¹⁸ Betania watjaqui Jerusalén wajtquiztan pizc kilómetro jilallatačha.

¹⁹ Jalla nii žcati želan walja žoñinacaqui Martaquiz nižaza Mariyaquiz kuzñi tjonzi-tačha, ninacž jila ticziž cjen.

²⁰ Martiqui Jesusaž waj irantižquiñi quintu nonžcu, Jesusižquin zali ojkchinčha. Mariiqui kjuyquin eclichintačha.

²¹ Jesusižtan zalžcu, Martiqui paljaychinčha, tuž cjican:

—Wejt Jiliri, am tekz žejltasaž niiqui, wejt jilaqui ana ticzi cjitasacha.

²² Jalla nuž cjenami wejrqui zizučha, čhulu amiž Yoozquiztan mayiztami tjaataž cjequičha. —Jalla nuž Jesusižquiz chiichinčha Martiqui.

²³ Jesusaqui naaquiz cjichičha:

—Am jilaqui jacatataquičha.

²⁴ Martiqui cjichinčha:

—Wejrqui zizučha, tii muntu tucuzinžtan, jacatatz tjuñquiziqui jacatataquičha.

²⁵ Nekztan Jesusaqui naaquiz cjichičha:

—Wejrtčha jacatatskatiñtqui, nižaza arajpach žeti tjayiñtqui. Jakziltat wejtquiz criyačhaja, ticzi cjenami, wilta žetaquičha.

²⁶ Nižaza jakzilta žejtñi žoñimi wejtquiz criyačhaja, jalla niiqui anaž wira ultimu ticznasačha. Arajpachquin wiñaya žetaquičha. ¿Jalla nii crii amya?

²⁷ Naaqui tuž kjaazinčha:

—Criyučha, wejt Jiliri. Nižaza criyučha, amqui Cristumčha; nižaza Yooz Maatimčha tii muntuquiz tjonchiqui. Jalla niiqui criyučha.

MARIAQUI JESUSIZTAN ZALI ULANCHINCHA

²⁸ Jalla nuž chiižcu, Martiqui naaža Marii cullaqui kjawzñi ojkchinčha. Nekztan Mariaquiz jamazit chiichinčha, tuž cjican:

—Tjaajiñi Maestruqui tekz tjonchičha. Am kjawžca cjičha.

²⁹ Jalla nuž nonžcu Mariiqui apura žaazinčha. Jesusižquin zali ojkchinčha.

³⁰ Jesusaqui imaž watja irantižcatčha, jakziquin Marti nižtan zalčhaja, jalla niiranž želatčha.

³¹ Lázaro jilaž ticziž cjen, Mariaquiz kuzcan žoñinaca kjuyquin želatčha. Jalla ninacaqui María apura žaažcu ulanñi cheržcu wirquizpacha apzičha. Ninacaqui cjichičha, “Lázaro jilž sipulturquin kayit ojkčhani” cjican.

³² Jesusižtan zalžcu Mariiqui niž yujcquiz quillzinčha, tuž cjican:

—Wejt Jiliri, tekzim cjitčhaj amqui, wejt jilaqui anaž ticzi cjitasačha.

³³ Jesusaqui naa María kaañi cheržcu, nižaza naatan tjonñi judío žoñinaca kaañi zakaž cheržcu, persun kuzquiz ancha sint'ichičha, nižaza ancha llaquita cjissičha.

³⁴ Jalla nekztan pewczičha, tuž cjican:

—¿Jakziquin tjatchinčhuctaya?

Ninacaqui cjichičha:

—Jiliri, niž cheržinžcalla.

³⁵ Nekztanaqui Jesusaqui kaachičha.

³⁶ Jalla nuž cheržcu žoñinacaqui cjichičha:

—Cherzna. Lázaro jila ančaž k'aachichičha.

³⁷ Yekjapa ninacazti cjichičha:

—Tiiqui zur žoñž čhujqui čhjetinchičha. ¿Anaj tiic Lázaro jila čhjetnasaya, ana ticzi cjisjapaya?

LAZARO JACATATSKATTA

³⁸ Jalla nekztanaqui Jesusaqui ancha kuzquiz sint'ican, sipulturquin macjatchičha. Sipulturaqui pajk mazquiz pjetatačha. Nižaza pajk maztan pjucžtatačha, nii sipultur zana.

³⁹ Jesusaqui nekztan cjichičha:

—Nii maz cjewžna.

Martiqui, nii ticzi jilž cullaquiqui, cjichinčha:

—Wejt Jiliri, pajkpic tjuñi tiiž ticztaqui. Jalla nižtiquiztan tiiqui chjonanchižlani.

⁴⁰ Nekztanaqui Jesusaqui naaquiz cjichičha:

—Amqui wejtquiz criyaquičž niiqui, Yooz azi tjeežtam cheraquičha. ¿Anaj werj nuž amquiz chiichinpanejo?

⁴¹ Jalla nekztanaqui nii sipultura mazqui cjewžtatačha. Nekztanaqui Jesusaqui arajpach kjutñi cheržcu, tuž cjichičha:

—Yooz Ejp, weriž mayizta nonzñiž cjen gracias amquin cjiwčha.

⁴² Weriž mayiztaqui nonzñampančha amqui. Jalla nii zizučha. Tekz tsijtchi žoñinacžtajapa nuž chiyučha, amčha wejr cuchanžquichi, jalla nii criyajo.

⁴³ Jalla nuž mayizizcu, Jesusaqui alto tawkžtan mantichičha tuž cjican:

—Lázaro, nekztan ulanžca, ticchuc tjona.

⁴⁴ Nii ticziqui ulanžquichičha, kjarami kojchami jweržintapacha, nižaza niž yujcmi tsjii pañžtan ch'okžinta. Nekztanaqui Jesusaqui nekz žejlñi žoñinacžquiz mantichičha:

—Nii jweržina. Nekztan ojklayaj cjee.

JESUSA CONZJAPA KAZZICHA

⁴⁵ Jalla nižtiquiztan muzpa judío žoñinacaqui Jesusižquin criichičha. Ninacaqui Mariaquiz cumpantižcu Jesusiž paata milajru cherchičha.

⁴⁶ Yekjap nekz žejlñi žoñinacazti fariseo žoñinacžquin mazñi ojkchičha. Nicju tjapa Jesusiž paatanaca quint'ižquichičha.

⁴⁷ Jalla nuž nonžcu fariseo partir žoñinacami timplu jilirinacami tjapa jilirinaca ajcškatchičha. Nekztan jilirinacžquiz pewczičha, tuž cjican:

—Nii žoñiqui ančaž milajrunaca paačha. ¿Učhumnacqui kjaža cjeequi nii žoñžtan?

⁴⁸ Jalla nužkaž milajrunaca tira paañižlaj niiqui, tjapa žoñinacaqui nižquincama criyačhani. Jalla nuž cjenacqui roman jilirinacaqui zultatunaca cuchanžcačhani, učhum timplu pajljapani, nižaza učhum naciona akzjapani.

⁴⁹ Nii wataqui Caifás cjitaqui uchtatacha timplu chawc jiliri. Jalla niiqui paljaychiča, tuž cjican:

—Ančhucqui ana zizñi žoñinacažtakaz, ¿kjažtatajo?

⁵⁰ Učhum wajtchiz žoñinacžtajapa nii Jesusac ticstanča, tjapa učhumnaca ticz cjenquiztanpacha. Jalla nuž waquiziča. Tjapa tii naciona akžinasaz niiqui, jalla niž ana wali cjesača. Nuž ana waquiziča.

⁵¹ Nii timplu chawc jiliričui anača persun kuzquiztan chiichiqui. Timplu chawc jiliriž cjen, Yoozza nuž čiikatchi. Jalla nuž čiican, Jesusiž puntu mazinčiča, Jesusaqui nii wajtchiz žoñinacžtajapa ticznaquiča.

⁵² Anazaž nii wajtchiz žoñinacžtajapakaz ticznaquiča. Tjapa žoñinacžtajapa ticznaquiča. Yooz partiquiz kamñi žoñinacaqui tjapa kjutñi tii muntuquiz wichanziča. Jalla ninacaqui Jesusaqui tjapa nacionquiztan ricujaquiča. Tsjii Yooz jamillajapa ricujaquiča.

⁵³ Jalla nuž palt'izcu nii noojtanpacha judío jilirinacaqui Jesusa conzjapa kazziča.

⁵⁴ Jalla nižtiquiztan Jesusaqui chjozacuñ ana kjanacama ojklaychiča Judea cjita yokquiz. Jerusalén žcati yokquiztan ojkchiča Efraín wajtquin. Efrain watjaqui ch'ekti yok žcatitača. Jalla nicju niž tjaajintanacžtan kamčiča.

⁵⁵ Judío žoñinacž pascua pjijzta wajillatača. Jalla nižtiquiztan walja žoñinacaqui jochinacquiztanami zkolta watjanacquiztanami Jerusalén watja ojkchiča ima pascua pjijzta tjonan. Ajunz cuzturumpi payi ojkchiča. Ana nii cuzturumpi paaquiz niiqui, ana pascua pjijzta paasača.

⁵⁶ Nii tjonchi žoñinacaqui Jesusa kjuratča. Timpluquin tsijtchi žejlcan ninacpora Jesusiž puntu pewcsassiča, tuž cjican:

—¿Am jaknužum tantii? ¿Tii pjijztičiz Jesusac tjonasaya?

⁵⁷ Nižaza fariseo partir žoñinacami timplu jilirinacami ordena tjaachiča, jequit Jesusa cheračhaja, jalla niiqui ninacžquiz maztanča, Jesusa preso tanta cjisjapa.

12

ASIITI TJAJLZINTA QUINTU

¹ Pascua pjijzta wajilla sojta tjuñiž cjen Jesusaqui Betania watja ojkchiča, Lazaruž kjuya. Niiž tuquiqui Jesusaqui ticziquiztan nii Lázaro jila jacatatskatchitača.

² Jalla nicju Jesusižquiz rispitan zuma čhjeri tjaczinčiča. Martiqui čhjeri atintichinča. Lazaruzti mizquiz želatča, Jesusižtan chica lujlcan nii parti žoñinacžtanpacha.

³ Jalla nuž lulan Mariiqui medio litro zuma ulurchiz asiiti zjijčchinča. Nii asiitiqui zuma legal nardo cjita asiititača, wali preciuchiztača. Jalla nii asiitižtan Jesusiž kjojchquiz alžcu tjajlžinčinča. Nekztan naaža persun ach charžtan chjujžinčinča. Walja zuma ulurchiztača. Tjapa nii kjuyquiziqui nii zuma ulura chjijpsitača.

⁴ Jalla nuž asiiti alžinči cheržcu, Judas Iscariote cjita Simonž majchqui chutchiča. Jalla niiqui Jesusiž tjaajinta žoñinacž partiquiztantača. Nižaza niipacha niž wiruñ Jesusiž quintra tarasunaž paaquiča. Jalla nii Judasqui naa Mariaquiz paljaychiča, tuž cjican:

⁵ —¿Kjažtičiztan tii aceite ana 300 paazuñ tuytata, pori žoñinacžquiz yanapzjapajo?

⁶ Judaszi anaž porinaca importayatča. Tjañi zaañitača. Niiž kjarquiztača paaz pulsaqui. Nižaza nii utžta paaznacquiztan tjangñitača. Jalla nižtiquiztan nuž čiichiča.

⁷ Jalla nekztanaqui Jesusaqui Judasquiz cjichiča:

—Ana naaquiz nuž cjee. Ima wejt ticz tjuñi tjonan, naaqui wejttajapa tii aceite čhjojčinča, wejr zuma tjatta cjisjapa.

⁸ Tii muntuquiz porisanacac panž žejlča. Wejrzi ančhucatan ana tira želača, tii muntuquiz.

LAZARUZAKAZ CONZ PECCHA

⁹ Walja judío zoñinacaqui Jesusiž quintu zizziča, Betania wajtquin žejlñi, jalla nii. Jalla nekztan nicju ojkčiča, Jesusa chertzni, nižaza Lázaro chertzni. Jesusaqui Lázaro ticziqiztan jacatatskatchiča.

¹⁰ Jalla nuž Lázaro jacatatskatta quintu nonžcu timplu jilirinacaqui Lazaruzakaz konz kazziča.

¹¹ Jalla nii Lazaruž jacatattaž cjen, walja judío zoñinacaqui nii jilirinacz chiitanaca ana cazziča. Nekztan zarakžcu, Jesusižquiz apoychiča. Nižaza nižquin criichiča.

JERUSALEN WAJTQUIN LUZTA QUINTU

¹² Walja zoñinacaqui Jerusalén watja tjonžcu, nekz želatča pascua pijzta paazjapa. Jakatažuqui zoñinacaqui zizziča, Jesusaqui wajtquin wajillaž irantižquiča, jalla nii.

¹³ Jalla nekztan chjañinacztanpacha ramuza cjita munti itsa kjajpchiča. Jalla nuž nii ramuz itsanac manžcu, wajtž tjiya Jesusa risiwi ulanchiča, tuž kjawcan:

—¡Yoozqui honorchiz cjila! ¡Yooz Jilirž tjuuquiz tjonni žoñi rispittaj cjila! ¡Israel chawjc jiliri rispittaj cjila!

¹⁴ Jesusaqui tsjii aznu cunsicžcu, yawchiča, jaknužt Yooz tawk liwruquiz cijrtčhaja, jalla nuž.

¹⁵ Cjijrta Yooz takuqui tuž cjiča:

—Sión wajtchiz zoñinaca, anaž eksna. Chertzna. Aznuquiz yawchi am chawjc jiliriž tjonča.

¹⁶ Jalla nuž watan nii ora niž tjaajintanacaqui anaž intintazatča, kjažtiquiztan nižta wat, jalla nii. Jesusa arajpacha ojektan, jalla nekztan ninacaqui intintazzi cjišiča. Jalla nii ora cjuñziča, tuqitan cijrta Yooz takuqui tjapa nii watchinaca mazinčiča, nii. Nii cijrtanac jaru, nužcama watchiča.

¹⁷ Niiž tuquiqui Jesusaqui Lázaro ticziqiztan jacatatskatchiča. Nekztan kjawžcu sipulturquiztan ulanskatžquichiča. Jalla nii cherñi zoñinacaqui parti zoñinaczquiz walja parličiča tjapa nii milajru paatiquiztan.

¹⁸ Jalla nižtiquiztan Jesusaž paata milajru zizcu, walja zoñinacaqui Jesusižquin zali ojkčiča.

¹⁹ Jalla nuž chertzcu fariseo zoñinacaqui ninacpora tuž cjichiča:

—Wejrnacqui jazicz cheruča. Tjapa zoñinacaqui nižquin ojkzpanž cjiskalala. Nižaza wejrnacqui anaž čjulumi kjaž cjiyi atchuca cjesaž, jaz.

GRIEGO WAJTCHIZ ZOÑINACA

²⁰ Nii pijzta ojkchi zoñinaczporquiz tsjii kjaž griego wajtchiz zoñinaca želatča. Ninacaqui Jerusalén watja ojkchizakazza, Yooz rispiti.

²¹ Ninacaqui Felipižquin tjončiča. Felipiqui Betsaida wajtchiztača, nižaza Galilea yokchiztača. Felipižquiz rocchiča tuž cjican:

—Señor, wejrnacqui Jesusižtan zalz pecuča.

²² Nekztanaqui Felipiqui Andrežquiz mazni ojkčiča. Nekztanaqui pucultanaqui Jesusižquiz mazni ojkčiča.

²³ Jalla nuž maztiquiztan Jesusaqui cjichiča:

—Wejrqui tsewtan cuchanžquita Yooz Zoñtča. Jaziqui wejt ticz ora wajiča. Jalla nekztanaqui wejrqui honorchiz cjeeča.

²⁴ Ančucaquiz weraral chiyuča. Tsjii čjacta trigo semillaqui yokquiz tjažta, katča. Jalla nižta čjacta cjen, ew zkala jecža, nižaza pookča. Ana nižta čjacta cjequiz niiqui, nužquizkaz žejlča semillaqui.

²⁵ Jalla nižta iratača tii chiitaqui. Jakziltat persun kuzcamakaz kamz pecčhaja, jalla niiqui ultim zuma kamaña pertaquiča. Pero jakziltat tii muntuquiz žejlcan

persun kuzcama ana kamz pecchaja, nižaza Yooz kuzcama kamz pecchaja, jalla niiqui wiñajyapa zuma kamañchiz cjequiča.

²⁶ Jakziltat wejtquiz sirwačhaja, jalla niiqui wejttan chica ojklaysa čhjul sufrizquiztanami. Nekztan jakziquin wejr želačhaja, jalla nicju wejttan chica wejt sirwiñinaca zakaz cjequiča. Nižaza jakziltat wejtquiz sirwačhaja, jalla nižquiz wejt Yooz Ejpqui honoraž tjaaquiča.

JESUSIZ TICZ MAZINTA

²⁷ 'Anziqui wejt kuzqui ancha turwaysičha. ¿Kjaž cjisnaqui? Yooz Ejp, tii sufrisquiztanž liwriyalla. ¿Nuž cjis wali cjesaya? Anača. Wejrqui tii muntuquiz tjonchinpanča, sufrisjapaqui.

²⁸ Yooz Ejp, am munañpaj cjila; ampacha rispittaj cjila. —Nuž cjichiča Jesusaqui. Jalla nii orapacha arajpachquiztan tsjii joraqui paljayžquichiča, tuž cjan:

—Wejrqui rispittičha, nižaza rispittapan cjeeča, amiž cjen.

²⁹ Nekz žejlñi žoñinacaqui jalla nii chiiñi jora nonžcu, cjichiča:

—Tsji jorjorñi želatča —nuž cjichiča.

Yekjapanacaqui tuž cjichiča:

—Tsji anjilaž paljayžquichila.

³⁰ Jalla nekztanaqui Jesusaqui cjichiča:

—Anaž wejtajapa nii jora chiižquichiča, antiz ančhucaltajapača.

³¹ Weriz ticztaž cjen tii muntuquiz žejlñi žoñinacaqui pjalžtaž cjequiča. Nižaza tii muntuquiz mantiñi diabluqui atiptaž cjequiča, chjatkattaž cjequiča.

³² Yooz Zoñčha wejrqui. Jaziqui tii yokquiztan cruzquiz waytital cjeeča. Nekztan tjapa wejt partir žoñinacžquiz wejtquin macjatskatača, wejtquin criizjapa.

³³ Jalla nuž chiican Jesusaqui jaknužt ticznačhaja, jalla nii chiichiča.

³⁴ Nekz žejlñi žoñinacaqui tuž cjichiča:

—Učhumnacqui učhum liquiztan zizziča, Cristuqui wiñaya žetaquiča. ¿Kjaž amqui chiyasajo, Yooz Zoñi cruzquiz waytita cjequiča, cjanajo? ¿Ject tii Yooz Zoñejo?

³⁵ Jalla nekztanaqui Jesusaqui cjichiča:

—Wejrqui tsji upacamakal ančhucatan želača Yooz kamaña tjeežcan, tsji kjanažtakaz. Jalla nuž wejt kjana želan, ančhucqui zuma kamañchiz kama. Zumchi cjis wajillača. Nii zumchi cjen, ana tsucaquiča. Jakziltat anawal zumchiquiz kamčhaja, jalla niiqui jakzitchuc ojkčhaja, jalla nii ana zizza.

³⁶ Jaziqui tsji kjanažtakaz weriz želan, wejtquiz criya, zuma Yooz kamaña tjeežñinaca cjisjapa.

Jalla nuž chiižcu Jesusaqui ojkchiča. Nekztan ninacžquiztan čhjojziča.

ISAIAS CJJRTA TAKU CUMPLISSICHA

³⁷ Ninacaž cheran walja milajrunaca paachiča Jesusaqui. Jalla nuž paachiž cjenami parti žoñinacaqui ana nižquin criichiča.

³⁸ Jalla nuž ana critiquiztan Isaiás cjita profetž takunaca cumplissičha. Isaiás cjita Yooz cuntiquiztan chiiñi profetaqui tuž cjichiča:

“Yooz Jiliri, ¿ject wejtnacaž chiita taku criijo? Nižaza am azi tjeežnan, žoñinacaqui anapaž intintazza”.

³⁹ ¿Kjažt žoñinacaqui criyasajo? Isaiasqui tuž cjichiča:

⁴⁰ “Yoozqui tii žoñinaca zur žoñižtakaz cjiskatchičha, ana cherñi žoñinacažtakaz cjeajo.

Nižaza chojru kuzziz cjiskatchičha, ana intintazñi kuzziz cjeajo. Jalla nuž cjen ana wejtquin macjatžcaquiča, liwriita cjeajo”.

Nuž cjičhiča Isaiasqui,

⁴¹ tuquitan Jesusaž tjeežta honora puntu zizcu.

⁴² Jila parti ana criichiž cjenami, muzpa žoñinacaqui Jesusižquiz criichiča, nižaza jilirinacami. Pero fariseo žoñinaca ekscu ana kjanacama cjiicjiichiča. Jamazit criichiča, ana ajcz kjuyquiztan chjatkatta cjeyajo.

⁴³ Zoñinacaž rispitta cjis pecatča, Yoozquiztan cjen juc'anti. Jalla nižtiquiztan jamazit criichiča Jesusižquiz.

JESUSIZ CHIITA TAKU

⁴⁴ Jalla nekztanaqui Jesusaqui altu joržtan chiichiča tuž cjican:

—Jakziltat wejtquiz criiĉhaja, jalla niiqui wejr cuchanžquiñižquiz nužuzakaz criiĉha.

⁴⁵ Nižaza jakziltat wejr cherĉhaja, jalla niiqui wejr cuchanžquiñižquiz nužuzakaz cherĉha.

⁴⁶ Wejrqui tii muntuquiz tjonchinĉha, Yooz kamaña tjeezjapa, tsjii kjanažtakaz. Jakziltat wejtquiz criiĉhaja, jalla niiqui anawal zumchiquiz ana tira kamaquiĉha.

⁴⁷ Jakziltat weriž chiita nonžcu ana catokaĉhaja, jalla niž quintra tii ora anal chiyuĉha. Wejrqui žoñinacž quintra chiizjapa ana tjonchinĉha. Antiz žoñinaca liwriizjapa tjonchinĉha.

⁴⁸ Jakziltat wejtquiz ana criiĉhaja, nižaza werj ana chertz pecĉhaja, nižaza weriž chiita taku ana catokĉhaja, jalla niĉha persun quintra cjiicjiiñiqui. Pjalz tjuñquiziqui weriž chiita taku ana catoktiquiztan jalla nižtiquiztan Yooz Ejpqui ultimquiz ninaca casticaquiĉha.

⁴⁹ Wejrqui anal persun kuzquiztan chiiñĉha. Antiz wejr cuchanžquiñi Yooz Ejpž mantita jaru chiiñĉha, nižaza niž mantitacama tjaajniñĉha.

⁵⁰ Wejt Yooz Epiž mantitacama kamzqui arajpachquin Yooztan wiñaya kamzjapanĉha. Jaziqui weriž chiitaqui Yooz Epiž mantitacama chiichinĉha.

13

JESUSAQUI PIYUNAZTAKAZ KJOJCHANACA AWJZICHA

¹ Ima pascua pjijzta tjonan, Jesusaqui zizziĉha niž ticz ora wajitaĉha, jalla nii. Nižaza zizziĉha, tii muntu eccu niž Ejpžquinž okaquiĉha, nii. Tii muntuquiz žejlcan Jesusaqui niž pecta mazinaca walja k'aachichiĉha, ultim werarapan. Ticzcama k'aachichiĉha.

² Pascua pjijzta paacan, Jesusaqui niž tjaajintanacžtan ĉhjeri lujlchiĉha. Judas Iscariote cjita Simonž majch chicapacha nekc želatĉha. Judas kuzqui diabluz mantuz quiz cjiskatchiĉha. Diabluz mantitaž cjen Judasqui tarzuna paaz pinsichiĉha, Jesusa tankatzjapa.

³ Jesusaqui zizziĉha, Yooz Ejpqui tjapa mantiznaca niž kjarquiz tjaachiĉha. Nižaza niiqui Yooz Ejpžquiztan tjonchiĉha, nižaza Yooz Ejpžquin quepaquiĉha. Jalla nii zizziĉha Jesusaqui.

⁴ Jalla nuž zizziž cjenami, piyunažtakaz cjissiĉha. Misquiztan tsijtscu, niž juntuña zquiti chjojksiĉha. Nekztanaqui toalla aptižcu, nižtan tsjaasiĉha.

⁵ Jalla nekztanaqui tsjii purinquiz kjaz alžcu, niž tjaajintanacž kjojcha awjžiñi kallantichiĉha. Nekztan nii tsjaazta toallžtan kjojchanaca chjujžinchiĉha.

⁶ Nižaza Jesusaqui Simón Pedro cjita žoñžquiz niž kjojcha awjžiñi macjatchiĉha. Nekztan Pedruqui Jesusižquiz cjichiĉha:

—Wejt Jiliri, žamqui wejt kjojcha awjžinz pecya? Ana wejt kjojcha awjžinz waquiziĉha.

⁷ Jalla nuž chiitiquiztan Jesusaqui tuž kjaaziĉha:

—Tii weriž paataqui amqui ana intintazza anziqui. Tii jarquinam intintazaquiĉha.

⁸ Pero Pedruqui cjichiĉha:

—Wejt Jiliri, amqui wejt kjojcha anapanim awjžinasacĉha.

Jesusaqui nižquiz kjaaziĉha, tuž cjican:

—Wejrqui am kjojcha anal awjžinaž niiqui, anam wejt partiquiz cjesacĉha.

⁹ Jalla nekztanaqui Simón Pedro cjitaqui tuž cjichiĉha:

—Wejt Jiliri, ana wejt kjojcha alajakaz awjnasača, wejt kjarami achami awjžinalla.

¹⁰ Jesusaqui nižquiz tuž cjichiča:

—Tsjii ajunta žoñiqui anaž wilta wilta ajunz pecča, antiz kjojchakaz ajunz pecča. Nekztan limpuž niiqui tjappacha. Ančhucqui limpuča, pero tsjiiqui ana limpuča ančhucqui.

¹¹ Jesusaqui zizziča, jakziltat tarsuna paazcu nii tankatačhaja, nii. Jalla nižtiquiztan nuž chiichiča Jesusaqui, “Tsjiiiqui ana limpuča ančhucqui” cjicanaqui.

¹² Nekztan Jesusaqui ninacž kjojchanaca awjawjžiñžcu, niž juntuñta chjojka zquiti aptichiča. Zquiti cujtžcu wilta misquiz julziča. Nekztan ninacžquiz cjichiča:

—¿Tii weriž paata ančhucqui intintazziñčhuckaya?

¹³ Ančhucqui wejr “Tjaajiñi Maestruž” cjiča, nižaza “Jiliriž” cjiča. Jalla nužupanča wejrqui. Jalla nižtiquiztan nužpan chiiz waquiziča.

¹⁴ Wejrtča werara ančuca Jiliritqui nižaza Tjaajiñi Maestrutqui. Jaziqui wejrqui ančuca kjojcha ajunžinchinča. Jalla nižta irata ančhucmi piyunanacažtakaz, porapat yanaparassa, nižta kjojchanaca ajunz tjepi.

¹⁵ Jazic nižta paachinča, ančhuc nižtapacha paajo.

¹⁶ Ančucaquiz ultim weraral chiyuča. Tsjii piyunaqui niž jiliržquiztan anača juc'anti Nižaza tsjii cuchanžquitaqui niž cuchanžquiñižquiztan anača juc'anti.

¹⁷ Ančhucqui tii puntu intintazzaj niiqui, jalla nii jaru kamz waquiziča. Nekztan cuntintuž cjequiča ančhucqui.

¹⁸ Wejrqui weriž illztanaca pajuča. Nižaza tsjiizuñ pajuča. Niiž puntuquiztan cjiirta Yooz takuqui tuž cjiča: “Tsjii wejttan chica lujlñiqui wejt quintraž cjisnaquiča”. Jalla nii cjiirta Yooz takuqui cumplisnaquiča. Tjapa ančuca puntuquiztan anal chiyuča.

¹⁹ Pero anziqui ima tankatan ančucaquiz chiyuča jaknužt wejr tanta cječhaja, nii puntu kjanzt'uča. Jalla nižtiquiztan wejr tantanaqui, ančhucqui wejtquiz criyaquiča, wejrtča Yoozquiztan cuchanžquitaqui, jalla nii.

²⁰ Ančucaquiz weraral chiyuča. Jakziltat weriž cuchanžquita žoñinaca risiwčhaja, jalla niiqui wejr zakaz risiwčhaja. Nižaza jakziltat wejr risiwčhaja, jalla niiqui wejr cuchanžquiñižquiz risiwčhazakaz cjequiča.

JESUSAQUI TARAZUNTAZ CJEQUICHA

²¹ Jalla nuž chiižcu Jesusaqui persun kuzquiz ancha llaquita sint'ichiča. Jalla nekztan tuž kjanapacha cjichiča:

—Ančucaquiz weraral chiyuča. Tsjii ančucaquiztan wejr tankataquiča.

²² Jalla nuž chiitiquiztan niž tjaajintanacaqui porapat chersassiča, kuzquiz pinsican, “¿Jakziltižjapa chiičhaja?” jalla nii.

²³ Tsjii ancha k'aayi tjaajinta žoñi Jesusiž latuquiz žcati julzi želatča.

²⁴ Jalla nekztan Simón Pedruqui nii žcati žejlñižquiz kjaržtan paljaychiča. “¿Jecžquiztanpan chii? Maznalla”, cjicanaqui.

²⁵ Jalla nižtiquiztan nii žcati žejlñi žoñiqui Jesusižquiz pewczyča tuž cjican:

—Wejt Jiliri, ¿ject am tankatñi žoñiqui?

²⁶ Jesusaqui tuž kjaaziča:

—Jecžquizkat wejrqui čhjer mazquiquiz t'awžcu tii t'anta tjaáčhaja, jalla niž cjequiča niiqui.

Jalla nekztanaqui nii t'anta t'awžcu, Judas Iscariotiquiz tjaachiča. Niiqui Simonž majčtača.

²⁷ Jalla nii t'awžta t'anta tanžtanaqui, Satanás cjita diabluqui Judas kuzquiz luzziča. Nekztanaqui Jesusaqui Judasquiz paljaychiča, tuž cjican:

—Chjulum paačhaja, apura paa.

²⁸ Nii parti mizquiz julzi žoñinacaqui ana intintichiča, nii Jesusiž chiita.

²⁹ Yekjapanacaqui tantiyat'cha, jalla tuž: Judas paaz pulsa tanzñiž cjen, Jesusaqui nižquiz mantichižlani pjijzta paazjapa čjulunaca kjayžjapani. Yekjapanacazti zakaz tantiyat'cha, jalla tuž: Judas paaz pulsa tanzñiž cjen, Jesusaqui mantichižlani, pori žoñinacžquiz paaz onanzjapani.

³⁰ Judasqui nii t'anta tanžcu nii orapacha ulanchi'cha. Nii oraqui weenta'cha.

EW MANTITAQUI

³¹ Jalla nuž Judas ulantanaqui, Jesusaqui cjichi'cha:

—Wejrt'cha Yooz cuchanžquita Zoñtqui. Jaziqui wejrqui wejt Yooz tjaata kamaña tjeeznu'cha, honorchiz cjisjapa. Nižaza weriž cjen Yooz Ejpqui honorchiz cjequi'cha.

³² Jalla nižtiquiztan Yooz Ejpqui wejtquiz zakaz honorchiz cjiskataqui'cha. Jalla niiqui wajillaž wataqui'cha.

³³ Weriž pecta jilanaca, tsjii upacamakaz ančucatan žela'cha. Nekztan ančucqui wejr kjuraqui'cha. Pero jaknužt tuquiqui žoñinacžquiz chiitu'chaja, jalla nižtapachal anziq'qui ančucaquiz tuž chiyu'cha: Jakziq'uint wejr oka'chaja, jalla nicju ančucqui ana oki atas'a'cha.

³⁴ Wejrqui tsjii ew mantita ortina ančucaquiz tjaa-u'cha: “Porapat zuma munaz-izpan'cha, jalla nii. Jaknužt wejrqui ančucatan zuma munazitu'chaja, jalla nižta ančucqui porapat zuma munazaqui'cha”.

³⁵ Ančucaž nii ortina mantita jaruž kaman, tjapa žoñinacaqui zizaqui'cha, ančuc'cha weriž tjaaajinta žoñinacapan.

PEDRUQUI K'OTAQUICHA

³⁶ Jalla nekztanaqui Simón Pedruqui nižquiz cjichi'cha:

—Wejt Jiliri, ¿am jakzim okaquiya?

Jesusaqui nižquiz kjaazi'cha, tuž cjican:

—Jakziq'uint wejr oka'chaja, jalla nicju anaž apzñi atas'a'cha anziq'qui. Tii jarquinaqui amqui wejtquin tjonaqui'cha.

³⁷ Pedruqui cjichizakazza:

—Wejt Jiliri, ¿kjažtiquiztan anziq' ana am apzñi atasajo? Anzimi amquiztanami weril ticznasa'cha.

³⁸ Jesusaqui tuž kjaazi'cha:

—¿Wejtquiztan ticznasaya? Ultim weraral amquiz cjiw'cha: Ima quer wallpaž kjawan, amqui čhjep wilta wejr ana pajñim toscara chiyaqui'cha.

14

ARAJPACHA OJKZ PUNTU

¹ Wejt tjaaajinta žoñinaca, Yooz Ejpžquin criyiñ'chuc'cha nižaza wejtquiz zakaz criya. Ana turwayzi kuzziz cjee.

² Wejt Ejpž arajpach kjuyquin wacchi campu žejl'cha, kamzjapa. Ana nižta žejltasaž niiqui wejrqui ančucaquiz maztasa'cha. Jaziqui wejrqui oka'cha ančucaltajapa campu tjaczquizjapa.

³ Jalla nuž campu tjaczñi ojkžcu, wital quejpžca'cha ančuc čhjichi, wejttan kamz-japa. Jakziq'uint wejr žela'chaja, jalla nicju ančuc zakaz želaqui'cha, weriž čhjichtaž cjen.

⁴ Ančucqui jakziq'uint wejr oka'chaja, niiqui zizza. Nižaza wejt ojkz jicz zizza.

⁵ Nekztanaqui Tomasqui cjichi'cha:

—Wejt Jiliri, jakziquinam am oka'chaja, anal zizu'cha wejrnacqui. ¿Kjažt am ojkz jicz zizasaya?

⁶ Jesusaqui nižquiz tuž kjaazi'cha:

—Wejrtča jicz cuntitqui, arajpachquin irantizjapaqui. Nižaza wejrtča werarapankaztqui. Weriz cjen werar Yooz kamaña zizasacha. Nižaza wejrtča žeti tjaayiñtqui, Yooztan winaya kamzjapa. Weriz cjenpankaz Yooz Ejpžquin iranti atasacha.

⁷ Ančhucqui wejr ultimū pajtasaz niiqui, ančhucqui wejt Yooz Ejp zakaz pajtasacha. Jaztanpacha weriz cjen ančhucqui wejt Yooz Ejp pajča, nižaza weriz cjen ančhucqui Yooz Ejp cherča.

⁸ Nekztanaqui Felipiqui cjichiča:

—Wejt Jiliri, Yooz Ejp cherkatalla, nužquiz niimi bastakal cjeeča.

⁹ Jesusaqui tuž kjaaziča:

—Felipe, ančhucatan azkpacha žejlchinzala. ¿Anapanim wejr pajjo? Jakziltat wejr cherčhaja, nižaza Yooz Ejp cherča. ¿Kjažt am nuž cjeejo, “Yooz Ejp cherkata”, cjicanajo?

¹⁰ Wejrmi Yooz Ejpmi tsjii kuzzizza. ¿Jalla nii anam crii amya? Weriz ančucaquiz chiitaqui anaž persun kuzquiztan chiyučha, antiz Yooz Ejpž cuntiquiztan chiyučha. Yooz Ejpqui wejt kuzquiz žejlča. Jalla nižtiquiztan niž cjen obranacal paa-uča.

¹¹ Wejrmi Yooz Ejpmi tsjii kuzzizza. Jalla nii criyaquiča, jaziqui. Weriz chiitiquiztan ana criyasaž niiqui, weriz paata obranaca cheržcu mekaz criyalla.

¹² Werarapan ančucaquiz chiyučha. Jakziltat wejtquiz criican tjapa kuzziz cječhaja, jalla niiqui weriz paata obranaca irataž zakaz paaquiča, nižaza weriz paata obranacquiztan juc'ant pajk obranaca paaquiča, weriz Yooz Ejpžquin ojktiquiztan.

¹³ Wejtquiz tjapa kuzziz cjen, ančhucqui čjul mayiztami Yooz Ejpžquiztan mayačhaj niiqui, jalla nii mayiztiquiztan wejrkal čjulumi tjaa-ača. Jalla nuž tjaa-ača, weriz cjen Yooz Ejp juc'ant honorchiz cjisjapa. Werjtča Yooz Majchqui.

¹⁴ Ančhucqui wejtquiz tjapa kuzziz cjen čjul mayiztami mayačhaja, jalla nii mayiztiquiztan wejr tjaa-ača.

ESPIRITU SANTUZ PUNTU

¹⁵ 'Ančhucqui wejtтан tjapa kuztan munazaquiz niiqui, weriz tjaata ortinanaca cazaquiča.

¹⁶ Wejrqui Yoozquiztan mayača, tsjii tjurt'iziñi cuchanžquizjapa. Nii tjurt'iziñiqui ančuca kuzquiz wiñayaž kamaquiča. Yooz Espiritu Santučha niiqui.

¹⁷ Nii tjurt'iziñiqui werara intintazkataquiča. Ana criichi žoñinacž kuzquiz anaž luzasacha. Ninacaqui nii tjurt'iziñi ana cherasacha, nižaza ana pajasacha. Nii tjurt'iziñiqui ančuca kuzquiz žejlča. Jalla nižtiquiztan nii pajča ančhucqui. Nižaza wiñaya ančuca kuzquizpacha želaquiča.

¹⁸ Wejrqui ančhuc anal ečača maa ejp wajchallažtakaz. Ančucaquin wilta tjonacha.

¹⁹ Tsjii upacamakaz, nekztan ana criichi žoñinacaqui ana iya wejr cheraquiča. Anchuczti wejr wilta cheraquiča. Nižaza jacatatžcu wiñayjapa žetača. Weriz žejtchiž cjen, ančhuc zakaz wiñaya žetaquiča Yooztan kamcan.

²⁰ Jacatatžtanaqui ančhucqui zizaquiča, wejrqui wejt Yooz Ejpžtan tsjii kuzzizza. Nižaza ančhucqui wejtтан tsjii kuzzizza. Nižaza wejrqui ančhucatan tsjii kuzzizza.

²¹ Jakziltat weriz mantita ortinanaca catokčhaja, nižaza cumličhaja, jalla niiqui ultimūž wejtтанž munaziča. Nižaza jakziltat wejtтан munazičhaja, jalla nižtan zakaz wejt Yooz Ejpqui munaziča. Nižaza wejrzakal nižtan munazuča. Nižaza wejrqui nii žoñžquiz kjanacama wejt puntu zizkatača.

²² Nekztan Judas (anača Iscariotiqui) tuž pewcziča:

—Wejt Jiliri, ¿kjažtiquiztan amqui wejtnacaquizkaz pajkataquiya, am puntuquiztan zuma zizjapaya? Nižaza ¿kjažtiquiztan parti žoñinacžquin am persuna ana pajkataquiya? ¿Kjažtiquiztan nuž cjeejo?

²³ Jesusaqui tuž kjaaziča:

—Jakziltat wejttanpan munazičhaja, jalla niiqui weriž chiita taku cazza, nižaza wejt Yooz Ejpqui nižtan munazičha, nižaza wejrnacqui nižquin tjonučha, niž kuzquiz kamzjapa.

²⁴ Jakziltat wejttan ana munazičhaja, jalla niiqui weriž chiita taku ana cazza. Weriž chiita takuqui anačha wejt persun kuzquiztan. Antiz wejr cuchanžquiñi Yooz Ejpž kuzquiztanpančha weriž chiita takuqui.

²⁵ Ančhucatan iya žejlcan ančhucacquiiz tii puntunaca chiyučha.

²⁶ Wejt wiruñ weriž cjen Yooz Ejpqui tsjii tjurt'iziñi cuchanžcaquičha. Yooz Espiritu Santučha nii tjurt'iziñi. Jalla niiqui wejt cuntiquiztanž cjequičha. Niiqui ančhucacquiiz tjapa Yooz puntunaca tjajnaquičha, nižaza tjapa weriž chiita takunaca cjuñkataquičha.

²⁷ Wejrqui ančhucacqui kuznaca jeejzkatučha. Ančhucacqui kuznaca jeejzkatžcuqui okačha. Zoñinacacqui anapanž zoñž kuz nižta jeejzkatasačha. Ančhucacqui kuznacaqui anačha turwaysi cjee, nižaza anačha eksna.

²⁸ Ančhucacqui weriž chiita nonzinčhucčha: Okačha, nižazal ančhucacquiiz wital tjonučha, jalla nii. Ančhucacqui wejttan zuma munaztasaj niiqui, chipchiž cjitasačha, nii weriž chiitaž cjen. Wejrqui wejt Yooz Ejpžquin okačha. Wejt Yooz Ejpqui wejtquiztan juc'antičha.

²⁹ Ima ojkan ančhucacquiiz anziqumazinčinčha, jalla nuž wattan wejtquiz tjapa kuztan criyajo.

³⁰ Tii muntuquiz žejlñi zoñinacaj mantiñi tjončha. Jalla nii anawal mantiñi diablucqui Judasquiz cuchanžquičha, wejr tankatzjapa. Jalla nižtiquiztan tsjii upacamakaz ančhucatan parlučha. Pero nii anawal mantiñi wejtquiztan anačha juc'ant azzizqui. Jazic niiqui wejr anaž mantasačha.

³¹ Wejrqui wejt Yooz Epiž mantitacama okačha. Jalla nižtiquiztan tii muntuquiz žejlñi zoñinacacqui zizaquičha, wejrqui Yooz Ejpžtan zuma munazičha, jalla nii. Jaziqui žaažna. Tekžtan ojkla.

15

UWAS MUNTI PUNTU

¹ Wejrtčha chekan lijitumtqui, tsjii zuma uwas muntiztakaz. Wejt Yooz Ejpqui nii munti cwitiñičha.

² Nii uwas muntiquiztan skoz uwas piz itzanacaj pajkčha. Jakzilta uwas piz itzat ana čherchiz pajkčhaja, nii ana čherñi itzaqui c'utžtaž cjequičha. Nižaza nii munti cwitiñi čherñi itzanaca zumpachaž azquichaquičha, juc'ant čheri pookajo. Yooz Ejpčha nii munti cwitiñi.

³ Weriž chiitiquiztan ančhucacqui zuma kuzziz cjissinčhucčha.

⁴ Nižaza wejrqui ančhucatan tsjii kuzziztčha. Jalla nižta ančhucacqui wejttan tsjii kuzziz cjee. Tsjii muntiquiztan ojknii piz itzaqui nii muntiquiztan apakta cjequiz niiqui, ana čherchiz cjisnasačha. Antiz nii zuma muntiquiz pajknii itzanacakaz čherasačha. Jalla nižta nii munti itzanaca irataž ančhucacqui. Ančhucacqui wejttan ana tsjii kuzziz cječhaj niiqui, ana zuma kami atasachha. Antiz wejttan tsjii kuzziz cječhaj niiqui, nekzipanž zuma kamaña nižaza zuma obranaca tjeeznasačha.

⁵ Wejrtčha nii zuma uwas muntiztakaztqui. Ančhucacqui ziti nii uwas piz pajknii itzanacajtakazza. Jakziltat wejttan ultimu tsjii kuzzižlaj niiqui, nižaza wejrmi nižtan tsjii kuzziz cjesaj niiqui, jalla ničha ancha zuma kamaña nižaza zuma obranaca tjeezñi. Jakziltat wejttan ana tsjii kuzzižlaj niiqui, Yooz yujcquiz ana čjul zum obranacami tjeeznasačha.

⁶ Jakziltat wejttan ana tsjii kuzzižlaj niiqui, Yoozquiztan chjatkattaž cjequiča. Nekztanaqui ana zuma kamañchiz cjen kjoñchi itsanacažtakaz cjequiča. Jalla nižtiquiztan nii kjoñchi itsanacažtakaz ricujtaž cjequiča ujquin ujjapa.

⁷ Ančhucqui wejttan tsjii kuzzižlaj niiqui, nižaza weriž tjaajinta takunaca catokaquiž niiqui, nekztan wejtquiztan čjulumiž mayasača. Nekztanaqui amiž mayiztiquiztan tjaataž cjequiča.

⁸ Ančhucqui walja zuma obranaca tjeezñiž cjen, Yooz Ejpqui honorchiz cjequiča. Nižaza ančuca zuma obranacchiz cjen ančhucqui weriž tjaajinta žoñinacčhucča, jalla nii kjanapachaž tjeeznaquiča.

⁹ Jaknužt wejt Yooz Ejpqui wejttan zuma munazičhaja, jalla nižtapacha wejr ančhucatan zuma munazuča. Weriž ančhucatan munazñiž cjen, jalla niipanž cjuñzna.

¹⁰ Ančhucqui weriž mantita ortinanaca cumplaquiča. Jalla nekztan wejrqui ančhucatan tirapan munaziñil cjeeča. Wejrqui wejt Yooz Epiž mantita ortinanaca cazzinča. Jalla nižtiquiztan niiqui wejttan tirapanž munaziča. Jalla nižta irata ančhucatan wejttan cjequiča.

¹¹ Jalla nii puntunaca ančucaquiz chiyučha, wejttan chica cuntintuž cjisjapa, nižaza ančuca kuznacami ancha cuntintu cjisjapa.

¹² Weriž mantita ortinaqui tužuča, jaknužt wejr amtan zuma munazitučhaja, jalla nižta irata ančhucqui porapat munazaquiča.

¹³ Jakziltat persunpacha niž mazinacž laycu ticžaja, jalla niiqui, ancha munaziñi kuz tjeeža. Jalla nižta žoñžquiztan anaž juc'anti munaziñi kuzziz žoñic želasača.

¹⁴ Ančhucqui weriž mantitacama kamaquiž niiqui, nekzipanča ančhucqui wejttan munaziñi qui.

¹⁵ Tekztan najwcchuc anal ančucaquiz “wejt piyunanacača” cjican cjesača. Tsjii piyunaqui čjulut patruna paačhaja, ana zizza. Wejrqui tjapa wejt Yooz Epiž chiitaqui ančucaquiz zizkatchinča. Jalla nižtiquiztan tekztan najwcchuc ančucaquiz “wejt mazinacapanča” cjeeča.

¹⁶ Ančhucqui ana wejr illzinčhucča. Wejrzi ančhuc illzinča, nižaza apóstol puestuquiz utchinča, Yooz taku parli okajo, nižaza walja žoñinaca wejtquiz criiskatajo. Nižaza nii wejtquiz criichi žoñinacaqui wejtquiz tiraž tjurt'aquiča. Wejtquiz kuzziz cjen, čjul mayiztami Yooz Ejpžquiztan mayačhaja, jalla nii mayiztaqui tjaataž cjequiča.

¹⁷ Wilta ančucaquiz mantuča:

Porapat zuma munazaquiča.

CRIICHI ŽOÑINACAQUI CHJAAWJKATTA CJEQUICHA

¹⁸ Ana criichi žoñinacž ančhucatan chjaawjkatan, cjuñzna, jalla nižta ninacaqui wejttan chjaawjkatchiča.

¹⁹ Ana criichi žoñinacž partiraž cjitasaz niiqui, ančhucqui ninacžquiz munazita cjitasacha. Pero wejrqui ančhuc illzinča. Jalla nižtiquiztan anača ana criichi žoñinacž partira ančhucqui. Nižaza nižtiquiztan ančhucqui ana criichi žoñinacžquiz ana munazita cjequiča, nižaza chjaawjtaž cjequiča.

²⁰ Weriž chiitac cjuñzna. Wejrqui cjichinča, “Tsji piyunaqui niž patrunžquiztan anača juc'anti”. Ana criichi žoñinacaqui wejtquiz sufriskatchiča. Nižaza ninacaqui ančucaquiz zakaz sufriskataquiča. Weriž tjaajinta taku ana catokchiča. Jaziqui ančucaž tjaajinta taku ana zakaz catokaquiča.

²¹ Pero ana criichi žoñinacaqui ančuca quintra cjequiča, ančucaž wejtquiz kuzziz cjen. Nii quintranacaqui wejr cuchanžquiñi anaž pajča. Jalla nižtiquiztan ančucaquiz quintraža.

²² Wejrqui ninacžquiz Yooz taku mazñi ana tjontasaž niiqui, ninacaqui ana nii pajk ujchiz cjitasacha. Pero wejrqui wejt puntuquiztan kjanapacha ninacžquiz chiichinča.

Jalla nižtiquiztan ninacaqui ana čhjulumi chiyi atasacha, casticz tjuñquiziqui. Nižaza ninacžquiziqui anaž pertunac želasacha.

²³ Jakziltat wejtquiz chjaawjkatčaja, jalla niiqui wejt Yooz Ejpžquiz zakaz chjaawjkatča.

²⁴ Wejrqui ninacž yujcquiz walja milajru obranaca paachinča, jakzilta wali žoñžquiztanami juc'anti. Pero anapanča wejtquiz criiz pecchiča. Jaziqui pajk ujchiz cjissiča. Jalla nižta obranaca anal paatasajž niiqui, ninacaqui ana nii pajk ujchiz cjitasacha. Pero nižta obranaca paachinča. Nižaza ninacaqui weriž paata milajrunaca cherchiča. Jalla nuž cheržcumi, wejtquizimi wejt Yooz Ejpžquizimi chjaawjchipanča.

²⁵ Jalla nuž ninacž chjaawjtaqui cjiirta Yooz taku cumplissiča. Ninacž liiquizpacha cjiirta Yooz takuqui, tuž cjiča: “Wejtquiz chjaawjchiča ana čhjul razunžtan”.

²⁶ Wejrqui Yooz Ejpžquiztan ančucaquiz Yooz Espiritu Santo cuchanžcača. Jalla nii Yooz Ejpžquiztan tjonchi Espiritu Santuqui wejt puntuquiztan wereraž intintazkataquiča, nižaza ančucaltajapa tjurt'iziinaquiča. Jalla nii Espiritu Santuqui tjonžcu wejt puntuquiztan zizkataquiča.

²⁷ Primirquiztanpacha ančucqui wejttañ chica ojklaychinčucpanča. Jalla nižtiquiztan ančuczakaz wejt puntuquiztan zizkataquiča.

16

PRUEBANACAZ TJONAQUICHA

¹ Tjapa weriž chiitanacaqui ančucaquiz chiichinča, čhjul sufrisquiztanami tirapan wejtquin kuzziz cjisjapa, nižaza ana wejtquiztan zarakzjapa.

² Jazta timpuquiz ančucqui ajcz kjuyanacquiztan chjatkattaž cjequiča. Nižaza tsjii sufris ora tjonaquiča. Jalla nii oraqui jecmit ančuc conačaja, jalla nii conñi žoñiqui cjequiča, “Wejrtča Yooz sirwintqui. Jalla nižtiquiztan nii žoñi conchinča”, nuž cjequiča.

³ Nii ančuc conñi žoñinacami wejtquizimi wejt Yooz Ejpžquizimi anapan pajča. Jalla nižtiquiztan ančuc conasača.

⁴ Tjapa weriž chiitanacaqui ančucaquiz chiichinča, ančucaquiz yanapzjapa. Nii sufris ora tjontanaqui jalla tii weriž chiitanaca cjuñznaquiča. Primirquiztanpacha tii sufris puntuquiztan ančucaquiz kjanacama ana chiichinča. Ančucatan kamiñtača. Jalla nižtiquiztan tii sufris puntu ana chiiz pechintača.

ESPIRITU SANTUZ PUNTU

⁵ Pero anz wajilla wejr cuchanžquiñizquin okača. Ančucaquiztan anaž jakziltami wejr pewcža, “¿Jakzit okačaja?” jalla nii.

⁶ Anchucqui ancha llaquita cjissinčucča, jalla nuž weriž chiiñiz cjen.

⁷ Pero wejrqui werera takunaca chiyuča. Weriž ojktanaqui waliž cjequiča ančucaltaqui. Wejrqui anal okasaž niiqui, tjurt'iziñi Espiritu Santuqui anaž tjonasača. Pero wejr ojžcuqui nii Tjurt'iziñi cuchanžcača.

⁸ Jalla niiqui tjonžcuqui, ana criichi žoñinacž kuzquiz ninacž persun uj tantiyaskataquiča. Nižaza Yooziž mantita kamañ puntu tantiyaskataquiča, nižaza nii Espiritu Santuqui Yooz casticz puntu tantiyaskataquiča.

⁹ Espiritu Santuqui ana criichi žoñinacž kuzquiz persun uj tantiyaskataquiča, wejtquiz ana criichiž cjen.

¹⁰ Nižaza nii Espiritu Santuqui ana criichi žoñinacž kuzquiz Yooziž mantita kamañ puntu tantiyaskataquiča, weriž Yooz Ejpžquin ojkičiz cjen. Jalla nižtiquiztan ančuc zakaz wejr ana iya cheraquiča.

¹¹ Tii muntuquiz mantiñi diabluqui Yooziž yatisinžtača, ana walipanča, nii. Jazic niiqui castictaž cjequiča ultim juyzuquiz. Jalla nižtiquiztan Espiritu Santuqui ana criichi žoñinacžquiz Yooz casticz puntu tantiyaskataquiča.

12 'Iya juc'anti kjažumi ančhucaquiz chiižinznača žejlčha wejttaquí. Pero anziquí ančhucquí anaž nii intintazasača.

13 Werar intintazkatñi Espíritu Santuquí tjonžcu, ančhucaquiz tjaajnaquíča tjapa weraranaca. Anaž persun kuzquiztan tjaajnaquíča, antiz Yoozquiztan nonžtanaca tjaajnaquíča. Nižaza tekztan najwcchuc čhjulut watačhaja, jalla nii zakaz tjaajnaquíča.

14 Espíritu Santuquí wejt puntuquiztan ančhucaquiz tjaajnaquíča. Jalla nuž tjaajniñiž cjen wejrquí honorchiz cjeeča.

15 Tjapa Yooz Epiž chiitaquí wejrpankazza chiiñtquí. Tsjiikaztčha wejrnacquí. Jalla nižtíquiztan wejrquí chiichinča, Espíritu Santuquí wejt puntuquiztan ančhucaquiz tjaajnaquíča, nii.

CUNTINTUZ CJEQUICHA

16 'Upaquižtancama ančhucquí wejr ana cheraquíča. Nekztanaquí tsjii kjaž majquiztan wejr wilta cheraquíča.

17 Nekztanaquí yekjap tjaajintanacaquí porapat pewcsassiča, tuž cjican:

—¿Kjažt cjií tjeejo, tuž cjicanajo? “Upaquižtancama ančhucquí wejr ana cheraquíča. Nekztanaquí tsjii kjaž majquiztan wejr wilta cheraquíča”. Nižaza tiíquí “Wejrquí Yooz Ejpžquin okača”, cjiča. Jalla nuž cjican, ¿kjažt cjií teejo? ¿Čhjul puntut chii teejo?

18 Ninacaquí cjichizakazza:

—“Upaquižtancama” chiicanaquí, ¿kjažt cjií teejo? Anača intintazzuca tiíž chiitaquí.

19 Jesusaquí persun kuzquiz zizatčha, ninacaquí nižquin tsjii pewcz pecatčha, jalla nii. Jalla nekztanaquí Jesusaquí ninaczquiz tuž cjichiča:

—Wejrquí chiichinča, tuž cjican: “Upaquižtancama ančhucquí wejr ana cheraquíča, nekztanaquí tsjii kjaž majquiztan wejr wilta cheraquíča”. Jalla nuž chiican, ¿kjažt cjií? ¿Jalla niíča ziz pecya?

20 Ultim weraral ančhucaquiz cjiwčha. Ančhucquí llaquita cjequiča, nižaza kaaquíča. Ana criichi žoñinacazti cuntintuž cjequiča. Ančhucquí llaquita kuzziz cjenami, tsjii kjaž majquiztan anča chipchipcan cuntintuzakaz cjisnaquíča.

21 Nonžna. Majtz ora irantižcan tsjaa maatak žonquí janchinaca walja mizkatiñča. Nekztan wawa majtžcuquí, naa maatak žonquí wawchiz cjen ana janchi mizkattami cjuñiñča. Wawchiz cjen, anča cuntintučha naaquí.

22 Jalla nižta irataž ančhucquí anziquí llaquita kuzzizza. Pero wejrquí am wilta cherača. Jalla nii oraquí ančuca kuznaca cuntintuž cjequiča. Nižaza nii ančuca cuntintu cjis kuzquí anaž jecmi wilta nižta llaquita cjiskatasacha.

23 'Nii orquiztan najwcchuc ančhucquí zizñi cjiscu wejr anaž iya pewcnaquíča. Ančhucaquiz weraral chiyučha. Wejtquiz tjapa kuztan cjen, ančhucquí Yooz Ejpžquiztan čhjulumí mayačhaja, jalla nekztan weriž cjen nii mayiztaquí tjaataž cjequiča.

24 Tii oracama ančhucquí anaž čhjulumí maychinčhucčha wejt tjuuquiz. Mayiza, nekztanaquí tjaataž cjequiča, ančuca kuz juc'anti cuntintu cjisjapa.

JESUSIZ CHIITANACA

25 'Tii oracama wejrquí ančucaquiz ch'aman intintazzuc takunaca chiichinča. Tsjii tjuñíquí tjončha. Jalla nii tjuñíquiztan nižta ch'aman intintazzuc takunacami anal iya chiyacha. Antiz Yooz Ejpž puntuquiztan jalla niil kjanacama chiyacha.

26 Nii oraquí ančhucquí wejt tjuuquiz čhjulquiztanamiž mayizaquíča. Nekztan wejrquí ančhucaltajapa anal iya maynača wejt Yooz Ejpžquiztanquí.

27 Ančhucquí wejttan munazichinčhucčha. Nižaza wejtquiz criichinčhucčha, wejrquí Yooz Ejpžquiztan tjonchi, jalla nii. Jalla nižtíquiztan Yooz Ejpčhaja ančhucatan munaziča.

²⁸ Wejrqui Yooz Ejpžquiztan tii muntuquiz tjonchinča. Nižaza tii muntuquiztan, wejt Yooz Ejpžquin quepača.

²⁹ Jalla nekztanaqui niž tjaajintanaqui cjichiča:

—Jaziqui ultimu kjanacama chiichamča, ana ch'aman intintazzuc takunacžtan.

³⁰ Jaziqui zizuča, amqui tjapa čhjulumi zizñampanča, nii. Ampankam wejtnaca kuzmi zizza. Jalla nižtiquiztan wejrnacqui anal iya pewcnasača. Nižaza wejrnacqui ultim chekpacha criyuča, amqui Yooz Ejpžquiztan tjonchamča, jalla nii.

³¹ Jesusaqui ninacžquiz tuž kjaaziča:

—¿Jaziqui ančhucqui ultim chekpacha criichinčhucjo?

³² Tsjii ora wajiča. Anzpachača nii oraqui. Nii oraqui ančhucqui wichanziž cjequiča, nižaza zina zina wichanziž cjequiča. Wejrqui zinalla ectal cjeeča. Pero wejr zina ecta cjenami, wejrqui ana zina cjeeča. Wejt Yooz Ejpž wejttan chica cjequiča.

³³ Jaziqui tjappacha tii takunaca ančhucacqui chiichinča, wejtquiz kuzziz cjen, cuntintu cjisjapa. Tii muntuquiz žejlcan ančhucqui sufraquiča. Walja tjup kuzzizpan cjee. Wejrqui tjapa liju atipchinča.

17

JESUSIZ YOOZ EJPZTAN PARLITA

¹ Jalla nuž chižcu Jesusaqui tsewcchuc arajpach kjutñi cherziča. Nekztan Yooz Ejpžtan parličiča, tuž cjan:

—Yooz Tatay. Wejt sufris ora tjonča. Wejrtča am Majchtqui. Wejtquiz honorchiz cjiskatalla. Nekztan wejrqui amquiz juc'ant honorchiz cjiskatača.

² Tjapa žoñinaca mantizjapa, jalla nii poder wejtquiz tjaachamča. Jakziltami amqui wejtquiz intirjičhaja wejt parti cjisjapa, jalla ninacžquiz arajpachquin wiñaya kamkatača wejrqui.

³ Amča zinta werara Yoozqui. Nižaza wejrtča Jesucristutqui; amiž cuchanžquita Žoñtča. Wejt parti žoñinacaqui amquizimi wejtquizimi pajča. Jalla nižtiquiztan arajpachquin učumtan wiñaya kamaquiča.

⁴ Tii muntuquiz kamcan amquiz honorchiz cjiskatchinča. Nižaza amiž mantita obranaca žerzinča.

⁵ Jaziqui, Yooz Tatay, amquin wilta quejpžcu, arajpachquin amtan chica želaquiča. Nekztan wejtquiz honorchiz cjiskatalla. Ima tii muntu želan, wejrqui amtan chica honorchiztala. Jalla nižta tuquita honorchiz irata wilta wejtquiz honorchiz cjiskatalla.

⁶ Amqui žoñinaca illzamča, wejt partiquiz cjisjapa. Jalla nii žoñinacžquiz intintazkatchinča am puntuquiztan. Ninacaqui amtača. Nižaza wejt parti cjisjapa wejtquiz tjaachamča. Nižaza ninacaqui am takunac jaru kamča.

⁷ Jaziqui wejt partir žoñinacaqui zizza, tjapa weriž chiitaqui amquiztan tjonñicamača, jalla nii.

⁸ Amiž chiita takunacacama ninacžquiz tjaajinčinča. Jalla nekztan ninacaqui weriž tjaajinta catokchiča. Nižaza weriž tjaajinta žoñinacača zizñipanqui, wejrqui amquiztan tjonchinča, jalla nii. Nižaza criichipanča, amqui tii muntuquiz wejr cuchanžquichamča, nii.

⁹ Jaziqui ninacžtajapa amquiz mayizuča. Ana criichi žoñinacžtajapa anal mayizuča. Antiz wejt partir žoñinacžtajapakaz mayizuča, amiž illžniž cjen.

¹⁰ Amtača tjapa wejt partir žoñinacaqui. Nižaza wejttača ninacaqui. Jalla ninacaž cjen wejrqui honorchizza.

¹¹ Wajilla ana iya tii muntuquiz kamača. Nii wejt partir žoñinacaž eclaquiča. Tii muntuquiz tira želaquiča ninacaqui. Wejrzi amquin quejpžcača. Zuma arajpach

Yooz Tatay, tii žoñinaca wejtquiz tjaachamča. Jaziqui am aztan tinaca tirapan cwitalla, tsjii kuzziz cjeajo, jaknužt učumqui tsjii kuzzizlaja, jalla nižta.

¹² Tii muntuquiz tinacžtan kamcan, tii žoñinaca cwitichinča, am aztan. Nižaza tinacžquiztan tsijtsinchinča čjulquiztanami ana kjaž cjisnajo. Tsjiiqui pertissinča. Jalla nuž pertisjapa nii Judas Iscariotiqui žejtkalča. Jalla nuž cjen tuquita cjiirta Yooz taku cumplissiča.

¹³ 'Anziqui wejrqui amquin quejpžcača. Iya tsjii zkolucžtan tii muntuquiz kamcan wejrqui tinacžquiz čiižinuča, wejtquiz criichi žoñinacaž wejržtapacha cuntintu cjeajo.

¹⁴ Wejrqui tinacžquiz am taku tjaajinchinča. Jaknužt wejrqui ana criichi žoñinacž partiquiz ana želatučhaja, jalla nižta irata wejtquiz criichi žoñinacaqui ana žejlča ana criichi žoñinacž partiquiz. Jalla nižtiquiztan ana criichi žoñinacaqui ninacžquiz chjaawjča.

¹⁵ Amquiztan ana mayizuča, wejt žoñinacaž tii muntuquiztan chjichtaž cjisjapa. Antiz amquiztan mayizuča, ana wal diabluzquiztan wejt žoñinaca tsijtsinta cjisjapa.

¹⁶ Jaknužt wejrqui ana criichi žoñinacž partiquiz ana želatučhaja, jalla nižta irata wejt žoñinacaqui ana žejlča, ana criichi žoñinacž partiquiz.

¹⁷ Amiž čiiataqui ultim werarača. Am takuž cjen wejtquiz criichi žoñinaca zuma kamañchiz cjiskata. Chjul ana zuma kamañquiztanami zarakskata.

¹⁸ Jaknužt amqui tii muntuquiz žejlči žoñinacž kjutči wejr cuchanžquičhaja, jalla nižaza wejrqui tii muntuquiz žejlči žoñinacž kjutči wejt žoñinaca cuchnuča.

¹⁹ Wejtquiz criichi žoñinacžtajapa ancha kuztanča wejrqui ticzjapa. Nižaza am werar tawk jaru kamtiquiztan tii žoñinaca t'akžinuča amta cjeajo.

²⁰ 'Wejrqui tii tekžta žoñinacžtajapa alaja anal mayizuča, antiz tjapa wejtquiz anzimi wiruñami criichi žoñinacžtajapa mayizuča. Tii tekžta žoñinacaž Yooz taku paljaytiquiztan yekjapanacaqui wejtquiz criyaquiča. Jalla ninacžtajapa zakaz mayizuča.

²¹ Jalla tjapa ninacžtajapa mayizuča tsjii kuzziz cjisjapa. Yooz Tatay, amqui wejttan tsjii kuzzizza. Nižaza wejrqui amtan tsjii kuzziztča. Jalla nižta irata ninacaqui učumnacaquiz tsjii kuzziz cjila. Jalla nuž mayizuča, tii muntuquiz žejlči žoñinaca criyajo, am wejr cuchanžquiči, jalla nii.

²² Amiž wejtquiz tjaata arajpach kamaña, jalla nii kamaña ninacžquiz cjiskatchinza-kazza, tsjii kuzziz cjeajo, jaknuž učumqui tsjii kuzzizzalaja, jalla nižta.

²³ Jaknužt amqui wejttan žejlčhaja, jalla nižtača wejrqui ninacžtan želača, ninaca tsjii kuzzizpan cjeajo. Jalla nižtiquiztan žoñinacaqui zizaquiča, amqui wejr cuchanžquičiča, jalla nii. Nižaza žoñinacaqui zakaz zizaquiča, amqui ninacžtan munaziča, jaknužt amqui wejttan munazičhaja, jalla nižta.

²⁴ 'Yooz Tatay, amqui wejtquiz tii žoñinaca tjaachamča, wejtquiz criyajo. Jalla tinacaqui wejttan chica kamñijapa pecuča, jakziquin wejr želačhaja, jalla nicju. Jalla nužuntu žejlcan tinacaqui wejt arajpach kamaña kjana cheraquiča. Ima tii muntu želan, wejttan munaziñiž cjen amqui wejtquiz nii arajpach kamaña tjaachamča. Jalla nii kamaña cheraquiča wejt partir žoñinacaqui.

²⁵ Ultim lijitum Tatayi ana criichi žoñinacaqui am anaž pajča. Wejrzi am pajuča. Nižaza jalla tinacaqui zizza, amqui wejr cuchanžquičamča, jalla nii.

²⁶ Am puntuquiztan tinacžquiz zumpacha intintazkatchinča. Nižaza wejrqui tiral intintazkatuča, ninacaž zuma munazizjapa, jaknužt učumqui zuma munazičhaja, jalla nižta. Nižaza am puntuquiztan ninacžquiz intintazkatuča, wejr ninacžtan tsjii kuzziz cjisjapa.

¹ Jesusaqui nuž chiižcu niiz tjaajintanacžtan ojkchiča. Cedrón cjita k'awž tsjii latuquin ojkchiča. Jalla nicju ch'ojni muntinaca želatča. Nijcchuc luzziča.

² Jesusaqui nii yokquin kjaž wilta ajczñipantakalča niiz tjaajintanacžtan. Tarazuñi Judasqui nii yoka pajchiča.

³ Jalla nicju Judasqui zultatunacami, nižaza timplu wijilni zultatunacami, jalla ninaca chjitchiča. Timplu jilirinacami, fariseo žoñinacami jalla ninacača nii timplu wijilni zultatunaca cuchanchiqui. Ninacaqui irantichiča michanacžtan teyanacžtan pajk cuchillunacžtan, nižaza wjajtz carotinacžtan. Jalla nižtanacžtan irantichiča.

⁴ Jesusaqui čjulut watačhaja, jalla nii tjapa zizatča. Nii tjonchi žoñinacžquiz macjatžcu, pewcziča, tuž cjican:

—¿Jectča kjur ančhucjo?

⁵ Jalla ninacaqui kjaaziča, tuž cjican:

—Wejrnacqui kjuruča Jesusa, nii Nazaret wajtchiz žoñi.

Jesusaqui tuž kjaaziča:

—Wejrtča niitqui.

Judas, nii tarazuñi žoñiqui ninacžtan chica tsijtchi želatča.

⁶ Jesusaž “Wejrtča niitqui” cjitiquiztan nii tanñi žoñinacaqui wir kjutni atžcu porapat tewksarascu yokquiz tjojtassiča.

⁷ Jesusaqui wilta pewcziča:

—¿Jectpan ančhuc kjurjo? —cjican.

Ninacaqui wilta kjaaziča, tuž cjican:

—Wejrnacqui kjuruča Jesusa, nii Nazaret wajtchiz žoñi.

⁸ Jesusaqui nekztan zakaz cjichiča:

—Wejrtča cjichinsala. Ančhucqui wejr kjurča. Jaziqui tii parti žoñinaca cutznaquiča.

⁹ Jalla nekztan Jesusaž tuqui chiita taku cumplissiča. Tuquiqui Jesusača chiichiqui, jalla tuž: “Yooz Epiž wejtquiz tjaata žoñinacaqui ana tsjiimi pertichinča”.

¹⁰ Simón Pedruqui pajk cuchillchiztača. Jalla nii cuchillu jwescu, Pedruqui timplu jilirž piyunž žew cjuñi pootžcu chjajtzinchiča. Jalla nii cjuñi chjajtzinta žoñiqui Malco cjitatača.

¹¹ Nekztanaqui Jesusaqui Pedružquiz cjichiča:

—Am cuchillu cuchillž žejlžquiz quijtzna. Wejt Yooz Ejpž pinsita kuz jaru wejtlaqui sufristanča. ¿Anaj wejr tii sufrasajo?

JESUSAQUI CHJICHTACHA

¹² Jalla nekztanaqui zultatunacami, zultatž comandantimi, nižaza judío timplu wijilni zultatunacami, jalla ninacaqui Jesusa tanžcu kjara jweržinchiča.

¹³ Nekztan Anás cjita jilirž kjuyquiz chjitchiča. Anasqui Caifás ajmuž ejptača. Jalla nii wata Caifasqui timplu chawjc jiliritacha.

¹⁴ Nii Caifasqui tuquiqui tuž cjitkalča: “Učhumnacaltajapa tsjii žoñi ticstanča, tjapa žoñinaca ana conta cjeyajo”.

¹⁵ Jesusa chjichan, Simón Pedružtan tsjii tjaajinta žoñžtan Jesusa apziča. Nii tsjii Jesusiž tjaajinta žoñiqui timplu jilirž pajtatača. Jalla nižtquiztan Jesusižquiz apžcu nii timplu jilirž patiuquin luzziča.

¹⁶ Pedruqui ana pajtaž cjen zancu eclichiča. Nekztan nii tsjii luzzi tjaajinta žoñiqui ulanžquichiča, naa ulanz zanquiz cwitiñi žonaquin paljayzjapa. Jalla nuž paljayžcu patiuquiz Pedro luzkatchiča.

¹⁷ Nekztan naa cwitiñi žonqui Pedružquiz pewczinča, tuž cjican:

—¿Anaj am zakaz nii žoñžtan chica ojklayñamtajo?

Nekztan Pedruqui chiichiča:

—Anaž wejr, —cjican.

¹⁸ Ch'uñuriž cjen piyunanacami timplu zultatunacami uj taazičha carpunžtan. Nekztan nii uj parazquiz tsijtchi kutnatčha. Ninacžtan chica Pedruqui tsijtchi zakaz želatčha, kutuncan.

TIMPLU CHAWJC JILIRZQUIN APANTITA

¹⁹ Jalla nekztanaqui timplu chawjc jiliriqum Jesusa pecunchičha, niiž tjaajinta žoñinacž puntuquiztanami nižaza niiž persun tjaajintami.

²⁰ Jesusaqui niižquiz kjaazičha, tuž cjican:

—Tjapa žoñinacž yujcquiz tjaajinchinčha. Učhum ajcz kjuyquizimi timpluquizimi tjaajinchinčha. Timpluquiz tjapa žoñinaca ajczñičha. Ana chjojzaka tjaajinchinčha.

²¹ ¿Kjažtiquiztan nuž wejr pecunjo? Weriž tjaajinta nonzñi žoñinacžquiz pewczna, čhjulut tjaajintučhaja, jalla nii. Jalla ninacaqui weriž tjaajintanaca zizza.

²² Jalla nuž čhiitan, tsjii nekz tsijtchi žejlñi zultatuqui Jesusa yujcquiz kjaržtan tsjajpchičha, tuž cjican:

—¿Jalla nuž timplu jiliržquiz kjaazkaya?

²³ Jesusaqui nii zultatžquiz kjaazičha, tuž cjican:

—Wejr ana zuma čhiitučhaj niiqui, ¿jaknužt cjican ana zuma čhiichintajo? Zumal čhiyučha. ¿Kjažtiquiztan am wejr tsjajpjo?

²⁴ Jalla nekztanaqui Jesusa kjara jweržintapacha cuchanchičha Caifás timplu chawjc jiliržquin.

PEDRUQUI K'OTCHICHA

²⁵ Jalla nii oraqui Simón Pedruqui tsijtchi želatčha nii ujquiz kutuncan. Tsjii tsjii nekz žejlñi žoñiqui Pedružquiz cjichičha:

—Amqui nii žoñžtan chica ojklayñamčha, ¿ana jaa?

Pedruqui toscara čhiichičha:

—Anačha wejrqui, —cjican.

²⁶ Jalla nekztanaqui tsjii timplu jilirž piyunaqui Pedružquiz pewczizakazza. Nii piyunaqui nii cjuñi čhjajtžinta piyunž familiatačha. Jalla tuž cjican pewczičha:

—Nii munti yokquin nii žoñžtan chica am cherchinla, ¿ana jaa?

²⁷ Pedruqui wilta toscara čhiichičha. Jalla nuž wilta toscara čhiyan, nii orapacha tsjii querwallpi jora kjawchičha.

PILATUZQUIN ČHJICHTA

²⁸ Jalla nekztanaqui Caifás cjita žoñžquiztan Jesusaqui čhjichtačha pajk mantiñiž kjuyquin. Waj kjantatitačha. Nii judío žoñinacapacha nii pajk mantiñiž kjuyquin ana luzzičha, ninacž cuzturumpi cjen. Jalla nuž luztasaz niiqui, pascua pjijzta čhjeri ana lujltasačha.

²⁹ Jalla nižtiquiztan Pilatuqui ninacžquiz paljayi ulanzquichičha, tuž cjican:

—Ančhucqui, ¿čhjul ujž tii žoñž quintra jwes pecya?

³⁰ Žoñinacaqui tuž kjaazičha:

—Tii žoñiqui ana čhjul pajk ujnacami paatasaz niiqui, anal wejrnacqui tii intirjitasachha.

³¹ Nekztanaqui Pilatuqui ninacžquiz cjichičha:

—Ančhuckaz čhjicha, ančuca lii jaruž justicia paažca.

Nii žoñinacaqui kjaazičha, tuž cjican:

—Wejtnacalta žoñi conzqui lii quintračha.

³² Niiž tuquiqui Jesusaqui čhiitkalčha, persun ticz puntuquiztan, jaknužt ticznačhaja, jalla nii. Nižaza niiž čhiitaqui cumplisnaquičha.

³³ Pilatuqui wilta niiž kjuyquin luzquichičha. Jesusa kjawžcu, niižquiz pewczičha, tuž cjican:

—¿Judío žoñinacž chawc jilirimkaya?

³⁴ Jesusaqui niizquiz kjaaziča, tuž cjican:

—¿Amqui jalla nuž persun kuzquiztan wejr pewczya? Už ¿yekja žoñinaca amquiz nuž pewczna cjichi jaa?

³⁵ Pilatuqui tuž kjaaziča:

—Wejrqui judío žoñt, ¿jaa? Am persun wajtchiz žoñinacami nižaza am persun timplu jilirinacami, jalla nii žoñinacača wejtquin am intirjichiqui. ¿Čhjul uj paachamt, amjo?

³⁶ Jesusaqui nekztan cjichiča:

—Wejtla mantizqui anača tii muntuquiztan. Tii muntuquiztan wejtla mantiz cjesaž niiqui, wejt piyunanaca kichaskatasaca wejt quintra žoñinaczquiz, ana wejr intirjita cjisjapa. Pero wejtla mantizqui anača tii muntuquiztanaqui.

³⁷ Nekztan Pilatuqui cjichiča:

—¿Nižtaqui amčhalani mantiñi jiliriniqui?

Jesusaqui cjichiča:

—Jesalla, wejr mantiñi jilirtchiya, am chiiča jalla nuž. Tii muntuquiz tjonžcu nassinča, werara puntu tjaajinzjapa. Jakziltat nii werara tjaajinta jaru kamčhaja, jalla niiqui weriž chiita taku nonža.

³⁸ Jalla nuž chiitiquiztan Pilatuqui cjichiča:

—Werara puntuqui, ¿čhjulut neejo?

Jalla nuž pewczcu Pilatuqui wilta ulanchiča judío žoñinaczquin parli. Ninaczquiz cjichiča:

—Wejrqui tii žoñžquiz ana čhjul ujmi jwesi atuča.

³⁹ Pascu pjijztiquiz ančhucalta tsjii custurumpi žejlča, wejtla tsjii preso tanta žoñi cutzqui. ¿Tii judío wajtchiz chawjc jiliri cutznaquiya? ¿Jalla nuž cutskatz pecya?

⁴⁰ Judío žoñinacaqui kjawchiča:

—¡Tii žoñi ana cutzna! ¡Barrabás cutzna! —cjican. Barrabasqui tsjii anawal tjañi žoñitača.

19

PILATUQUI JESUSA CUTZ PECCHA

¹ Jalla nekztanaqui Pilatuqui wilta kjuylchuc Jesusa majcchiča. Nekztanaqui Jesu-sižquiz wjajtajo mantichiča.

² Nekztan zultatunacaqui ch'apquiztan tsjii pillužtakaz paachiča. Jalla nii paatižtan Jesusiž achquiz tewžinchiča. Nižaza jilirž murat zquiti tjutziča.

³ Jalla nuž paažcu niizquin macjatchiča,

—¡Viva, judío žoñinacz chawjc jiliri! —cjican.

Nižaza Jesusiž yujcquiz kjaržtan tsjajpchiča.

⁴ Nekztan Pilatuqui judío žoñinaczquin wilta ulanzquichiča. Nekztan ninaczquiz cjichiča:

—Cherzna. Ančucaž intirjita žoñi ticju jwescača, ančhuc zumpacha intintazajo. Wejrqui tii žoñžquiz anal čhjul ujmi jwesi atuča.

⁵ Jalla nekztan Jesusaqui ulanzkatžquichiča. Ch'apquiztan paataqui achquiz tewžinta, nižaza jilirž murat zquiti tjutžta. Nekztanaqui Pilatuqui ninaczquiz cjichiča:

—Tiiča ančucaž intirjita žoñiqui.

⁶ Timplu jilirinacami, nižaza timplu wijilñi zultatunacami nii cheržcu, alto joržtan kjawcan, chiichiča:

—¡Cruzquizkaz ch'awczna! ¡Cruzquizkaz ch'awczna! —cjican.

Pilatuqui ninaczquiz cjichiča:

—Way, nižtacž čjicha ančhucqui, nižaza cruzquiz ch'awczca. Pero wejrqui ana čhjul ujmi tižquiz jwesi atchinča.

⁷ Nekz žejlñi judionacaqui tuž kjaaziča:

—Wejrnacqui liichiztča. Wejtnaca lii jaru tii žoñic ticstanča, tiiqui “Wejrtča Yooz Majch” cjican ojklaychiž cjen.

⁸ Jalla nii chiita taku nonžcu, Pilatuqui tsjan eksiča Jesusižquiztan.

⁹ Jalla nižtiquiztan Pilatuqui niž kjuya wilta luzziča Jesusižquin pewczjapa. Jalla tuž pewczyča:

—¿Jakziquiztan žoñipant amya?

Jesusazti ana čjulumi kjaaziča.

¹⁰ Jalla nižtiquiztan Pilatuqui nižquiz wilta paljaychiča, tuž cjican:

—¿Kjažtiquiztan am ana wejtquiz kjaazjo? Wejrqui mantasača, am cutzjapa. Nižaza mantasača cruzquiz ch'awczjapa, ¿Jalla nii ana ziz amjo?

¹¹ Jesusaqui nižquiz kjaaziča, tuž cjican:

—Yoozqui amquiz mantiz poder ana tjaatasaz niiqui, amtaqui mantiz poder ana žejltasača. Yooz amquiz mantiz poder tjaachiž cjenkaz wejr mantasača. Jalla nižtiquiztan jecčhalaj amquiz wejr intirjichi, jalla ninacača amquiztan juc'ant ujchizqui.

¹² Jalla nuž nonžcu Pilatuqui Jesusa ančaž jaknužumi cutz pecatča pero nii judío žoñinacazti kjawžcan chiichiča, tuž cjican:

—Tii žoñi cutznaquiž niiqui, am zakaz César tsjan chawjc jilirž quintra paaquiča. Jakziltat “Wejrtča chawjc jiliritqui” cjican chečhaj niiqui, César chawjc jilirž quintraž paača.

¹³ Pilatuqui jalla nuž nonžcu, zultatu mantichiča, Jesusa zancchuc jwescajo. Zancchuc jwesquichiča Gabata cjita patiuquin. Gabata tuž cjiča, maznacžtan curta, jalla nii. Jalla nicju Pilatuqui jusjiiz julzquiz julziča.

¹⁴ Jalla nii tjuñiqui tjacz tjuñitača jaka pascua pjijztaž cjen. Nižaza taypurutača. Nekztanaqui Pilatuqui nii judío žoñinacžquiz cjichiča:

—Tiiča ančuca chawjc jiliri qui.

¹⁵ Ninacaqui kjawchiča, tuž cjican:

—¡Ticžla tiiqui! ¡Ticžla tiiqui! ¡Cruzquiz ch'awczla!

Nekztan Pilatuqui ninacžquiz cjichiča:

—¿Kjažt ančuca tsjan chawjc jiliri ch'awcznas?

Nii timplu jilirinacaqui tuž kjaaziča:

—Wejtnacaltaqui zinta tsjan chawjc jiliri žejlča, César cjitača.

¹⁶ Jalla nekztanaqui Pilatuqui ninacž kuzcama Jesusa intirjichiča cruzquiz ch'awcta cjisjapa.

CRUZQUIZ CH'AWCTACHA

¹⁷ Jalla nekztanaqui Jesusaqui chjichtatača. Persuna cruza kuzi ojkkatchiča Ach Tsji cjiča tjuuchiz yokquin. Nii yokaqui hebreo tawkquiz Gólgota cjitatača.

¹⁸ Jalla nicju cruzquiz ch'awctatača, nižaza nižtan chica tsjii pucultan žoñinaca yekja cruzanacquiz ch'awctazakaztača, Jesusiž porap kjuttan, Jesusazti ninacž taypiz.

¹⁹ Nižaza Pilatuqui tsjii letrero paakatchiča, tuž cjican: “Jesusa Nazaret wajtchiz žoñi. Judionacž tsjan chawjc jiliri”. Jalla nii paažcu Jesusiž ach juntuñ cruzquiz ch'awczinchiča.

²⁰ Chawc wajt žcati Jesusaqui cruzquiz ch'awctatača. Jalla nižtiquiztan walja judío žoñinacaqui niž letrero liichiča. Nii letreruqui čjep tawkquiztan cjiirtatača, hebreo tawkquiztanami, griego tawkquiztanami, nižaza latin tawkquiztanami.

²¹ Nii letrero cheržcu timplu jilirinacaqui Pilatužquiz cjichiča:

—Ana cjiira, “Judionacž tsjan chawjc jiliri” cjicanaqui. Antiz cjiira, “Tii žoñiqui cjiča, ‘Wejrtča judionacž tsjan chawjc jiliritqui’ ”. Jalla nuž cjiira.

²² Pilatuqui tuž kjaaziča:

—Jaknužt cjiirčinžlaja, nužupanikaz cjequiča.

²³ Zultatunacaqui Jesusa cruzquiz ch'awcžcu niž zquti ricujchiča. Nižaza pajkpic partiquiz tojziča, nii pajkpaltan zultatunacaqui. Tsjii pajk tol zqutiqui ana ch'ucuchiz watzatača, tsewcchuc kozzuc pakjipacha.

²⁴ Jalla nižtiquiztan nii zultatunacaqui porapat kazassiča, tuž cjičan:

—Anačhum wjajrla. Antiz surtiila. Tii zqutiqui jeczquizkat surti cayačhani nižtaž cjequiča.

Jalla nuž paatan cjiirta Yooz takuqui cumplissiča. Cjiirta Yooz taku tuž cjiča: “Ninaczpora wejt zquti tojziča, nižaza parti zquitquiztan surtiyassiča”. Jalla nuž paachiča nii zultatunacaqui.

²⁵ Jalla nekz Jesusiž cruz žcati tsijtsiñ želatča, Jesusiž maa; nižaza niž maa cullaqui; nižaza María (Cleofas tjuntača); nižaza María Magdalena; nii pajkpaltan želatča.

²⁶ Jesusaqui niž maa cherchiča. Nižaza niž pecta tjaajinta žoñi naaža žcati tsijtchi želatča. Jalla nuž cheržcu Jesusaqui niž maaquiz cjichiča:

—Maataka, tiiča am maati cunta.

²⁷ Nekztanaqui nii tjaajinta žoñžquiz cjichizakazza:

—Taača am maaqui.

Jalla nekztanpacha nii tjaajinta žoñiqui Jesusiž maa ricujžcu persun kjuya chjitchiča.

JESUSAQUI TICZA

²⁸ Jalla nekztanaqui Jesusaqui zizziča, tjapa Yooz Epiž tjaata langznaca liwž žeržtapantača, jalla nii. Nekztan cjichiča:

—Kjaz kjaral paznuča.

Jalla nuž cjičan, cjiirta Yooz takuqui cumplissiča.

²⁹ Jalla nekzi tsjii ojch želatča jar vinchiz. Jalla nekztanaqui kjaz ch'umñi esponja t'awziča nii vinqiz. Nekztan hisopo cjita munti parquiz chjapžcu, Jesusiž atquin ch'iižinchiča.

³⁰ Jesusaqui nii jar vinu licžcu, nekztan cjichiča:

—Tjapaž cumplissay. —Jalla nuž chiižcu Jesusaqui acha colžcu ticziča.

³¹ Pascua pjijzta tjacz tjuñitača. Niiž jakatažu jeejz tjuñitača, nižaza chawc pjijzti tjuñitača. Jalla nižtiquiztan judío žoñinacaqui nii cruzquiz ticziž curpunaca anaž nuž tsijiptapacha chjelinz pecatča. Jalla nižtiquiztan nii judionacaqui Pilatužquin maychiča, cruzquiz ch'awcta žoñinacz lis tsjij kjolkjolžinajo, apura ticskatsjapa. Nekztan ticžtan cruzquiztan apakznasača.

³² Nekztan Pilatuqui zultatunaca mantichiča, nii cruzquiz ch'awctanacz lis kjolzjapa. Primir tjañž lismi kjolžinchiča. Nižaza tsjii tjañž lizmi kjolžinchizakazza.

³³ Nekztanaqui Jesusižquiz macjatžcu, nii zultatunacaqui cherziča, ticzi, jalla nii. Jalla nižtiquiztan niž lismi ana kjolkjolžinchiča.

³⁴ Pero tsjii zultatuqui Jesusiž ch'ill kjuttan chjapžinchiča pajk cuchillžtan. Jalla nuž chjaptan ljocmi kjazmi lewchiča.

³⁵ Wejrpacha jalla nii cherchinča. Jalla nižtiquiztan werara tielarchinča nii puntuquiztan, ančuczakaz criyajo. Weriz tielarta takuqui werarapanča.

³⁶ Jalla tii watchi puntunacquiztan cjiirta Yooz takuqui cumplissiča. Cjiirta Yooz takuqui jalla tuž cjiča: “Anaž jakzilta niž tsijimi kjoltaž cjequiča”.

³⁷ Nižaza tsjii cjiirta Yooz takuqui tuž cjiča: “Ninacaqui ninacz chjapta žoñiqui cheraquiča”.

JESUSAQUI TJATZTACHA

³⁸ Jalla nekztanaqui tsjii Arimatea wajtchiz žoñiqui, José cjita, Pilatužquin mayi ojkičiča. Josequi Jesusiž curpu maychiča tjatzjapa. Josequi chjozaka Jesusiž chiita tjaajintanaca catokchiča, ana jeczquizimi mazcu. Parti judío jilirinaczquiztan eksiča. Jalla nuž maytan Pilatuqui permiso tjaachiča. Jalla nekztanaqui Josequi ojkičiča Jesusiž curpu chjichi.

³⁹ Nižaza Nicodemo cjita žoñiqui Jesusiž curpu tjaczñi tjonchiča. Jalla nuž Jesusiž curpu tjaczjapa zjicchiča, tsjii quintala zuma ulurchiz mirržtan aloestan t'ajžta. Niiž tuquiqui Nicodemuqui Jesusižquin ween tjonzitača.

⁴⁰ Josežtan Nicodemžtan Jesusiž curpu tjacziča. Nižaza nii mirržtan aloestan jalla ninacžtan zuma pañunacžtan Jesusiž curpu capziča, jaknužutažlaj nii judío žoñinacž cuzturumpi, jalla nuž.

⁴¹ Jesusiž cruzquiz ch'awcta yokquin muntinaca želatča. Nii muntinac yokquiz tsjii ew sepulturu želatča, ana jec ticzimi tjažtatača nii ew sepulturquiz.

⁴² Judionacž jeejz tjuñimi pascua pjijzta tjuñimi wajillatača. Pero nii ew sepulturuqui žcatillatača. Jalla nižtiquiztan nii sepulturquin Jesusiž curpu tjatchiča.

20

JESUSAQUI JACATATCHICHA

¹ Semana kalltiznan nii tuming wenz chawjc kjantati María Magdalena sepulturquin ojkchinča. Nekztan cherchinča sepultura pjuczta maz, cjetžtatača.

² Jalla nekztan María Magdalenqui zati pariju ojkchinča, Simón Pedružquin, nižaza nii Jesusiž pecta tjaažinta zoñžquin. (Jalla niiča tii livru cjirñi Juan cjitaqui.) Jalla naa Mariiqui ninacžquiz paljaychinča, tuž cjican:

—Jesús Jilirž curpu sepulturquiztan chjichtača. Nižaza jakziquin chjichcu tjažtakazlani anača zizzuca.

³ Jalla nekztanaqui Pedružtan nii tsjii pecta tjaažinta žoñžtan ulanžcu sepultura cherzñi ojkchiča.

⁴ Ninacac pucultan juntu zatatača. Nii tsjiiqui tsjan apura zajtchiča Pedružquiztan. Jalla nuž zajžcu Pedruž tuqui sepulturquin irantichiča.

⁵ Irantižcu sepulturquiz colžcu chercherziča, nii Jesusiž curpu tejlžta pañunaca nezkikaz cherziča. Pero ana luzziča.

⁶ Niiž wiruñ Simón Pedruqui irantichizakazza. Jalla niiqui sepulturquiz luzziča. Nižaza niiqui Jesusiž curpu tejlžta pañunaca cherziča.

⁷ Jesusiž acha jeržinta pañu morokpachalla tsjii latu nonžtatača. Parti pañunacžtan anatača juntu.

⁸ Jalla nekztanaqui nii tuqui irantiñi žoñiqui sepulturquiz luzzizakazza. Jalla nii pañunaca cheržcu, criichiča, Jesusa jacatatchi, jalla nii.

⁹ Cjirta Yooz takuqui Jesusaž ticziquiztan jacatatz puntuquiztan chiiča. Pero Jesusiž tjaažintanaqui nii cjirta Yooz taku imaž intintazatača.

¹⁰ Jalla nekztanaqui Pedružtan Juanžtan, jalla nii pucultanaqui kjuya quejpciča.

MARIA MAGDALENAZ QUINTU

¹¹ Maria Magdalena cjitiqui sepultur zancu želatča, kaacan. Jalla nuž kaacan sepultur kjutñi colžcu cherzinča.

¹² Nekz sepulturquiz pucultan anjilanaca chiw zquti cutchi želatča. Jakziquiz Jesusa tjažtatažlaja, jalla nekz julzi želatča. Tsjiiqui ach kjuttantača, tsjiiqui kjojch kjuttantača.

¹³ Nii anjilanacaqui naaquiz pewcziča:

—Cullacalla, ¿kjažtiquiztan am kaa? —cjican.

Naaqui tuž kjaaziča:

—Wejt Jilirž curpu chjitchiča. Jakziquin chjittakazlani, anal zizi atuča.

¹⁴ Jalla nuž chiižcu, kjutzquichinča. Jalla nuž kjutžcu Jesusa tsijtsi cherziñča. Pero Jesusa ana pajchinča nii ratu.

¹⁵ Nekztan Jesusaqui naaquiz pewcziča, tuž cjican:

—Cullacalla, ¿kjažtiquiztan am kaa? ¿Jequim kjurya?

Mariiqui persun kuzquiz pinsichinča: “Munti yoka cwitiñi žoñiž caa”, cjican. Jalla nižtiquiztan nižquiz cjichinča:

—Señor, amqui Jesusiž curpu chjitchamžlaj niiqui, maznalla, jakziquin nii curpu cjichamta. Nekztan wejrqui niž curpu chjichasača.

¹⁶ Jesusaqui nekztan naaquiz cjichiča:

—¡María!

Mariiqui nuž chiiñi nonžcu zumpacha kjutzinča. Nekztan Jesusižquiz chiichinča:

—¡Raboni! —cjican. Nii takuqui hebreo tawkquiz “Maestro” cjiča.

¹⁷ Nekztanaqui Jesusaqui naaquiz cjichiča:

—Wejr cutzna. Wejrqui imazil Yooz Ejpžquin okuča. Jaziqui mazñi okaquiča weriž tjaajinta jilanacžquin. Tuž cjican maznaquiča: “Wejrqui Yooz Ejpžquin okača. Jalla niiqui wejt Ejpča, nižaza ančuca Ejpzakazza. Nižaza niiča wejt Yoozqui, nižaza ančuca Yoozqui”.

¹⁸ Jalla nekztanaqui María Magdalenqui Jesusiž tjaajintanacžquin mazñi ojkchinča, tuž cjican:

—Jesusa Jiliri cherchinča.

Nekztan ninacžquin Jesusiž chiitanaca mazzinča.

JESUSAQUI WILTA PARIZICHICHA

¹⁹ Tumincuqui jalla nii nooj ween niž tjaajintanacaqui tsjii kjuyquiz želatča. Kjuya zuma chawjcchitača, quintra žoñinaca ekscu. Jalla nuž cjen Jesusaqui tsijtsi ninacž taypiquiz parizichiča. Nekztan ninacžquiz tsaanchiča, tuž cjican:

—Ančucqui walikaz cjee.

²⁰ Jalla nuž tsaanžcu, Jesusaqui ninacžquiz tjeezicha niž pjetta kjaranacaž, nižaza niž chjapta ch'illa. Jalla nekztanaqui ninacaqui Jesús Jiliri cheržcu, ancha chipchi cuntintutača.

²¹ Jalla nekztanaqui Jesusaqui wilta ninacžquiz tuž chiichiča:

—Walikaz cjee. Jaknužt Yooz Ejpqui wejr cuchanžquichiča, jalla nižta zakaz wejrqui ančucaquiz cuchanžcača.

²² Jalla nuž chiican, Jesusaqui ninacž kjutñiž pjuziča, tuž cjican:

—Ančucqui, Yooz Espíritu Santuž tanzna.

²³ Jakzilta žoñž ujnaca ančucqui pertunaquiž niiqui, Yooz Epiž pertuntaž cjequiča. Nižaza jakzilta žoñž ujnaca ančucqui ana pertunaquiž niiqui, ana pertuntaž cjequiča.

WILTA PARIZICHICHA, TOMAS ZELAN

²⁴ Nii oraqui nii tuncapan illzta žoñinacžquiztan tsjiiqui ana želatča, Tomás cjita. Niiž tsjii tjuuqui “Pacha” cjitatača. Jesusa tjonz, nii ora ana želatča.

²⁵ Wiruñaquei parti tuncapan tjaajintanacaqui Tomasquiz quint'ichiča, tuž cjican:

—Jesús Jiliri wejrnac cherchinča.

Pero Tomaszi tuž cjichiča:

—Anal criyasača. Wejrqui Jesusiž clawžtan pjetta kjarami ana cheraž niiqui, nižaza nii pjetquiz ana wejt kjar loc'ana chjapznaž niiqui, nižaza niž ch'ill pjetquiz wejt kjara ana chjapznaž niiqui, jalla nižtiquiztan anal criyasača.

²⁶ Quinsakal tjuñquiztan nii tjaajintanacaqui wilta kjuyquin želatča, Tomastanpacha. Kjuy chajwcchiž cjenami, Jesusaqui ninacž taypiquiz tsijtsi parizichiča. Nekztan ninacžquiz tsaanchiča, tuž cjican:

—Ančucqui walikaz cjee.

²⁷ Jalla nekztanaqui Tomasquiz paljaychiča, tuž cjican:

—Wejt kjara chertzna. Am kjar loc'ana tekz chjapzna. Nižaza am kjara zjijca, wejt ch'illquiz chjapzna. Anapan tira ana ciiñi kuzziz cjee. Antiz criya, wejtquiz kuzziz cjee.

²⁸ Tomasqui tuž kjaaziča:

—¡Wejt Jiliri! ¡Wejt Yooz!

²⁹ Jesusaqui nekztan niizquiz cjichiča:

—Jaziqui Tomás, amqui wejr cheržcu criichamča. Ana wejr cheržcu criichinacaqui, juc'ant waliž cjequiča.

³⁰ Jesusaqui niiz tjaajintanacaž cheran walja milajrunaca paachiča. Parti milajrunacakaz tii libruquiz cjiirtatača.

³¹ Jalla tekz cjiirta milajrunacaqui wejrqui cjiirchinča ančhucqui criyajo, Jesusaqui Cristučha, nižaza Yooz Majchča, jalla nii. Nižaza cjiirchinča, ančhuc Cristužquin kuzziz cjisjapa, arajpachquin wiñaya kamzjapa.

21

JESUSAQUI WILTA PARIZICHICHA

¹ Niiž wiruñ Jesusaqui niiz tjaajintanacžquiz wilta parizichiča, Tiberias kot atquin. Jalla tuž watchiča.

² Nekz želatča, Simón Pedružtan, “Pacha” cjita Tomastan, Caná de Galilea wajtchiz Natanaelžtan, Zebedeož majchnacžtan, nižaza tsjii pucultan iya tjaajintanacžtan. Jalla ninacauntu želatča.

³ Nekztan Simón Pedruqui cjichiča:

—Wejrqui ch'iz tani okučha.

Nii partinacaqui cjichiča:

—Wejrnacmi amtan chical okača.

Jalla nekztan kotquin ojkchiča. Nicju tsjii warcuquin luzziča. Pakara langzcanami ana čjul ch'izmi tani atchiča.

⁴ Kjanžcanalla, Jesusaqui kot atquin parizizquichiča. Nii tjaajintanacaqui ana zizatča, nii Jesusažlaj, jalla nii.

⁵ Nekztanaqui Jesusaqui ninacžquiz cjichiča:

—Jilanaca, čana čjul ch'izmi tanchinčhuckaya?

Ninacaqui kjaaziča:

—Ana čjul, —cjican.

⁶ Nekztanaqui Jesusaqui ninacžquiz cjichiča:

—Nii warcuž žew latuquiz ch'iz tanz tjojtzna. Jalla nekz ch'iznaca tanznaquiča.

Jalla nuž tjojtžtiquiztan wacchi ch'iznaca tanzicha. Wacchi ch'iznaca tanchiž cjen, wirataž ana warcuquin joozuca.

⁷ Nii Jesusaž ancha k'aachita žoñiqui Pedružquiz cjichiča:

—Niiča Jesús Jiliriqi.

Nuž chiitiquiztan nii orapachalla Pedruqui niiz chjojka zquiti cutžcu, kot kjazquin luzziča, kjazuntuñ narcán Jesusižquin ojkzjapa. Warcuquiz langzcan, ana zquitchiztača, calzunsillo alaja.

⁸ Parti tjaajintanacaqui warcuquiz ojkchiča ch'iz tanzquiz ch'iznaca joočan. Nii ch'iz tanzqui ch'iznacžtan chjiipachatača. Nii joočan kot atquin macjatžquichiča. Ninacaqui kot atquiztan patac metruž jalla nužquinkaztača.

⁹ Nekztanaqui kot atquin irantižcu, warcuquiztan ulanchiča. Nižaza uj paraza cherchiča, ch'iz tjucta. Nižaza t'anta želatča.

¹⁰ Nekztanaqui Jesusaqui ninacžquiz cjichiča:

—Tsji kjaž ančhucaž tanta ch'iznaca zjiica.

¹¹ Jalla nuž maytiquiztan Simón Pedruqui warcuquiz luzcu nii ch'iznaca kot atquin joožquichiča. Nii ch'iz tanzqui pajk ch'iznacžtan chjiipitača, patac pjijska tunca quinsani ch'iznacchiztača. Jalla nuž wacchi tanchiž cjenami, nii ch'iz tanzqui ana wjajrzyča.

¹² Jesusaqui ninacžquiz cjichiča:

—Picha. Chjeriž lujl-lay.

Ana ultimu pajžcumí anaž jecmi nii tjaajintanacžquiztan pewczñi atatčha, “¿Ject amya?” cjicanaqui. Ninacaqui “Jesús Jilirižlani” nuž kuzquiz pinsichičha.

¹³ Jalla nekztanaqui Jesusaqui ninacžquin žcatžinžquichičha. T'anta tanžcu, ninacžquiz tjaachičha, nižaza ch'iz zakaz ninacžquiz tjaachičha.

¹⁴ Ticziquiztan jacatatžcu, tii čhjep wiltiquiziqui Jesusaqui niž tjaajintanacžquiz parizichičha.

SIMON PEDRUZQUIZ CHIICHICHA

¹⁵ Jalla nuž čhjeri lujltiquiztan, Jesusaqui Simón Pedružquiz pewczyčha, tuž cjican

—Simón, Jonás maati, ¿amqui tii žoñinacžquiztan wejttan juc'anti munazkaya?

Pedruqui tuž kjaazičha:

—Jesalla, wejt Jiliri. Amqui zizza, wejr am pecučha, jalla nii.

Nekztan Jesusaqui nižquiz cjichičha:

—Wejt žoñinacžquiz arajpach čhjeri tjaa. Ninacačha uuzanacažtakazqui.

¹⁶ Nekztan Jesusaqui Pedružquiz wilta pewczyčha, tuž cjican:

—Simón, Jonás maati, ¿amqui wejttan zuma munazkaya?

Pedruqui tuž kjaazičha:

—Jesalla, wejt Jiliri. Amqui zizza, wejr am pecučha, jalla nii.

Jesusaqui nižquiz cjichičha:

—Wejt žoñinaca cwita. Ninacačha uuzanacažtakazqui.

¹⁷ Nekztanaqui Jesusaqui čhjep wiltiquiziqui Pedružquiz pewczyčha:

—Simón, Jonás maati, ¿amqui wejr peckaya? —cjican.

Pedruqui jalla nuž čhjep wilta pewctiquiztan llaquita cjissičha. Jalla nekztanaqui Pedruqui tuž kjaazičha:

—Wejt Jiliri, amqui tjapa zizñampančha. Amqui zizza, wejr am pecučha, jalla nii.

Nekztan Jesusaqui nižquiz cjichičha:

—Wejt žoñinacžquiz arajpach čhjeri tjaa.

¹⁸ Ultim weraral amquiz chiyučha. Amqui tjowa cjicanaqui zquiti cujtžcu jakz-iquinam ojkz pecčhaja, ojkñamtačha. Pero chawczcuzti, amqui kjaram waaznaquičha. Yekja žoñiqui am zquiti tjutznaquičha, nižaza ana amiž ojkz pecta, jalla nijcchuc čhjichta cjequičha.

¹⁹ Jalla nuž chiižcu, Jesusaqui mazinchičha, jaknužt Pedro ticstančhalaja, nižaza jaknužt Pedruž cjen Yoozquin honora tjaataž cječhaja, jalla nii. Nekztan nuž chiižcu, Jesusaqui Pedružquiz tuž cjichičha:

—Wejt kamañquizka kama.

TJAAJINTA K'AYI ŽOÑI

²⁰ Nekztanaqui Pedruqui wir kjutñi kjutžcu, Jesusiž tjaajinta k'ayi žoñž kjutñi cherzičha. Nii tjaajinta k'ayi žoñiqui pascu pjijztiquiz čhjeri lulan, Jesusiž latuquiz želatčha. Niiqui Jesusižquiz pewczitačha, tuž cjican: “Wejt Jiliri, ¿ject am tankataquiya?”

²¹ Jalla nii tjaajinta žoñž kjutñi cheržcu, Pedruqui Jesusižquiz pewczyčha, tuž cjicha:

—Wejt Jiliri, ¿tii žoñžquiz čhjulut wataquiya?

²² Jesusaqui Pedružquiz tuž kjaazičha:

—Wejt tjonzcama tii žoñž žejtz munaž niiqui, ¿čhjulut amquiz importiya? Wejt kamañquizka kama amqui.

²³ Jalla nuž Jesusaž chiitiquiztan, tii quintu ojkchičha, nii tjaajinta k'ayi žoñiqui ana ticznaquičha, jalla nii. Pero Jesusaqui ana nižta chiichičha, “Amqui ana ticznaquičha” cjican. Pero Jesusaqui cjichičha, “Wejt tjonzcama tii žoñž žejtz munaž niiqui, ¿čhjulut amquiz importiya?” Jalla nužkaz cjichičha.

²⁴ Wejrpachača nii tjaajinta k'ayi zoñiqui. Wejrqui tii cartiquiz cjiirtanaca maznuča. Nižaza tii liwruquiz cjiiruča. Nižaza criichi zoñinacaqui zizza, weriž mazta taku werarapanča.

²⁵ Nižaza iya juc'anti Jesusaž paatanaca žejlča. Tjapa niž paatanaca cjiirta cjesaž niiqui, nii cjiirta liwrunaca tjapa tii muntuquiz chjijsnasača. Nižaza iya juc'anti želaquiča. Nužukazza. Amén.

LOS HECHOS DE LOS APOSTOLES

¹ Zuma Teófilo, tuqui wejrqui tsjii libro cjiirchinča tjapa Jesucristuž puntuquiztan. Jesusiž ojklaytanacami tjaajintanacami cjiirchinča, nasta tjuñquiztan,

² arajpacha quejpsquiz tjuñicama. Ima arajpacha quejpžcan Jesusižtan Espíritu Santužtan apostolonacžquin mantichiča, jaknužt kamz waquizičhaja, jalla nii.

³ Jesusaqui ticziquiztan jacatatžcu tii yokquiz iya pusi tunc tjuñi žejlchiča niž apostolonacžquiz persuna tjon tjonzjapa. Tjon tjonžcan, kjanapacha tjeeziča, “Jacatatchinča”, cjican. Nižaza jaknužt Yooz mantuquiz kamz waquizičhaja, jalla nii tjaajinchiča.

⁴ Tsjii nooj niž apostolonacžtan juntjapžcu, Jesusaqui ninacžquiz chiižinchiča, tuž cjican:

—Anača tii Jerusalén wajtquiztan ulnaquiča. Tekziča tjewznaquiča ančhucqui, wejt Yooz Epiž chiita taku cumpliscama. Niiqui Espíritu Santo cuchanžcaquiča; jalla nicamaž tjewznaquiča. Tuquitan wejrqui anchucaquiz nii puntu paljaychinpantača.

⁵ Juan Bautistaqui kjaztan bautissipanča. Anziqui tsjii kjaž majquiztan ančhucqui Espíritu Santužtan bautistaž cjequiča. —Nuž cjichiča Jesusaqui.

JESUCRISTUQUI ARAJPACHQUIN QUEJPCHICHA

⁶ Apostolonacaqui Jesusižtan juntjapsi cjen, pewcziča, tuž cjican:

—Wejt Jiliri, ¿anzpacha amqui tii Israel wajtchiz žoñinaca ninacž quintranacžquiztan liwriyaquiya? ¿Tii žoñinaca persuna mantisjapaya?

⁷ Nekztanaqui Jesusaqui ninacžquiz kjaaziča, tuž cjican:

—Yooz Ejppankazza timpunacaqui mantiñiqui, čhjulatorat tii tii watačhaja, jalla nii. Nižaza Yoozqui ančhucaquiz ana zizkatz munča, čhjulatorat tii Israel žoñinaca liwriita cječhaja, jalla nii.

⁸ Pero Espíritu Santuž ančuca kuzquiz luztan, ančhucqui tjup kuzziz cjequiča. Jalla nekztan ančhucqui wejt puntuquiztan paljayñi ojklayaquiča Jerusalén wajt yokaran, nižaza Judea yokaran, nižaza Samaria yokaran, nižaza tjapa kjutñi. —Jalla nuž cjichiča Jesusaqui.

⁹ Nekztan apostolonacaž cheran Jesusaqui ninacž taypiquiztan tsewcchuc waytis- siča. Yooz Epiž chjichtatača arajpacha. Nužquiz tsjir taypiquiz katchiča Jesusaqui. Ana iya tjenchiča.

¹⁰ Nekztanaqui tsewcchuc cheksnan, pucultan chiw zquitchiz žoñinacažtakaz jeczquichiča ninacž žcati.

¹¹ Nii pucultan anjilanacaqui tuž cjichiča:

—Galilea žoñinaca, ¿kjažtiquiztan ančhucqui tsewcchuc chekžqui? Jesusaqui ančucaquiztan arajpacha chjichtača. Pero tsjii nooj nii Jesusapacha wilta tii muntuquiz quejpžcaquiča, jaknužt tsjir taypiquiz katčhaja, jalla nuž tsjir taypiquizzakaz jeczcaquiča. Nuž tjonaquiča. —Nuž cjichiča anjilanacaqui.

MATIASQUI ILLZTA APOSTOL CJISSICHA

¹² Jalla nekztanaqui apostolonacaqui Olivos cjita curullquiztan chjijwžquižcu, Jerusalén watja quejpchiča. Jerusalén watjaqui nii curullquiztan žcatitača, jeejz tjuñquiz jaknužt judiuž lii jaru ojkz waquizičhaja, jalla nužullquin ojkztača.

¹³ Jerusalén watja irantižcu apostolonacaqui alujta kjuya luzziča; tsewcta altu pisuquin alujtatača. Nii apostolonacaqui tinacatača: Pedrotača, Jacobotača, Juantača, Andrestača, Felipitača, Tomastača, Bartolomitača, Mateotača, Jacobo

cjita Alfeož majhtača, Simonatača (niiqui cananista cjita partir žoñitača), nižaza Judas cjita Jacobož majhtača. Jalla ninacatača apostolonacaqui.

¹⁴ Tjapa ninacaqui tsjii kuzziz Yoozquin mayizizjapa ajcajczñipantača. Ninacžtan chica želatča Jesusiž lajknacžtan, Jesusiž maatan, nižaza yekja maatakanacžtan. Tjappacha Yoozquin mayizican želatča.

¹⁵ Tsjii noojiqui jalla nuž chicapacha želan Pedruqui tsijtsiča, nii Yoozquin criichi žoñinacž taypiquiz. Nii oraqui tsjii patac paatuncani nužquintakalča nii criichi žoñinacaqui. Pedruqui ninacžquiz cjichiča:

¹⁶ –Jilanaca, cullaquinaca, Judasqui Jesusa tanñi žoñinaca irpichiča. Tuquitan jalla nii Judas puntuquiztan Espíritu Santuqui Davidžquiz mazinchiča, Yooz tawk liwruquiz cijrta cjisjapa. Nižaza nii Espíritu Santuž mazintaqui cumplispantača. Jaziqui cumplissiča.

¹⁷ Judasqui učum partiquiztantača. Nižaza Yoozta langzñiquiz uchtatača.

¹⁸ Nii anawali paañi Judasqui Jesusa tarasunta paaztan tsjii yoka kjaychiča. Nekztan, kozzuc achchiz tjojtscu, walu pjatsi ticziča.

¹⁹ Tjapa Jerusalén wajtchiz žoñinacaqui nii Judas quintu zizza. Jalla nii quintu nonžcu, Judas kjayta yoka tjuuskatchiča, Acéldama cjican. Acéldama tjuuqui ninacž tawkquiztan “Ljoc Yoka” cjiča.

²⁰ Judas puntuquiztan Salmos cjita liwruquiz tuž cijrtača: “Niiž kjuyaqui jaytitaj cjila. Nižaza ana jecmi nii kjuyquiz kamla”. Salmos cjita liwruquiz tuž zakaz cijrtača: “Niiž puestuquiz yekja uchtaj cjila”.

²¹ Pedruqui tira chiichiča, tuž cjican:

–Jalla nii Yooz takuž cjen učumnacquiztan tsjiiqui illza, Judas puesto tanzñijapa. Jaziqui nii puesto tanzñi žoñiqui tjapa wejrnacaž Jesusižtan ojklayta timpu cumpant'ichi žoñinacžquiztan illzta cjistanča.

²² Juanž bautis timpu jalla nijctanpacha Jesusa arajpacha ojkzcama, jalla nii timpu cumpant'ichi žoñinacžquiztan nii žoñiqui illzta cjistanča. Nekztan nii žoñiqui wejtnacatan chicapacha cjequiča, Jesusaž jacatatta puntu paljayzjapa. –Nuž cjichiča Pedruqui.

²³ Nekztanaqui pucultan žoñi illsiča, tsjiiqui Judas puesto tanzñijapa. Tsjiiqui José cjitatača, nižaza Josiqui Barsabás cjitazakaztača. Nižaza Josiqui Justo tjuuchizzakaztača. Tsjiizuñqui Matías cjitatača.

²⁴ Nekztan nii ajczñi žoñinacaqui mayizichiča, tuž cjican:

–Jesús Jiliri, amqui tjapa žoñinacž kuz zizza. Jaziqui tii pucultiquiztan amiž illzta apóstol tjeeznalla.

²⁵ Niiqui Judas puestuquiz uchtaž cjequiča, amquin sirwiñiž ojklayzjapa. Judasqui nii puestuqui pertichiča anawali uj paažcu. Jaziqui infiernuquin ojkchiča. Jalla nuž nižtaqui waquizichiča. –Jalla nuž mayizichiča.

²⁶ Nekztanaqui ject Jesusiž illzta, jalla nii zizjapa, zurtiassiča, nii pucultiquiztan jakziltižquiz nii zurti cayačhaja, jalla nii. Jalla nuž zurtiascu, nii zurtiqui Matiasquiz caychiča. Jalla nekztan Matiasqui nii parti tuncaman illzta apostolonacžtanuntu cjissiča. Lijitum apóstol nužquiz cjissiča.

2

YOOZ ESPIRITU SANTUQUI TJONCHA

¹ Pentecostés cjita pjijsta tjuñquiz tjapa Jerusalén žejlñi criichi žoñinacaqui juntassiča tsjii kjuyquizkaz.

² Tiripintit tsewctan tsjii chawc tjamž joražtakaz nonziča. Tjapa nii kjuya zmali kjaazkatchiča.

³ Jalla nekztanaqui uj lastakaz jeczquichiča zapa mayni ninacz juntuñcama t'akzta, yekja yekja. Jalla nuž zapa maynižquiz nii ujnacaqui želatča.

⁴ Jalla nuž tjonžcu Espíritu Santuqui tjapa ninaczquiz luzziča. Nekztan ninacaqui parijunaca yekja yekja taku chiichičiča, jaknužt nii Espíritu Santuž chiikatčhaja, jalla nii.

⁵ Nii timpunacaqui Jerusalén wajtquin wacchi judío žoñinaca kamñi želatča, ninacz cuzturumpi jarupan paañi. Nii judío žoñinacaqui tjapa kjuttan ajczquichitača.

⁶ Jalla nii suyniñi jora nonžcu, žoñinacaqui juntassiča. Zapa mayni nii žoñinacaqui persun taku nonziča. Nekztan ana tantiichuca, čhjulut watačhaja, nii.

⁷ Jalla nižtiquiztan ninaca ancha kuz turwaysi cjissiča. Ispantichi ninacpora parlassiča, tuž cjican:

—¿Tjapa nižta chiichiiñinacaqui anaj Galilea wajtchiz žoñinacajo?

⁸ Zapa mayni učum persun takuž nonža. ¿Jaknužupan teejo? —Jalla nuž cjichiča.

⁹ Nekz želatča Partia žoñinaca, nižaza Media žoñinaca, nižaza Elam žoñinaca, nižaza Mesopotamia žoñinaca, nižaza Judea žoñinaca, nižaza Capadocia žoñinaca, nižaza Ponto žoñinaca, nižaza Asia yokchiz žoñinaca,

¹⁰ nižaza Frigia žoñinaca, nižaza Panfilia žoñinaca, nižaza Egipto žoñinaca, nižaza Africa žoñinaca, nii Afric yokaqui Cirene yokž nawjktuñtan. Nižaza Roma wajtquiztan tjonñi žoñinaca želatča. Yekjapanacaqui judío maa ejpchiz žoñinacatača. Yekjapanacaqui ana judío maa ejpchiz cjenami judionacz cuzturumpi paañi žoñinacapantača.

¹¹ Nižaza želatča Creta wajtchiz žoñinaca, nižaza Arabia žoñinaca. Nii žoñinacaqui parlassiča, tuž cjican:

—Wacchi watjanacchiz žoñinacala učumtanaqui. Pero zapa mayni učum persun takunacaz nonžla. ¡Nii tjapa takunacžtan chiiñinacaqui Yooziž ispanlichuca paatanaca quint'ila!

¹² Jalla nuž chiichiiñi nonžcu tjappacha ispanlichiča. Kuz turwaysi cjissiča. Nekztan pewcsassiča, tuž cjican:

—Nii puntuquiztanac, ¿kjažt cjeejo?

¹³ Yekjapanacaqui iñarchiča, tuž cjican:

—Aaaa, ninacaqui licchikazza.

PEDRUQUI ZOÑINACŽQUIZ PALJAYCHICHA

¹⁴ Nekzpacha tsijtsi želatča nii tuncapan illzta apostolonaca. Jaziqi Pedruqui altu joržtan paljaychiča, tuž cjican:

—Judea yokquiz kamñi žoñinaca, nižaza Jerusalén wajtquiz žejlñi žoñinaca, wejt taku zumpachaž nonžna. Čhjulužlaja, jalla niil kjanzt'ača.

¹⁵ Ančhucqui “Tii žoñinaca licchikaz” cjican pinsiča. Pero tii žoñinacaqui anača licchi. Anzic wenzlakača.

¹⁶ Anziqi Joelž cjirta Yooz taku cumplissa. Nii Joelqui Yooz cuntiquiztan maz-inchiča, tuž cjican:

¹⁷ “Yoozqui tuž cjiča, Tii timpu tucuzinžtan wejrqui tii muntuquiz žejlñi žoñinaczquiz wejt Espíritul tjaača. Wejt Espíritu Santuž kuzquiz luzziz cjen, ančhuca maatinacaqui lucmajch cjiñi tjunmata cjiñi wejt takuž parlaquiča. Nižaza Espíritu Santuž cjen tjojowaqui visionanaca cheraquiča. Nižaza chawc chawcwanacaqui wiyquin chjuuznaquiča.

¹⁸ Jalla nii timpuquiz wejt sirwiñinaczquiz luctaka cjiñi maataka cjiñi wejt Espíritu cuchanzcača. Nii Espírituž cjen, ninacaqui wejt takuž parlaquiča.

¹⁹ Tsewc arajpachquinami tii yokquizimi wejrqui ispanlichuca siñalanaca tjeeznača, ljocnaca, ujnaca, tsokchi tsjirinaca, uj žketižtakaz, jalla nuž.

²⁰ Ima Jesucristo Jiliriž tjonan, tjuñiqui zumchi cjisnaquiča. Nižaza jiizmi ljocžtakaz cjisnaquiča. Jalla nižtanaca watan, wajillaž Yooz chawc tjuñiqui tjonaquiča, Yooz wali azi tjeežni tjuñi.

²¹ Nii timpuquiziqui jakziltat liwriita cjisjapa Yooz Jiliržquin mayizičhaja, jalla niiqui liwriitaž cjequiča”.

Jalla nuž cjiirchiča Joelqui.

²² ‘Israel wajtchiz žoñinaca, wejt taku nonžna. Jesusaqui Nazaret wajtchiz žoñitača. Ančuca watjanacquiz ojklaycan Jesusaqui Yooz aztan ispantichucanacami, milajrunacami, siñalanacami, jalla ninaca tjeeziča. Nii tjeežta obranaca ančucqui zizza. Jalla nii obranacaqui kjanapacha tjeeziča, Jesusaqui Yooz Epiž cuchanžquita žoñipankazza, jalla nii.

²³ Jalla nuž pajk obranaca paachiž cjenami ančucqui Jesusa conkatchinčucča. Nekztanaqui ančucqui uj paañi žoñinacžquiz Jesusa intirjichinčucča cruzquiz ch'awczjapa. Tuquitanpacha Yooz Ejpqui jalla tižtanaca watzpan zizatča. Nižaza niiz muntacama tii watzjapa mantichiča.

²⁴ Ančucqui Jesusa conkatchinčucča. Yooz Ejpzti Jesusa jacatatskatchiča. Anawal ticzquiztan liwriichiča. Nii ticzqui Jesusižquiztanaqui anapantača atipchuca.

²⁵ Tuqui ažk watanaca David cjita jiliri qui Jesusiž puntu cjiirchiča tuž cjican:

“Yooz Jiliri wejttan chica željñipanča. Jalla nuž wejt kuzquiz Yoozquin zint'iñpanča. Yoozqui wejt žew latuquiz žejlča, wejr yanapzjapa, nižaza wejr ana čhjulquiztanami eksnajo.

²⁶ Jalla nižtiquiztan wejt kuzqui wali cuntintuča. Chipchipcan wejt tawkžtan Yoozquin honorat tjaa-uča. Ticz cjenami, Yoozquin kuzziztča, Yooz Ejpqui wejr jacatatskataquiča.

²⁷ Yooz Tata, amqui ticzi žoñinacžtan wejt alma anam ecaquiča. Wejrqui am lijitum sirwiñi žoñtqui. Jaziqui wejt curpuqui anam ecaquiča sipulturquiz mokajo.

²⁸ Nižaza wejtquiz arajpach kamaña tjaajinchamča. Tii muntuquiz amtan chica kamcan ancha cuntintul cjeeča”.

Jalla nuž Jesusiž puntuquiztan cjiirchiča Davidqui.

²⁹ ‘Jilanaca, učum David cjita tuquita atchi ejpž puntuquiztan kjanapacha intin-tiskats pecuča. David jiliri qui ticziča. Nižaza tjattatača. Anzcama niiz sipulturuqui učum yokquiz žejlča.

³⁰ Davidqui illztatača Yooz taku chiiñijapa. Yooz Ejpqui niizquiz juramintužtan compromitkalča tuž cjican: “David, tsjiiqui am majchmaatquiztan (Cristo cjita) pajk jiliri cjequiča. Niiqui mantiz puestuquiz uchtaž cjequiča, tii wajtchiz žoñinaca mantizjapa.” Jalla nuž Yoozqui Davidžquiz compromitchiča.

³¹ Jalla nii zizcu, Davidqui tuquitanpacha Cristuž jacatatz puntuquiztan chiichiča, tuž cjican: “Cristuž almaqui ticzi žoñinacžtan anaž ecta cjequiča. Nižaza Jesucristuž curpumi anaž mokaquiča.” Jalla nuž Cristuž puntuquiztan chiichiča.

³² Jaziqui Yooz Ejpqui nii Jesucristo jacatatskatchiča. Jacatattan, wejr nacpachača Jesucristo cherchintqui. Jaziqui tisticu cjican, nii puntu weraral chiyasača.

³³ Jesucristuqui jacatatzcu, Yooz Ejpž žew latuquiz walja honorchiz cjissiča, Yooz Ejpžtan chica mantiñi. Nižaza Yooz Epiž tuquita chiita tawk jaru Jesucristuqui Espiritu Santo žoñinacžquiz cuchanžquichiča arajpachquiztan. Nii Espiritu Santuž tjonchiž cjen tii ančucaž chertanacami nonztanacami watchiča.

³⁴ Davidqui persun puntuquiztan ana chiichiča. Davidča tsewc arajpachquin ana ojkhiqui, Yooztan mantizjapa. Davidpachača tuž cjichiqui:

“Wejt Yooz Ejp Jiliri qui wejt Yooz Majch Jiliržquiz chiichiča: ‘Honorchiz cjisjapa, wejt žew latuquiz julzna wejttan chica mantizjapa.

³⁵ Tsjii noojiqui am quintra zoñinaca k'ala atipžtaž cjequiča. Am kjojch koztan tječžtažtakaz cjequiča. Jalla nii oracama wejt žew latuquiz julzna' ”.

³⁶ 'Ančhucqui Jesucristo cruzquiz ch'awcchinčucča. Pero anziqiu Yooz Ejpqui tii Jesusa tsjan chawc jiliri utchiča zoñinaca liwriizjapa. Jalla nuž intintiñi waquizila tjapa Israel wajtchiz zoñinacaqui. Ultim werarača tii takuqui. —Nuž cjican Pedruqui paljaychiča.

³⁷ Jalla nuž nonžcu nii zoñinacaqui persun kuzquiz ancha zint'ichiča. Jalla nižtiquiztan Pedružquizimi parti apostolonacžquizimi pewcziča, tuž cjican:

—Jilanaca, ¿kjažt cjisnaqui? ¿Čhjulut wejrnac paaqui?

³⁸ Nekztanaqui Pedruqui kjaaziča, tuž cjican:

—Ančhucqui persun uj pajžcu, kuz campiya. Nekztanaqui Jesucristuž tjuuquiz bautistaž cjee. Jalla nekztanaqui ančuca ujnaca pertuntaž cjequiča. Nižaza Yooz Espíritu Santuqui ančuca kuzquiz nužukaz luzaquiča.

³⁹ Nii compromitta Espíritu Santuqui tjaataž cjequiča ančucaquizimi ančuca maatinacžquizimi, ažkquin wajtchiz zoñinacžquizimi, nižaza tjapa učum Yooz Jiliriž kjawžta zoñinacžquizimi. Jalla ninacžquizimi Yooz Espíritu Santo tjaataž cjequiča. — Jalla nuž kjaaziča Pedruqui.

⁴⁰ Wacchi takunacžtan Pedruqui ninacžquiz chiižinchiča, tuž cjican:

—Liwriita cjis waquiziča, Cristuž quintra uj paañi zoñinacžtan ana casticta cjisjapa.

⁴¹ Jalla nekztanaqui walja zoñinacaqui Pedruž chiita taku tjapa kuztan catokchiča. Jalla nuž catoktiquiztan tjapa ninaca bautistaž cjissiča. Nii noojiqui tsjii čhjep warank zoñinacaqui yapžquichiča parti Yoozquin criichi zoñinacžquin. Jalla nuž mirchiča.

⁴² Tjapa nii criichi zoñinacaqui apostolonacaž tjaajintanacžquiz walja tjapa kuztača. Ninacaqui tsjii kuzzizpan cjissiča. Chica juntasñitača Yoozquin mayizizjapa, nižaza čjjeri lujljjapa.

CRIICHI ZOÑINACŽ KAMTA

⁴³ Apostolonacaqui walja milajrunacami siñalanacami paachiča. Jalla nuž paatiquiztan tjapa zoñinacaqui ispantichiča.

⁴⁴ Tjapa Yoozquin criichinacaqui juntu kamchiča. Nižaza tjapa ninacž cusasami tsjiiquiz juntjapñitača, zapa maynižquiz tojunzjapa.

⁴⁵ Parti cusasa tuyžcu, nii paaz tojunñitača, ana želinchiz zoñinacžquiz.

⁴⁶ Zapuru timpluquiz ajczñipantača Yoozquin sirwizjapa. Nižaza criichi zoñinacž kjuyquiztan kjuya okatča, juntu čjjeri lujljjapa. Humilde kuzziz zuma cuntintu lujlñipantača.

⁴⁷ Nižaza Yoozquin honora tjaañipantača. Jalla nuž nii criichinacaž zuma kamtiquiztan parti zoñinacaqui ninaca zuma rispitiñitača. Zapuru zoñinacaqui criichiča, liwriita cjisjapa. Nekztan parti criichi zoñinacžquiz juntassiča. Jaziqui Jesucristo Jiliriqiu criichi zoñinaca mirkatchiča.

3

ZUCH ZOÑI ČHJETINTA

¹ Tsjii noojiqui majñakak ora, Pedružtan Juanžtan pucultan timplu kjutñi yawchiča. Nii oraqui Yoozquin mayiziz oratača.

² Nicju tsjii zuch zoñi želatča. Zucha nassipantača. Zapuru timpluquin chjitztatača. Hermosa cjita timplu zanquiz žejlñitača, timplu luzñi zoñinacžquiztan paaz tomangzjapa.

³ Nii zuch zoñiqui Pedružtan Juanžtan timplu luzñi cheržcu, paaz tomangziča.

⁴ Nekztanaqui Pedružtan Juanžtan nii zuch zoñž kjutñi cherziča. Nekztanaqui Pedruqui cjichiča:

—Wejtnaca kjutñi cheržca.

⁵ Jalla nuž chiitiquiztan nii zuch žoñiqui “Paaz onaá” cjican cherzičha.

⁶ Pedruqui cjichičha nekztanaqui:

—Anaž wejta paaz žejlčha. Antis wejta Jesucristuž azi žejlčha, jalla niiztan yanapasačha. Jesucristo cjita Nazaret wajtchiz žoñž aztan amquiz cjiwčha, tsijsna. Oka.

⁷ Nižaza Pedruqui nii zuch žoñž žew kjarcu tanžcu, tsijskatchičha. Nii tsijskatan nii orapacha niiz kjojchanacaqui tsijsni cjissičha.

⁸ Jalla nekztanaqui nii zuch žoñiqui layžcu tsijsičha, nižaza ojklayni cjissičha. Nekztanaqui Pedružtan Juanžtan chica timplu luzičha, ojkan, laylaycan, nižaza Yooz tjuu alawazcan.

⁹ Tjapa timpluquiz žejlni žoñinacaqui nii zuch žoñi ojklayni cherchičha, nižaza Yooz tjuu alawazni nonzičha.

¹⁰ Nekz žejlni žoñinacaqui nii žoñi pajchičha. Nii žoñipacha zapuru Hermosa cjita timplu zanquiz žejlničha, paaz tomtomangžcan. Nii čhjetinta žoñi cheržcu ispantichi cjissičha.

PEDRUZ PALJAYTA

¹¹ Nii čhjetinta žoñiqui Pedružquiztan Juanžquiztan anaž eclawc cjetčha. Ninaca Portal de Salomón cjita timplu kjuyquiz želatčha. Jalla nijcchuc tjapa nii timpluquiz žejlni žoñinacaqui zati pariju juntassičha. Ispantichičha.

¹² Nekztanaqui Pedruqui nii juntasquiñi žoñinaca cheržcu, ninacžquiz paljaychičha, tuž cjican:

—Israel wajtquiz žoñinaca, ¿kjažtiquiztan ančhucqui ispantiya? ¿Kjažtiquiztan ančhucqui wejrnaca chekžjo? Wejrnacpacha anačha tii žoñi čhjetinchintqui. Anal wejtnaca aztan ojklayskati atchinčha. Nižaza wejrnacaž persuna zuma kamtiquiztan anal tii žoñi čhjetinchinčha.

¹³ Antiz Yoozkaz tii žoñi čhjetiniqui. Nii Yoozqui učhum tuquita ejpnacž Yoozza, Abraham, Isaac, Jacobo, ninacž Yoozza. Jalla nii Yoozpacha niiz Majch Jesusižquiz pajk honorchiz cjiskatchičha. Nii Jesusaž cjen, tii žoñic žejtchičha. Ančhuczti jilirinacžquiz nii Jesusa intirjichinčhucčha. Nekztanaqui Pilatuž cutz tantiižtan, ančhucqui ana cutskatz pecchinčhucčha. “Tiiqui anapančha Yooziž cuchanžquitaqui” cjican chiichinčhucčha.

¹⁴ Jesusaqui ana čhjul ujchizza. Yooz Ejpž kuzcama kamničha. Nii Jesusa cuts cjenpacha, ančhucqui tsjii pajk ujchiz žoñi cutskatz pecchinčhucčha.

¹⁵ Jalla nuž nii žeti tjaañi Jesucristo conchinčhucčha ančhucqui. Yooz Ejpzi Jesusa ticztiquiztan jacatatskatchičha. Jalla nii puntuquiztanaqui wejrnacpachačha cherchintqui. Jaziqui nii puntu zuma werara chiyasačha.

¹⁶ Tii Jesucristučha azzizqui. Jesucristužquiz tjapa kuztan cjican, wejrnacqui Jesucristuž aztan tii ančhucpajta žoñi čhjetinchinčha. Jesucristužquin tjapa kuzziz cjen tii žoñiqui zumpacha žejtchičha. Jalla nuž ančhucqui tjappachaž cheržcu, nayaquičha.

¹⁷ Jaziqui jilanaca, ančhucmi ančhuc jilirinacami Jesusa conchinčhucčha. Jalla nii ora ančhucqui čhjulul paatčhaja anaž zizatčha.

¹⁸ Jalla nuž cjenami Yoozqui niiz persun taku cumpliskatchičha. Tuquiqui Yoozqui tjapa niiz taku chiiñi profetanacžquiz chiikatchičha, tuž cjican, “Yooz cuchanžquita Cristuqui sufristančha”. Nii takuqui cumplissičha.

¹⁹ Jaziqui ančhucqui Yoozquin kuzziz cjee, persun uj pajžcu. Yoozquin quejpžca, ančhuc ujnaca pertunta cjisjapa. Jalla nekztanaqui Yooz Jiliri qui ančhuc kuznaca cuntintu cjiskataquičha.

²⁰ Nižaza Yooz Jiliri qui wilta cuchanžcaquičha Jesucristo ančhucalta uchta liwriñiqui.

²¹ Ima Jesucristuž wilta tjonan Yooz Ejpqui tjappacha azquichaquičha, jaknužt tuquita zuma kuzziz Yooz taku chiiñi žoñinacaž mazinčhaja, jalla niicama

cumpliskataquiĉha. Jalla nii cumplis oracama Jesucristuŝlaqui tsewc arajpachquin kamspanĉha.

²² Moisesqui uĉhum tuquita ejpnacŝquiz cjichiĉha: “Yooz Jiliriqui anĉucaquiz tsjii Yooz taku chiiĉni profeta cuchanŝcaquiĉha. Nii ŝoĉni qui anĉuca wajtchiz ŝoĉnacŝquiztanpacha ulnaquiĉha. Jaknuŝt Yooz Ejpqui wejr cuchanŝquitĉhaja, jalla nuŝuzakaz tsjii cuchanŝcaquiĉha. Anĉhucqui nii Yooz Epiŝ cuchanŝquita ŝoĉĝ taku tjapa kuztan nonŝna, ĉhjulut chiyachaja, jalla nii.

²³ Jakziltat ana niŝ taku nonznawk cjeĉhaj niiqui, Israel wajtchiz ŝoĉnacŝquiztan pjaltatŝ cjequiĉha. Niŝaza walja castictatŝ cjequiĉha”. Nuŝ cjiĉha Moisesqui.

²⁴ Niŝaza tii timpu puntuquiztan tjapa Yooz taku chiiĉni profetanacaqui parlichipanĉha Samuelŝquiztanpacha jecchuc.

²⁵ Nii profetanacŝ taku Yooz Ejpqui anĉhucaltajapa chiikatchiĉha. Anĉhucaltazakaz Yooz Ejpqui tsjii zuma taku tjaachiĉha uĉhum tuquita ejpnacŝquiz. Jalla tuŝ cjican, Yoozqui Abrahamŝquiz taku tjaachiĉha: “Am majchmaatiŝ cjen, tjapa tii muntuquiz ŝejlĉni ŝoĉnacŝtajapa favoral paa-aĉha wejrqui”.

²⁶ Yooz Ejpqui niŝ Majch jacatatskatŝcu, anĉucaquiz primira cuchanŝquichiĉha, favora paacan. Jazic tjapa anĉhuc anawali paaznaca apatatspanĉha.

4

PEDRUŽTAN JUANŽTAN

¹ Pedruŝtan Juanŝtan jalla nuŝ parlan, timplu jilirinacaqui, timplu zultatŝ jilirŝtan saduceo parti ŝoĉnacŝtan tjonchiĉha.

² Pedruŝtan Juanŝtan ŝoĉnaca tjaajnatĉha, tuŝ cjican:

—Jesusaqui ticziquiztan jacatatchiĉha. Jalla nuŝ kjanapacha tjeeŝa, tjapa ticzi ŝoĉnacaqui jacatataquiĉha, jalla nuŝ. —Jalla niŝta chiitiquiztan anĉha ŝawjĉiĉha nii jilirinacaqui.

³ Jalla nekztanaqui Pedruŝtan Juanŝtan preso ĉjijtataĉha. Niŝaza carsilquiz majc-tataĉha, jakataŝcama. Nii oraqui zeziqueyataĉha.

⁴ Jalla nuŝ Pedruŝtan Juanŝtan Yooz puntu chiichiichiŝ cjen, tama nonŝni ŝoĉnacaqui tjapa kuztan Yoozquin criichiĉha. Luctak criichi ŝoĉnacakaz tsjii pjijjska warankataĉha.

⁵ Jakataŝuqui Jerusalén wajtquin ajczitaĉha wajt jilirinacami, timplu jilirinacami lii tjaajiĉnacami.

⁶ Nii oraqui timplu ĉawc jiliritacĉha Anasqui. Niimi ajczitaĉha, niŝaza Caifastan, Juanŝtan, Alejandruŝtan. Niŝaza tjapa timplu ĉawc jilirinacŝ famillanacami ajczitaĉha.

⁷ Jalla nuŝ ajcziŝ cjen Pedruŝtan Juanŝtan zjiĉkatchiĉha. Nekztanaqui nii jilirinacŝ taypiquiz apantiskatŝcu pewcziĉha, tuŝ cjican:

—Anĉhucqui, ŝjakzilta jiliriŝ mantitaŝ cjen niŝta anĉhuc paajo?

⁸ Jalla nekztanaqui Espiritu Santuqui Pedruŝquiz tuŝ chiikatchiĉha:

—Israel wajtchiz jilirinaca, timplu jilirinaca,

⁹ wejrnacqui anĉucaŝ yujcquiz zjiĉtaĉha, tsjii wali paata zumpacha zizajo. Jaknuŝt tii zuch ŝoĉni ŝejtĉiŝlaja, jalla nii ziz pecaquiŝ niiqui, niil quint'asaĉha.

¹⁰ Wejrnacqui anĉuca yujcquiz weraral chiyacĉha, anĉhuc nii quintu zumpacha zizajo; niŝaza tjapa Israel wajtchiz ŝoĉnaca zumpacha zizajo. Jesucristuŝ aztan tii ŝoĉni ĉĉjetinta ŝejlĉha tjapa anĉuca yujcquiz tsijtĉi. Anĉhucqui nii Nazaret wajtchiz Jesucristo cruzquiz ĉ'awcĉinĉhucĉha. Nekztanaqui Yoozqui niipacha ticziquiztan jacatatskatchiĉha.

¹¹ Anĉhucqui kjuy pirkiĉnacatŝtakaz nii zuma maz tjojtĉiĉha, “Ana cusa” cjican. Jalla nii tjojtta mazqui Jesusapanĉha. Nii tjojtta mazti anĉha cusala, isquinquiz nonŝta maz irata cjiŝiĉha. Yoozqui cjiĉiĉha, “Tii mazza tsjan juc'ant chekanaqui”.

¹² Jesucristupankazza Liwriiñiqui. Yooz Ejpqui anaž iya jakziltami utchiča liwriiñi cjisjapa. Tii muntuquiz žejlñi žoñinacžquiztan ana iya liwriiñi žoñi žejlča. Jesucristupankaz učum liwriiñi atasacha.

¹³ Jalla nuž Pedruqui chiichiča Juanžtan. Nii pucultanaqui ana istutiñitača, campuquin kamñi žoñikazza. Jalla nuž cjenami Pedružtan Juanžtan tjup kuzziz chiichiča, ana ekscan. Jalla nii nayžcu nii jilirinacaqui ispantichiča. Nižaza pajchipan cjissiča, nii pucultanaqui Jesusižtan chica ojklaychitača, jalla nii.

¹⁴ Nekz chica nii čhjetinta žoñimi tsijtchi želatča. Jalla nižtiquiztan ana čhjul quintrami chii atchiča.

¹⁵ Jalla nekztanaqui nii čhjepultan žoñinaca ajczquiztan ulanskatchiča. Ninacaž ulantan, nii jilirinacaqui ninacpora zmali parlassiča,

¹⁶ tuž cjican:

—Čhjul učum tii žoñinacžtan paaquejo? Tjapa Jerusalén žoñinacaqui tinacaž paata milajru zizkalala. Tinacaqui pajk siñala tjeeziča. Anača nicchuca učumqui.

¹⁷ Tii chiitaqui ana iya zizta cjisjapa, učumqui ninacžquiz mantiz waquiziča, ana iya Jesusiž puntu parlajo. “Nižta parlaquiž niiqui, ančhucqui casticta cjequiča” jalla nuž chiižinz waquiziča.

¹⁸ Nekztanaqui nuž parli žeržcu, nii jilirinacaqui Pedružtan Juanžtan kjawziča. Nekztan tuž chiižinchiča:

—Jaziqui ančhucqui anaž iya parlaquiča nii Jesusiž tjuužtan. Nižaza anaž jeczquizimi tjaajnaquiča Jesusiž puntuquiztan. —Jalla nuž mantichiča.

¹⁹ Jalla nuž mantitiquiztan Pedružtan Juanžtan kjaaziča, tuž cjican:

—Ančhucpachaž tantiyasa. Čhjulut walikaz Yooz yujcquiziya? ČAnčucaž mantita caz wali cjesaya? už ČYooz mantita caz wali cjesaja?

²⁰ Wejrnacqui anal weriž chertanacami nonžtanacami parlis jaytasacha. Jalla nuž parlispansa wejrnacqui.

²¹ Jalla nekztanaqui nii jilirinacaqui Pedružquiz Juanžquiz zuma ch'aanchiča. Pero nižtami ninacaqui cutztatača. Jalla nužquiz nii jilirinacaqui ana castiqui atchiča. Parti žoñinacami Yoozquin alawazziča, nižaza Yoozquin honora tjaachiča jalla nii milajru paatiquiztan.

²² Nii čhjetinta žoñiqui pusi tunc wata jilchiztača.

CRIICHI ŽOÑINACAQUI MAYIZICHICHA

²³ Nekztanaqui Pedružtan Juanžtan carsilquiztan cutztiquiztan niž mazinacžquin ojkičiča. Tjapa ninacž ojklaytanaca quint'ichiča, jaknužt nii timplu jilirinacami wajt jilirinacami chiitčaja, jalla nii liwj quint'ichiča.

²⁴ Jalla nuž quint'itiquiztan, tjapa ninacaqui tsjii kuzziz Yoozquin mayizichiča, tuž cjican:

—Yooz Jiliri, tjapa mantiñi Jiliri. Amqui arajpachami yokami, kot kjazmi, nižaza tjappacha paachamča.

²⁵ Amtan Espiritu Santužtan am David cjita sirwiñi tuž chiikatchamča:

“ČKjažtiquiztan Yooz quintra žawjchi chiichii nacionanacchiz žoñinacaqui?

ČKjažtiquiztan tii muntu žoñinaca ana zuma tantii?

²⁶ Nižaza tii muntuquiz chawc jilirinacaqui Yooz quintra tsijtsa, nižaza chawc jilirinacaqui Yooz Jilirž quintra nižaza niž uchta Jesucristuž quintra parlizjapa juntassa”. Nuž cjican cjiirchiča Davidqui.

²⁷ Jalla tižta werarača. Herodestan, Poncio Pilatužtan, Israel wajtchiz žoñinacžtan, yekja wajtchiz žoñinacžtan, jalla tjapa ninacaqui tii wajtquin juntassiča wali zuma Jesusiž quintra paazjapa. Pero am Majch utchamča, tsjan chawc jiliri cjisjapa.

²⁸ Jalla nuž juntascu ninacaqui am kuzquiz pinsitacama cumplissiča. Nužquiz cjissiča. Amiž tuqitan pinsita jaru, jalla nužpacha watchiča.

²⁹ Anziqui, Yooz Jiliri, wejtnaca quintra ch'aanita taku am zizza. Jaziqi wejtnacaquiz, amiž mantita ojkni žoñinacžquiz, zuma tjup kuz tjaažcalla, ana ekscan am taku parlajo.
³⁰ Nižaza am azi tjaažcalla, laa žoñinaca čhjetinzjapa, nižaza zuma obranacami, nižaza siñalanacami, nižaza milajrunacami paazjapa, am zuma Majch aztan. —Jalla nuž chiican Yoozquin mayizichiča.

³¹ Jalla nekztanaqui Yoozquin mayiziz žeržtan jakziquin ajczitažlaja, jalla nii kjuya čhekjinchiča. Nižaza tjapa ninacaqui Espiritu Santuž azi tanzichiča ninacž kuzquiz. Jalla nižtiquiztan walja tjurt'iñi kuzziz Yooz taku parličiča.

CRIICHI ZOÑINACŽ KAMTA

³² Tjapa nii wacchi criichinacaqui tsjii kuzziztača. Nižaza ninacž pinsamintuqui tsji-ipanikaztača. Jakzilta žoñit cusasanacchiz želatčaja, nii žoñinacaqui ana cusasquiztan chiiñitača, “Wejt cusasaž tiic” cjicanaqui. Antis tjapa ninacž cusasanacaqui tsjižtakaz želatča, tjapa criichi žoñinacžtajapa.

³³ Nii Jesusiž illzta apostolonacaqui Jesús Jiliriž jacatatz puntuquiztan tirapan pal-jayñitača, zuma atipni tawkžtan. Zuma wali azziz tawkžtan atipñipantača. Nižaza Yoozqui ninaca walja yanapchiča.

³⁴ Ninacžquiztan anaž tsjii t'akjir žoñi želatča. Jakzilta criichi žoñižlaja yokchizimi kjuychizimi, jalla ninacaqui nii tuyžcu paaz zjijcñipanikazza.

³⁵ Nii paaz zjijcžcu apostolonacžquin intirjiñipanikaztača. Nižaza ninacaqui nii paazqui chicata tojžñitača ana želinchiz žoñinacžquiz.

³⁶ Nižaza tsjii José cjita levita t'akquiztan žoñi želatča, Chipre cjita isla yokchiz žoñi. Nii José cjita criichi žoñiqui yekja tjuuchizzakaztača Bernabé cjita. Jalla nuž tjuuskatchiča apostolonacaqui. Nii Bernabé tjuuqui tuž cjiča, “Zuma Kuzni”, jalla nii.

³⁷ Nii Bernabé cjita žoñiqui tsjii yokchiztača. Nekztanaqui nii yoka tuychiča. Nii yoka tuyžcu, paaz zjijcchiča. Nekztanaqui apostolonacžquin nii paaz intirjichiča.

5

ANANIAS, NIZAZA SAFIRA UJ PAACHICHA

¹ Yekja žoñi želatča, Ananías cjita. Safira cjiti tjunchiztača. Ninacaqui persun yoka tuychizakazza.

² Nii yok tuyta paazqui t'ecžcu, persunaltajapa parti čhjojchiča. Partillakaz chjitchiča apostolonacžquin, jalla nužuñ yoka tuychižtakaz. Niiž tjunqui nii t'ecžta paaz zizatča.

³ Jalla nekztanaqui Pedruqui cjichiča:

—Ananías, ¿kjažtiquiztan am kuzquiz Satanás luzzita? ¿Espiritu Santužquiz tižta k'otsjapaqui? Nii yok tuyta paazqui t'ecsamča.

⁴ Ima tuycan nii yokaqui amtapantakaya, ¿ana jaa? Tuyžcu, nii yoka tuyta paazqui amtakaztaž, ¿ana jaa? ¿Kjažtiquiztan tižta ana wali pinsichamtajo? Amqui Yoozquiz k'otchamča; ana žoñžquiz k'otchamča.

⁵ Pedruž nuž chiitiquiztan, Ananiasqui ticzi tjojtsiča. Jalla nižtiquiztan nii quintu nonchi žoñinacaqui ancha eksni cjissiča.

⁶ Jalla nuž ticstan, tsjii kjažt tjojtjowanacaqui macjatchiča, Ananías ticzi curpu murtajzjapa. Nekztan nii tjojtjowanacaqui tjati chjitchiča.

⁷ Tsjii čhjep orquiztan, Ananías tjunqui tjonchinča. Naaža lucu ticzi quintu ana zizatča.

⁸ Nekztanaqui Pedruqui naaquiz pewcziča, tuž cjican:

—Wejtquiz maznalla. ¿Ančuca yoka tuyta paaz nužullakazkaya?

Nekztanaqui naaqui kjaaziča, tuž cjican:

—Jesalla, nužullapanča.

⁹ Nekztanaqui Pedruqui naaquiz cjichiča:

—Ančhucqui Yooz Espíritu Santo incallz pecatča. ¿Kjažtiquiztan ančhucqui pucultan nuž kaasjo? Nii zancucž tjonča nii am lucu tjažžquiñinacaqui. Nižaza anziqúi amzakaz chjichaquiča.

¹⁰ Nii orapacha Pedruž kjojchquiz tjojtžcu ticzinča. Nii tjojtjowanacaqui kjuya luzcu naa ticzin cherchiča. Nižaza jwezcu tjati chjitchiča naaža lucž latuquin.

¹¹ Jalla nižtiquiztan tjapa nii iclizziz žoñinacami, nižaza nii quintu nonchi žoñinacami ancha eksni cjišiča.

MILAJRUNACA PAATA

¹² Nii tjuñinacquiz apostolonacaqui walja siñalanacami milajrunacami paañitača žoñinacž cheran. Nižaza tjapa criichinacaqui Portal de Salomón cjita kjuyquiz ajczñitača.

¹³ Ana jakzilta ana criichi žoñinacami criichinacžtan mazi pajas, ancha eksnatča. Jalla nuž cjenami žoñinacaqui walja rispitchiča criichinacžquiz.

¹⁴ Nižaza tsjan tsjan žoñinacaqui Yooz Jiliržquin kuzziz cjišiča, luctaka cjiñi maataka cjiñi. Walja žoñinacaqui Yoozquin criichiča.

¹⁵ Nižaza laa žoñinacami callquin jweztatača. Callquin tjajz zquti chjinžcu, t'apžtatača. Nižaza camillquiz zakaz nonžtatača. Jalla nuž nonžta žejlcan Pedruž tjonz tjewziča, tsjii kjažta čhjetinta cjeyajo. Pedruž siwsallamekaj laa žoñinacž juntuñ wat jaa, cjiñitača.

¹⁶ Nižaza nii wajt vicin watjanacquiztan walja žoñinacaqui tjontjonatča Jerusalenquin. Laanacami zajraž tantanacami zjič zjičatča. Nižaza tjapa laa žoñinacaqui čhjetintatača.

PEDRUŽTAN JUANZTAN CARSILQUIZ CHAWJCTA

¹⁷ Jalla nižtiquiztanaqui timplu chawc jiliriqui saduceo parti žoñinacžtan ancha iñizichiča.

¹⁸ Jalla nuž iñizžcu, apostolonaca preso tanchiča, carsilquiz chawjczjapa.

¹⁹ Jalla nuž carsilquiz chawjctadž cjen ween tsjii Yooz Jilirž anjilaqui tjonchiča. Nižaza carsil zan chawjcz cjetsiča. Cjetžcu, apostolonaca jwessiča tuž cjican:

²⁰ —Timpluquin oka. Jalla nicju tsijtsna. Jesucristuž kamaña puntuquiztan tjapa žoñinacžquiz paljayaquiča.

²¹ Jalla nii anjilaž čiita jaru, jakatažuqui wentanalla timplu ojkchiča. Timpluquin luzcu, tjaañi kallantichiča. Jalla nii orazakaz timplu chawc jiliriqui niž mazinacžtan parliz kjuyquiz ajcziča. Tjapa Israel wajtchiz jilirinaca kjawziča. Nižaza zultatunaca mantichiča, nii chawjcta apostolonaca zjičajo.

²² Jalla nuž carsilquin irantižcu, nii cuchanta zultatunacaqui ana čhjulumi wjtchiča. Quejpžcu quint'ichiča,

²³ tuž cjican:

—Wejrnacqui carsilquin irantižcu, zuma chawjcta zalchinča. Nižaza ichni zultatunacaqui želatča carsil zawnctan. Nekztanaqui carsila cjetžcu, luzzinča. Nii kjuyltanaqui cherassinča anaž zinta pres žoñi želatča.

²⁴ Jalla nii quintu nonžcu timplu chawc jilirimi timplu zultatž jilirimi nižaza parti timplu jilirinacami, jalla tjappacha ninacaqui zuma kuz turwayzi cjišiča, ¿Kjažt cjequejo? cjican.

²⁵ Jalla nii orazakaz tsjii žoñiqui irantižquichiča, tuž cjican:

—Ančucaž carsilquiz chawjcta žoñinacaqui timpluquin žoñinacžquiz tjaajinča. — Nuž cjican quint'ichiča.

²⁶ Nekztanaqui nii guardiñi zultatž jiliriqui ojkchiča zultatunacžtan. Nekztan apostolonaca zjičchiča, ana chjojritžcu. “Chjojritžtaž cjesaž niiqui, parti žoñinacaqui wejrnacž maztan čhjacasaka”, jalla nuž pinsichiča nii zultatunacaqui.

²⁷ Jalla nuž zjijcžu, nii parliz kjuyquin tsijskatchičha chawc jilirinacz yujcquiz. Jalla nuž želan nii timplu chawc jiliriqiu chiižinchiča, tuž cjican:

²⁸ –Wejrnacqui ančhucaquiz ana iya parlanj cjichintala. Nižaza nii žoňž puntuquiz-tanaqui ana iya tjaajnaj cjichintala. Jaziqui, ěhjululu paachinčhuctajo? Ančhucqui tjapa tii Jerusalén watja chjijpchinčhucča ančhuca tjaajintižtan. Nižaza nii žoňi contiquiztan wejtnacaquiz uj tjojtunz pecchinčhucča.

²⁹ Jalla nekztanaqui Pedružtan parti apostolonacztan kjaaziča, tuž cjican:

–Primiraqui wejrnacqui Yooz castanča. Niiž jarukaz žoňimi cazasača.

³⁰ Ančhucqui cruzquiz ch'awcžu Jesusa conchinčhucča. Nekztan učhum tuquita atchi ejpž Yooz tii Jesusa jacatatskatchičha.

³¹ Jacatatskatžu Yoozqui nii Jesusa pajk honorchiz cjiskatchičha. Niiž žew latuquiz želan, Yooz Ejpqui mantis poder tjaachiča, Jesusa tsjan chawc jiliri cjisjapa. Nižaza Jesusača Liwriñiqui, tii Israel wajtchiz žoňinaca kuz campiiskatajo, ninacz uj pertunta cjeajajo.

³² Jalla tii puntunacquiztan wejrnacqui zizuča. Nižaza tisticu cjican wejrnacqui nii chiyučha Espiritu Santužtanpacha. Yoozqui nii Espiritu Santo tjaacha niiž kuzcama kamñi žoňinaczquiz. –Nuž cjican cjichiča Pedruqui.

³³ Jalla nii nonžcuqui, nii jilirinacaqui apostolonaczjapa ancha žawjchiča. Conz pecatča.

³⁴ Pero nii jilirinaczquiztan tsjii Gamaliel cjita fariseo želatča. Nižaza lii tjaajiñi maestrutača niiqui. Tjapa žoňinacaqui niižquiz walja rispitiča. Jalla nii Gamaliel cjita žoňiqui tsijsičha. Nuž tsijsu mantichiča apostolonaca zancu jwescajo tsjii ratu.

³⁵ Nekztan parti jilirinaczquiz tuž cjichiča:

–Israel wajtchiz žoňinaca, ančhucqui tii žoňinaczquiztan cwitazaquičha. Anaž ěhjulumi paaz waquiziča.

³⁶ Ančhucž cjuñzna, tsjii tuquiqui Teudas cjita žoňiqui jeczquichiča. Nii žoňiqui “Wejrtča chekan žoňtqui”, tuž cjican ojklaychiča. Jalla nekztanaqui pajcpic patac žoňinacaqui nii apziča. Pero nii Teudasqui contatača. Nekztanaqui nii apzñi žoňinacaqui wichanziča. Nužquiz niiž tjaajintaqui tjatantatača.

³⁷ Niiž wiruñ censo tjuñinaczquiz tsjii Judas cjita žoňiqui jeczquichiča. Galilea wajtchiztača. Žoňinacaqui nii apzquichiča. Ultimquiziqui contazakaztača. Nekztanaqui niiž apzñinacaqui wichanzi cjissičha.

³⁸ Jalla nižtiquiztan nižta wattanaca cjuñžu, tii žoňinacz quintra anača ěhjulumi paa. Ana tinaczquiz mitis waquiziča. Tii žoňinacaqui persun kuzcamakat paačhaja, nuž cjenaqui anaž tjurasacha. Orallaž kataquičha.

³⁹ Yooz kuzcamat tii žoňinacaqui paačhaja, jalla nekziqiu tinacaqui anaž tjatanchuca cjesača. Tinacaqui Yooz parti žoňinaczlaja, jalla nii quintra paasaž niiqui, Yooz quintraž cjesača. Jalla nižtiquiztan tii žoňinacz quintra anaj paala. –Jalla nuž cjican nii žoňinaczquin chiižinchiča Gamaliel cjita žoňiqui.

⁴⁰ Nižtiquiztanaqui tjapa jilirinacaqui naazi cjissičha. Jalla nekztanaqui kjawziča apostolonaca. Kjawžu, ninaca wajtchiča. Nižaza chiižinchiča ana iya parlajo nii Jesusiž puntuquiztan. Nekztan ninacaqui cutztatača.

⁴¹ Jalla nuž cutztan, jilirinacz yujcquiztan ulanchičha. Yoozqui jalla nuž munchičha, Jesusiž laycu sufrichi ninacaqui, jalla nuž. Jalla nuž cjenaqui ancha cuntintutača apostolonacaqui.

⁴² Nekztanaqui zapuru Jesucristuž puntuquiztan tira tjaajnatča, nižaza tiraž paljay-atča timpluquinami kjuyquinami, “Jesusaqui Yooz cuchanzquita Cristučha” cjiñitača.

6

¹ Nii timpuquiz Yoozquin criichinacaqui waljaž yapatča. Nuž yaptiquiztan tsjii quija žejlchiča. Griego taku chiiñi judionacaqui hebreo taku chiiñi judionacž quintra quijziča, tuž cjican:

–Wejtnaca žew maatakanaca ana cusa atintitača. Zapuru čhjeri tojzquiz upa čhjeri onantača.

² Jalla nuž quijtiquiztan nii tuncapan apostolonacaqui tjapa Yoozquin criichinaca kjawziča. Nekztanaqui tjappacha juntjapžcu ninacžquiz cjichiča:

–Wejrnacqui Yooz taku parli apatatsqui anaž waquiziča, čhjerikaz atintisjapaqui.

³ Jilanaca, pakallak žoñinaca ančucaquiztan kjurzna. Zuma kuzziz žoñi, nižaza Yooz Espíritu Santuž irpita žoñi, jalla nižaza zuma intintazzi žoñi, nižta žoñinaca kjurzna. Nekztan ninacaqui tii čhjeri atintiz puestuquin uchta cjequiča.

⁴ Wejrnacžti Yoozquin mayiziz, nižaza Yooz taku tjaažinz tiral atintača. Nii langzquiz tiral kuz tjaa-ača.

⁵ Jalla nii parlita jaru tjappacha asiptichiča. Nekztanaqui pakallak zuma žoñinaca illztatača, čhjeri atintisjapa. Primeruqui Esteban illztatača. Estebanaqui Yoozquin tjapa kuzziztača, nižaza Yooz Espíritu Santuž irpita kamñitača. Nižaza illztatača Felipižtan, Procoružtan, Nicanoržtan, Timonžtan, Parmenastan, nižaza Nicolastan. Nicolasqui Antioquía wajtchiz žoñitača. Ima Jesucristužquiz kuzziz cjican Nicolasqui judío cuzturumpichiztača, ana judío žoñi cjenami.

⁶ Jalla nuž illzcu nii pakallak žoñinaca apostolonacžquin chjichtatača. Nekztanaqui apostolonacaqui ninacžta mayizichiča, nižaza ninacž achquiz kjaržtan lanziča, nii puestuquiz cjejajo.

⁷ Jalla nekztanaqui Yooz taku paljayta cjen, Jerusalén wajtquin criichi žoñinacaqui ančaž miratča. Nižaza wacchi judiuž timplu jilirinacami tjapa kuztan Yooz taku catokchiča.

ESTEBAN PRESO TANTA

⁸ Estebanaqui walja Yooz aztantača, nižaza Yooziž yanaptatača. Jalla nižtiquiztan walja milajrunacami siñalanacami paachiča žoñinacž cheran.

⁹ Tsjii nooj tsjii kjaž judío cuzturumpi paañi žoñinacaqui Estebanžtan ch'aasi kallantichiča. Nii judío cuzturumpi paañi žoñinacaqui “Liwriita žoñi” cjitatača. Ninacžtan, tsjii kjažt Cirene wajtchiz žoñinacžtan, nižaza Alejandría wajtchiz žoñinacžtan, nižaza Cilicia wajtchiz žoñinacžtan, nižaza Asia yokquin kamñi žoñinacžtan, jalla nii žoñinacaqui Estebanžtan ch'aassiča.

¹⁰ Jalla nuž ch'aascan, Estebanžquiz ana atipi atchiča. Estebanqui Espíritu Santuž tjaažinta taku chiiñipantača.

¹¹ Jalla nižtiquiztan nii quintra žoñinacaqui toscar tisticunacž taku kjaychiča, tuž chiican k'otajo:

–Tii Estebanqui ana wali tawkžtan Moisés quintrami nižaza Yooz quintrami chichiča. Wejrnacqui nuž chiyanacqui nonzinpanča. –Jalla nii takunacžtan tisticunacžquiz tjaažziča.

¹² Jalla nekztanaqui nii Estebanž quintra žoñinacaqui parti žoñinacžquiz walja žawjkatchiča. Žoñinacami, wajt jilirinacami, nižaza judío lii tjaažiñi maestrunacami, tjapa ninacaqui žawjchi cjissiča. Nuž žawjchi cjiscu Esteban tanchiča. Nekztanaqui Esteban tanžcu, pajk parliz kjuya chjitchiča.

¹³ Nižaza toscar tisticunaca apantižquichiča. Nii toscar tisticunacaqui tuž cjichiča: –Tii žoñiqui tirapan tii Yooz timplu quintra chiiñiča, nižaza Yooz lii quintra chiiñiča. Nužupanž parliñiča.

¹⁴ Nižaza wejrnacqui nonzinča, “Nii Jesús cjita Nazaret wajtchiz žoñiqui tii timplu pajlznaquiča”, nuž cjican tiiqui chiiñiča. Nižaza tiiqui cjiñiča, “Nii Jesusaqui Moisés tjaaata cuzturumpinaca campiyaquiča”. Nuž cjiñiča tiiqui.

¹⁵ Jalla nektanaqui tjapa nii julzi jilirinacami Estebanž kjutñi cherziča. Nii oraqui Estebanž yujcqui anjilž yujcžtakaz cherziča.

7

ESTEBANQUI TJURT'ICHICHA

¹ Nekztanaqui timplu chawc jiliriqúi Estebanžquiz pewcziča, tuž cjican:

—¿Ultimu nužupanza amya?

² Nekztanaqui Estebanqui kjaaziča, tuž cjican:

—Wejt jilanaca, ejpnaca, jilirinaca, nonžna. Učhum zuma honorchiz Yoozqui učhum tuquita atchi ejp Abraham cjita zoñžquiz persuna tjeeziča. Nii oraqui Abrahamqui Mesopotamia yokquin kamñitača. Imaž Harán yokquin kami okatča.

³ Nii oraqui Yoozqui Abrahamžquiz cjichiča: “Am yoka eca, nižaza am parintinacami eca. Jakzi yokquinam okačhaja, jalla nicju am tjaajznača”.

⁴ Jalla nižtiquiztan Abrahamqui Caldea yokquiztan ulanchiča, Harán yokquin kami ojkičiča. Nekz kaman Abrahamž ejpqui ticziča. Nekztanaqui tekzi tii učhumž kamz yokquiz Abraham tjonchiča. Yoozza nii irpichiqui.

⁵ Jalla tekz kaman, Yoozqui ana čhjul yok irinsami tjaachiča. Abrahamžtajapa persun yoka ana želatča. Jalla nuž cjenami Yoozqui taku ecchiča, tuž cjican: “Tii yoka amtapanž cjequiča. Nižaza am ticžtanaqui tii yokaqui am maatinacaž tanznaquiča”. Jalla nuž cjican Yoozqui Abrahamžquiz taku tjaachiča. Nii oraqui Abraham ana ocjalchiz cjenami, Yoozqui nuž chiichiča.

⁶ Nižaza Yoozqui nižžquiz cjichiča, “Wiruñaqúi am majchmaatinacaqui yekja yokquin kamaquiča, nacjuñta žoñinacažtakaz. Nekziqúi pusi patac wata kamaquiča. Jalla nii yokquin am majchmaatinacaqui yekja zoñž mantakaz paaquiča. Nižaza sufrican kamaquiča”.

⁷ Nižaza Yoozqui cjichiča: “Am majchmaatinaca sufriskatchiž cjenaqúi, wejrqui nii sufriskatñi žoñinaca casticača. Nekztanaqui am majchmaatinacaqui nii yokquiztan ulanžcaquiča. Ulanžcu tii yokquiz wejr sirwaquiča”.

⁸ Nižaza Yooz Ejpqui tsjii compromiso paachiča Abrahamžtan. Nii compromis jaru Abrahamqui persun janchiquiz chimpuskatchiča. Nižaza quinsakal tjuñquiztan Isaac majch nastan, Abrahamqui nižž persun majchquiz chimpuchiča. Wiruñaqúi Isaacqui nižž majch Jacobžquiz chimpuchiča. Wiruñaqúi nižazakaz Jacobqui nižž tuncapan lucmajch maatinacžquiz chimpuchiča. Jacobž lucmajch maatinacžquiztan tjonchiča učhum tuncapan t'akanaca.

⁹ Nii Jacobž majchnacaqui učhum tuquita atchi ejpnacatača. Ninacaqui José cjita lajkž quintra iñiziñitača. Jalla nižtiquiztan ninacž lajk tuychiča. Nekztanaqui nii tuyta lajkqui Egipto yokquin chjichtača. Pero Yooz Ejpqui Josižtan chicapachatača nii oraqui.

¹⁰ Nekztan sufrichi želan Yoozqui José liwriichiča. Nižaza walja zizñi cjissiča. Jalla nuž cjen Faraón chawc jiliriqúi Josižtan cuntintutača. Nekztanaqui Faraonqui José utchiča, Egipto wajtchiz žoñinaca mantiñijapa, nižaza Faraonž kjuychiz žoñinaca mantiñijapa.

¹¹ Wiruñ tsjii kjaž watquiztan tsjii mach'a žejlchiča, ancha sufrichiča tjapa Egipto yokquin kamñi žoñinacami, nižaza tjapa Canaán yokquin kamñi žoñinacami. Jalla nuž cjen učhum tuquita ejpnacaqui ana čhjululujlsmi nii timpunacac wachatča.

¹² Pero Jacobqui tsjii quinto nonchiča, Egipto yokquin trigo žejlchi. Nuž nonžcu nižž majchnaca cuchanchiča. Niiž majchnacaqui učhum tuquita ejpnacatača. Jalla niitača primer ojkaqui Egipto yokquinaqui.

¹³ Nekztanaqui pizc wilta ojkcžcu, Josequi nižž jilanacžquiz pajkatchiča. Jalla nižtiquiztan Egipto chawc jiliriqúi Josiž familia pajchiča.

14 Jalla nekztanaqui Josequi mantichiča niiž ejp Jacobo zjijcajo, nižaza tjapa familianacžtanpacha. Ninacaqui pakallak tunca pjijskani žoñitača.

15 Jalla nekztanaqui Jacobqui kami ojkchiča Egipto yokquin. Nekzi ticziča Jacobqui. Nii yokquin ticzizakazza učum tuquita atchi ejpnacaqui.

16 Wiruñaqui nii atchi ejpnacž tsijnaca chjichtatača Siquem cjita yokquin. Nicju tjtatača Abrahamž kjayta yokquin. Abrahamqui nii Siquem yoka paaztan kjaychiča Hamor cjita maatinacžquiztan.

17 'Tuquitan juramintužtan Yoozqui Abrahamžquiz taku tjaachiča, tuž cjican: "Am majchmaatinacžquiz tii yoka tjaacha". Nii tjaata taku cumplis ora žcatžinžcan Israel wajtchiz žoñinacaqui waljaž miratča Egipto yokquinaqui.

18 Nii oranaca Egipto yokquinaqui tsjii chawc jiliri qui mantiz kallantichiča, ana José pajñi.

19 Nii jiliri qui učum wajtchiz žoñž quintra pinsichiča. Nekztan anawal quintra paachiča učum tuquita atchi ejpnacžquiz. Nii jiliri qui mantichiča, Israel lucmajch maatinaca majttan zawnc uchla, ticzi cjisjapa.

20 Jalla nii timpu Moisesqui majttatača. Ancha c'achja wawatača niiqui. Yoozqui nii wawžtan wali cuntintutača. Niiž maa ejpqui čhjep jiiž kjuyquiz mantiñchiča.

21 Ana iya nii wawa čhjoj čhjoji atžcu, kjuyquiztan chjitchiča. Nekztanaqui Egipto chawc jilirž persun majtqui nii Moisés wawa wajtchinča. Jalla nuž wajtžcu, persun maatižtakaz uywazzinča.

22 Jalla nižtiquiztan Moisesqui tjapa nii Egipto žoñinacž tjaajintanaca zizñi cjissiča. Nižaza zuma paatiquiztanami nižaza zuma chiitiquiztanami walja rispittatača Moisesqui.

23 'Niiž pusi tunc watchiz cjican Moisesqui parti Israel žoñinacžquin tsjii tjonžni ojkz pecchiča.

24 Jalla nuž tjonžni ojkžcu cherchiča, tsjii Egipto žoñi qui tsjii Israel žoñi wjajtatča, jalla nii cherchiča. Nii Israel žoñžtan cjatžcu kijtchiča. Nekztan nii Egipto wjajtñi žoñžquiz ayni tjepuncan conchiča.

25 Nekztanaqui Moisesqui kuzquiz zizziča, Yoozqui nii utchiča, Israel žoñinaca Egipto žoñinacž mantuquiztan liwriizjapa, jalla nii. Nižaza Moisesqui pinsichiča, Israel žoñinacaqui nižtakaz zizziča. Pero nii Israel žoñinacžti ana nižta naaziča, Moisesqui Yooz uchta liwriiñi, jalla nii.

26 Jaka tažuqui Moisesqui tsjii pucultan Israel žoñinacžtan ch'aasñi zalchiča. Jalla nuž zalžcu, pertunaskats pecchiča, tuž cjican: "Jilanaca, pucultan ančhucqui Israel žoñinacžchucča. ¿Kjažtiquiztan ančhucpora ch'aasjo?"

27 Nekztanaqui ana wal uj paañi žoñi qui Moisés tewkziča, tuž cjican: "¿Ject am jiliri utchejo, wejrnac mantiñijapajo?"

28 Zezcu Egipto žoñi conchamča. ¿Jazic wejrzam conz pecjo?"

29 Jalla nii nonžcu Moisesqui atipassiča Madián yokquin. Jalla nicju kamchiča nacjuñta žoñi cjenaqui. Nicju tjunatan zalžcu, pucultan ocjalchiz cjissiča, nii yokquin kaman.

30 'Pusi tunc watquiztan nekztan tsjii ch'ekti yokquintača Moisesqui, Sinaí cjita cur žcati. Jalla nekž želan, tsjii anjilaqui niižquin jeczquichiča, tsjii kalu ujžtan taaztažtakaz, nii taypiz.

31 Jalla nii cheržcu, Moisesqui ispantichiča. Jalla nii uj cheri macjatcan, nonziča Yooz Jilirž jora. Nii joraqui tuž cjichiča:

32 "Wejrqui am tuquita atchi ejpnacž Yooztča. Abrahamž Yooztča, nižaza Isaacž Yooztča, nižaza Jacobž Yooztča". Nekztanaqui Moisesqui tsucchi kjarcati kallantichiča. Iya ana cheržni atchiča.

³³ Nekztanaqui Yooz Jiliri qui cjichiča: “Am čhjata chjojknazna. Tii amiž tecžta yokaqui wejt yokača.

³⁴ Wejrqui weriž illzta žoñinacaž sufriñi cherchinča nii Egipto yokquin kamñi. Nižaza ninacaž llaquizan ninaca kjawñi nonzinča. Jalla nižtiquiztan ninaca liwrii chjijwžquichinča. Picha, ninaca liwriizjapa am cuchnača Egipto yokquin”.

³⁵ “Tuqui Israel wajtchiz žoñinacaqui Moisesquiz ana rispitchiča. Niižquiz cjichiča: “¿Ject am jiliri utchejo, wejrnaca mantiñijapajo?” Jalla nuž cjenami Yoozqui nii Moisespacha jiliri utchiča, Israel žoñinaca liwriyajo. Israel žoñinaca liwriizjapa, nii taazta kalquiz jecžquichi anjilaqui Moisesquiz yanapaquiča.

³⁶ Jalla nekztanaqui Moisesqui učum tuquita atchi ejpnaca jwessiča nii Egipto yokquiztan. Ima nii yokquiztan ulanskatan milajrunacami Yooz siñalanacami paachiča, nižaza Ljoc cjita kot tayıquız tjakziča, jalla nuž milajru paachiča. Nekztan pusi tunc wata ch'ekti yokquin ojklaycan milajrunacami Yooz siñalanacami paachiča.

³⁷ Jalla tii Moisespacha Israel wajtchiz žoñinacžquiz cjichiča: “Yoozqui wejr cuchanžquichiča ančhuc liwriizjapa. Jalla nižta irata Yoozqui Israel žoñinacžquiztan yekja liwriiñi profeta cuchanžcaquiča. Jalla niiž tjontan ančhucqui niižquiz caza”. Jalla nuž cjichiča Moisesqui.

³⁸ Nižaza Moisesqui Israel žoñinacžtan ch'ekti yokquin žejlchiča, Sinaí cjita cur latuquız. Jalla nekz tsjii anjilžtan parlichiča. Nižaza učum tuquita atchi ejpnacžquiz palt'ižinchiča. Jalla nižtiquiztan Yooz taku tanziča, tjurñi Yooz taku. Učumnacaltajapa nii tanziča. Nižaza učumnacaquız nii taku tjaajinchiča.

³⁹ Učum tuquita ejpnacaqui Moisesquiz ana caz pecchiča. Ana pajz pecatča, Yooziž uchta jiliri, jalla nii. Egipto yokquinpanž quejps pecatča.

⁴⁰ Jalla nekztanaqui učum tuquita ejpnacaqui Aaronžquiz paljaychiča, tuž cji-can: “Yooznaca paažinalla, wejtnaca tucquin chjichñijapa. Nii Moisesaqui wejrnaca ulanskatchiča Egipto yokquiztan. Pero anzi qui anal zizi atuča, čhjulukat niižquiz watčhani. Cunamit curquıztan ana quejpžcačhani”.

⁴¹ Jalla nekztanaqui nii žoñinacaqui korquıztan tsjii wac chul turu paakatchiča ninacžtajapa, tsjii yooz cjisjapa. Nekztan nii paata yoozquız wilana conchiča. Nižaza ninacaž paata yoozquıztan ancha cuntintutača.

⁴² Jalla nižtiquıztan Yoozqui ninaca jaytichiča, ninacž persun kuzcamakaz kamajo. Jalla nižtiquıztan persun kuzcama cjičjican arajpach tjuñimi, jiizimi, warawaranacami sirwichiča. Jalla nii puntuquıztan Yooz taku chiiñi profetanacaž cjiirta liwruquız tuž cjiirtatača:

“Israel žoñinaca, ančhucqui pusi tunc wata ch'ekti yokquin kamcan, wilana conchinčucča. ¿Wejtquin sirwisjapa nižta paachinčuccho?

⁴³ Anapanča. Antis Moloc cjita žoñiž paata yoozquin jawkchinčucča nii wilananaca. Nižaza Renfán cjita warawara yooztakaz cherchinčucča. Jalla nii warawar yoozquin rispitchinčucča wilana tjaacan. Nižaza ančuca tuqui nii žoñiž paata yooznaca chjitskatiñchuctača. Ančhucpachaž nižta yooznaca paachinčucqui, nekz sirwisjapa. Jalla nižtiquıztan ančhuc jwesača ančuca kamz yokquiztan. Jalla nuž jwescu Babilonia cjita yokquiztan nawjctučtan chjichača”. Jalla nuž Yooz tawk liwruquız cjiirtatača.

⁴⁴ Ch'ekti yokquin ojklaycan učum tuquita ejpnacaqui zkiz timpluchiztača. Yoozqui Moisesquiz nii timplu plano tjeeziča. Nekztanaqui Yooz mantita plan jaru, nii timpluqui paatatača. Nekzi qui Yoozqui sirwitatača.

⁴⁵ Nii zkiz timplu učum tuquita ejpnacaqui tanziča irinsažtakaz. Josuež irpita, učum tuquita ejpnacaqui nii timplu chjitchiča, Canaán yokquin luzcan. Nekz žejlñi žoñinacžquiztan nii yoka tanziča. Yooz pacha nii žoñinaca chjatkatchiča, učum

tuquita ejpnacžquiz tjaazjapa. Nii yoka tanžcu jalla nekz kamchiča Davidž kamtaca.

⁴⁶ David cjita jiliriqui Yooziž ancha okžtatača. Jalla nižtiquiztan Davidqui tsjii timplu kjuya kjuyz pecatča Yooz sirwizjapa. Niiž tuquita ejp Jacobqui nii Yooz sirwichizakazza.

⁴⁷ Pero ultimquiziqui Salomón cjita Davidž majch, niiča Yooz timplu cjican kjuychiqui.

⁴⁸ Jalla nuž timplu kjuyta cjenami, werar Yoozqui anaž žoñiž kjuyta kjuyquiz želasača. Jalla nuž cjichizakazza tsjii Yooz taku chiiñi profet žoñiqui. Yooz puntuquiztan jalla tuž cjiřchiča nii profet žoñiqui:

⁴⁹ “Wejt mantis julzza arajpachaqui. Tii yokaqui wejt kjojcha jeejzkatzjapažtakazza. ¿Chjuluž cheechi kjuya ančhucqui wejtajapa kjuyasajo? Jalla nuž cjiča Yooz Jiliriqui. ¿Jakziquint wejt jeejz yoka žejljo?”

⁵⁰ Wejrtča tjappacha paachintqui”.

Jalla nuž Yooz puntuquiztan cjiřtatača.

⁵¹ Nižaza Estebanqui tira chiichiča, tuž cjican:

—Ančhucqui ancha chojru kuzzizčhucpanča, ana Yoozquin kuzzizčhucča. Cjuñchizčhucča pero ana Yooz taku nonzinčhucča. Nižaza ančhucqui Yooz Espiritu Santužquiz anapan caziñčhucča. Tuquita ejpž nižtazakazza ančhucqui.

⁵² Ančuca tuquita ejpnacaqui Yooz taku chiiñi profetanacžquiz ana rispitchipanča. Antis sufriskatchipanča. Nii profetanacaqui tsjii tsjan zuma žoñiž tjonz mazinchiča. Ančuca tuquita ejpnacazti ninaca conchiča. Jaziqui nii zuma žoñiqui tjonchiča. Ančhuczti nii žoñi preso tankatchinčhucča, y nižaza conkatchinčhucča.

⁵³ Anjilanacaqui ančucaquiz Yooz lii tjaachiča. Jalla nii tjaata lii ana cazziñčhucča. —Jalla nuž Estebanqui paljaychiča.

ESTEBAN CONTA

⁵⁴ Estebanž chiita taku nonžcu, ancha žawjchiča. Nižaza Estebanž quintra izke jojchiča, ninacaž žawjchi tjeezjapa.

⁵⁵ Estebanžti Espiritu Santuž irpitapankaztača. Nekztanaqui Estebanqui arajpach kjutni cherziča. Nekztan Yoozquiztan walja c'ajžquiñi cherchiča. Nižaza Yooz Ejpž žew latuquiz Jesusa tsijtsi cherchizakazza.

⁵⁶ Nekztan Estebanqui cjichiča:

—¡Arajpach kjutni cheržna! Arajpacha cjetzil cheruča. Nižaza Yooz Ejpž žew latuquiz tsijtsi žejlča Jesusa Yooz Maatiqui.

⁵⁷ Ninacazti ana nonžni yujcchiča. Cjuñi chawcziča. Nižaza altu joržtan kjawcan apura zalchiča tanzjapa.

⁵⁸ Jalla nuž tanžcu, wajtquiztan jwessiča. Nekztan wajtž tjiiquin, maztan čhajcchiča. Nii maz čhajcni žoñinacaqui tsjii Saulo cjita tjowžquiz ninacž zquti cwitižinajo ecchiča.

⁵⁹ Jalla nuž maztan čhajcan, Estebanqui Yoozquin mayizichiča, tuž cjican:

—Wejt Yooz Jesús Jiliri, wejt animu chjichalla.

⁶⁰ Jalla nekztanaqui Estebanqui quillziča. Altu joržtan kjawchiča, tuž cjican:

—Wejt Yooz Jiliri, tii žoñinaca tii ujquiztan pertunalla amqui.

Jalla nuž kjawžcu, ticziča.

8

CRIICHI ŽOÑINACA WICHANZI

¹ Nekztanaqui nii Saulo cjita tjowaqui Esteban conzjapaqui tjapa kuztača. Jalla nii noojpacha Yoozquin criichinacž quintra juc'anti juc'anti sufriskati kallantichiča

Jerusalén wajtquiz. Jalla nižtiquiztanaqui tjapa criichi zoñinacaqui wichanziča tjapa Judea yokaran nižaza Samaria yokaran. Nii Jesusiž apostolonacazti ana wichanziča.

² Tsjii kjažultan Yoozquin zuma sirwiñinacaqui Estebanž curpu tjazziča. Nižaza ancha kaachiča nižquiztan.

³ Nekztan nii Saulo cjita zoñiqui criichinacž quintra ancha anawali paachiča. K'ala tjabatanz pecchiča. Nižaza kjuyquiztan kjuya ojklaychiča luctaka cjiñi maataka cjiñi tanzjapa, nižaza carsilquiz chawjckatsjapa.

SAMARIA WAJTQUIN YOOZ TAKU PALJAYTA

⁴ Jakziquin nii wichanzi criichinacaqui ojktčhaja, jalla nicju liwriiñi Yooz taku paljayñitača.

⁵ Tsjii wichanzi zoñiqui Felipe cjitatača. Jalla nii zoñiqui tsjii Samaria yokquiz žejlñi watja ojkičiča. Jalla nicju Cristuž puntuquiztan paljayi kallantichizakazza.

⁶ Jalla nuž paljayan zoñinacaqui walja ajcziča. Tjapa nii zoñinacaqui Felipiž paljayta taku tjapa kuztan nonznatča. Nižaza Felipiž paata milajrunaca cheržcu, niž chiita taku tjapa kuztan catokchiča.

⁷ Walja zajraž tanta zoñinacaqui čhjetintatača. Nii laa zoñinacžquiztan zajraqui kjawcan ulanchiča. Nižaza walja zuch zoñimi cojumi čhjetintazakaztača.

⁸ Jalla nižtiquiztan tjapa nii wajtchiz zoñinacaqui cuntintutača.

⁹ Jalla nii wajtquiz tsjii Simón cjita wayt'ir zoñi želatča. Tuquitanpacha wayt'iri ojklayñi zoñitača, nii Samaria wajtchiz zoñinaca incallcan.

—Wejrtča chekan zoñtqui —cjican ojklayñitača.

¹⁰ Jalla niž taku walja nonz pecniča. Nižaza kolta cjiñimi pakji cjiñimi tuž cjiñitača: —Tii zoñiča walja Yooz aztanaqui. Yooztakazza tiiqui. —Nuž cjican cjiñitača.

¹¹ Azk watanaca nii wayt'ir zoñiqui zoñinaca incallžcu, walja cazkatniča.

¹² Jalla nekztanaqui Felipiqui tjonchiča Yooz taku paljayi. Yooz Epiž mantiz puntuquiztan nižaza Jesucristuž puntuquiztan jalla nuž paljaychiča. Jalla nuž paljaytiquiztan walja luctaka cjiñi maataka cjiñi tjapa kuztan criichiča Yooz Ejpžquin. Nekztan criitiquiztan bautistatača.

¹³ Nižaza Simonpachača criichiqui, nižaza bautistatača. Jalla nekztanaqui Felipžquiz cumpanti kallantichiča. Felipiž milajrunaca paan, walja ispantichiča nii Simonaqui.

¹⁴ Nekztanaqui Jerusalenquin žejlñi apostolonacaqui quintu nonchiča, Samaria wajtchiz zoñinaca Yooz taku catokchiča, jalla nii. Jalla nuž nonžcu nicju tsjii pucultan cuchanžquichiča, Pedružtan Juanžtan.

¹⁵ Jalla nuž irantižcuqui, nii pucultanaqui Samaria wajtchiz criichinacžtajapa Yoozquin mayizichiča, Espiritu Santu tanznajo.

¹⁶ Tuquiqui anaž jakziltižquizimi Espiritu Santuqui luztkalča. Jesucristuž tjuužtan alajakaz bautistakalča.

¹⁷ Jalla nekztanaqui Pedružtan Juanžtan ninacž juntuñ kjaržtan lanziča. Jalla nižtiquiztan Espiritu Santuqui ninacžquiz luzziča.

¹⁸ Jalla nuž kjaržtan lanztiquiztan Espiritu Santuž luzni cheržcu, Simonaqui paaz tirziča,

¹⁹ tuž cjican:

—Wejtquin zakaz nii am azi tjaalla. Jalla nekztanaqui wejrzakaz kjaržtan lanžcu zoñinacžquiz Espiritu Santo luzkatača.

²⁰ Jalla nekztanaqui Pedruqui Simonžquiz cjichiča:

—Am paazmi amtanpacha k'ala katžla. Yooz onanta Espiritu Santo anaž kjayasača paaztan. ¿Kjažtiquiztan nižta am pinsejo?

²¹ Amqui tii langzquiz anaž mitisiz waquiziča. Tii Yooztajapa langzquiz anaž amta cjesača. Yooz yujcquiziqui am kuzqui anača zuma.

²² Jalla nii am anawali pinsisnaca jayta, nižaza apatata. “Wejrqui anawali pinsichinpanča” cjican Yoozquin rocaza, am kuz pinsitanaca pertunta cjisjapa. Nekztan cunami pertunta cjis atčhani.

²³ Amqui ana zuma kuzzizzamča. Anawali pinsiskaz am kuzquiz tjonča. Wejrqui am ana wali int'iskatča.

²⁴ Jalla nekztanaqui Simonaqui kjaaziča, tuž cjican:

—Wejttajapa Yooz Jiliržquin mayiziñalla, ana čhjulumi tii amiž chiita takunacquiztan wejtquiz watajo.

²⁵ Nekztanaqui nii apóstol žoñinacaqui Jesucristo Jilirž puntuquiztan zuma chiichiča, nižaza Yooz taku zuma parličiča. Jalla nekztanaqui Samaria yokquiz wacchi kolta watjaran liwriñi Yooz taku paljayñi ojklayčiča. Jalla nuž ojklayžcu quejpčiča Jerusalén watja.

FELIPZTAN ETIOPIA WAJTCHIZ ŽOŇŽTAN

²⁶ Niiž wiruñ tsjii Yooz anjilaqui Felipžquiz cjichiča:

—Zaažna. Jerusalén wajtquiztan warchuc oka, Gaza ojkñi jiczquin.

Ch'ekti yoka nuž watča nii jiczqui.

²⁷ Nekztanaqui Felipiqui žaažcu, ojkiča. Nii jiczquiz ojkan tsjii Etiopía wajtchiz žoñžtan zalčiča. Nii žoñiqui eunucutača. Nižaza jilirž cusasanaca cwitiñi žoñitača. Candace cjita žonqui tsjan chawc jiliritiča Etiopía wajtquin. Jalla naa chawc jilirž mantuquiztača nii cusasanaca cwitiñi žoñiqui. Nii žoñiqui Jerusalén watja ojkichitača werar Yooz rispitsjapa.

²⁸ Jaziqui persun watja quepi ojkiča. Niiž persun cawall autuquiz julzi želatča, Isaías cjiirta Yooz taku liican. Isaiastača tuquita Yooz taku chiiñi profetaqui.

²⁹ Jalla nekztanaqui Espiritu Santuqui Felipžquiz cjichiča:

—Nii cawall autuquiz macjata.

³⁰ Jalla nuž macjatžcu Felipiqui nonziča, nii žoñiqui Isaías cjiirta Yooz taku liiñi, jalla nii. Jalla nuž nonžcu Felipiqui pewczyča, tuž cjican:

—¿Nii Yooz taku am intintiya?

³¹ Nii žoñiqui kjaaziča, tuž cjican:

—Anaž wejtquiz jec tjaajiñimi žejlča. ¿Jaknužt wejr intintasajo?

Nekztanaqui nii žoñiqui Felipe kjawziča, nii autu juntuñ yawzcajo, niižquiz julžinžcajo.

³² Jalla nii cjiirta Yooz taku tuž cjetča:

“Uuzažtakaz coni čhjichtaž cjequiča. Uuzaqui ch'ujukaz žejlpanča tsjii čhjipñi žoñžquiziqui, jalla nižta conz oraqui ch'ujuž cjequiča niiqui. Anaž chiyacuiča.

³³ Zuma kamañchiz cjenami ombrawillta cjequiča. Ana čhjul justiciami wataquiča. Niiž majchmaatquiztan, ¿jequit tii puntu watchinaca quint'izjapa želas? Tii muntuquiz niiž kamz wira tucuzinžnaquiča”.

³⁴ Jalla nii ližcu nii jiliriqui Felipžquiz pewczyča tuž cjican:

—¿Jecz puntuquiztan tii profetaž cjiirta chiijo? ¿Niiž persun puntuquiztankaya? už čyekja žoñž puntuquiztan, jaa?

³⁵ Jalla nekztanaqui Felipiqui nii liita Yooz taku puntuquiztan tjaajñi kallantichiča. Jesucristuž puntuquiztan niiqui chiyatča. Jalla nii zuma liwriñi taku tjaajziča.

³⁶ Jalla nekztanaqui tsjii wijiña macjatcan, nii jiliriqui cjichiča:

—Tekz kjaz žejlča. ¿Anaj tii kjazquiz bautista cjesaya?

³⁷ Felipiqui kjaaziča, tuž cjican:

—Am persun tjapa kuztan criyaquiz niiqui, bautistam cjesača.

Nii jiliriqui kjaaziča tuž cjican:

—Jesucristuqui Yooz Majčča, jalla nii tjapa kuztan criyuča.

FELIPIQUI YOOZ TAKU KJANZT'ICHICHA

³⁸ Jalla nekztanaqui nii cawall autu tsijskatchičha. Nekztanaqui pucultan chji-jwžquichičha kjaz kjutñi. Nekztanaqui Felipiqui nii jiliri bautissičha.

³⁹ Kjazquiztan ulnan, Yooz Espíritu Santuqui Felipe chjitchičha. Felipiqui ana iya tjenchičha nii jiliržquiz. Jalla nuž cjenami nii jiliriqui tira ojkchičha cuntintu.

⁴⁰ Felipizti Azoto cjita wajtquin chjichtatačha. Nižaza wajtquiztan watja ojklaycan, liwriiñi Yooz taku paljayñi ojkchičha, Cesarea cjita watja irantiscama.

9*SAULO JESUCRISTUZTAN ZALCHICHA*

¹ Jalla nuž Felipe ojklayanaqui Sauluqui Yoozquin criichi žoñinaca tanzjapa nižaza conzjapa tirapan kuz tjaatčha. Anapanž jaytiz pecatčha. Nekztanaqui simplu chawc jiliri cherzñi ojkchičha.

² Nii chawc jiliržquiztan ortina maychičha. Damasco cjita watja ojkz pecatčha. Jalla nicju ajcz kjuyaran ojklayz pecatčha, Yooz jiczquiz luzñi žoñinaca kjurzjapa, criichi luctaka cjiñi maataka cjiñi kjurzjapa. Nii criichinaca wajtžcu preso tanz pecatčha, Jerusalenquin chjitzjapa. Jalla nižta ojklayzjapa ortina maychičha.

³ Ortina jwescu, ojkchičha Damasco cjita wajt kjutñi. Damasco žcatilla cjen, tiripintit tsjii wali pajk kjanaqui muzpa kjanžquichičha niiž muytata.

⁴ Sauluqui yokquiz tjojtsičha. Jalla nuž tjojtzcu tsjii jora nonzičha, tuž cjiñi:

—Saulo, Saulo, ¿kjažtiquiztan am wejt quintramjo?

⁵ Nekztanaqui Sauluqui pewczičha, tuž cjican:

—Wejt Jiliri, ¿ject amya?

Nii tsewctan chiiñi joraqui kjaazičha, tuž cjican:

—Wejrtčha Jesusitqui. Amqui wejt quintram paačha. Nuž paacan, ampacham quintra paačha. Tsjii wacaqui ar parž quintra llawkžcu, persun janchiž quintraž paačha. Jalla nižta irata am persun quintram paačha.

⁶ Nekztanaqui Sauluqui tsučzcu cjatinzka tjonzičha niiž curpuqui. Nekztanaqui cjichičha:

—Wejt Jiliri, ¿čhjulu wejr paajum cjee amya?

Yooz Jiliriqui cjichičha:

—Zaažna. Watja luzna. Jalla nicju amquiz kjana chiita cjequičha čhjulut paasalaja, jalla nii.

⁷ Saulužtan chicapacha ojklayñi žoñinacaqui ancha tsucchičha. Ninacaqui nonzizakazza nii jora chiižquiñi. Pero ana cherchičha jecmi.

⁸ Jalla nekztanaqui Sauluqui žaazičha yokquiztan. Jalla nuž žaažcu čhujquiqui cjetzičha, pero ana wira cheri atchičha. Jalla nižtiquiztan Sauluž kjarcu tanžcu Damasco watja chjitchičha niižtan chica ojklayñi žoñinacaqui.

⁹ Jalla nii wajtquin čhjep maj ana cherñi žejlchičha. Nižaza ana čhjeri lujlñi anaza kjaz licñi žejlchičha.

¹⁰ Jalla Damasco wajtquin tsjii Ananías cjita Yoozquin criichi žoñi želatčha. Nii Ananiasquiz Yooz Jiliriqui jeczquichičha wiiquin, tuž cjican:

—¡Ananías!

Jalla niiqui kjaazičha, tuž cjican:

—Wejt Jiliri, tekzičha wejrqui.

¹¹ Nekztanaqui Yooz Jiliriqui cjichičha:

—Zaažna. Sok'o cjita call kjutñi oka. Nekztan Judas kjuyquiz pewczna, tuž cjican: “¿Saulo, Tarso wajtchiz žoñi anaj žejlya?” Jalla nuž pewcznaquičha. Nii Sauluqui Yoozquin mayizican želaquičha.

¹² Tsjii wiiquin chjuuzcan, tižta cherchiča Sauluqui. Tsjii Ananías cjita žoñiqui nižquiz luziča. Jalla nuž luzcu kjaržtan niž juntuñ lanziča wilta cherajo. Chjuuzcan Sauluqui jalla nuž cherchiča.

¹³ Jalla nuž nonžcu, Ananías cjichiča:

—Wejt Jiliri, tii žoñžquiztan wacchi quintunaca nonchinča. Jerusalén wajtquiz juc'anti anawali paachiča amquin criichinacžquiz.

¹⁴ Anziqui tekzpacha tjonzizakazza. Timplu chawc jiliriž tjaata ortinchiz tjonchiča, tjapa amquin rispiti žoñinaca tanžcu preso chjitsjapa.

¹⁵ Pero Jesucristo JiliriQUI cjichiča:

—Oka amqui. Wejrqui tii žoñi illzinča, wejt puntuquiztan parlajo. Yekja nacionchiz žoñinacžquizimi nižaza ninacž jilirinacžquizimi nižaza Israel nacionchiz žoñinacžquizimi, jalla nuž wejt puntuquiztan parlaquiča tiiqui.

¹⁶ Jalla niiqui wejt puntuquiztan parliñiž cjen ancha sufraquiča. Wejrqui nižquiz intintiskatača jalla niž sufris puntuquiztan.

¹⁷ Jalla nekztanaqui Ananiasqui ojkchiča jakziquin Saulo želatčhaja, jalla nicju. Saulužquin luzcu, kjaržtan niž juntuñ lanziča, tuž cjican:

—Saulo, jila, amiž jiczquiz tekz tjonan Jesusa JiliriQUI amtan zalchiča. Jalla nii Jesusa JiliriQUI wejtquin mantižquiča, am wilta cherkatajo, nižaza Espiritu Santuž am kuzquiz luzajo.

¹⁸ Nii orapacha Sauluž čhjujquiztan ch'iz cjajpažtakaz tjojtsiča. Nekztan wilta cherñi cjissiča. Nekztanaqui Sauluqui žaaziča, nižaza bautista cjissiča.

¹⁹ Jalla nekztanaqui čhjeri lujlžcu, wilta azi tanziča. Nekztan tsjii kjaž maj Damasco cjita wajtquin kamchiča Yoozquin criichinacžtan.

SAULUQUI JESUSIZ PUNTUQUIZTAN PALJAYCHICHA

²⁰ Jalla nuž kamcan Sauluqui ajcz kjuyanacquiziqui Jesusiž puntuquiztan paljayi kallantichiča tuž cjican:

—Jesusaqui werar Yooz Majchpanča.

²¹ Nii nonžni žoñinacaqui ispantichiča, tuž cjican:

—Tii žoñiqui Jerusalén wajtquin ojklaychiča Jesucristužquin rispiti žoñinaca tani. Tekzizakaz tjonchiča Jesucristužquin criichinaca tanažlani. Nižaza preso chjic-hažlani, timplu jilirinacžquin intirjizjapa. Jalla nii žoñipanča, ¿ana jaa?

²² Pero Sauluzti juc'anti tjup kuzziz Yooz taku parličiča. Juc'anti juc'anti atipni takunacžtan parličiča. Zuma kjana intintiskatchiča, Jesusa Yooziž cuchanžquita Cristuča, jalla nii. Jalla nuž intintiskatan, nii Damasco wajtquin kamni judionacami kuz inakaz turwaysi quirchiča.

SAULUQUI ATIPCHICHA

²³ Tsjii kjaž majquiztan nii žejlñi judío žoñinacaqui palt'ichiča Saulo conzjapa.

²⁴ Nii žoñinacž conz palt'ita zizziča Sauluqui. Majiñami weenami wajtž zana tjewsnatča, čhjulatorat wajtquiztan ulnačhaja, jalla nii ora Saulo conzjapa.

²⁵ Pero tsjii ween nii wajtchiz criichinacaqui tsjii pajk canastiquiz yaažcu, Saulo chjijunžquichiča. Tsjii pajk alto murallaž muyuntitatača nii watjaqui. Jalla nii juntuñ chjijunchiča zawncchuc. Jalla nuž atipassiča Sauluqui.

SAULUQUI JERUSALENQUIN QUEJPCHICHA

²⁶ Sauluqui Jerusalén watja quejpžcu Yoozquin criichi žoñinacžtan ajcz pecatča. Nii criichinacžti Saulužtan ajcz eksiča. “Ana ultimu Yoozquin criichižcaa” cjican kuzquiz pinsichiča.

²⁷ Jalla nuž cjenami Bernabé cjita jilaqui Saulo chjitchiča, apostolonacžtan zalzjapa. Nekztanaqui Bernabequi apostolonacžquin mazziča, jaknužt Saulo jiczquiz ojkan Jesucristo Jiliržtan zaltčhaja, jalla nii. Nižaza jaknužt Jesucristo JiliriQUI Saulužquiz

paljaychičhalaja, nii mazñi. Nižaza jaknužt Damascuquin Sauluqui Jesucristo puntuquiztan tjup kuzziz parličhaja, jalla nii mazzizakazza.

²⁸ Nekztanaqui Sauluqui Jerusalén wajtquin ojklaychiča; nižaza hermanonacžtan kamchiča.

²⁹ Jalla nuž žejlcan Sauluqui Jesucristuž puntuquiztan tjup kuzziz paljaychiča. Nižaza griego taku chiiñi judionacžtan ch'aascan parličiča. Nii žoñinacaqui Saulo konz pecatča.

³⁰ Jalla nii quintu zizcu, nii parti criichinacaqui Saulo chjitchiča Cesarea cjita wajtquin. Jalla niwjctan Tarso cjita watja cuchanchiča.

³¹ Jalla nekztanaqui nii timpuqui walikaz želatča iclizanacami, Judea yokquin žejlñi iclizanacami, Galilea yokquin žejlñi iclizanacami, Samaria yokquin žejlñi iclizanacami. Jalla nuž tjappacha walipantača. Yoozquin criichinacami Yooz Jiliri walja tjapa kuzziz cjisnatča. Rispitñi kuzziztača. Nižaza Espiritu Santuqui ninaca kuzñitača, cuntintu kamajo. Jalla nižtiquiztan walja yapchiča Yoozquin criichinacaqui.

ENEAS CHJETINTA

³² Nižaza Pedruqui criichi žoñžquiztan žoñi tjontjonžcan ojklayatča. Nižaza Lida wajtchiz Yooz parti žoñinacžquiz tjonžñi ojkchiča.

³³ Jalla nicju Eneas cjita žoñžtan zalchiča. Eneasqui quinsakal wata laa zuchu želatča, tjajz ajpzquiz želatča.

³⁴ Nekztanaqui Pedruqui nižquiz cjichiča:

—Eneas, Jesucristuqui am čhjetnaquiča. Zaažna. Am tjajz zquiti zumpacha chjinžna.

Nii orapacha Eneasqui žaaziča.

³⁵ Nekztanaqui nii Lida wajtquiz kamñi žoñinacami nižaza Sarón wajtquiz kamñi žoñinacami nii zuch žoñi čhjetinta cherchiča. Nekztanaqui niž tuqita ejpnacž cuzturumpinaca eccu, Yooz Ejp Jiliržquín criichiča. Nižaza Yooz kamañchiz cjissiča.

DORCAS CJITI ZON JACATATSKATTA

³⁶ Jalla nii timpuzakaz Jope cjita wajtquin tsjaa Yoozquin criichi žon želatča, Tabita cjiti. Griego tawkquiz Dorcas cjiti tjuuchiztača. Naa maatak žon zuma paatanaca paacan zuma kamiñpantača, nižaza t'akjir žoñinaca okzniñtača.

³⁷ Jalla nii timpu Dorcas cjiti žonqui laa cjiscu, ticzinča. Ima tjatcan naaža curpu awjžcu, tsjii kjuyquiz tsewcta pisuquin chjichtatača.

³⁸ Jope watjaqui Lida žcatillatača. Jalla nii Lida wajtquin Pedruqui želatča. Jalla nuž zizcu nii Jope wajtchiz hermanonacaqui pucultan žoñinaca cuchanchiča Pedružquin rocajo, tuž cjican:

—Apuraj tjonla, ana enenžcu.

³⁹ Nekztanaqui Pedruqui tsijtsu ninacžtan ojkchiča. Jalla nicju irantižcu nekztan Pedruqui chjichtatača, Dorcas curpu majcžta kjuyquin. Nii kjuyquin Pedružtan chica žejlcan žew maatakanacaqui kaatča. Nižaza ninacaqui Pedružquiz tjeeziča Dorcas paata zquitinaca, nii.

⁴⁰ Jalla nekztanaqui Pedruqui tjappacha nii parti žoñinaca ulanskatchiča. Ninacaž ulantiquiztan quillžcu Yoozquin mayizichiča. Naa ticzin žona curpu kjutñi cheržcu chiichiča, tuž cjican:

—Tabita, žaažna.

Jalla nižtiquiztanaqui naa ticzin žonqui čhjujcuqui cjetzinča. Nekztanaqui Pedro cheržcu, julzinča.

⁴¹ Pedruqui naaža kjarcu tanziča, nekztan tsijtskatchiča. Nuž tsijtskatzcu Pedruqui parti jilanacami nižaza žew maatakanacami kjawziča. Nekztan Dorcas žejtchin tjeeziča.

⁴² Tjapa nii Jope wajtchiz žoñinacaqui nii quintu zizziča. Jalla nižtiquiztan walja Yoozquin criichiča.

⁴³ Pedruqui tsjii kjaž maj nii wajtquiz kamchiča, Simón cjita žoñž kjuyquiz. Nii Simonaqui zkizinaca koñž langzñitača.

10

PEDRUZTAN CORNELIUZTAN

¹ Cesarea wajtquiz tsjii Cornelio cjita žoñi želatča. Niiqui zultatž jiliritača, Italian cjita regimientoquiztan.

² Jalla nii jiliriqiui nižž familianacžtanpacha arajpach Yooz rispitñitača. Nižaza Yoozquin mayiziñitača. Nižaza pori judío žoñinacžquiz walja paasztan yanapt'ichiča.

³ Tsjii noojiqui majñakak ora chjuužtažokaz tsjii Yooz anjila cherziča, kjanapacha. Nii anjilaqui nižžquin tjonžquichiča tuž cjican:

—¡Cornelio!

⁴ Corneliuzti tsucchi anjilž kjutñi cherziča. Nekztan pewcziča:

—Wejt Jiliri, žchjulutaya? —cjican.

Nekztanaqui nii anjilaqui kjaaziča, tuž cjican:

—Amqui Yooz Ejpžquin mayiziñamča. Nuž naychiča Yooz Ejpqui. Nižaza am t'akjir žoñinacžquiz yanaptanaca naychiča. Jalla nuž nayžcu, Yooz Ejpqui cuntintuča. Nižaza am cjuñža.

⁵ Jaziqui Jope wajtquin žoñinaca cuchanžca, Simona kjawzjapa. Nii Simonaqui Pedro cjitazakazza.

⁶ Pedruqui yekja Simonžtan alujtača. Nii yekja Simonaqui zkizi koñž langzñi žoñiča. Niiž kjuya pajk kot žcati žejlča. Nii Pedruž amquiz chiyaquiča, čhjulut am paas cječhaja, jalla nii. —Jalla nuž chiichiča nii anjilaqui.

⁷ Nii anjilaž ojektanaqui, Corneliuqui pucultan piyunanaca kjawziča. Nižaza atintiñi zultatunacžquiztan tsjii zuma cumpliñi zultatu kjawziča. Nii zultatuqui Yoozquin kuzzizzakaztača.

⁸ Nekztanaqui Corneliuqui nii kjawžta žoñinacžquiz tjapa quint'ichiča. Jalla nekztan Jope wajtquin cuchanchiča.

⁹ Niiž jaka tažuqui nii čhjepultan cuchanta žoñinaca Jope kjutñi ojkchiča. Jope watja žcatiž cjen, nii oraqui Pedruqui kjuy juntuñta patiuquin yawchiča Yoozquin mayizi. Nii oraqui taypurutača.

¹⁰ Jaziqui Pedruqui ancha čhjeri eeskatatča, lujlz pecatča. Jalla nuž čhjeri kisan, Pedruqui nii tsewcta patiuquin tsjii chjuužtažokaz cherziča.

¹¹ Jalla tuž cherziča: arajpacha cjetzi tsjii pajk mantilažtakaz chjijwžquichiča yokquin. Nii mantilaqui pajkpic punta žcucžintača.

¹² Jalla nii mantiliquiz tjapaman pajkpic kjojchanacchiz animalanacami, zko-ranacami, wežlanacami želatča.

¹³ Nekztanaqui Pedruqui tsjii jora nonziča, tuž cjican:

—Pedru, tsijtsna. Conžna. Lujlzna.

¹⁴ Pedruzti kjaaziča, tuž cjican:

—Wejt Jiliri, nižta anal paasača. Nii punta animalanaca ana lulasača. Lii quintrača. Jaziqui nižta anal lulasača wejrqui.

¹⁵ Jalla nuž kjaaztiquiztanaqui nii joraqui wilta chiižquichiča, tuž cjican:

—Yoozqui amquiz chiichiča, “Zumača niiqui, lujlzjapa” cjican. Jalla nii Yooziž chiita taku anam amqui nicasača, “Ana zumača lujlzjapa. Lii quintrača” cjicanaqui.

¹⁶ Jalla tižta čhjep wilta watchiča. Nekztanaqui nii mantilaqui arajpach kjutñi waytitatača.

17 Nekztanaqui Pedruž kuzquiz pinsichiča, tuž cjican: “Nii chjuužtakaz cherta ějaknužt cji? ěĈjulut Yoozqui wejtquiz intintiskatž pec?” Nii orapacha Simonž kjuya pewcpewcziča Corneliuž cuchanžquita žoñinacaqui. Nekztanaqui Simonž kjuy zanquin irantichiča.

18 Irantižcu, nii žoñinacaqui altu joržtan pewcziča, tuž cjican:

—ěSimón anaj tekz alujya? Simonž tsjii tjuuqui Pedro cjitača.

19 Pedruqui tirapanž pinsatča nii chjuužta puntuquiztan. Jalla nuž pinsan, Espíritu Santuqui niž kuzquiz cjichiča:

—Cheržca, Pedro. Ĉjepultan žoñinaca am kjurča.

20 Tsijtsna. Ĉhjiwžca. Ana paysnakcan ninacžtan oka. Wejrtča ninaca cuchanžquichintqui.

21 Jalla nekztanaqui Pedruqui Ĉhjiwžquichiča, nii Corneliuž cuchanžquita žoñinacžtan zali. Ninacžquiz cjichiča:

—Ančhucqui tsjii žoñi kjurča. Wejrtča niitqui. ěĈjulquin ančhucqui tjonch-inčhuctay?

22 Nekztan ninacaqui kjaaziča, tuž cjican:

—Cornelio cjita zultatž jliriž cuchanžquita tjonuča wejrnacqui. Niiqui walja rispitta žoñiča. Nižaza niiqui Yooz rispitičiča. Tjapa judío žoñinacaqui niž zuma kamañ wira quint'iñiča. Tsjii Yooz anjilaqui nižquin mantichiča, tuž cjican: “Žoñinaca cuchna, Pedro cjitaqui tekz am kjuyquiz kjawzjapa. Pedruž čiita taku nonžna amqui”. Jalla nuž Corneliužquiz cjichiča nii Yooz anjilaqui.

23 Nekztanaqui Pedruqui kjuyquiz kjawziča atintita cjisjapa. Tsjii arama nezk tjajžinčiča. Jaka tažuqui Pedruqui ninacžtan ojkčiča. Nižaza tsjii kjaž Jope wajtchiz hermanonacaqui nižtan čiica ojkčiča.

24 Niž kat tažu Cesarea watja irantichiča, Corneliuž kjuyquin. Jalla nicju Corneliuqui tjewznatča niž parintinacžtan, nižaza tsjii zuma mazinacžtan. Corneliuqui ninaca kjawziča, ninacazakaz Pedruž taku nonzjapa.

25 Pedruž kjuyquin luztan Corneliuqui nižtan zalčiča. Nekztan Pedruž yujcquiz quillziča, nii amzjapa.

26 Pedruzti tsijtskatchiča, tuž cjican:

—Tsijtsna amqui. Wejrmi am irat žoñizakaztča. Anača Yooztakaztča.

27 Jalla pucultan parlican, luzziča. Nii kjuyquin walja ajczi žoñinaca zalčiča.

28 Pedruqui ninacžquiz cjichiča:

—Ančhucqui zizza. Tsjii judío žoñiqui yekja wajtchiz žoñžtan anaž mazi cjisnasača, anaž ninacžtan ajcnasača. Nižaza yekja wajtchiz žoñž kjuyquin anaž tjonznasača. Jalla nuž judiož lii cjiča. Pero Yoozqui wejr intintiskatchiča. Anziqui Ĉjul žoñimi Yooz partiquiz cjesača, nii. Jalla nižtiquiztan wejrqui anal čiiz waquizuča, “Nii žoñiqui ana Yooz partiquiz cjesača” cjicanaqui.

29 Nekztan amiž kjawžtiquiztan wejrqui ana kjaž čižcu tjonchinča; judionacž lii quintra cjenami ana nicčinča. Pero ziz pecuča, ěkjažtiquiztan wejr kjawzinčhucta ančhucqui?

30 Jalla nekztanaqui Corneliuqui kjaaziča tuž cjican:

—Ažk pajkpic tjuñi wattan tii majñakak ora wejrqui kjuyquiz želatuča, Yoozquin mayizican, nižaza ayunazcan. Jalla nuž želan, tsjii walja llijñi zquitchiz žoñiqui wejtquiz jeczquichiča.

31 Nižaza wejtquiz cjichiča: “Cornelio, Yoozqui am mayizita nonziča. Nižaza amiž t'akjir žoñinacžquiz okztanaca cjuñziča.

32 Jaziqui Jope wajtquin žoñinaca cuchna, Simona zijcajo. Nižaza niž tsjii tjuuqui Pedro cjitača. Yekja Simonž kjuyquiz alujazi žejlpachača, pajk kot žcati. Nii yekja

Simonaqui zkizi koñz langzñi zoñičha. Nii Pedruqui tjonžcu, amtanž parlaquičha”. Jalla nuž wejtquiz chiichičha nii anjilaqui.

³³ Jalla nuž nii chiita tawk jaru, apura cuchanchinčha am kjuri. Walim tjonchamčha. Jaziqui tekzi tjappacha wejrnacqui Yooz Ejpž yujcquiz žejlčha. Jaknužt Yoozqui wejrnacalta amquiz cjitčhaja, jalla nii tjappacha nonz pecasučha wejrnacqui.

PEDRUZ PALJAYTA TAKUNACA

³⁴ Jalla nekztanaqui Pedruqui paljayi kallantichičha, tuž cjican:

—Jaziqui tintintazučha. Ultim weraraž, Yoozqui tii muntuquiz žejlñi zoñinaca anaž yekja yekja illillza.

³⁵ Yoozquin rispitznaquiž niiqui, nižaza Yooz kuzcama kamaquiž niiqui, Yoozqui jakzilta čhjul wajtchiz zoñžquizimi asiptasačha. Anziqui jalla nuž tintintazučha.

³⁶ Yooz Ejpqui Israel zoñinacžquiz amigo pajassičha. Nekztan niž zuma kamañ puntu zizkatchičha. Jesucristuž cjen zuma cuntintu kuzziz cjisñi atasachha, jalla nii. Jesucristučha čhjulquiztanami chekan Jiliriqiu, wali azziz.

³⁷ Ančhucqui zumapanž zizza, jaknužt judío yokquiz watčhaja, jalla nii. Primero Juanqui Yooz taku mazmazzičha. Nižaza zoñinaca bautissičha. Nekztanaqui Jesucristuqui niž persun Galilea yokquiz obranaca tjeezñi kallantichičha.

³⁸ Jesusaqui Nazaret wajtchiz zoñitačha. Yooz Ejpqui nižquiz walja Espiritu Santuž azi tjaachičha. Jalla nižtiquiztan ojklaychičha, walinaca paacan, nižaza zajraž tanta zoñinaca liwriican. Jalla nuž paachičha, Yooz Ejpžtan nižtan chicapachaž nuž cjen.

³⁹ Tjapa Jesusaž ojklaytanacami paatanacami cheržcu, jalla nii maznasačha wejrnacqui, Judea yokaran ojklaytanacami, nižaza Jerusalén watjaran ojklaytanacami. Wiruñiqui Jesusaqui cruzquiz ch'awctiquiztan conta ticzičha.

⁴⁰ Jalla nuž contiquiztan čhjep majquiztan Yooz Ejpqui Jesusa jacatatskatchičha. Jacatatskatžcu Yoozqui wejtnacaquiz parizizkatchičha.

⁴¹ Jesusaqui parti zoñinacžquiziqui ana parizichičha. Antiz wejtnacaquiz alaja parizichičha. Nižaza jecnacat Yooz Ejp illztčhaja, jalla ninacžquiz parizichičha Jesusaqui. Nižaza wejrnacmi Jesusaž jacatattiquiztan nižtan juntu lulassinčha, nižaza kjazmi juntu licassinčha.

⁴² Nekztanaqui Yooz Ejpqui tii Jesusapacha wali Juez Jiliržquin utchičha. Juez cjen nii Jesús chawc Jiliriqiu žejtñi zoñimi ticzi zoñimi juzjizaquičha. Jalla nii mazmazñijapa wejrnac cuchanžquichičha Jesusaqui.

⁴³ Nižaza tuquitanpacha Yooz taku parliñinacaqui Jesusiž puntuquiztan parlichipančha, tuž cjican: “Jakziltat nii Jesusižquiz tjapa kuztan criyačhaj niiqui ujnacquiztan pertuntaž cjequičha”.

ESPIRITU SANTUZ LUZTA

⁴⁴ Jalla nuž Pedruž chiyan, Espiritu Santuqui tjapa niž chiita taku nonzñi zoñinacžquiz luzzičha.

⁴⁵ Jalla nuž cjen nii Pedružtan tjonchi judío zoñinacaqui ispantichi quirchičha, Espiritu Santuqui tjaatazakaztačha ana judío zoñinacžquiziqui.

⁴⁶ Espiritu Santo tanžcu, nii zoñinacaqui yekja ana pajta taku chiichiyatčha. Nižaza Yoozquin waljaž alawatčha. Jalla nižtiquiztan ispantichi cjissičha nii žejlñi judionacaqui.

⁴⁷ Nekztanaqui Pedruqui cjichičha:

—Wejtnacaquiz Espiritu Santo tjaatačha. Nižaza tinacžquiz Espiritu Santo tjaatazazkazza. Jaziqui tinaca bautista cjisjapa, ¿jec zoñit atajas?

⁴⁸ Jalla nekztanaqui Pedruqui mantichičha, Jesucristuž tjuuquiz tinaca bautista cjeyajo. Nekztanaqui nii zoñinacaqui Pedružquiz rocchičha tsjii kjaž maj ninacžquiz kamt'ajo.

11

PEDRUZ JUDIO ZOÑINACŽQUIZ MAZTA

¹ Nii Judea yokaran žejlñi illzta apostolonacami, jilanacami, jalla ninacaqui quintu nonchiča, yekja wajtchiz žoñinacaqui Yooz taku catokchiča, jalla nii.

² Pedruqui Jerusalén watja quejpžquichiča. Jalla nuž quejptan parti judío criichinacaqui Pedruž quintra chuchchiča,

³ tuž cjican:

—¿Kjažtiquiztan učum lii quintra amqui yekja wajtchiz žoñinacžquin tjonzñi ojkchamtajo? ¿Kjažtiquiztan učum lii quintra ninacžtan lujlchamtajo?

⁴ Nekztanaqui Pedruqui nii parti judionacžquiz quint'ichiča, jaknužt watčhaja primerquiztanpacha Corneliuž puntu, jalla nii. Tuž cjican, quint'ichiča:

⁵ —Wejrqui Jope wajtquin želatuča. Yoozquin mayizican, tsjii chjuužtažoka cherchinča, jalla tižta. Tsjii pajk mantilažtakaz tsewctan chjijwžquichiča. Niiž pajkpic puntuquiztan žcucžintatača. Jakziquiztažlaj wejrqui, jalla neksz wejr tirichuc irantižquichiča.

⁶ Jalla nuž irantižquitanaqui zumpacha cherzinča, čhjulut nii kjuyltan žejl, cji-can. Jalla nuž wejrqui cherchinča tjapaman pajkpic kjojchchiz animalanaca, k'it animalanacami, zkoranacami, wežlanacami, jalla nuž cherchinča.

⁷ Nii orazakaz tsewctan tsjii žoñž joražtakaz nonzinča. Wejtquin chiižquichiča tuž cjican: “Pedro, tsijtsna. Conžna. Nižaza lujlžna”.

⁸ Wejrzi kjaazinča, tuž cjican: “Wejt Jiliri, nižta anal paasača. Nii punta animala ana luli atasacha, am lii quintrača. Jaziqui nižta anal paasača wejrqui”.

⁹ Jalla nuž kjaaztiquiztanaqui nii joraqui wiltazakaz chiižquichiča, tuž cjican: “Yoozqui chiichiča, ‘Zumaž tiiqui lujlžjapa’ cjican. Nii Yooz zuma cjitaqui ana amqui ‘Ana lulasaž’ cjeella. Yooziž chiita taku anam nicz waquiziča, ‘Ana lulasaž. Lii quintrača’ cjicanaqui”.

¹⁰ Jalla nuž čhjep wilta watchiča, nekztanaqui nii mantilaqui waytitatača tsewcchucpacha.

¹¹ Nekztanaqui čhjepultan žoñinacaqui weriž alujta kjuyquiz irantižquichiča. Cesarea wajtquiztan cuchantatača wejr kjuri.

¹² Nižaza Espíritu Santuqui wejr mantichiča ninacžtan ana paysnakcan okajo. Nižaza sojtaltan jilanacaqui wejttan chica ojkchiča. Jalla nicju irantižcu, tjappacha wejrnacqui tsjii žoñž kjuyquiz luzazzinča.

¹³ Nižaza nii kjuychiz žoñiqui wejtnacaquiz quint'ichiča, jaknužt niiž kjuyquiz tsjii anjila chertčhaja, jalla nii. Nii anjila tsijtsi cherchiquiča. Nižaza nii anjilaqui niižquiz tuž cjichiquiča: “Jope wajtquin žoñinaca cuchanžca, Simona kjawznajo. Niiž tsjii tjuuqui Pedro cjitača.

¹⁴ Jalla niiqui amquiz chiyaquiča, jaknužt ammi nižaza tjapa am familianacami liwriita cječhaja, jalla nuž”.

¹⁵ Nekztanaqui wejrqui ninacžquiz parli kallantitan, Espíritu Santuqui ninacžquiz luziča, jaknužt tuquiqui učumnacaquiz luztčhaja, jalla nuž.

¹⁶ Jalla nekztanaqui wejrqui Jesusaž niiž tuqui chiita taku cjuñzinča. Jesucristo Jiliriqui cjichiča, “Juanqui kjaztan bautisñipantača. Ančhucqui antis Espíritu Santužtan bautistaž cjequiča”.

¹⁷ Jesucristo Jiliržquiz criichiž cjen Yoozqui učumnacaquiz Espíritu Santo tjaachiča. Nižta iratapacha Yoozqui ninacžquiz Espíritu Santo tjaachiča. Jaziqui wejrqui anal Yooz quintra cjesača. —Nuž quint'ichiča Pedruqui.

¹⁸ Jalla nii quintu nonztiquiztan nii Jerusalén wajtchiz criichinacaqui ana iya chutchiča. Nužquiz ch'ujquichiča. Yoozquin alawazziča, tuž cjican:

—Nižazakaz yekja wajtchiz zoñinacaqui persun ujnaca pajžcu, nižaza persun kuznaca campiižcu, jalla nekztan ninacaqui persun ujnacquiztan pertuntazakaz cjequiča. Nižaza wiñaya Yooztan kamaquiča.

CRIICHI ZOÑINACA WICHANZI

¹⁹ Esteban conžcuqui, yekja Yoozquin criichinaca zakaz walja tanzquin cjissiča. Jalla nuž cjen criichinacaqui yekja watjanacquin atipassiča. Fenicia, Chipre, Antioquía, jalla nii yokanac kjutñi wichanziča. Jalla nicju liwriñi Yooz takunaca parličiča. Judío zoñinacžquiz alaja parličiča, ana yekja zoñinacžquiziqui.

²⁰ Yekjapa criichi jilanacaqui Chipre yokquiztan nižaza Cirene yokquiztan ojkčiča. Nekztanaqui nii yokanacquiztan Antioquía watja irantičiča. Nekztan Antioquía wajtquin yekjapa criichinacaqui ana judío zoñinacžquiz parlichizakazza Liwriñi Jesucristo Jilirž puntu takunacquiztan.

²¹ Jesucristo Jilirž aziqui ninacžquiztača. Nižaza nii parlitiquiztanaqui walja zoñinacaqui tuquita cuzturumpinaca jaytižcu, Jesucristo Jiliržquin tjapa kuztan criičiča.

²² Nekztanaqui Jerusalén iclizziz criichinacaqui nii quintu nončiča. Jalla nii quintu nonžcu, Bernabé cjita zoñi cuchanchiča Antioquía watja.

²³ Jalla nicju irantižcu, Bernabequi cherčiča, jaknužt Yoozqui nekz žejlñi criichinacžquiz okztčhaja, jalla nii. Nii criichinacaqui walja cuntintutača. Jaziqui Bernabequi tjappachquiz chiižinčiča, tuž cjican:

—Yoozquin criichinaca, zuma tjapa kuztan Yooz jiczquiz kamaquiča.

²⁴ Nižaza Bernabequi wali zuma zoñitača. Niiqui Espiritu Santužtan tsjii kuzziztača. Nižaza Yoozquin tjapa kuzziztača. Jalla nuž zuma kamcan walja zoñinaca Yoozquin macjatskatžquičiča Bernabequi.

²⁵ Jalla nekztanaqui Bernabequi Tarso watja ojkčiča Saulo kjuri. Saulo wajtžcu Antioquía chjitchiča.

²⁶ Jalla nicju tsjii wata intiru criichinacžtan žejlčiča. Tama zoñinacžquiz Yooz taku tjaajinčiča. Antioquía wajtquiziqui criichinacaqui cristiano tjuuchiz cjissiča. Tuquiqui nižta tjuuchiz ana želatča.

²⁷ Jalla nii timpuqui tsjii kjažultan Yooz taku parliñi zoñinacaqui Jerusalén wajtquiztan Antioquía ojkčiča.

²⁸ Tsjiiqui Agabo cjitatača. Niiqui nii ajczñi criichinacž taypiquiz tsijtsiča. Tsijtsan Yooz Espiritu Santuqui nii Agabo chiikatchiča, tuž cjican:

—Tjapa tii yokquiz wali čhjer mach'a želaquiča.

Jalla tižta watchiča, Claudio cjita chawc jiliriž mantiz timpuqui.

²⁹ Jalla nižtiquiztan nii Antioquía wajtchiz criichinacaqui acuerdo luzziča Judea wajtchiz jilanacžquin tsjii yanapñi cuchanzjapa. Zapa mayniqui jaknužt onanchucažlaja jalla nuž onanchiča, nii Judea wajtchiz criichi jilanacžquin yanapzjapa.

³⁰ Nižaza nii onantanaca apayčiča Judea wajtchiz icliz jilirinacžquin. Bernabežtan Saulužtan nii apayanacaqui chjitchiča.

12

JACOBO CJITA APOSTOL CONTACHA

¹ Jalla nii timpu Herodes cjita chawc jiliriqui yekjap Yoozquin criichi zoñinaca tanchiča.

² Nižaza Herodesqui Jacobo conkatchiča pajk cuchillžtan. Jacobqui Juanž jilatača.

³ Jalla nuž contiquiztanaqui judío zoñinacaqui muzpa chipchipčiča. Jalla nuž nayžcu Herodesqui Pedro preso tanchizakazza. Jalla nii oraqui ana liwaturchiz t'anta lujlz pijstatača.

⁴ Pedro preso tantiquiztan, carsilquiz chawctatača. Carsilquiz pajkpic t'ak zultatunaca wijilñi uchtatača. Zapa t'akaqui pajkpic zultatuchiztača. Pascua pjijsa pastanalla Herodesqui Pedro jwes pinsichiča, nii Jerusalén wajtchiz žoñinacžquiz tjeezjapa.

⁵ Nuž Pedruqui tirakaz carsilquiz chawcta želatča, zultatuž cwitita. Nii parti Yoozquin criichi jilanaca cullaquinaca niiztajapa walja tjapa kuztan Yoozquin mayizatča.

PEDRO CARSILQUIZTAN LIWRIITA

⁶ Jaka tažuqui Herodesqui Pedro jwes pecatča žoñinacžquiz tjeezjapa. Ima jwesan nii ween Pedruqui tjajatča, carinžtan čejlta pucultan zultatž taypiquiz. Yekja zultatunacaqui carsil zanquiz wijilatča.

⁷ Jalla nii weenpacha tiripintit Yooz anjilaqui tjonchiča. Nižaza nii carsil kjuyltan muzpa waljaž kjanchiča. Nekztanaqui nii anjilaqui Pedruž latuquiztan lanziča. Nuž lanžcu tjaji wajtskatchiča. Nekztanaqui Pedružquiz paljaychiča:

—Uri žaažna, —cjican.

Jalla nii orapacha Pedruž kjara čejlta carinaqui jutztoka tjojtsiča.

⁸ Nižaza nii anjilaqui cjichiča:

—Cinturuna zumpacha yajkzna. Nižaza am čhjata čhjatzna.

Jalla nuž Pedruž paan, nii anjilaqui cjichiča:

—Am irs irsna. Wejt wirquiz apžca.

⁹ Nekztanaqui Pedruqui anjilž wirquizpacha ulanchiča carsilquiztan. Nii ora Pedruqui werara ana werara, ana zuma zizi atchiča. “Chjuuznoka wejrqui” cjican pinsatča.

¹⁰ Jalla nekztanaqui primera wijilñi zultatu watchiča. Nekztanaqui nii jaru wijilñi zultatu watchizakazza. Nekztanaqui carsil zanquin irantichiča. Nekztan carsil jir chawjczqui jutztoka cjetsiča. Jalla nekztanaqui callquinpacha ulanchiča, nižaza ojkchiča. Jalla nuž cjen yekja callquin zina ectača. Anjilaqui nužquiz juttokaz katchiča.

¹¹ Pedruqui nekztan zumpacha naaziča, carsilquiztan liwriita, nii. Nekztanaqui cjichiča:

—Ultim werara liwriitaž wejrqui. Anal chjuuznukalala. Wejt Yooz Ejp Jiliriqui niiz anjila cuchanžquichiča wejr liwriizjapa Herodes kjarquiztan, nižaza nii anawali paaz pecni judío žoñinacž kjarquiztan.

¹² Jalla nuž pinsican, Pedruqui María kjuya ojkchiča. Naa Mariiqui Juanž maatača. Juanž tsjii tjuuqui Marcos cjitazakaztača. Jalla naaža kjuyquin walja Yoozquin criichi žoñinacaqui ajczitača, nii ora Yoozquin mayizatča.

¹³ Pedruž kjuy patio zana t'okt'okan, tsjaa tur cullaqui Rode cjiti ulanžquichinča, ject tjonchi, cjican.

¹⁴ Pedruž jora čhajzcu, ancha cuntintu zajtchinča partinacžquin mazni, Pedruča tjonchi, cjican. Tjatzintača, nii patio zana cjetzinz.

¹⁵ Nii quintu nonžcu, criichi žoñinacaqui cjichiča:

—¡Amqui lucuratača!

Jalla nuž chiyan, naaqui werarapanča cjichinča. Nii partinacžti cjichiča:

—Anaž nii cjesača. Niiž animužlani anjilažlaj.

¹⁶ Pedruzti tira zanquiz t'okžinchiča. Nekztan chawjcz cjetžinchiča. Pedro cheržcu, walja tsucchi cjissiča.

¹⁷ Pero Pedruqui kjaržtan siñala utchiča nii ajczi žoñinaca ch'uj cjeyajo. Jalla nekztanaqui Pedruqui quint'ichiča, jaknužt Yoozqui nii carsilquiztan liwriitčaja, jalla nii. Nižaza cjichiča:

—Ančhucqui nužuzakaz quint'aquiča Jacob jilžquin nižaza parti criichinacžquin. Wejr okaž, —cjichiča.

Jalla nekztanaqui Pedruqui ulanchiča, yekja kjutñi ojkzjapa.

¹⁸ Tjuñiž tewjctanalla, Pedro ana žejlñi cheržcuqui, nii wijilñi zultatunacaqui ancha tsucchiča, nižaza kuz turwayskatchiča. Pedruqui jaknužt ulantčhaja, jalla nii ana wira jaknuž zizi atchiča.

¹⁹ Nekztanaqui Herodesqui Pedro kjuri cuchanchiča. Ana wachi atchiča. Jalla nekztanaqui Herodesqui nii wijilñi zultatunacžquiz zumpacha pewcpewcziča. Jalla nuž pewc pewcžcu, nii zultatunaca conajo mantichiča. Jalla niž wiruñ Herodesqui Judea yokquiztan ojkchiča, Cesarea wajtquin želi.

HERODES TICZICHA

²⁰ Herodesqui žawjchiča Tiro Sidón wajtchiz žoñinacž quintra. Jalla nižtiquiztanaqui ninacaqui acuerdo palt'ichiča Herodes yujcquiz prisintisjapa. Nii Tiro Sidón watjanacchiz žoñinacaqui Herodes tjaata čheržtan kamñitakalča. Nižaza tsjii Blasto cjita žoñi želatča. Niiqui Herodes secretariotača. Jalla nii žoñinacaqui Blasto cjita secretario roct'ichiča ninacžta favora tjurt'izinajo, Herodes ana quintra cjeyajo.

²¹ Herodesqui tsjii tjuñi citchiča ninaca nekzi prisinti cjeyajo. Jalla nii cita tjuñquiziqui Herodesqui niž wali jilir zquiti cujtsiča audiencia watzjapa. Jalla nuž zquiti cujtžcu, niž mantiñi sillquin julziča. Nekztanaqui tsjii kjaž takunaca chiichiča.

²² Jalla nuž chiitiquiztanaqui nii nonzñi žoñinacaqui kjawi kallantichiča, tuž cjican:

—Tii chiiñi žoñiqui anača ina žoñi. ¡Antis yoozpanča!

²³ Jalla nuž kjawtiquiztan Herodesqui cuntintutača, nii žoñinacž kjawta taku ana nicz pecatča, “Anača wejrqui Yooztqui” cjicanaqui. Ana werar Yooz Ejpžquin honora tjaachiča. Jalla nižtiquiztan nii orapacha Yooz Ejp Jiliri qui niž anjila cuchanžquichiča, Herodes chawc laa cjisnajo. Jalla nekztanaqui nuž laacjžcu Herodesqui lak'už liwj mirta ticziča.

²⁴ Pero nii liwriñi Yooz takuqui tjapa kjutñi parlita cjissiča. Nekztanaqui tsjan tsjan žoñinacaqui tjapa kuztan nii parlita Yooz taku criichiča.

²⁵ Bernabežtan Saulužtan nii pucultanaqui apayta onantanaca intirjižcu, Jerusalén wajtquiztan Antioquia quejpcchiča. Nižaza Juan chjichcu ojkchiča. Juanqui niž tsjii tjuuqui Marcos cjitazakaztača.

13

BERNABEZTAN SAULUZTAN CUCHANTA

¹ Antioquia wajtchiz Yoozquin criichi žoñinacžquiztan Yooz puntu tjaajiñinaca, nižaza Yooz taku chiiñi profetanaca želatča. Jalla tinacatača: Bernabé, Saulo, Simón (Negro cjitazakaztača), Lucio (Cirene wajtchiz žoñitača), nižaza Manaén (niiqui junto pajkchiča Herodestan. Herodesqui Galilea kjuttan mantiñitača).

² Tsjii nooj Yoozquin alawazjapa ajczitača, nižaza nii ora ayunasatkalča. Jalla nuž cjen Espiritu Santuqui ninacžquiz cjichiča:

—Ančhucqui Bernabé nižaza Saulo yekja t'akžina, weriž munta trabajo paañijapa.

³ Jalla nekztanaqui Yoozquin mayiziccu, nižaza ayunascu, nii Yoozquin criichinacaqui Bernabežtan Saulužtan ninacž juntuñ kjaržtan lanziča. Nekztanaqui nii pucultanaqui cuchanchiča, Yooz trabajo trabajžcajo.

BERNABEZTAN SAULUZTAN CHIPRE YOKQUIN OJKTA

⁴ Nekztanaqui Espiritu Santuž cuchanžquitan Bernabežtan Saulužtan ojkchiča Se-leucia cjita watja. Jalla nicju warcu zalchiča Chipre cjita yoka ojkzjapa.

⁵ Jalla nicju irantižcu Salamina cjita watja luzziča. Jalla nicju judionacž ajcz kjuyanacquiz Yooz taku parli kallantichiča. Juan Marcos ojkchizakazza ninaca yanapi.

⁶ Tjapa nii Chipre cjita yokaran ojklaychiča. Nižtami Pafos cjita watja iran-tichiča. Jalla nicju tsjii judío žoňžtan zalchiča. Nii žoňiqui Barjesús cjitatača. Nii žoňiqui laykatalča. Nižaza toscara chiiñitakalča, “Wejrqui Yooz taku chiichiyuča” cjiñitakalča.

⁷ Jalla nii layka žoňiqui chawc jiliri Sergio Paulo cjita nižtan chicatalča. Jalla nii jiliri cusa zizni žoňitača. Nii žoňiqui Yooz taku nonz pecatča. Jalla nižtiquiztan Bernabežtan Saulužtan kjawskati cuchanchiča.

⁸ Nii layka žoňiqui ninacž quintra chiichiča, nii jiliri ana Yooz taku nonznajo, nižaza Yoozquin ana kuzziz cjejajo. Nii layka žoňž tsjii tjuuqui Elimas cjitazakaztača.

⁹ Nižaza Sauluž tsjii tjuuqui Pablo cjitazakaztača. Nii Pabluqui Espíritu Santuž irpitapantača. Nii layka žoňž Yooz tawk quintra chiitiquiztan, Pabluqui nii žoňž kjutni zumpacha cherziča,

¹⁰ tuž cjan:

—Amqui anawalimča. Incallnamča. Amqui zajriž maetimča. Nižaza Yooz kuz quintramča. Amqui Yooz Ejpž taku tsjii kjutni intintiskatz pecnampanča. ¿Kjažtiquiztan nižta amjo?

¹¹ Jaziqui Yooz Ejp Jiliri am casticaquiča. Zuram cjequiča. Tsjii kjaž maj tii tjuñ sii anam cheraquiča.

Jalla nii orapacha zura cjissiča, zumchiquizpan. Ana zinta cheri atžcu, nii layka žoňiqui tsjii žoňi kjurchiča niž kjarcu tanžcu chjichñijapa.

¹² Jalla nižta cheržcu, nii chawc jiliri Yoozquin criichiča. Yooz taku puntu tjaajintiquiztan walja ispantichi quirchiča nii jiliri.

ANTIOQUIA OJKTA

¹³ Jalla nekztanaqui Pabluqui niž mazinacžtan warcu zalchiča Pafos wajtquiztan ojczjapa. Nekztan Perge cjita watja irantichiča. Perge watjaqui Panfilia yokquintača. Nekztan Juanqui ninaca ecchiča, Jerusalén watja quejžquichiča.

¹⁴ Nekztanaqui ninacaqui Pergequiztan watchiča Antioquía watja. Antioquía watjaqui Pisidia yokquintača. Jalla nicju tsjii jeejz tjuñquiz luzziča tsjii judionacž ajcz kjuyquiz. Nekztanaqui luzcu, julziča.

¹⁵ Jalla nuž želan cjiirta Yooz tawk liwruqui liitatača, Moisés cjiirta Yooz takumi, nižaza Yooz cuntiquiztan chiiñi profetanacž cjiirta takumi, jalla nii liitatača. Jalla nuž ližcu ajcz kjuy jilirinacaqui Bernabežquiz Pablužquiz chiyajo nuž cjichiča, tuž cjan: —Jilanaca, ančucalta tsjii zuma taku želanaqui, anzpachaž chiya.

¹⁶ Nekztanaqui Pabluqui tsijtsiča. Nižaza kjara waytižcu ch'uj cjiskatchiča. Jalla nuž ch'uju želan, paljaychiča tuž cjan:

—Israel wajtchiz žoňinaca, nonžna. Nižaza werar Yooz rispiti žoňinaca, nonžna.

¹⁷ Israel wajtchiz žoňinacž Yoozza werar Yoozqui. Jalla nii Yoozqui učum tuquita atchi ejpnaca illziča nižquin sirwajo. Nii timpuquin Egipto yokquin tirapan kamchiča yekja wajtchiz žoňinacžtakaz. Jalla nižta želanami Yoozqui walja mirkatchiča. Wiruñnaqui Yooz Ejpqui niž azi tjeezcan jwezquichiča nii yokquiztan.

¹⁸ Pusi tunc watanaca ch'ekti yokaran ojklayan, Yoozqui ninacž anawali kamzquiztan awantichiča.

¹⁹ Nii timpupacha pakallak nacionanacaqui Canaán yokquin žejlñitača. Jalla tjapacha nii yokquiz žejlñinaca tjananchiča Yoozqui, nižaza ninacž yoka tjaachiča učum tuquita atchi ejpnacžquiz, tsjii irinsažtakaz.

²⁰ Nekztanaqui pusi patac pjijska tuncan watanaca juezanaca utchiča učum ejpnacžquiz mantiñijapa, Samuelž timpu irantisquizcama. Samuelqui Yooz cuntiquiztan chiiñi profetatača.

²¹ Jalla nii Samuelž timpuquiz učum ejpnacaqui tsjii pajk jiliri maychiča ninaca irpiñijapa. Jalla nuž maytiquiztan Yoozqui Saúl illziča ninaca mantiñijapa. Nii Saúlqui

Cis majchtača, nižaza Benjamín t'akquiztantača. Nii Saúlqui pusi tunc watajapa mantiñitača.

²² Nekztanaqui Yoozqui niž puestuquiztan Saúl jwessiča. Jalla nekztanaqui nii rey puestuquin David utchiča. Davidž puntuquiztan Yoozpachača tuž cjichiqui: “Wejrqui tii David cjita žoñi nayuča Isaíz majchča. Tii žoñiž cjen ancha cuntintutča. Wejt kuzcamapanikaz kamñipanča tiiqui”. Jalla nuž cjichiča Yoozqui.

²³ Tsjii Davidžquiztan majchmaati ojkñiqui Jesusa cjitača. Tuquiqui Yoozqui taku ecchiča Israel wajtchiz žoñinaca liwriizjapa. Jalla nii taku cumplisjapa, Yoozqui tii Jesusa cuchanžquichiča Israel žoñinaczquiz.

²⁴ Ima Jesusaž Yooz langz kalltan, Juanqui tjapa Israel žoñinaczquiz parliñitača, tuž cjican: “Ančhucqui persun ujnaca pajžcu, kuznacaž campiya, nekztan bautistaž cjesača”.

²⁵ Juanž ticz tjuñi žcatžinzcan, Juanqui cjichiča: “Ančhucqui jaknužt wejt puntuquiztan pinsičhaja, niiqui anača niit wejrqui. Wejt wirquin tjonča tsjiiqui, wejtquiztan juc'ant jiliriča. Nii atintizjapa, anal waquizuča, nižaza wejrqui inakaztča.”

²⁶ Jilanaca, Abrahamž majchmaatinaca, nižaza Yooz rispitsñinaca, ančhucqui nonžna. Ančhucaltajapaž tii liwriiñi Yooz taku žejlča.

²⁷ Jalla nii Jerusalén wajtquiz kamñi žoñinacami, nižaza niž jilirinacami, jecčhalaja Jesusaqui, nii ana zizatča. Zapa jeež tjuñquiz judionacz ajcz kjuyquin tuquita profetanacz cijirta taku liiñipanča. Jalla nuž liyanami nii taku anaž intintazñipantača. Nii žoñinacapachača tuquita Yooz taku cumpliskatchiqui, Jesusa conta cjiskatchiča, nuž.

²⁸ Nii Jesusižquiz ana čjul ujmi watchiča, nii conzjapaqui. Jalla nuž cjenami ninacaqui Pilato chawc jiliržquiztan maychiča, nii Jesusa conzjapa.

²⁹ Nekztanaqui Jesusiž puntuquiztan jaknužt tuquitanpacha Yooz tawk liwruquiz cijirtatažlaja, jalla tjapa nii cijirta takunaca cumplisiča. Nii taku cumplisiquiztan Jesusiž curpu cruzquiztan apakchiča. Nekztanaqui niž curpu tjattatača.

³⁰ Yooz Ejpzti Jesusa ticziquiztan jacatatskatchiča.

³¹ Nekztanaqui tsjii kjaž majquiztan Jesusaqui niž mazinaczquiz tjontjonziča. Niiž mazinacaqui nižtan chica ojkchiča Galilea yokquiztan Jerusalén watja. Nižaza ninacaqui anziqui žoñinaczquiz niž puntuquiztan tiraž parliča.

³² Jaziqui Yoozqui učum tuquita atchi ejpnaczquiz taku ecchiča. Wejrnacqui nii cumplista takunaca zijcchinča ančhucaquiz mazjapa. Jalla nii zuma mazta ančhucaquiz parluča. Yoozqui učum ejpnaczquiz taku ecchiča.

³³ Učumqui nii tuquita atchi ejpnaczquiztan tjonchinča. Učumnacalta Yoozqui niž ecta taku cumplisiča, Jesusa jacatatskatchiqui, nii. Nižaza nižtapacha segundo salmuquiz cijirtatača tuž cjican: “Amqui wejt maatimča. Tonj tjuñi žejtkatchinča”.

³⁴ Nižaza Yooz Ejpqui niž jacatatz puntuquiztan chiichiča, tuž cjican: “Ticziquiztan am curpu jacatatskatača, ana wira sipulturquiz mojkzjapa”. Jalla nii puntuquiztan chiiča cijirta Yooz takuqui, tuž cjican: “Yoozqui Davidžquiz taku ecchiča, jalla nii tawk jaru ančhucaquiz zuma favora paasača Yoozqui”.

³⁵ Jalla nužpan chiiča tsjii salmuquiziqui, tuž cjican: “Am zuma sirwiñiž curpu ana ecta cjesača mokajo”.

³⁶ Jalla nuž werarača. Davidqui niž timpu žejlñi žoñinaczquiz yanapchiča, jaknužt Yooz mantičhaja, jalla niicama. Nekztanaqui Davidqui ticziča niž ejpnaca irata. Nekztan niž ticzi curpu tjattiquiztan mojkchiča.

³⁷ Jesucristuzti Yooziž jacatatskatchiča. Niiž curpuzti ana mojkchiča.

³⁸ Jilanaca, ančhucqui tuž ziz waquiziča. Jesusiž cjen ujnaca pertuntaž cjesača. Jalla nii zuma taku ančhucaquiz parluča.

³⁹ Moisés mantita lii jaru kamcanami, ana pertunta cjisñi atča. Jesusižquiz macjatchi cjenacqui jalla nižtakaz tjapa ujnacami pertuntaž cjesača.

⁴⁰ Jaziqui ančhucqui cwit'aza, ana nii tuquita cjiirta casticu sufrisjapa. Tuquitan Yooz taku parliñi profetanacaqui cjiirchiča, tuž cjan:

⁴¹ “Nonžna, Yooztan quintražñinaca, azzucaž ančhucqui, nižaza chjatkatchucaž ančhucqui. Wejrqui Yooz Ejptča. Ančuca kamz timpuquiz wali pajk obranaca paachinča. Jalla nuž ančucaquiz quint'ichi cjenami ančhucqui ana criyasača. Jalla nižtiquiztan ispantichi cjisna, nižaza casticta cjequiča, ančhucqui Yooz quintra tjasñinaca”.

⁴² Nuž chiižcu Pabluqui niiž mazinacžtan judionacž ajcz kjuyquiztan ulanchiča. Yekjap ana judionacž ejpchiz žoñinaca želatča. Jalla ninacaqui roct'azziča, tuž cjan: –Tii jar jeejz tjuñquiz tii puntunacquiztan wejtnacaquiz wilta tjaaznalla.

⁴³ Nii ajcz kjuyquiz nii cultu žeržcu walja judío žoñinaca, nižaza judiož cuzturumpi paañinaca, jalla ninacaqui Pablužtan Bernabežtan chica apziča. Nii pucultanaqui zuma taku tjaachiča, tuž cjan:

–Ančhucqui Yoozquin tjapa kuztanž cjee. Nižaza tjurt'iñi kuzziz cjee.

⁴⁴ Jalla nii wiruñta jeejz tjuñquiziqui joz tjapa nii wajtchiz žoñinacaqui ajcziča Yooz taku nonzjapa.

⁴⁵ Jalla nuž ajczi cheržcu, nii judío žoñinacaqui iñizichiča. Nekztanaqui Pabluž quintra chiichiča, niiž taku ana walkatzjapa. Nižaza Pablo iñarchiča.

⁴⁶ Nekztanaqui Pablužtan Bernabežtan ana ekscu chiichiča, tuž cjan:

–Ančhucqui judío žoñinacžhucča. Nižtiquiztan ančucaquiz primeraqui tii liwriiñi Yooz taku chiistanča. Ančhuczi tii Yooz taku anaž nonz pecča. Nižaza Yooziž tjaata wiñaya žeti anaž risiwz pecča, jalla nuž tantiichinčhucča ančhucqui. Jalla nižtiquiztan anziqui ana judío ejpchiz žoñinacžquiz tii Yooz taku paljayača.

⁴⁷ Jalla nuž mantichiča Yooz Ejp Jiliriqiu, tuž cjan:

“Wejrqui ančucaquiz utchinča, tjapa nacionanacquin žoñinacžquiz wejt puntu kjanzt'ajo. Ančucaž cjen tjapa kjuttan tii muntuquiz yok tjiiquin kamñi žoñinacami liwriitaž cjequiča”.

⁴⁸ Jalla nuž nonžcu, nii ana judío ejpchiz žoñinacaqui ancha chipchiča. Nižaza Yooz tawk puntuquiztan, tuž cjichiča: “Tii Yooz takuqui zumapanča”. Jakziltat arajpachquin wiñaya kamzjapa Yoozqui illzaja, tjapa ninacaqui nii parlita Yooz taku criichiča.

⁴⁹ Tjapa yokaran Jesucristo Jilirž puntuqui parlitatača.

⁵⁰ Judío žoñinaczi quintra aptazziča. Nekztan ninacaqui tsjii kjaž rispitta judío cuzturumpi paañi maatakanacžtan, nižaza tsjii kjaž wali zuma rispitta wajt jilirinacžtan palt'ichiča. Nii judío žoñinacž cjen ninacaqui Pabluž nižaza Bernabež quintra aptazzizakazza, nii yokquiztan chjatkatzcama.

⁵¹ Jalla nižtiquiztan Pablužtan Bernabežtan ninacž kojchquiztan zcatchi pulpu tsajt-siča. Jalla nii tsajtstaqui tsjii siñalažtakaztača nii wajtchiz žoñinacž quintrajapa. Nii yokquiztan ulanžcu, Iconio cjita watja ojkchiča.

⁵² Pero nii Yooz taku catokñi žoñinacaqui ancha cuntintutača. Nižaza Espiritu Santuž irpitapanž cjissiča.

14

ICONIO WATJA OJKTA

¹ Iconio cjita wajtquin kamcan Pablužtan Bernabežtan luzziča nii judionacž ajcz kjuyquin. Nekztan Jesucristuž puntuquiztan parlitiquiztan, walja judío žoñinacžtan, nižaza ana judío žoñinacžtan, walja ninacaqui Yoozquin criichiča.

² Pero nii ana criichi judío žoñinaczi ana criiž pecchipantača. Nekztan ninacaqui parti žoñinaca Yoozquin criichinacž quintra aptazziča, nižaza criichinacž quintra pinsiskatchiča, “Nii Yoozquin criichi žoñinacaqui anawalipanča” cjicanaqui.

³ Jalla nižtiquiztan Pablužtan Bernabežtan ažk tjuñi kamchiča nii wajtquin. Nižaza zuma tjurt'iñi kuzziz paljaychiča. Nižaza Jesucristo Jiliržquin tjapa kuzziztača. Jalla nižtiquiztan Jesucristuqui azi tjaachiča, siñalanacami milajrunacami paajo. Jalla nuž paatiquiztan kjanapacha tjeežtatača, Yooz okzñi takuqui werarača, jalla nii.

⁴ Nii wajtchiz žoñinacaqui pizc partiquin t'akziča. Parti žoñinacazti judío žoñinacžquin apuychiča. Parti žoñinacazti apostolonacžquin apuychiča.

⁵ Jalla nekztanaqui judío žoñinacaqui parti žoñinacžtan, nižaza nii wajt jilirinacžtan, tsjii parla asiptichiča Pablo Bernabé ch'aanizjapa, nižaza ninaca maztan čhajczjapa.

⁶ Pablužtan Bernabežtan jalla nii quintu zizcu, atipassiča. Litra wajt kjutñi ojkchiča. Nižaza Derbe wajt kjutñi ojkchizakazza. Nii pizc watjanacaqui Licaonia cjita yokuintača.

⁷ Tjapa nii Licaonia yokaran zuma liwriiñi Yooz taku parličiča.

PABLO MAZTAN ČHAJCTA

⁸ Nii Litra wajtquin tsjii zuch žoñi želatča. Majttiquiztanpacha nižtapantača, wira ana ojklayñitača. Jalla nicju julzi želatča.

⁹ Nii zuch žoñiqui Pabluž chiita taku nonziča. Nii žoñiqui “Pabluqui wejr čhjetnasaž jaz” cjican pinsichiča. Nižaza Pabluqui niž kuzquiz naychiča, Yoozquin tjapa kuzziz cjeta, jalla nii.

¹⁰ Jalla nižtiquiztan Pabluqui nižquiz zuma chekžcu, altu joržtan chiižinchiča, tuž cjican:

—Sok'opacha tsijsna, am persun kjojchtan.

Jalla nižta chiitiquiztanaqui nii zuch žoñiqui tsjii layzcu tsijsiča, nekztan ojklayi kallantichiča.

¹¹ Jalla nii Pabluž paata cheržcu, žoñinacaqui walja kjawi kallantichiča. Licaonia tawkquiztan kjawchiča tuž cjican:

—Yooznacaqui žoñižtakaz tsewctan chjijwžquichiča učumnacaquiz.

¹² Nii žoñinacaqui cjetča, Bernabequi Júpiter cjita yoozza. Pabluqui parliñipantača, jalla nuž cjen nii žoñinacaqui cjichiča, Pabluqui Mercurio cjita yoozza.

¹³ Wajt tjiiquin Júpiter yooz timpluquiz želatča. Nii timplu fabriqueruqui wac turunaca nižaza pjajkjallanaca zijjcchiča, wajt zanquiz, jalla nekz. Nii fabriqueržtan nii wajtchiz žoñinacžtan Pablužquiz Bernabežquiz sirwiz pecatča Yooztakaz. Wac turunacžtan wilana ljokt'iz pecatča.

¹⁴ Nekztanaqui Pablužtan Bernabežtan jalla ninacaqui nižta paa-awc cjen naaziča. Jalla nuž naažcu persun zquiti wjajrsiča, anal nii pecuča cjican. Nižaza nii žoñinacž taypiquin kjawcan luzcu, altu joržtan chiichiča, tuž cjican:

¹⁵ —Žoñinaca, ¿kjažtiquiztan wejtnacaltajapa tižta paajo? Wejrnacqui ančuca irata žoñizakaztča. Ančucqui jalla tižta paaz cuzturumpinaca jaytiz waquiziča. Inapanikazza tii ančuc cuzturumpinacaqui. Werar žejtñi Yoozza tjapa kuztanqui sirwizqui. Jalla nuž cjican ančucaquiz mazñi tjonchinča. Nii werar Yoozqui paachiča arajpacha, yokanaca, kotanaca, nižaza tjapa žejlñinaca paachiča.

¹⁶ Tuqui timpuqui žoñinacaqui persun kuzcama ojklayñitača. Jalla nuž ojklayan Yoozqui ana kjaž cjiñitača.

¹⁷ Yoozqui chijñi apayžquiča, zuma zkala pookajo. Nižaza Yooz cjen wali čhjeri žejlča, učumnaca lujlžjapami, nižaza cuntintu kamzjapami. Jalla nuž zumanaca tjaacha Yoozqui. Nižtiquiztan žoñinacaqui Yooz pajz waquiziča.

¹⁸ Jalla nuž chiyunami nii wajtchiz žoñinacaqui tira wilana conawkkaz cjetča, Pablužquiz Bernabežquiz sirwizjapa. Ch'aman tii custurumpinacquiztan apatatskatchiča. Ultimquiziqui nižtami ana wilana conchiča.

¹⁹ Jalla nekztanaqui tsjii kjaž judionacaqui tjonchiča Antioquía wajtquiztan, nižaza Iconio wajtquiztan. Jalla nii tjonchi žoñinacaqui nii wajtchiz žoñinacžquiz kazzinchiča

Pabluž quintra. Nekztanaqui maztan Pablo muzpa čhajcchiča. Nekztan nii čhajcchi žoñinacaqui, “Ticziča” cjican Pablo wajtž tjiya joochiča.

²⁰ Wajtž tjiiquin ectaž cjen jalla nekzi criichinacaqui ajcziča Pabluž muytata. Jalla nuž želan, Pabluqui žaaziča. Nekztan wajtquin wilta luzziča. Nekztanaqui jaka tažuqui Bernabežtan Pablužtan ojkchiča Derbe cjita wajt kjutni.

²¹ Jalla nicju zuma liwriiñi Yooz taku paljaychiča. Jalla nuž paljayan walja žoñinacaqui Yooz taku criichiča. Nekztanaqui Listra Iconio Antioquia nii watjanac kjutni quejpchiča.

²² Jalla nii watjanacquin Pablužtan Bernabežtan Yoozquin criichi žoñinaca tjurt'iñi kuzziz cjisjapa walja chiižinchiča, tuž cjican:

–Yoozquin kuzzizpankaz tira kamaquiča. Yooz mantuquiz kamchiž cjen, tii mantuquiz ancha sufrispanča učumnacaqui.

²³ Nižaza zapa iclizquin jilirinaca nombrichiča. Nekztanaqui Yoozquin mayizizcu ayunazcu Pabluqui nii nombritanaca Yoozquin cumpjiichiča. Nii nombrita jilirinacaqui Yoozquin tjapa kuzziztača.

PABLUZTAN BERNABEZTAN ANTIOQUIA QUEJPCHICHA

²⁴ Jalla nekztanaqui Pabluqui Bernabežtan Pisidia cjita yokaran watchiča. Nekztanaqui Panfilia cjita yokquin irantichiča.

²⁵ Jalla nicju Perge wajtquin Yooz taku paljaychiča. Nekztanaqui Atalia cjita wajt kjutni ojkchiča.

²⁶ Jalla nicju warcu zalchiča, Antioquia ojkzjapa. Tuquiqui ima okan, Antioquia wajtchiz criichinacaqui Pablužtan Bernabežtan, nii pucultan Yoozquin cumpjiichiča Yooz taku paljayajo. Jalla nuž Yooz taku paljayz trabajo žeržcu, Antioquia watja quejpchiča.

²⁷ Jalla nicju irantižcu, Pabluqui Bernabežtan nii wajtchiz criichinaca juntaskatchiča. Nekztan nii criichinaczquiz quint'ichiča, tjapa Yooz aztan paatanaca. Nižaza quint'ichiča, jaknužt yekja wajtchiz žoñinacaqui Yoozquin criichiča; nižaza Yooz jiczquiz luzziča.

²⁸ Nižaza ažk tjuñinaca Pablužtan Bernabežtan nicju žejlchiča criichinacztan.

15

JERUSALENQUIN AJCZTA PUNTU

¹ Jalla nii timpuqui tsjii kjaž žoñinacaqui Judeaquiztan Antioquia ojkchiča. Jalla nicju ninacaqui Yoozquin criichinaczquin tjajni kallantichiča, tuž cjican:

–Moisés mantita cuzturumpinaca paastanča, liwriita cjisjapa.

² Pablužtan Bernabežtan nižta tjajni žoñinacztan walja ch'ayi ch'ayi parličiča nii cuzturumpi paaz puntuquiztan. Ultimquiziqui Pablužtan Bernabežtan yekjap criichinacztan nombrita cjissiča, Jerusalén watja ojkzjapa. Jalla nicju nii parlita puntuquiztan wilta parlaquiča apostolonacztan nižaza icliz jilirinacztan.

³ Jalla nijjapa nii Antioquia criichinacaqui ninaca cuchanchiča. Jalla nuž ojkan, Fenicia yokaran Samaria yokaran watchiča. Jalla nuž wajtcan Pablužtan Bernabežtan quint'ichiča, jaknužt yekja nacionchiz žoñinacaqui ninacz tuquita cuzturumpinaca jaytičhaja, nižaza jaknužt Yoozquin kuzziz cjistchaja, jalla nii quint'ichiča. Jalla nii quintu nonžcu žoñinacaqui “Ancha cuzala” cjican cjichiča.

⁴ Pablužtan Bernabežtan Jerusalén watja irantitan, nii wajtchiz criichinacami apostolonacami nii icliz jilirinacami tjapauntu Pablužtan Bernabežtan risiwchiča. Jalla nekztanaqui Pabluqui Bernabežtan quint'ichiča jaknužt ninacaqui Yooz aztan paatčhaja, jalla nii.

⁵ Nekztanaqui yekjap fariseo partiquiztan criichinacaqui tsijtsiča, tuž cjican:

—Nii yekja nacionchiz criichinacaqui judionacž chimpuz custurumpi jalla nii paastanča. Nižaza Moisés mantita liicama kamla.

⁶ Jalla nekztanaqui apostolonacami icliz jilirinacami ajcziča jalla nii puntu parlizjapa.

⁷ Jalla nuž ažkpacha ch'ayi ch'ayi parližcu, Pedruqui tsijtsiča, tuž cjican:

—Jilanaca, ančhucqui tižta zizza. Tuquiqui Yoozqui ančhucaquiztan wejr illzipanla, yekja nacionchiz žoñinacžquiz nii zuma liwriiñi Yooz taku paljayajo, ninaca nii liwriiñi taku criyajo.

⁸ Nižaza Yooz Ejpqui tjapa žoñinacž kuz zuma zizza. Nii yekja nacionchiz žoñinaca criiñi kuzziz cjen, Yoozqui ninacžquiz Espíritu Santo luzkatchiča. Jaknužt učumnacaquiz Espíritu Santo luzkattčhaja jalla nužuzakaz. Nižaza Espíritu Santo tjaacan, Yoozqui tjeeziča, yekja nacionchiz criichinaca persun maati cunta ricujchizakazza, jalla nii.

⁹ Yoozqui ninacžtan učumnacatan ana pjalpjalziča. Yoozquin tjapa kuz cjen ninacaqui kuz campiichiča. Nižaza Yoozqui ninaca pertunchiča, zuma kuzziz cjeajo.

¹⁰ Jaziqui Yooz Ejpqui nižta munchiča. Ančhucqui Yooz quintra cjequiž niiqui, casticta cjequiča. Ančhucqui nii yekja wajtchiz criichinaca učum cuzturumpi tjuz pecča, tsjii liczi kuzižtakaz. Učumpachaž nii cuzturumpinaca ana tjapa payi atchiča, nižaza učum tuquita atchi ejpnacžquiztanpacha ana tjapa payi atchiča. Jaziqui, ¿kjažtiquiztan nižta ninaca paakatž pecjo?

¹¹ Nii cuzturumpi paañiž cjen anaž jakziltami ujnacquiztan liwriita cjesača. Jesucristo Jiliriqui okzñi kuzziz cjen žoñinacž laycu ticziča. Jalla nižtiquiztan Jesucristužquin criichiž cjen učumnacami ninacami ujnacquiztan liwriita cjesača.

¹² Jalla nuž Pedruž chiitiquiztan tjappacha ch'uju cjissiča. Nekztanaqui Pablužtan Bernabežtan ninaca quint'ichiča, jaknužt yekja nacionanacaran ojklaycan Yooz aztan siñalanacami milajrunacami paatčhaja, jalla nii.

¹³ Jalla nuž quint'i žeržtan, Jacoboqui cjichiča:

—Jilanaca, nonžna.

¹⁴ Simón Pedruqui učumnacaquiz quint'ichiča jaknužt tuquiqui Yoozqui persun maati cunta ana judío žoñinaca ricujchižlaja, jalla nii.

¹⁵ Nižaza Yooz taku parliñi profetanacž cijjrta tawk jaručha niiqui. Cjijrta Yooz takuqui tuž cjiča:

¹⁶ “Tii wattanaqui quejpžcača. Davidž kjuyquiztan ojkní žoñinacaqui pajlzi kjuyažtakaz žejlča. Jaziqui Davidž pajlzi kjuyaqui wital kjuyača. Wital waytača, ew žoñinaca cjisjapa.

¹⁷ Jalla nekztanaqui tjapaman nacionchiz žoñinacaqui Yooz Ejp Jilirž kamaña pecaquiča. Jakziltat Yooz kjawztažlaja, jalla nii žoñinacaqui Yoozquin tjonaquiča.

¹⁸ Jalla nuž cjichiča Yooz Jiliriqui tuqui timpuquiztanpacha, žoñinacž zizajo”.

¹⁹ Jalla nižtiquiztan wejr cjiwča. Nii ana judío žoñinacaqui ana molistis waquiziča. Ninacaqui ninacž tuquita cuzturumpinaca jaytichiča, Yooz kuzcama kamzjapa. Jalla nuž cjenacqui ana kjaž cjis waquiziča, nii učum cuzturumpinaca paaz puntuquiztan.

²⁰ Tiikaz učumqui ninacžquin cijjrasača, tuž cjican: “Žoñiž paata yoozquin wilana jawkta chjizwi anača lujlsqui. Nižaza anača adulteriuquiz ojklayzqui. Nižaza jora zkenzcu conta animal chjizwimi anača lujlsqui. Nižaza čjul animal ljocmi anača lujlsqui”. Jalla niikaz cumplistanča nii yekja wajtchiz criichinacaqui.

²¹ Tuquitanpacha zapa wajtquiziqui Moisés liiqui parlitatača. Nižaza zapa ajcz kjuyquiz liitatača zapa jeejz tjuñquiziqui.

²² Jalla nekztanaqui apostolonacami icliz jilirinacžtan nižaza tjapa criichinacžtan palt'ichiča, tsjii tsjii ninacžquiztan illzjapa. Nekztan Judas illztatača, niž tsjii tjuuqui Barsabás cjitazakaztača. Nižaza Silas illztazakaztača. Jalla nii pucultanaqui walja

zuma jilanaca cjitatača niiž mazi jilanacžquiztan. Nekztanaqui nii illzta zoñinacaqui Pablužtan Bernabežtan cuchantatača Antioquía wajtquin, nii cuzturumpi paaz parlita puntu mazjapa.

²³ Jalla ninacžtan tsjii carta apaychiča. Nii cartiquiz tuž cjichiča:

“Wejtnaca jilanaca, wejrnacqui Jesusiž illzta apostolonactča, nižaza icliz jiliri-nactča, nižaza Yoozquin criichinactča. Wejrnacqui ančhucaquin tsaanznuča. Ančhucqui ana judío zoñinacčhucča. Antioquía wajtchiz zoñchucča, nižaza Siria yokquin kamiñchucča, nižaza Cilicia yokquin kaminčhuczakazza.

²⁴ Wejrnacqui tsjii quintu zizzinča. Tekztan tsjii kjaž zoñinacaqui ančhucaquin ojtkalča, ana jec jiliriž mantita ojkičiča. Jalla ninacaž chiita taku ančuca kuz turwayskatčani. Ninacaqui cjičani, “Judionacž chimpuz cuzturumpi paastanča. Nižaza tjapa Moisés liiqui cumplistanča”. Jalla nuž chižcu, paysnakni kuzziz cjiss-inčhucžlani.

²⁵ Jalla nii quintu zizcu, nii puntuquiztan wejrnacqui zuma palt'ichinča. Nekztanaqui wejrnacqui kazzinča, tsjii pucultan wejtnacaquiztan illzjapa. Nii pucultanaqui illztatača ančhuc cheržni okajo. Ninacaqui Pablužtan Bernabežtan chica okaquiča. Nii Pablo Bernabé, jalla ninacaqui ancha zuma pecta jilanacača.

²⁶ Nii Pablužtan Bernabežtan Jesucristo Jilirž mantita ojklaycan joz conkatchiča.

²⁷ Nižtiquiztan wejrnacqui Judastan nižaza Silžtan cuchanchinča, ančhucatan tii puntu parlizjapa. Nižaza ančucaquiz tjapa tii puntuquiztan paljayaquiča.

²⁸ Wejtnacquizimi Espíritu Santužquizimi walikaztača tinacaqui. Wejrnacqui ančucaquiz anaž tsjii liczi kuzi tjuz waquizasacha, anaž wejtnac liczi cuzturumpi paakatž waquizasacha. Jalla tiikaz paakatž waquiziča.

²⁹ Zoñiž paata yoozquiz wilana jawkta chjizwi anača lujlsqui. Nižaza čhjul animal ljocmi anača lujlsqui. Nižaza jora zkenzcu conta animal chjizwimi anača lujlsqui. Anača adulteriuquiz ojklayzqui, luctaka cjiñimi maataka cjiñimi. Zuma lucutiñipan kamsa. Jalla nuž kamaquič niiqui, walikaz cjequiča ančhucqui. ¡Zumakaz ojklaya!” Jalla nuž cjiirtatača nii cartaquí.

³⁰ Nekztanaqui nii cuchanta zoñinacaqui cartižtan ojkičiča Antioquía watja. Jalla nicju irantižcu, tjapa nii wajtchiz criichi zoñinaca juntazziča. Nekztan nii carta intirjichiča.

³¹ Jalla nii carta liižcu, nii jilanacaqui walja chipchiča, nii zuma takunaca cjiiržquitaž cjen.

³² Nižaza nii Judastan Silžtan Yooz taku paljayñitača. Jalla nuž paljaycan walja zoñinacžquiz kuzziča. Nižaza nii criichinacaqui tjurt'iñi kuzziz cjiskatchiča ninacž tawkžtan.

³³ Jalla tsjii kjaž tjuñinaca nicju kamchiča, Judastan Silžtan. Nekztanaqui ninaca cuchanžquiñi jilanacžquin quejz pecatča. Jalla nuž peccan parti criichinacaqui cjichiča:

–Yooz Ejpžtan ančhucqui zumakaz okalla.

³⁴ Jalla nekztanaqui Judasqui ojkičiča. Ultimquiziqui Silasqui eclis tantiichiča.

³⁵ Nižaza Pabluqui Bernabežtan Antioquía wajtquin eclichizakazza. Nekztanaqui parti jilanacžtan Yooz taku walja tjajnatča ana criichi zoñinacžquiz, nižaza liwriñi Yooz taku paljayatča.

PABLUQUI WILTA YOOZ TAKU PALJAYI OJKCHA

³⁶ Jalla niiž wiruñ Pabluqui Bernabežquiz paljaychiča, tuž cjican:

–Wiltaž jaziqui ojklalla. Jakzi watjanacquin učumqui liwriñi Yooz taku parlitazlaja, jalla nii jilanacžquin tjontjonžquilalla. Jaknužt kamčhaja jalla niichum cheržquilalla.

³⁷ Bernabequi Juan chjitz pecatča. Juanž tsjii tjuuqui Marcos cjitazakaztača.

³⁸ Niiž tuquiqui Panflia wajtquin žejlcan, Marcosaqui Pablužquiztan Bernabežquiztan quepi zarakchiča. Ana iya chica ojklaychiča Yooz taku parlican. Jaziqui Pabluqui Marcos ana chjitz pecatča.

³⁹ Jalla nižtiquiztan Pablužtan Bernabežtan ch'aassiča. Nekztanaqui jaljtichiča. Bernabequi Marcos chjitžcu tsjii warcu luzziča Chipre kjutni ojczjapa.

⁴⁰ Pabluzti Silas cjita žoñi illziča nižtan chica ojknijapa. Nii žejlñi jilanacaqui Pablužtan Silžtan Yoozquin cumpjiichiča, Yooz zuma yanapajo.

⁴¹ Nekztan ninaca Siria yok kjutni ojkiča. Siria yokaran nižaza Cilicia yokaran ojklaychiča, iclizquiztan icliza ojklaychiča, criichi jilanaca tjurt'iñi kuzziz cjejajo.

16

TIMOTEOQUI PABLO CUMPANT'ICHICHA

¹ Nekztanaqui Pablužtan Silžtan irantižquichiča Derbe Listra cjita watjanacquiz. Jalla nicju tsjii Yoozquin criichi žoñžquiz zalchiča, Timoteo cjita. Niiž maaqui judío žontača, Yoozquin criičtača. Niiž ejpqui griego žoñitača.

² Nižaza Listra wajtchiz criichi žoñinacami Timoteo rispitchiča. Iconio wajtchiz žoñinacaqui Timoteo rispitchizakazza.

³ Nekztanaqui Pabluqui Timoteo kjutzni pecatča. Jalla nižtiquiztan Pabluqui judionacž cuzturumpi jaru Timoteo chimpuskatchiča, nii yokaran kamni judionacaž ana quintra chiyajo. Timoteož ejpqui griego žoñitača, anatača judío. Jalla nuž cjen Timoteoqui ana chimpuchiztača, judionacaž irata. Jalla nii zizziča nii yokaran kamni judionacaqui.

⁴ Nekztanaqui tjapa watjanaca ojklaycan, Pabluqui niiž mazinacžtan Jerusalén parlita quintu mazziča. Apostolonacami Jerusalén icliz jilirinacami, jalla ninacaž čiita taku quint'ichiča tjapa Yoozquin criichi jilanacžquiz.

⁵ Jalla nižtiquiztanaqui niiran žejlñi criichinacaqui Yoozquin walja tjapa kuzziz cjissiča. Nižaza zapuru Yooz jiczquiz luzatča iya žoñinacaqui. Jalla nižtiquiztan tsjanž yapatča Yoozquin criichi jilanacaqui.

PABLUZ CHJUUZTA

⁶ Jalla nekztanaqui Espiritu Santuqui Pablužquizimi niiž mazinacžquizimi atajchiča, ana Asia yokaran Yooz taku parliñi ojklayajo. Jalla nižtiquiztan ninacaqui Frigia, nižaza Galacia cjita yokanacaran ojklaychiča.

⁷ Jalla nuž ojklayžcu, Misia cjita lintiquin irantichiča. Jalla niwjctan Bitinia yokquin luzquiz pecatača. Jalla nuž pinsan Jesucristužtan Espiritu Santužtan nii yoka luz ana munchiča.

⁸ Jalla nižtiquiztan Bitinia yokquin ana luzziča. Antis Misia yokquin watžcu, Troas cjita watja irantichiča. Jalla nii watjaqui pajk kot tjiiquiz želatča.

⁹ Jalla nicju tsjii ween Yoozqui Pablo chjuuzkatchiča. Chjuuzcan jalla tuž Pabluqui cherchiča, tsjii Macedonia wajtchiz žoñi cherchiča. Tsijsi želatča. Nižaza rocatča, tuž cjan: “Macedonia yok kjutni kajkžcalla amqui. Yanapt'alla”.

¹⁰ Jalla nuž wiiquin chjuužcuqui Pabluqui tjacziča Macedonia ojczjapa. Nižazakaz wejrnacmi tjaczinča Pablužtan ojczjapa. Ultimupanž Yoozqui wejrnaca kjawziča, nawjk ojklayajo liwriñi taku paljayajo.

PABLUZTAN SILZTAN FILIPOS CJITA WAJTQUIN OJKTA

¹¹ Jalla nekztanaqui Troas wajtquin tsjii warcu zalazzinča. Nekz luzcu ojkičinča. Nii pajk kot taypiz tsjii kolta yoka želatča, Samotracia cjita. Jalla nii tirichuc ojkičinča. Niiž jaka tažui Neápolis cjita watja irantichinča.

¹² Jalla nekztan ojkchinča Filipos cjita watja. Nii watjaqui tuquitanpacha romano cjita wajtchiz zoñinacaž julztatača. Jalla Macedonia yokquin nii watjaqui tsjan chekan pakjitača yekja watjanacquiztanaqui. Jalla nicju tsjii kjaž maj kamchinča.

¹³ Tsjii jeejz tjuñquiz wajtquiztan ulanchinča, nižaza puj atquin. Jalla nicju zoñinacaqui ajczñitača, Yoozquin mayizi. Jalla nuž žejlcan wejrnacqui julzinča. Nekztanaqui liwriiñi Yooz taku palt'ican, nii ajczi maatakanacžquiz paljaychinča.

¹⁴ Tsjaa maatakqui Lidia cjititača. Naaqui Tiatira cjita wajtchiz zontača. Nižaza naaqui fin murat telanaca tuiñtača. Naa žonqui Yoozquin walja kuz tjaachintača. Jalla nuž cjen, Yoozqui naaža kuzquiz Pabluž chiita taku catokskatchiča.

¹⁵ Jalla nižtiquiztan naa žonqui bautistatača naaža familianacžtanpacha. Nekztanaqui wejtnacaquiz roct'ichinča, tuž cjican:

—Ančhucqui ultimupan wejrqui Jesucristužquin criichinčhataqui cjičhaj niiqui, wejt kjuyquin tjonžcalla alujazjapa. —Nuž roctiquiztan naaža kjuyquiz wejrnacqui alujazzinča.

¹⁶ Tsjii noojiqui wilta Yoozquin mayiziz yokquin ojkan, wejrnacqui tsjaa zajriž tanti turatan zalchinča. Naa turqui ariwiñi zizzintača. Naaqui patrunž manta payiñtača. Jalla nižtiquiztan walja paaz ganiñtača naaža patrunžjapa.

¹⁷ Naa turqui Pablužquiz nižaza wejtnacaquiz apzñi kallantichinča. Jalla nuž apzcan kjawiñtača, tuž cjican:

—Tii zoñinacaqui arajpach Yooz sirwiñiča. Nižaza ančhucacquiz liwriiñi Yooz taku paljayñiča. —Jalla nuž kjawcan chiichinča.

¹⁸ Zapuru nižta kjawcan wejtnacaquiz apzniñtača. Jalla nižtiquiztan Pabluqui naažajapa tsjii zkoluc žawjznawcž cjetča. Jalla nuž cjen naaža kjutñi quejpžcu cherziča. Nižaza naa tanñi zajrižquiz chiichiča, tuž cjican:

—Zajra, Jesucristuž tjuuquiz am ulna cjiwča taa turaquiztan.

Jalla nii orapacha nii zajraqui naa turaquiztan ulanchiča.

¹⁹ Jalla nižtiquiztan naa tura patrunanacaqui naaža ariwiñiquiztan ana iya paaz gani atchiča. Jalla nuž cjetča nii patrunanacaqui. Jalla nižtiquiztan ninacaqui Pablužtan Silžtan tanchiča. Nekztanaqui pajk plazquin chjitchiča nii wajt pajk jilirinacž yujcquin.

²⁰ Juez jilirinacžquin prisintiskatchiča, tuž cjican:

—Tii judío zoñinacaqui učum zoñinaca aptjapča.

²¹ Nižaza ninacž tsjemat cuzturumpinaca tjaajinča. Jalla nii cuzturumpinaca učumqui anaž catokz waquiziča. Nižaza ana niicama kamz waquiziča. Lii quintrača. Učumnacaqui roman zoñinacžhumča.

²² Jalla nuž chiitiquiztan nii wajtchiz zoñinacaqui Pabluž nižaza Silž quintra tjojk-tichiča. Nižaza nii juez jilirinacaqui mantichiča, ninacž kujta zquiti chjojkžinajo, nekztan paržtan wjajtajo.

²³ Jalla nuž walja wjajtžcu, carsilquiz chawjcchiča. Nižaza nii carsila itzñi zoñi mantichiča, ninaca zuma wijilajo.

²⁴ Jalla nuž mantitiquiztan, nii carsila itzñi zoñiqui ninaca carsil kjuył majcchiča, nawjk c'utzjati. Jalla nekzi pajk mazu madera želatča, niiqui zoñi castics maderapan-tača. Nii maderquiz ninacž kjojcha majcžinchiča.

²⁵ Jalla nuž cjenami chica arama Pablužtan Silžtanaqui Yoozquin mayizican želatča. Nižaza Yooz wirsu itscan želatča. Jalla nuž mayizan, nuž itsan, nii parti carsilquiz chawjcta zoñinacaqui nonziča.

²⁶ Jalla nekztanaqui tiripintit tsjii tembloraž tjonchi. Nekztan nii carsil yokanacami pirkanacami liwj chekjinskatchiča. Jalla nuž chekjintiquiztanaqui tjapa nii carsil zananacami justokaz cjetsiča. Nižaza nii preso zoñinacž čejlta carinanacami justokaz jersiča.

²⁷ Jalla nižta watžcu, carsil itzñi zoñiqui tjaji wajtsiĉha. Nii carsil zananaca cjetsi cheržcu, “Pris zoñinacaqui atipchiž caa” nuž cjican pinsiĉha. Jalla nuž pinsiscu, niž pajk cuchillu jwessiĉha, cuchillžtan persuna conzjapa.

²⁸ Nekztanaqui Pabluqui kjawĉiĉha, tuž cjican:

—Anam persunpacha ĉhjojriĉha. Tjapa chwjcta pris zoñinacami tekz žejlĉha.

²⁹ Jalla nekztanaqui nii carsila itzñi zoñiqui micha tjeesnaj cjichiĉha. Nekztanaqui carsil kjutñi zati pariĉha, walja tsucchi chekjincan. Nekztan Pabluž Silž kjojchquiz tuzi t'oksiĉha.

³⁰ Nekztanaqui zancu jwescu, pewĉiĉha, tuž cjican:

—Jilanaca, wejr liwriita cjisjapa, ĉĉjulut wejr paaz waquizasaya?

³¹ Pablužtan Silžtanaqui kjaaziĉha, tuž cjican:

—Jesucristo Jiliržquiz tjapa kuztan criya. Jalla nuž cjenacqui liwriita cjequiĉha am familianacžtanpacha.

³² Jalla nekztanaqui Pablo Silasqui nižquizimi niž kjuy familianacžquizimi Yooz taku paljayĉiĉha.

³³ Nii weenpacha nii carsila itzñi zoñiqui ninacž ĉhjojri awjžinĉiĉha. Jalla nekztanaqui niimi tjapa familianacami bautista cjissiĉha.

³⁴ Nekztanaqui nii carsila itzñi zoñiqui Pablužtan Silžtan jalla ninaca ĉhjitchiĉha persun kjuya. Niž kjuyquin ĉhjeri tjaachiĉha. Nii zoñiqui familianacžtanpacha walja cuntintutaĉha Yoozquin crižcu.

³⁵ Nii wenziqui juez jilirinacaqui zultat policianaca mantichiĉha carsilquin, Pablužtan Silžtan cutz ortinžtan cuchanchiĉha.

³⁶ Ninacž carsilquin irantitan, nii carsila itzñi zoñiqui Pablužquiz cjichiĉha:

—Nii juez jilirinacaqui wejtquin ortina apayžquichiĉha, anĉhuc cutznajo. Nižtiquiztan anĉhucqui jazic liwriiž okaquiĉha.

³⁷ Pabluzti nii zultat policianacžquiz paljayĉiĉha, tuž cjican:

—Wejrnacqui roman parti zoñinacĉha. Tjapa tii wajtquiz žejlñinacž yujcquiz wejrnaca wjajtĉiĉha, ana wejtnacacquiz zumpacha pewĉcu. Nekztanaqui inapacha wejrnac carsilquiz majcĉiĉha. ĆJaziqui anĉhucqui wejrnaca ĉhjojzaka cuts pecya? ĆAnaž cjesaĉha! Antiz ninacaj persuna wejrnac tii carsilquiztan jwesi tjonla.

³⁸ Nekztanaqui nii policianacaqui ojkžcu nii juez jilirinacžquiz tjapa nii puntuquiztan quint'ichiĉha. Pablužtan Silžtan roman parti zoñinacquiztan, jalla nii quintu zizcu, anĉha tsucchi cjissiĉha.

³⁹ Jalla nižtiquiztan pertuna mayizi ojkĉiĉha. Nekztanaqui nii jilirinacaqui tjonžcu jwessiĉha. Nekztan Pablužquizimi Silžquizimi rocĉiĉha, tuž cjican:

—Tii wajtquiztanž ulna.

⁴⁰ Jalla nekztanaqui carsilquiztan ulanžcu Pablužtan Silžtan Lidia kjuya ojkĉiĉha. Jalla nekztanaqui criĉi jilanaca cheržcu, “Tjurt'iñi kuzziz cjee anĉhucqui” cjican ĉižinĉiĉha. Nekztanaqui ojkĉiĉha.

17

ZOÑINACAŽ APTJAPZTA TESALONICA WAJTQUIN

¹ Jalla nekztanaqui wilta ojkĉiĉha, Pablužtan Silžtanaqui. Anfípolis nižaza Apolonia jalla nii yokanaca watchiĉha. Nekztanaqui Tesalónica cjita pajk watja irantichiĉha. Jalla nekzi tsjii judionacž ajcz kjuya želatĉha.

² Nii wajtquin Pabluqui nii acjz kjuyquin ojkĉiĉha, niž cuzturumpi jaru. Tsjii ĉhjep jeejz tjuñinacquiziqui Pabluqui nii ajczñi zoñinacžquiz paljayĉiĉha, nii tuquitan cjiĉrta Yooz tawk jaru.

³ Yooz tawkquiztan tjaajinĉiĉha Jesucristuž puntuquiztan, tuž cjican:

—Jesucristuqui sufrispantača, niž ticzcama. Niiž ticziquiztan jacatatspantača. Nii Jesusapachača Yooziž cuchanžquita Cristuqui. Jalla nuž ančhucaquiz paljayuča.

⁴ Jalla nii paljaytiquiztan yekjap judionacaqui Jesucristužquin criichiča. Nekztanaqui ninacaqui Pablužtan Silžtan juntu cjissiča. Nižaza walja griego parti žoñinacaqui Jesucristužquiz criichizakazza. Tuquiqui Yooz Ejpkez sirwichiča. Nižaza walja rispitta maatakanacaqui Jesucristužquin criichizakazza.

⁵ Jalla nuž cjen ana criiñi judionacaqui ancha iñiziñi cjissiča. Nekztanaqui nii ana criiñinacaqui yekjap ñejo kuzziz žoñinaca juntjapchiča, Pabluž Silž quintra parlizjapa. Nekztanaqui ninacaqui juc'anti žoñinaca juntichiča. Nii žoñinaca junižcu, žoñinaca aptjapchiča Pabluž Silž quintra. Nekztanaqui tjapa nii quintra aptjapzñi žoñinacaqui Jasonž kjuya ojkchiča. Jalla nuž ojkžcu, nii kjuya muyuntichiča, Pablo Silas kjurcan. Nii pucultan žoñinaca jwes pecatča, parti žoñinaczquiz intirjizjapa.

⁶ Pero Jasonž kjuyquiz Pablo Silas ana watchiča. Nižtiquiztanaqui nii quintra žoñinaca Jasón tanchiča, nižaza yekjap nekz žejlñi jilanacztan. Nekztanaqui nii criichinacaqui chjichtatača wajt jilirinacz yujcquin. Nii jilirinacz yujcquiz želan, nii quintra žoñinacaqui altu joržtan čiichiča, tuž cjican:

—Tii žoñinacaqui jakziquin ojektčaja, nekz žejlñi žoñinacz kuz turwayskatča. Jalla tinacaqui tekz tjonchizakazza, ana wal kamaña quejpskatzjapa.

⁷ Jasonqui niž kjuyquiz Pablo Silas alujchitakalča. Nižaza tinacaqui cjiča, yekja chawc jiliri žejlča, Jesusa cjita. Nužukaz cjiča tinacaqui. Jalla nuž cjenaqui niiqui ancha učum lii quintrača, nižaza učum roman chawc jilirž quintrača. —Nuž cjican quintra čiichiča.

⁸ Jalla nuž nonžcu, tjapa nii wajtchiz žoñinacami jilirinacami walja žawjchiča.

⁹ Ultimquiziqui Jasonqui niž mazinacztanpacha tsjii wali printa tjaachiča, ninaca cutta cjejajo.

PABLUZTAN SILZTAN KAMTA BEREJA CJITA WAJTQUIN

¹⁰ Jalla nii nooj weenpacha criichi jilanacaqui Pablužquiz Silžquiz nii wajtquiztan ulanskatchiča. Nekztan Berea cjita watja ojkchiča. Jalla nicju irantižcu, judionacz ajcz kjuya luzziča.

¹¹ Jalla nii judionacaqui tsjan zuma kuzziztača nii Tesalonic wajtchiz judionaczquiztan. Tjapa kuztan Yooz taku catokñitača. Nižaza zapuru ninacaqui tuquita cjižrta Yooz taku ližcu ližcu zumpacha tantiichiča, nii Pabluž Silas čiita taku, werara ana werara, jalla nii zizjapa.

¹² Jalla nižtiquiztan walja nii judionacaqui Jesucristužquin criichiča. Nižaza walja griego parti žoñinacaqui criichizakazza, rispitta luctakanacami maatakanacami criichizakazza.

¹³ Jalla nekztanaqui nii Tesalónica wajtchiz judionacaqui nonziča, Pabluqui Berea wajtquin Yooz taku paljayñi ojkchiča. Jalla nii quintu zizcu, Berea watja ojkchiča. Jalla nicju ninacaqui žoñinaca žawjwaž zijcanchiča, Pabluž quintra.

¹⁴ Jalla nuž cjen nii criichi jilanacaqui ana enenskatžcu Pablo cuchanžquichiča pajk kot kjutñi. Silžtan Timoteožtan, jalla ninacazti Berea wajtquiz eclichitača.

¹⁵ Nekztanaqui Pablužtan cumpant'iñi žoñinacaqui Pablo chjitchiča Atenas cjita watja. Jalla nekztanaqui quejpžquichiča tii takunacztan: “Silžtan Timoteožtan, jalla ninacaqui Pablužquin apura irantiz waquiziča”, cjican.

PABLUZ KAMTA ATENAS CJITA WAJTQUIN

¹⁶ Nekztan Pabluqui Silas Timoteo tjewsnatča. Atenas cjita wajtquiz žejlcan, wacchi žoñiž paata yooznaca cherchiča. Nii wajtquiziqui jakzimi žoñiž paata yooznacapanikaz želatča. Jalla nuž cheržcu niž kuzquiz ancha sint'ichiča.

¹⁷ Jalla nižtiquiztan Pabluqui judionacz ajcz kjuyquin paljaychiča. Judionaczquizimi Yooz rispitiñi zoñinaczquizimi paljaychiča. Nižaza zapuru pajk plazquin paljaychiča, ojklayñi zoñinaczquiz.

¹⁸ Jalla nii plazquiz tsjii istutiiñinaca želatča. Parti nii istutiiñinacaqui Epicúreos t'akquiztantača. Parti nii istutiiñinacazti Estoicos cjita t'akquiztantača. Jalla ninacaqui Pablužquiz paljaychiča. Nekztanaqui yekjap istutiiñinacazti cjichiča:

—¿Jaknužkat tii zoñic chiičhani, waljaž chiiča pero? ¿Čhjulut intintiskatz pecjo?

Yekjap istutiiñinacazti cjichiča:

—Niiča yekja yooznacz puntuquiztan paljayñiqui.

Pabluqui Jesusiž puntuquiztan nižaza ticzquiztan jacatatz puntuquiztan chiičiča. Jalla nuž chiiquiztan nii istutiiñinacaqui nižta chiičiča.

¹⁹ Nekztanaqui nii istutiiñinacaqui Pablo chjitchiča tsjii Areópago cjita yokquin. Jalla nicju ajczñitača parlizjapa. Nekztan Pablužquiz chiičiča tuž cjican:

—Nawjctan amqui tsjii ew tjaajintanaca zjijcchamča. Jalla nii ew taku ziz pecuča wejrnacqui.

²⁰ Amqui tsjemat istrañchuc takunaca chiiča. Kjažt cjii nii takunacaya, jalla nii intintaz pecuča wejrnacqui.

²¹ Nii Atenas wajtchiz zoñinacaqui nižaza nii parti wajtquin kamñi zoñinacaqui čhjul ew takunacami nonzkaz pecatča. Nižaza čhjul ew takunacami chiiz kaz pecatča. Jalla nii ew takunacquizkaz ninacz kuz tjaañitača.

²² Jalla nii Areópago yokquin Pabluqui ninacz taypiquin tsijtsiča. Jalla nuž tsijtscu, tuž cjichiča:

—Atenas wajtchiz zoñinaca, ančhucqui wacchi yooznaca rispitiñchucča, jalla niil cheruča.

²³ Tii wajtquiz ojklaycan, wejrqui ančuca silunaca cherchinča. Nižaza tsjii silquin cherchinča tuž cjiirta: “Tii siluqui ana pajta Yooz sirwizjapača”. Nii ana pajta Yooz ančhucqui rispitiča, ana pajžcupacha. Jalla nii ana pajta Yooz puntuquiztan chiyuča.

²⁴ Nii Yoozqui tii muntu paachiča, nižaza tjapa tii muntuquiz žejlñi cusasanaca. Jaziqui arajpachquinami yokquizimiž mantiča. Nii Yoozqui zoñinacz kjuyta timplunacquiz ana kamča.

²⁵ Anaž čhjulumu pecča, zoñiž sirwita paataqui. Niipachaž zapa maynižquiz žeti tjaacha, nižaza quera atquiztan jeejsjapa tjaacha, nižaza tjappacha tjaacha zoñinaczquiz.

²⁶ Tsjii lucutiñi zoñžquiztan tjapa tii muntuquiz žejlñi zoñinaca tjonkatchiča Yoozqui, tjapa kjutñi tii muntuquiz kamajo. Nižaza zoñinacz žejtz timpumi ticz timpumi, jalla nii Yoozpachaž mantiča. Nižaza jakziquin tsjii zoñiqui kamslaja, jalla niimi zakaz mantiča Yoozqui.

²⁷ Jalla nuž mantichiča Yoozqui, zoñinaca nii kjurajo, nižaza wachajo. Ultimupanča Yoozqui učumnacaquiztan anaž ažkquin žejlča.

²⁸ Yooziž cjen učumqui žejtča, nižaza ojklayča. Jalla nižtazakaz yekjap ančucaquiztan cjiirchiča, tuž cjican: “Yooziž paatača učumqui”.

²⁹ Nekztanaqui učumqui Yooz paatiquiztan, učumlaqui anaž pinsis waquiziča, tuž cjican: “Ultim Yoozza zoñiž paataqui, korquiztan, paazquiztan, mazquiztan, jalla nižta zoñiž paataqui”.

³⁰ Tuqui timpuqui zoñinacaqui Yooz puntuquiztan ana zumpacha zizziča. Jalla nuž cjen Yoozqui zoñinacz uj awantichiča. Anziqui tjapa tii jazta zoñinaczquiz mantichiča, tuž cjican: “Persun uj pajžcu, kuzza campiya”.

³¹ Nekztanaqui Yoozqui tsjii tjuñi utchiča, tjapa tii muntuquiz žejlñi zoñinaca werara pjalzjapa. Tsjii Yooziž illzta zoñiqui tjapa zoñinaca pjalaquiča, Yooz Ejpž cuntiquiztan.

Yoozqui nii illzta zoñi ticziquiztan jacatatskatchiicha. Jalla nižtiquiztan Yoozqui kjana-pacha tjeeziicha, nii zoñiqui illztatacha pjalñijapa, jalla nii. Jaziqui nižquin criya. —Nuž paljaychiicha Pabluqui.

³² Jalla nii ticziquiztan jacatatchi quintu nonžcu, yekjapanacaqui tjassiicha. Yek-japanacazti cjichiicha:

—Tii jarquin tii amiž chiita puntuquiztan wilta nonznačhani.

³³ Jalla nekztanaqui Pabluqui ninacžquiztan ojkchiicha.

³⁴ Yekjapanacazti Pablužquiz apziicha, niž taku crižcu. Ninacžquiztan tinaca želatča: Dionisioča tsjiiqui, nižaza niiqui Areópago cjita t'akquiztantača. Nižaza Dámaris cjiti tsjaa maatak žonqui criichintača. Nižaza tsjii kjaž iya zoñinacaqui cri-ichiicha.

18

PABLUZ KAMTA CORINTO CJITA WAJTQUIN

¹ Wiruñiqui Pabluqui Atenas wajtquiztan ulanchiicha. Corinto cjita watja ojkchiicha.

² Jalla nicju tsjii judío zoñžtan zalchiicha. Nii zoñiqui Aquila cjitatača. Ponto yokquiztan tjonchitača. Niiž tuquiqui Claudio cjita chawc jiliriqi mantichiicha tjapa judío zoñinaca Roma wajtquiztan ulnajo. Jalla nižtiquiztan Aquilaqui Italia yokquiz-tan ulanspantača, niž tjunatanpacha, Priscila cjiti. Ninacžquin Pabluqui tjonžni ojkchiicha.

³ Pablužtan ninacžtan tsjii oficiuchiztača, tultu kjuya paañitača. Jalla nižtiquiztan Pabluqui ninacžtan kamchiicha junto nii tultu kjuya langzjapa.

⁴ Zapa jeejz tjuñquiz Pabluqui judionacž acjz kjuya ojkñitača. Jalla nicju ju-dionacžquiz Yooz taku paljayñitača, nižaza ana judío zoñinacžquizimi. Zuma razunchiz tawkžtan paljaychipanča ninacaž zumpacha intintazni cjisnajo.

⁵ Nekztan Silžtan Timoteožtan Macedonia yokquiztan irantižquichiicha. Nekztanaqui Pabluqui Yooz takupanž paljayatča. Yekja langzñijapa timpu ana želatča. Nižaza Pabluqui judío zoñinacžquiz kjanacama intintiskatchiicha, Jesusaqui ninacaž tjewžta Cristučha, jalla nii.

⁶ Nii judío zoñinacazti quintra cjissiicha Pablužjapa. Nižaza niž quintra anawalinaca chiichiicha. Jalla nižta niž quintra chiitiquiztan Pabluqui niž zquiti tsajttsajtsinchiicha, ninacž quintra tsjii siñala cjeyajo. Nižaza cjichiicha:

—Ančhucqui infiernuquinž tjojttaž cjequiicha, liwriiñi Yooz taku ana nonzinčhucča, nekztan. Jalla nuž castictaž cjen, ana wejtquiz uj tjojtñasacha. Ančhucqui kuzinpan Yooz taku ana criiz pecča. Tonjtan nawjchuc wejrqui yekja wajtchiz žoñinacžquin okača, ninacžquin liwriiñi Yooz taku paljayžcača.

⁷ Nekztanaqui nii ajcz kjuyquiztan ulanžcu tsjii Justo cjita zoñž kjuya ojkchiicha. Nii zoñiqui Yooz sirwiñitača, nižaza ajcz kjuy latuquiz kjuychiztača. Jalla nekz žejlñitača.

⁸ Nii ajcz kjuy jiliriqi Crispo cjitatača. Niiqui niž familianacžtanpacha Jesu-cristužquin criichiicha. Nižaza walja Corinto wajtchiz žoñinacaqui Yooz taku nonžcu criichiicha. Nekztanaqui bautista cjissiicha.

⁹ Jalla nekztanaqui tsjii ween Yooz Jiliriqi Pablo chjuuzkatchiicha. Nii chjuužtiquiztan Yoozqui Pablužquiz cjichiicha:

—Ana eksna amqui. Tirapan Yooz taku parla. Yooz taku paljayñi langzquiztan ana jayta.

¹⁰ Wejrqui amtan chicapachača. Anaž jakziltami amquiz tani atasacha, ana wali paazjapaqui. Nižaza tii chawc wajtquiz muzpa žoñinacaqui wejtquin criyaquiicha.

¹¹ Jalla nuž chjuuzcu Pabluqui nii Corinto wajtquiz tsjii wata tirzuchiz kamchiicha, Yooz taku tjaajincan.

¹² Jalla niiz wiruñ judío zoñinacaqui Pabluž quintra tsjii kuzziz ajcziča. Nekztanaqui Pablo tanžcu, chawc jilirž yujcquin chjitchiča. Galión cjitatača nii Acay yok jiliriqui.

¹³ Jalla nuž chjichcu, nii chawc jiliržquiz cjichiča:

—Tii zoñiqui učumnaca lii quintraž ojklayča. Tiiqui zoñinaczquiz ana wal tawkžtan intintiskatča, niiz Yooz sirwizjapa. Pero niiz Yooz sirwizqui učumnaca lii quintrača.

¹⁴ Pabluž chiyawc cjen Galión cjita jiliriqui judionaczquiz paljaychiča, tuž cjican:

—Judío zoñinaca, tii zoñiqui ana wejtnaca lii quintra paachiča. Nižaza ana chawc uj paachiča. Tsjii anawali paatasacha, nekztan ančucaž quijta razuna nonžtasacha.

¹⁵ Tii asuntuqui ančuca takucamakazla; nižaza zoñž tjuu puntuquiztan parlakazla; nižaza ančuca liiquiztankazla. Jaziqui ančucporaž parlasa; nižaza ančucporaž kjažmi arreglata. Wejrqui anal tii ančuca lii puntuquiztan arreglis želuča.

¹⁶ Jalla nekztanaqui nii jiliriqui nii zoñinaca tjirkatchiča niiz ofcinquiztan.

¹⁷ Nii ajcz kjuya jiliriqui Sostenes cjitatača. Jalla niicha quijchiqui. Jalla nuž nii jiliriz tjirkattiquiztan, tjapa nii wajtchiz zoñinacaqui nii quijni zoñžtan kichi tansiča, jalla nekzpacha, nii jilirž yujcquizpacha. Nii Galión cjita jilirizti nuž kichjasanami ana importichiča.

PABLUQUI ANTIOQUIA QUEJPCHICHA

¹⁸ Nekztanaqui Pabluqui iyapan kamchiča. Nekztan nii criichi jilanaczquiz “Okuča” cjican ulanchiča. Nekztanaqui tsjii warcu zali ojkiča, Siria yoka ojczjapa. Priscilatan Aquilžtan chica ojkiča. Cencrea cjita wajtquiz, ima warcuquiz luzcan, Pabluqui niiz ach chara k'ala murchiča, tsjii compromitta cuzturumpi cumplisjapa.

¹⁹ Nekztanaqui warcuquiz ojczcu, Efeso cjita watja irantichiča. Jalla nicju Pabluqui Priscilatan Aquilžtan, jalla ninaca ecchiča. Nekztan Pabluqui judionacz ajcz kjuya ojkiča. Jalla nicju nii ajczni judionacztan parlichica.

²⁰ Nekztanaqui nii judionacaqui Pablo roct'ichiča, iya tsjii kjaž majžtan kamt'ajo. Pabluzti ana munchiča.

²¹ Jalla nekztan ima ninaczquiztan ojkan, Pabluqui cjichiča:

—Jerusalén watja irantistanča, pijjsta paazjapa. Pero Yooz munanaqui wejrqui quejpžcača ančucatan wilta zali.

Jalla nuž chižcu, warcuquiz luzziča. Nekztanaqui Efeso wajtquiztan ojkiča.

²² Nekztanaqui Cesarea cjita watja irantižcu, Pabluqui warcuquiztan ulanchiča. Jalla nuž ulanžcu Jerusalén watja ojkiča, criichi jilanaczquin zalzjapa. Nekztan Antioquia wajt kjutni ojkiča.

²³ Jalla nekz tsjii kjaž tjuñi kamžcu, wilta ojkiča. Galacia nižaza Frigia yokanacaran ojklaychiča. Jalla niiran iclizquiztan icliza ojklaychiča, criichi jilanaca tjurt'iñi kuzziz cjiskatzjapa.

APOLOS CJITA YOOZ TAKU PALJAYÑI

²⁴ Jalla nii timpuqui tsjii judío zoñiqui Efeso cjita watja irantichiča. Apolos cjita tjuuchiztača. Niiqui Alejandria pajk wajtchiz zoñitača. Nižaza niiqui Yooz taku walja zuma paljayñitača. Nižaza cijirta Yooz taku zumaž zizatča.

²⁵ Nii Apoložquiz Yooz kamañ puntu walja tjaajintatača. Jaziqui walja tjapa kuztan Yooz taku parliñitača. Juanž bautistakaz cjenami Jesucristuž puntuquiztan walja kjana tjaajinchiča.

²⁶ Nekztanaqui Efeso wajtquiz žejlcan, Apolosqui ajcz kjuyquiz tjurt'iñi kuzziz tsi- jtsiča, Yooz taku paljayzjapa. Niiz paljayta taku nonžcu, Priscilatan Aquilžtan jalla ninacaqui tsjii latu Apolos chjitchiča, Yooz kamaña puntu tsjan kjana tjaajinzjapa.

²⁷ Jalla nekztanaqui Apoložquiz Acaya cjita yokaran ojklayz pecatča. Jalla nuž cjen jilanacaqui walja apoychiča, nižaza tsjii carta credencial apaychiča nii yokquin žejlñi

jilanacžquiz, ninaca zuma risiwajo. Nii yokchiz jilanacaqui Yooz okzñiž cjen criichiča. Acaya irantiscuqui Apolosqui nii criichi jilanacžquiz zuma tjaajinchiča.

²⁸ Nižaza zuma razunquiztan chiican, tjapa žoñinacž yujcquiz nii quintra judionacž pinsitanaca tjeeziča, anapan zumaž ninacž razunaqui. Ninaca atipchiča. Nii quintra judío žoñinacaqui ana kjaž cjii atchiča. Cjijrta Yooz tawk jaru intintiskatchiča, Jesusaqui ninacaž tjewzta Cristučha, nižaza Yoozquiztan cuchanžquita Cristučha, jalla nii.

19

PABLUZ KAMTA EFESO CJITA WAJTQUIN

¹ Acayquiztan quejpžcu, Apolosqui Corinto wajtquiz želatča. Pabluzti curunac yoka watžcu, Efeso watja irantichiča. Jalla nicju tsjii kjaž Yoozquin criichi žoñinacžtan zalchiča.

² Jalla nuž zalžcu, Pabluqui pewcziča, tuž cjican:

—¿Ančhuc criiz oraqui Espíritu Santuqui ančhuca kuzquiz luzzikay?

Ninacaqui kjaaziča, tuž cjican:

—Anaž. Nii Espíritu Santo puntuquiztan anawira nonzinča.

³ Jalla nižtiquiztanaqui Pabluqui pewcziča, tuž cjican:

—Ančhucqui, ¿chjul bautismo tanzinčhuctaya?

Ninacaqui kjaaziča:

—Juanž bautismo tanzinča —cjican.

⁴ Nekztanaqui Pabluqui cjichiča:

—Walikazza. Juanqui kuz campiiñi žoñinacžquiz bautisñitača. Pero nii Juanž wirquin tsjiiqui tjonchiča. Jalla niiča Jesusaqui. Niiqui Yooz Ejpžquiztan cuchanžquita Cristučha. Jalla nižžquin criiz waquiziča. Jalla nižtazakaz Juanqui žoñinacžquiz chiižñitača.

⁵ Jalla nii taku catokžcu, nii žoñinacaqui Jesucristo Jilirž tjuuquiz bautistatača.

⁶ Nekztanaqui Pabluqui ninacž juntuñ kjaržtan lanchiča. Jalla nuž lanznan Espíritu Santuqui tjonchiča. Jalla nižtiquiztan yekja takunacžtan parli kallantichiča. Nižaza Yooziž zizkatta puntunaca parličiča.

⁷ Jalla ninacaqui tsjii tuncapan žoñinacatakalča.

⁸ Chjep již Pabluqui jalla nicju kamchiča. Jalla nuž kamcan ajcz kjuya ojkñipantača. Nii ajcz kjuyquin zuma tjurt'iñi kuzziz paljayñipantača, Yooz mantita kamañ puntuquiztan intintiskatcan.

⁹ Yekjap žoñinacžti wira ana criichipanča. Ninacaqui chojru kuzziz cjissiča. Yooz kamañ quintra parličiča. Jalla nižtiquiztan Pabluqui ninacžquiztan zarakchiča. Nižaza criichi žoñinaca chjitchiča tsjii escuel kjuyquin. Nii escuelchiz žoñiqui Tiranno cjita tjuuchiztača. Jalla nicju Pabluqui tjaajinchiča zapuru.

¹⁰ Jalla nuž tjaajincanaqui pizc wata kamchiča. Jalla nižtiquiztan tjapa nii Asia provincia yokquin kamñinacaqui Jesusa Jilirž liwriñi quintu nonchiča. Judío žoñinacami, nižaza ana judío žoñinacami nii quintu nonchiča.

¹¹ Nižaza Yooz aztan Pabluqui wali pajk milajrunaca paachiča.

¹² Jalla nižtiquiztan žoñinacaqui pañumi zquitimi Pablužquiz lanskatchiča. Jalla nuž lanskatzcu, nii pañumi zquitimi chjitchiča, laa žoñinacžquin. Jalla nižtiquiztan nii laanacaqui chjetintatača, nižaza nii žoñinaca tanñi zajranacami ulanskatchiča.

¹³ Tsjii kjaž judío žoñinacaqui ojklayatča, zajranaca chjatkatcan. Jalla nuž chjatkatcan, nii žoñinacaqui Jesusa Jilirž tjuužtan ojklayz pecatča. Nekztanaqui zajranacžquiz cjichiča:

—Zajranaca, ančhuc ulnaj cjiwčha, Pabluž parlita Jesús tjuuquiz.

¹⁴ Jalla nižta paachiča pakallawk judío jilazullcaqui. Ninacž ejpqui Esceva cjita tjuuchiztača. Niiqui judiuž timplu chawc jiliritača.

¹⁵ Nii pakallawk jilazullca nižta paan, tsjii žoñi tanñi zajraqui ninacžquiz cjichiča:
—Jesús pajuča. Nižaza Pablo pajuča. Ančhucqui ¿jectchuctajo?

¹⁶ Jalla nižtiquiztan nii zajra tanta žoñiqui tsjii layžcu ninacžquiz tanzicha, kijchjapa. Nii zajraž tanta žoñiqui walja azziztača. Jalla nii aztan ninaca atipchiča. Nižaza k'alapacha čhojritchipanča. Nižtami čhojrichta ana zquitchiz atipassiča nii pakallawk žoñinacaqui.

¹⁷ Jalla nekztanaqui tjapa nii Efeso wajtchiz žejlñi žoñinacaqui nii quintu zizziča, judionacami, ana judionacami. Jalla nekztan walja eksnatča. Nižaza Jesucristo Jilirž tjuu walja alawazziča.

¹⁸ Nižaza walja criichi žoñinacaqui ninacaž tuquita persun uj paatanaca pajžcu, kjanacama mazziča.

¹⁹ Nižaza yekjap žoñinacaqui ima Yoozquin criican, laykican ojklayñitača. Jalla ninacaqui ninacž layka ojklayz liwrunaca zijjčchiča. Nekztan k'ala nii liwrunaca ujkatchiča tjapa žoñinacaž cheran. Pjijska tunc waranka pajk ultimu paaz, nuž valorchiztača nii liwrunacaqui.

²⁰ Jalla nekztan nii criichi žoñinacaqui tjapa kjutñi Yooz taku paljayi ojklaychiča. Nekztan tsjan tsjan žoñinacaqui Yooz taku catokchiča.

²¹ Jalla niž wiruñ Pabluqui niž kuzquiz Macedonia nižaza Acaya yokanacquin tjonzpanž tantiichiča. Jalla nuž wattan Jerusalén watja irantispanž tantiichiča. Nižaza Pabluqui cjichiča:

—Jerusalén watja ojžcuqui, wejtlaqui Roma watja irantistanča.

²² Jalla nižtiquiztanaqui Pabluqui pucultan yanapñinaca cuchanchiča Macedonia. Nii pucultanaqui Timoteotača, nižaza tsjiiqui Erastotača. Pabluzti tsjii kjaž majjapa eclichiča Asia yokquin.

ZOÑINACA APTJAPZTA EFESO WAJTQUIN

²³ Jalla nii timpluqui walja žoñinaca aptjapziča, Yooz kamañ jicz puntuquiztan paljaytaž cjen.

²⁴ Nii aptjapñi achaqui Demetrio cjitatača. Jalla niiqui paazquiztan yooznaca paañitača. Jalla nuž paatiquiztan walja paaz canchiča, nižaza parti nižta paañinacaqui. Diana cjiti žoñiž paata yooz timplu irata jalla nii paachiča ninacaqui.

²⁵ Nekztan Demetrio cjita žoñiqui tjapa nii yooznaca paañi žoñinaca juntichiča, nižaza niž langžni mazinaca juntichizakazza. Nekztanaqui tuž cjichiča:

—Jilanaca, ančhucqui zizza. Tii oficiuquiz langzcan, zuma paaz canča učumnacaqui, zuma kamzjapa.

²⁶ Tii Pabluqui ojklayča, “Žoñiž paata yooznacaqui anača ultim yoozqui”, cjican. Jalla nuž chiyan, walja žoñinacaqui niž taku criiča, tii Efeso wajtquinami, nižaza tjapa tii Asia provincia yokquinami. Niiž taku criičcu, učum yooznacquiztan zarakchiča. Jalla nii quintu nonchinčucča, nižaza cherchinčucča.

²⁷ Jalla nižtiquiztan tii učum langznacaqui anat cusa cjisnačhani. Nižaza učumž cansmi pertisnačhani. Anziqui tjapa tii Asia provincia yokquin žejlñi žoñinacami nižaza tjapa tii muntuquiz žejlñi žoñinacami naa yooz siñuri sirwiñiča. Pero Pabluž cjen, Diana cjiti pajk yooz siñuri timplumi ana rispittat cječhani.

²⁸ Jalla nuž Demetriuž chiita taku nonžcu, walja žawjchi cjissiča. Jalla nuž žawjžcu, kjawchiča tuž cjican:

—¡Viva Diana yooz siñura! ¡Viva tii Efeso wajtchiz yooz! —nuž cjican kjawchiča.

²⁹ Nekztan tjapa nii wajtchiz žoñinacž kuz turwayskatchiča. Nižtiquiztan nii wajtchiz žoñinacaqui Gayžtan Aristarcužtan, jalla ninaca kichi tanzicha. Nii pucultanaqui

Macedonia yokquiztan Pablužtan chica ojkchitača. Jalla nii pucultan tanžcu, pajk parliz kjuya chjitchiča.

³⁰ Nižaza Pabluqui nii kjuya luz pecatča, žoñinacžquiz paljayzjapa. Criichi žoñinaczi Pablo atajchiča, ana luzkatajo.

³¹ Nižaza yekjap Asia jilirinaca želatča, Pabluž amigonacatakalča. Jalla ninacaqui tsjii žoñi cuchanžquichiča Pablužquin rocžinajo, nii parliz kjuyquiz ana luzajo.

³² Tampachquiztan juntazcu žoñinacaqui kjawchiča tjapaman razunanaca chiican. Aptjapziž cjen nekztan nižta kjawchiča žoñinacaqui. Ancha pajk ch'awjwa paatča. Jila manka žoñinacaqui čjul puntu ajcztažlaja ana zizziča.

³³ Yekjap žoñinacaqui nii ajczta puntu zumpacha intintiskatchiča Alejandružquiz. Nekztan niiqui tucquin tsijtskatchiča, nii judionacžquiztan tjurt'izinajo. Nekztanaqui Alejandruqui kjara waytižcu ch'uj cjeej cjichiča. Nekztanaqui niiqui tjapa žoñinacž yujcquiz tjurt'iziñž tawkžtan chiiz pecatča.

³⁴ Parti žoñinaczi Alejandro judío žoñi cjican zizcu, wilta kjawchiča tsjii pizc ora. Tsjii joržtan tuž cjican:

—¡Viva Diana yooz siñura! ¡Viva tii Efeso wajtchiz yooz!

³⁵ Jalla nekztanaqui nii wajt secretariuqui žoñinaca ch'uj cjiskatžcu, paljaychiča tuž cjican:

—Efeso jilanaca, tii pajk yooz Diana siñura timplu tii Efeso wajtchiz žoñinacžquiz cumpjiitača. Nižaza arajpachquiztan tjojtžquichinča taa yooz siñuriqui. Tsjii maz cheechi tjonžquichinča.

³⁶ Jalla nii puntuquiztanaqui anaž jecmi nicasača. Jaziqui ch'ujča cjee. Ima zuma tantiyazcan anača čjulumu paa.

³⁷ Tii ančhuca zjijeta žoñinacaqui ana čjulumu chiichiča naa Diana siñurijapaqui, anazaž naa quintra čjulumu paachiča.

³⁸ Demetriužtan niž langžni mazinacžtan quijz pecchaj niiqui, nijapa juez jilirinaca žejlča. Nii jilirinacžquinkaz ojkla, nii quija arreglisjapaqui.

³⁹ Tsjii yekja puntu parliz pecchaj niiqui, zumpachaž ajczcuž parla.

⁴⁰ Tii aptjapzi puntuquiztan učum chiiz razunanacaqui ana žejlča. Jaziqui učum gobiernuqui učumnac quintra uj tjojtñasacha, tii nooj aptjapztiquiztan.

⁴¹ Tii parlaqui žeržta cjila, —nuž cjichiča nii secretariuqui.

Nekztanaqui žoñinaca liwj cuchanchiča, persun kjuya okajo.

20

PABLUZ OJKTA MACEDONIA NIZAZA GRECIA

¹ Jalla nekztanaqui nii aptjapzta žoñinacž ojkta, Pabluqui criichi žoñinaca kjawziča, ninacžquiz tjaajinzjapa. Nekztanaqui Pabluqui “Okaz” cjichiča, Macedonia yoka ojkzjapa.

² Jalla nii yokquin ojklaycan, criichi jilanacžquin zuma tawkžtan ancha p'ekinchaychiča, tjurt'iñi kuzziz cjeyajo. Nekztanaqui Grecia yoka irantichiča.

³ Jalla nicju čhjep jiiz žejlchiča. Nekztan warcu zalz pecatča, Siria yoka ojkzjapa. Warcu tanawc cjen, Pabluqui quintu zizziča, judionacaqui niž quintra parlassitaquiča, jalla nii. Jalla nižtiquiztan niž warcuquiz ojkz cjitaqui nužquiz tijsiča. Yokaranpacha ojkchiča. Nekztan Macedonia yoka irantichiča.

⁴ Nižaza Pablužtan chica ojkchiqui tinacatača: Sopatertača (niiqui Berea wajtchiztača), nižaza Aristarcutača, nižaza Segundutača (niiqui Tesalónica wajtchiztača), nižaza Gayutača (niiqui Derbe wajtchiztača), nižaza Timoteotača, nižaza Tiquicutača, nižaza Trofimutača. (Jalla Tiquicužtan Trofimužtan Asia provinciquiztan-tača).

⁵ Jalla nii jilanacaqui wejtnaca tuqui okjaychiča. Jalla nuž okjayžcu Troas cjita wajtquin wejrnac tjewziča.

⁶ Wejrnacqui ana liwaturchiz t'anta lujlz pjijsa paztan, Filipino cjita wajtquiztan zarakchinča tsjii warcuquiz. Tsjii pjijska tjuñquiztan Troas watja irantichinča. Jalla nicju kamchinča tsjii simana.

PABLUZ KAMTA TROAS WAJTQUIN

⁷ Dominguqui wejrnacqui ajczinča, Santa Cena paazjapa. Jalla nuž ajčžcu Pabluqui tjaajinchiča criichi jilanacžquiz. Jaka tažu zarakz cjen, chica aramacama tjaa-jinchiča.

⁸ Wejrnacqui tsewcta pisuquin ajczintača tsjii kjuyquiz. Kjanzjapa wacchi michanaca tjeestatača.

⁹ Nižaza Eutico cjita tjowa ventanquiz julzi želatča. Pabluž ažkapacha chiyan, nii tjowaqui ancha tjaji tjonkatchiča. Nekztan nii ventanquiztan kossuc tjojtsiča, čhjep pisu kjuyquiztan. Ticzi waytitatača nii tjowaqui.

¹⁰ Nekztanaqui Pabluqui chjijwžquichiča. Nii tjowž juntuñ chutjatžcu žcojrziča. Nekztanaqui parti jilanacžquin cjichiča:

—Anača tsucaquiča. Zejtča tiiqui.

¹¹ Jalla nekztanaqui Pabluqui wilta yawchiča tsewcta pisuquin. Nekztan Santa Cena paachiča. Jalla nuž paažcu, Pabluqui tirapan parličiča kjantatscama. Nekztan ojkchiča.

¹² Partinacazti zuma kuzta eclichiča. Nii tjowa vivož cjen, cuntintu nii tjowa chjitchiča.

¹³ Nekztanaqui wejrnacqui warcuquiz okjaychinča Asón yokacama. Pabluzti kjo-jchuñ ojkz pecatča. Asón wajtquiztan Pablo zakaz warcuquiz ojkz tantiichiča. Jalla nuž cjican kaztatača.

¹⁴ Nekztanaqui Asón wajtquin Pablužtan zalzinča. Nekztanaqui Pabluqui wejtnacatan chica warcuquiz luzziča. Nekztanaqui Mitilene kjutni ojkchinča.

¹⁵ Mitilenequiztan ojkcan, jaka tažuqui Quío latuquin watchinča. Kat tažuqui Samos cjita watja irantichinča. Nekztanaqui Trogilio cjita wajtquin jeejsassinča. Niiž jaka tažuqui Mileto cjita watja irantichinča.

¹⁶ Jalla nuž ojkchinča, Asia yokquin ana wacchi tjuñi žejljapa. Efeso wajtquin ana ojkz pecatča. Antiz Jerusalén watja apura ojkz pecatča Pabluqui. Jalla nicju irantis pecatča ima Pentecostés tjuñi tjonan. Jaknužquiztanami irantisquizpanž pecatča.

EFESO ICLIZ JILIRINACZQUIN CHIIZINTA

¹⁷ Mileto wajtquiz žejlcan, Pabluqui Efeso icliz jilirinaca kjawžquini cuchanchiča.

¹⁸ Jalla nii jilirinacaž tjontan, Pabluqui ninacžquiz tuž chiižinchiča:

—Weriž Asia yokquiz tjontan, nii tjuñquiztanpacha jaknužt ančhucatan chica kam-tučhaja, jalla nii ančhucui zizza.

¹⁹ Jalla nuž ančhucatan kamcan, humilde kuzziz Yooz Jiliržquiz sirwichinča. Nižaza criichi žoñinacžquiztan wejt kuzquiz sint'itiquiztan ancha kaachinča, nižaza ancha pruebanacami sufrichinča.

²⁰ Tsjan zuma kamañchiz cjisjapa ančhucaquiz tjapa zumanaca tjaajinčinča, tjup kuzziz. Plazquinami callquinami tjaajinčinča, nižaza ančhuca persun kjuyquiztan kjuya tjaajinčinča.

²¹ Nižaza judionacžquizimi ana judionacžquizimi paljaychinča wejrqui, tuž cjican: “Ančhucui persun uj pajžcu, kuznaca campiya. Jesucristo Jiliržquin tjapa kuztan criya”.

²² Anziqiu wejrqui Jerusalén watjal okača. Espíritu Santuž mantital okača. Jalla nicju čhjulut watačhaja, anal zizuča.

²³ Jalla tii puntukal zizuča. Tjapa watjaran weriž ojklayan Espíritu Santuqui wejtquiz chiichiča, tuž cjican: “Amqui carsilquiz chawctam cjequiča. Nižaza ancham sufraquiča”.

²⁴ Pero nii mazintiquiztanaqui wejr anal turwasnuča. Tii muntuquiz žejtzjapa anaž importiča wejrqui. Wejt wiraqui anaž chekanaqui. Jesucristo Jiliriž tjaata apóstol cargo, jalla nii cumplistanča chekanaqui. Yooziž tjaata kamañ jaru ojklayz pecuča, ticzama. Liwriiñi Yooz taku parliz pecuča, Yooz zuma okzñiča cjican.

²⁵ “Yooz mantuquiz kamz puntuquiztan ančucaquiz mazzinča. Anziqui ančucqui wejttan anaž iya zalaquiča tekztan nawjcchuc.

²⁶ Jalla nižtiquiztan ančucaquiz chiyuča, tuž cjican: Anaž jecmi ančucaquiztan wejtquin uj tjojtasača, tuž cjican:

²⁷ “Pabluqui anaž tjapa Yooziž tjaata taku tjaajinchiča” cjicanaqui. Wejrqui tjapa Yooziž tjaata takunaca ančucaquiz mazzinča.

²⁸ Jalla nižtiquiztanaqui ančucqui persunpachquiz cwitaza, nižaza parti ančuca iclizziz jilanaca cwitaquiča ančucqui. Espíritu Santuqui ančuc jilirižtakaz utchiča Yoozquin criichinaca cwitajo, nižaza Yooz tawk čjjeri tjaajo. Nii criichi jilanacz laycu Jesucristo Yoozqui niž persun ljoc tawkchiča, cruzquiz ch'awczcu. Jaziqui criichi žoñinacača Jesucristužtaqui.

²⁹ Tsjii zakal zizuča. Weriž ojktan, yekja žoñinacaqui ančucaquin tjonaquiča ančuc wichanzjapa, nižaza ančuca icliza akskatzjapa. Ninacaqui uuzi tanñi ki-tižtakaz luzcaquiča.

³⁰ Nižaza ančucaquiztan toscara chiiñinaca želaquiča tsjii kjutñi criichi jilanaca chjitzjapa toscar tawkžtan.

³¹ Jaziqui ančucqui zumpacha cwitaza. Wejrqui čhjep wata intiru majiñami weenami zapa mayni ančucaquiz tjaajinčinča. Nižaza ančucaquiz chiichiižincan, ancha kaachinča.

³² Jaziqui jilanaca, ančucqui Yoozquin cumpjiyuča. Nižaza Yooz zuma taku zumpachaž catoka. Jalla nuž cjen ančucqui tjurt'iñi kuzziz cjequiča. Nekztan Yoozquiztan irinsa tanznaquiča tjapa Yooziž t'akžta žoñinacztan.

³³ Wejrpachača paazmi zquitimi anapan pecchintqui jeczquiztanami.

³⁴ Antiz wejrtča persun kjaržtan langziñtqui, čhjulut pecatučhaja, jalla nijjapa, nižaza wejttan chica ojklayñi žoñinaczjapami. Jalla nii puntuquiztanaqui ančucqui zumpachaž zizza.

³⁵ Jalla nužupan ančucqui langz waquiziča, t'akjir žoñinaczquiz yanapzjapa. Jalla nuž kjana tjeezinča persuna langzcan. Nižaza Jesús Jilirž chiita taku cjuñzna. Jalla tuž cjiča nii chiitaqui: “Onanñi žoñinacaqui juc'ant cuntintuča tanzñi žoñinaczquiztanaqui”.

³⁶ Jalla nuž chiižcu, Pabluqui quillziča, tjapa nii žejlñi hermanonacztan, Yoozquin mayizizjapa.

³⁷ Jalla nekztanaqui tjapa nii jilanacaqui kaachiča Pabluž ojcz cjen. Pablo žcojrziča, nižaza chjulziča.

³⁸ Pabluqui cjichiča:

—Wejrqui okača, jaziqui anaž iya wejr cheraquiča. —Jalla nižtiquiztan nii jilanacaqui ancha llaquita cjissiča.

Jalla nekztanaqui warcu luzcama chica ojkchiča.

21

PABLUQUI JERUSALEN WATJA OJKCHICHA

¹ Jilanaca eccu, warcuquiz luzzinča. Nekztan Cos cjita yok tirichuc ojkchinča. Jaka tažuqui Rodas cjita yokquin ojkchinča. Jalla niwjctan Pátara cjita watja ojkchinča.

² Jalla nii Pátara wajtquiztan tsjii Fenicia kjutñi ojkñi warcu zalchinča. Nekztan nii warcuquiz luzcu ojkchinča.

³ Jalla nuž ojkcan Chipre cjita yoka ažkquin cherchinča. Chipre yokaqui zkar latuquintača. Tira ojkchinča Siria yoka irantizcama. Tiro cjita wajtquiz kuzi ecz želan, nekztan Tiro watja luzziča.

⁴ Jalla nicju criichi jilanaca kjurchinča, zalañcama. Nekztanaqui ninacžtan kamchinča tsjii simana. Ninacaqui Espíritu Santuž cjen chiikatchiča Pablužquiz, tuž cjican: —Amqui anatača ojkzqui Jerusalén watja.

⁵ Simanaž wattan, Tiro wajtquiztan ulanchinča. Nižaza tjapa nii wajtchiz criichi žoñinacaqui maatakanacžtanami ocjalanacžtanami wejtnacaquiz cumpant'ichiča wajtž tjiya. Jalla nicju tsjii k'ara želatča, kot atquin. Nii k'arquiz quillžcu Yoozquin mayizassinča.

⁶ Nekztanaqui zumpacha kjara tansascu, jaljtassinča “Kjažllami okall” cjican. Nekztanaqui wejrnacqui warcuquiz luzzinča. Ninacazi kjuya quejpciča.

⁷ Nekztanaqui Tiro wajtquiztan zarakchinča, Tolemaida cjita watja irantiscama. Jalla nicju criichi jilanacžquin tsaani ojkchinča. Jalla nekztanaqui tsjii nooj kamchinča nii jilanacžtan.

⁸ Niiž jaka tažuqui Pablužtan wejtnacatan ulanchinča. Nekztan Cesarea cjita watja irantichinča. Jalla nii wajtquiz irantižcu Filipž kjuya ojkchinča. Jalla niitača liwriiñi Yooz taku parliñiqui jalla nii oficiuchiztača. Niiž tuqui Jerusalenquin pakallawk jilanaca illztatača, Yooztajapa langzjapa. Tsjiiqui nii Filipitača. Jalla niiž kjuyquin kamchinča.

⁹ Nii Felipiqui pajkpaltan ana zalzi tjunmatanacchiztača. Nižaza ninacaqui Yoozquiztan zizta taku parliñi profetanacatača.

¹⁰ Jalla ninacž kjuyquin tsjii kjaž maj kamžcu, tsjii Agabo cjita žoñiqui tjonchiča Judea cjita yokquiztan. Nii žoñiqui Yooz taku parliñi profetatača.

¹¹ Jalla nii žoñiqui wejrnac tjonzñi tjonchiča. Nekztanaqui Pabluž jweranta kojch aptichiča. Nii kojchtan persun kojcha kjara jwersiča tuž cjican:

—Espíritu Santuqui tuž cjiča: “Jalla nižtapacha Jerusalén wajtquin judío žoñinacaqui tii kojch tuyñi žoñi jwernaquiča. Jalla nuž jweržcu, yekja wajtchiz žoñinacžquiz intirjaquiča”. —Nuž cjichiča Agabo cjita profetaqui.

¹² Jalla nuž nonžcu, wejrnacmi nižaza nii Cesarea wajtchiz criichinacami tjappacha Pablužquiz rocassinča ana Jerusalén watja okajo.

¹³ Pabluzti kjaaziča, tuž cjican:

—¿Kjažtiquiztan ančhuc kaajo? ¿Kjažtiquiztan ančhuc wejr llaquizkatjo? Wejrqui Jesucristuž cjen listuča čejlta cjisjapami nižaza Jerusalén wajtquin ticzjapami.

¹⁴ Jaziqui wejtnaca razunžtan Pabluž taku ana atipi atchinča. Jalla nuž cjen ana tira chiichinča. Tiikazza cjichinča:

—Yooz Jilirž munañpaj cjila.

¹⁵ Jalla nekztanaqui ojkzjapa tjaczinča. Nekztan Jerusalén wajt kjutñi ojkchinča.

¹⁶ Nižaza yekjap Yoozquin criichi jilanacaqui wejtnacaquiz cumpant'ichiča. Tsjii ninacžquiztan Mnasón cjita žoñi želatča. Niiqui Chipre cjita wajtchiz žoñitača. Ažk wata Yoozquin criichipantača. Niiž kjuyquin alujazjapatača Jerusalén wajtquin.

PABLUQUI JACOBZQUIZ TJONZICHA

¹⁷ Jerusalén watja irantižcu, Yoozquin criichi jilanacaqui wejrnac ancha cuntintu risiwt'ichiča.

¹⁸ Niiž jaka tažu Pabluqui wejtnacatan Jacobžquin tjonzñi ojkchiča. Jalla nicju tjapa nii Jerusalén icliz jilirinacaqui želatča.

19 Pabluqui jilanacžquiz tsaanžcu, tjappacha niiž ojklayta quint'ichiča. Yoozqui Pablužquiz wali pajk obranaca paakatchiča ana judío žoñinacž yokaran ojklayan. Jalla nii quint'ichiča Pabluqui.

20 Jalla nii takunaca nonžcuqui, Yooz honora chiichiča. Nižaza Pablužquiz cjichiča:

—Jila, walikazza niiqui. Nižaza tekzi tsjii kjaž warank judionacaqui Jesucristužquin criichizakazza. Jalla nii zizzamča. Nižaza tjapa ninacaqui cjichipanča, “Moisés lii jaru ojkanča” jalla nii.

21 Nižaza ninacaqui nonziča tii quintu: Amqui yekja yokquin kamñi judionacžquiz tjajinñamča, “Moisés mantita lii ana cumplis waquiziča”, jalla nii. Nižaza ninacaqui am puntuquiztan tuž nonziča: Amqui “Lucmajch wawanaca ana chimputa cjis waquiziča”, cjican tjajinñamča. Nižaza amqui “Učhum judío cuzturumpinac jaru ana paaz waquiziča” cjican tjajinñamča. Jalla nuž am puntuquiztan nonziča tekž žejlñi hermanonacaqui.

22 Anziqui nii hermanonacaqui am tjonchi zizcu ajcznaquiča. Jaziqui, ¿jaknužum cjeequi?

23 Amqui jalla tužum paačhaj. Tii Jerusalén wajtquiz pajkpaltan žoñinaca žejlča. Ninacaqui compromitta taku complistanča.

24 Amtan chica ninaca chjiča. Nekztan ninacžtan chica am učhum cuzturumpi paa. Nižaza ninacž gasto pacna, ninaca persun ach chara k'ala murta cjisjapa. Jalla nižtiquiztan tjappacha intintiskataquiča, amqui učumnaca cuzturumpi ana quintrača, jalla nii. Jalla nuž chiichiiñinacaqui toscara cjitaž cjequiča. Ampachazakazim učhum lii jaru paača. Jalla nuž intintaquiča tjappachaqui.

25 Nižaza wejrnacqui nacjuñta wajtchiz ana judío criichinacžquiz cjjirčinča, tuž cjican: “Žoñiž paata yoozquiz wilana jawkta chjizwi anača lujlsqui. Nižaza jora zkenzcu conta animal chjizwimi anača lujlsqui. Nižaza luctakžtanami maatakžtanami anača adulteriuquiz ojklayzqui”. —Jalla nuž Pablužquiz chiichiča nii icliz jilirinacaqui.

PABLUQUI PRESO TANTATACHA

26 Jalla nekztanaqui Pabluqui nii pajkpaltan žoñinaca chjitchiča. Niiž jaka tažuqui ninacžtan chica cuzturumpi paachiča. Nekztanaqui timpluquin luzziča čjulorat nii cuzturumpi paaz tjuñinaca žerznačhaja, jalla nii mazjapa. Nii cuzturumpi paaz tjuñinaca žerztan, Pabluqui persunjapami ninacžtajapami ofrenda tjaastanča. Nii puntu zakaz timpluquin mazñi luzziča.

27 Nii pakallawk cuzturumpi paaz tjuñinaca žeržmayatača. Jalla nii ora tsjii kjažt judionacaqui želatča Asia provinciquiztan tjonchi. Ninacaqui Pablo cherchiča timpluquiz žejlñi. Jalla nuž cheržcu, ninacaqui tjapa žoñinaca aptjapchiča Pabluž quintra. Nižaza Pablo tanzjapa jirchiča.

28 Nekztan kjawchiča tuž cjican:

—Israel wajtchiz žoñinaca. Yanapt'alla. Tiiča anawal žoñiqui. Tiiqui tjapa kjutñi ojklayan, žoñinacžquiz tjajinñča učhum nación quintrami, nižaza Moisés lii quintrami, nižaza tii timplu quintrami. Nižaza anziqui tii timpluquiz ana judío žoñinaca chjitchiča. Jalla nižtiquiztan tii Yooz timplu quintraž paača. Učhum alajakazza tii arajpach Yooz timpluquiz luzpanqui. Ana judío žoñinacaqui ana luztanča. —Jalla nuž kjawchiča Pabluž quintra.

29 Niiž tuquilla Pabluqui Trófimo cjita žoñžtan želatča. Trofimuqui Efeso wajtchiz žoñitača. Niiž pucultan chica cheržcu, nii judío žoñinacaqui tuž pinsatča, Pabluqui timpluquin nii Trófimo chjitchižlani, cjican. Jalla nižtiquiztan Pabluž quintra kjawchiča.

30 Tjapa žoñinacaqui Pabluž quintra žawjchi tjojktichiča. Zati pariju tjonchiča timplu kjutñi. Nekztanaqui Pablo tanchiča. Timplu kjuyltan tanžcu zawncchuc joochiča. Nekztanaqui nii timplu zanami chawjczicha.

³¹ Ninacaqui Pablo conzmayatacha. Nekztan zoñinaca walja aptjapzi cjen, zultatž jiliržquin maztatacha.

³² Jalla nii quintu zizcu, walja apura zultatunaca juntassiča ninacz sargentunacztan. Nekztan zati pari ju jirchiča jakziquin tama zoñinaca želatčhaja, jalla nicju. Nekztanaqui zoñinacaqui nii zultatunaca sargentunacztanpacha cherchiča. Nuž cheržcu Pablo kijtž cjen nužquiz apatatchiča.

³³ Jalla nekztanaqui nii zultatž jiliri qui macjatžcu Pablo preso tanchiča. Nižaza mantichiča, pizc carinžtan chelajo. Nekztanaqui zoñinaczquiz pewcziča:

—¿Ject teejo? ¿Chjulu paachita tii zoñejo?

³⁴ Nii zoñinacazti tjapaman puntunaca chiican kjawchiča. Ancha altu joržtan arnan, nii zultatž jiliri qui ana intintasi atatča. Jalla nižtiquiztan mantichiča, cuartilquin chjicha, cjican.

³⁵ Zultatž cuartil guardanaczquiz macjatžcan, zultatunacaqui Pablo waytižcu chjitchiča, ana nii zoñinaczquiz kijchkatzjapa.

³⁶ Niiž wirquiz tama zoñinacaqui apzquichiča, kjaw jawi:

—¡Ticzla tiiqui! ¡Panj ticzla! —cjican.

PABLUQUI PERSUNA TJURT'ICHICHA

³⁷ Nekztanaqui Pabluqui cuartilquiz makawc cjen zultatž jiliržquiz paljaychiča, tuž cjican:

—Wejrqui tsjii chiiz pecučha. ¿Wejr chiyasaya?

Nekztanaqui nii zultatž jiliri qui kjaaziča tuž cjican:

—¿Amqui griego taku chiiñam jaa?

³⁸ Jaziqui amqui anaž nii anawal egipt wajtchiz zoñimča. Niiqui ažk tjuñinaca gobiernuž quintra zoñinaca tjojtiskatchiča. Ch'ekti yokquin tsjii pajkpic warank guerrillero juntichiča gobierno niiž puestuquiztan chjatkatzjapa. ¿Ana nii egipto zoñimya?

³⁹ Nekztanaqui Pabluqui kjaaziča, tuž cjican:

—Wejrqui judío zoñtča. Cilicia cjita yokquin Tarso cjita wajtquin nassinča wejrqui. Nii pajk wajtchiz zoñtča wejrqui. Jalla nižtiquiztan tii zoñinaczquiz paljayskatalla. —Nuž permiso maychiča.

⁴⁰ Nekztanaqui zultatž jiliri qui permiso tjaachiča, zoñinaczquiz paljayajo. Nekztanaqui Pabluqui tsijtsiča nii gradanac juntuñ. Nižaza kjara waytižcu zoñinaca ch'ujquizkatchiča. Jalla nuž zoñinaca ch'ujquizkatžcu, Pabluqui hebreo tawkquiztan paljaychiča, tuž cjican:

22

¹ —Jilanaca, ejpnaca, wejrqui persunal tjurt'ača. Wejt takuž nonžna.

² Jalla nuž hebreo tawkžtan paljayan, walja ch'uj žejlchiča nii zoñinacaqui. Nekztanaqui Pabluqui paljaychiča, tuž cjican:

³ —Wejrqui judío zoñtča. Nawjc Cilicia cjita yokquin Tarso cjita wajtquin nassinča. Pero tekzi tii Jerusalén wajtquiz pajkchinča. Gamaliel cjita maestruqui wejr tjaajinchiča, učum atchi ejpnacz tuquita lii jarupanča tjaajinchi qui. Nižaza wejrqui tjapa kuztan Yoozquin sirwiñpanča, jaknužt ančhucqui tjapa kuztan učum cuzturumpi jaru paačhaja, jalla nuž.

⁴ Tuquiqui wejrqui Yooz jiczquiz ojklayñi zoñinaca taniñtača, conañcama. Nižaza Yoozquin criichi luctaka cjiñimi maataka cjiñimi preso tanžcu, cheliñtača carsilquiz chawjckatzjapa.

⁵ Nižaza timplu jilirinacami tjapa wajt jilirinacami zizza, weraral chiyučha, nii. Ninacaqui wejtquiz carta credencial tjaachiča, Damasco wajtquin učum judío jilinanaczquiz tjeezjapa. Nekztan nicju ojckchinča, Yoozquin criichi zoñinaca tanzjapa.

Tekzi Jerusalén wajtquiz zjijczcu, casticz pecchinča. Jalla tii weriž ojklayta puntuquiz-tanaqui tii Jerusalén jilirinacaqui kjanacama declarasača.

PABLUQUI JESUCRISTUZTAN ZALCHICHA

⁶ ‘Carta credencial tanžcu, wejrqui Damasco watjal ojkchinča. Nižaza taypur ora irantiz cjen, tiripintit arajpachquiztan tsjii wali pajk ispijužtakaz kjanžquichiča wejt muytata.

⁷ Wejrqui yokquin tjojtzinča. Jalla nuž tjojtžcu tsjii jora nonziča, tuž cjican: “Saulo, Saulo, ¿kjažtiquiztan am wejt quintramjo?”

⁸ Jalla nekztanaqui wejrqui pewczinča, tuž cjican: “Wejt Jiliri, ¿ject amya?” Jalla nekztanaqui wejtquiz kjaaziča, tuž cjican: “Wejrtča Jesusitqui. Nazaret wajtchiz žoñtča. Amqui wejt quintram paača”.

⁹ Wejttan chica cumpant'iñi žoñinacaqui walja tsucchiča. Nižaza nii kjanžquiñi cherchizakazza. Pero nii wejtquiz chiizquiñi jora ana nonziča.

¹⁰ Nekztanaqui wejrqui cjichinča: “Wejt Jiliri, ¿chjulu wejr paajum cji amya?” Nekztanaqui wejt Yooz Jiliriqui kjaaziča, tuž cjican: “Zaažna. Tiraka amqui Damasco watja oka. Jalla nezk amquiz mazinta cjequiča čhjulut paasalaj, jalla nii”.

¹¹ Jalla nii kjanaž cjen zuranzinča. Jalla nekztanaqui wejt cumpant'iñi žoñinacaqui wejt kjarcu tanžcu Damasco watja irantizcama chjitchiča.

¹² Jalla nii wajtquin tsjii Ananías cjita žoñi želatča. Jalla niiqui Moisés lii jaru walja cumpliñitača. Nižaza tjapa nii Damasco wajtquin kamñi judionacami nii žoñž puntuquiztan “Zumapanča nii žoñiqui” cjiñitača.

¹³ Nekztanaqui Ananiasqui wejtquiz tjonžni tjonchiča. Jalla nuž tjonžcu wejt latuquiz tsijtsiča. Nekztan wejtquiz cjichiča: “Saulo jila, wilta cherñim cjequiča”. Jalla nii orapacha wejrqui cherñi cjissinča. Nekztan Ananías kjutni cherzinča.

¹⁴ Jalla nekztanaqui Ananiasqui wejtquiz cjichiča: “Tuquitanpacha učum ejpnacž Yoozqui am illziča, niž pinsita zizajo, nižaza niž ancha zuma Majch cherajo, nižaza niž jora nonžnajo.

¹⁵ Nižaza amqui niž puntuquiztan paljayaquiča tjapa tii muntuquiz žejlñi žoñinacžquiz. Nižaza ninacžquiz amiž chertanaca, nižaza amiž nonztanaca declaraquiča.

¹⁶ Jaziqi apura žaažna, Yooz Jiliržquin tjapa kuztan cjee, am ujnaca pertunta cjisjapa. Nižaza bautista cjee”.

¹⁷ Wiruñiqui Jerusalén watja quejpchinča. Jalla nuž quejpžcu, timpluquin ojkchinča Yoozquin mayizizjapa. Jalla nuž mayizican Yoozqui tsjii chjuužtažokaz wejt kuzquiz tjonskatchiča.

¹⁸ Nekztan Yooz Jiliri cherchinča. Nižaza Yooz Jiliriqui wejtquiz cjichiča: “Tii Jerusalén wajtquiztan apura ulna. Amiž wejt puntuquiztan chiita takunaca anaž nonz pecča”.

¹⁹ Nekztanaqui wejrqui cjichinča: “Wejt Jiliri, ninacaqui zizza weriž ojklaytanacaqui. Tjapa ajcz kjuyaran ojklayiñtača, amquin criichinaca kjurcan. Jalla nii criichinaca wachtiquiztan, wejrqui ninaca wjajtkatchinča.

²⁰ Nižaza am puntu declarñi Esteban conan, wejrqui nicju tsijtsi želatuča. Nižaza wejt kuzmi tjapa kuztača nii conan. Nižaza nii conñi žoñinacž zquitinaca cwitichinča”.

²¹ Pero Yooz Jiliriqui wejtquiz chiižinchiča, tuž cjican: “Oka amqui. Ažkquin nacjuñta wajtchiz žoñinacžquin am cuchnača”.

PABLUZTAN COMANDANTI JILIRZTAN

²² Jalla niicama žoñinacaqui Pabluž paljayta taku nonziča. Nekztanaqui kjawi kallantichiča, tuž cjican:

—¡Ticzla tii žoñiqui! ¡Ana žejtz waquiziča!

²³ Jalla nuž tirapan kjawcan, persun zqutinaca wewcwewczinchiča, polvo žketinchizakazza.

²⁴ Jalla nižtiqiztan zultatž jiliriqiu mantichiča, Pablo cuartelquin majkžnajo. Nižaza mantichiča, Pablo wjajtžcu mazkatzjapa, “¿Kjažtiqiztan nii žoñinacaqui niž quindra nižta kjaw?” jalla nii puntuqiztan zizjapa.

²⁵ Pablo wjajtjapa čhejlžtaž cjen, Pabluqui neksz žejlñi tenientžquiz paljaychiča, tuž cjican:

—Ima zumpacha zizcan, ¿tsjii roman žoñi wjajtž waquiziya? Anapaž waquiziča.

²⁶ Jalla nii taku nonžcu, nii tenientiqui niž comandantižquiz ojkchiča, nii puntu mazjapa. Jalla nekztanaqui tuž cjichiča:

—Tii žoñiqui roman žoñipanzača. Anaž čhjulumi nižtaqui kjaž cjila.

²⁷ Nekztanaqui nii comandante jiliriqiu Pablužquin macjatžquichiča. Nekztan pewcziča, tuž cjican:

—¿Roman žoñim panj amya?

Pabluqui kjaaziča, tuž cjican:

—Jesalla.

²⁸ Nekztan nii comandantiqui cjichiča:

—Wacchi paaz wejrqui pacchinpanča roman wajtchiz žoñi cjisjapaqui.

Nekztan Pabluqui kjaaziča, tuž cjican:

—Wejrqui nastiqiztanpacha roman wajtchiz žoñtča.

²⁹ Jalla nuž Pabluž taku nonžcu, nii Pablo wjajtajo mantita zultatunacaqui nužquiz wir kjutñi atziča. Nižaza Pablo roman žoñi zizcu, nii comandantiqui nii wjajtjapa čhejlchiž cjen, tsucchi quirchiča.

PABLUQUI JUDIO JILIRINACZQUIZ PRISINTISKATCHICHA

³⁰ Niiž jaka tažuqui nii comandantiqui ancha ziz pecatča Pabluž puntuqiztan. Ultimu, ¿kjažtiqiztan nii judío žoñinacaqui Pablo conkatz pecatjo? Jalla nekztan Pablo čhejlta carina apakžinchiča. Nižaza timplu chawc jilirinacami wajt jilirinacami juntjapznajo mantichiča. Jalla nuž juntjapztiqiztan nii comandantiqui Pablo ninacz yujcquin prisintisjapa chjitchiča.

23

¹ Nekztanaqui Pabluqui nii ajczi jilirinacz kjutñi cherziča. Jalla nuž cheržcu, tuž cjichiča:

—Jilanaca, wejt kuzquiz zizuča, tii nojcama wejrqui Yooz yujcquiziqui walika kamchinča, nii.

² Nuž chiitqiztan, Ananías cjita chawc jiliriqiu Pabluž žcati žejlñi žoñžquiz mantichiča Pabluž atquiz kijchnajo.

³ Pabluzti kjaaziča, tuž cjican:

—Pizc kuzziz žoñi, Yoozqui am casticaquiča. Amqui tekz julzamča, učum lii jaru wejr jusjizjapa. Jaziqui, ¿kjažtiqiztan amqui učum lii quindra wejr kijchnajo mantichamtajo?

⁴ Jalla nii žejlñi žoñinacaqui kjaaziča, tuž cjican:

—¿Jalla nuž Yooz chawc jiliriqiu chayskazkaya?

⁵ Nekztan Pabluqui cjichiča:

—Jilanaca, anal wejrqui zizatuča tiiqui Yooz chawc jilirižlaja, jalla nii. Cjijrta Yooz takuqui tuž cjicha: “Tsjii wajt jilirž quindraqui anača chiizqui”.

⁶ Jalla nekztanaqui Pabluqui naaziča, parti ajczñi žoñinacaqui saduceo partiqiztantača, nižaza parti ajczñi žoñinacazti fariseo partiqiztantača. Jalla nižtiqiztan altu joržtan nii žoñinaczquiz paljaychiča, tuž cjican:

—Jilanaca, fariseo parti žoñt'cha wejrqui. Wejt familiaqui fariseo partizakazza. Tsjii noojiqui ticzi žoñinacaqui jacatataqui'cha. Jalla nii tjuñi wejrzakal tjewznu'cha. Jalla nii puntuquiztan an'chucqui wejr jusji'cha.

⁷ Jalla nuž chiitiquiztan fariseo partinacžtan saduceo partinacžtan porapat apt-japzi'cha. Nekztanaqui nii ajczñi žoñinacaqui t'akzi'cha.

⁸ Nii saduceo žoñinacazti cjiñita'cha, “Ticziquiztanaqui anaž wira jacatatasac'ha. Nižaza anaž anjilanacami zajranacami želasac'ha”, nuž cjiñita'cha. Nii fariseo žoñinacazti jacatatz puntumi anjilanacž puntumi, zajranacž puntumi, tjapa nii puntunaca criiñita'cha.

⁹ Jalla nižtiquiztan altu joržtan ch'aasi kallantichi'cha. Nekztan tsjii kjaž lii tjajjiñi maestronacaqui tsjitsi'cha. Ninacaqui fariseo partiquiztanta'cha. Ninacaqui paljay-chi'cha tuž cjican:

—Tii žoñžquiz ana čjul ujmi wachu'cha wejrnacqui. Cunamit tsjii anjila'cha Pablužquiz chiižinchini, už ispirituzlaj tiižquiz chiižinchi.

¹⁰ Juc'ant juc'ant ch'aascan aptjapsi'cha. Jalla nuž cjen comandante jiliriqui eksnat'cha Pablo chjojritžta cje'chaj, jalla nii. Nekztan nii comandantiqui zultatunacžquiz mantichi'cha nii judionacž taypiquiztan Pablo jwescu wilta cuartilquin chjichajo.

¹¹ Niiž jaka zeztažu nii arama Yooz Jiliriqui Pablužquiz jeczquichi'cha, tuž cjican:

—Pablo, tjup kuzziz cjee. Jaknuž tii Jerusalén wajtquiz wejt puntuquiztan paljayčhamžlaja, nižaza Rom wajtquin wejt puntuquiztan paljaystan'cha.

PABLO CONZ KAZTA

¹² Jalla niiž jaka tažuqui tsjii kjaž judío žoñinacaqui Pablo conzjapa juramentužtan tsjii acuerduquiz asiptassi'cha. “Pablo ana ticznaquiž niiqui, wejrnac contal cjee'cha”. Nuž cjican asiptassi'cha. Nižaza ninacaqui palt'assi'cha ninacpora, tuž cjican:

—Anaž čjul čherimi lujls, Pablo conañcama, —jalla nii.

¹³ Jalla nii parla asiptiñi žoñinacaqui pusi tunc jilata'cha.

¹⁴ Nižaza ninacaqui mazñi ojkchi'cha timplu chawc jilirinacžquinami nižaza wajt jilirinacžquinami. Ninacžquiz mazzi'cha tuž cjican:

—Tsjii acuerduquiz asiptassin'cha tuž cjican: “Pablo ana ticznaquiž niiqui, wejrnac contal cjee'cha”. Nižaza palt'assin'cha wejrnacpora, tuž cjican: “Anaž jecmi čjul čherimi lujls, Pablo conañcama”, jalla nii.

¹⁵ Jaziqui an'chucqui parti jilirinacžtanami nii comandante jiliržquiztan nii Pablo mayaqui'cha, tuž cjican: “Wilta Pablo cuchanzcalla wejtnacaquin. Wejrnacqui Pabluž puntuquiztan tsjan zumpacha intintiz pecasu'cha”. Jalla nuž cjican Pablo mayaqui'cha. Wejrnacqui listuž cjee'cha Pablo conzjapa. Ima an'chucaquiz irantižcan, wejrnacqui nii Pablo cona'cha. —Jalla nuž cjichi'cha.

¹⁶ Jalla nekztanaqui Pabluž cullaca majchqui Pablo conz puntuquiztan nonzi'cha. Jalla nii nonžcuqui cuartilquin ojkchi'cha Pablužquiz mazñi.

¹⁷ Nekztanaqui Pabluqui tsjii zultatž teniente kjawzi'cha, tuž cjican:

—Tii tjowa chjicha comandantižquin. Tiiqui quintuchizza.

¹⁸ Nekztanaqui nii teniente nii tjowa chjitchi'cha tuž cjican:

—Nii Pablo prisita žoñiqui wejr kjawzi'cha. Nekztan wejtquiz chiichi'cha tii tjowa amquin chjichajo. Tiiqui amquiz quint'iz pec'cha.

¹⁹ Nekztan nii comandantiqui kjarcu tanžcu nii tjowa tsjii latu chjitchi'cha. Jalla nekztan pewczi'cha, tuž cjican:

—¿Čhjululum amqui wejtquiz chiiz pecya?

²⁰ Jalla nekztanaqui tjowaqui kjaazi'cha tuž cjican:

—Judío žoñinacaqui tsjii acuerduquiz asiptassi'cha. Jaka wenz amquiztan mayaqui'cha Pablo chjitzjapa judío jilirinacž yujcquin. Jalla tuž mañžtan mayaqui'cha, “Wejrnacqui Pabluž puntuquiztan tsjan zumpacha intintiz pecasu'cha”. Jalla nuž cjican mayaqui'cha.

²¹ Amzti ana ninacžquiz juyzu paaz waquiziča. Tsjii pusi tunc jil žoñinacaqui juramentužtan tsjii acuerduquiz asiptassiča, tuž cjican: “Pablo ana ticznaquiz niiquei, wejrnac contal cjeeča”. Nižaza ninacpora palt'assiča, tuž cjican: “Anača čhjeri lujls Pablo conañcama”. Nii žoñinacaqui čhjojziž tjewža Pablo irantisquizcama. Anzpacha listuča, amiž asiptita takukaz tjewža.

²² Jalla nii quintu nonžcu nii comandantiqui nii tjowa cuchanchiča. Nižaza mantichiča:

—Anaž jeczquizimi amiž quint'itaqui chiichiyaquiča, —jalla nuž cjican cuchanchiča.

PABLUQUI FELIX CJITA JILIRZQUIN CUCHANTA

²³ Jalla nekztanaqui nii comandantiqui pucultan teniente kjawziča. Jalla nuž kjawžcu tsjii ortina mantichiča, tuž cjican:

—Zultatunaca tuž tjaczna, paa patac zultatu kjojchiñ ojkñijapa, nižaza pakallawk tunca zultatu cawallquiz yawchi ojkñijapa, nižaza paa patac zultatu lanzižtan ojkñijapa. Ispir ora listu tjaczta cjequiča Cesarea watja ojkzjapa.

²⁴ Nižaza tsjii cawallu tjaczinaquiča Pablo yawchi chjitzjapa. Nižaza Pablo chjichaquiča ana čhjulu kjaž cjižcu. Nekztanaqui Félix cjita chawc jiliržquiz intirjaquiča. —Jalla nuž mantichiča nii comandantiqui.

²⁵ Nižaza nii Pablo chjichñi zultatunacžtan tsjii carta apaychiča, tuž cjican:

²⁶ “Al señor excelentísimo chawc jiliri Félix: Wejrqui amquin tsaanuča; Claudio Lisias wejrtča.

²⁷ Judío žoñinacaqui tii žoñi preso tanchiča. Nižaza konz cjichitakalča. Jalla tiiquei roman žoñiča. Jalla nii zizcu, wejrqui zultatunacžtan ojkchinča, tii liwrii. Wejr irantan, judío žoñinacaqui tii conzmayatača.

²⁸ Wejrqui ziz pecatuča, ultimu kjažtiquiztan nii judío žoñinacaqui tii conkatz pecatjo, jalla nii. Nižtiquiztan judío jilirinacž yujcquin chjitchinča.

²⁹ Nekztanaqui zizzinča nii judionacž lii puntuquiztankaz tii quintra uj tjoj-tunchiča. Anaž konz razunami nižaza ana carsilquiz chawjcz razunami želatča tii judionacžquiztanaqui.

³⁰ Jalla nekztanaqui nii judío žoñinacaqui tsjii acuerduquiz asiptassitakalča tii Pablo konzjapa. Jalla nii zizcu, nekztan wejrqui amquin apura cuchanžcuča. Nižaza nižta quintra žoñinacžquiz mantichinča, am yujcquiz parlajo, čhjul puntuquiztan quintra aptazaja, jalla nii. Jalla nužukazza”.

³¹ Jalla nekztanaqui ortin jaru zultatunacaqui ween Pablo chjitchiča, Antípatris cjita watjacama.

³² Niiž jaka tažuqui kjojchiñ ojkñi zultatunacaqui cuartilquin quejpžquichiča. Cawallquiz ojkñi zultatunacakaz tira Pablužtan ojkchiča.

³³ Cesarea watja irantižcu, carta tjaachiča chawc jiliržquiz. Nižaza nii jiliržquiz Pablo intirjichiča.

³⁴ Carta liižcu, nii chawc jiliriiquei Pablo pewcziča, jakzi wajtchiz žoñitažlaja, jalla nii. Cilicia wajtchiz žoñi, nii zizcu,

³⁵ tuž cjichiča:

—Am quintra aptažni žoñinacž tjonchiž cjen, am puntuquiztanaqui wejrqui atintača.

Nekztanaqui nii jiliriiquei mantichiča Herodes pajk kjuyquiz Pablo zuma wijilta želajo.

24

PABLUQUI FELIX YUJCQUIZ PRISINTICHICHA

¹ Nekztan pjijska tjuñquiztan, Ananías cjita timplu chawc jiliriqúi Cesarea watja irantichiča Jerusalén wajt jilirinacžtanami nižaza tsjii Tértulo cjita tjurt'iziñi awjatžtan. Jalla ninacaqui chawc jilirž yujcquin prisintichiča Pabluž quintra chawc uj tjojtunzjapa.

² Tsjii audiencia cjetžtanaqui jilirž yujcquiz Pablo chjichtatača. Nekztan nii Tértulo tjurt'iziñi awjatuquí Pabluž quintra chii kallantichiča tuž cjican:

—Wejt excelentísimo chawc jiliri: Walikazza wejt watjaqui, nižaza cuntintu kamasuča. Sparaquiča amquin. Am walja zizñiž cjen zuma irpiñamča wejtnacaquiz. Chjul necesidad žejlčhaja, jalla nii atintichamča.

³ Tjapa watjanacquin amiž uchta obranacquiztan ancha sparaquiž cjiwča, zuma excelentísimo Félix. Nižaza tjapa žoñinacaqui nuž amquiz sparaquiča cjiñipanča.

⁴ Wejrqui am ana ancha molistis pecuča, tii puntuquiztankaz am atintalla. Nižaza tsjii ratu wejt taku nonžnalla.

⁵ Nuc ažka kamcan, wejrnacqui zizzinča, tii žoñiqui wira anawalipanča. Nižaza tjapa kjutñi judío žoñinacaž aptjapča, t'aka t'aka. Nižaza tiiqui walja achača nii nazaren cjita t'akquiztan.

⁶ Nižaza wejtnaca timpluquin yekja wajtchiz žoñi luskatz yanchiča. Jalla nižta anawalipanča. Jalla nižtiquiztan wejrnacqui tii preso tanchinča. Nižaza wejtnac lii jaru tii žoñi casticskatz pecatuča.

⁷ Nii Lisias cjita comandantizti fuerzižcu wejtnacaquiz mitissiča. Tama zultatunacžtan tii kjañchiča.

⁸ Nekztanaqui nii comandantiqui wejrnacqui tii žoñž uj tjeezjapa tekzi am yujcquiz tjonkatča. Jazic amza tii pewczna. Jalla nekztanaqui tiižquiztanpacha zizaquiča wejrnaca ultim werara chiichinča, wejtnacaž tjojunta uj puntuquiztan zumpacha zizaquiča. Tii žoñiqui walja ujchizza.

⁹ Nii žejlñi judío žoñinacaqui cjichizakazza:

—Tiiž chiita takunaca werarača.

¹⁰ Nekztanaqui nii chawc jiliriqúi kjara waytižcu Pablo chiikatchiča. Jalla nuž cjen Pablo paljaychiča, tuž cjican:

—Nuc ažk wata tekz tii nacionquiz amqui jiliri tsijtsamča. Jaziquiz wejrqui ancha cuntintuča am yujcquiz tjurt'izjapaqui wejt puntuquiztan.

¹¹ Ampacham wejt puntuquiztan averiguasača. Tuncapan tjuñikaz weriž iran-tisquitaqui, nii Jerusalén wajtquin Yoozquin sirwizjapa tjonchintača.

¹² Anaž jec žoñimi wejr žoñžtan ch'assñi cherchiqui, nižaza wejrqui ana žoñinaca aptjapchinča, Jerusalén wajtquizimi.

¹³ Tii wejt quintra žoñinacaqui anaž čjul ujmi amquiz tjeezñi atča.

¹⁴ Jalla tiiča ultim weraraqui. Wejrqui wejtnac ejpnacž Yoozpacha sirwuča Yooziž tjeežta kamaña jaru. Jalla nii Yooz kamañaqui yekjaž t'aka cjiča tinacaqui. Nižaza wejrqui criyuča tjapa Moisés cijirta liimi, nižaza tjapa profetž cijirta Yooz takunacami.

¹⁵ Nižaza criyuča Yoozqui ticziquiztan jacatatskataquiča zuma kamñi žoñimi ana zuma kamñi žoñimi. Jalla nii jacatatz tjuñi tjewznuča, tinacami nižazakaž tjewža.

¹⁶ Jalla nuž tjewžcan, Yooz yujcquizimi žoñž yujcquizimi wejt kuz zuma iwjt'ican persunpacha cwitasuča, ana ujchiz cjisjapa.

¹⁷ Tsjii kjaž watanaca yekja nacionaran wejr cjklayžquichinča. Jalla nuž ojklayžcu wejrqui wejt persun yoka quejpchinča, limosnamí ofrendanacami timpluquin uchjapa.

¹⁸ Jalla nuž paan, tsjii kjaž Asia provinciaquiztan tjonchi judionacaqui wejttan zalchiča. Timpluquin žejlchinča judiož cuzturumpi jaru paacan. Timpluquin žoñinacaqui anatača wacchi, nižaza anatača čjulumi aptazzi.

¹⁹ Jalla nii Asiaquiztan tjonchi judionacaqui jalla ninacžla tekziqui am yujcquiz prisintisquizlani wejt quintraqui, čhjul uj paatučhaja, jalla nii. Ninacaqui tsjii uj tjeeznačhaj niiqui, tekz am yujcquiz tjeezla.

²⁰ Jalla nii ana atchucažlaj niiqui, tii žejlñi žoñinacaj weriž paata uj kjanacama chiilalla. Wejr judío jilirinacž yujcquiz želan, uj paachinžlaj niiqui kjanaj chiilalla.

²¹ Judío jilirinacž yujcquiz žejlcan, tiikaz altu joržtan čhiichinča: “Ticziquiztan jacatatž tjuñi tjewznuča. Jalla nižtiquiztan tonj ančhucqui wejr jusjiča”. Jalla niikazza weriž čhiitaqui. —Nuž cjican Pabluqui čhiichiča.

²² Jalla nuž nonžcu, Félix chawc jiliriqiu nii cjetžta audiencia nužquiz suspintiskatchiča. Nii jiliriqiu Yooz jicz puntuquiztan zuma zizziča. Jalla nižtiquiztan Pabluž quintra žoñinacžquiziqui ana juyzu paachiča. Nekztan cjichiča:

—Čhjlorat Lisias comandante tjonačhaja, jalla nekztanž tii ančuca quijaqui wilta atintita cjequiča. Nii nooj azquitžta cjequiča.

²³ Nekztanaqui Félix chawc jiliriqiu teniente capitanžquin mantichiča Pablo tira kjuyquiz chawjcta cwitajo. Pero Pabluž amigonacžquiz permiso tjaachiča, Pablo atintizjapa.

²⁴ Tsjii kjaž majquiztan Félix chawc jiliriqiu Drusila cjiti tjunatan tjonžquichiča Pabluž taku nonzjapa. Jalla naaqui judioquiztan žontača. Nekztanaqui Pablo kjawžñi mantichiča. Niiž yujcquiz prisintižcu, Pabluqui Jesucristužquin kuzziz puntuquiztan paljaychiča.

²⁵ Nii jiliriž nonznan, Pabluqui parličiča tii čhjep puntuquiztan: Yooz zuma kamaña puntuquiztan, nižaza persun kuz zuma irpiz puntuquiztan, nižaza Yooz casticz tjuñi puntuquiztan. Jalla nii parlita nonžcu Félix chawc jiliriqiu muzpa tsucchiča. Nekztanaqui cjichiča:

—Oka amqui. Wejttaž timpu želan, wilta am kjawznača.

²⁶ Félix chawc jiliriqiu “paaz pac jaa” cjican jalla nuž Pablužquiztan pecatča. Paaz pactiquiztan Pabluqui cuchtaž cjitasatča. Jalla nižtiquiztan nii jiliriqiu kjaž wilta Pablo kjaw kjawatča, “Cunamiž paaz pacasa jaa” cjican. Pablo kjawžcu, nižtan parličiča.

²⁷ Félix jiliriqiu judionacž kuz wali cjiskats pecatča. Jalla nižtiquiztan Pablo preso ecchiča. Pizc wata nuž watchiča. Jalla nekztanaqui Félix chawc jiliriqiu niž puestuquiztan ulanchiča. Nii puestuquiz tsjiizuñ luzziča, Porcio Festo cjita tjuuchiztača.

25

PABLUQUI FESTUZ YUJCQUIZ PRISINTICHICA

¹ Festuqui chawc jilirž puestuquiz luzcu, niž čhjep majquiztan Cesarea wajtquiztan Jerusalén watja ojkchiča.

² Jalla nicju simplu chawc jilirinacami walja acha wajt jilirinacami, jalla ninacaqui Pabluž quintra quijchiča.

³ Nižaza rocchiča:

—Tsjii favora paalla —cjican. —Tii Jerusalén watja Pablo cuchanžcalla.

Nii oraqui ninacž kuzquiz pinsichiča, Pablo jiczquiz tjonan conzjapa.

⁴ Nekztanaqui Festo chawc jiliriqiu kjaaziča, tuž cjican:

—Pabluqui Cesarea wajtquin preso žejlča. Tsjii kjaž majquiztan wejrpachal quepača nicju.

⁵ Jaziqui ančuca jilirinacaqui wejttan chica Cesarea ojkla. Jalla nicju nii žoñiqui ujchizpanžlaj niiqui, jalla niž uj tjeezpanikazza ančhucalaqui.

⁶ Nii Festo jiliriqiu quinsakal tjuñizlaj už tunca tjuñizlaj, jalla nuž žejlchiča Jerusalén wajtquiz. Jalla nekztanaqui Cesarea watja quejpchiča. Niiž jaka tažuqui niž jusjiz ofcinquiz luzziča. Jalla nekztan Pablo zjijcajo mantichiča.

⁷ Pablo zijctiquiztan Jerusalén wajtquiztan tjonchi judionacaqui jusjiz oficinquiz luzzizakazza. Pabluž muytata tsijtsu, wali chawc ujnaca tjojtunchičha. Pero ana čjul uj tjeezñi atchičha.

⁸ Jalla nekztanaqui Pabluqui persuna tjurt'ican takunaca chiichičha, tuž cjican:

—Wejrqui ana čjul ujmi paachinpančha, ana judionacž lii quintrami, nižaza ana timplu quintrami, nižaza ana roman chawc jilirž quintrami. Anapan uj paachinčha.

⁹ Nekztanaqui Festo jiliri qui judionacž kuz wali cjiskatzjapa tsjii favora paaz pecatčha. Jalla nižtiquiztan Pablužquiz pewczičha, tuž cjican:

—¿Jerusalén watjam okasaya? Jalla nicju am quintra quijta puntuquiztan atintasačha.

¹⁰ Jalla nižtiquiztan Pabluqui kjaazičha, tuž cjican:

—Roman chawc jilirž jusjiz oficinquiz želučha. Tekzpacha wejrqui jusjita cjistančha. Amqui zumpacham zizza wejt puntuquiztan. Wejrqui ana čjul ujmi paachinčha tii judionacž quintrami.

¹¹ Jaziqui wejrqui ujchizpančhalaj niiqui, casticta cjis anal jiwjatučha. Nižaza uj paachiž cjen ticz waquizičhaj niiqui, ticzmi anal jiwjatučha. Pero wejt quintra tjojtunta ujnacami ultimu ana tjezkattačha. Nižtiquiztan anaž nii judionacž kjarquiz wejr intirjita cjesačha. Jaziqui roman chawc jiliržquinpan watz mayučha wejt puntuquiztan zumpacha arreglita cjisjapa.

¹² Jalla nekztanaqui Festo jiliri qui niiz tantiiñinacžtan palt'ichičha. Jalla nuž palt'ižcu, Pablužquiz chiichičha, tuž cjican:

—Amqui roman chawc jiliržquin watz maychamčha. Jaziqui jalla nii jiliržquinpanikam watačhani.

PABLUQUI AGRIPZ YUJCQUIZ PRISINTICHICHA

¹³ Jalla tsjii kjaž majquiztan tsjii Agripa cjita chawc jiliri qui Cesarea watja tjonchičha Berenice cjiti tjunatan. Jalla ninacaqui tjonchičha Festo tsaanzjapa.

¹⁴ Jalla nicju tsjii kjaž maj kaman Festo jiliri qui ninacžquiz quint'ichičha Pabluž puntuquiztan, tuž cjican:

—Tekz tsjii pres zoñi žejlčha, Félix jiliržquiztanpacha.

¹⁵ Wejrqui Jerusalén wajtquiz želan, timplu jilirinacami wajt jilirinacami jalla ninacaqui tii zoñž quintra quijchičha. Ninacaqui wejtquiz tii zoñi conkatz pecatčha.

¹⁶ Jalla nižtiquiztan wejrqui kjaazinčha tuž cjican: “Romanž liiqui tuž cjičha: Quijta zoñžtan quijñi zoñžtan pucultan declarskatzpanikazza, čjulut watčhaja, jalla nii. Nekztan nii quijta zoñiqui persun takunacžtan tjurt'asačha werarquiztanaqui. Nekztan chawc ujchizlaj niiqui, contaž cjesačha”.

¹⁷ Jalla nižtiquiztan ninacaž tiwc tjonchiž cjen, ana timpu pertižcu, niiz jaka tažuqui quija atintichinčha wejt jusjiz oficinquiz. Nii quijta zoñi zijcajo mantižcu zuma atintichinčha.

¹⁸ Nii quijñi zoñinacaqui prisintichizakazza. Wejrqui pinsichintačha, ninacac chawc ujpnan nii zoñžquiz tjeeznaa, cjican. Ultimu ninacazti ana čjul chawc ujmi tjeezkati atchičha.

¹⁹ Nii zoñž quintra chiichičha religiön puntuquiztankaz. Tsjii Jesusa cjita zoñiqui ticzičha. Pabluzti “Zejtčha niiqui” cjiñitakalčha.

²⁰ Wejrqui nižta quija atintizjapa anal zuma zizatučha. Jalla nižtiquiztan Pablužquiz pewczinčha, tuž cjican: “¿Jerusalén watja okasay? Jalla nicju tii am quintra quij puntuquiztan atintasačha”. Jalla nuž chiichinčha wejrqui.

²¹ Jalla nekztanaqui niiqui maychičha roman chawc jiliržquin watzjapa. Jalla nižtiquiztan Augusto cjita chawc jiliržquin watajo mantichinčha. Nižaza tirapan preso želajo mantichinčha, čjulorat chawc jiliržquin mantichuca cječhaja, jalla niicama.

²² Jalla nekztanaqui Agripa jiliri qui Festo jiliržquiz cjichičha:

—Wejrzakal nii zoñž razuna nonz pecučha.

Festo jiliriq̄i kjaaziĉha, tuŝ cjican:

—Jakapacham nonznaquiĉha.

²³ Niiŝ jaka taŝuq̄i Agripa cjita jiliriq̄i Berenice cjiti tjunatan pajk audiencia kjuyquin luzquichiĉha, ancha zuma honorchiz. Zultatŝ jilirinacŝtanami wajt jilirinacŝtanami luzzizakazza. Nekztanaq̄i Festo jiliriq̄i Pablo zjijcajo mantichiĉha.

²⁴ Pablo zjijctiquiztan Festo jiliriq̄i tuŝ paljaychiĉha:

—Agripa chawc jiliri, niŝaza tekz ajczi zuma ŝoŝinaca. Tekziĉha tii ŝoŝiq̄i. Walja judionacaq̄i tii ŝoŝŝ quintra chiichiĉha Jerusalén wajtquinami tii Cesarea wajtquizimi. Jalla ninacaq̄i wejr rocrocchiĉha tii ŝoŝi conzjapa, “Tii ŝoŝiq̄i ana ŝejtz waquiziĉha” cjican.

²⁵ Wejrpacha tii zuma pewcpewcŝcu, anapan ĉhjul uj waĉhi atchinĉha, ticzkatajo. Niŝaza tiq̄i roman chawc jilirŝquin watz maychiĉha jusjita cjeyajo. Jalla nuŝ maytiquiztan tantiiŝcu, watajo mantichinĉha.

²⁶ Wejrqi roman chawc jilirŝquin ĉhjul puntut tii ŝoŝŝ puntuquiztanaq̄i cijiras? Anal zizuĉha. Jalla niŝtiquiztan am yujcquiz prisintiskatuĉha, seŝor Agripa, wejt chawc jiliri. Niŝaza tjapa anĉucaquiz prisintiskatuĉha. Jaziq̄i anĉucqui tii ŝoŝi zumpachaŝ pewcŝina. Nekztan wejrqi aptaĉhani ĉhjul puntut cijiras, nii.

²⁷ Tii pres ŝoŝŝ quintra puntuquiztan kjanapacha cijrz waquiziĉha. Ana niŝta cijraq̄iŝ niq̄i, anapal cuchŝi atasacĉha. —Jalla nuŝ paljaychiĉha Festo jiliriq̄i.

26

PABLUQUI TJURT'INŝI TAKUNACA WILTA CHIICHICHA

¹ Jalla nekztanaq̄i Agripa jiliriq̄i Pabluŝquiz tuŝ cjichiĉha:

—Amq̄i am persunquiztan zuma tjurt'iz taku chiya.

Jalla nekztanaq̄i Pabluq̄i kjara chjinŝcu paljayi kallantichiĉha, tuŝ cjican:

² —Excelentísimo Agripa, chawc jiliri, ancha cuntintuĉha wejrqi, am yujcquiz wejt puntunaca werera chiizjapa. Judio ŝoŝinacaq̄i wejt quintra ujnaca tjojtunchiĉha. Jakniŝlaj nii werera chiyasaĉha.

³ Amq̄i tjappacha uĉhum judionacŝ cuzturumpinaca zumam zizza. Niŝaza uĉhumpora ĉhjul puntu ch'aasaj, nii ch'aastanacami zizza amq̄i. Jalla niŝtiquiztanaq̄i wejrqi ancha cuntintuĉha, am yujcquiz tjurt'izjapaq̄i. Zuma pasinsistanŝ nonŝnalla.

⁴ Tjapa judionacaq̄i weriŝ kamta zizza. Wejt yokquiz ojklaytami niŝaza Jerusalén wajtquiz ojklaytami jaknuŝ ocjalquiztanpacha kamiŝtaŝlaja, nii zizza tjapa judionacaq̄i. Ninacŝtan kamiŝtaĉha.

⁵ Tjowanstiquiztanpacha fariseo t'akquiz ŝejlchinĉha. Nii fariseo t'akaq̄i uĉhum judionacŝ lii jarupan walja estricto kamŝiĉha yekja judionacŝ t'akanacquiztan cjenami. Jalla nii aŝktan zizza nii wejt quintra judionacaq̄i. Jaziq̄i ninacakaj declarla, declarz pecĉhaj niq̄i.

⁶ Tuquiq̄i Yoozq̄i uĉhum tuq̄ita ejpnacŝquiz taku ecchiĉha, ticziquiztan jacatatz puntu, jalla nii. Jalla nii jacatatzpan tjewznuĉha. Jalla nuŝ weriŝ tjewztiquiztan, judionacaq̄i wejt quintra quijchiĉha.

⁷ Pero Israel wajtquiziqui wejtnac tuncapan t'akanacaq̄i Yooziŝ ecta taku cumplis zakaz tjewŝa. Jalla niŝtiquiztan Yoozquin rispitiŝiĉha, niŝaza majiŝami weenami niŝquin sirwiĉha. Wejt chawc jiliri, jalla niipan tjewzŝiŝ cjen judionacaq̄i wejt quintra tjojktichiĉha.

⁸ Anĉucmi zakaz criiĉhani, Yoozq̄i ticziquiztan ŝoŝinaca jacatatzquichiĉha, nii.

⁹ Tuquiq̄i wejrqi pinsiŝtaĉha, nii Nazaret wajtchiz Jesusiŝquin criichi ŝoŝinacŝ quintra ĉhjul anawalinacami paaz waquiziĉha.

¹⁰ Jalla nuž wejrqui criichinacž quintra anawalinaca paachinča Jerusalén wajtquin. Učhum timplu jilirinacž mantita jaru walja criichinaca carsilquiz chawjcskatchinča. Nižaza criichinaca conajo, wejr zakal taku utchinča.

¹¹ Nižaza kjaž wilta criichi žoñinaca sufriskatchinča, Jesucristuž quintra chiikatzjapa, nižaza Jesucristužquiztan quejpskatzjapa. Wejrqui nižtapacha paachinča judionacž ajcz kjuyquizimi. Nižaza walja žawjwiñtača nii criichinacž kjutñi. Jalla nuž žawjžcu wejrqui criichinaca tani ojklayiñtača yekja watjaranami.

¹² Jalla nijapa Damasco watja ojckchinča, timplu chawc jilirinacž mantita jaru. Nižaza ninacaqui wejtquiz carta credencial tjaachiča, nii criichi žoñinaca tanzjapa.

¹³ Jiczquiz okan, tappur ora tiripintit arajpachquiztan tsjii wali pajk ispijužtakaz kjanžquichiča, tjuñ siiquiztan juc'anti. Wejt muytatami wejt cumpant'iñi žoñinacž muytatami kjančiča.

¹⁴ Niiž cjen, wejrnacqui yokquiz tsucaña tjojtsinča. Nekztanaqui wejrqui tsjii jora nonzinča. Hebreo tawkquiztan wejtquiz paljayžquichiča, tuž cjican: “Saulo, Saulo, ¿kjažtiquiztan am wejt quintramjo? Ampacha persun quintra paača. Tsjii wacaqui ar parž quintra llawkžcu, persun janchiž quintra paača, jalla nižta irata am persun quintra paača”. Jalla nuž paljayžquichiča nii tsewctan chiiñi joraqui.

¹⁵ Nekztanaqui wejrqui pewczinča, tuž cjican: “Wejt Jiliri, ¿ject amya?” Nekztan Yooz Jiliriqui wejtquiz cjichiča: “Wejrtča Jesusitqui. Amqui wejt quintram paača. Wejrtča niitqui.

¹⁶ Zaažna. Tsijtsna. Amqui wejr sirwaquiča. Nižaza tii amiž chertanacami declaraquiča muzpa žoñinacžquiziqui. Wiruñaquei iyam cheraquiča wejt puntuquiztan. Jalla nekztan tjapa wejt puntuquiztan parlaquiča. Jalla nižtajapa am illzinča. Jalla nuž cjen amquiz pariscuča.

¹⁷ Jaziqui am cuchnača ana judío žoñinacžquin wejt puntuquiztan parližcajo. Nekztanaqui amiž parlan, wejrqui am cwitača, judionacžquiztanami, nižaza nacjuñta žoñinacžquiztanami.

¹⁸ Nacjuñta žoñinacžquiz am cuchnača, wejt puntuquiztan parlajo. Jalla nuž amiž parlitiquiztan nii žoñinacž kuzqui cjetžintaž cjequiča wejt puntu intintazajo, nižaza ana zumchiquiz kamajo, antiz zuma kamañquiz kamzjapa. Nižaza amiž parlitiquiztan ninacaqui liwriita cjequiča, Satanás cjita diabluž mantita jaru ana ojklajajo, antiz Yooz mantita jaru ojklajajo. Nižaza wejtquin criyaquiča, ninacž ujnaca pertunta cjisjapa, nižaza Yooz kamaña tanzjapa parti Yooz illzta žoñinacžtan”.

¹⁹ Nekztanaqui, Agripa chawc jiliri, nii arajpachquiztan paljayta takunaca catokchinča, nii jaru kamzjapa.

²⁰ Primiraqui Damasco wajtquin žejlñi žoñinacžquiz liwriiñi Yooz taku parli kallantichinča. Nekztanaqui Jerusalén wajtquin nii Yooz taku parlichinzakazza. Niiž jaru Judea yokaran parlichinča. Niiž jaru nacjuñta žoñinacžquin Yooz taku parlichinča. Judío žoñinacžquizimi ana judío žoñinacžquizimi tjappachquiz parlichinča, ninacž kuznaca campiyajo, Yooz sirwiz quejpnajajo, nižaza Yoozquin quejptiquiztan zuma kamaña tjeežnajo.

²¹ Jalla nižta Yooz takunaca parlitiquiztan judío žoñinacaqui wejr preso tanchiča timpluquiz, wejr conajo.

²² Anzcama Yoozqui wejr yanapča. Jalla nižtiquiztan wejrqui tjurt'iñi kuzziz tii zuma Yooz taku parluča humilde žoñinacžquizimi pajk jilirinacžquizimi. Tuquitan Yooz taku parliñi profetž chiita tawk jaru nižaza Moisés chiita tawk jaru, jalla niicama parluča. Jalla ninacaqui mazinčiča, tuž cjican:

²³ “Cristuqui sufristanča ticzcama. Nekztan ticziquiztan jacatatstanča. Jalla niiqui primer ticziquiztan jacatatchi žoñiča. Jalla nii Jesucristuž cjen tii zuma liwriiñi Yooz takuqui parlitapantača učhum wajtchiz žoñinacžquizimi yekja wajtchiz

žoñinacžquizimi”. Jalla nii liwriiñi taku zaka wejr parluča.

PABLUQUI AGRIPZQUIZ CHIIZINCHICHA

²⁴ Pablo jalla nuž tjurt'iñi taku paljayan, Festo jiliriqui altu tawkžtan cjichiča:

—Pablo, ¡lucuratažtakazza amqui! Zmali istutiižcu, jalla nižtiquiztan lucurata cjis-samčhalani amqui.

²⁵ Pabluqui kjaaziča, tuz cjican:

—Festo, zuma chawc jiliri. ¡Wejrqui anača lucuratqui! Antiz weriž paljayta taku-nacača razunaqui, nižaza werarača.

²⁶ Tekzimi Agripa chawc jilirimi žejlča. Niimi zumaž tii puntuquiztan zizza. Jalla nižtiquiztan wejrqui tjup kuztan tiž yujcquiz chiižinuča. Tii Agripa chawc jiliriqui tjapa weriž paljayta puntunacaqui zizzipanča. Nižaza tii puntunacaqui watchiča tjapa žoñinacaž zizan, anača tsjii chjožzak watchi quintu.

²⁷ Señor Agripa, chawc jiliri, ¿profetaž parlita takum criya? Amqui criiž caa kal cjiwchiya.

²⁸ Agripa chawc jiliriqui Pablužquiz kjaaziča, tuž cjican:

—¿Tsji koluc takunacžtankam wejr cristiano cjiskatz pecya?

²⁹ Nekztanaqui Pabluqui cjichiča:

—Tsji kjaž takunacžtan už wacchi takunacžtan wejrqui ančhuc tuž cristiano cjiskatz pecuča. Ammi nižaza tjapa tonj nonžñi žoñinacami wejr irataj cjisla. Jalla nuž Yooz munañpaj cjeequi. Wejr irata Yoozquin criichej cjisla, pero ana tižta carinžtan mokta.

³⁰ Jalla nuž Pabluž chiitan, tjappacha nii julzi žejlñi jilirinacaqui tsijtsiča, Agripa chawc jilirimi, nižaza Festo jilirimi, nižaza Berenice cjiti tjunmi.

³¹ Nekztanaqui ninacaqui Pabluž puntuquiztan parlizjapa tsjiu latu ojkchiča ninac-cama palt'i. Jalla nekztanaqui ninaccama kazziča:

—Tii žoñiqui ana čjul ujmi paachiča, konkatajo. Anaž conta cjesača. Nižaza anaž carsilquizimi chawjcta cjesača.

³² Nižaza Agripa chawc jiliriqui Festo jiliržquiz cjichiča:

—Tii žoñiqui ana roman jiliržquin watz maytasaž niiqui, cutztaž cjitasacha.

27

PABLUZ QUIJAQUI ROMA TJATZTACHA

¹ Jalla nekztanaqui nii jilirinacaqui tantiichiča, Pabluž quija roman chawc jiliržquin tjatzjapa. Jalla nižtiquiztan Pablumi parti presonacami intirjitatača tsjiu Julio cjita capitanžquiz, Italia watja chjitzjapa. Nii capitanaqui Augusto cjita batalionquiztan jiliritača. Wejrqui Pablužquiz cumpant'ichinča.

² Adramitio cjita wajtquiz tsjiu warcu želatča. Nii oraqui nii warcuqui ojkz-pachatača Asia kjutñi. Jalla nuž cjen nii warcuquiz luzzinča. Nižaza wejtnacatan Aristarco cjita žoñitača. Niiqui Tesalónica wajtchiz žoñitača. Tesalónica watjaqui Macedonia yokquintača.

³ Jaka tažuqui Sidón cjita wajtquin irantichinča. Jalla nicju Julio capitanaqui Pablužquiz tsjiu favora paachiča, Pablužquiz permiso tjaachiča niž mazinacžquin tjonznajo atintita cjisjapa.

⁴ Nekztanaqui Sidón wajtquiztan ulanžcu Chipre cjita zkolta yoka watchinča. Zkar latu watchinča tjamiž cjen.

⁵ Jalla nekztanaqui Cilicia nižaza Panfiliaž niž waruñ chawc kota kajkchinča Mira cjita watjacama. Mira watjaqui Licia cjita yokquintača.

⁶ Jalla nicju zultatž capitanaqui tsjiu Italia ojkñi warcu zalchiča. Nii warcuqui Alejandría wajtquiztan ulnatča. Jalla nii warcuquiz capitanaqui wejrnac luzkatchiča tira ojkzjapa.

⁷ Nekztanaqui tsjii kjaž maj ojkchinča zumat. Ancha tjamiž cjen ch'aman irantichinča Gnido cjita yokž wartuñtan žcati. Nižaza nii ancha tjamiž cjen Salmón cjita yok žcati watchinča. Nekztanaqui Creta yok žcati irantican tajachuc muytižcu ojkchinča.

⁸ Tjamiž cjen, ch'aman ojkcan Creta cjita yok žcati ojkchinča. Nižtami wejrnacqui irantichinča Buenos Puertos cjita watja, Lasea wajtž žcati.

⁹ Jalla nicju irantizjapaqui walja timpuqui pertitača. Auti timpu irantisquiz cjen, tjamiqui tirapan tjamchiča. Jalla nižtiquiztan anawalitača chawc kotquiz ojkzqui. Jalla nižtiquiztan Pabluqui chižinchiča,

¹⁰ tuž cjican:

—Jilanaca, wilta ojkzqui anawaliž cjequiča. Warcumi cargami pertisnačhani nižaza učummiž ticznasača.

¹¹ Nii zultatž capitanazti Pabluž chiita ana cazziča. Warcuchiz tuyñumi, nižaza warcuž capitanami, jalla ninacž takukaz nonziča.

¹² Nii wajtquiz auti timpu watzjapa, warcužtaqui anatača cuza. Jalla nižtiquiztan jos tjappacha ninacaqui pinsatča nawjctan ojkz tsjan cusa, nii. Fenice cjita wajtquin irantis pecatča jaknužumi. Fenice watjaqui Creta yokquinzakaztača. Nii wajtquiztan cheržtaqui pajk kota tjenča warutuñtan, užatuñtan. Jalla nicjuñtača waliqui auti timpu watzqui.

PAJK KOTQUIZ ANAWALI WATCHICHA

¹³ Jalla nekztanaqui warutan zuma queržcan ninacaqui pinsichiča, tira ojkzjapa. Jalla nekztan ninacaqui zarakchiča. Creta yok tjiyaranpan ojkchiča.

¹⁴ Tsjii kjaž majquiztan tsjii walja pjursanti tjamiqui tjonchiča užatan tuwantan cheechi.

¹⁵ Nekztanaqui tjamiqui warcu chjitchiča chawc kot mor kjutñi. Tjamž kjutñiqui anataž wira ojkchuca. Jalla nižtiquiztan jakzichuckat tjamiqui učum chjichačhani, jalla nicjupankaz okačhani.

¹⁶ Jalla nekztanaqui Clauda cjita kolta yokž waruñ watchinča. Jalla nicjuñ watan tjamiqui anatača ancha pjursanti. Tsjii kolta warcuqui pajk warcuž wirquiz mojkžtatača. Ana ancha tjamiž cjen nii kolta warcuqui pajk warcuquiz tewziča ch'aman.

¹⁷ Jalla nuž tewžcu, nii pajk warcu kojchnacžtan zumpacha t'ejžtatača, ana cjac-snajo. Jalla niiran yok pjila želatča Sirte cjita. Tjamiž cjen nii yok pjilquiz julz eksnatča. Jalla nižtiquiztan nii pajk pañuz cherchi pajk tultu apakchiča warcu tsewtan. Nekztanaqui tjamžquiz warcu chjitskatchiča.

¹⁸ Niiž jaka tažuqui nii tjam queraqui tira walja pjursantitača. Jalla nižtiquiztan nii warcuquiz žejlñi kuzinacaqui pajk kotquiz tjojtatača.

¹⁹ Jalla niipa tažuqui warcuž cusasanaca kot kjazquiz tjojtchinča wejtnaca kjaržtan.

²⁰ Tsjii kjaž majquiztan ancha ch'orawitača. Jalla nuž ch'orawiž cjen anaž tjuñimi warawarami tjenatča. Nižaza nuž ch'orawiž cjen wejrnacqui “Ticznachani. Anaž jaknužumi liwriyasača”, nuž cjican chiichinča.

²¹ Tsjii kjaž maj ana čhjeri lujlchi cjen Pabluqui ninacž tayıquiz tsijtsiča, tuž cjican:

—Jilanaca, anatača učumqui Cretquiztan ulansquiz, wejt taku cazpantača ančucalaqui. Nižaza anaž carginacami pertitasača, nižaza učumqui anaž tižta sufritasača.

²² Anziqui ančucqui tjup kuzziz cjisna, anača llaquiza. Tii warcuž katanami, anaž jakziltami ticznaquiča.

²³ Wejrqui Yooz sirwuča, nižaza Yooz partitča. Zez ween Yoozqui tsjii anjila wejtquiz cuchanžquichiča. Nii anjilaqui wejtquiz jeczquichiča,

²⁴ tuž cjican: “Pablo, ana eksna amqui. Roman chawc jilirž yujcquiz prisintistanča amqui. Jaziqi amiž cjen tjapa amtan chica ojkñi žoñinaca žetaquiča”.

²⁵ Jilanaca, anača llaquiza. Wejrqui Yoozquin tjapa kuztanča. Jaknuž nii anjilaqui chiitčaja, jalla niicamaž cumplisnaquiča.

²⁶ Kot taypiquiz tsjii kolta yoka žejlča. Jalla nii yoka irantiž cjen warcuqui yokquiz čjakžcu, tsijtsnaquiča kjazquizpacha. —Jalla nuž paljaychiča Pabluqui.

²⁷ Jalla nekztanaqui pizc simana ojktiquiztan, Adria cjita kot kjazquiz želan, tjamiqui warcu chjichatča. Jalla nii ween čica arama warcu joojooñinacaqui pinsichiča, yokquin irantičhani, cjican.

²⁸ Jalla nižtiquiztan kjazquiztan kozzuc yokquin tupžcu, zizziča quinsa tunc sojtan metro. Nižaza tsjii kjažtapacha ojžcu wilta tupzizakazza. Jalla nuž tupžcu, zizziča paatunc pakallakun metro.

²⁹ Kjaz kostan maz akji želačhani cjican pinsichiča. Nekztan warcu wirquiztan tsjii pajkpic pajk jirunaca quijsiča ana nii maz ajkquin čjakajo. Ekscan tjuñi tjewks tjewznatča.

³⁰ Jalla nuž tjewžcan, nii warcu joojooñinacaqui pinsichiča, warcuquiztan atipasjapa. Jalla nuž pinsižcu, nii tewžta kolta warcu kjazquiz chjijwnatča. Jalla nuž chjijuncan nii pajk jirunaca quijtžtažokaž cjetča nii warcuž yujcquiztan.

³¹ Jalla nuž cheržcu, Pabluqui zultatž capitanžquiz paljaychiča nižaza zultatunacžquizimi, tuž cjican:

—Nii warcu joojooñinacaqui ana tii warcuquiz eclaquiž niiqui, ančhucqui ticznasača.

³² Nuž nonžcuqui zultatunacaqui nii kolta warcu mojka kojchnaca pootžinchiča kolta warcu kjazquin tjojtsnajo.

³³ Jalla nii kjantati Pabluqui taku tjaachiča čhjeri lulajo, tuž cjican:

—Pizc simana tjontača ančhucmi kuz turwayzi ana tjajchi nižaza ana lujlchi.

³⁴ Nižtiquiztan ančhucqui čjulullamekaz lujlnalla, azi tanzjapa. Anaž jecmi wira apt'isnasača. Nižaza ana zinta čhjojrichta cjequiča.

³⁵ Jalla nuž chiižcu Pabluqui tsjii t'anta tanziča. Nižaza Yooz Ejpžquin sparaquiž cjichiča tjapa nii žejlñi žoñinacž yujcquiz. Jalla nekztanaqui nii t'anta kjolžcu lujlchiča.

³⁶ Jalla nižtiquiztan tjapa nii žoñinacaqui lujlsquin kuzziz cjissiča. Nekztan lujlchizakazza.

³⁷ Nii warcuquiz paa patac pakallawk tunca sojtan žoñinacatača.

³⁸ Jaknužt zapa mayni pecčhaja jalla nuž lujlchiča. Jalla nuž lujlžcu nii parti trig kuzinaca kjaz kotquin tjojtchiča nii warcu cježu cjeyajo.

WARCU KJAZQUIZ KATCHIČA

³⁹ Tjuñi tjewktanalla, warcu joojooñinacaqui nii yoka cheržcu ana pajatča. Pero tsjii puj atquin pjila iñžta k'ar yoka želatča. Nii yokquin warcu tsijtskatz pecatča.

⁴⁰ Jalla nekztanaqui nii pajk quijtžta jirunacžquiz mojka kojchmi pootchiča. Kjazquizpacha cutziča. Nižaza kochnaca jweržcu, warcu irpiñi maderanaca cutsiča. Nekztan pajk tultu, warcu juntuñ tucquin tsijjsiča tjami tanzjapa. Jalla nižtiquiztan warcuqui puju iñžta yoka žcatžinchiča.

⁴¹ Jalla nuž žcatžincan, pizc curinti ojknī kjaz jalla nekz cjissiča. Jalla nižtiquiztan nii warcuqui kjaz koztan yokquiz quijsiča. Warcu tucquiztanaqui pjilquiz luzzitača. Ana jaknužquin kissiča. Nižaza warcu wirquiztanaqui kjaz ljojkičaž warcu kjolatča.

⁴² Jalla nuž cjen preso itzñi zultatunacaqui preso žoñinaca konz pecatča, ana atipskatzjapa kjazquiz narcen.

⁴³ Zultatž capitanazti Pablo liwriiz pecatča. Jalla nižtiquiztan presonaca conawc cjen atajichiča. Nekztan mantichiča, tuž cjican:

—Kjazquiz narñi zizñi žoñinaca, ančhucqui primiraqui kjazquiz luzna, yokquin iran-tizjapa.

⁴⁴ Parti zoñinaca, ančhucqui tabla tanžcu kjazquiz zakaz luzna. —Jalla nuž mantichiča nii capitanaqui.

Jalla nuž tjappacha yokquin irantichiča. Ana zinta ticziča.

28

PABLUZ MALTA YOKQUIN KAMTA

¹ Jalla nuž yokquin ulanžcu, nii kolta yokž tjuu zizzinča Malta cjitatakalča.

² Jalla nii yokquin žejlñi zoñinacaqui wejrnaca ancha wali atintichiča. Nižaza tsjii pajk uj taazinchiča wejrnac kutnajo. Chijniž cjen zaquiž cjen wejtnacaltajapa uj taazinchiča.

³ Nekztanaqui Pabluqui kjoñ žup aptichiča. Nii žup ujquin tjojtan, tsjii zkoraqui uj kjakiž cjen ulanžquichiča Pabluž kjarquin ch'atzi chejchipacha.

⁴ Jalla nuž cheržcu nii yokchiz zoñinacaqui tuž cjeysiča:

—Tii zoñiqui zoñi conñizlani. Kot kjazquiztan liwriitaž cjenami Yoozqui anat munčani, tiž žejtzi.

⁵ Pabluqui kjarquiztan zkora tsajtsajtsiča ujquiz. Zkoraž ch'attaž cjenami anapan kjaž cjissiča Pabluqui.

⁶ Tjapa nii zoñinacaqui Pabluž kjarat tjuwačhani cjican chekznatča. Nižaza tsjii ratuquiztan ticzit cjee tiiqui, jalla nuž pinsatča nii zoñinacaqui. Jalla nuž ažk tjewžcu, Pablo ana kjaž cjissi cherziča. Jalla nižtiquiztan pinsita campiižcu, nii zoñinacaqui cjichiča:

—Tii Pabluqui cheka Yoozalani —cjican.

⁷ Ulanta yok žcati nii yokchiz jilirž yokanaca želatča. Nii jiliriqi Publio cjitatača. Jalla niiqui wejrnaca zuma risiwchiča. Čjep maj wejrnac zuma atintichiča.

⁸ Publiž ejpqui laa želatča, tsjii ch'ujlñi conžtan, nižaza jawžtan. Pabluqui nižquin tjonžni ojkchiča. Nekztanaqui Pabluqui nii laa zoñža Yoozquin mayizichiča, čjetinzjapa. Nekztanaqui niž juntuñ kjaržtan lanžcu, čjetinchiča.

⁹ Jalla nižtiquiztan parti nii yokquiz žejlñi laanacaqui tjonchizakazza, jalla ninacami čjetintatača.

¹⁰ Nuž čjetintiquiztan nii zoñinacaqui wejtnacquiz walja rispitchiča. Čjep jiižquiztan wilta tsjii warcuquiz luzzinča. Ima nii warcu luzan, nii zoñinacaqui walja zuma žaka cjižinchiča, wejrnaca ojkzjapa.

PABLUQUI ROMA WAJTQUIN IRANTICHICHA

¹¹ Warcuqui nii yokquiz auti timpu watchiča. Alejandría wajtquiztan tjonchitača. Nii warcuž tucquin pizc yooznacchiztača. Cástor y Pólux cjitatača nii pizc yooznacaqui.

¹² Nekztanaqui warcuquiz ojkan, Siracusa wajtquin irantichinča. Jalla nicju čjep maj kamchinča.

¹³ Jalla nekztan warcuquiztan tira ojkchinča. Nekztan yok žcatiran ojkan, Regio cjita wajtquin irantichinča. Niiž jaka tažuqui wartan queržquichiča. Jalla nuž queržcan pucmajquiz irantichinča Puteoli wajtquin.

¹⁴ Jalla nicju tsjii kjažultan Yoozquin criichi jilanacžtan zalchinča. Jalla ninacaqui wejtnacaquiz invitichiča ninacžtan tsjii simana kamajo. Jalla nekztanaqui Roma wajt kjutni zarakchinča.

¹⁵ Roma wajtchiz Yoozquin criichi jilanacaqui wejtnacaž tjonz quintu zizzitakalča. Jalla nekztan wejtnacatan zali ulanžquichiča. Jalla ninacaž nuž zalzquichiquiztan, Pabluqui Yoozquin sparaquiž cjichiča. Nižaza juc'ant tjup kuzziz cjissiča. Wejrnacqui ninacžtan zalchinča Foro de Apio cjita yokquin, nižaza Tres Tabernas cjitazakaztača.

¹⁶ Jalla nekztanaqui Rom watja irantitanaqui nii capitanaqui preso zoñinaca intirjichiča roman zultatž jiliržquiz. Pero nii capitanaqui Pablo kamkatchiča yekquin tsjii guardiñi zultatžtan.

PABLUZ KAMTA ROMA WAJTQUIN

¹⁷ Chjep majquiztan nuž irantižcu, Pabluqui kjawzkatchiča Roma žejlñi judío jilirinaca. Jalla nuž Pablužquin tjontan, Pabluqui ninacžquin paljaychiča, tuž cjican:

—Jilanaca, wejrqui roman zultatžquiz preso intirjitatača Jerusalén wajtquin, ana čhjulumi judionacž quintra paachi cjenami. Nižaza ana čhjulumi učhum tuquita ejpnacž cuzturumpi quintra paachi cjenami.

¹⁸ Wejr zumpacha pecunžcu, ninacaqui wejr cuts pecatča. Wejt quintra ana čhjul ujmi watchiča, wejr conzjapaqui.

¹⁹ Judío partinacazti ana munchiča. Jalla niztiquiztan roman chawc jiliržquin wejt quija tjaznajo maychinča. Jalla nuž cjenami, wejrqui wejt wajtchiz zoñinacž quintra ana čhjul uj tjeeskatz pecuča.

²⁰ Jalla nižtiquiztan ančhuc kjawzkatuča ančuca chertzjapa, nižaza ančhucatan parlizjapa. Učhumqui Israel wajtchiz zoñinacžhumča. Jalla učhumqui Yooziž cuchanžquita zoñi tjewža. Jalla nii tjewžta zoñi sirwiñiž cjen wejrqui tii carinžtan čejlta želuča.

²¹ Jalla nekztanaqui nii judionacaqui cjichiča:

—Wejrnacqui am puntuquiztan ana čhjul cartami risiwchinča Judea wajtquiztan. Nižaza nii nawjctan tjonči judío jilanacami anaž am quintra chiiča.

²² Wejrnacqui amiž pinsita takunaca nonz pecuča. Tjapa wajtquizimi tii ew yekja t'akž quintra chiiča. Jalla nuž zizuča.

²³ Jalla nekztanaqui tsjii tjuñi citčiča. Jalla nii citta tjuñquiziqui walja zoñinacaqui tjonchiča jakziquin Pablo alujassi želatčhaja, jalla nicju. Jalla nuž zoñinacž tjonžcu Pabluqui ninacžquiz paljaychiča wenstanpacha zezicama Yooz mantita kamañ puntuquiztan. Pabluqui ninaca zumpacha intintiskatz pecatča Jesucristuž puntuquiztan. Moisés liiquiztanami nižaza profetanacaž cjiirta liwrunacžquiztanami punta punta chiižinčiča, ninaca zuma intintazajo Jesusiž puntuquiztan.

²⁴ Yekjapanacaqui Pabluž nuž chiita takunaca catokčiča. Yekjapanacazti niž takunaca ana nonziča.

²⁵ Jalla ninacpora Jesucristuž puntuquiztan ch'aascan, nužquiz ninacaqui wichanzi kallantichiča. Ima okan, Pabluqui cjichiča:

—Espíritu Santuqui Isaías cjita profetžquiz paljaychiča učhum tuquita ejpnacžjapa. Ančuca puntuquiztan werarapan chiichiča, tuž cjican:

²⁶ “Oka, tii zoñinacžquiz paljayžca, tuž cjican: Ančhucqui nonžñeeka nonznaquiča, pero ana intintazasača. Nižaza chekžñeeka chekznaquiča, pero ana cumprint-asasača.

²⁷ Jalla nuž cjequiča. Tii zoñinacž kuznacaqui walja tjupiča, ana Yooz taku intintizjapa. Nižaza oñižtakazza ninacaqui, Yooz taku ana nonzjapa. Nižaza zuražtakazza Yooz paatanaca ana chertzjapaqui. Jalla nižtakaz žejlča ana intintiñi kuzziz cjisjapa. Nižaza ana wejtquin cut'iscaquiča, liwriita cjisjapa”.

²⁸ ‘Jalla tekztan nawjchuc tii liwriiñi Yooz takuqui parlitaž cjequiča ana judío zoñinacžquin. Jalla nii ziza ančhucqui. Nii yekja wajtchiz zoñinacaqui tii liwriiñi Yooz taku nonznaquiča.

²⁹ Jalla nuž Pabluž chiitiquiztan, judionacaqui ojkčiča, ninacpora ancha ch'aascan.

³⁰ Pabluqui pizc wata intiru nii aquilta kjuyquiz kamčiča. Jakzilta nižquin tjonžni zoñimi zuma risiwñipanikaztača.

³¹ Jalla ninacžquin parličičha Yooz mantita kamañ puntuquiztan, nižaza Jesucristo Jilirž puntuquiztan. Tjapa kuztan kjana tjajnatčha. Nižaza anaž jecmi Pablo atajchicha, Yooz taku ana paljayajo.

LA CARTA DEL APOSTOL SAN PABLO A LOS ROMANOS

¹ Wejr Pabluqui ančhucaquin tii cartal cjjrźcuča. Jesucristuž mantitacama okiñ žoñtča. Yooz Ejpqui wejr kjawźcu apóstol puestuquin utchiča, liwriiñi Yooz taku parlajo.

² Tuquitanpacha Yoozqui tsjii liwriiñi žoñi cuchanžquiz compromitchičha. Jalla nii compromittaquí Yooz cuntiquiztan chiiñi profetanacaquí mazinchiča zuma Yooz tawk libruquiz.

³ Nii liwriiñi žoñiqui Jesucristo Jiliriča. Yooz Majchča niiqui. Jesucristuqui žoñi cjicanaquí Davidž majch maatinacquiztan tjonñitača.

⁴ Nižaza Jesucristuqui ticziquiztan jacatatchičha; nižaza zuma Yooz Espirituchizza. Jalla nii kjanapacha tjeeža, niiča walja azziz Yooz Majchqui, nii. Jesucristo Yooz Majchča učhum Jiliriquí.

⁵ Jesucristuž cjen wejrqui zuma Yooz kamaña tanzinča. Nižaza Jesucristuž cjen Yooz Ejpqui wejr apóstol puestuquiz utchiča, tjapa wajtchiz žoñinaca Jesucristužquin kuzziz cjeajo, nižaza nižquiz cazajo. Jalla nuž apóstol kamañquiz kamcan, Jesucristužtajapa langznuča.

⁶ Ančhuc zakaz Jesucristužquiz kuzziz cjissinčhucča. Yooz Epiž ančhuca kuzquiz kjawžtan Jesucristuž partiquiz cjissinčhucča.

⁷ Wejrqui tjapa ančhucaquin cjjrźcuča, Roma wajtquin žejlñi žoñinacčhucča. Yooz k'ayi žoñinacaž cjen, Yoozqui ančhucaquiz kjawziča, Yooz zuma kamañchiz cjeajo. Učhum Yooz Ejpmi, nižaza Jesucristo Jilirimi ančhucaquiz zumaj yanapt'ila; nižaza cuntintu kuzziz cjiskatla.

PABLO ROMA WAJTQUIN TJONZ PECCHA

⁸ Jaziqui ančhucaž zuma kamtiquiztan Yooz Ejpžquin ancha gracias cjican chiyučha. Tjapa wajtchiz žoñinacaquí ančhuc puntu chiiča, ančhucqui ancha Jesucristužquin kuzzizza, nii. Jesucristuž cjen Yoozquin gracias cjican chiyučha.

⁹ Wejrqui tjapa kuz Yooz sirwuča, Yooz Majch liwriiñi puntu parlican. Jaziqui Yooz zizza, oracionžtan ančhucaquiz tirapan yanapuča, nii.

¹⁰ Nižaza Yoozquin mayizučha. Yooz munan, ultimu ančhucaquin jaknužquiztanami tjonzquiz atučhani. Ažka ančhucaquin tjonzquiz pecatuča.

¹¹ Ančhucatan ancha zalz pecučha, Yooz kamañquiz ančhucaquiz tsjan zuma kami yanapzjapa, nižaza Yooz tjup kuzzizpan cjiñi yanapzjapa.

¹² Ančhucmi wejrmi Jesucristužquinkaz kuzzizčhumča. Jalla nižtiquiztan zalžcu porapat chiižinascu, Yoozquin juc'ant kuzziz cjesača učhumqui.

¹³ Jilanaca, cullaquinaca, ančhucaquiz zizkatz pecučha, kjaž wiltami wejrqui ančhucaquin tjonz pecatuča. Pero tii orcama ana atchinča. Ančhucaquin tjonz pecatuča, Rom wajtquiz zakaz Yooztajapa obranaca payi. Rom wajtquizimi, nižaza yekja watjanacquizimi Jesucristužtajapa langz pecučha, žoñinaca nižquin kuzziz cjeajo.

¹⁴ Wejrqui liwriiñi Jesucristuž puntu parlistanča, k'ar žoñinacžquizimi campuquiz žejlñi žoñinacžquizimi, zizñi žoñinacžquizimi, ana zizñi žoñinacžquizimi. Jalla tjapa žoñinacžquizimi liwriiñi Jesucristuž puntu parlistanča.

¹⁵ Jalla nižtiquiztan wejrqui ančhucaquiz zakaz nii puntu parliz anchal pecučha.

ANCHA AZZIZZA LIWRIIÑI TAKUQUI

¹⁶ Jakziltat liwriiñi Yooz taku catokačhaj niiqui, liwriita cjequiča. Tuquiqui judío žoñinacžquiz nii liwriiz puntu parlitatača. Nekztan yekja wajtchiz žoñinacžquiz parlitazakaztača. Jakziltat nii liwriiz puntu catokačhaja, jalla niiqui liwriitaž cjequiča. Nižta azzizza liwriiñi Yooz takuqui. Jalla nižtiquiztan nii Yooz taku parlizjapa anal azučha; nii ancha zuma taku parlizjapa ancha jutztaznuča.

¹⁷ Liwriiñi takuqui tuž cjiča; Yoozqui ancha zumača; nižaza žoñinacžquiz nižta zuma nižaza ana ujchiz cjiskatasacha. Jalla nuž cjiča nii liwriiñi Yooz takuqui. Jaknužt žoñinaca Yooz yujcquiz ana ujchiz, nižaza zuma cječhaja, jalla nii zizkatučha, nii liwriiñi taku chiican. Jesucristužquiz kuzziz cjen, jalla nii alajakaz Yooz yujcquiz ana ujchiz, nižaza zuma kuzziz cjesača. Cjijrta Yooz takuqui tuž cjiča: “Jakziltat Yoozquin kuzziz cječhaja, jalla niičha Yooz yujcquiz ana ujchizqui, nižaza zuma kuzzizqui. Nekztan Yooztan wiñaya kamaquiča”.

YOOZ JAYTIZCU ŽOÑINACAQUI UJPAN PAACHA

¹⁸ Arajpachquiztan Yooz casticuqui tjonča tjapa ana Yooz kuzcama kamñinacž quintra, nižaza anawali paañinacž quintra. Jalla nii anazum kamañchiz žoñinacaqui anawali paaznacapan pecča, Yooz zuma kamaña anaž importičha. Nekztan Yooz kuzcama ana kamča. Yooz puntu werara zizawc cjen, atajča.

¹⁹ Pero ninacž kuzquiz Yooz puntu zizasacha. Yoozqui žoñinacžquiz kjanapacha tjeeziča, niž puntu.

²⁰ Ana Yooz cheržcumi tii mundo paatiquiztanpacha Yooz puntu zizta cjesača. Niiž paatanaca cheržcu, tjapa žoñinacaqui Yooz puntu zizasacha, Yoozqui wiñaya azzizza, nižaza werar Yoozpankazza, tii mundo paachi Yoozqui. Jalla nii kjana zizta cjesača. Jalla nižtiquiztan Yooz kuzcama ana kamcanaqui anazuma kamañchiz žoñinacaqui ana razunchizza.

²¹ Žoñinacaqui Yooz puntu persun kuznacquiz zizza. Jalla nuž zizcumi, Yooz ana rispitcha, nižaza ana čjulquiztanami “Gracias, wejt Yooz” cjican čiiča. Nekztan žoñinacaqui ina kaz pinsitanacchiz cjissiča. Nižaza ninacž chojru kuzziz cjen ana wali zumchiquiztakaz kamča.

²² Žoñinacaqui “Wejrnacča ziziñtqui” cjicanami, zumzužtakaz cjissiča.

²³ Ancha zumapankazza Yoozqui. Pero žoñinacaqui nii wiñaya žejtñi Yoozquiz rispitz jaytichiča. Nekztan žoñinacaqui žoñiž paata yoozquizkaz rispitiñi cjissiča. Nii žoñiž paata yooznacaqui ticžni curpuchiz žoñinacž irata paatača, nižaza wežlanacž irata paatača, nižaza pajkpic kjojchchiz animalanacž irata paatača, nižaza zkoranacž irata paatača. Jalla nižta paatanacquiz rispitcha.

²⁴ Jalla nižtiquiztan Yooz Ejpqui ninacžquiz jaytichiča. Nekztan ninacž anazuma pecñi kuzcama čjul ujmi paañičha. Žoñinacpora azzucanaca paachiča.

²⁵ Ninacaqui Yooz puntuquiztan werar razunanaca criichi ecchiča. Nekztan toscar razunanaca criichiča. Jalla nekztan ninacaqui Yoozquin ana rispitchičha. Yooziž paata obranacquizkaz rispitchičha, nižaza sirwichičha. Pero Yoozqui tjappacha paachiča. Jalla nii tjapa paañi Yoozqui wiñaya honorchizza. Jalla nužoj cjila. Amén.

²⁶ Jalla nižta anawali kuzziz cjen Yoozqui ninaca jaytichiča, ninacaž anazum kuzcama azzucanaca paajo. Jalla nuž azzucanaca paacan maatakanacaqui porapat želassiča, jaknužt lucutiñi želas, jalla nižta.

²⁷ Luctakanacaqui nižaza porapat ana wali želassiča, jaknužt lucutiñi želas, jalla nižta. Ninacpora ancha peccu, azzuca ujnaca paachiča. Ancha akñi ujnacquiz tjojtsičha. Jalla nižtiquiztan ninacž persun curpuquizpacha casticu sufriča, nii ana wali paatiquiztan. Nižaza nižta sufris waquiziča ninacaqui.

²⁸ Werar Yooz zizzucatača, pero ninacaqui Yooz ana pajz pecatča. Jalla nižtiquiztan Yoozqui ninaca jaytichiča, ninaca ana zuma pinsiñi kuzziz cjisjapa, nižaza ana zuma cjuchki kamañchiz cjisjapa.

²⁹ Ninacž kuzquiz walja tjapaman ana zumanaca želatča, chjijpipacha. Jalla tižta ana zumanaca želatča; ana Yooz kuzcama kamz, adulteriuquiz ojklayz, žoňž quintra ana wali paaz, yekja žoňžquiztan zmaz, nižaza tjapa ana walimi paaz pecni kuz želatča. Nižaza ninacž kuznaca tižtača: iñiziñi kuz, žoñi coñi kuz, žoňžtan quija ojklayz kuz, incallñi kuz, ana wal paaz pecni kuz, nižaza ana wal quintu joojooñi kuz. Jalla nižta anawali kuzziz žoñi žejlča.

³⁰ Ninacaqui žoňž quintra chiiñinacača. Yooz quintra chjaawjkatñiča. Nižaza žoñi iñarñiča, nižaza mitarazi kuzzizza, persunpacha honora waytisñiča. Nižaza ana zuma paazjapa tantiiñiča, nižaza maa ejp ana cazñiča.

³¹ Nižaza Yooz puntu ana intintiz pecniča, nižaza chiižcupacha niž taku ana cumpliñiča. Nižaza ana jec žoňžtanami munaziñiča. Nižaza ana pertunñiča. Nižaza ana jec žoňžquizimi okzñi kuzzizza.

³² Yoozqui mantichiča, jalla nižta žoñinacaqui ticzpan waquiziča. Jalla nuž Yooz mantita zizcumipacha, nii ana wali žoñinacaqui nižta ana wali paazkaz pecniča, nižaza yekjaž nižta ana wali paanami, “Walikazza” cjiñiča.

2

YOOZZA LIJITUMA PJALZÑIQUI

¹ Jakzilta žoñit tsjii uj paachi žoňžquiztan “Yooz nii casticla” cjican chiičhaja, jalla nii žoñiqui ana nižta ujpacha paaz waquiziča. Jalla nižta ujpacha paaquizñi niqui, persun casticu chiiča. Nižaza Yooz yujcquiziqui anaž razunchiz cjesača niž persun paata ujquiztan.

² Yoozqui uj paañinaca lijituma pjalznaquiča, casticzjapa. Jalla nii učhum zizza.

³ Jequit yekja uj paañi žoňž quintra chiičhaja, nižaza nižta użakaz persuna paačhaja, jalla niqui anapanž atipasača Yoozquiztan. Panž castictazakaz cjequiča. Uj paažcu, anapan pinsa, “Ana Yooziž casticta cjeeka” cjican.

⁴ Jalla nižta pinsiñi žoñinacaqui Yooz puntu ana zuma intintiča. Yoozqui ancha zumača, nižaza tsjan juc'anti okzñi kuzzizza, nižaza tsjan juc'anti pasinsis kuzzizza. Jalla nii werar razunača. Pero jalla nižta kuzziz cjen, Yoozqui žoñinacžquiz persun uj sint'iskatz pecča. Nuž sint'iskatzcu ujnaca paazqui eca. Jalla nuž pecča Yoozqui. Jalla nii zizza ančhuc, ¿ana jaa?

⁵ Ančhucqui ana persun uj sint'iñiž cjen, nižaza chojru kuzziz cjen, juc'anti castictaž cjequiča Yooziž ultimu pjalz tjuñquiziqui. Jalla nii tjuñquiziqui Yoozqui žoñinacž paata ujnaca tjeeznaquiča; nekztan ultimuz casticaquiča.

⁶ Jalla nii tjuñquiziqui Yoozqui tjapa žoñinaca pjalznaquiča ninacaž paatiquiztan jama.

⁷ Jequit pasinsis kuzziz zuma kamañchiz kamčhaja, jalla ninacaqui Yooztan wiñaya kamaquiča. Jalla nii zuma kamañinacaqui Yooziž tjaata honorchiz cjis pecča, nižaza Yooziž rispitta cjis pecča, nižaza Yooztan wiñaya kamz pecča.

⁸ Pero yekjapanacaqui persun kuzcamakaz kamz pecča, werar Yooz kamaña anaž pecča. Anawalinacž mantuquizpanž žejlča. Jalla ninacž quintra Yoozqui juc'anti žawjžcu casticaquiča.

⁹ Tjapa anawali paañinacžtami sufris želaquiča, nižaza wali llaqui želaquiča. Anawali paañi judío žoñinacaqui juc'anti sufraquiča. Pero tjapa anawali paañi žoñinacaqui zakaz sufraquiča, infiernuquinaqui.

¹⁰ Tjapa zuma kamañinacžtami Yooziž tjaata honorchiz cjequiča, nižaza Yooziž rispittaž cjequiča, nižaza llan kuzziz cuntintu cjequiča. Nii zuma kamñi judío žoñinacaqui juc'ant waliž cjequiča. Pero tjapa zuma kamñi žoñinacaqui zakaz waliž cjequiča, arajpachquinaqui.

¹¹ Yoozqui žoñinaca ana illillžcu lijituma pjalznaquiča.

¹² Yekjapanacaqui Moisés lii ana zizza. Jalla nižtiquiztan Yoozqui nii lii jaru ana casticaquiča; persun uj paatiquiztanjama casticaquiča. Yekjapanacaqui Moisés lii zizza. Jalla nižtiquiztan Yoozqui nii lii ana cumplitiquiztan jama casticaquiča.

¹³ Jakzilta žoñinacat Moisés lii nonžcu, ana nii lii jaru kamčhaja, jalla niiqui Yooz yujcquiziqui tira ujchizza. Pero jakzilta žoñinacat Moisés lii cazzaja, jalla niiqui Yooz yujcquiziqui ana ujchizza.

¹⁴ Ana judío žoñinacaqui Moisés lii ana zizza. Jalla nuž ana zizcumi, ninacpacha persun kuzquiz zuma paaz zint'asača, jaknužt Moisés lii zuma paaz mantičhaja, jalla nuž. Nekztan nii kuzquiz zint'ita jaru zuma kamcan, ninacžtaqui liižtakazza nii kuzquiz zint'itaqui.

¹⁵ Jalla nuž zuma kamcan kjanapacha tježa, Yoozqui ninacž kuzquizpacha niž mantitanaca zizkatcha, nii. Nii Yooziž zizkattacama ana kamtiquiztan casticta cjequiča. Nižaza nii zizkattacama kamchižlaja, nekztan ana casticta cjequiča. Yooz pjalz tjuñquiziqui ninacaž kamtanacquiztan jama pjaltaž cjequiča.

¹⁶ Yoozqui Jesucristužquiz žoñinaca pjalkataquiča, chjožzaka paatiquiztanami, nižaza pinsitaquiztanami. Wejrqui niipan chiichinča liwriiñi Yooz puntu parlican.

JUDIO ŽOÑINACAQUI MOISES LIICHIZZA

¹⁷ Yekjap ančhucacquiztan judío žoñinacčhucča. Ančhucqui Moisés liichiz cjen “Walikaztča wejrqui” cjiñchucča. Nižaza mitarazi kuzziz cjiñchucča, “Werar Yoozza wejt Yoozqui”, cjicanaqui.

¹⁸ Ančhucqui jaknužt Yooz munčhaja, jalla nii zizza. Ančhucqui Moisés lii tjaajintaž cjen Yooz zuma kamaña panž zizza.

¹⁹ Yooz puntu ana zizñi žoñinaca želan, ančhucqui cjiča, “Nii zuražtakaz žoñinacžquiz tjaajznasak” cjican. Nižaza ana wal zumchiquiztakaz kamñi žoñinaca želan, ančhucqui cjiča, “Nii ana wal kamñi žoñinacžquiz Yooz zuma kamaña tjaajznasak” kaž cjiča; “Werjtča ninacžtaqui kjanažtakaz” cjican.

²⁰ Nižaza ančhucqui cjiča: “Zumzu kamñi žoñinacžquiz Yooz kamaña sok'o tjaajznasak, ana tsjii kjutñi kamajo”, kaž cjiča. Nižaza ančhucqui cjiča: “Yooz puntu koloculla zizñi žoñinacžquiz tjaajznasak”, kaž cjiča. Yooz puntu razunanacaqui Moisés liiquiz kjana žejlča. Jakziltat Moisés lii zuma zizaja, niiqui Yooz puntuquiztan zuma zizñi zizñi cjequiča.

²¹ Jaziqui ančhucqui yekžžquiz tjaajznasadž niiqui, ¿kjažtiquiztan amiž tjaajinta jaru ana kamjo? Nižaza yekjap ančhucacquiztan chiižiniñchucča, tuž cjican: “Anača tjañi zaazqui”. Jalla nuž chiižcu, ¿kjažtiquiztan ančhucpacha tjañi zaajo?

²² Nižaza ančhucqui cjiñchucča; “Anača adulteriuquiz ojklayzqui”. Jalla nuž chiižcu, ¿kjažtiquiztan ančhucpacha adulteriuquiz ojklayjo? Ančhucqui žoñiž paata yooznaca chjaawjča. Jaziqui, ¿kjažtiquiztan ančhucqui timplu cusasanaca cjižjo?

²³ Ančhucqui mit kuzziz cjiñchucča: “Wejrnacqui Moisés liichiztča”. Jalla nuž chiižcu, ¿kjažtiquiztan ančhucqui nii lii ana cazjo? Ančhucqui nižta ana cazziž cjen Yoozquiz ana rispitcha.

²⁴ Cjijrta Yooz takuqui razunapanž chiiča. Yooz takuqui tuž cjiča: “Ančhucadž uj paachiž cjen yekja wajtchiz žoñinacaqui ultim werar Yooz quintraž chiiča”.

²⁵ Tsjii chiižinuča. Ančhuc judío jilanacaqui Moisés lii jaru janchiquiz chimputa cjissinčhucča. Moisés lii jaru kamchiž cječhaj niiqui, ančhucžtaqui nii chimputa walča. Pero Moisés lii jaru ana kamchiž cječhaj niiqui, nii chimputaqui anaž walča.

²⁶ Jaziqui tsjii ana chimputa žoñiqui Moisés lii jaru kamchi cječhaja, jalla niiqui Yooz yujcquiziqui chimputažtakaz cjequiča, niž janchiquiz ana chimputa cjenami.

²⁷ Nižaza jakzilta ana chimpata žoñit Moisés lii jaru kamchi cječhaja, jalla niiqui ančhucua uj tjeeža. Ančhucqui chimpataž cjenami nižaza Moisés cjiirta liichiz cjenami, jalla nii lii ana cazza.

²⁸ Jakziltat juntuñkaz lii jaru paačhaja, jalla niiqui anača ultimu Yooz maatiqiu. Nižaza jakziltat janchiquiz alaja chimpata cječhaja, jalla niiqui anača ultimu Yooz maatiqiu.

²⁹ Pero jakziltat tjapa kuztan Yooz kuzcama kamčhaja, jalla niičha ultimu Yooz maatiqiu. Nižaza niiqui persun kuzquiz ultimu Yooziž chimpatača. Tsjii cjiirta lii jaru juntuñkaz kamz anača chekanaqiu. Zoñž kuzquiztanča kamz chekanaqiu, lijituma Yoozquin kuzziz, už ana lijituma Yoozquin kuzziz, nii. Jalla nižta lijitum kuzziz žoñiqui Yooziž tjata honorchizza. Zoñiž tjata honora anaž importičha.

3

¹ Yooz yujcquiziqui judío žoñinacaqiu yekja wajtchiz žoñinacžquiztan tsjan walasaž niiqui, ¿chjulapat waljo? Nižaza janchiquiz chimpataqiu, ¿chjulapat waljo?

² Judío wajtchiz žoñinacaž cjičan, zuma walča. Tužuča primer razunaqiu. Judío žoñinacžquiz Yoozqui niž cjiirta taku cumpjiičha.

³ Nii Yooziž tjata lii jaru yekjap judío žoñinacaqiu ana lijituma kamčiča. Jalla nuž ana lijituma kamčiž cjen, ninacaž compromitta taku ana cumplissiča. Jalla nuž cjenami Yoozqui niž persun compromitta taku cumpliča.

⁴ Nužupanča. Yoozqui taku chiižcu panž cumpliča, tjapa žoñinacaž chiita taku ana cumpličiž cjenami. Cjiirta Yooz takuqu tuž cjiča:

“Yooz, amiž chiitaqiu lijitumača. Jalla nii ziztaj cjila. Zoñinacaž am quintra uj tjojtunchiž cjenami amqui lijitumapankaz tjeežtaj cjila”.

⁵ Zoñinacaž toscara chiitaqiu juc'ant tjeeža, Yoozza lijitumaqiu, nii. Jaziqui, ¿kjaž cjeequi? Yoozqui nii toscara chiiñi žoñinaca ana casticz waquiziča. ¿Nuž chiyasajo?

⁶ Anapanča. Yoozqui lijitumapanča. Nižaza Yoozqui uj paañi žoñinaca ana casticaquič niiqui, inakaz jusjasača.

⁷ Yekjapanacaqiu tuž cjiñičha: “Wejt toscara chiitaqiu, Yooz lijitumaž, nii tjeeznaquič niiqui, ¿kjažtiquiztan wejrqui casticta cjesajo? Weriz toscar chiitiquiztan Yoozqui juc'anti rispitta cjesača”. ¿Jalla nuž pinsichinčhucjo? Jalla nii razunaqiu ancha zumzuča.

⁸ Nižaza yekjapanacaqiu cjiñičha: “Anazuma paatiquiztan zuma paaznaca tsjan kjana tjeežta cjesača. Nekztan nii anazumanaca paaz waquiziča”. Nižaza cjiñičha: “Pablo zakaz nuž tjaañičha”. Jalla nuž cjičan, yekjap žoñinacaqiu wejtnac quintra chiiča, wejrnacaž ana rispitta cjeajajo. Jalla nižta chiiñi žoñinacaqiu casticta cjis waquiziča.

TJAPA ZOÑINACAQUI UJ PAACHA

⁹ Nekztan, ¿kjaž cjii? ¿Učhum judío žoñinacaqiu parti žoñinacžquiztan tsjan wali žoñinacajo? Anapanž cjesača. Wejrqui kjanapacha tjezinča, judío wajtchiz žoñinacami nižaza yekja wajtchiz žoñinacami tjappacha už mantuquič žejlča, nii. Tjapa žoñinacami uj paazquin kuz tjaača.

¹⁰ Jalla nižtapacha cjiirta Yooz takuqu cjiča: “Anaž jec lijitum kamañchiz žoñimi žejlča, ana zintallami.

¹¹ Anaž jec Yooz kamaña intintiñimi žejlča, anaž jecmi Yoozta kamzquin kuz tjaača.

¹² Tjapa žoñinacaqiu Yoozquiztan tsjii kjutñi zarakča, nižaza ana zum kuzziz cjissa. Anaž jakziltami zuma paañic žejlča, ana zinta.

¹³ Ninacž joranacquiztan anazuma chiitanaca ulanča, ticzinacž sipultura cjetžtažokaz. Chiican, žoñinaca incallča. Zkorž atquič žejlñi venenožtakazza ninacaž atquiztan chiitaqiu.

14 Ninacaž chiitaqui zoñž quintrapancha, nižaza zoñžtan chjaawjkatča.

15 Ninacž kjojchaqui apura zajtča, zoñi conzjapa.

16 Ninacaqui zoñi akz pecča, nižaza zoñžquiz llaquit kuzziz cjiskatča.

17 Nižaza llan kuzziz kamaña anapan zizza.

18 Nižaza werar Yooz rispits puntuquiztan anaž pinsiča”.

19 Jakziltat tuquita Moisés lii mantuquiz žejlčhaja, jalla niiqui nii lii jaru kamstanča. Pero tjapa nii liichiz zoñinacaqui ana nii lii jaru kamča. Jalla nižtiquiztan ch'uju cjissiča. Ana chiyasača, “Wejrqui ana ujchiztča” cjicanaqui. Tjapa zoñinacaqui, jaknužt kamčhaja, jalla nii cuenta Yoozquin tjaastanča. Tjapa zoñinacaqui Yooziž casticta cjis waquiziča.

20 Anaž jakziltami Moisés lii jaru zumpacha lijituma kamča. Jalla nižtiquiztan Yooz yujcquiziqui anaž jakziltami ana ujchizza. Moisés lii zizcumi uj paaspanča. Jalla nižtiquiztan nii lii jaru ana kamtiquiztan tjapa zoñinacaqui zizza, panž ujchizza, nii.

¿ZOÑINACAQUI, JAKNUŽT ANA UJCHIZ CJESAJO?

21 Moisés liiquiztan Yoozqui yekjat lii jaru zoñinacžquiz ana ujchiz nižaza zuma cjiskatča. Pero nii puntu Moisés liimi nižaza profetanacaž cjiirta takumi zakaz chiiča.

22 ¿Jaknužt zoñinacaqui ana ujchiz cjesajo? Jalla tužuča. Jakziltat Jesucristužquiz kuz tjaačhaja, jalla niiqui Yooz yujcquiziqui ana ujchiz nižaza zuma cjequiča. Yoozqui zoñinaca ana illilla.

23 Tjapa zoñinacaqui tsjii pariju ujchizza. Jalla nižta ujchiz cjenaqui Yoozqui ana jecžquizimi honorchiz cjiskatasacha.

24 Pero Jesucristuqui ujchiz zoñinacžta persun wiržtan pacchiča, ninaca ana casticta cjejajo, nižaza Yooz yujcquiz zuma cjejajo. Yoozqui Jesucristo cuchanžquichiž cjen zoñinacžquiz pajk favora paachiča. Jalla nuž cjen Yoozqui inat zoñinaca liwriyasača, ninaca ana čjulu paažcu.

25 Yooz Ejpqui Jesucristo cuchanžquichiča ujchiz zoñinacž laycu ticzjapa. Niiž ticziž cjen jakziltat Jesucristužquin kuz tjaačhaja, jalla niiqui persun ujquiztan ana castictaž cjequiča. Tuqitan ima Jesucristuž ticznan Yoozqui nižquin kuzziz zoñinacžtajapa pasinsis kuzziztača; ninaca ana casticchiča. Pero Yoozqui uj paañinaca casticstanča. Jalla nuž cjenami Jesucristuž cjen Yoozqui ujchiz zoñinaca pertunasača. Jalla nižtiquiztan Jesucristo cuchanžquichiž cjen Yoozqui, persun kuz zuma lijitumaž, jalla nii tjeeziča.

26 Uj paañi zoñinaca ana castictaž cjenami, Yoozqui lijitumača. Uj paañi zoñinacaqui Jesucristuž ticziž cjen ana castictača. Jakziltat Jesucristužquin kuz tjaačhaja, jalla niiqui Yooz yujcquiziqui zuma cjissa, ana ujchiz, Jesucristuž cjen.

27 Jaziqui zoñinacaqui anapanž mitarazi kuzziz cjis waquiziča, “Yooz yujcquin walikaztča wejrqui” cjicanaqui. ¿Kjažtiquiztan mit kuzziz ana nuž chiyas? Anaž jecmi Moisés lii jaru zuma kamchucaqui. Jalla nižtiquiztan ana lii jaru kamchiž cjen tjapa zoñinacaqui Yooz yujcquiz ujchizza. Jesucristužquin kuz tjaachiquiztan, jalla nužquizkaz Yooz yujcquiz zuma cjesača, ana ujchiz. Jalla nižtiquiztan zoñinaca ana mitaraz kuzziz cjis waquiziča.

28 Wejrqui kjanapacha tjaajinchinča, Jesucristužquin kuz tjaachiž cjen Yooz yujcquiz ana ujchiz nižaza zuma cjesača, jalla nii. Moisés lii jaru kamchiž cjen Yooz yujcquiz anapanča zuma kuzziz cjichuca.

29 ¿Yoozqui judío zoñinacž Yooz alaja cjesajo? Anapanča. Yoozqui parti zoñinacž Yoozzakazza.

30 Zinta Yoozqui žejlča. Jalla niiž yujcquiziqui chimputa judío zoñinacami ana chimputa yekja wajtchiz zoñinacami Jesucristužquin kuz tjaachiž cjenkaz zuma cjesača, ana ujchiz.

³¹ Jalla nižtiquiztan nuž tjaajincan wejrqui, “Moisés liiqui anaž walčha”, ¿nuž cjican tjaajnojo? Anazal nižta tjaajnučha. Liiqui panž walčha, cjiwčha.

4

ABRAHAMZ PUNTU

¹ Wejrnacqui Abrahamž majch maatinacquiztan tjoniñchumčha. Tuquita atchi Abraham ejpž puntuquiztan, ¿kjaž cjii?

² Abrahamqui Moisés lii jaru kamtasaz niiqui Yooz yujcquiz ana ujchiz cjitasachha. Nižaza “Wejrtčha Yooz yujcquiz zumtqui” cjican chii attasachha. Pero ana nuž chii atatčha Yooz yujcquiziqui.

³ Cjijrta Yooz takuqui tuž cjičha: “Abrahamqui Yoozquin kuz tjaachičha. Jalla nižta kuz tjaatiquiztan Yooz yujcquiz zumaž cjissičha, ana ujchiz”.

⁴ Tsjii zakal chiyučha. Jakziltat langznačhaja, jalla niiqui paca tanznaquičha. Nii pactaqui anačha onanta, pero langztiquiztan nižta pacta cjis waquizičha.

⁵ Pero jakzilta ujchiz žoñinacat ana čhjulu paažcu, Yoozquin kuz tjaachhaja, jalla niž kuz tjaatiquiztankazza Yooz yujcquiz ana ujchiz, nižaza zuma kuzziz. Ujchiz cjicanpacha kuz tjaatiquiztan Yoozqui cjičha, “Nii žoñž uj pertunučha. Wejt yujcquiz ana ujchizza”.

⁶ Ana čhjulu paažcu nii kuz tjaaňi žoňiqui ana ujchiz cjissa. Jalla nižta kuz tjaaňi žoňž puntu David cjita tuquita ejpqui

⁷ tuž cjichičha:

“Jakzilta žoñinacž ujnacat Yooziž pertunta cječhaja, nižaza ninacž ujnacat Yooziž ana iya tjeežta cječhaja cuntintuž cjila.

⁸ Nižaza jakzilta žoñinacat ujnacquiztan Yooz Jiliriž ana casticta cječhaja, jalla nii žoňiqui cuntintuž cjila”.

⁹ Nii Davidž chiitaqui ¿jec žoňž puntuquiztantajo? ¿Chimputa žoñinacž puntuquiztan alajakazkaya? ¿Už yekja wajtchiz ana chimputa žoñinacž puntuquiztan jaa? Wejrqui cjiwčha pizcquiztanpachachha. Abrahamqui Yoozquin kuz tjaachiž cjen Yooz yujcquiz ana ujchiz cjissičha.

¹⁰ ¿Čhjulorquiztanpacha ana ujchiz cjissitaya? ¿Ima chimpuchiz cjen? už ¿chimpuchiz cjen jaa? Wejrqui cjiwčha, anačha chimpuchiz cjen Yooz yujcquiz ana ujchiz cjissiqui, pero ima chimpuchiz cjen.

¹¹⁻¹² Ima chimputa cjican Abrahamqui Yoozquin tjapa kuz tjaachičha. Jalla nižtiquiztan Yooz yujcquiz ana ujchiz nižaza zuma cjissičha. Jalla niž wiruň Yoozqui nii chimputa lii mantichičha tjeezjapa kuz tjaachiž cjen Yooz yujcquiz ana ujchizza, zuma kuzzizza, jalla nii tjeezjapa. Jalla nižtiquiztan Abrahamqui tjapa Yoozquin kuz tjaaňinacžta ejpžtakazza, ana chimputa žoñinacžtami, nižaza chimputa žoñinacžtami. Jalla nuž pinsichičha Yoozqui. Jakziltat kuz tjaachiž cjen Yooz yujcquiz ana ujchiz, nižaza zuma kuzziz cjisnačhaja, jalla ninacaqui Abrahamž ultim majchmaatinaca cjequičha. Učhum Abraham ejpqui ima chimputa cjican Yoozquin kuz tjaachičha. Jakzilta chimputa žoñinacat Abrahamžtapacha Yoozquin kuz tjaachhaja, jalla ninacaqui Abrahamž ultim majchmaatinaca cjequičha. Chimputakaz ana walčha, Yooz yujcquiz zuma cjejajo.

YOOZIZ TJAATA TAKU

¹³ Yoozqui Abrahamžquizimi niž majchmaatinacžquizimi comprometcan taku tjaachičha, tii muntuquiz cuntintuž cjequičha, jalla nii. Abrahamž lii jaru kamtiquiztan Yoozqui ana nižta taku tjaachičha. Pero Yoozquin kuz tjaachiž cjen nižaza zuma kuzziz cjen, Yoozqui nižta taku tjaachipančha.

¹⁴ Moisés liichiz kamñi žoñinacaqui tii muntu irinsa tanznačaj niiqui, jalla nižtiquiztan Yoozquin kuz tjaazqui inakazza. Nižaza Yooziž tjaata taku anaž walkatča. Pero anača nižta. Anaž jecmi nii lii jaru zuma kamasatča.

¹⁵ Jaziqui lii jaru ana kamtiquiztan žoñinacaqui casticta cjistanča. Lii ana žejltasača, nekztan lii quintra ana kamtasača.

¹⁶ Jalla nižtiquiztan Yoozquin kuz tjaatiquiztankaz Yooz yujcquiz ana ujchiz, nižaza zuma kuzziz cjesača. Nižaza Yoozqui žoñinacžquiz okziž cjen žoñinaca ana ujchiz cjiskatča. Jalla nii wali pajk favora paachiča Yoozqui. Jalla nuž cjen Yooziž tjaata takuqui tirapanž walča tjapa Abrahamž majchmaatinacžtaqui, Moisés liichiz žoñinacžtami, ana Moisés liichiz žoñinacžtami. Yooziž tjaata takuqui walča tjapa Abrahamžtapacha Yoozquin kuz tjaachinacžtaqui. Abrahamqui tjapa učum Yoozquin kuz tjaachi žoñinacž ejpžtakazza.

¹⁷ Jalla nužupanž cjiirta Yooz takuqui chiiča, tuž cjican: “Amqui wacchi nacionchiz žoñinacž epim cjequiča”. Jalla nižtiquiztan Abrahamqui učum ejpžtakazza, Yooz yujcquiziqui. Abrahammi učumnacami nii zinta Yoozquin kuz tjaachinčhumča. Nii zinta Yoozqui ticzinacami jacatatskatča, nižaza ana žejlñinaca žejlzkatča.

¹⁸ Abrahamžquiz Yoozqui cjichiča: “Amqui wacchi nacionchiz žoñinacž epim cjequiča”. Jalla nii puntuiztan zakaz Yoozqui Abrahamžquiz cjichiča: “Jalla nuž amqui wacchi majchmaatinacchiz cjequiča”. Yooz taku criichiž cjen Abrahamqui wacchi majchmaatinaca tjew tjewziča, chawcwacama. Tsjii žoñinacž “Amiž tjaata Yooz taku ana cumplita cjesača” nuž chiiñi cjenami Abrahamzti tira tjewziča, Yooz taku cumplispanž cjican.

¹⁹ Abrahamqui jos patac watchiz cjen ticz orquiztača. Ana majchchizpan cjichucatača. Nižaza niž maatakaqui ana zinta majtchucatača. Jalla nuž pucultan ana majtchuca cjicanami, Abrahamqui Yoozquin anača upa kuzziz.

²⁰ Nižaza ana kuz turwayskatčiča. Yooziž compromitta taku cumplis ora tirapan tjewziča, cumpliscama. Tirapantača Yoozquin kuzziz. Nižaza Yooz honora waytican, juc'anti Yoozquin kuzziz cjissiča.

²¹ Abrahamqui zizziča, Yoozqui niž compromitta taku ultimupan cumpli atasača. Jaziqui tirapan tjewznatča, ana kuz paysnakžcu.

²² Jalla nižtiquiztan nižta Yoozquin kuz tjaatiquiztan Abrahamqui Yooz yujcquiz ana ujchiz cjissiča, nižaza anča zuma kuzziz.

²³ Jalla nuž Yooz tawk liwruquiz cjiirtatača. Nii cjiirtaqui anatača Abrahamž cjen alajakaz,

²⁴ učumnacaltajapa zakaz cjiirtatača. Jakziltat Yoozquin kuz tjaachaj niiqui, Yooz yujcquiz ana ujchiz cjisnasača. Nii Yoozqui učum Jesucristo Jiliri ticziquiztan jacatatchiča.

²⁵ Jesucristuqui učum ujquiztan contatača; nižaza niž jacatatchiž cjen učumqui Yooz yujcquiz ana ujchiz nižaza zuma cjissinčhumča, nižquin kuz tjaachiž cjen.

5

YOOZQUIN KUZUZ ZOÑINACA

¹ Jalla nižtiquiztan Yooz yujcquiz ana ujchiz, nižaza zuma kuzziz cjen, Yoozqui anača učum quintra. Jesucristo Jiliriž cjen, nižaza nižquiz kuzziz cjen učumtan Yooztan walikazza.

² Jesucristužquin kuzziz cjen učumqui Yooz partiquiz luzzinčhumča. Jalla nii partiquiz učumnacaqui panž žejlča. Jalla nuž žejlcan cuntintuž tjewža, Yooziž tjaata honora tanz ora, Yooztan honorchiz cjisjapa.

³ Nii Yooz zumanaca tjewžcan, učumqui cuntintučhumča. Nižaza sufris želanaqui cuntintuzakazza. Sufrisquiztan pasinziz kuzziz cjissa. Jalla niiqui učumqui zizza.

⁴ Nižaza pasinziz kuzziz žejltiquiztan Yoozquin tjurt'iñi kuzzizpan yatisinsa. Jalla nekztan zumquin yatisinžcu, Yooz honora tjaaz ora tjewža.

⁵ Yoozqui niž Espíritu Santo učumnaca kuzquiz luzkatchičha. Nii Espíritu Santuqui učum kuzquiz luzcu, Yooz ancha zuma munaziñi kuz učumquiz intintiskatča. Jalla nižtiquiztan Yooziž tjaata honora tjewžcan učumqui zizza, ultimquiziqui panž tanznaquiča, nii. Ana inakaz tjewznaquiča.

⁶ Učumpacha ujquiztan anatača liwriizuca. Jalla nižtiquiztan Yooziž pinsita timpuquiz Cristuqui ujchiz žoñinacž laycu ticziča.

⁷ Anaž jakzilta žoñimi tsjii žoñžtajapa pjasila ticznasača, zuma žoñi cjenami. Cuna mit tsjii ancha zuma kuzziz žoñžtajapa ticz pecačhani.

⁸ Yoozti niž zuma okzñi kuz tjeeziča, jalla tižta. Učumnaca ujchiz cjenami Yoozqui niž Majch Jesucristo cuchanžquichiča, učumnacaltajapa ticzjapa.

⁹ Jalla nižtiquiztan Yooz Majch ticziž cjen anziqiu učumqui Yooz Ejpž yujcquiz ana ujchizza, nižaza zuma kuzzizza. Jalla niic zuma razunača. Jaziqiu učumqui zuma kuzzizza. Jalla nižtiquiztan tiizakaz zuma razunača: Jesucristuž ticziž cjen učumqui ultim casticz tjuñquiziqui liwriitaž cjequiča Yooz casticzquiztan.

¹⁰ Tuquitan učumnacaqui Yooz quintratača. Jalla nuž Yooz quintrata želanami, Yoozqui niž Majch cuchanžquichiča, žoñinacž laycu ticzjapa, žoñinacž pertunta cjejajo. Jalla niiqui razunača. Nižaza anziqiu učumqui Yooz pertuntača. Jalla nižtiquiztan učumtan Yooztan walikazza. Nižaza Yooz Majch jacatattiquiztan učumqui ultimquiziqui tjapa anawalinacquiztan liwriitapanž cjequiča, Yooztan wiñaya kamzjapa. Jalla niiqui zuma razunazakazza.

¹¹ Ultimquiziqui liwriitaž cjequiča. Nižaza anzimi liwriitazakaz učumqui. Jalla nižtiquiztan učumqui Yooztan tsjii kuzziz cjican, cuntintučha, Jesucristo Jiliriž cjen. Jesucristuž cjen učumqui Yooziž pertunta cjissiča. Jalla nižtiquiztan učumtan Yooztan walikazza.

ADANZTAN JESUCRISTUŽTAN

¹² Tsjiilla cjesača. Tsjii žoñiž cjen uj žejlča tii muntuquiz. Nižaza nii ujquiztan ticz žejlča. Nižaza tjapa žoñinacami uj paacha. Jalla nuž uj paažcu, ticža.

¹³ Moisés liž tuquiqui uj paazqui želatča tii muntuquiz. Pero ana liichizlaj niiqui, žoñinacaqui nii lii quintrata paata ujquiztan ana castictatača.

¹⁴ Adanž timpuquiztanpacha Moisés timpucama žoñinacaqui ticziča uj paatiquiztan. Jaknužt Adán primera uj paatčaja, jalla nii ujpacha ana paachiča parti žoñinacaqui. Jalla nuž cjenami yekja ujnaca paachiča. Adanqui tjonñi Jesucristužtakaz tjapa tii muntuquiz žejlñi žoñinacžquiz contajichiča. Jalla nii puntuquiztan Adanžtan Jesucristužtan cassa.

¹⁵ Pero tii puntuquiztan anaž cassa. Adanž uj paatiquiztan anawalinaca žejlča. Cristuž ticztiquiztan zumanaca žejlča. Tsjii žoñiqui uj paachiž cjen tjapa žoñinacžquiz ticskatča. Jalla niičha Adanqui. Nižaza tsjii žoñiž cjenkaz walja žoñinacaqui ujquiztan liwriitača. Jalla niičha Jesucristuqui. Jesucristuž cjen Yoozqui žoñinaca okziča. Žoñinacž ana okžta cjichuca cjenami, Yoozqui žoñinacžquiz okziča. Jalla nuž okztiquiztan Yoozqui Jesucristuž cjen žoñinaca liwriichiča niž yujcquiz ujchiz ana cjisjapa. Nužupanča.

¹⁶ Adanž uj paatžtan Jesucristuž liwriiñižtan anaž cassa. Punta puntaž žoñinacžquiz contajičha. Adanž zinta ujquiztan tjapa žoñinacaqui pjalžtača, casticta cjisjapa. Pero Jesucristuž liwriitiquiztan walja žoñinacaqui Yooz yujcquiz ana ujchiz nižaza zuma cjissa, walja ujnaca paachiž cjenami. Jesucristuž cjenkaz nižta cjissa.

¹⁷ Tsjii žoñž ujquiztan tjapa žoñinacaqui ticstanča. Jalla niic razunača. Tiiqui tsjan zuma razunača. Jakziltat Jesucristuž cjen ujquiztan liwriita cječhaja, jalla niiqui

Yooz yujcquiz ana ujchiz cjequiĉha. Niĉaza ujquiztan ticziĉ cjenpacha, Yooztan wiĉaya kamaquiĉha. Niĉaza honorchiz cjequiĉha.

¹⁸ Jaziqui tsjii Źoĉĉ ujquiztan tjapa Źoĉinacaqui pjalĉtaĉha casticta cjisjapa. Niĉaza tsjii Źoĉĉ ticztiquiztan tjapa Źoĉinacaqui ninacĉ ujquiztan pertunta cjesaĉha, ninacĉ ujquiztan ana casticta cjejajo, niĉaza Yooztan wiĉaya kamajo.

¹⁹ Yooz mantita ana cumplichiz cjen Adanqui tjapa Źoĉinacaĉquiz ujchiz cjiskatĉha. Jesucristuzti Yooz kuz cumplichiz cjen walja Źoĉinacĉquiz Yooz yujcquiz ana ujchiz, niĉaza zuma cjiskatĉha.

²⁰ Yoozqui Moisesquiz tsjii lii tjaachiĉha, Źoĉinacĉquiz persun ujnaca kjanapacha tjeezjapa. Nii lii zizcuqui Źoĉinacaqui lii quintra juc'anti uj paachiĉha. Jalla nuĉ juc'anti uj paachiĉ cjenami, Yoozqui niĉ okĉĉi kuz Źoĉinacĉquiz juc'anti tjeeziĉha Jesucristuĉ cjen.

²¹ Uj paaĉcu Źoĉinacaqui ticstanĉha, niĉaza casticta cjistanĉha. Pero Źoĉinacaĉ ujnacquiztan infiernuquin castictaĉ cjenpacha Yoozqui Źoĉinaca liwriichiĉha Jesucristo Jiliriĉ cjen. Źoĉinacaqui Jesucristuĉ cjen Yooz yujcquiz ana ujchiz, niĉaza zuma cjisnasaĉha, Yooztan wiĉaya kamzjapa.

6

EW KAMAÑA PUNTU

¹ Uj puntuquiztan yekjapanacaqui chiiĉiĉha. Uĉhumqui tira uj paaz waquiziĉha, Yooz okĉĉi kuz juc'anti tjeeĉta cjisjapa.

² Pero wejr cjiwĉha, anapanĉ uj paaz waquiziĉha. Tuquitan ticzi Źoĉinacaĉtakaztaĉha uĉhumqui, anazum kamaĉchiz kamcan. Pero uĉhumĉ tuquitan anazuma uj paaĉi kamaĉquiztan jaytichinĉhumĉha. Jalla niĉtiquiztan uj paaĉi kamaĉchiz anapanĉ kamz waquiziĉha.

³ Tjapa uĉhumnacaqui, Jesucristuĉtan tsjii kuzziz cjissinĉhumĉha. Bautistaĉ cjen nekz tjeezinĉhumĉha. Jesucristuqui ticĉcu, tjatzataĉha. Jalla niĉta irata uĉhumqui anazum uj paaznaca tjatz waquiziĉha. Jalla nii uĉhumnacaqui panĉ zizza.

⁴ Bautista cjiscu, niĉaza Jesucristuĉtan tsjii kuzziz cjiscu, uĉhumnacaqui uj paaĉi kamaĉquiztan jaytichinĉhumĉha. Nekztan zuma ew kamaĉchiz cjissinĉhumĉha. Yooz Ejpqui persun aztan Jesucristo ticziquiztan jacatatskatchiĉha. Jalla niĉta irata Yoozqui uĉhumnaca anazuma kamaĉquiztan liwriichiĉha, zuma ew kamaĉchiz cjejajo.

⁵ Jakziltat Jesucristuĉtan tsjii kuzziz cjeĉhaja, jalla niiqui Jesucristuĉtan ticziĉha, anazum uj paaĉi kamaĉquiztan liwriita cjisjapa. Niĉaza jakziltat Jesucristuĉtan tsjii kuzziz cjeĉhaja, jalla niiqui Jesucristuĉtan jacatatchiĉha, ew zuma kamaĉchiz cjisjapa.

⁶ Jaknuĉt Jesucristuqui cruzquiz ch'awcta ticziĉlaja, jalla niĉta irata uĉhumqui ticziĉtakaz cjissiĉha uj paaz pecĉi kuzquiztan. Jalla niĉtiquiztan uĉhum anazum uj paaz pecĉi kuzqui nuĉquiz ana azziz cjissiĉha. Niĉaza nii uj paaz pecĉi kuzqui ana iya mantasaĉha uĉhum kuzquizpacha. Jalla nii uĉhumqui panĉ zizza.

⁷ Jakziltat uj paaz pecĉi kuzquiztan ticzi cjeĉhaja, jalla niiqui uj paaĉi kamaĉquiztan liwriita cjequiĉha.

⁸ Niĉaza jakziltat Jesucristuĉtan tsjii kuzziz cjissiĉ cjen uj paaĉi kamaĉquiztan liwriita cjeĉhaja, jalla niiqui ew kamaĉchiz cjequiĉha, Jesucristuĉtakaz. Niĉaza Jesucristuĉtan chica kamaquiĉha. Jalla nii razuna criichinĉhumĉha.

⁹ Jesucristuqui ticziquiztan jacatatchiĉha. Jalla niĉtiquiztan ana wilta ticznaquiĉha, niĉtaqui ana iya ticz Źejlĉha.

¹⁰ Jesucristuqui Źoĉinacĉ ujquiztan ticziĉha, tsjii wilta. Ana wilta ticznaquiĉha. Jaziqui Źejtĉha, niĉaza Yooztajapa kamĉha.

¹¹ Jalla niĉtiquiztan anĉhucqui cjuĉzna, uj paaĉi kamaĉquiz liwriitaĉ, nii. Jaziqui Jesucristo Jiliriĉ cjen Yooztajapa ew kamaĉchiz kamla.

¹² Uj paaz pecñi kuzqui ana mantiskata, anazumanaca paajo.

¹³ Nii uj paaz pecñi kuzqui curpu mantis pecchaj niiqui, panž ewjasa. Pero ančuca curpu zuma paazjapa, nižaza Yooz sirwizjapa kuz tjaa. Ančucqui anazum uj paañi kamañquiztan liwriita cjiscu ew zuma kamañchiz cjissinčuccha. Jalla nižtiquiztan ančucqui Yooz kuzcama kamajo Yooz mantuquiz cjee, tjapa curpumi, nižaza kuzmi.

¹⁴ Ančucqui anača iya Moisés lii mantuquiz. Okzñi Yooz mantuquizza ančucqui. Jalla nižtiquiztan nii uj paaz pecñi kuzqui ana mantiskata.

YOOZ MANTUQUIZPANKAZ CJEE

¹⁵ ¿Kjaž cjesajo? Moisés lii mantuquiz ana žejlcan, nižaza okzñi Yooz mantuquiz žejlcan, ¿uj paañi kamañchiz želasajo? Anapanž cjesača.

¹⁶ Jakziltat tsjii žoñž mantuquiz žejlčhaja, jalla nii patrunž mantitanaca caspanikazza. Jalla nižta irata jakziltat uj paaz pecñi kuz mantuquiz žejlčhaja, ujnaca paasača; jalla nekztan Yooziž castictaž cjequiča. Nižaza jakziltat Yooz mantuquiz žejlčhaja, jalla niiqui Yooz kuzcama cumplis waquiziča. Jalla nekztan tsjan tsjan zuma kamañchiz cjequiča. ¿Nii ana ziz ančucjo?

¹⁷ Tuquiqui ančucqui uj paaz pecñi kuz mantuquiz žejlñitača. Nekztan Yooz puntu zuma werar razunanacaqui ančucaquiz tjaa jintatača. Jaziqui jalla nii tjaa jintanac jaru tjapa kuztan kamča. Jalla nižta ančuca zuma kamañchiz cjen Yoozquin gracias cjan chiyuča.

¹⁸ Jalla nižtiquiztan nii uj paazquiztan liwriitača ančucqui. Nižaza zumanaca paazjapa tjapa kuz tjaačinčuccha. Yooz manta paaz cjissinčuccha.

¹⁹ Žoñž wirquiztan punta punta chiyuča, Yooz puntu intintazkatzjapa. Ana nižta chiitasajž niiqui, ančucqui anaž intintaztasacha. Tuquiqui ančucqui uj paaz pecñi kuz mantuquiz želatča, ujnaca paacan. Jalla nuž žejlcan juc'anti juc'anti uj paachinčuctača. Jaziti Yooz mantuquiz tsjan tjapa kuztan žela, tsjan zumanaca paazjapa. Jalla nuž žejlcan Yooztakaz tsjan tsjan zuma kuzziz cjisnaquiča.

²⁰ Tuquiqui ančucqui uj paaz pecñi kuz mantuquiz žejlcan, zumanaca paazjapa ana importiča.

²¹ Jalla nuž kamcan, ančucaltajapa ¿chjul walitajo? Jaziqui ančucaž tuquita paatanacquiztan ančucaltaqui azipanča. Jalla nižta anazum kamchi žoñinacaqui wiñayjapa Yooziž castictapanž cjequiča.

²² Pero ančuczti nii anazum uj paañi kamañquiztan liwriitača. Yooz mantuquiz cjissinčuccha. Jalla nižtiquiztan ančucqui tsjan tsjan zuma kamañchizza. Nižaza Yooztan wiñayaž kamaquiča.

²³ Jakziltat anazum uj paañi kamañquiz kamčhaja, jalla niiqui Yooziž castictaž cjistanča. Nuž waquiziča. Pero Yoozqui žoñinacžtajapa tsjii pajk favora paachiča, žoñinacaž ana waquizan. Nužukaz paachiča niž zuma okzñi kuzziz cjen. Jaziqui jakziltat Yooziž liwriita cjechaja, jalla niiqui Jesucristo Jiliriž cjen Yooztan wiñayaž kamaquiča.

7

LII PUNTU

¹ Moisés lii zizñi jilanaca, cullaquinaca, ančucqui zizza, ima ticzcan, žoñinacaqui Moisés lii mantuquiz žejlča.

² Nižaza tsjaa maatakqui zalz kamz lii mantuquiz žejlča, naaža lucu ticzcama. Naaža lucuž ticznaquiž niiqui, nekztan naaqui nii lucutiñi kamañ liiquiztan liwriitača.

³ Jaziqui naaža persun lucu žetan, naaqui yekja luctakžtan želaquiž niiqui, jalla naaqui adulterio paača. Naaža lucu ticznaquiž niiqui, jalla nekz lucutiñ kamañ liiquiztan liwriitača. Jalla nižtiquiztan yekja lucžtan zalžnanami, anaž adulterio cjesača.

⁴ Wejt jilanaca, cullaquinaca, jalla nižta iratača Moisés lii puntuquiztanaqui. Jesucristuqui ančuca ujnacquiztan ticziča. Niiž cjen ančucqui Yooz yujcquiz ana ujchizza, zuma kuzzizza. Moisés lii mantuquiz žejlcan, anapan zuma kuzziz cjisni atchucatača. Jaziqui ančucqui ticzi žoñižtakazza nii lii puntuquiztan. Jalla nižtiquiztan yekjaž mantuquiz žejlča, Jesucristuž mantuquiz, tsjii yekja lucžtan zalzižtakaz. Jesucristuqui ticziquiztan jacatatchiča, ančucaž Yooztajapa zumanaca paajo.

⁵ Tuquiqui učhum persun kuzcama kamcan, učhum uj paaz pecni kuzqui učhumnacaquiz mantiñitača, ujnaca paajo. Jalla nižta ujnaca paatiquiztan infernuquin Yooziž casticta cjichucatača. Moisés liiquiz “Anača uj paazqui” cjican cjenami učhum uj paaz pecni kuzqui juc'anti uj paazquin učhum chjitchiča.

⁶ Ima Jesucristužquin kuz tjaacan, jalla nižta kamchinčumča. Pero jaziqui učhumqui Moisés liiquiztan liwriitača. Tuqita nii liiž mantuquiz učhum želatča, preso tanta žoñižtakaz. Anziqui Espiritu Santuž mantuquiz žejlča. Niiqui učhumnacaquiz ew kamaña tjaachiča.

¿JECT WEJR YANAPASAJO, ZUMA PAAZJAPAJO?

⁷ Jaziqui ¿kjažu cjeequi? ¿Moisés liiqui anawalejo? Anapanž cjesača. Moisés lii mantuquiz ana kamtasaz niiqui, wejrqui wejt ujnaca anal pajkattasača. Moisés liiquiz “Anača zmazni kuzziz cjee” cjiča. Nekztan wejt zmazni kuz zuma pajchinča.

⁸ Moisés liiquiz nižta mantita cjen, wejt uj paaz pecni kuzqui tjapamana zmaz pinsichiča. Nii lii quintra ancha paaz pecatča. Pero nii liiqui ana žejltasaz niiqui, jalla nižtiquiztan nii zmazqui anaž pajta cjitasakalča.

⁹ Ima Moisés lii pajcan, cuntintul kamchinča. Nekztan Moisés lii mantitanaca pajtiquiztan wejt ujnaca pajchinča, nižaza juc'anti uj paachinča. Jalla nižtiquiztan persun kuzquiz weriž paata uj zint'ican, llaquita žejlchintača. Wejt persun uj paatiquiztan Yooz castictal cjis waquizuča.

¹⁰ Wejrqui Moisés lii jaru zumpacha kamtučhaja, jalla nekztan Yooztan cuntintu kamtasacha. Pero nii Moisés lii jaru ana zuma kami atchinča. Jalla nižtiquiztan nii liiž cjen wejtquiz tjeežtača, wejr castictal cjis waquizuča, jalla nii.

¹¹ Moisés liiquiz mantitanaca žejlča. Nii mantitanacaqui zizcuqui wejt uj paaz pecni kuzqui juc'ant uj paaz pecchiča. Anapan nii lii jaru kami atatuča. Incallta cjissinča. Nii lii jaru ana kamtiquiztan, Yooz casticta cjichucatača.

¹² Moisés liiqui Yooziž mantitatača. Jalla nižtiquiztan ancha zumača nii liiqui. Nižaza nii liiquiz mantitami ancha zumapanča, nižaza Yooz kuzcamača, nižaza wejtta waliča.

¹³ Nii liiqui wejtta wali zumažlaj niiqui, ¿kjažtiquiztan nii liiž cjen Yooz casticta cjis waquizasajo? Nii liiqui zumača. Pero nii zuma lii zizcuqui, wejt uj paaz pecni kuzqui juc'anti ana wal uj paaz pecchiča. Jalla nekztan wejt quintra Yooz casticz žejlča. Jalla nižtiquiztan tjeežtača, wejt uj paaz pecni kuzqui ana zumapanča, nii. Nižaza Moisés lii quintra paatiquiztan tsjan juc'ant anazumaž cjissa wejt uj paaz pecni kuzqui.

¹⁴ Učhumqui zizza, Moisés liiqui Yooz Espiritu Santuž kuzcamača. Wejrzi persun kuzcama kamz pecuča. Jalla nižta kamcan wejt uj paaz pecni kuz mantuquiz želuča.

¹⁵ ¿Kjažtiquiztan nižta ana zuma paatojo? Anal tintintazuča. Jesucristužquin kuz tjaažcu, jalla nekztanpacha zuma paaz pecni kuzziz cjissinča. Jalla nižta kuzziz cjenami, uj paaz pecni kuzzizpanča. Zuma paaz peccumi, anal zuma payi atuča. Ana pecta uj paaznaca, jalla niikal wilta wilta paa-uča.

¹⁶ Jalla nižta paachiž cjenauqui, wejrqui pajuča, Moisés liiqui zumača, jalla nii.

¹⁷ Ana zuma paacanami wejt kuzquiz zuma paaz pecuča. Jalla nižtiquiztan wejr-pacha nii anazuma paatanaca anal iyal paaz pecuča. Pero wejt uj paaz pecni kuzqui nii ana zuma paatanaca paakatča.

¹⁸ Wejt uj paaz pecñi kuzqui ana zumapanča. Yooz aztankaz zuma payi atasacha. Wejrqui zuma paaz pecanami, wejt persun aztan nii zuma paazqui anal atuča. Weriz kamtiqiztan nii razuna zizni cjissinča.

¹⁹ Wejrqui weriz zuma paaz pectanacaqui anal paa-uča. Antiz weriz ana paaz pectanacaqui, nii ana zumanacal paa-uča.

²⁰ Jalla nizta ana weriz pectanaca paacan, wejrpacha ana nizta paa-uča. Pero wejt uj paaz pecñi kuzqui nizta anazuma paakatča.

²¹ Jalla niztiqiztan wejtquiz niztapan žejlča. Zuma paaz pecanami, wejt uj paaz pecñi kuzkaz mantiz pecča.

²² Wejt kuzquizpacha Yooz kuzcamapan paaz ancha pecuča.

²³ Jalla nuž cjenami uj paaz pecñi kuziztča. Wejt curpu mantiz pecča. Jalla niztiqiztan wejt uj paaz pecñi kuzqui wejt zuma paaz pecñi kuz quintrača. Wejrqui anazuma paacan wejt uj paaz pecñi kuz mantuquiz želuča. Nizaza nii uj paaz pecñi kuzqui wejt curpu mantiča. Weriz kamtiqiztan nii razuna zizni cjissinča.

²⁴ Ana waliča wejrqui. Jalla niztiqiztan ¿jequit tii ana zuma paañi curpuqiztan wejr liwriyaquiya? ¿Tii casticzkatni curpuqiztanya?

²⁵ Yoozquin gracias cjican, chiyuča, učum Jesucristo Jiliriča wejt liwriñiqui. Wejrpacha tjapa wejt zuma paaz pecñi kuztan Yooz kuzcama kamuča, wejt uj paaz pecñi kuz uj paaz pecanami.

8

ESPIRITU SANTO KUZQUIZ ZEJLCHA

¹ Jesucristuž partiquiz žejlñi zoñinacaqui ana Yooziž casticta cjequiča. Ninacaqui Yooz Espiritu Santuž kuzcama kamča; uj paaz pecñi kuzcama ana kamča.

² Jesucristuž cjen wejrqui Espiritu Santuž mantuquiz želuča. Espiritu Santuž cjen ew kamañchiz kamuča. Nii Espiritu Santuqui uj paaz pecñi kuz mantuqiztan wejr liwriichiča. Uj paaz pecñi kuz mantuquiz tira žejltasaž niiqui, Yooziž wiñaya casticta cjitasacha.

³ Zoñinacž uj paaz pecñi kuz mantuquiz žejlcan, Moisés lii jaru ana kami atchiča. Jalla niztiqiztan Yoozqui niž persun Majch cuchanžquichiča. Ujchiz zoñiztakaz curpuchiz kamchiča. Pero ana ujchizza niiqui. Zoñž curpuchiz cjican, ujchiz zoñinacž laycu ticziča. Jalla nuž cjen Jesucristuqui ujchiz zoñinacž cuntiquiztan casticta cjis-siča, Jesucristužquin kuziz zoñinaca ana casticta cjejajo.

⁴ Moisés liiquiz Yooz kuzcama kamzqui mantitača. Jakziltat uj paaz pecñi kuz mantuquiz kamčhaja, jalla niiqui Yooz kuzcama ana kamča, nizaza Moisés liicama ana kamča. Pero jakziltat Yooz Espiritu Santuž mantuquiz kamčhaja, jalla niiqui Yooz kuzcama kamča.

⁵ Jakziltat persun uj paaz pecñi kuzcama kamčhaja, jalla niiqui persun pinsitanacžquizkaz kuz tjaača. Pero jakziltat Espiritu Santuž kuzcama kamčhaja, jalla niiqui Yooz Espiritu Santuž pinsitanacžquiz kuz tjaača.

⁶ Jakziltat uj paaz pecñi kuz pinsitanacžquiz kuz tjaačaj niiqui, Yooziz wiñaya castictaž cjequiča. Pero jakziltat Espiritu Santuž pinsitanacžquiz kuz tjaačaj niiqui, Yooz kamañchiz kamaquiča, nizaza Yooztan nižtan walikaz cjequiča.

⁷ Jakziltat persun anazum kuzcamakaz kamz pecčhaja, jalla niiqui Yooz quintrača. Yooz kuzcama anapanž kamz pecča, nizaza anapanž atča.

⁸ Jakziltat persun kuzcamakaz kamz pecčhaja, jalla nuž kamtiqiztan Yoozqui anapanča cuntintu.

⁹ Ančuczti persun kuzcamakaz anaž kamča. Yooz Espiritu Santuž ančuca kuznacquiz žejlchiž cjen, ančucqui Espiritu Santuž kuzcama kamča. Jakziltat ana Jesucristuž Espirituchizlaja, anača Jesucristuž partichiz zoñiqui.

10 Jesucristuž ančuca kuznacquiz žejlchiž cjen Yooz yujcquiz ana ujchizčucča, nizaza zuma kuzzizčucča. Nižaza ančuca animunacaqui ew zuma kamañchizza. Uj paachiž cjen ančuca curpunacaqui ticznaquiča. Jalla nuž cjenami ančuca animunacaqui Yooztan wiñaya kamča.

11 Yooz Ejpqui niiž Espíritu Santuž cjen Jesucristo ticziquiztan jacatatskatchiča. Nii Yooz Espíritu Santuqui ančuca kuzquiz žejlča. Jalla nižtiquiztan Yooz Ejpqui niiž Espíritu Santuž cjen ančuca ticzi curpunaca zakaz jacatatskataquiča.

12 Jilanaca, cullaquinaca, tsjii mantuquiz kamspanča učumqui. Anača uj paaz pecni kuz mantuquiz kamzqui, persun kuzcamakaz paazjapa. Pero Yooz Espíritu Santuž mantuquiz kamsa.

13 Jakziltat persun kuzcamakaz kamchiž cječhaja, jalla niiqui Yooziž wiñaya castictaž cjequiča. Pero jakziltat Espíritu Santuž mantuquiz žejlčhaja, jalla niiqui uj paaznaca jaytiča. Jalla nuž ujnaca jaytichiž cjen, Yooz kamañchiz kamaquiča.

14 Jakziltat Yooz Espíritu Santuž irpita cječhaja, jalla niiqui Yooz maatiča.

15 Ančucqui Yooz maatinacčucča. Jaziqi Espíritu Santuqui ančuca kuznacquiz luzziž cjen, ana Yoozquiztan eksni kuzzizza. Espíritu Santuž cjen, “Učhum Yooz Tata”,

16 jalla nuž cjican učum kuznacaqui chiča. Nižaza kuzquiz sint'iskatča, učumča Yooz maatinacaqui, jalla nii.

17 Nižaza Yooz maatinacaž cjen Yooziž tjaata zuma irinsa tanznaquiča, jalla nii irinsača Yooztan wiñaya kamzqui, Jesucristužtan chica. Tii muntuquiz kamcan Jesucristuqui sufrichiča. Učhumqui Jesucristužquiz sirwichiž cjen zakaz sufraquiž niiqui, nekztan arajpachquin nižtan chica honorchiz cjequiča.

18 Tii timpuquiz sufrisnacaqui anača anča. Cjuñzna, Yooziž tjaata honorača anča zuma. Jalla nuž cjuñznuča wejrqui. Jesucristuž tjonz tjuñquiziqui učumnacaqui zuma honorchiz cjequiča. Jalla nii tjeežtaž cjequiča.

19 Tjapa tii muntuquiz žejlñinacaqui ančaž tjewža, Yooz maatinacž honora tjeez tjuñi.

20 Adanž uj paatiquiztan tjapa tii muntuquiz čhjultakimi inakaz cjissiča. Yooz munan jalla nuž cjissiča. Anača juyztokaz inakaz cjissiča. Pero tsjii noojiqui tii muntumi tii muntuquiz žejlñinacami anawalinacquiztan liwriitaž cjequiča. Jalla nii tjuñi tjewža.

21 Jalla nii noojiqui tii muntumi tii muntuquiz žejlñinacami tjapa ana walinacquiztanami liwriitaž cjequiča. Ticzmi anawali watñinacami ana želaquiča. Liwriitiquiztan tii muntumi tii muntuquiz žejlñinacami liwj zumacama cjiskattaž cjequiča, jaknužt Yooz maatinacaqui zumapan cjiskattaž cječhaja, jalla nižta irata.

22 Adanž timpuquiztanpacha tii timpucama tjapa tii muntuquiz žejlñinacaqui sufričha jaknužt tsjaa ic maataka majtz ora sufričhaja, jalla nižta anča ayincan žejlča.

23 Učhum kuzquiz zakaz anča sufričha, Espíritu Santuchiz cjenami. Nii Espíritu Santuqui tsjii zuma adelanto učhum kuzquiz žejlča. Jalla nuž cjen učhumqui anča tjewža, juc'ant tsjan zuma kamañchiz cjisjapa. Učhumqui Yooz maatinacaž cjitiquiztan nii zuma kamañchiz cjisnaquiča. Nižaza učhum Yooz maatinaca cjican, ew curpuchiz cjisnaquiča.

24 Jalla nuž učumnacaqui tjewža liwriitaž cjen. Čhjulunacat chertčhaja, jalla nii chertanaca ana tjewžta cjequiča. ¿Jec žoñit chertanaca tjewznasajo?

25 Učumnacaqui ana chertanaca tjewža. Yoozquiztan tjonni zumanaca tjewža. Jalla nižtiquiztan pasinziz kuztan tjewstanča.

26 Jaknužt učhum zuma tjewzqui sufris awantizjapa yanapčhaja, jalla nižta irata Yooz Espíritu Santuqui učhum yanapčha tjurt'iñi kuzziz cjisjapa. Učhumqui Yoozquiztan jaknužt mayiziz waquzičhaja, ana zizza. Jalla nižtiquiztan Yooz Espíritu Santupacha učumnacalta anča mayižinñičha, nižaza niipachaž anča sint'ičha učumnacalta. Nii Espíritu Santuž mayižintaqui žoñž tawkžtan ana chiita cjesača.

²⁷ Espíritu Santuqui criichi zoñinacžta mayižinñiicha Yooz Ejpž kuzcamakaz. Jalla nuž mayižinan kuzquiz zizñi Yooz Ejpqui nii Espíritu Santuž kuzquiz pinsitanaca zizza. Jalla nižtiquiztan Yooz Ejpqui Yooz Espíritu Santuž učumnacalta mayižintanaca zizza.

YOOZ EJPQUI NIIŽ MAATINACZTAN ANCHA MUNAZICHA

²⁸ Yoozqui niž pinsitacama zoñinaca kjawziča, niž maati cjiskatajo. Jalla nii kjawžta zoñinacaqui Yooztan zuma munaziča. Jalla nii munazita zoñinacžta Yoozqui čjulu cjenami mantiča ninacžta zuma cjisjapa. Učumqui nii zizza.

²⁹ Yoozqui tuquitanpacha zizziča, jecnacat niž maatinaca cjisnačhaja, jalla nii. Nižaza tuquitanpacha Yoozqui niž maatinaca utčiča, niž zinta Majch irata cjisjapa, jalla nižta zuma cjisjapa. Jalla nuž Yoozqui pinsichiča, niž zinta Majchqui jilir jila cjisjapa, tjapa Yoozquin criichi zoñinacžquiztan juc'ant honorchiz cjisjapa.

³⁰ Yooz Ejpqui jecnacat niž maatinaca cjisnačhaja, nii pinsichiča. Ninaca kjawzizakazza. Nižaza Yoozqui jecnacat kjawztčhaja, jalla ninaca ana ujchiz cjiskatča. Nižaza Yoozqui jecnacat ana ujchiz cjistčhaja, jalla ninaca juc'ant zuma kamañchiz cjiskatča.

³¹ Tjapa nii puntuquiztan učumqui, ¿kjaž iya cjequejo? Yoozqui učumnacaltajapapanča. Jalla nižtiquiztan ¿ject učum atipasajo? Anaž čjulumi.

³² Yoozqui niž zinta Majch ana chjojchiča, antiz učumnacaltajapa utčiča, učum laycu ticzjapa. Jalla nuž niž zinta Majch utčiž cjen učumnacaquiz tjapa niž zumanaca zakaz tjaaquiča, juc'ant zuma kamañchiz kamajo.

³³ Nižaza Yooz illzta zoñinacžjapa anaž jecmi uj tjojtNASAča. Yoozpacha ninaca ana ujchiz cjiskatchiča.

³⁴ Jalla nižtiquiztan ¿ject Yooz illzta zoñinacžquiz “Casticta cjistanča” cjican chiyasajo? Anaž jecmi. Jesucristučha ninacž laycu ticziqui. Nekztan ticziquiztan jacatatchiča. Anziqui Yooz Ejpž žew kjarquiz žejlča, tjapa mantican. Jalla nii Jesucristupachača učumnacalta tjurt'ižinñiqui.

³⁵ Čjulunacaž watanami Jesucristuqui učumnacatan munaziča: sufris watanami, llaquinaca watanami, chjaawjkatñi watanami, mach'a watanami, ana zquiti žejlž watanami, ana waliž tjonanami, ana wali ticz watanami, čjulunacaž watanami Jesucristuqui učumnacatan munaziča.

³⁶ Cjijrta Yooz takuqui tuž cjiča:

“Yooz partiquiz žejlčiž cjen učumnacaqui sufrican sufrican zapuru ticzmayažtakaz žejlča. Učum quintra zoñinacaqui tantiiča, criichi zoñinacaž contaj cjila, cjican. Conz uuzanacažtakaz učumnacaquiz nayča”.

³⁷ Pero čjulunacaž watanami Jesucristuqui učumnacatan panž munaziča. Nižaza čjulunacaž watanami učumnacaqui Jesucristuž cjen tjapa nii anawalinacžquiztan atipaquiča.

³⁸ Anaž čjulumi Yooz učumnacatan ana munazizkati atasacha: anaž ticzmi, anaž žetimi, anaž anjilanacami, anaž mantinñinacami, anaž poderchiznacami, anaž anztan žejlñinacami, anaž jaztan žejlñinacami,

³⁹ anaž tsewcta poderanacami, anaž tii yokquiz žejlñi poderanacami, anaž čjul paatanacami Yooz učumnacatan ana munazizkati atasacha. Yoozqui učumnacatan panž munaziča, učumnacatan Jesucristo Jiliržtan tsjii kuzziz cjen.

9

JUDIO WAJTCHIZ ZOÑINACA

¹ Tsjilla cjesača. Jalla tii puntuquiztan wejrqui zuma razunapal cjiwča. Jesucristužquiz kuzziz cjen razunal chiyučha, anal toscara chiyučha. Espíritu Santuqui wejt kuz zizza. Lijituma cjiwča.

² Ancha llaquizuča, nižaza wejt kuzquiz anchal cjuñznuča wejt judío wajtchiz žoñinacžquiz.

³ Wejt judío žoñinacaqui Jesucristuž partiquiz cjiskattasaž niiqui, wejrqui Jesucristužquiztan t'akžtacama cjis pectasača. Nižaza wejrqui ninacž laycu infiernuquin castictacama cjitasacha. Ninacaqui wejt parti žoñinacača.

⁴ Israel majchmaatinacquiztan tjonchiž cjen, ninacaqui Yooz illzta žoñinacača. Yoozqui judío žoñinacžquiz persun honora tjeeziča. Nižaza Yoozqui judío žoñinacžtan acuerdunacquiz luzziča. Nižaza Yoozqui Moisesquiz lii tjaachiča ninacžtajapa. Nižaza Yoozqui, jaknužt nižquiz sirwiz waquizičhaja, jalla nii cuzturumpinaca ninacžquiz tjaachiča. Nižaza tuqui timpuquiz Yoozqui ninacžquiz takunaca tjaachiča, jaztanaqui tsjii Liwriiñi tjonacuiča, nii.

⁵ Učhum judío žoñinacž tuquita atchi ejpnacaqui Yooziž illztatača. Jaziqui učhum judío žoñinacž majchmaatinacquiztan tjonñitača Cristuqui. Nekztan žoñž curpuchiz cjissiča. Cristučha tjapa mantiñi Yoozpachacui. Nižaza wiñaya honorchiz cjila. Nužoj cjila. Amén.

⁶ Tjapa Israel cjita tuquita ejpž majchmaatinacaqui anača ultim lijitum Israel wajtchiz žoñinaca, nižaza anača Yooz wajtchiz žoñinaca. Tjapa judío žoñinacami ana Yooz maatinacaž cjenami, Yooz takuqui cumplissiča.

⁷ Nižaza tjapa Abrahamž majchmaatinacaqui anača ultim lijitum Abrahamž familiaqui. Cjijrta Yooz takuqui Abrahamž puntuquiztan tuž cjiča: “Am ultim majchmaatinacaqui am majch Isaacžquiztan okaquiča”.

⁸⁻⁹ Jaziqui wejrqui cjiwča, tjapa Abrahamžquiztan ojkñi majchmaatinacaqui anača ultim Yooz maatinaca, nii. Yoozqui Abrahamžquiz taku tjaachiča, tuž cjican: “Weriz chiita timpuquiz quejpžcača, wejt taku cumplizjapa. Jalla nii weriz quejpžquizcama am Sara cjiti tjunqui tsjii majch mataquiča”. Nekztan Abrahamqui nii taku catokchiča. Nižaza Yoozqui tjapa niž taku catokñi žoñinacžquiz nayča, ninacaqui ultim lijituma Abrahamž majchmaatinacača, nii.

¹⁰ Tsjilla cjesača nii puntuquiztan. Učhum Isaac tuquita atchi ejpqui Rebeca cjiti tjunchizza. Nii lucutiñiqui pucultan majchnacchiztača.

¹¹⁻¹³ Nii pucultan ocjalaž ima matan, nižaza ima zuma ana zuma paan, Yoozqui Rebecaquiz cjichiča, tuž cjican: “Am jilir majchqui niž majchmaatinacžtanpacha niž lajkžquiz piyunanaca cjequiča niž lajkž majchmaatinacžquizpacha”. Nižaza cjijrta Yooz takuqui tuž cjiča: “Jacob pecchinča. Esau ana pecchinča”. Jaknužt Yooz pinsitčhaja, jalla nuž illziča. Paatanacquiztan jama ana illziča Yoozqui. Pero niž pectacama illziča, nižaza kjawziča niž partiquiz cjisjapa.

¹⁴ Jalla nii puntuquiztan ¿kjaž iya cjequejo? ¿Yooz ana lijituma paajo? Anaž cjesača. Yoozqui lijituma panž paača.

¹⁵ Yoozqui Moisesquiz cjichiča, tuž cjican: “Wejt munañpacama wejt okžni kuz tjeeznuča, nižaza wejt munañpacama favora paaznuča”.

¹⁶ Ana žoñž munañpacama, nižaza ana žoñiž langžtacama Yoozqui okža. Pero Yoozqui persun kuz munañpacama okža.

¹⁷ Cjijrta Yooz takuqui tuž cjiča: Yoozqui Egipto nación chawc jiliržquiz cjichiča: “Wejrqui am utchinča chawc jiliri cjisjapa. Jalla nuž am utchinča, am quintra wejt azi tjeezjapa, nižaza tjapa tii žoñinacžquiz weriz paata quintu mazta cjisjapa”. Jalla nuž cjichiča Yoozqui.

¹⁸ Yoozqui persun kuz munañpacama okža, nižaza persun kuz munañpacama žoñinacž kuz chojruzakaz cjiskatča. Jalla nižta kjanapachača.

¹⁹ Cunamit tsjiiqui cječhani, tuž cjican:

—Jalla nižta cjen, ¿kjažtiquiztan Yoozqui žoñinacž ujquiztan casticaquejo? ¿Jec žoñit Yooz pinsita quintra kamasajo?

²⁰ Jalla nižta chiiñižquiz pewcznača, ¿ject amjo Yooz quintra ch'aazjapajo? ¿Tsjii ojchqui niž paañižquiz chuchasajo, “¿Kjažtiquiztan wejr nižta paajo?” cjecanajo?

²¹ Tsjii ojch paañiqui čhjulumi paasača ljocquiztanaqui. Ljocquiztan paasača tsjii ancha c'achja ojchlla pjijztanacžquiz joojoota cjisjapa. Nižaza ana zuma cheechi ojch paasača, zapuru joojoota cjisjapa.

²² Jalla nižta iratača Yoozqui. Yoozqui tsjii žoñinaca utchiča, casticta cjisjapa. Jalla nuž utchiča, niž azi tjeezjapa, nižaza niž uj quintra žawjz tjeezjapa. Jalla nuž tjeezñi peccanami Yoozqui pasinziz kuztan nii ana wal žoñinaca awantiča, casticz tjuñicama.

²³ Nižaza Yoozqui yekjap žoñinaca utchiča, niž okžta cjisjapa. Tuquitanpacha nii žoñinaca tjaczicha, arajpachquin zuma honorchiz cjisjapa. Nižaza Yoozqui nii žoñinacžtan okžni kuztan žejlča, niž juc'ant okžni kuz tjeezjapa.

²⁴ Učhum zakaz Yoozqui kjawziča, niž okžta žoñinaca cjisjapa. Judío wajtchiz žoñinacami ana judío wajtchiz žoñinacami, tjapa učhumqui Yooz okžta žoñinacčhumča.

²⁵ Jalla nii puntuzakaz Yoozqui Oseas cjiirta liwruquiz tuž cjiča: “Ana Yooziž illzta žoñinacaqui Yooziž illzta žoñinaca cjequiča. Nižaza tuqui ana pecta žoñinacaqui anziqui Yooziž pecta cjequiča”.

²⁶ Nižaza tuquiqui judío žoñinacaqui cjichiča: “Ančhucča anaž Yooz wajtchiz žoñinacaqui”. Pero tii timpuquiz nii iñarta žoñinacaqui “zejtñi Yooz maatinacž cjequiča”.

²⁷ Israel žoñinacž puntuquiztan Isaías profetaqui tuž cjichiča: “Israelž majchmaatinacaqui ancha tama želaquiča, kot at pjilažtakaz, jalla nižta miraquiča. Jalla nuž mirchi cjenami, tsjii kjaž žoñinacakaz liwriitaž cjequiča.

²⁸ Yooz Jiliri qui tii muntuquiz žejlñi žoñinacžquiz niž chiita taku cumplaquiča, panž apura cumplaquiča”.

²⁹ Jalla nii puntuzakaz Isaías profetaqui mazinchiča tuž cjecan: “Walja azziz Yooz Jiliri qui tsjii učhum majchmaatinaca ana liwriitasaž niiqui, tjap-pacha ticztasača Sodoma wajtchiz žoñinacžtakaz, nižaza Gomorra wajtchiz žoñinacžtakaz”.

JUDIO ŽOÑINACAQUI UJQUIZ TJOJ TSA

³⁰ ¿Kjaž cjequejo nekztanajo? Tuquiqui ana judío žoñinacaqui ana importichiča Yooz yujcquiz ana ujchiz cjisjapa. Jazi qui Jesucristužquin kuz tjaachiž cjen Yooz yujcquiz ana ujchiz cjissiča.

³¹ Nižaza judío žoñinacaqui Moisés lii jaru kamz pecatča, Yooz yujcquiz ana ujchiz cjisjapa. Pero nii lii jaru ana zumpacha kami atchiča.

³² ¿Kjažtiquiztan Yooz yujcquiz ana ujchiz cjisni atatjo? Ninaca persunpacha lii jaru kamtiquiztan Yooz yujcquiz zuma cjis pecchiča. Pero ana atchiča. Nižaza nii lii jaru kamz peccan, juc'ant ujchiz cjissiča, Jesucristužquin ana kuz tjaachiž cjen. Jaknužt tsjii mazquiz tejžcu tjojtsaja, jalla nižta irata Jesucristužquiztan ujquiz tjojtsiča.

³³ Jalla nužpacha cjiirta Yooz taku qui cjiča: “Žoñinaca nonžna; wejrqui Sión cjita wajtquiz tsjii utča. Jalla nižquiztan žoñinaca ujquiz tjojtsnaquiča. Tsjii maztakaz nižquiztan žoñinaca t'eznaquiča. Pero jakziltat nižquiz kuz tjaachaja, jalla niiqui ana inakaz kuz tjaaquiča. Ana incallta cjequiča”.

10

¹ Jilanaca, cullaquinaca, judío žoñinaca liwriitaj cjila, jalla nužuča weriž kuzquiz pectaqui. Nižaza jalla nužuča weriž Yoozquin mayiztaqui.

² Ninacž puntuquiztan wejrqui ticlarača, ninacaqui Yooz sirwiz pecča, nii. Pero Yooz sirwiz puntu ana zuma intintazza.

³ Jaknužt Yoozqui žoñinaca ana ujchiz, nižaza zuma cjiskatčhaja, jalla nii Yooz pinsita ana zizza. Ninacaqui persun kuzquiz pinsitacamakaz Yooz yujcquiz zuma cjis pecča. Jalla nižtiquiztan Yooz pinsitiquiz ana importichiča; nižaza Yooz taku ana nonža.

⁴ Jesucristuqui Moisés lii nužquiz apatatskatchiča. Jaziqui jakziltat Jesucristužquiz kuz tjaačhaja, jalla niikaz Yooz yujcquiz zuma cjisnaquiča, ana ujchiz.

⁵ Yooz yujcquiz zuma cjis puntuquiztan Moisesqui tuž cjiirchiča: “Jakziltat wejt lii jaru kamčhaja, jalla niiqui Yooztan kamaquiča, lii jaru kamchiž cjen”. Pero žoñinacaqui nuž kami anapan atča.

⁶ Jaziqui Jesucristužquiz kuz tjaachiž cjenkaz Yooz yujcquiz zuma cjesača. Jalla nii puntuquiztan tužuča. Ančuca kuzquiz ana pinsaquiča, tuž cjican: “¿Ject arajpacha yawasay?” (Jalla nuž cjican, Jesucristo chjijwkatz pecča.) Ana čjul žoñimi nižta paasača.

⁷ Nižaza ančuca kuzquiz ana pinsaquiča, tuž cjican: “¿Ject ticzi žoñinacžquin okaqui?” (Jalla nuž cjican, Jesucristo ticziquiztan jacatatskatz pecča.) Ana čjul žoñimi nižta paasača.

⁸ Pero čjul žoñimi Yoozquin kuz tjaachiž cjen Yooz yujcquiz zuma cjisnasača. Yooz yujcquiz zuma cjisqui jalla tužuča. Liwriiñi taku ančhucalta žejlča, Yoozquin kuzziz cjisjapa. Nii taku ančuca atžtan parlasača, nižaza ančuca kuztan catokasača. Jalla nii liwriiñi takuqui tužuča: Jesucristužquiz kuz tjaaquiž niiqui, liwriita cjequiča, nii. Jalla niipacha wejrnacqui paljayuča.

⁹ Ančhucqui ticlarstanča, Jiliripanča Jesucristuqui, cjicanaqui. Nižaza ančuca kuzquiz criistanča, Yoozqui Jesucristo ticziquiztan jacatatchiča, jalla nii. Jalla nekztan liwriita cjequiča.

¹⁰ Žoñinacaqui tjapa kuztan criistanča, nekztan Yooz yujcquiz zuma cjequiča, ana ujchiz. Nižaza persun tawkžtan “Jesucristužquiz kuz tjaa-uča” cjican ticlarstanča, nekztan liwriita cjequiča.

¹¹ Cjiirta Yooz takuqui tuž cjiča: “Jakziltat Yoozquin kuz tjaačhaja, jalla niiqui ana inakaz kuz tjaaquiča”.

¹² Judío žoñinacžtanami yekja wajtchiz žoñinacžtanami Yooz yujcquiziqui tsjii parijukazza. Yooz Jiliriča tjapa žoñinacžta Jiliriqui. Jakziltat liwriita cjisjapa Yoozquiz mayzičhaja, jalla nižquiz Yoozqui okznaquiča; nižaza liwriyaquiča.

¹³ Jalla nužpacha cjiirta Yooz takuqui cjiča: “Jakziltat Yooz Jiliržquiz mayzičhaja, jalla niiqui liwriita cjequiča”.

¹⁴ Pero žoñinacaqui Yoozquin ana criyaquiž niiqui, ¿kjažt nii žoñinacaqui Yoozquin mayizasajo? Nižaza Yooz puntuquiztan ana nonzitažlaj niiqui, ¿kjažt Yoozquiz criyasajo? Nižaza Yooz puntu paljayñi žoñi ana želaquiž niiqui, ¿kjažt nonžni cjesajo?

¹⁵ Nižaza Yooz puntu paljayñi žoñinaca ana cuchanžquitažlaj niiqui, ¿kjažt Yooz puntu paljayta cjesajo? Cjiirta Yooz takuqui tuž cjiča: “Anča zumača Yooz puntu paljayñi žoñinacaqui. Paljayta Yooz taku catokžcu, Yooztan žoñinacžtan wali cjiskatasača”.

¹⁶ Pero wacchi žoñinacaqui paljayta Yooz taku ana juyzu paača. Jalla nužupan Isiasqui cjichiča: “Yooz Jiliri, ¿ject wejrnacaž paljayta takunaca criijo? Tsjii kjažukazza criichiqui”.

¹⁷ Jaziqui Jesucristuž puntu paljaytažlaja, nii puntu nonžta cjesača. Nižaza Jesucristuž puntu nonžcu, žoñinacaqui nižquin kuz tjaasača.

¹⁸ Wejr pewcznuča, ¿Judío žoñinacaqui ana nonzejo? Nonzipanča. Yooz takuqui cjiča:

“Tjapa kjutñi tii yokchiz žoñinacžquiziqui nii liwriiñi taku mazmaztača. Nižaza tjapa tii muntuquiz žejlñi žoñinacaqui nii taku nonža”.

¹⁹ Tsjižžtan wilta pewcznuča, ¿Israel wajtchiz žoñinacaqui ana intintazzikaya? Tuquiqui judío žoñinacž puntuquiztan Moisesqui cjichiča:

“Yoozqui ančhucaquiz iñiziskataquiča, yekja wajtchiz zoñinacžquiztan. Nižaza Yoozqui ančhucaquiz žawjkataquiča tuquita ana Yooz pajñi wajtchiz zoñinacžquiztan”.

²⁰ Nekztanaqui Isaiasqui ana ekscu, tuž chiichiča:

“Ana werar Yooz pecñinacaqui ultimquiziqui Yooz pajchiča. Nižaza Yoozqui persunpacha tjeeziča tuquita ana nižquiz pecñinacžquiz”.

²¹ Yooz Ejpqui Israel wajtchiz zoñinacž puntuquiztan tuž cjiča:

“Zita zita wejrqui ančhuc kjawznatuča wejtquin tjonajo. Ančhuczi anaž wejt kjawžta cazza, antiz wejt quintrakazza”.

11

CRIICHI JUDIO ZOÑINACA ZEJLCHA

¹ Jalla nižtiquiztan wejrqui pewcznuča, ¿Yoozqui niž tuquita illzta zoñinaca chjatkatjo? Anapanž cjesača. Wejrpacha Israel wajtchiztča, Abrahamž majchmaatitča, nižaza Benjaminž parti zoñtča.

² Tuquitanpacha Yoozqui Israel zoñinaca illziča. Jalla nižtiquiztan anaž chjatkatasacha. ¿Jalla Elías puntuquiztan ana cjuñjo? Elías puntuquiztan cjiirta Yooz takuqui tuž cjiča: Eliasqui Israel zoñinacž ujnaca Yoozquiz tjeeziča, tuž cjican:

³ “Yooz Jiliri, ninacaqui amiž cuchanžquita profetanaca conchiča. Nižaza am sirwiz altaranaca pajlchiča. Wejrqui am sirwiñi zinalla želuča. Ninacaqui wejr zakaz konz pecča”. Jalla nuž cjichiča Elíasqui.

⁴ Nekztan Yoozqui Eliasquiz tuž kjaaziča: “Wejttajapa pakallawk warank zoñinaca čhjetzinča. Ninacaqui Baal cjita zoñiž paata yooz yujcquiz anapan quillziča”.

⁵ Jalla nižta irata tii timpuguiz zakaz tsjii kjaž judío zoñinacaqui Yooz partiquiz žejlča. Yoozqui ninacžquiz okžcu, illziča.

⁶ Nii criichi judío zoñinacaqui Yooziž okziž cjenkaz illztača. Jalla nižtiquiztan ana ninacaž kamtiquiztan illztača. Ninacaž kamtiquiztan illzta cjitasaž niiqui, Yooz okzqui inakaz cjitasača.

⁷ ¿Jazic kjaž cjii? Israel wajtchiz zoñinacaqui ujquiztan liwriita cjis pecatča. Pero ana liwriitatača. Yooziž illztanacaqui ninaca alajakaz liwriitacha. Parti Israel zoñinaczi chojru kuzziz cjissiča.

⁸ Jalla nii chojru kuzziz zoñinacž puntuquiztan cjiirta Yooz takuqui tuž cjiča: “Yoozqui Israel zoñinacžquiz niž puntu ana intintiñi kuzziz cjiskatchiča. Jalla nižtiquiztan ninacaqui Yooz puntu chercanpacha ana cherñižtakaz cjiskatchiča, nižaza Yooz puntu nonzcanpacha ana nonzñižtakaz cjiskatchiča. Anzta tii timpucamaž nižta žejlča”.

⁹ Nižaza Davidqui Yooz tawk liwruquiz tuž cjiirchiča:

“Yoozquin ana kuzziz zoñinaca žejlča. Yooziž tjaatanacaqui ninacžquiz ujquiz tjojtskatla. Tsjii trampažtakaz cjila, ujquiz tjojtskatzjapa. Nižaza ninaca t'ezinla, ninacž uj paatiquiztan jama casticta cjisjapa.

¹⁰ Zur zoñinacžtakaz žejlcan Yooz puntu ana cherñi cjila. Nižaza ninacž tajqui chutunzižtakaz cjila, ana walinacaž tjonchiž cjen”.

YEKJA WAJTCHIZ ZOÑINACŽ PUNTU

¹¹ Jalla nižtiquiztan wejrqui pewcznuča, Israel wajtchiz zoñinacaqui ujquiz tjojtsiž cjen, ¿wiñaya chjatkatta cjesajo? Anapanž cjesača. Israel wajtchiz zoñinacž liwriiñi tawkquiz ana juyzu paachiž cjen, nii liwriiñi takuqui yekja wajtchiz zoñinacžquiz paljaytača, Israel zoñinacžquiz p'ekinčayzjapa, Yoozquin kuz tjaajo.

¹² Israel zoñinacž liwriiñi taku ana juyzu paachiž cjen parti zoñinacžtajapa zuma cjissiča. Nižaza ninacaž Yoozquiztan jaytitiquiztan yekja wajtchiz zoñinacžtajapa wali

cjissiĉha. Jalla niŕtiquiztan Israel ŝoñinaca wilita Yooz partiquiz cjisnan tsjan juc'ant zumaŝ cjisnaquiĉha yekja wajtchiz ŝoñinacŕtajapa.

¹³ Anziqui anĉhuc yekja wajtchiz ŝoñinacŕquiz chiyuĉha. Wejrqui yekja wajtchiz ŝoñinacŕquiz cuchanŕquita apostoltĉha. Jalla niŕtiquiztan wejt apóstol kamaña anchal importayuĉha,

¹⁴ wejt judío sarchiz ŝoñinaca p'ekinchayzjapa, niŕzaza tsjii kjaŕu liwriita cjisjapa.

¹⁵ Judío ŝoñinacaŝ chjatkattaŝ cjen yekja wajtchiz ŝoñinacaqui pertunta cjissiĉha, Yooz-tan wali cjisjapa. Jalla niŕtiquiztan nii judío ŝoñinacaŝ wilita Yooz partiquiz risiwta cjis cjen, ŝoñinacaqui ticziquiztan jacatatchi cjisnaquiĉha.

¹⁶ Judío ŝoñinacŕ tuquita atchi ejpnacaqui Yooz partiquiz ŝelatĉha. Jalla niŕtiquiztan tsjii tjonñi timpuquiz judío ŝoñinacaqui Yooz partiquiz wilita cjisnaquiĉha. Jaknuŕt primir paata t'antaqui zumaŝlaja, jalla nekztan tjapa nii t'anti mazaqui zuma zakazza. Niŕzaza tsjii munti sep'aqui zumaŝlaj niiqui, nii tsijtñi muntiqui zuma zakazza.

¹⁷ Tsjii judío ŝoñinacaqui munti itzanacaŕtakaz ts'ojrtacĉha. Niŕzaza anĉhuc yekja wajtchiz ŝoñinacaqui tsjii ana pecta munti itzaŕtakazza. Pero anĉhucqui judío ŝoñinacŕ cjenpacha apjattaĉha, nii zuma muntiŝ cjen wali zakaz cjejajo. Nii zuma muntiqui Yooz partiĉha.

¹⁸ Anĉhucqui jalla nuŝ apjattiquiztan, anaŝ judío ŝoñinaca iñaraquiĉha. Jakziltat iñaraĉhaja, jalla niiqui tuŝ cjuñz waquiziĉha, anĉhucqui nii sep'aŝ cjen ŝetiñĉhucĉha. Ana anĉhucacŝ cjen nii sep'a ŝejtĉha. Nii sep'aĉha judío ŝoñinacaqui. Cristuĉha tsjii judío ŝoñiqui. Jalla niiŝ cjen anĉhucqui ew ŝeti tanzinĉhucĉha.

¹⁹ Yekjapanacaqui cunamit cjeĉhani, “Nii itsanacaqui ts'ojrtacĉha wejrnaca apjatŕta cjisjapa”.

²⁰ Razunaŝ niiqui. Ana Yoozquin kuz tjaachiŝ cjen judío ŝoñinacaqui chjatkattaĉha. Anĉhuczi Yoozquin kuz tjaachiŝ cjen jalla nii alajakaz Yooz partiquiz ŝejlĉha. Jalla niŕtiquiztan anaĉha mitarazi kuzziz cjeella. Antiz humilde kuzziz cjee, Yooz rispitan.

²¹ Yoozqui ana kuz tjaañi judío ŝoñinacŕjapa quintra cjissiŝlaj niiqui, anĉhucajapa zakaz quintra cjisnaquiĉha ana niiŝquiz kuzzizlaj niiqui.

²² Yoozza okŕñimi niŕzaza casticñimi, jalla niiŝ tantiya. Yoozquiztan zarakñi ŝoñinacŕjapa casticñipanĉha. Niŕzaza niiŝquin kuz tjaañinacŕjapa okŕñipanĉha. Anĉhucqui tira Yoozquin kuzzizlaj niiqui, nekztan Yoozqui anĉhuc tira okznaquiĉha. Anĉhucqui ana tira Yoozquin kuzzizlaj niiqui, nekztan Yoozqui anĉhucacquiz zakaz chjatkataquiĉha.

²³ Nii chjatkatta judío ŝoñinacaqui wilita Yoozquin kuz tjaaquiŝ niiqui, wilita Yoozqui ninaca ricujaquiĉha. Yoozqui ricujzmi atĉha, Yooz partiquiz cjisjapa.

²⁴ Anĉhucqui yekja wajtchiz ŝoñinacaĉha, ana pecta munti itzanacaŕtakaz. Ana Yooz partiquiz ŝelan Yoozqui anĉhuc niiŝ partiquiz apjatchiĉha, yekja wajtchiz ŝoñinacaŝ cjenami. Jalla niŕta watan, judío ŝoñinacaqui Yooz partiquiz wilita apjatŕqui tsjan pjasilaĉha, tuquiqui Yooz partiquiz ŝejlchiŝ cjen.

JUDIO ŜOÑINACAQUI YOOZQUIN KUZ TJAAQUICHA

²⁵ Jilanaca, cullaquinaca, tsjii tuquita ana zizta taku anĉhucacquiz zizkatz pecuĉha, ana mitaraz kuzziz cjisjapa, “Wejrnacqui ziziñ ŝoñtĉha” cjicanaqui. Jalla tuŝ zizkatz pecuĉha: Yoozqui yekja wajtchiz ŝoñinacŕquiz niiŝ partiquiz cjiskatz pecĉha. Jakzil-tanacŕquiz Yoozqui niiŝ partiquiz luzkatz pecĉhaja, jalla ninacaqui luzaquiĉha. Tjapa nii Yooziŝ pecta ŝoñinaca Yooz partiquiz luzcama, jalla niicama Israel ŝoñinacaqui chojru ana intintiñi kuzziz cjequiĉha.

²⁶ Jalla nekztanaqui tjapa nii timpuquiz ŝejlñi Israel ŝoñinacaqui liwriita cjequiĉha. Jalla nuŝ cjiŕta Yooz takuqui cjiĉha:

“Sión wajtquiztan tsjii Liwriiñiqui tjonaquiĉha. Jacobŝ majchmaatinacquiztan ana zum kamañanaca jaytiskataquiĉha.

²⁷ Jalla nekztanaqui wejrqui ninacžtan compromitača, ninacž ujnaca pertunača, nii”.

²⁸ Tii timpuquiziqui Israel žoñinacaqui Yooz liwriiñi tawk quintrača, nižaza Yooz quintrača, ančhucalta wali cjisjapa. Jalla ninaca Yooz quintraž cjenami Yoozqui ninacžtan munaziča, ninacž tuquita atchi ejpnaca illziž cjen.

²⁹ Yoozqui tjaacanpacha anaž niž tjaataqui kjañasača. Nižaza Yoozqui illžcupacha, ana chjatkatasacha.

³⁰ Tuquiqui ančhucqui Yooz ana cazziñčhucča. Anziqui ančhucqui Yooziž pertuntača, ninacaž ana Yooz cazziž cjen.

³¹ Tii timpuquiziqui Israel žoñinacaqui Yooz ana cazza. Jalla nuž cjenami tii jarquin ninacaqui Yooziž pertuntaž cjequiča, jaknužt ančhucqui pertunta cjistčhaja, jalla nižta. Jalla nižta Yoozqui niž okzñi kuz tjeeznaquiča.

³² Yoozqui tsjii pariju tjapa žoñinacž ujnaca tjeeziča, nižquiz ana cazta, jalla nii. Jalla nuž tjeeziča tjapa žoñinacžquiz tsjii pariju niž okzñi kuz tjeezjapa.

³³ ¡Ancha juc'anti zumača Yoozqui! Ancha zuma pinsitanacchizza. Nižaza Yoozqui tjapa intintazza. Nižaza Yooziž pinsitanaca anaž jecmi zuma intintasača. Yooz pjalan anaž jecmi nižquiz mitisasača.

³⁴ ¿Ject Yooz Jilirž pinsitanaca intintasajo? ¿Ject Yooz Jiliržquiz tjaajnasajo?

³⁵ ¿Ject Yooz Jiliržquiz ayñi cjisjapa tjaasajo? Anaž jecmi.

³⁶ Tjapa Yoozquiztan tjonča. Nižaza tjapa niž cjen žejlča. Nižaza tjapa nižtacamača. Yoozqui wiñaya honorchiz cjila. Jalla nužoj cjila. Amén.

12

YOOZ KUZCAMA KAMZ PUNTU

¹ Jilanaca, cullaquinaca, Yooz ančhuc okziž cjen ančhucaquiz chiižinuča, ančhuca persun curpu Yoozquin tjaa, tsjii žejtñi wilanažtakaz. Ančhuca persun curpu Yoozta-japakaz cjee, ana zinta uj paacan. Nuž cjen Yoozqui cuntintuž cjequiča. Jalla nižtača Yooz ultim lijituma sirwizqui.

² Jaknužt tii muntuquiz ana criichi žoñinaca kamčhaja, jalla nižta ančhucqui ana kama. Antiz ančhucaz pinsitanacaž campiita cjee, Yooz pinsitanacaž irata cjeajo. Tjapa ančhuca kamaña zuma cjee. Jalla nekztan Yooz kuz zizñiž cjisnaquiča. Yooz kuzqui zumapanča, nižaza Yooz kuzcama kamzqui Yoozquiz cuntintu cjiskatča, nižaza Yooz kuzcama kamcan ančhucqui zumapan cjequiča.

³ Yoozqui wejr okžcu apóstol puestuquiz wejr utchiča. Jalla nižtiquiztan tjapa ančhucaquiz chiižinuča, persun puntuquiztan anača pinzizqui, “Wejrqui tsjan zumtča” cjicanaqui. Jalla nuž pinziz anaž waquiziča. Antiz zapa mayni persun kamañ puntuquiztan zuma razunchiz pinziz waquiziča. Cjuñzna, Yoozqui zapa maynižquiz tsjii kamaña tjaachiča, Yoozquin kuzziz cjitiquiztan jama. Jaziqi ana mitarazi kuzziz cjee.

⁴ Tsjii curpuquiz wacchi partinaca žejlča. Punta punta žejlča, cherñi, nonzñi, lanzñi jalla nižta.

⁵ Jalla nižta irata Cristuž partiquiz žejlča. Učhumqui tamaž cjen tsjii pariju Cristuž partiquizkaz žejlča, tsjii curpužtakazza. Cristuž partiquiz žejlcan, učumnacaqui tsjii kuzziz uniru žejlča.

⁶ Yoozqui zapa maynižquiz yekja yekja kamaña tjaachiča, jaknužt munčhaja, jalla nuž. Jalla nii tjaata kamañ jaru kama. Yooziž tjaata taku parliñi kamañchižlaj niiqui, jalla nii kamañquiz zuma kama, Yoozquiz tjapa kuzquiztan jama.

⁷ Iclizquiz yanapñi kamañchižlaj niiqui, zuma yanapz waquiziča. Yooz puntu tjaajiñi kamañchižlaj niiqui, zumapan tjaajinz waquiziča.

⁸ Yoozquin kamzjapa p'ekinchayñi kamañchižlaj niiqui, zumapan p'ekinchayz waquiziča. Yoozquin cusasanaca tjaañi kamañchižlaj niiqui, tjapa kuztan tjaaz

waquiziča. Icliza irpiñi kamañchizlaj niiqui, zumapan irpiz waquiziča. T'akjir zoñinacžquin okzñi kamañchizlaj niiqui, zuma cuntintu yanapz waquiziča.

ZUMAPAN KAMAQUICHA

⁹ Tjapa kuztan porapat lijitum zuma munaziñi cjee. Ana zuma paaznaca anapan peca. Pero zuma paaznaca tjapa kuztanpan paa.

¹⁰ Porapat oksaspanča. Zuma kuztan parti hermanonacžquiz rispitaquiča, anača tsjiž rispitskaz tjewzqui.

¹¹ Ana jayrazñi kuzziz cjee, pero c'unchi kuzziz cjee Yooz sirwizjapa. Nižaza tjapa kuztanpan Yooz sirwa.

¹² Arajpach zumanaca tjewžcan, cuntintuž kama. Llaquinacaž tjonanami pasinziz kuzziz kama. Yoozquin parlicanpan žela.

¹³ Criichi zoñinacaž t'akjiri želan, panž yanapa. Tjonzñinaca tjonan, panž kjawžna.

¹⁴ Ančuca quintra zoñinacžtajapa Yoozquiztan mayžinaquiča, ninaca zuma cjisjapa. Anaž quintra chiichiyaquiča. Antiz mayžinaquiča.

¹⁵ Cuntintu žejlñi zoñinacžtan cuntintuza cjee. Kaañi zoñinacžtan chicazaž kaazna.

¹⁶ Porapat zuma munazican kama. Anača mitarazi kuzziz tucquin cjis pecsqui. Pero humilde kuzziz wirquin cjican cuntintuž cjee. Anača “Wejrqui zuma ziziñ zoñtča” cjee.

¹⁷ Tsjiiqui ančuca quintra paachiž cjen, ančhucqui anača nižtapacha quintra tjepunzqui. Zumapanž paazjapa tjapa kuz tjaa.

¹⁸ Nižaza ančhucqui tjapa zoñinacžtan zuma kama, attacama.

¹⁹ Pecta jilanaca, cullaquinaca, ančhucpacha anača quintra tanassa. Yoozpachaž ančuca quintranaca casticaquiča. Jalla nuž cjiirta Yooz takuqui cjiča: “Yooz Jiliri qui tuž cjiča, ‘Wejrtča quintra zoñinaca castiquiñtqui. Wejr casticača’ ”.

²⁰ Nižaza Yooz takuqui cjiča: “Ančuca quintra zoñinacaž čhjeri eecziz cjen, čhjeri ona. Nižaza kjaz kjara passiž cjen, kjaz ona. Jalla nuž paažcuqui nii zoñinacžquiz azkataquiča”.

²¹ Tsjii zoñiqui ančuca quintra paasača. Ančhuczi ana nižtapacha tjepna. Pero nii quintra zoñžquiz zumžtanž paacan jalla nuž atipa.

13

¹ Tjapa zoñinacaqui gobiernuž mantitanaca caz waquiziča. Yoozqui mantiz poder tjaača tižquizimi nižquizimi. Yoozqui jilirinacžquiz poder tjaachiča mantizjapa.

² Jalla nižtiquiztan jakziltat jilirž quintra cječhaja, jalla niiqui Yooziž utžta zoñž quintrača. Nižaza nii quintra zoñinacaqui casticta cjequiča.

³ Zuma paañi zoñinacaqui anaž jilirinacžquiz eksnasača. Antiz ana zuma paañi zoñinacaqui jilirinacžquiz eksnasača. ¿Ančhucqui jilirinacžquiz ana ekscan kamz pecya? Zumapan kama. Nekztan nii jilirinacaqui ančucaquiz walikaz cjican cjequiča.

⁴ Jilirinacaqui zizcumi ana zizcumi Yooz sirwiča, ančhucalta wali žejljzjapa. Pero ančhucqui ana zuma paaquž niiqui, eksnasača. Jilirinacaqui casticz poderchizza, anača inakaz nii mantiz puestu tanža. Ninacaqui Yooz sirwiča, nižaza Yooz cuntiquiztan ana zuma paañi zoñinaca casticča.

⁵ Jalla nižtiquiztan jilirinacž mantuquiz cjee, Yooz ana casticta cjisjapa, nižaza jilirinacžquiz tjapa kuztan cazpanča.

⁶ Jalla nijjapa zakaz ančhucqui impuestonaca pjojkz waquiziča. Mantiñi gobiernuqui Yooz sirwican impuestonaca packatča.

⁷ Tjapa jilirinacžtan zumapan cjee. Tsjii tasa tjaaslaj niiqui, panž tjaa. Tsjii impuesto pacz waquiziž niiqui, panž paca. Jakziltižquiz rispitz waquiziž niiqui, nižquiz panž rispita. Jakziltižquiz honora waytižinz waquiziž niiqui, nižquiz honora waytižina.

⁸ Ana jecžtanami kajchiz žela. Pero porapat zuma munaziz waquiziča. Jakziltat žoñinacžtan zuma munazačhaja, jalla niiqui Yooz mantitanacaž cumpliča.

⁹ Yooz mantita ortinanacaqui tuž cjiča: “Anača adulteriuquiz žejlzqui. Anača žoñi conzqui. Anača tjañi zaazqui. Anača toscara chiizqui. Anača yekja žoñžta cusasa zmazqui”. Jalla nii mantita ortinanacami nižaza tjapa mantitanacami cumplitaž cjequiča, tuž kamcan: “Jaknužta am persun kuztan zuma munazičhaja, jalla nuž žoñinacžtan zuma munaziz waquiziča”.

¹⁰ Jakziltat nižta zuma munazičhaja, jalla niiqui žoñinacž quintrá anapan paaquiča. Jalla nižtiquiztan zuma munazican Yooz mantita ortinanaca cumpliča.

¹¹ Jalla nuž kamcan, tii timpu naya. Nii nii žela. Tuquiqui Jesucristužquiz kuz tjaachinčhumča. Anziqui ultimu liwriiz tjuñiqui tsjan žcatžinžquiča.

¹² Tii kamz timpuqui waj tucuzinznaquiča. Nižaza Jesucristuž tjonz tjuñi žcatžinžquiča. Jalla nižtiquiztan ana zuma paaz kamañquiztan zarakzpan waquiziča. Zuma paaz kamañchiz kamz waquiziča, tsjii zuma armichiz zultatužtakaz.

¹³ Zuma kamcan zuma žoñižta ojklaya, kjanquiztakaz ojklaycan. Anaž pijstanaca paacan, kama. Nižaza ana licchi kama. Nižaza ana adulteriuquiz žejlcan kama. Nižaza ana zuma kamañchiz ana kama. Nižaza žoñinacžtan ch'aascan ana kama. Nižaza žoñinacžtan iñisican ana kama.

¹⁴ Tsjii zuma armichiz zultatužtakaz Jesucristo Jilirž kuzcama kama. Uj paaz pecñi kuz pinsitanacžquiz ana kuz tjaa, nii jaru kamzjapa.

14

CRIICHI ŽOÑINACAQUI PUNTA PUNTA PINSAQUICHA

¹ Tsjii llajlli kuzziz criichi žoñiqui želan, nižquiz zuma risiwaquiča, pero nižtan ana payznakkatñi puntunaca ch'aas waquiziča.

² Tsjii criichi žoñiqui tantiiča, čhjulumiž lulasäča, nii. Yekja criichi žoñiqui tantiiča, chjizwi ana lulasäča, nii.

³ Nii čhjulumi lujlñi žoñiqui nii yekja žoñžquiz ana iñarz waquiziča. Nižaza nii ana chjizwi lujlñi žoñiqui nii čhjulumi lujlñi žoñžquiz anaž uj tjojtunz waquiziča. Yoozqui nii čhjulumi lujlñiqui risiwchiča, nižquiz kuzziz cjen.

⁴ Jalla nižtiquiztan nii Yooz sirwiñi žoñžquiz ana uj tjojtunz waquiziča. Niiž persun Yooz Patrunaqui niž uj jwesnaquiča, ana zuma paachižlaj niiqui. Yoozquiz kuzziz cjenaqui ultimquiziqui walikaz cjesäča. Yooz Patrunaqui nii žoñžquiz wali cjiskatz atča niž aztanaqui.

⁵ Tsjii puntužtan chiižinuča. Tsjii criichi žoñiqui “Tsji tjuñinacaqui chawc tjuñinacača” cjiča. Yekja criichi žoñizti cjiča, “Tsji parijuča tjuñinacaqui”. Zapa mayni persun kuzquiz zumpacha tantiižcuqui, jalla nii tantiita jaru kama.

⁶ Tsji criichi žoñiqui tsji chawc tjuñi wartaquiz niiqui, Yooz honora waytita cjisjapa wartiyaquiča. Tsji criichi žoñizti nii tjuñi ana wartčhaja, jalla niiqui Yooz honora waytita cjisjapa nižta ana wartča. Nižaza tsji čhjulumi lujlñi žoñiqui Yoozquin gracias cjižcu jalla nuž lulaquiz niiqui, Yooz honora waytita cjisjapa lulaquiča. Nižaza yekja criichi žoñiqui ana chjizwi lulaquiz niiqui, Yooz honora waytita cjisjapa ana lujlča. Nižaza ana lujlchiž cjen niiqui Yoozquin gracias cjican chiiz waquiziča.

⁷ Anaž žoñinacaqui inakaz kamča, nižaza anaž inakaz ticža.

⁸ Učhumqui tii muntuquiz kamcan Yooz Jiliržtajapapanž kamča. Nižaza ticžcan Yooz Jiliržtajapapanž ticža. Jalla nižtiquiztan žejtcanami ticžcanami Yooz Jiliržtajapapančhumča.

⁹ Jalla nijapa Jesucristuqui ticziča, nižaza jacatatchiča, žejtñi žoñžtami, ticzi žoñžtami tjapa žoñinacžta Jiliri cjisjapa.

¹⁰ Jalla nižtiquiztan ġkjažtiquiztan am criichi jilžquiz uj tjojtunjo? Nižaza ġkjažtiquiztan am jilž quintra iñarjo? Tjapa uċhumqui Yooz yujcquiz prisintistanċha, niž pjalžtaž cjisjapa.

¹¹ Cjijrta Yooz takuqui tuž cjiċha:

“Yoozqui ultimupanž cjiċha, ‘Wejt yujcquiz zapa mayni žoñiqui quillznaquiċha. Nižaza zapa mayniqui wejtquin rispitaquiċha; nižaza wejt honora chiyaquiċha’ ”.

¹² Jalla nižtiquiztan tjapa uċhumqui Yoozqui quinta tjaastanċha.

UJQUIZ ANA TJOJTSKATA

¹³ Jalla nižtiquiztan uċhumqui porapat ana iya ujnaca tjojtনারas waquiziċha. Pero tjapa uċhumqui tuž tantiiz waquiziċha, yekja jilžquiz anapanž ujquiz tjojtskatz munzqui.

¹⁴ Chjul cusasami tsjii criichi žoñžquiz ana ujchiz cjiskatasաċha. Jalla nii razuna zizuċha, Jesucristo Jiliržquiz kuzziz cjen. Jalla niic nužupanċha. Jakziltat “Tii cusasaqui ujchiz cjiskatċha” cjican tantiyաċhaja, jalla nižquiz nii cusasaqui ujchiz cjiskatasաċha.

¹⁵ Anċhuca lujltiquiztan tsjii criichi žoñž kuz payznakaquiž niiqui, nii ċhjeriqui anaž lujlz waquiziċha. Jalla nii ċhjeri tira lulaquiž niiqui, amqui nii payznakskatñi žoñžtan ana zuma munaziċha. Yekja criichi žoñžquiz ana ujquiz tjojtskata, castica cjeyajo. Jesucristuqui nižtajapa zakaz ticziċha.

¹⁶ Tsjii žoñžtaqui ċhjulu lujlzmi walikaz cjesaċha. Pero nii lujltaž cjen parti žoñinacaqui, “Ana zuma kamañchizza nii criichi žoñiqui” cjeċhaj niiqui, nekztan ana lujlz waquiziċha.

¹⁷ Yooz mantuquiz kamcan, ċhjerimi liczmi ana importiċha. Pero Espíritu Santuž cjen ana ujchiz cjee; nižaza Yooztan anċhucatan walikaz cjee; nižaza cuntintu kuzziz cjee. Jalla nužuċha chekan zuma kamañaqi.

¹⁸ Jakziltat jalla nuž kamcan Cristužquiz sirwaċhaja, jalla niž cjen Yoozqui cuntintuž cjequiċha. Nižaza parti žoñinacaqui “Nii žoñiqui walikaz kamċha” cjican chiyaquiċha.

¹⁹ Uċhumnacžtan parti žoñinacžtan zumapanž kamzjapa kuz tjaa. Nižaza parti criichinacžquiz juc'ant zuma kamañchiz cjeyajo, jalla nii kamzquiz kuz tjaa.

²⁰ Anċhucaž ċhjulumi lujltiquiztan anaċha yekja criichi žoñžquiz Yooz zuma kamañquiztan jaytiskatzqui. Ana ċhjul ċhjerimi ujchiz cjiskatasաċha. Pero nuž ċhjulumi lujlžcu yekja criichi žoñžquiz ujquiz tjojtskataquiž niiqui, jalla nižtiquiztan anaž ċhjulumi lujlz waquiziċha.

²¹ Tsjii criichi žoñiqui anċhucaž ċhjizwi lujltiquiztan, nižaza vinu lictiquiztan, nižaza ċhjulumi paatiquiztan ujquiz tjojtskatasաž niiqui, jalla nižtanaca paazqui ana waquiziċha.

²² Jesucristužquiz tjapa kuzziz cjen ċhjulu kamañchizlaja, jalla nii kamañ jaru Yooz yujcquiz kamz waquiziċha. Yoozquizkaz quinta tjaastanċha. Jalla nuž zuma kamcan persun kuzquiz uj ana sint'aqiċha. Persun kuzquiz ana zinta uj sint'ican zuma kamaquiž niiqui cuntintuž cjequiċha.

²³ Pero jakziltat paysnakñi kuztan lujlċhaja, jalla nii paysnakžcu lujltiquiztan persun kuzquiz uj sint'aqiċha, “Ujžcaa nii lujlzqui” cjican. Yoozquin ana tjapa kuztanžlaj niiqui, ċhjulumi ujž cjesaċha. Yoozquin kuzzizpan cjee.

15

PORAPAT YANAPARASQUICHA

¹ Yekjap uċhumqui tjapa kuztanpan Yoozquinċha. Yekjapanacaqui Yooztan kamcan llajlla kuzzizza. Uċhum kuzquiz pecta jarukaz anaž kamz waquiziċha. Nii llajlla kuzziz criichi žoñinacaž pinsitanaca panž cjuñzna, zuma kami yanapajo.

² Zapa mayni criichi žoñiqui parti criichi žoñinacžtajapa kamz waquiziċha, ninaca tsjan zuma kamañchiz cjisjapa.

³ Jesucristuqui nižta kamchiča, anača persun kuz wali cjisjapa kamchiqui. Cjijrta Yooz takuqui Jesucristuž puntuquiztan tuž cjiča: “Yooz quintra iñarñi žoñinacaqui wejt quintra iñarchiča”.

⁴ Yooz takuqui učumnacalta cjijrtkalča, učumnacaquiz tjaajinzjapa. Jalla tuž učumnacaquiz tjaajinča, zuma tjurt'iñi kuztan, pasinsis kuztan, nižaza p'ekinchayta kuztan, Yoozquin arajpachquin ojkz tjewzjapa.

⁵ Yoozqui učumnacžtan pasinsis kuzzizza; nižaza učumnacaquiz p'ekinchayča. Nii Yoozpacha učumnacaquiz yanapt'ila, tsjii kuzziz cjeajajo, nižaza zuma kamajo Jesucristuž munañpacama.

⁶ Jalla nuž tsjii kuzziz kamcan, učumqui tsjii kuzziz Yooz honora waytaquiča. Yoozqui učum Jesucristo Jilirž Ejpča. Jalla niž honora waytaquiča.

CRISTUZ PUNTU

⁷ Jalla nižtiquiztan tsjiimi tsjiimi zumaž risiwžcu munazaquiča, jaknužt Cristuqui učumnacatan zuma munazičhaja, jalla nuž, Yooz honora waytita cjisjapa.

⁸ Ančucaquiz cjiwča. Jesucristuqui judío žoñinaca liwrii nižaza yanapñi tjonchiča. Nuž tjontiquiztan Yooz niž taku lijituma cumpliñipan, jalla nii tjeziča. Yoozqui tuquitapacha judío žoñinacž atchi ejpnacžquiz taku tjaachiča. Jalla nii taku cumplichiča, Jesucristuž tjonchiž cjen.

⁹ Nižaza Jesucristuqui tjonchiča, yekja wajtchiz žoñinacžquiz Yooz honora waytiskatzjapa. Yooz ancha okžni kuzziz cjen niž honora waytitača. Jalla nužupan cjijrta Yooz takuqui chiča, tuž cjan:

“Jalla nižtiquiztan wejrqui yekja nacionchiz žoñinacžtan žejlcan, am honora waytača. Nižaza am honora waytican, itsnača”.

¹⁰ Yooz tawk liwruquiz tuž cjijrtazakazza:

“Yekja nacionchiz žoñinaca, Yooz parti žoñinacžtan chica cuntintuž cjee”.

¹¹ Yooz tawk liwruquiz tuž cjijrtazakazza:

“Yekja nacionchiz žoñinaca, tjapa ančhucqui Yooz Jilirž honora wayta. Tjapa žoñinacaqui Yooz zuma paatanacquiztan nižquin honora tjaala”.

¹² Nižaza Yooz tawk liwruquiz Isaiasqui tuž cjijrchiča:

“Isaiž majchmaatinacquiztan tsjiiqui tjonaquiča. Jalla nii tjonžcu yekja nacionchiz žoñinacž mantaquiča. Nižaza niž cjen ninacaqui liwriiñiž tjewznaquiča”.

¹³ Yoozza liwriiñi tjewzkatñiqui. Nii Yoozqui ančuca kuz ancha cuntintu cjiskatla. Nižaza Jesucristužquiz kuzziz cjen walikaz cjiskatla. Nekztan ančhucqui Yooz Espiritu Santuž aztan zumpacha liwriiñiž ancha tjewznasača.

¹⁴ Wejt jilanaca, cullaquinaca, ančhucqui ancha zuma kamañchizza, nižaza Yooz puntu zuma zizza, nižaza tsjižquizimi tsjižquizimi Yooz puntu zuma intintiskatča. Jalla nužupanča ančuca kuzqui. Jalla niiqui zumpachal zizuča.

¹⁵ Jalla nuž cjenami ana jiwjatžcu tsjii kjaž puntunaca cjijržcuča, ančucaquiz cjuñkatzjapa. Yoozqui wejtquiz favora paacan apóstol puestuquiz utchiča, tii puestuquiz Jesucristo sirwizjapa. Jalla nižtiquiztan ančucaquiz cjijržcuča.

¹⁶ Jesucristo sirwican, yekja wajtchiz žoñinacžquiz liwriiñi Yooz taku paljayuča. Jalla nuž Yooztajapa langznuča, nii yekja wajtchiz žoñinaca Yoozquin kuz tjaajo. Ninaca tsjii zuma ofrendažtakaz Yoozquiz prisintis pecuča. Nižaza Espiritu Santuž ninacžquiz zuma kamañchiz cjiskatchiž cjen, Yoozqui ninacžquiztan cuntintuž cjequiča.

¹⁷ Jesucristo sirwican wejt Yooztajapa langžtiquiztan cuntintutča wejrqui, tama žoñinaca nižquin kuz tjaachiž cjen.

¹⁸ Jesucristuž puntuquiztankaz wejrqui chiiz pecuča. Jesucristuqui wejtquiz wacchi zuma obranaca paakatchiča, yekja wajtchiz žoñinaca nižquin kuz tjaakatzjapa. Jesucristuž cjen, wejrqui milajru paatanacami Yooz puntu chiitanacami nii yekja wajtchiz žoñinaca Yooz kuzcama cazkatchinča.

¹⁹ Espíritu Santuž aztan ninaca cazkatchinča wacchi milajrunaca paacan. Jalla nuž paacan, nižaza tjapa Jesucristuž puntuquiztan parlican, wejrqui tjapa kjutni ojklaychinča, Jerusalenquiztan Ilírico yokaran.

²⁰ Wejrqui kuzquiz tantiichinča, jakziquin Yooz puntu parlitažlaja, jalla nicju ana ojkz pecchinča. Pero jakziquin Jesucristuž puntu ana parlitažlaja, jalla nicjuñ liwriiñi Jesucristuž puntuquiztan parlican ojklayača, yekja žoñž iclizanaca ana mitiscu.

²¹ Cjijrta Yooz takuqui tuž cjiča:

“Tuquiqui Yooz puntu ana nonziča. Jaziqui nii žoñinacaqui Yooz puntu nonžcu catokaquiča. Nižaza ninacaqui Yooz puntu intintazaquiča”.

PABLUQUI ROMA CJITA WAJTQUIN OJKZ PECCHA

²² Jalla nuž ojklaycan wejrqui ančhucaciz ana tjonžni atchinča. Walja tjonz pecaytuča, pero anal atchinča.

²³ Ažk watanacquiztanpacha wejrqui ančhucatan zalz pecaytuča. Anziqui tii yokaran ojklayzqui žerzinča.

²⁴ Jalla nižtiquiztan ančhucaciz ojkz cjisnuča; España ojkcan tjonžnača. Tsjii kjaž maj ančhucatan cuntintu kaman, ančhucaciz wejr yanapasača, wilta jiczquiz ojczjapa España irantajo.

²⁵ Pero anzpacha wejrqui Jerusalén watja okača, ofrendanaca chjichača nicju žejlñi criichinaca yanapzjapa.

²⁶ Macedonia wajtchiz žoñinacami Acaya wajtchiz žoñinacami kazziča ofrendanaca utzjapa, Jerusalén pori criichinaczquiz yanapzjapa.

²⁷ Jalla nuž ofrendanaca tjaz puntuquiztan ninacapachača “Waliča niiqui” cjichiqui. Nižaza ninacaqui judío žoñinaczquiz kajažtakazza. Judío žoñinacaqui ninaczquiz Yooz zuma tjaajintanaca tojunchiča, ninaca liwriita cjisjapa. Jalla nižtiquiztan nii yekja wajtchiz žoñinacaqui judío wajtchiz žoñinaczquiz ninacz cusasanaca tojunz waquiziča.

²⁸ Primiraqui tii ojkz cumplistanča ofrendanaca intirizjapa. Jalla nuž ojkažu ančhucaciz tjonžnača, España ojkcan.

²⁹ Nekztan liwriiñi Jesucristuž puntuquiztan zumpacha ančhucatan parliz pecuča. Jalla nekztanaqui Jesucristuž cjen wejtquizimi ančhucacizimi wali cjequiča. Nužupanž cjequiča.

³⁰ Jilanaca, cullaquinaca, ančhucaciz rocuča učum Jesucristo Jiliriž cjen, nižaza munaziñi kuz cjiskatni Espíritu Santuž cjen, oracionžtan yanapalla. Wejrqui ancha Yoozquiztan mayuča,

³¹ Judea wajtchiz quintra žoñinaczquiztan anapan tanta cjisjapa. Nižaza oracionžtan yanapalla, tii weriž chjitzta ofrendanaca wali risiwta cjisjapa. Pecuča, judío criichi žoñinacaqui tii ofrendanaca zuma risiwčhaja, nii.

³² Jalla nuž zuma wataquiž niiqui, ančhucaciz tjonžcača Yooz munan. Wejr cuntintu irantizquizjapa, mayizinaquiča. Nižaza ančhucatan tjonžcu porapat cuntintu kuzziz yanaparasjapa mayizinaquiča. Jalla nijapa oracionžtan yanapalla.

³³ Yoozqui ančhuc walikaj cjiskatla. Jalla nužoj cjila. Amén.

16

PABLUZ TSAANTANACA

¹ Tsjaa criichi cullaquiqui žejlča, Febe cjiti, jalla naa cullaquiqui ancha zumča cjiwča. Naaqui Cencrea iclizquiz Yooztajapa sirwiča.

² Yooz Jiliriž cjen naa cullaqui zuma risiwaquiča. Jalla nuž waquiziča Jesucristužquiz kuzziz jilanacaqui. Jalla naa cullaquiz yanapaquiča čhjułu pecanami. Naaqui wacchi criichi žoñinaczquiz yanapchinča, nižaza wejtquizimi.

³ Priscilaquizimi Aquilžquizimi tsaanžinalla. Ninacaqui Jesucristužquin sirwiñi mazinacača.

⁴ Wejr ticznawc cjen ninacaqui wejr liwriiskatchiča. Jalla nuž liwriiskatcan ninacaqui joz ticzizakazza. Jalla nižtiquiztan ninacaž cjen Yoozquin gracias cjican chiyuča. Nižaza tjapa nacjuñta jilanacaqui ninacaž cjen Yoozquin gracias cjiča.

⁵ Nižaza Priscila Aquilž kjuyquiz ajczñi jilanaczquiz tsaanžinaquiča. Nižaza weriž pecta Epeneto tsaanžinaquiča. Acaya wajtchiz žoñinaczquiztan primirpacha niiqui Cristužquin kuz tjaachiča.

⁶ Nižaza Mariaquiz tsaanžinaquiča. Naaqui ančhucatan žejlcan ancha langzinča.

⁷ Nižaza wejt wajtchiz žoñinaczquiz, Andrónico, nižaza Junias, tsaanžinaquiča. Ninacaqui wejttan chica carsilquiz žejlchi compañerunacatača. Apostolunacazakaz ninaca rispitcha. Weriž ima Jesucristužquiz kuz tjaan, ninacaqui Jesucristužquiz kuz tjaachiča.

⁸ Nižaza Ampliasquiz tsaanžinaquiča. Jalla niiča weriž pecta maziqi. Niiqui Jesucristo Jiliržquin kuz tjaachizakazza.

⁹ Nižaza Urbanžquiz tsaanžinaquiča. Niiqui Jesucristužquiz sirwiñi maziča. Nižaza weriž pecta Ēstaquizquiz tsaanžinaquiča.

¹⁰ Nižaza Apelesquiz tsaanžinaquiča. Jalla niiqui Jesucristužquiz kuz tjaažcu, Yooz kamaña pankaz kamča. Nižaza Aristóbuluž kjuychiz žoñinaczquiz tsaanžinaquiča.

¹¹ Wejt wajtchiz žoñžquiz, Herodión, tsaanžinaquiča. Nižaza Narcisož kjuychiz Yoozquin criichi žoñinaczquiz tsaanžinaquiča.

¹² Nižaza Trifenaquiz, nižaza Trifosaquiz tsaanžinaquiča. Ninacaqui Yooz Jiliržtajapa sirwiča. Nižaza učum pecta Persidaquiz tsaanžinaquiča. Naaqui Jesucristo Jiliržtajapa juc'anti langzinča.

¹³ Nižaza Rufžquiz tsaanžinaquiča. Niiqui Jesucristužquiz tjapa kuz tjaažcu, parti hermanonaczquiz rispitta cjissiča. Nižaza niž maaquiz tsaanžinaquiča. Naaqui wejt maa cuntitača.

¹⁴ Nižaza tsaanžinaquiča tinaczquiz, Asincritužquiz, Flegontižquiz, Hermasquiz, Patrobasquiz, Hermesquiz, nižaza ninacžtan chica kamñi jilanaczquiz.

¹⁵ Nižaza tsaanžinaquiča Filologužquiz, nižaza Juliaquiz, nižaza Nereožquiz, nižaza niž cullacaquiz, nižaza Olimpasquiz, nižaza tjapa ninacžtan kamñi criichi žoñinaczquiz.

¹⁶ Nižaza porapat zuma tsaanassaquiča, tjapa kuztan. Nižaza tjapa Jesucristužquiz kuz tjaañi žoñinacaqui ančhucaquiz tsaanz apayžquiča.

¹⁷ Jilanaca, cullaquinaca, ančhucaquiz rocuča, zumapanž ančhucqui cwitzaquiča, nii t'akt'aksñi žoñinaczquiztan. Nižaza zumpacha cwitzaquiča tsjii kjutñi tjaajiñi žoñinaczquiztan. Nii žoñinacaqui, jaknužt ančhucaquiz Yooz puntu tjaajinta cječhaja, jalla nii tjaajinta quintra tjaajinča. Ninaczquiztan ančhucqui zaraka.

¹⁸ Ninacaqui Jesucristužtajapa ultimu ana sirwiča. Antiz ninacaqui persun kuzcamaž sirwiča. Ninacaqui humilde criichinaczquiz incallča, zuma chiican, žoñinacz kuz wali cjisjapa.

¹⁹ Tjapa žoñinacaqui ančuca puntu zizza, jaknužt ančhucqui Yoozquin cazzaja, jalla nii. Jalla nižtiquiztan wejrqui chipznuča. Nižaza zumanaca paazjapa zizñi zizñi cjee. Ana zumanaca paachucaž cjen, ana mitisa.

²⁰ Jalla nuž zuma kaman, Yoozqui ančhucaltajapa Satanás diablužquiz tječžcu, atipaquiča. Yoozza ančhuc walikaz cjiskatñi. Nižaza učum Jesucristo Jiliriqui ančhucaquiz yanapt'ila. Amén.

²¹ Timoteuqui ančhucaquin tsaanz apayžquiča. Niiqui wejt compañeruča, wejr Yooztajapa langznan. Nižaza wejt wajtchiz žoñinaca, Lucio, Jasón, Sosípater, jalla ninacaqui ančhucaquin tsaanz zakaz apayžquiča.

²² Nižaza wejrqui, Tercio cjita zoñtča ančhucaquin tsaanz zakaz apayžcuča, Jesucristo Jilirž tjuuquiz. Wejrqui Pabluž chiitiquiztan tii cartal cijruča.

²³ Nižaza Gayuqui ančhucaquin tsaanz apayžquiča. Niiž kjuyquiz alujassinča. Nižaza niiqui čhjul criichi zoñimi kjawzñipanikazza, niiž kjuyquiz alujazjapa. Nižaza Erastuqui ančhucaquin tsaanz apayžquiča. Jalla niiča wajt paaz tanzñi tesoreruqui. Nižaza učhum jila Cuarto cjitaqui ančhucaquin zakaz tsaanz apayžquiča.

²⁴ Učhum Jesucristo JiliriQUI tjapa ančhucaquiz zumaj yanapt'ila. Jalla nužoj cjila. Amén.

ZERZ TAKUNACA

²⁵ Ima žerzcan Yooz honora waytuča. Yoozqui ančhuc tjurt'iñi kuzziz cjisnasača. Nii liwriiñi Yooz puntumi, Jesucristuž puntumi parluča. Jalla nii parlita puntunacaqui Yoozqui ančhucaquiz zizkatchiča. Tuquitan nii puntunaca ana ziztača.

²⁶ Tii timpuquizkaz Yoozqui nii puntunaca zizkatchiča. Nižaza profetanacaqui nii puntunaca cijrchiča Yooz tawk liwruquiz. Tii timpuquiz wiñay žejtñi Yoozqui mantichiča, tjapa žoñinacžquiz nii puntunaca zizajo. Jalla nuž mantichiča, žoñinaca Jesucristužquiz kuz tjaajo, nižaza casajo.

²⁷ Yoozkazza zizñi zizñiqui. Jesucristuž cjen Yooz honoraqui wiñaya waytitaj cjila. Jalla nužoj cjila. Amén.

PRIMERA CARTA DEL APOSTOL SAN PABLO A LOS CORINTIOS

¹ Wejrqui Pablutcha. Jesucristuž cuchanžquita apostoltcha. Jalla nuž Yoozqui munchiicha, wejr apóstol puestuquiz uchi. Wejrqui Sóstenes cjita jilžtan tii cartal cjižrucuicha ančhuc criichi žoñinacžquin.

² Ančhucqui Corinto wajtchiz criichi jilanacchuccha. Werar Yooz iclizziz žoñinacchuccha. Jesucristuž cjen Yoozqui ančhuc t'akziicha niž zuma kamañchiz cjisjapa. Jalla nijapaqui Yoozqui ančhuc kjawziicha. Nižaza Yoozqui tjapa criichi žoñinaca kjawziicha niž zuma kamañchiz cjisjapa. Ančhucatan parti criichi žoñinacžtan Jesucristo Jiliržquin sirwiicha. Jesucristo Jilirž mantuquizza ninacami, nižaza učummi.

³ Učhum Yooz Ejpžtan Jesucristo Jiliržtan, ančhucaquiz zumaj yanapla. Nižaza ančhucžtajapa walikaj kamkatla.

YOOZQUI ŽOÑINACŽQUIZ YANAPCHICHA

⁴ Jesucristuž cjen Yoozqui ančhucaquiz ancha okziicha. Ančhucaž okžtaž cjen tirapan Yoozquin gracias cjican chiyučha.

⁵ Jesucristuž cjen Yoozqui ančhucaquiz zumpacha yanapchiicha, Yooz puntu zuma zizajo, nižaza Yooz taku zuma paljayajo.

⁶ Wejrnacaž Jesucristuž puntuquiztan paljaytan ančhucqui persun kuzquiz zumpacha catokchinčhuccha.

⁷ Jalla nižtiquiztan ančhucqui tjapaman Yooziž tjaata kamañchizza. Jalla nuž kamcan, Jesucristo Jilirž tjonz tjuñi tjewža ančhucqui.

⁸ Jesucristo Jiliripacha ančhucaquiz tjurt'iñi kuzziz cjiskataquiicha niž tjonz tjuñicama. Tjurt'iñi kuzziz tjewznan, Jesucristo Jilirž tjonz tjuñquiziqui ančhuca quintra anaž jecmi kjaž cjesača. Yoozqui ančhuca ujnaca pertunchiicha Jesucristuž cjen.

⁹ Nižaza ančhuc kjawziicha niž Majch Jesucristo Jiliržtan tsjii kuzziz cjeyajo. Nižaza Yoozza niž kjawžta taku cumpliñiqui. Niž tawkcama ančhucaquiz cwitaquiicha Jesucristuž tjonz tjuñicama.

T'AKA T'AKA CH'AASSICHA

¹⁰ Jilanaca cullaquinaca, učhum Jesucristo Jilirž tjuuquiz ančhucaquiz rocuča, porapat tsjii kuzziz cjeyajo, nižaza ana pjali cjeyajo. Tsjii kuzziz cjen tsjii pinsamintuchiz cjis waquiziča.

¹¹ Wejt jilanaca cullaquinaca, tsjii kjaž žoñinacaqui Cloé famill žoñinacžquiztan wejtquiz quint'ichiča, ančhucpora ch'aasiñchucquiča, jalla nii.

¹² Ch'aascan, t'aka t'aka chiichiiñchucquiča, tuž cjican: “Wejrtča Pabluž t'akquiztanqui”. Tsjiizti cjiñizakazquiča: “Wejrtča Apolos t'akquiztanqui”. Tsjiizti cjiñizakazquiča: “Wejrtča Pedruž t'akquiztanqui”. Yekjapanacazti cjiñizakazquiča: “Wejrtča Cristuž t'akquiztanqui”. Jalla nužupan ančhucqui ch'aasiñchucquiča.

¹³ Nonžna ančhucqui. Cristuqui anača t'aka t'aka. Ančhuca laycu wejrqui anača cruzquiz ch'awetaqui. Nižaza wejt tjuuquiz anača bautistaqui, wejt t'akquiz cjisjapa.

¹⁴ Crispo, nižaza Gayo, jalla ninaca bautissinča. Walizat ana iya bautistučhaja. Jalla nižtiquiztan Yoozquin gracias cjican chiyučha.

¹⁵ Nižaza wejt tjuu ana waytasača, “Pabluqui wejr bautissiča”, cjicanaqui.

¹⁶ Aaa, tsjiilla wejr tjatzinča; Estéfanos familia zakaz bautissinča. Anal iya jec bautistac cjuñučha.

¹⁷ Cristuqui anača wejr bautisajo mantizquichi. Antis liwriiñi Yooz taku paljayajo mantizquichiča. Jalla nuž Yooz taku paljaycan wejrqui anača chawjc takunaca

chiichintqui. Chawjc takunaca chiitasaž niiqui, wejtquiz kuz tjaatasacha. Jalla nižtiquiztan ančhucqui anaž učhum laycu conta Jesucristužquiz tjapa kuztan cji-tasacha. Nižaza Jesucristužquin tjapa kuz ana criitasača.

JESUCRISTO CRUZQUIZ CH'AWCTA PUNTU

¹⁸ Jesucristuqui cruzquiz ch'awctatača. Jalla nii puntu paljaytiquiztan infier-nuquin ojkni žoñinacaqui zumzu takunacažtakaz nayča. Liwriita, arajpachquin ojkni žoñinacazti Yooz takupanž nayča. Nii Yooz taku paljaytaž cjen, Yoozqui niž azi tježa.

¹⁹ Cjijrta Yooz takuqui tuž cjiča:

“Yoozqui tjeznaquiča, ana criichi žoñinacaž ziztaqui inakazza, jalla nii. Nižaza Yoozqui tjeznaquiča, ana criichi žoñinacaž intintitaqui tsjii kjutniča, jalla nii”.

²⁰ Nonžna. Chawjc taku chiiñi žoñinacami, judío cuzturumpinac puntu tjaajiñi žoñinacami, nižaza partir puntu parliñi žoñinacami, jalla ninacaqui inakazza; Yooz puntuquiztan ana zizñinacača. Jalla nuž tjeziča Yoozqui; ninacž takunacami pinsitanacami zumzukazza.

²¹ Tii muntuquiz žejlñi žoñinacaqui persun kuzquiz pinsican anapan Yooz pajasacha. Jalla nuž Yoozqui munchiča. ¿Jaknužt žoñinacaqui Yooz pajasajo? Jalla tižtača. Wejrnacqui Jesucristuž puntuquiztan paljayuča. Nii paljayta taku catokžcu žoñinacaqui werar Yooz pajasacha. Nižaza liwriita cjesača. Ana criichi žoñinacaqui nii liwriiñi taku zumzu takužtakaz nayča. Jalla nuž ninacaž zumzu taku nayanami, Yoozqui muncha, paljayta Yooz taku criižcu, žoñinacaqui liwriita cjequiča, nii.

²² Judío wajtchiz ana criichi žoñinacaqui milajrunacakaz pecča. Griego wajtchiz ana criichi žoñinacazti ninacaž pinsita jarukaz liwriita cjis pecča.

²³ Ana walipanča nižta kuzziz žoñinacaqui. Jesucristuqui ticziča, žoñinaca ujquiztan liwriizjapa. Jalla nii Jesucristuž puntuquiztan wejrnacqui paljayuča, žoñinaca liwriita cjejajo. Pero wejrnacaž Jesucristuž ticžta puntu paljaytiquiztan, Judío wajtchiz žoñinacaqui ana criiz pecča, “¿Kjažt niiča liwriiñi cjesajo?” cjicanaqui. Parti žoñinacazti wejrnacaž paljayta takunaca nonžcu zumzu takužtakaz nayča. Pero lijitum liwriiñi takupanča.

²⁴ Jakzilta Judío wajtchiz žoñinacami yekja wajtchiz žoñinacami Yooziž kjawžta nonžaja, jalla ninacaqui Jesucristuž puntu takunaca zumaž nayča. Nižaza Yooz taku nayča, walja zizniž taku, nii. Nižaza Jesucristuž cjen liwriiñi Yooz aziž pajcha nii Yooziž kjawžta nonžni žoñinacaqui.

²⁵ Ana criichi žoñinacazti Yooz taku zumzu takužtakaz nayča. Pero Yooz takuqui tsjan zumača tjapa zizni žoñinacž tawkquiztanami. Nižaza Yoozqui žoñinaca ujquiztan liwriizjapa juc'ant azzizza čhjul žoñinacžquiztanami. Cruzquiz ch'awctazaž cjen Cristo ana azziztakaz nayča ana criichi žoñinacaqui. Pero cruzquiz ch'awctiquiztan Cristuqui žoñinaca ujquiztan liwriyasača. Ana criichi žoñinacaqui persun aztan anaž liwriyasača. Cristupankazza liwriiñi azzizza.

YOOZIZ KJAWZTA ŽOÑINACA

²⁶ Jilanaca, cullaquinaca, ančhucž cjužzna. Yoozqui ančhuc kjawziča. Jalla nii kjawžta oraqui jila parti ančhucquiztan ana zizni žoñinacatača tii muntuquiz žejlñi žoñinacž yujcquiziqui. Nižaza ana mantiñi žoñinacatača. Nižaza zuma rispitta familianacquiztan anatača jila parti ančhucqui.

²⁷ Yoozqui ančhuc illziča ana zizni žoñinaca cjenami. Nuž muncha ana criichi zizni žoñinaca azkatsjapa ultimquiziqui. Nižaza Yoozqui ančhuc illziča ana mantiñi žoñinaca cjenami. Nuž muncha ana criichi mantiñi žoñinaca azkatsjapa.

²⁸ Nižaza Yoozqui ana rispitta nižaza iñarta žoñinaca illziča, liwriizjapa. Nii žoñinacž puntuquiztan tii muntuquiz ana criichi žoñinacaqui cjiñiča, “Ana čhjuljapa sirwiča”,

cjican cjiñiĉha. Pero ultimquiziqui iñarta žoñinacaž liwriitiquiztan ana criichi rispitta žoñinacaqui inakaz cjiskattaž cjequiĉha.

²⁹ Jalla nuž Yoozqui žoñinaca illz munchiĉha, niž yujcquiz anaž jecmi mitarasi kuzziz cjeyajo.

³⁰ Yoozqui Jesucristuž cjen anĉhucaquiz tsjii ew kamañchiz cjiskatchiĉha. Nižaza Jesucristuqui uĉumnacaquiz Yooz zuma pinsitanaca tjeeziĉha. Jesucristuž cjen uĉumqui zuma cjissiĉha Yooz yujcquiziqui. Nižaza Jesucristuž cjen uĉumqui Yooz kuzcama kamĉha. Nižaza ultimquiziqui tjapa ana walinaquiztanami liwriitaž cjequiĉha uĉumqui. Jalla nužuĉha Yooz zuma pinsitanacaqui uĉumnacaltajapaqui.

³¹ Jalla nižtiquiztan cijjrta Yooz takuqui tuž cjiĉha: “Jakziltat honora waytiz pecĉhaja, persunpachquiziqui honora anaj waytila, antis mañtiñi Yoozquizkaz honoraj waytila”.

2

YOOZ TAKU PALJAYZ PUNTU

¹ Jilanaca, cullaquinaca, wejrqui anĉhucaquiz liwriiñi Yooz taku paljayi tjonchinĉha. Jalla nuž paljaycan ana chawjc tawkžtan paljaychinĉha, tsjii walja zizñi žoñižtakazzi.

² Anĉhucatan želan, Jesucristuž puntuquiztan nižaza Jesucristuž ticžta puntuquiztan jalla niipanikazza weriž paljayaqui. Jalla nuž wejrqui persun kuzquiz tantiichinĉha, ima anĉhucaquiz tjoncan.

³ Anĉhucatan žejlcan, wejrqui humilde kuzziztaĉha, nižaza Yooz eksñi kuzziztaĉha.

⁴ Anĉhucaquiz Yooz taku paljaycan ana chawjc tawkžtan atips pequiñtaĉha, tsjii walja zizñi žoñižtakaz. Pero paljayan, Espiritu Santuĉha niž aztan anĉhuca kuznaca atipchiqui, Jesucristužquin criyajo.

⁵ Yooz aziž tjeežtiquiztan anĉhucaquiz criiskatz pecatuĉha. Ana chawjc taku paljaytiquiztan anĉhucaquiz criiskatz pecatuĉha.

YOOZ PUNTUQUIZTAN INTINTAZ PUNTU

⁶ Pero tsjii tsjii Yooz puntunacaqui ch'amaĉha intintazqui. Jalla nii puntunacazakaz tjaažinz pecuĉha. Pero walja Yooz kuzcama kamñi criichi žoñinacakaz nii puntunaca intintazasaĉha. Jalla nii Yooz puntunacaqui anaž tii muntuquiz kamñi žoñinacž kuzquiz pinsitiquiztan tjonĉha. Nižaza anaž tii muntuquiz mantiñi jilirnacžquiztan tjonĉha. Jalla ninacaqui kataquiĉha, ninacaž pinsitanacžtanpacha.

⁷ Ima tii muntu paacan Yoozqui persun kuzquiz pinsichiĉha, jaknužt žoñinaca liwriyaĉhaja, jalla nii. Ažk watanaca Yoozqui nii liwriiñi puntu ana kjanapacha intintazkatchiĉha žoñinacžquiz. Jaziqui tii timpuquizkaz Yoozqui intintazkatĉha, uĉum nižtan wiñaya kamzjapa. Yoozpachaĉha liwriiñi puntuquiztan tjaažinchiĉha wejtquiziqui. Jalla nii tjaažinta kjanzt'uĉha.

⁸ Tii timpuquiz mantiñi žoñinacžquiztan anaž jecmi liwriiñi Yooz pinsita intintazziĉha. Intintaztasaz niiqui zuma honorchiz Jesucristo Jiliri anaž cruzquiz ch'awctasaĉha ninacaqui.

⁹ Cijjrta Yooz takuqui tuž cjiĉha:

“Yoozqui zumanaca tjaczinchiĉha nižquin sirwiñi žoñinacžtajapa. Nii Yooz tjaczinta zumanacaĉha anaž jecmi cherĉi, nižaza anaž jecmi nonzi, nižaza anaž jecmi persun kuzquiz tantiyi atchiqui”.

¹⁰ Anzimi Yoozqui niž zumanaca Espiritu Santuž cjen uĉumnacaquiz intintazkatchiĉha. Espiritu Santuqui Yooz puntuquiztan zumpacha intintazza, tjapa Yooz puntumi. Jalla nižtiquiztan uĉumnacaquiz intintazkatasasaĉha.

¹¹ Žoñinacaqui persun kuzquiz persun pinsitanacami zizza. Yekja žoñiqui ultimu ana zizza. Jalla nižta irata Yooz Espiritu Santuqui Yooz Ejpž pinsitanacami zizza. Ana ĉjul žoñimi Yooz pinsitanaca zizi atasasaĉha,

¹² Yoozqui učum kuznacquiz niiz persun Espiritu Santo luzkatchičha, niiz persun pinsita intintazkatajo. Ana criichi zoñz kuzqui Yooz pinsitanaca anapan intintazkati atasacha. Jalla nižta kuz učumnacaltaqui ana žejlčha.

¹³ Wejrnacqui Yooz puntu intintazcu, ančhucaquiz Yooz pinsitanaca tjaajinchinčha. Zoñiz tjaajinta jaru nižaza zizni zoñz chawjc tawk jaru anal tjaajnučha. Pero Yooz Espiritu Santuž tjaajinta jaru, jalla niil tjaajnučha. Jaziqui Yooz pinsitanaca tjaajnučha Espiritu Santuž irpita criichinacžquin.

¹⁴ Jakzilta zoñit ana Yooz Espiritu Santuž irpitažlaj niiqui, Espiritu Santuž tjaajintanaca anaž catokčha. Zumzu tjaajintanacažtakaz nayčha. Jalla nižtiquiztan ana Espiritu Santuchiz zoñinacaqui anapanž Yooz tjaajintanaca intintazasačha. Yooz Espiritu Santuž irpita zoñinacapankaz Yooz puntu tjaajintanaca intintazasačha.

¹⁵ Espiritu Santuž irpita zoñinacaqui tjapa tjaajintanaca tantiyasačha, Yoozquiztan tjonni taku cjicu, už zoñžquiztan tjonni taku cjicu, jalla nii. ¿Pero ana Espiritu Santuž irpita zoñinacaqui Espiritu Santuž irpita zoñz taku ana tantiyasačha, nižaza criichi zoñinacžquiz Yooz puntu ana tjaajnasacha? ¿Kjažtiquiztan nižta cjesajo?

¹⁶ Yoozqui niiz Espiritu Santuž cjen učumnacaquiz Cristuž pinsitanaca tjaajza. Jaziqui zizza. Cjijrta Yooz takuqui, tuž cjičha: “Anaž jecmi persun kuzquiztan Yooz pinsitanaca zizasacha. Jaziqui anaž jecmi Yoozquiz tjaajnasacha”.

3

ANA CRIICHI ZOÑINACAŽTAKAZ ANACHA KAMZQUI

¹ Jilanaca, cullaquinaca, wejrqui ančhucaquiz tjapa Yooz puntu imazil tjaajzni atučha. Ančhucqui imazi zuma intintazasačha. Cristužquiz criichi cjenami Yooz Espiritu Santuž tjaajinta jaru ana zuma kamiñchucčha. Persun kuzcama kamiñchucčha, kolta ocjalanacažtakaz.

² Jalla nižtiquiztan wejrqui Cristuž puntuquiztan tsjii kjaž tjaajintanacakaz ančhucaquiz tjaajinchinčha. Jaknužt tsjii wawaqui lichicčha, nižaza anaž čhjeriqui luli atčha, jalla nižta irataž ančhucqui. Imazi Yooz tawk čhjeri intintazasačha. Imazičha Yooz tawk čhjeri lujlžquinaqui ančhucqui.

³ ¿Kjažtiquiztan nižtajo? Ančhucčha ana criichi zoñinacažtakazqui. Ančhucpora quintras pequiñchucčha, nižaza ch'aas pequiñchucčha, nižaza pjali cjicjiz pequiñchucčha. Jalla nuž anawali kamcan iyazičha Yoozquin zuma sirwiñnacčhucqui. Nuž anawali kamcan, ana criichi zoñinacažtakazza.

⁴ Yekjapanacaqui ančhucaquiztan cjičha, “Wejrqui Pabluž t'akquiztančha”. Yekjapanacazti cjičha, “Wejrqui Apolos t'akquiztančha”. Jalla nuž chiichiican ana criichi zoñinacažtakaz kamčha.

YOOZ TAKU TJAAJIÑINACŽ PUNTU

⁵ ¿Ject Apolosjo? ¿Ject Pablojo? Wejrnacaz Yooz taku paljaychiž cjen ančhucqui Jesucristužquin criichinčhucčha. Wejrnacqui Yoozquin sirwiñkactčha. Yoozqui zapa mayniž wejtnacaquiz sirwiz langz tjaachičha.

⁶ Jalla nižtiquiztan Yooz taku paljaychinčha, tsjii zkal čhjaqui kalltažokazzi. Wiruñaqi Apolosqui ančhucaquiz iya Yooz taku paljaychizakazza, jaknužt zkalquiz kjaztan jawiyaz, jalla nižta. Ultimquiziqui Yoozpachačha zuma kamañchiz ančhucaquiz cjiskatchiqui, tsjii zuma zkalažtakaz.

⁷ Jalla nižtiquiztan nii čhjaciñimi nii jawiñimi anaž čhjulumi. Yoozpančha chekanaqui. Yoozqui zoñinacž kuzquiz langža, tsjii čhjecta žkalažtakaz zuma pakzjapa.

⁸ Čhjaciñimi jawiñimi tsjiikazza ninacaqui. Yoozqui zapa maynižquiz pacaquičha niiz langztiquiztan jama.

⁹ Wejrnacqui Yooztajapa langzni mazinactčha. Ančhucqui Yooz langžta yok cuntičhucčha. Nižaza ančhucqui Yooz kjuyta kjuya cuntičhucčha.

YOOZTAJAPA LANGZ PUNTU

¹⁰ Yoozqui niž kuzcama wejr apóstol puestuquiz utchiča. Jalla nekztan Yooz taku paljaychinča, zoñinaca Jesucristužquin criyajo. Wejrqui kjuya kjuyñi maestružtakaztča. Yooz kjuy simintu langzinča. Nekztan Yooziž tjaata langzquiztan jama yekjapaqui Yooz kjuya pirkichiča. Weriz kalltita kjuy simint juntuñ jakziltat pirkačhaja, zumpachaž pirkiz waquiziča.

¹¹ Wejrqui Jesucristuž puntuquiztanpankaz tjaajinchinča. Jalla nii tjaajintaqui Yooz kjuy simintužtakazza. Tsjemat simintuqui anača Yooz kjuyjapaqui.

¹² Nii Yooz kjuy simint juntuñ punta punta pirkitamiz cjesača. Koržtan, paaztan, zuma maznacžtan, jalla ninacžtan pirkitaž cjesača. Nižaza pirkitaž zakaz cjesača tabližtan, cañžtan, pjitžtan jalla ninacžtan.

¹³ Pero zapa mayniž langžtaqui kjanapacha tjeežtaž cjequiča Yooz pjalz tjuñquiziqui. Yoozqui ujžtanžtakaz tankataquiča. Nii ujžtan zapa mayniž langžta yatizinskataquiča, zuma langžta, ana zuma langžta, jalla nii.

¹⁴ Jakziltiz langžtat ujžtan tankattiquiztan tjuračhaja, jalla niiqui zuma pactaž cjequiča.

¹⁵ Jakziltiz langžtat ujsnačhaja, jalla niiqui ana pactaž cjequiča. Pero nii zoñž wirakaz infiernuquiztan livriita cjequiča, niž langžta pertissi cjenami.

CRIICHI ZOÑINACAQUI YOOZ TIMPLU CUNTACHA

¹⁶ Ančhucqui Yooz timplu cuntača. Yooz Espiritu Santuqui ančuca kuznacquiz kamča. ¿Jalla nii ana ziz ančhucjo?

¹⁷ Yooz timpluqui Yooztajapapanča. Ančhucpachača Yooz timplučhucqui. Jalla nižtiquiztan jakziltat ančhuc akačhaja, nii ančhuc akñi zoñiqui zakaz akta cjequiča; Yooziž castictaž cjequiča.

ANA CRIICHI ZOÑINACŽ ZIZTAQUI

¹⁸ Ančhucqui anaž jecžquizmi incallskata. Jakziltat ančucaquiztan zoñinacž tjaajintanaca zuma zizñizlaja, jalla niiqui nii tjaajintanacžquiz anača kuz tjaazqui. Pero Yooz puntuquiztan tjaajintanacžquizkaz kuz tjaaz waquiziča, nekztan lijitum zizñi zoñi cjequiča.

¹⁹ Zoñž kuzquiztan ziztaqui zumzu ziztažtakazza Yooz yujcquiziqui. Cjijrta Yooz takuqui tuž cjiča: “Jakzilta zoñit zoñiz pinsita jarukaz kamčaj niiqui, jalla nižta kamtiquiztan Yooziž tantaž cjequiča, casticta cjisjapa”.

²⁰ Nižaza cjijrta Yooz takuqui, tuž cjiča: “Tjapa ana criichi zoñinacž pinsitanaca inakazza. Jalla nii zizza Yooz Jiliriqui”.

²¹ Jaziqui anača zoñž kuzquiztan tjaajintaqui kuzquiz sint'izqui, “Jalla nii zoñiqui zumaž tjaajinča”, cjicanaqui. Yoozqui tjapa ančucaquiz tjapa zumanaca tjaacha.

²² Tjappachača ančhucaltaqui, Pablumi, Apolosmi, Pedrumi, tii muntuquiz žejlñimi, žetimi, ticzmi, tii anzta žejlñimi, tii jazta žejlñimi, tjappacha ančhucaltača, Yoozquin sirwiz yanapzjapa.

²³ Nižaza ančhucča Cristužtajapaqui. Nižaza Cristučha Yooz Ejpžtajapaqui.

4*YOOZ SIRWIZ PUNTU*

¹ Wejrnacqui Yooz sirwiñi zoñinacakaztča. Wejrnacaž Yooz sirwan, Yoozqui wejtnacacquiz niž tuquita chjozaka pinsitanaca tjaajinchiča, parti zoñinacžquiz tjaajnajo. Jalla nuž ančhucqui wejtnaca puntuquiztan pinsiz waquiziča.

² Jakziltizquiz Yoozqui tjaajinčhaja, jalla nii tjaajintacama parti zoñinacžquiz tjaajinstanča nii zoñiqui. Jalla nužupan waquiziča.

³ Weriž tjaajintaqui yatisinžtaž cjequiča. Pero ančhucqui weriž tjaajinta yatisinžnaquiž niiqui, čhjul žoñimi weriž tjaajinta yatisinžnaquiž niiqui, wejtquiz anaž impo-rtičha. Werjpachami ultimu ana yatisinžnasača. Yoozkazza ultimu yatisinžkatñiqui.

⁴ Wejrqui persun kuzquiz ana čhjul uj wachučhaj niimi, Yooz yujcquiziqui cunamizłani wejr ujchiztni. Ultimquiziqui Yooz Jiliričiqui wejr yatisinžkataquiča.

⁵ Jalla nižtiquiztan ančhucqui Yooztakaz anaž yekjapanacžquiz tantiž waquiziča, ima pjalz tjuñi tjonanaqui, nižaza ima Jesucristo Jiliriž tjonanaqui. Ultimquiziqui Jesucristo Jiliričiqui chjojta anawalinaca kjanapacha tjeeznaquiča. Nižaza tjapa žoñinacž kuzquiz pinsitanaca tjeeznaquiča, zumpacha pjalzjapa. Jakziltami zuma lijituma ulnačhaja, jalla niiqui honorchiz cjequiča; Yooziž tjaata honoržtan.

MITARAZI KUZZIZ ŽOÑINACA

⁶ Jilanaca, cullaquinaca, Apolužtan wejttan jalla nii wejtnaca puntuquiztan chiyučha, ančhucquiz tjaajznajo. Wejtnacaž tjaajintami nižaza kamtami Yooz tawk jaručha. Jalla nuž nayžcu, ančhucmi Yooz tawk jaru kamñi kuzziz cjee. Anača mitarazi kuzziz cjiicjiisqui, “Wejt Yooz taku tjaajiñiqui juc'ant zumača; am Yooz taku tjaajiñiqui anal pecučha”, cjicanaqui.

⁷ ¿Ject ančhuca t'aka parti žoñinacžquiztan tucquin uchjo? Ančhuca t'akaž juc'ant waližlaj niiqui, Yoozpankaz juc'ant wali cjiskatchičha. Ančhucqui anača persunpacha wali cjisnasača. Jalla nižtiquiztan anača atinaru kuzziz chiichiizqui, “Juc'ant waliča wejt t'akaqui”, cjicanaqui.

⁸ ¿Ančhucqui wejrnac wirquin ecchinčhucjo? ¿Ančhucqui tjapa Yooz puntunaca zizjo? ¿Wali chawjc jilirinacažtakaz ančhucqui kuzquiz sint'ejo? ¿Wejrnac wirquin ecchinčhucjo? Ultimquiziqui ančhucqui anača nižta. Jalla nižta cjenaqui walipanž cjesača. Neesaj wejrnacmi ančhuca partiquiz cjiwčhani, ančhucatan chica jilirinaca cjisjapa.

⁹ Ančhucqui nayča, Yoozqui wejrnac apostolonaca wirquin ectača, conta cjisjapa utžta žoñižtakaz, jalla nii. Žoñinacami anjilanacami nižaza tjapa tii muntuquiz žejlñinacami wejtnacaquiz chekža. Ana wali žoñinacažtakaz wejtnacaquiz chekža.

¹⁰ Wejrnacaž Jesucristuž puntuquiztan paljayan ana criiči žoñinacaqui cjiñičha, “Zumzu žoñinacčhucča”. Nuž cjicanž wejtnacaquiz iñarča. Ančhuczti persun puntuquiztan pinsiñčhucča, “Cristuž cjen zuma zizñi žoñinactča wejrnacqui”, cjicanaqui. Wejrnac apostolanacaqui humilde kuzziztča. Ančhuczti persun puntuquiztan pinsiñčhucča, “Tjup kuzziztča”, cjicanaqui. Wejrnacqui iñartača. Ančhuczti rispitta žoñižtakazza. Ultimquiziqui ančhucqui anača nižta.

¹¹ Anzcama wejrnac apostolanacaqui ancha sufručha čhjerquiztanami kjazquiztanami, nižaza zquitquiztanami. Nižaza wejrnacqui kichtača. Nižaza anača wejrnacqui žejlž kjuychiztqui.

¹² Nižaza persun kjaržtan očañcama langznuča. Žoñinacaž wejtnacaquiz iñaranami zuma tawkžtan kjaaznuča. Nižaza žoñinacaž wejtnacaquiz ana wali paanami, zuma tjurt'iñi kuzziz awantuča.

¹³ Žoñinacaqui wejtnaca puntuquiztan quintra chiiča. Jalla nuž quintra chiyanami, wejrnacqui zuma pazinziz kuzziz chiižinuča. Nižaza žoñinacaqui wejtnacaquiz tsjii cjujchi irataž cherča, nižaza wirquinpanž tewjcža tsjii juc'ant ana zuma kamñi žoñižtakaz. Jalla nuž wejtnacaquiz watča.

¹⁴ Jalla nuž cjiyržcuča ana ančhuc azkatzjapa, antiz ančhucquiz chiižinžcuča wejt k'ayi maatinacaž cjen.

¹⁵ Weriž Jesucristuž puntuquiztan paljaytiquiztan, ančhucqui Jesucristužquin criičinčhucča. Jaziqui wejrqui ančhuca ejp cuntitča. Kjažtamit ančhucquiz wacchi tjaajiñinaca, nižaza irpiñinaca želačhani, tsjii ejpchizčhuckazza.

¹⁶ Jalla nižtiquiztan jaknužt wejr zuma kamučhaja, jalla nižta ančhucqui zuma kamz waquiziča.

¹⁷ Jalla nižtiquiztan wejt k'ayi Timoteo cuchanžcuča, ančhucaquiz cjuñkatzjapa, jaknužt wejrqui Jesucristo sirwican kamtučhaja, jalla nii. Nižaza tjapa kjutñi tjapa iclizziz žoñinacžquizimi tjaajnuča, jaknužt žoñinacžlaqui Cristuž kamañchiz kamzlaja, jalla nii. Jalla nuž Timoteoqui ančhucaquiz cjuñkataquiča. Timoteoqui zuma cumpliñi žoñiča. Timoteoqui weriž cjen Jesucristužquin criichiča.

¹⁸ Yekjapanacaqui ančhucaquiztan mitarazi kuzziz cjissinčhucča. Tuz pinsichinčhucča, “Pabluqui anapanž tjonzñi tjonasaka”, cjican.

¹⁹ Yooz munan, wejrqui wajillaž tjonacča. Nekztan wejrqui nii mitarazi kuzziz žoñinacaž langžta obra pajača, nižaza jaknižta kamañchizlaja, jalla nii. Nii žoñinacaž chitami wejtquiz anaž importiča.

²⁰ Yooz mantuquiz kamcan, Yooz aztan zuma kamstanča. Jalla niiča chekanaqui; chiita takunacakazza anaž chekanaqui.

²¹ ¿Jaknužt ančhuc pecjo? ¿Ančhuc casticzjapa, wejrqui tjonz waquiziya? ¿Už humilde kuzziz k'ayachtican tjonz waquiza ja'? ¿Weriž tjontanaqui kjaž cjiñiž pec ančhucjo?

5

ANA WALI KAMTA QUINTU

¹ Jilanaca, cullaquinaca, wejtquin tsjii ana wal quintu tjonchiča, ančhucaquiztan tsjiiqui niž wiri maa persun tjun tjacsiquiča. Jalla niiqui juc'ant anawaliča. Ana criichi žoñinacami ana nuž paača.

² Jalla nuž cjenami ančhucqui tirapan mitarazi kuzzizčhucča. Pero ančhucalaqui llaquit kuzziz cjis waquiziča. Jalla nižta ana wali paañi žoñiqui ančhucaquiztan jaytitaj cjila.

³ Wejrqui ančhucatan ana chica želuča. Jalla nuž cjenami, kuzquiz llaquita sint'izcuča. Nuž sint'izcu wejrqui nii uj paañi žoñž puntuquiztan tantiichinča, ana wali paača, jalla niiqui.

⁴ Ančhuczi wejt llaquita kuz cjuñžcan, Jesucristo Jilirž tjuuquiz ajcnaquiča nii uj paañi žoñž puntu tantiizjapa. Jalla nuž ajczcu, Jesucristo Jiliriqui niž aztan ančhucatan chicaž cjequiča.

⁵ Nekztanaqui ančhucqui nii uj paañiqui Satanasquiz intirjaquiča, niž curpu t'akjisajo. Niiž curpu t'akjistiquiztan cunamit niž kuzqui azquichta cječhani. Jalla nekztanaqui Jesucristuž tjontanaqui niž animuqui livriita cječhani.

⁶ Ančuca mita kuzziz cjisqui anawaliča. Jalla tii chiita taku cjuñžna, “Koloculla liwratuqui tjapa t'anti maza t'amča”. Jalla nižta iratača nii anawal žoñiqui ančhucatan chica kamcan parti žoñinacžquiz anawali cjiskatasacha.

⁷ Tjapa ančuca anawali kamañanaca eca, zuma kamañchizpan cjisjapa. Jesucristuqui učhum cuntiquiztan tsjii wilanažtakaz ticziča, učhum ujquiztan ana casticta cjejajo. Jalla nižtiquiztan ančhucqui ana ujchizza Yooz yujcquiziqui. Tsjii zuma t'anti maza cuntičhucča.

⁸ Jaknužt pascua pjižsta paañinaca zuma kamañchiz cjis pecčhaja, jalla nižta irata učhumqui zuma kuzziz cjis waquiziča, nižaza Yooz kuzcama ligituma kamz waquiziča. Anazuma kuzziz, nižaza anazuma kamañchiz, jalla nižta kamz ana waquiziča.

⁹ Tuquiqui cartiquiz cjižžquichinča tuž cjican: “Adulterio paañinacžquiztan jaytaquiča, nižaza nižta paañinacžtan anaž cumpant'iz waquiziča”.

¹⁰ Jalla nuž cjižžcu wejrqui ultimupan anal cjiwča, tjapa ana criichi adulterio paañinacžtan ana želajo. Ana criichi žoñinacaqui anawaliž paača, adulteriuquiz

ojklaycha, niżaza cusanaczquiz kuz tjaača, niżaza tjañi zaača, niżaza žoñiž paata yooznaca sirwiča. Tii muntuquiz niža anawali paañi žoñinaca panž žejlča.

¹¹ Yekjapanacazti “Yoozquin criyuča” cjican, anawali paača; adulteriuquiz ojklaycha, niżaza cusasanaczquiz kuz tjaača, niżaza žoñiž paata yooznaca sirwiča, niżaza anawal takunaca joojooča, niżaza licča, niżaza tjañi zaača. Jalla niža anawali paacan jakziltat Yoozquin criyuča” cječaj niiqui, jalla niža žoñinacztan ana ojklayaquiča. Niżaza anača niža paañinaczтанаqui čherimi lujlsqui. Panž ana cumpant'auquiča.

¹² Wejrqui ana criichi žoñinaca anača wejtlaqui tantiistanqui. Antiz učumqui icliz žoñinaca tantiistanča, ujchiz ana ujchiz, jalla nii.

¹³ Nii uj paañi žoñi jaytitaj cjila. Pero Yoozqui nii ana criichi žoñinaca tantiyaquiča, casticzjapa.

6

QUIJZ PUNTU

¹ Jakziltat tsjii jilž quintra quijačhaja, jalla niiqui ana criichi juez yujcquiziqui anaž quijz waquiziča. Pero criichi jilanaczquin quijspanča.

² Jesucristuž tjontan criichi jilanacaqui tjapa ana criichi žoñinacz puntu jusjisaquiča. ¿Nii ana ziz ančhucjo? ¿Tjapa ana criichi žoñinacz puntu jusjisaquiž niiqui, kjažt tsjii quija ana azquichi atasajo?

³ Criichi žoñinacaqui anjilanacz puntu zakaz jusjisaquiča. ¿Nii ana ziz ančhucjo? Jaziqui anjilanacz puntu jusjisaquiž niiqui, ¿kjažt tii muntuquiz žejlñi quija ana azquichi atasajo?

⁴ Ančhucaquiz quijanaca želaquiž niiqui, ¿kjažt ančhucqui ana criichi žoñžquin quiijo? Criichinaczquiztanaqui anaž čhjulumini nacauqui.

⁵ Jalla nuž tii puntuquiztan chiižinuča ančhuc azajo. Ančhucaquiz quijanacača anaž cjichuca. ¿Tsjii quija želan, ančhucaquiztan anaj azquichi atñi žoñi žejl, kjažtatajo?

⁶ Ana criichi jilirž yujcquiz quijas, ¿kjažtatajo?

⁷ Quija želanaqui, kjanapacha tjeeža, ančhucaquiz ana waliča, jalla nii. Nii criichi jilaž uj paatiquiztanaqui nuž pasinza paachucakazza. Niżaza awantichucakazza.

⁸ Pero ančhucpachača persun criichi jilanacz quintra payiñchucqui, ana walinaca paacan niżaza tjañi zaacan, jalla nuž.

ARAJPACHQUIN KAMZ PUNTU

⁹ Ana wali kamañchiz žoñinacaqui anaž arajpach wajtquin Yooztan chica kamasacha. ¿Jalla nii ana ziz ančhucjo? Jaziqui ančhucqui anača incallta cjisqui. Arajpachquin anaž okaquiča tii žoñinacaqui: adulteriuquiz ojklayñinaca, niżaza žoñiž paata yooz sirwiñinaca, niżaza pampa cjicjiñi zultirunaca, niżaza luctakpora tsjii luctakžtan tsjii maatakžtantakaz cjeyasñinaca.

¹⁰ Niżaza tjañinaca, niżaza cusasanacquin kuz tjaañinaca, niżaza licchinaca, niżaza quintra chiičhiñinaca, niżaza žoñinaczquiztan kjañž pecñinaca. Jalla tjapa niža žoñinacaqui arajpachquin anapan okasača Yooztan wiñaya kamzjapa.

¹¹ Ima Yoozquin criicanaqui yekjap ančhucqui nižtatača. Anziqui Jesucristo Jiliriž cjen, niżaza Yooz Espiritu Santuž cjen ančhuca ujnacaqui pertuntača. Jalla nižtiquiztan ančhucqui Yooz partiquiz cjissiča, niżaza Yooz yujcquiziqui walikaz ana ujchiz cjissiča ančhuca ujquiztan liwriita.

YOOZTAPACHA UCHUMQUI

¹² Jilanaca, cullaquinaca, tsjiilla cjesača. Yekjapa ančhucqui chiičhani, criichi žoñiqui liwriitaž cjen čhjulu paazmi paasača. Pero čhjulu paazmi zuma kamañchiz

kamzjapa anaž yanapča. Chjulu paazmi paasača, pero čjul paazami ana wejt kuz atipskatz pecuča.

¹³ Tužuča razunaqui. Chjeriqui pjuchjapača. Nižaza pjuchqui čhjerijapača. Ultimquiziqui Yoozqui piscpacha liwj tucužinzkataquiča. Tužuzakazza razunaqui, učum persun curpuqui anača adulterio paazjapaqui. Antiz učum curpuqui Jesucristo Jiliržquiz sirwiñijapača. Nižaza Jesucristo Jiliriča učum curpuž mantiñiqui.

¹⁴ Yooz Ejpqui Jesucristo Jiliri jacatatskatchiča. Nižaza Yoozqui niž persun aztan učum curpunaca jacatatskataquiča.

¹⁵ Učum curpunacaqui Jesucristužtajapača. ¿Jalla nii ana ziz ančucjo? Jalla nižtiquiztan ¿kjažt criichi žoñž curpuqui putirii maatakžquin tjaata cjesajo? Anapanž cjichuca.

¹⁶ Jakzilta žoñit putirii maatakžtan adulterio paačhaj niiqui, nuž pucultan tsjii curpuchiztakaz cjissa. Cjijrta Yooz takuqui tuž cjiča: “Luctakžtan maatakžtan lucutiñi cjequiž niiqui, tsjii curpuchiztakaz cjisnaquiča”. ¿Jalla nii Yooz taku ana ziz ančucjo?

¹⁷ Nižaza jakzilta žoñit persun kuz Jesucristo Jiliržquin tjaaquiž niiqui, nuž pucultan tsjii kuzziz cjissa.

¹⁸ Adulterio cjcjisqui anapanž pecalla. Jalla nižta paaquiž niiqui, persunažtajapa quintraž paača. Parti paata ujnacaqui, anaž nii adulterio ujžtapachaqui.

¹⁹ Ančuca curpuqui Yooziž tjaata Espíritu Santuž kjuya timpluča. Jalla nižtiquiztan Espíritu Santuqui ančucaquizpacha žejlča. ¿Jalla nii ana ziz ančucjo? Ančucqui patrunchizpanča.

²⁰ Yoozqui ančuc kjaychiča, wali preciužtan, Jesucristuž ljocžtan. Jalla nižtiquiztan ančuca curpuquiztanami kuzquiztanami Yooztajapa honora waytiz waquiziča. Jalla nuž pizcpacha Yooztajapanča. Jilanaca, anača uj paazqui.

7

ZALZ PUNTU

¹ Jaziqui amiž cjijrta pewcžtanacquiz kjaaznasača. Jaziqui tii chiižinuča. Ana zalzqui walikazza.

² Jalla nuž cjenami tii timpuquiz zalz waquiziča, ana adulterio ujquiz tjojtsjapa. Jalla nižtiquiztan zapa luctaka tsjaa maatakžtan zalz waquiziča. Nižaza zapa maataka tsjii luctakžtan zalz waquiziča.

³ Tsjii lucuqui zuma lucužta cjispanča persun maatakžtanaqui. Nižaza tsjaa tjunqui zuma tjunažta cjispanča persun luctakžtanaqui.

⁴ Tjuna curpuqui persun lucžtajapanča. Nižaza lucž curpuqui persun tjunalta-japanča.

⁵ Nižaza porapat lucutiñi curpu tjaa-asaquiča. Porapat tsjii acuerduquiz luzasaquiž niiqui, tsjii kjažtallaž nicasasača, Yoozquin mayizizquin kuz tjaazjapa. Nii acuerduquiz luzta timpu wattan, nii lucutiñiqui ana iya nicz waquiziča. Tira nicaquiž niiqui persun curpu ana ewjazñi atačhani, nekžtan Satanás diabluqui nii ana ewjazñi attiquiztan nižaza nictiquiztan adulteriuquiz tjojtskatasacha.

⁶ Nekžtan jalla tuž chiižinuča, pero anal ultimu mantuča.

⁷ Wejrqui ana zalzničha. Jalla nižta kamñiž cjičhaj tjapa ančucqui, jalla nižtal pecuča wejrqui. Pero Yoozqui zalz kamaña, nižaza ana zalz kamaña tjaacha. Jalla nižtiquiztan zapa mayni niž persun Yooziž tjaata kamañ jaru kamstanča. Jalla niiqui walikazza.

⁸ Zultiržquizimi, žew luctakžquizimi žew maatakžquizimi tuž chiižinuča ančucaquiz. Wejr irataž cjičhaj ančucqui, ana zalžni. Jalla niiqui waliž cjesacha.

⁹ Anchapanž zalz pecĥaj niiqui, zalzna cjichucaĥa. Ana zalzcanpacha niŕaza ancha maataka peccan ŕelasaž niiqui, ujquiz tjojtznasaĥa. Jalla nuŕ cjenacqui zalzla cjichucapanikazza.

JALJTIZ PUNTU

¹⁰⁻¹¹ Zalzi ŕoñinaca, anĥucaquiz wejr mantuĥa, jalla tuŕ. Tsjaa tjunqui naaŕa persun luctakŕtan ana jaljtiz waquiziĥa. Niŕaza tsjii lucuqui niŕ persun tjunatan ana jaljtiz waquiziĥa. Jaltaquiz niiqui, ana iya yejkŕtan zalznasaĥa. Pero nii lucutiñ ŕoñiqui porapat pertunas waquiziĥa. Jalla tii mantitaqui anaĥa weriŕ mantitakazzi, Yooz Jiliriŕ mantitapanĥa.

¹² Parti ŕoñinacŕquiz chiiŕinuĥa, tii chiiŕintaqui ana Yooziŕ mantitaĥa. Tsjii criichi ŕoñiqui ana Yoozquin criichiñ tjunchizlaj niiqui, niŕaza naa tjunqui lucutiñipan kamz pecĥaj niiqui, nii criichi lucuqui ana jaljtiz waquiziĥa.

¹³ Niŕaza tsjii criichi maatakaqui ana criichi lucchizlaj niiqui, niŕaza naaŕa lucuqui lucutiñipan kamz pecĥaj niiqui, naa criichiñ tjunqui ana jaljtiz waquiziĥa.

¹⁴ Naaŕa cjen Yoozqui naaŕa ana criichi lucu cwitiĥa. Niŕaza Yoozqui ana criichiñ tjun cwitiĥa naaŕa Yoozquin criichi lucchiz cjen. Ana niŕta cjequiŕ niiqui, nii lucutiñ maatinacaqui ana criichi ŕoñinacŕ maatinacaŕtakaz cjesaĥa. Pero Yoozqui nii lucutiñ maatinaca cwitiĥa.

¹⁵ Pero tsjii ana Yoozquin criichi lucumi uŕ tjunmi jaljtizpanž pecĥaj niiqui, tsjiikaj jaljtila cjichucaĥa. Jalla niŕta wataquiŕ niiqui nii Yoozquin criichi lucu cjicu uŕ tjun cjicu jaljtasaĥa, porapat zuma kamasajo, ana wali kamchuca cjenacqui. Yoozqui uĥum criichinaca kjawzicha, zuma kamajo.

¹⁶ ¿Criichi lucuqui niŕ ana criichiñ tjun ultimu Yoozquin criiskatasajo? Ana zizzucaĥa. ¿Niŕaza criichiñ tjunqui naaŕa ana criichi lucu ultimu Yoozquin criiskatasajo? Ana zizzucaĥa.

YOOZIZ TJAATA KAMAÑ JARU KAMZ WAQUIZICHA

¹⁷ Zapa mayniqui Yooziŕ tjaata kamañ jaru kjaŕtachichimi kamz waquiziĥa. Yooziŕ kjawŕtaŕ cjen tsjii wira kamchinĥucĥa. Jalla nii wira ana Yooz quintraŕlaj niiqui, niŕta kamzquiz cjesaĥa. Jalla nuŕupan mantuĥa tjapa iclizziz ŕoñinacŕquin.

¹⁸ Criiz oraqui jakziltat judío ŕoñŕ chimpanaŕlaj niiqui, chimpana ŕela. Niŕaza criiz oraqui jakziltat ana chimpanaŕlaj niiqui, ana chimpanskata.

¹⁹ Chimputamami ana chimpanamami anaŕ importiĥa. Yooz mantitacama kamzqui, jalla niiĥa importaqui.

²⁰ Yoozquin criiŕcuqui ĥjul ŕoñimi ĥjul kamañchizlaja, jalla nii kamañquiz cuntintu ŕejlzkazza.

²¹ Criiz oraqui ŕoñŕ mantuquiz ŕejlcanami, amqui ana kuz turwayskataquiĥa. Nekŕtan, jalla nii ŕoñŕ mantuquiztan liwriita cjesaŕ niiqui, pan ulnaquiĥa, liwrii cjisjapa.

²² Jakzilta criichi ŕoñit ŕoñŕ mantuquizlaj niiqui, nii ŕoñŕ mantuquiz tira ŕejlcanami, cjuñzna, Jesucristo Jiliriŕ liwriitaĥa, nii. Niŕaza jakzilta criichi ŕoñit ŕoñŕ mantuquiz ana ŕejlĥaja, tii cjuñzna, Jesucristuŕ mantuquiz ŕejlĥa, nii.

²³ Yoozqui anĥuc kjaychiĥa wali jila preciuŕtan. Cristuŕ ljokĥa nii preciuqui. Jalla niŕtiquiztan ŕoñŕ mantuquiz anaĥa cjiskatsqui.

²⁴ Yoozquin criiŕcuqui ĥjul ŕoñimi ĥjul kamañchizlaja, jalla nii kamañquiz ŕejlŕ waquiziĥa. Kjaŕtachichimi cuntintu cjequiĥa Yooztan chica kamchiŕ cjen.

ZALZ PUNTU

²⁵ Yoozqui wejtquiz ana taku tjaachiĥa zultirunacŕ puntuquiztan. Pero, wejrqui tuŕ chiiŕinuĥa. Niŕaza cjuñzna, Yoozqui wejtquiz apóstol kamaña cumpjiichiĥa. Niŕaza nii apóstol kamañ jaru panž kamuĥa. Wejrqui Yooziŕ illŕtitĥa niŕquin sirwizjapa. Jalla niŕtiquiztan weriŕ chiiŕinta tawkquiz kuz tjaaz waquiziĥa.

²⁶ Tuž chiižinuča. Tii timpuquiz kamzqui ch'amača criichi zoñinacžtajapaqui. Jalla nižtiquiztan čjul kamañchizlaja, jalla nii kamañquiz žejlz waquiziča. Zalzižlaja, zalzi žela; ana zalzižlaja, ana zalz waquiziča.

²⁷ Jakziltat tjunchiz cječhaja, anaž persun maatakžtan jaljtiz waquiziča. Nižaza ana zalzi žoñiqui maataka kjurz ana waquiziča.

²⁸ Pero jakziltat zalznačhaja, jalla nii zalžtaqui anača ujqui. Nižaza jakzilta turt zalznačhaja, jalla nii zalžtaqui anača ujqui. Tii ch'ama kamz timpuquiz zalžñinacžquiz juc'ant llaquinaca cjequiča. Wejrqui anaj nižta llaquita kamjaa ančhuc cjiwčhiya.

²⁹ Jilanaca, cullaquinaca, tii walja ch'ama kamz timpuqui ana ažka tjuraquiča. Jalla nižtiquiztan tekztan nawjcchuc tjunchiz zoñinacaqui anaž tjunaquiz juc'anti kuz tjaaquiča. Antiz Yoozquin juc'anti kuz tjaaquiča.

³⁰ Nižaza llaquita žejlñi zoñinacaqui anaž ancha llaquisaquiča. Yooztan kamchiž cjen cuntintu cjequiča. Nižaza čjulquiztan chipsñi zoñinacaqui anaž juc'anti kuz tjaaquiča chipchipsquiziqui. Yoozquin juc'anti kuz tjaaquiča. Nižaza cusasanaca kjayñi zoñinacaqui anaž juc'anti kuz tjaaquiča kjayta cusasanacquiz.

³¹ Tii muntumi nižaza tii muntuquiz žejlñimi tucuzinžnaquiča. Jalla nižtiquiztan jakziltat tii muntuquiz želinchiz cječhaja, anaž nii želinchizquiz kuz tjaaquiča. Antiz Yoozquin juc'anti kuz tjaaquiča.

³² Ančhucqui tii muntu kamcan kuz turwayzquiztanaqui liwriitakaj cjeejal cjiwčhiya. Ana zalzñi zoñinacaqui Yooz kamañquizkaz kuz tjaašpanča; Yooz kuz cuntintu cjiskatz pecča.

³³ Zalzñi zoñinacžti Yoozquin sirwicanami tii muntu kamañquiz kuz tjaača, persun tjun cuntintu cjisjapa.

³⁴ Nižaza zalzi maatakž kamañžtan zultir maatakž kamañžtan anača tsjiikaz. Ana zalzi maatakqui Yooz kamañquizkaz kuz tjaača. Curpumi kuzmi Yoozquin sirwizquin tjapa kuz tjaača. Pero zalzi maatakžti Yoozquin sirwicanami tii muntu kamañquiz kuz tjaača, persun lucu cuntintu cjisjapa.

³⁵ Tii weriž chiižintaqui ančhucalta wali cjisjapača, anaž ančhuca atajzjapa. Nižaza tii weriž chiižintaqui ančhucacquiz zuma kami yanapzjapača, nižaza Yoozquinpankaz tjapa kuz tjayi yanapzjapa.

³⁶ Tsjiilla cjesača, zalz puntuquiztan zakaz. Jakzilta zoñžtat tsjaa majt želačhaja, zalz irarquiz tjonchiñ, nižaza ancha zalz pecchiñ. Ana chajalztiquiztan niž kuz turwayskatčhaj niiqui, tuž chiižinuča. Niiž tur chjalz wali tantiižcu, chjalznasača. Nii chjalzqui anača ujqui.

³⁷ Tii puntu iyal chiižinuča. Naa tura ejpqui ana chjalz pecčhaj niiqui, ana chjalzucacha. Walikaz cjesača. Naa turaž cjen, ana jarita cjesaž niiqui, nižaza niž persun kuzquiz ana chjalz pinsitacamažlaj niiqui, ana chjalzucadž cjesača. Jalla nii ana chjalzqui waliž cjesača.

³⁸ Jaziqui nii chjalzñi žoñiqui walikaz pača. Pero nii ana chjalzñi žoñizti juc'ant walikaz pača.

³⁹ Zalzñi maatakaqui persun lucžtan kamaquiča, čjulorat ticznačhaja, jalla nicama. Jalla niiqui liyjaruča. Jalla nuž lucu ticzi cjenacqui naa žew žonqui yekja lucžtan zalznasača, pero Yoozquin criichi žoñizakaz cjesača.

⁴⁰ Pero naa žew žon ana zalznaquiž niiqui, juc'ant cuntintu cjequiča. Jalla nuž pinsuča wejrqui. Nižaza Yooz Espiritu Santuča wejt kuzquiziqui, weriž pinsita zuma cjisjapa.

8

¹ Tsjilla cjesača, zoñiž paata yooznacquin tjaata čhjeri puntuquiztan. Ančhucqui cjiča: “Tjapa wejrnacqui nii puntuquiztan zizuča”. Pero wejr cjiwča, jakziltat “Wejrtča ziziñtqui”, cječhaj niiqui, mit kuzziz cječhani. Nižaza jakziltat zuma munaziñi kuzziz cječhaj niiqui, parti criichi zoñinacažquiz yanapstanča zuma kamañchiz cjeajo.

² Jakziltat persun kuzquiz pinsican: “Ultim weraral zizuča”, cjican cječhaja, jalla niiqui ana zuma zizza. Anapanž ultim werara zizasacha.

³ Jakziltat Yoozquin tjapa kuz tjaachaja, Yoozqui nii zoñi pajča niiz maati cunta.

⁴ Jaziqui nii zoñiž paata yooznacquin tjaata čhjeri puntuquiztan, tuž cjiwča. Zoñiž paata yooznacaqui anapanča ultim Yoozqui. Nižtiquiztan anača čhjulumi. Werar Yoozqui zintallapanikaz žejlča.

⁵ Tii muntuquiz žejlñi zoñinacž yooznacaqui wacchiča. Ana criichi zoñinacaqui tii yokquiz žejlñimi nižaza tsewc arajpachquin žejlñimi cjiča, “Niiča Yoozkaz”, nižaza “Niiča učum Jiliriqui”, panž cjiča.

⁶ Učumnacalta tsjii werar Yoozkaz žejlča. Tsjii Yooz Ejp žejlča. Niiqui tjapa žejlñinaca paachiča. Nižaza učumnacaqui nižtajapača. Nižaza tsjii Jesucristo Jilirikaz žejlča. Niiž cjen tjapa žejlñinaca žejlča, nižaza niž cjen učumnacaltaqui ew žejtz kamaña žejlča.

⁷ Zoñiž paata yooznac puntuquiztan yekjap criichi zoñinacaqui ana zuma intintiča. Tuqita yekjapanacaqui ančhucquiztan zoñiž paata yooznaca sirwiñitča. Jalla nižtiquiztan anziqui yooznacquiz tjaata čhjeri lujlcan, nii paata yooznacquin pinsiča, nižaza persun kuzquiz sint'iča. Jalla nižtiquiztan nii čhjeri lujlchiž cjen ultim Yooz quintra uj paača.

⁸ Yooz yujcquiziqui čhjeri lujlchi cjenami ana čhjeri lujlchi cjenami anaž importiča. Jakziltat čhjul čhjerimi lujlčhaj niiqui, nii čhjerquiztan anaž tsjan Yoozquin kuzziz cjesača. Nižaza jakziltat ana tjapaman čhjeri lujlčhaj niiqui, nii ana tjapaman čhjeri lujltiquiztan ana upa Yoozquin kuzziz cjesača.

⁹ Pero zoñiž paata yooznacquin tjaata čhjeri lujlquiztan cwitazaquiča, ana tsjii ana zuma intintiñi criichi jila ujquiz tjojtskatzjapa.

¹⁰ Ančhucqui zizza, zoñiž paata yoozqui anača čhjulumi, jalla nii. Nižaza ančhucqui zoñiž paata yooznacquin ana sint'iča. Pero yekjap jilanacazti tirapan zoñiž paata yoozquin kuzquiz sint'iskatča, ultimu Yoozquin criichi cjicanami. Jaziqui yekjap ančhucquiztan zoñiž paata yooz timpluquiz čhjeri lulasača. Pero tsjii jilaqui ančhuc cheržcu lujlz zakaz pecasača, aunquimi nii zoñiž paata yoozquin sint'icanami. Jalla nižtiquiztan nii zoñiž paata yoozquin sint'iñi jilaqui ultim Yooz quintra uj paasača, nii zoñiž paata yoozquin tjaata čhjeri lujlžcu.

¹¹ Jaziqui ančhucž lujltiquiztan nii criichi jilaqui werar Yoozquiztan zarakskatča. Jesucristuqui nii jilž laycu ticziča, jalla.

¹² Pero ančhucqui nii jilž kuz ana wali cjiskatča. Jaziqui nii jilž quintrami uj paača, nižaza Cristuž quintrami uj paača.

¹³ Jalla nižtiquiztan zoñiž paata yoozquin tjaata čhjeri lujlchiž cjen wejt jila ujquiz tjojtskatasaz niiqui, anapan nii čhjeri lujlz pecuča. Wejrqui anapan yekja jila ujquiz tjojtskatz pecuča.

9

PABLUZ KAMAÑA PUNTU

¹ Wejrqui liwriitča. Jalla nižtiquiztan čhjulu paazmi paasača. Wejrqui Jesucristuž cuchanžquita apostoltča. Nižaza wejrqui persun čhjujcztan učum Jesucristo Jiliri cherchinča. Nižaza weriž Yooz taku paljaytiquiztan, ančhucqui Jesucristo Jiliržquin criichinčhucča. Jaziqui ančhucqui wejt obra cuntača Yooztajapaqui.

² Cunamit yekjapanaca wejr ana apóstol pajčhani. Ančhuczi wejr apóstol pajstanča. Ančucaž Jesucristužquin criichiž cjen, wejrqui kjanapacha tjeztitča, ultim werara apóstol, jalla nii.

³ Wejt quintra chiiñinacžquiz kjaaznuča, tuž cjican: Wejrtča ligitum apostoltqui.

⁴ Jalla nižtiquiztan criichi žoñinacaž tjaata čherimi nižaza čhjul tjaatami tanznasača.

⁵ Nižaza apóstol kamañquiz ojklaycan criichiñ tjun chjichasača. Jalla nižta chjichniča parti apostolanacaqui, nižaza Jesucristo Jilirž persun lajknacami, nižaza Pedrumi.

⁶ Wejttn Bernabežtan Yooz taku paljaycan tirapan langznuča, persuna mantinzjapa. Jalla nuž cjenami, tii mantinzjapa langzqui jaytasacha, ančhucqui wejr mantinžinajo.

YOOZ TAKU PALJAYŃI ZOŃŽ PUNTU

⁷ Tsjilla cjesača nii puntuquiztan. Zultatunacaqui anaž sirwiča, persuna mantincan. Nižaza zkala langzñi žoñiqui zkal čherquiztan lulasača. Nižaza uuza ichñi žoñiqui uuzi lichiz licača. Jalla nužupanča tii muntuquiziqui.

⁸ Anača wejt kuzquiztankaz tii chiitaqui. Jalla nuzupanž chiiča Moisés cijjrta Yooz takuqui.

⁹ Nii Moisés cijjrta liiquiziqui tuž cjiča: “Tsjii zkala jojñi wacaqui anaž ñujcz waquiziča”. Yoozqui jalla nuž cjican chiichiča anača wacžtajapa,

¹⁰ antiz wejrnacaltajapacha. Nijjapa nii Yooz taku cijjrtača. Zkal yoka kjullñi žoñimi, nižaza zkala jojñi žoñimi tjewznača zkalquiztan tsjižtan tanzjapa.

¹¹ Jaziqui wejrnacqui ančucaquiz Yooz taku paljaychinča, zkala čhjaczhtakaz. Jalla nižtiquiztan wejtnacalaqui ančucaquiztan mantinzjapa tanzñi cjichuca, zkala langzñi žoñižtakaz.

¹² Yekja Yooz taku tjaajiñi žoñinacaqui ančucaquiztan mantinzjapa tanchipanča. Wejtnacalaqui ančucaquiztan juc'anti tanzuca. Wejrnaczi anapan wira mantinz exijcan kamiñča. Wejrnacqui persuna langztiquiztan mantincan kamiñča. Chjulumi awantuča liwriñi Cristuž taku catokz ana atažta cjejajo.

¹³ Timpluquiz langzñi žoñinacaqui timpluquiztan mantiñča. Nižaza timplu altarcuiz wilana jawkñi žoñinacaqui wilana jawkta chjizwiquiztan mantiñitacha. Jalla nii ančhucqui zizza.

¹⁴ Jalla nižtapacha Jesucristo Jiliriqui mantichiča, jakziltat liwriñi Yooz taku paljayačhaja, jalla niiqui nii Yooz taku paljayz langzquiztan mantinasača.

PABLUQUI YOOZ TAKU PALJAYCHA, PERSUNA MANTINCAN

¹⁵ Wejrqui anapan mantinz exijcan kamiñča. Nižaza anziqiu anal ančucaquin cijjržcuča wejr mantinskatzjapa. Ana jakziltižquizimi mantinskatz pecuča. Wejrqui ima žoñžquiz mantinskatzcan ticzkal pecasača. Tii persuna mantinz honora ana wejtquiztan kjañkatz pecuča.

¹⁶ Yooz taku paljaycan wejrqui anal mit kuzziz cjesača. Yoozqui wejtquiz nii kamaña tjaachiča. Jalla nižtiquiztan Yooz taku paljaystanča. Liwriñi Yooz taku ana paljayasaž niiqui, wejrqui castictal cjesača.

¹⁷ Nižaza wejrqui persun kuzcamakaz Yooz taku paljaytasaz niiqui tsjii pacz tjewztača, weriž Yoozquiz yanaptiquiztan. Pero anača wejt kuzcama tii puestuquin kamuča. Yoozqui tii Yooz taku paljayz kamaña wejtquiz tjaachiča. Jalla nižtiquiztan Yooz taku paljaystanpanča wejrqui.

¹⁸ Nižaza liwriñi Cristuž taku paljaycan ana jeczquiztanami cobriñča, wejr mantinžinajo. Antiz persunpacha mantinuča. Jalla nižta ojklayžcu ancha cuntintuča. Jalla niča wejt kuzquiz pactažtakazqui.

¹⁹ Cristuž cjen wejrqui liwriitača. Jaziqui zoñž kuzquiz pinsita jaru ana kamuča. Jalla nuž liwriitaž cjenami, wejrqui tjapa zoñž kuz jaru paasača, walja zoñinaca Cristužquin kuzziz cjiskatzjapa.

²⁰ Judío zoñinacžtan kamcan, judío zoñinacž cuzturumpi paa-uča, ninaca Cristužquin kuzziz cjiskatzjapa. Nižaza, Moisés liy jaru kamni zoñinacžtan kamcan, Moisés liy paa-uča, ninaca Cristužquin kuzziz cjiskatzjapa. Ultimquiziqui anal nii Moisés liy mantuquiz kamuča.

²¹ Nižaza ana Moisés liy jaru kamni zoñinacžtan kamcan, wejrqui zakal Moisés liy jaru ana kamuča, nii zoñinaca Cristužquin kuzziz cjiskatzjapa. Ultimquiziqui wejrqui werar Yooz liy jaru kamuča, nižaza Cristuž liy jaru kamuča.

²² Nižaza čjulquizimi kuz sint'iskatni zoñinacžtan kamcan, wejrqui nižtazakaz kuz sint'iskattažokaz cjiñča, nii zoñinaca Cristužquin kuzziz cjiskatzjapa. Jalla nižta punta punta kamuča, jaknužumi zoñinaca liwriita cjejajo.

²³ Jalla nižta punta punta kamuča, zoñinacžquiz liwriiñi Yooz taku criiskatzjapa. Nižaza jalla nižta kamuča, persunpacha Yoozquiztan zumanaca tanzjapazakaz.

²⁴ Tsjiilla cjesača. Ančhucqui tuž zizza. Tsjii zajtñiquiz tjapa zajtñi zoñinacžquiztan tsjiillapankaz ganča. Jalla nuž cjuñžcu ančhucqui Yooz jiczquiz tjapa kuztan zajt waquiziča, premio ganzjapa.

²⁵ Tjapa piluta uziñinacaqui walja istutiiča ima canchiquiz luzcan. Nižaza ana walinacquiztan jaytissa tsjan cusa uzinzjapa. Jalla nižta paača, tsjii chjañquiztan paata royti pillu ganzjapa. Nii premiuqui tsjii upacamakaz tjurča. Ančhuczi Yooz jiczquiz zajtča, tsjii wiñaya tjurñi premio ganzjapa. Jalla nii premiuqui cjiča, Yooztan wiñaya kamz, jalla nii.

²⁶ Wejrqui anal inapampa Yooz jiczquiz zajt zajtcan kamuča. Tsjii pucultan boxsiyasni zoñinacaqui anaž tsjii kjutni čhajcz pecča. Antiz panž čhajcza tsjiizuñž yujcquin. Wejrqui jalla nižtazakaz anal inapampa kamuča. Antiz liwriiñi Yooz takucama kamuča.

²⁷ Wejrqui persun kuzquizpacha ewjasuča čjul anawalinacami paazquiztan. Wejrqui jalla nuž paa-uča, Yooz wejr ana wirquin tjewcznajo. Yekjapanacžquiz zuma tjaažinžcu wejrqui anal wirquin tjewczta cjis pecuča, wejr ana zuma kamchinž cjen.

10

TUQUITA EJPNACZ KAMTA PUNTU

¹ Tsjiilla cjesača. Wejrqui ančhucaquiz tuž zizkatz pecuča. Egipto yokquiztan ulanžquichi tuquita ejpnacaqui tsjir koztan kamatča. Moisés irpita kamatča. Nižaza Moisesqui tjapa ninaca Ljoc Kota tjakchiča.

² Jalla nuž irpitaž cjen, nižaza Ljoc Kota tjaktaž cjen, nii zoñinacaqui Moiestan tsjii kuzziztača. Jalla nižtiquiztan tjapa ninacaqui Moisés irpiñi bautistažtakaztača.

³ Nižaza tjapa ninacaqui Yooz tjaata čjjeri lujlchiča.

⁴ Nižaza tjapa ninacaqui tsjii pajk maz ajkquiztan Yooz tjaata kjaz licchiča, curpu mantinzjapa, nižaza ninacž kuz wali mantinzjapa. Nižaza ninacž kuz wali mantinzjapa Cristutača mazquiztan ulanñi kjaztakaz. Jalla nii Cristuqui chicapacha cumpañ'tača ninacaž jiczquiz okan.

⁵ Jalla nuž Cristuž cumpañ'tita cjenami, jila parti nii zoñinacaqui anapan Yoozquin kuzziztača. Jalla nižtiquiztan Yoozqui anatača cuntintu; ninacž quintra žawjchiča. Jalla nižtiquiztan nii zoñinacaqui ch'ekti yokquin ticziča.

⁶ Jalla nii tuquita kamtaqui cijirtatača učumnaca cjuñajo, nižaza nižta ana walinaca tuquitažtapacha ana paajo.

⁷ Jaknužt yekjapa tuquita ejpnaca zoñiž paata yooznacquin sirwitčhaja, jalla nižtapachaqui anapanž kamz waquiziča ančhucqui. Nii tuquita ejpnacž puntuquiztan cjiŕta Yooz takuqui, tuz cjiča: “Nii zoñinacaqui čhjeri lujlžcu licžcu tsajts pjiŕsta payi waquintichiča.” Jalla nižta irata kamz anaž waquiziča.

⁸ Nižaza yekjap tuquita ejpnacaqui adulterio paachiča. Jalla nižtiquiztan ticziča 23,000 zoñinacaqui tsjii noojikaz. Jalla nii cjuñzna. Adulterio anača paazqui.

⁹ Nižaza yekjap tuquita ejpnacaqui: “Yoozza pazinziz kuzzizqui”, cjičiča. Jalla nekztan juc'anti anawalinaca paapaatča. Ultimquiziqui Yooz Ejpqui ninaca castičiča. Jalla nii castictiquiztan walja zoñinacaqui ticziča, zkoranacaž čh'atta. Jalla nii cjuñzna. Anača uj paazqui: “Yoozza pazinziz kuzzizqui”, cjicanaqui.

¹⁰ Nižaza yekjap tuquita ejpnacaqui Yooz quintra chutchiča. Jalla nižtiquiztan Yoozqui anjila cuchanžquichiča ninaca conzjapa. Jalla nii cjuñžcu, ančhucqui Yooz quintra chuch anaž waquiziča.

¹¹ Tjapa tuquita ejpnacaž kamtaqui Yooz tawk libruquiz cjiŕtatača učhumnacaquiz chiižinzjapa ana nižta paajo. Tii muntu tucuzinz žcatžinžquiča. Jalla nižtiquiztan tuquita ejpnacaž kamta quintunaca zumpacha cjuñž waquiziča, ana nižta kamzjapa.

¹² Jalla tuž cjiwča. Jakziltat persun kuzquiz “walikaztča wejrqui” cjican pinsičhaja, jalla niiqui panž cwitazaquiča, ana ujquiz tjojtsjapa.

¹³ Čjul pruebanacquizimi ančhuc sufričhaja, jalla nižta pruebanacquiz zakaz tsjii tsjii criichi zoñinacaqui sufriča. Čjul pruebanacaž sufriskatta cjenami Yoozqui ančhucacquiztan nii pruebanaca ana atipskataquiča. Antiz ultimquiziqui Yoozqui čjul pruebanacquiztan ančhucacquiz atipskataquiča, ančhuc ana čjul ujquiz tjojtsjapa, nižaza tjurt'iñi kuzziz awantizjapa. Učhum Yoozza zuma yanapñiqui, učhumnacaž tjapa pruebanaca tjurt'iñi kuzziz watajo.

ZOÑIŽ PAATA YOOZNACQUIZTAN ZARAKA

¹⁴ Weriz pecta jilanaca, cullaquinaca, zoñiž paata yooznacquiztan zaraka. Anapanž ninacžquiz sirwa.

¹⁵ Ančhucča zizñi zoñinacaqui. Ančhucpacha tii weriz chiita taku yatisinznasača, werara ana werara, jalla nii.

¹⁶ Cristuqui učhum laycu ticziča. Jalla nii cjuñznajo Cristuqui cuzturumpi mantichiča, uwas kjaz liczmi, nižaza t'anta lujlžmi. Nii uwas kjazza Cristuž ljoc cuntaqui. Nižaza nii t'antača Cristuž curpu cuntaqui. Nii Cristuž mantita cuzturumpi paacan Yoozquin gracias cjican chiča. Nii uwas kjaz liccan Cristužtan tsjii kuzziz cjican tjeeža. Nižaza nii tojžta t'anta lujlcan Cristužtan tsjii kuzziz cjican tjeeža.

¹⁷ Tsjii t'anta žejlča, aunquimi t'unapacha kjolžtami. Nižtazakazza učhummi. Walja tama criichinaca želanami, tsjii curpuchiztakazza. Tsjii t'antiquiztan tjappacha lujlča, jalla nuž tjeeža, tsjii kuzzizza tjappacha, cjicanaqui.

¹⁸ Israel zoñinacžquiztan tii puntu cjuñzna. Jakziltat Yooz altarquin wilana jawkčhaja, jalla niiqui wilanquiztan lujlcan nii altarž Yooztan tsjii kuzziz cjican tjeeža.

¹⁹ Nonžna, zoñiž paata yoozqui anaž čjulumi. Nižaza zoñiž paata yoozquin tjaata chjizwimi anaž čjulumi, chjizwikazza.

²⁰ Pero jakzilta ana Yoozquin criichi zoñit wilana jawkčhaja, jalla niiqui zajranacžquin wilana onanča, anapanž werar Yoozquin onanča. Jalla nižtiquiztan ančhucqui anaž ninacžtan cumpañt'iz waquiziča. Cumpañt'aquiz niiqui zajranacžquiz kuzziz cjican tjeeža.

²¹ Anaž jakziltami Cristo Jilirž wasumi nižaza zajranacž wasumi tanznasača. Nižaza anaž jakziltami Cristo Jilirž t'antami nižaza zajranacž čhjerimi tanznasača. Anača nižta kuzziz cjichuca. Antiz tsjii Yoozquizpanikaz kuzziz cjesača.

²² Jakziltat zajranacž cuzturumpiquiz mitisaquiž niiqui, jalla nii zoñž quintra werar Yoozqui žawjwaquiča. Jalla nižtiquiztan ančhucqui nuž paaquiž niiqui, castictaž cjequiča. Ančhucqui anača Yoozquiztan juc'anti azziz jalla.

ZOÑIŽ PAATA YOOZNACZQUIZ ANA MITISA

²³ Jalla tuž werarača. Tsjii criichi zoñiqui liwriitača. Jalla nižtiquiztan čhjulumi paasača. Pero tjapa paataqui juc'ant Yoozquin kuzziz cjisjapa anaž yanapča. Nižaza čhjulu paatami anaž parti criichinacžquinami yanapča zuma kamañchiz kamajo.

²⁴ Parti criichinacaž zuma kamañchiz cjisjapača kuz tjaazqui. Anača persun kamañjapakaz kuz tjaazqui.

²⁵⁻²⁶ Cjijrta Yooz takuqui tuž cjiča: “Tjapa tii muntuqui Yooz Jiliržtacamača, nižaza tjapa tii muntuquiz žejlñinacaqui Yooz Jiliržtacamača”. Jalla nižtiquiztan mercatquiz kjayta čhjerimi lulasča. Anaž persun kuz turwayskataquiča tuž pinsican, tii čhjerizlan zoñiž paata yoozquiz tjaata čhjeri, už zoñiž paata yoozquiz ana tjaata čhjerizlaj, jalla nii.

²⁷ Nižaza ana werar Yoozquin criichi zoñiqui čhjeri lujlzjapa am impitasaz niiqui, okasača, ojkz pecasaž niiqui. Jalla nuž okaquiž niiqui, čhjul onanta čhjerimi lujlznaquiča anaž persun kuz turwayskatcan.

²⁸⁻²⁹ Pero tsjiiqui amquiz maznačhani, tuž cjican: “Tii čhjeriqui zoñiž paata yoozquiz tjaata čhjeriča. Jalla nii čhjeri ana lujlz waquiziča”. Jalla nuz cjenaqui amlaqui anača nii čhjeriqui lujlsinsqui, nii mazni zoñž sint'iñi kuz anawali cjiskatzjapa, nižaza niiž kuz ana turwayskatzjapa. Am persun kuzqui walikaz cječhani, ana turwayta. Jalla nuž cjenami amqui nii čhjeri lulasaz niiqui, am jilž kuz turwayskatasča.

Jalla nii weriž chiižintiquiztan yekjap ančhucquiztan wejtquiz pewcznačhani, tuž cjican: “¿Kjažtiquiztan amqui nižta chiižinjo? Tsjii zoñiž sint'iñi kuzziz cjenami, čhjulumi paaz atuča, Cristuqui wejr liwriičiča.

³⁰ Ima čhjul čhjerimi lujlcan Yoozquin gracias cjican chiyuča. Jaziqui, ¿kjažtiquiztan weriž lujltiquiztan zoñej wejtquin uj tjojtunjo?” Nuž cjican, wejtquiz chiyáčhani.

³¹ Ančhucquiz tuž kjaaznuča. Čhjeri lujlzmi, čhjulumi paazmi Yooztajapa honora waytiz waquiziča.

³² Ančhucqui anaž jec zoñimi ujquiz tjojtskata, judío zoñinacami, ana judío zoñinacami, nižaza Yooz iclizziz zoñinacami.

³³ Wejrzi kjažllami tjapa zoñinacžquiz yanapuča zuma kamañchiz kamajo. Anal wejtjapakaz ojklayuča. Antiz parti zoñinacžtajapa ojklayuča, ninaca ujquiztan liwriita cjeyajo.

11

¹ Wejrqui jaknužt Jesucristuqui kamtčhaja, jalla nižtazakal kamuča. Nižaza jaknužt wejr kamučhaja, jalla nižtazakaz kama ančhucqui.

ACHA CH'OKCHI CUZTURUMPI PUNTU

² Jilanaca cullaquinaca, ančhucqui tjapa weriž tjaajintanaca cjuñča, nižaza weriž tjaajintacama kamiñchucča. Jalla nižtiquiztan ančhucquin felicituča. Ultimu anača wejt kuzquiztan nii tjaajintaqui, antiz, wejtquiz tjaajintatača.

³ Jilanaca, cullaquinaca, persun luctakž mantuquiz žejlča maatakanacaqui. Nižaza zapa luctak zoñiqui Cristuž mantuquiz žejlča. Nižaza Cristuqui Yooz Ejpž mantuquiz žejlča. Jalla nii puntuquiztan ančhucquiz intintiskatz pecuča.

⁴ Iclizquiz ajcžcu luctak zoñinacaqui pañžtan acha ch'okchi anapanž cjesača, Yoozquin mayizicanami, nižaza Yooziž tjaata taku tjaajincanami. Acha ch'okchižlaj niiqui, persunjapa omobrawillaž cjesača.

⁵ Nižaza iclizquiz ajcžcu, criichi maatakanacaqui pañžtan acha ch'okchi pañž cjesača, Yoozquin mayizicanami, nižaza Yooziž tjaata taku tjaajincanami. Acha ana

ch'okchinžlaj niiqui, persunjapa ombrawillaž cjesača. Acha ana ch'okchinžlaj niiqui ach chara k'ala murtaž cjes, nižtažtakaz cjesača.

⁶ Iclizquiz ajcžcu, jakzilta maatakat ana acha ch'okchinžlaj niiqui, naaža persun ach chara k'ala murtaž cjila. Nekztan naaqui acha ch'okznasača. Naaža ach chara k'ala murtaž cjen ombrawillaž cjesača. Jalla nižtiquiztan maatakaqui acha ch'okchinpanž cjis waquiziča.

⁷ Yoozqui niž kuzcama luctak žoñi paachiča niž irata cjeyajo. Jalla nižtiquiztan luctak žoñiž cjen Yooztajapa honoraqui tjeeztača. Nižaza maatakaž cjen luctakž honoraqui tjeeztača, jalla nižtiquiztan criichi luctakaqui iclizquiz ajcžcu anapan acha ch'okchi cjis waquiziča.

⁸ Tuquita timpuqui Yoozqui luctaka paachiča, nekztan luctakžquiztan maataka paachiča. Luctakaqui ana maatakžquiztan paatatača.

⁹ Nižaza maatakaqui luctakžtajapa paatača. Luctakaqui anača maatakžtajapa paataqui.

¹⁰ Jalla nižtiquiztan maatakanacaqui acha ch'okz waquiziča, luctakž mantuquiz cjican tjeezjapa, anjilanacaž cjen.

¹¹⁻¹² Pero tii tantiya. Cristian kamañchiz cjen luctakanacami nižaza maatakanacami tsjiikazza. Yoozqui luctakžquiztan maataka paachiča. Nižaza luctakaqui maatakaž majtñiž cjen žejlča. Pero tjappachaqui Yooziž cjen žejlča. Jalla nižtiquiztan ana maataka žejltčaja luctakaqui ana žejltasača. Nižaza ana luctaka žejltčaja maatakaqui ana žejltasača. Nižaza anaj Yooz muntčaja, anapanž čjulumi žejltasača.

¹³ Ančhucpacha tantiya. Yoozquin mayizican maatakaqui acha ch'okchinžlaj niiqui, ¿wali cjesaya? už ¿anawali cjesaj? Acha ch'okchi walipankazza maatakžtaqui.

¹⁴ Nižaza luctakaqui lajch charchizlaj niiqui persunjapa ombrawillaž cjesača. Jalla nužuča tii wirquiz kamañaqui. Tjapa žoñinacaqui persun kuzquiztan nuž zizza.

¹⁵ Nižaza maatakanacaqui pajk charchizlaj niiqui ninacžquizpacha honoraž cjesača. Pajk charchizqui acha ch'okchi cuntača. Jalla nižtiquiztan pajk charchiz cjisqui walikazza maatakžtaqui.

¹⁶ Jakziltat nii puntu ch'aas pecčaja, jalla niiqui ziz waquiziča tužu. Wejrnacqui nii cuzturumpi pajzpanča. Nižaza tjapa Yooz iclizziz žoñinacaqui nii cuzturumpi jaru paaspanča.

SANTA CENA PAAZ PUNTU

¹⁷ Tsjiižtan zakal chiižinuča. Wejrqui ančhucaquiz zumpacha ewjtis waquiziča. Santa Cena paažcu ančhucqui koluculla akžta kamañchiz ulanča tsjan zuma kamañchiz cjenpacha.

¹⁸ Iclizquiz ajzcanc, ančhucqui t'aka t'aka cjiicjiiñchucquiča. Nii quintu wejtquiz irantižquičiča. Cunamit nižtapan cjiicjiičhani.

¹⁹ Pero jalla nižta t'aka t'aka cjtiquiztan, kjanapacha tjeeža, jecnacat lijitum cristian kamañchiz criichinaca, nii. Jalla nižtiquiztan t'aka t'aka cjichuca cječhani.

²⁰⁻²¹ Ančhucqui Santa Cena cuzturumpi paazjapa chjeri luli ajczinčhucquiča. Nekztan chjeri lujlcan zapa mayni ančhucaquiztan persun čjeri lujlskaz cjissinčhucquiča, ana tojunžcu. Jalla nižtiquiztan koloculla čjerchiz žoñinacazti čjeri eecznan žejlchiquičiča. Partizti chjekí čjeri lujlchi žejlchiquičiča, nižaza yekjapazti mallzilla žejlchiquičiča. Ana wali paachinčhucča. Jalla nižtiquiztan anača Jesucristo Jiliriž mantita Santa Cena cjichuca cjequičiča.

²² ¿Ančhuczti lujljzjapa liczjapa, ana kjuychizčhuc, kjažtatajo? Nižta ana wali paacan, ančhuqui tjeeža, ančhucaquiz Yooz iclizziz žoñinaca anaž importiča, nii. Nižaza pori criichinacaqui azkatča ana želinchiz cjenaqui. ¿Wejr ančhucaquiz kjažt cjes? ¿Wejr ančhucaquiz “Walikaz” chiyasaya? Anapan nižta chiyasača.

²³ Jesucristo Jiliripachača wejtquiz mantichiqui Santa Cena cuzturumpi paajo. Jalla nii tjaajintacama ančhucaquiz zakal tjaajinchinča. Ima Jesucristo Jiliriž intirjita cjen, jalla nii weenpacha tsjii t'anta tanzicha niž persun kjaržtan.

²⁴ Jalla nekztanaqui Yooz Ejpžquin gracias cjican cjichiča. Nekztanaqui t'anta kjolžcu, tojunchiča, tuž cjican: “Tii t'antaqui wejt curpu cuntača. Wejrqui žoñž curpuchiz cjen ančhuc laycul ticznača. Weriz ticžta cjuñžjapa tii cuzturumpi wilta wilta paaquiča”.

²⁵ Nekztan čjjeri lujlžcu nižtapacha Jesucristuqui niž persun kjaržtan tsjii wasu tanzicha, tuž cjican: “Tii wasquiz uwas kjazqui wejt ljoc cuntača. Wejt ljoc cjen ew acta tjulžtaž cjequiča. Čhjulorat tii cuzturumpi paačhaj niiqui, wejtquiz cjuñž waquiziča”. Nuž mantichiča Jesucristuqui.

²⁶ Čhjulorat tii Santa Cena cuzturumpi paachaj niiqui, ančhucqui tjeeža Jesucristo ticziča ančhuca laycu, jalla nii. Jalla nii cuzturumpi paaz waquiziča, Jesucristo Jiliriž tjonzcama.

²⁷ Jalla nižtiquiztan jakziltat nii Santa Cena cuzturumpi ana zuma paaquiž niiqui, Jesucristo Jiliriž ombrawillaž cjequiča. Nižaza Jesucristo Jiliriž quintru uj paaquiča; niž curpuquizimi niž ljocquizimi iñartažokaž cjequiča.

²⁸ Ima Santa Cena paacan, zapa mayni persun kuzquiz amayt'asaquiča, kjažtiquiztan Santa Cena cuzturumpi paa, jalla nii. Nekztan Santa Cena cuzturumpi paasača.

²⁹ Nižaza Santa Cena paacan, Jesucristuž učhum laycu ticžta, jalla niiča zapa mayni persun kuzquiz waljapanž cjuñž waquiziča. Santa Cena paacan Jesucristo ana cjuñžiz cjequiž niiqui, persun casticujapa cjequiča.

³⁰ Santa Cena cuzturumpi ana wali paatiquiztan, walja ančhucaquiztan laa žejlča, nižaza ana wali žejlča, nižaza yekjapanacaqui ticziča.

³¹ Ima Santa Cena cuzturumpi paacan učhumnacapacha zapa mayni persun kuzquiz zuma amayt'as waquiziča. Nekztan pertuna mayiziz waquiziča. Nekztan Jesucristo Jiliriž anaž casticta cjequiča.

³² Jesucristo Jiliriqui učhum casticaquiž niiqui, azquichjapa panž castičča, zuma kamañquin cjisnajo. Nekztan ana criichi žoñinacžtan chica ana wiñaya casticta cjequiča.

³³ Wejt jilanaca, cullaquinaca, čjjeri lujlžjapami nižaza Santa Cena paazjapami ajcžcu, zapa mayni tjewz waquiziča parti criichi žoñinacaž zumpacha ajczquiscama.

³⁴ Jakziltat čjjeri eeskatčhaja, persun kjuyquin zumpacha lujlžnaquiča, ima iclizquin ojkan. Nekztan lujlžcu ajczquin okaquiča, Santa Cena zuma paazjapa. Jakziltat Santa Cena ana zuma paaquiž niiqui, Yoozqui nii žoñi casticaquiča. Nužulkazza nii puntuqui. Yekja puntunacaqui wejr azquichača, ančhucaquin cheržni quejpžcu.

12

ESPIRITU SANTUZ TJAATA KAMAÑANACA PUNTU

¹ Tsjii zakaz chiižinuča, Espiritu Santuž tjaata kamañanaca puntuquiztan. Jalla nii ančhucaquiz zuma intintiskatz pecuča.

² Tuquiqui ima ančhucaž Yoozquin criican ančhucqui ana criiči žoñiz paata yooznacžquiz tsjii kjutni irpitatača, jalla nižta irpiskatchinčhucča ančhucqui. Jalla nii ančhucqui zuma zizza.

³ Jakziltat Yooz Espiritu Santuž irpitažlaja, jalla niiqui ana chiyasača: “Jesusaqui laykjita cjila”, cjicanaqui. Nižaza jakziltat: “Jesusaqui Yooz Jiliriča”, cjican chiyachaja, jalla niiqui Espiritu Santuž irpitaž chiyaučiča. Jalla nuž intintiskatz pecuča.

⁴ Jilanaca, cullaquinaca, criichi zoñinacaqui yekja yekja Espíritu Santuž tjaata kamañanacchizza, nižaza poderanacchizza. Pero tsjii Espíritu Santukaz tjapa nii kamañanacami nižaza poderanacami tjaača.

⁵ Nižaza criichi zoñinacaqui yekja yekja Yoozquin sirwiča. Pero tsjii Yooz Jiliržquinkaz sirwiča.

⁶ Nižaza criichinacaqui yekja yekja wali obranaca pača. Pero tsjii Yooz Ejpkaz criichinacžquiz nii obranaca paakatča.

⁷ Jaziqui tjapa criichinacaqui Yooz Espíritu Santuž tjaata kamañchizza, parti criichinacžquiz juc'ant zuma kami yanapzjapa.

⁸ Tižta kamañanacaqui tjaatača: Espíritu Santuqui yekjap criichinacžquiz zuma pinsita razunanacchiz chiikatča. Nižaza Yooz Espíritu Santuqui yekjap criichinacžquiz zizñi zizñi chiikatča.

⁹ Nižaza Espíritu Santuqui yekjap criichinacžquiz Yoozquin juc'ant tjapa kuzziz cjiskatča, zuma obranaca paazjapa. Nižaza Espíritu Santuqui yekjap criichinacžquiz poder tjača laanaca čhjetnajo. Pero Espíritu Santuqui tsjiikazza.

¹⁰ Nižaza Espíritu Santuqui yekjap criichinacžquiz poder tjača wali milajrunaca paazjapa. Nižaza Espíritu Santuqui yekjap criichinacžquiz poder tjača, Yooziž tjaata takunaca zuma kjanzt'izjapa. Nižaza Espíritu Santuqui yekjap criichinacžquiz zizñi kuz tjača, zoñinacaž chiita takunaca zumpacha tantiizjapa, Yoozquiztan tjonchižlan už zajrižquiztan tjonchižlaj, jalla nii. Nižaza Espíritu Santuqui yekjap criichinacžquiz ana pajta taku chiikatča. Nižaza nii Espíritu Santupacha yekjap criichinacžquiz zizñi kuz tjača, nii ana pajta chiita taku parti criichinacžquiz intintiskatajo.

¹¹ Tsjii Espíritu Santukaz tjapa nii yekja yekja poderanaca tjača. Jaknužt nii Espíritu Santuqui tjaaz munčhaja, jalla niicama tjapa criichinacžquiz tjača.

CRIICHI ZOÑINACAQUI TSJIKAZZA

¹² Cristužtan nižquin criichi zoñinacžtan tsjii curpuchiz zoñižtakazza. Tsjii zoñžta žejlča, kjarami, lismi, čhjujcquimi, cjuñimi, jalla nižtanaca žejlča, pero tsjii zoñikazza. Wacchi cjenami tsjii curpukazza. Jalla nižta iratača Cristužtan criichinacžtan.

¹³ Criichinacaqui yekja yekja žejlča, judionacami, yekja wajtchiz zoñinacami, piyunanacami, ana piyunanacami, jalla nižtanaca žejlča. Pero bautistaž cjistanaqui Espíritu Santuž cjen tjapa nižta criichinaca tsjii zoñž curpu cunta cjissiča. Nižaza Yooz Ejppui tjapa criichinacž kuzquizimi Espíritu Santo luzkatchiča.

¹⁴ Tsjii zoñžtaqui kjarami lismi achami čhjujcquimi cjuñimi jalla nižtanaca žejlča. Punta punta žejlča tsjii zoñž curpuquiziqui.

¹⁵ Jalla nižta iratača Cristužtan nižquin criichinacžtan. Jalla nižtiquiztan tjapa Cristužquin criichinacaqui tsjiikazza. Jilanaca, cullaquinaca, nonžna. Tsjii zoñž kjojchaqui ana chiiz waquiziča, tuž cjican: “Wejrqui kjojchakazza, anača wejr kjaraqui; jalla nižtiquiztan anaž tii zoñž curpuquiz želasača”. Jalla nižta chiižcumi, nii kjojchaqui tirapanča nii zoñž curpu partiquizqui.

¹⁶ Nižaza tsjii zoñž cjuñiqui ana chiiz waquiziča, tuž cjican: “Wejrqui cjuñikazza, anača wejr čhjujquiqui. Jalla nižtiquiztan anaž tii zoñž curpuquiz želasača”. Jalla nižta chiižcumi, nii cjuñiqui tirapanča nii zoñž curpu partiquizqui.

¹⁷ ¿Tjapa zoñž curpuqui čhjujquicamazlaj niiqui, kjažt nonžnasajo? ¿Nižaza tjapa zoñž curpuqui cjuñicamazlaj niiqui, kjažt mucžnasajo?

¹⁸ Yoozqui zoñž curpuquiz punta punta utčiča, jaknužt munčhaja, jalla nuž. Jalla nižta irata Yoozqui punta punta Espíritu Santuž kamañanacami nižaza poderanacami tjaachiča criichinacžquiz.

¹⁹ Zoñž curpuquiz anaj punta punta žejlčhaja, anaž ultim zoñž curpu cjitasacha.

²⁰ Punta punta želanami, tsjii curpukazza. Jalla nižta irata criichinacaqui punta punta poderanacchizza, nižaza kamañanacchizza, pero tjapa criichinacača Yooz partiquiz, nižaza tsjiikazza.

²¹ Jalla nižtiqiztan čhujquiqui kjaržquiz ana chiiz waquiziča, “Amqui anal pecuča”, cjicanaqui. Nižaza achaqui kjojchquiz ana chiiz waquiziča, “Amqui anal pecuča”, cjicanaqui. Nižaza tsjii criichi žoñiqui yekja criichi žoñžquiz ana chiyasača: “Amqui anal pecuča”, cjicanaqui.

²² Žoñž curpuqui punta puntaž pecča. Jaziqui žoñž curpuquiz jallc'a partiqui zaka žejlča. Nii jallc'a partiqui juc'antiž pecča.

²³ Nižaza žoñž curpuquiz ana zuma chercherchiznaca žejlča. Ninacaqui zquitžtan tjutžtača zuma chercherchiz cjisjapa. Nižaza žoñž curpuquiz chjojžta partinaca žejlča. Ninacaqui zquitžtan tjutžtača, učhum ana azjapa.

²⁴ Zuma chercherchiznaca tsjii zquiti tjutzqui anaž pecča. Yoozqui žoñž curpu nižta paachiča. Nižaza Yoozqui žoñž kuz peckatchiča, ana zuma chercherchiznaca tsjii zquitžtan zuma tjutzjapa. Jalla nižta iratača iclizziz žoñinacaqui.

²⁵ Jalla nižta munchiča Yoozqui, criichi žoñinacaž ana t'aka t'aka cjisjapa. Nižaza Yoozqui nižta munchiča, porapat zuma munaziñi kuzziz yanapasjapa.

²⁶ Tsjii criichi žoñiž sufran, tjapa criichinacaqui kuzquiz sint'iča. Nižaza tsjii criichi žoñiž honorchiz cjen, tjapa criichinacaqui nižtan chica chipča.

CRIICHI ŽOÑINACŽ KAMAÑ PUNTU

²⁷ Jilanaca, cullaquinaca, tjapa Yoozquin criichinacžtan Cristužtanpacha tsjii kuzzizza. Zapa mayni ančhucqui Jesucristuž partiquiz žejlča.

²⁸ Nižtiqiztan Yooz Ejpqui criichinacžquiz yekja yekja kamañanaca tjaacha, iclizziz žoñinacžquiz yanapzjapa. Primiraqui Yoozqui yekjap criichinacžquiz apóstol kamaña tjaachiča. Niiž jaru Yooziž tjaata taku paljayz kamaña tjaachiča yekjap criichinacžquiz. Niiž jaru Yoozqui niiž taku tjaajinz kamaña tjaachiča yekjap criichinacžquiz. Nižaza Yoozqui milajru paaz poder tjaachiča. Nižaza Yoozqui poder tjaachiča laanaca čhjetnajo. Nižaza Yoozqui icliz langzquiz yanapz kamaña tjaachiča. Nižaza Yoozqui kamaña tjaachiča iclizziz žoñinacžquiz irpiñijapa. Nižaza Yoozqui poder tjaachiča, ana pajta takunaca chiichiyajo.

²⁹ Anača tjapa ančhucqui apóstol kamañchizqui. Nižaza anača tjapa ančhucqui Yooziž tjaata taku paljayz kamañchizqui. Nižaza anača tjapa ančhucqui Yooz taku tjaajinz kamañchizqui. Nižaza anača tjapa ančhucqui milajru paaz poderchizqui.

³⁰ Nižaza anača tjapa ančhucqui laanaca čhjetinz poderchizqui. Nižaza anača tjapa ančhucqui ana pajta takunaca chiiz poderchizqui. Nižaza anača tjapa ančhucqui nii ana pajta chiita takunaca intintiskatz poderchizqui.

³¹ Ultim zuma kamañquiz kuz tjaa ančhucqui. Nižaza wejrqui ančucaquiz nii juc'ant zuma kamañal tjaajnuča.

13

ZUMA MUNAZIZ KAMAÑAQUI JUC'ANT ZUMACHA

¹ Jalla tužuča juc'ant zuma kamañaqui. Zuma munaziz kamañaqui juc'ant zumača tjapa kamañanacquiztanaqui. Tsjii žoñiqui ana pajta žoñž takunacami nižaza anjilž takunacami chiyasača. Jalla nižta chiichiž cjenami ana zuma munaziñi kuzziz cječhaj niiqui, jalla nii žoñiqui inapachaž chiyaquiča. Ina takukazza nii žoñž takuqui. Tsjii ina wjajtta cazažtakaz cjesača.

² Nižaza tsjii žoñiqui Yooziž tjaata takunaca paljayasača; nižaza tjapa Yooz pinsitanaca zizasača; nižaza tjapa Yooz puntu zizasača. Pero ana zuma munaziñi kuzziz cječhaj niiqui, anaž čhjulumi cjequiča Yooz yujcquiziqui. Nižaza tsjii Yoozquin tjapa kuzziz žoñiqui Yoozquiztan mayizichiž cjen, tsjii curumi kiskatasacha. Pero jakziltat

ana zuma munaziñi kuzziz cječhaja, jalla niiqui čhjulu parlizcumi zizcumi paazcumi anaž čhjulumi cjequiča Yooz yujcquiziqui.

³ Nižaza tsjii žoñiqui tjapa niž želinchiznaca tojnasaž niiqui, nižaza Cristuž cjen persun curpumiž ujta cjisjapa intirjasaž niiqui, pero ana zuma munaziñi kuzziz cječhaja, jalla niiqui čhjulu paazcumi inakaz cjesača nii persunaltajapa.

⁴ Zuma munaziñi kuzziz žoñiqui tižta kuzzizza. Pazinziz kuzzizza, nižaza okzñi kuzzizza, nižaza ana iñiziñi kuzzizza, nižaza ana persun kamaña alawasñi kuzzizza, nižaza ana mit kuzzizza.

⁵ Nižaza ana atinar kuzzizza, nižaza zuma munaziñi kuzziz žoñiqui ana malcriat kuzzizza. Nižaza persun kuzcamakaz anaž kamz pecča. Nižaza ana žawjñi kuzzizza. Nižaza ana anawal ayñi tjepuns kuzzizza.

⁶ Nižaza tsjii jilaž ujquiz tjojtsi cjenaqui, anaž chipasača zuma munaziñi kuzziz žoñiqui. Antiz tsjii jilaž zuma paachi cjenaqui, nekztan chipsnasača.

⁷ Čhjul pruebanaca tjonanami zuma munaziñi kuzziz žoñiqui awantiča. Nižaza zuma munaziñi kuzziz žoñiqui parti criichinacž puntuquiztan persun kuzquiz cjiča; “Zuma kuzzizlan”, cjican. Nižaza zuma munaziñi kuzziz žoñiqui parti criichinacž puntuquiztan persun kuzquiz: “Zuma kamačan”, cjiča. Nižaza čhjul pruebanacaž tjonanami Yoozquin tjurt'iñi kuzziz cjequiča zuma munaziñi kuzziz žoñiqui.

⁸ Nii zuma munaziz kamañaqui anawira tucuzinznaquiča. Nii Yooziž tjaata taku paljayz kamañaqui tucuzinznaquiča; nižaza nii ana pajta taku chiiz kamañaqui zakaz tucuzinznaquiča. Nižaza nii Yooz puntu zumpacha zizta paljayz kamañaqui panž tucuzinznaquiča.

⁹ Tii muntuquiz žejlcanaqui Yooz puntuquiztan anapanž tjappacha zizi atasača. Nižaza Yooz puntuquiztan anapanž tjappacha intintiskati atasača.

¹⁰ Wiruñaqui Yooztan kamcanaqui Yooz puntu tjappacha zizaquiča. Jalla nii timpuqui Yooz puntu tjaajinz kamañanacaqui kataquiča.

¹¹ Jalla tižta iratača Yooz puntu zizqui. Žoñiqui kolta uza cjicanaqui, ocjal chiichiiz chiiñiča, nižaza ocjal pinsi pinsiñiča, nižaza ocjalž pinsamintuchiz tantiiñiča. Jalla nižta žejltača ocjala cjicanaqui. Jazizti pajk žoñi cjisucui, ocjalažtakaz chiichiiz-nacami, pinsiznacami jaytitača. Jalla nižta irataž Yooz puntunaca zizqui.

¹² Zur ispijquiz persun yujcqui ana zuma kjanaž tjenča. Jalla nižta iratača anziqiu Yooz puntunaca zizqui, ana kjana. Wiruñaqui Yooztan kamcan zuma kjanaž zizaquiča Yooz puntuqui. Anziqiu anaž tjappacha zizzuca Yooz puntuqui. Wiruñaqui Yooztan kamcan tjapa Yooz puntunaca zizaquiča, jaknužt Yoozqui učhum puntuquiztan zumpacha zizzaja, jalla nižta.

¹³ Ultimquiziqui criichi žoñinacaqui Yoozquin tjapa kuzziz wiñaya cjequiča. Nižaza criichinacaqui Yoozquiztan zumanaca niž jaru niž jaru tjewznaquiča. Nižaza criichinacaqui zuma munaziñi kuzziz wiñaya cjequiča. Pero tsjiiča chekan waliqui, zuma munaziñi kuz, jalla nii.

14

YOOZ TAKU PALJAYZ KAMAÑA PUNTU

¹ Jalla nižtiquiztan zuma munaziz kamañquiz kuz tjaa. Jalla nii kamañača juc'ant chekanaqui. Nižaza Yooz Espíritu Santuž tjaata kamañacquiz kuz tjaa. Yooz taku paljayz kamañquiz juc'anti kuz tjaa.

² Nii anaž pajta taku chiiz kamañaqui anača chekanaqui. Nii kamañchiz žoñiqui Yoozquizkaz chiiča. Anaž žoñžquiziqui chiiča. Jalla nuž ana pajta taku chiyan parti žoñinacaqui anaž intintazi atča. Espíritu Santuqui ana zizta chjojžta taku paljayzkatča nii ana pajta taku chiiñi žoñžquiz.

³ Pero nii Yooz taku paljayñi žoñiqui parti criichinacžquiz paljayčha, juc'ant zuma kamajo, nižaza Yoozquin tjurt'iñi kuzziz cjeajo, nižaza kuzta cjeajo.

⁴ Nii ana pajta taku chiiñi žoñiqui persunjapakaz yanapčha Yoozquin juc'anti kuzziz cjisjapa. Nii Yooz taku paljayñi žoñizti parti criichinacžquiz yanapčha Yoozquin juc'anti kuzziz cjeajo.

⁵ Wejrqui ančhucaquiz cjiwčha, tjapa ančhucqui ana pajta taku chiichiiñi cjičhaja. Pero juc'ant chekanaqui, Yooz takunaca paljayñiž cjičhaja, jalla nižta anchal pecučha. Nii Yooz takunaca paljayz kamañchiz žoñičha juc'ant chekanaqui nii ana pajta taku chiichiiz kamañchiz žoñžquiztanaqui. Jalla nižtiquiztan ana pajta taku chiichiižcu, parti criichinacžquiz intintiskatz waquizičha Yoozquin juc'anti kuzziz cjeajo.

ANA PAJTA TAWKŽTAN PALJAYZ KAMAÑA PUNTU

⁶ Jilanaca, cullaquinaca, ančhucaquiz tjonžcu ana pajta tawkžtan paljayaž niiqui, nii paljaytaqui inakaz cjequičha ančhucaquiz. Ana yanapasačha tsjan zuma kamañchiz cjeajo. Ančhucaquiz yanapzjapa, wejtlaqui kjanapacha paljastančha, tsjii Yooziž tjaata ew takumi, tsjii Yooz puntu zizta takumi, tsjii Yooziž intintiskatta takumi, tsjii Yooz puntu catokta takumi, jalla nii. Nekztan ančhucqui yanaptaž cjequičha, Yoozquin juc'anti kuzziz cjisjapa.

⁷ Tsjii pincallu pjujñi žoñiqui čhjakčhjakauiz niiqui, nii pjujta wirsu ana pajta cjequičha. Nižaza pincallu pjujñinacami quitara icñinacami čhjul musicunacami tsjii wirsu ana kjanapacha tejlznaquiz niiqui, parti žoñinacazti čhjul wirsut pjujčhaja, icčhaja, anaž tantiyi ataquičha. Jalla nižta iratačha ana pajta tawkžtan chiizqui.

⁸ Tsjii quira zalzjapa trompetaz ana zuma claro tjawunaquiz niiqui, jalla nuž ana zuma tjawuntiquiztan zultatunacaqui anaž listu tjaczi cjequičha nii quirajapaqui.

⁹ Jalla nižta irata zakaz ančhucaquiz watčha. Tsjii criichi žoñiqui ana intintazuc takuž paljayaquiz niiqui, ančhucqui ana intintichiž cjequičha, čhjulut chiitčhaja, jalla nii. Jakziltat ana intintazuc takuž chiičhaj niiqui, inakaz chiičha.

¹⁰ Tii muntuquiz tjapaman takunacapanž žejlž, jaz. Nižaza zapa takuqui intintitaž cjesačha jakzilitžquizimi.

¹¹ Pero wejrqui tsjii chiita taku anal intintasaž niiqui, niwjtanaqui yekja wajtchiz žoñžtakaztčha nii chiiñi žoñžquiztanaqui. Nižaza nii yekja taku chiiñi žoñiqui wejtquiztan yekja wajtchiz žoñžtazakazza.

¹² Ančhucaquiz nižtazakazza. Ančhucqui Espíritu Santuž tjaata kamañanacami ancha tanz pequiñčhucčha. Jalla nižtiquiztan ančhucqui tsjan chekan kamañanacquiz kuz tjaz waquizičha, parti criichinacaz Yoozquin juc'anti kuzziz cjeajo.

¹³ Jalla nižtiquiztan jakziltat ana pajta taku chiyáčhaja, Yoozquin mayiziz waquizičha, niž chiita taku zuma intintiskatzjapa parti criichinacžquiz.

¹⁴ Nižaza wejrqui ana pajta tawkžtan Yoozquin mayizaž niiqui, wejt animukaz mayaquičha. Wejt kuzpacha anaž intintičha. Jalla nižtiquiztan inakazza wejt kuzqui. Ana čhjul provechumi jwesasačha.

¹⁵ ¿Jalla nuž cjenaui kjažt cjes wejrqui? Kuztanami animužtanami Yoozquin mayiziz waquizičha. Nižaza kuztanami animužtanami Yooz wirsu its waquizičha.

¹⁶ Animukaz ana pajta tawkžtan Yoozquin gracias cjican chiyasačha. Pero jalla nuž chiyani parti nonzñi žoñinacaqui anaž intintazi atasachha. Jaziqui: “Amén. Jalla nužoj cjila”, cjican ana kjaazñi atasachha.

¹⁷ Ana pajta chiita orasunaqui walikaz cjesačha, Yoozquin gracias cjicanaqui. Pero nii orasunaqui parti criichinacžquiziqui anaž yanapčha, Yoozquin juc'anti kuzziz cjeajo.

¹⁸ Wejrqui ana pajta tawkžtan juc'anti chiyučha tjapa ančhucaquiztan. Jalla nižtiquiztan Yoozquin gracias cjican chiyučha.

¹⁹ Jalla nuž cjenami parti criichinacžtan ajcžcu, wejrqui nii parti criichinacžquiz tjaajinz pecučha. Jaziqui ana pajta tawkžtan anal chiiz pecučha. Jalla nuž chiyani

parti criichinacaqui anaž tantiyi atasacha. Jalla nižtiquiztan iclizziz žoñinacžtan ajcžcu pjijska intintita takunaca chiiz pecucha, tunca waranka ana pajta takunacquiztan.

²⁰ Jilanaca, cullaquinaca, pruebaž tjonan, anapan uj paa. Antiz zuma pinsiñiž cjee.

²¹ Cjijrta Yooz takuqui, tuž cjiča: “Wejrqui yekja wajtchiz žoñinacžquiz paljayskatača. Ninacaqui ana intintazzuc tawkžtan tii wajtchiz žoñinacžquiz paljayaquiča. Nižta ana pajta taku nonžcanami tii wajtchiz žoñinacaqui anaž wejtquin kuzziz cjequiča. Jalla nuž cjiča Yooz Jiliriqi”.

²² Ana pajta takunaca paljayaqui jalla nii chiita takuqui ziñalažtakaz cjequiča, ana criichi žoñinacžquiziqui. Nii ana intintazzuc takunacaqui anača criichi žoñinacžtajapa. Yooziž tjaata takuž jalla niiča criichi žoñinacžtajapaqui. Nii takuqui anača ana Yoozquin criichi žoñinacžtajapaqui.

²³ Tjapa criichi žoñinacžtan ajcziž cjen tsjii ana criichinacaqui luzasacha. Nekztan, ana pajta takunacakaz chiiñi nonznaquiž niiqui, ninacaqui criichi žoñinacžquiz chersnaquiča lucurat žoñinacžtakaz.

²⁴ Pero criichinacaqui Yooziž tjaata takunacakaz paljayaquiž niiqui, nekztan nii ana criichi žoñinacaqui persun kuzquiz sint'aquiča. Yooz taku paljaytaž cjen, nii ana criichi žoñinacž ujnaca tjeežtaž cjequiča. Nii criichinacž chiita takunaca nonžcu persun kuzquiz amayt'asaquiča, nekztan persun ana zuma kamtaž pajaquiča.

²⁵ Jalla nuž ninacaž chjozaca uj paatanacaqui tjeežtaž cjequiča. Jalla nižtiquiztan quillžcu, werar Yoozquin macjatasacha, nižquin sirwizjapa. Nekztan chiyaquiča; “Yoozqui ančhucatan kalča”, cjicanaqui.

CULTO PAAZ PUNTU

²⁶ Jilanaca, cullaquinaca, iclizziz žoñinacžtan ajcžcan, jalla tuž waquiziča. Yekjapanacaqui Yooz wirsu tjaajnasacha. Yekjapanacazti tsjii zuma taku tjaajnasacha. Yekjapanacazti tsjii Yooziž tjaata taku intintiskatasacha. Yekjapanacazti ana pajta taku paljayasača. Yekjapanacazti nii ana pajta chiita taku zumpacha intintiskatasacha. Jalla niiqui walikazza. Pero tjapa chiita takunacaqui criichinacžquiz yanapz waquiziča, Yoozquin juc'anti kuzziz cjejajo.

²⁷ Nii ana pajta taku paljayñi žoñiqui tsjii pucultan čhjepultanž nuž cjesacha. Nižaza niž jaru niž jaru turnasasacha. Nižaza ninacž chiita taku intintiskatta cjis waquiziča.

²⁸ Intintiskatñi žoñi ana želaquiž niiqui, nekztan ana pajta takunaca ana chiiz waquiziča. Pero nii ana pajta taku chiiñi žoñinacaqui persun kuzquiz paljayasača, Yoozquinami.

²⁹ Nižaza nii Yooz takunaca paljayñi žoñinacaqui tsjii pucultan čhjepultanž nuž cjesacha. Parti criichinacaqui ninacž chiita taku zumpacha tantiyaquiča, werara ana werara paljayñi, jalla nii.

³⁰ Yoozqui tsjii julzi žoñžquiz taku tjaaquiž niiqui, nekztan nii ora chiiñiqui nužquiz apatatasacha, niž chiizquiztan.

³¹ Jilanaca, cullaquinaca, paljayñi žoñinacaqui niž jaru niž jaru paljayz waquiziča, parti criichinacž Yooz taku zumpacha zizajo, nižaza juc'anti Yoozquin kuzziz pek'inchayta cjejajo.

³² Nii Yooz taku paljayñi žoñinacaqui persun kuzquiz zuma ewjas waquiziča, niž jaru niž jaru paljayzjapa.

³³ Iclizquiziqui Yoozqui anaž tsjiiza tsjiiza arañi pecča. Iclizziz žoñinacžtan ajcžcu zuma lijituma Yoozquin rispita. Zuma walikaz ajcž waquiziča. Jalla nuž pecča Yoozqui.

Jalla tuž criichi žoñinacaqui ajcžñipanča tjapa wajtquiziqui.

³⁴ Nižaza iclizquiziqui maatak criichinacaqui ch'ujupanž želasacha, anaž chiiz waquiziča. Nižaza maatak criichinacaqui luctakž mantuquiz cjistanča. Jalla nuž cjiča cjijrta Yooz takuqui.

³⁵ Maatakaqui tsjii puntu ana zuma intintichaj niiqui, kjuyquin persun luctakžquiz pewcznaquiča zuma intintizjapa. Nii ajcztiquizpacha ana pewcznaquiča, criichinacžtajapa ana ombrawillta cjejajo.

³⁶ Ančhucqui nii tjaajinta jaru kamz waquiziča. Yooz takuqui ančhucquiztan anaž kalltiča. Nižaza anača ančhuc alajquizkaz Yoozqui taku tjaachiqui. Weriz tjaajintacama kamča tjapa iclizziz žoñinacaqui.

³⁷ Jakziltat Yooz taku paljayz kamañchiz cječhaja, nižaza jakziltat Espiritu Santuž tjaata kamañchiz cječhaja, jalla ninacžlaqui tii weriz cijrta taku pajstanča. Jalla tii takuča Yooz Jilirž mantitaqui.

³⁸ Jakziltat tii weriz cijrta taku ana pajz pecchaj niiqui, parti criichinacaqui nii žoñžquiz anaž pajaquiča. Nii žoñiqui anapanž Espiritu Santuž tjaata kamañchizqui.

³⁹ Wejt jilanaca, cullaquinaca, tužuča chekanaqui. Yooz takunaca paljayz kamañquiz kuz tjaa. Pero tsjii žoñiqui ana pajta tawkžtan chiyaquiz niiqui, jalla nii chiiñi žoñžquiz anaž atajz waquiziča.

⁴⁰ Jilanaca, cullaquinaca, iclizquiziqui zuma jurmali cultu paaz waquiziča, nižaza ajcztiquiz paljayñinacaqui niiz jaru niiz jaru chiiz waquiziča.

15

JESUCRISTUZ JACATATTA PUNTU

¹ Jilanaca, cullaquinaca, weriz tjaajinta takunaca cjuñskatz pecuča. Wejrqui werar liwriiñi Yooz taku tjaajinchinča. Nižaza weriz tjaajintanaca nonžcu ančhucqui catokchinčhucča; nižaza nii tjaajintacama kamzjapa tjup kuzzizčhucča.

² Nižaza liwriiñi Yooz taku tiraž catokaquiz niiqui, nii liwriiñi Yooz takuž cjen ančhucqui tsjan tsjan ujnacquiztan liwriita cjequiča, tsjan zuma kamzjapa. Juñta kuzquizkaz catokchižlaj niiqui, nii juntuñallakaz catoktiquiztan ultimu ana liwriitaž cjequiča.

³ Wejrqui ančhucquiz juc'ant chekan takunaca tjaajinchinča. Tuquiqui wejtquiz zakaz nii zuma takunacaqui tjaajintatača. Jalla tužuča nii tjaajinta takunacaqui. Jesucristuqui učhum uj laycu ticziča. Jaknužt Yooz tawk liwruquiz cijrtatažlaja, jalla nii cijrta jaru cumplissiča.

⁴ Nekztanaqui Jesusiž curpuqui tjažtatača. Nekztanaqui nuž tjažtiquiztan čhjep majquiztan ticziquiztan jacatatchiča. Jaknužt Yooz tawk liwruquiz tuquitan cijrtatažlaja, jalla nii jaru cumplissiča.

⁵ Jacatatžcu Jesucristuqui Pedružquiz parizichiča. Nekztanaqui niiz illzta apostolanacžquiz parizichizakazza.

⁶ Nekztanaqui niiz wiruñ pjijska patac jilanac ajcziquiz parizichizakazza. Jila parti ninacaqui tira žejtča, tsjii kjažta žoñinacakaz ticziqui.

⁷ Niiz wiruñ Jacobžquiz parizichizakazza. Nekztanaqui tjapa niiz illzta apostolanacžquiz parizichizakazza.

⁸ Ultimquiziqui wejtquiz zakaz parizichiča. Wejrqui parti apostolanacžquiztan wirwirilla Yooz partiqui luzzinča.

⁹ Wejrqui parti apostolanacžquiztan ana ancha waquizuča. Tuquiqui wejrqui Yoozquin criichinacž quintra ojklayiñtacha. Jalla nižtiquiztan anatača Cristuž apóstol cjita cjichuca.

¹⁰ Yooz wejtquiz okžniž cjen, wejrqui apóstol kamañquiz uchtitča. Pero ana ina Yoozqui wejr utčiča. Wejrqui apóstol kamañquiz juc'anti jilacami langzinča nii parti apostolanacžquiztan. Nii langztiquiztan wejrqui ana honorchiz cjichucača, Yoozza honorchizqui. Yoozqui wejtquiz wali yanapčiča, apóstol kamañquiz zuma cumplisjapa.

11 Nužulkazza nii puntuqui. Chekpachača wejrnacqui ančhucaquiz liwriiñi Yooz taku paljaychintqui. Jaziqui ančhucqui nii liwriiñi taku tjapa kuztan catokchinčhucča.

ZOÑINACAQUI JACATATAQUICHA

12 Jaziqui wejrnacqui tjaaajinchinča, Jesucristuqui ticziquiztan jacatatchi, jalla nii. Yekjap ančhuczti chiiñiča: “Zoñinacaqui ticžcu ana jacatatasacha”. ¿Kjažta nižta cjesajo?

13 Ticziquiztan ana jacatattasaž niiqui, Jesucristuqui anapaj jacatatchi cječhani.

14 Nižaza Jesucristo ana jacatatchižlaj niiqui, jalla nižtiquiztan wejrnacaž paljayta liwriiñi taku nuž cjenaqui inapankat cječhani. Nižaza ančhuca Cristužquin criichi kamañiqui inapanzakat cječhani.

15 Wejrnacqui “Yoozqui Cristo jacatatskatchiča” jalla nuž cjiwchiya. Ana jacatatchižlaj niiqui, wejrnacqui toscar tisticužtakazlani Yooz puntuquiztanani. Ticzi zoñinacaqui ana jacatattasaž niiqui, Yoozqui Jesucristo anapaj jacatatskatchi cječhani.

16 Ticzi zoñinacaqui ana jacatattasaž niiqui, Jesucristupacha anapaj jacatatchi cječhani.

17 Nižaza Jesucristuqui anapan jacatatchižlaj niiqui, ančhucaž nižžquin tjapa kuztan criitaqui inapankat cječhani. Ančhuca ujquiztan anapan liwriita cječhani.

18 Nižaza Jesucristužquin criichi ticzi zoñinacaqui ninacž ujchiz cjen casticta cječhani.

19 Jesucristužquin criichinacaqui ultim liwriiz ora tjewža. Nii tjewzqui inakazlaj niiqui, učhumqui ana criichi zoñinacžquiztan juc'anti incalltaž cječhani.

20 Pero ultim werara Jesucristuqui ticziquiztan jacatatchipanča. Jalla niiča primir ticziquiztan jacatatchi zoñiqui, primira pookchi zkala ricujtažtakazza.

21 Primirquiztanpacha tsjii zoñiž uj paachiž cjen, tjapa zoñinacaqui ticstanča. Jalla nižtakaz tsjii zoñiž cjen tjapa Jesucristužquin criichi zoñinacaqui jacatataquiča, Yooz-tan wiñaya kamzjapa.

22 Adán cjita zoñiž cjen tjappachaž ticža, jalla nižtakaz Jesucristo cjita zoñiž cjen tjapa nižžquin criichi zoñinacaqui jacatatskatta cjequiča.

23 Nižaza tjapa criichinacaqui jaknužt Yooz munčhaja, jalla niicama jacatatskatta cjequiča. Jesucristo, niiča primiraqui. Nekztan Jesucristuž tjonz tjuñquiziqui nižž parti zoñinacaqui jacatataquiča.

24 Jalla niž wiruñ nižž parti zoñinacaž jacatattiquiztan, tii muntuquiz tucuzin-naquiča. Nekztan tjapa Jesucristuž quintra jilirinacami, nižaza nižž quintra mantiñinacami, nižaza nižž quintra azziznacami, jalla tjappacha liwj tjatantaž cjequiča. Jalla nekztanaqui tjapa mantizqui Yooz Ejpžquin intirjitaž cjequiča.

25 Pero anziqiu Cristuqui tira mantistanča nižž quintrarionaca liwj atipscama. Nižž quintranaca tjewcžtažokaz cjequiča.

26 Ultimquiziqui ticzqui atiptaž zakaz cjequiča. Ticzqui ana iya želaquiča.

27 Yoozqui Cristo utchiča tjappacha mantizjapa. Yooz Ejpkazza ana Cristuž mantuquiz žejlča. Jalla nii puntu kjanača. Tjapa nekztanaqui Cristuž mantuquiz žejlča.

28 Yoozqui Jesucristo utchiča, tjappacha mantizjapa. Ultimquiziqui Jesucristo Yooz Majchqui tjapa tii muntuquiz žejlñinacami atipžcu, niipachaž Yooz Ejpž mantuquiz cjequiča. Yooz Ejpča wiñaya juc'ant chekanaqui cjequiča, tjappachquiztanaqui.

29 Tsjiilla cjesača, jacatatz puntuzakaz. Ančhucaltaž tsjii cuzturumpi žejlča, criichi zoñiqui ima bautistan, ticziž cjen, žejtñi criichi zoñiqui nii ticzi criichiž cuntiquiztan bautismo tanzñiča. Ticziquiztan ana jacatatchi cječhaja, ¿Kjažtiquiztan nižta paa ančhucjo? ¿Chjuljapa bautismo tanžjo? ¿Ticzi zoñž cuntiquiztanajo?

30 Nižaza ticziquiztan ana jacatatchi cječhaj niiqui, ¿Kjažtiquiztan wejrnacqui zapuru sufrican Yooz taku paljayz kamañiquiz tira ojklajojo?

31 Apóstol kamañiquiz ojklayan anchucqui Jesucristo Jiliržžquin criichinčhucča. Jalla nuž cjen cuntintuž wejrqui. Jalla nuž chiican werar razunal chiyuča. Nižaza zapuru

wejrqui ticz llaquizican želuča, apóstol kamañquiz ojklaycan. Jilanaca, jalla nuž chiican, werar razunal chiyuča.

³² Wejrqui Efeso cjita wajtquin preso cjicanaqui anawal q'uit animalanacžtan kich-jaskattatača. Ticziquiztan anažlaja jacatatñi niiqui, weriž nuž sufritaqui inakat cječhani. Ana criichi žoñž pinsita jaru inapankazza weriž sufritaqui. Ninacaqui tuž cjiñiča: “Lujžla, licžla, jaka kat učumqui ticznačan”, jalla nuž cjiñiča ana criichi žoñinacaqui. Ticziquiztan ana jacatattasaž niiqui, nuž cjiñi žoñinacaqui zuma razunchiztakat chiichani. Pero ultimu žoñinacaqui jacatataquiča.

³³ Jaziqui ančucqui anaž incallskata. Ana zuma kamañchiz mazinacchizčucčhalaj niiqui, ančucqui zuma kamañquiztan tsjii kjutñi chjichtaž cjesača.

³⁴ Ančucqui zuma lijitum razunanacchiz cjisna; nižaza lijituma cjee; anaž uj paa. Yekjap ančucqui Yooz puntunaca ana zuma zizza. Jalla nii ančucaquiz chižinuča, ančuc azajo.

JACATATCHI ZOÑINACŽ CURPU PUNTU

³⁵ Cunamit tsjii žoñiqui pewcznačan, tuž cjican: “¿Jaknužt ticzi žoñinaca jacatataquejo? ¿Chjuluž cherchi curpuchiz cjequejo?”

³⁶ Zumzu pewczñi pewcziča. Semilla čhjaczcu, nii čhjacta semillaqui ana katchi cjequiž niiqui, ew zkala ana jecznašača.

³⁷ Nii čhjacta semillaqui anaž ew zkalapacha cjesača. Nii čhjacta semillaqui semil-lakazza, trigo cjenami, yekja cjenami, semillakazza, anaž ew zkalapacha cjesača.

³⁸ Semilla čhjactiquiztan jaknužt Yoozqui munčhaja, jalla nižta ew zkala ulanskatča. Chjacta semillquiztan jama, punta puntaž ew zkala ulanča. Tjapa zkalanacaqui anača tsjiikaz. Punta punta žejlča.

³⁹ Jalla nižta iratača tii muntuquiz žejlñi curpuqui. Zoñinacž curpuqui yekjača. Ch'iznacž curpuqui yekjača.

⁴⁰ Nižaza arajpachquin žejlñinacž curpuqui yekjača. Nižaza yokquiz žejlñinacž curpuqui yekjača. Arajpach curpuqui tsjemata cheechi tježa yokquiz žejlñi curpuquiztan.

⁴¹ Tjuñ kjanaqui tsjematača jiiž kjanquiztan. Nižaza tsjematazakazza warawarž kjanquiztan. Nižaza tsjii warawarž kjanaqui tsjematazakazza yekja warawarž kjanquiztanaqui.

⁴² Jalla nižta iratača jacatatzqui. Ticzi curpuqui tsjematača jacatatchi curpuquiztan. Nii ticzi curpuqui tjažta, nižazaž mojkča. Nii jacatatchi curpuzti ana ticznasača, nižaza ana mokasača.

⁴³ Nii ticzi curpuqui ana honorchizza. Nii jacatatchi curpuzti zuma honorchizza. Nii ticzi curpuqui ana azzizza. Jacatatchi curpuzti walja azzizza.

⁴⁴ Nižaza ticzcuca curpuqui tii muntuquiz kamzjapa curpukazza. Jacatatchi curpuqui tsjematača, wiñaya kamzjapa. Tii muntuquiz kamcan, žoñinacaqui curpuchizza. Nižta zakaz jacatatzcu curpuchiz zakaz cjequiča, wiñaya kamzjapa.

⁴⁵ Cjijrta Yooz takuqui tuž cjiča: “Tuquita žoñiqui Adán cjitatača, nižaza žejtñi curpuchiztača, tjapa niž majch maatinacžtajapaqui”. Cristuqui Adanžtapachazakazza. Jalla niiqui wiñaya žetiž tjaača, tjapa nižquin criichi žoñinacžtajapaqui. Yooztan kamz, jalla niča wiñaya žetiqui.

⁴⁶ Tii muntuquiz žoñinacaqui kamča žejtñi curpuchiz. Wiruñauqui jacatatzcuqui žoñinacaqui wiñaya žejtñi curpuchiz cjequiča.

⁴⁷ Tuquita žoñiqui yok pjilquiztan paatača. Wiruñta žoñiqui, Jesucristo Jiliriui, arajpachquiztan tjončiča.

⁴⁸ Tii yokquiz kamñi žoñinacž curpuqui Adanž curpu iratača. Nižaza Yooztan arajpachquin kamñi criichinacž curpuqui Jesucristuž jacatatchi curpu iratača.

⁴⁹ Učhumnacaqui Adán irata curpuchizza. Pero jacatatžcu Jesucristo irata kamaquiča, ew curpuchiz.

⁵⁰ Jilanaca, cullaquinaca, jalla tii puntu tjaajnuča, ančhucaquiz zizkatzjapa. Janchichiz nižaza ljokchiz curpuqui arajpach wajtquin ana luzasača. Nižaza tii mojkni curpuqui anaž wiñaya žetasača arajpachquin.

⁵¹ Tsji zakaz ančhucaquiz zizkatz pecuča. Tjapa criichinacaqui anaž ticznaquiča. Pero tsji ratullakaz curpunacaqui campiižintaž cjequiča.

⁵² Tsji čhujqui jaknužt ch'ipquiñizlaja, jalla nuž tsji ratulla curpu campiižintaž cjequiča. Arajpach anjilaž trompeta tjawžtan, curpunacaqui campiižintaž cjequiča. Nii trompeta tjawžtan, ticzi žoñinacaqui jacatatskattaž cjequiča, ana iya ticzjapa. Nižaza žejtři žoñinacž curpunacazakaz campiižintaž cjequiča.

⁵³ Tii yokquiz žejlři curpuqui anaž wiñaya tjurři cjesača. Jalla nižtiquiztan učumqui ew curpuž tanstanča wiñaya žejtzjapa. Nižaza učum ticzři curpuqui anaž wiñaya tjurři cjesača. Jalla nižtiquiztan učumqui ana ticzři curpu tanstanča.

⁵⁴ Učhumnacaqui ew wiñaya žejtři curpuchiz cjequiča, nižaza ana ticzři curpuchiz. Jalla nuž wattan Yooz takuqui cumplissi cjequiča. Yooz takuqui tuž cjiča: “Ticzqui atipžtaž cjequiča. Jalla nižtiquiztan ana iya ticz želaquiča.

⁵⁵ Nižaza ticzqui anapanž iya atipaquiča”. Ticzqui anaž iya žoñinacžquiz llaquita cjiskataquiča.

⁵⁶ Ujchiz cjen ticz žejlča. Nižaza ticzqui žoñinacžquiz llaquita cjiskatča. Nižaza tuquita cijirta liiqui žoñinacžquin persun ujnaca tježa.

⁵⁷ Wejrqui Yoozquin ancha gracias cjican tjaa-uča. Jesucristo Jilirž cjen učumqui ticzquiztan atipaquiča.

⁵⁸ Jalla nižtiquiztan, weriž pecta jilanaca, Yoozquin tjurt'iři kuzziz cjee, nižaza Yoozquin tjup kuzziz cjee, nižaza Jesucristo Jilirž tjaata kamañquin juc'anti juc'anti kuz tjaa. Ančhucqui zizza, Jesucristo Jiliržtajapa langzqui anača inaqi.

16

CRIICHINACZTAJAPA PAAZ JUNTIZ PUNTU

¹ Tsji zakal chiižinuča, criichinacžtajapa paaz juntiz puntuquiztan. Jaknužt Galacia provinciquin wejrqui tjapa iclizziz žoñinacžquiz chiižinčinčhalaja, jalla nižta irata ančhucaquiz chiižinuča, paaz juntantiz waquiziča, pori criichinacžquiz yanapzjapa, jalla nii.

² Zapa siman tumincuqui ančhucqui ančhucaž cantiquiztan jama t'akz waquiziča. Jalla nuž t'akžcu chjojwaquiča wejt tjonzcama. Nekztan weriž tjontan, ana žoñ žoñžquiztan apura ojklaycan paaz juntantichuca. Ančhucaž t'akzta paazqui listupachakaz cjequiča.

³ Nižaza ančhucqui tsji kjaž jilanaca illz waquiziča, nii juntantita paaz chjichñijapa Jerusalén wajtchiz criichinacžquiz. Nižaza ančhucqui nii illzta jilanacžquiz tsji carta credencialž tjaaquiča. Nekztanaqui wejr tjonžcu, wejrpachal ninaca cuchanžcača Jerusalén watja.

⁴ Wejr ojchuca cjequiž niiqui wejtta chicaž okaquiča ninacaqui.

TSJII KJAZT PUNTUNACA

⁵ Ima tjoncan, wejrqui Macedonia yokaran ojklayasaj cjiwča. Wiruñaqu Corinto irantasaj cjiwča, ančhucaquiz tjonzjapa.

⁶ Irantižcu tsji kjaž maj kamačan, uz cunamit nicju sac timpu watačhani. Nekztanaqui ančhucqui wejt ojklayzjapa yanapasača, jakzi ojcz cjenami, jalla nii.

⁷ Wejrqui tsji upacama watcankaz ana tjonz pecuča. Antiz tsji kjaž maj ančhucatan kamz pecuča, Yooz Jilirž munan.

⁸ Pero Efes wajtquin kamačha Pentecostes tjuñicama.

⁹ Tii Efes wajtquiz ancha Yooztajapa langz žejlčha. Nižaza zumpachapan langznan, walja žoñinacaqui criyačhani. Nižaza walja Yooztajapa langzñi quintra žoñinaca žejlčha.

¹⁰ Timoteož irantižqitan, ančhucqui Timoteož kuz cuntintupanž cjiskataquičha. Niiqui Yooz Jiliržtajapa langža, wejr irata.

¹¹ Jalla nižtiquiztan anaž jecmi ančhucaquiztan nii Timoteo iñarasačha. Antiz ančhucqui juc'antiž yanapaquičha, nii zuma cuntintu tira ojklayajo. Nižaza nii yanapaquičha, wejr chertzni quejpžcajo. Tekzi wejrqui Timoteo tjewznuča parti criichi jilanacžtan.

¹² Apolos jilž puntuquiztan tiil maznuča. Wejrqui ancha nižquiz rocchinča, yekjap jilanacžquiz cumpañt'ajo, ančhucaquin chertzni. Parti jilanacžtan ojkz cjen Apoluqui ana okawk cjichičha. Wiruñ niiqui ančhuc chertzni okačhani, atchucaž cjen.

¹³ Ančhucqui persun kamaña cwitaza. Yoozquin tjurt'iñi kuzziz cjee. Yooz aztan tjup kuzziz cjee.

¹⁴ Chjulu paacanami zuma munaziñi kuzziz cjee.

¹⁵ Jilanaca, cullaquinaca, ančhucqui zizza. Acaya yokquiz Estefanasqui niž jamil-lanacžtanpacha primira Yoozquin criichičha. Nekztanaqui ninacaqui parti criichi jilanacžquiz yanapzjapa kuz tjaachičha.

¹⁶ Jalla nižta kuzziz žoñinacž tawk jaru kama. Nižaza tjapa nižta criichinacžquiz yanapñinacami, nižaza Yooztajapa langzñinacami rispitaquičha. Nižaza ninacž tawk jaru kama.

¹⁷ Estefanastan Fortunatžtan Acaicužtan jalla ninacaž tjontan, walja cuntintutačha wejrqui. Ančhucaž ana wejttanž žejlchucaž cjen, ninacačha ančhuc cuntiquiztan wejr yanapchiqui.

¹⁸ Wejttan kamcan ninacaqui wejt kuzquiz amtaychičha, jaknužt ančhuca kuzquiz amtayčhaja, jalla nižta. Nižta žoñinacaqui, rispittaj cjila.

¹⁹ Asia provinciquin žejlñi jilanacaqui ančhucaquin tsaanžquičha. Aquilžtan Priscilatan, nižaza ninacž kjuyquiz ajczñi jilanacžtan, jalla tjapa ninacaqui ančhuc criichinacžquin tsaanžquičha, Jesucristo Jilirž tjuuquiz.

²⁰ Nižaza tjapa criichi jilanacaqui ančhucaquin tsaanžquičha. Nižaza ančhucaquiz porapat zuma kuztan tsaanassnaquičha.

²¹ Wejrqui Pablutčha. Persun kjaržtan tii weriž tsaanta litraqui cijjruča.

²² Jakziltat Jesucristo Jiliržquin ana kuzziz cječhaja, nižaza quintra cječhaja, jalla niiqui anawalquiz uchtaž cjequičha. ¡Učhum Jesucristo Jiliri urej tjonla!

²³⁻²⁴ Nižaza Jesucristo Jiliri qui ančhucaquiz zuma yanapt'ila. Nižaza wejrqui tjapa ančhucaquin k'ayichuča Jesucristuž cjen. Jalla nužoj cjila. Amén.

SEGUNDA CARTA DEL APOSTOL SAN PABLO A LOS CORINTIOS

¹ Wejr Pabluqui Jesucristuž illzta apostoltča. Yoozqui niž munañpi jaru tii apostol puestuquiz wejr utchiča. Jaziqui tii cartal apayžcuča ančhucaquin Corinto wajtchiz žoñinaca. Wejttan Timoteužtan ančhucaquin tsaanžcuča. Nižaza tjapa Acaya yokquin kamñi žoñinacžquin tsaanžcuča. Ančhucqui Yoozquin criichiž cjen Yooz icliz žoñinacchucča.

² Učhum Yooz Ejpžtan Jesucristo Jiliržtan ančhucaquiz yanapt'ila. Nižaza ančhucaquiz walikaj kamkatla.

YOOZ EJP ANCHA OKZŃI NIZAZA KUZŃI KUZZIZ

³ Učhum Jesucristo Jilirž Yooz Ejpžquiz honora waytitaj cjila. Yooz Ejpqui okzñi kuzzizpanča, nižaza sufrita žoñinacžquiz zumpacha kuzñipancha.

⁴ Wejrnacaž sufranami Yooz Ejpqui kuzñipancha, niztapacha wejrnacaž sufrita jilanacžquiz kuzjapa. Nekztanaqui wejrnacqui sufrita jilanacžquiz maznasača, “Yoozqui amquiz kuznasača”, cjican. Nižaza wejrnacpacha ninacžquiz kuznasača.

⁵ Jesucristužquin criichiž cjen Jesucristuž irata ancha sufruča. Nižaza Jesucristuča wejrnacaquiz zumpacha kuzñiqui.

⁶ Jaziqui wejrnacqui ančhucaquiz tsjan zuma kuznasača. Nižaza Yooz taku paljaycan ančhucaltajapa sufruča, ančhuc liwriyta cjisjapa. Nižaza wejrnacqui Yooziž kuztača. Jaziqui nižtazakaz ančhucaquiz kuznasača. Nekztan ančhucqui kuzta kuzziz cjen sufrisnaca wataquiča, ana ančhuca kuz turwayskatžcu. Jaziqui ančhucqui wejrnac irata sufrican, pasinziz kuztan awantasača.

⁷ Ančhucqui tjurt'iñi kuzzizchucča. Jalla nužupanča ančhucqui. Ančhucqui wejrnac irata sufriča. Nižaza Yoozqui ančhucaquiz zakaz kuznaquiča. Jalla nužupanž cjequiča.

⁸ Jilanaca, cullaquinaca, tii puntunaca ančhucaquiz zizkatz pecuča. Asia yokaran ojklaycan, ancha sufrichinča. Jalla nuž sufrican azi upzižtakaz cjissintača, ticzmayaztakaztača.

⁹ Jalla nižta sufritiqiztan kuzquiz tantiichinča, ticzucapan, jalla nii. Pero Yoozza ticzinacami jacatatskatñiqui. Jalla nižta sufrichinča, persun azquizimi nižaza pinsitanacquizimi ana kuzziz cjisjapa, antiz Yoozquin juc'anti kuzziz cjisjapa.

¹⁰ Ultimquiziqui Yoozqui wejr liwriichiča, nii ticzmaya ojklayta pruebanacqiztan. Nižaza wilta nižta prueba tjonaquiz niiqui wilta Yoozqui wejr liwriyaquiča. Yoozquin kuzziz cjican, jalla nužupanča wejt razunaqui.

¹¹ Ančhucqui wejtquiz mayizinalla, wejt pruebanacqiztan liwriita cjisjapa. Jalla nuž ančhucaž ancha mayizintaž cjen liwriital cjeeča. Jalla nekztan weriž yanaptaž cjen anchucqui Yoozquin gracias cjican chiyasača. Jaziqui wejttajapa mayizinalla.

PABLO CORINTO WAJTQUIN OJKZ PECATCHA

¹² Wejrqui ančhucatan, nižaza tjapa žoñinacžtanami Yooz zuma kamañchiz kamchinča, zuma lijituma. Ana pizc kuzziz kamchinča. Wejt kuzquiz zizuča anal toscara chiyuča, weraral chiyuča. Jalla nižta zuma kamcan, ana žoñiž pinsita jaru kamchinča. Okzñi Yoozqui wejtquiz yanapchiča, nižta zuma kamzjapa. Jalla nižta zuma kamtaž cjen cuntintuča wejrqui.

¹³ Weriž cjiirtaqui zuma werara zakazza. Liican, ančhucqui kjanaž intintasača. Ana incallñi kuztan cjiiržcuča.

¹⁴ Yekjapanacaqui ančhucaquiztan wejt kuz pajča. Wejt kuzqui juc'anti zumpacha pajsspanča ančhucqui. Nekztan Jesucristo Jiliriž tjonz tjuñquiziqui ančhucqui weriž cjen cuntintuž cjesača, jaknužt wejrqui ančhucaž cjen cuntintul cjeeča, jalla nižta.

¹⁵ Ančhucatan wejtta walikazza. Jalla nužupanča. Jalla nižtiquiztan weriž ojklaytiquiz ančhucaquin wilta tjonz pecaytuča. Nekztan ančhucqui pizc wilta cuntintu cjiskattaž cjitasača, weriž pizc wilta tjonžtiquiztan.

¹⁶ Primiraqui Macedonia cjita provinciquin ojkecan ančhucaquiz tjonz pecaytuča. Nekztan Macedoniquin ojkažu wilta ančhucaquiz tjonz pecaytuča. Jalla nuž ančhucqui wejr yanaptasača, Judea yokquin irantizjapa. Nužupan tantižcu ana atchinča.

¹⁷ Jalla nižtiquiztan yekjap žoñinacaqui wejtjapa chiichiča, Pabluqui p'ajpacužtakaz chiichiča, cjican. Anača werara ninacž tantiitaqui. Wejrqui ana tantiyiñča ana criichi žoñižtakaz. Ana criichi žoñinacaqui p'ajpawc razunchiz chiyasača.

¹⁸ Lijitum Yoozqui zizza, wejrqui anača p'ajpacužtakaz chiichintqui, nii

¹⁹ Silvanužtan, Timoteužtan, wejtta, jalla wejrnacqui anapan p'ajpawc razunanaca chiichintqui. Ančhucatan kamcan Jesucristo Yooz Majch puntuquiztan lijituma chiichinča. Nižaza Jesucristuqui zuma lijitumača. Niž chiita taku cumpliñipanča.

²⁰ Nižaza tjapa Yooz taku cumpliñipanča. Jalla nižtiquiztan Jesucristuž cjen Yooz tawkquiztan “Nužoj cjila” cjiñča. Nuž cjican Yoozquin honora tjaa-uča.

²¹ Nižaza Yoozza wejtnacquizimi ančhucaquizimi Jesucristužquin tjurt'iñi kuzziz cjiskatñiqui. Nižaza Yoozza wejr utchiqui, niž apóstol cjisjapa.

²² Yoozqui nii tjeeziča, nižaza wejtnaca kuzquiz niž Espiritu Santo luzkatchiča. Jalla nižtiquiztan kjana tjeeztača, Yooz žoñinacača wejrnacqui, nii.

UJCHIZ ZOŃI PERTUNTA

²³ Jilanaca, cullaquinaca, Corinto wajtquin tsjii tjonžni okitača. Pero ana tjonchinča, ančhuc ana ujzjapa. Jalla niča ana wejr tjonni razunaqui. Yoozqui zizza, wereral cjiwča wejrqui.

²⁴ Ančhucqui Yooz mantuquiz žejlča, anaž wejt mantuquiz. Pero ančhucaquiz chiižinačaj niiqui, yanapz pecuča, ultimu ančhuc juc'anti cuntintuž cjisjapa.

2

¹ Wejrqui tantiichinča, imazi ančhucaquin wilta tjonžni. Wilta llaquiskatz anal pecatuča.

² Ančhucaquiz llaquiskatasaz niiqui, anaž čjulumi wejtquiz cuntintu cjiskatasacha. Ančhucča wejtquiz cuntintu cjiskatñiqui. Jalla nižtiquiztan ančhucaquiz ana wilta llaquiskatz pecatuča.

³ Jaziqui ančhucaquin tjonz cjenpacha tuqui cjižžquichinča zumpacha ewjt'ican, ančhuc anawalinaca azquichjapa. Nekztan wejrqui ančhucaquin irantižcu, cuntintu cjeeča, ana llaquita. Ančhucča wejtquiz cuntintu cjiskatñiqui, ¿ana jaa? Weriž cuntintu cjen ančhucqui zakaz cuntintuž cjesača. Jalla nužupanž cjesača.

⁴ Tuqui cjižžquican, ančhucajapa anča kuzquiz sint'iskatchinča nizaza llaquisinča, kaazcama. Jalla nuž cjižžquican anal ančhuc llaquiskatz pecatuča, antiz wejt zuma munaziñi kuz tjeez pecaytuča. Ančhucatan anča munazuča.

⁵ Nii ana wali kamni žoñiqui ančhucaquiz anča llaquiskatchiča. Wejtquiz zakaz llaquiskatchiča; pero ančhucaquiz juc'anti. Cunamit anaž tjapa ančhucaquiz llaquiskatchižlani, pero jila partipan ančhucaquiztan.

⁶ Jila parti ančhucqui nii ana wali kamni žoñi casticchinčhucča, nižaza chjaawjkatchinčhucča. Nužquizkaz cjila.

⁷ Anziqui nižquiz pertunz waquiziča, nižaza nižquiz kuz waquiziča, nii žoñi ana juc'anti upa kuz cjisnajo.

⁸ Jaziqui ančhucaquiz rocuča, niižquiz zuma munaziñi kuz wilita tjeezjapa.

⁹ Tuqui tii puntuquiztan ančhucaquiz cjiřžquichinča, ančhuc zumpacha yanzjapa, tjapa weriž chiižinta cazzi, ana cazzi, jalla nii.

¹⁰ Nii ujchiz žoñiqui ančhucaž pertuntažlaja, jalla niiqui weriž pertuntazakazza. Cristuž yujcquiziqui pertunuča, añchuc juc'ant zuma cjisjapa.

¹¹ Nii ujchiz žoñi pertunta cjis waquiziča, Satanás diablu ana učumnacaquiz atipskatzjapa. Diabluž ana wal mañanaca zizza uchumqui.

QUINTU ANCHA ZIZ PECCHICHA PABLUQUI

¹² Troas watja irantichinča, Cristuž liwriiñi taku paljayzjapa. Nekztan Jesucristo Jilirižtajapa langznan, muzpa žoñinacaqui Yooz taku nonziča.

¹³ Pero Tito cjita jilžtan ancha zalz pecaytuča, ančhuc quinto zizjapa. Jalla nižtiquiztan wejt kuzqui anatača cuza. Jalla nižtiquiztan Troas wajtchiz žoñinacžquiztan eccu, Macedonia yokquin ojkchinča.

¹⁴ Nicju tjapa ančhucž quinto nonzinča, walikazza ančhucqui. Yoozquin ancha gracias cjican chiyuča. Yoozpanča anawalinacquiztan wejrnaca atipskatchiqui. Nižaza tjapa kjutñi Yooz Ejpqui Cristuž puntuquiztan paljayta cjiskatča wejrnacaž cjen. Jaknužt tjapa kjutñi tsji zuma ulura žkejtčhaja, jalla nižta irata wejrnacaž paljayta liwriiñi taku tjapa kjutñiž ojkča.

¹⁵ Wejrnacqui zuma inzinužtakaz Yoozquiz cuntintu cjiskatuča, Cristuž puntu paljaycan. Liwriita žoñinacžquizimi ana liwriita žoñinacžquizimi Cristuž puntu paljayuča.

¹⁶ Nii ana liwriita žoñinacaqui anapan catoktiquiztan juc'anti casticta cjequiča. Jalla nižtiquiztan weriž paljaytaqui ana wali chjonanchi žketñižtakazza ninacžtajapa. Pero nii liwriita žoñinacazti weriž paljayta catoktiquiztan juc'ant zumaž cjequiča. Jalla nižtiquiztan weriž paljaytaqui zuma uluražtakazza ninacžtajapa. Jalla nižtiquiztan jequit Cristuž puntuquiztan paljayñi puesto tanznasajo?

YOOZ UCHTA ZONICHA PABLUQUI

¹⁷ Wejrqui Cristuž puntu paljaycan anal negocio paa-uča; nižaza Yooz taku anal queruča yekjap žoñinacžtakaz. Wejrzi zuma lijituma paljayuča zuma kuzziz. Yooz uchta apostultča. Cristužtan wejtta tsji kuzziz cjen, Yooz Ejpqui zizza, liwriiñi Yooz taku lijituma paljayuča.

3

¹ Jalla nuž wejt puntuquiztan chiyanaqui, ančhucqui pinsačhani, wejr persunpacha honora waytiñi, jalla nii. Yekjapanacaqui tsji carta nombramientužtan ojklayča. Nižta carta nombramientuqui wejtta ana pecza, ančhucaquiz prisintizjapa. Nižaza ančhucaquiztan nižta carta anal mayasača.

² Ančhucpachača wejt carta nombramiento cuntaqui. Ančhucqui weriž paljaytiquiztan ew kamañchizza. Tjapa žoñinacaqui nii cherasača, nižaza pajasača.

³ Cristuqui ančhucaquiz ew kamañchiz cjiskatča, weriž paljaytaž cjen. Jaziqui ančuca ew kamañaqui tsji carta nombramientužtakazza. Jalla nii cartaqui anača čjul tintižtanami cjiřtaqui; anača čjul mazquizimi cjiřtaqui. Yooz Espiritu Santuqui ančuca kuzquiz luzziča, ew kamañchiz cjisjapa. Jaziqui ančuca ew kamañaqui tsji carta nombramientužtakazza.

CRISTUZ LIWRIIÑI TAKU PALJAYZ

⁴ Ančhucča kjana tjeezñiqui, wejrqui lijitum apostoltqui, nii. Jalla nužupan cjiwča. Cristuž cjen nuž chiyasača Yooz yujcquiz.

⁵ Nuž cjican, zakaz cjiwča: Wejrpacha ana čjul walimi paasača Yooztajapa. Čjul Yooztajapa wali paatami Yooz aztanpankaz paatača. Inakaztča wejrqui. Pero Yoozqui wejr illziča, niiž apóstol cjisjapa.

⁶ Yoozpacha wejr utchiča niiž ew compromis puntu paljayñi ojklajzjapa. Nii ew compromisuqui anača Moisés cjiirta liiquiztan, antiz Espiritu Santužquiztanča. Nii cjiirta lii cjen žoñinaca infiernuquin okaquiča, castictaž cjisjapa. Espiritu Santuž cjen žoñinacaqui arajpachquin okaquiča, Yooztan wiñaya kamzjapa.

⁷ Nii Moises cjiirta liiqui maznacquiz litranacžtan cjiirtatača. Nii cjiirta lii tanžcu, Moises yujcqui walja c'ajchiča. Jalla nuž Moises yujc walja c'ajan, parti Israel žoñinacaqui niiž yujc ana cheržñi atchiča. Moises yujcqui jalla nuž c'ajñiž cjen, zumat zumat upa c'ajchiča. Yoozqui jalla nižta lii tjaachiča, honorchiz cjisjapa, žoñinaca ana liwriiñi cjenami.

⁸ Yoozqui niiž ew compromiso juc'ant honorchiz cjiskatchiča. Ew compromisquiztan Espiritu Santuqui žoñinacžquiz liwriiskatča.

⁹ Nii honorchiz lii ana cumplitiquiztan učumqui castictajapa cjissinčumča. Pero ew compromiso catokchiž cjen učumqui Yooz yujcquiz zuma cjissinčumča, ana ujchiz. Juc'ant honorchizza nii ew compromisuqui.

¹⁰ Tuquiqui Moisés liiqui honorchiztača. Anzta ew compromisquiztan nii tuquita liiqui anča upa honorchizza, nii anzta compromisuqui juc'ant honorchiz cjen.

¹¹ Nii liiqui Cristuž tjonzcama mantizjapakaz tjaatatača. Nekztan ana iya walča. Nii ew compromisuzti wiñayaž tjuraquiča. Jalla nižtiquiztan juc'ant honorchiz žejlztanča.

¹² Jalla nii ew compromiso ut'aytaž cjen wejrnacqui uchtača, wiñaya liwriiñi taku paljayzjapa. Jalla nižtiquiztan tjup kuztan kjanacama chiyuča.

¹³ Nii Moises irata anal paa-uča wejrnacqui. Moisesqui niiž c'ajni yujc chjojziča, parti Israel žoñinaca ana cherzjapa, nii yujc c'ajñi katzcama. Moises yujcqui ana tira c'ajñitača. Nii tuž cjiča, liiqui anaž tira walča, apatatta, jalla nii.

¹⁴ Wejrnacqui liwriiñi puntuquiztan kjanacama chiyuča. Pero Israel žoñinacazti nii puntu ana intintazziča. Chojru kuzzizpantača anzcama ana intintazza. Moises lii liižcu nii liiquizkaz pinsiča. Cristužquin kuz tjaaz ana pinsiča. Pero Cristužquin kuz tjaachiž cjenkaz liwriiñi Yooz puntu intintazñi cjesača.

¹⁵ Anzcama Moises lii liicanami ana liwriiñi Yooz puntu intintazasača jila parti judío žoñinacaqui.

¹⁶ Jesucristo Jiliržquiz kuz tjaažcu, nekztanž liwriiñi Yooz puntu intintazasača.

¹⁷ Jesucristo Jiliriqui Yooz Espiritužtan tsjii kuzzizza. Nižaza jakziltiž kuzquiz Jesucristuž Espiritu žejlčhaja, jalla niiqui liwriitapanž cjequiča.

¹⁸ Jalla nižtiquiztan liwriitaž cjen, tjapa učumqui Jesucristo Jilirž honoraž tjeeža, tsjii ispijužtakaz. Nižaza učumqui zumat zumat Jesucristuž irata juc'ant zuma cjissa. Nižaza niiž irata juc'ant juc'ant honorchiz cjissa. Jalla nuž učumnacaltajapa cjiskatča Jesucristo Jilirž Espirituqui. Nužupanča Yoozqui učumnacaltajapa.

4

YOOZQUI PABLO UTCHICHA APOSTOL PUESTUQUIZ

¹ Jalla nižtiquiztan anal upa kuzziz cjesača. Yoozqui niiž okžni kuzziz cjen wejr apóstol puestuquiz utchiča.

² Jalla nii puestuquiz kamcan, wejrqui ana wali chjojzaka paaznaca, nižaza azzuca paaznaca ana wirapan paachinča. Nižaza ana wali paaz mañanaca ana wira paachinča. Nižaza Yooz taku anal tsjii kjutñi cjiyasača. Antiz kjanacama werarapanikal chiyuča. Yoozza weriž chiitaqui zizñiqui. Nižaza weriž chiitiquiztan tjapa žoñinacaqui persun kuzquiz zizasacha, wejrtča ligitum apostoltqui, jalla nii. Nuž cjiwča, ana wali žoñinacaž wejtquiz uj tjojtnanami.

³ Weriž paljaytaqui zumzu takužtakazza ana criichi žoñinacžjapaqui. Ninacača infiernuquin ojkninacaqui.

⁴ Tii muntuquiz mantiñi diabluqui nii ana criichi zoñinacž kuz chojru cjiskatchičha, liwriiñi taku ana intintajo. Zur zoñižtakaz cjiskatchičha, Cristuž liwriiñi kjana ana cherajo, nižaza liwriiñi taku ana catokajo. Nii liwriiñi takučha ancha zumaqui. Ancha zuma Cristuž puntu chiičha. Jesucristučha Yooz Ejpž kuz tjeezñiqui.

⁵ Jilanaca, cullaquinaca, nonžna. Wejrqui Jesucristuž puntuquiztankaz paljayučha. Ultim chawjc Jiliripankazza Jesucristuqui. Nuž cjiwčha. Jesucristuž honora waytučha; anačha wejt persun honora waytučha. Nižaza Jesucristuž mantuquiz ojklaycan wejrqui ančhuc piyunitčha, ančhuc yanapzjapa.

⁶ Tuquitanpacha Yoozqui mantichičha ween zumchiquiz kjana cjeajajo. Nii Yooz-pachačha wejt kuzquiz kjanchiqui, liwriini Yooz taku zumpacha intintizjapa, ancha zuma Yoozpan pajzjapa. Jesucristuqui niž ancha zuma kamañchiz cjen Yooz kuzmi nižaza Yooz honora tjeezičha, učhum nii zuma intintajo.

PABLUQUI ANCHA SUFRICHICHA

⁷ Jaknužt zumanaca tsjii ljoc mazquiquiz chjojta cječhaja, jalla nižta irataž Yoozqui liwriiñi puntu wejtquiz cumpjiichičha zoñinacžquiz paljayajo. Jalla nuž Yoozqui wejr apóstol utchičha, niž juc'ant zuma azi tjeezjapa. Liwriiñi aziqiu Yoozquiztankaz tjončha, anaž wejtquiztan tjončha. Zoñikazza wejrqui.

⁸ Wejtta ancha anawalinaca želanami, ultimquiziqui wejrqui atipačha. Wejt kuz turwayskatanami, anaž wejt kuz llajllasa.

⁹ Zoñinacaž wejr chjatkatanami, Yoozqui wejr ana zinalla ecčha. Wejtquiz ancha sufriskatcanami, zoñinacaqui wejr anaž akasačha.

¹⁰⁻¹¹ Jesucristužquin sirwican jakziquinami wejr ojklayučhaja, ancha sufručha, ticzmaya cjenami. Jalla nuž sufrican, Jesucristuž cjen tira žetučha; nižtajapa tii curpuquiz kamučha. Jesucristužquin sirwichiž cjen ancha sufručha. “Waj ticznaa; ticznaa” cjiwčha. Pero tii ticzñi curpchiz žejtcanaqui, Jesucristuž cjen kamučha.

¹² Wejrqui walja sufrisnocal watučha. Wilta wilta ticzmayažtakaztačha, Cristuž puntu paljaycan. Pero weriž paljaytiquiztan ančhucqui Cristuž žeti tanchinčhucčha.

¹³ Yooz takuqui tuž cjičha: “Yoozquin kuzziz cjen, wejrqui chiyučha”. Jalla nižta irata wejrqui Yoozquin kuzzizza, sufrita kamcanami. Jalla nižta kuzziz cjen, chiichiyučha, Cristuž puntu paljaycan.

¹⁴ Nuž paljayučha, tuž zizcu: Yoozqui Jesucristo Jiliri jacatatskatchičha, nižaza Jesucristužtan chica wejrmi ančhucmi jacatatskatta cjequičha. Yooz yujcquin chjichtaž cjequičha. Chjulumu sufrican, nii cjuñznučha.

¹⁵ Tjapa wejtquiz watchinacaqui ančhucaltajapačha. Liwriiñi Yooz taku paljayučha, juc'anti juc'anti zoñinaca Yoozquin kuzziz cjiskatzjapa, nižaza ninaca Yooziž yanapta cjiskatzjapa. Jalla nuž cjen tsjan tsjan zoñinacaqui Yoozquin gracias cjican chiyaquičha, nižaza Yoozqui juc'anti honorchiz cjequičha. Jalla nuž pecučha.

¹⁶ Jalla nižtiquiztan wejrqui anal llajllazučha. Kjažtami wejt curpu sufrichani wejt kuz zapuru tsjan tjupi cjissa; juc'anti Yoozquin kuzziztčha.

¹⁷ Tii wirquiz kamcan sufrisqui tsjii ratužtakazza; nekztan watčha. Pero tii muntuquiz sufrituquiztan učhumqui arajpachquin wiñaya honorchiz cjequičha. Ancha sufrizcu, ancha juc'anti honorchiz cjequičha. Arajpachquin ancha zuma kamaquičha.

¹⁸ Nužupanž cjequičha, tii muntuquiz žejlñi cusasanacžquiz anačha kuz tjaazqui. Antiz arajpach zumanacžquin kuz tjaaz waquizičha. Nekztan arajpachquin ancha honorchiz cjequičha. Cherta cusasanaca wataquičha. Arajpach zumanacazti wiñaya tjuraquičha.

5

PABLUQUI ARAJPACHQUIN OJKZ PECCHA

¹ Jalla tuž zizuča wejrqui. Tii žejtñi curpuqui ticziž cjequiž niiqui, Yoozqui ew curpuž tjaaquiča, Yooz paata curpu. Nekztan arajpachquin wiñaya kamača.

² Tii muntuquiz sufricanaqui anchal pasnuča ayincan. Ew arajpach curpu anchal pecuča, nekz kamzjapa.

³ Wejt kuzqui nii ew curpuchiz ancha pecča, tsjii ew zquti cujtz pecas, jalla nižta. Ana curpuchiz anal cjis pecuča.

⁴ Tii curpuchiz sufrican, aynuča. Tii curpuqui ticznaquiča. Nižaza tii muntuquiz kamtaqui ana wiñayjapača. Jalla nižtiquiztan ew yekja curpuchiz cjis pecuča. Arajpachquin wiñayjapa kamz pecuča.

⁵ Yoozpachača nižtajapa wejr utchiča. Nižaza Yoozza niž Espíritu Santo wejt kuzquiz luzkatchiqui. Jaziqui arajpachquin kamspanča wejrqui.

⁶ Jalla nižtiquiztan wejrqui tjup kuzzizpanča. Tii curpuchiz kamcan, arajpachquin Yooztan chica ima žejlča. Pero arajpach wajtchiz žoñtča wejrqui. Jalla niil zizuča.

⁷ Tii muntuquiz kamcan, ana Yooz chercan kamuča. Pero ana cherta Yoozquin kuzzizpan kamuča ana niž cheranami.

⁸ Jalla nižtiquiztan tjup kuzziz želuča. Tii curpuquiztan ulanžcu, nižaza Yooztan chica arajpachquin kamcan, jalla nii walikaz cjesača.

⁹ Jaziqui žejtcanami, ticz cjenami, Yoozquin kuzziztča wejrqui. Weriz kamtiquiztan wejt Yoozquiz cuntintu cjiskatzpan pecuča.

¹⁰ Tjapa učumnacqui Cristuž yujcquiz prisintistanča, pjalžta cjisjapa. Jaknužt tii muntuquiz kamtčhaja, zuma ana zuma, jalla niit jama pjalžtaž cjequiča. Jalla nuž pjalžtiquiztan zapa maynižquiz arajpach kamaña tjaataž cjequiča.

ZOÑINACŽTAN YOOZTAN WALIKAZ CJESACHA

¹¹ Jalla nižtiquiztan Jesucristo Jiliri ekscan zuma razunžtan ančucaquiz chiyuča, zuma kamanchiz kamiñča, cjican. Toscana anal chiyuča. Wejt kamaña Yooz zizza. Wejr cjiwča, ančucqui zakaz zizza zuma kamañchiz kamiñča, jalla nii.

¹² Jalla nuž chiican, persun honora anal waytiz pecuča. Antiz wejt puntuquiztan ančucaquiz intintiskatz pecuča, wejtquiztan cuntintu cjisjapa. Jalla nekztanaqui ančucqui wejt quintra žoñinacžquiz kjaaznasača, zuma razuna tjaacan, “Pabluqui zuma kamñiča”, cjican. Wejt quintra žoñinacaqui žoñinacžquiztan honorchiz cjis pecča. Ninacžtajapa zuma kuz anaž importayča. Tucquin cjis, jalla niikaz importayča ninacžtaqui.

¹³ Wejrzi zuma kuzziz cjis anchal pecuča. Wejt quintra žoñinacaqui cjiñiča “Lucuratača Pabluqui”. Jalla nuž chiyanami Yooztajapakal kamuča. Yekjap žoñinacžti cjiñiča, “Zuma razunžtan chiiča Pabluqui”. Ančucaltajapa zuma razunžtan chiyuča.

¹⁴ Jesucristuqui ancha okžni kuzziz cjen tjapa žoñinacž laycu ticziča. Žoñinacž cuntiquiztan ticziča. Jalla nužupanča wereraqui. Jalla nuž tjapa kuztan criižcu, wejrqui Jesucristužquin sirwistanča, liwriiñi taku paljaycan.

¹⁵ Jesucristuqui tjapa žoñinacž laycu ticziča, žoñinacž ana persunjapa kamajo, antiz Cristužtajapa kamajo. Jalla nižtiquiztan jakziltat ew kamañchiz kamčhaja, jalla ninacaqui Jesucristužtajapa kamz waquiziča. Jesucristuča ninacž laycu ticziqui, nižaza jacatatchiqui.

¹⁶ Jaziqui Jesucristužtajapa kamcan, zizuča, žoñinacž kuzza chekanaqui, nii. Tuquiqui pinsatuča: Žoñinacž cherchi, pajk puesto ocupchi, wajt honora tanchi, jalla nižtanacača chekanaqui, nuž cjican pinsatuča, Cristuž puntuquiztanami. Ana criichi žoñinacž pinsitakaz pinsatuča. Anziqui ana iya nižta pinsuča.

¹⁷ Jaziqui tuž cjiwča: jakziltat Cristužtan tsjii kuzziz cjissaja, jalla niiqui ew kuzzizza, nižaza ew kamañchizza. Tuquita kamaña liwj ecta, ew kamañchizpan kamča.

¹⁸ Ew kuzmi nižaza ew kamañami Yooziž tjaatapanča. Cristuž cjen Yoozqui učumnaca pertunchičha, nižtan učumnacatan zuma cjisjapa. Nižaza Yoozqui wejr-naca utchiča parti žoñinacžquiz Yooz pertunz puntu paljayajo, Cristuž cjen žoñinacžtan Yooztan zuma cjesača, cjican.

¹⁹ Yooz pertunz puntuqui jalla tužuča. Yoozqui Cristuž cjen tjapa žoñinaca pertu-nasača, nižtan ninacžtan zuma cjisjapa. Žoñinaca pertunžcu, ana ujchiz cjiskatča, ana casticta cjisjapa. Nižaza Yoozqui wejr-nacaquiz cumpjiichiča, Yooz pertunz puntu paljayajo.

²⁰ Jalla nižtiquiztan Cristuž cuntiquiztan ojklayuča niž takunaca paljaycan. Jalla nuž ojklayan Yoozqui weriž cjen ančucaquiz paljayča. Jaziqui Cristužtajapa ančucaquiz chiižinuča, Yoozquin kuz tjaalla, nižtan ančucatan zuma cjisjapa. Jalla nuž chiižinuča.

²¹ Cristuqui ana čjul uj paachiča. Učhum laycu Jesucristuqui Yooz yujcquiz učhum ujnacchiz cjissiča, učhumqui Yooz yujcquiz ana ujchiz nižaza zuma cjisjapa. Jalla nuž cjiskatchičha Yoozqui, niž pinsitacama.

6

¹ Jilanaca, cullaquinaca, wejrqui Yooztan langznuča, žoñinaca Yoozquin kuz tjaajo. Jaziqui ančucaquiz chiižinuča, liwriiñi Yooz takuqui anača inapankaz nonzqui, nii. Anča okzñi kuzziz cjen, Yoozqui ančucaquiz niž liwriiñi taku paljaykatchičha.

² Cjijrta Yooz takuqui tuž cjiča: “Wejrtča okzniñtqui, ančhuc liwriita cjisjapa. Jaziqui tii timpuquiz okzñi kuzziz ančucaž mayizita nonzinča, nižaza tii liwriiz timpuquiz ančucaquiz yanapchinča”. Jaziqui Yoozpanča okzñi kuzzizqui. Anziqui žoñinaca liwriita cjesača.

³ Wejrqui anal jec žoñžquizimi t'ezinz pecučha, ujquiz tjojtjapa. Jaziqui ana jecmi weriž Yooztajapa trabajta iñarasača.

⁴ Yooztajapa trabajcan, jaknuž watanami, zuma Yooz kamañakaz tjeez pecučha. Yoozquin tjurt'iñi kuz tjeez pecučha, čjul sufrisquiztanami, nižaza čjulquiztan t'akjiri žejlžquiztanami, nižaza čjul ch'ama ojklayzquiztanami. Čjulunacaž watanami tjurt'iñi kuz tjeez pecučha.

⁵ Jilanaca, cullaquinaca, tižta sufrisnaca watchinča: wjajttatača, carsilquiz chawc-tatača; žoñinacaqui wejtnaca quintra aptichiča; nižaza muzpa ch'ama langznaca watchinča otčañ tjepi; nižaza ana tjajchi kamchinča, nižaza čhjerž kjara pascan žejlchinča. Jalla nižta sufrisnaca watchinča, tjurt'iñi kuztan.

⁶ Yooztajapa langzcan, zuma Yooz kamaña tjeez pecučha, zuma lijitum Yooz kamañchiz kamcan, nižaza Yooz puntu zuma zizñi nižaza pasinziz kuzziz kamcan, nižaza okzñi kuzziz kamcan, nižaza Espíritu Santuž aztan kamcan, nižaza zuma lijitum mu-naziñi kuzziz kamcan,

⁷ nižaza lijitum Yooz taku paljaycan, nižaza Yooz aztan kamcan. Jalla nižta kamcan zuma Yooz kamaña tjeez pecučha. Nižaza Yooztajapa kamcan, Yooz zuma razunžtan ojklayuča, tsjii zuma armichiztakaz. Yooz zuma razuna chiican, wejrqui žoñinacžquiz Yooz taku catokskatuča, nižaza quintra žoñinacžquiz Yooz zuma razunžtan kjaaznuča.

⁸ Yooztajapa kamcan, awizaqui wejrqui zuma rispittača. Awizaqui ch'aanitazakazza. Awizaqui žoñinacaqui wejt quintra ana waliž parličha. Awizaqui žoñinacaqui wejt puntu zumaž parličha. Wejt puntuquiztan yekjap žoñinacaqui “Niiča tsjii kjutñi irpiñiqui” cjican chiichiča. Jalla nuž cjenami, wejrtča werara chiiñtqui, nižaza irpiñtqui.

⁹ Yekjapanacaqui wejr ana pajz pecča. Jalla nuž cjenami, pajtapanikazza wejrqui. Yekjapanacaqui “Nii Pabluqui ticzla”, cjiñičha. Jalla nuž cjenami tiral žetuča. Wejt Yooz Ēpiž ujžta cjenami, ana contača wejrqui.

¹⁰ Llaquita kuzziz cjenami, Yoozqui wejt kuzquiz cuntintupan cjiskatča. Poriž cjenami, Yooz taku paljaycan walja žoñinacžquiz ricachužtakaz cjiskatchinča. Ana čhjulchiz cjenami, tjapa wejtta žejlča, Yooz maatiž cjen.

¹¹ Corinto wajtchiz jilanaca, cullaquinaca, kjanapacha ančhucaquiz paljayžcuča. Ančhucatan zuma munazuča, tjapa kuztan.

¹² Anača juntuñalla kuz ančhucatan munazuča. Yekjapanacazti anaž tjapa kuztan wejttan munaziz pecčhani.

¹³ Pero ančhuczi tjapa kuztan wejttan zuma munaziñi cjee. Ančhucaquiz chiižinuča, jaknužt tsjii ejp persun ocjalžquiz chiižinčhaja, jalla nižta.

YOOZ ZOÑINACĀHUCCHA ANCHUCQUI

¹⁴ Tsjiilla chiižinuča. Ana criichi žoñžnacžtan anaž ancha pajasa, tii muntuquiz kamcan. Yooz kamañchiz žoñiqui Yooz quintra žoñžtan anapan tsjii kuzziz cjesača. Zuma žoñiqui ana zum žoñžtan anapan zuma pajasasača, tii muntuquiz kamcan.

¹⁵ Jaknužt Cristužtan Satanas diablužtan tsjii kuzzizpan cjesajo? Nižaza jaknužt criichi žoñiqui ana criichi žoñžtan tsjii kuzziz cjesajo? Anapanž tsjii kuzziz cjesača.

¹⁶ Yooz kjuyquiz žoñiž paata yooznacaqui anapanž juntu cjesača. Nižaza učhumqui žejtñi Yooz kjuyčhumča. Yoozpachača tuž cjichiqui: Ninacž kuznacquiz kamača; ninacžtan chica želača. Ninacž Yooz wejr cjeeča, nižaza ninacaqui wejt wajtchiz žoñinacaž cjequiča.

¹⁷ Jalla nižtiquiztan Yooz Jiliriqui tuž zakaz cjiča: Ana criichi žoñinacž kamañquiztan zaraka, nižaza jayta. Ana zum kamañnacchiz anapan kama. Nekztan wejrqui ančhuc zuma risiwača.

¹⁸ Ančhuca ejp cjeeča. Nižaza ančhucqui wejt maatinacaž cjequiča. Jalla nuž cjiča tjapa azziz Yooz Jiliriqui.

7

¹ Munazita jilanaca, cullaquinaca. Yoozqui učhumnacaquiz niž chiiita takunaca tjaachiča. Jalla nižtiquiztan učhumqui tjapaman ana walinacquiztanami nižaza tjapaman ana zum kamañnacquiztanami jaytistanča, zuma kamañchizpan cjisjapa, curpumi kuzmi zuma cjisjapa. Yoozquin ekscan, nižaza rispitan, tjapa ana walinacquiztan jaytistanča, juc'ant juc'ant walja zuma lijituma cjisjapa, Yooz kamañchizpan cjisjapa.

PABLUZ CHIITA TAKU CATOKTA

² Wejttan zuma munaziñi cjee, tjapa kuztan. Ana jakziltiž quintra čhjulumi paachinča. Nižaza ana jakziltižquizimi tsjii kjutñi chjitchinča. Nižaza ana jakziltižquizimi incallchinča, cusasanaca tanzjapa.

³ Jalla nuž čhiican, ančhucaquiz uj tjojtunz ana pecuča. Tjapa kuztan ančhucatan zuma munazuča. Tuqui nuž cjetuča. Anača wejr ančhuca quintraqui. Ticz cjenami, žejtz cjenami tirapan ančhucatan zuma munazuča.

⁴ Wejr cjiwča, ančhucqui tirapan Yoozquin tjurt'iñi kuzziz cjequiča. Ančhucaž cjen ancha cuntintuča. Ančhuca honora waytuča. Ančhuca quintu nonžcu zuma kuztaž wejrqui. Ancha sufrita cjenami anchal chipuča ančhucaž cjen.

⁵ Macedonia yokquin irantižcu, ana jeejžñi atchinča. Tjapa kjutñi walja sufrisnaca želatča. Tjapa kjuttan quintranaca želatča. Wejt kuzqui turwaysnatča, “Criichi žoñinacaqui quejpsnaa”, cjichinča. Llaquita kuzziztača wejrqui.

⁶ Pero Yoozqui llaquita žoñinacžquiz kuzñipanča. Yoozqui wejr kuzziča, Tituž tjontiquiztan.

⁷ Nižaza Titžquiztan ančhuca quintu nonžcu, wejrqui zuma kuztatača. Tituqui ančhucaž cjen llaquita cjissitača. Nekztan ančhucaquiz tjonžcu, nižaza ančhucaž zuma kamta cheržcu, kuztatača. Nižaza Tituqui quint'ichiča, ančhucqui wejr ancha

cherz pecatĉha, niŕaza weriŕ llaquita cjen anĉhucqui llaquitazakaz cjissinĉhucĉha. Nekztan wejtquiz tjurt'iŕinĉinĉhucĉha. Jalla nii nonŕcu juc'anti cuntintu cjissinĉha.

⁸ Weriŕ cijrta cartaquí anĉhuc llaquita cjiskatchiĉha. Jalla nuŕ cjenami, anziqúi ana llactazzinĉha. Pero tuquiquí llactazzinĉha; nii anĉhucaquíz chiŕzinta ana cijrŕ pecatuĉha. Pero anĉhuc tsjii upacamakaz llaquiskatchinĉha.

⁹ Anĉhucqui llaquiskattiquiztan anazuma kamznaca ecchinĉhucĉha. Jalla niŕtiquiztan wejrqui cuntintuĉha. Anĉhucaŕ llactaztiquiztan wejrqui anataĉha cuntintu. Antiz anĉhucaŕ anazuma kamznaca ectiquiztan jalla nekztantaĉha wejrqui cuntintu. Anĉhucaŕ anazuma kamtiquiztan Yoozqui anĉhucaquíz uj cjuñkatchiĉha. Jaziquí weriŕ cjen anĉhucqui ana ina llaquissinĉhucĉha.

¹⁰ Yoozqui ŕoñŕquíz uj cjuñkatĉha kuz campiita cjejajo. Jequít kuz campiiĉhaja, jalla niiquí liwriita cjesaĉha, zuma kamañchiz cjisjapa. Niŕaza liwriita ŕoñinacaquí cuntintuĉha. Ana criichi ŕoñinacaquí ujnaca cjuñŕcan niŕaza llactazcan ana kuz campiyaquíz niiquí chojrú kuzziz cjissa. Ultimu infiernuquin okaquíĉha.

¹¹ Anĉhucŕti uj cjuñŕcu Yoozquin juc'anti kuzziz cjissinĉhucĉha; oralla kuz campiichinĉhucĉha. Niŕaza tjapa kuz tjaachinĉhucĉha ana wali kamznaca azquichjapa. Nii uj paañi ŕoñŕ quintra anĉha ŕawjchinĉhucĉha. Niŕaza nii ujquiztan tsucchinĉhucĉha. Niŕaza wejtĉan anĉha zalz pecchinĉhucĉha. Niŕaza nii uj paañi ŕoñi anĉha casticz pecchinĉhucĉha. Niŕaza ultimu nii uj paañi ŕoñi casticchinĉhucpanĉha. Jalla niŕtiquiztan anĉhucqui kjanapacha tjezinĉhucpanĉha, zuma kuzzizĉhucĉha, ana tira ujchiz.

¹² Nii uj paata puntuquiztan nonŕcu anĉhucaquíz c'aripacha cijrŕŕquichinĉha. Anataĉha nii uj paañi ŕoñŕjapakaz cijrŕŕquichinquí. Niŕaza anataĉha nii quintra uj paaŕzinta ŕoñŕjapakaz cijrŕŕquichinquí. Antiz anĉhucajapakaz cijrŕŕquichinĉha, Yooz yujcquíz anĉhucaquíz tjeezjapa, anĉhucqui wejtĉan munaziñi kuzzizza, jalla nii.

¹³ Ultimquiziquí tjappacha walikaz cjissiĉha. Jalla niŕtiquiztan wejrqui cuntintu cjissinĉha. Anĉhucaŕ wíltá zuma kamtiquiztan Tituquí wíltá llan kuzziz cjissiĉha. Niŕaza Tito cuntintu cjissiŕ cjen, wejr zakaz juc'ant cuntintu cjissinĉha.

¹⁴ Wejrqui Titŕquíz anĉhuca honora waytichinĉha, "Ninacaquí zumaĉha", cjican. Jalla nuŕ cjican ultimquiziquí anĉhucaŕ cjen ana azkatchinĉha. Anĉhucatan ŕejlcan werar razunakaz chiichinĉha. Niŕaza Titŕquíz chiita razuna werara zakazza anĉhuca puntuquiztan.

¹⁵ Tituŕ tjaajintacama zuma kamchinĉhucĉha. Niŕaza Tito zuma risiwchinĉhucĉha, humilde kuztan, niŕaza rispitiñi kuztan. Tjapa niŕta cjuñŕcu Tituquí anĉhucaquin juc'antiŕ munaziĉha.

¹⁶ Anĉhucaŕ cjen wejrqui zakaz anĉha cuntintuĉha. Niŕaza anĉhuca puntuquiztan cjiwĉha, anĉha zuma kamañchiz, jalla nii.

8

OFRENDANACA TJAAZ PUNTU

¹ Jaziquí jilanaca, cullaquinaca anĉhucaquíz tii zizkatŕ pecuĉha, jaknuŕt Macedonia yokquíz ŕejlñi criichinacaquí Yooz zuma kamaña tjeeziĉha, jalla nii.

² Nii criichi ŕoñinacaquí anĉha pruebanaca watchiĉha. Anĉha pori cjissiŕ cjenami ninacaquí anĉha cuntintu ŕelatĉha. Niŕaza ricachuŕtakaz walja ofrendanaca utchiĉha.

³ Ninacŕ ŕelinchizquiztan jama utchiĉha. Wejr cjiwĉha, jilacama utchiĉha ninacŕ persun kuzquiztan.

⁴ Ninacaquí t'akjir criichinacŕquin ofrenda tjaaz anĉha pecchiĉha, jaknuŕt parti criichinacaquí ofrenda tjaatĉhaja, jalla niŕtapacha. Niŕaza wejtquíz anĉha rocchiĉha favora paajo, ninacŕ ofrenda chjichajo, jalla nii rocchiĉha.

⁵ Ninacaqui juc'ant zuma paachiĉha weriž tantiitiquiztanaqui. Tuquiqui Yoozquin tjapa kuz tjaachiĉha. Nekztan Yooz munaŋpi jaru wejtquiz kuz tjaachizakazza.

⁶ Jalla nižtiquiztan wejrqui Tito rocchinĉha, anĉucaquin wilta okajo. Tuquiqui Tituqui ofrenda tjaaz puntu anĉucaquiz chiižinĉha. Jaziqui Tito wilta rocchinĉha, anĉucaquin wilta okajo, anĉuca ofrendanaca cumpliskatzjapa, jaknužt tuqui anĉucqui okzŋi kuzquiztan tjaatĉhaja, jalla nuž.

⁷ Anĉucqui ancha zumaĉha; anĉucĉha Yoozquin kuzzizpan, nižaza Yooz puntu zuma zizŋi, nižaza zuma tjaajnasaĉha, nižaza tjapa kuztan zumanaca paayiŋĉhucĉha, nižaza wejttan zuma munaziŋi kuzzizĉhucĉha. Chjulquizimi anĉucqui ancha zumaĉha. Jalla nižtiquiztan anĉucqui zuma ofrenda tjaaz zakaz waquizicha, anĉuca okzŋi kuzquiztan.

⁸ Anĉucaquiz anal mantuĉha, pero zizkatz pecuĉha, parti žoŋinacaqui tjapa kuztan ofrenda utĉiĉha, jalla nii. Jazic anĉucqui walja ofrendanaca tjaaquiž niiqui, anĉuca okzŋi kuz tjeeznasaĉha.

⁹ Uĉhum Jesucristo Jilirž ancha okzŋi kuz zizza anĉucqui. Jesucristuqui tjappacha nižtacama žejlchiž cjenami, anĉucaž cjen pori cjissiĉha tii muntuquiz kamcan. Jalla nuž pori cjissiĉha anĉuc ricachužtakaz cjiskatzjapa.

¹⁰ Jalla nižtiquiztan tii ofrenda puntuquiztan anĉucaquiz chiižinuĉha. Waj tsjii wataqui anĉucqui t'akjir criichinacžtajapa ofrenda uch pecatĉha, nižaza ofrenda uchi kalltichinĉhucĉha. Jalla nižtiquiztan anziqiu nii ofrenda cumpliskatz waquizicha. Jalla niiqui walipanž cjesaĉha.

¹¹ Tuquiqui anĉucqui tjapa kuztan ofrenda uch pecatĉha. Jalla nuž pectaqui cumpliskatz waquizicha, anĉuca želinchizquiztan jama.

¹² Jakziltat tjapa kuztan ofrenda utĉhaja, želinchizquiztan jama uch waquizicha. Jalla niiqui Yoozquin cuntintu cjiskatasaĉha. Jakziltat ana zinta želinchiz cjeĉhaja, jalla nižquiztan Yoozqui ana ofrenda mayĉha.

¹³ Wejrqui anal pecuĉha, yekja criichinacžquiz yanaptiquiztanaqui anĉucpacha t'akjiri cjisjapa.

¹⁴ Tuž cjiwĉha, anziqiu anĉucqui juc'ant želinchizza. Jalla nižtiquiztan nii t'akjir criichi žoŋinacžquiz yanapasaĉha. Wiruŋaqui ninacaqui anĉucaquiz yanapaĉhani, ninacž juc'ant želinchizquiztan jama. Jalla nižtiquiztan tsjiikaz cjequiĉha.

¹⁵ Cjijrta Yooz taku tuž cjiĉha: “Juc'ant želinchiz žoŋiqui anaž ĉhjetnasaĉha. Nižaza ana želinchiz žoŋiqui ana t'akjiri želasaĉha”.

TITZ PUNTU

¹⁶ Yoozqui Tito anĉucaquiz ancha cjuŋzkatchiĉha, jaknužt wejrqui anĉucaquiz cjuŋzniĉha, jalla nižta. Jalla nižtiquiztan Yoozquin gracias cjican chiyuĉha.

¹⁷ Weriž roctiquiztan Tituqui “iyaw” cjichiĉha. Pero niipacha anĉucaquiz cjuŋziĉha. Jalla nižtiquiztan persun kuzquiztan anĉucaquin tjonžcaquiĉha.

¹⁸ Titžtan juntu yekja jila cuhanžcaĉha. Tjapa iclizziz criichinacaqui nii jilž puntu zizza, zuma livriiŋi taku parliŋi, jalla nii.

¹⁹ Nižaza iclizziz criichinacaqui nii jila utĉiĉha, wejttan chica ojklajajo, nižaza tii ofrenda Jerusalenquin chjitzjapa. Wejrqui tii ofrenda chjitz pecuĉha, Yooz honora waytizjapa, nižaza wejt yanapŋi kuzziz tjeezjapa.

²⁰ Jalla nuž tii ricujta ofrendaqui ancha tažpachaĉha. Jalla nii paaznaca chjichcan wejrnacqui zuma kjana kamz pecuĉha, žoŋinaca wejtnacaquiz ana uj tjojtajajo, “Pabluqui persunjapa ofrendanacquiztan paaz jwessiĉha”, cjican.

²¹ Yooz yujcquizimi žoŋinacž yujcquizimi wejrnacqui zuma lijituma kamz pecuĉha.

²² Titžtan nii yekja jilžtan tsjii jilžtan zakaz cuchanzcača. Tii jilaqui wejrnacqui wawczinča, zuma lijitum kuzziz čhjultakquiztanami, jalla nii. Niiqui ančuca puntuquiztan nonžcu, ančucaquin tjonzquin ancha pecchiča. Ančucaž zuma kamtiquiztan nižta kuzzizza.

²³ Titž puntuquiztan tuž cjiwča. Niiqui wejt cumpañeruča. Nižaza wejttan chica ančucultajapa sirwiča. Nii yekja pucultan jilanacž puntuquiztan tuž cjiwča, ninača iclizquiztan cuchantaqui, nižaza ninacaž cjen Cristuqui ancha honorchizza.

²⁴ Nonžna ančucqui. Tjapa criichinacžquiz ančuca zuma okzñi kuz tjeezna. Jalla nuž tjeeznan criichinacaqui zizaquiča, zuma razunžtan ančucaž kamtiquiztan wejrqui cuntintuča, jalla nii.

9

OFRENDA PUNTU

¹ Tsjižtan zakal chiižinuča Yooz žoñinacžtajapa ofrenda puntuquiztan. Jalla nii puntuquiztan anača ančucaquin tsjii cartami cjižržquichuca.

² Ančucqui tjapa kuztan tjaaz pequiñčucča. Jalla nii zizuča. Nižaza Macedonia yokquin žejlñi criichinacžquiz cuntintu cjiwča, ewitanpacha Acaya yokquin žejlñi criichinacaqui ofrendižtan yanapzjapa listutača, jalla nuž chiyuča. Jalla nuž nonžcu tsjan kuzziz cjišiča ofrenda uchjapa zakaz.

³ Nižaza wejrqui tii čhjepultan jilanaca cuchanzcuča, weriž chiita ančuca puntuquiztan ana toscara cjisjapa, ultimupan ančuca uchta ofrenda tjaczta cjisjapa, jaknužt wejrqui parti criichinacžquiz cjiučaja, jalla nuž.

⁴ Cunamit yekjap Macedonia criichinacaqui wejttan chica tjonačhani. Ninacžquiz ančuca ofrenda uch puntuquiztan kjaž wiltami chiižinčinča. Jalla nižtiquiztan ančuca ofrenda ana listu tjacztažlaj niiqui, wejtnacaltami ančucaltami aziž cjequiča.

⁵ Ana azi cjisjapa, wejrqui tantičinča, tii čhjepultan jilanaca rocž waquiziča wejt tuqui ančucaquin tjonznajo. Ninacaqui tjonžcu ančucaž compromitta ofrenda cumpliskataquiča. Jalla nižtiquiztan ančuca ofrenda listu tjaczta cjequiča ima wejt tjonan. Zuma okzñi kuzziz cjen ofrenda uch waquiziča, ana weriž chiižintiquiztankaz.

⁶ Ančucqui tii cjuñzna. Jequit koloculla zkala čhjacačaja, nižaza koloculla ajznaquiča. Nižaza jequit wacchi čhjacačaja, nižaza wacchi ajznaquiča.

⁷ Zapa mayni persun kuzquiz tantiižcu, ofrenda uchaquiča. Jequit zuma okzñi kuztan ofrenda utčaja, jalla niižtan munaziča Yoozqui. Ana pizc kuztan uchasača, nižaza ana žoñiz chiižintiquiztankaz uchasača.

⁸ Tiizakaz cjuñzna. Yoozqui ančucaquiz wacchi tjapaman wintizunanaca tjaaznasača. Jalla nižtiquiztan ančucqui želinchizkaz cjesača. Nižaza ančucqui želinchizquiztan ofrenda tjaasača, tjapaman zuma obranaca yanapzjapa.

⁹ Tii puntuquiztan cjižta Yooz takuqui tuž cjiča: Zuma žoñiqui okzñi kuztan pori žoñinacžquiz tjaača. Nižaza niiž zuma obranaca watay wata cjuñtaž cjequiča.

¹⁰ Yoozza semilla tjaañiqui čhjaczjapa, nižaza čjjeri tjaañiqui lujljapa. Jalla nižtiquiztan Yoozqui ančucaquiz želinchiz cjiskataquiča, juc'anti. Nekztan ančucqui juc'ant ofrenda tjaasača. Ančucaž zuma tjaatiquiztan zuma obranacchiz cjequiča.

¹¹ Yoozqui ančucaquiz tjapaman zuma cusasanacchiz cjiskataquiča, ančuca okzñi kuztan juc'anti tjaazjapa. Ančucaž uchta ofrenda intirjitiquiztan, nii ofrendižtan yanapta criichinacaqui Yoozquin ancha gracias cjican cjequiča.

¹² Jalla nuž ofrenda tjacan Yooz sirwiča. Nižaza nii Yooz sirwitiquiztan t'akjir criichinacaqui yanapta cjequiča. Nekztan ninacaqui Yoozquin ancha gracias cjican cjequiča.

¹³ Tii ofrendaqui tjeeža, jaknužt ančhucqui Cristuž liwriiñi tawk jaru kamčhaja, jalla nii. Nižaza ančucaž zuma kamtiquiztan Yoozquin ancha honorchiz cjequiča. Ančhucqui okzñi kuztan wali chawc ofrenda tjaaquiča. Ninacžtajapa, nižaza tjapa criichi žoñinacžtajapa ančhucqui zuma okzñi kuzzizčhucča. Jalla nižtiquiztan Yoozqui honorchiz cjequiča.

¹⁴ Yoozqui ančucaquiz ancha zuma okzñi kuzziz cjiskatchiča. Jalla nižtiquiztan nii yanapta žoñinacaqui ančhucaltajapa Yoozquiztan mayižinaquiča. Nižaza ančhucatan juc'anti zuma munazaquiča.

¹⁵ Jilanaca, cullaquinaca. Tiipanž cjuñzna. Yoozqui učumnacaquiz Cristo tjaachiča. Nii Yooziž tjaataqui juc'ant zumača; ana intintazzucača. Yoozquin ancha gracias cjian cjiwča.

10

PABLUQUI CRISTUZ APOSTOLUCHA

¹ Jilanaca, cullaquinaca. Wejr Pabluqui tii cjižrčučha. Jazic nonžna. Cristuqui humilde kuzzizza. Jalla nižta kuzziz cjen wejrqui ančucaquiz chiižinžučha. Yekjap žoñinacaqui tuž cjiča: “Ančhucatan žejlcan, Pabluqui humilde kuzziztača. Pero ančhucatan ana žejlcan, c'aripachača”.

² Ančhucatan wilita žejlcan, ana wilita c'ari cjis pecučha. Yekjapanacaqui wejt-nacaquiz uj tjojtunča. “Žoñž kuzcamakaz kamčha Pabluqui”, jalla nuž cjiñičha. Jalla ninacžtajapa c'ari cjesača. Pero ančhucqui ninacaž irata ana cjee. Ančhucaltajapaqui anal c'ari cjis pecučha. Cristuž apostoltča wejrqui. Pero wejt persun aztan mantiz anal tjeez pecučha.

³ Wejrqui žoñi cjianami ana žoñž kuzcamakaz paa-uča, nižaza ana žoñinacžtan kichas pecučha. Pero tjapa Yooz quintranacžtan quiražtakaz zalznasača.

⁴ Nižaza Yooz quintranacžtan zalžcu, ultim arma anal joojoo-uča. Antiz Yooz aztan anawalinacquiztan atipasača, ninacaž anawal azziz cjenami.

⁵ Yooz quintra razunanacami atipasača. Nižaza čjul mit kuzquiztan pinsita razunanacami atipasača, žoñinaca Yoozquin pajkatzjapa. Tjapa žoñinacaž pinsitanacami Cristuž tjaajintanac jaru cjiskatz pecučha.

⁶ Jalla nižtiquiztan wejrqui listučha tjapa Yooz quintra žoñinaca casticzjapa. Ančhucqui Yooz mantuquizpan cjisna, tjappacha. Weriž tjonztan, jakziltat anaž Yooz mantuquizlaja, jalla niiqui casticta cjequiča. Cristuž apostoltča wejrqui.

⁷ Ančhucqui žoñikaz chekža, kjažta tsijtchižlaja nižaza kjažta chiiñižlaja, jalla nii. Jakziltat mit kuzziz “Wejrqui Cristuž partiquiztča” cječhaja, jalla niiqui cjuñž waquiziča, wejrzakaztča Cristuž partiquiz, jalla nii.

⁸ Wejt apóstol puesto puntuquiztan cunamit juc'anti chiyučhani. Jalla nuž cjenami wejrqui anal azasača. Jesucristo Jiliriqui wejtquiz nii apóstol puesto tjaachiča, ančhucalta zuma kamañchiz cjiskatzjapa. Wejtta nii poder ana žejlča, ančhuc akzjapa.

⁹ Cartanaca cjižrčcu anal ančhuc tsucunz pecučha.

¹⁰ Yekjap quintra žoñinacaqui tuž cjiča: “Pabluž cartanacaqui chawjc jilirž cartanacažtakazza. Pero tekz žejlcan, ana azzizza, nižaza niž razunanaca inakazza”. Nuž cjiñičha yekjapanacaqui.

¹¹ Jalla nižta cjiñi žoñinacaqui zumpacha intintaz waquiziča. Jaknužt wejrqui cartanacquiz cjižrčquitučhaja, jalla niicama paasača ančhucatan žejlcan.

¹² Nii mita kuzziz žoñinacaž irata cjis anal pecučha. Ninacaqui porapat iñarascan ana intintazñi kuz tjeeža. Yooz tawk jarupankaz kamz waquiziča.

¹³ Wejrqui persun puntuquiztan anal juc'ant chiyučha. Yoozpachača wejtquiz tii apóstol langz tjaachiqui. Nii langzquiztan jama chiyučha. Nižaza nii Yooziž tjaata langzquiztan jama ančucaquin tjonzinča, liwriiñi Yooz taku paljayzjapa.

¹⁴ Ančhucaquin ana tjontasaž niiqui, wejrqui Yooziž tjaata langzquiztan jama ana ojktasača. Parti Cristuž liwriiñi taku paljayñi žoñinacžquiztan wejrtča primero ančhucaquin tjonchintqui. Yekja žoñiž Yooz taku langtiquiz ana mitisasača.

¹⁵ Yekja žoñiž Yooztajapa langztiquiztan anapal cjiwča, “Nii langztaqui weriž langztača” cjicanaqui. Wejrqui pecuča, ančhucqui juc'anti Yoozquin kuzziz cjeajo. Jalla nižtiquiztan ančhucaporquiz Yooztajapa juc'anti langz pecuča, Yooz tjaata langzquiztan jama.

¹⁶ Jalla nekztanaqui ančhucaquiztan nawjkchuc yekja wajtchiz žoñinacžquiz zakaz liwriiñi Yooz taku paljayz pecuča. Pero yekja žoñiž Yooztajapa langztiquiz anal mitisis pecuča.

¹⁷ Jakziltat honora waytiz pecčaja, niižlaqui Yooz honora waytiz waquiziča.

¹⁸ Jakziltat persun honora waytican chiiñižlaja, jalla niiž puntuquiztan Yoozqui “ana zumača” cjequiča. Jakziltat “Yooz alaja zumapankazza” cječaja, jalla niiqui Yooziž tjaata honorchiz cjequiča.

11

PABLUZTAN ANAZUM TJAAJINACŽTAN

¹ Wejrqui zumzužtakaz tsjii koluc chiyacha. Nii zumzužtakaz chiita takunaca nonžnalla.

² Yoozqui ančhucajapa tsjii silusiñižtakaz wejtquiz cjiskatča. Weriž Yooz taku paljaytiquiztan ančhucqui Cristužquin kuzziz cjissiča. Cristužtan zalz ora wejrqui ančhuc zuma kamañchiz Cristužquin prisintis pecuča, jaknužt tsjaa zuma tur naaža compromitta tjowžquiz prisintita cječaja, jalla nuž.

³ Wejrqui ančhuca puntuquiztan turwayznuča; cunamit tsjiiqui ančhucaquiz incallskatačani, Cristužquin ana tjapa kuz cjisjapani, nižaza Cristužquiztan zarakchi cjisjapani. Ančhucaž pinsitanacaqui tsjii kjutñiž cjisnačani. Tuquitanpacha nii ana wal zkoraztakaz diabluqui mañužtan Evaquiz incallchiča, cunamit jalla nižta incallta cjisnačani ančhucqui.

⁴ Wejrqui ančhucaquin tjonchinča, werar liwriiñi takumi nižaza Jesusiž puntuquiztanami paljayzjapa, nižaza tjonchinča Espíritu Santuž ančhuca kuzquiz luzskatzjapa. Jaziqi ančhucquiz chiižinuča. Tsjii žoñinacaqui tsjemat liwriiñi taku paljayñiž cjenami, ančhucqui nii incallñi žoñi zuma risiwiñchucquiča. Ninacaž tsjemat tjaa jintanaca catokiñchucquiča. Nižaza tsjii žoñinacaqui tsjemat espiritunaca tjaaz pecasaž niiqui, ančhucqui nižta incallñi žoñi zuma risiwiñchucquiča. Nuž nonžcu, ispantichinča; nižaza llaquita kuzziz cjiskatchinča.

⁵ Yekjapnacaqui ančhucaquiztan nii incallñi žoñinacž puntuquiztan pinsiča, zuma apostolonacača, jalla nii. Ninacaqui anača werar apostolonacaqui; anača wejtquiztan pajk jiliriqi. Jalla nuž cjiwča.

⁶ Wejrqui anal altu tawkžtan paljaycan ančhucatan kamchinča. Jalla nuž cjenami wejrqui Yooz puntu zuma zizuča. Jalla nii zizñi cjican kjanapacha tjezinča weriž tjapa puntunaca paljaytiquiztan. Tantiya ančhucqui.

⁷ Wejrqui humilde kuzziz ančhucatan kamchinča, ančhuc honorchiz cjisjapa. Nižaza ana paaz paca mayžcu, liwriiñi Yooz taku ančhucaquiz paljaychinča. ¿Jalla nuž anawali paachin wejrjo?

⁸ Yekja iclizziz žoñinacaqui wejtquiz paaz tjaachiča. Jalla nii ofrendanaca tanzinča, ančhucaquin Yooz taku paljayñi ojczjapa.

⁹ Ančhucatan kamcan ana želinchiz cjissinča. Pero ančhucaquiztan ana čjulumi maychinča. Macedoniaquiztan tjonchi jilanacaqui wejtquiz onanchiča. Jalla nižtiquiztan anaž čjulumi wejtquiz pjaltatča. Tuquiqui wejrqui ančhucaquiz ana

mayzjapa ancha cwitassinča, ančhucjapa ana ch'ama cjeajajo, nižaza jaztanami mayzquiztan cwitasuča.

¹⁰ Jaknužt Cristuqui werarapan chiiñitažlaja, jalla niž cjen nižta werarapan chiyiñzakaztča wejrqui. Jalla nižtiquiztan legali cjican, wejrqui cjiwča, anaž jec Acay wajtchiz žoñiqui wejt puntuquiztan cjesača, “Pabluqui ana želinchiz cjican, wejtquiztan maychiča”, nuž cjicanaqui. Jalla nuž ančhucaquiztan ana čhjulumi maytiquiztan cuntintutča wejrqui.

¹¹ ¿Kjažtiquiztan nižta chiyu wejrjo? ¿Ančhucatan ana zuma munazojo? Anapanž cjesača. Yooz zizza, wejrqui ančhucatan munazuča, jalla nii.

¹² Wejrqui liwriñi Yooz taku paljajiñča, ana paaz paca mayžcuqui. Nižaza tirapan nužullakaz kamača. Nekztan jakziltat paaz ganzjapa Yooz taku paljayčhaja, jalla niiqui anapanž cjichuca, “Wejrtča Pabluž irata Yooz taku paljajiñtqui”, nuž cjicanaqui.

¹³ Nii paaz tanzjapa paljayñinacaqui falso apostolunacača. Nii žoñi incallñinacaqui Cristuž apostolunacažtakaz ojklajniča.

¹⁴ Jalla nužupan tii muntuquiz wataquiča. Satanás diablupacha tsjii Yooz anjilažtakaz ojklajniča.

¹⁵ Nižazakaz Satanásquiz sirwiñi žoñinacaqui werara Yooz sirwiñinacažtakaz ojklajniča. Jalla nižta puntu nayžcu, ana tsucaquiča. Ninacaž nižta ojklajtiquiztan jama castictaž cjequiča.

PABLUQUI ANCHA SUFRISNACA WATCHICHA

¹⁶ Wiltal cjiwča. Jalla nuž chiyanaqui ančhucqui weriž chiita puntuquiztan anača pinsisqui, “Niiqui zumzu taku čiiča” cjicanaqui. Jalla nuž pinsanami, wejr chiyaj cjila tsjii lucurata žoñižtakaz. Wejrqui tsjii koluculla persun honora waytaj cjila.

¹⁷ Jalla nuž chiican wejrqui lucuratu žoñižtakaz chiyča. Anal chiyča Yooz Jilirž ortin jaru, jalla nuž persuna honora waytican.

¹⁸ Walja žoñinacaqui tii muntuquiz čhjulunacquiztanami persun honora waytiča. Jalla nižtiquiztan wejr zakal persun honora koluculla waytača.

¹⁹ Ančhucqui chiiñchucča, “Ziziñ žoñinactča wejrnacqui”, cjicanaqui. Jalla nuž čiičičž cjenami ančhucqui zumzu žoñinacž takunaca cuntintu nonzniñchucča.

²⁰ Falso žoñinacaqui ninacž mantuquiz ančhuc cjis Katz pecča. Nekztan ančhucqui nii žoñinacžquiz zuma cassa. Nižaza tsjii falso žoñinacaqui ančhuca cusasanacquiztan paca mayča. Nekztan ančhucqui ninacžquiz zuma tjaača. Nižaza tsjii falso žoñinacaqui persunaltajapa zuma cjisjapa ančhuc mantiča. Nekztan ančhucqui nižquiz zuma cassa. Nižaza tsjii falso žoñiqui ančhuc iñarča. Nekztan ančhucqui nižquiz zumakaz awantiča. Nižaza tsjii falso žoñiqui ančhuca yujcquiz tsjajpačhani. Jalla nižakaz ančhucqui zuma awantačhani.

²¹ Wejrqui ančhucatan kamcan ana nižta kamčinča; humilde kuzziz kamčinča. ¿Jalla nižtiquiztan wejrqui azasajo? Anapal azasača. Yekja žoñinacaqui čhjulquiztan persun honora waytačhaja, jalla nii žoñinacžquiztan juc'antitča wejrqui. Jalla nuž čiičanaqui lucuratažtakaz chiyuča.

²² Yekjapanacaqui cjiñiča, “Hebreo sarchiz žoñinactča wejrnacqui”. Werj zakal cjeeča, “Hebreo sarchiz žoñtča wejrqui”. Nižaza ninacaqui cjiñiča, “Yooz illzta Israel wajtchiz žoñinactča wejrnacqui”. Wejr zakal cjeeča, “Yooz illzta Israel wajtchiz žoñtča wejrqui”. Nižaza ninacaqui cjiñiča, “Abrahamž majchmaatquiztan tjoniñča”. Wejrmi zakal cjeeča, “Abrahamž majchmaatquiztan tjoniñča”.

²³ Ninacaqui cjiñiča, “Cristuž sirwiñtča”. Wejrmi zakal cjeeča, “Cristuž juc'ant zuma sirwiñtča”. Jalla nuž čiičanaqui lucuratažtakaz chiyuča. Pero ninacžquiztan juc'anti langzinča Cristužtajapa. Nižaza ninacžquiztan juc'anti wjajttatača. Nižaza ninacžquiztan juc'anti carsilquiz chawctatača. Nižaza tsjii kjaž wilta ticzmaya želaytuča.

²⁴ Pjijska wilta judío žoñinacaqui wejr casticchiča. Jalla nuž casticcan, quinsa tunca llatuncan lazu wjajtta mutchinča.

²⁵ Chjep wilta wejrqui wjajtz paržtan wjajttatača. Tsjii wilta maztan čhajctatača. Chjep wilta warcuquiz okan nii warcu julskatchiča. Warcu julskatzcu tsjii nooj weentižtan majiñtižtan pajk kotaypiz žejlchinča.

²⁶ Tirapan ojkojkchinča, walja anawalinaca watñiž cjenami. Tižta anawalinaca watchinča, anawal pujunaca, anawal tjañinaca, wejt wajtchiz anawal žoñinaca, yekja wajtchiz anawal žoñinaca, chawjc wajtquiz anawal žejlñinaca, ch'ekti yokquin anawal žejlñinaca, anawal pajk kotanaca, nižaza anawal falso jilanaca. Jalla nižta anawalinacami watchinča.

²⁷ Nižaza ancha langzinča, nižaza zuma ch'amanaca watchinča, kjaž wilta ana tjaji atchinča, nižaza kjaž wilta čherž kjarami kjaz kjarami passinča, kjaž wilta ayunassinča. Nižaza kjaž wilta zakinacquiz ch'uncan sufrichinča, zquitž kjara.

²⁸ Tjapa nižtanaca watchiž cjenami, iyakal sufruča. Zapuru tjapa iclizziz žoñinacžtajapakal cjuñznuča, llaquita kuzziz ninaca zuma kamañchiz cjiscama.

²⁹ Jakziltat llajllasñi kuzziz cječhaja, wejrqui nižtan chica zakal llaquisuča. Jakziltat ujquiz tjojtskatñi cječhaja, wejrqui nii tjojtskatñi žoñž quintra žawjznuča.

³⁰ Wejrqui persun honora waytaž niiqui, weriž sufritanacquiztanami nižaza inal-lakaz cjitiquiztanami honoral waytača.

³¹ Anal toscara chiyuča. Jesucristo Jilirž Yooz Ejpqui nii zizza. Yooz Ejpqui wiñaya honorchiz cjila.

³² Damasco wajtquin želan, Aretas cjita chawjc mantiñi jiliriqui ulanz zananacquin guardianaca mantichiča, wejr tanzjapa.

³³ Pero criichi jilanacaqui wejr pajk canastiquiz yaažcu, pirkiž tsewctan kozzuc tsjii kjuya wintanquiztan wejr chjijunchiča. Jalla nižtiquiztan wejrqui ninacžquiztan atipassinča.

12

¹ Persun honora waytican, anača čjulumi wejttaqui cusaqui. Jalla nuž cjenami tiral wejt puntuquiztan chiyuča. Ančhucaquiz tii zakal quint'ača, Yoozqui niž puntuwaca cherkatchiča. Nižaza niž puntuwaca zizkatchiča.

² Wejrqui Jesucristužquin kuz tjaachinča. Niiž wiruñ ažk tunca pusin watanaca wejrqui arajpach Yooz wajtquin chjichtatača tsjii upacama. Curpužtanpacha chjichtatažlaja, už ana curpužtanpacha chjichtatažlaja, jalla nii anal naychinča. Yooz Ejpkaž zizza.

³⁻⁴ Pero wejrqui zizuča, nii zuma wajtquin chjichtatača, jalla nii. Curpužtanami ana curpužtanami, jalla nii anal naychinča. Yoozkaž zizza. Jalla nii zuma wajtquin takunaca nonzinča, jalla nii nonžta takunacaqui anača chiichuca žoñž takunacžtan.

⁵ Jalla nii Yooz puntu nonztiquiztanami chertiquiztanami honora waytasacha. Wejrqui persun sufrisnacquiztan honora zakaz waytasacha. Persunquiztan anal honora waytiz pecuča.

⁶ Wejrqui persun honora waytiz pectasaž niiqui lucuratažtakaz ana chiitasača. Zuma werar razunžtanpan chiyuča. Jalla nuž cjenami, persun honora anal iya waytača. Weriž chiitanacquiztanami paatanacquiztanami jalla nii jarukaz wejrqui rispitta cjesacha.

⁷ Nii Yooz puntu ziztanaca, chertanaca juc'ant zuma cuzača. Jalla nižtiquiztan ana mit kuzziz cjisjapa, Yoozqui wejr laa cjiskatchiča. Wejr tsjii ch'apžtan chjapchižtakaz sufriskatchiča. Yoozqui Satanás diabluzquiz nii laa cjisjapa permitchiča, wejtquiz nižta sufriskatzjapa.

⁸ Wejrqui čjep wilta nii laa puntuquiztan Yooz Jiliržquin mayizichinča, wejt curpu laa žetajo.

⁹ Pero Yooz Ejpzti wejtquiz kjaaziĉha, tuĝ cjican: Wejrqui amtan zuma munazuĉha, jalla niĝtiquiztan amquiz yanapaĉha. Am inallakaz cjicanaqui wejt aztan amquiz zuma atĉi cjiskataĉha, niĝaza ĉjulunacquiztanami amquiz zuma atipĉi cjiskataĉha. Jalla nuĝ cjichiĉha Yoozqui.

Jalla niĝtiquiztan wejrqui sufrisnaca watchiĝ cjenami, niĝaza inallakaz cjenami, cuntintul cjeeĉha. Nekztan Cristuĝ aztan wejt kuzmi curpumi yanaptaĝ cjequiĉha.

¹⁰ Cristuĝtajapa sufricanaqui ĉjulu watanami cuntintul cjeeĉha, inallakaz cjenami, iĉarta cjenami, ana ŝelinchiz cjenami, sufriskatta cjenami, ch'amanaca watchiĝ cjenami, ĉjulunacaĝ watanami cuntintul cjeeĉha. Juc'ant inallakaz cjicanaqui, juc'ant tjupi kuzziztĉha, Cristuĝ aztanaqui.

¹¹ Jalla nuĝ chiican lucurataĝtakaz chiichinĉha. Anĉhucpachaĝ niĝta wejr chikatchiĉha. Anĉhucpacha wejt puntuquiztan zumanaca chiiz waquiziĉha. Yekjap ŝoĉinacaqui chiiĉiĉha, nii Pabluĝquiztan juc'ant zuma apostolonactĉha wejrnacqui, cjican. Jalla niĝta cjiĉinacĝquiztan juc'ant zumtĉha wejrqui, Yooz yujcquiz inakaz cjenami.

¹² Wejrqui anĉhucatan ŝejlcan ultim werar apóstol puestuquiz ojklaychinĉha, zuma pasinsis kuztan. Anĉhucporquiz wacchi milajrunacami, siĉalanacami, ispantichucanacami, jalla niĝtanaca paachinĉha.

¹³ Jaknuĝt parti iclizziz criichinacĝtan kamtuĉhaja, jalla niĝta irata anĉhucatan kamchinĉha. Jalla nuĝ kamcan anĉhucacquiztan ana ĉjulumi maychinĉha, jaknuĝt parti criichinacĝquiztan maytuĉhaja, jalla niĝta. Jalla nii ana ĉjulumi maytiquiztanaqui cunamiĝ anĉhucqui ŝawjĉhani. Jalla nekztanĝ pertunalla.

PABLUQUI CORINTO ZOĉINACĝQUIZ ANCHA CJUĉHA

¹⁴ Anziqui wejrqui tjacznuĉha ĉhjep wiltiquiziqui anĉhucacquin tjonzjapa. Tii wilta zakaz anĉhucacquiztan ana ĉjulumi mayaĉha. Anĉhucac cusasa wejtquiz anaĝ impoertiĉha. Antiz anĉhuc alaja importayuĉha. Ocjalanacaqui anaĝ cusasanaca juntasaĉha, maa ejpĝtaqui. Antiz maa ejpnacaĝ cusasanaca juntasaĉha, persun ocjalanacĝta.

¹⁵ Jalla niĝtiquiztan wejrqui persun gasto gastaĉha anĉhucac kuznaca zuma cjisjapa. Wejrqui anĉhucacquiz yanapasacĉha oĉaĉncama. Wejrqui anĉhucatan juc'ant zuma munaziĉi kuzziztĉha. ĆAnĉhuczti upa wejtтан munaziĉi kuzzizĉhuckaya?

¹⁶ Tsjii ŝoĉinacaqui tuĝ cjiĉiĉha, Pabluqui wejtnacacquiztan ana ĉjulu may cjenami, jalla nuĝ maĉa paacan wejtnacacquiz incallchiĉha. Jalla nuĝ cjiĉiĉha.

¹⁷ Pero wejrqui pewcznuĉha, ĆWejrqui cuchanĝquita jilanacĝquiz anĉhuc incallzkatchinjo? Anapanĉha.

¹⁸ Wejrqui Tito rocchinĉha anĉhucacquiz tjonzcajo. Niiĝtan chica yekja jila cuchanĝquichinĉha. ĆNii Titĝquiz anĉhucqui incallchinĉhucjo? Niiĝtan wejtтан nuĝ pucultan anĉhucatan zumpacha kamchinĉha, zuma kuztanami niĝaza zuma kamcanami.

¹⁹ Anĉhucqui cunamit wejt puntuquiztan pinsiĉhani, Pabluqui persun puntuquiztan tirapankaz tjurt'iĉha, jalla nii. Jalla niĝta pinsitaqui anazumaĉha. Weriz pecta jilanaca, cullaquinaca. Yooz yujcquiz Cristuĝ tjuuquiz chiyuĉha, anĉhucac kuznaca juc'ant zuma cjisjapa.

²⁰ Anĉhucacquin tjonzcu, cunamit wejrqui anĉhucacquiztan tsjii ŝoĉinacĝtan anazuma kamaĉchiz zalaĉhani. Jalla nii jiwjatuĉha. Jalla niĝta zalaĝ niiqui, wejrqui anĉhucacquiz c'aril cjeeĉha. Jalla niĝta c'ari takunacĝtan tjonzjapa anaĝ pecĉha anĉhucqui. Cunamit anĉhucaporquiz ch'aaznaca ŝejlĉhani, niĝaza iĉiziĉinaca ŝejlĉhani, niĝaza ĉjaawjkatĉinaca ŝejlĉhani, niĝaza mitarar kuzziznaca ŝejlĉhani, niĝaza ana zum taku joojooĉinaca ŝejlĉhani, niĝaza ŝoĉiĝ quintru chiichiiĉinaca ŝejlĉhani, niĝaza mit kuzziz ŝoĉinaca ŝejlĉhani, niĝaza kichjasĉi kuzziz ŝoĉinaca ŝejlĉhani. Jalla niĝtanaca ŝejlĉhani. Jalla niĝtiquiztan tii cartal cjiĝrĝcuĉha, anĉhucacĝ ana zuma kamaĉanacquiztan jaytisjapa.

²¹ Cunamit yekjapanacaqui ana zuma kamañchizlani, nižaza adulteriuquiz ojklaychizlani, nižaza ana walinaca paachižlani. Cunamit yekjapanacaqui ančhucaquiztan uj paayinčuczłani, nižaza ančhuca ujquiztan ana pertuna mayizichinčuczłani. Jalla nižtiquiztan ančhucaquin tjontan cunamit wejt Yoozqui ančhucaž anazuma kamchiž cjen wejr azkatačhani. Nižta wataquiž niiqui, llaquita kuzziz cjeeča.

13

ZERZ TAKUNACA

¹ Tiižtan čhjepquiziqui ančhucaquin tjonžcuča. Ima tjoncan tiizakal chiižinuča. Tsjii žoñžquiz uj tjojtnaquiž niiqui, ima casticta cjican, pucultan čhjepultan tisticunacžtan ticlarskataquiča nii uj paañi žoñž puntuquiztan.

² Tuquiqui wejrqui uj paañi žoñnacžquiz chiižinčinča, ujnaca eca, cjican. Nižaza tjapa žoñnacžquizimi nižta chiižinčinča. Jaknužt pizc wiltiquiz tjonžcu ninacžquiz chiižinčinča, jalla nižta tii cartiquiz wilta chiižinžcuča, ančhucatan ana žejlcanami. Wilta tjonžcu, uj paañi žoñinaca panž casticača.

³ Jalla nuž castictiquiztan ančhucqui kjanapacha cheraquiča, Cristužtan wejtan tsjii kuzzizza. Jaziqui Cristuqui wejr chiikatchiča. Cristuqui anača inallakaz ančhucaltajapa. Antiz ančhucaporquiz niž azi tjeeža.

⁴ Ina žoñižtakaz cruzquiz ch'awctatača. Pero Yooz Ejpž aztan jacatatchiča. Cristužtakaz inallakaz wejrqui. Pero nižaza Cristužtan kamcan, wejrqui Yooz aztan tjeeznasača ančhucaltajapa.

⁵ Ančhucqui persunpacha kuz tantiyasa, Cristužquin tira kuz tjurt'iñi, už ana tjurt'iñi, jalla nii. Persunpacha tantiyasa. Jesucristuqui ančhuca kuznacquizza. ¿Jalla nii ana naazjo? ¿Ančhucqui anaj ultim criichinacajo?

⁶ Wejrqui cjiwča, wejrnacqui anača falso criichi žoñi, antiz ultim werar criiñ žoñtča. ¿Nii ana nayjo?

⁷ Wejrqui Yoozquin mayizuča, ančhuc ana ujnaca paajo. Jalla nuž mayizuča, wejt zuma razuna ana tjeezjapa, antiz ančhucqui zuma cjisjapa. Wejrqui ana zuma razunchiztakal cjež niiqui, anaž importiča.

⁸ Wejrqui werar razun quintra anal paasača čhjulumi. Antiz werar razun jarukaz chiyasača.

⁹ Jalla nižtiquiztan wejrqui inallakaz cjicanami cuntintuča, ančhucqui tjup kuzziz cjequiž niiqui. Wejrqui ančhucaltajapa tira Yoozquin mayizuča, ančhuc juc'ant zuma kamañchiz cjisjapa.

¹⁰ Wejrqui ančhucatan ana žejlcan, jalla tuž tii cartal cjižcuča, ančhuc zuma cjisjapa. Wejrqui ančhucaquin tjonča Yooz Jilirž apóstolž aztan. Ančhucaquin tjonča, ana c'aripacha cjisjapa, antiz ančhuc juc'ant zuma kamañchiz cjiskatzjapa.

¹¹ Jilanaca, cullaquinaca, jalla nuž chiižcu tiizakal chiyuča. Ančhucaquiz zumaj cjila. Ančhuca kamañanaca zumpacha azquicha. Zuma kamañchiz panž cjisna. Nižaza ančhucqui porapat kuzzasñiž cjee. Tsjii kuzziz cjee. Porapat zuma munaza. Jalla nuž zuma kaman, Yoozqui ančhucatan cjila. Yoozqui ancha zuma okzñi kuzzizza, nižaza niiča llan kuzziz cjiskatñiqui.

¹² Jilanaca, cullaquinaca, porapat zuma tsaanasaquiča.

¹³ Tekzta tjapa Yoozquin kuzziz jilanacaqui ančhucaquin tsaanžquiča.

¹⁴ Jesucristo Jiliriqui tjapa ančhucaquiz zumanacaj tjaala, nižaza Yooz Ejpqui tjapa ančhucatan zuma munaziñej cjila, nižaza Yooz Espíritu Santuqui tjapa ančhuca kuznacquiz cjila. Jalla nužoj cjila. Amen.

LA CARTA DEL APOSTOL SAN PABLO A LOS GÁLATAS

¹ Wejr Pablutcha, anchucaquin tii cartal cjiřzcuča. Jesucristužtan Yooz Ejpžtan cuchanzquita apóstol žoñtča wejrqui, anača žoñiz cuchanzquititqui. Nižaza anača žoñiz uchtitqui tii apóstol puestuquiz. Antiz Jesucristužtan Yooz Ejpžtan wejr tii apóstol puestuquiz utchiča. Yooz Ejpča Jesucristo ticziquiztan jacatatskatchiqui.

² Wejrqui tjapa wejttañ žejlñi jilanacžtan anchucaquin tsaanžcuča. Ančucqui Galacia provinciquin icliz žoñinacžhucča.

³ Učhum Yooz Ejpžtan Jesucristo Jiliržtan anchucaquiz zumaj yanapla, nižaza anchucaquiz cuntintu kuzziz walikaj kamkatla.

⁴ Tii muntuquiz kamcan, žoñinacaqui ana zuma kamañchiz kamča. Nii ana zuma kamañquiztan liwriizjapa, Jesucristuqui ticziča. Nižaza učhum ujnac laycu ticziča Yooz Ejpž munañpi jaru. Jalla nii Yoozza učhum yanapñiqui.

⁵ Yooz Ejpqui wiñaya honorchiz cjila. Jalla nužoj cjila. Amén.

TSJIKAZ LIWRIIÑI TAKU ZEJLCHA

⁶ Wejrqui anchuca puntu nonžcu ispantichinča. Ančucqui ratulla Yoozquiztan zarakquiča. Jesucristuž anchucaquiz okžñiz cjen, Yoozqui ančuc kjawziča, liwriita cjisjapa. Yoozquiztan zarakcan ančucqui yekja tsjemat liwriiñi taku catokquiča.

⁷ Pero anaž yekja liwriiñi takuqui želasača. Tsjii tsjii žoñinacaqui ančuca kuz turwayskatz pecča. Nižaza Jesucristuž liwriiñi taku tsjematquin querz pecča. Wejrnacqui anchucaquiz werar liwriiñi taku paljaychinča. Jalla niic ančucqui zizza.

⁸ Jalla nižtiquiztan jakziltamiž tsjemat liwriiñi taku anchucaquiz tjaajnasaz niiqui, jalla nii žoñiqui Yooziž castictaj cjila. Wejr mekaj cjila, arajpachquiztan tjonchi anjila mekaj cjila, jakziltami yekja tsjemat liwriiñi taku tjaajnasaz niiqui, castictaj cjila.

⁹ Tuquiqui nižtapan čiichinča. Jaziqui wilita nižtapachal chiyuča: Jakziltamiž yekja tsjemat liwriiñi taku anchucaquiz tjaajnasaz niiqui, jalla niiqui Yooziž castictapaj cjila. Ančucqui werar liwriiñi taku catokchinčhucča. Ana iya žejlča.

¹⁰ Jalla nuž c'aripacha chiican, žchjulut pecoj wejrjo? Anal pecuča "Amča zumamqui" cjiñinacaqui. Nižaza anal pecuča žoñinacž kuz wali cjiskatzjapa. Jalla nižta pecaquiz niiqui, Jesucristuž mantuquiz sirwiñi ana cjichucača.

PABLUZ OJKLAYTA QUINTU

¹¹ Jilanaca, cullaquinaca, anchucaquiz tuž tjaajinz pecuča. Weriz paljayta liwriiñi takuqui anača žoñž kuzquiztan pinsita.

¹² Ana jec žoñžquiztanami nii liwriiñi taku nonzinča, nižaza anaž jec žoñimi wejtquiz nii liwriiñi taku tjaajinchiqui. Jesucristupachača wejtquiz tjaajinchiqui.

¹³ Tuquiqui wejrqui judío žoñinacž kamañ jaru kamiñtača. Jalla nii nonzinčhucča. Tuquiqui Yooz partir žoñinaca tanžcu ninaca walja sufriskatiñtača. Yooz icliz žoñinaca k'ala akz pecaytuča.

¹⁴ Nižaza wejrqui judío cuzturumpinacž puntu juc'anti zizzinča, wejt judío mazi-nacžquiztan juc'anti. Wejrqui wejt tuquita atchi ejpnacž cuzturumpiquiz tjapa kuztan-tača. Nii cuzturumpinacž jaru kamzjapa anča c'unchintača.

¹⁵ Jalla nuž cjenami Yoozqui wejr t'akziča, niž apóstol cjisjapa. Ima weriz maaquiztan nasan, Yoozqui wejr t'akzjapa tantiichiča. Nižaza Yoozqui wejtquiz anča okžñiz cjen, wejr kjawziča, liwriita cjisjapa. Chjulorat wejr kjawz tantiitčhaja, jalla nii ora wejr kjawziča,

¹⁶ niiz zinta Majch pajjapa, nižaza niiz apóstol cjisjapa. Nižaza Yoozqui wejr kjawziča, ana judío wajtchiz žoñinacžquin Jesucristuž puntu paljayni cjisjapa. Jalla nuž Yooztan niiz Majchtan pajžcu, ana jecžtanami kazni ojkchinča.

¹⁷ Nižaza ana Jerusalén watjami ojkchinča, parti apostolanacžtan kaznimi. Ninacaqui wejt tuqui apóstol puestuquin luzzitača. Jalla nuž wejt tuqui luzziž cjenami ana ninacžtan kazni ojkchinča. Antiz Arabia yokquin ojkchinča. Wiruñaqu niwjctan Damasco wajtquin quejpžquichinča.

¹⁸ Nekztanaqui čhjep watquiztan Jerusalén ojkchinča, Pedružtan zalzjapa. Jalla nekztan Pedružtan tsjii tunca pjijskan tjuñi kamchinča.

¹⁹ Jalla nicju kamcan, Jesucristo Jilirž lajk Jacobo cjita apostolžtan zalchinča. Ana jakzilta parti apostolonacžtanami zalchinča.

²⁰ Yooz yujcquiz žejlcan, anal toscara chiyuča. Tii weriž cijirtaqui werarača.

²¹ Jerusalén wajtquiztan zarakžcu, Siria yokaran nižaza Cilicia yokaran ojkchinča.

²² Judea yokquin kamni criichinacžtan ima zalchinča. Nii Cristuž partir žoñinacaqui ima wejr paj-kalča.

²³ Ninacaqui wejt puntuquiztan tii quintukaz zizziča: “Nii wejr nacaž sufriskatta žoñiqui niipachaž Jesucristužquin kuztan criichiqui. Tuquiqui liwriiñi Jesucristuž puntu k'ala tjananz pecniča. Anziqui niiqui liwriiñi Jesucristuž puntu paljayla”. Jalla nuž cjetča wejt puntuquiztanaqui.

²⁴ Nii criichinacaqui Yooztajapa honora waytichiča wejt puntu nonziž cjen.

2

APOSTOLONACAQUI PABLO ZUMA RISIWCHICHA

¹ Nekztan tunca pusin watquiztan wilta Jerusalén watja ojkchinča Bernabežtan. Nižaza Tito chjitchinča.

² Yooz wejtquiz chiitan, Jerusalén watja ojkchinča. Jalla nicju jaknužt yekja wajtchiz žoñinacžquiz liwriiñi Yooz taku paljaytučhaja, jalla nii mazin pecchinča. Primiraqu icliz jilirinacžtan ajcžcu ninacžquiz mazinchinča, nekztan parti criichinacžquiz mazinchinča weriž paljayta liwriiñi Yooz taku, jalla nii. Jalla nuž mazinchinča, weriž Yooztajapa langžta ana ina cjisjapa. Nižaza anz weriž Yooztajapa langztaqui ana ina cjiskatz pecuča. Jalla nižtiquiztan weriž paljaytaqui nii judío criichinacžquiz mazinchinča.

³ Ninacaqui wejr zuma risiwchiča. Nižaza Tituqui wejttan chica želatča. Nii Tituqui griego wajtchiz žoñi cjican, ana janchiquiz chimpuchiztača, judío žoñinacž cuzturumpi jaru. Jalla nuž cjenami judío žoñinacž cuzturumpi ana paakatchiča, nii janchiquiz chimputa cuzturumpi, jalla nii.

⁴ Pero tsjii kjaž žoñinaca želatča, “Wejrnactča criichinacaqui” cjiñi. Jalla ninacaqui anatača lijitum criichinacaqui pero. Criichinacžporquiz chjozaka luzzitača. Jalla nii ana zum žoñinacaqui awayt'i luzzitača, jaknužt wejrnacqui Jesucristužquin kuzziz cjen Moisés liiquiztan liwriita, jalla nii. Ninacakaz Titžquiz judío chimpuchiz cjiskatz pecatča. Nižaza ninacaqui wлтаž wejrnac ninacž lii mantuquiz utz pecatča.

⁵ Anapan ninacž munañpi jaru cjiskatchinča. Wejrnacqui pecaytuča, ančhucqui werar liwriiñi Yooz tawk jaru tirapan kamzjapa, jalla nuž.

⁶ Nekz žejlñi pajta jilirinacaqui ana wejtquiz čhjul ew taku tjaajinchiča. Jiliri cjenami ana jiliri cjenami wejtquiz anal importayuča. Yoozquiz žoñinaca ana illilziča. Yooz yujcquiziqui tjapa criichinacaqui tsjii parijuča.

⁷ Jalla ninacaqui wejtquiz ana čhjul ew taku tjaajinchiča. Antiz ninacaqui wejr pajchiča, Yooziž uchta apóstol, nižaza werar liwriiñi taku paljayni, jalla nii. Wejrqui uchtača yekja wajtchiz žoñinacžquiz liwriiñi Yooz taku paljayajo, jaknužt Yoozqui Pedro utčhaja, judío wajtchiz žoñinacžquiz liwriiñi taku paljayajo, jalla nižtapacha.

⁸ Yoozqui Pedro cuchanchiĉha, judío ŝoñinacĉquiz liwriiñi taku paljayajo. Jalla nii Yoozpacha wejr cuchanchizakazza, yekja wajtchiz ŝoñinacĉquiz paljayajo. Yoozqui jalla nuŝ pucultan cuchanchiĉha niŝtajapa langznajo.

⁹ Jalla niŝtiquiztan Jacobŝtan Pedruŝtan Juanŝtan wejr pajĉiĉha, Yooz amt'ita jaru apóstol puestuquiz uchta, jalla nii. Nii ĉhjepultanaqui pajta chawjc jilirinacataĉha. Jalla nuŝ wejr pajĉcu, ninacaqui wejr zuma risiwĉiĉha. Bernabequi risiwtazakazza. Jalla niŝtiquiztan wejtnacatan ninacŝtan wali cjiyassinĉha. Wejrnacqui tsjii zuma acuerduquiz kazzassinĉha, wejrnaca yekja wajtchiz ŝoñinacĉquin paljayi ojkzjapa, niŝaza ninaca judío ŝoñinacĉquin paljayi ojkzjapa, jalla nuŝ.

¹⁰ Niŝaza ninacaqui wejtnacaquiz roĉt'ichiĉha, pori ŝoñinacĉquin yanapzjapa cjuñznajo. Wejrqui niŝtapacha zakaz anĉha tantiyuĉha.

PEDRUZTAN PABLUZTAN ANTIOQUIA WAJTQUIN

¹¹ Niiŝ wiruñ Pedruqui Antioquía watja ojkĉiĉha. Jalla nicju Pedruŝquiz zumpacha chiiŝinĉha, niiŝ yujcquizpacha. Niiŝ kamtaqui ana zumquintaĉha.

¹² Antioquía wajtquin irantiĉcu, Pedruqui nii wajtchiz ana judío ŝoñinacŝtan lu-
jlĉiĉha. Nekztan tsjii kjaŝ Jacobŝ partir ŝoñinacaqui irantichiĉha. Jalla ninacaqui judío cuzturumpinaca exiñitaĉha. Jalla ninacĉquiz ekscu, Pedruqui nii ana judío ŝoñinacĉquiztan tsjii latu zarakĉiĉha.

¹³ Pedruŝ nuŝ zaraktan, parti judío criichinacaqui niŝtapacha zakaz tsjii latu zarakĉiĉha. Pero ninacaqui kuzquiz zizatĉha, niŝta zarakz ana wali, jalla nii. Bernabemi ninacŝtan chica zarakzkattataĉha.

¹⁴ Jalla nuŝ zarakŝcu ninacaqui werar liwriiñi Yooz tawk jaru ana kamĉiĉha. Jalla ninaca zarakñi cherŝcu wejrqui tjapa ŝoñinacŝ yujcquiz Pedruŝquiz zumpacha chiiŝinĉha, tuŝ cjican: —Amqui judío ŝoñimĉha. Jalla nuŝ cjenami amqui ana judío ŝoñiŝtakaz kamñamĉha. Amqui judío cuzturumpinac jaru ana kamñamĉha. Jalla niŝtiquiztan ĉkjaŝtiquiztan amqui tii ana judío ŝoñinaca judío ŝoñinacaŝtakaz kamkatz pecya? Anapanŝ zuma niiqui.

JESUCRISTUZQUIN KUZIZ CJEN ZOÑINACA LIWRIITACHA

¹⁵ Wejrnacqui judío ŝoñinacĉquiztan tjoniĉha. Yekja wajtchiz ŝoñinacĉquiztanami, Yooz quintrá paañi ŝoñinacĉquiztanami anapan tjoniĉha.

¹⁶ Jalla nuŝ tjonñiŝ cjenami wejrnacqui zizzinĉha, anaŝ jakziltami Moisés lii jaru kamĉiŝ cjen Yooz yujcquiz zuma cjisnasaĉha. Yooz yujcquiz zuma cjisjapa, ŝoñinacaqui Jesucristuŝquin kuziz cjistanĉha. Jalla nuŝ zizzinĉha. Wejrnac zakaz Jesucristuŝquin kuz tjaachinĉha, Yooz yujcquiz zuma cjisjapa. Anaŝ jakziltami Moisés lii jaru kamĉiŝ cjen Yooz yujcquiz zuma cjisnasaĉha. Jalla niŝtiquiztan wejrnac zakaz Moisés lii jaru kamĉiŝ cjen, Yooz yujcquiz anapanŝ zuma cjisnasaĉha.

¹⁷ Yooz yujcquiz zuma cjisjapa wejrnacqui Jesucristuŝquin kuz tjaachinĉha. Jalla nii kuz tjaaz oraqui, wejrnacqui yekja wajtchiz ŝoñinaca irata persun uj pajstantaĉha, “Wejrnacmi zakaz ujchiztĉha”, cjicanaqui. ĉJalla nuŝ wejrnacaŝ persun uj pajĉiŝ cjen, Jesucristuqui wejrnac niŝta ujchiz cjiskatjo? Anapanŝ cjesaĉha.

¹⁸ Yooz yujcquiz zuma cjisjapa, Moisés lii ana walĉha. Jalla nuŝ wejrqui tjaajinĉ-
inĉha. Anziqui wejrqui wлта chiitasaŝ niiqui, “Moisés lii jaru kamĉiŝ cjen Yooz yujcquiz zuma cjisnasaĉha” jalla niŝtiquiztan wejrqui juc'anti ujchizpan cjitasaĉha.

¹⁹ Moisés lii mantuquiz kaman nii liiqui kjanapacha wejtquiz tjeeziĉha, wejrqui ujchizpantĉha, jalla nii. Jalla niŝtiquiztan wejt persun uj pajĉcu, Jesucristuŝquin kuz tjaachinĉha. Jalla niŝtiquiztan Moisés liiquiztan liwriitaĉha wejrqui, Yooztajapa kamzjapa.

²⁰ Jesucristuqui wejt ujnac laycu cruzquiz ch'awĉta ticziĉha. Jalla nuŝ wejt ujnac laycu ticziŝ cjen, wejrqui niŝtan chica ticziŝtakaztĉha. Wejt tuquita ana zuma kamaña

jaytichinča, jalla nižtiquiztan ew kamañchizza wejrqui. Pero anača wejt persun kamañchiz antiz Cristuž kamañchiz kamuča. Jaziqui tii muntuquiz žejtcan ew kamañchiz kamuča. Jesucristo Yooz Majchquin kuz tjaatiquiztan Jesucristuqui wejtquiz okzñiž cjen, wejt ticz cuntiquiztan ticziča.

²¹ Yoozqui žoñinacžquiz okžcu, Jesucristo cuchanžquichiča žoñinaca liwriizjapa. Liwriiñi Yooz taku anal nicz pecuča. Moisés lii jaru kamchiž cjen žoñinacaqui Yooz yujcquiz zuma cjissiž cjitasaž niiqui, Jesucristuqui inapankaz ticztasača. Anapanča nužuqui.

3

LIWRIIZ PUNTU

¹ Galat wajtchiz žoñinaca, ančhucča zumzužtakaz. ¿Jequit ančhuc incallchejo? ¿Jequit werar liwriiñi tawkquiztan ančhuc tsjii kjutñi chjitchejo? Liwriiz puntu paljaycan wejrnacqui Jesucristuž puntuquiztan kjanapacha ančhucaquiz tjaañinčinča, Jesucristuqui žoñinacž ujnacquiztan cruzquiz ch'awcta ticziča, jalla nii.

² Tsjii pewcz pecuča. ¿Moisés lii jaru kamchiž cjen, Espiritu Santo ančhuca kuzquiz luzzikay? Anapanča. Jesucristužquin kuz tjaatiquiztan, nekztan Espiritu Santuqui ančhuca kuzquiz luzziča. Jalla niiqui nužupanča.

³ ¿Kjažtiquiztan anča zumzu ančhucjo? Espiritu Santuž cjen ančhucqui Yooz kamañquiz kami kallantichinčhucča. ¿Persun kuzcama kamcanaqui Yooztajapa tsjan zuma kamasajo? Anapanča.

⁴ ¿Jesucristužquin criižcu ančhucqui inakaz sufrichinčhuc cjes kjažtatajo? Ana inakaz ančhucqui sufrichinčhucžlani.

⁵ Yoozqui ančhuca kuzquiz niž Espiritu Santo luzkatchiča. Nižaza ančhucaž cheran Yoozqui milajrunaca paachiča. ¿Ančhucaž Moisés lii jaru kamtiquiztan jalla nižta milajrunaca Yooz paachejo? Anapanča. Ančhucqui Jesucristuž puntuquiztan nonžcu catokchinčhucča. Jaziqui ančhucaž Jesucristužquin kuz tjaatiquiztan Yoozqui ančhucaž cheran milajru paachiča.

⁶ Abraham zakaz Yoozquin kuz tjaačhaja. Jalla nuž tjaatiquiztan Yooz yujcquiz zuma cjiskattatača.

⁷ Jalla nižtiquiztan jakziltat Jesucristužquin kuz tjaačhaja, jalla niiqui ultim Abrahamž majchmaatiča. Jalla niic werar razunača.

⁸ Yoozqui tuquitanpacha tuž tantiichiča, Jesucristužquin kuz tjaañi žoñinaca Yooz yujcquiz zuma cjiskattaž cjesača, jalla nuž tantiichiča. Jalla nižtiquiztan tuquitanpacha liwriiñi Yooz puntuqui Abrahamžquiz chiitatača, tuž cjican: “Amiž cjen tjapa wajtquiztan žoñinaca zumaž cjiskattaž cjequiča”. Jalla nuž cjiča cijjrta Yooz takuqui.

⁹ Jalla nižtiquiztan jakziltat Jesucristužquin kuz tjaačhaja, jalla niiqui Abrahamžtan zuma cjiskattaž cjesača.

¹⁰ Jakzilta žoñinacat Yooz yujcquiz zuma cjisjapa, Moisés liiquiz kuz tjaačhaja jalla ninacaqui Yooziž castictaž cjequiča. Cjijrta Yooz takuqui tuž cjiča: “Jakziltat tjapa Moisés liiquiz mantitanac jaru ana zumpacha kamčhaja, jalla ninacaqui Yooziž castictaž cjequiča”.

¹¹ Anaž jecmi Moisés lii jaru zumpacha kami atasacha. Jalla nižtiquiztan Moisés liiquiz kuz tjaatiquiztan anaž jecmi Yooz yujcquiziqui zuma cjisnasača. Kjanapachača nii razunaqui. Cjijrta Yooz takuqui tuž cjiča: “Jakziltat Yoozquin kuz tjaatiquiztan Yooz yujcquiz zuma cjisnačhaja, jalla niiqui Yooztan kamaquiča”.

¹² Pero Moisés lii jaru kamcan, Yoozquin kuz tjaažqui ana walča. Moisés lii puntuquiztan Yooz takuqui tuž čiča: “Jakziltat Moisés lii jaru kamčhaja, jalla niiqui nii lii jaru kamtiquiztan Yooztan kamaquiča”.

¹³ Pero anaž jecmi nii lii jaru zumpacha kamasacha. Jalla nižtiquiztan tjapa žoñinacaqui Yooziž castictaž waquiziča. Pero Jesucristuqui učhum liwriičiča, Yooziž ana casticta cjeajo. Jesucristupacha učhum cuntiquiztan casticta cjissiča. Cjijrta Yooz takuqui tuž cjiča: “Jakziltat cruzquiz ticznačhaja, jalla niiqui tjeeža, Yooziž castictaž, jalla nii”.

¹⁴ Jesucristuqui yekja wajtchiz žoñinacž cuntiquiztan zakaz casticta cjissiča, ninaca Abrahamžtan Yooz yujcquiz zuma cjiskatzjapa. Nižaza Jesucristužquin kuz tjaachiž cjen Yoozqui tjapa učhum kuznacquiz niž Espíritu Santo luzkatchiča, niž tuquita chiita takucama.

MOISES LII PUNTU

¹⁵ Jilanaca, cullaquinaca, tsjii puntul chiyača. Tiiž nonžna. Tsjii zuma legali acuerduquiz luzta, nižaza jiliriž sillta, jalla nii documentuqui ana wira campiyasača, nižaza ana nekz yapasača, jiliri sillta jaru.

¹⁶ Anziqui tii puntul chiyača. Yoozqui taku tjaachiča Abrahamžquizimi niž majchquizimi. Yooz takuqui anaž cjiča, “Majchmaatinacžquizimi”, cjicanaqui. Anaž wacchi žoñinacž puntuquiztan chiiča. Antiz tsjii žoñž puntuquiztankaz chiichiča. Jalla nii žoñiča Cristuqui.

¹⁷ Jalla tuž chiyuča: Yoozqui Abrahamžquiz taku tjaachiča. Nekztan pusi patac quinsa tuncan watanacquiztan Yoozqui Moisesquiz niž lii tjaachiča. Jalla nii wiruñ tjaata liiqui nii tuquita Abrahamžquiz tjaata taku anapanž ana walkatasacha.

¹⁸ Moisés lii jaru kamchiž cjen Yooz zumanaca tanžtaž cjitasaž niiqui, jalla nižtiquiztan Yooziž Abrahamžquiz tjaata taku anaž waltasača. Pero panž walča. Yoozqui Abrahamžquiz nužukaz taku tjaachiča, žoñinaca liwriizjapa.

¹⁹ Jalla nižtiquiztan, ¿chjuljapat Moisés lii sirwiya? Jalla tužuča. Moisesquiz nii liiqui tjaatatača, žoñinacž ujnaca tjeezjapa. Nižaza nii liiqui walatča, Jesucristuž tjonzcama. Jesucristuqui Abrahamž majchmaatquiztan tjonniča. Nižaza niž puntuquiztan chiiča nii Yooziž Abrahamžquiz tjaata takuqui. Yoozqui anjilanaca cuchanžquichiča, niž lii Moisesquiz tjaazjapa. Nekztan Moisesqui parti žoñinacžquiz Yooz mantitanaca tjaajinčiča.

²⁰ Moisesqui nii ližtan žoñinacžquiz mantichiča, žoñinaca nii lii cumplajo. Pero Yoozqui niž persun tjaata taku cumplichiča. Yooz alaja cumplichiča.

²¹ Jalla nižtiquiztan, ¿kjaž cjii? ¿Moisés liiqui Yooziž tjaata tawk quintra cjesaya? Anapanž cjesača. Anaž jecmi Moisés lii jaru zumpacha kamasacha, Yooztan wiñaya kamzjapa. Jalla nii lii jaru žoñinaca kamtasaž niiqui, Yooz yujcquiz zuma cjitasača, nii lii jaru kamtiquiztan.

²² Pero cjijrta Yooz takuqui tuž cjiča: “Tjapa žoñinacaqui uj paachiž cjen castictaž cjequiča”. Jalla nuž cjenami, Jesucristužquin kuz tjaañi žoñinacaqui Yooziž tjaata taku tanznasača, ana casticta cjisjapa, Yooztan wiñaya kamzjapa.

²³ Ima Jesucristuž puntuquiztan zizcan učhumqui Moisés lii mantuquiz želatča. Nižaza nuž žejlchinčumtača Jesucristužquin kuz tjaazcama.

²⁴ Jalla nižtiquiztan Moisés lii mantuquiz želatča učhumqui, Jesucristuž tjonzcama. Nekztan Jesucristužquin kuz tjaatiquiztan Yooz yujcquiz zuma cjissinčumča, nižaza ana ujchiz.

²⁵ Anziqui žoñinacaqui Jesucristuž puntuquiztan ziasača. Jalla nižtiquiztan učhumnacqui Moisés lii mantuquiz žejlzqui žeržtača.

²⁶ Jesucristužquin kuz tjaatiquiztan tjapa ančhucqui Yooz partiquiz žejlča, Yooz maatinacčhucča.

²⁷ Jakziltat Jesucristužtan tsjii kuzziz cjiscu bautista cječhaja, jalla niiqui Cristuž partiquiz cjissiča. Nižaza ew kamañchiz cjissa.

²⁸ Cristuž partiquiz žejlcan, anaž t'aka t'aka žejlča. Judío žoñinacami, yekja wajtchiz žoñinacami, žoñž mantuquiz žejlñi žoñinacami, ana žoñž mantuquiz žejlñi žoñinacami, luctakami, maatakami, jalla tjapa žoñinacaqui Jesucristuž partiquiz žejlcan Yooz yujcquiz tsjii parijuča. Nižaza tsjii t'akquizkazza.

²⁹ Nižaza Cristuž partiquiz želaquiž niiqui, ančhucqui Abrahamž ultim ligitum majchmaatinacchucča. Nižaza ančhucqui Abrahamž ligitum majch maatinacažlaj niiqui, ančhucqui Yooziž Abrahamžquiz tjaata taku tsjii irinsažtakaz tanznaquiča, Yooztan wiñaya kamzjapa.

4

UCHUMNACAQUI YOOZ MAATICHUMCHA

¹ Nii irinsa puntu tii zakaz chiiz pecuča. Tsjii irinsa tanzñi ocjalaqui žoñi pajkzcama anaž irinsa tanznasača. Ocjala cjicanaqui nii famillžquiz piyunažtakaz kamča. Pajkžcu, nekztan tjapa nii famillž cusasanaca nižtacama želaquiča.

² Nii ocjalaqui famillž mantuquiz tjiižta žejlča, nižaza niž irinsaqui yekja žoñžquiz cwitižinajo cumpjiitača, irinsa tanz oracama.

³ Jalla nižta iratača učumnacaqui. Tuquiqui učumqui ocjalažtakaz kamcanaqui žoñiž pinsita jarukaz kamatča.

⁴ Yooziž pinsita timpu irantižcu Yoozqui niž Majch cuchanžquichiča. Nekztan tsjaa maataquiztan majttatača, nižaza Moisés lii mantuquiz želatča.

⁵ Jalla nuž Yoozqui niž persun Majch cuchanžquichiča učumnaca Moisés lii mantuquiztan liwriizjapa, nižaza Yooz maati cunta cjisjapa.

⁶ Ančhucaž Yooz maati cjicanaqui Yoozqui niž Majch Espíritu Santo ančhuca kuzquiz cuchanžquichiča. Espíritu Santuqui ančhuca kuzquiz Yooz Ejpžquin cjuñkatča, “Wejt Tata” cjican.

⁷ Jalla nižtiquiztan Yooz cjen ančhucqui Moisés lii mantuquiz anaž iya žejlča. Yooz maati cjican, Yooz tjaata irinsa tanznaquiča.

PABLUQUI CRIICHI ŽOÑINACŽQUIZ ANCHA CJUÑČHA

⁸ Tuqui ančhucqui werar Yooz anaž pajatča. Antiz žoñiž pinsita yooznacž mantuquizkaz želatča. Nii yooznacaqui anaž ultimu Yoozza, žoñiž pinsitiquiztankazza.

⁹ Anziqui ančhucqui werar Yooz pajča. Primiraqui Yoozqui ančhuc maati cunta pajchiča. Jalla nuž Yooz maati cunta cjiscu, ¿kjaž ančhucqui žoñiž pinsita yooznacquin wilta cutasajo? ¿Nii yooznacž mantuquiz wilta cjis pecjo? Nii yooznacaqui ana azzizza; nižaza inakazza.

¹⁰ Ančhucqui tirapan tjuñinacžquizimi jiižnacžquizimi oranacžquizimi watanacžquizimi rispitiñchucča. Jalla nižta rispitzqui anaž waquiziča.

¹¹ Jalla nuž rispitan wejtla ančhucaquiz tjaajinzqui inapankaj cjičhani. Jalla niil jiwjatuča.

¹² Jilanaca, cullaquinaca, ančhucaquiz rocuča, wejržtapachaž cjissaja, Moisés lii mantuquiztan liwriita, jalla nižta. Wejrqui ančhuc yekja wajtchiz žoñižtakaz cjissinča judío cuzturumpinaca ana paažcu. Ančhucqui wejr zuma risiwchinčhucča, ana čjul wejt quintra kjaž cjiscu.

¹³ Ančhucqui zizza, primeraqui wejr laacjichiž cjen ančhucatan kamchinča. Nižaza ančhucatan kamcan, liwriiñi Yooz puntu paljaychinča. Jalla nii zizza ančhucqui.

¹⁴ Jalla nii cona laacjitaqui wejtajapa tsjii pruebatača. Jalla nižta weriž laacjitiquiztan ančhucqui ana wejr iñarchinčhucča, nižaza wejr ana jakjurpayz pecchinčhucča. Antiz wejr ancha zuma risiwchinčhucča, tsjii Yooz cuchanžquita anjilažtakaz. Nižaza Jesucristužtakaz wejr zuma risiwchinčhucča.

15 Weriz ančucatan kamchiž cjen ančucqui zuma cuntintu sint'ichinčuccha. Jaziqui ančucaquiz, ¿kjažt cjisjo? Wejrqui declaručha, ančucatan kamcan, ančucqui attasaž niiqui, persun čhujcquimi lecžcu wejtquiz tjaatasača.

16 Wejrqui ančucaquiz werar razunanaca chiichinča. Jalla nuž chiitiquiztan, ¿ančucqui wejt quintra cjissinčucjo?

17 Nii ana werar razuna chiiñi žoñinacaqui ančuc anchaž importayča. Jalla nuž importaycan ninacaqui ančuc ana zuma cjiskatz pecča. Wejtnacaquiztan t'akskatz pecča, ninacž partiquiz cjisjapa, nižaza ninacž honora waytiskatzjapa.

18 Tsji žoñiqui yekja žoñžquiz tsjan zuma kamañchiz cjiskatz pecasača. Jalla nuž pecanaqui nii žoñžquiz ancha importayasača. Jalla nižta importayzqui ancha zumača. Tjapa žoñinacaqui ančucaquiz nižtaj paala. Anača wejrkaz, ančucatan kamcanaqui, ančuc importayz waquiziča.

19 Zuma jilanaca, cullaquinaca, ančucaltajapa wilta wejt kuzquiz ancha cjuñučha. Nižaza wejrqui ančucaltajapa tiral cjuñučha ančucaž Cristuž kamañchiz zuma kamzcama.

20 Wejrqui ančucatan chical žejlz pecučha. Jalla nuž ančucatan žejltasaž niiqui, juc'ant zuma carinchiz razuna chiižintasača. Ančuca quintu nonžcu wejrqui kuz turwayskatchinča.

ABRAHAMZ MAATIZ PUNTU

21 Ančucqui Moisés lii mantuquiz kamz pecñinaca, ¿nii lii mantuquiz kamzqui ana intintiya?

22 Cjijrta Yooz takuqui tuž cjiča: Abrahamqui pucultan majchnacchizza. Tsjiiqui Abrahamž mantita piyunaž majttača. Tsjiizti Abrahamž zalžta tjunaž majttača.

23 Piyunaž majtta majchqui žoñiž pinsita kuzcama majttatača. Tjunaž majtta majchzti Yooz tjaata tawk jaru majttatača.

24 Nii pucultan maatakquiztan tuž cjiča. Yoozqui pizc wilta taku tjaachiča. Tsjiiqui Sinaí cjita curquiz Yoozqui Moisesquiz mantita lii tjaachiča. Jakziltat nii lii mantuquiz žejlčhaja, jalla niiqui nii lii jaru kamstanča. Tsjaa maatakquiztan nii puntu cjiča. Naa maatakaqui Agar cjititača.

25 Agar cjitiquiztan Sinaí curu cjiča. Sinaí curuqui Arabia yokquin žejlča. Sinaí curquiztan Jerusalén watja cjiča. Jerusalén wajtchiz žoñinacami, nižaza tjapa judío žoñinacami Moisés lii mantuquiz žejlča.

26 Učhumzti anaž Moisés lii mantuquiz žejlča. Yooziž liwriitiquiztan ultim arajpach Jerusalén wajtchiz žoñinacčhumča. Jalla nii Jerusalenqui Yooz watjača.

27 Cjijrta Yooz takuqui tuž cjiča:

“Ana majtñi maataka, cuntintuž cjee. Majtz sufris ana pajžcumi, alto tawkžtan Yooztajapa honora waytila. Ecta maatakaqui juc'ant majchmaatinacchiz cjequiča ana ecta maatakquiztan”.

28 Jilanaca, cullaquinaca, jaziqui učhumqui Yooz tjaata tawk jaru Yooz maatinacčhumča, Isaac cjita žoñižtakaz.

29 Abrahamž pucultan majchnacžquiz tižta watchiča. Nii žoñiž kuzquiztan pinsita majttaqui quintratača nii Yooz Espiritu Santuž cjen majtta majchjapa. Anzimi nižta iratazakazza.

30 Cjijrta Yooz takuqui tuž cjiča: “Naa piyuni majchtanpacha chjatkata. Naa piyunaž majtta majchqui anaž irinsa tanznaquiča. Antiz zalžta tjunaž majtta majch, jalla niikaz irinsa tanznaquiča”.

31 Jilanaca, cullaquinaca, učhumqui anača naa piyunaž majtta maatinacažtakazqui. Antiz zalžta tjunaž majtta maatinacažtakazčhumča. Učhumqui lijitum Yooz maatinacčhumča.

5

LIWRIIZ PUNTU PALJAYTA

¹ Jesucristuqui učhum liwriichiča, Moisés lii mantuquiz ana iya kamzjapa. Jesucristužquiz tjup kuzziz cjee. Anača nii lii mantuquiz iya kamzqui.

² Wejr Pabluqui ančhucaquiz cjiwčha, ančhucqui judío chimpu cuzturumpi jaru paaquič niiqui, jalla nižtiquiztan ančhucaltajapa Cristuqui inakaz cjequiča.

³ Wejrqui tii puntu ticlaručha, jakziltat Yooz yujcquiz ana ujchiz cjisjapa Moisés lii jaru persuna chimpuskatčhaja, jalla niiqui tjapa nii lii mantitanaca cumplistanča.

⁴ Ančhucqui Moisés lii jaru Yooz yujcquiz ana ujchiz cjis pecčhaj niiqui, Cristužquiztan persunpachaž t'aksa. Nižaza liwriiñi Yooz kamañquiztan persunpachaž t'aksa.

⁵ Yooz Espiritu Santuž cjen, nižaza Jesucristužquiz kuz tjaachiž cjen, učhumqui Yooz yujcquiz ana ujchiz nižaza zuma kamañchiz, jalla nii tjapa kuztan tjewža.

⁶ Jesucristuž partiquiz žejlcan žoñinacaqui tsjii parijuča. Judío chimpuchiz cjenami ana judío chimpuchiz cjenami anaž importičha. Antiz Jesucristužquiz kuz tjaaz importičha. Nižaza kuz tjaažcu zuma munaziñi kuzziz cjis importičha.

⁷ Ančhucqui zumaž kamatčha. Jalla nuž zuma kaman, ¿ject ančhuc atajchejo werar tjaajintanaca ana cazjapajo?

⁸ Jalla nii atajñiqui anača Yoozquiztan. Yoozqui ančhuc kjawziča, liwriita cjisjapa.

⁹ Jaknužt tsjii zkoluc liwatura tjapa t'anti maza t'amkatčhaja, jalla nižta irata zkoluc ana zuma tjaajiñinacaqui tjapa ančhuc tsjii kjutñi chjichasača.

¹⁰ Jesucristo Jiliriž cjen wejrqui ančhucaquiztan anal kuz turwayskatučha. Ultimquiziqui jaknužt wejrqui Yoozta kamañ puntu pinsučhaja, jalla nužuzakaz ančhucqui Yoozta kamañ puntu pinsaquiča. Nižaza jakziltat ančhuca kuz turwayskatčhaja, jalla niiqui casticta cjequiča, jakziltapirimi.

¹¹ Jilanaca, cullaquinaca, tuquiqui ima Jesucristužquiz kuz tjaacan, wejrqui tjaajinčinča, judío chimpuchiz ana želaquič niiqui, Yooz yujcquiziqui anapanž zuma želasača. Jalla nuž tira tjaajintasaž niiqui, ¿kjažtiquiztan wejt quintra anča tanjo? Jalla nuž tjaajintasaž niiqui, Jesucristuž ticz puntuquiztan tjaajincanpacha ana wejt quintra tanasača. Pero jalla nižta ana tjaajinčinča.

¹² Ančhuca kuz turwayskatñinacaqui persun janchej pootpootžla.

¹³ Jilanaca, cullaquinaca, Yoozqui ančhuc kjawziča Moisés liiquiztan liwriita cjisjapa. Jalla nuž liwriita cjican, anaž persun kuzcamakaz kamz waquiziča. Antiz zuma munazican porapat yanaparassa.

¹⁴ “Jaknužt persunpachquiz zuma okzaja, jalla nižta irata parti žoñinacžquiz zuma okzpanča”. Jalla nuž kamcan tjapa Moisés liiqui cumplissa.

¹⁵ Pero ančhucqui porapat chjaawjwasaquič niiqui, nižaza porapat ch'aasaquič niiqui, jalla nižtiquiztan tsjiimi tsjiimi aksnaquiča.

ESPIRITU SANTUZ IRPITA KAMZ

¹⁶ Wejrqui cjiwčha, ančhucqui Yooz Espiritu Santuž irpita kama. Nekztan persun ana zum kuzquiz pectanac jaru ana kamaquiča.

¹⁷ Nii ana zum kamañiqui Espiritu Santuž pecta kamañ quintrača. Nižaza Espiritu Santuž pecta kamañiqui nii ana zum kamañ quintrača. Nii pizc kamañiqui anača tsjiikazqui, antiz pisc punta kamañičha, zuma kamaña, ana zuma kamaña, jalla nii. Jalla nižtiquiztan nii ana zuma kamaña pecñi kuzqui ančhuc atajčha zuma kamañ jaru ana kamzjapa.

¹⁸ Pero ančhucqui Espiritu Santuž irpitaž cjequič niiqui, anača lii mantuquiz žejlzqui.

¹⁹ Nii ana zuma kamaña pecñi kuzqui jalla tižta paaz pecča: adulterio paaz, yekja maatakžtan yekja luctakžtan ana wali paaz, azzucanaca paaz,

²⁰ žoňiž paata yooznacžquiz sirwiz, žoňž quintra laykiz paaz, žoňž quintra chuchas, žoňžtan ch'aas, iňiziz, čhjaawjkatas, persun kuzcamapankaz paaz, t'aka t'aka cjiyas, tsjii partiquiztan tsjii partiquiztan quintras,

²¹ zmaz, žoňi konz, licz, ana wira wali pjijsa paaz, jalla nižta ana zumanaca paaz pecħa nii ana zuma kamaňa pecħi kuzqui. Tuquiqui wejrqui ančhucaquiz chiižinčinča, ana nižta paazjapa. Wilta ančhucaquiz chiižinuča, anapan nižtanaca paaz waquiziča. Jalla nižta paaňi žoňinacaqui werar Yooz mantuquiz ana žejlča.

²² Espíritu Santuž kamaň jaru kamcan, jalla tižtanaca paasa: zuma munaziz, cuntintu cjis, llan kuzziz cjis, pazinziz kuzziz cjis, okzňi kuzziz cjis, zumanaca paaz, lijituma kamz,

²³ humilde kuzziz cjis, ana zuma pecħi kuz persun kuzquiz ewjaz. Jalla nii zuma paatanacaqui anapanča lii quintraqui.

²⁴ Nižaza jakziltat Cristuž partiquiz žejlčhaja, jalla ninacaqui nii ana zuma paaz pecħi kuz mantuquiz ana kamz waquiziča. Nii ana zuma pecħi kuzquiztan ticzi žoňižtakazza. Nižaza nii ana zuma pinsitanac jaru ana kamz waquiziča.

²⁵ Učhumqui Espíritu Santuž cjen liwriitazlaja nižaza ew kamaňchizlaja, jalla nižtiquiztan učhumqui Espíritu Santuž cjen nii zuma kamaň jaru pan kama.

²⁶ Jalla nii zuma kamaň jaru kamcan učhumqui ana mitarazi kuzziz cjistanča. Nižaza ana žawjwa zijcanňi kuzziz cjistanča. Nižaza anaž porapat zmazastanqui.

6

PORAPAT YANAPARAS WAQUIZICHA

¹ Jilanaca, cullaquinaca, yekjap ančhucqui Espíritu Santuž kamaňchiz kamiňchucħa. Jaziqui ančhucqui tsjii criichi žoňi uj paaňipacha cheraquiz niiqui, zuma kuztan chiižinaquiča, nii uj paaňi žoňi wilta zuma kamaňchiz cjeyajo. Nižaza ančhucqui persun kuzqui zuma cwitaza, ujquiz ana tjojtsjapa.

² Pruebanacaž watan, ančhucqui porapat kuzzassa. Jalla nuž kamcan ančhucqui Cristuž lii cumpliča, zuma munaziz, jalla nii.

³ Jakziltat persun puntuquiztan mit kuzziz “Wejrqui zumtħa” cjican pinsačhaja, jalla niiqui persunpacha incallča. Anaž zumača niiqui.

⁴ Zapa mayni persun kamtanaca tantiistanča, zuma ana zuma kamta, jalla nii. Jakziltat zuma kamchižlaj niiqui, cuntintuž cjesača, persuna zuma kamtaž cjen. Criichi žoňinacaqui yekja žoňž kamaňa iňaržcu, anaž mitarazi kuzziz cjis waquiziča, “Wejrqui juc'ant zuma kamaňchiztħa” cjican.

⁵ Ultimquiziqui zapa mayni persun kamaňquiztan jama Yooziž tantiitaž cjequiča.

⁶ Yooz puntu tjaajinta žoňiqui persun cusasanacquiztan tjaaz waquiziča Yooz puntu tjaajiňinacžquiz.

⁷ Ančhucqui persun kuzquizpacha anača incallzqui. Yoozquiztan ana atipasača. Jaknužt tsjii žoňi kamčhaja, jalla niit jama pjalžtaž cjequiča.

⁸ Jakziltat persun kuzcamakaz kamčhaja, jalla niiqui niiz ana zuma kamtiquiztan castictaž cjequiča. Nižaza jakziltat Espíritu Santuž kamaň jaru kamčhaja, jalla niiqui Espíritu Santuž cjen Yooztan wiňayaž kamaquiča.

⁹ Učhumqui zumanaca paazjapa tjurt'ila. Ultimquiziqui pactaž cjequiča, ana jay-tasaž niiqui.

¹⁰ Jalla nižtiquiztan čhjulora zumanaca payi atchucaž cjequiz niiqui, učhumqui zumaž paala tjapa žoňinacžquizimi. Criichi mazinacžquizimi juc'ant zuma paala.

ZERZ TAKUNACA

¹¹ Anziqui wejt persun kjaržtan cijržcuča. Tii pajk litranaca chera.

¹² Tsjii žoňinacaqui ančhuc judío chimpuchiz cjiskatz pecħa. Jalla ninacaqui nuž pecħa, parti žoňinacž kuz wali cjiskatzjapa, nižaza parti žoňinacž ninacžjapa ana

quina cjisjapa. Cristuqui cruzquiz ticziča učumnaca liwriizjapa, judíuž irata ana chimpata cjenami.

¹³ Pero nii chimpata žoñinacapacha Moisés lii jaru ana zumpacha kamča. Ninacaqui ančhuc chimpuchiz cjiskatz pecča, ančuca janchiquiz chimpuchiz cjen persun incantiñi kuzziz cjisjapa.

¹⁴ Wejrqui anača čhjulquiztanami incantiñi kuzziztqui. Jesucristo Jiliriž učhum laycu ticziquiztan, jalla nekztankazza wejrqui incantiñi kuzziztqui. Jesucristuž ticziž cjen wejrqui liwriitača. Jalla nižtiquiztan tii muntuquiz žejlñinacaqui anaž wejr anča importayuča. Ninaczquiztan ticzi žoñižtakaztča wejrqui.

¹⁵ Jesucristuž partiquiz žejlcan, judío chimpuchiz cjisqui anaž importiča, nižaza ana chimpuchiz cjismi ana zakaz importiča. Ew kamañchiz cjisqui jalla niikaz importiča.

¹⁶ Jakziltat ew lii kamañ jaru kamčaja, jalla ninacaqui ultim werar Yooz partir žoñinacača. Jalla ninacztan Yooztan zumaj cjila, nižaza Yoozqui ninaczquiz okžla.

¹⁷ Tekztan nawjcchuc tii puntunacquiztan ana jecmi wejtquiz molestila. Jesucristo Jiliržtajapa kamchiž cjen wejt janchiquiz chjojrínaca žejlča. Nii chjojrínaca kjanapac-haž tjeeža, “Wejrtča Jesucristuž partiquiztqui”, jalla nii. Anzcama nii chjojrínacaqui wejt janchiquiz cherčučača.

¹⁸ Jilanaca, cullaquinaca, učhum Jesucristo Jiliriqui ančuca kuznaca walikaj cjiskatla. Jalla nužoj cjila. Amén.

LA CARTA DEL APOSTOL SAN PABLO A LOS EFESIOS

¹ Wejrtêcha Pablutqui, ançhucacuin tii cartal cjiyrzcuêcha. Wejrqui Jesucristuž illzta apostoltêcha Yooz munañpi jaru. Ançhucqui Yooz partir žoñinacçhucêcha, Efeso wajtquiz kamñinaca. Nižaza ançhucqui Jesucristužquin kuz tjaachi žoñinacçhucêcha.

² Uçhum Yooz Ejpmi, uçhum Jesucristo Jilirimi ançhucacquiz zumaj yanapla, nižaza ançhucacquiz cuntintu kuzziz walikaj kamkatla.

YOOZ EJPQUI UCHUMNACALTAJAPA ZUMA PINSICHA

³ Uçhum Jesucristo Jilirž Yooz Ejpžtajapa honoral waytuêcha wejrqui. Uçhum Yooz Ejpqui uçhumnacaquiz ancha zuma favoranaca paachiêcha, Jesucristuž partiquiz cjiskatchiž cjen. Uçhumqui arajpach Yooz wajtchiz žoñinacçhumêcha. Jalla nižtiquiztan tјapaman favoranaca uçhumnacaquiz paachiêcha Yooz Ejpqui.

⁴ Tuquitanpacha ima tii muntu kalltican Yooz Ejpqui Jesucristuž cjen uçhumnac illziêcha, nižtajapa t'acžta cjisjapa, nižaza niž yujcquiz ana ujchiz nižaza zuma cjisjapa.

⁵ Yoozqui niž okzñi kuzziz cjen, tuquitanpacha tantiichiêcha, uçhumnaca niž partiquiz cjisjapa, niž maatinacjapa. Jesucristuž cjen uçhumqui Yooz maatinacçhumêcha.

⁶ Nižaza Yooz Ejpqui niž ancha okzñi kuz tjeeziêcha, niž persun honora waytita cjisjapa. Niž k'ayi Majchiž cjen uçhumnacaquiz nužukaz walja okziêcha Yooz Ejpqui.

⁷ Jesucristuž ticziž cjen, Yoozqui uçhum liwriichiêcha. Jalla nuž liwriižcu uçhum ujnaca pertunchiêcha, niž zuma okzñi kuzquiztan.

⁸ Yoozqui uçhumnacaltajapa niž okzñi kuz walja tjeeziêcha, zuma favoranaca paacan. Jalla nuž zuma favoranaca paacan, Yoozqui uçhumnacaquiz tјapa niž puntunaca intintazñi cjiskatchiêcha.

⁹ Nižaza Yoozqui niž tuquita chjojta pinsitanaca uçhumnacaquiz zizkatchiêcha. Niž kuzcama pinsita jaru, jalla nuž uçhumnacaquiz zizkatchiêcha.

¹⁰ Yoozqui niž pinsita tjuñquiz niž persuna pinsitaqui cumpliskataquiêcha. Jalla niž pinsita jaru Yoozqui tјapa arajpachquin žejlñinacami, nižaza tјapa tii yokquiz žejlñinacami tјappachaž juntјapaquiêcha, Cristuž mantuquiz cjisjapa.

¹¹ Jesucristužquin kuzziz cjen wejrnac judío žoñinacaqui t'acžtaêcha. Yoozqui persun kuzcama pinsita jaru nuž wejrnac t'acziêcha. Yoozqui tјapa niž pinsitacama cumpliskatêcha.

¹² Wejrnacqui ançhucž tuqui Jesucristo tjewziêcha. Wejrnacqui t'acžta cjissinêcha, zuma kamzјapa. Nekztan wejrnacaž zuma kamtiquiztan Yooztajapa juc'anti honora waytitaž cjequiêcha.

¹³ Nižaza ançhucqui werar Yooz taku nonžcu Jesucristužquin kuz tjaach-inçhuczakazza. Jalla nižtiquiztan liwriita cjissinçhuczakazza. Nekztan Cristuž partiquiz želan, Yoozqui niž Espiritu Santo ançhuca kuznacquiz luzkatchiêcha. Tuquitanpacha Yoozqui niž Espiritu Santo cuchanžquizјapa taku tjaachiêcha. Nižaza Espiritu Santuqui ançhuca kuzquiz žejltiquiztan, ançhuca kuzquiz Yooziž chimputapanêcha. Nii kjanapacha tjeeža, ançhucqui Yooz partir žoñinacçhucêcha, jalla nii.

¹⁴ Espiritu Santo uçhumnaca kuzquiz cjen, uçhumqui zizza, ultimpacha arajpach Yooz irinsa tanznaquiêcha. Chjulorat tјapa Yooz partir žoñinaca liwriita cjeçhaja, jalla nii ora nii irinsa tanznaquiêcha. Tјapa nižta zumanaca uçhumnacaltajapa pinsichiêcha Yoozqui, nižtajapa juc'ant honora waytita cjisjapa.

PABLUZ MAYIZITA

¹⁵ Jilanaca, cullaquinaca, ančuqui Jesucristo Jiliržquin kuzzizpanča, nižaza parti criichi žoñinacžtan zuma munaziñi kuzzizpanča. Jalla nižta zizcu,

¹⁶ wejrqui ančucaž cjen tirapan Yoozquin sparaquiz cjiwča. Nižaza Yoozquin mayizican ančhucaltajapa mayizuča, ančhuc Yooz puntu zuma zizñi cjisjapa.

¹⁷ Učhum Jesucristo Jilirž Yooz Ejpžquinpan mayizuča. Yooz Ejpqui juc'ant chekan honorchizza. Ančhucaltajapa mayizuča, Yooz ančucaquiz tsjii zizñi kuzziz cjiskatajo, nižaza mayizuča Yooziž tjeežtanaca intintazñi kuzziz cjiskatajo. Jalla nižta kuzziz kamaquiz niiqui, juc'anti Yooz puntunaca zizñi cjequiča.

¹⁸ Nižaza juc'anti Yooz puntunaca intintazñi kuzziz cjequiča. Zuma intintazñi cjequiz niiqui, arajpachquin kamz puntu juc'anti zizaquiča. Yoozqui učumnaca kjawziča, arajpachquin kamzjapa. Jalla nicju kamzjapa učumqui tjewža. Arajpachquin Yooztan kamzqui juc'ant ancha zuma wali irinsažtakazza. Jalla nii irinsa Yoozqui tjapa niž partir žoñinacžquiz tjaaquiča.

¹⁹ Nižaza wejrqui mayizuča, ančhucqui Yooz aziž puntuquiztan juc'anti intintazjapa. Učhum Yoozqui juc'ant walja azzizza, čhjultakquiztanami. Niiž aztan Yoozqui učum kuznaca campiiskatchiča, ew kamañquiz kamzjapa. Yoozqui niž jacatatskatñi aztan učum kuznaca campiichiča.

²⁰ Yooz Ejpqui niž walja azi tjeeziča, Jesucristo ticziquiztan jacatatskatcan. Nižaza niž aztan tjeeziča arajpachquin niž žew latuquiz Jesucristo tjulžcan, nižtan chica mantizjapa.

²¹ Yoozqui tjappacha Cristuž mantuquiz utchiča, tjapa jilirinacami, tjapa mantiñinacami, tjapa mantiñi poderchiznacami, tjappacha Cristuž mantuquizcama uchtača. Tii timpuquiz žejlñinacami, nižaza jazta timpuquiz tjonñi mantiñinacami tjappacha Cristuž mantuquiz uchtača.

²² Yoozqui mantichiča tjappacha Cristuž mantuquiz cjisjapa. Nižaza Yooziž mantiquiztan nii tjapa mantiñi Cristuqui niž icliz žoñinacžtajapača.

²³ Cristuž partir žoñinacaqui nižtan tsjii kuzziz žejlča, nižaza tsjii curpuchiztakazza. Tjapa Cristuž partir žoñinacaqui Cristuž kamañchizpankazza. Nižaza Cristuž cjen tjapa čhjultakimi tii muntuquiz žejlča.

2

YOOZ OKZŃI KUZIZ CJEN ŽOŃINACAQUI LIWRIITACHA

¹ Jaziqui Yoozqui ančucaquiz ew kamañchiz cjiskatchiča. Tuquiqui ančhucqui Yooz yujcquiziqui ticzi žoñinacažtakaz želatča ujnaca paachiž cjen, nižaza ana walinaca paachiž cjen.

² Jalla nuž ana wali ujnaca paacan, ančhucqui kamatča ujchiz žoñinacž kamañ jaru. Nižaza ana wali paacan, zajranacž jilirž kuzcamakaz kamatča. Jakziltat ana Yooz kuzcama kamčhaja, jalla niiqui zajranacž jilirž kuzcamapankaz kamča. Nii ana wali zajra jiliriqui žoñinacžquiz ana wal kamañchiz cjiskatča.

³ Tuquiqui učumqui ana wal kamañchiz zakaz kamatča, Yooz kuzcama ana kamcan. Učumqui persun kuzcamakaz kamatča. Nižaza učum ana wali pecñi kuz jaru kamatča. Nižaza učum ana wali pinsitanacž jaru kamatča. Jalla nižtiquiztan učumqui Yooz casticta cjichucapantača, jaknužt Yoozqui parti ujchiz žoñinaca casticačhaja, jalla nižta.

⁴ Jalla nižta ana wali kamanami, Yoozti zuma okzñi kuztan učumnacaquiz okziča. Nižaza učumnacatan munaziča.

⁵ Nuž zuma okzñi munaziñi kuzziz cjen, Yoozqui učumnacaquiz Cristužtan zuma kamañchiz cjiskatchiča. Yooz okztiquiztankaz ančhucqui liwriitača. Tuquiqui uj paachiž cjen, učumqui Yooz yujcquiziqui ticzi žoñinacažtakaztača.

⁶ Jaknužt Jesucristuqui ticžcu Yooz aztan sepulturquiztan ulantčhaja, jalla nižta irata učumqui Yooz aztan ana wal kamañanacquiztan ulanchinčhumčha. Nekztan Cristužtan tsjii kuzziz cjen Yoozqui učumnacaquiz Cristužtan chica honorchiz cjiskatchičha.

⁷ Jalla nuž Yoozqui cjiskatchičha, wiñayjapa niž ancha zuma okzñi kuz tjeezjapa. Jesucristuž cjen Yoozqui učumnacaquiz zuma kuztan munazicha.

⁸ Yooz okzñi kuzziz cjen, nižaza ančhucaž Jesucristužquin kuz tjaachiž cjen, ančhucqui liwriitačha. Jalla nii liwriitaqui anačha ančhucaž cjenaui. Antiz Yooz cjenpankazza nii liwriitaqui. Jalla ničha ančhucaquiz liwriiz tjaachiqui.

⁹ Ančhucaž paata obranacquiztan nii liwriizqui anaž tjončha. Jalla nižtiquiztan anaž jecmi mit kuzziz cjesačha.

¹⁰ Učumqui Yooz obranacčhumčha. Jesucristužquin kuz tjaachiž cjen Yoozqui učum liwriičičha, zuma kamañchiz cjisjapa. Yoozqui jalla nižta zuma kamañanaca učumnacaltajapa tantiižinčičha, ima nižquiz criñiž cjen. Jalla nii kamañanaca tantiižinčičha, učum zuma obranaca paazjapa.

TUQUI ANCHUCQUI ANATACHA YOOZ ZOÑINACA

¹¹ Ančhucqui jalla tuž cjuñzna. Ančhuqui anačha judío zoñinaca. Chimputa judío zoñinacaqui ančhuca puntuquiztanž cjičha, “Ninacaqui janchiquiz ana chimputačha. Jalla nižtiquiztan anaž Yooz partir zoñinaca cjesačha”. Jalla nuž cjiñičha. Nii judionacačha curpuquiz chimputaqui, “Yooz illzta zoñi” cjican tjeezjapa. Zoñiž chimputačha nii judío zoñinacaqui.

¹² Nižaza cjuñzna. Tuquiqui ančhucqui ana Cristo pajiñchuctačha. Nižaza Israel wajtchiz zoñinacžquiztan yekčhuctačha. Nižaza ančhucqui Yooziž tjaata takunaca anaž pajatčha. Ujnacquiztan liwriita cjisjapa ana tjewzñi atatčha. Tii muntuquiz kamcan ančhucqui anapan werar Yooz pajatčha.

¹³ Pero anziqiu Jesucristužquin kuzziz cjen ančhucqui Yoozquin macjatchinčhucčha. Tuquiqui ančhucqui Yoozquiztan ažkquin želatčha. Cristuž ticziž cjen, ančhucqui Yoozquin macjatskattačha.

¹⁴ Cristuž cjen učumnacatan Yooztan pajaskatchičha. Nekztan zumanskatchičha. Nižaza učumnacatan parti criichi zoñinacžtan zumanskatchizakazza. Cristuqui judío zoñinacami ana judío zoñinacami tsjii partiquizkaz tjappacha cjiskatchičha, nižquin criichiž cjen. Tuquiqui judío zoñinacaqui yekja wajtchiz zoñinacžtan quintrapanikaztačha. Nižaza yekja t'akapanž nayatčha. Pero anziqiu Yooz partiquiz cjican criichi zoñinacaqui tsjiikazza.

¹⁵ Cristuqui curpuchiz cjican Yooziž mantita lii liwj cumpližcu ticzičha. Jaziqui Cristuž ticziž cjen Yoozqui nii tuqui timpuquiztan kamchi lii tuct'ayskatchičha, tjapa niž mantitanacžtanpacha. Jalla nekztan Yoozqui judío criichi zoñinacami ana judío criichi zoñinacami tjappacha tsjii ew partiquiz cjiskatchičha. Nii ew partiquiz žejlcan, judío zoñinacžtan yekja wajtchiz zoñinacžtan ana iya quintrasñi cjesačha.

¹⁶ Nižaza cruzquiz ch'awcta ticziž cjen, Jesucristuqui judío zoñinacžtanami yekja wajtchiz zoñinacžtanami pertunaskatchičha. Jaziqui Jesucristuž cjenkazza nii pucultan quintrasñi zoñinacžtan Yooztan zuma cjiskatchiqui. Nižaza nii pucultan quintrasñi zoñinacaqui tsjii partiquizkaz kamasachha, zuma munazican.

¹⁷ Nižaza Jesucristuž tjonchiž cjen, Yoozquiztan ažkquin žejlñinacžquizimi žcati žejlñinacžquizimi zuma quintunaca paljaytačha. Ninacaqui nii paljayta tjapa kuztan catokaquiž niiqui, jalla nekztan Yooziž pertunta cjesačha. Nižaza ninacžtan Yooztan zumanznaquičha.

¹⁸ Jesucristuž cjen nižaza Yooz Espíritu Santuž cjen judío zoñinacami ana judío zoñinacami, tjapa zoñinacaqui Yooz Ejpžquin macjatz atčha.

¹⁹ Jalla nižtiquiztan ančhucqui anača iya yekja zoñinacchucqui, anača iya Yoozquiztan yekja t'akchucqui. Antiz Yooz partiquiz kamñi mazinacchuccha parti criichi zoñinacžtan, nižaza ančhucqui Yooz famillquizchuccha.

²⁰ Učhumqui tsjii pajk kjuyažtakazza Yooztajapaqui. Nii kjuy simintuqui apostolonacača, nižaza Yooztajapa chiiñi profetanacača. Nižaza Jesucristupacača juc'ant chekan maz cuntaqui nii kjuyquiziqui.

²¹ Jesucristuž cjen tjapa criichi zoñinacaqui arubinacažtakazza nii kjuya pirkitauqui. Tjapaman criichi zoñinacaž cjenami tsjii Yooztajapa kjuyakaz kjuytača. Jesucristuž yanaptaž cjen nii kjuychiz zoñinacaqui tsjan tsjan zuma cjissa, Yooztajapa kamcan.

²² Ančhuc zakaz nii kjuy pirkitau arubinacažtakazza parti criichi zoñinacžtan. Jalla nuž učhum Yooz kjuyquiz cjissiz cjen, Yoozqui učhum kuzquiz žejlča niž Espiritu Santužtan.

3

PABLUQUI YOOZ TAKU PALJAYÑI ZOÑIČHA

¹ Jalla nižtiquiztan wejr Pabluqui ančhucaltajapa mayizuča. Wejrqui Jesucristo sirwiñiz cjen tii carsilquiz želuča. Nižaza ančhuc yekja wajtchiz zoñinacžquiz liwriiñi taku paljaytiquiztan zakaz carsilquiz želuča wejrqui.

² Ančhucqui wejt puntuquiztan zizzinčhucžlani. Yoozqui tii apóstol puestuquiz wejr utchiča, ančhucquiz Yooz puntu paljayzjapa, jaknužt Yoozqui okžni kuzziz ančhuc liwriiz pecchaja, jalla nii paljayzjapa.

³ Nižaza ančhucqui zizzinčhucžlani Yoozqui niž tuquita pinsita takunaca wejtquiz zizkatchiča, jalla nii. Tuquita anapan ziztatača nii takunacaqui. Nii wejtquiz zizkatta takunaca tuqui ančhucquin tsjii koluculla cjiirchinča.

⁴ Nižaza tii carta liiču, ančhucqui tantiyasača, wejrtča Cristuž puntuquiztan zuma intintaziñtqui, jalla nii.

⁵ Tuqui timpuqui Yoozqui anaž jeczquizimi Cristuž puntuquiztan zuma zizkatchiča. Jazikaz Yoozqui Cristuž puntu zuma zizkatchiča, niž illzta apostolonacžquizimi, nižaza nižtajapa chiiñi profetanacžquizimi. Niiž Espiritu Santuž cjen nuž zizkatchiča.

⁶ Nii tuquita chjojta puntuqui jalla tiča: Cristuž puntu liwriiñi taku catokchiž cjen, čjuluž cherchi zoñimi Yooziž liwriitaž cjesača. Tsjii irinsažtakaz nii liwriiz tanznasača. Ana judío zoñinacami Cristuž partiquiz zakaz cjisnasača. Nižaza Cristuž partiquiz žejlcanpacha Yooz tjaata taku tanznasača, liwriita cjisjapa.

⁷ Wejrqui nii liwriiñi taku paljayzjapa apóstol puestuquiz uchtača. Jalla nii puestuquiz cjis anal waquizuča. Yoozqui wejr okžcu nužkaz nii puestuquiz wejr utchiča, niž kuzcama. Yooz poderchiz apóstol kamañ jaru kamuča.

⁸ Wejrqui tjapa Yooz partir zoñinacžquiztan upa honorchiz cjis waquizuča. Jalla nuž cjenami Yoozqui wejtquiz apóstol puestu tjaachiča, ana judío zoñinacžquiz Cristuž puntuquiztan anča zumanaca paljayzjapa. Cristuž puntuqui anča zumača. Tjapa nii puntuquiztan ana intintazzucača.

⁹ Yoozza tjappacha paachiui. Jalla nii Yoozqui wejtquiz niž tuquita chjojta pinsita cumpjiichiča, tjapa zoñinacžquiz kjanzt'izjapa.

¹⁰ Jalla nuž watchiča, tjapa poderchiz spiritunacami tjapa mantiñi spiritunacami zizkatzjapa, jaknužt Yoozqui anča zizni zizni pinsichižlaja, nii. Tuquiqui nii arajpachquin žejlñi spiritunacaqui ana zuma zizziča nii Yooziž pinsita puntuqui. Anziqui criichi zoñinacaž cjen, nii spiritunacaqui Yooz tuquita pinsitaqui zizziča.

¹¹ Tuquitanpacha Yoozqui nuž zizkatz pecchiča. Jaziqui učhum Jesucristo Jiliriž cjen Yoozqui niž pinsitaqui zizkatchiča.

¹² Nižaza Jesucristuž cjen učhumqui Yoozquin macjati atasacha, ana ekscan. Jesucristužquin kuz tjaachiž cjen, učhumqui tjup kuztan Yoozquin macjati atasacha.

¹³ Jalla nižtiqiztan ančucaquin tuž chiižinžcuča, weriž ančucaltajapa sufrichiž cjen, ana upa kuzziz cjee. Jalla nuž ančucaltajapa sufran, ančucqui juc'ant honorchiz cjequiča.

CRISTUQUI ANCHA ZUMA MUNAZIŇI KUZZIZ

¹⁴ Nii Yooziž ancha zuma pinsitaqui cjuñzcu, wejrqui učum Jesucristo Jilirž Yooz Ejpžqiztan mayižinuča. Quillžcu, Yoozqiztan mayižinuča.

¹⁵ Yooz Ejpžqiztan tjapa Yooz partiquiz žejlŇi familianacaqui tjuuchizza, arajpachquinami yokquizimi.

¹⁶ Yooz Ejpžqiztan mayižinuča, ančuca kuznaca tjupi tjurt'ichi cjisjapa. Yoozqui niž Espiritu Santuž aztanž cjen, ančuca kuznaca tjupi tjurt'ichi cjiskatasacha. Yoozqui niž juc'ant zuma kuzqiztan ančuca kuznaca tjurt'ichi cjiskatasacha.

¹⁷ Nižaza ančucaltajapa mayižinuča, Jesucristužquiz juc'ant kuzziz cjeajajo. Jalla nuž juc'ant kuzziz cjen, Jesucristuqui ančuca kuznacquiz juc'anti irpaquiča. Jesucristuž irpita cjen, ančucqui zuma munaziŇi kuzzizpanž kamaquiča, tsjii zuma pookŇi zkalažtakaz.

¹⁸ Nižaza zuma munaziŇi kuzziz kamchiž cjen, ančucqui Jesucristuž zuma munaziŇi kuz juc'antiž pajaquiča. Jalla nuž mayižinuča tjapa criichi žoŇinacžtajapa. Wejrqui tuž mayižinuča, tjapa criichi žoŇinacaqui Cristuž zuma munaziŇi kuz zumpacha pajla cjiwča. Zmali pakjiž cjes, nižaza palaž cjes, nižaza lajchaž cjes, jalla nižta iratača Cristuž zuma munaziŇi kuzqui.

¹⁹ ŽoŇinacaqui Cristuž zuma munaziŇi kuz anaž tjapa paji atča. Jalla nuž cjenami Yoozqiztan mayižinuča criichi žoŇinaca Cristuž zuma munaziŇi kuz zumpacha pajzapa. Jalla nuž pajtiqiztan, ančucqui Yooz iratapankaz zuma kamaŇchiz kamaquiča.

²⁰ Jaziqui Yoozqui zuma honorchiz cjila. Yoozqui niž aztan učum kuznacquiz zuma obranaca trabajča. Učumž mayizitiqiztanami nižaza učumž pinsitiqiztanami juc'anti zuma kamaŇchiz kami yanapasacha učum zuma Yoozqui.

²¹ Criichi žoŇinacž cjenami, Jesucristuž cjenami, Yoozqui honorchiz cjila. WiŇay wiŇaya watay wata honorchiz cjila. Jalla nužoj cjila. Amén.

4

ESPIRITU SANTUZ CJEN TSJII KUZZIZZA UCHUMQUI

¹ Jesucristo Jiliržquiz sirwiŇiž cjen carsilquiz želuča. Wejrqui ančucaquin chiižinžcuča zuma kamaŇchiz kamajo, jaknužt Yooz kjawžta žoŇinaca kamz waquizičhaja, jalla nižta. Yooz Ejpqui ančuc kjawziča nižtajapa kamajo. Jalla tuž kamz waquiziča,

² ana mit kuzziz, nižaza humilde kuzziz, nižaza zuma munaziŇi kuzziz, nižaza pasinsichiz kuzziz. Jalla nuž kamz waquiziča.

³ Espiritu Santuž cjen, tsjiižtan tsjiižtan zumanskatz waquiziča. Jaziqui tsjii kuzzizpan cjee. Nužquiz tirapan kuz tjaa.

⁴ Tjapa criichi žoŇinacaqui Cristuž partiquiz žejlča tsjii curpuchiztakazza. Nižaza tsjii Espiritu Santuchizza. Tjapa ančucqui Yooz kjawžtiqiztan tsjiikaz tjewža, arajpachquin Yooztan kamz, jalla nii.

⁵ Nižaza tjapa ančucqui tsjii Jesucristo Jilirchizkazza, nižaza tjapa ančucqui Jesucristužquin kuz tjaachinčucča. Jalla nižtiqiztan ančucqui tsjiikazza. Nižaza tsjii bautismokaz tanzinčucča.

⁶ Nižaza tjapa učumqui tsjii Yooz Ejpchizza. Učum Yooz Ejpž mantuquiz tjapa criichi žoŇinaca žejlča. Nižaza Yooz Ejpqui trabajča tjapa criichi žoŇinacž kuzquiz. Nižaza Yooz Ejpqui tjapa criichi žoŇinacž kuznacquiz žejlča.

⁷ Tjapa criichi žoŇinacžquiz kamaŇanaca tjaatača, Cristuž pectacama.

⁸ Jalla nii puntuquiztan Yooz taku tuž cjiča:

“Ararpachquin ojkan, wacchi Cristuž atipta presunaca chjitchiča. Nižaza tii muntuquiz žejlŋi žoñinaczquiz kamañanaca tjaachiča”.

⁹ Yooz takuqui “Ararpachquin ojkan” ħkjažt cjii? Jalla tuž cjiča: Primeraqui Cristuqui tii muntuquiz chjiwžquichiča.

¹⁰ Jalla nii chjiwžquiniqui Jesucristupachača. Nižaza niipachača ararpach kjutŋi ojchiqui, juc'ant tsewc ararpachquin. (Jalla nuž Jesucristuqui tsewc ojchičiča, Espiritu Santuž cjen criichi žoñinacz kuznacquiz niipacha žejljapa.)

¹¹ Jalla tižta kamañanaczchizza criichi žoñinacaqui: apostolonaca kamañchiz, nižaza Yooztajapa paljayŋi profetanaca kamañchiz, nižaza liwriiŋi taku parliñinaca kamañchiz, nižaza icliz irpiñinaca kamañchiz, nižaza Yooz puntu tjaajiñinaca kamañchiz.

¹² Jalla nižta kamañanaca tjaachiča Yoozqui, tjapa criichi žoñinaca Yooztajapa zuma kamajo, nižaza Yooztajapa sirwican langznajo, nižaza parti criichi žoñinaca tsjan zuma kamañchiz cjiskatajo. Criichi žoñinacaqui Cristužtan tsjii curpuchiztakazza.

¹³ Nižaza Yooz Ejpqui criichi žoñinaczquiz nižta kamañanaca tjaachiča, Yooz irata zuma cjiscama. Jalla nižta Yooz irata zuma cjican tjapa criichi žoñinacaqui tsjii kuzzizpankaz cjequiča, Jesucristužquiz tjapa kuz tjaacan, nižaza tjapa Yooz Majch puntunaca intintazcan. Jalla nuž Yooz irata zuma cjican, učumqui tsjii zuma pajk žoñiztakaz cjequiča. Nižaza jaknužt Jesucristuqui zumapanžlaja, jalla nižta irata učumqui zumapanž cjequiča.

¹⁴ Jalla nižta zuma kamŋi intintazŋi cjican, učumqui anaž tsjii ocjalažtakaz cjequiča, ħjul ew tjaajintiquizimi criizjapaqui. Nižaza učumqui anaž tsjii kjutŋi chjichta cjesača. Nižaza učumqui nii ana wal mañuz žoñinaczquiz ana incallskataquiča. Nii ana wal žoñinacaqui ħjulumu paača, nižaza chiča, parti žoñinaca incallzjapa, nižaza tsjii kjutŋi chjichjapaqui.

¹⁵ Antiz učumqui zuma munaziŋi kuztan werarapan chiiz waquiziča. Jalla nuž zuma kamcan nižaza zuma chiican, učumqui Cristužtan tsjii kuzzizimi tsjii kamañchizimi juc'anti cjisnaquiča. Cristupankazza učum jilir achaqui.

¹⁶ Učumqui Cristužtan tsjii curpuchiztakazza. Tsjii curpuquiz yekja yekja žejlča. Jalla nuž cjenauqui tsjii curpukazza. Jalla nižta iratača Jesucristuž partiquiz žejlŋi žoñinacaqui. Yekja yekja želanami, tsjii partiquiz juntjapziča, Jesucristuž cjen. Jesucristuqui učumnaca juntjapchiča, nižaza tsjii kuzziz cjiskatchiča, nižaza ew kamaña tjaachiča. Tjapa criichi žoñinacz zuma kamŋiž cjen Cristuž curpuqui tsjan zuma pajktažokazza. Nižaza porapat zuma munaziŋi kuzziz kamŋiž cjen, tsjan tsjan wali zumaž cjissa.

EW KAMAÑCHIZZA CRIICHI ŽOÑINACAQUI

¹⁷ Jalla nii puntu ančucaquin chiižinžcuča. Jesucristo Jiliržtan tsjii kuzziz cjican wejrqui ančucaquin tuž cjiwča: Ana Yoozquin criichi žoñinacaqui ana zuma kamča. Jalla ninacaqui inapankaz persuna pinsitanacz jaru kamča. Jalla nižta irataqui ančhucqui anača kamzqui.

¹⁸ Ana criichi žoñinacaqui ana Yooz puntu intintazŋi kuzzizza. Zumchiquiz ojklajŋi žoñinacača ninacaqui. Ninacz chojru kuzziz cjen, Yooz puntu ana zizza. Jalla nižtiquiztan ana Yooz kamañchizza.

¹⁹ Ninacaqui ana wali paaznacquiztan ana azŋiča. Nižaza ana wal kamañquiz kuz tjaachiča. Tjapaman ana walinaca paazjapa pecñipanča.

²⁰ Pero Jesucristuž tjaajintaqui anača nižta. Jalla niž tjaajintaqui zizza ančhucqui.

²¹ Ančhucqui Jesucristuž puntuquiztan nonžcu niž tjaajintaqui catokchinčhucča. Niž tjaajintaqui werarapankazza.

²² Ančuca tuquita ana wal kamaña eca. Ančuca ana wali pecñi kuz jarutača nii kamañaqui. Ana wal kamañchiz kamcan, zoñinacaqui persunpachaž incallča. Ana wal kamaña liwj jayta ančhucqui.

²³ Kuznaca liwj campiya, zuma kamañchiz cjisjapa.

²⁴ Nižaza Yooz tjaata ew kamañchizpankaz cjisna. Nii ew kamañaqui Yooz irata zuma kamañača. Nii ew kamañ jaru kamcan, ana uj paaquiča, lijituma zumaž kamaquiča.

²⁵ Jalla nuž kamcan, ana toscar takunaca chiya. Antiz zapa mayni porapat zuma werar takunacžtan parlispanča. Tjapa criichi zoñinacaqui yekja yekja cjenami tsjii curpuchiztakazza.

²⁶ Tsjii žawjz tjonanaqui, uj paazquiztan cuitaza. Ana zita žawjz peczqui.

²⁷ Anača Satanás diabluz jaru ujquiz tjojtskatz peczqui.

²⁸ Jakziltazlaja tjanz pecñi kuzziz, nii tjañi zaaz kuz jaytila. Jalla niiqui langz waquiziča persun kjaržtan. Nekztan ganžcu, t'akjir zoñinacžquiz onasača.

²⁹ Ana wal takunacžtan ana chiya. Antiz zuma takunacžtan chiya, parti zoñinaca juc'ant zuma kamañchiz cjisjapa. Jalla nuž chiyon nonzñi zoñinacaqui yanapta cjequiča, zuma kamajo.

³⁰ Espíritu Santuqui ančuca kuzquiz žejlcan Yooz chimputapanča, ultim liwriiz tjuñicama. Jalla nižtiquiztan Yooz Espíritu Santužquiz ana llaquiziskata, ana wali kamcan.

³¹ Chjaawjkatñi kuz jayta, nižaza culirazñi kuz jayta, nižaza žawjžawjz kuz jayta, nižaza zoñi ararñi kuz jayta, nižaza zoñž quintra ana wali chiiñi kuz jayta, nižaza tjapa ana wali kuznaca jayta.

³² Nižta ana wali kuzziz cjenpacha porapat zuma munaziñi kuzziz cjee. Nižaza porapat zuma okzñi kuzziz cjee. Nižaza porapat pertunñi kuzziz cjee. Jaknužt Jesucristuž cjen Yoozqui ančucaquiz pertunchaja, jalla nižta porapat pertunassaquiča.

5

ZUMA KAMAÑANAC PUNTU

¹ Ančhucqui Yooz partiquiz žejlcan Yooz pecta maatinacača. Jalla nižtiquiztan Yooz irata zuma kamañchiz cjee. Yooz kamañchiz yatekaza.

² Zuma munaziñi kuzziz cjee. Jaknužt učumnacatan Cristo munazičhaja, jalla nižta. Učumnacatan munazican, Cristuqui učum laycu ticziča. Jalla nuž ticžcan Cristuqui niž persun curpu Yoozquin tjaachiča, tsjii zuma ofrendažtakaz, nižaza tsjii zuma wilanažtakaz.

³ Ančhucqui Yooz partiquiz cjicanaqui, anača tsjii adulteriuquiz ojklayz pinsisqui. Nižaza anača čjul anawalinacami pinsisqui. Nižaza anača čjultakimi zmazqui. Nižta anawalinaca anapanž pinsis waquiziča.

⁴ Anača azzuc takunaca chiichiizqui. Nižaza anača ina takunaca chiichiizqui. Nižaza anača ana zum takunaca chiichiizqui. Jalla nižta chiichiiznacaqui anaž učumnaca chiichiiz waquiziča. Antiz zuma takunacžtan chiichiiz waquiziča. Yoozquin sparaqiz cjis waquiziča.

⁵ Ančhucqui tuž zizza. Jakziltat adulteriuquiz ojklayñi cječhaja, jalla niiqui anaž arajpach wajtquin luzasača, Cristužtanami Yooz Ejpžtanami chica kamzjapa. Nižaza ana zuma kamñinacami, nižaza zmazñinacami, jalla ninaca zakaz ana arajpach wajtquin luzasača. Ninacaqui Cristuž partiquizimi Yooz partiquizimi anapanž cjesača. Tsjii zmazñi zoñiqui, tsjii zoñiž paata yooz rispitiñi zoñi iratača.

⁶ Nižaza ančhucqui ina takunacžtan ana incallskata. Jalla nižta ana wali paañiz cjen Yoozqui nii ana wali paañinaca casticaquiča. Ninacaqui Yooz kuzcama ana kamñiča, antiz Yooz quintra paañiča.

⁷ Jalla nižta ana wali paañi zoñinacžtan chica anača munazizqui.

⁸ Tuquiqui ančhucqui uj paacan ana wal zumchiquizkaz kamatča. Anziqiu Jesu-cristo Jilirž partiquiz cjan, ančhucqui kjanquiz kamča. Jalla nižtiquiztan zuma kamcan kjanquiz kamñi žoñižta cjee.

⁹ Kjanquiz kamcan, ančhucqui zuma kamaquiča, nižaza Yooz kuzcama kamaquiča, nižaza lijituma kamaquiča.

¹⁰ Chjul kamaña Jesucristo Jiliriqui jutztazaja, jalla nii kamañchiz kamzjapa tjapa kuz tjaa.

¹¹ Ana zuma obranaca paazqui ana nezk mitisa. Zumchiquiz ojklayñi žoñinacakazza nižtanaca paaz pecñiqui. Ninacž obranacaqui ana waliž, jalla nii kjanapacha tjezna ančhucqui.

¹² Zumchiquiz ojklayñi žoñinacaqui chjozaka ana zuma paañiča. Jalla nii paatanac puntuquiztan parlizqui ancha azzucača.

¹³ Jalla nižta chjozaka paatanacaqui kjanapacha tježtažlaj niiqui, tjappacha zisača, ana walipan, jalla nii. Werar Yooz kjanaqui čjul paatanacami tježkatasacha, zuma, ana zuma, nii.

¹⁴ Jalla nii puntuquiztan Yooz takuqui tuž cjičan:
“Tjajñi žoñinaca, žaazna ančhucqui. Ticziquiztan žaažtažokaz cjee. Cristuqui ančuca kuzquiz kjanzt'ajućiča, tsjii zuma kjanažtakaz”.

¹⁵ Jaziqui ančhucqui amayt'aza, jaknužt kamčhaja, jalla nii. Yooz puntu ana zizñinacažtakaz ana kamz waquiziča. Antiz Yooz puntu zizñi žoñinaca irata kamspanž waquiziča.

¹⁶ Tii timpuquiz kamñinacaqui ana wali paača. Jalla nižtiquiztan tii timpuquiz žejlcan ančhucqui parti žoñinaca yanapa, zuma kamajo.

¹⁷ Anača zumzužtakaz cjee. Antiz Jesucristo Jiliriz pecta kuz intintazñiž cjee.

¹⁸ Nižaza anača vinžtan licchi cjisqui. Jalla nuž licasaž niiqui, zuma kamañquiztan tsjii kjutñi chjichta cjesača. Antiz ančuca kuztan Espiritu Santužtan tsjii kuzziz cjee.

¹⁹ Ančhucqui porapat zuma parlaquiča Yooz tawk salmužtan, nižaza Yooz wirsu itsnacžtan. Yoozquin tjapa kuztan itsnaquiča. Nižaza itscan Yoozquin honora tjaa.

²⁰ Chjulu watanami Yooz Ejpžquin tirapan sparaquiz cjequiča, učhum Jesucristo Jiliriz cjen.

CRIICHI FAMILLZ PUNTU

²¹ Jesucristužquin rispitchiž cjen porapatž sirwasaquiča.

²² Maatakanaca, persun luctakž jaru cjee, jaknužt ančhucqui Jesucristo Jilirž jaru kamčhaja, jalla nižta.

²³ Maatakaqui luctakž mantuquiz žejlča, jaknužt icliz žoñinacaqui Cristuž mantuquiz žejlčhaja, jalla nižtača. Icliz žoñinacaqui Cristužtan tsjii curpuchizpanča. Nižaza Cristuqui ninacž ačača. Cristuqui nižquin criichi žoñinaca liwriiča.

²⁴ Jaknužt criichi žoñinacaqui Cristuž mantuquiz žejlčhaja, jalla nižta irata tsjii maatakaqui luctakž mantuquiz cjistanča čjulu cjenami.

²⁵ Luctakanaca, persun maatakžtan zuma munaza. Jaknužt Cristuqui criichi žoñinacžtan zuma munazičhaja, nižaza ninacž laycu ticztčhaja, jalla nižta irata persun maatakžtan zuma munaza.

²⁶ Jalla nižta zuma munazican Cristuqui nižquin criichi žoñinacž laycu ticziča, ninaca zuma kamañchiz cjiskatzjapa. Jalla nižta zuma kamañchiz cjisjapa criichi žoñinacaqui kjaztan ajuntažokaz cjissiča, Yooz taku catokžcu.

²⁷ Cristuqui nižquin criichi žoñinacžquiz zuma kamañchiz cjiskatchiča, nižquizpacha zumapankaz ana ujchiz prisintisjapa. Jaknužt tsjii zuma telaqui ana manchichiz, nižaza ana tjot tjotsi, nižaza ana čjul ana walinacchiz žejlčhaja, jalla nižtapan criichi žoñinacaqui Cristuž yujcquiz cjequiča, zumapankaz cjequiča.

²⁸ Jalla nižta Cristo irata tsjii luctakaqui persun maatakžquiz zuma munazizpanča. Jaknužt persun curpuquizpacha cuitazñizlaja, jalla nižta persun maataka cuitaz waquiziča. Persun maatakžtan munazican, persunpacha munazitažokazza.

²⁹ Anaž jecmi persun curpupaja quintrapaasača. Antiz persun curpuquiz cuitazza, nižaza čhjeriž tjaača. Cristuqui jalla nižta irataž icliz žoñinacžtan cuitiča.

³⁰ Učhumqui icliz žoñinacača, nižaza Cristuž curpu cuntača, yekja yekja cjenami. Jalla nižtiquiztan Cristuqui učhumnacatan cuitiča.

³¹ Yooz takuqui tuž cjiča: “Tsjii luctak žoñiqui persun maa ejpžquiztan zarakaquiča, persun maatakžtan zalzjapa. Persun maatakžtan zalžcu, nii pucultanaqui tsjiikaz cjissa”.

³² Cristužquiz criichi žoñinacaqui Cristužtan lucutjiñiztakazza. Jalla nižta cjenauqui ch'amača intintazqui.

³³ Pero zapa mayni ančhucaquiztan persun maatakžtan zuma munaza, jaknužt persunpachquiz zuma munazaja, jalla nižta. Nižaza maatakaqui persun luctaka rispitsa.

6

¹ Criichi maatinaca, persun maa ejpžquiz caspanča. Jalla nuž cascuqui Yooz pecta kuzcamača.

² Yoozqui tuž mantichiča: “Maa ejpžquiz rispitsa”. Nižaza maa ejpžquiz rispitaquiž niiqui Yoozqui compromitchiča, tuž cjican:

³ “Maa ejpžquiz rispitaquiž niiqui, ančhucqui waliž kamaquiča, nižaza ažk wata žetaquiča tii yokquiziqui”.

⁴ Ejpna, ančhucqui maatinacžquiz ana inapankaz žawjwa zjijcna. Ocjalanacaqui ana wali paaquiž niiqui, zumžtan chižinaquiča zuma kamajo. Nižaza Jesucristo Jilirž tjaajinta tjaajžna.

⁵⁻⁶ Piyunanaca, ančhuca patrunanacžquiz caspanča, rispitan, nižaza ekscan, nižaza tjapa kuztan. Anača cherankaz c'unchikaz tuczqui niž kuz wali cjisjapa. Antiz tjapa kuztan nižtajapa langznaquiča. Jaknužt ančhucqui Yooz kuzcama tjapa kuztan Cristužquiz sirwičhaja, jalla nuž ančhuca patrunanacžquiz sirwasača.

⁷ Zuma kuztan langznaquiča, Yooz Jiliržtajapa langztažokaz, ana žoñžtajapaqui.

⁸ Ančhucqui zizza, piyunanacami, ana piyunanacami, tjapa žoñinacami Yoozquiztan pactaž cjequiča zuma langztiquiztan jama.

⁹ Patrunanaca, ančhuc zakaz piyunanacžtan zumapan cjee. Ana žawjñi takunacžtan chiichiya. Jalla tuž cjuñžna: ančhucmi, ančhuca piyunanacami, tjappacha arajpach Yooz Patrunž mantuquiz žejlča. Nižaza Yooz Patrunaqui žoñinaca ana illilla.

YOOZQUIN TJURT'IZ PUNTU

¹⁰ Jaziqui jilanaca, cullaquinaca, Yooz wali aztan Jesucristo Jiliržquiz tjurt'iñi kuzziz cjee.

¹¹ Satanás diabluz incallzpanž pecča. Jalla nižtiquiztan tjapa Yooziž tjaata armanacchiz cjee, tjurt'iñi kuzziz cjisjapa.

¹² Učhum wali azziz quintranacaqui anača žoñinacakaz. Antiz ninacaqui ana wal jilir zajranacača, nižaza ana wal poderchiznacača, nižaza ana wal mantiñinacača. Nižaza tjapa ana wal azziznacača učhum ultim quintranacaqui. Jalla ninacaqui zumchiquizkaz ojklayñiča, tii timpuquiz ana walinaca mantican.

¹³ Jalla nižtiquiztan Yooz armanaca tanžna, nii ana walinacž quintraja tjurt'izjapa tii ana wal timpuquiz. Yooztajapa tjurt'ican tjup kuzziz žela.

¹⁴ Jaziqui tii Yooz armanaca tanžna. Tsjay cinturuna tanžna. Nii cinturuna tanzqui tuž cjiča, werar Yooz tawkžtan tjurt'ichi žejlz, jalla ničha niiqui. Nižaza persun curpu atajñijapa arma tanžna. Nii arma tanzqui tuž cjiča, Yooz kuzcamapankaz kamz, jalla ničha niiqui.

¹⁵ Nižaza jaknužt zultatunacaqui quira zalzjapa zuma zapatu cujtžaja, jalla nuž ančhucqui liwriiñi taku paljayzjapa tjaczpanča.

¹⁶ Nekztan tii arma tanžna. Tii armača juc'ant chekanaqui, escudo cjita. Jalla nii arma tanzqui tuž cjiča, Jesucristužquin kuzziz kamz, jalla niiča niiqui. Jesucristužquin kuzziz cjen, ana wal diabluž quintra tjurt'aquiča.

¹⁷ Nižaza tii arma žejlča. Yooziž liwriita cjisqui tsjii tjup scarchiztakazza, acha ana chjojritžta cjisjapa. Nižaza Espíritu Santuž pajk cuchillu tanžna. Jalla nii cuchilluqui Yooz takuča.

¹⁸ Espíritu Santuž ančuca kuzquiz želan, ančhucqui Yoozquin tirapan mayiza, nižquin tjurt'ichi cjisjapa. Jalla nuž tjurt'ichi cjisjapaqui, naynay žela, ana llajlli kuzziz cjee. Nižaza tjapa Yooz partiquiz žejlñi žoñinacžtajapa mayizina.

¹⁹ Nižaza wejttajapa mayizina, Yoozqui wejr niž liwriiñi takunaca chii yanapzjapa. Wejrqui tjup kuztan liwriiñi Yooz taku zumpacha paljayz pecuča. Jalla nuž paljayzjapa wejttajapa mayizina.

²⁰ Yoozqui wejr cuchanžquichiča, niž puntunaca paljayzjapa. Jalla nuž weriž paljaytiquiztan anziqi wejrqui carsilquiz chawcta želuča. Jalla nižtiquiztan wejttajapa mayizina, liwriiñi takunaca tjup kuztan ticlarzjapa, jaknužt wejrqui chiiz waquizučaja, jalla nii.

ZERZ TAKUNACA

²¹ Tíquico jilaqui ančucaquin tjapa wejt puntunaca quint'aquiča, jaknužt želučaja, nižaza čhjulut paa-učaja, jalla nii. Tíquico jilaqui pecta jilača, nižaza wejt zuma yanapñiča, Jesucristo Jiliri sirwican.

²² Jaziqi tii jila ančucaquin cuchanžcuča, wejtnaca puntuquiztan mazinzjapa, nižaza ančuca kuznacquiz zumpacha p'ekinchayzjapa.

²³ Yooz Ejpžtan Jesucristo Jiliržtan ančucaquiz llan kuzziz cjiskatla, nižaza juc'ant zuma munaziñi kuzziz cjiskatla, Jesucristužquin kuz tjaacan.

²⁴ Učhum Jesucristo Jiliržtan zuma munaziñi kuzziz žoñinacžquiz Yoozqui yanapt'izquila. Jalla nužoj cjila. Amén.

LA CARTA DEL APOSTOL SAN PABLO A LOS FILIPENSES

¹ Wejr Pabluqui Timoteo jilžtan ančhucaquin tii cartal cjiřžcuča. Wejrnacqui Jesucristuž manta payiñtča. Jaziqui ančhuc Filipos wajtchiz criichinacžquin cjiřžcuča. Jesucristužquin kuz tjaachiž cjen, ančhucqui Yooz partir žoñinacača. Ančhucaquin tsaanžcuča icliz irpiñinacžquinami, nižaza icliz jilirinacžquinami.

² Učhum Yooz Ejp, nižaza učhum Jesucristo Jiliri ančhucaquiz yanapt'ila. Nižaza ančhucaquiz walikaj kamkatla.

PABLUZ MAYIZITA

³ Čhjulatorat ančhucaquin cjuñznučhaja, ančhucaž cjen Yoozquin sparaquiz cjian chiyučha.

⁴ Nižaza čhjulatorat ančhucaltajapa mayizučhaja, cuntintul mayizuča.

⁵ Učhumqui chicapacha langzinčhumča, žoñinaca Yoozquin kuzziz cjiskatzjapa. Ančhucaž criichi tjuñquiztanpacha nižaza anzama Yooztajapa wejttan chica langzinčhucča.

⁶ Ančhucaž criichi tjuñquiz Yoozqui ančhucaquiz zuma kamañchiz cjiskatz kalltichiča. Nižaza Yooz Ejpqui ančhuca zuma kamaña Jesucristuž kamaña irata juc'anti juc'ant cjiskataquiča, Jesucristuž tjonz tjuñicama. Jalla nužupanča cjiwča.

⁷ Nii ančhuca puntuquiztan pinsitanacaqui zuma lijitumača. Wejrqui persun kuzquiztan ančhucajapa anchal cjuñučha. Yoozqui tjapa ančhucaquizimi wejtquizimi yanapchiča, carsilquiz želanami, nižaza jilirinacž yujcquiz želanami. Jilirinacž yujcquiz liwriñi Yooz tawk favora chiicanpan tjurt'ichinčhumča. Nižaza "Nii liwriñi takuqui werar takupanča" cjian ticlarchinčhumča. Jalla nuž chiyani Yoozqui učhum yanapchiča.

⁸ Jaziqui wejrqui persun kuzquiz ančhucajapa anchal cjuñučha, jaknužt Jesucristuqui ančhucajapa zuma cjuñčhaja, jalla nuž. Yoozqui nuž zizza.

⁹ Jalla nižtiquiztan ančhucaltajapa Yoozquin mayizuča, ančhucqui tsjan tsjan zuma munaziñi kuzziz cjisjapa. Nižaza jalla nuž zuma munazan, zakaz mayizuča, ančhucqui Yooz puntu tsjan zizñi cjisjapa, nižaza Yooz puntu tsjan zuma intintazñi kuzziz cjisjapa.

¹⁰ Jalla nuž ančhucqui zuma zizñi nižaza intintazñi kuzziz cjequiz niiqui, zuma kamañanacakaz illznaquiča. Nuž illznaquiz niiqui, Jesucristuž tjonz tjuñquiziqui ančhucqui ana ujchiz zumapan cjequiča. Anaž jecmi ančhuca quintra tsji ujm tjojtasača.

¹¹ Nižaza ančhucqui Jesucristuž cjen zuma kamañanacakaz tjeeznaquiča Jesucristuž tjonz tjuñquiziqui. Jalla nižtiquiztan ančhucaž cjen Yoozqui zuma honorchiz cjequiča. Nižaza "Yooz ancha zumača" cjian Yooz honora chiitaž cjequiča.

KAMAÑAQUI CRISTUZ CJENPANCHA

¹² Jilanaca, cullaquinaca, ančhucaquin wejt puntuquiztan zizkatz pecučha. Wejtquiz anawali watchinacaž cjen tsjan žoñinacaqui liwriñi Yooz taku nonziča.

¹³ Anziqui pajk jilirž kjuyquiz preso želuča. Jalla nuž želan tjapa wejr cuitiñi zultatunacaqui liwriñi Yooz taku nonziča. Parti žoñinacaqui nonzizakazza. Tjapa ninacaqui zizza, wejrqui Jesucristuž liwriñi puntu paljaychiž cjen, preso želuča.

¹⁴ Nižaza weriž preso željtiquiztan, jila parti criichinacaqui Yooz taku paljayzjapa zumpacha p'ekinchaychiča. Nižaza tjup kuzziz cjisiča Yooz taku paljayzjapa, ana ekscan.

15 Yekjapanacaqui wejttajapa iñiziñi kuztan Cristuž puntu paljayča. Ninacaqui wejtquiztan juc'ant honorchiz cjis pecča. Partizti zuma kuztan Cristuž puntu paljayča.

16-17 Ninacaqui zuma munaziñi kuzquiztan Yooz taku paljayča. Ninacaqui zizza, wejrqui tekz carsilquiz želuča, liwriñi tawk favora tjurt'ichiž cjen. Yekjapanacaqui ana zuma kuzquiztan persun honora tanzjapa Cristuž puntu paljayča. Ninacaqui pinsiča, ninacž quintu nonžcu wejrqui juc'ant llaquisichucača, jalla nii.

18 Jalla nuž cjen, wejrqui ¿kjažt cjeesa? Jalla tuž cjiwča: zuma kuztan cjenami, ana zuma kuztan cjenami Crustuž puntuqui paljaytača. Jaknužt paljayta cjenami, wejttajapa walipankaz cjesača. Jalla nuž cjenacqui wejrqui chipznuča.

19 Nižaza juc'anti chipznača. Ančucaž wejttajapa mayiziz cjen, nižaza Jesucristuž Espírituž yanapz cjen, tjapa tii watchinacžquiztan wejrqui walipankal cjeeča. Wejrqui tii carsilquiztan ulnačhani.

20 Jalla nuž anchal pecuča, nižaza tjewznuča. Ultimquiziqui wejrqui ana azkattal cjeeča. Pero Cristuž puntul kjana declarača, zuma tjurt'ichi kuztan. Jaziqui weriž cjen Cristuqui tsjan tsjan honorchiz cjequiča, weriž žetanami, weriž ticznunami. Tuquimi anzimi weriž cjen Cristuqui honorchizpanča.

21 Tuž cjiwča. Cristužtajapapankaz žetuča. Wejr ticznaž niiqui, wejttajapa tsjan cusaž cjequiča, arajpachquin Cristužtan chica žejlcan.

22 Tii curpuchiz tira žetaž niiqui, Cristužtajapapankal langznasača. Jalla nižtiquiztan, žejtzm ticzmi jakziltat illz waquizas? Anal atasacha.

23 Tii pizc partiqui ch'amača illzjapa. Tsjii kuzqui ticz pecuča, Cristužtan chica žejlzjapa. Jalla niiqui wejttajapa juc'ant waliž cjesača.

24 Pero ančucaltajapa wejt tira žejt waquiziča.

25 Jalla nuž wejr ančucaquiztan kuzquiz zint'ican, wejrqui zizuča: tiral žetuča. Ančucatan tiral kamuča, ančucqui Jesucristužquiz juc'ant kuzziz cjisjapa, nižaza juc'ant cuntintu cjisjapa.

26 Nižaza wiruñacqui ančucaquin wilita tjonznača. Jalla nuž weriž tjonz cjen, nižaza Jesucristuž cjen, ančucqui cuntintuž cjequiča.

27 Jilanaca, cullaquinaca, jalla tužuča chekanaqui. Ančuca cristian kamzqui Cristužquiz honorchiz cjiskatz waquiziča, Cristuž tjaajinta jaru kama. Jalla nuž kamaquič niiqui, ančuca puntuquiztan zuma quintu okaquiča. Nekztanaqui wejrqui ančucaquin cherzñi tjonznaž niiqui, už ana cherzñi tjoni ataž niiqui, wejrqui ančuca puntuquiztan zuma quintu nonznačhani. Ančucqui tsjii kuzziz tjurt'ichi želačhani. Nižaza tjapa ančucqui tsjii kuzziz Yooz tawk favora langzcan želačhani.

28 Nižaza ančucqui quintra žoñinacžquiztan anaž jaknužumi tsuctsucačhani. Anaž ninacž taku kjayačhani. Jalla nuž quintu nonžcuqui, cuntintul cjeeča. Nižaza ančucaž nuž kaman, kjanapacha tjeežtaž cjequiča, ančuca quintra žoñinaca in-fiernuquin Yooziž castictaž cjequiča. Nižaza kjanapacha zakaz tjeežtaž cjequiča, ančucqui ultimu liwrižcu arajpachquin zuma kamañchiz cjequiča. Nii zuma kamaña Yooziž tjaata cjequiča.

29 Yoozqui ančuc illziča, Jesucristužquin kuz tjaazjapami, nižaza Jesucristuž laycu sufrisjapami.

30 Wejr irata ančucqui sufrichinčucča žoñinacaž quintra paan. Tuqui jaknužt wejrqui sufritučaja, jalla nuž cherchinčucča. Anzimi zakaz wejt sufrita quintu nonzinčucča. Ančuc zakaz nižta sufraquiča.

2

¹ Ančhucqui Jesucristužquin kuzziz cjen p'ekinchaytaž cjee. Nižaza Jesucristo ančhucquiz okzñiž cjen, ančhucqui kuzta cjee. Nižaza Espíritu Santuqui ančhucua kuzquiz luzziča. Nižaza ančhucqui okzñi kuzzizza.

² Jalla nižtiquiztan ančhucqui tsjii kuzziz cjee, porapat zuma munazican, nižaza zuma kamcan. Jalla nuž ančhucqui kamaquiž niiqui, nekztan wejrqui juc'ant cuntintul cjeeča.

³ Anaž persun kuzcamakaz čhjulumi paa. Nižaza anaž čhjulumi mit kuztan paa. Antiz humilde kuzziz cjee. Parti criichinacaqui wejtquiztan juc'ant honorchiz waquiziča, jalla nuž cjican pinziz waquiziča.

⁴ Persunaltajapa wali cjisjapa, ančhucqui kuz tjayiñčhucča. Nižaza parti criichinacžtajapa wali cjisjapa zakaz kuz tjaa.

⁵ Jaknužt Jesucristuqui zuma kuzziz žejltčhaja, jalla nižta irata zuma kuzziz cjee. Jesucristuqui zuma kuzziz žejlcan, ana paachiča persunaltajapakaz wali cjisjapa.

⁶ Jesucristuqui Yooz cjicanaqui, arajpachquin žejlñi kamañchizpan želatča. Nii arajpach kamañchiz cjenami ana nii arajpach kamaña jaknužumi tira tanzitača.

⁷ Nii arajpach kamaña ecchiča. Nekztan tii muntuquiz žejlñi kamañchiz cjissiča, žoñinaca sirwizjapa. Nižaza žoñi irata nassiča.

⁸ Zoñž curpuchiz cjican, humilde kuzziz želatča. Yooz manta paacan, Yooz Ejpž kuzcamapan kamatča. Cruzquiz ch'awcta ticz cjenami, Yooz Ejpž kuzcamakaz kamatča. Yooz kuzcama kamzquiztan anapan jiwjatchiča.

⁹ Jalla nižtiquiztan Yooz Ejpqui Jesucristužquiz juc'ant zuma honora tjaachiča. Jesucristužquiz tsjan chawc jiliri utchiča, tjappachquiztanami.

¹⁰ Jalla nižtiquiztan tjappachaž nižquiz quillzcan rispitaquiča. Arajpachquin žejlñimi, tii muntuquiz žejlñimi, yok kos žejlñimi, tjappacha Jesucristužquiz rispitaquiča.

¹¹ Tjappacha ticlaraquiča, tuž cjican:

—Jesucristuqui, werarapan Jilirimča amqui. Jalla nuž cjican, Yooz Ejpžquiz zakaz honora tjaata cjequiča.

CRIICHI ZOÑINACAQUI YOOZ ZUMA KAMAÑCHIZZA

¹² Weriž pecta jilanaca, cullaquinaca. Weriž ančhucatan želan, ančhucqui weriž chiita taku cassinčhucpanča. Nižaza jaziqui juc'antiž wejt taku casa, ančhucatan ana želanami. Arajpachquin kamzjapa nižaza ultimu liwriita cjisjapa, ancha kuz tjaa. Nižaza humilde kuzziz cjee Yoozquin ekscan.

¹³ Cjuñzna. Yoozqui ančhucua kuzquiz žejlča. Jalla nuž žejlcan, niipachaž niž kuzcama zuma paaz ančhucquiz pekatča. Nižaza Yoozpacha nii zuma paaznaca cumplisjapa yanapča.

¹⁴ Čhjulu paacanami, ana Yooz quintra chucha, nižaza ana payznaka. Pero tjapa zuma kuztan kama.

¹⁵ Jalla nuž zuma kuztan kamtiquiztan, anaž jecmi ančhucua quintra uj tjojtasača. Ana wal ujchiz žoñinacžtan kamcanami, anapan ujchiz cjesača, zuma kuztan kamcan. Nekztan ančhucqui kjanapacha tježa, Yooz maatinacčhucča. Zuma kamcan ančhucqui ana wal žoñinacžquiz Yooz zuma kamaña pajkatča, zuma kjanažtakaz.

¹⁶ Nižaza ančhucqui Yooztan wiñay kamz puntu paljaycan Yooz zuma kamaña pajkatča. Jalla nuž ančhucuaž zuma kamtiquiztan wejrqui Jesucristuž tjonz tjuñquiz ancha cuntintul cjeeča. Ančhucua zuma kamañchiz kamtiquiztan weriž apóstol puestuquiz Cristužtajapa langžtaqui anača ina.

¹⁷ Ančhucqui Yoozquin tsjii wilana ofrendažtakaz ančhucua zuma kamaña tjaača. Ančhucua ofrenda zuma cumplisjapa, ticznasača wejrqui. Jalla nuž ticzcanami wejrqui cuntintul cjeeča. Ančhucuaž cjen Yooz sirwican cuntintuča.

¹⁸ Nižaza ančhucqui weriž cjen cuntintu zakaz cjis waquiziča. Jaziqwi wejttan chica cuntintuž cjee.

¹⁹ Jesucristo Jiliriž munan, wejrqui ančucaquin Timoteo jila cučanžquiz pecuča. Nekztan Timoteož quejpžquiztan, ančuca puntu wejtquiz maznaquiča. Nekztan wejrqui persun kuzquiz zuma cuntintul cjeeča.

²⁰ Anaž iya jecmi wejr irata pinsiñi žejlča, Timoteokazza. Jalla niiča ančhucalta wali cjisjapa kuz tjaañipankaz.

²¹ Parti jilanacaqui persunaltajapa wali cjisjapa kuz tjaača. Jesucristuž kuzcama ana zuma ojklajča.

²² Ančhucqui Timoteo jilž puntu zizza. Niiqui zuma kuz tjeeziča. Wejttan chica liwriiñi Yooz taku paljaycan wejr zuma yanapchiča, jaknužt tsjii majch persun ejp yanapčhaja, jalla nižta irata.

²³ Čhjulut wejtquiz carsilquiz watačhaja, jalla nii zizcu, wejrqui Timoteo jila cučanžquiz pecuča ančucaquin.

²⁴ Nižaza Jesucristo Jiliriž munan, wejrpacha upaquiztan ančhuc chertzñi tjonz pecuča.

²⁵ Tirapan carsilquiz želaž niiqui, Epafrodito jila cučanžcača. Jalla nuž cučanžquiz tantiichinča. Epafrodito jilaqui wejt herman jilača, nižaza Jesucristužtajapa langzñi maziča, nižaza wejttan chica tjurt'iñi maziča. Ančhucqui Epafrodito jila wejtquin cučanžquichinčhucča, wejtquiz yanapzjapa. Wejttan žejlcan, wejr zuma atintichiča.

²⁶ Nii jilaž tjapa ančucaquiz ancha cjuñtiquiztan wejrqui tantiichinča, ančucaquin nii cučanžjapa. Ančhucqui Epafrodito jila laaquita quintu nonzinčhucča. Epafrodito jilaqui jalla niiž quintu ančucaquin irantitiquiztan kuz turwaysi cjissiča, ančhuc cjuñžcu.

²⁷ Ultim werara laatača, nižaza ticzmayatača. Pero Yoozqui niižquiz ancha okžcu čhjetinchiča. Yoozqui wejtquizimi okzizakazza. Ana čhjetintaž cjitasaž niiqui, wejtaqui juc'ant llaquiz cjitasača.

²⁸ Jalla nižtiquiztan wejrqui tii jila juc'ant cučanžquiz pecuča, ančhucqui tii jila cheržcu cuntintu cjequiča, nižaza wejrzakaz ančucaž cuntintu cjen, upa llaquisaćha.

²⁹ Nii jila zuma cuntintu kuztan risiwaquiča, zuma Jesucristo Jilirižquin criichi žoñiča niiqui. Jalla nižta jilanacžquiz rispitspanča.

³⁰ Tii Epafrodito jilaqui ticzmayapantača, Cristužtajapa sirwican. Jos ticziča, ančuca cuntiquiztan wejtquiz tii carsilquin atintican. Jalla nižtiquiztan niižquiz zuma risiwaquiča.

3

PABLUQUI JESUCRISTUZQUIN KUZIZPANCHA

¹ Jilanaca, cullaquinaca, tsjiilla cjesaćha. Cristuž mantuquiz žejlcan cuntintuž cjee. Tuqui ančucaquin cartal cjiirchinča, tsjii kjaž puntunacquiztan. Jalla nii puntunacquiztan wital cjiirz pecuča. Wejtta ana molističa nii wilta cjiirzqui. Ančhucaltajapaqui ancha walipanča jalla nii puntunaca wilta cjiirzqui.

² Ančhucqui ana wal žoñinacžquiztan cwitaza. Ana wal pacužtakazza ninacaqui. Ana wali paañinacača ninacaqui. Čhimpuchiz cjisjapa žoñinacž curpu pootñiča.

³ Učhumqui lijitum Yooz partir žoñinacača, nižaza učhum kuznacquiz Yooziž chimputapanča. Yooz Espiritu Santuž učhum kuznacquiz luzziž cjen, Yooz rispitiñčhumča. Nižaza Jesucristužquin kuz tjaačiž cjen učhumqui cuntintučhumča. Učhumqui anača žoñiž pinsita custurumpiquiz kuz tjaačinčhumqui, Yooz partira cjisjapaqui.

⁴ Ima Jesucristužquiz kuz tjaacan, wejttaqui razunanaca želatča, “Yooz partiquiz želuča” cjisjapaqui. Jakzilat persun razunanacquiztan pinsičhaja, “Wejrqui Yooz partiquiz želuča” cjicanaqui, jalla nižta chiiñi žoñžquiztan wejttaqui juc'anti razunanaca žejlča, “Yooz partiquiz želuča” cjisjapaqui.

⁵ Jalla tužuča wejt razunanacaqui: maaž majttiquiztan quinsakal tjuñquiztan persun curpuquiz chimputapantača. Wejrqui Israel wajtchiz žoñtča. Benjamin famillquiztantča. Hebreo tawkchiz žoñtča majttiquiztanpacha. Nižaza wejt maa ejpmi hebreo chiiñizakazza. Judío lii puntuquiztan fariseo partir tjaajinta jaru kamiñpantača.

⁶ Ancha tjapa kuztan judionacž lii jaru kamz pecquiñtača. Jalla nižtiquiztan Jesucristužquin criichi žoñinaca sufriskatiñtača. Judionacž lii jaru kamz puntuquiztan wejrqui zuma cumpliñtača. Anaž jecmi wejt puntuquiztanaqui “Amqui anam judionacž lii jaru kamča” cjican chii atchiča. Wejt kamzqui lijituma lii jarupantača.

⁷ Tuquiqui tjapa nii puntunacaqui wejtquiztan ancha walñitača. Anziqui tjapa nii puntunacaqui wejtquiztan ana zinta walča, Jesucristuž tjapa walchiž cjen.

⁸ Jesucristo wejt Jiliri tsjan zuma pajzpanqui, jalla niikaz wejtquiziqui walča, tjappachquiztan juc'anti. Jalla nižtiquiztan tjapa žoñiž pectanaca wejtquiztan ana zumanacažtakal nayuča. Wejtquiztan anaž iya čhjulumi walča. Jesucristuž partiquiz cjisjapa wejrqui tjapa žoñiž pectanaca ana kuz tjaa-uča. Ninaca ecchinča. Jaziqui ana criiñi žoñiž pectanaca cjujchinacažtakal nayuča Cristuž partiquiz žejljapa,

⁹ nižaza Cristužtan tsjii kuzziz cjisjapa. Jesucristupankaz wejtquiztanac walča wejr Yooz yujcquiz ana ujchiz cjisjapa. Wejt persun pinsita jaru kamtasaž niiqui, nižaza judionacž lii jaru kamtasaž niiqui, Yooz yujcquiz tirapan ujchiz cjitasacha. Pero Yooz yujcquiz ana ujchiz cjisjapa, Jesucristužquin ultimpacha kuzziztča wejrqui. Jesucristužquin kuzziz cjen, Yoozqui wejtquiz nayča, ana ujchiz nižaza zuma, jalla nii.

¹⁰ Wejrqui pecuča tužu, Cristo tsjan zuma pajz, jalla niiča. Nižaza Jesucristuqui jacatatcan, ancha aziž tjeeziča. Jalla nižta azziz cjis pecuča. Nižaza jaknužt Jesucristuqui sufritčhaja, jalla nuž sufris zakal pecuča, niž partiquiz cjissiž cjen. Nižaza jaknužt Jesucristuqui ticztčhaja, jalla nižtazakaz ticzižtakal žejlz pecuča, ana uj paacan žejljapa.

¹¹ Jalla nuž Cristužtajapakaz kamcan, wejrqui ticžcu tjewznuča, jacatatzjapa, jalla nii.

YOOZ IRATA ZUMA KAMAÑCHIZ CJIS PECCHA PABLUQUI

¹² Tuž cjiwča. Wejrqui tii muntuquiz žejlcan, Cristužtajapa awisaqui ana zuma kamuča. Imaziča Yooz irata zuma kamañchiz žejlzquinaqui. Jalla nuž cjenami, wejrqui tirapan kuz tjaa-uča, nižaza tjurt'uča, Yooz irata zuma kamañchiz cjisjapa. Jalla nižta wejr cjisjapaqui Jesucristuqui wejr liwriichiča. Nižaza wejr liwriichiča niž mantuquiz cjisjapa.

¹³ Jilanaca, cullaquinaca, wejrqui tuž cjiwča, wejrqui imaziča Yooz irata zuma kamanchizqui cjicanaqui. Pero tuž cjiwča, wejt tuquita ana zuma kamaña ecuča. Nižaza ancha tjapa kuztan tjurt'uča, juc'ant zuma kamañchiz cjisjapa.

¹⁴ Tira tjurt'uča, Yooz irata zuma kamañchiz cjisjapa, nižaza Yoozquiztan tsjii zuma premio ganzjapa. Jesucristuž partiquiz žejlchiž cjen Yoozqui wejr arajpachquin kjawznaquiča. Nekztan juc'ant zuma kamañaž tjaaquiča.

¹⁵ Tjapa ančhuc Yoozquin kuz tjurt'ichinaca wejr irata cjee. Ančucaž pinsitaqui tsjii puntu ana wejr iratažlaj niiqui, Yoozqui ančucaquiz nii puntu zizkataquiča lijituma pinzizjapa.

¹⁶ Tii zakal cjiwča. Anzcama jaknuž Yoozqui učumnacaquiz niž kamañ puntuquiztan zizkatčhaja, jalla nii zizkatta kamañ jaru kamstanča.

¹⁷ Jilanaca, cullaquinaca, weriž kamta irataž kama. Nižaza jakzilta criichinacat weriž kamta irata kamčhaja, jalla ninacžquin yatekaza, juc'ant zuma kamañchiz cjisjapa.

¹⁸ Wejrqui kjaž wilita ančhucaquiz chiižinchinča, nižaza ancha kuzquiz zint'ican kaacan, wilita chiižinuča, jalla tuž cjan. Wacchi žoñinacaqui Cristuž quintra žejlča. Cristuž cruzquiz ticziž cjenami, jalla nii liwriiñi ana juyzu paača.

¹⁹ Ultimquiziqui nii ana Cristužquiz juyzu paañi žoñinacaqui Yooziž castictaž cjequičha. Ninacaž persun kuzquiztan pectanaca rispitcha, tsjii yooztakaz. Azzucanaca paacan, mit kuzzizkazza. Nižaza tii muntu yokquiz žejlñi cusasanacžquizkaz pinsičha.

²⁰ Učhumzti arajpach wajtchiz žoñinacčhumča. Učhumqui arajpachquiztan učhum Liwriiñi, Jesucristo Jiliri, tjewža.

²¹ Jesucristuqui wilita tjonžcu učhum ana wal curpunaca tsjemataž tuckataquičha, niž irata zuma curpuchiz cjisjapa. Niiž persun aztan učumnaca curpu jalla nižta tsjemata tuckataquičha. Nižaza niiž persun aztan čhjultakimi niiž mantuquiz cjiskataquičha.

4

YOOZQUIN KUZZIZ CJEN CUNTINTUPANZ CJEE

¹ Weriž pecta jilanaca, cullaquinaca, ančhucaquin ancha tjonz pecučha. Ančhucaž cjen, cuntintuž wejrqui, nižaza ančhucaž cjen honorchiz cjeeča. Pecta jilanaca, cullaquinaca, Jesucristo Jiliržquin tjurt'ichi kuzziz cjee.

² Evodia cullaca, nižaza Síntique cullaca, ančhucqui Jesucristo Jiliržquin criichiž cjen tsjii kuzziz cjee.

³ Wejt lijitum Cristužquiz sirwiñi mazi, amquiz rocuča, tii pucultan cullaquinacžquiz yanapt'alla, porapat zuma munaziñi kuzziz kamzjapa. Nii pucultan cullaquinacaqui wejttañ chica liwriiñi taku paljaycan langziča. Nižaza nii cullaquinacaqui Clementižtan, nižaza parti wettan chica paljayñi mazinacžtan langziča. Tjapa ninacž tjuunacaqui listitača arajpach žejtz liwruquiz.

⁴ Jesucristo Jiliriž cjen cuntintupanž cjee čhjulorami. Wilita cjiwča: cuntintuž cjee.

⁵ Tjapa žoñinacaqui ančhuc zuma kuzziz pajla. Jesucristo Jiliriž wajiłlaž tjonaquičha.

⁶ Ana čhjulquiztanami llaquita kuzziz cjee. Antiz čhjulu watanami Yoozquizkaz mayiza. Yoozquiztan čhjulumí maya, nižaza sparaquiž cjee.

⁷ Jalla nuž kaman, Yoozqui ančhuca kuzquiz cuntintuž cjiskataquičha. Jaknužt Yoozqui žoñinacž kuzquiz cuntintu cjiskatčhaja, jalla nii cuntintu cjiskattaqui ana intintazasača, žoñiž pinsitiquiziqui. Jesucristužtan tsjii kuzziz cjen ančhuca kuznacaqui cuntintu cjequičha, Yooz cwititiquiztanaqui.

ZUMA PINZIZNACAPANZ WAQUIZICHA

⁸ Jilanaca, cullaquinaca, tii zakal cjiwča. Jalla tižta ultim zuma pinziznaca waquiziča: weraranaca, nižaza rispitsnaca, nižaza Yooz kuzcama kamznaca, nižaza ana uj paaznaca, nižaza tjapa zumapan kamz pecznaca, nižaza zuma quintuchiz cjisnaca. Jalla nižta zumanaca pinza, nižaza tjapa zuma walinaca pinza.

⁹ Weriž tjaajinta jarumi, nižaza weriž chiita jarumi, jalla nii jarupan kama. Nižaza jaknužt weriž kamta puntuquiztan nonžinčhucčhalaj niiqui, nižaza cherch-inčhucčhalaj niiqui, jalla nižta iratapan kama. Jalla nuž zuma kamtiquiztan Yoozqui ančhucatan chicapachaž cjequičha. Nekztan ančhucqui walikaz cjequičha.

PABLUZQUIN PAAZNACA APAYZQUITA

¹⁰ Jaziqui ančhucqui wilita wejtquiz cjuñzinčhucča. Jalla nižtiquiztan anča cuntintučha wejrqui, Jesucristo Jiliriž cjen. Jazic wejrqui anal cjis pecučha, wejr tjazikalak, cjanacaqui. Antiz ančhucqui yanapz peccanami, ana jaknužumi wejtquiz yanapi atchinčhucča.

¹¹ Wejrqui anal cjiwča, "Ancha t'akjiri želuča", cjanacaqui. Wejrqui apredichinča, cuntintupankaz žejljzjapa, čhjulu wejtquiz watanami.

¹² Zelinchiz kamcanami, ana želinchiz kamcanami cuntintu želi zizzinča. Chjulu watanami, čhjerchiz cjicanami ana čhjerchiz cjicanami, walipankaz želi aprendichinča. T'akjirižtakaz žejlcanami, ana t'akjiri žejlcanami walipankaz želi aprendichinča.

¹³ Chjulu watanami, Jesucristuqui wejtquiz azi tjaañipanča, awantizjapa. Cristuž aztan čhjulumi paachucača.

¹⁴ Jalla nuž cjenami, ančhucqui walipankaz paachinčhucča, wejtquiz yanapcan, weriž sufrican žejlchiž cjen.

¹⁵ Tuquiqui weriž liwriiñi taku paljayi kalltitan, nižaza Macedonia yokquiztan ulantan, ančhucqui wejtquiz ofrendanacžtan yanapžquichinčhucča. Ančuca iclizquiztanz tankaz wejtquiz yanapchinčhucča. Wejrqui ančucaquiz zuma Yooz taku paljaychinča, nižaza ančhucqui wejtquiz cusasanaca tjaacan yanapchinčhucča. Jalla tjapa nii zizza ančhucqui.

¹⁶ Nižaza Tesalónica wajtquiz sufrican želan, ančhucqui ofrendanaca wejtquin apayžquichinčhucča, wilita wilita.

¹⁷ Wejrqui ančuca ofrendanacquiz anal kuz tjaa-uča. Ančuca ofrendanacakaz anal pecučha. Pero wejr pecučha, ančhuc arajpachquin juc'ant honorchiz cjisjapa, ančucaž ofrendanaca tjaatiquiztan. Jalla niil pecučha.

¹⁸ Ančucaž yanaptiquiztan juc'anti wejtquiz žejlča, ana iyal necesituča. Epafrodito jilaqui ančucaž apayžquita ofrendanaca wejtquiz intirjichiča. Jalla nižtiquiztan wejtta jilacamača. Jalla nii apayžquita ofrendanacaqui Yoozquiz tsjii zuma ulurchiz inzinužtakaztača. Nižaza Yooz yujcquiziqui ančuca ofrendanacaqui tsjii zuma wilanažtakazza. Yoozqui nižtiquiztan cuntintučha.

¹⁹ Chjulorat ančhucqui čhjulunacquiztanami upsi cječhaja, jalla nii oraqui wejt Yoozqui ančucaquiz juc'anti yanapt'aquičha. Jesucristuž cjen Yoozqui ančucaquiz yanapt'aquičha, tjapa nižquiz zuma walinaca žejltiquiztanjama.

²⁰ Učhum Yooz Ejpžquiz wiñaya wiñaya honora tjaataj cjila. Jalla nužoj cjila.

²¹ Tsjii cjesača. Tjapa Jesucristužquin criichi jilanacžquin tsaanžinalla. Nižaza tii wejtta chica criichi jilanacaqui ančucaquin tsaanžquičha.

²² Tjapa tekžta criichi žoñinacaqui ančucaquiz tsaanžquičha. Juc'anti ančucaquiz tsaanžquičha tii Roman chawc jilirž kjuchiz criichi žoñinacaqui.

²³ Učhum Jesucristo Jiliriqui ančuca kuzquiz zumapaj yanapt'ila. Amén.

LA CARTA DEL APOSTOL SAN PABLO A LOS COLOSENSES

¹ Wejrqui Pablutcha, anchucaquin cjiřzcuča. Wejrqui Jesucristuž illzta apostultcha, Yooz pectiquiztan. Wejttan Timoteužtan tii carta cjiřzcan anchucaquin tsaanžcuča.

² Ančhucqui Colosas wajtchiz žoñinacchucča, nižaza lijitum Yooz parti žoñinacchucča. Ančhucqui lijitum Jesucristužquin kuzzizchucča. Jaziqui wejtnac mazinacchucča. Učhum Yooz Ejp anchucaquin yanapt'ila, nižaza zuma cuntintu kuzziz cjiskatla.

PABLUZ MAYIZITAQUI

³ Wejrnacqui čhjulatorat Yoozquin parlučhaja, učhum Jesucristo Jilirž Yooz Ejpžquin sparaquiča cjiñpanča ančuca zuma kamchiž cjen.

⁴ Ančhucqui Jesucristužquin kuz tjaayiñchucquiča, nižaza parti jilanacžtan zuma munaziñchucquiča. Jalla nuž zizcu, Yoozquin ancha sparaquiž cjichinča.

⁵ Jalla nuž zuma kamcan, ančhucqui tjewžquiča, čhjulut Yoozqui arajpachquin ančhucaltajapa zuma panž tjaczaja, jalla nii. Ančhucqui nii Yooz tjacžta kamz puntu zizzinčhucča, werar liwriiñi Yooz taku nonžcu.

⁶ Nii liwriiñi takuqui anchucaquiz paljaytatača, nižaza tjapa kjutñi žoñinacžquiz paljaytatača. Jalla nii taku paljaytiquiztan, tjapa kjutñi žoñinacaqui Yooz zuma kamañchiz cjissiča. Nižaza tjapa kjutñi tsjan tsjan žoñinacaqui liwriiñi tawkquiz kuzzizza. Nižaza tsjan tsjan ančuca wajtchiz žoñinacaqui liwriiñi tawkquiz zakaz kuzzizza. Zuma Yooz taku nonztiquiztanpacha tii orcama tsjan tsjan ančhucqui Yoozquin kuzzizchucča. Nižaza Yooz taku nonžcu zumpacha zizñi cjissinčhucča, Yoozqui žoñinaca ancha okžñiča, jalla nii.

⁷ Jalla nuž Epafra jilaqui anchucaquin tjaajinchizakazza. Jalla niiqui učhumž pecta jilača, nižaza niiqui wejttan chica Jesucristo Jiliržtajapa langziča. Nižaza Epafra jilaqui Jesucristužquin sirwiñiča.

⁸ Epafra jilaqui ančuca puntu wejtnacaquiz quint'ichiča, jaknužt ančhucqui parti criichinacžtan zuma munazichinčhucžlaja, jalla nii.

⁹ Jalla nuž ančhuc zuma kamtiquiztan wejrnacqui ančhucaltajapa Yoozquin mayiziñpanča. Ančuca puntu nonžcu, Yoozquin mayiziñpanča, tsjan zuma kamajo. Nižaza mayiziñpanča, Yoozqui ančhuc zumpacha zizkatajo, jaknužt niiqui ančhuc zuma kamz munčhaja, jalla nii. Nižaza mayiziñpanča, ančhucqui Yooz kuz zizñi cjisjapa, nižaza Yooz kuz intintazñi cjisjapa.

¹⁰ Jalla nuž zizñi nižaza intintazñi cjequiž niiqui, ančhucqui zuma kamaquiča, jaknužt Jesucristo Jilirž partir žoñinacaqui kamstanžlaja, jalla nii. Jalla nuž ančucaž zuma kamtiquiztan, Yoozqui cuntintuž cjequiča. Nižaza jalla nuž zuma kamcan, ančhucqui tjapaman walinacaž paaquiča. Nižaza Yooz puntu juc'ant zuma zizaquiča.

¹¹ Jalla nuž ančhucqui zuma kamcan, Yooz aztan kamaquiča, jaknužt Yoozqui zuma tjapa aztančhalaja, jalla nižta aztan. Yooz aztan kamcan, ančhucqui čhjulquiztanami pasinsis kuzziz Yoozquin tjurt'aquiča, nižaza sufricanami cuntintu kuzziz cjequiča.

¹² Nižaza zuma kamcan, ančhucqui Yoozquin sparaquižpanž cjequiča. Yoozqui ančhuc tjacziča, arajpachquin irinsa tanzjapa. Yoozqui tjapa criichinacžquin tsjii zuma irinsa tjaaquiča. Nii zuma irinsa ančucaquiz zakaz tjaata cjequiča. Jaziqui Yoozquin ancha sparaquiž cjis waquiziča.

¹³ Yoozqui uĉum liwriichiĉha, jalla niĉtiquiztan uĉumqui ana wal Satanás mantuquiz ana iya zejlĉha. Yoozqui uĉum niĉz pecta Majĉ Jesucristuĉ mantuquiz utĉiĉha.

¹⁴ Jesucristuĉ ticztiquiztan uĉumqui Satanás mantuquiztan liwriitaĉha. Niĉza Jesucristuĉ ticztiquiztan uĉum ujnaca pertuntaĉha.

JESUCRISTUZ PUNTUQUIZTAN

¹⁵ Tii muntuquiz kamcan Yooz Majĉqui ana cherta Yooz Ejpĉ kuz kjanacama pakatchiĉha. Yooz Majĉqui tjappachquiztan tsjan jiliriĉha.

¹⁶ Niĉz cjen tjappacha zejlĉha, tjapa arajpachquin zejlĉinacami, tjapa yokquiz zejlĉinacami, tjapa chertanacami, ana chertanacami, tjapa mantiĉinacami, gobier-nunacami, jilirinacami, tjapa anjilanacami, tjapa zajranacami, Jesucristo Yooz Majĉ cjen, tjappacha zejlĉha. Niĉza niĉztajapa tjappacha paataĉha, niĉzquiz honora waytizjapa.

¹⁷ Jesucristuqui zejlĉiĉha, primerquiztanpacha, niĉza tjapa zejlĉinacĉ tuquitanpacha. Niĉz cjen tjappacha zejlĉha.

¹⁸ Niĉza Jesucristuqui Yooz partir zoĉinaca mantiĉha. Jaknuĉt persun zoĉz kuz persun curpu mantiĉhaja, jalla niĉta irata Jesucristuqui niĉz icliz zoĉinaca mantiĉha. Niĉz cjen niĉz icliz zoĉinacaqui Yooz kamaĉchiz cjisiĉha. Niĉha primera ticĉcuqui jacatatchiqui, tjappachquiztan tsjan jiliri uchta cjisjapa.

¹⁹ Yooz Ejpĉtan Yooz Majĉtan tsjii kamaĉchizpanĉha.

²⁰ Niĉza Jesucristuĉ ticziĉ cjen, tjappacha pertunta cjesaĉha, yokquiz zejlĉinacami, ana yokquiz zejlĉinacami. Jalla nuĉ Yooz Ejpqui munchiĉha. Jesucristuĉ cruzquiz ch'awcta ticziĉ cjen, Yooz Ejpĉtan parti zejlĉinacĉtan zumanskattaĉ cjesaĉha. Jalla nuĉ munchiĉha Yooz Ejpqui.

²¹ Tuquiqui anĉhucqui Yoozquiztan yekjataĉha, niĉza Yooz quinrataĉha anĉhuca kuzquiz. Tuqui anĉhucqui ana wali pinsiĉnĉhuctaĉha, niĉza Yooz quintra ana wali paayiĉnĉhuctaĉha. Jalla nuĉ ana wali kamta cjenami Yoozqui anĉhuc pertunchiĉha, niĉztan anĉhucatan wali cjisjapa.

²² Jesucristuĉ cjen Yooz Ejpqui anĉhuc pertunchiĉha. Jesucristuqui anĉhuc irata curpuchiz cjican, anĉhuca laycu ticziĉha. Anĉhuc laycu ticziĉha, Yooz yujcquiz anĉhuc ana ujchiz Yooz irata zuma kamaĉchiz prisintiskatzjapa. Jalla nuĉ Yooz yujcquiz zuma cjican anaĉ jecmi anĉhucaquiz tsjii uj tjojtunz atasaĉha.

²³ Jalla nuĉ Yooztan anĉhucatan wali cjisjapa, ultimu chekpacha Jesucristuĉquiz kuzzizpanĉha. Niĉza anĉhucqui Jesucristuĉquiz tjurt'iĉni kuzziz cjistanĉha, ana wira jaytistanĉha. Tii muntuquiz liwriiĉni tawk jaru kamĉi cjistanĉha, arajpach zuma kamaĉna tjewĉcan. Nii liwriiĉni taku nonzinĉhucĉha. Niĉza nii liwriiĉni takuqui tjapa kjutĉni tii muntuquiz paljaytataĉha. Nii taku paljayzjapa, wejr Pabluqui apótol oficiuquiz uchtaĉha.

PABLUQUI APOSTOL KAMAĉCHIZZA

²⁴ Wejt Yooz tjaata oficio cumplan, anĉhucaltajapa sufruĉha. Jalla nuĉ sufrican wejrqui cuntintutĉha. Anĉhuc zuma kamaĉchiz cjisjapa yanapĉiz cjen, wejrqui cuntintutĉha. Niĉzami iya sufristanĉha. Jalla nuĉ wejt curpuĉtan sufrican, Cristuĉ partir zoĉinacaltajapa wejt sufrisnaca cumpliĉzinuĉha. Cristuĉquiz kuzziz cjen niĉza sufruĉha. Cristuĉ partir zoĉinacaqui Cristuĉ icliz zoĉinacaĉha.

²⁵ Wejrqui Cristuĉ partir zoĉinacĉquin sirwizjapa, apótol oficiuquiz uchtaĉha. Yoozqui anĉhucaltajapa nii oficiuquiz wejr utĉiĉha. Wejrqui uchtaĉha Yooz taku zumpacha zizkatzjapa,

²⁶ niĉza Yooz pinsita zizkatzjapa. Jalla nii Yooz pinsitaqui tuquitanpacha chjoj-tataĉha. Jalla niĉtiquiztan tjapa zoĉinacaqui ana zizzucataĉha. Jazikaz Yoozqui niĉz pinsita zizkatchiĉha niĉz partir zoĉinacĉquiz.

²⁷ Yoozqui niiz partir zoñinacžquiz niiz tuquita chjojta pinsitaqui zizkatz munchičha. Nii pinsitaqui ancha zumača ana judío zoñinacžtajapaqui. Jalla tiicha nii tuquita chjojta pinsitaqui: Jesucristuqui ančuca kuzquiz žejlča. Jalla nižtiquiztan ančucqui Cristužtan arajpachquin ancha zuma kamaquiča. Jalla nii zuma kamaña tjewža ančucqui.

²⁸ Jesucristuž puntu paljayučha, tjapa zoñinacžquin chiižincan, nižaza tjaajincan. Jalla nuž chiyan, Yoozqui wejr yanapča zizni zizni chiyajo, tjapa Jesucristužquin kuzziz zoñinaca Yooz irata zuma kamañchiz cjeajo.

²⁹ Nižaza apóstol oficiuquiz ojklaycan, ancha langznuča, tjapa Cristuž tjaata aztan langznuča, tjapa jilanaca Yooz irata zuma kamañchiz cjiskatzjapa.

2

¹ Jalla nuž ančucaquin maznuča, weriž ančucaltajapa langžta zizkatzjapa. Tjapa kuztan langznuča, ančucaltajapami, nižaza Laodicea cjita wajtchiz zoñinacžtajapami, nižaza tjapa ana wejr cherchi criichinacžtajapami.

² Jalla nuž tjapa aztan langznuča, Yoozquin criichi zoñinacž kuzquiz zumpacha p'ekinchayta cjisjapa, nižaza tsjii kuzziz cjisjapa, nižaza porapat zuma munaziñi kuzziz cjisjapa. Nižaza langznuča, Yooz chjojta pinsita puntu zumpacha intintizkatzjapa. Jalla nuž zumpacha intintazcu, ančucqui tjurt'iñi kuzziz cjequiča. Jalla nii tuquitan chjojta Yooz pinsitaqui Cristuž puntuča. Wejrqui Cristuž puntu paljaycan langznuča.

³ Cristupankaz Yooz puntu lijituma zizni cjiskatasacha, nižaza tjapa Yooz puntu intintazni cjiskatasacha.

⁴ Jalla niil ančucaquiz cjiwča, ana jakziltami ančucaquiz incallzjapa, tsjii zuma takužtakaz chiican.

⁵ Ančucatan ana žejlcanami, wejt persun kuzquiz ančucaquiztan anchal cjuñznuča. Wejrqui ančuca puntu naychinča, tsjii kuzziz kamča, nižaza Jesucristužquin criižcu tjurt'ichi kuzzizčucča. Jalla nižta nayžcu wejrqui chipznuča.

⁶ Tuquiqui ančucqui Jesucristuž puntu tjaajintan tjapa kuztan catokchinčucča. Nuž catokžcu Jesucristuž mantuquiz cjissinčucča, niiqui ančuca jiliri cjisjapa. Jalla nuž Jesucristuž mantuquiz tirapan kama. Nižaza nižquin tsjii kuzziz cjee.

⁷ Nekztan niiz puntu tsjan tsjan zizni cjequiča, nižaza nižquin tjurt'ichi kuzziz kamaquiča. Jalla nuž ančucqui tjaajintatača. Nižaza čhjulu watanami ančucqui Yoozquin sparaqizpanž cjis waquiziča.

CRISTUZ CJEN EW KAMAÑA ZEJLCHA

⁸ Ančucqui cwitazaquiča, tsjii kjutni ana chjichta cjisjapa. Yekjapanacaqui ančuc incallskatz pecča, zuma razunanacžtakaz chiican, nižaza toscar takunacžtan chiican. Jalla nižta tawkchiz zoñinacaqui Cristuž pinsita jaru anaž chiiča. Pero zoñiž pinsita jarukaz chiiča. Nižaza zajranacž pinsitanac jarukaz chiiča. Jaziqui nižta chiiñi zoñinacžquiztan cwitazaquiča.

⁹ Cristuqui tii muntuquiz kamcan zoñž curpuchiztača. Nižta curpuchiz cjenami, Cristuqui Yoozpankazza, nižaza Yooz kamañchizpankazza.

¹⁰ Cristužtan tsjii kuzziz cjican ančucqui Yooz kamañchizpan žejlča. Nižaza Cristučha wali pajk jiliri qui tjapa mantiñinacžquiztanami, tjapa poderchiznacžquiztanami.

¹¹ Cristužtan tsjii kuzziz cjican, ančucqui kuzquiz chimpata cjissinčucča. Zoñiqui ana ančuc chimpuchiča. Pero Jesucristuqui ančuca kuz chimpuchiča. Nii kuzquiz chimpataqui tuž cjiča: Yooz partir zoñinacača, jalla nii. Cristuqui niiz partir zoñinaca uj paaz pecni kuzquiztan jaytiskatchiča.

¹² Jesucristužquin kuz tjaatiquiztan bautista cjissinčhucča. Bautistaqui tuž cjiča: Jaknužt Cristuž curpu tjatžtažlaja, jalla nižta irata ančhuca tuquita ana wal kamaña tjatžtakazza. Nižaza jaknužt Jesucristuqui jacatatzcu Yooz kamaña tanžtchaja, jalla nižta irata zakaz ančhucqui Jesucristužquin kuzziz cjen Yooz kamaña tanzinčhucča. Yoozqui ticzinaca jacatatskatzjapa azzizza. Jalla nii azziz Yoozquin crižcu, Yooz kamaña tanzinčhucča, Yooz kamañchiz kamzjapa.

¹³ Tuquiqui ančhucqui ana curpuquiz chimputatača, judío žoñinacz partira cjisjapa. Ana chimpuchiz cjican, nižaza ujnaca paacan, ticzi žoñinacažtakaztača ančhucqui. Jaziqui Cristužtan tsjii kuzziz cjen Yoozqui ančhucaquiz niž ew kamaña tjaachiča. Nižaza tjapa učhum ujnaca pertunchiča.

¹⁴ Uj paatiquiztan tsjii acta želatča učhum quintra. Jesucristuž učhum laycu ticziž cjen Yoozqui nii acta jurkatchiča, tjapa učhum quintra puntuquiztan. Anulta cjišičha, Jesucristuž cruzquiz ch'awceta ticziž cjen.

¹⁵ Cristuž cruzquiz ch'awceta ticztiquiztan, Yooz Ejpqui atipchiča tjapa anawal jilirinacami nižaza poderchiznacami. Yoozqui nii anawal azziz ispiritunaca ana azziz cjiskatchiča. Kjanapacha azkatchiča, prisu tanta žoñinacažtakaz. Yoozpanikazza tjappacha atipchiqui.

ARAJPACH KAMAÑCHIZ CJISPANCHA

¹⁶ Jalla nižtiquiztan anaž jecmi ančhucaquiz uj tjojtNASAča, tuquita mantitanaca jaru ana kamtiquiztan. Tuquitan Yoozqui puntu puntu mantichiča, lujlz puntu, licz puntu, pjijsta puntu, ew jiiz puntu, jeez tjuñi puntu, jalla nuž.

¹⁷ Tuquitan Yoozqui tjapa nii puntunaca mantichiča, Yooz kuz koloculla tjeezjapa. Pero Cristupankaz ultim werara Yooz kuz tjeeža.

¹⁸ Ančhucqui Jesucristužquin kuzziz cjen, anaž jeczquizimi ančhucaquiztan arajpach premio kjanakataquiča. Yekjap žoñinacaqui mit kuzziz cjenami, ana mit kuzziz tjeeža. Nižaza anjilanaczquiz rispitažo tjaajža. Nuž tjaajñi žoñinacaqui anchuc incallz pecča, čjuužta puntunaca ancha paljaycan. Ninacaqui inakaz mit kuzzizza. Ana wal pinsita jarukaz tjaajža. Nuž tjaajincan mit kuzziz cjišsa.

¹⁹ Ninacaqui Cristo Jiliržquiz ana tsjii kuzziz tjurt'ichi žejlča. Pero Cristupankazza criichinacz jiliriqui. Niiž cjen tjapa criichinacaqui tsjan tsjan zuma kamañchiz cjisnasača. Nižaza Cristuž cjen tjapa criichi žoñinacaqui tsjan tsjii kuzziz cjisnasača. Jaknužt žoñž curpuqui, yekja yekja cjenami, tsjii curpuchizkazza, jalla nižta irata criichi žoñinacaqui, yekja yekja cjenami, tsjii kuzzizkazza.

²⁰ Ančhucqui Jesucristužquin kuzziz cjen, ujchiz žoñinacz pinsitanacquiztan t'akzinčhucča. Nii ana wal pinsitanacquiz ojklayz cjenpacha, ticzi žoñinacažtakaz katzinčhucča. Jalla nižtiquiztan, ¿kjažtiquiztan ančhucqui ujchiz žoñinacz pinsita jaru wлта kamjo? ¿Nižaza ninacz lii jaru ojklayjo?

²¹ Ninacz liiqui tuž cjiča: Tiinaca ana kjaržtan tanžla, nižaza tiinaca ana lujl-la, nižaza tinaca ana čjul lanžla. Jalla nuž cjiča ninacz liiqui.

²² Nii liinacaqui tii muntuquiz žejlñi cusas puntukazza. Nii cusasanacaqui tucuzinzaquiča. Nii liinacaqui žoñiž pinsita mantita jarukazza.

²³ Ninacz liinacaqui zizñi pinsitažtakazza. Pero ultimquiziqui inakazza. Ana azzizza, žoñinaca zuma kamñi yanapajo. Cuzturumpinaca ijzijcan mantiča, nižaza humilde kuzziztakaz mantiča, nižaza persun curpu sufriskatzjapa mantiča. Jalla nuž mantita liinacaqui zizñi pinsitažtakazza. Pero ultimquiziqui inakazza. Uj paaz pecñi kuz tjonanaqui anaž nižta kuz ewjazi atasacha nii liinacaqui. Jaziqui ančhucqui ninacz inakaz tjaajintaqui anaž nonznaquiča.

3

¹ Ančhucqui Yooz kamañchizza. Jaknužt Jesucristuqui jacatatžcuqui Yooz kamaña wilita tanzizlaja, jalla nižta irata ančhucqui Yooz kamaña tanzinčhucča. Jalla nižtiquiztan ančhucqui arajpach Yooz kamañquizkaz kuz tjaa. Jalla nicju arajpachquin Cristo žejlča; Yooz Ejpž žew latuquiz julzi žejlča, mantican.

² Ujchiz žoñž kamañquiz ana kuz tjaa. Arajpach kamañquizkaz kuz tjaa.

³ Ančhucqui Jesucristužquin kuz tjaachiž cjen, ančuca tuquita ana wal kamaña ecchinčhucča. Jaziqui ančuca Yooz kamañaqui Yooztajapa žejlča. Ana criichi žoñinacžtajapa ančuca Yooz kamañaqui chjojžtažtakaz žejlča. Ana wira intintazzucača.

⁴ Cristuqui ančucaquiz Yooz kamaña tjaachiča. Jalla nižtiquiztan čhjulatorat tjapa žoñinacaqui Jesucristužquiz pajchi cječhaja, jalla nii ora zakaz ninacaqui ančuca Yooz kamaña pajchi cjequiča. Jalla nii oraqui ančhucatan Jesucristužtan honorchiz cjequiča.

TUQUITA KAMAÑ PUNTU, JAZTA KAMAÑ PUNTU

⁵ Jalla nižtiquiztan ančuca tuquita ana wal kamaña liwj jayta. Anaž adulteriuquiz ojklayzqui. Anača luctak žoñiqui yekja maatak žonatan ojklayzqui. Anača ančuca ana wal paaz pecni kuz jaru ojklayzqui. Anača čhjul ana walimi peczqui. Anača yekja žoñž čhjultakimi zmazqui. Jalla nuž zmaznaquiž niiqui, žoñž paata yoozquiz rispitažokazza. Jalla nii anawali paaznacquiztan liwj jayta.

⁶ Nii ana wali paañi žoñinacžquiz Yoozqui ancha casticu tjaaquiča, Yooz kuzcama ana kamtiquiztan.

⁷ Ančhucqui tuquita ana wal kamañquiz ojklaycan, nižtanacaž paa-atča.

⁸ Jaziqui ančhucqui nii ana wal paaznaca liwj eca. Anača žawjchi kuzziz žejlzqui. Anača culirazzi kuzziz žejlzqui. Anača ana wal paaz pecni kuzziz žejlzqui. Anača žoñž quintra ana wali taku chiizqui. Anača ana wal tawkžtan chii chiican žejlzqui.

⁹ Anača toscar taku chiizqui. Ančhucqui tuquita ana wal kamaña ecchinčhucča. Jalla nižtiquiztan ančhucqui nii ana wal paaznacquiz ana iya ojklayz waquiziča.

¹⁰ Ančhucqui Yooz kamañchiz cjissinčhucča. Yoozpacha ančucaquiz Yooz kamaña tjaachiča. Nižaza ančhucqui Yooz irata zuma kamañchiz tsjan tsjan cjissa, Yooz zumpacha pajañcama.

¹¹ Yooz kamañchiz cjican, tjapa criichi žoñinacaqui Yooz yujcquiziqui tsjiikazza. Tuquita kamañnacaqui anaž walča. Pero Cristo kamañchiz kaz walča. Tsjii griego walja zizni kamañami anaž walča. Tsjii judío lii jaru kamañami anaž walča. Tsjii curpuquiz chimputa žoñž kamañami anaž walča. Tsjii curpuquiz ana chimputa žoñž kamañami anaž walča. Tsjii k'ar žoñž kamañami anaž walča. Tsjii q'uit žoñž kamañami anaž walča. Tsjii piyunažta žoñž kamañami anaž walča. Tsjii patrun žoñž kamañami anaž walča. Cristuž kamañapankaz walča. Nižaza Cristupankaz tjapa criichi žoñinacž kuzquiz žejlča.

¹² Ančhucqui Yooz illzta žoñinacčhucča. Jalla nižtiquiztan Yooz zuma kamañ jaru kamstanča. Yoozqui ančhucatan zuma munaziča. Yooz partir žoñinaca cjican, jalla tuž kama: Okzni kuzziz, nižaza zuma kuzziz, nižaza ana mit kuzziz, nižaza humilde kuzziz, nižaza pasinziz kuzziz, nižaza

¹³ porapat pertunasni kuzziz. Jalla nižta kamz waquiziča. Tsjii criichi žoñiqui yekja criichi žoñž quintra quijchi cjesaž niiqui, zuma kuztan pertunz waquiziča, jaknužt Jesucristuqui ančucaquiz pertuntčhaja, jalla nuž.

¹⁴ Jalla tužučha chekanaqui, porapat zuma munazizza, jalla nii. Jalla nuž zuma munazican, zuma kuzziz zuma kamañčiča, Yooz irata zuma kamaña cumplañcama.

¹⁵ Ančhuc criichinacaqui, Cristuž cjen ančhucqui llan kuzziz cjesača. Jaziqui llan kuzziz cjee, porapat zuma munazican zuma kamzjapa. Jalla nuž porapat zuma kamzjapa, Yoozqui ančhuc liwriichiča. Jalla nuž liwriižcu, Yoozqui tjapa ančhuc criichinaca tsjii t'akquizkaz cjiskatchiča. Tsjii curpuchiztakazza ančhucqui. Jalla nižtiquiztan ančhucqui Yoozquin ancha sparaquiz cjican, mayiziz waquiziča.

¹⁶ Ančhucqui Cristuž puntu zuma zizcan porapat tjaajsarasaquiča, nižaza Cristuž tawkžtan porapat p'ekinchayrasaquiča. Nižaza ančuca kuzquiz Cristuž taku zumpacha catokz waquiziča. Nižaza Yooz takumi, Yooz wirsumi itsnaquiča, ančuca kuzquiz Yooz ancha cjuñcan.

¹⁷ Ančhucqui Cristuž partir žoñinacčhucča. Jalla nižtiquiztan čhjulu paacanami chiicanami, zuma kamañchiz kamz waquiziča. Nižaza čhjulu watanami Jesucristuž cjen Yooz Ejpžquin sparaquiz cjican tjaaz waquiziča.

PORAPAT ZUMA KAMZ PUNTU

¹⁸ Maatakanaca, persun luctakanacž mantuquiz cjee. Jesucristo Jiliržquin kuzziz cjican, jalla nuž waquiziča.

¹⁹ Luctakanaca, persun maatakanacžtan zuma munaziñi cjee. Nižaza anaž persun maatakanaca chjaawj chjaawjwa.

²⁰ Maatinaca, persun maa ejpžquiz casa, čhjulu mantanami. Jalla nuž maa ejpž mantita casaquiz niiqui, amiž cjen Jesucristo Jiliriqui cuntintuž cjequiča.

²¹ Ejpnaca, anaž persun maatinaca žawjwa zjijcna, upa kuzñi ana cjisjapa.

²² Piyunanaca, am persun patruna čhjulu mantanami caspanča. Anača cherankaz c'unchikaz tuczqui. Pero tjapa kuztan nižtajapa langz waquiziča. Yooz patruna cjuñžcu, zuma langz waquiziča. Anača langzqui ančuca patrunch kuz wali cjiskatzjapakaz.

²³ Čhjulu langzcanami tjapa kuztan langznaquiča, Yooz Patrunchtajapa langznaquiča, ana žoñžtajapakaz langznasača.

²⁴ Ančhucqui tuž zizza, Yooz Patrunchquiztan arajpach irinsa tanznaquiča. Ultimu Yooz Patrunaqui ančucaquiz pacaquiča. Nižaza ultimu ančhucqui Jesucristo Patrunchquiz sirwiča.

²⁵ Nižaza jakziltat ana wali paačhaja, jalla niiqui castictaž cjequiča niž ana wali paatiquiztan jama. Yoozqui ana žoñi illillza.

4

¹ Patrunanaca, ančhucqui persun piyunanacžtan zuma lijituma cjistanča. Ančhucqui tuž zizza, ančhuc zakazza Patrunchizqui. Jalla niiča arajpach Yoozqui.

² Tjapa criichinaca, ančhucqui mayizicanpan želaquiča. Nižaza Yoozquin mayizican ana tjazna, Yoozquin sparaquiz cjisjapa.

³ Wejtnacaquiz zakaz mayizican yanapalla, wilta Yooz takunaca paljayñi ojklajzjapa. Cristuž puntuquiztan tuquita chjojta taku paljayz pecuča. Jalla nuž paljaytiquiztan wejrqui carsilquiz želuča.

⁴ Mayizican wejtquiz yanapalla, Cristuž puntu kjanapacha paljayzjapa, jaknužt wejrqui kjana paljayz waquizučhaja, jalla nii.

⁵ Ančhucqui ana criichinacžtan kamcan, walja zizñi zizñi ojklayaquiča. Čhjulator Cristuž puntu paljaychucažlaj niiqui, panž paljayaquiča, ana criichinacžquiz nonzkatzjapa.

⁶ Jalla nuž Yooz taku paljaycan zuma tawkžtan chiyaquiča. Jaknužt yacuqui tsjii lak'a čhjerquiz zuma saborchiz paačhaja, jalla nii irata ančuca zuma takunacaqui Cristuž puntunaca zuma saborchiztakaz paaquiča. Jalla nuž zuma takunacžtan paljaycan, ančhucqui zapa maynižquiz jaknužt kjaaz waquizičhaja, jalla niiqui zizaquiča.

ZERZ TAKUNACA

⁷ Jilanaca, cullaquinaca, učum pecta Tíquico jilaqui tjapa wejt puntuquiztan ančucaquin quint'aquiča. Tiquicuqui wejtquiz ancha zuma yanapñipanča. Yoozquin tjurt'iñi kuzzizza. Nižaza wejttan chica Yooztajapa sirwichiča.

⁸ Wejt puntuquiztan quint'izjapa ančucaquin nii cuchanžcuča. Nižaza cuchanžcuča, ančuca kuzquiz zumpacha p'ekinchayzjapa.

⁹ Niižtan chica Onésimo pecta jila cuchanžcuča. Onésimo jilaqui Yoozquin tjurt'iñi kuzzizakazza. Nižaza ančuca wajtchiz žoñiča. Jalla nii pucultanaqui tjapa tekz watchinaca quint'aquiča.

¹⁰ Aristarco jilaqui wejttan chica carsilquiz chawcta maziča. Niiqui ančucaquin tsaanžquiča. Nižaza Marcos jilaqui ančucaquin tsaanžquiča. Marcos jilaqui Barnabež famillžquiztanča. Tuquiqui wejrqui Marcos puntu ančucaquiz chiichinča. Marcos jilaqui ančucaquin tjonaquiž niiqui, ančucqui zumaž risiwaquiča.

¹¹ Nižaza Jesusaqui ančucaquin tsaanžquiča. Jesusaqui Justo cjitazakazza. Ninacakazza judío criichinacquiztan wejttan chica Yooztajapa langzñinacaqui, Yooz mantita kamañ puntu paljaycan. Ninacaqui wejtquiz ancha kuzziča.

¹² Nižaza Epafra jilaqui ančucaquin tsaanžquiča. Epafra jilaqui Jesucristužtajapa sirwiñiča. Jalla niiqui zakaz ančucaquiztanča. Jalla niiqui tjapa kuztan ančucaltajapa Yoozquin mayiziñipanča, ančucqui tjurt'ichi kuzziz cjisjapa, nižaza tjapa kuztan Yooz munañpa kamañ jaru kamzjapa.

¹³ Wejrqui Epafra puntuquiztan ticlaruča, niiqui ancha langziča ančucaltajapami. Nižaza Laodicea wajtchiz criichinacžtajapami, nižaza Hierápolis wajtchiz criichinacžtajapami Epafra jilaqui ancha langziča.

¹⁴ Nižaza Lucas jilaqui Demas jilžtan ančucaquin tsaanžquiča. Lucas pecta jilaqui kullñi medicuča.

¹⁵ Laodicea wajtchiz criichi jilanacžquin tsaanžinalla. Nižaza Ninfas jilžquiz tsaanžinalla. Nižaza niiž kjuyquiz ajczñi criichinacžquiz tsaanžinalla.

¹⁶ Tjapa ančucqui tii carta ližcu, Laodicea iclizquin apayžcaquiča, nekz liyajo. Wejrqui tsjii carta cijrchinča Laodicea criichi jilanacžquin. Ančuczakaz nii carta liyaquiča.

¹⁷ Ančucqui Arquipo jilžquiz chiižinaquiča, tuž cjican: “Jesucristo JiliriQUI am tsjii puestuquiz utchiča, niižquiz sirwizjapa. Nii Jesucristuž tjaata puestuquiz žejlcan, zuma cumplistanča”.

¹⁸ Wejr Pabluqui persun kjaržtan tii tsaanta letra cijržcuča. Wejrqui carsilquiz želuča, jalla nii cjužzna. Yoozqui ančucaquiz zumaj yanapla. Jalla nužoj cjila. Amén.

PRIMERA CARTA DEL APOSTOL SAN PABLO A LOS TESALONICENSES

¹ Wejr Pabluqui, Silvanužtan, Timoteožtan, tii cartal cjiřzcuča ančhuc Tesalónica wajtchiz zoñinacžquin. Nii wajtquiz icliz zoñinacčhucča ančhucqui. Nižaza Yooz Ejpžtan Yooz Majchtan tsjii kuzzizčhucča. Jalla nižtiquiztan učhum Yooz Ejpžtan, nižaza učhum Jesucristo Jiliriztan ančhucaquiz yanapt'ila. Nižaza zuma cuntintu kuzziz walikaj kamkatla.

JESUCRISTUZQUIN ANCHA KUZIZ ZOÑINACA

² Wejrnacqui tjapa ančhucaž cjen tirapan Yoozquin sparaquiz cjiwča. Yoozquin mayizican ančhucaltajapa wiltan wiltan mayizuča.

³ Učhum Yooz Ejpžquin mayizican, cjuñznuča ančhucaž zuma Yooztajapa trabajtiquiztan. Ančhucqui Jesucristužquin kuzziz cjen Yooztajapa tjapa kuztan trabajča. Nižaza anchucqui zuma munaziñi kuzziz cjen, Yoozquin zuma sirwiča. Nižaza Jesucristo Jilirž tjonz tjuñi tjewzcan, zuma tjurt'iñi kuzzizčhucča. Jalla nuž ančhucaquin cjuñzcu Yooz Ejpžquin sparaquiz cjiwča.

⁴ Jilanaca, cullaquinaca, Yooziž pectanaca, Yoozqui ančhuc illziča. Jalla nuž zizcu, wejrnacqui Yoozquin sparaquiz cjiwča.

⁵ Wejrnacqui ančhucaquin tjonžcu, liwriñi Yooz taku paljaychinča. Anača zoñž taku alajakaz paljaytaqui; Yooz takupanča paljaytaqui. Yooz Espiritu Santuž aztan paljaychinča. Nižaza werar Yooz tawkquiz tjapa kuz tjurt'ican, Yooz puntu paljaychinča. Nižaza ančhucatan kamcan jaknužt wejrnacqui kamchinžlaja, jalla nii zuma zizza ančhucqui.

⁶ Ančhuczi wejrnaca kamaña irata jalla nižta kamñi zoñi cjissinčhucča. Nižaza Jesucristo Jilirž kamañ irata kamñi zoñi cjissinčhucča. Nižaza ančhucqui wejrnacaž paljayta Yooz taku catoktiquiztan, ancha sufrichinčhucča. Walja sufris cjenami, Espiritu Santuqui ančhucaquiz cuntintu cjiskatchiča. Nižaza sufrisqui ančhucaquiz wejtnacaquiz iratazakaz watchiča.

⁷ Jalla nižtiquiztan ančhuca puntuquiztan zuma quintu ulanchiča tjapa criichi zoñinacžquin, Macedonia yokquin žejlñi criichi zoñinacžquinami nižaza Acaya yokquin žejlñi criichi zoñinacžquinami.

⁸ Ančhucaž cjen Yooz takuqui tjapa kjutñi paljaytača. Anača Macedonia yokquizkaz nižaza Acaya yokquizkaz paljaytaqui. Tjapa kjutñi paljaytača. Nižaza jaknužt ančhucqui Yoozquin kuzziz cjissinčhucžlaja, jalla nii quintu tjapa zoñinacaqui zizza. Jaziqui wejrnacqui ančhuc puntuquiztan anaž iya quint'asača.

⁹ Ninacapacha wejtnacaquiz quint'iñitača jaknužt ančhucqui wejtnacaž paljayta Yooz taku catokchinčhucžažlaja, jalla nii. Ančhucqui zoñiž paata yooznacquiztan zarakchinčhucča, werar žejtñi Yooz sirwizjapa.

¹⁰ Nižaza ančhucqui Yooz Majch arajpachquiztan tjonz tjuñi tjewža. Yoozqui niž Majch ticziquiztan jacatatskatchiča. Jalla nii Jesusaqui učhum casticunacquiztan liwriichiča. Jalla nuž quint'iñitača ančhuca puntuquiztan.

2

PABLUZ YOOZ TAKU PALJAYÑI OJKTA

¹ Jilanaca, cullaquinaca, jalla tuž zizza. Wejrnacqui ana ina ančhucaquiz tjonzinča.

² Ima ančhucaquiz tjoncan Filipos wajtquiz sufrichinča, nižaza wejrqui iñartatača. Jalla nuž sufritaž cjenami Yoozqui wejrnaca yanapchiča, ana ekscan tjurt'iñi kuzziz

Yooz zuma liwriiñi taku paljayajo. Jalla nuž paljaychinča, žoñinacaž wejtnacatan quintra ancha aptazanami.

³ Nižaza wejtnaca paljaytaqui anatača chekachuc, nižaza anatača ana zuma kuzquiztan, nižaza anatača ančhuc incallzjapa.

⁴ Yooz Ejpqui wejrnaca tantiichiča, walikazza. Jalla nižtiquiztan Yoozqui wejtnacaquiz niž zuma taku cumpjiichiča. Jalla nii Yooz takupan paljayuča wejrnacqui. Anal paljayuča žoñinacž kuz wali cjeajo kasi. Antiz Yooz kuz wali cjeajo paljayuča. Yoozqui učumnaca kuz zizza, nižaza tantiicha ultimu.

⁵ Ančhucqui tuž zizza, wejrnacqui anača zuma takunaca paljaychinča wejtnaca partiquiz luzkatzjapa, nižaza persunalta čhjulumi tanzjapa. Weraral chiyuča. Yooz-zakaz wejtnaca puntuquiztanaqui nii zizza.

⁶ Cristuqui wejrnac apostolunaca cuchanžquichiča. Jalla nižtiquiztan wejrnacqui ančhucaquiz mantiñi cjitasača. Pero ančhuc ana mantichinča, nižaza wejtnaca honora wayt'iziñi anal pecasuča, ančhucmi yekjanacami.

⁷ Antiz wejrnacqui ančhuc zuma cwitican žejlchinča, jaknužt tsjaa maatak žonqui persun wawa cwitassaja, jalla nuž.

⁸ Nižaza ančhuc ancha k'ayachtuča. Jalla nižtiquiztan ančhucaquiz Yooz zuma liwriiñi taku paljaychinča. Nižaza ančhucaltajapa čhjululu paazmi listuča wejrnacqui, ticz cjenami. Jalla nuž ančhuc pecñi cjiñiča.

⁹ Jilanaca, cullaquinaca, weriž langžta cjuñzna. Majiñami weenami langzinča ochañcama, wejtnaca persun wira mantinsjapa, nižaza ančhucalta ana ch'ama cjeajo. Jalla nuž kamchinča liwriiñi Yooz taku paljaycan.

¹⁰ Nižaza ančhucatan zuma kamchinča. Yooz kuzcama kamchinča. Nižaza anaž jecmi wejtnaca quintra čhjul ujmi tjeezñi atasacha. Jalla nii ančhucqui zumpacha zizza. Yooz zakaz nii zizza.

¹¹ Ančhucmi zakaz zizza, jaknužt tsjii ejpqui niž persun maati cwitassaja, jalla nižtapacha wejrnacqui ančhuc cwitassinča. Ančhuc kuzzinča, nižaza p'ekinchaychinča, nižaza chiižinčinča, ančhuc zuma kamajo.

¹² Jaknužt Yoozquin criichi žoñinacaqui zuma kamz waquizičhaja, jalla nuž ančhucqui zuma kamz waquiziča. Yoozqui nižquin criichinaca utchiča nižtan chica mantizjapa, nižaza nižtan chica honorchiz cjisjapa. Jalla nižtiquiztan zuma kamz waquiziča.

¹³ Ančhucqui weriž paljayta Yooz taku nonzinčhucča, nižaza catokchinčhucča, tuž cjan: “Tii takuča ultim werar Yooz takuqui. Anača žoñž takukaz”. Jalla nuž catoktiquiztan tii zuma Yooz takuqui ančhuca kuznaca tsjan tsjan zuma cjiskatča. Jalla nižtiquiztan tirapan Yoozquin sparaquiž cjiwča.

¹⁴ Jilanaca, culluquinaca, ančhucqui walja sufriñchucča ančhuca persun wajtchiz žoñinacaž ana wali paañiž cjen. Jalla nižta irata sufrichiča Judea yokquiz žejlñi criichinacami. Werar Yooz icliz žoñinacaž cjen nižta sufrichiča. Nižaza persun wajtchiz žoñinacaž ana wali paañiž cjen, sufrichiča. Tsjiikaz ančhucaquizimi ninacžquizimi watchiča.

¹⁵ Nii Judea yokquiz žejlñi judionacaqui Jesús Jiliri conchiča. Nižaza niž tuqui Yooz taku paljayñi žoñinaca conchiča. Nižaza wejrnacqui chjatkatchiča. Nižaza jalla nuž paažcu tjapa žoñinacž quintraž paača. Jalla nuž paatiquiztan Yoozqui ninacž quintra žawjča.

¹⁶ Wejrnacqui liwriiñi Yooz taku paljayz pecatuča ana judío žoñinacžquiz, ninaca liwriita cjeajo. Nii anawali paañi žoñinacazti wejrnac atajchiča. Jalla nižtiquiztan ninacaqui juc'anti persun ujž yapkatča. Jalla nuž ujnaca yapkattiquiztan Yoozqui wiñayaž wali casticu tjonkataquiča ninacžquiz.

¹⁷ Jilanaca, cullaquinaca, tsjii kjažtapacha ančhucaquiztan ojkchinča. Jalla nekztan wejrnacqui ančhuc anchal cjuñznuča. Jalla nižtiquiztan ančhuc ancha cherpzal pecaytuča.

¹⁸ Nižaza ančhucaquin irantisquizpan pecaytuča. Wejrnacaž ojkz pecan, Satanasacqui wejrnac atajchiča. Wejrqui wiltan wiltan ojkz cjichintača. Jalla nuž ojkz pectaž cjen, Satanasacqui wejr atajchiča.

¹⁹ Jilanaca, cullaquinaca, Jesucristuqui tjonaquiča. Nekztan niž yujcquiziqui ančhucaž cjen cuntintul cjeeča. Ančhucaž cjen wejrnacqui tjewznača honora tanzjapa. Ančhucaž Yooz taku criichiž cjen, juc'antiž chipznača wejrnacqui.

²⁰ Chekapan ančhucqui wejtnacaquiz cuntintuž cjiskatča, nižaza wejrnac honorchiz cjiskatča.

3

¹ Jalla nuž ančhucaquiztan ojkžcu, ancha ančhuc cjuñchinča. Jalla nekztan Timoteo učum jila cuchanžquichinča, ančhuc chertzni. Parti wejrnacztí Atenas wajtquiz ecliz cjichinča.

² Timoteuqui Yoozquin sirwiñiča, Cristuž liwriiz puntu paljaycan. Jalla nižtiquiztan Timoteuqui cuchanžquichinča ančhuc juc'anti Yoozquin tjurt'iñi kuzziz cjeyajo. Nižaza ančhucaquiz zumpacha Yoozquin criizjapa p'ekinchayajo, cuchanžquichinča.

³ Nižaza Timoteuqui ančhucaquin tjonžquichiča, ančhuca kuz ana turwayta cjisjapa pruebanacaž watchiž cjenami. Ančhucpacha zizza criichinacaqui pruebanacaquiztan sufristanča, jalla nii.

⁴ Tuquiqui ančhucatan žejlcan, wejrnacqui nuž mazinčinča, učum criichinacžquiz pruebanacaž tjonaquiča, cjican. Jalla nižtapacha weriž chiita taku cumplisicha.

⁵ Jalla nuž ančhucaquiz pruebanacaž watan wejrqui quintu ana zizzi atchinča. Jalla nižtiquiztan ana iya awantichinča. Nekztan Timoteo cuchanžquichinča, ančhuca Yoozquin criichi kuz, jaknužt kamčhaja, jalla nii zizjapa. Pinsichinča, “Satanás diablut ančhuc tsjii kjutñi cutiskatžcaa”, cjican pinsichinča. Ančhuc cutiskattasaž niiqui, wejtnaca obra inakaz cjitasacha.

⁶ Tsjii kjaž majquiztan Timoteuqui quejpžquichiča Tesalónica wajtquiztan. Nižaza zuma quintunaca zjijcchiča tuž cjican: “Nii Tesalónica wajtchiz criichi žoñinacaqui ancha Yoozquin kuzzizpanča, nižaza zumaž munaziča. Nižaza ninacami učumnacž zumapanž cjuñkalča. Nižaza ninacaqui učumnacatan ancha zalz pecča, jaknužt učumqui ninacžtan ancha zalz pecčhaja, jalla nižtazakazza ninacaqui”. Jalla nuž cjican zuma quintunaca zjijcchiča ančhucaquiztan.

⁷ Jilanaca, cullaquinaca, wejrnac zakaz ancha sufrisnacami pruebanacami watuča. Jalla nuž cjenami nii ančhuca puntu zuma quint'itiquiztan wejtnaca kuzqui zuma cuntintutača. Ančhucaž Yoozquin tjapa kuzziz cjen, ancha cuntintutča.

⁸ Jaziqui zizzinča, ančhucqui Yoozquin tjurt'iñi kuzzizpanča. Jalla nuž zizcu wejrnacqui tsjii ew žeti tanžtažokazza.

⁹ Ančhucaž cjen Yoozquin ancha sparaquiž cjiwča. Nižaza ančhucaž cjen Yooz yujcquiz ancha cuntintuž wejrnacqui.

¹⁰ Nižaza majiñami weenami Yoozquin mayizuča ančhucatan wejtnacatan persunpacha wilta zalzjapa. Nekztan ančhucaquiz tjaajznasača juc'ant zumpacha Yoozquin kuzziz cjisjapa. Ančhuca kamaña čhjulut pjaltichaja, jalla nii tjaajznasača.

¹¹ Jaziqui učum Yooz Ejpžtan nižaza Jesucristo Jiliržtan, jalla ninacaqui wejrnaca irpijaal cjiwča ančhucaquiz wilta zalzjapa.

¹² Nižaza Jesucristo Jiliriqiu ančhucaquiz juc'anti zuma munaziñi kuzziz cjiskatla, porapatmi nižaza tjapa žoñinacžquizimi. Jaknužt wejrnac ančhucatan zuma munazitučhaja, jalla nižta irata.

¹³ Jalla nuž zuma kamtiquiztan Yoozqui ančuca kuz juc'ant tjurt'iñi cjiskataquiča. Jalla nižtiquiztan ančuca kuzqui Yoozquinpanž cjequiča, Yooz Ejpž yujcquiziqui ana čhjul ujchiz cjisjapa. Jalla nuž cjequiča učum Jesucristo Jilirž tjonz tjuñquiziqui. Jalla niiqui tjonaquiča niž partir žoñinacžtanpacha.

4

LUCUTJIÑI ZUMA KAMZ WAQUIZICHA

¹ Jilanaca, cullaquinaca, jaknužt zuma kamz waquizičhaja Yooz cuntintu cjisjapa, jalla nuž tjaajinchinča. Nii zuma kamañ jaru kamiñčucča. Nižaza juc'anti niicama kamaquiča. Jalla niijapa ančucaquiz chiižinuča, nižaza rocuča, Jesucristo Jilirž cuntiquiztan.

² Tuquiqui ančhucatan žejlcan, wejrnacqui Jesucristo Jilirž cuntiquiztan tjaajinchinča. Jalla nii tjaajintanaca ančhucqui zizza.

³ Yooztajapapan zuma kamajo, jalla nižtaž kamñiž pecča Yoozqui. Jalla nuž kamcan, anača adulteriu paazqui, nižaza anača tsjii luctakaqui yekja maatakžquiz pinzizqui.

⁴ Nižaza Yooztajapa kamcan, tjapa criichi žoñiqui ziz waquiziča, jaknužt criichinacaqui persun tjunatan zalz waquizičhaja, nižaza zalžcu jaknužt zumapanž kamz waquizičhaja, jalla nii.

⁵ Ana Yoozta kamñi žoñinacazti persun tjunatan ana zuma kamča. Yekja maatakanacžquizpankaz pinsican kamñiča. Jalla nižta irata ančhucqui anaž kamz waquiziča.

⁶ Anaž jec criichimi yekja jilž maataka kjutñi pinziz waquiziča. Nižaza yekja jilž maatakatan adulteriu paaz anaž waquiziča. Nižta paaquič niiqui, jilž quintra uj paača. Jalla nuž ana zuma kamñinaca casticaquiča Yoozqui. Jalla nuž tuquiqui wejrnacqui ančucaquiz chiižinchinča.

⁷ Yoozqui učumnaca kjawziča niž partiquiz cjisjapa, nižaza zuma kamajo, ana yekja kjutñi cjičjeyajo.

⁸ Jalla nii tjaajintaqui anaž žoñž kuzquiztan tjonča, Yooz kuzquiztanpan tjonchiča. Jalla nižtiquiztan jequit nii tjaajinta taku ana pajčhaja, niiqui Yooz ana pajča. Yoozqui ančuca kuzquiz niž Espíritu Santo luzkatchiča ančhuc zuma kamajo.

⁹ Tsjiilla wejr cjiwča, criichi jilanacžtan zuma munaziz puntuquiztan. Jalla nižta puntuquiztan Yoozqui ančucaquiz tjaajinchiča porapat zuma munazizjapa. Jalla nižtiquiztan wejrnacqui ančucaquiz nii puntuquiztan ana ancha cjiirača.

¹⁰ Jalla nuž zuma munaziñčucča tjapa Macedonia yokquiz kamñi criichinacžtan. Jilanaca, cullaquinaca, wejrnacqui ančhuc chiižinuča, ančuca kuz juc'anti munaziñi cjisla, jalla nuž cjiwča.

¹¹ Nižaza ančhucqui zuma llan kuzziz cjee. Yekja žoñž asuntuquiz anapan mitiz waquiziča. Pero persun kamañ wirquiz kuz tjaasa. Nižaza persun kjaržtan langznaquiča. Tuquiqui nuž ančucaquiz mantichinča.

¹² Jalla nuž ančhuc zuma langztiquiztan ana criichi žoñinacaqui ančhuc rispitaquiča. Nižaza ančucaquizpacha ana čhjulumi pjaltaquiča.

JESUCRISTUQUI WILTA TJONAQUICHA

¹³ Jilanaca, cullaquinaca, wejrnacqui ančucaquiz ticzi žoñinacž puntuquiztan tjaajinz pecuča, ana ancha llaquita cjeajo. Ana jacatatz wira tjewzñi žoñinacaqui llaquiziča tsjii ticzi cjenaqui. Ana nižta cjeajo, ančucaquiz tjaajinz pecuča.

¹⁴ Učumqui criichinčhumča, Jesucristuqui ticziquiztan jacatatchiča, jalla nii. Nižaza criichinčhumča, Yoozqui Jesucristužquin criichi ticzinaca jacatatskataquiča. Nižaza ninaca Jesucristužtan chica tjonkatta cjequiča.

¹⁵ Nižaza tii Jesucristo Jilirž tjaajinta taku ančucaquiz tjaachinča. Jesucristo Jilirž tjonz tjuñquiziqui primiraqui ticzi criichi jilanacaqui nižtan zalaquiča. Nekztan

tii yokquiz žejtchi criichinacaqui tsewcchuc chjitzazakaz cjequiča, Jesucristužtan zalzjapa.

¹⁶ Učhum Jesucristo Jiliripacha tsewc arajpachquiztan chjijwžcaquiča. Nii orapacha criichinaca kjawznaquiča mantiñi joržtan. Nižaza tsjii pajk jilir arc anjilaqui kjawznaquiča. Nižaza Yooz trompeta tjawunznaquiča. Jalla nekztan Cristužquin ticzi criichinacaqui jacatatskattaž cjequiča.

¹⁷ Tii muntuquiz žejtchi criichinacž tuqui jacatatskattaž cjequiča. Nii ticzi criichinacž jacatatskattiquiztan parti criichinacaqui ninacžtan juntupacha chjitzazakaz cjequiča. Nekztan tsewcchuc tsjir taypiguiz Jesucristo Jiliržtan zalaquiča. Jalla nekztanaqui tjapa criichinacaqui tirapanž Jesucristo Jiliržtan wiñaya kamaquiča.

¹⁸ Jalla nii zizcu, nii takunacžtan porapat kuzasnaquiča.

5

¹ Jilanaca, cullaquinaca, čhjulator Jesucristuqui quejpžcačhaja, nižaza ima niiž quejpžcan čhjulut watačhaja, jalla nii pizc puntuquiztan ančhucaquiz ana anchal cijruča.

² Ančhucqui nii pizc puntu zumpacha zizza, Jesucristo Jiliri qui tiripintitž tjonžcaquiča. Zoñinacž ana čhjulu pinsita, tiripintit tsjii tjañiqui luzza. Jalla nižtaž cjequiča Jesucristo Jilirž tjonzqui.

³ Ana criichi zoñinacž “Walikal kamok” cjenpan, nižaza cuntintu želan, tiripintit Yoozqui ninacžquiz tsucnaquiča casticž tjuñžtan. Jaknužut tsjaa ic maatak žon tiripintit laaquičhaja majtsjapa, jalla nižtaž tiripintit ana criichi zoñinacaqui castictapanž cjequiča. Nii casticz tjuñquiztan ana atipa ataquiča.

⁴ Jilanaca, cullaquinaca, ana criichinacaqui zumchiquiz kamča. Ančhuczi anaž zumchiquiz kamča. Jalla nižtiquiztan Jesucristuž tjonzqui anaž ančhuc tsucnaquiča tsjii tjañižtakaz.

⁵ Tjapa ančhucqui Yooz zuma kjañ jiczquiz kamiñčhucča, anaž zumchiquiz kamiñčhucča.

⁶ Jalla nižtiquiztan Jesucristo Jilirž tjonz tjuñi ančhucqui listu tjaczi zuma kuzziz tjewznaquiča. Zuma kamcan, listupachaž tjewžna, ana tjažtažokaz. Ana criichi zoñinacaqui ana juyzu paača Jesucristo tjonz tjuñi puntuquiztan. Ana nižta cjee. Jesucristuž tjonz tjuñi zuma listuž tjewžna, tjaji watsi kuzziztakaz. Nižaza zuma kamzjapa persun wira cwitasa.

⁷ Weenqui zoñinacaqui panž tjačha. Nižaza weenqui zoñinacaqui licča, panž licča. Jalla nuž paacan, ana iya čhjulumi pinsiča. Jalla nižtača ana criichi zoñinacaqui. Jesucristuž tjonz puntuquiztan ana juyzu paača.

⁸ Ančhucqui ana nižta cjee. Učhumnacaqui Yooz kjan jiczquiz kamiñčhumča. Jalla nižtiquiztan persun kuz zuma Yooz jiczquiz kamzjapa, cwitasa. Yoozquin tjapa kuztan cjee, Yooz ančhuc Satanasquiztan tsijtsinajo. Nižaza criichi zoñinacžtan zuma munaziza. Nižaza ančhucqui liwriiz tjuñi zuma listuž tjewžnaquiča. Jalla nuž kaman armichiztakaz cjequiča. Jalla nižtiquiztan Satanasaqui ančhuc ana atipasača.

⁹ Yoozqui učhumnaca ana utchiča casticta cjisjapa. Pero Yoozqui učhumnaca utchiča, zuma liwriita wira tanzjapa Jesucristo Jilirž cjenaqui.

¹⁰ Jesucristuqui učhum laycu ticziča, žejtchi criichinacami ticzi criichinacami nižtan chica cuntintu kamajo.

¹¹ Jalla nižtiquiztan porapat p'ekinchayrasaquiča, tjurt'iñi kuzziz cjisjapa. Nižaza porapat yanaparasaquiča, zuma kamañchiz kamzjapa. Anzi qui ančhucqui porapat yanapassa. Jalla nuž tirapan porapat yanaparasaquiča.

PABLUZ CHIZINTA TAKUNACA

¹² Jilanaca, cullaquinaca, ančhucatan Yooz taku paljayñi zoñinaca žejlča. Jalla ninacžquiz rispitaquiča. Nižaza ančhuca irpiñinacžquiz rispitaquiča. Nižaza

ančucaquiz zuma tawkžtan chiižiñi žoñinacžquiz rispitaquiča. Yooz Jiliriž uchtaž cjen nii žoñinacž mantuquiz žejlča ančucqui. Jalla ninacžquiz rispitažo rocuča.

¹³ Ančucqui tjapa nii žoñinacami ancha rispitaquiča ninacaž Yooztajapa langztiquiztan. Ninacžtan zuma munazaquiča. Nižaza ančucqui porapat zumapanž kamaquiča.

¹⁴ Jilanaca, cullaquinaca, ančucaquiz chiižinžcuča, jayrazñi criichinacžquiz zumpacha trabajzjapa chiižinajo, nižaza ururñi kuzziz criichinaca tjup kuzziz cjeyajo, nižaza llajllasñi kuzziz criichinaca tjurt'iñi kuzziz cjiskatajo. Nižaza tjapa criichinacžtanami pasinziz kuzziz cjee.

¹⁵ Tsjii žoñiqui ana wali paatan tsjiizuñiqui ana nižta ayni tjepunz waquiziča. Antiz zuma munaziz waquiziča porapatmi nižaza tjapa žoñinacžtanami.

¹⁶ Chjulu watanami cuntintuž cjee.

¹⁷ Yoozquin tirapanž mayiza.

¹⁸ Chjulu watanami Yoozquin sparaquiča cjee. Jalla nuž ančucalta Yooz munča ančucqui Jesucristužquin kuz tjaachiž cjen.

¹⁹ Espíritu Santuž obra tjeeznan, ana nii ataja.

²⁰ Nižaza Yooz taku paljayñi žoñinaca ana iñara.

²¹ Antiz nii paljayñi žoñinacž taku zumpacha tantiya, werar Yooz taku ana werar Yooz taku, jalla nii. Zuma Yooz takuž cjenauqi, kuzquiz nii taku catokaquiča.

²² Ultimu ana werar Yooz taku cjequiz niiqui, nii taku ana catokaquiča. Chjul ujmi nižaza anawalinacami anapan paa.

²³ Učhum Yoozza cuntintu kuzziz cjiskatñiqui. Jalla nii učhum Yooz ančucaquiz niž kuzcamapankaj kamkatla. Nižaza Yoozqui ančuca kuzmi, animumi, janchi curpumi zumapaj cwitila ana tsjii uj cjeyajo, Jesucristo Jiliriž tjonzcama.

²⁴ Yoozqui ančuc kjawziča niž partiquiz cjisjapa. Yoozza niž taku panž cumpliñiqui.

²⁵ Jilanaca, cullaquinaca, oracionžtan yanapžcalla.

²⁶ Tjapa criichi jilanacžquiz zuma tsaanaquiča, jaknužt ančuca tsaanz cuzturumpi žejlčhaja, jalla nuž.

²⁷ Wejrqui ančucaquiz tjiinuča, tii carta tjapa criichi jilanacžquiz ližinaquiča, jalla nuž.

²⁸ Učhum Jesucristo Jiliriqui ančucaquiz yanapt'ila. Nužukazza tii cartauqi. Amén.

SEGUNDA CARTA DEL APOSTOL SAN PABLO A LOS TESALONICENSES

¹ Wejrnacqui Pablužtan, Silvanužtan, Timoteužtan tii cartal cjižrčučha ančhuc Tesalónica wajtchiz žoñinacžquin. Nii wajtquiz icliz žoñinacchucča. Nižaza učumča Yooz Ejpžquinami Jesucristo Jiliržquinami kuzzizqui.

² Jalla nižtiquiztan Yooz Ejpžtan nižaza Jesucristo Jiliržtan ančhucaquiz zumaj yanapt'ila. Nižaza walikaj kamkatla. Nižaza zuma contento kuzziz cjiskatla.

CRIICHI ZOÑINACAQUI SUFRISTANCHA

³ Jilanaca, cullaquinaca, wejrnacqui ančhucaž zuma kamtiquiztan tirapan Yoozquin sparaquič cjiwča. Jalla nužupan chiiz waquizuča. Ančhucqui juc'anti juc'anti Yoozquin kuzziz cjissa, nižaza juc'anti juc'anti porapat zuma munaziñi kuzziz cjissa.

⁴ Nižaza ančhucaž zuma kamtiquiztan wejrnacqui ančhuca honora parluča Yooz iclizanacquinami. Ančhucqui walja sufricanami, nižaza žoñinacž chjaawjkatta cjenami awantichinčhucča. Ančhucča pasinziz kuztan Yoozquin tira tjurt'iñchucqui. Nižaza Yoozquinča tjapa kuztan tira žejlzqui.

⁵ Jaziqui ančhucqui Yooz partirquiz cjen sufriskattača. Jalla nižta sufritaqui kjana-pacha tježa, Yooz Ejpqui ančhucjapa tantiichiča, ančhucqui Yooz arajpach wajtquin luzkatz waquiziča, jalla nii.

⁶ Yoozqui nii ančhucaquiz chjaawjkatñi žoñinaca legali casticaquiča. Anziqui ninacaqui ančhucaquiz sufriskattača. Ultimquiziqui Yoozqui ninacžquiz sufriskataquiča.

⁷ Nižaza ančhucaž sufritiquiztan Yoozqui ančhucaquiz jeejskataquiča Jesucristo Jilirž tjonz tjuñquiziqui. Nižaza wejtnacaquiz jeejskataquiča. Tsewc arajpachquiztan Jesucristuqui niž walja azziz anjilanacžtan jecžcaquiča.

⁸ Tsjii ujžtakaz kjakaquiča. Jalla nii uj irata ana Yooz pajñinacž quintra cjequiča. Ninacaqui castictaž cjequiča. Nižaza jakziltat učum Jesucristo Jilirž zuma liwriiñi taku ana cazzit cjechaja, jalla ninacami castictaž cjequiča.

⁹ Jalla tjapa nii casticta žoñinacami wiñayaž sufraquiča. Yooz yujcquiztanaqui wiñayaž chjatkattaž cjequiča. Arajpachquin Yoozqui niž zuma azi tjeznaquiča. Pero nii casticta žoñinacaqui Yooz zumanaca anaž cheraquiča.

¹⁰ Jalla nii Jesucristo Jilirž tjonz tjuñquiziqui, Yooz partir žoñinacami nižquin honora waytazaquiča. Ančhucqui wejrnacž paljayta Yooz taku catokchinčhucča. Nižaza Jesucristuž tjonz cheržcu, Yooz taku catokchinacaqui ispantichi cjequiča. Pero continuž cjequiča.

¹¹ Wejrnacqui tirapan Yoozquin mayizuča ančhucaltajapa, ančhuc ultimu liwriita cjeajajo. Yoozqui ančhucaquiz kjawziča nižta ultimu liwriita cjeajajo. Jaziqui Yoozqui ančhucaquiz liwriita cjis waquizkataquiča. Jalla nuž mayizuča. Yoozqui niž aztan ančhucaž zuma pinsitanacami cumplista cjiskataquiča. Jalla nuž zakaz mayizuča. Nižaza Yoozquin kuzziz cjen, ančhucqui zuma obranaca paača. Yoozqui niž aztan tjapa ančhuca zuma obranaca cumplista cjiskataquiča. Jalla nuž zakaz mayizuča.

¹² Jalla nekztanaqui ančhucaž zuma kamchiž cjen Jesucristo Jiliriqiqui honorchiz cjequiča. Nižaza Jesucristuž cjen ančhucqui honorchiz zakaz cjequiča. Tjapa nižtanaca wataquiča učum Yooz Ejpžtan Jesucristo Jiliržtan učumnacaquiz okzñiž cjen, nižaza yanapchiž cjen.

¹ Jilanaca, cullaquinaca, učum Jesucristo Jilirž tjontanaqui, učumqui juntjapz-naquiča, nižtan zalzjapa. Jalla nii puntuquiztan ančhucaquiz intintiskatz pecuča.

² Yekjap žoñinacaqui ančhucaquiz incallzkatz pecča, “Jesucristuqui tjonchikalča” cjican. Jalla nižta chiita taku nonžcu, anaž ančhucqui tsuca. Nii takunaca ana juyzu paa. Nižaza anaž kuz turwayskata. Ninacaqui cjiča, “Yoozqui Pablužquiz nii taku tjaachiquiča. Nekztan Pablupacha wejtquiz quint'ichiča, ‘Jesucristuqui tjonchikalča’, jalla nii. Nižaza Pabluqui nuž tsjii cartiquiz cjjirchiča”. Jalla nuž cjiča nii toscara chiiñi žoñinacaqui. Jalla nižta chiita taku nonžcu, ana criyaquiča.

³ Ana jaknužumi nii Jesucristuž tjonz puntuquiztanami incallta cjee. Ima Jesucristuž tjonan, walja žoñinacaqui juc'ant Yooz quintra cjistanča. Nižaza tsjii juc'ant ana wal žoñiqui jeczcaquiča. Wiruñaquí nii žoñiqui wiñaya casticta cjequiča.

⁴ Jalla niiqui čhjul yooznacquiztanami juc'ant tucquin cjis pecaquiča. Nižaza ultim werar Yooz quintrami, nižaza žoñiž paata yooz quintrami aptasaquiča. Nižaza tjapa tii muntuquiz amtitanaca quintra aptasaquiča. Nižaza nii ana wal žoñiqui, “Wejrtča chekan Yooztqui” cjequiča. Werar Yooz timpluquinpankaz julznaquiča Yooztakaz.

⁵ Ančhucatan žejlcan, jalla nižtapan paljaychinča. ¿Ana cjuñž ančhucjo?

⁶ Tii zakaz nonžna ančhucqui. Nii juc'ant ana wali paañiqui atajtača. Wiruñaquí Yooziž pinsita timpu niiqui parizaquiča.

⁷ Anziqui ana wali paañinaca žejlča. Nižaza ana walinaca paača. Nii ana walinaca paañinaca atajtača, čhjul ana walimi ana paajo. Wiruñaquí nii atajñiqui ana iya atajaquiča. Nekztan čhjul ana walimi paata cjesača.

⁸ Jalla nii ana atajanaqui nekztan nii juc'ant ana wali paañiqui jeczcaquiča. Nekztanaqui Jesucristo Jiliriqui tjonžcu, persun tawkžtan nii ana wali paañi conaquiča. Nižaza walja aztan tjonžcu nii ana wali paañi liwj akznaquiča Jesucristo Jiliriqui.

⁹ Satanás cjita diabluqui nii juc'ant ana wali paañi žoñi jesckataquiča. Nižaza Satanás aztan ispantichuc milajrunacami siñalanacami paaquiča žoñinacžquiz incallzjapa.

¹⁰ Niiž ana wal kuzcama kamcan tjapaman milajrunaca paaquiča, nižaza tjapaman takunaca parlaquiča, incallzjapa. Jalla nuž ojklajcan incallaquiča infiernuquin ojkní žoñinacžquiz. Jalla nii žoñinacaqui Yooz werar taku ana catokz pecchiča, liwriita cjisjapaqui.

¹¹ Jalla nižtiquiztan Yoozqui ninaca jakjurpaychiča, incallta cjeyajo werar Yooz taku ana criiñiž cjen. Nižaza nii ana liwriita žoñinacaqui toscar takupan criyaquiča.

¹² Ninacača ana wali paatanacapankaz jutasñiqui, jalla nižtiquiztan tjapa nii Yooz taku ana criichi žoñinacaqui casticaž cjequiča.

ILLZTA ŽOÑINACAQUI LIWRIITA CJEQUICHA

¹³ Yooz k'ayi jilanaca, cullaquinaca, wejrnacqui ančhucaž cjen tirapan Yoozquin sparaquiž cjistanča. Tuqui timpuquiztanpacha Yoozqui ančhuc illzipanča liwriita cjisjapa. Nižaza ultimupan liwriitaž cjequiča Espíritu Santuž cjen, nižaza werar taku criichiž cjen. Nii Espíritu Santuqui ančhucaquiz ancha zuma yanapča, ančhuca kuz ultimu zumapankaz cjisjapa.

¹⁴ Jalla nijapa Yoozqui ančhuc kjawziča. Wejrnacaž zuma liwriiñi Yooz taku paljaytaž cjen, Yoozqui ančhuc kjawziča, Jesucristo Jiliržtan ančhucqui zuma honorchiz cjisjapa.

¹⁵ Jaziqui jilanaca, cullaquinaca, tirapan tjurt'iñi kuzziz cjee. Wejrnacqui ančhucaquiz tjaajinchinča, chiita takunacžtanami nižaza cjjirta takunacžtanami. Jalla nii tjaajinta takunaca anapan tjatzna. Nii tjaajinta jaru panž kama.

¹⁶ Učum Yooz Ejpqui učumnaca okziča, nižaza niiča wiñayjapa cuntintu cjiskatñi. Nižaza učumnaca okžcan, ančhucaquiz tjewskatča, arajpachquin nižtanpan zuma kamz, jalla nii.

¹⁷ Yooz Ejpžtan učhum Jesucristo Jiliržtan, jalla ninacapacha ančhuca kuznaca p'ekinchayaquiča. Nižaza ninacaqui ančhucaquiz juc'ant tjurt'iñi kuzziz cjiskataquiča tјapaman walinaca paajo, nižaza tјapaman wali takunaca parlajo. Jalla nuž ančhucaltajapa mayizuča.

3

¹ Jilanaca, cullaquinaca, tiicamakal chiižinača. Wejtnacalta Yoozquin mayiza, Yooz taku tјapa kјutñi paljayajo, nižaza mayiza nii paljayta Yooz taku tјapa kuztan catokta cјeyajo. Jalla nižta ančhucqui Yooz taku catokchinčucča.

² Nižaza Yoozquin mayiza, ana wal kuzziz žoñinacžquiztan wejrnac tsiјtsinajo. Yekјap žoñinacaqui anača Yoozquin kuzziz.

³ Jesucristo Jiliriča cumpliñiqui. Jalla nižtiquiztan niiqui ančhuca tjurt'iñi kuzziz cheјlnaquiča, nižaza anawalinacquiztanž zumapanž cwitaquiča.

⁴ Ančhucaž Yooz Jiliržquin kuzziz cјen, wejrnacqui tantiichinča, ančhucqui wejtnacaž mantitacama kamiñchucča, nižaza niicama tira kamcan želaquiča, jalla nii. Jalla nužupan cјequiča.

⁵ Jesucristo Jiliriqui ančhuca kuz irpila, Yooz irata јilanacžtan zuma munazajo, nižaza Jesucristuž irata pasinziz kuzziz cјeyajo. Jalla nuž mayizuča.

ANA JAYRAZCU LANGZ WAQUIZICHA

⁶ Jilanaca, cullaquinaca, Jesucristo Jilirž tјuuquiz ančhucaquiz mantuča. Jayrazñi јilanacžquiztan zarakauiča. Jalla ninacaqui wejrnacaž tјaaјintacama ana kamča.

⁷ Jaknužt wejrnacqui kamučhaja, jalla niicama ančhucalaqui kamsa. Wejtnacaž kamaña yatekaza. Wejrnacqui ančhucatan žejlcan walja langzinča.

⁸ Nižaza kјayžcu t'antami čhјerimi lujlchinča. Majiñami weenami walja langzniñča očañcama, ančhucalta ana ch'ama cјeyajo.

⁹ Ančhucaltan žejlcanaqui wejrnacqui ančhucaquiztan čhјeri mayiñ cјichuca cјitasacha. Ultimquiz anal maychinča. Antiz langzinča, tsјii kamaña tјeezјapa. Jalla niwјctanaqui tsјii zuma kamaña tјeez pecchinča, ančhucqui nii kamañquiz јaru kamzјapa. Jakziltat lujl pecčhaja, langz waquiziča.

¹⁰ Ančhucatan žejlcan, chiižinčinča. “Jakziltat ana langz pecčhaja, jalla niiqui anaž lujl waquiziča yeјkž čhјerquiztan”.

¹¹ Pero tsјii quintu nonzinča. Yekјap ančhucaquiztan ana langžcu kamñiquiča. Ana langžcu, ana persun luraña paažcu, јayrazcan yeјja žoñž asuntunacquiz mitisñiquiča.

¹² Jalla nižta žejlñi žoñinacžquiz mantuča ana nižta cјisјapa. Učhum Jesucristo Jilirž tјuuquiz ninacžquiz chiižinuča, zuma kuzziz nižaza ana mitisñi kuzziz langznaquiča persun wira mantinzјapa, jalla nii.

¹³ Jilanaca, cullaquinaca, zuma paazјapa anaž očhlla.

¹⁴ Jakziltat tii weriž cartiquiz cјјrta taku anapanž catokz pecčhaja, jalla nii zumpacha cheraquiča, јecčhalaj nii. Nižta žoñžquinaqui anapanča tјonzqui, nižaza anapanča nižtan oјklayzqui, nii žoñipacha azajo niž anawal kamañquiztan.

¹⁵ Anaza nižјapa quintrа cјee, antiz nii criichi јilžquiz zuma tawkžtan chiižina.

¹⁶ Jesucristo Jiliriča cuntintu kuzziz cјiskatñiqui. Jalla nii zakaz ančhuca kuz walikaj cјiskatla zapurumi nižaza čhјulu cјenami. Nižaza Jesucristo Jiliriqui ančhucatan chicapachaj kamla.

¹⁷ Weјrqui Pablutča. Anziqui tii ančhucaquin tsaanz letranaca persun kјaržtan cјјržcuča. Jalla nužupan zapa cartiquiz weјt firmapan firmuča.

¹⁸ Učhum Jesucristo Jiliriqui tјapa ančhucaquiz zumaj yanapla. Nužukazza. Amén.

PRIMERA CARTA DEL APOSTOL SAN PABLO A TIMOTEO

¹ Wejrtëcha Pablutqui. Timoteo jila, amquin tii cartal cjiiržcuëha. Jesucristuž illzta apostultëcha wejrqui. Jalla nii apóstol puestuquin uëhum Liwriiñi Yooz Ejpqui Jesucristo Jiliržtanpacha wejr utchiëha. Jesucristo Jilirž tjonz tjuñi tjewža uëhumqui.

² Timoteo jila, amquin tii cartal cjiiržcuëha. Weriz Yooz taku paljaytaž cjen amqui tjapa kuztan Yoozquin criëhamëha. Jaziqui wejt maati cuntamëha. Amëha lijitum criëchi žoñiqui. Yooz Ejpžtan uëhum Jesucristo Jiliržtan amquiz zumaj yanapla, nižaza amquiz okzla, nižaza walikaj kamkatla.

ANA WALI TJAAJINACA TJONAQUICHA

³ Tuquiqui ima Macedonia yokquin ojkcan wejrqui amquiz rocchinëha, Efeso waqtquin želajo. Anziqui wilta rocüha nicju tiraka želajo. Jalla nicju žejlcan, amqui tsjii žoñinacžquiz chiižinz waquiziëha. Jalla ninacžquiz amqui mantaquieha, Yooz taku ana iya tsjii kjutñi tjaajnajo.

⁴ Nižaza mantaquieha žoñiz pinsita quintunacquizimi ana kuz tjaajo. Nižaza tuquita atchi ejpnacž tjuunac puntuquizimi anapanëha nijcchucqui kuz tjaazqui. Jalla nuž amqui mantaquieha. Jalla nižta parlanacaqui panž inakazza, kuznaca turwayskatñi alajaëha. Nižta parlanacaqui anapanž uëhumnacaquiz yanapëha, Yooziž tjaata kamañquiz juc'ant zuma kamaajo. Yooz kamañquiz kamcan, Yoozquin kuzziz cjicjiñi, jalla niž walëha.

⁵ Jalla nuž wejrqui mantuëha, criëchi žoñinacž porapat zuma munazajo. Zuma kuzzizpan, nižaza ana ëhjul ujmi cjuñžcu, zuma munaziz waquiziëha. Nižaza tjapa kuztan Yoozquin criëcan, jalla nižta kuzziz žoñinacaqui zuma munaziz waquiziëha.

⁶ Jalla nižta zuma kamañquiztan tsjii žoñinacaqui chekachuc ojkchiëha. Jaziqui parleeke parlis pecñiëha, ana ëhjulquiz waquiziñi.

⁷ Nižaza walja zizñi Moisés lii tjaajiñi cjis pecëha. Ninacazti tjaajinžcupacha, persuna chiita ana intintassa. Nižaza “Tužupanëha werar razunaqui” cjiscupacha, ana panž niž persuna tjaajintaqui intintazasaëha.

⁸ Yooziž Moisesquiz tjaata liinacaqui zumaëha, Yooz kuz jaru lijituma tjaajintaž niiqui.

⁹ Nižaza lii puntuqui tužuëha: Moisés liinacaqui anataëha ut'ayta zuma kamñi žoñinacžtajapa. Antiz ana zuma kamñi žoñinacžtajapa ut'aytataëha. Zuma paaznaca ana juyzu paañi žoñinacžta, nižaza Yooz kuzcama ana kamñi žoñinacžta, nižaza ana Yooz sirwiñinacžta, nižaza uj paañinacžta, nižaza Yooz kamañ jicz ana pecñinacžta, nižaza ana Yooz rispitiñinacžta, nižaza persun maa ejp conñinacžta, nižaza žoñi conñinacžta,

¹⁰ nižaza adulteriuquiz ojklayñi žoñinacžta, nižaza luctakpora ana wali paasñinacžta, nižaza žoñi tanñinacžta, nižaza toscara chiiñinacžta, nižaza toscar juramentužtan chiiñinacžta, nižaza tjapa zuma tjaajintanacž quintra paañinacžta, jalla ninacžta ut'aytataëha Moisés liinacaqui.

¹¹ Zuma tjaajintanacaqui zuma liwriiñi Yooz tawk jaruëha. Yooz takuqui azzizza, žoñinaca liwriizjapa. Walja zuma Yoozqui wejtquiz nii liwriiñi taku zizkatchiëha, nižaza wejtquiz cumpjiëchiëha, žoñinacžquiz paljayajo.

JESUCRISTUQUI PABLUZQUIZ ANCHA OKZICHA

¹² Yooz taku paljayajo, Jesucristo Jiliriqui wejtquiz yanapchiëha. Jalla nižtiquiztan Jesucristužquin sparaquiz cjiwëha. Jesucristuqui wejr cumpliñipan cherziëha. Jalla nižtiquiztan apóstol puestuquiz wejr utchiëha nii sirwajo.

¹³ Tuquiqui wejrqui Jesucristuž quintra chiiñtača, nižaza niiž quintra iñariñtača. Nižaza Jesucristužquin criichi zoñinacž quintra payiñtača. Jalla nuž paanami nižaza chiyanami, Yoozqui wejtquiz okziča. Ima Jesucristužquin criican, jalla nuž ana wali ojklaychintača ana ultim werara zizcu. Jalla nižtiquiztan Yoozqui wejtquiz ancha okziča.

¹⁴ Učhum Yooz Jiliriqui wejtquiz walja zuma okziča. Jaziqui Jesucristuž cjen, Yoozquin tjapa kuztan cjissinča wejrqui, nižaza Yooztan ancha munaziñi kuzziz cjissinča.

¹⁵ Jesucristuqui tii muntuquiz tjonchiča, ujchiz zoñinaca liwriyi. Jalla nii takučha ultim razunaqui. Nižaza tjappachaqui nii taku catokz waquiziča. Tjapa ujchiz zoñinacžquiztan wejrtča juc'ant ujchiztqui cjiwča.

¹⁶ Jalla nuž cjenami, Yoozqui wejr zumapan okziča, Jesucristuž zuma pasinziz kuz tjeezjapa. Weriž cjen, tjappacha zizaquiča, Jesucristo ancha zuma pasinziz kuzziz, jalla nii. Tjapa ujchiz zoñinacžjapa Jesucristuqui zuma pasinziz kuzzizza. Cristužquin criyaquiž niiqui, čhjul zoñimi Yooztan wiñaya kamaquiča.

¹⁷ Jalla nižtiquiztan tjapa mantiñi Yooz honoraž wiñayjapa waytitaj cjila. Yoozqui wiñaya žejlča, nižaza ana ticznasača, zoñž čhjujquiz anaž cherta cjesača. Tsjiiilla-panikazza Yoozqui, nižaza niipanča juc'ant tjappacha zizñi qui. Jalla nii Yooz honora wiñay wiñaya tirapan waytitaj cjila. Jalla nužoj cjila. Amén.

¹⁸ Timoteo jila, wejt maati cuntamča. Zuma zultatuztakaz Yoozquin tjurt'iñi kuzziz cjee. Nižaza Satanás partiranacž quintra cjee. Tuquiqui tsjii criichi jilanacaqui am puntuquiztan Yooziž tjaata taku čiičiča. Nii takunaca cjuñzna. Jalla nii tawk jaru amqui Yooz sirwiz puestuquiz utžtača. Jaziqui amquin tii čiižinuča.

¹⁹ Tirapan Yoozquin tjapa kuzziz cjee, nižaza zumapan kama. Zuma kamcan, am kuzquiz ana ujnaca cjuñznaquiča. Yekjapaqui persun kuzquiz ujnaca cjuñžcu, ana juyzu paachiča, nii ujquiztan ana jaytichiča. Jalla nižtiquiztan ninacaqui ana uj tantiyasñi kuzziz cjissiča, nekztan Yooz kamañ jiczquiztan zarakchiča.

²⁰ Jalla nižta paachiča Himeneužtan nižaza Alejandružtan. Jalla ninaca Satanás kjarquiz intirjichinča, ana Yooz quintra iya čii zizajo.

2

YOOZQUIN MAYIZIZ PUNTU

¹ Tsjiižtan cjiwča. Primeraqui čiižinžcuča jalla tuž: Tjapa zoñinacžta Yoozquin mayizaquiča, nižaza zuma kuztan Yooztan parlaquiča, nižaza tjapa zoñinacžtajapa Yoozquiztan roct'ižinaquiča, nižaza Yoozquin sparaquiž cjequiča. Jalla nuž mayiziz waquiziča tjapa zoñinacžtami,

² nižaza tjapa pajk mantiñi jilirinacžtami, nižaza tjapa jilirinacžtami. Jalla nuž mayiziz waquiziča, walikaz kamajo. Jalla nuž kamcan, Yoozquin sirwiñi kuzziz cjee, nižaza nižta kuzziz kamcan jilirinacžquiz rispitiñi kuzziz cjee.

³ Jalla nižta kamaquiž niiqui, walikazza. Nižaza jalla nižta kamz cjen, učhum Liwriiñi Yoozqui cuntintuž cjequiča.

⁴ Učhum Liwriiñi Yoozqui tjapa zoñinaca liwriita cjis, jalla nii pecča. Nižaza tjapa zoñinaca werar taku pajñi cjis, jalla nii zakaz pecča.

⁵ Tsjii Yoozpanikaz žejlča. Nižaza zoñinacaltajapa tsjii Yoozquiz pjalt'iziñi žejlča. Jalla niiča Jesucristuqui. Učhum irat zoñi cjiscu,

⁶ tjapa tii muntuquiz žejlñi zoñinacž laycu ticziča. Jalla nuž ticžcu ninacž ujquiztan pacchiča. Yooz pinsita timpu tjonžcu, jalla nekztan nii zuma liwriiñi quintuqui zoñinacžquiz paljaytatača.

⁷ Jalla nii Jesucristuž zoñinacž laycu ticzi quintu wejrzakaz paljayučha. Nižta paljayajo, Yoozqui wejr apóstol puestuquiz utchiča. Wejr utchiča werar liwriiñi Yooz

taku tjaajnajo ana judío žoñinacžquin. Ninacžquin Yooz taku paljayiñča, ninaca Jesucristužquin kuzziz cjeajajo. Wejrqui Jesucristužquin criichiž cjen weraral chiyučha. Ana toscaral chiyučha.

⁸ Tjapa kjutñi žoñinacaqui Yoozquin mayiziñi cjičhaj cjiwčha. Jalla niil pecučha. Zuma kuzziz, nižaza ana žawjchi kuzziz, nižaza ana ch'aazñi kuzziz, nižaza zuma kuztan kjara waytizcu, jalla nuž mayiziñi cjičhaj cjiwčha.

MAATAKZ PUNTU

⁹ Nižaza maatakanacami zuma kuzziz cjispanča. Zuma zquitinaca anaž juc'anti cujtzni cjičhaj cjiwčha. Anača iziwiri maatakažtakaz cujtzqui. Nižaza anača ricachužtakaz cujtzqui. Anaž ancha ist'asaquiča. Nižaza maatakanacami anača persun ach charquiz ancha quitsnacchiz cjequiča. Nižaza anaž ancha čjul alajanacchiz cjequiča. Nižaza anaž ancha zquitinaca cujt cutaquiča. Jalla nižta zquitinacquizimi nižaza cusasanacquizimi ana kuz tjaa.

¹⁰ Antiz zuma kamzquin kuz tjaa. Zuma kamz waquiziča Yoozquin kuzziz criichi maatakanacami.

¹¹ Nižaza maatakanacami ch'uju žejlcan tjaajinta takunaca catokspanča, ana čjulu chiizcu.

¹² Nižaza žoñinaca cheran maatakanacami luctakanacžquiz anaž tjaajinz waquiziča; nižaza anaž mantiz waquiziča. Nižaza maatakanacžlaqui ch'uju žejlcan luctakanacž takunaca nonspanča.

¹³ ¿Kjažtiquiztan nižta cjesajo, maatakanacž puntuquiztanajo? Jalla tužuča niiqui. Tuquiqui Yoozqui Adán paachiča. Nekztan Eva paachiča.

¹⁴ Nižaza Adanžquiz anatača incallta. Antiz Evaquiztača incallta. Incallskattiquiztan Evaqui ujquiz tjojtsinča.

¹⁵ Maatakanacami maatakž kamañquiz kamz waquiziča, maatinaca majtcan. Nižaza Yoozquin kuzziz, nižaza zuma munaziñi kuzziz, nižaza ana ujchiz zuma kamañ kuzziz, nižaza humilde kuzziz, jalla nižta kuzzizpan kamaquič niiqui, liwriita cjequiča maatakanacami.

3

ICLIZ JILIRZ PUNTU

¹ Jakziltat icliz jilirž puestuquiz luz pecčhaja, jalla niiqui zuma Yooztajapa langz pecñičha niiqui. Jalla nii takuqui ultim werarača.

² Jalla nižtiquiztan jakziltat icliz jilirž puestuquiz luzaja, jalla niiqui zuma kamañchiz žoñi cjispanča. Jalla nižtiquiztan žoñinacaqui niž puntu cjiñičha, “Zuma žoñipancha, ana ujchiz” cjicanaqui. Niiqui tsjaa tjunchizpanikaz cjispanča. Nižaza ewjazñi kuzziz cjispanča. Nižaza zumapan kamñi kuzziz cjispanča. Nižaza zuma kamtiquiztan rispittaž cjispanča. Nižaza tjonzñi žoñinacžquiz kjawzñi kuzziz cjispanča. Nižaza zuma tjaajiñiž kuzziz cjispanča.

³ Nižaza anapan licñi kuzziz cjispanča. Nižaza ana kichjasñi kuzziz cjispanča, antiz pasinziz kuzzizpan cjispanča. Nižaza anapan ch'aazñi kuzziz cjispanča. Nižaza paaz pecñi kuzziz anapan cjispanča.

⁴ Nižaza niž kjuychiz žejlñi žoñinaca zuma irpiñi cjispanča. Nižaza niž maatinacami zuma cazñi nižaza walja rispitiñi, jalla nižta kuzziz cjispanča.

⁵ Tsjii icliz jiliriqui niž persun kjuy žoñinaca ana zuma irpiñi atchucažlaj niiqui, jalla nižtiquiztan, ¿jaknužt Yooz icliz žoñinaca zuma irpasajo?

⁶ Nižaza tsjii icliz jiliriqui anaž uzca criichi žoñi cjesača. Uzca criichi cjesaž niiqui, mitarazi kuzziz cjisnasača, nekztanaqui ujquiz tjojtsnasača. Nižaza jaknužt diablucqui niž ujquiztan casticta cječhaja jalla nižta irata nii žoñiqui uj paatiquiztan casticta cjequiča.

⁷ Nižaza icliz jilirinacaqui tjapa žoñinacžquiz rispittaž cjispanča, criichi žoñinacami, ana criichi žoñinacami. Ana criichi žoñinacaqui nižžquiz ana rispitaquiž niiqui, juc'anti nižžquin ujnacaž tjojt-nasača. Jalla nižtiquiztan diabluqui nii žoñžquiz ujquiz tjojt-skatasacha.

⁸ Jalla nižta zuma kamañchiz zakaz cjispanča iclizquiz yanapñi žoñinacaqui. Jalla ninacaqui zuma rispitta kamañchiz cjispanča. Nižaza ninacž chiita taku cumpliñi kuzziz cjispanča. Nižaza anapan licñi kuzziz cjispanča. Nižaza paaz pecñi kuzziz anapan cjispanča.

⁹ Tuquiqui Jesucristuž puntumi nižaza nižžquin kuzziz puntumi ana tjapa ziztatača. Anziqui kjanacama paljaytača. Nii Jesucristuž puntu zuma zizñi kuzziz cjispanča. Nii iclizquiz yanapñi žoñinacaqui ana uj paañi kuzziz cjispanča.

¹⁰ Tsji žoñiqui iclizquiz yanapz puestuquiz luzasaž niiqui, primeraqui niž persun kamaña zumpacha tantiitaž cjispanča. Nekztan zuma kamañchiz cjequiž niiqui, iclizquiz yanapz puestuquiz luzasacha.

¹¹ Jalla nižta zuma kamañchiz cjispanča iclizquiz yanapñi maatakanacami. Nii maatakanacami walja rispitta kamañchiz cjispanča. Nižaza anapan ana wal quinto joojooñi kuzziz cjispanča. Nižaza ewjazñi kuzziz cjispanča. Nižaza tjapa cumpliñi kuzziz cjispanča.

¹² Nižaza iclizquiz yanapñi žoñinacaqui tsjaa tjunchiz alajakaz cjispanča. Nižaza niž persun maatinacami kjuy žoñinacami zumapanž irpiñi cjispanča.

¹³ Jakziltat iclizquiz yanapz puestuquiz zuma cumplačhaja, jalla niiqui zuma hon-orchiz cjequiča, nižaza juc'ant tjup kuzziz cjisnaquiča, Jesucristužquin criiz puntuquiztan paljayzjapa.

¹⁴⁻¹⁵ Wajilla wejrqui amquin ojkz pecuča. Pero anat uri tjonz atučhani. Jalla nižtiquiztan tii takunaca amquin cjiiržcuča. Tii takunacaž cjen amqui zizaquiča, jaknužt Yoozquin criichi žoñinacaqui parti Yooz maatinacžtan kamz waquizičhaja, jalla nii. Yooz maatinacača werar žejtñi Yooz iclizaqui. Yooz icliz žoñinacaqui werar Yooz tawkquizimi tjurt'iñi kuzzizpanča.

¹⁶ Anaž jecmi kjaž cjesača tii puntuquiztan. Tuquiqui Jesucristuž puntumi, nižaza Yooz kamañ puntumi ana tjapa ziztatača. Anziqui nii puntunacami kjanacama ziz-tača. Tii Jesucristuž puntunacača chekanaqui. Jesucristuqui učum irat curpuchiz tjončiča tii muntuquiziqui. Jacatattiquiztan Yooz Espíritu Santuqui ticlarchiča niž puntuquiztan, lijituma Yooz kamañchizza, jalla nii. Nižaza Yooz anjilanacaqui Jesucristo cherčiča. Nižaza tjapa tii muntuquiz žejlñi žoñinacžquiz Jesucristuž puntuquiztan paljaytača. Nižaza tjapaman žoñinacaqui nižžquiz criichiča. Nižaza Jesucristuqui tsewc arajpachquin wilta quejpchiča. Jalla nii puntunacača chekanaqui.

4

ZUMA TJAAJINTA TAKUNACA

¹ Tsjii puntu cjesača. Yooz Espíritu Santuqui kjanapacha intintazkatchiča jalla tužu: Ima Jesucristuž wilta tjonan, yekjap criichinacaqui Yoozquin criizquiztan zarakaquiča. Tsjii kjutñi irpitaž cjequiča incallñi zajranacaž cjen, nižaza nii ana wal zajranacž tjaajintaž cjen.

² Nii zajranacaž mantita žoñinacaqui incallñi kuzziz cjican toscar takunaca pal-jayaquiča. Nižaza ninacž toscar takunaca nonžcu, yekjap werar Yoozquin criichi-nacaqui Yoozquiztan tsjii kjutñi zarakaquiča. Nii zajranacaž mantita žoñinacaqui ujquiztan ana sint'iñi kuzziz cjequiča, nižaza ana uj naazñi kuzziz cjequiča.

³ Nii ana wal žoñinacaqui anapanž lucutjiñi zalzqui cjican mantaquiča. Nižaza tsjii čherinaca lujlmi, anapanž lulzqui, cjican mantaquiča. Nii incallñi žoñinacaqui jalla nuž cjequiča, pero Yoozqui nii čheri tjaachiča, žoñinacž lulajo. Jalla nižtiquiztan

Yoozquin criichinacami werar Yooz tawkquiz criichinacami nii čheri lulasächa Yoozquin sparaquiz cjižcu.

⁴ Tjapa Yooziž tjaata čherinacaqui walipankazza. Yoozquin sparaquiz cjižcu lulasächa. Anapanča “Lujlzjapača anawaliqui” cijzqui.

⁵ Yoozquin sparaquiz cjižcu, nižaza Yooz taku chiižcu, čjul čherimi walipankaz cjesächa, lujlzjapa.

⁶ Jalla nii weriž tjaajinta takunaca criichi žoñinaczquiz tjaajnaquiča amqui. Nekztan amqui Jesucristužtajapa zuma sirwiñim cjequiča. Yooz tawk jaru, nižaza Yooz puntu zuma tjaajintanac jaru zuma kamchamča. Nižaza zuma tjaajnaquiz niiqui, juc'ant zuma kamañchiz cjequiča.

⁷ Ana wal quintumi nižaza zumzu žoñinacz quintumi anapan nonznaquiča. Antiz Yooz kuzcamapankaz kamzquinča kuz tjaazqui.

⁸ Curpu ejercicio paakatzqui curpuquizkaz yanapča. Yooz kuzcama kamzqui curpuquizimi kuzquizimi tjappachquizpanž yanapča. Nižaza tii muntuquiz kamz žejtzquizimi arajpach muntuquiz kamz žejtzquizimi yanapča.

⁹ Jalla werar razunača nii takuqui. Jalla nižtiquiztan catokz waquiziča.

¹⁰ Učhumqui žejtñi Yoozquin criichiž cjen tjewznaquiča arajpachquin Yooztan kami ojkzjapa. Jalla nuž tjewžcan, učhumqui Yoozta ancha langža nižaza sufriča. Jalla nii žejtñi Yoozza ultim werar Liwriiñiqui. Niižquin criichinacaqui liwriita cjequiča. Nižaza tjapa žoñinacaqui liwriita cjesächa, niižquiz criyaquiz niiqui.

¹¹ Jalla nii puntu tjaajintanaca mantaquiča, nižaza tjaajnaquiča amqui.

¹² Amqui tjowaž cjenami žoñinaczquiz rispitskataquiča, amiž zuma kamtiquiztan. Amqui zumapan kamaquiča, nižaza zumapan chiyaquiča, nižaza žoñinacztan zuma munazaquiča, nižaza Yoozquin tjapa kuzzizpan cjequiča, nižaza lijitum kamañchiz cjequiča. Nekztan jaknužt amqui zuma kamčhaja, jalla nii cheržcu, parti criichi žoñinacaqui am iratapacha zakaz zuma kamasächa.

¹³ Nižaza wejt tjonzcama, parti criichi žoñinaczquin Yooz taku liizinzjapa kuz tjaaquiča. Nižaza Yooz taku liižcu parti criichi žoñinaczquin zumpacha chiižinaquiča. Nižaza ninaczquiz tjaajnaquiča.

¹⁴ Tuquiqui icliz jilirinacaqui kjaržtan am juntuñ lanziča. Nižaza am puntuquiztan tsjii Yooziž tjaata taku chiičiča, “Yooz tjaata kamañchiz cjequiča” cjicanaqui. Nekztan jalla nižta Yooz kamañchiz amquiz cjiskatchiča. Amqui nii Yooz kamaña ana cutznaquiča.

¹⁵ Jalla nii am kamañ puesto cumplisjapa, tjapa kuz tjaaquiča. Nii kamañ jaru kama. Jalla nižta kamz cjen, amqui juc'ant juc'ant zuma kamaquiča. Nižaza parti criichinacaqui am juc'ant zuma kamañiž cjen nayaquiča.

¹⁶ Jaziqui am persun kuzquizimi nižaza amiž tjaajintanacquizimi cuitaza, zumapan cjisjapa. Weriz chiižintanaca tirapan cjuñzna. Jalla nuž zuma cjuñznaquiz niiqui, ultimquiziqui liwriitam cjequiča. Nižaza amiž tjaajinta catokchi žoñinacaqui liwriitaž zakaz cjequiča.

5

ZEW MAATAKANACZ PUNTU

¹ Tsjiilla cjesächa. Irarchiz ejpnaczquiz ana ancha ujznaquiča. Antiz persun ejpžtakaz zuma tawkžtan chiižinaquiča, niiž ana wali paatiquiztan jaytiskatzjapa. Nižaza parti luctak žoñinaczquiz persun jilanaczquiz chiižintažokaz chiižinaquiča.

² Nižaza irarchiz maatakanaczquiz persun maažtakaz zuma rispitchiz razunžtan chiižinaquiča. Nižaza parti maatakanaczquiz persun cullaquinaczquiz chiižintažokaz chiižinaquiča, zuma kuztan. Maatakanaczquiztan zumapan pinsaquiča.

³ Nižaza ultim t'akjir žewanacžquiz okznaquiča.

⁴ Tsjaa žew žonqui maatinacchiz nižaza ajlchinacchiz cjesaž niiqui, jalla ninacaqui naa žew maaquiz okz waquiziča. Jakziltat Yoozquin criichižlaj niiqui, persun famillžquiztan žew maatakanacžquiz yanapz waquiziča. Nii žew maatakanacaqui famill ocjalanaca jwesi yanapchizlani. Žew maatakanacžquiz yanapzpanž waquiziča persun familiaqui. Jalla nuž Yooz yujcquiziqui walipanikaz cjequiča.

⁵ Jakzilta t'akjir žew žonmi zinalla žejlčhaj niiqui, jalla naača werar žewqui. Naaqui Yoozquin kuzziz cjenacqui arajpachquin kami ojkz, jalla nii tjewža. Nižta tjewžcan naaqui majiñami weenami Yoozquin ancha mayizinča.

⁶ Jakzilta žew žonmi tii muntuquiz kamzquinkaz kuz tjaachi žejlčhaja, jalla naaqui criichi žoñž cuzturumpi paachi cjenami, ana Yoozquin kuzziz zuma kamča.

⁷ Persun famillž žewnacžquiz okz waquiziča. Jalla nuž mantaquiča amqui, žewanacami ninacž familianacami ana ujchiz cjisjapa.

⁸ Persun famillžquiztan tsjii t'akjiri žejlčhaj niiqui, famillžquiztan mantinta cjis waquiziča. Ana mantintažlaj niiqui, nii famillchiz žoñinacaqui Yooz kuzcama kamz ana cumpliča. Nižaza nižta žoñinacaqui tsjan ana zuma kuzzizza ana criichinacžquiztanami.

⁹ Jakzilta žew maatakanacž tjuumi icliz listiquiz žejlčhaja jalla ninacaqui yanapta cjesača. Nižaza nii žew maatakanacaqui yanapzjapa sojta tunc wata jilchiz cjistanča. Nižaza tsjii luctakžtan panikaz zalsintača naa žewqui.

¹⁰ Nižaza žoñinacaqui naaža zuma kamtiquiztan pajta cjistanča. Nižaza naa žewqui maatinaca zuma irpiñtacha. Nižaza tjonžni žoñinacžquiz zuma atintiñi kuzziz cjispanča. Nižaza criichi žoñinacž kjojcha humilde kuzziz ajwsinintača. Nižaza sufriñi žoñinacžquiz zuma yanapñi kuzziz cjispanča. Nižaza tjapaman wali paatanacžquiz kuz tjaañi cjispanča. Jalla nižta zuma kuzziz žew maatakanacaqui iclizquiztan yanapta cjesača.

¹¹ Ima sojta tunca watchiz cjen žew maatakanacaqui anaž icliz listiquiz apuntita cjesača, yanapta cjisjapa. Listiquiz apuntita cjisjapaqui, žew maatakanacaqui tsjii icliz jilirinacž acuerduquiz luztanča. Tur žew maatakanacaqui wilta zalz pecačhani. Wilta zalaquiz niiqui, nii acuerduquiztan ulanspanča. Jalla nuž ulantiquiztan Cristuž quintražtakaz cjequiča.

¹² Nii primero acuerduquiztan ulantiquiztan ujchiz cjequiča.

¹³ Nižaza turapacha žew maatakanacaqui kjuyquiztan kjuya ojklayasaž niiqui, jayraž cjesača. Nižaza ana wali quintu joojooñiž cjesača. Nižaza yekja žoñž parliquiz mitisñi cjesača. Jaziqui ana zuma takunaca chiichiyáčhani. Nižta chiichiizqui inapankazza. Anapan waquiziča.

¹⁴ Jalla nižtiquiztan tur žew maatakanacaqui zalz waquiziča. Zalzcu, ocjalchiz cjesača. Nižaza kjuya luraña cwitiñi cjesača. Jalla nižta zuma kamañ quintra žoñinacaqui icliz žoñinacžquiz anaž iñarasača.

¹⁵ Yekjap žew maatakanacazti Yoozquiztan zarakchiča, nižaza Satanás diabluž kuzcama ojkča.

¹⁶ Jakzilta criichi luctakami maatakami persun famillžquiztan tsjaa žew žon žejlčhaja, naa žew žon yanapz waquiziča, icliz žoñinacžta ana ch'ama cjejajo. Jalla nižtiquiztan ultim t'akjir chawc žew maatakanacžquiz icliz paažtan yanapta cjesača.

ICLIZ JILIRZ PUNTU

¹⁷ Jakzilta icliz jilirit zumpacha irpačhaja, parti criichi žoñinacaqui nii jiliržquin zuma honora tjaaz waquiziča, nižaza zuma pacz waquiziča. Nižaza Yooz taku paljayñi jiliržquizimi, nižaza Yooz taku tjaajiñi jiliržquizimi juc'ant honora tjaaz waquiziča, nižaza juc'anti pacz waquiziča.

¹⁸ Tuquitanpacha cjiirta Yooz takuqui tuž cjiča: “Tsjii trigo jojñi aznuqui ñujcžtan ana ñucasacha ana lulajo”. Nižaza cjiirta Yooz takuqui tuž cjiča: “Jakziltat langžñizlaja, jalla niiqui pacta cjis waquiziča”.

¹⁹ Nižaza tsjii žoñikaz icliz jiliržquiz uj tjojtNASAž niiqui, jalla nii žoñž chiitaqui anača nonzqui. Antiz tsjii pucultan čhjepultan tisticu žoñinacaž ujchizpanča cjesaž niiqui, ninacž chiitaqui nonznaquiča.

²⁰ Nižaza jakzilta icliz jilirit uj paañi žejlčhaja, jalla nižquiz ujsnaquiča parti criichi jilanacž yujcquiz. Jalla nižtiquiztan nii parti žoñinacaqui uj paaz jiwjataquiča.

²¹ Jaziqui Yooz Ejpžtan nižaza Jesucristužtan nižaza Yooziž illzta anjilanacžtan, jalla ninacž yujcquizičiqi amquiz mantuča, nii weriž tjaajintanac jaru kamajo, nii. Nižaza jalla nuž kamcan anapanča pjali cjičisqui. Nižaza tjapa žoñinacžtan tsjii kuzziz cjis peca.

²² Nižaza ima icliz jilirž puestuquiz uchan, nii žoñž kuz zumpacha tantiižinaquiča. Ana zumpacha tantiyaquiž niiqui, tsjii amiž uchta icliz jiliričiqi ujquiz tjojtNASAča. Nekžtan parti žoñinacaqui amquiz zakaz uj tjojtNASAča. Jaziqui ima uchcan zumpacha tantiiž waquiziča. Nižaza am persun kuzquiz cuitasa ana ujquiz tjojtSjapa.

²³ Amiž walu ancha laa laa cjenaqui, anam kjaz alaja licasača. Tsjii kulla cunta koluc vinulla licsNASAča.

²⁴ Yekjap žoñinacaž uj paatanacaqui kjanapacha tjeežta cjiſsa ima casticta cjiſnan. Yekjap žoñinacaž uj paatanacazti chjojžta cjesača, casticz tjuñicama. Nekžtan tjeežtaž cjequiča.

²⁵ Jalla nižtapacha yekjap žoñinacaž zuma paatanacaqui kjanapachača. Yekjap žoñinacaž zuma paatanacazti ana chertača. Pero anaž tirapan chjojžta cjequiča. Pjalz tjuñquizičiqi tjeežtaž cjequiča.

6

¹ Criichi žoñinacžquiz chiižina, tuž cjičan: Patrunž mantuquiz kamñi piyunanacaqui persun patrunžquiz rispitle, parti žoñinacaž werar Yooz quintra ana chiyajo, nižaza tjaajinta Yooz taku ana iñarajo.

² Nižaza jakzilta piyunanacat criichi patrunchizlaj niiqui, juc'anti rispitle, ana quintra chiila, nii patrunaž criichiž cjen. Antiz juc'anti nii patrunžta langžinspanča. Am patrunchača criichi mazičiqi. Jalla nižtiquiztan zuma k'ayi jilača niiqui. Jalla nii puntunaca chiižinaquiča, nižaza tjaajnaquiča.

ANA WALI TJAAJIÑINACŽ PUNTU

³ Tsjii žoñiqui tsjemat pinsita takunacžtan tsjii kjutñi tjaajnačhani. Jalla nižta ana wali tjaajnaquiž niiqui, Jesucristo jiliriž zuma tjaajintanacquiztan tsjemataž tjaajinča. Nižaza nii žoñiqui Yooz mantita kamañquiztan tsjemata kamaña tjaajinča.

⁴ Jalla nižta tjaajiñi žoñiqui mit kuzzizza. Yooz puntunaca ultim werara ana zizza. Nižaza nižta tjaajiñi žoñiqui ana wali kuzziz cjen žoñinacžtan ch'aazkaz pecča. Chjul taku puntuquiztan ch'aazkaz pecča. Jalla nuž ch'aazcan chjaawjkatas žejlča, nižaza t'aka t'akaž cjiſsa, nižaza žoñinacaqui quintra chiyas žejlča. Nižaza porapat uj tjojt-nassa.

⁵ Nižaza nii millk'u kuzziz žoñinacaqui porapat ana tucuziñi ch'aasñiča. Ninacaqui Yooz pinsitanacami zuma werar razunanacami ana zizza. Tii muntuquiz wali jiru kamz cjis pinsican, Yooz jiczquin luzza. Nii wali jiru kamzqui, “Jalla nii kamzazza waličiqi”, cjičan pinsiñiča. Jalla nii ana wal pinsitanacchiz žoñinacžtan ana munazaquiča.

⁶ Pero tsjiikaz cjiwča. Yooz jiczquiz kamzqui ancha waliča, wali jiru kamzquiztan juc'anti. Yoozquinkaz kuzziz cjičan žoñinacaqui cuntintu cjequiča.

⁷ Tii muntuquiz nascuqui učhumqui ana čjulchiztača. Nižta irata ticžcuqui tii muntuquiztan ana čjulchiz okaquiča.

⁸ Jalla nižtiquiztan tii muntuquiz žejlcan, čhjerchizimi zquitchizimi cuntintu cjistanča.

⁹ Jakziltat wali jiru cjis pecčhaja, ujquiz tjojtsnasača, nižaza ana wal jiczquiz lusasača. Nekztan zumzu pinsamintuchiz cjesača. Nižaza persun quintra ana wal kamzquizkaz pecasača. Nekztan nii ana wal kamtiquiztan tjappacha pertaquiča. Liwj akztaž cjisnaquiča nii žoñiqui.

¹⁰ Paazquin kuz tjazqui tjapaman ana walinacquiz cjiskatča. Paazquin kuz tjaacan yekjap criichi žoñinacaqui Yoozquiztan tsjii kjutñi chjichta cjissiča. Nekztan persunpacha wira ancha sufriskatča.

TIMOTEOZQUIZ CHIIZINTA TAKUNACA

¹¹ Timoteo jila, amqui Yooz žoñimča. Jaziqui ana walinacžquiz anapan kuz tjaaquiča. Antiz zuma kamzquin kuz tjaaquiča. Yooz kuzcama kama. Nižaza Yoozquin kuzzizpan cjee. Nižaza zuma munaziñi kuzziz cjee. Nižaza pasinziz kuzziz tjurt'a. Nižaza humilde kuzziz cjee.

¹² Zuma zultatužtakaz Yoozquin tjurt'iñi kuzziz cjee, nižaza Satanás diabluž partiranacž quintra cjee. Nižaza arajpachquin Yooztan wiñaya kamzjapa, kuz tjaaquiča. Arajpachquin wiñaya kamajo Yoozqui am kjawziča. Nižaza nuž kjawztan, amqui walja žoñinacž yujcquiz ticlarchamča, “Yoozquinkaz kuzziztča wejrqui” cjan.

¹³ Timoteo jila, Yoozqui tjapa tii muntuquiz žejlñinacžquiz žeti tjaača. Nižaza Jesucristuqui Poncio Pilatuž yujcquiz Yooz Ejpžquinkaz kuzziztača. Jaziqui Yooz yujcquizimi Jesucristuž yujcquizimi wejrqui amquin mantuča,

¹⁴ Yooz kamañquikaz kama, jalla nii. Nekztan žoñinacaqui Yooz kamaña quintra ana čhjul chiyasača, nižaza Yooz kamañaqui zumapankaz tjeežta cjequiča, Jesucristo Jiliriž tjonz tjuñicama.

¹⁵ Yooz Epiž pinsita timpuquiz Jesucristuqui wilta tjonaquiča. Yooz Ejpqui zinta zuma Yoozza. Jalla niiča tjappachquiztanami chekanaqui. Nižaza Yoozqui tsjan pajk jiliriča čhjul jilirinacžquiztanami. Nižaza niiča juc'ant azziz mantiñiqui čhjul mantiñinacžquiztanami.

¹⁶ Yoozpankazza wiñay žejtchizqui. Nižaza anaž jec ujchiz žoñimi Yoozquin macjati atasacha juc'ant zuma kjañquiz kamchi, nekztan. Jalla nižtiquiztan anaž jec žoñimi Yooz cherchiča, nižaza ana cherasača. Yoozqui wiñaya honorchiz cjila. Nižaza wiñaya mantiñej cjila. Jalla nužoj cjila. Amén.

¹⁷ Amqui tii muntuquiz wali jiru kamñi žoñinacžquiz mantaquiča, ancha cusasanacchiz cjenami ana mita kuzziz cjeyajo. Anaž wiñaya nižta wali jiru kamasacha. Jalla nižtiquiztan cusasanacquiz anača kuz tjazqui. Antiz Yoozquinkaz kuz tjaa. Nii žejtñi Yoozpankaz učumnacaquiz tjapaman wintizunanaca tjaača, učumnaca cuntintu kamzjapa.

¹⁸ Nižaza nii wali jiru kamñi žoñinacžquiz mantaquiča tuž kamajo. Ninacaqui zuma obranaca paaz waquiziča. Nekztan zuma obranacaž paachiž cjen ultim werar wali jiruž cjequiča Yooz yujcquinaqui. Nižaza ninacaqui zuma kuztan ninacž cusasanacžtan žoñinacžquiz yanapz waquiziča. Ana zkutu kuzziz cjis waquiziča.

¹⁹ Jalla nuž zuma obranaca paatiquiztan arajpachquin ultim werar cusasanaca juntaquiča. Nuž juntitiquiztan, ultimupan Yoozqui arajpachquin ninacžquiz zuma kamkataquiča, wiñaya. Jalla nii arajpachquin wiñay kamzquin kuz tjaz waquiziča. Nii kamzqui juc'ant zumača. Jalla nuž wali jiru žoñinacžquiz mantaquiča amqui.

²⁰ Timoteo jila, wejrqui amquiz tjapa Yooz puntunacquiztan tjajinčinča. Jalla nii tjajintanaca zumpacha cjuñzna, nižaza nii jaru kama. Nižaza ina žoñž takunaca ana nonžna. Ana Yooz takunacača ninacž takunacaqui. Nižaza zuma tjajintanac quintra chiitaqui ana nonžna. Yekjap žoñinacaqui tsjii kjutñi chiižcuqui, “Zuma zizta takuča weriž chiitaqui”, cjiñiča.

²¹ Nižaza yekjap criichi žoñinacaqui nii ana wal taku catokžcu Yoozquiztan tsjii kjutñi zarakchiča. Ana zuma kuzziz cjissiča.
Yoozqui am wintijla. Jalla nužoj cjila. Amén.

SEGUNDA CARTA DEL APOSTOL SAN PABLO A TIMOTEO

¹ Wejrtča Pablutqui. Yooz muñañpi jaru Jesucristuž illzta apostoltča. Yoozqui Jesucristuž cjen žoñinacžquiz taku tjaachiča, Jesucristužquin kuz tjaañi žoñinacžquiz wiñaya arajpachquin kamkatzjapa. Jalla nii wiñaya kamz puntuquiztan paljayajo wejrqui apóstol puestuquiz uchtitča.

² Timoteo jila, amqui wejt k'ayi maati cuntamča. Jalla nekztanaqui tii cartal cijrzcucha. Učhum Yooz Ejpžtan nižaza učhum Jesucristo Jiliržtan, jalla ninacaqui amquin zumaj yanapla, nižaza amquin okžla, nižaza zuma cuntintu kuzziz kamkatla.

TIMOTEOZQUIZ CHIIZINTA TAKU

³ Wejrqui majiñami weenami Yoozquin mayizican, am cjuñucha. Am cjuñzcu, wejrqui amiž cjen tirapan Yoozquin sparaquiž cjiwča. Yoozquin tjapa kuztan lijituma sirwuča. Jaknužt wejt tuquita atchi ejpnaca Yoozquin zuma sirwitčhaja, jalla nuž Yoozquin sirwuča.

⁴ Wejrqui cjuñucha, amiž wejtquiztan kaazñiž cjen. Nižaza wilta am chertz anchal pecuča. Nekztan cuntintul cjeeča.

⁵ Nižaza cjuñucha, amqui tjapa kuztan Yoozquin criichamča, jalla nii. Primeraqui am Loida cjiti matilliqui Yoozquin kuzziz cjissintača. Nekztan am Eunice cjiti maa Yoozquin kuzziz zakaz cjissintača. Nižazakaz amqui ultimupan Yoozquin kuzziz cjissamča.

⁶ Yoozqui amquiz tsjii zuma kamaña tjaachiča, weriž am juntuñ kjaržtan lanžtan. Jalla nižtiquiztan amquin chiižinuča, nii zuma kamañquiz tira kamajo.

⁷ Yoozqui učhumquiz eksñi kuzziz ana cjiskatchiča. Antiz tjup kuzziz cjiskatchiča, nižaza zuma munaziñi kuzziz cjiskatchiča, nižaza zuma pinsiñi kuzziz cjiskatchiča.

⁸ Jaziqui amqui anapanim azaquiča, učhum Jesucristo Jilirž favora paljaycan. Wejrqui Jesucristuž cjen carsilquiz chawjctitča. Jalla nuž cjenami amqui ana wejtquiztan azaquiča. Amqui Yooz zuma liwriiñi taku paljayñiž cjen zakam sufriča. Nii sufrisquiztan ana jiwjatalla. Yoozqui amquiz azi tjaažcaquiča tjurt'izjapa.

⁹ Nii azi tjaañi Yoozza učhum liwriichiQUI. Nekztan učhum kjawziča nižquin tjapa kuztan kamzjapa. Yoozqui učhum ana kjawziča učhumnacaž zuma paatiquiztan. Antiz Yoozqui učhum kjawziča niž persun kuz munañpi jaru, nižaza niž persun okžñi kuzziz cjen. Ima tii muntu želan Yoozqui tantiichiča, Jesucristužquin kuzziz žoñinacžquiz niž okžñi kuz tjeeznaquiča, nii.

¹⁰ Jazizti Yoozqui učhum Liwriiñi Jesucristuž tjonchiž cjen niž okžñi kuzziz tjeeziča. Jesucristuqui ticz liwj atipchiča persunaltajapami nižaza nižquin criichi žoñinacžtajapami. Nižaza liwriiñi Yooz taku paljaytiquiztan, jaknužt žoñinacaqui Yooz-tan wiñaya kamčhaja, jalla niiqui kjanzt'itača.

¹¹ Jalla nii zuma quintu paljayajo Yoozqui wejr utchiča apóstol puestuquiz. Nižaza wejr utchiča ana judío žoñinacžquiz tjaañajo.

¹² Jalla nižtiquiztanpacha wejrqui ancha sufruča tii carsilquiz chawjckatzcama. Jalla nuž cjenami wejrqui anapan azuča, werar Yooztan tsjii kuzziz cjen. Werar arajpach Yoozquinpanž kuz tjaachinča. Nižaza tuž cjiwča, wejt Yoozqui walja azzizza. Jaziqui niiqui weriž cumpjiita wira cuitaquiča Jesucristo tjonz tjuñicama. Jalla niča zuma werar razunaqui.

¹³ Werjqui amquiz zuma tjaajinchinča. Jalla nii tjaajintacama amqui tirapan tjapa kuztan kamaquiča. Yoozquin kuzzizpan cjequiča, nižaza žoñinacžtan zuma munaziñi kuzziz cjequiča. Jalla nuž kamaquiča Jesucristužtan tsjii kuzziz cjen.

¹⁴ Yoozqui amquin niiz zuma tjaajintanaca tjaachiča. Jalla nii zuma taku cuitaquiča. Učhum kuzquizpachača Espíritu Santuqui. Jalla niiqui amquiz yanapaquiča nii Yooz taku zuma lijituma tjaajnajo.

¹⁵ Tjapa nii Asia provinciquiztan tjonchi žoñinacaqui wejr zinalla ecchiča. Jalla ninacquiztan Figelo, nižaza Hermógenes, jalla ninacaqui wejr ecchizakazza. Nii zizza amqui.

¹⁶ Onesiforožti ancha wejr kuzziča wiltan wiltan. Nižaza weriž carsilquiz chawjctaž cjen ana azziča. Jalla nižtiquiztan zuma okzñi kuzziz Yooz Jiliriqúi niizquiz zumaj yanapla, niiz familianacžtanpacha.

¹⁷ Roma cjita wajtquiz želan, nii Onesíforo jilaqui wejr ancha kjurchiča zalañcama.

¹⁸ Jesucristo Jiliriž pjalz tjuñquiziqui Yooz Jiliriqúi nii Onesiforožquin okzñi kuzziz cjequiča. Efeso wajtquin želan, Onesiforoqui jaknužumi criichi žoñinacžquin yanapchiča, jalla nii amqui zuma zizza.

2

JESUCRISTUZ ZULTATUZTAKAZ CJISPANCHA

¹ Timoteo jila, wejt maati cuntamča. Tjup kuzziz cjee. Jesucristuqui amquiz yanapaquiča.

² Wejrqui walja žoñinacaž želan Yooz taku tjaajinchinča. Ninacžtanpacha amqui weriž tjaajintanaca nonzamča. Jalla nii tjaajinta takunaca amqui tjaajnaquiča zuma cumpliñi kuzziz žoñinacžquizimi. Nekztan nii žoñinacaqui yekjanacžquizimi tjaajnasacha.

³ Amqui Jesucristužquin sirwiñiž cjen sufraquiž niiqui, nii sufrizquiztan ana jiwjata. Jalla nuž sufrican, Jesucristužquin tjurt'aquiča walja tjup zultatužtakaz.

⁴ Jakzilta zultatut servicio militarquiz žejlčhaja, jalla niiqui militar asuntunacquiz tjapa kuz tjaacha. Ana panž civil asuntunacquiz kuz tjaasacha. Niiz comandantiž mantuquiz cjissa, nii comandantiž kuz wali cuntintu cjiskatzjapa. Jaziqui zultat lii jaruž kamča, anapanž civil lii jaruž kamča.

⁵ Jalla nižta irata jakziltat pelota uzinčhaja, pelot uzinz lii jaru uzinztanča. Ana pelot uzinz lii jaru uznaquiž niiqui, anapanž premio ganasacha.

⁶ Nižaza jakzilta langzñi žoñit zkala langžaja, jalla niiqui primeraž zkal čhjerquiztan lulasacha.

⁷ Jalla nii weriž chiita puntuquiztan tantiya. Jalla nekztan Yooz Jiliriqúi tjapa nii puntuquiztan zumpachaž intintiskataquiča.

⁸ Nižaza Jesucristuž puntu cjuñzna. Jesucristuqui David cjita tuquita jilirž majchmaatinacquiztan tjonñiča. Jesucristuž ticziquiztan jacatatchi puntu cjuñzna. Jalla nii liwriiñi takupacha paljayuča.

⁹ Jalla nuž paljaytiquiztan wejrqui carsilquiz chawjcta sufruča, criminal žoñižtakaz. Jalla nuž weriž carsilquiz chawjcta želanami, liwriiñi Yooz takuqui anača chawjcta. Jalla nižtiquiztan Yooz takuqui tirapanž paljaytača.

¹⁰ Jalla nižtiquiztan wejrqui walja sufruča Yooziž illzta žoñinacžquiz juc'ant wali cjiskatzjapa. Sufruča ninacami wejrmi ultimu liwriita cjisjapa. Jesucristužquiz kuzziz cjen ninacami wejrmi wiñayaž liwriita cjequiča, nižaza arajpachquin wiñaya honorchiz cjequiča.

¹¹ Jesucristuqui učhum laycu ticziča. Jalla niiča ultim werar razunaqui. Učhumqui tuquita ana wal kamañquiztan ticzi žoñinacžtakaz cjissinčhumča, nii ana wal kamañquiz ana iya kamajo. Jaziqui ew kamañchiz cjissinčhumča. Jalla nižtiquiztan Jesucristužtan kamča.

¹² Nižaza Jesucristužquiz sirwiñiž cjen sufračhaj niiqui, tjurt'ichi kuzziz kamz waquiziča. Nekztan tjurt'ichi kuzziz tirapan cjequiž niiqui, učhumqui nižtan

chica mantaquiĉha. Uĉhumqui Jesucristužquiz nicaquiž niiqui, niiqui nižaza uĉhum nicaquiĉha.

¹³ Jaziqui uĉhumž Jesucristužquiz criiz ana cumplichiž cjenami, nii Jesucristuqui tirapanž niž ecta taku cumplaquiĉha. Niiqui persun taku anapanž nicasaĉha.

YOOZTAJAPA ZUMA LANGZPANCHA

¹⁴ Amqui criichi jilanacžquiz nii puntu cjuñskataquiĉha. Nižaza Jesucristo Jilirž tjuuquiz ninacžquiz zumpacha chiižinaquiĉha, jalla tužu: Anaž ch'aazaquiĉha ina žoñž takunac puntuquiztan. Jalla nuž ch'aazqui anaž ĉjuljapa sirwiĉha. Nižaza nii ch'aazta taku nonžñi žoñinacaqui Yooz jiczquiz kamzquiztan tsjii kjutñi ĉjichtaž cjesaĉha.

¹⁵ Amqui Yooztajapa tjapa kuztan langzna, Yooz yujcquiziqui zuma langzñi žoñi pajta cjisjapa. Jalla nižtiquiztan Yooz yujcquiz žejlcan amqui ana ĉjulquiztan azasaĉha. Nižaza Yooztajapa langžcan, niž werar liwriñi taku legali paljaya.

¹⁶ Ina žoñž takunacaqui anaĉha chiizqui. Jalla nii ina takunaca chiyasaž niiqui, tsjan tsjan tsjii kjutñi žoñinacžquiz irpaquiĉha.

¹⁷ Nii ana wal chiizqui zuma kamañanaca ana wali cjiskataquiĉha, jaknužt tsjii laa cjiñi tjapa curpu ana wali ch'ujlkatĉhaja, jalla nižta. Jalla nuž watchiĉha Himeneožtan Filetužtan, jalla ninacžquiz.

¹⁸ Jalla ninacaqui werar Yooz tawkquiztan tsjii kjutñi tsjemat taku parličiĉha, “Jacatatz tjuñiqui watchiĉha”, cjican. Jalla nuž chitiquiztan yekjap criichinacž kuznacaqui turwayskatžcu, Yooz jiczquiztan zarakskatĉiĉha.

¹⁹ Jalla nuž cjenami Yoozqui nižquin kuzziz žoñinaca yanapĉha tjurt'iñi kuzziz cjeyajo. Jalla nižtiquiztan Yooz icliz žoñinacaqui tirapan tjuraquiĉha. Jalla nii puntuquiztan Yooz takuqui tuž cjiĉha, “Yooz Jiliriqui niž illzta žoñinacaž pajĉha”. Nižaza, “Tjapa Jesucristužquin kuzziz žoñinacaqui ana wali kamañquiztan zarakstanĉha”. Jalla nužupanĉha.

²⁰ Tsjiilla cjesaĉha. Tsjii ricach žoñž kjuyquiziqui tjapaman cusasanaca žejlĉha, korquiztan paata, nižaza paazquiztan paata, nižaza tabliquiztan paata, nižaza ljocquiztan paata, jalla nižta cusasanaca žejlĉha tsjii kjuyquiziqui. Parti cusasaqui zuma visitanaca atintizjapa žejlĉha. Parti cusasazi zapuru kamzjapa žejlĉha.

²¹ Jalla nižta irataĉha žoñinacaqui. Yooz Jilirž atintizjapa, nižaza zuma honorchiz cjisjapa, zuma kamstanĉha. Nižaza nii ana wali chiiñi žoñinacžquiztan cuitasaquiĉha. Yooz Jiliržtajapa sirwiñi pankaz cjee. Nekztan Yooz Jiliriqui am ocupasaĉha. Nižaza listu cjesaĉha ĉjul wali paazjapami.

²² Tjotjowanacaqui ana wali pinsizcu, ana wali ojklayasaĉha. Amqui nižta anawali kamzquiztan cuitasaquiĉha. Yooz kuzcama kamaquiĉha, nižaza Yoozquinkaz kuzziz cjequiĉha, nižaza zuma munaziñi kuzziz cjequiĉha, nižaza parti žoñinacžtan zuma kamaquiĉha. Amtan tjapa Jesucristo Jiliržquin kuzziz žoñinacžtan zuma kamz waquiziĉha.

²³ Nižaza zumzu ana zizñi žoñinacaž ch'aaz puntunaca parlanaqui, ana mitisaquiĉha. Nii ch'aaz puntu parlaquiž niiqui, ultimupan juc'anti aptjapznasaĉha. Jalla nii zizza amqui.

²⁴ Jesucristo Jiliržquin sirwiñi žoñiqui anaž ch'aaz waquiziĉha. Antiz tjapa žoñinacžtan zuma munaziñi kuzziz kamz waquiziĉha. Nižaza zuma tjaajiñi kuzziz cjis waquiziĉha. Nižaza pasinziz kuzziz cjis waquiziĉha.

²⁵ Nižaza Yooz tawk quintra žoñinacžquiz chiižinaquiĉha zuma humilde kuztan. Jalla nuž chiižinan Yoozqui cunamit ninacž kuz campiiskataĉhani, werar Yooz tawk jaru wilta kamajo.

²⁶ Anziqui ninacaqui diabluž kjarquiz žejlĉha, tsjii presužtakaz, diabluž mantita jaru ojczjapa. Amiž humilde kuztan chiižintiquiztan Yoozqui cunamit diabluž kjarquiztan ninacžquiz liwriita cjiskataĉhani.

3

ANCHA ANA WALI ZOÑINACA ZELAQUICHA

¹ Jalla tižta zakaz intintazkatz pecučha. Ima Jesucristuž tjonan ch'amaž cjequičha zuma kamzjapa.

² Zoñinacaqui persun kuzcama kamzkaz pecaquičha. Nižaza paazquiz kuz tjaaquičha. Nižaza persun honorchiz cjis pecaquičha. Nižaza mit kuzziz cjequičha. Nižaza Yooz quintra chiiñi cjequičha. Nižaza maa ejpž takunaca ana casñi cjequičha. Nižaza ana jeczquizimi sparaquiž cjiñi cjequičha. Nižaza Yooz kamañ puntu ana rispitaquičha.

³ Nižaza ana okzñi kuzziz cjequičha. Nižaza ana jecztanami zuma kamaquičha. Nižaza žoñinacž quintra takunaca joojowaquičha. Nižaza jaknužt persun kuz pinsiçhaja, jalla niicama ojklayñi cjequičha. Nižaza žoñi sufriskatz pecñi kuzziz cjequičha. Nižaza zuma žoñinacž quintran cjequičha.

⁴ Nižaza tarasuna paañi kuzziz cjequičha. Nižaza ana eksñiž malcreados cjequičha. Nižaza persun honorchiz cjis pecñi kuzzizkaz cjequičha. Nižaza persun kuzcama kamzquinkaz kuz tjaaquičha. Yooz kuzcama kamzquin anapan kuz tjaaquičha.

⁵ Ninacaqui Yoozquin criichiž cuzturumpi jaru ojklayñiž cjenami, ultimquiziqui persun kamañ wira kaz paaquičha, anaž Yooz kamañ jaru cjequičha. Yooz aztan ana kamaquičha zuma kamzjapa. Jalla nižta kamñi žoñinacžtan anaçha ancha amigo pajasqui.

⁶ Nižaza yekjapanacaqui nii ana wal kamñi žoñinacžquiztan maatakžtan kjuyquiz luz pecçha, nii kjuychiz uj paañi maatakžquiz incallzjapa. Nižta maatakanacaqui uj paazquiztan ana atipasaçha. Nižaza juc'ant juc'ant ujchiz cjissa. Persun kuz ana ewjasñi atçha. Jaziqui nii maatakanacaqui çhjul ana wali pinsitanacž jaru ojklayçha.

⁷ Zizñi cjis peccu, çhjul tjaa jintanacami catokçha. Pero anawira werar Yooz taku intintazñi cjis atasaçha.

⁸ Jalla nižtakaztaçha pucultan yatirinacaqui, Janes cjita žoñžtan nižaza Jambres cjita žoñžtan. Jalla ninacaqui Moisés quintra paachiçha. Jalla nižta irata nii ana wal kamñinacaqui werar Yooz tawk quintra paaçha. Nižaza nii ana wal kamñi žoñinacaqui ana zum pinsamintuchiz tsjii kjutñipan chiiñiçha “Yoozquin kuzziztçha” cjicanaqui. Pero zumpacha tantiita cjequičha. Nekztan ninacž ana zuma kuz kjanapacha tjeežta cjequičha, tjapa žoñinacaž ninacž puntuquiztan werara zizajo.

⁹ Ninacaqui tsjii ratupanikaz ninacž taku walkatasaçha. Nekztan žoñinacapachaž ninacž taku zuma tantiižcu ninacž ana zuma razunanaca nayaquičha. Jalla nižta watchiçha Janetan Jambrestan.

PABLUZ KAMTANAC PUNTU

¹⁰ Amzti weriž tjaa jintanaca zumpacha catokchamçha, nižaza weriž kamtanacami zumpacha zizzamçha, nižaza weriž kuzquiz tantiitanacami, nižaza weriž Yoozquin kuzziz kamtanacami, nižaza weriž zuma pasinziz kuzziz kamtanacami, nižaza weriž zuma munaziñi kuzziz kamtanacami, nižaza weriž tjurt'iñi kuzziz kamtanacami,

¹¹ nižaza žoñinacaž wejtquiz chjaajwkatcan kamtanacami, nižaza weriž sufrican kamtanacami. Jalla tjapa weriž kamtanacami zizzamçha. Nižaza amqui zumpacha zizza, jaknužt wejtquiz watçhaja Antioquia wajtquizimi, Iconio wajtquizimi, Listra wajtquizimi. Jalla nii watjanacquiziqui ancha sufrichinçha. Jalla nuž sufrichiž cjenami Yooz Jiliriqui wejr liwriichiçha tjapa nii sufrisquiztan.

¹² Jalla nižta sufraquičha tjapa criichi žoñinacaqui. Jakzilta criichi žoñinacat Jesucristuž kuzcamapan zuma kamz pecçhaja, jalla nižta sufraquičha tjapa ninacaqui.

¹³ Nižaza ana wal kamñi žoñinacami nižaza incallñi žoñinacami tsjan juc'anti ana waliž kamaquičha, žoñinacžquiz incallaquičha, nižaza ninacaqui incallta zakaz cjequičha.

¹⁴ Amzti amiž zizta Yooz tawk jaru kamcan tirapan tjurt'iñi kuzziz cjequiča. Nižaza amqui zizza jecčhalaj amquiz tjajinchi, jalla nii. Nii tjajintanaca zumpacha tantižcu, legali Yooz takucamača nii tjajintanacaqui, jalla nii tantiyazzamča.

¹⁵ Koltallquiztanpacha amqui cjiirta Yooz taku zizzamča. Nii Yooz takuž istutiican, amqui liwriiñi puntu ancha zizñi cjissamča. Yooz takuqui tjajža, jaknužt liwriita cječhaja, Jesucristužquiz criichiž cjen, jalla nii.

¹⁶ Tjapa nii cjiirta Yooz takuqui Yoozquiztancama ulanchicamača. Jalla nižtiquiztan Yooz takuča zuma tjajiniñpanqui, nižaza uj tjeezniñi, nižaza zuma Yooz jiczquiz ojklajajo azquichniñi, nižaza tjapa Yooz kuzcama tjajiniñpanqui.

¹⁷ Jalla nužupanča Yooz takuqui. Yooz taku zumpacha catokžcuqui, Yoozquin kuzziz žoñinacaqui zumpacha zizni cjiissa Yooz kamañquizkaz zuma kamzjapa. Nižaza Yooz taku catokžcuqui Yoozquin kuzziz žoñinacaqui zumpacha tjaczi cjiissa, tjapaman walinaca paazjapa.

4

PABLUZ CHIIZINTA TAKU

¹ Jesucristo Jiliriñi mantizjapa tjonaquiča. Jalla nuž tjonžcu ticzimi žejtñimi pjalznaquiča. Jalla niž yujcquizimi Yooz Ejpž yujcquizimi am chiižinuča, Yooz taku paljayaquiča amqui.

² Nižaza timpuchiz cjicanami ana timpuchiz cjicanami tirapan Yooz tawkžtan žoñinacžquiz chiižinaquiča. Nižaza žoñinacžquiz intintiskataquiča Yooz taku werarača, jalla nii. Nižaza uj paañi žoñinacžquiz Yooz tawkžtan ujznaquiča. Nižaza zumpacha amtayaquiča. Jalla nuž chiižincan, zuma pasinziz kuzzizpan tirapan tjajnaquiča.

³ Tsjii timpuž tjonaquiča. Jalla nii timpuquiz žoñinacaqui zuma Yooz taku tjajintanaca anaž nonz pecaquiča. Antiz jakzilta tjajiniñit ninacž persun kuz wali cjiskatačhaja, jalla nii tjajiniñinaca nonzkaz pecaquiča. Ninacž persun ana wali razun jaru, jalla nižta tjajintanaca pecaquiča.

⁴ Werar Yooz taku anapanž nonz pecaquiča. Ina žoñž parlakaz nonz pecaquiča.

⁵ Amzti zuma werar razunanac jaru tirapan lijituma kamaquiča. Sufričanami zuma tjurt'iñi kuzziz cjequiča. Nižaza zuma liwriiñi Yooz taku paljayzquin kuz tjaaquiča. Nižaza amqui Yooziž tjata kamaña cumplaquiča.

⁶ Wejrqui tsjii wilanažtakaz contal cječa. Wejt ticz tjuñiñi wajillača.

⁷ Zuma zultatužtakaz wejrqui Yoozquin zuma tjurt'iñi kuzzizpan žejlchinča. Nižaza werjqui wejt apóstol oficio zuma cumplichinča. Nižaza tirapan Yoozquin tjapa kuztan criyuča.

⁸ Jaziqui arajpachquin ojkžcu weriž Yooz kuzcama kamtiquiztan, tsjii zuma premiužtakaz gansjapa tjewznuča. Jesucristo Jiliriča lijituma pjalniñi. Jalla niñi niž pjalz tjuñquiz nii premio wejtquiz tjaaquiča. Anaž wejtquizkaz premio tjaaquiča. Tjapa nižquin kuzziz žoñinacžquiz premio tjaaquiča. Ninacazakaz niž tjonz tjuñi ancha tjewža, ancha chertz pecča.

PABLUQUI ZINALLA CARSILQUIZ ZEJLCHA

⁹ Timoteo jila, tsjiillakaz cjesača. Tsjii wiltallami wejr chertzniñpan tjonz pecall amqui. Wajilla tjonalla.

¹⁰ Demazti wejr zinalla ecchiča. Tii muntuquiz žejlñi cusasanaca juc'anti pecča. Jalla nekztan wejtquiztan ojkchiča Tesalónica watja ojkzjapa. Nižaza Crescentiqui Galacia yokquin ojkchiča. Nižaza Tituzti Dalmacia yokquin ojkchiča. Jaziqui wejtquin tjonalla.

¹¹ Lucaskazza wejttañ chicaqui. Jaziqui Marcos kjurznaquiča. Nuž wajtžcumi zjiicaquiča amtan. Marcosqui wejtquiz zuma yanapasača Yooztajapa langzquiztan.

¹² Tíquico wejrqui cuchanchinča Efeso wajtquin.

¹³ Amqui tjoncan wejt irs caputi zjijcnaquiča. Wejt irs caputi ecchinča Carpos kjuyquiz Troas wajtquin. Nižaza librunaca zjijcnaquiča. Tsjan chekanac wejt papilanaca zjijcnaquiča.

¹⁴ Alejandro, nii cobre jirunaca paañiqui ancha wejt quintra paachiča. Jalla niiz paatiquiztan Yooz Jiliriqúi nii casticaquiča.

¹⁵ Amqui niizquiztan cuitasaquiča. Niiqúi učum paljayta Yooz taku ancha quintrača.

¹⁶ Weriz jilirnacž yujcquiz primera tjurt'iñi tawkžtan chiyan, anaž jecmi wejtquiz tjurt'i yanapchiča. Tjapa wejr zinalla ecchiča. Ninacaž ectiquiztan Yoozqui ninaca anakaj casticla.

¹⁷ Yooz Jiliriqúi wejtquiz yanapchiča. Nižaza wejtquiz zuma tjup kuzziz cjiskatchiča, jalla nižtiquiztan wejrqui liwriiñi Yooz taku tirapankal paljayuča, tjapa ana judío žoñinaca nonznajo. Nižaza wejr konz cjen Yoozqui wejr liwriichiča.

¹⁸ Nižaza tjapa ana walinacquiztan wejr liwriyaquiča, nižaza Yoozqui wejr cuitaquiča niž arajpach wajtquin cjisjapa. Zuma Yoozqui wiñaya wiñaya honorchizkaj cjila. Amén.

¹⁹ Tsaanžinalla Priscaquin, nižaza Aquilžquin, nižaza Onesíforuž familianacžquin.

²⁰ Erasto cjita jilaqui Corinto wajtquin eclichiča. Trófimo cjita jila jalla nii laa ecchinča Mileto wajtquin.

²¹ Ima zac timpu luzan tjonžquizpan pecalla. Nižaza amquin tsaanžquiča Eubulo cjita jilami, nižaza Pudente cjita jilami, nižaza Lino cjita jilami, nižaza Claudia cjiti cullacami, nižaza tjapa criichi jilanacami.

²² Jesucristo Jiliriqúi amtan chicaj cjilalla, nižaza tjapa ančucaquiz zumaj wintijla. Amén.

LA CARTA DEL APOSTOL SAN PABLO A TITO

¹ Wejrtcha Pablutqui, Yooz mantitacama okiñ zoñtcha, nižaza Jesucristuž cuchanžquita apostoltcha. Jesucristuqui wejr apóstol puestuquiz utchiča criichi zoñinacžquiz Yoozquin juc'ant kuzziz cjiskatzjapa, nižaza Yooz kamañ puntu ultim werara zizkatajo,

² nižaza arajpachquin Yooztan wiñaya kamz tjewzkatajo. Yoozqui ana toscara chiyasača. Jalla niiqui arajpachquin wiñaya kamzjapa taku tjaachiča tuqui timpuquiztanpacha.

³ Nekztan niž pinsita timpuquiz Yoozqui nii kamz puntuquiztan kjanapacha kjanzt'ichiča paljayta liwriiñi Yooz tawkquiztan. Nii liwriiñi taku paljayajo, ućhum Liwriiñi Yoozqui wejtquiz mantichiča. Jalla nižtiquiztan wejrtcha liwriiñi taku paljayñi kamañchizqui.

⁴ Tito jila, jaziqui wejrqui amquin tii cartal cijjrzcuča. Wejt maati cuntamča. Amqui Yoozquin kuz lijituma tjaachamča. Jaziqui pucultan ućhumqui Yoozquin kuzzizćhumča. Yooz Ejpžtan nižaza Jesucristo ućhum Liwriiñižtan, amquiz yanapla, nižaza amquiz okzla, nižaza walikaj kamkatla.

ICLIZ JILIRINACAQUI ZUMA KAMZPANCHA

⁵ Creta yokquin wejrqui am ecchinča, criichi zoñinacžquiz juc'ant zuma kamañanacchiz cjiskatajo, nižaza weriž mantitacama zapa wajtquiz icliz jilirinaca uchajo.

⁶ Icliz jilirinacaqui zuma kamzpanča: Zuma kamañchizlaj niiqui, ana jakziltami ćhjul ujmi tjeeznasača. Icliz jilirinacaqui tsjaa tjunatanpanikaz cjispanča. Nižaza niž maatinacaqui Yoozquin criiñi cjispanča. Nižaza niž maatinacaqui zuma kamañchiz cjispanča, ana malcreado. Nižaza maa ejp cazñi kuzziz cjispanča.

⁷ Jakzilta icliz jilirit Yooz icliz cwitiñi puestuquiz uchta cjećhaja, jalla niiqui zuma kamañchizkaz cjispanča, jalla nižtiquiztan ana jakziltami nižquiz ćhjul ujmi tjeeznasača. Nižaza ana persun kuzcamakaz pecñi cjispanča. Nižaza ana oralla žawjñi kuzziz cjispanča. Nižaza ana licñi kuzziz cjispanča. Nižaza ana kichjasñi kuzziz cjispanča. Nižaza ana ancha paaz pecñi kuzziz cjispanča.

⁸ Nižaza ćhjul tjonzninacžquizimi zuma kjawzñi kuzziz cjispanča. Nižaza zumanacapan pecñi kuzziz cjispanča. Nižaza zuma pinsamintuchiz cjispanča. Nižaza Yooz kuzcamapankaz kamñi kuzziz cjispanča. Nižaza Yoozquin tjapa kuz sirwiñi cjispanča. Nižaza persun kuz zuma ewjazñi cjispanča, ćhjul uj paaz cjenami.

⁹ Nižaza apostoluž tjaajinta jaru ultim werar Yooz tawkquiz tjurt'ichi kuzziz cjispanča. Nižaza werar Yooz taku zuma tjaajincan, criichi zoñinacžquiz p'ekinchayasača, nižaza Yooz tawk quintra chiiñinacžquiz ninacž ana zuma pinsamintunaca tjeeznasača.

¹⁰ Creta yokquin walja ana zuma zoñinaca žejlča, ana jiliri cazñi. Nižaza ina razunanacaž chiiñiča. Nižaza criichinacžquiz incallča. Nižaza ninacaqui judío cuzturumpinac jaruzakaz kamz pecñiča. Ninacaqui juc'anti nižta ana waliž kamča.

¹¹ Nii ana zum zoñinacaqui ana wali tjaajinča, paaz gansjapakaz. Jalla ninacž ana zuma chiiñi ataqui chawjcsinsa, ana nižta tjaajnajo. Ninacaqui ana wali tjaajincan, kjuychiz familianaca intiru quejpskatča. Jalla nižta ana wali tjaajinz ana waquiziča.

¹² Tsji Cret wajtchiz zoñiqui ariwiñitača. Nii Cret zoñipacha cjichiča: “Cret wajtchiz zoñinacaqui toscar zoñinacapanča, nižaza malcreado zoñinacača, nižaza walja lujlñi zoñinacača, nižaza jayranacača”. Jalla nuž cjichiča nii Cret zoñiqui.

¹³ Jalla nii žoñiqui razuna chiichiča. Jalla nižtiquiztan Cret wajtchiz anawal criichinacžquiz zumpacha ujznaquiča, Yoozquin tjapa kuzziz werar Yooz tawkquiz tjurt'ajo.

¹⁴ Nižaza chiižinaquiča judío quintunaca ana juyzu paajo. Yekjap žoñinacaqui werar Yooz taku anaž catokz pecča. Jaziqui Cret žoñinacžquiz chiižinaquiča nii Yooz tawk quintra žoñinacž mantitanaca ana juyzu paajo.

¹⁵ Jakziltat Yooz kuzcama zuma kamčhaja, jalla niiqui čhjulu paacanami Yoozquin kuzzizpanča. Pero ana zuma kamañchiz ana criichinacaqui čhjulu paacanami ana Yoozquin kuzzizza, persun pecta kamzquinkaz kuzzizza. Ninacača ana zuma pinsamintuchizkazqui. Nižaza persun uj paažcumi ana naazñiča.

¹⁶ Ninacaqui cjiñiča, “Yooz pajuča” cjican. Ultimquiziqui ana zuma kamñiž cjen Yooz quintranpanikaz kamča. Yoozqui ninacaž ana zuma kamtiquiztan anaž jutzazza. Ninacaqui Yooz kuzcama ana cazñipanča. Nižaza ninacaqui ana čjul zuma paazmi atasacha.

2

ZUMA TJAAJINTA PUNTU

¹ Tito jila, amqui zuma tjajinta jaru tjajnaquiča, jalla tužu:

² Chawc žoñinacaqui zuma ewjazñi kuzziz cjispanča. Nižaza rispitta kamañchiz cjispanča. Nižaza zuma pinsamintuchiz cjispanča. Nižaza Yoozquin tjapa kuzziz cjispanča. Nižaza zuma munaziñi kuzziz cjispanča. Nižaza tjurt'iñi kuzziz cjispanča.

³ Jalla nižta irata zakaz cjispanča chawc maatakanacami. Zuma kamañchiz cjispanča, jaknužt Yooz yujcquiz zuma kamz waquizičhaja, jalla nižta. Nižaza ana čjul ana wal quintumi joojooñi cjispanča. Nižaza ana licñi kuzziz cjispanča. Nižaza parti maatakanacžquiz zumanaca tjajjiñipan cjispanča.

⁴ Nižaza parti maatakanacžquiz chiižinasacha, persun luctakžtanami maatinacžtanami zuma munaziñi cjisjapa.

⁵ Tur maatakanacaqui zuma pinsamintuchiz cjispanča. Nižaza anapanž yekja luctaka pinsispanča. Nižaza kjuya zuma cwitiñi cjispanča. Nižaza okzñi kuzziz cjispanča. Nižaza luctakž jaru cjispanča. Jalla nižta zuma kamtiquiztan anaž jecmi Yooz tjajinta tawk quintra chiyasacha. Jalla nižta tjajnaquiča chawc maatakanacaqui.

⁶ Nižaza tjowa luctakanacžquiz zakaz chiižinaquiča nižta zuma kamañchiz kamajo. Nii tjowa luctakanacaqui ewjazñi kuzziz cjispanča, ana čjul uj paazjapa.

⁷ Ampacha zumapankaz kamz waquiziča. Jalla nižtiquiztan tjowa luctakanacaqui am zuma kamñi cheržcu, nižta iratazakaz zuma kamasacha. Nižaza amqui tjajincanaqui zumapan tjajnaquiča zuma kuztan, nižaza humilde kuztan.

⁸ Jalla nuž amiž zuma tjajintiquiztan anaž jecmi amquiziqui uj tjojtñasacha, “Ana wali tjajinchamž amqui” cjicanaqui. Nižaza amiž zuma tjajintiquiztan quintra žoñinacaqui azkataquiča. Ana čjulumi am quintra uj tjeezñi atasacha.

⁹ Amqui criichi piyunanacžquiz chiižinaquiča, ninacž patrunž mantita jaru cjeyajo. Nižaza čhjulu paacanami patrunžquiz cuntintu cjiskatasacha, anapanž chayñi kuzziz cjispanča.

¹⁰ Nižaza anača tjañi cjispanqui, antiz lijitumapanž cjispanča, zuma cumpliñi. Jalla nižta piyunanacaž kamtiquiztan, žoñinacaqui učhum Liwriiñi Yooz tjajinta puntuquiztan “Walipanča” cjican chiyasacha.

¹¹ Yoozqui tjapa žoñinacalta Jesucristo cuchanžquichiča. Jaziqui jakziltat Jesucristužquiz kuzziz cječhaja liwriita cjesacha. Jalla nuž cuchanžquitaž cjen Yoozqui niž okzñi kuzziz tjeeziča.

¹² Nii okzñi kuzziz Yoozqui učhumnacaquiz tjajža, Yooz tawk quintra paatanaca ecajo, nižaza ana wal kuzquiztan pectanaca ecjo. Nižaza Yoozqui tjajža, tii muntuquiz žejlcan persun kuz ewjazpanča čhjulu uj paaz cjenami, nižaza čhjulu ana wal chiiž

cjenami. Nižaza Yooz kuzcama kamspanča. Nižaza Yoozquin tjapa kuz sirwispanča. Jalla nuž tjaažža Yoozqui.

¹³ Učhum Liwriiñi Jesucristučha pajk Yoozqui. Jalla niiqui zuma pajk obra tjeežcan tii muntuquiz wilta tjonaguiča. Jalla niž tjonz tjuñquiziqui cuntintuž cjequičha tjapa criichinacaqui. Jalla nižtiquiztan zuma kamcan niž tjonz tjewznaquičha. Jalla nižta tjewz waquiziča, jalla nii tjaažža Yoozqui.

¹⁴ Nii tjonzñi Jesucristuqui učhum laycu ticziča, tjapa ana walinacquiztan liwriizjapa. Ana walinacquiztan učhum liwriichiča, niž partir žoñi cjiskatzjapa, nižaza učhumnacaquiz tjapaman zumanaca paaz ancha pecñi kuzziz cjiskatzjapa.

¹⁵ Jalla nii tjaažintanaca amqui zakaz tjaažinstanča, zumpacha chiižincan, nižaza p'ekinchaycan. Nižaza nii tjaažintanaca panž mantaquičha žoñinacaž nii tjaažinta jaru kamajo. Jilir puestuchiz cjen nižta mantaquičha. Nekztan amiž tjaažintiquiztanacqui anaj jecmi am iñarla.

3

PABLUZ CHIIZINTA TAKUNACA

¹ Criichi žoñinacžquiz cjuñskataquičha jalla tužupan: Ninacžlaqui gobierno mantiñi žoñinacžquizimi jilirinacžquizimi jalla ninacž mantuquiz zuma kamz waquiziča. Nižaza ninacaž mantitanaca caz waquiziča. Nižaza listupan cjispanča zuma obranaca langzjapa.

² Nižaza anaž jakziltižquizimi chjaawjkatasacha. Nižaza ana ch'aasñi kuzziz cjispanča. Nižaza llan kuzziz cjispanča. Nižaza tjapa žoñinacžtan humilde kuzziz cjispanča.

³ Tuquiqui učhumqui ana criichi žoñinacazakaztača. Yooz puntuquiztan zumzu ana zizñi kuzziztača. Nižaza ana Yoozquin cazñi kuzziztača. Nižaza tsjii kjutñi cjicjiñchumtača. Nižaza učhumqui persun kuzcama ojklayiñchumtača, jaknužt učhum ana wal kuz pectchaja, jalla nuž. Nižaza ana wal kuzziz kamiñchumtača. Nižaza tsjii želinchiz žoñižtakaz cjis pequiñchumtača ana wali zmazñi. Nižaza učhum ana wali kamtiquiztan žoñinacaqui učhum quintra žawjñitača. Nižaza žoñinacžtan porapat chjaawjkatñi kuztan ch'aasiñchumtača.

⁴ Jalla nuž učumnacaž ana zuma kaman učhum Liwriiñi Yoozqui niž zuma kuzmi nižaza niž okzñi kuzmi tjeeziča.

⁵ Jalla nižta okzñi kuzziz tjeežcu Yoozqui učhum liwriichiča. Učumnacaqui tsjii lii jaru kamtiquiztan ana liwriitatača. Pero učhum ana zum kuz awjžintaž cjen, nižaza Yooz Espíritu Santuqui učumnac kuznacquiz luzziž cjen, Yoozqui učhum liwriichiča. Nekztan ew zuma kamaña tjaačiča.

⁶ Učhum Liwriiñi Jesucristuž cjen Yoozqui tjapa učumnacaquiz niž Espíritu Santo ancha zuma kuztan tjaačiča.

⁷ Yooz Ejpqui niž okzñi kuzziz tjeežcu učumnacaquiz nii favora paachiča, niž yujcquiz zumapan cjisjapa. Nižaza Yoozqui učumnacaquiz arajpach irinsa tanzñinaca cjiskatchiča. Nižta irinsa tanzñinacaž cjen učumnacaqui tjewznača Yooztan chica wiñaya kamzjapa.

⁸ Ultim werarača Yoozquiztan tjaažintaqui. Nižaza zumpacha tjurt'iñi kuztan nii tjaažintanacquiz panž tjurt'aquičha, Yoozquin criichinacaž zuma kamzquin kuz tjaažo. Jalla nii tjaažintaqui ancha zumapanča, tjappach žoñinacžta. Nižaza zumapanž yanapča Yooz kamañquiz juc'ant zuma kamzjapa.

⁹ Zumzu ch'aazñinacžquiz ana mitisa, nižaza zarakaquičha nii zumzu ch'aazñinacžquiztan. Nižaza tuquita atchi ejpnacž puntu parlita nonzquiztan zarakaquičha. Nižaza Moisés lii puntuquiztan ch'aasnan jalla nižtanaca nonzquiztan

zarakaquiča. Tjapa nii ana wali parlitanacaqui inakazza. Zuma kamañchiz kami anapanž yanapča.

¹⁰ Jakzilta icliz criichinacat pjali t'akačhaja, jalla nii žoñi kjawznaquiča. Nekztan chiižinaquiča tsjii wiltami pizc wiltami. Amiž chiižinta anaž nonznaquiž niiqui, iclizquiztan chjatkattaž cjequiča.

¹¹ Niiž ana nonžtiquiztan amqui zizzaquiča, nii žoñiqui ana zuma kuzzizpanča, nižaza tsjii kjutñi chjichta kuzzizpanča, jalla nii. Persunpacha niiž uj paata naaz-nasača. Ancha ujnaca paaz pecñi kuzziz cjen castictaž cjequiča.

¹² Wejrqui amquin Artemas už Tíquico cuchanžcača. Jalla niiž irantižquitan, amqui wejtquin uri tjonz pecalla. Wejrqui Nicópolis wajtquin želača. Jalla nicju awti timpu watz tantiichinča.

¹³ Nii tjurt'iziñi Zenas awjatu, nižaza Apolos, jalla nii pucultan žoñinaca zumpacha despachaquiča amqui, ninaca ana čhjulumi pjaltizjapa. Nižaza zumpacha žaka cjižinaquiča ninaca ojkzjapa.

¹⁴ Nižaza učhum criichinacaqui zuma kamznacquiz kuz tjaaž waquiziča. Nekztan t'akjir criichi žoñinacžquiz yanapaquiča. Nižaza wacchi zuma obranaca tjeez-naquiča.

¹⁵ Tjapa wejttan chica kamñi žoñinacaqui amquin tsaanžquiča. Nižaza wejrmi amquin tsaanžcuča. Nižaza amqui wejtnaca k'ayi criichinacžquiz tsaanžinaquiča. Yoozqui amquiz nižaza tjapa nekz žejlñi criichi žoñinacžtan zumapaj yanapla. Jalla nužoj cjila. Amén.

LA CARTA DEL APOSTOL SAN PABLO A FILEMON

PABLUQUI FILEMONZQUIZ CARTA APAYCHICHA, ONESIMUZQUIZ ZUMA RISIWAJO

¹ Wejrtča Pablutqui. Jesucristužquin sirwiñiž cjen carsilquiz chawjctitča. Filemón jila, amqui Yoozquin sirwiñi mazimča, nižaza pecta jilamča. Wejttan Timoteo jilžtan amquin tii cartal cjižcuča.

² Nižaza cjižcuča am kjuyquiz ajczñi criichi žoñinacžquin. Nižaza cjižcuča Apia cullacaquin, nižaza Arquipo jilžquin. Arquipuqui zuma zultatužtakaz tjurt'iñi kuzziz Yoozquin sirwiča.

³ Učhum Yooz Ejpžtan nižaza učhum Jesucristo Jiliržtan, ančhucaquiz zumapaj yanapla, nižaza walikaj kamkatla.

FILEMON ANCHA ZUMA TJAPA KUZZIZZA

⁴ Yoozquin mayizican am cjuñznuča. Amiž cjen wejrqui tirapan Yoozquin sparaquiž cjiwča.

⁵ Amqui zuma munaziñi kuzziz kamñamča tjapa criichi jilanacžtan. Nižaza amqui Jesucristužquin tjapa kuzziz criichamča. Jalla nii am puntu zizcu, Yoozquin sparaquiž cjichinča.

⁶ Ammi parti Jesucristužquin kuzziz žoñinacami Yooz zuma kamañchizza. Jesucristužquin kuzziz cjen učhumnacalta ancha Yooz zumanaca žejlča. Amiž zuma kamz cjen žoñinacaqui Yooziž tjaata zumanaca puntuquiztan juc'anti intintazñi cjissiča.

⁷ Filemón jila, amiž cjen criichi jilanacž kuznacaqui cuntintu cjiskattača. Wejrqui zakaz nižaza cuntintu cjissinča, am zuma munaziñi kuzziz cjen.

PABLUQUI TSJII FAVORA MAYCHICHA

⁸ Wejrqui Cristuž illzta apostultča. Jalla nižtiquiztan wejrqui jaknužt am kamz waquzičhaja, jalla nii amquiz mantasača.

⁹ Pero amquin ana mantacha. Antiz amquiztan tsjii favora mayuča. Wejrtča chawcalla, nižaza Jesucristužquin sirwiñiž cjen carsilquiz preso želuča. Amtan zuma munazican, amquiz roc pecuča Onesimužquiz tsjii favora paajo.

¹⁰ Tii carsilquiz žejlcan, wejrqui Onesimužquiz Yooz taku paljaychinča. Nekztan Onesimuqui Yoozquin criichiž cjen wejt maati cunta cjissiča.

¹¹ Niiž tuquiqui Onesimuqui ana wal kamañquiz luzzitača. Anziqui zuma kamañquiz luzziča. Jaziqui niiqui amtami wejtami walipanča.

¹² Jaziqui wilta amquin cuchanžcuča. Nižaza niiž irantižcu amqui zuma risiwaquiča, jaknužt wejr risiwchamča, jalla nuž.

¹³ Tekz wejttan chica ecličhaj cjiwča. Carsilquiz želan Onesimuqui am cuntiquiztan wejtquiz sirwasača. Wejrqui Yooz taku paljaytiquiztan tii carsilquiz želuča.

¹⁴ Pero amtan ima zumpacha parlican, wejrqui anal Onésimo ecliskatz pecuča. Amquiz anal ancha mantiz pecuča, wejtta tsjii favora paazjapa. Onésimo wejttan chica tira kamasacha. Pero am persun kuzquiztan nuž tantiitaž niil pecuča.

¹⁵ Tsjii timpuqui Onesimuqui amquiztan zarakchiča. Cunamit nižta katčhani, amtan chica tsjii criichi jila watay wata cjisjapa.

¹⁶ Jaziqui anača piyunakazqui. Antiz Yoozquin criichi k'ayi jilazakazza. Wejrqui niižquin k'ayachuča. Walikazza niiqui. Amzakaz Onesimužquiz k'ayachaquiča am zuma žoñiž cjen, nižaza Yoozquin criichi jilažta cjen.

¹⁷ Nižaza amqui wejtquiz zuma amigumžlaj niiqui nekztan Onésimo zuma risiwaquiča, wejt cunta cjenaqi.

¹⁸ Tuquiqui Onesimuqui amquiz ana wali paachizlaj niiqui, weril respontača. Nižaza Onesimuqui amquiz čhjulu kaja cjenami, wejtquizkam cobraquiča.

¹⁹ Wejrpacha tii litranaca persun kjaržtan cjiiržcuča, wejrqui tjapa pacača. Pero wejr am cjuňskatasacha, weriž cjen amqui Yoozquin criichamča.

²⁰ Wejt jila, jalla nii favoraž paalla, Yoozquin criichi jilažta. Wejr kuznalla, Cristužquin criichi jilažta.

²¹ Yooz kuzcama kamňamča. Jaziqui nayuča, amqui tii weriž mayta favorquiztan juc'anti paaquiča, nii. Jalla nužupanž cjequiča.

²² Nižaza wejtta tsjii alujamintu tjacžinalla. Wejrqui ančhuc chertzni tjonz pecuča. Yooz munan nižaza ančucaž mayizitaž cjen wejrqui tjonacha, ančhuc chertzni. Jalla nii ojkzjapa tjewznuča.

²³ Epafrasqui amquin tsaanžquiča. Niiqui wejttan chica carsilquiz žejlča, Jesu-cristužquin sirwiňiž cjen zakaz.

²⁴ Marcustan, Aristarcužtan, Demastan, nižaza Lucastan, jalla ninacaqui amquin zakaz tsaanžquiča. Ninacača wejt mazinacaqui, Yooz sirwiňi langžniča.

²⁵ Učhum Jesucristo Jiliriqui amquiz zumaj yanapla. Jalla nužoj cjila. Amén.

LA CARTA A LOS HEBREOS

YOOZ MAJCH PUNTU

¹ Tuqui timpuqui Yoozqui niiz puntunaca zizkatchiicha uĥum tuquita atchi ejpnacĥquiz. Yoozqui niiz cuntiquiztan chiiñi profetanacĥquiz jaknuĥquiztanami wiltan wiltan niiz taku zizkatchiicha. Nekztan nii profetanacaqui uĥum tuquita atchi ejpnacĥquiz parlichicha.

² Anziqui tii timpuquiz Yoozqui niiz Majch cjen uĥumnacaquiz juc'ant zizkatchiicha niiz puntunaca. Yooz Majchta tjapa ŷejlñinacaqui. Yooz Ejpqui niiz Majch cjen tjappacha paachiicha. Nekztan niiz Majch mantuquiz tjappacha utchiicha.

³ Yooz Majchta Yooz Ejpĥtan tsjii kuzzizpanĥa, jalla niiztiquiztan Yooz Majchkazza Yooz Ejpĥ juc'ant zuma kuz tjeezñiqui. Niŷaza Yooz Majch kjarquiz tii muntu ŷejlĥa. Niiŷ chiitaŷ cjen tii muntu ŷejlñipanĥa. Walja azzizza niiz chiitaqui. Nii Majchpacha uĥum ujnacquiztan ticziĥa, uĥum pertunta cjisjapa. Jalla nekztan arajpacha ojkiĥiicha. Jalla nicju arajpach Yooz Ejpĥ ŷew latuquiz julziĥa, mantiñijapa.

⁴ Nii Yooz Majchqui tjapa anjilancĥquiztan tsjan chawc jiliriĥa. Niŷaza tjapa anjilancĥquiztan tsjan zuma puesto tanzicha.

⁵ Yooz Ejpqui ana jakzilta anjilĥquizimi tuŷ chiichiĥa:

“Amĥa wejt Majchqui. Jaziqui amquin wejt kamañal tjaa-uĥa”.

Jalla nuŷ cjican, ana jakzilta anjilĥquizimi chiichiĥa. Antiz niiz zinta Majchquiz alajakaz nuŷ chiichiĥa. Niŷaza Yooz Ejpqui niiz Majch puntuquiztan cjichizakazza:

“Wejrqui niiztajapa niiz Ejp cjeeĥa. Niiqui wejtajapa wejt Majch cjequiĥa”.

⁶ Wiruñ Yooz Ejpqui niiz zinta Majch tii muntuquiz cuchanĥquiz pinsiscu tuŷ chiichiĥa:

“Tjapa wejt anjilanacaqui wejt Majchquiz rispitle”.

⁷ Yoozqui anjilancĥ puntuquiztan tuŷ chiichiĥa:

“Wejrqui wejt anjilancacuchniĥa tsjii apura ojkiñi tjamiŷtakaz. Niŷaza wejrqui wejtquiz sirwiñi anjilancĥquiz cjiskatuĥa tsjii uj peekstaŷtakaz”.

⁸ Pero niiz Majch puntuquiztan Yooz Ejpqui tuŷ cjichiĥa:

“Amĥa Yoozqui. Am mantiz puestuqui wiñayjapa cjequiĥa. Am mantizqui lijitumapankazza.

⁹ Amqui zuma lijituma mantiz pecñampanĥa. Yooz kuz quintra paañinaca panŷ ĥjaawjñamĥa amqui. Wejrtĥa am Yoozqui. Amquiz juc'ant honorĥiz cjiskatchinĥa, ĥjul ŷejlñinacĥquiztanami”.

¹⁰ Yooz Ejpqui niiz Majch puntuquiztan cjichizakazza:

“Amqui Jilirimĥa, tuqui timpuquiztanpacha amqui anaŷ ĥjulquiztanami tii mundo paachamĥa. Niŷaza am kjarĥtan arajpacha paachamĥa.

¹¹ Amqui wiñayjapam ŷelaquiĥa. Pero nii paata arajpachami yokami tucuzinznacquiĥa. Tsjel zquitiŷtakaz tucuzinznacquiĥa.

¹² Piiŷta zquitiŷtakaz tsjii latu ectaŷ cjequiĥa. Liwj campiitaŷ cjequiĥa. Amzti ana niŷta campiyaquiĥa. Amqui wiñay wiñayjapa cjequiĥa”.

¹³ Yoozqui niiz Majchquiz tuŷ cjichizakazza:

“Wejt ŷew latuquiz julzna, am quintranaca kojchtan tjezcama”.

Jalla nuŷ Yooz Ejpqui cjichiĥa niiz Majchquiz. Ana wira tsjii anjilĥquiz nuŷ chiichiĥa.

¹⁴ Tjapa anjilancacĥa ana cheraña ojklayñiqui, Yooztajapakaz sirwiñiĥa. Yoozqui ninaca cuchanĥa, liwriita ŷoñinacĥquiz yanapi.

2

LIWRIIÑI TAKU IMPORTICHA

¹ Jilanaca, cullaquinaca, Yooz puntu tjaajintanacžquiz juc'anti kuz tjaaz waquiziča, werar zuma kamañquiztan tsjii kjutñi ana chjitžta cjisjapa.

² Tuquiqui anjilanacaqui žoñinacžquiz chiichiča. Jalla nii chiitaqui walñitača. Jakziltat nii chiita jaru ana kamtčhaja, uj paachiča. Nekztan nii uj paañinacaqui ninacž ana zuma paatiquiztan jama castictapan cjissiča.

³ Nižaza tii timpuquiziqui zuma liwriiñi takuqui učumnacaquiz zumpacha kjanzt'itača. Jalla nii liwriiñi taku ana catokaquiž niiqui, ¿kjaž Yooz castictiquiztan atipasajo? Anapanž nii castictiquiztan atipi atasacha. Primeraqui nii liwriiñi takuqui Jesucristo Jiliriž paljaytatača. Nekztanaqui Jesucristuž tjaajinta žoñinacaqui nii liwriiñi takupacha učumnacaquiz lijituma paljaychiča.

⁴ Jalla nuž paljayan Yoozqui zuma pajk obranacami nižaza ispantichucanacami, nižaza tjapaman milajrunacami paachiča. Nižaza Yoozqui criichi žoñinacžquiz niž munañpacama niž Espíritu Santuž tjaata kamañanaca tojunchiča. Jalla nižta Yoozqui tjeeziča, nii liwriiñi takumi lijitumača, jalla nii.

JESUCRISTUQUI ŽOÑI CJISSICHA

⁵ Yoozqui niž wiñayjapa mantiz puestuquiz anjilanaca ana utchiča. Jalla nii puntuiztan cjiyržcuča.

⁶ Tsjii cjiyrta Yooz takuqui tuž cjiča:

“Žoñiča anaž čjulumi. Yooz Ejp, ¿kjažtiquiztan amqui žoñinaca cjuñjo? ¿Kjažtiquiztan žoñinacžquiz honorchiz cjiskatjo?

⁷ Tii kjaž watanaca anjilanacaqui žoñžquiztan tsjan jilir puestuquiz žejlča. Jalla nuž Yoozqui munchiča. Nekztanaqui Yoozqui žoñžquiz juc'ant honorchiz cjiskataquiča anjilanacžquiztan. Nižaza juc'ant zuma kamzqui žoñžquiz tjaataž cjequiča.

⁸ Yoozqui žoñž mantuquiz tjapa tii muntupacha utča”.

Jalla nuž chiichiča Yooz takuqui. Jaziqui Yoozqui žoñž mantuquiz tjapa tii muntu žejlñinaca utchiča. Jalla nižtiquiztan žoñž mantuquiz tjappachapankaz cjequiča. Imazipanča tjappacha žoñž mantuquiz žejlča.

⁹ Pero Jesucristuž puntu naya. Niiqui tsjii kjažtapacha anjilanacžquiztan upa jilir puestuquiz cjiskattatača, žoñinacž laycu ticzjapa. Yooz žoñinacžquiz okžniž cjen Jesucristuqui tjapa žoñinacž laycu ticziča. Jalla nuž ticztiquiztan Yoozqui nižquiz juc'ant zuma honora tjaachiča; nižaza Jesucristuqui juc'ant zuma kamaña tanziča.

¹⁰ Yooz cjen tjappacha žejlča, nižaza nižtajapa žejlča. Zuma Yoozqui pinsichiča, tjapa niž maatinacaqui pruebanaca watžcu, nižtan chica honorchiz cjequiča. Jalla nii pinsichiča. Jalla nižtiquiztan Yooz Ejpqui pinsichizakazza, Jesucristuqui sufrinaca watžcu, ancha zuma Liwriiñi cjisnaquiča, jalla nii. Jesucristupankazza žoñinaca Liwriiñiqui. Jalla nii liwriiñi pinsitaqui ancha zumača.

¹¹ Jaziqui Jesucristuqui žoñinacžquiz Yooz irata zuma kamañchiz cjiskatasacha. Nii zuma kamañchiz cjiskatñimi, nižaza nii zuma kamañchiz cjiskattanacami tsjii Yooz Ejpchizkazza. Jalla nižtiquiztan Yooz Majchqui liwriita žoñinacžquiz “Wejt jilanaca” cjan chiizjapa anaž azza.

¹² Yooz tawk liwruquiz Jesucristuqui tuž cjiča:

“Wejrqui wejt jilanacžquiz Yooz puntu chiižinača. Yooz partir žoñinacžtan žejlcan Yoozquin honora tjaacha”.

¹³ Cristuqui zakaz cjiča:

“Wejrtča Yoozquinkaz kuzziztqui”.

Wilta zakaz cjiča:

“Yoozqui wejtquiz zoñinaca tjaachiča, maatinacažtakaz. Yooz Tata, tekz zejlča ni-nacami wejrmí”.

¹⁴ Jesucristuž liwriita zoñinacaqui curpuchizza, nižaza ljocchizza. Jalla nižtiquiztan Jesucristuqui curpuchiz nižaza ljocchiz zakaz cjissiča. Jalla nižta curpuchiz cjiscu, ticziča ana wal diablu tjananzjapa. Nii diabluqui conz poderchizza. Pero ticžtiquiztan Jesucristuqui diabluž poder atipchiča.

¹⁵ Zoñinacaqui ticz ekskcu diabluž mantuquizpan žejlča. Nii zoñinaca liwriizjapa, Jesucristuqui ticziča.

¹⁶ Jesucristuqui tii muntuquiz tjonchiča, ana anjilanacžquiz yanapzjapa antiz Abrahamž majchmaatinacžquiz yanapzjapa. Jakziltat Jesucristužquin kuz tjaachaja jalla ninacaqui Abrahamž majchmaatinacažtakazza.

¹⁷ Zoñinaca liwriiñi cjisjapa, Jesucristuqui zoñinaca iratpacha cjistanča. Jalla nuž zoñinaca irata cjican, Jesucristuqui zoñinacžtajapa zuma lijítum palt'iziñi cjissiča Yooz yujcquiziqui. Okzñi kuzzizza učhum palt'iziñiqui. Zoñinacžtajapa palt'iziñi cjican Jesucristuqui Yoozta zuma wilanažtakaz ticziča. Jalla nižta ticziča, ujchiz zoñinacž laycu.

¹⁸ Jesucristupacha sufrichiča, nižaza diabluqui Jesucristo yanziča ujquiz tjojtskatzjapa. Pero sufrisquiztanami diabluž yanžtanami atipchiča. Jalla nuž tjapa atipžcu Jesucristuqui zoñinacžquiz yanapi atasača, ana ujquiz tjojtskatzjapa.

3

JESUCRISTUQUI MOISESQUIZTAN TSJAN JILIRIČHA

¹ Yooz kamañchiz jilanaca, cullaquinaca, Yoozqui ančhucaquiz kjawziča Jesucristužquin kuzziz cjisjapa. Jalla nižtiquiztan arajpach wajtchiz mazinaca cjissinčucča. Ančhucqui Jesucristuž kuz zumpacha naya. Jalla niiqui učhumnacalta tsjan jilir apóstol cuntača, Yooz puntu zuma tjaajinchiž cjen. Nižaza učhumnacalta timpluquiz langzñi pajk jiliri cuntača, učhumnacatan Yoozta zuma cjiskatchiž cjen.

² Tuquiqui Yoozqui Moisés utchiča tsjii puestuquiz. Moisesqui nii puesto zuma cumplichiča, Yooz kjuychiz zoñinacžquiz sirwican. Jalla nižta irata Yoozqui Jesucristo tsjii puestuquiz utchiča. Jesucristo zakaz nii puesto zumapan cumplichiča Yooz kjuychiz zoñinacžtajapa.

³ Tsjii kjuy kjuyñi zoñiqui nii kjuyquiztan tsjan honorchizza. Jalla nižta irata Jesucristuqui Moisesquiztan tsjan honorchizza. Jalla nuž waquizichiča.

⁴ Zapa kjuyaqui tsjii zoñiž kjuytača. Pero Yoozza tjappacha paataqui.

⁵ Yooztajapa sirwiñi Moisesqui niiž puestuquiz zuma cumpliñi kamchiča, tjapa Yooz kjuychiz zoñinaca irpican. Moisesqui Yooz puntunaca tjaajinchiča. Jalla nižta tjaajincan Moisequi Yoozquin sirwichiča. Wiruñiqui nii Yooz puntunacaqui tsjan kjana tjaajintatača.

⁶ Jesucristuzti anača Yoozquin sirwiñikazza. Antiz Yooz Majchpanča. Jalla niiqui niiž puestuquiz zuma cumpliñi kamchizakazza, Yooz kjuychiz zoñinacžquiz mantican, tsjii jilir maatižtakaz. Nižaza učhumnacača Yooz kjuychiz zoñinacaqui. Jakziltat tirapan Yoozquin tjurt'ichi kuzzizlaja, jalla niiča ultimu Yooz kjuychiz zoñiqui. Jesucristuqui taku tjaachiča, Yooz zoñinacaqui arajpachquin niižtan chica kamaquiča, jalla nii. Jaziqui jakziltat Jesucristuž tjaata takuž cjen chipchi kuzzizlaja, jalla niiča ultimpacha Yooz kjuychiz zoñiqui.

ANA CHOJRU KUZUZ CJEE

⁷ Jalla nii puntuquiztan Yooz Espíritu Santuqui Yooz tawk liwruquiz tuž cjiča: “Anžtan Yooz kjawžta nonžcu,

⁸ anaž chojru kuzziz cjee. Ančhuca tuquita atchi ejpnacaqui ch'ekti yokquin žejlcan, chojru kuztan Yooz quintra cjissiča. Chojru kuztan persun kuzcamakaz kamz pecchiča, Yooz žawjwa zjijquinzjapa.

⁹ Pusi tunc watanaca ninacaqui Yooz pajk obranaca cherchiča. Jalla nuž cheržcumi, tirapan Yooz žawjwa zjijquinz pecchiča. Anapan criyatča.

¹⁰ Jalla nižtiquiztan nii žoñinacž quintra žawjziča Yoozqui. Ninacž puntuquiztan Yoozqui tuž cjichiča: 'Ninacž kuzqui tsjii kjutñipan pinsiča. Wejt zuma kamaña ana pajz pecča'. Nuž cjichiča Yooz Ejpqui.

¹¹ Jalla nižtiquiztan Yoozqui ninacž quintra žawjžcu, tsjii juramentužtan chiižinchiča, tuž cjican: 'Anapan wejt famillquiz luzkatača, wejtan chica jeejzjapa' ”.

¹² Jilanaca, cullaquinaca, persun kuzquiz cuitasa, Yoozquin ana criichi kuzziz ana cjisjapa. Anawal kuzziz cjequiž niiqui, ultim žejtñi Yoozquiztan zarakzkatta cjequiča.

¹³ Tii timpuquizkaz Yoozqui žoñinaca kjawznaquiča, jaziqui zapurupan porapat p'ekinchayasaquiča, Yoozquin nonznajo. Anapanž ančhucqui persun uj paažcu incallskataquiča, Yooz quintra paažjapa. Jalla nižta anawali paažcu chojru kuzziz cjisnasača ančhucqui. Nekztan Yooz kjawžta ana nonžni atasacha. Ančhucqui jalla nižta anazum kuzziz ana cjisjapa, porapat p'ekinchayasaquiča.

¹⁴ Tuquiqui učumqui Jesucristužquin kuz tjaachinčhumča. Jakziltat tirapan ticzcama Jesucristužquin tjurt'ichi kuzziz kamčhaja, jalla niiqui ultimu Cristužtan tsjii kuzzizza.

¹⁵ “Tonjpacha tii Yooz taku nonžna: Anztan Yooz kjawžta nonžcu, anaž chojru kuztan Yooz quintra cjee. Jaknužt ančhuca tuquita atchi ejpnaca chojru kuztan Yooz quintra želatčhaja, anaž nižta cjee”.

¹⁶ Egipto yokquiztan Moisés irpita žoñinacaqui, jalla ninacatača Yooz quintranacaqui. Yooz taku nonžcupacha ninacatača chojru kuzzizpan.

¹⁷ Nekztan Yoozqui pusi tunc wata ninacžtajapa žawjchiča. Ninacž uj paatiquiztan žawjchiča. Nekztan ninacaqui ch'ekti yokquin walja ticziča.

¹⁸ Nižaza Yoozqui tsjii juramentužtan chiižinchiča, “Anapan wejt famillquiz luzkatača ančhucqui wejtan chica jeejzjapa”, cjican. Jalla ninacača Yooz taku ana cazñinacaqui.

¹⁹ Jalla ninacaqui ana criichiž cjen, Yooz wajtquin ana luzi atchiča. Jalla nii kjanapacha intintita cjesača.

4

YOOZ FAMILLQUIZ LUZA, NIIZTAN JEEJZJAPA

¹ Tuquiqui Yooz Ejpqui taku ecchiča tuž cjican, “Jakziltat weriž kjawžta nonžaj niiqui, wejtan chica jeejznaquiča, nižaza liwriita cjesača”. Nii Yooz ecta takuqui tirapan walča. Jaziqui učumqui persun kuz cuitila. Persun kuz ana cuitaquiž niiqui, ana Yooztan chica jeejnačhani.

² Učumnacaquizimi tuquita ejpžquizimi nii zuma liwriiñi Yooz taku paljaytatača. Pero ninacaqui inakaz nonziča, ana criichiž cjen.

³ Učumqui nii liwriiñi taku catokžcu criichinčhumča. Jalla nižtiquiztan liwriitaž cjen Yooztan chica jeejža. Pero ninacž puntuquiztan Yoozqui cjichiča:

“Ninacž quintra žawjžcu, wejrqui tsjii juramentužtan chiichinča, tuž cjican: 'Ninacaqui wejtan chica ana jeejznaquiča, anapan wejt famillquiz luzkatača' ”.

Yoozqui tii muntu paažcu, nii langz žerziča; sojta tjuñinacakaz langziča.

⁴ Pakallak tjuñ puntuquiztan tsjii Yooz takuqui tuž cjiča:

“Pakallak tjuñquiziqui Yoozqui tjapa niž muntu paaz langquiztan jeejziča”.

⁵ Tsjii zakaz Yooz takuqui cjiča:

“Nii uj paañi žoñinacaqui anapan wejtan chica jeejznasača, wejt famillquiz cjisjapa”.

⁶ Nii tuqita ejpnacaqui liwriiñi taku nonžcu ana Yooz famillquiz cjissiča, Yooz tawk jaru ana kamchiž cjen. Jalla nižtiquiztan anziqiu iya žoñinacaqui Yooz famillquiz cjesača.

⁷ Yoozqui anzta timpuqui sitchiča, žoñinaca wilita kjawzjapa. Ažk watanaca nii tuqita ejpnacžquiz chiižcu Yoozqui Davidžquiz chiikatchiča, tuž cjican:

“Anzta žoñinacami, nižaza jazta žoñinacami, Yooz taku nonžcu, ana chojru kuzziz cjee”. Jalla nii Yooz takuqui tuquitanpacha chiižintača.

⁸ Josuequi žoñinacžquiz ultimu jeejskattasaž niiqui, Yoozqui ana chiitasacha, iya timpu želaquiča žoñinacž Yooz famillquiz jeezjapa.

⁹ Jalla nižtiquiztan anzta timpuquizzakaz Yoozquin kuzziz žoñinacaqui Yooz famillquiz luzasacha, Yooztan jeezjapa.

¹⁰ Jakziltat Yooz famillquiz luzzaja, jalla niiqui ch'aman kamznacquiztan jeežža, jaknužt Yoozqui niž mundo paaz langztiquiztan jeežtčhaja, jalla nižta.

¹¹ Jalla nižtiquiztan učumnacaqui Yoozquin tjapa kuz tjaaz waquiziča, Yooztan jeezjapa, nižaza Yooz famillquiz kamzjapa. Učum tuqita atchi ejpnacaqui ana criichiž cjen ana Yooz famillquiz luzziča, antiz castictatača. Jalla ana nižta casticta cjisjapa, učumqui criizpanž waquiziča.

¹² Yooz takuqui žejtñi Yooz azzizza, žoñinacž kuzquiz zuma, ana zuma, jalla nii tjeezjapa, nižaza cjuñskatzjapa. Nižaza nii Yooz takuqui tsjii porap latu archiz cuchilluztakazza. Pero tsjan ariča. Yooz takuča žoñž animquizimi kuzquizimi uj cjuñskatñiqui. Tsjii žoñž kuzqui parti žoñinacžquiztan chjojta cjesaž niimi, jalla nii kuzquiz Yooz takuqui uj cjuñskatasacha. Nižaza Yooz takuqui žoñž kuzquiz pinsitanacami tantiitanacami kjanapacha tjeeža, zuma ana zuma, jalla nii.

¹³ Yoozqui tjappacha paachiča. Jalla nižtiquiztan anaž jakziltami nižquiztan chjojžni atasacha. Ultim pjalz tjuñquiziqui tjappacha persun kamañ puntuquiztan, nižaza kjažtat kamtčhaja, jalla nii puntunacquiztan cuenta tjaastanča. Tjapa žoñinacž kamta puntunacquiztan Yoozqui liwj zizza, nižquiztan ana tsjii takumi chjojžni atasacha.

JESUCRISTUCHA UCHUM PALT'IZIÑIQUI

¹⁴ Jesucristuča Yooz Maatiqui. Jalla niiča učum chawjc timplu jiliri cuntača. Nižaza niiqui arajpachquin Yooz yujcquin luzziča, učumnacaltajapa tsjii wali palt'iziñi cjisjapa. Jalla nižtiquiztan učumqui Jesucristužquin kuzziz kamcan jalla nii kamzquiz tjurt'ichi kuzziz cjila.

¹⁵ Učumqui Yooz irata zuma kamzjapa panž pjaltiča. Pero Cristuqui zuma okzñi kuztan učum criichinacžquiz cjuñča, nižaza yanapasacha. Učum irata Jesucristuqui pruebanaca watchiča. Ana uj paacan tjapaman pruebanaca watchiča. Jalla nižtiquiztan, Jesucristuqui zuma okzñi kuztan učumnacaltajapa palt'izinasacha.

¹⁶ Jalla nižtiquiztan čjul pruebanaca watanami učumnacaqui okzñi Jesucristužquin tjapa kuztan cjee. Yooz yujcquin macjatz ana jiwjataquiča, učum ujnaca pertuna mayizizjapa, nižaza pruebanaca želan, Yoozquiztan mayizaquiča nii pruebanaca zuma watzjapa.

5

¹ Tjapa timplu jilirinacaqui žoñinacžquiztan illztatača, žoñinacžtajapa Yoozquin palt'izinajo. Nižaza nii timplu jilirinacaqui žoñinacž wilananacami Yooz yujcquiz timplu altarquiz nonžñitača, žoñinacž ujnaca pertunta cjisjapa. Nižaza žoñinacžtajapa ninacž ofrendanaca Yooz yujcquiz tjeežñitača.

² Timplu jilirinacapacha pruebanaca sufriča, parti žoñinaca irata. Nižaza uj paača parti žoñinaca irata. Jalla nižtiquiztan nii jilirinacaqui pasinziz kuzziz cjesača ana zizñi žoñinacžtajapami, nižaza tsjii kjutñi cjcjñi žoñinacžtajapami.

³ Ujchiz zakaz cjicanaqui nii timplu jilirinacami persun ujnacquiztanami nižaza parti žoñinacž ujnacquiztanami Yoozquin wilana tjaastanča, pertunta cjisjapa.

⁴ Nižaza anaž jakziltami timplu jilirž puestuquiz persun kuzcama luzasača. Yoozqui žoñinaca kjawža, nii puestuquiz utzjapa. Jaknužt Yoozqui Aarón cjita žoñi utčhaja, jalla nižta.

⁵ Nižaza Cristuqui anaž persun kuzcama palt'iziñi puestuquiz luzziqui. Yoozpankazza nii honorchiz puestuquiz utchiqui. Nižaza Yoozqui Cristuž puntuquiztan tuž cjichiča:

“Amča wejt persun maatimqui. Amquiz wejt kamañal tjaa-uča”.

⁶ Cristuž puntuquiztan Yoozqui zakaz cjiča:

“Amča žoñinacžtajapa palt'iziñi jiliri qui wiñay wiñayajapa. Jaknužt Melquisedec cji-taqui zuma palt'iziñi jiliri uchtatažlaja, jalla nižta”.

⁷ Tii muntuquiz kamcan Jesucristuqui Yooz Ejpžtan parličičha, nižaza Yooz Ejpžquin rocchiča, tjurt'iñi kuzzizpan kami yanapzjapa. Altu tawkžtan chiican nižaza kaacan Yoozquin jalla nuž mayizichiča. Yoozqui Jesucristo liwrii atatča, ana cruzquiz ticzjapa. Pero Jesucristuž ticzquiztan ana liwriitaž cjenami Yooz Ejpqui nižquiz yanapchiča, Yooz kuzcamapankaz kamzjapa. Jesucristuqui Yooz Ejpžquin kuzziz cjen yanaptatača.

⁸ Cristuqui Yooz Majch cjenami sufrichiča. Jalla nižta tii muntuquiz sufrichiž cjen Yooz Ejpž kuzcamapankaz kamchiča.

⁹ Jalla nuž tii muntuquiz sufrichiž cjenami, jalla ničha Yooz kuzcamapankaz kamñiqui. Jalla nižtiquiztan žoñinaca liwriiñiqui cjissiča. Jakziltanacat nižquiz cazzaja, jalla tjapa ninacaqui wiñayajapa liwriitaž cjequiča.

¹⁰ Yooz Ejpqui Cristo utchicha žoñinacžtajapa liwriiñi nižaza palt'iziñi cjisjapa. Jaknužt Melquisedec cjita žoñiqui palt'iziñi jiliri uchtatažlaja, jalla nižtapacha.

PERSUN KUZ CUITASAQUICHA

¹¹ Jalla nii puntuquiztan waljaž takunacaž žejlča. Pero ch'amača ančhucaquiz intintiskatzqui.

¹² Ažk watanaca ančhucqui criichinčhucča. Jaziqui Yooz puntu tjajjiñi maestrunaca cjichuca cjiwča. Pero wiltakaz ančhucqui tjajjinta cjis pecča Yooz tawk pjasilanaca zizjapa. Ančhucqui wawanacažtakaz lichikaz pecča Yooz tawk čhjeri lujlzquiz-tanaqui.

¹³ Lichtan mantinasñi wawažtakazza ančhucqui. Jaziqui lijitum Yooz kamaña ana zuma kamiñčhucča.

¹⁴ Čhjeri lujlzqui pajk žoñinacžtača. Jalla nižta irata ch'aman intintazuc puntunaca zuma criichi žoñinacžtajapača. Jalla ninacaqui zuma kamchiž cjen zumpacha tantiyasača kamañ puntunaca, zuma, anazuma, jalla nii.

6

¹ Pjasil Yooz puntunacquiztan zizñi, cjee. Jesucristuž puntuquiztan tjajjintanaca zizzinčhucča. Jalla nižtiquiztan ančhucqui nii puntunacquiztan anaž iya tjajjinz pecasača, jalla. Ančhucqui zizzinčhuctača, casticu zjičñi paaznaca puntuquiztanami nižaza kuz campiiz puntuquiztanami, nižaza Yoozquin kuz tjaz puntuquiztanami,

² nižaza bautismo puntuquiztanami, nižaza kjaržtan lanz cuzturumpi puntuquiztanami, nižaza ticziquiztan jacatatz puntuquiztanami, nižaza ultim pjalz tjuñi puntuquiztanami. Jalla nižtanaca zizzinčhuctača ančhucqui.

³ Yooz munan, iya Yooz puntunaca tjajjnasača, juc'ant zuma kamañchiz cjisjapa.

⁴ Jakziltat kjanzt'ita Yooz taku catoktčhaja, jalla nuž catokzpacha Yooz quintra quejpsaja, jalla niiqui ana wilta liwriita cjesača. Jakziltat Yooz taku catoktčhaja, jalla niiqui Yooz kamañquiz luzzipanča, nižaza Espíritu Santuqui niž kuzquiz luzziča.

⁵ Nižaza ninacaqui Yooz taku zuma nayžcu catokchiča. Nižaza arajpachquiztan tjonñi azi pajchiča persun kuzquiz.

⁶ Jalla nižta Yooz taku catokchi žoñinacaqui Yooz quintra quepsnaquiž niiqui, anaž wilta kuz campii atasacha zumquinaqui. Ninacž kuzqui chojrupan cjissa. Jalla nižta cjiscu, ninacapacha Jesucristo Yooz Majch wilta cruzquiz ch'awctažokazza, niž quintra žoñinacž yujequiz cjičjiñiča.

⁷ Tii quintu nonžna. Tsjii yokaqui zkala čhjacz. Jalla nekztan chijñiž tjonča. Jalla nekztan nii zkalaqui zuma čhjeriž tanča. Nižazaž pookča, nii zkala čhjacñi žoñinacžtajapa. Nii yokaqui Yoozqui wintijchiča.

⁸ Pero nii yokaqui ch'apinacchizkaz cjisnasaž niiqui, inakaz cjequiča. Jalla nižtiquiztan pjalžta cjequiča, ana zuma. Jalla nekztan ujquin tewjkžnaquiča. Jalla nižtaž nii Yooz taku catokžpacha quejpsñi žoñiui.

YOOZQUIN KUZIZPAN CJEE

⁹ Pecta jilanaca, cullaquinaca, jalla nuž chiižcumi ančuca puntuquiztan anača nižta cjiwčhiya. Ančucqui liwriita cjiscu ultimpacha ančucqui zuma Yooz kamañchiz kamaquiča. Jalla niiqui nužupanča.

¹⁰ Yoozqui ancha zumapanča. Ančucaquiztan anaž tjaznasača, ančucaž zuma kamchiž cjen, nižaza ančucaž Yooztan zuma munaziñi kuzziz cjissiž cjen. Ančucqui jalla nižta kamañchiz cjen parti criichi jilanacžquiz sirwichinčhucča Yooztajapaqui. Tuquimi anzimi zakaz ančucqui nižta zuma kamañchizza.

¹¹ Zapa mayni ančucaquiztan nižta zuma kuzzizpan cjee, juc'ant juc'ant zuma kamañchiz cjisjapa, ticzcama. Ančucqui tirapan tjewzna, arajpachquin Yooztan zuma kamz, jalla nii. Nižaza nii oracama, juc'ant juc'ant zuma kamañchiz cjee. Jalla niil pecuča.

¹² Ančucqui ana jayrazñi kuzziz cjee. Antiz zuma Yoozquin kuzziz žoñinacžquiz yatekasa. Nižaza pasinziz kuzziz žoñinacžquiz yatekasa. Nižta kamñi žoñinacaqui Yooz chiita zumanaca tanznaquiča, tsjii irinsažtakaz.

¹³ Yoozqui Abrahamžquiz tsjii zuma taku tjaažcu, persun ahtan juramento paachiča. Niižquiztan tsjan jilir juramento tjaakatñi ana želatča. Jalla nekztan persun ahtan juramento paachiča,

¹⁴ tuž cjican: “Ultimpacha wejrqui amquin zumanacal tjaažcača, nižaza am majchmaatinaca walja mirkatača”.

¹⁵ Abrahamqui Yoozquin kuzzizpan tjewžcu, nii Yooziž tjaata taku tanziča.

¹⁶ Tsjii juramento tjaañi žoñiui nii juramento tanzñi žoñžquiztan tsjan jiliriča. Tsjii juramento paažcu, anaž iya parliz želasača. Jalla nii puntuquiztan žeržtača.

¹⁷ Jaziqui Yoozqui tsjii juramento paažcu taku tjaachiča. Nekztan Yoozqui nii tjaata taku tanzñi žoñinacžquiz kjanapacha tjeez pecchiča, niž tjaata taku panž cumpliskataquiča, jalla nii. Yoozqui niž chiita taku ana campiyasača.

¹⁸ Yoozqui taku tjaachiča, učumqui niižtan chica kamaquiča, jalla nii. Nekztan juramento paachiča. Jalla nii pizc taku anapan campiyasača tsjii tsjii chiicanaqui. Yoozqui ana toscara chiyasača. Učumqui Yoozquin macjatchinčhumča, niž cuitita cjisjapa. Učum cuitiñi Yoozza taku cumpliñiui. Jalla nižtiquiztan Yooz taku cumpliz ora tjewžcan p'ekinchayta kuzzizpan cjesača učumqui.

¹⁹ Jalla nii cumpliñi Yooziž chiita taku cjuñžcupan učum kuz tjurt'ichi cjiskatča, ana kuz turwayskatchuca. Nii taku cumpliñi Yoozqui warcu anclažtakaz, učum kuz tjurt'ichi cjiskatča. Jesucristuž cjen Yoozqui niž tjaata taku cumplaquiča. Jesucristuqui arajpachquinpacha Yooz yujequiz luzziča.

²⁰ Učhumž tuqui luzziča, učumnacaltajapa palt'izinjapa. Jesucristuqui zuma palt'iziñi cjišičha, jaknužt Melquisedec palt'iziñi cjitčhaja, jalla nižta. Jalla nižtiquiztan učumnacaltajapa ultimu palt'iziñi puestuquiz luzziča.

7

MELQUISEDECZ PUNTU

¹ Nii Melquisedec cjita palt'iziñiqui Salem wajt jiliriča, nižaza niž puestuquiz zinta arajpach Yooziž uchtatača. Melquisedecž timpuquiz Abrahamqui quintra reynacžtan tsjii quira zalčiča, ninacž zultatunacžtanpacha. Nekztan Abrahamqui liwj atipčiča. Jalla nuž Abrahamž atipžtan Melquisedecqui Abrahamžtan zalčiča. Nekztanaqui Melquisedecqui Abrahamžtajapa Yoozquin palt'izinčiča, Abrahamžquiz Yooziž yanapta cjisjapa.

² Nekztan Abrahamqui Melquisedecžquiz tjapa niž cantiquiztan diezmo tjaachiča. Melquisedec tjuuqui tuž cjiča, Yooz kuzcama zuma mantiñi, jalla nii. Nižaza Salem tjuuqui tuž cjiča, žoñinaca walikaz žejlča, jalla nii. Melquisedecž puntu cjiča, niž mantichiž cjen, žoñinaca walikaz žejlča.

³ Yooz takuqui anaž chiiča, Melquisedecž maa ejpž puntuquiztanami, niž atchi ejpnacžquiztanami, niž majttiquiztanami, niž ticzquiztanami. Jalla nižtiquiztan palt'iziñitača Yooz Majch irata.

⁴ Jaziqui Melquisedecqui pajk jiliriča. Nii naya ančhucqui. Učhum tuquita ejp Abrahamqui quira atipžcu Melquisedecžquiz tsjii tunca parti niž cantiquiztan tjaachiča. Jalla nižtiquiztan Melquisedecqui Abrahamžquiztan juc'ant jiliriča.

⁵ Moisés lii jaru Leví cjita majchmaatquiztan tjoñi žoñinacakaz timplu jilirž puestu tanznasača, žoñinacžtajapa Yoozquin palt'izinjapa. Jalla nii timplu jilirinacaqui parti žoñinacžquiztan ninacž želinchizquiztan diezmo cobriñitača. Aunquimi nii cobrita žoñinacaqui timplu jilirinacž familiatača. Tjapa ninacaqui Abrahamž ejpžquiztan tjoñitača. Jalla nižtiquiztan Melquisedecqui nii timplu jilirinacžquiztan juc'ant jiliriča.

⁶ Melquisedeczti ana Leviž majchmaatquiztan tjoñitača. Pero Abrahamqui nižquiz diezmo tjaachiča. Nižaza Melquisedecqui Abrahamžquiz wintizuna tjaachiča, Yooz Abrahamžquiz taku tjaachiž cjenami.

⁷ Wintizuna tjaañi žoñiqui tsjan jiliriča wintizuna tanzñi žoñžquiztan. Anaž jakziltami nii razuna nicasača.

⁸ Tii muntuquiz kamcan žoñikazza učumnacaquiz diezmo cobriñiqui. Žoñinacača ticzñiqui. Pero Melquisedecž puntuquiztanaqui Yooz takuqui niž ticz puntuquiztan ana chiiča, wiñayjapa žejtzjapažtakazza.

⁹ Melquisedecž timpu wattan Leviž majchmaatquiztan tjoñi timplu jilirinacaqui diezmo cobriñitača. Nii cobriñi žoñinacapacha Abrahamž majchmaatquiztan tjončiča. Jalla nižtiquiztan Abrahamž diezmo Melquisedecžquiz pactiquiztan, ninacazakaz pactažokazza.

¹⁰ Abrahamž curpuquiz niž majchmaatinaca želatča, ima majttatača. Jalla nižtiquiztan Abrahamž Melquisedecžquiz diezmo pactiquiztan, Leviž majchmaatquiztan tjoñi timplu jilirinacaqui zakaz pactažokazza.

¹¹ Leviž parti timplu jilirinacaqui Israel wajtchiz žoñinacžquiz Moisés lii jaru kamkatchiča. Nižaza nii jilirinacaqui parti žoñinacžta Yoozquin palt'iziñitača. Nii Leviž parti žoñinacaqui Aaronž majchmaatquiztan tjoñitača. Jaziqui ninacaqui parti žoñinacžquiz Yooz yujcquiz zumapankaz cjiskattasaž niiqui, anaž iya palt'iziñi pectasača. Nii wiruñ tjoñi palt'iziñiqui anaž Aaronž majchmaatquiztan tjoñiča. Antiz Melquisedecž partiquiztan tjončiča.

¹² Palt'iziñi timplu jilirinacaqui campiitaž cjenauqui, lii zakaz campiitaž cjistantacha.

13 Nii wiruñ tjonñi palt'iziñiqui Jesucristo Jiliriča. Jesucristuqui anača Leviž partiquiztan tjonñiqui. Antiz Judaž majchmaatquiztan tjoñitača. Pero Moisés lii jaru anaž jakziltami Judaž partiquiztan timplu jilirž puestuquiz uchtatača.

14 Timplu jilirinacž puntuquiztan Moisesqui anaž čhjulumi chiichiča Judaž parti žoñinacžquiz. Judaž parti žoñinacaqui anapan timplu jilirž puestuquiz luzasača. Pero kjanapachača Jesucristuqui Judaž partiquiztan tjoñi.

15 Jalla nižtiquiztan kjanapachazakazza Moisés lii campiitaqui. Melquisedecžtakaz Jesucristuča tsjemat timplu jiliriqui, žoñinacžtajapa Yoozquin palt'izinjapa.

16 Moisés liiqui cjiča, ticzñi timplu jilirinacaqui Leviž majchmaatquiztan tjonñi žoñinacapankaz cjequiča. Jesucristuqui anaž nii lii jaru timplu jiliri cjissiča. Antiz niž wiñayjapa žejtñi kamañquiztan timplu jilirž puestuquiz uchtača, wiñayjapa žoñinacžtajapa Yoozquin palt'iziñi cjisjapa.

17 Jesucristuž puntuquiztan Yooz takuqui tuž chiiča:

“Amqui wiñayjapa timplu jiliri cjequiča žoñinacžtajapa palt'iziñi. Melquisedecž partiquiztan cjequiča”.

18 Tuquita liiqui nužquiz apatatziča. Nii liiqui ana azzizza žoñinaca zumapan kamkatzjapa. Jalla nižtiquiztan ana iya walča.

19 Nii Moisés lii jaru kamtiquiztan anaž jakziltami Yooz yujcquiz zumapankaz cjiskattaž atasacha. Jaziqui tsjii ew lii žejlča; učumnacaltajapa juc'ant zumača. Nii lii jaru Jesucristuqui Yoozquin palt'iziñi puestuquiz luzziča. Jesucristuž cjen učumqui Yoozquin macjatasacha.

20 Yoozqui juramentužtan Jesucristo utchiča palt'iziñi puestuquiz.

21 Tuquita palt'iziñi timplu jilirinacaqui ana juramentužtan nombritatača. Pero tii Jesucristo timplu jilirizti juramentužtan nombritača. Yooz takuqui tuž cjiča:

“Yooz Jiliriqui juramentužtan tuž mantichiča: Amqui wiñayjapa timplu jilirim cjequiča žoñinacžtajapa palt'iziñi, Melquisedec partiquiztan. Jalla nuž mantiču, Yooz kuzquiz pinsitaqui wira ana campiyasacha”.

22 Nii Yooz chiitaž cjenaqui Jesucristuča tuquita timplu jilirinacžquiztan žoñinacžtajapa juc'ant zuma Yoozquin palt'iziñiqui. Jalla nižtiquiztan žoñinacaqui wiñaya liwriitapan cjequiča. Nii ew liiqui tuquita liinacquiztan juc'anti zumača.

23 Nii tuquita timplu jilirinacaqui tamatača. Ninacžquiztan anaž jakziltami wiñaya timplu jilirž puesto tanzñi atchiča. Ninacaqui tjapaž ticza.

24 Pero Jesucristuzti wiñaya žetaquiča. Jalla nižtiquiztan wiñayjapa timplu jiliripanž cjequiča, žoñinacžtajapa Yoozquin palt'iziñijapa.

25 Jalla nižtiquiztan Jesucristuqui ultimupan wiñayjapa žoñinaca liwriyasacha. Jakziltat niž cjen Yoozquin macjataquiž niiqui, wiñayjapa liwriita cjequiča. Nižaza Jesucristuqui wiñaya žejtcan liwriita žoñinacžtajapa tirapan Yoozquin pjalt'izinaquiča.

26 Jalla nižta palt'iziñipanž pecča učumnacaqui. Jalla nii Jesucristuqui Yooz irata zumapankaz kamañchizza. Anaž jakziltami nižquiz tsjii uj tjojtnasacha. Niiqui ana zinta ujchizza. Ujchiz žoñinacžquiztan tsjematača. Arajpachquin Yooztan chica honorchizza.

27 Jesucristuqui parti timplu jilirinaca ana iratača. Nii parti timplu jilirinacaqui zapuru wilanapan tjaañitača, persun ujnacquiztanami parti žoñinacž ujnacquiztanami. Jesucristuqui anapan nižta paasacha, ana ujchizza niiqui. Jesucristuqui tsjii wiltapankaz wilana tjaachiča. Wilana cunta niž persun curpu intirjichiča.

28 Moisés lii jaru ujchiz žoñinacaqui palt'iziñi puestuquiz uchtatača. Nii liinacquiztan wiruñ Yoozqui tsjii juramento paachiča, niž Majch palt'iziñi puestuquiz uchjapa. Nii Majchqui Yooz irata zumapankaz kamañchizza wiñayjapa.

8

EW LII ZEJLCHA

¹ Weriz chiitanacquiztan jalla tiicha chekanaqui, uchumnacaltajapa tsjii zuma palt'iziñi zejlcha, Jesucristupacha. Jalla niiqui arajpachquin Yooz Ejpž žew latuquiz julzi zejlcha, Yooz Ejpžtan chica mantican.

² Niiča ultim Yooz kjuychiz jiliriqui, uchumnacaltajapa palt'iziñzjapa. Nii ultim Yooz kjuy timpluqui anaž žoñiz paatača. Nižaza anača tii muntuquiz. Antiz Yooz Jilirž arajpach kjuyapankazza.

³ Zapa timplu jiliriqui niž puestuquiz kamcan, ofrendanacami wilananacami jalla ninaca tjaañiča. Jalla nižtiquiztan Jesucristo zakaz tsjii tjaažjapa necesitča.

⁴ Jesucristuqui tii yokquizkaz kamñi žoñi cjitasaz niiqui, anaž timplu jilirimi cjitasacha. Tii yokquizpachača Moisés lii jaru timplu jilirinaca panž zejlcha. Jalla ninacaqui tirapanž wilana tjaača Moisés lii jaru.

⁵ Pero ninacaqui ultim Yooz kjuy timpluquiz anaž sirwiča. Arajpachquin zejlcha nii ultim Yooz kjuy timpluqui. Jalla nii timplu cunta tii yokquiz tsjii paata timplu zejlcha tsjii fotožtakaz. Tuqui timpuqui Moisesqui Yooz cjitacama tsjii zkiz timplu paakatchiča. Ima paakatcan Yoozqui nižquiz mantichiča, tuž cjican: “Sinaí curquin amquiz tjezinča, jaknužt wejt timpluqui paaztančhalaja, jalla nii. Jalla nii jarupankaz timplu kjuya kjuystanča”. Jalla nuž mantichiča Yoozqui.

⁶ Pero Jesucristuzti žoñinacžtajapa tsjan zumaž palt'izinasacha. Jalla niiča tuquita palt'iziñinacž kamañquiztan juc'ant zuma kamañchizqui. Nižaza tuquita liiquiztan tii anzta liiqui uchumnacalta tsjan zumača. Jesucristuž cjen tii anzta liiqui zejlcha. Nižaza nii liiž jaru tsjii tsjan zuma kamañaqui compromittača.

⁷ Tuquita tjaaata liiqui juc'ant zuma cjitčhaj niiqui, anaž iya liiqui pectasacha.

⁸ Yoozqui tuquita lii jaru kamñi žoñinacžquiz ana zuma naychiča. Jalla nii puntuiztan Yooz takuqui tuž cjiča:

“Yooz Jiliriqui tuž cjiča: Wiruñta timpuquiztajapa wejrqui tsjii ew lii tjaa-ača Israel wajtchiz žoñinacžquizimi, nižaza Judá wajtchiz žoñinacžquizimi.

⁹ Nii ew liiqui tuquita ejpnacžquiz tjaata liiquiztan tsjemataž cjequiča. Tuquiqui wejrqui ninacž tuquita ejpnaca jwessinča Egipto yokquiztan. Nii timpuquizpacha wejt lii ninacžquiz tjaachinča; pero ninacazti wejt lii jaru ana cumplichiča. Jalla nižtiquiztan wejrqui ninaca jaytichinča. Jalla nuž cjiča Yooz Jiliriqui.

¹⁰ Wiruñta timpuquiz Israel žoñinacžtajapa tsjii ew lii tjaa-ača, jalla tuž: Jalla nii wiruñta timpuquiz wejrqui žoñinacž kuzquiz wejt lii zizkatača, kuzquiz cijjrtaztakaz. Nekztan wejrpacha ninacž Yooz cjeeča. Nižaza ninacaqui wejt partir žoñinaca cjequiča.

¹¹ Jalla nii wiruñta timpuquiz kamñi žoñinacaqui anaž porapat tjaažnarasasacha, ninacž mazinacžquizimi, nižaza ninacž jilanacžquizimi. Anaž tjaažnasacha, “Yooz Jiliržquin paja” cjican. Antiz zapa mayni Yooz Jiliripankaz pajaquiča, tsjii zkoltiquiztanpacha asta pajk žoñicama.

¹² Nižaza ninacž ujnaca pertunača, wejt okzñi kuzziz cjen. Nižaza ninacž ujnacquiztan tjatznača wiñayjapa”.

Jalla nuž cjiča Yooz takuqui.

¹³ Yoozqui nii ew lii puntuiztan chiižcu nii tuquita lii apatatchiča. Nii tuquita liiqui watchiž cjen, inakazza. Wajilla liwj tjatzaž cjequiča.

9

YOOZ ZKIZ TIMPLU

¹ Nii tuquita liiqui cuzturumpinacchizza, Yooz rispitzjapa. Nii cuzturumpinacaqui tii muntuquiz zejlñi Yooz timpluquizkaz paatatača.

² Primeraqui zkiz timplu želatĉha. Nii timpluquiz pizc kjuya želatĉha. Tsjii kjuyaqui 'Yooztajapa T'akžta Kjuya' cjitataĉha. Nii kjuyquiziqui tsjii pajk candelabra želatĉha, nižaza mesa želatĉha, Yooztajapa t'akžta t'anta nonzjapa.

³ C'uchquin tsjii kjuya želatĉha, 'Yooztajapa Juc'ant T'akžta Kjuya' cjitataĉha. Nii pizc Yooz kjuy taypizquiz tsjii pañ cortina želatĉha.

⁴ C'uchquin tsjii kor altara želatĉha, incienso ujzjapa. Nižaza tsjii caja želatĉha, Yooz tjaata lii chjojzjapa. Nii cajaqui kjuyltanami zawnctanami koržtan tjalžtataĉha. Nii caj kjuyltan tsjii kor ojch želatĉha maná cjita ĉhjerchiz. Nižaza Aaronž wara želatĉha. Nii waraqui ch'ojña c'ajĉiĉha tsjii žejtņi muntiztakaz. Nižaza nii caj kjuyltan Yooz lii cjjrtanaca želatĉha.

⁵ Nii caj juñtun querubines cjita želatĉha anjila irata paata. Nii querubinanacaqui wežlaž cherchi kjarchiztaĉha; nii caj juntuñ kjara waazitaĉha. Nižaza nii caj juntuñ ljocžtan tjawkz tabla želatĉha, jalla niiqui ujnaca pertunta cjisjapataĉha. Jaziqui nii puntunacquiztan ana iya chiiz pecuĉha.

⁶ Jalla nuž tjacžcu timplu jilirinacaqui zawncchuc kjuyquiz luzluzñitaĉha, lii jaru cuzturumpinaca paacan.

⁷ C'uchquin žejlņi kjuyquiz tsjii watquiz tsjii wilta luzñitaĉha timplu chawjc jiliriĉui. Nii alajakaz jalla nekziĉui luzasaĉha. Jalla nuž luzcan wilana conta ljoc ĉhjichñitaĉha, persun ujnaca pertunta cjisjapami, nižaza parti žoñinacž ujnaca pertunta cjizjapami.

⁸ Jalla nižta liiquiztan Espiritu Santuĉui zizkatchiĉha, ima Moisés lii apatatzcan, nii Yooz kjuy timpluquiz paaz cuzturumpinacaqui walatĉha, nii. Nižaza jalla nuž walan ĉhjul žoñimi anapan c'uchquin luztaĉha.

⁹ Nii tuquita liiqui Yooz puntunaca ĉiĉiĉha tii timpuquiz kamņi žoñinacžtajapa. Nii lii jaru žoñinacaqui ofrendanacami wilananacami tjaachiĉha. Jalla nuž tjaachiž cjenami nii žoñinacaqui Yooz yujcquiz ana ujchiz nižaza zuma kuzziz ultimu ana cjiskatta cjesaĉha. Ninacaqui tirapan ujchiztaĉha.

¹⁰ Jalla nii tuquita cuzturumpinacaqui jalla tižtakaztaĉha: ĉhjeri tjaazmi, licz tjaazmi, kjaztan ajunzmi. Jalla nižta cuzturumpinacaqui žoñž curpu zawnctankazza. Jalla nuž cjenami lii campiizcama nii cuzturumpinacaqui walatĉha.

¹¹ Wiruñ nekžtan Cristuĉui tjonĉiĉha. Jazic niĉiĉha Yooz timplu chawjc jiliriĉui; Yooz zumanaca tjaazjapa tjonĉiĉha. Timplu chawjc jiliri cjican Yooz kjuyquiz sirwiĉha. Anaž tii yokquiz paata Yooz kjuyquiz sirwiĉha. Antiz arajpachquin Yooz ligitum kjuyquin sirwiĉha. Jalla niĉiĉha ultim Yooz kjuya. Tii yokquiz paata Yooz kjuyquiztan juc'ant zumaĉha.

¹² Cristuĉui arajpachquin ultim Yooz kjuyquiz luzziĉha. Jalla nuž luzcan ana cabranacž ljocmi nižaza ana vac toronacž ljocmi ĉhjitchiĉha. Antiz persun ljocžtan luzziĉha, žoñinaca wiñaya liwriita cjisjapa. Jalla nuž persun ljocžtan tsjii wiltakaz luzziĉha tjapa tižtajapa.

¹³ Tuquita liiqui tužutaĉha: Cabranacž ljocžtanami, vac toronacž ljocžtanami ujchiz žoñinacžquiz tjawkñitaĉha. Nižaza ujta vacanacž kjupžtan ujchiz žoñinacžquiz llump'aczt'iñitaĉha. Jalla nižta cuzturumpinaca zawnctankazza; ana poderchiztaĉha, ana ujchiz cjiskatzjapa.

¹⁴ Cristuž ljocžti ancha juc'anti poderchizza. Nii ljocž cjen žoñinacž kuznacaqui zuma cjiskatasasĉha. Wiñay žejtņi Espiritu Santuž cjen Cristuĉui tsjii zuma wilana cunta persunpacha ticziĉha. Ana ujchiz cjican, niž ljoc Yoozquin tjaachiĉha, ujchiz žoñinaca pertunta cjisjapa. Jalla nižtiquiztan Cristuĉui žoñinaca liwriyasasĉha. Cristuž cjen nii liwriita žoñinacaqui ninacž tuquita ana zuma kamañanaca jaytasasĉha, nižaza zuma kamañchiz Yoozquin sirwasasĉha.

¹⁵ Jalla nižtiquiztan Jesucristuž cjen Yoozqui ew lii ut'ayĉiĉha, žoñinaca ultimu liwriita cjisjapa. Žoñinacaqui primer lii mantuĉiz cjican, ujnaca paañitaĉha. Pero

Jesucristuqui ticziča, nii paata ujnacquiztan liwriizjapa. Jalla nižtiquiztan jakziltat Yooz kjawžta cječhaja, jalla niiqui Yooz compromitta irinsa tanznaquiča; jalla niiqui wiñayjapa Yooztan chica kamaquiča.

¹⁶ Tsjii žoñiqui testamento paachiž cjen, niž cuzazanaca tanñi žoñinacžquiz ut'ayča. Pero ticžtankaz nii testamentuqui walča.

¹⁷ Nii testamento paañi žoñiqui tira žetan, nii testamentuqui anaž walča. Antiz ticžtan, jalla nekztanž nii testamentuž walasača. Ticžtankaz niž cuzazanaca tanñi žoñinacaqui ultimu niž cuzazanaca tanznasača.

¹⁸ Jalla nižtiquiztan tuquita liiqui ut'aytatača, conta animal ljocžtan.

¹⁹ Moisesqui tjapa Yooz mantita liinaca kjanapacha paljayžcu nii liinaca ljocžtan ut'ayčiča. Moisesqui tsjii chupic choma tanžcu, hisopo cjita parquiz tjerčiča. Nekztan ljocžtan kjaztan t'ajžcu, jalla nekz nii para ch'ižcu, sucarpayñitača, žoñinacžquizimi, liichiz libruquizimi.

²⁰ Jalla nuž sucarpaycan, Moisesqui tuž cjichiča: Tii ljocqui Yooz mantita liinaca walkatča ančhucaltajapa.

²¹ Jalla nižtazakaz Moisesqui nii ljocžtan Yooz kjuyquizimi, Yoozquin sirwiz cuzazanacquizimi sucarpayñitača.

²² Nii tuquita lii jaru jos tjapa cuzazanaca sucarpayñitača, Yooz yujcquiz zuma cjisjapa. Ljoc ana tjawkžcu ujnaca ana pertunta cjesača.

JESUCRISTUQUI ŽOÑINACŽ LAYCU TICZICHA

²³ Tuquita lii jaru nii Yoozquin sirwiz cuzazanacaqui Yooz yujcquiz wali cjisjapa jalla nižta cuzturumpinaca paastantača. Tii yokquiz žejlñi cuzazanacaqui fotožtakazza. Anača arajpachquin ultimu želasača. Arajpach Yooz zuma kamañchiz cjiskatzjapa, nii animal ljocnacaqui anaž atasača.

²⁴ Cristuqui persun ljocžtan ana žoñiž paata timpluquiz luzziča. Arajpach Yooz kjuyquizpacha luzziča. Jalla nicju anziqiu niiča učumnacaltajapa Yoozquin palt'iziñiqui. Tii yokquiz žejlñi timpluqui tsjii fotožtakazza nii werar arajpach Yooz kjuyquiztan.

²⁵ Zapa wata timplu chawjc jiliriqui animalž ljocžtan Yooz kjuyquin luzñitača. Ana persun ljocžtan luzñitača. Pero Cristuqui tsjii wiltapanikaz wilana cunta cjissiča, ana wilta wilta.

²⁶ Wilta wilta wilana cunta ticztasaž niiqui, tii muntu kalltiquiztanpacha wilta wilta sufrican ticztasača. Tuquita timpu tucuzinta cjiscu tsjii wiltakaz Jesucristuqui parizquichiča. Nekztan niž ljoc tjawkžcu ticziča, tjapa ujnacquiztan žoñinaca liwriizjapa.

²⁷ Tjapa žoñinacaqui tsjii wilta ticstanča tii yokquiz. Jalla nekztan pjalžta cjequiča, Yooz yujcquiz zuma, anazuma, nii.

²⁸ Jalla nižta irata Jesucristuqui tsjii wilta tii yokquiz ticziča, wacchi ujchiz žoñinacž laycu. Pero wiruñ wilta tii muntuquiz tjonaquiča. Nekztan žoñinacž ujnacquiztan ana ticznaquiča. Antiz nižquiz tjapa kuz tjewzñi žoñinaca ultimu liwriyaquiča.

10

MOISES LIQUI PJALTICHA

¹ Moisés liiqui Yooz zumanaca tsjii kolucullakaz tjeeziča. Ana ultimu kjana tjeeziča. Nii liiqui tuž cjiča: Wiruñ tjapa Yooz zumanaca tjonaquiča, jalla nii. Nižaza nii liiqui anaž ultimpacha Yooz yujcquiz zuma cjiskatasacha, Yoozquin macjatñi žoñinacžquiziqui. Nii lii jaru watay wata wilanakaz contača. Jalla nuž paažcumi, žoñinacžquiz anaž ultimpacha Yooz yujcquiz zuma cjiskatta cjesača.

² Nii lii jaru paacan, žoñinacaqui ultimpacha Yooz yujcquiz zuma cjiskattasaž niiqui, anapanž wilana tira onantasača. Nii wilana tjaañi žoñinacaqui ultimu ana ujchiz

cjitasaz niiqui, zumapan cjitasacha, nizaza persun kuzquiz ana iya cjuñtasacha čhjul ujquiztanami.

³ Pero nii wilana tjaaz liiqui watay watapanž ujnaca cjuñkatča.

⁴ Vac toronacz ljocmi cabranacz ljocmi tjaatiquiztanami anapanž ujnacquiztan li-wriyasača.

⁵ Jalla nižtiquiztan Cristuqui tii muntuquiz tjonžcu Yooz Ejpžquin tuž cjichiča: “Amqui animal wilananacami ofrendanacami ultimu ana pecasača. Antiz wejtajapa žoñž curpu tjaczinchamča, žoñinacz ujnac laycu ticzjapa.

⁶ Ujta animalanacami uj paatiquiztan tjaata ofrendanacami ultimu am ana cuntintu cjiskatasača.

⁷ Jalla nižtiquiztan wejrqui cjichinča: Wejt Yooz, tii muntuquiz tjonchinča, am kuzcama paazjapa. Jaknužt wejt puntuquiztan Yooz tawk liwruquiz cjiřtažlaja jalla nii cumplizjapa tjonchinča”.

⁸ Jesucristuqui cjichiča, “Yooz Ejpqui anaž pecča nizaza anaž jutztaza jalla tinaca: animal wilananacami, ofrendanacami, nizaza ujta animalanacami, nizaza uj paatiquiztan tjaata ofrendanacami. Tuquita liiqui nižtanaca tjaaz mantichiča. Jalla nuž mantita cjenami, Yoozqui anaž niikaz ultimu pecča”.

⁹ Nekztan Jesucristuqui cjichizakazza: “Yooz Tata, wejrqui tii muntuquiz tjonchinča, am kuzcama kamzjapa”. Jaziqui Jesucristuqui nii tuquita liinaca apatatskatchiča, nii lii cuzturumpinacztanpacha. Nekztan ew lii ut'aychiča. Nii lii jaru Jesucristuqui wilana cunta intirjitatača.

¹⁰ Yooz kuzcama kamcan Jesucristuqui tsjii wiltakaz persun curpu wilana cunta intirjichiča, žoñinacz ujquiztan ticzjapa. Jalla nižtiquiztan Yoozqui učumnacaquiz zuma kamañchiz cjiskatchiča.

¹¹ Timplu jilirinacaqui zapuru ninacz puestuquiz atintichiča. Zapuru wiltan wiltan wilananaca Yoozquin tjaañitača. Pero nižta wilananacaqui ujnacquiztan anapan žoñinaca liiwriyasača.

¹² Jesucristuzti tsjii wiltakaz persun curpu wilana cunta intirjichiča, žoñinacz ujquiztan ticzjapa. Jalla nuž ticžcu, arajpachquin Yooz Ejpž zew latuquiz julziča, nižtan chica mantiñi cjisjapa.

¹³ Jalla nicju tjewžcan žejlča, niž quintranaca liwj atiptacama cjisjapa, niž kjojch koztan tjecžtažtakaz.

¹⁴ Jalla nuž žoñinacztaajapa tsjii wilta ticžcu, Jesucristuqui Yooz partiquiz žejlñi žoñinaczquiz wiñayjapa Yooz yujcquiz ancha zuma cjiskatchiča.

¹⁵ Nižaza nii puntuquiztan Espiritu Santuqui chiiča, tuž cjan:

¹⁶ “Tuquita lii apatatžcu, wejrqui žoñinaczquiz tsjii ew lii tjaa-ača. Jalla nuž cjiča Yooz Jiliriqi. Wejrqui ninacz kuzquiz wejt liinaca zizkatača, nizaza intintazkatača”.

¹⁷ Nekztan cjichizakazza:

“Ninacz paata ujnaca ana iya cjuñznača. Nižaza ninacz ana wali cjičitanacami liwj tjatznača.

¹⁸ Jalla nižta ujnacquiztan pertuntažlaj niiqui, ana iya čhjul wilanami pecasača”.

YOOZQUIN MACJATSPANZ WAQUIZICHA

¹⁹ Jilanaca, cullaquinaca, jaziqui Jesucristuž ticziž cjen učumqui ana jiwjatcan Yooz yujcquiz luzasača.

²⁰ Ew kamañchiz kamcanaqui ana jiwjatcan Yooz yujcquiz luzasača. Jalla nii ew kamañqui Jesucristuž tjaatača. Persun curpu wilana cunta tjaažcu, Jesucristuqui arajpachquinpacha Yooz yujcquiz luzziča, nii c'uchquin žejlñi cortina cjetžtažokaz.

²¹ Jesucristuča Yooz kjuychiz žoñinacztaajapa Yoozquin palt'iziñiqui. Jaziqui učumnacaltajapa palt'izinaquiča.

²² Jalla nižtiquiztan tjapa kuztan Yoozquin macjatz waquiziča. Nižaza Jesucristužquin kuzziz cjen ana jiwjatcan Yoozquin macjatz waquiziča. Jesucristuqui učumnacaž paata ujnaca pertunchiča, učumnac kuzquiz ana iya uj cjuñzjapa. Nižaza učum curpunacaqui tsjii zuma kjaztan awjztažokazza.

²³ Yoozquin macjatžcu Yooz famillquiz luzzinčumča. Jaziqi ana jiwjatcan tirapan Yoozquin tjurt'ichi kuzziz cjequiča. Nekztan Yooztan chica kamaquiča. Nii Yooztan kamzqui, jalla nii Yoozqui učumnacaquiz compromitchiča. Nižaza nii compromitchi Yoozza taku cumpliñiqui.

²⁴ Jalla nižtiquiztan Yooz kamañquiz kamcan porapat zumpacha p'ekinchayasa, zuma munaziñi kuzziz cjisjapa, nižaza zuma obranaca paazjapa.

²⁵ Nižaza yekjap criichi žoñinacaqui zapa domingo ana ajcajczñiča. Ana nižta irata kama. Antiz učumqui porapat zumpacha p'ekinchayasa, zuma kamzjapa. Jesucristuž tjonz tjuñi žcatžinžquiča. Jalla nižtiquiztan juc'anti učumqui porapat p'ekinchayastanča.

²⁶ Werar Yooz taku catokžcupacha nekztan kuzinpan Yooz quintra quepsnaquiž niiqui, ana pertunta cjesača.

²⁷ Pero nižta cjcijñinacžquiz Yoozkaz casticaquiča. Yoozqui niž quintranaca wiñaya casticaquiča infiernuquin.

²⁸ Jakziltat Moisés lii ana cazzi cjitčhaja, nižaza pucultan čhjepultan testicunaca nii ana cazta puntu declartčhaja, jalla nekztan nii uj paañi žoñiqui ana okžcu conzpanikaztača.

²⁹ Jalla nižtiquiztan jakziltat Yooz Majch quintranapan quepsnačhaja, nižaza Yooz Majch liwriñi ljoc tjawkta puntuquiztan iñaračhaja, nižaza okžni Yooz Espiritu Santužquiz žawjwa zjičhaja, jalla nižta paañinacaqui juc'anti castictaž cjequiča, nii Moisés lii quintra paañi žoñinacžquiztan cjen. Jalla nižta casticzpan waquiziča nižta žoñinacžtaqui.

³⁰ Učum pajta Yooz Jiliriqui tuž cjichiča: “Wejrtča castiquiñtqui. Wejrqui žoñinacžquiz casticača, ujnaca paatiquiztan jama”. Jalla nuž cjichiča Yooz Jiliriqui. Nižaza Yooz takuqui tuž cjiča: “Yooz Jiliriqui niž kjuychiz žoñinacž paatanaca pjalznaquiča”.

³¹ Jakziltat Yooz quintranapan kamchižlaja, jalla niiqui werar žejtñi Yooziž tantaž cjequiča. Jalla nuž Yooz tantaž cjequiž niiqui, nižtanacžquiz anča ana waliž cjequiča.

³² Ančucaž Yooz famillquiz luztaž cjuñzna. Paljayta Yooz taku catokžcu, ančhucqui pasinziz kuztan anča sufrichinčhucča, quintranaca anča žejlčhiž cjen.

³³ Yekjap ančhucqui ch'aanitatača, nižaza wjajttatača tjapa žoñinacaž cheran. Nižaza yekjap ančuca jilanacaž nižta sufran, ančhucqui “Jesalla, wejt jilača niiqui” cjican declarchinčhucča.

³⁴ Ančhucqui tsjii criichi žoñinaca preso tanta cjen okžni kuztan yanapchinčhucča. Nižaza ančucaž cusasanaca kjañta cjenami, cuntintu kuzziz žejlchinčhucča. Arajpachquin ančhucaltajapa juc'ant zumanaca žejlča, wiñayjapa tjurñi. Jalla nii cjuñžcu, ančhucqui cuntintu kuzziz žejlchinčhucča.

³⁵ Tjurt'ichi kuzziz cjican, jalla nii zuma kuzquiztan ana jayta. Ticzcama tjurt'ichi kuzziz cjequiž niiqui, Yoozquiztan pacta cjequiča juc'ant zumanacžtan.

³⁶ Ančhucqui pasinziz kuzziz cjee, Yooz kuzcama zuma kamzjapa. Jalla nekztan ančhucqui Yooziž compromitta zumanaca tanznaquiča.

³⁷ Yooz takuqui tuž cjiča:

“Wajilla nii tjonñiqui tjonaquiča, anaž anča ažk katasacha.

³⁸ Jakziltat wejtquiz kuzziz cjen wejt yujcquiz ana ujchiz cječhaja, jalla niiqui arajpachquin wejttañ chica zumapan kamaquiča. Pero jakziltat wejt quintra quepačhaja, jalla nii žoñiča ana waliqui. Niižtan anča anal jutztazuča”.

³⁹ Pero uĥumnacaĥa anapan Yooz quinfra quejpnasaz ni-
iĥui, Yooziĥ ancha ana waliĥ castictaĥ cjequiĥa. Antiz uĥumĥa tirapan Yoozquin
kuzzizqui. Jalla nuĥ kamcan uĥum persun animu zumaĥ ĥjelinĥa, liwriita cjisjapa.

11

YOOZQUIN KUZZIZ ZOÑINACA

¹ Yoozquin kuzziz cjen, uĥumqui ultimupan zizza, Yooz taku cumplitapanĥ cje-
quiĥa, jalla nii. Niĥaza Yoozquin kuzziz cjen uĥumqui zizza, anzta timpuquiz ana
cherĥcumu Yooz ĥejlpanĥa, niĥaza Yooz zumanaca ultimupan ĥejlĥa, nii.

² Uĥum tuquita atĥi maa ejpnacaqui Yoozquin kuz tjaachiĥa. Jalla nuĥ Yoozquin
kuzziz cjen Yoozqui ninacĥ puntuquiztan “Zumaĥa ninacaqui” cjichiĥa.

³ Yoozqui tawkĥtankaz chiican tii muntu paachiĥa. Yoozquin kuzziz cjen jalla nii
zizza, ultim werara jalla nuĥupan paata, jalla nii. Yoozqui ana chertanacquiztan tii
muntuquiz ĥejlĥinaca paachiĥa.

⁴ Yoozquin kuzziz cjen Abelqui tsjii zuma ofrenda wilana Yoozquin tjaachiĥa.
Cainĥquiztan juc'ant zuma ofrenda Yoozquin tjaachiĥa. Abelĥ Yoozquin kuzziz cjen,
Yoozqui Abelĥ tjaata ofrenda risiwĥiĥa. Niĥaza Abelĥ puntuquiztan Yoozqui chi-
ichiĥa “Zumaĥa niĥui” cjican. Abel ticziĥ cjenami uĥumqui zizza, niĥui Yoozquin
zuma kuzziztaĥa, jalla nii. Jalla nii zizcuqui uĥumqui Abelĥ zuma kamaĥa yatekasa.

⁵ Yoozquin kuzziz cjen Enocqui arajpachquin ana ticzi ĥjichtataĥa. Ana iya tii
muntuquiz ĥejlĥiĥa. Yoozpantaĥa ĥjitchi. Yooz takuqui Enocĥ puntuquiztan tuĥ
cjĥa: Ima arajpachquin ĥjichtaĥ cjen, Yoozqui Enoc zuma kamaĥquiztan cuntintu
cjissiĥa. Jalla nuĥ cjiĥrtaĥa Yooz tawk liwruquiz.

⁶ Jakziltat ana Yoozquin kuzziz cjeĥhaja, jalla niĥquiztan Yoozqui anapanĥ cuntintu
cjesaĥa. Jakziltat Yoozquin macjatz pecĥhaja, jalla niĥui criistanĥa, Yoozqui ĥejlĥa,
jalla nii. Niĥaza criistanĥa, Yoozqui niĥquin macjatz pecĥi ĥoĥinacĥquiz zumanaca
tjaaquiĥa, jalla nii. Jalla niĥta criichi ĥoĥĥquiztan Yoozqui cuntintuĥa.

⁷ Niĥaza Yoozquin kuzziz cjen Noequi kjaz juyzuquiztan liwriitataĥa. Ima kjaz juyzu
tjonan Yoozqui Noeĥquiz chiĥzinĥiĥa, “Kjaz juyzul cuchanĥcaĥa”, cjican. Jalla nii
Yooz chiĥzintaqui Noequi catokĥiĥa. Nekztan Yooz chiita jaru tsjii pajk warcu kjuya
irata kjuyĥiĥa, niĥ familianacĥtanpacha liwriita cjisjapa. Jalla nuĥ Yoozquin kuzziz
cjen Noequi tjeeziĥa, parti ĥoĥinacaqui ancha ujĥizza, jalla nii. Niĥaza Yoozquin
kuzziz cjen Noequi Yooz zuma kamaĥa tanchiĥa, tsjii irinsaĥtakaz.

⁸ Niĥaza Abrahamqui Yoozquin kuzziz cjen, Yooz mantita ana jayrazcu cazziĥa.
Yoozqui Abrahamĥquiz cuchanzjapa kjawziĥa, yekja yokquin okajo. Niĥaza Yoozqui
Abrahamĥquiz tuĥ cjichiĥa: “Wiruĥ wejrqui amquiz nii yoka tjaaĥa, irinsa cunta”.
Yooz mantita jaru ojĥiĥa. Jakziquin ojĥĥhaja, jalla nii ana zizatĥa. Jalla nuĥ
cjenami Abrahamqui Yooz tawk jaru ana jayrazcu ojĥiĥa ĥelatĥa.

⁹ Abrahamqui Yoozquin kuzziz cjen Yooz mantitacama nii Yooz tjeeĥta yokquiz kam-
ĥiĥa. Yekja ĥoĥ yoka cjenami, Yoozqui Abrahamĥquiz nii yoka compromitchiĥa,
“Wiruĥ tii yoka amta cjequiĥa”, cjicanaqui. Jalla nii yokquizpacha kamcan, zkiz
kjuy tultunacĥiz kamĥitaĥa Abrahamqui. Jalla niĥta zakaz Isaacĥtan Jacobĥtan zkiz
kjuyĥiz kamĥitaĥa. Nii pucultanaqui Abrahamĥ irata tjewzizakazza Yooziĥ chiita
taku cumpliscama.

¹⁰ Ultimu Abrahamqui arajpach wajtquin ojĥz tjewziĥa, wiĥaya tjurĥi watja. Yoozqui
nii zuma watja pinsichiĥa, niĥaza paachiĥa. Jalla nii zuma wajtquin ojĥz tjewziĥa
Abrahamqui.

¹¹ Niĥazakaz Sarqui Yoozquin kuzziz cjen ica cjissinĥa, ĥawcwa cjicanpacha.
Tsĥii majĥchiz cjissinĥa, Yoozquin criichiĥ cjen. Sarqui tantiĥinĥa, Yoozqui niĥ
compromitta taku panĥ cumplisnaquiĥa, nii.

¹² Jalla nižtiquiztan Abrahamqui ticz irarchiz cjenami tsjii majchchiz cjissičha. Jalla nii majchquiztan walja tama mirchiča, walja tama arajpach warawaranacažtakaz nižaza walja tama kot at pjilanacažtakaz, jalla nižta mirchiča. Ancha tamaž cjen, anača kanchuca Abrahamžquiztan tjonñi majch maatinaca.

¹³ Tjapa nii žoñinacaqui, Abelžtan Enocžtan, Noežtan, Abrahamžtan, jalla ninacaqui ticziča ima Yooz compromitta taku cumplisan. Jalla nuž cjenami Yoozquin tirapan kuzziztača. Yoozquin kuzziz cjen ninacaqui zizziča, Yoozqui niž taku wiruñtajapa panž cumplaquiča. Jalla nuž kuzquiz zizcu cuntintutača. Tii muntuquiz žejlcan ninacaqui “Yekja wajtchiz žoñtča”, cjiñitača.

¹⁴ Jalla nižta chiiñinacaqui kjanapacha tjeeža, ninacaqui arajpach wajtquin ojkz pecchiča, nii.

¹⁵ Ninacaž ulanžquita yoka cjuñtasaz niiqui, nii yokquin cuttiñi attasača.

¹⁶ Ninacazti tsjan cusa yokaž pecatča, arajpach yokquin irantiz pecatča. Jalla nižtiquiztan Yoozqui anaž azkatča, ninacaž “Wejt Yoozza”, cjican cjenacqui. Yoozqui ninacžtajapa tsjii zuma watja tjaczinchiča.

¹⁷ Nižaza Abrahamqui Yoozquin kuzziz cjen tjapa Yooz mantitanacami cumpliñitača. Yoozqui Abraham yanziča, ultimu Yoozquiz kuzziz, ana ultimu Yoozquiz kuzziz, jalla nii. Jalla nuž yanzjapa Yoozqui Abrahamžquiz mantichiča, niž zinta majch wilana cunta tjaakatzjapa. Nii zinta majchqui Isaac cjitatača. Nekztan Abrahamqui niž zinta majch wilana cunta conijochiča. Nekztan conzmayatača. Pero Yoozqui nii conz apatatskatchiča, Abrahamž zuma cazñi kuz zizcu. Niiž tuquiqui Yoozqui Abrahamžquiz cjichiča:

¹⁸ “Isaacž cjen amqui majchmaatinacchiz cjequiča”. Jalla nuž taku tjaachi cjenami Abrahamqui niž zinta majch wilana cunta conijochiča.

¹⁹ Abrahamqui persun kuzquiz tantiichiča, Yoozza ticzinacami jacatatskatñiqui, jalla nuž tantiyatča. Abrahamqui persun kuzquiz persun majch conz cjichipantača. Jalla nižtiquiztan Isaac majchqui ticziquiztan jacatatchižtakaz cjissičha.

²⁰ Nižaza Isaacqui Yoozquin kuzziz cjen Jacobžtan Esaužtan, jalla ninacžquiz mazinchiča, wiruñtajapa ninacžta zumanaca cjequiča, nižaza Yooz yanapta cjequiča, jalla nii.

²¹ Nižaza ticz ora Jacobqui Yoozquin kuzziz cjen Josež maatinacžquiz mazinchiča, Yoozqui ninacžquiz zumanaca tjaaquiča, jalla nii. Nižaza Jacobqui atztan tjurt'izcu Yoozquin rispitchiča.

²² Nižaza Josequi Yoozquin kuzziz cjen ticz ora mazinchiča, Israel žoñinacaqui Egipto yokquiztan ulnaquiča, nii. Nižaza mantichiča, persun curpu tsjijnaca Egipto yokquiztan chjichajo.

²³ Nižaza Moisés maa ejpqui Yoozquin kuzziz cjen Moisés nastiquiztan čhjep jiiz chjojziča. Ninacaqui cherchiča, ancha c'achja nii wawa, jalla nii. Tuquiqui Egipto chawjc jiliriqui mantichiča, tjapa Israel lucmajch wawa contaj cjila, nii. Pero Moisés maa ejpqui Yoozquin kuzziz cjen nii chawjc jiliriz mantita ana eksiča. Moisés wawa ana conchiča.

²⁴ Nekztan Faraón chawjc jilirž majtqui nii Moisés wawa uywassinča. Jalla nuž uywastiquiztan nii wawaqui pajkchiča. Jalla nekztan pajkžcu Moisesqui Yoozquin kuzziz cjen Faraonž maati cunta cjis anapan pecatča.

²⁵ Antiz Moisesqui Yooz illzta Israel žoñinacžtanpacha sufriz tantiichiča, uj paañi žoñinacžtan tsjii ratukaz cuntintu žejlz cjenpacha.

²⁶ Niiž kuzquiz tantiichiča, “Egipto cusasanacžtan cuntintu kamz cjenpacha, Cristužtajapapankaz sufrasača. Jalla nuž sufrichi kamchiž cjen ultimquiziqui juc'ant cusal cjeeča, ricachu kamzquiztan”. Jalla nuž cjican, Moisesqui Yooz compromitta zumanac kjutñi pinsatča.

²⁷ Nižaza Moisesqui Yoozquin kuzziz cjen Egipto yokquiztan ulanchičha, chawjc jilirž žawjta ortina ana eksk. Niiž kuzquiz tantiita jaru tjurt'ichi žejlchiča, niiž kuztan Yooz cherchiž cjen.

²⁸ Nižaza Moisesqui Yoozquin kuzziz cjen Yooz mantita jaru zapa kjuyquiz pascua wilana konz mantichiča. Nekztan nii wilan ljocztan zapa kjuy zanquiz sucarpayz mantichiča Israel žoñinacž primer maatinaca ana conta cjisjapa, ticzkatñi anjilžquiz.

²⁹ Nekztan Yoozquin kuzziz cjen Israel žoñinacaqui Mar Rojo cjita pajk kota kajkchiča, kjoñ yokažtakaz. Nekztan Egipto quintra žoñinacaqui nii kjoñiranpacha nii pajk kota zakaz kakatča. Jalla nuž taypiquiz kajkžcan tjapa nii Egiptonacaqui kjazquiz ticziča.

³⁰ Yoozquin kuzziz cjen Israel žoñinacaqui Jericó wajt muytata žejlñi pirkanaca pajlkatchičha, pakallak tjuñi muytata ojklayžcu.

³¹ Nižaza Yoozquin kuzziz cjen Rahabqui ana ticzinča parti Jericó wajtchiz žoñinacžquiztan. Naaqui Israel wajtchiz awayt'iñinaca zuma risiwchinča. Jalla nižtiquiztan ana ticzinča. Tuquiqui putirii žoñtača. Nekztan Yoozquin kuz tjaachinča. Pero parti Jericó wajtchiz žoñinacaqui Yooz mantita ana cazziča, werar Yoozquin ana kuz tjaachiča.

³² Yoozquin kuzziz puntuquiztan iya quintunaca žejlča. Pero timpuž pjaltiča. Jalla nižtiquiztan ana chii atasacha Gedeónž puntu, Baracž puntu, Sansónž puntu, Jeftéz puntu, Davidž puntu, Samuelž puntu, nižaza profetanacž puntu. Jalla nii Yoozquin kuzziz žoñinacž quintunaca žejlča pero.

³³ Ninacaqui Yoozquin kuzziz cjen quintra žoñinaca atipchiča, nižaza zuma mantiñi cjissiča, nižaza Yooz compromitta taku tanziča, nižaza ana wal leonanacž atanaca chawczinchiča.

³⁴ Nižaza ana wal uj asñinaca tjessinchiča, nižaza atipchiča, ninaca ana pajk cuchillžtan conta cjisjapa. Nižaza ana azziz žoñinacaqui azziz cjissiča Yoozquin kuzziz cjen. Nižaza quira zalcan walja azziztača, jalla nižtiquiztan quintra žoñinaca tjiranchiča.

³⁵ Yoozquin kuzziz cjen Yoozqui yekjap maatakanacžtajapa ticzinaca jacatatskatchičha.

Yoozquin kuzziz cjen yekjap žoñinacazti sufriskattača. Pero ninacaqui ana Jesucristo nicchiča, sufrisquiztan liwriita cjisjapa. Antiz tirapan tjurt'ichiča, ticz cjenami. Jalla nuž ticziča, jacatatžcu juc'ant zuma kamañchiz cjisjapa.

³⁶ Yekjap žoñinacaqui Yoozquin kuzziz cjen iñartatača. Nižaza wjajttatača. Nižaza carinžtan maktatača. Nižaza carsilquiz chawctatača.

³⁷ Nižaza Yoozquin kuzziz cjen yekjap žoñinacaqui maztan čhajcžcu contatača. Nižaza yekjapanacaqui taypiquiz pootžcu contatača. Yekjapanacaqui sufriskattatača, werar Yoozquiztan quejpskatajo. Pero nii criichi žoñinacaqui ana quejpsiča. Yekjapanacaqui Yoozquin kuzziz cjen cuchillžtan contača. Yekjapanacaqui Yoozquin kuzziz cjen uuzi zkizimi cabra zkizimi cujtžta ojklaychiča. Ana iya zquitichiztača. Nižaza Yoozquin kuzziz cjen yekjap žoñinacaqui t'akjiri kamcan awantichiča; yekjapanacaqui ancha sufrisnaca awantichiča; yekjapanacaqui chjojritžtapan awantichiča.

³⁸ Ana criichi žoñinacaqui nii Yoozquin kuzziz žoñinacžtan ana kamz waquiziča. Ana criichi žoñinacaqui ana zumapanča. Nii Yoozquin kuzziz žoñinacazti ancha zumača. Jalla nuž cjenami tii muntuquiz sufrican awantichiča, ch'ekti yokaran ojklaycan, curunacaran ojklaycan, maz pjet ajkquiz kamcan, nižaza yok pjetquiz kamcan.

³⁹ Tjapa ninacaqui Yoozquin kuzzizpantača. Jalla nižtiquiztan Yoozqui ninacž puntuquiztan ticlarchičha, “Ninacača wejtquin kuzzizqui” cjicanaqui. Jalla nuž cjenami, Yooziž compromitta taku ninacžtajapa ima cumplissiča. Yooz taku cumplitaqui ana tanziča.

⁴⁰ Učhumnaca cjuñzcu, Yoozqui juc'ant zumanaca pinsichiča. Jalla nižtiquiztan ninacžtanami učhumnacatanami chicapacha, nižaza tjapa Yoozquin kuzziz žoñinacaqui Yooz irata ancha zuma kamañchiz cjequiča.

12

YOOZ KAMAÑCHIZ CJEE

¹ Yoozquin kuzziz žoñinaca, jaziqui wacchi tuquita žoñinacaqui učhumnacaquiz tjeeziča, Yoozquin kuzziz kamaña, jalla nii. Ninacaqui učhumnaca muytatažtakazza. Ninacž zuma kamaña cjuñzla. Jalla nekztan tjapa anawalinaca paaz jaytila nižaza kuzquiz tjapa anawali pinsiskatñinaca ecla. Nekztan Yooziž tjaata kamañquiz tjurt'iñi pasinziz kuztan kamla.

² Nižaza učhumqui Jesucristuž kamaña cjuñzla. Niiž cjen učhumqui Yoozquin kuz tjaachinčhumča. Nižaza niiqui učhumnacaquiz juc'ant Yoozquin kuzziz cjiskataquiča, ancha zuma Yooz kamañchizkaz cjisjapa. Jesucristuqui cruzquiz ticzcan sufrichiča. Cruzquiz ticzqui azzucatača. Pero Jesucristuqui ana turwayziča nii ticzjapa. Jalla nižtiquiztan arajpachquin Yooz žew latuquiz julzi žejlča, cuntintu. Jalla nuž cuntintu žejlz zizcu, nii sufriznaca awantichiča.

³ Jesusaž kamta cjuñzna. Niiqui ujchiz žoñinacž kjarquiz ancha sufrichiča. Jalla nii Jesusaž kamta cjuñzcu Yooz kamañchiz kamcan anapan ocha, tjup kuzziz cjee.

⁴ Ančhucqui imaziž contača ujchiz žoñinacž ančhucaquiz walja sufriskatanami.

⁵ Yoozqui ančhucaquiz chiižinčiča, niž maatinacažtakaz. Jalla nii ewjt'iñi chiižinta ana tjatzna. Yooz takuqui tuž ančhucaquiz chiižinča:

“Wejt maati, Yooz Jiliriž ewjt'iñi chiižinta ana chjaya. Nižaza nižquiz casticta cjenami ana llajlla kuzziz cjee.

⁶ Yooz Jiliriqui niž k'aayi maatinaca ewjt'iča; nižaza persun maatinaca azquichñi casticu tjaaža, wilta zuma cjičiyajo”.

⁷ Jalla nižtiquiztan ančhucqui pasinziz kuztan Yooz azquichñi casticu awanta. Yooz Ejpqui ančhucaquiz irpiča. Tjapa ejpnacaqui persun maatinacapanž ewjt'iča. ¿Tsjii ana nižta ewjt'iñi ejp želasajo? Anaž cjesača.

⁸ Jaknužt Yoozqui tjapa niž maatinaca ewjt'ičhaja, jalla nižta Yoozqui ančhuc ewjt'izakazza. Ančhucqui ana ewjt'ita cjitasaž niiqui, ana lijitum Yooz maatinaca cjitasača. Ančhucqui pampan maatinacažtakaz cjitasača. Ana ultim Yooz famillchiz žoñinaca cjitasača.

⁹ Ančhuc cjuñzna, ocjala cjicanaqui učhum persun maa ejpqui ewjt'iñitača. Nižaza ninacžquiz rispitchinčhumtača. Jalla nižtiquiztan žoñi paañi Yooz Epiž ewjt'itaqui juc'anti catokz waquiziča, zuma kamañchiz kamzjapa.

¹⁰ Učhum persun maa ejpqui tsjii timpujapakaz učhumnacaquiz ewjt'ichiča, ninacž tantiitacama. Yooz Ejpzti učhumnacaltajapa ewjt'iñiča, učhum tsjan zuma kamañchiz cjisjapa, niž irata ancha zuma cjisjapa.

¹¹ Azquichñi casticunacquiztan učhumqui sufričhumča. Casticz ora llaquita kuzzizčhumča. Pero jakziltat castictiquiztan tsjan zuma kamañchiz cjissižlaja, jalla niiqui ultim cuntintu cjisnaquiča. Nižaza zuma kuzziz Yooz kuzcama kamaquiča.

YOOZQUIN TJAPA KUZ CJISPANCHA

¹² Jalla nižtiquiztan ančhucqui wilta azi tanzna, zuma kamzjapa. Kjaranacami owanacami otchižtakazza. Tjup kuzziz cjee, zuma kamzjapa.

¹³ Yooz jiczquiz zuma ojklaya. Jalla nekztan anazuma ojklayñi žoñinaca zuma kamañquiz irpita cjesača. Ančhucaž zuma kamtiquiztan ninacaqui zuma kamañchiz cjisnaquiča.

14 Nižaza tjapa žoñinacžtan zumapanž kamzjapa tjapa kuz tjaa. Nižaza Yooz irata ancha zuma kamañchiz kamzjapa tjapa kuz tjaa. Ana zuma kamañchiz cjequiž niiqui anaž Yooz Jiliržtan kamasacha.

15 Yoozqui ančhucquin yanapz peccha. Nii zuma yanapta ana chjaya. Yoozquiztan anapan zaraka. Ana wal jar muntižtakaz ana cjee. Jalla nuž ana wal muntižtakaz cjequiž niiqui, ančhucatami parti jilanacžtami ana wali kamañchiz cjesacha.

16 Nižaza nii ana zuma kamañchiz Esaúžtakaz ana nižta cjee. Esaúqui adulteriuquiz ojklaychiča, nižaza Yooz kamaña ana importaychiča. Esaúqui jilir majch irinsižtan tsjii lujlz čhjeržtan campiichiča.

17 Nekztan wiruñ Esauqui ejpžquiztan jilir majch irinsa tanz pecatča. Niiž ejpqui Jacobžquiz tjaachitaž cjen Esaúžquiz ana tjaas atchiča. Niiž irinsa tjaatapanča. Wiruñ Esaúqui ancha kaacanami, ana jaknužumi irinsa tanzni atchiča.

18 Ančhucqui Yoozquin macjatžquichinčhucča. Ančhucqui anača Israel žoñinacžtakaz Sinaí curquin macjatžquichinčhucqui. Nii curquiz žoñinacqui ojklayča, nižaza lanža. Pero Yoozquin ana lanzni atasacha. Tuqui timpuqui Israel žoñinacž Sinaí curquin macjatan nii curuqui ujznatča, nižaza tsokchi tsjiržtan weeztatača. Nižaza jorjorñimi lliwjlliwjñimi želatča.

19 Nekz žejlcan trompet jora nonziča. Nižaza Yooz jora nonziča, ninacžquin paljayžquiñi. Nii jora nonzni žoñinacqui roct'ichiča, ana iya chiižcajo.

20 Nii joraqui tuž mantichiča: “Jakziltat tii curquiz macjatžcačhaja, maztan čhajc jawi contaž cjequiča, už pajk cuchillžtan contaž cjequiča. Žoñinacami animalanacami nižta macjatžcaquiž niiqui, contaj cjila”. Jalla nuž chiižinžquitiquiztan Israel žoñinacqui ancha tsucchiča, nižta mantanaqui ana iya awanti atchiča. Jalla nižtiquiztan roct'ichiča, ana iya chiižcajo.

21 Ancha ispantichucanacatača nii chertanacqui. Jalla nižtiquiztan Moises-pachača tuž cjichiqui: “Wejrqui anchal tsucuča, nižaza kjarkatuča”.

22 Pero ančhucqui Sinaí curquin ana macjatžquichinčhucča. Ančhuczi arajpach žejtñi Yoozquin macjatchinčhucča, nižquin kuz tjaachiž cjen. Jaziqui ančhucča arajpach Jerusalén wajtchiz žoñinacqui. Nižaza Sión cjita curquiz macjattažokazza. Nii Sión cjita curuqui cjiča, arajpach Jerusalén watja, jalla nii. Arajpach Yooz wajtquin warank waranka anjilanaca žejlča, Yoozquin rispitzjapa ajczni.

23 Nižaza Yooz wajtquin anjilanacžtan chica Yooz wajtchiz žejlñinacqui ajcža, Yooz wajtchiz žoñinacžtanpacha. Jalla nii žoñinacž tjuunacqui arajpach listiquiz cjiirtača. Nižaza ančhucqui Yooz Jiliržquizpacha macjatchinčhucča. Nii Yoozza tjapa pjalñiqui. Nižaza ančhucatan zuma kamañchiz žoñinacž animunacžtan Yooz wajtchizza. Yoozqui ninacžquiz niž irata ancha zuma kamañchizkaz cjiskatchiča.

24 Nižaza ančhucqui Jesusižquin macjatchinčhucča. Niiča ew acta ut'aychiž cjen žoñinacžta tjurt'iziñiqui. Žoñinacžtajapa ticziča. Nižaza žoñinacž laycu niž ljocžtan sucarpaytažokaz cjichiča animal ljocžtakaz. Jesusiž ljoc tjawkchiž cjen, žoñinacqui liwriita cjesacha. Abelž ljocqui žoñinaca ana liwriyasača. Jalla nižtiquiztan Jesusiž ljocqui Abelž ljocquiztan tsjan cusača.

25 Jalla nižtiquiztan ančhucqui Yooz chiita taku anaž nicaquiča, panž catokz waquiziča. Tuqui timpuqui Yoozqui Sinaí curquiztan Israel žoñinacžquiz chiichiča. Nekztan ninacqui nii chiita taku ana juyzu paachiča. Jalla nižtiquiztan ninacqui castictatača. Anziqui Yoozqui arajpachquiztan učumnacqui chiižinžquiča. Nii chiižinta ana juyzu paaquiž niiqui, panž castictaž cjequiča. Yoozquiztan anapan atipi atasacha.

26 Tuqui timpuqui Yooz joraqui yokanaca chjekinskatchiča. Anziqui cjiča: “Tsjižtan yokanacami arajpachami chjekinskatača”.

²⁷ “Tsjiiztan” cjicanaqui Yoozqui zizkatča, Yooz paata yokanacami arajpachanacami liwj kataquiča. Nekztan ana chjeksinskattanaca, niikaz želaquiča.

²⁸ Yooz watjaqui ana tjabatadž cjesača, panž želaquiča. Učhumča nii wjtchiz žoñinacaqui. Nižaza učhumqui Yooztan chica mantaquiča. Jalla nižtiquiztan učhumqui Yoozquin gracias cjizpan waquiziča. Nižaza tjapa kuztan, nižaza humilde kuztan Yoozquinž zuma rispita, Yooz tsucchuca azi tjeezñiž cjen, nii cjuñžcu. Jalla nuž rispitan Yoozqui cuntintu cjequiča.

²⁹ Cjuñžna. Učhum Yoozza tsjii anawalinaca ujzñi ujztakazqui. Jalla niiča anawali žoñinaca casticñiqui.

13

CHIZINTANACA

¹ Jilanaca, cullaquinaca, porapat tirapan zuma munaziñi kuzziz cjee.

² Nižaza tjonzñi žoñinacžquiz zuma pan kjawžna. Jalla nuž kjawžcuqui yekjap žoñinacaqui anjilanacžquiz atintichiča, ana zizcu.

³ Carsilquiz chawcta jilanaca panž cjuñžna. Ančhucacakaz persun kuzquiz ninacaž chawctiquiztan sint'iz waquiziča. Nižaza sufriskatta jilanacžquiz cjuñžna. Ančhucqui curpuchiz cjicanaqui zakaz sufriskatta cjesača.

⁴ Tjapa ančhucqui lucutjiñi zalžcu, zuma lijitumaž cjicjiya. Tjunatan zalžcu zuma li-jitumaž kama, ana yekja maatakžtan ojklayasača. Jakziltat adulteriuquiz ojklayčhaja, jalla nižquiz Yoozqui casticaquiča.

⁵ Ančhucqui anaž paazquin kuz tjaa. Zejlñi cusasanacžtan cuntintukaz cjee. Yoozqui tuž cjichiča: “Wejrqui ančhuc anal jaytača, nižaza anal ecača”.

⁶ Jalla nižtiquiztan učhumqui ana jiwjatcan chiyasača, tuž cjican: “Yooz Jiliriča wejtquiz yanapñiqui. Zoñinacž wejtquiz čhjulu paachi cjenami anal eksnasača”.

⁷ Ančhucqui icliz irpiñinaca cjuñžna. Ninacaqui ančhucacquiz Yooz taku paljaychiča. Jaknužt ninacaqui tjurt'ichi kuzziz ticzičhaja, jalla nii cjuñžna. Ninacaž Yoozquin kuzziz kamta jalla nižta irataž kama.

⁸ Jesucristuqui tuqitanpacha, anzimi, jaztanami tsjii kuzzizpanikazza, jalla niiča ana kuz campiiñiqui.

⁹ Nižaza ančhucqui tjapaman tsjemata tjaajintanacžquiz anaž incallskata. Cjuñžna, Yoozqui ančhucacquiz yanapaquiča, tjup kuzziz cjisjapa. Jalla niiqui tsjan yanapča, čhjeri lujlz cuzturumpiquiztanaqui. Jakziltat nii čhjeri lujlz cuzturumpinac jaru kamčhaja, jalla ninacžtaqui anaž yanapča juc'ant zuma kamañchiz cjisjapa.

¹⁰ Učhumnacaltaqui anača animal wilana žejlča. Tsjemat wilana žejlča, Jesucristupacha. Tuqita timplu jilirinacaqui anapanča nii wilana lujlchuca.

¹¹ Tuqita lii jaruqui timplu chawjc jiliriQUI conta wilan ljoc chjitchiča c'uchquin žejlñi Yooz kjuyquin, Yoozquin ofrenda tjaazjapa, ujnaca pertunta cjisjapa. Nii wilanž curpunacaqui wajt tjii pampiquin ujñitača.

¹² Jalla nižta irata Jesusaqui wajt tjiiquin ticziča, niž persun ljoc cjen žoñinacžquiz Yooz anča zuma kamañchiz cjiskatzjapa.

¹³ Ančhucqui ana wal kamaña eccu, Jesucristužquin macjatz waquiziča. Nekztan učhum listuž cjee, sufrizjapa.

¹⁴ Tii muntuquiz kamcan ana wiñaya tjurñi wajtchizčhumča. Pero učhumqui arajpach watjaž ojczjapa anča tjewža.

¹⁵ Jalla nižtiquiztan Jesucristužquin sirwican učhumqui tirapan Yoozquin honora tjaaz waquiziča. Jalla nuž honora tjaacan wilana cuntaž cjequiča. JaziQUI učhumqui persun atžtan “Yoozqui honorchizkaj cjila”, cjican chiiz waquiziča.

¹⁶ Nižaza ančhucqui zuma paaznaca panž paa. Nižaza parti jilanacžtan ančuca želinchizquiztan jama tojna. Nekztan ančucaž zuma kamtiquiztan cuntintu cjequiča Yoozqui.

¹⁷ Ančhucqui icliz irpiñinaca cazpanča, nižaza ninacž jaru cjee. Ninacaqui ančhuc cuitiñiča. Nižaza nii icliz irpiñinacaqui, jaknužt criichi žoñinaca cuitiñizlaja, jalla nii Yooz yujcquin cuenta tjaastanča. Ančhuc zuma kaman, irpiñinacaqui cuntintuž ančhuc cuitaquiča, ana llaquizcu. Ančhucqui ančuca irpiñinacžquiz llaquiskataquiž niiqui, anapanž cusa cjesača ančhucaltajapaqui.

¹⁸ Wejtnacaltajapa Yoozquiztan mayizina. Wejrnacqui zuma kuztanpan kamuča. Jaziqui wejtnaca kuzquiz ana zinta uj cjuñuča. Chjulu paacanami zuma lijituma kamz pecuča.

¹⁹ Nižaza wejtnacaltajapa mayizinalla, ančucaquin wilta apura tjonzjapa, ana iya atajta cjisjapa.

²⁰⁻²¹ Yoozza žoñinacž kuznaca walikaz cjiskatñiqui. Jalla niiqui učum Jesucristo Jiliriž ticziquiztan jacatatskatchiča. Jesucristuča učum chawjc Awatiriqui uuzanaca itzñižtakaz. Niiqui persun ljocžtan ew acta ut'aychiča wiñayjapa.

Jalla nižtiquiztan Yoozqui ančucaquiz zuma kamañchizpankaj cjiskatla, niž kuzcama kamzjapa. Nižaza Jesucristuž cjen Yoozqui učum yanapla, zuma obranacami paazjapa, nižaza zuma kamzjapa. Ančucaž zuma kamtiquiztan Yoozqui cuntintu cjequiča. Jaziqui Jesucristuqui wiñayjapa honorchiz cjila. Jalla nužoj cjila. Amen.

²² Jilanaca, cullaquinaca, ančucaquiz rocuča, weriž chiižinta taku zuma kuztan nonznaquiča. Tsjii kjaž takunaca tii cartiquiz cjiirchinča.

²³ Učum Timoteo jilaqui carsilquiztan liwriitača. Jalla nii ančucaquiz maz pecuča. Timoteoqui tekz waj tjonaquiž niiqui, nižtan wejttan ančucaquin cheržni okača.

²⁴ Tjapa icliz irpiñinacžquin tsaanžinalla. Nižaza tjapa Yoozquin criichi žoñinacžquiz tsaanžinalla. Nižaza Italiaquiztan tjoñi jilanacaqui ančucaquin tsaanžquiča.

²⁵ Yoozqui tjapa ančucaquiz zumapanj yanapt'ila. Jalla nužoj cjila. Amén.

LA CARTA DE SANTIAGO

¹ Wejrtča Santiaguqui. Wejrqui Yooz Ejpž, nižaza Jesucristo Jilirž mantitacama okiñ žoñtča. Ančhucqui Israel wajtchiz žoñinacaqui tjapa nacionquin wichanziča. Ančucaquin saludos apayžcuča tii cartiquiz.

PRUEBANACZ PUNTU

² Yoozquin criichi jilanaca, cullaquinaca, tii muntuquiz kaman tjapaman pruebanacaž žejlča. Chjulorami tsjii prueba tjonauquiz niiqui, ancha cuntintuž cjee.

³ Yoozquin tirapan kuzziz cjen, čjul pruebanacami atipaquiča. Nižaza Yoozquin juc'anti kuzziz cjisnaquiča. Nekztan juc'anti Yoozquin tjurt'iñi kuzziz cjisnaquiča.

⁴ Nižaza tirapan Yoozquin tjurt'aquiz niiqui, Yooz irata ancha zuma kamañchiz cjisnaquiča. Zuma lijitum žoñipan cjisnaquiča.

⁵ Pruebanacaž amquiz tjonauquiz niiqui, nekztan am kuz turwayznaquiz niiqui, Yoozquin juc'anti mayiza, Yooz jicz puntu zuma zizñi cjisjapami, nižaza nii pruebanaca atipzjapami. Yoozqui ancha zumača. Jakziltat mayizaja, jalla nii žoñžquiz Yoozqui zuma yanapasacha. Niiž okzñi kuzziz cjen, ana ujžcu yanapasacha, pruebanaca atipsjapa.

⁶ Yoozquin mayizican tjapa kuztan mayizizpanča. Ana paysnakñi kuzziz mayiziz waquiziča. Paysnakñi kuzziz cjesaž niiqui, tjamiž chjichta kjaz ljojkižtakaz cjesača, awizaqui Yoozquin kuzziz, awizazti ana Yoozquin kuzziz.

⁷⁻⁸ Nii payznakñi žoñiqui pizc kuzzizza. Jalla nižtiquiztan pizc kuzziz mayizan, ana nonžta cjesača. Yoozqui nii žoñžquiz ana yanapasacha. Nižaza nii pizc kuzziz žoñiqui anaž pinziz waquiziča, “Yoozqui wejtquiz yanapaquiča”, cjicanaqui.

⁹ Jilanaca, cullaquinaca, yekjapa Yoozquin criichi žoñinaca porinacača. Nii žoñiqui Yoozquin criichiž cjen, Yooz maati cjissiča. Nižaza arajpachquin okaquiča, walikaz kamzjapa. Jalla nižtiquiztan cuutintupanž cjis waquiziča.

¹⁰ Jakzilta Yoozquin criichi žoñit ricachuquiztan porilla cjisnasaž niimi, cuntintupankaz cjis waquiziča. Nii žoñiqui tirapan Yooz maatiča. Tsjii pastuqui tsjii pacamakazza zuma pjajkjallchizqui. Nekztan niiž pjajkjallaqui k'alaž chooča. Pjajkjallažtakaz tsjii timpupankaz ricachu cjesača žoñiqui.

¹¹ Tjuñiž kjaki siyanaqui pastu pjajkjallanacaqui k'ala chooča. Nekztan nii pjajkjallanacaqui katča. Anaž iya c'ajča. Nižtakaz ricach žoñinacaqui tsjii timpukaz ricu kamča. Ricachu kamcan tiripintit porinsnasača.

UJ PAAZ PUNTU, YOOZ PUNTU

¹² Chjul prueba tjonanami Yoozquin tjurt'iñi kuzziz cjee. Nižta tjurt'aquiz niiqui, cuntintuž cjequiča. Yoozqui nii zuma tjurt'iñi kuzziz žoñinaczquiz ancha zuma kamaña tjaača. Nuž Yoozqui compromitchiča nižtan munazican sirwiñi žoñinaczquin.

¹³ Jakziltat uj paaz pecčhaj niiqui, anapanž Yoozquin culpasača, “Yoozqui wejtquiz ujquin tjojtskatz pecča” cjicanaqui. Yoozqui ana jakzilta žoñimi ujquiz tjojts munča. Nižaza Yoozqui uj paazqui anapanž persuna pecča.

¹⁴ Žoñinacz persun kuzqui ana zuma uj paaz pecča. Nekztan uj paazquin ojkča.

¹⁵ Chjulorami žoñinacaqui ana zuma kuzcama kamčhaj niiqui, ujquinpanž chjichtača. Nižaza jakziltami uj paañipan kamčhaj niiqui, wiñaya castictaž cjequiča.

¹⁶ Wejt k'ayi jilanaca, cullaquinaca, ana incalltaž cjee.

¹⁷ Yoozqui zumapanča, nižaza lijitumapanča čjulquiztanami. Tjappacha zumanacaqui Yoozquiztanž tjonča, tjapa zumanacača tsewcta Yooz Epiž tjaataqui. Yoozqui tjuñimi jiižmi paachiča. Ninacz kjanaqui awisac zuma kjanča, awisac

tsjirqviz weeztača. Yoozti anača nižta, zumapankazza. Anapan zoñi ujquin tjojtskatz pecča.

¹⁸ Yoozqui zuma kuztan učumnacaquiz niž maati cjiskatchičha. Yooz werar taku criichiž cjen, učumnacaqui Yooz maatinaca cjissinčhumčha. Jalla nižtiquiztan učumnacaqui parti criichi zoñinacz tuqui Yooz maatinaca cjissinčhumčha. Jalla nužupančha Yooziž pinsitaqui.

YOOZ TAKUNACA CATOKZPANCHA

¹⁹ Wejt k'ayi jilanaca, cullaquinaca, nonžna. Yooz taku nonzjapa listu cjee. Ančhuca kuzquiz čhjulu chiizmi tjonžaja, jalla nii chiizqui zumpacha tantiižcu, chiiz waquizičha. Tiizakaz cjiwčha, anača orallac žawjzqui.

²⁰ Oralla žawjñi zoñinacaqui parti zoñinaczquiz anaž yanapi atasacha Yooz kuzcama kamajo.

²¹ Jaziqui ančhuqui ana zuma kamañnacquiztan jayta. Ancha uj paaznaca žejlčha. Tjapa uj paaznacquiztan jayta. Nekztan humilde kuzziz Yooz tjaajinta taku zumpacha catoka. Nii Yooz takuqui ančhucž liwriyasača.

²² Yooz takuqui anača nonžneeka nonzqui, antiz catokspančha, ana persunpachquiz incallta cjejajo.

²³ Yooz taku nonžcu jakzilta zoñit nii Yooz tawkcama ana kamčhaja, jalla niičha ana zuma zoñiqui. Tižtaž nii zoñiqui. Nii zoñiqui ispiwjquiz persun yujc cheržcu,

²⁴ ojkčha. Nekztan nii cheržta yujc tjatža. Nižtaž nii Yooz taku nonžneeka nonžni zoñiqui. Yooz taku nonžcu, Yooz taku tjatža; ana nii Yooz tawkcama kamčha.

²⁵ Yekjap zoñinacazti tjapa kuz nonža Yooz zuma liwriiñi taku. Kuzquiz chjojčha. Nonžcu, ana tjatža, niicamaž kamčha. Jalla niž zuma kamtiquiztan Yoozqui nii zoñžquiz wintissa, tsjan walikaz kamajo.

²⁶ Jakzilta zoñit “Yooz tawkcama zuma kamiñ zoñtčha wejrqui” chiičhaj niiqui, niž atquiztan chiichiiz cuitazla. Anaž niž ata cuitasaquiz niiqui, persunpachaž incallčha. Inapankaz cjičha, “Yooz tawkcama zuma kamiñ zoñtčha wejrqui”.

²⁷ Jakzilta zoñit Yooz tawkcama zuma kamčhaj niiqui, t'akjir wajchallanacami žewallanacami yanapaquičha. Nižaza ujchiz zoñi irata anaž kamasacha. Jalla nii zoñičha Yooz tawkcama zumaž kamñiqui. Jalla nii zoñičha Yooz Ejpž yujcquiziqui ana ujchizqui.

2

JILANACZQUIZ ANACHA PJALI PJALI CJISQUI

¹ Wejt jilanaca, cullaquinaca, Jesucristo Jiliričha ancha honorchiz Yoozqui. Ančhucqui nii Jesucristo Jiliržquiz kuzziz kamcan, tjapa jilanacžtan kuz chicata chjits pecca. Anača pjali pjali cjisqui.

² Jalla tuž nonžna. Ančhucaž ajcziž cjen pucultan zoñinacaqui tjonačhani. Tsjiiqui ricachučha, kor surtijanacchiz, nižaza ancha zuma zquitchiz. Tsjiizti porillačha, tsjel zquitchiz.

³ Nekztanaqui ančhucqui ricachukaz zuma atintačhani, “Tucquin julzna” cjican. Nii porill zoñžquizzti, “Nekzillakaz tsijtsna” cjičhan, už “Zana latullakaz julzna” cječhaj.

⁴ Nuž cjequiz niiqui, niwjctanaqui pjaliž cjiicjiičha. Tjapa jilanacažtan ana chicata kuz chjitčha. Ana zuma kuzziz cjen, nižta cjiicjiičha ančhucqui.

⁵ Nonžna, wejt k'ayi jilanaca, cullaquinaca. Tii muntuquiz Yoozqui pori zoñinaca illzičha, nižquin ancha kuzziz cjejajo. Nižaza Yoozqui tsjii taku tjaachičha, tuž cjican: “Wejtquin kuzziz zoñinacaqui wejttan chicaž kamaquičha. Nižaza jilirižtakaz wejttan chicaž mantaquičha”. Jalla nii taku tjaachičha, nižtan zuma munaziñi zoñinaczquiz. Jaziqui nii Yoozquin kuzziz pori zoñinacaqui nii tjaata taku tanznaquičha.

⁶ Ančhuczti pori zoñinaca ana rispitcha. Ricachukaz rispitcha. Pero ricachu zoñinacaqui ančhuc juc'anti langzkatcha. Nižaza jilirinacz yujcquiz ančhuc chjitcha, multanaca pacajo.

⁷ Nižaza ricachunacaqui Jesucristuž quintra ana zuma chiichiiča. Pero zuma Jesucristuž cjen učhumqui cristiano cjita tjuuchizčhumča.

⁸ Jilanaca, cjiirta zuma Yooz takuqui tuž cjiča: “Jaknužt persunpachquiz okzñamžlaja, jalla nižta okzñi kuzziz cjistanča zoñinaczquizimi, lijitum mazižtakaz”. Niicama kamcanaqui zuma kamsa.

⁹ Pero pjali cjiicjiiñinacazti uj paača. Yooz tawk quintra paača. Jalla nii kjanapacha zizkatča Yooz takuqui.

¹⁰ Jakzilta zoñit tsjiillapan Yooz mantita ana cazzaj niiqui, ujchizpanča. Parti mantitanaca cazziž cjenami Yooz lii quintra paachiča. Jaziqui castictaž waquiziča.

¹¹ Yoozqui tuž mantiča: “Anača adulterio paazqui”. Nižaza nii Yoozpacha mantiča: “Anača zoñi conzqui”. Adulterio ana paachi cjenami, jakzilta zoñit zoñi cončhaj niiqui, uj paača. Yooz lii quintraž paača.

¹² Yooz takuqui Cristuž puntu zakaz chiiča. Cristuča učhum liwriiñiqui. Liwriita zoñinacaqui čhulu paacanami chiicanami zuma munaziz waquiziča. Jakzilta zoñit ana nuž kamčhaj niiqui, casticta cjequiča.

¹³ Nižaza jakziltat ana okzñi kuzziz kamchižlaj niiqui, casticta cjequiča. Yoozqui nižquiz ana zakaz okznaquiča. Pero jakziltat okzñi kuzziz kamchižlaj niiqui, juyzuquiz liwriita cjequiča, ana casticta cjequiča.

YOOZQUIN KUZIZ KAMZ PUNTU

¹⁴ Wejt jilanaca, cullaquinaca, jakzilta zoñit ana zuma kamčhaja, niiqui inakaz chiiča, “Yoozquin kuzziztča wejrqui” cjican. Nuž ata alaja chijan, ana liwriita cjesača.

¹⁵ Nonžna. Tsjii jila cjicu už tsjaa cullaqui cjicu ana zquitchizlaja, nižaza ana čhjerchizlaja, jalla nižquiz yanapž waquiziča.

¹⁶ Nii t'akjir zoñi cheržcu tsjiiqui ančhucaquiztan cječhani, “Walika okalla amqui, am curpu anam čh'uñuri naykataquiča; nižaza anam čhjeri eckataquiča” cjican. Pero ana čhjulumi nii t'akjir zoñžquiz yanapčhaj niiqui, ina chiita tawkžtankaz okža. Nii pori zoñiqui pachpa t'akjirikaz žejlča.

¹⁷ Pori zoñžquiz ana yanapčhaj niiqui, inapanikazza Yoozquin criitaqui. Nii ana yanapñi zoñiqui ana Yooz kamañchizqui. Inakaz pinsiča, “Yoozquin kuzziz zoñtča wejrqui” cjicanaqui.

¹⁸ Yekjap zoñinacaqui cječhani, “Tsjiiča Yoozquin kuzzizqui. Tsjiizti zuma kamañnacchizqui”. Pero wejrqui cjiwča, ana zuma kamčhaj niiqui, žaknužt Yoozquin kuzzizqui tjeeznasajo? Anapanž tjeezni atasacha. Zuma kamcan, Yoozquin kuzzizqui tjeeznasacha.

¹⁹ Zinta Yoozpankaz žejlča. Ančhucqui nii zinta Yoozquin criiča. Nii walikazza. Pero zajranacami “Zinta Yoozpankaz žejlča” jalla nuž zakaz zizza. Jalla nuž zizcu, Yooz casticz tjuñi eksniča. Pero Yoozquin eksni cjenami ana Yooz mantitacama kamz pecča nii zajranacaqui.

²⁰ Ana zuma kamcan, jakziltat “Yoozquin kuzziztča” cjican chiičhaja, jalla niiqui inakaz nižta chiiča. Zumuča niiqui. Yoozquin kuzziz puntu zizni cjisjapa, tuž nonžna.

²¹ Abraham, učhum tuquita atchi ejpqui, Yooz mantitacama ojkchiča. Tsjii nooj Yoozqui Abrahamžquiz mantichiča tuž cjican: “Abraham, am zinta majch, Isaac cjita, wilanažtakaz jawkwaquiča”. Yoozqui nuž mantichiž cjenacqui, Abrahamqui niž kuzquiz nii mantita payitača. Pero niž majch Yoozquin wilana ljoktawc cjen, Yoozqui

Abrahamžquiz atajchiča, nii zinta majch ana conajo. Jalla nuž Yooz mantitacama kamtiquiztan, Abrahamqui Yooz yujcquiziqui ana ujchiz nižaza zuma cjissiča.

²² Abrahamqui Yoozquin kuzziz cjen, Yooz mantitacama zuma kamchiča. Nižaza zuma kamchiž cjen Abrahamqui tjeeziča, Yoozquin kuzzizpanča, nii. Nekztan Yooz mantita cazziž cjen, juc'anti Yoozquin kuzziz cjissiča.

²³ Cjijrta Yooz takuqui tuž cjiča: “Yoozquin kuzzizpanča Abrahamqui. Nekztan Yooz yujcquiziqui Abraham ana ujchiz nižaza zuma cjissiča”. Abrahamž kamtiquiztan učumqui zizza, nii Yooz takuča zuma razunaqui. Nižaza Abrahamqui “Yooz amigo” cjita tjuuchiztača.

²⁴ Jaziqui ančhucqui zizza, zuma kamcan, Yooz yujcquiziqui ana ujchiz cjesača, nii. Ana zuma kamcan, ata alajakaz chiča, “Yoozquin kuzziztča” cjicanaqui. Juńta kuzllakaz criyanaqui Yooz yujcquiziqui tira ujchizpanikaz žejlča.

²⁵ Nii puntuquiztan tsjiillazakaz cjiwča. Naa Rahab cjiti putirii maatakž puntuquiztan cjuńzna. Naaža wajtquiziqui pucultan Israel žońinacaqui cuchanžquitatača awayt'izjapa. Naa žonqui nii pucultan Yooz partir žońinaca zuma atintichińča. Nekztan ana conta cjeyajo nii žońinaca yekja jiczquin cuchanchińča. Atipasńi yanapchińča. Jalla nižtiquiztan Yooz yujcquiziqui ana ujchiz cjissinča, nižaza zuma kuzziz, naaž zuma kamchiž cjen.

²⁶ Tsjiillazakaz cjiwča. Tsji žońiqui ticžcu, animu ojkča, janchi inakazza. Nižtapachaž tsji ana zuma kamńi žońiqui ticzižtakaz žejlča. Ana žejtz wirchizza. Inakaz chiča, “Yoozquin kuzziztča” cjicanaqui.

3

ATZTAN CHIIZ PUNTU

¹ Wejt jilanaca, wacchi žońinaca anaž tjaajińi cjis waquiziča. Tjaajińi žońinacaqui Yoozquiz cuenta tjaastanča. Nekztan ana zuma tjaajinchižlaja, niiqui yekja žońžquiztan juc'anti castictaž cjequiča. Nii zizzinčhucča ančhucqui.

² Tjapa žońinacaqui ujnaca paača. Jakzilta žońit persun chiitiquiztan ana ujchizlaja, jalla nii žońiča ancha zumapanqui. Persun chiiz zumpacha ewjasauizńi, jalla nekztan tjapa niž curpuzakaz ewjasńi atasacha, ana uj paazjapa.

³ Nonžna. Tsjii frenžtan cawalluqui irpita cjesača, yawchi žońž pecta jaruqui.

⁴ Nižtazakaz žońinacaqui tsjii kolta tuńztan pajk warcumi chjitsa, pjursanti tjamiž cjenami. Tsjii warcu joojoońi žońimi jakzi pecanami tuńztan nii warcu chjichasača. Kjažta kolta tuńižtanami pajk warcumi joojowasača.

⁵ Nižtazakaz tsjii kolta ujmi wacchi muntinaca tjapznasača. Nižtazakaz učum chiińi atami kjažta koltalla cjenami, niž chiitiquiztan ancha mantiz atasacha.

⁶ Tsjii uj peekztažtakazza tii ataqui. Tii ataqui čjul anawalinacami chiyasača. Tii ataž cjen persunpacha ana zuma kamča. Nižaza tii ataž cjen yekja žońinaczquiz ana zuma kamkatča. Tii atazakaz ajriž jaruqui chiča.

⁷ Tjapa animalanacami nižaza tjapa wežlanacami žońž mantuquizpanikaz cjesača.

⁸ Antiz anaž jec žońimi persun chiińi ata manti atasacha. Tii ana wal ataqui anaž jaknuž mantichuca. Tii ataqui ana wali chiiz pecńipanča. Tsjii wininožtakazza tii učum ataqui.

⁹ Učumqui tii atžtan chiican Yooz Ejpž tjuu aynakińčhumpanča. Yooz Ejpqui žońi paachiča niž irata kuzziz. Nižaza tii atžtanpacha chiican Yooziž paata žońinaca laykińizakazza.

¹⁰ Tii atača zuma ana zuma chiińiqui. Jilanaca, cullaquinaca, jalla nižta chiichiizqui anawalipanča.

¹¹ Tsjii zuma wijińquiztan zuma kjaztan nižaza chjonanchi kjaztan anaž lewasača. Anapanž tsjii wijińquiz pizc punta kjaz želasača.

¹² Nižtazakaz tsjii tujquin mazk'a kjaztan nižaza ch'uyi kjaztan, jalla nii pizc punta kjaz ana želasacha. Nižtazakaz tsjii muntiquiz tsjii punta frutapankaz pookñiicha. Pizc punta fruta anaž pookasača. Nižaza tsjii ch'uyi tuquiztan mazk'a kjaz ana cooznasača.

¿JECT YOOZ TAWK JARU KAMÑI ZOÑI?

¹³ Jaziqui jakziltat Yooz taku zuma zizzaj niiqui, zumaž kamspanča. Nii zizñi žoñiqui humilde kuzziz zuma kamaña tjeez waquiziča.

¹⁴ Jakzilta žoñit anawal iñiziñi kuz tjeezaja, nižaza persunpacha tucquin cjis pecñi kuz tjeezaja, jalla niiqui mit kuzzizpanča. Nižaza nii ana zum žoñiqui “Yooz taku zizintča” cjicanami, Yooz tawk jaru ana kamča.

¹⁵ Nii žoñž kamañaqui anača Yoozquiztanaqui. Antiz žoñžquiztanpankazza. Žoñž kuzquiz pinsitanac jaruča nii kamañaqui. Zajražquiztan tjonča.

¹⁶ Jakzilta žoñit anawal iñiziñi kuzzizlaja, nižaza tucquin cjis pecñi kuzzizlaja, jalla nii žoñž cjen ch'aasnacami nižaza tjapaman ana wali kamznacami žejlča. Nižaza jakzilta žoñit Yooz Epiž kamañchizlaja, jalla niiqui zumapankaz kamča.

¹⁷ Nižaza niiqui pasinziz kuzziz cjen, žoñinacžtan zuma kamča. Nižaza parti žoñž razunanaca nonža. Nižaza nii zuma kamañchiz žoñiča okzñi kuzzizqui. Jalla nii žoñiqui zuma kamañanac jarupanž kamča. Nii žoñiqui ana pjali cjiicjiñi kuzzizza. Antiz zuma kuzzizza.

¹⁸ Jakzilta žoñit pasinziz kuzziz žoñinacžtan kamčhaja, jalla niiqui zuma kamča, nižaza parti žoñinacžquiz zuma kami yanapča.

4

MAYIZIZ PUNTU

¹ ¿Jequiž cjen chjaawjkatas žejljo? ¿Jequiž cjen ch'aas žejljo? Ančhuc ana zuma kuzziz cjen žejlča niiqui. Ančuca ana zuma pecñi kuzqui mantiz pecča.

² Ančucaž pectanaca ana žejlča. Nekztan ančhucqui kichassa, žoñi conañcama. Nižaza yekja žoñž cusasa zmassa. Nii zmasta cusasa ana cunsiqui atžcu, nekztan chjaawjkataša, nižaza kichassa. Ančucaž pectanaca cunsiczjapaqui, Yoozquiztan ana mayiziñchucča. Jalla nižtiquiztan ančucaž pectanaca ana žejlča ančhucalta.

³ Nižaza ana zuma mayizan, ančucaž mayizitaqui ana nonžtača. ¿Kjztiquiztan ana nonžtajo? Ančhucqui ana zuma kuzquiztan mayizichinčhucča. Persun kuzcamakaz kamzjapa mayizichinčhucča. Nekztanaqui anapan nonžtatača.

⁴ Yoozquiztan quejpsñi kuzziz jilanaca. Ana nižta cjee. Ujchiz žoñž kamañquiz kuzzizlaj niiqui, Yooz quintrača ančhucqui. ¿Nii ana ziz ančhucjo? Jakzilta žoñit ujchiz žoñž kamañquiz kuzzizlaj niiqui, Yooz quintraž cjissiča nii žoñiqui.

⁵ Anaž inapampa tuquita Yooz cjiirta takuqui tuž cjiča, “Yooz Ejpqui uchum kuzquiz niž Espíritu Santo cuchanžquichiča. Nii Yooz Espíritu Santuqui anča pecča, uchumqui Yoozquin alaja kuzziz cjisjapa, jalla nii”.

⁶ Ančucaž Yoozquin juc'anti kuzziz cjisjapa, Yoozqui juc'anti yanapasača. Nižaza Yooz takuqui cjiča, “Yoozqui humilde kuzziz žoñžquiz yanapñipanča. Pero mita kuzziz žoñž quintranpanča Yoozqui”.

⁷ Jaziqui Yoozquin kuzziz cjee. Niiž mantuquiz cjee. Zajraž ančhuc ujquiz tjojt-skatz pecanami, Yoozquin tjurt'ichi kuzziz cjee. Nekztanaqui ančucaquiztanaqui zarakaquiča nii zajraqui.

⁸ Yoozquin macjata. Nižaza Yoozqui ančucaquiz macjatžcaquiča. Uj paañinaca, ančhucqui uj paaz eca. Pizc kuzziznaca, Yoozquin tjapa kuzziz cjee.

⁹ Nižaza uj paažcuqui, llaquita cjee. Kaacan ančucaž paata uj paja. Uj paažcuqui, anača chipsqui. Juc'ant llaquizziza. Anača cuntintu cjisqui.

¹⁰ Yooz Jilirž yujcquiziqui humilde kuzziz cjee. Nekztan Yoozqui ančhucaquiz honorchiz cjiskataquiča.

ANACHA JILANACZ QUINTRA CHIICHIIZQUI

¹¹ Jilanaca, cullaquinaca, tsjižquinami tsjaaquinami anača quintra chiizqui. Nižaza anača quintra chuchqui. Jakziltat jilanacž quintra chiyachaja, už cullaquinacž quintra chiyachaja, jalla niiqui Yooz mantita jaru ana kamča. Yooz mantitaqui tuž cjiča, “Porapat zuma munazizza”. Nii mantitacama ana kamaquiz niiqui, nii mantitaqui ana waližtakaz nayaquiča. Nižaza nii Yooz mantita anal pecuča cjiča.

¹² Tsjiipankazza ultim mantiņi taku tjaachiqui. Yoozza niiqui. Jalla niizakazza ultim juezqui. Jaziqui nii Yoozqui žoņinaca arajpachquin chjichasača. Nižaza infiernuquin chjatkatasacha. Jaziqui anchuczti anaž jecmi arajpachquinami infiernuquinami ojkkatasacha. Jaziqui ančuca jilanaca anača pjalz peczqui.

TII MUNTUQUIZ ZOŃŽ ZETI PUNTU

¹³ Tsjiilla cjesača. Nonžna. Yekjap žoņinacaqui anchucaquiztan ancha chawjcwa amtiņiča, tuž cjican: “Tonji jakat watja okača. Nii watja irantižcu, cusasa campijan, paaz cancan zumal kamača tsjii wata intiru”. Nuž cjiņiča.

¹⁴ Nižta chiižcumi, anapanž zizza nii žoņiqui, jaknužt kamačaja, čhjulut watačaja, jalla nii. Yoozpankazza tjappacha mantiņiqui. Ćhjululu iratat ančuca žejtz? Kuyižtakazza žejtzqui. Tsjii kuyiqui jeczcu tsjii upacamapankaz tjenča. Nekztanž katča. Nižtapachazakazza žoņiqui. Tsjii upacamapankaz tii yokquiz žejtča.

¹⁵ Jaziqui tuž chiiz waquiziž, “Yooz munanaqui, žetača. Nekztan Yooz munanaqui langznača, nižaza čhjulumu paača, nižaza ojklayača”. Jalla nuž chiiz waquiziča.

¹⁶ Antiz yekjapaqui ančucaquiztan chawjcwa amtiņi kuzziz chiiča, ana tjapa čhjulumu zizcu. Jalla nižta mit kuzquiztan chiizqui ana walipanča.

¹⁷ Jakziltat Yooz kuz zizzaj niiqui, Yooz kuzcama kamz waquiziča. Ana nii Yooz kuzcama kamčhaj niiqui, uj paača.

5

RICACHU ZONINACZ PUNTU

¹ Ricachunaca, nonžna. Ančucaquiz ana walinacaž tjonaquiča. Nii zizcu, kjawcan kaacan žejlz waquiziča.

² Ančuca cusasanacaž mokaquiča. Ančuca zuma zquitinaca kjuriž lujltaž cjequiča.

³ Ančuca juntjapta korinacami paaznacami inapankaz cjequiča. Ančhucqui ančuca wacchi paaznaca ana gastichinčhucča, zuma kamtanaca paazjapa. Jaziqui ančuca ana okzņi kuzziz cjen casticta cjequiča. Nižta cjenami ančhucqui tira juc'anti paaznaca juntjapča.

⁴ Ančhuc ricachu patrunanacaqui ančuca piyunanaca juc'anti langskatchinčhucča. Ančuca pastunaca zkalanaca ajzkatchinčhucča, “Cusa pacaž” cjican. Ultimquiziqui koloculla pacchinčhucča. Nii incallta piyunanacaqui ančuca quintra quijchiča. Yoozpachača nii piyunanacž quijta nonziqui. Jalla Yoozza walja azzizqui.

⁵ Ančhuc ricachu patrunanacaqui, tii muntuquiz ancha cusasanacchiz kamiņchucča. Čhjuluž pectanacami žejlča ančhucaltaqui. Jaziqui tsjii cjew animalažtakaz cjissinčhucča. Žoņiqui cjew animala illza conzjapa. Nižtapacha Yoozqui ančhuc illziča casticta cjisjapaqui.

⁶ Ančhucqui ricachu patrunanaca, ana ujchiz žoņinaca kuzinpan casticchinčhucča, conaņcama. Nii žoņinacazti anatača ančuca quintraqui.

PASINZIZ KUZUZ PUNTU

⁷ Jilanaca, cullaquinaca, uĉhum pajk arajpach Jiliriž tjonzcama pasinziz kuzziz cjee. Zkal puntuquiztan cjuñzna. Tsjii zkala ĉhjacchi žoñiqui ĉijñi tjonz tjewža, primer ĉijñi, taypi ĉijñi. Pasinziztan tjewža, ima zkala ajz timpu irantižcan.

⁸ Nižtakaz anĉucqui pasinziz kuzziz cjee. Arajpach Jiliriž tjonz tjuñiqui wajillaĉha. Nekztan ana walinacquiztan liwriita cjequiĉha. Nii cjuñžcan, Yoozquin tira tjurt'ila.

⁹ Jilanaca, cullaquinaca, porapat anaž chuchasaquiĉha. Jakzilta žoñit chuchaĉhaj niiqui, Yooziž azquichtaž cjequiĉha. Nii azquichñi Yoozqui wajillaž tjonaquiĉha.

¹⁰ Jilanaca, tuquita Yooztajapa ĉiiñi žoñinacaž puntu cjuñzna. Kjažta sufriz cjenami, Yoozquin tjurt'ichiĉha pasinziz kuztan. Nižtapacha cjee.

¹¹ Uĉhumqui tuž ĉjiñĉhumĉha, sufriz cjenami, “Yoozquin tjurt'ichi žoñinaca cuntintuž cjequiĉha”. Tuquiqui Job cjita jila želatĉha. Niiž quintu zizza uĉhumqui. Jobqui pasinziz kuztan sufrichiĉha. Nižaza Yoozquin tirapan tjurt'ichiĉha. Jalla nii sufriz wattan, Yoozqui niiž zuma pinsita cumplichiĉha nii Job cjita žoñžtajapa. Nižtapankazza Yoozqui žoñinacžquiziqui, anĉa okzñi kuzzizpanĉha.

¹² Jilanaca, cullaquinaca, tiĉha chekanaqui. Anaĉha inapampa Yooz tjuuqui ĉiichiizqui. Anapanĉha “Juro por Dios” cjican, ĉiichiizqui. “Iyaw” cjižcuqui, cumplispanĉha. “Anaĉha” cjižcuqui, anaĉha cjispanĉha. Werar ĉiizpanĉha, ana Yooziž casticta cjisjapa.

¹³ Jakžiltat sufrāhaja, jalla niiqui Yoozquin mayiziz waquiziĉha. Nižaza cuntintu kamñi žoñimi Yooz wirsu itz waquizizĉha.

¹⁴ Nižaza tsjii laa žoñi želan icliz jilirinaca kjawz waquiziĉha. Nii jilirinacaqui asiitižtan kullcan, Jesucristo Jiliržquiz mayizaquiĉha, laa žoñi žetajo.

¹⁵ Yoozquin tjapa kuztan mayizaquiž niiqui, nii laa žoñi ĉhjetnaquiĉha. Jesucristo Jiliriqui nii laa žoñi žaazkataquiĉha. Nižaza nii laa žoñiqui ujĉhiz želaquiž niiqui, pertuntaž cjequiĉha.

¹⁶ Jakziltat žoñž quintra uj paaĉhaja, jalla niiqui nii uj maztanĉha, “Am quintra tii uj paachinpantĉha” cjican. Nekztan Yoozquin porapat mayizaquiĉha. Nekztan anĉucqui ĉhjetintaž cjequiĉha. Yoozqui tsjii zuma žoñiž tjapa kuztan mayizitaqui nonža. Jalla nekztan Yoozqui tjaaquiĉha nii mayizitacama.

¹⁷ Cjuñzna, Elías cjita jilž puntu. Uĉhum irataĉha nii jilaqui, žoñikazza. Pero Yoozquin tjapa kuztan mayizichiĉha, ana ĉijnajo. Nekztan ĉhjep wata ĉicatchiž ana ĉi-jinĉiĉha.

¹⁸ Wiruñaquei Elías cjita jilaqui wilta mayizichiĉha, ĉijñi apayžcajo. Nekztan Yoozqui ĉijñi apayžquichiĉha. ĉijnan, zkanacacqui wilta pookĉiĉha.

¹⁹ Jilanaca, cullaquinaca, tsjii žoñiqui Yooz jiczquiztan zarakāhani. Nekztan Yooz jiczquiztan zarakĉi žoñžquiz tuž paljayz waquiziĉha, “Ana zarakalla. Yooz jiczquiz cut'iscalla” cjican.

²⁰ Nekztan nii zarakĉi žoñiqui niiž uj paaznaca ecaquiž niiqui, nižaza Yooz jiczquiz wilta quejpžcaquiž niiqui, jalla niiž wacĉi ujnacquiztan pertuntaž cjequiĉha. Infernuquin ana okaquiĉha nii žoñiqui. Jalla nii zizza anĉucqui.

PRIMERA CARTA DEL APOSTOL SAN PEDRO

¹ Wejrtča Pedrutqui, Jesucristuž uchta apostoltqui. Jalla nižtiquiztan ančhucaquin tii cartal cjiyržcuča. Ančhucqui persun wajtquiztan wichanzinčhucča wacchi yekja provincianac kjutñi, Ponto, Galacia, Capadocia, Asia, Bitinia, jalla nii provincianacquin ojkchinčhucča. Jakziquint ojektčhaja, jalla nicju kamča; ana persun wajtquiz kamča ančhucqui.

² Yooz Ejpqui ančhuc illziča, niž partiquiz cjisjapa. Niiž tuquita pinsita jaru ančhuc illziča. Nižaza Espiritu Santuqui ančhucaquiz zuma kamañchiz cjiskatchiča, ančhuc Jesucristuž kuzcama kamajo. Jesucristuž ticziž cjen ančhuca ujnacaqui pertuntača. Jaziqui ančhucča Yooz wajtchiz žoñinacaqui. Yoozqui ančhucaquiz zumaj yanapt'ila, nizaza ančhucaquiz walikaj kamkatla.

EW KAMAÑCHIZ PUNTU

³ Učhum Jesucristo Jilirž Yooz Ejpqui honorchizkaj cjila. Yooz Ejpqui zuma okzñi kuzziz cjen učumnacaquiz ew kamaña tjaachiča. Jesucristuž ticžcu jacatattiquiztan Yoozqui učumnacaquiz ew kamaña tjaachiča. Ew kamañchiz cjican učumqui tjewža arajpachquin Yooztan chica kamzjapa.

⁴ Nižaza ew kamañchiz cjican učumqui Yooz tjaata irinsa tanznaquiča arajpachquin. Učhum irinsača arajpachquin Yooztan kamzqui. Anaž čjul anawalinacami nekz želasača. Nii Yooz irinsaqui učumnacaltajapa chjojtača. Jalla nižtiquiztan nii irinsaqui anaž jecmi akasača. Tsji ew zquitiqi manchita cjesača. Nižaza tsji c'achja pjajkjallaqui chooča. Ančhuca arajpachquin chjojta irinsaqui ana nižta cjesača.

⁵ Arajpachquin ančhucaltajapa tsji ancha zuma kamzqui tjacžtača. Jesucristuž tjonz tjuñquiziqui nii zuma kamzqui tjeežta nižaza tjaata cjequiča. Pero anziqi tii muntuquiz želan, nižaza ančhuc Yoozquin kuzziz cjen, Yoozqui niž aztan ančhuc cuitaquiča.

⁶ Jalla niztiquiztan ančhucqui zuma cuntintu kuzzizčhucča. Pero tii anzta timpuquiz ančhucaltajapani anawalinacaž tjonchiž cjen llaquisaquiča. Tii muntuquiz želan ančhucqui pruebanaca watča. Nuž cjenami Yooz Ejpča ančhuc cuitiñiqui, nižaza liwriiñiqui. Jaziqui cuntintuž cjee.

⁷ Ančhuca kuzqui pruebanacžtan yanztača, ultimu Yoozquin kuzziz, ultimu ana Yoozquin kuzziz, jalla nii tjeežta cjisjapa. Jakziltat pruebanacžquiztan sufranami tirapan Yoozquin tjurt'ichižlaja, jalla nižta kuzziz žoñiqui ancha valorchizza, c'achja kor paazquiztan cjen juc'anti. Čjul c'achjanacami anaž tjurča, akzñipanikazza. Korimi ujquiz t'azinta cjenaqui, jñipanikazza. Nekztan pjalzñiča ana walinaca. Pero zuma pjalzta korimi ana tjurñipanikazza. Yoozquin kuzzizpan žoñinacaqui anača nižtažtakaz. Antiz tjurñipanikazza. Ančhucča Yoozquin lijitum kuzzizqui. Jalla nižtiquiztan Yooz Ejpqui ančhuc zuma risiwaquiča, nižaza honoraž tjaaquiča, Jesucristo wilta tjonz tjuñquiziqui.

⁸ Ančhucqui Jesucristužtan munaziča, kjažta ana cheržcumi. Nižaza ana cheržcumi nižquin kuzzizza. Jalla nižtiquiztan ančhucqui ancha cuntintuž chipža. Zoñž takunacžtan učhum cuntintu kuz puntuquiztan ana zuma intintaskati atasača. Nižta cuntintu kuzqui Yoozpachaž chipskatča.

⁹ Ančhucqui Yoozquin kuzzizpanča. Jalla nižtiquiztan ancha zuma kamañchizza. Wiñaya Yooztan walikaz kamča.

¹⁰ Yoozqui niiž okzñi kuzziz cjen ančhucaquiz yanapčha niižtan zuma kamajo. Uchumnacaltajapačha nii Yooziž yanaptaqui. Jalla nii Yooziž yanaptaqui mazinchičha tuquita profetanacaqui. Nii Yooztajapa chiiñi profetanacaqui Yooztan kamz puntu walja istutiichičha nii puntu iya iya zizjapa. Walja kuzquiz pinsichičha tsjan zuma intintajo.

¹¹ Cristuž Espíritu Santuqui profetanacž kuzquiz zizkatchičha, jalla tuž: Yooziž cuchanžquita Cristuqui sufraquičha; nižaza sufrizcu walja honorchiz cjequičha. Jalla nii puntunaca profetanacaqui zizkattatačha. Pero tsjan kjana ziz pecatčha, ¿čhjulorat Cristo tjonaquejo, nižaza jaknužt niiž tjonz wataquejo? Jalla nii zizjapa ancha pinsatčha.

¹² Espíritu Santuqui tuquita profetanacžquiz Yooz pinsitanaca zizkatchičha, uchumnacaquiz maznajo. Anatačha ninacžtajapakaz nii zizkattaqui, antiz uchumnacaltajapazakaz. Jaziqui anzta timpuquizkaz nii tuquita mazintaqui kjanapacha kjanzt'ičha. Liwriiñi Yooz taku paljayñi žoñinacačha nii puntunaca kjanzt'iñinacaqui. Espíritu Santuqui arajpachquiztan cuchanžquitačha, kjanzt'iñi žoñinaca yanapzjapa. Jalla nii kjanzt'ita puntuquiztanaqui arajpachquin žejlñi anjilanacami juc'ant intintazñi pecčha.

¹³ Jalla nii puntunacquiztan chiižcu, jalla tuž ančhucaquin chiižinz pecučha. Zumpacha tantiya, zuma razunžtan. Ewjt'iñi kuzziz cjee. Tjapa kuztan tjewža, Yooz irata zuma kamañchiz cjisjapa. Jalla nižta zuma kamaña ančhucaquiz tjaaquičha Yoozqui, Jesucristuž tjonz tjuñquiz.

¹⁴ Ančhucčha Yooz zuma cazñi maatinacaqui. Jaziqui zuma kamañchiz cjee. Ima Yooz maati cjican, tuquita ana wali paaz pecñi kuz jaru kamchinčhucčha. Yooz kamaña ana pajchinčhucčha.

¹⁵ Jaziqui, Yooz maati cjican, nižta ana wali pecñi kuz mantuquiz ana cjiskata. Anziqui čhjulu paacanami zuma kamañchizkaz cjee, jaknužt ančhuc kjawzñi Yoozqui zuma kamañchizpanžlaja, jalla nižta.

¹⁶ Yooz tawk liwruquiz Yooz Ejpqui tuž cjičha: “Wejrqui zuma kamañchizpankaztčha. Jalla nižtiquiztan ančhuczakaz zuma kamañchiz cjee”.

¹⁷ Ančhucqui, Yooz maatinaca cjican, mayizičha, “Wejt Ejpčha” cjican. Ančhucqui, niižquinkaz rispitan, tii muntu yokquiz zuma kamzpan waquizičha, arajpachquin ojkcama. Yooz Ejpqui ana illillžcu pjalznaquičha. Zapa mayniqui paatiquiztan jama pjalžta cjequičha.

¹⁸ Cjuñzna ančhucqui. Tuquiqui ančhucqui tuquita ejpnacaž tjaaajinta kamañchiztačha. Inapankaz kamchinčhucčha. Jalla nii ana walñi kamañquiztan liwriitačha. Nii liwriiñiž puntuquiztanaqui tantiya. Anaž čhjul koržtanami, nižaza anaž paaztanami, nižaza anaž čhjul tucuziñi cusasanacžtanami pacžcu, liwriitacha ančhucqui.

¹⁹ Antiz Jesucristuž ancha walurchiz ljocžtan liwriitačha. Jesucristuqui conta cjissičha, walipunt uuza wilanažtakaz, zuma llumpaka. Jalla nižta zuma ljocžtan ančhucqui liwriitačha.

²⁰ Ima tii muntu paacan Yoozqui Jesucristo utchičha, tii muntuquiz žejlñi žoñinaca liwriizjapa. Anzta timpuquizkaz Jesucristuqui tjonchičha; ančhucaltajapa žoñi tucchičha.

²¹ Jesucristuž cjen ančhucqui Yoozquin kuzziz žejlčha. Yoozqui Jesucristo ticziquiztan jacatatskatchičha; nekztan zuma honorchiz cjiskatchičha, ančhuc niižquin kuzziz cjisjapa, nižaza arajpachquin kamz tjewzñi kuzziz cjisjapa.

²² Jaziqui ančhucqui lijitum Yooz tawkquiz cassinčhucčha Espíritu Santuž yanapchiž cjen. Jalla nuž Yooz tawkcama kamtiquiztan ančhuca kuznacaqui ana ujchiz cjissičha Yooz yujcquiz. Nižaza parti criichñinacžtan zuma munaziñi kuzziz cjissičha. Jalla nižtiquiztan tirapan porapat ancha tjapa kuztan zuma munaza.

²³ Ančhucqui užca nassi wawažtakaz ew kamañchizza. Ančuca ew kamañaqui anača ticzi ejpnacžquiztan. Antiz žejtñi Yooz Ejpžquiztanča, niž taku catoktiquiztan. Yooz takuča ew kamañchiz cjskatñi; nižaza Yooz takuqui wiñayjapa tjuraquiča.

²⁴ Jalla nii puntuquiztan Yooz takuqui tuž cjiča:

“Tjapa žoñinacaqui pastunacažtakazza. Tjapa žoñinacaž pajk obranacaqui pastunacž pjakjallažtakazza. Tsjii timpukaz tjurasača. Jaknužt pastunacaqui tsjii timpukaz žejlčhaja, jalla nižta tsjii kjaž watanacakaz žoñinacaqui kamča; nekztan ticža. Nižaza pastunacž pjakjallanacaqui ratulla choočha, jalla nižta irataž žoñiž paata pajk obranacaqui anaž tjurasača.

²⁵ Pero Yooz Jilirž takuzti wiñayjapa tjuraquiča”.

Jalla nii Yooz takuča liwriiñi takuqui. Jalla nii liwriiñi taku ančucaquiz paljaytatača.

2

¹ Jalla nii taku catokžcu zuma kamañchizpan cjee. Tjapaman ana wali paaznaca eca. Nižaza pisc kuzziz cjicjijnaca eca. Nizaza ana incallz pecñi kuzziz cjee. Nižaza ana zmazñi kuzziz cjee. Nižaza anawali chiichiiznaca eca.

² Ančhucqui Yooz taku ancha pecz waquiziča, jaknužt tsjii užca nassi wawaqui piz itz pecčhaja, jalla nižta Yooz taku pecñi kuzziz cjis waquiziča. Nekztanaqui Yooz taku juc'anti zizñi zizñi kuzziz cjen, juc'ant zuma kamañchiz cjisnaquiča.

³ Jesucristo Jiliriqui zumapanča. Jalla nii naazinčhucča. Jaziqui Yooz taku juc'ant juc'ant zizñi cjee.

JESUCRISTUCHA CHEKAN MAZTAKAZ

⁴ Jesucristo Jiliržquiz macjata. Niiča ew kamaña tjaañiqui. Jesucristučha žejtñimi, nižaza žejtkatñimi. Jalla niiča, žejtñi maz cjitaqui. Žoñinaca nii maz ana pecchiča. Yoozti nii maz illziča; nižtajapa ancha walurchizza.

⁵ Nii žejtñi maz cjita Jesucristuž cjen, ančhuczakaz Yooz žeti tanzinčhucča. Jaziqui ančhuczakazza žejtñi maznacažtakaz. Jaknužt maznacžtan kjuya pirkičhaja, jalla nižta Yoozqui ančhucatan niž kjuya kjuytažokaz cjiča. Ančhucča Yooz kjuychiz žoñinacaqui. Nižaza ančhucqui t'akžtača Yooztajapa sirwiñi. Nižaza ančhucqui persun kuznaca Yoozquin tjaača ofrendanacažtakaz. Nižaza Jesucristuž cjen Yoozqui ančucaž tjaata kuznaca asiptasača.

⁶ Jesucristučha maz cjitaqui. Jalla nii puntuquiztan cjjirta Yooz takuqui tuž cjiča:

“Wejrqui tsjii simint maz tjulznuča Sión cjita arajpach wajtquin. Jalla nii mazqui juc'ant chekanča tjapa parti maznacquiztan. Nii mazqui Yooziž illžtača, nižaza Yooztajapa wali walurchizza. Jequit nii walurchiz maz cjita Jesucristužquin kuz tjaačhaja, jalla ninacaqui anapanž amulasaquiča. Anapanž inapankaz cjesača”.

⁷ Maz cjita Jesucristuqui walja walurchizza, ančhuc criichinacžtaqui. Pero ana criichi žoñinactaqui nii maz ana walurchiztakaz nayča. Cjjirta Yooz takuqui tuž cjiča:

“Kjuyñi žoñinacaqui tsjii maz ana pecchiča. Jalla nii ana pecta mazpacha zuma chekan maz cjissiča”.

⁸ Nižaza cjjirta Yooz takuqui tuž cjiča:

“Nii maz cjen žoñinacaqui t'ejžcu, ujquiz tjojtsnaquiča”.

Ana criichi žoñinacaqui Yooz taku ana juyzu paača. Nekztan sufriskattapanž cjequiča. Jalla nižtajapa Yoozqui ninaca utchiča.

⁹ Pero ančhuczti anača nižta. Antiz ančhucqui Yooziž illžtača. Jaziqui ančhucča Yooz maatinacaqui. Yooz Jiliržquiz sirwizjapa, t'akžtača. Ančhucča Yooz wajtchiz žoñinacaqui. Jalla nuž cjisjapa illžtača ančhucqui. Nižaza ančhucqui illžtača Yooz ispantichuca obranaca paljayzjapa. Anawal zumchiquiz kaman Yoozqui ančhuc kjawziča, niž ancha zuma jiczquiz luzkatzjapa, niž kjanquiz kamzjapa.

¹⁰ Tuquiqui ančhucqui anatača Yooz watja. Anziča Yooz wajtchiz žoñinacaqui. Tuquiqui ančhucqui Yooziž ana okžtatača. Anziča Yooziž okztaqui.

JILIRINACZQUIZ RISPITA

¹¹ Pecta jilanaca, cullaquinaca, tii muntuquiz kamcan ančhucqui istrañiñchucča. Yooz wajtchiz žoñinacača ančhucqui. Jaziqui chiižinžcuča, anawali pecni kuz ana juyzu paa. Nii anawali pecznacaqui ančuca persun kuz animu quintrača.

¹² Ana Yooz pajni žoñinacžtan kamcan, ančhucqui zumapan kama. Ana Yooz pajni žoñinacaqui ančuca quintra chiyačhani. Nižaza uj paañinacažtakaz ančhuc nayačhani. Jalla nižta quintra cjiicjiyanami, ančhucqui zuma kamz waquiziča, ninaca ančucaž zuma paatanaca cherzjapa. Jalla nuž cheržcuqui ninacaqui Yoozquin honora tjaaquiča ultim pjalz tjuñquiziqui.

¹³ Jilanaca, cullaquinaca, nonžna. Jesucristo Jiliržquiz sirwican tjapa žoñiž nombrita jilirinacžquiz casa. Chawc mantiñi jiliržquiz casa.

¹⁴ Nižaza niž cuchanžquita jilirinacžquiz casa. Nii jilirinacaqui cuchanžquitača, anawali paañi žoñinaca casticajo, nižaza zuma paañi žoñinacžquiz honora tjaajo.

¹⁵ Yoozqui pecča, ančhuc zuma kamzjapa. Jalla nižta zuma kamcan, ančhucqui zumzu anawali kamañchiz žoñinacžquiz ch'ujuž cjiskataquiča.

¹⁶ Yooz liwriita žoñinaca cjicanaqui zuma kama. Pero liwriita cjicanaqui anača pinzizqui ana walinaca paaznacžquiz. Antiz zuma kama Yooz piyunažta.

¹⁷ Tjapa žoñinacžquiz rispita. Tjapa criichi žoñinacžtan zuma munaza. Yoozquin rispita. Nižaza chawc mantiñi jiliržquiz honora tjaa.

SUFRICAN YOOZQUIN KUZZIZ CJEE

¹⁸ Piyunanaca, ančhucqui patrunacž mantuquiz cjee, ninacžquiz rispitan. Zuma kuzziz, nižaza okžni kuzziz patrunchizlaj niiqui, niž mantuquiz cjee. Nižaza ana zuma patrunchizlaj niiqui, niž mantuquiz zakaz cjee.

¹⁹ Tsjii piyunaqui zuma langžni cjenami wjajttaž cječhani. Pero pasinziz kuztan awantiz waquiziča. Jalla nii piyunaqui nuž sufrican cjuñz waquiziča, niiča ultimu Yooz piyunaqui, jalla nii. Jalla nuž sufrizcu zuma kuz tjeeža; nekztan Yooz yujcquiz ancha cuza cjitaž cjequiča.

²⁰ Tii muntuquiz kamcan ančhucqui anawali paatiquiztan castictaž cječhani. Pasinziz kuztan awantaquiž niiqui, ¿čhjul honorat tjaata cjesajo? Pero zuma paatiquiztan sufriskattaž cjequiž niiqui, nižaza ančhucqui pasinziz kuztan awantaquiž niiqui, Yooz yujcquiz honorchiz cjequiča.

²¹ Jalla nižta pasinziz kuzziz sufraquiž niiqui, kjana tjeeža, Jesucristuž žoñinacčhucča, nii. Yoozqui ančhuc kjawziča, zuma kuz tjeezjapa. Cristuqui ančhuc laycu sufrichizakazza. Cristuqui sufrican ancha pasinziz kuz tjeeziča. Nižta irata ančhucqui sufrican, nižtazakaz pasinziz kuz tjeez waquiziča.

²² Jesucristuqui ana zinta uj paachiča. Nižaza čhjul anawal takumi ana chichipanča.

²³ Cristuqui žoñinacaž ch'aanita cjenami, anapan chjaychiča. Nižaza Cristuqui sufrichi cjenami, anapan žoñi kitz pecchiča. Jalla nižta sufrican Cristuqui zizziča, Yooz Ejpqui nii anazuma žoñinaca legali casticaquiča, jalla nii. Jesucristuqui zizziča, anawali cjićiñinacaž paatiquiztan jama casticta cjequiča, nii. Nižaza Yooz Ejpqui zuma kuzziz žoninacžquiz honora tjaaquiča.

²⁴ Jesucristupachača persun curpuquiz učhum ujnacquiztan sufrichiqui, cruzquiz ch'awcta. Jalla nuž učhumnacalta laycu ticziča, učhumnaca anawali ujnaca ecajo, nižaza Yooz tjaata zuma kamañchiz cjejajo. Jesucristuqui chjojrichta cjissiča, ančhuc čhjetinta cjisjapa ančuca ujnacquiztan.

²⁵ Tuquiqui ančhucqui pasta uuzanacažtakaz ojklayatča. Anziqiu ančhucqui Araj-pach Awatiržquiz quejpcinčhucča, ančuca kuz niž cuitita cjisjapa.

3

LUCUTJIŃI KAMZ PUNTU

¹ Maatakanaca, ančhucqui persun luctakž jaru kama. Tsjii luctakanacaqui Yooz taku ana criičha, nižaza Yooz tawk jaru ana kamčha. Pero ančhuc criichin maatakanacaqui zuma kamaña tjeez waquizičha. Ančuca zuma kamaña tjeztiquiztan, ančuca ana criichi luctakanacaqui Yooz taku criichiž cječhani, ančhuc ana ancha tawkžtan atipchiž cjen.

² Nižaza ančuca luctakanacaqui criyačhani ančuca zuma kamtiquiztan, nižaza ančuca rispiti kamtiquiztan.

³ Zawncatan zquiti ist'asnacquiz anačha kuz tjaazqui. Persun c'achja chjičža ach charquiz, nižaza zquiti ist'asnacquiz, nižaza ancha c'achja zquitinacquiz, jalla nižtanacquiz anačha kuz tjaasqui.

⁴ Antiz zuma c'achja kamañnacquiz kuz tjaa. Humilde kuzziz, nižaza llan kuzziz cjee. Jalla nižta kamañnacqui Yooz yujcquiziqui walja walurchizza. Ni zuma c'achja kamañnacqui tsjii zuma tjurñi walurchiztakazza.

⁵ Tuquiqui timpuquiqui Yooz partir maatakanacaqui nižta c'achja kamañchiztačha. Nii maatakanacaqui Yoozquin kuzziztačha. Nižaza luctakž jaru cjiicjiñitačha.

⁶ Jalla nižta Sara cjita cullaquiqui Abraham cjita lucžquiz cassinčha, nižquiz “wejt jiliri” cjican. Ančhucqui nižta zuma kamañchiz cjequiz niiqui, Sara cullaca maatinacažtakaz cjequičha. Ana čjulquiztanami ančuca kuz turwayskata.

⁷ Luctakanaca, ančucaquin zakaz chiižinžcučha. Ančhucqui persun maatakanacžtan zuma intintazñi munaziñi kuzziz kamaquičha. Yoozqui pucultan ančucaquiz niž zuma kamaña tjaachičha. Jalla nižtiquiztan jaknužt persun maatakžquiz rispitz waquizičhaja, jalla nuž rispitaquičha. Cjuñzna, luctakaqui maatakžquiztan juc'ant azzizza. Persun maatakžtan zuma kamz waquizičha, ančucaž Yoozquiztan mayizitanaca ana ina cjejajo.

SUFRIS PUNTU

⁸ Tsjiižtan zakal cjesačha. Tjapa ančhucqui tsjii kuzziz kamaquičha. Nižaza criichinacpora zumaž munazaquičha. Nižaza okzñi kuztan kamaquičha. Nižaza humilde kuztan kamaquičha.

⁹ Tsjiižuñ ančucaquiz anawali paachiž cjen ana nižtapacha anawali tjepnaquičha. Nižaza tsjiižuñ ančuca quintra ch'aananami, ana nižtapacha niž quintra ch'aaquičha. Antiz nižtajapa Yoozquiztan mayizinaquičha, nii zuma cjiskatzjapa. Yoozqui ančhuc kjawzičha, zumanaca tanzjapa. Jalla nižtiquiztan ančuca quintra žoñinacžtajapami Yoozquiztan mayizinaquičha, Yooz wintižta cjisjapa.

¹⁰ Yooz takuquiqui tuž cjičha:

“Jakziltat zuma kamañchizpan pecčhaja, nižaza cuntintupan kamz pecčhaja, jalla niiqui persun chiiñi ata ewjt'istančha, anawal taku ana chiizjapa, nižaza ana incallñi toscar taku ana chiizjapa.

¹¹ Nižaza jakziltat cuntintupan kamz pecčhaja, anawali paaznacquiztan zarakstančha; nekžtan zumapan paastančha. Parti žoñinacžtan wali kamzjapa, jalla nižtiquiz kuz tjaastančha.

¹² Yooz Jiliri quiqui zuma kamañchiz žoñinaca cuitičha. Nižaza ninacaž mayizitanaca nonža. Pero Yooz Jiliri quiqui anawali paañi žoñinacž quintračha.

¹³ Ančucaž zuma kamznacquiz kuz tjaachiž cjen, žject ančuca quintra paasajo?

¹⁴ Pero ančhucqui zuma kamcan sufraquiž niiqui, cuntintuž cjee. Yoozqui ančhucaquiz honora tjaaquiča. Nii quintra žoñinacžquizimi ana eksna. Nižaza anaž jecžquiztanami kuz turwayskata.

¹⁵ Cristupankazza ultim Jiliriqui. Jalla nižtiquiztan Cristužquiz ančhucqui rispitanča. Nižaza ančhucqui listu tjaczi žela, ančhucaž Yooztajapa kamz puntuquiztan chiizjapa. Tsji žoñi nii puntu pewcznaquiž niiqui, zuma razunžtan kjaaz waquiziča. Humilde kuzziz nižaza rispitiñi kuzziz kjaaz waquiziča.

¹⁶ Zumaž kamaquiča. Nekztan ančuca kuzquiz anaž čjul ujmi cjuñznaquiča. Cristužquin kuzziz zumaž kama. Jalla nekztanaqui žoñinacaqui anaž ančuca quintra chiyi atasacha. Ninacaqui ančuca quintra chiyaquiž niiqui, ultimu azaquiča ančuca zuma kamtiquiztan.

¹⁷ Ančhucqui walikaz Yooz munañpi jaru kamcan sufračhaja, wintižta cjequiča. Ana zuma kamtiquiztan sufraquiž niiqui, jalla niičha ana waliqui; anaž Yooz munañpi jaručha niiqui.

¹⁸ Jesucristuqui učhum ujnac laycu ticziča. Jalla nižtiquiztan učhum ujnac laycu ana iya ticz pecča. Zuma kamañchiz Cristuqui ana zuma kamañchiz žoñinacž laycu ticziča, ninacžquiz Yoozquin macjatskatzjapa. Curpuchiz cjican contatača pero niž animuqui tirapan žejtča.

¹⁹ Niž espíritu animuqui chawctažtakaz espíritu animunacžquin ojkchitača Yooz puntu kjanzt'izjapa.

²⁰ Jalla nii chawctažtakaz espíritu animunacaqui tuquitanpacha Yoozquin ana casičha. Noež kamta timpuquiz Yoozqui pasinziz kuzziz želatča nii tuquita anawali žoñinacžtajapa. Jalla nuž žejlcan Yoozqui Noežquiz tsjii pajk kjuyaž cherchi warcu kjuykatchičha. Nekztan Yoozqui nii warcuquiz tsjii quinsakal žoñinaca luzkatchičha, wacchi kjazquiztan žejtkatzjapa.

²¹ Jalla nii kjazqui bautismožtakaztača. Ančhuczakaz bautista cjican liwriitača. Ultim bautismuqui anaž curpu ajunča, antiz ultim bautismučha Yoozquin tjapa kuztan cjisqui, ujnacquiztan pertunta cjisjapa, paata ujnacquiztan ana iya cjuñzjapa. Jilanaca, cullaquinaca, Jesucristuž jacatatchiž cjen učhumqui liwriita cjesača.

²² Jesucristuqui jacatatžcu arajpacha ojkchičha. Jaziqui nicju Yooz Ejpž žew latuquiz julzi žejlča. Nekz žejlcan anjilanacami, nižaza jilirinacami nižaza poderchiznacami Cristuž mantuquiz žejlča.

4

¹ Cristuqui žoñž curpuchiz kamcan sufrichiča. Jalla nižtiquiztan ančhuczakaz sufrisjapa listo cjis waquiziča. Ančhucqui Cristužquiz kuzziz cjen sufraquiž niiqui, nižquin juc'anti macjataquiča. Nižaza uj paaznacquiztan juc'anti zaraquiča.

² Jaziqui zuma kamaquiča, tii muntuquiz žejlcan. Yooz munañpi jaru juc'anti kamaquiča; anawali pecni kuz jaru ana kamaquiča.

³ Ančucaquiz cjiwča, ančuca tuquita kamtaqui ana walitača. Nužquizkaj cjila nii anawal kamtaqui. Jalla nižta anawal kamtaqui ana criichi žoñinacaqui jutzazza. Ančhucqui zuma zizza nii anawal kamta puntu. Tuquiqui ančhucqui anawal kuz pinziz jaru ojklayatča; nižaza adulteriuquiz ojklayatča; nižaza čjul kuz pecta jarumi paatča, nižaza kuz katchi licatča, nižaza ancha pjijstanaca paatča, nižaza mazinacžtan licz pecatča. Nižaza žoñiž paata yooznacquiz rispitatča. Werar Yooz mantita quintrača niiqui.

⁴ Yoozquin kuzziz cjen, ančuca kamtaqui anača iya nižtaqui. Jalla nižtiquiztan ančuca tuquita mazinaca ančucaquiztan istrañča, ančucaž ana iya cumpant'ichiž cjen. Nekztan ančucajapa iñarča.

⁵ Pero ultim pjalz tjuñquiz ninacaqui persuna anazuma kamtiquiztan Yoozquin cuenta tjaastanča, Yoozqui ticzi žoñinacami žejtñi žoñinacami ultimquiziqui pjalz-naquiča, tii yokquiz jaknužt kamtčhaja, jalla niit jama. Yoozqui listo žejlča žoñinaca pjalzjapa.

⁶ Tii muntuquiz žejlñi žoñinaczquiz liwriiñi Yooz takuqui paljaytatača, ninaca criyajo, nižaza liwriita cjejajo. Žoñž curpuchiz cjen criichinacaqui tjapa žoñinaca irata ticža. Pero ninacz animunacaqui Yooziž arajpachquin kjawžta cjen zumapan kamča Yooz irat kamañchiz.

⁷ Jilanaca, cullaquinaca, tii timpuqui otča, wajillaž tjappacha čhjultakinacami tucuz-inznaquiča. Pero ana kuz turwayzita cjee. Zuma pinsiñi cjee. Nižaza persuna kamz ewjazñi cjee, Yoozquin mayizican.

⁸ Jalla tužuča chekanaqui, porapat zuma munaziñi kuzzizpankaz cjee. Zuma munazican, parti žoñinacz ujnac puntuquiztan ana ancha cjuñasača.

⁹ Porapat ančuca kjuyquiz zumapanž risiwasaquiča, ana paysnakžcu.

¹⁰ Yoozqui criichi žoñinaczquiz tjapaman zuma kamañanaca tjaača. Nii kamañanaczchiz porapat yanapasaquiča, juc'ant zuma kuzziz cjisjapa. Nižta pecča učum Yooz Jiliriqui.

¹¹ Jakziltat paljayz kamañchiz žejlčhaja, panž Yooz taku paljayz waquiziča. Jakziltat yanapñi kamañchiz žejlčhaja, panž Yooz tjaata aztan yanapz waquiziča. Tjapa ančhucqui čjul kamañchizimi Yooz honora juc'ant waytiskatča, Jesucristuž cjen. Yoozqui wiñayjapa honorchiz cjila. Nižaza Yoozqui wiñayjapa mantiñej cjila. Jalla nužoj cjila. Amén.

PRUEBANACAZ TJONANAMI CUNTINTUZ CJEE

¹² Pecta jilanaca, cullaquinaca, anawal pruebanacaz tjonan ana tsuca. Ančhuc yanzjapakaz tjonča, Yoozquin zuma tjurt'iñi kuzziz, ana tjurt'iñi kuzziz, jalla nii yanzjapa. Nižta pruebanacaqui panž želaquiča. Anaž istraña.

¹³ Jaknužt Jesucristuqui sufritčhaja, jalla nižtazakaz ančhucqui sufraquiča. Jalla nižtiquiztan nižta pruebanaca tjonchiž cjen, cuntintuž cjee. Nižaza Jesucristuž tjonz tjuñquiz ančhucqui juc'anti cuntintuž cjequiča. Nekztan Jesucristuqui niž aztan niž honora tjeeznaquiča.

¹⁴ Cristužquin kuzziz cjen ančuca quintra ch'aanita cjequiča. Pero ančhucqui cuntintuž cjee. Zuma Yooz Espíritu Santuqui ančuca kuzquiz žejlča. Ančuca quintra žoñinacaqui Cristuž quintra chiiča. Ančhuczi Cristuž honora waytiča.

¹⁵ Nonžna ančhucqui. Anača žoñi conzqui. Anača tjañi zaazqui. Anača uj paazqui. Anača yekja žoñž asuntuquiz mitizizqui. Nižta ana walinaca paaquič niqui, sufračhani. Pero nižta ana walinaca anapan paaquiča.

¹⁶ Zuma cristiano cjican sufraquič niqui, ana azasača. Antiz Yoozquin panž honora tjeeznaquiča, Cristuž partiquiz žejltiquiztan.

¹⁷ Yoozqui niž famillchiz žoñinaca jusjiñi kalltiča, azquichta kamañchiz cjisjapa. Učumqui tii muntuquiz žejlcan sufraquič niqui, ¿kjažt ana criichi žoñinacztajapa wataquejo? Ninacaqui Yooz liwriiñi taku anapanž cassa. Jalla nižtiquiztan infiernuquin wiñayjapa sufraquiča.

¹⁸ Zuma kamañchiz žoñinacaqui ch'aman anawalinacquiztan liwriitača. Jalla nižtiquiztan ana criichi žoñinaczquiz nižaza uj paañi žoñinaczquiz kjaž cjitat cjequejo? Infiernuquin wiñayjapa sufraquiča.

¹⁹ Jalla nižtiquiztan tii muntuquiz kamcan criichi žoñinacaqui Yooz munañpi jaru sufriča. Jalla nižta sufrican Yoozquin kuzzizpan cjee, niž cuitita cjisjapa. Tii muntu paañi Yoozza ligituma cuitiñiqui. Ancha zumapanča.

5

CRIICHI ZOÑINACŽQUIZ CHIIZINTA TAKU

¹ Icliz jilirinaca, ančhucaquin zuma tawkžtan chiižinžcuča. Wejrqui icliz jilirizakaztča. Persunpacha Jesucristo sufriñi cherchinča. Nižaza wejrqui parti criichi zoñinacžtan chica honorchiz cjeeča, Jesucristo wilta tjonz tjuñquiz.

² Tjapa ančhucqui Yoozquin criichi zoñinaca zuma cwitaquiča, zuma uuza awatiriztakaz. Tjapa kuztan nižaza zuma kuztan cuitiz waquiziča. Jalla nižta pecča Yoozqui. Anača paaz ganžjapakaz iclizziz zoñinaca cuitaquiča, pero Yooz sirwican tjapa kuztan cuitiz waquiziča.

³ Anača tsjii ana zum patrunažtakaz cjiicjisqui, ančhuca icliz zoñinacžtaqui. Antiz parti criichi zoñinacžquiz zuma kamaña tjezna, ninaca nižta iratapacha zuma kamkatzjapa.

⁴ Nekztan chekan jilir Awatiriqui tjonžcu ančhucaquiz zuma honoraž tjaaquiča, zuma premiožtakaz. Tsjii chjañiquiztan paata premiuqui ratulla tucuzinznasača. Ančhuca honora ana tucuzinznasača. Ančhucqui Yoozquin criichi zoñinaca zuma cuititiquiztan jalla nižta honora tanznaquiča.

⁵ Ančhucqui tjetjowanaca, icliz jilirinacž jaru cjee. Nižaza tjapa ančhucqui porapat humilde kuztan rispitasaučiča. Yoozqui mita kuzziz zoñinacž quintruča. Pero humilde kuzziz zoñinacžquiz yanapča.

⁶ Jalla nižtiquiztan tjapa azziz Yooz Jilirž mantuquiz humilde kuzziz cjee, nekztan Yoozqui ančhucaquiz honorchiz cjiskataquiča.

⁷ Yoozqui ančhuc cuitiča. Jalla nižtiquiztan čjul llaquinacami nižaza kuz turwayskatñinacami nižquin kuzziz cjee.

⁸ Pinsiñi kuzziz cjee. Nižaza naynay žela. Ančhuc quintra diabluqui ojklayča, anawal leona ajuticanžtakaz. Nii anawal diabluqui ančhucaquiz atipz pecča. Nižaza criichi zoñinaca Yoozquiztan zarakskatz pecča.

⁹ Jalla nižtiquiztan niž quintra tjurtichi žela. Jesucristužquin kuzziz tjurt'ichi žela. Ančhucqui zizza, tii muntuquiz kamcan tjapa criichi jilanacaqui sufristanča. Jalla nižta zizcu, Jesucristužquin tjapa kuzziz cjen tjurt'ichi žela.

¹⁰ Ančhuc tsjii zkoloc sufritan, Yoozqui ančhucaquiz yanapaquiča, juc'ant zuma kamañchiz cjisjapa. Nižaza Yoozqui ančhucaquiz tjurt'iñi kuzziz cjiskataquiča, nižaza tjup kuzziz cjiskataquiča, čjul ana walquiztanami atipajo. Nii Yoozza zuma yanapñiqui. Niiqui učhum kjawziča, Jesucristužtan chica arajpachquin kamzjapa, wiñayjapa honorchiz cjisjapa.

¹¹ Nii Yoozqui wiñayjapa honorchizkaj cjila. Wiñayjapa mantiñej cjila. Jalla nužoj cjila. Amén.

¹² Wejrqui ančhucaquin tii kolta cartal Silvanužquiz cjijskatuča. Silvano jilaqui zuma lijitum jilača, cjiwča. Tii cartiquiz ančhucaquin chiižinžcuča, nižaza Yooz lijitum okzñi kuz puntu paljayžcuča. Jalla nii puntunaca zizcu tira tjurt'iñi kuzziz cjee.

¹³ Babilonia wajtquin icliz zoñinacaqui ančhucaquin tsaanžquiča. Ninacaqui Yooz illzta zoñinacazakazza. Nižaza Marcos ančhucaquin tsaanžquiča. Marcossa wejt maatižtakaz.

¹⁴ Ančhucqui porapat zuma munaziñi kuztan tsaanasaquiča. Tjapa ančhucqui, Cristuž partiquiz žejlñinaca, walikaj cjila. Jalla nužoj cjila. Amén.

SEGUNDA CARTA DEL APOSTOL SAN PEDRO

¹ Wejr Simón Pedruqui ančhucquin cjiiržcuča. Wejrqui Jesucristuž manta payiñ zoñtča. Niiž uchta apostoltča. Yooztan Jesucristo Liwriiñiztan zoñinacžquiz anaž illilla; legaliž niiqui. Jalla nižtiquiztan ančhucmi wejrmi Jesucristužquin kuzziz cjen Yooziž tjaata kamaña tanzinčhumča. Ancha zumača nii kamañaqui.

² Yoozquiz nižaza učum Jesucristo Jiliržquiz juc'ant zuma pajz waquiziča. Nekztan ančhucqui juc'anti Yooziž yanapta cjequiča, nižaza tsjan walikaz kamaquiča Yooziž cjen.

CRIICHI ZOÑINACŽ KUZ PUNTU

³ Yoozqui učum kjawziča, nižtan chica honorchiz cjisjapa, nižaza nii irata zuma kamañchiz cjisjapa. Jaziqui Yoozqui niž aztan ančhucquiz yanapča, niž kuzcama zuma kamni atñijapa. Ančhucqui Yooz puntu zizni zizniž cjen Yooz yanaptaqui tanz-nasača.

⁴ Yoozqui niž ancha zuma walurchiz tawkžtan compromitchiča, učum yanapz-japa. Nii compromitta taku cumplissiča. Jaziqui ančhucqui Yooz kuz irataž cjis-naquiča. Nižaza ančhucqui tii muntuquiz žejlñi ana walinacquiztan atipaquiča. Tii muntuquiz ancha ana walinaca žejlča zoñinacaž ana zuma pinsiñiž cjen.

⁵ Jalla nižtiquiztan ančhucqui Yoozquin tjapa kuztan cjee juc'anti juc'anti zuma cjisjapa. Jesucristužquin kuzziz cjen lijituma zuma kamz waquiziča. Nekztan zuma kamcan, zizni nižaza intintiñi kuzziz cjis waquiziča.

⁶ Nekztan zizni kuzziz cjican, persun kuzquiz ewjazni kuzziz cjis waquiziča. Nekztan persun kuzquiz ewjazcan, zuma tjurt'iñi kuzziz kamz waquiziča. Nekztan tjurt'iñi kuzziz kamcan, Yooz kuzcamakaz kamz waquiziča.

⁷ Nekztan Yooz kuzcamakaz kamcan, criichi zoñinacžquiz okzni kuzziz cjis waquiziča. Nekztan okzni kuzziz cjican, tjapa zoñinacžquiz zuma munaziñi kuzziz cjis waquiziča.

⁸ Ančhucqui jalla nižta ancha zuma kuzzizčhucčhalaj niiqui, juc'anti juc'anti zumaž cjequiča. Nižaza ančhucraž zuma kamtaqui anaž ina cjequiča. Nižaza ančhucraž Jesucristo Jilirž puntunaca ziztaqui anaž ina cjequiča. Jesucristuž puntunacquiztan zizni zizni cjican, walja zuma obranacchiz cjisnaquiča.

⁹ Jakzilta zoñit nižta zuma kamañchiz ana žejlčhaja, jalla niiča tsjii zur zoñižtakaz. Nižaza niiča ana zizni zoñiqui. Niiž ujnacaqui pertunzqui tjaztča.

¹⁰ Ančhucqui, anača nižta cjee. Yoozqui ančhuc illzcu kjawziča. Jalla nii kjawžta zumpachaž catoka. Nižaza nižquinpan kuz tjaaquiča. Jalla nuž zumpachaž kamaquiž niiqui, anapanž Yoozquiztan zarakasača.

¹¹ Nekztan ančhucraž zuma kamtiquiztan arajpach wajtquin zuma risiwtaž cjequiča. Nii arajpach wajtquin Liwriiñi Jesucristo Jiliriqui wiñayjapa mantiča.

¹² Jalla nižtiquiztan wejrqui ančhucquin tirapan nii puntunaca cjuñzkatača. Ančhucqui nii puntunaca zizza. Nižaza ančhucqui werar Yooz taku catokžcu Yoozquin tjurt'ichi žejlča.

¹³ Jalla nuž cjenami wejrqui tuž tantiichinča. Wejr iya žejtcan, ančhucquiz cjuñzkatz pecuča, tii chiižintanacžtan. Nii walikaz cjiwča.

¹⁴ Učum Jesucristo Jiliriqui wejtquiz zizkatchiča, wajillaž tii curpu eccu arajpach wajtquin okača, nii.

¹⁵ Jalla nižtiquiztan tii puntunacquiztan cjiirz pecuča. Nekztan weriž ticžtan ančhucqui čhjulorami tii puntunaca liyasača, zuma cjuñajo.

JESUCRISTUZ PUNTUQUIZTAN TJAAJINTA

¹⁶ Ančhucaquin tjaajincan, wejrqui učum Jesucristo Jilirž puntuquiztan tjaajinchinča, jaknužt walja aztan wilta tjonachaja, jalla nii. Jalla nii tjaajintaqui anaž wejt kuzquiztan ulanchičha. Nii tjaajintaqui anača mañžtan tantiita quintuqui. Antiz wejrqui persun čhjujcztan Jesucristuž honora cherchinča.

¹⁷ Wejrqui cherchinča, Yooz Ejpqui Jesucristužquiz zuma honora tjaachiča. Nižaza Yooz Ejpž ispannichuc joraqui chižquichiča tuž cjican: “Jalla tiičha wejt k'ayi Maatiqui. Tiiž cjen ancha cuntintučha”.

¹⁸ Jalla nuž cjiñi taku nonzinča arajpachquiztan tjonñi. Nii oraqui wejrqui Jesucristužtan chica žejlchinča Yooziž illzta curquin.

¹⁹ Jaziqui wejrqui cjiwčha tuquita Yooztajapa chiiñi profetž takučha werar takuqui, nii. Jesucristuž tjonzcama nii profetaž chiitaqui učumnacaltajapa kjanazt'ičha tsjii zuma lamparažtakaz. Jalla nižtiquiztan nii profetaž chiitiquiz kuz tjaaz waquiziča. Nii walikaz cjiwčha. Wentan kjantati chawcwa tewczcan, anaž iya lampara kjañi pecasača. Jalla nižta irata Jesucristuž tjontan, profetaž chiitanacaqui anaž iya pecasača.

²⁰ Jalla tii zakaz intintaz waquiziča. Nii cjiirta profetaž chiitanacaqui Yooz takučha. Jaziqui profetaž chiitami žoñž kuzquiztankaz ana intintazta cjesača. Yoozpanikazza profetaž chiita intintazkatñiqui.

²¹ Profetanacaqui anača persun kuzcama nižtanaca chiichiqui. Antiz Yooz Espiritu Santuqui ninaczquiz Yooz taku chiikatchičha.

2

FALSO TJAAJIÑINACŽ PUNTU

¹ Tuqui timpuqui toscara chiiñi profetanacaqui Israel wajtchiz žoñinaczquiz jeczīča. Jalla nižta irata zakaz ančhucaquiz toscar tjaajiñinacaqui jecznaquičha. Ninacaqui persuna pinsitaquiztan chjozakaž tjaajnaquičha, žoñinaca turwayskatzjapa, nižaza Yoozquiztan zarakskatzjapa. Jalla nuž anawali tjaajincan Jesucristo Jiliri ana pajñi chiyaquičha. Pero Jesucristuqui ninaca liwriizjapa ticziča. Jalla nuž anawali tjaajintiquiztan ninacpachaž wajilla castictaž cjequičha.

² Nižta anawali tjaajintiquiz walja criichi žoñinacaqui kuz tjaaquičha. Nekztan anazuma kamaquičha. Jalla ninacaž anazuma kamtiquiztan žoñinacaqui werar Yooz kamañ quindra iñaraquičha.

³ Ancha paaz paca peccu, nii anawali tjaajiñi žoñinacaqui toscar tawkžtan ančhucaquiz incallaquičha. Nekztan ančhuca paaz tanznaquičha. Jalla nuž cjen ninacaqui ultimupan tantaž cjequičha. Tuquitanpacha Yoozqui ninaca utchiča casticta cjisjapa.

⁴ Yoozqui uj paachi anjilanaczquiz ana pertunchičha. Antiz infiernuquin tjojtchīča. Zumchiquiz chawctažtakaz nekz chjojta žejlčha, ultimu pjalz tjuñicama.

⁵ Nižaza tuquita timpuqui Yoozqui uj paachi žoñinaca ana pertunchičha. Antiz kjaz juyzu mantizquichiča nii anazuma kamañchiz žoñinaca ticznajo. Noé cjitaqui žejtkatchičha niž pakallak familianacztan. Noequi nii timpuquiz kamñi žoñinaczquiz cjichiča: “Zuma kamañchiz cjee” cjican. Pero žoñinacaqui Noež chiita tawkquiz ana juyzu paachiča.

⁶ Nižaza Yoozqui ana wal Sodoma wajtchiz žoñinacami nižaza Gomorra wajtchiz žoñinacami ujžtan ujchiča, kjup tuzcama. Jalla nuž Yoozqui liwj tjatanzjapa mantichiča. Jalla nuž casticcan Yoozqui wiruñ tjonñi anawal kamñi žoñinaczquiz chiižinz pecchiča, “Anača nižta kamzqui” cjican.

⁷ Nii pizc ujzi watjanacquiztan Lot cjita žoñiqui alajakaz liwriitača. Jalla niitača zuma kamañchizqui. Parti žoñinacaqui tjapaman ana walinaca paachiča. Jalla nižtiquiztan Lot cjitaqui nii anawali kamñi žoñinaca cheržcu ancha llactazñitača.

⁸ Nii zuma zoñiqui zapuru niž kuzquiz ancha zint'iñitača, nii parti zoñinacaž Yooz lii quintra paachiž cjen. Lot cjita zoñiqui zapuru ninacaž anawali paatanaca cherchiča, nižaza nonziča. Jaziqui nii anawali paañinacžtan kamcan, niž kuzquiz ancha zint'iñitača.

⁹ Ultimquiziqui Yoozqui Lot jwessiča nii wajtquiztan. Yooz Jiliriqiu pruebanacžquiztan zuma kamañchiz zoñinaca liwriiñiča. Nižaza Yoozza anazuma kamañinaca pjalzñiqui, nižaza chjojñiqui casticz tjuñicama.

¹⁰ Yoozqui juc'anti casticaquiča jalla tižta zoñinaca, persun anawali pecñi kuzcama kamñi zoñinacami, nižaza jilirinacžquiz ana rispitiñinacami. Jalla nižta zoñinaca juc'anti castictaž cjequiča. Ninacaqui ancha lisuča, nižaza mit kuztan anawali paañiča. Ninacaqui poderchiz arajpachquin žejlñinacžquiz ana ekskcu ararñiča.

¹¹ Yooz zuma anjilanacazti nii poderchiz arajpachquin žejlñinacžquiz ararzjapa eksa, azziz anjilanacaž cjenami. Nižaza zuma anjilanacaqui Yooz yujcquiziqui nii anawal žejlñinacž quintra ana uj tjojtunz pecča.

¹² Jalla nii anawal kamñi zoñinacaqui animalažtakazza ana intintazñi kuzziz. Persun kucamakaz ojklayñiča, Yoozquin ana juyzu paañi. Q'uit animalanacaqui žejlča, tanžta cjisjapa, nižaza conta cjisjapa. Jalla nižtaž nii zoñinacaqui. Ana zizta puntuquiztan quintra chiiča. Anawali kamcan nii anawali kamtiquiztan animalanacažtakaz ticznaquiča.

¹³ Nižaza ninacaqui parti zoñinacžquiz sufriskatchiž cjen, zakaz sufraquiča. Nižaza anawal pjiiztanacquiz kamcan, "Cuntintuča wejrnacqui" cjican chiiñiča. Ančhucqui ninacžtan žejlzqui azipanča, nižaza ninacž cumpant'izmi ančhucaltajapa ana waliča. Ninacaqui ančhucacquiz incallz ancha jutzazza, ančhuc criichinacžtan chica žejljapa.

¹⁴ Nii anawali zoñinacaqui tsjii maataka cheržcu, panž adulterio paaz pecča. Nižta anawali paaznacquiztan anapan ochñiča. Incallchuc maatakanacžquiz adulterio kjutñi chjichñiča. Jalla nižta zoñinacaqui adulteriuquiz ojklayñi, nižaza paaz tanzñi nižaza čhjul uj paazmi ancha atñipanikazza. Jalla nižta cjiicjiñinacaqui infiernuquin ojknii zoñinacača.

¹⁵ Yooz jiczquiztan zarakchiča. Nekztan uj paacan ojklayñiča. Tuquitan tsjii anawali profeta želatča, Balaam cjita, Beorž majch. Jalla niiqui anawali paatiquiztan paaz ganz pecchiča. Jalla nii Balaam cjitaž iratača ninaca ojklayñiqui.

¹⁶ Tsjii ana chiiñi aznuqui Balaamžquiz ujziča žožž tawkžtan, Balaam anawali paaz pecchiž cjen. Jalla nižta ujzñiž cjen Balaamqui atajtatača niž anawali pinsita jaru ana paazjapa.

¹⁷ Wejr cjiwča, nii anawali tjaajiñi zoñinacaqui ana kjazziz tujžtakazza. Ancha taku tjaača, pero anawira cumpliča. Nižaza ninacača ana chijñichiz tsjirižtakaz, tjami chjichta tsjirižtakaz. Ninacaqui wiñayjapa casticta cjequiča anawal tsokchi zumchiquiz chjatkatžcu.

¹⁸ Nii anawalinacaqui mitarazzi tawkchiz inapankaz chiiñiča. Anawali paaznaca tjaajincan, nižaza anawali pecznaca tjaajincan užca anawal kamañquiztan zarakchinacžquiz wilta anawal kamañchiz kamkatz pecñiča.

¹⁹ Wejtnac jaru cjee, cjiñiča. Wejtnac jaru cjican, čhjulu paaznacami walikazza cjiñiča. Pero ninacapacha anazum kamañanac jaru cuztumrazziča. Jakziltat anawal kamañ jaru cuztumrazačhaja, jalla niiča nii anawal kamañ mantuquiz žejlñiqui.

²⁰ Učhum liwriiñi Jesucristo Jiliržquin criižcu, yekjap nii anawal tjaajñinacaqui liwriitačhani anawali paatanacquiztanami, nižaza anazuma kamtiquiztanami. Liwriita cjiscu wilta anazum kamañquiz mitisačhaja, nižaza anazuma kamaña cuztumrazačhaja, niž tuquita anawal kamañquiztan juc'anti anawaliž cjequiča.

²¹ Ninacaqui Yooz zuma kamaña ana pajtasaz niiqui, ninacžtaqui tsjan cusaž cji-tasača. Pero ninacaqui Yooz zuma tjaajinta catokchiča. Jaziqui Yooz zuma kamaña pajžcu, quejpsiča. Jalla nižtiquiztan ninacžtaqui juc'ant anawira waliž cjequiča.

²² Ninacaqui Yooz tawk jaru ojklaychitača. Nekztan Yoozquiztan quejpsiča ninacaqui. Jaziqui nii quejpsni žoñinacaqui pacunacažtakazza. Pacunacaqui jotžcu persun joti lujža. Nižaza tsjii ajunta cuchiqui wilta ljajzpiquizpacha zumt'iča. Jalla nižtača nii anawal tjaajñinacaqui.

3

JESUCRISTUZ TJONZ PUNTU

¹ Pecta jilanaca, cullaquinaca, jalla tiiztan pizc wilta cartal ančhucaquin cjižrcuča. Jalla tii pizc cjižrta cartaž cjen ančhucaquiz werar razunžtan pinsiskatz pecuča.

² Tuquitan Yooztajapa chiiñi zuma profetanacaqui Yooz puntu mazinchiča. Nižaza wejrnac apostolonacaqui liwriiñi Jesucristo Jiliriž mantitanaca ančhucaquiz tjaajinchinča. Jaziqui tjapa nii tjaajintanaca cjuñzna.

³ Profetaž mazinta timpuž tjontan žoñinacaqui tjonaquiča. “Yooz puntu tjaajintanaca inapanikazza” cjican burlasaquiča. Nii burlasni žoñinacaqui persun anawal kuzcama ojklayaquiča, nižaza persun kuzcama kamaquiča. Ančhucqui jalla nii zumpacha ziz waquiziča.

⁴ Ninacaqui pewcznaquiča, tuž cjican: “¿Kjažt cjisit Cristojo tjonaquiča cjetla pero? Učhum tuquita atchi ejpnacaqui kamchiča; nekztan ticziča. Tii muntu kalltiquiztanpacha tjapa nižtapankaz watča. Cristuc anaž tjonasača”. Nuž cjicanž chiyaquiča ninacaqui.

⁵ Pero tuquita timpuquiztanpacha arajpachaqui Yooz chiitiquiztanpacha paatača. Jalla nii Yooz paatami, ninacaqui anaž naaza. Nižaza Yooz mantitiquiztanpacha tii yokaqui kjazquiztan jecziča.

⁶ Nižaza kjaz juyzu tjontiquiztan nekztanpachaž tii muntu yoka kjazquiz katžcu pertissiča.

⁷ Tii muntuquiz žejlñi yokami pachanacami ujžtan ujzjapa chjojta žejlča. Yooz mantita jaru zakaz nižta wataquiča. Jalla nii ujqui ultimu pjalz tjuñquiz ujaquiča. Nii pjalz tjuñquiz zakaz anazum kamañchiz žoñinaca castictaž cjequiča nii ujquizpacha.

⁸ Pecta jilanaca, cullaquinaca, tiizakaz anaž tjazna. Yooz Jiliržtajapa tsjii noojiqui warank watanaca cuntača. Nižaza warank watanacaqui tsjii nooj cuntača. Yooztajapa timpunacaqui niztača.

⁹ Yekjap žoñinacaqui tuž cjiča, Yooz Jiliriqui niiz tjaata taku ana uri cumpliča. Jilanaca, jalla nii chiitaqui anazuma razunača. Antiz Yoozqui ančhucaltajapa pasinziz kuzziz žejlča. Yoozqui anaž jakziltami casticz pecča. Antiz tjapa žoñinaca “ujchizpantča” cjican chiikatz pecča, ninaca liwriita cjisjapa. Jalla nižtiquiztan ana uri tjonča.

¹⁰ Pero Jesucristo Jiliriž tjonz tjuñiqui tiripintitž tjonaquiča, tsjii tjañižtakaz. Jalla nii tjuñquiziqui tii muntu pachanacaqui tsjii tsucchuc jorjorñižtan tucuzinžnaquiča. Tjuñimi jiizmi warawarami liwj kataquiča; ujta cjequiča. Nižaza tii muntu yokami tjapa žejlñinacžtan pacha ujžtan tankattaž cjequiča.

¹¹ Jalla nižta liwj tjatantaž cjequiča. Jalla nižtiquiztan ančhucqui Yooz kuzcama juc'anti kamz waquiziča, nižaza Yooz irata zuma kamañchiz cjis waquiziča. Jalla nižta kamañchiz waquiziča ančhucqui.

¹² Yooz tjonz tjuñi tjewžna, nižaza zumapan langžna, Yooz apura tjonzjapa. Nii tjonz tjuñquiziqui tii muntu pachanacami ujžtan tankattaž cjequiča. Nižaza tjuñi jiizmi warawarami ujquiz liwj jiñkattaž cjequiča; nekztan liwj kataquiča.

¹³ Pero učumzti ew arajpachami yokami tjewža, Yooz chiita tawk jaru. Nii ew arajpachquinami yokquinami tjappacha Yooz irata zumacamaž cjequiča. Ana zinta anawaliqui cjequiča.

¹⁴ Pecta jilanaca, cullaquinaca, Yooz tjonz tjuñi tjewžcan, zuma kamañquiz kuz tjaa, niž yujcquiz ana ujchiz cjisjapa. Nekztan Yooztan učumnacatan walikaz cjequiča.

¹⁵ Jalla tii cjuñzna. Yooz Jiliriqiu ančhucaltajapa pasinziz kuzziz žejlča, ančhuc liwriita cjisjapa. Jalla nii puntuquiztan zakaz Pablo jilaqui ančhucaquin cjiirčiča. Yoozqui nižquiz zizñi zizñi nižaza zuma intintazñi kuzziz cjiskatchiča. Jalla nii ziztanac jaru učumž pecta Pabluqui ančhucaquin cjiirčiča.

¹⁶ Weriz chiita puntunacquiztan Pabluzakaz chiichiča tjapa niž cjiirta cartanacquiz. Parti Pabluž cjiirtanacaqui ch'aman intintazzucača. Jalla nižta ch'aman intintazzucanacaqui ana zizñi žoñinacami, nižaza pizc kuzziz žoñinacami tsjii kjutñiž intintazza. Nižaza parti Yooz takunaca zakaz tsjii kjutñiž intintazza. Jalla nuž tsjii kjutñiž intintazcu, ninacaqui ninacžtajapa juc'ant ana zumquiz cjissa; nekztan castictaž cjequiča.

¹⁷ Pecta jilanaca, cullaquinaca, ima tii muntuquiz tižtanaca watan tii puntunaca ančhucaquiz zizkatchinča. Jaziqui anawali incallñi žoñinacaqui želaquiča. Nii anawali incallñi žoñinacaqui Yooz mantitanaca anapan cassa. Jalla nižtiquiztan ninacžquiztan cuit'aza, ana tsjii kjutñi chjichta cjisjapa. Anawalinac kjutñi chjichta cjequiž niiqui, ančhucqui ana tjurt'iñi kuzziz cjequiča.

¹⁸ Ančhucqui učum liwriiñi Jesucristo Jiliržquiz juc'ant zumaž pajaquiča. Nižaza niž puntu juc'ant zizaquiča. Nižaza juc'ant zuma kamañchiz cjee. Učum Jesucristo Jiliriqiu honorchizkaj cjila anztajapami wiñayajapami. Jalla nužoj cjila. Amén.

PRIMERA CARTA DEL APOSTOL SAN JUAN

JESUCRISTUQUI TII MUNTUQUIZ TJONCHICHA

¹ Wejrqui Jesucristuž puntul ančhucaquin cjiŕžcuča ančhuc wali cuntintu cjisjapa. Tuqui timpuquiztanpacha Jesucristuqui žejlñipantakalča, ima tii muntu želan. Tii muntuquiz tjontanaqui wejrnacqui Jesucristužtan kamchinča; wejtnaca čhjučžtan nii cherchinča; nižaza niž taku nonzinča. Jacatattanaqui wilta cherchinzakazza; nižaza wejtnaca kjaržtan nii lanzinča. Jazimi tirapanž žejtča Jesucristuqui. Nižaza jakziltat Jesucristuž taku criyačhaja jalla niiqui Yooztan wali cuntintupankaz cjequiča.

² Nii žeti tjaañi Jesucristuqui tjonchiča tii muntuquiz. Nekztan wejrnacqui nii pajchinča, nižaza cherchinča. Nekztan wejrnacqui nii Jesucristuž puntuquiztan žoñinacžquizimi, ančhucaquizimi paljaychinča. Tuqui timpuquiztanpacha žejtñipantakalča nii Jesucristuž puntuquiztan žoñinacžquizimi, kamñitakalča. Nekztan tii muntuquiz tjonžcu, žoñi tucchiča.

³ Jaziqui nii chertanaca nii nonžtanaca ančhucaquin quint'uča, wejtnacatan ančhucatan tsjii kuzziz cjejajo. Wejtnacatan Yooz Ejpžtan nižaza Yooz Majchtan tsjii kuzzizpanča, jalla nižtapacha wejtnacatan ančhucatan cjisjapa.

⁴ Wejrqui tii cartal cjiŕžcuča ančhucaquin wali cuntintu cjisjapa.

YOOZQUI ZUMA KJANQUIZ KAMCHA

⁵ Jesucristuqui wejtnacaquiz tjaajinchiča. Jaziqui nii tjaajintanaca ančhucaquin cjiŕžcuča. Yoozqui zuma kjanquiz kamča. Yoozqui zumapankazza, jalla nuž cjiča nii kjanquiz kamz puntuqui. Nižaza Yoozqui anapanž zumchiquiz kamča. Yoozqui ana čhjul ujchizza, jalla nuž cjiča nii ana zumchiquiz kamz puntuqui.

⁶ Tsjii uj paañi žoñiqui zumchiquiz kamča. Nuž kamcanaqui “Yooztan wejttanaqui tsjii kuzzizza”, cjičhaj niiqui, toscaraž čhiča nii žoñiqui. Anaž werar Yooz jiczquiz ojklayča.

⁷ Yekjapazti kjanquiz kamča; Yoozqui kjanquiz kamča, jalla nižtapacha. Jakzilta žoñinacat nuž kamčhaj niiqui, Yoozquin criichinacžtan tsjii kuzzizza. Nuž kamcanaqui, tjapa niž ujquiztan pertuntača, Jesucristuž ticziž cjen.

⁸ Jakzilta žoñit “Ana ujchiztča”, cjičhaj niiqui, persunpachaž incallča; toscaraž čhiča. Ana zum kuzzizza nii žoñiqui.

⁹ Pero jakzilta žoñit Yoozquin pertuna mayizaj niiqui, niž ujqui pertuntaž cjequiča. Nižaza ana ujchiz cjequiča. Jalla nuž cjiča Yoozqui. Anaž wira toscara chiyasača Yoozqui; niž taku cumpliñipankazza.

¹⁰ Yoozqui cjiča, “Tjapa žoñinacami ujchizza”. Jaziqui jakzilta žoñit “Ana ujchiztča”, cjičhaj niiqui, Yooz toscara čiitažokaž nayča nii žoñiqui. Nižaza niž kuzquiz Yooz taku anaž catokča.

2

JESUCRISTUCHA UCHUM TJURT'IZIÑIQUI

¹ Wejt jilanaca, cullaquinaca, wejrqui tii cartal cjiŕžcuča, ančhuc ana uj paajo. Jakziltat uj paačhaj niiqui, Jesucristužquiztan mayizaquiča. Niiča ućhum tjurt'iziñiqui. Nekztan Jesucristuqui Yooz Ejpžquin mayizinaquiča. Jesucristuqui ana čhjul ujchizza, zumaž kamča. Jaziqui nii tjurt'iziñiqui zuma mayizinasacha.

² Ućhumž uj paatiquiztan Yooz Ejpqui ućhum casticz waquiziča. Jesucristuž ticzi nekztan Yooz Ejpqui ućhum pertunasacha. Ana ujchiz Jesucristuqui ućhum laycu

uĉumnaca ujquiztan ticziĉha. Jaziqui Jesucristuŝquin tjapa kuztan cjenacui ĉhjul uj paaŋi ŝoŋinacami pertunta panikaz cjesaĉha.

³ Jakzilta ŝoŋit Yooz mantita jaru kamĉhaj niiqui, Yooz pajĉha. Jalla niĉha werarapan.

⁴ Jakzilta ŝoŋit ana Yooz mantita jaru kamĉhaj niiqui, anaŝ chii atasaĉha “Yooz pajuĉha”, cjicanaqui. “Yooz pajuĉha”, cjesaŝ niiqui, toscaraŝ chiĉha. Anazum kuzzizza nii ŝoŋiqui.

⁵ Jakzilta ŝoŋit Yooz tawk jaru kamĉhaj niiqui, Yooztan ancha zuma munaziŋi kuzzizza. Yoozquin tjapa kuzzizpanĉha. Jilanaca, tii zuma cjuŝzna.

⁶ Jakzilta ŝoŋit “Yooztan tsjii kuzziztĉha wejrqui”, cjiĉhaj niiqui, zuma kamzpanŝ waquiziĉha, Jesucristuŝqui zumaŝ kamĉha, jalla niŝta.

EW MANTITA

⁷ Jilanaca, cullaquinaca, wejrqui anal jazta mantita cjiŝrŝcuĉha. Tuquitanpacha tii mantitac zizzinĉhucĉha anĉhucqui, porapat zuma munaziz, jalla nii. Tuquitanpacha tii mantitac nonzinĉhucĉha.

⁸ Pero tii mantita cjiŝrŝcuĉha, jazta mantitaŝtakaz. Jesucristuŝqui tii mantitacama kamchiĉha tii muntuquiz. Anĉhuczakaz tii mantitacama kamĉha. Nuŝ kamcan, zuma munazican, ana zumchiquiz kamĉha, werar kjanquiz kamĉha, Yooz takucama. Jalla nuŝupanĉha niiqui.

⁹ Jakzilta ŝoŋit “Kjanquiz kamuĉha”, cjiĉhaj niiqui, jilanacŝtan porapat zuma munaziz waquiziĉha. Jilanacŝtan tira ĉjaawjkatĉhaj niiqui, pachpa zumchiquizpanŝ kamĉha.

¹⁰ Jakzilta ŝoŋit jilanacŝtan porapat zuma munazaja, jalla niiqui kjanquizpankaz kamĉha. Jaziqui Yooz jicz cherchucaĉha, ana ujquiz tjoŝtsjapa.

¹¹ Jakzilta ŝoŋit jilanacŝtan ĉjaawjkatĉhaja jalla niiqui zumchiquiz kamĉha. Jakz-itĉhuc ojĉhaj niiqui, ana zizza. Jaziqui Yooz jicz ana cherchucaĉha; zur ŝoŋiŝtakazza nii ŝoŋiqui.

¹² Jilanaca, cullaquinaca, anĉhucacuin cjiŝrŝcuĉha. Jesucristuŝ ticzi nekztan anĉhucacui uj pertunchiĉha Yoozqui.

¹³ Ejpnaĉa, anĉhucacuin cjiŝrŝcuĉha. Jesucristuŝqui tuqui timpuquiztanpacha ŝejlŋipantakalĉha. Nii Jesucristuŝtan kamĉha anĉhucqui. Tjotjowanaca, turtakanaca, anĉhucqui Satanás atipĉhinĉhucĉha. Jaziqui anĉhucacuinzakaz cjiŝrŝcuĉha.

Jilanaca, cullaquinaca, anĉhucqui Yooz Ejpŝtan kamĉha. Jaziqui anĉhucacuinzakaz cjiŝrŝcuĉha.

¹⁴ Ejpnaĉa, Jesucristuŝqui tuqui timpuquiztanpacha ŝejlŋipantakalĉha. Nii Jesucristuŝtan kamĉha anĉhucqui. Jaziqui anĉhucacuin cjiŝrŝcuĉha. Tjotjowanaca, turtakanaca, anĉhucacui kuzquiz Yooz taku ĉjojĉhiŋĉhucĉha. Nekztan Yoozquin tjurt'iŋi kuzziz cjen, anĉhucqui Satanás atipĉhinĉhucĉha. Jaziqui anĉhucacuinzakaz cjiŝrŝcuĉha.

¹⁵ Tjappacha anĉhucqui, nonŝna. Anaĉha tii muntuquiz ŝejlŋi cusasanacŝquin kuz tjaaŝqui. Anaĉha anawali paaznacquiziĉqui kuz tjaaŝqui. Jakzilta ŝoŋit anawali paaznacquiz kuz tjaaĉhaj niiqui, anaŝ Yooz Ejpŝquin kuz tjaaĉha.

¹⁶ Tii muntuquiziĉqui tiŝta anawali paaznaca ŝejlĉha: persun kuzcama kamz pecznaca, persun ĉhjujquizĉ cherta pecznaca, tucquin cjis pecznaca. Jalla niŝtanaca pecĉhaj niiqui, diabluz jaru ojĉklayĉha.

¹⁷ Tii muntuquiz ŝejlŋinacacui liwj tucuzacuĉha, tjatŝtaŝ cjequiĉha. Niŝaza tii muntuquiz ŝejlŋinaca pecznacami tucuzacuĉha. Pero Yooz kuzcama ojĉklayŋinacacui Yooztan wiŋaya kamacuĉha.

WERAR TAWKZTAN, TOSCAR TAWKZTAN

¹⁸ Jilanaca, cullaquinaca, tii timpumiŝ ojtĉha. Tsjii Jesucristuŝ quintraĉqui tjonacuĉha, nii quintu zizza anĉhucqui. Niŝaza anziĉqui muzpa Cristuŝ quintra ŝoŋinacacui jecŝa. Nekztan uĉhumqui zizza tii timpuqui ojtĉha.

¹⁹ Nii quintranacaqui uĥumquiztan zarakchiĥa. Anataĥa uĥumtan tsjii kuzziz ninacaqui. Uĥumtan tsjii kuzziz cjitasaĥ niiqui, tira uĥumtan kamtasaĥa. Ninacaĥ zarakтанаqui, kjanapacha cjiŝiĥa, anataĥa uĥum tsjii kuzziz ninacaqui.

²⁰ Anĥuczti ana niĥtiĥucĥa. Anĥuca kuzquizzti Yooz Espiritu Santo kamĥa. Jaziqui anĥucqui tjapa werara zizzinĥucĥa.

²¹ Werar taku zizniĥ cjen anĥucaquin cijrĥcuĥa. Niĥaza Yooz takuqui anaĥ ĥjul toscarami chiiĥa.

²² ¿Ject toscar ťoņejo? Jakziltat “Jesusaĥa ana Yooziĥ cuĥanĥquita Cristuqui” cjiĥaja, jalla niĥa toscara chiiņiqui. Cristuĥ quintraĥa ninacaqui. Nii ťoņinacaqui Yooz Ejpĥquin niĥaza Yooz Majĥquin ana pajz pecĥa.

²³ Jakziltat ana Yooz Majĥquin pajz pecĥaja, jalla niiqui ana Yooz Ejpĥtan kamasāĥa. Jakziltat “Jesuscristuqui werar Yoozza” cjiĥaja, jalla niiqui Yooz Majĥtan kamĥa; Yooz Ejpĥtan zakaz kamĥa.

²⁴ Nii tuqui nonĥta Yooz taku persun kuzquiz ĥjojwa anĥucqui. Nii Yooz taku ĥjojĥcu, Yooz Majĥtan Yooz Ejpĥtan anĥucatan tsjii kuzziz wiņaya kamaquiĥa.

²⁵ Yooz Majĥqui chiichiĥa, tuĥ cjan:

—Wiņaya Yooztan kamaquiĥa anĥucqui.

²⁶ Yekjap ťoņinacaqui anĥuc incallz pecĥa. Jaziqui cijrĥcuĥa nii puntuquiztan.

²⁷ Jesucristuqui Yooz Espiritu Santo anĥuca kuzquiz cuĥanĥquichiĥa. Jalla niĥtiquiztan nii Espiritu Santuqui anĥucaquiz tjaajinĥa. Jaziqui yekja tjaajiņi espiritu anaĥ peĥsa anĥucqui. Yooz Espiritu Santuĥ ĥekan weraraqui tjaajinĥa. Anaĥ toscanaca tjaajnasāĥa. Cristuĥtan tsjii kuzziz kama; jalla nuĥ tjaajinĥa Espiritu Santuqui. Niĥtaqui niĥ tjaajintacama kama.

²⁸ Jilanaca, cullaquinaca, Cristuĥtan tsjii kuzziz kama anĥucqui. Nekztan Cristuĥ tjonšanaqui, uĥumqui anaĥ eksnaquiĥa, niĥaza anaĥ azaquiĥa.

²⁹ Jesucristuqui zuma kuzzizpanĥa. Nii zizza anĥucqui. Jakziltaĥlaj zuma kuzziz niiqui, Yooz maatiĥa. Jalla niizakaz zizza anĥucqui.

3

YOOZ MAATINACA

¹ Tjappacha anĥucqui nonĥna. Yooz Ejpqui uĥum zumaĥ k'ayacht'iĥa. Niĥaza Yoozqui uĥum illziĥa, niĥ maati cjisjapa. Yooz maatiĥumĥa uĥumqui. Jalla niĥtiquiztan uĥum kuzqui ana pajĥa ana Yooz criichinacaqui. Yooz kuzmi anazaĥ pajĥa ninacaqui.

² Jilanaca, cullaquinaca, uĥumqui Yooz maatiĥumĥa. Wiruņaqui jaknuĥkaĥum cjiŝnaĥan, uĥumqui ana zizza. Pero Jesucristuĥ tjonšanaqui, nii ĥeraquiĥa uĥumqui. Nekztanaqui Jesucristuĥ irata cjiŝnaquiĥa uĥumqui. Jalla nii tjaajinta zizzinĥumĥa.

³ Jakziltat Jesucristo tjewĥaja, jalla niiqui ĥjul uj paaznacami ecĥa, ana ujĥiz cjisjapa; Jesucristuqui ana ujĥizza, jalla niĥtapacha cjisjapa.

⁴ Jakzilta ťoņiĥlaj uj paaņi, jalla niiqui Yooz mantitanaca anaĥ cazza. Uj paazqui Yooz taku quintraĥa.

⁵ Jesucristuqui tii muntuquiz tjonchiĥa, ťoņinacĥ uj pampatzjapa. Ana ĥjul ujĥizza niiqui. Jalla nii zizza anĥucqui.

⁶ Jakzilta ťoņiĥlaj Cristuĥtan tsjii kuzziz, jalla niiqui ana uj paaņiĥa. Uj paaņi ťoņinacaqui anaĥ naaza Cristuĥ puntuquiztanaqui. Niĥaza anaĥ kamĥa Cristuĥtanami.

⁷ Jilanaca, cullaquinaca, ana jecĥquizimi incallskata anĥucqui. Wali kamņi ťoņinacaqui zuma kuzzizza, Cristuĥtakaz.

⁸ Satanás cjita diabluqui tuqui timpuquiztanpacha uj paañipankaztakalcha. Jaziqui nižaza tira uj paañiicha. Nekztan uj paañi zoñinacaqui Satanás diabluz maatinacača. Jesucristuzti tii muntuquiz tjonchiča, Satanás diabluz paatanaca akkatzjapa.

⁹ Yooz maatiqui ana kuzin uj paañiicha. ¿Kjažtiquiztan nii ana kuzin uj paañitajo? Yooz maatiča, nekztan kuztan ana uj paapaasača. Yooz Ejpž kuz cherchi kuzziz kamñiča. Jalla nekztan tjapa kuztan uj ana paasača.

¹⁰ ¿Jakziltat Yooz maatejo? ¿Jakziltat diabluz maatejo? ¿Jaknužža nii zizas učhumjo? Jalla tuž zizasacha. Jakziltazlaj kuzin uj paañi, jalla niicha ana Yooz Ejpchizqui. Nižaza jakziltazlaj niiz jilanacžtan čhjaawjkatñi, jalla niicha diabluz maatiqui.

PORAPAT ZUMA MUNAZIZA

¹¹ Porapat zuma munaziza. Tii mantitaqui tuquitanpacha nonzinčhucča.

¹² Tsjii zoñi želatča, Caín cjita. Jalla nii Cainqui niiz lajk conchiča. ¿Kjažtiquiztan conchit niijo? Jalla niiz paatanacaqui anawalinacatača; niiz lajkž paatanacazti wali-nacatača. Jalla nekztan niiz lajk conchiča. Cainqui diabluz maatiča. Ana nii Cainž kuz cherchi kuzziz cjee ančhucqui.

¹³ Jilanaca, cullaquinaca, tii muntuquiz žejlñi zoñinacaž ančhuc čhjaajwanaqui, ana istraña, ana upa kuzziz cjee.

¹⁴ Tuquiqui ana zuma munazan, jalla nekztan infiernuquin okaj cjitatakalča učhumqui. Jaziqui Yoozquin criižcuqui arajpach watjaž okaquiča; wali cuntintu cje-quiča. Jalla nekztan učhumqui Yoozquin criichi jilanacžtan porapat zuma munazizza. Nii zizza učhumqui. Jakziltat ana jilanacžtan porapat zuma munazičhaja, jalla niiqui infiernuquinž okaquiča.

¹⁵ Jakziltat niiz jilžtan čhjaawjkatčhaja, jalla niiqui zoñi conchiž cjes, jalla nižtaž ninacaqui. Nižaza zoñi conñinacami ana Yooz kuz cherchi kuzzizza. Anaž wiñaya Yooztan kamasacha.

¹⁶ Cristuqui učhum laycu ticziča. Nekztan jaknuž munazizlaja, jalla nii učhumqui zizza. Učhumqui Yooz criichi jilanacžtan zuma munazizpanča, ticzcama.

¹⁷ Tsjii tjapa cusasanacchiz zoñiqui tsjii t'akjir jila cheraquiž niiqui, okzpanča. Anaž okznasaž niiqui, ¿kjažt Yooz cherchi kuzziz cjesajo? Anapanž Yooz cherchi kuzzizza.

¹⁸ Jilanaca, cullaquinaca, anača atžtan taku mayaka okzqui. Paatanacžtanaqui okza. Nekz tjeeža učhumž okžtaqui. Niicha werar okzqui.

YOOZQUIZTAN ANA PAYZNAKZCU MAYAQUICHA

¹⁹ Jilanaca zuma okzcan, učhumqui zizza, werar Yooz maatičhumpanča, jalla nii. Nekztan llajlla kuzzizlaj niiqui, tjup kuzziz cjee. Yooz yujcquiz Yooz maatinacčhumča.

²⁰ Yoozza juc'ant chekanaqui učhum kuzquiztan cjenaqui. Yoozqui tjapa učhum kuz zizza, ana walinacami, walinacami, tjappacha. Nii anawalinaca zizcumi, Yoozqui tirakaž učhum okža.

²¹ Jilanaca, cullaquinaca, čhjulatorat učhumž kuz walika cječhaj niiqui, Yoozquiztan ana ekskumayasača.

²² Učhumqui Yooz mantitacama kamtiquiztan, nižaza Yooz kuzcama kamtiquiztan učhumž mayiztac nonžtaž cjequiča.

²³ Yooz mantitanacaqui tužuča: Yooz Majch Jesucristužquin tjapa kuztan cjee. Nekztanaqui jilanacžtan zuma munaza. Jalla nuž mantichiča Yoozqui.

²⁴ Jakziltat nii mantitacama kamčhaja, jalla niiqui Yooztan tsjii kuzzizza. Nižaza Yooztan tsjii kuzzizza nii zoñinacžtan. Yooz tjaata Espiritu Santuqui učhum kuzquiz žejlča. Jalla nekztan zizza učhumqui, Yooztan učhumtan tsjii kuzziz, jalla nii.

4

ESPIRITU SANTUŽTAN CRISTUŽ QUINTRA ESPIRITUŽTAN

¹ Jilanaca, cullaquinaca, nonžna. Jakziltat “Tii takuqui Yooz takučha”, cjičhaj niiqui, nii žoñiž chiita taku zumpacha tantiyaquičha, Yooz taku chiiñi, ana Yooz taku chiiñi, jalla nii. Anačha čjul takumi pjazila criizqui. Tii muntuquiz muzpa toscara chiiñi žoñinaca žejlčha; Yooz taku chiitažokaž cjičha.

² ¿Jaknužt žoñiž chiita taku paji atas učumjo? ¿Yooz Espíritu Santuž chiikatkaya? ¿Uz ana Yooz Espíritu Santuž chiikatja? Jalla tuž paji atasučha učumqui. Tii muntuquiz Jesucristuqui žoñž curpuchiz kamchičha. Jakziltat nižtapan chiičhaja, jalla niičha Yooz taku chiiñiqui.

³ Nižaza jakziltat Jesucristuqui anačha žoñž curpuchiz kamchiqui, cjican chiičhaja, jalla niičha ana Yooz takucama chiiñiqui. Cristuž quintra espírituqui nii chiikatčha. Nii Cristuž quintra espírituqui tjonaquičha; tuqitan ančhucqui jalla nii nonzinčhucčha. Anziqui tii muntuquiz nižta Cristuž quintra chiiñinaca žejlčha.

⁴ Pecta jilanaca, cullaquinaca, ančhucqui Yooz maatinacčhucčha. Nii toscar taku joojooñinacaqui diabluž mantitaž ojklayčha. Ančhuczti Yooz Espíritu Santuž mantitaž ojklayčha. Yooz Espíritu Santuqui juc'anti azzizza nii diablužquiztan cjenauqui. Nekztan ančhucqui nii toscar taku joojooñinaca atipasačha.

⁵ Ninacaqui diabluž maatinacačha. Nii žoñinacaqui ana Yooz takucama chiiñičha, diabluž taku chiiñičha ninacaqui. Nii diabluqui tii muntuquiz ančaž mantičha. Jaziqui Yoozquin ana criichi žoñinacaqui diabluž taku criičha.

⁶ Učumzti Yooz maatinacčhumčha. Jaziqui werar Yooz takuž chiyan Yoozquin criichi žoñinacaqui nii werar takuž catokčha. Ana Yoozquin criichi žoñinacaqui nii werar taku anaž catokčha. Nužquiz werar taku chiiñi žoñinacami, nižaza toscar taku chiiñi žoñinacami pizcpacha pajasučha učumqui.

YOOZQUI ANCHA MUNAZIŇI KUZZIZZA

⁷ Pecta jilanaca, cullaquinaca, Yoozpankazza učum porapat zuma munazkatñiqui. Jaziqui učumqui tjappacha porapat zuma munazizpančha. Jakziltat zuma munazičhaja jalla niiqui Yooz maatičha. Nižaza Yooz pajčha.

⁸ Yoozqui ancha munaziñi kuzzizza. Jaziqui jakziltat ana munaziñi kuzzizlaja, jalla niiqui ana Yooz pajčha.

⁹ Yooz Ejpqui tii muntuquiz niž zinta Majch cuchanžquichičha učum Yooztan wiñaya kamzjapa, wali cuntintu. Jalla nuž cuchanžquitiquiztan Yoozqui učumquiz niž munaziñi kuz tjezičha.

¹⁰ Yoozqui ultimu zuma munaziñi kuzzizpančha. Yooz Ejpčha učum k'ayachichiqui. Nekztan niž Majch cuchanžquichičha. Yooz Majchqui učum uj laycu ticzičha, učum ana casticta cjisjapa. Nekztan zuma munaziñi kuzqui jaknužt cječhaja, nii zizza učumqui.

¹¹ Pecta jilanaca, cullaquinaca, učumtan ancha munazičha Yooz Ejpqui. Jaziqui učum nižtazakaz porapat zuma munazizpančha.

¹² Anaž jakzilta žoñimi Yooz cherčha. Ana Yooz cheržcumi zuma munazičhaja, jalla nii žoñiqui Yooztan tsjii kuzzizza. Nižaza Yooz munaziñi kuz, jalla nižta kuzzizza nii žoñiqui.

¹³ Yooz Ejpqui niž Espíritu Santo učumquiz tjaachičha. Jalla nekztan Yooztan učumtan tsjii kuzzizza, nii zizza učumqui.

¹⁴ Yooz Ejpqui niž Majch cuchanžquichičha žoñinaca liwriizjapa. Nii Yooz Majch cherchinčha wejrnacqui. Nekztan ančhucaquiz nii puntu tjaajinchinčha.

¹⁵ Jakziltat “Yooz Majchčha Jesucristuqui”, cjičhaja, jalla niičha Yooztan tsjii kuzzizqui. Nižaza Yoozqui nižtan tsjii kuzzizza.

¹⁶ Yoozqui učumtan ancha munazičha, jalla nii zizza učumqui. Nižaza nii criičha učumqui. Yoozqui munaziñi kuzzizza. Jaziqui jakziltat munaziñi kuzzizpanžlaja, jalla niičha Yooztan tsjii kuzzizqui. Nižaza Yoozqui ninacžtan tsjii kuzzizza.

17 Nuž kamcan juc'ant juc'ant munaziñi kuzziz cjissa učumqui, Jesucristuž irat kuzziz cjiscama. Jalla nekztan juyzuquiz ana eksnaquiča učumqui.

18 Munaziñi kuzziz žoñinacaqui ana Yoozquin eksniča. Zuma munaziñi kuzziz žoñinacaqui anaž čhjulumi eksnasača. Jalziltat eksni kuzzizlaja, jalla niiqui Yooz casticz eksa. Jalla nižtiquiztan anaž zuma munaziñi kuzzizza nii eksni žoñinacaqui.

19 Yoozqui učumtan zuma munaziča. Jalla nekztanaqui učumqui Yooztan munaziča.

20 Jakziltat “Wejrqui Yooztan zuma munaziñi kuzziztča”, chiičhaja, jalla niiqui niž jilanacžtan ana chjaawjkatñipanča. Niiž jilanacžtan chjaawjkatčhaja, jalla niiqui anaž Yooztan zuma munaziñi kuzzizza. Inapankaz “Wejrqui Yooztan zuma munaziñi kuzziztča” cjiča. Toscara chiiča. Nii žoñinacaqui cherta jilanacžtan anazuma munazičhaja, jalla niiqui ¿jaknužt ana Yooz cheržcu Yooztan munaziñi kuzziz cjesajo? Anapanž cjesača.

21 Yoozqui učum mantichiča tuž cjican:

—Jakziltat Yooztan munaziñi kuzzizlaja, jalla niiqui niž jilanacžtanami zuma munaziñi kuzzizakaz cjis waquiziča.

5

UCHUMQUI ANAWALINACA ATIPCHA

1 Jesusača Yooziž cuchanžquita Cristuqui. Jakziltat nii Jesucristužquin criičhaja, jalla niiča Yooz maatiqi. Tjapa Yooz maatinacami Yooz Ejpžtan munaziñi kuzzizza. Nižaza Yooz Ejpžtan munaziñi kuzzizalaj niiqui, Yooz Ejpž maatinacžtan munaziñi kuzzizakazza.

2 Nižaza jakziltat Yooztan munaziñi kuzzizalaja, jalla niiqui Yooz mantitanacaž cazza. Jalla nekztan Yooz maatinacaqui porapat zumaž munaziča. Niiž zizza učumqui.

3 Yooztan munaziñi kuzziz žoñiqui Yooz mantitanaca cazza. Nii Yooz mantitanacaqui anača ch'ama.

4 Yooz mantita cazcu, Yooz maatinacaqui anawalinaca atipča. Jakzilta žoñit Yoozquin tjapa kuz criičhaja, jalla niiqui anawalinaca atipča.

5 ¿Jakziltat anawalinaca atipjo? Jakziltažlaj Jesús cjita Yooz Majchquin tjapa kuztan, jalla ninacaž atipča anawalinacaqui.

YOOZ MAJCHCHA JESUCRISTUQUI

6 Jesucristuqui tii muntuquiz tjontan, kjaztan bautistatača. Jalla nekztan cruzquiz ch'awcta ticziča. Kjaztan bautistaž cjen, jalla niiča tisticuqui, Yooz Majchča Jesucristuqui, cjican. Cruzquiz ch'awcta ljoc tjawkchiča. Jalla nii zakazza tisticuqui, Yooz Majchča Jesucristuqui, cjican. Yooz Espiritu Santuqui tisticuzakazza: Yooz Majchča Jesucristuqui, cjican. Nii Espiritu Santuča werarapan chiiñiqui.

7 Arajpachquinaqui čhjep tisticunaca žejlča, Yooz Ejp, nižaza Taku cjita tjuuchiz Yooz Majch, nižaza Yooz Espiritu Santo. Nii čhjepultanaqui tsjiikaz chiiča.

8 Nižaza tii muntuquiziqui čhjep tisticunacazakaz žejlča, Yooz Espiritu Santo, nižaza kjaztan bautis, nižaza cruzquiz ljoc tjawkz. Nii čhjepqui tsjiikaz chiiča: Jesucristuča Yooz Majchqui, cjican.

9 Zoñž taku weraražlaja niiqui, Yooz taku juc'ant werarača. Werara chiiñi Yooz Ejpqui chiiča, tuž cjican:

—Jesucristuča Wejt Majchqui.

10 Jakziltat Yooz Majchquin criičhaja, jalla niiqui persun kuzquiz zizza, Jesucristuča Yooz Majchqui, nii. Jalla nižakaz Yooz Ejpqui chiiča. Jakziltat Yooz taku ana criičhaja, jalla niiqui Yooz toscara chiitažokaz nayča. Yooz takuqui chiiča: Jesucristuča Yooz Majchqui, cjicanaqui. Jalla nii anaž criiž pecča yekjap žoñinacaqui. Jalla nekztan Yooz toscara chiitažokaz nayča nii ana criiñinacaqui.

¹¹ Nižaza Yoozqui cjičha:

—Wejt Majchqui ančhuca ujquiztan ticzičha. Jalla nekztan ančhucqui wejttan wiñaya kamaquičha, wali cuntintu.

¹² Jakziltat Yooz Majchtan tsjii kuzziz kamčhaja, jalla niiqui Yooztan wiñaya kamaquičha. Nižaza jakziltat Yooz Majchtan ana tsjii kuzziz kamčhaja, jalla niiqui Yooztan ana wiñaya kamasacha.

ZERZ TAKUNACA

¹³ Ančhucqui Yooz Majchquin criičha tjapa kuztan. Jalla nekztan Yooztan wiñaya kamaquičha, wali cuntintu. Nii zizjapa, ančhucaquin cjičhucucha wejrqui.

¹⁴⁻¹⁵ Učhumqui Yooz kuzcama mayizaquiž niiqui, nonžtaž cjequičha. Učhumž mayizta nonžtaž cjequiž niiqui, tjaataž cjequičha. Jalla nužupančha. Weraraž niiqui.

¹⁶⁻¹⁷ Tjapa anawalinacami ujpančha. Tsjii jilaqui uj paaquiž niiqui, Yoozquiztan mayizinspančha, pertunta cjeejo. Pero tsjii juc'ant anawal uj paaz kuzzizzalaj niiqui anaž pertunta cjesačha. Niižta ana Yoozquiztan mayizina, pertunta cjeejuqui. Yekja ujnacami Yoozquiztan mayizinasacha, pertuntaž cjeyajo.

¹⁸ Yooz maatinacami anaž kuzin uj paasačha. Yooz maatinaca walja kjaraž cuitičha Yooz Majchqui. Nii anawal Satanás diabluqui Yooz maati Yooz kjarquiztan ana kjañi atčha. Nii zuma zizza ančhucqui.

¹⁹ Yooz maatinacčhumčha učhumqui. Ana Yoozquin criichi žoñinacaqui, tjappacha Satanás diabluž mantuquiz žejlčha. Učhumqui nii zakaz zizza.

²⁰ Yooz Majchqui tjonchičha učumnaca zuma intintazkatajo, nižaza werar Yooz pajajo. ¿Ject werar Yoozjo? Jalla niičha Jesucristo Yooz Majchqui. Jaziqui učhumqui nii werar Yooztan tsjii kuzziz cjissinčhumčha. Niižtan kamcan, wiñaya niižtan kamaquičha.

²¹ Jilanaca, cullaquinaca, ančhucqui žoñiž paata yooznacquiztan zaraka, ana iya nekz macjata ančhucqui. Jalla nužupančha.

SEGUNDA CARTA DEL APOSTOL SAN JUAN

WERAR TAKU, MUNAZIÑI KUZ

¹ Wejrqui Juan cjititča. Icliz jiliritča wejrqui. Jaziqui tii cartal cjiyržcuča Yooz illzta cullacaquin tjappacha naaža maatinacžquin. Wejrqui ančhuc werara k'ayachuča. Nižaza tjapa Yooz taku criichinacaqui ančhucž k'ayachiča.

² Učhum kuzquiziqui werar Yooz taku žejlča, nižaza wiñaya želaquiča.

³ Nižaza zuma munaziñi kuzziz kaman, Yooz Ejpžtan nižaza Jesucristo Yooz Majchtan učhum yanapča. Nižaza učhum okžcu, llan kuzziz cjiskatča.

⁴ Yekjap am maatinaca cherchinča, Yooz takucama kamñi. Nužupan, mantichiča Yoozqui. Nuž kamñi cheržcu, ancha chipchinča wejrqui.

⁵⁻⁶ Cullacalla, anziqui am roct'uča, porapat zuma munaza. Nii mantitaqui anača antakaz. Tuquitanpacha učhumqui nuž mantitapanča. Jakziltat zuma munaziñi kuzzizlaja, jalla niiqui Yooz mantitanacacama kamča.

Tuquitanpacha Yooz mantita nonzinčhucča, zuma munaziñi kuzziz cjee, jalla nii.

INCALLÑI ZOÑINACA

⁷ Tii muntuquiz muzpa žoñinacaqui ojklajča, žoñi incallcan. Ninacaqui anaž criiča, Jesucristuž žoñž curpuchiz kamchiča tii muntuquiz, nii. Jalla ninacača incallñinacaqui. Nižaza Cristuž quintranacača.

⁸ Ančhucqui nonžna. Ančhucqui Yooztajapaž langža. Nii langžta cuitaquiča, ana pertiznajo, arajpachquin zumanaca tanzjapa.

⁹ Jakziltat Jesucristuž tjaajinta yapzaja, jalla niiqui anaž Yooztan tsjii kuzziz kamča. Nižaza jakziltat Jesucristuž tjaajintacama ana kamčhaja, jalla niiqui anazakazza Yooztan tsjii kuzzizqui. Pero jakziltat Jesucristuž tjaajintacama kamčhaja, jalla niiča Yooz Ejpžtan nižaza Yooz Majchtan tsjii kuzzizqui.

¹⁰ Jakziltat ančhucquiz tjonžcu Cristuž tjaajinta ana niicama tjaajinčhaj niiqui, anaž Yooztan tsjii kuzziz nii jilaqui. Ančhucqui nii žoñi ana kjuyquiz kjawznaquiča. Anazaž tsaanaquiča.

¹¹ Jakziltat nii anawal žoñžquiz tsaanačhaj niiqui, nii žoñž anawal langz yanap-
tažokaz cjiča.

ZERZ TAKUNACA

¹² Zumsira wacchi takunaca wejtta žejlča. Pero tjappachaqui anal cjiyrz pecuča. Ančhucquain tjonz pecuča, učhum pora parlijapa, porapat cuntintu cjisjapa.

¹³ Am cullaqui illzizakazza Yoozqui. Naaža maatinacaqui saludos apayžquiča. Jalla nužukazza.

TERCERA CARTA DEL APOSTOL SAN JUAN

GAYO CJITAQUI ZUMACHA

¹ Wejrqui Juan cjitit'cha. Icliz jilirit'cha wejrqui. Gayo, amquin cjiiržcu'cha. Yooz takucama kamcan, am k'ayachu'cha.

² Jila, amtal mayizinu'cha tjappacha walicama cjeajo, nižaza am curpu zuma žejt'ni cjeajo. Am kuz walikazza, nii zizu'cha wejrqui.

³ Yekjap jilanacaqui wejtquiz tjonzi'cha. Am puntu wejtquiz quint'ichi'cha, tuž cjican:

—Nii Gayuqui werar Yooz takucamaž kam'cha.

Jalla nuž zizcu ancha chipchin'cha.

⁴ Wejt jilanacaž werar Yooz takucama kam'ipan zizcu, anchal cuntintu'cha wejrqui. Anaž čjulumi wejr juc'ant cuntintu cjiskat'niqui žejl'cha.

⁵ Jila, walikam am paa'cha, jilanaca yanapcan, ana pajta jilanacami.

⁶ Yekjap amiž yanaptanacaqui iclizquiz mazzi'cha, tuž cjican:

—Nii Gayo cjita jilaqui ancha zuma'cha. Ana pajta jilanacami yanap'ni'pankazza. Nižaza okz'ni'pankazza.

Gayo jila, jalla nužupan amqui tira yanapaqui'cha. Jilanacaž jiczquin okanami yanapz waquizi'cha. Jalla niic walikazza; jalla nuž cjenaqui Yooz kuzqui wali cuntintuž cjequi'cha.

⁷ Nii jilanacaqui Yooz sirwican ojklay'ni'cha. Ninacaqui ana Yooz criichinacžquiztan ana čjul yanap'ni' pec'ni'cha.

⁸ Jaziqui u'chumqui nii Yooz sirwi'ni jilanaca yanapz waquizi'cha, ninaca werar Yooz taku parlajo.

DIOTREFES CJITAQUI ANAWALI PAA'ŃCHA

⁹ Tuquiqui iclizquin cjiirchin'cha. Tsjii žo'ni'qui weriž cjiirta anaž nonz pec'cha. Wejrqui icliz jilirit'cha. Pero nii žo'ni'qui anaž wejr jilirižtaka nay'cha. Diotrefes cjita tjuuchizza nii žo'ni'qui. Niikaz jilanaca juc'antiž mantiz pec'cha.

¹⁰ Wejrqui an'chucaquin tjonac'haj niiqui, jalla nekztan nii žo'niž anawali paatanaca paljaya'cha an'chucaquiz. Nii Diotrefesqui toscaranaca parlich'i'cha wejtnaca quintra. Iya anawalinaca paachizakazza. Nižaza jilanacaž tjonznanami, ana risiwz pec'ni'cha. Yekjap criichinacazti wali quiyas pec'cha. Nii Diotrefeszi cji'ni'cha:

—Anapanž nii jilanacžtan zumaž risiwaqui'cha.

Nižaza zuma risiw'ni jilanaca iclizquiztan chjatkat'ni'cha.

¹¹ Jila, jaziqui ana'cha nižta cjisqui. Nii žo'niž paatanaca ana yatekaza. Amzti, walikam paa'cha. Jakziltat walinaca paachaja, jalla niiqui Yooz cherchi kuzziz kam'cha. Jakziltat anawalinaca paachaja, jalla niiqui anaž Yooz paj'cha, ana Yooz cherchi kuzzizza.

DEMETRIO CJITAQUI WALI PAACHA

¹² Tjappach žo'ni'acaqui Demetriuž puntu cji'cha:

—Zuma'cha nii Demétrio cjita jilaqui. Niiž paatanacami werar tawk jarupankazza.

Nižaza wejrnacmi chiyu'cha, Demetriuqui zuma jila'cha, nii. An'chucqui zizza, wejrnacqui werar takul chiyi'ni'cha, nii.

¹³ Zumsira wacchi takunacaqui wejtta žejl'cha cjiirzjapa. Pero tii cartiquiz anal iyal cjiirz pecu'cha.

¹⁴ Wajilla amquin tjonzquiz pecu'cha. Jalla nekztan u'chumporaž palt'aqui'cha.

¹⁵ Llan kuzziz cjee. Tekzta jilanacaqui saludos apayžqui'cha. Nižaza amqui wejtnaca jilanacžquiz tsaanžinaqui'cha, zapa maynižquiz. Jalla nužukazza.

LA CARTA DEL APOSTOL SAN JUDAS

¹ Wejr Judasqui Jesucristuž manta payiñ zoñt'cha nižaza Jacobž lajk'cha. Wejrqui ančucaquin cjiřzcučha. Yooz Ejpqui ančuc kjawzičha, niž maati cjeajo. Nižaza Yooz Ejpqui ančucatan zuma munazičha. Nižaza ančuc anawalinacquiztan cuitičha, Jesucristuž tjonzcama.

² Yoozqui ančucaquiz juc'antej okžla, nižaza juc'ant walikaj kamkatla, nižaza ančucqui Yooziž ancha munasitaj cjila.

TOSCARA TJAAJINACŽ PUNTU

³ Pecta jilanaca, cullaquinaca, wejrqui ančucaquin anchal cjuñchinčha. Jalla nuž cjuñzcu liwriiñi puntuquiztan ančucaquin anchal cjiřz pecučha. Ančucatan wejttan liwriita zoñinacačha. Anawal tjaajiñinacž ančucaquiz incallz pecchiž cjen tii cartal urgente apayžcačha, ančucaquiz chiižinzjapa. Yoozquin kuz tjaaz puntu werara tjaajintatačha. Tsjemata tjaajintanacaqui anačha werara niiqui. Werar tjaajintanacžquizkaz tjurt'iñi kuzziz cjee.

⁴ Yekjap ana lijitum criichi zoñinacaqui ančucaquiz jamazit luzzičha, ana kjana-pacha. Ninacaqui ana wal zoñinacačha. Yooz partiquiz luzcu, Yooz okžni kuz tsjii kjutni intintazza. Ninacaqui cjiñičha, “Yoozqui učum okzpančha, jaziqui čjul paatami walikazza”. Jalla nuž kamcan učum Jesucristo Jiliržquiz anapan pajčha. Pero criichi zoñinacž pajk Patrunačha Jesucristuqui. Yekjat ana iya želasačha. Jaziqui ninacaqui Yooz kamañquiz anapan kamčha. Tuquiqui profetanacaqui nižta kamñinacž puntuquiztan cjiřchičha, “Yoozqui ninacžquiz casticaquičha”, jalla nuž cjican.

⁵ Ančucaž zizziž cjenami, ančucaquiz zumpacha cjuñkatz pecučha tii puntuquiztan. Tuqui Yooz Jiliričha Egipto yokquiztan Israel wajtchiz zoñinaca jwessičha. Nekztan jwessiž cjenami ana criichinacžquiz ticzkatchičha.

⁶ Nižaza tii cjuñzna. Yekjap anjilanacaqui Yooziž tjaata puesto ana iya wacaychiz pecchičha, nižaza arajpach puestuquiztan zarakchičha. Jalla nižtiquiztan Yoozqui ninaca presužtakaz čhjelinčha. Wiñayjapa zumchiquiz chawctažtakaz žejlčha Yooz pajk pjalz tjuñicama.

⁷ Nižaza Sodoma wajtquiz žejlñinacami Gomorra wajtquiz žejlñinacami, nižaza žcatinta wajtquiz žejlñinacami jalla nii ana wal anjilanacažtapacha ancha uj paachičha. Ninacaqui adulteriuquiz ojklaychičha. Nižaza tsjemata adulterio paachičha. Jalla nižtiquiztan Yoozqui ninaca casticchičha, wiñaya infiernuquin. Jalla nuž kjanapacha chiichičha, Yoozqui ana walinaca casticspančha, jalla nii.

⁸ Jalla nii Yooz casticz puntu zizcumi, ana zuma tjaajiñi zoñinacaqui chjuužta jaru ojklayčha, “Yoozqui nižta wejtquiz tjaajinchičha, tsjii chjuužtiquiz” cjican. Nekztan adulteriuquiz ojklayčha, nižaza Yooz Jiliriž mantita anaž cassa, nižaza poderchiz zajranacžquiz ararčha. Jalla nuž chjuužta jaru anawali kamčha.

⁹ Tsjii pajk arcángel Miguel cjita žejlčha, walja poderchiz. Jalla nii anjilaqui diablužtan ch'aassičha Moisés curpu puntuquiztan. Jalla nuž ch'aascan, Miguel anjilaqui diablužquiz ana ararchičha; “Casticta cjee”, cjican. Antiz tiikaz chiichičha, “Yooz Jiliričha amquiz ujžla”. Jalla nižtakaz chiichičha.

¹⁰ Pero nii ančucatan kamni anawali zoñinacaqui ana intintazni kuzzizza. Poderchiz zajranacž quintra chiican, chjaawjkatčha. Animalažtakaz persun kuzcamakaz ojklayničha. Jalla nuž ojklaytiquiztan persunjapa casticu zjičha.

¹¹ Ninacžtaqui ana wali cjequiča. Cainž irata Yooz kamañquiz ana kamz pecča. Paaz ganz peccu, Balaam irata tsjii kjutni ojklayča. Nižaza Corež iratažtakazza casticu zjijča. Korequi Yooz uchta žoñinacž quintra paažcu ticziča.

¹² Ančhucqui Yooztajapa pjiistanaca paača. Ančucaž cristian pjiista paan, ninacaqui azipanča ančhucalta. Pjijstiquiz ancha anazuma lujlñi, nižaza licni, nižaza ana zuma kamniča. Ninacača Yooz ana rispitiñiqui. Persunjapakaz importiča. Anača yanapchuca, ančucaž zuma kamajo. Ninacaqui ana chijñichiz tsjirižtakazza, nižaza tjamiž chjichta tsjirižtakaz. Nižaza ninacaqui anazuma frutchiz muntinacažtakaz. Cajlžta muntinacažtakaz, žejtz wira anapan žejlča ninacžtaqui.

¹³ Tjamiž chjichta kjaz ljojkinacažtakazza. Ninacaž azzuca paatanacaqui kot anazum ch'utunacažtakazza. Nižaza ninacaqui tsjii kjutni pertissi warawaranacažtakazza. Anawal zumchiquiz wiñayjapa castictaž cjequiča. Casticta cjisjapa, nii anawal tjaa-jiñinacaqui chjojtača.

¹⁴ Tsjii žoñiqui Enoc cjitatača. Adanzquiztan pakallak wilita majchmajchquiztan tjonñitača. Jalla nii Enocqui Yooztajapa chiichiča tuž cjican: “Yooz JiliriQUI warank warank anjilanacžtan tjonaquiča, tjapa žoñinaca pjalzjapa.

¹⁵ Jalla nuž pjalžcan Yooz JiliriQUI tjapa anawal žoñinacž ujnaca tjeeznaquiča; tjapa ninacaž anawali paatanaca tjeeznaquiča. Nižaza Yoozqui tjapa niž quintra anawali chiitanaca tjeeznaquiča”. Jalla nuž mazinchiča Enoc cjitaqui.

¹⁶ Nii anawali žoñinacača quijakaz pecñinacaqui. Nižaza iñarcan chuchkaz pecñinaca; nižaza ninacaž kuz pecta jaru ojklayniča. Nižaza mitarazzi takunacžtan chiiñiča. Nižaza žoñinacž kuz wali cjisjapa chiiñiča, nii žoñinacžquiztan cusasanaca ganzjapa.

CRIICHI ŽOÑINACŽQUIZ CHIIZINTA TAKU

¹⁷⁻¹⁸ Pecta jilanaca, cullaquinaca, jalla tii puntuquiztanž cjuñzna. Učhum Jesucristo Jilirž apostolonacaqui ultim timpu puntuquiztan ančucaquiz mazinchiča, tuž cjican; “Ima tii muntu tucuzinznan, anawal žoñinacaqui jecznaquiča, Yooz kamañ puntunacž quintra chiican. Ninacaqui persun anawal pecta kamañ jaru kamaquiča”. Jalla nuž mazinchiča apostolonacaqui.

¹⁹ Jalla nižta anawali žoñinacaqui žoñi t'akniča, nižaza porapat quintra tanaskatniča. Yooz Espiritu SantuQUI ninacž kuzquiz ana žejlča. Ninacaqui persun kuzcamakaz kamča.

²⁰ Pecta jilanaca, cullaquinaca, Yooz puntunaca tjaa jintanacžquiz tjurt'iñi kuzziz cjee. Nižaza Espiritu Santuž aztan Yoozquin mayiza, juc'ant zuma kamañchizpan cjisjapa.

²¹ Nižaza zuma kama, Yooz ančhucatan tira zuma munazizjapa. Nižaza učhum Jesucristo Jilirž tjonz tjuñi tjewžna. Nii tjuñquiziqui JesucristuQUI niž okzñi kuzziz cjen arajpachquin Yooztan wiñaya kamñijapa ančucaquiz cjiskataquiča.

²² Turwayzi kuzziz žoñžquiz zumpacha paljaya, zuma tjaa jintanacžquiz tjurt'iñi kuzziz cjisjapa.

²³ Infiernuquin tjojtsnak cjenpacha kjawžna, livriita cjisjapa. Nižaza ujchiz žoñinacžquiz okzñi kuzziz cjee. Anawal žoñinacžquiz okžcan, persun kuzquiz cuitasaquiča, zuma kamañquiztan tsjii kjutni ana chjitchta cjisjapa. Ančhucqui ana zuma kamañchiz žoñinacžtan ojklaycan nižta ana zuma kamañchiz cjesača. Jalla nižtiquiztan anawal žoñinacžquiz okžcan, cuitasa ninacž irata ana cjisjapa.

²⁴⁻²⁵ Yoozqui zinta Yoozza. Niča Jesucristo Jilirž cjen učhum Liwriiñiqui. Niča ancha azzizqui, učhumnaca cuitizjapa, nižaza ančhuc ana ujquiz tjojtzjapa, nižaza niž yujcquiz ana ujchiz prisintizjapa. Jalla nekz, Yooz yujcquiz žejlcan, ančhucqui ancha cuntintuž cjequiča. Anztajapami wiñayajapami Yoozqui honorchizkaj cjila, nižaza niž arajpach watjaqui zumapaj cjila, nižaza tjapa azzizkaj cjila, nižaza tjapa mantiñej cjila. Jalla nužoj cjila. Amén.

APOCALIPSIS O REVELACION A SAN JUAN

¹ Yoozqui tii liwruquiz cjiirta puntunaca Jesucristužquiz mazinchiča, Jesucristo niž sirwiñi žoñinacžquiz maznajo. Tii puntunacaqui waji wataquiča. Jesucristuqui niž sirwiñi Juanžquin anjila cuchanžquichiča, tii liwruquiz cjiirtanaca zizta cjeajo.

² Wejr Juanqui tjapa nii zizta puntunacžquiztan cjiiruča, jaknužt wejr nii zizzinžlaja, jalla nužupan. Jaziqui Yooz takumi nižaza Jesucristuž maztami chiyuča. Nižaza tjapa weriž chertanacami chiyuča. Tjappacha werarapan cjiiruča.

³ Jakziltat žoñinacžquiz tii Yooziž tjaata takunaca ličhaja, jalla niiqui cuntintuž cjequiča. Nižaza jakziltat tii Yooziž tjaata takunaca nonžaja, nižaza niž jaru kamčhaja jalla niiqui zakaz cuntintuž cjequiča. Tii puntunaca cumplis timpunaca žcatžinžquiča.

JUANQUI ICLIZANACZQUIN CJIJRCHA

⁴ Wejr Juanqui pakallawk Asia yokquin žejlñi iclizanacquin cjiiruča. Yoozqui ančhucaquiz zumpachaj yanapt'ila, nižaza Yoozqui ančhucaquiz walikaj kamkatla. Yoozqui tuquitanpachami anzimi jaztanami wiñayjapa tirapan žejlča. Yooz mantiz julz yujcquiz pakallawk zuma ispiritunaca žejlča. Ninacaqui ančhuc walikaj kamkatla.

⁵ Nižaza Jesucristuqui ančhuc walikaj kamkatla. Jesucristuča ligitum chiiñiqui. Nižaza primir ticziquiztan jacatatchi žoñiča. Nižaza Jesucristupanča tjapa tii muntuquiz žejlñi mantiñi reynacžquiz mantiñiqui. Cristuqui učum ancha okziča. Nekztan učum ujnacquiztan ticziča. Jalla nuž ticžcu, učum liwriichiča, niž ljok tjawkchiž cjen.

⁶ Nekztan Jesucristuqui učum utchiča, nižtan chicapacha mantiñijapa, nižaza Yooz Ejpžquiz rispitiñijapa. Jalla nii Jesucristuqui wiñayjapa honorchiz cjila. Nižaza wiñayjapa mantiñej cjila. Jalla nužoj cjila. Amén.

⁷ Cjuñzna. Tsjii nooj Jesucristuqui tsjir taypiquiz tjonaquiča. Jalla nuž tjonan tjapa žoñinacaqui nii cheraquiča; Jesucristo quintra paañi žoñinacami nii zakaz cheraquiča. Nekztanaqui tjapa wajtchiz ana ciiñi žoñinacaqui kaaquiča, ninaca casticz ora tjonchiž cjen. Jalla nužoj cjila. Amén.

⁸ Yooz Jiliriqui tuž cjiča: “Wejrtča primirquiztan tjappacha kalltichintqui. Nižaza wejrtča tjappacha mantiñtqui. Jaknužt tsjii litraqui “A”quiztan kallantičhaja, nižaza “Z”quin žerzaja, jalla nižtitča wejrqui tjappachtajapa”. Jalla nuž cjiča tjapa aztan mantiñi Yooz Jiliriqui. Niiqui anzimi, tuquitanami, jaztanami žejlča.

⁹ Wejr Juanqui ančhucaquin cjiiržcuča. Wejrqui ančhuca jiltča, Jesucristužquin kuz tjaatiquiztanaqui. Učumqui Yooz mantuquiz kamchiz cjen, sufriča. Pero čjul sufritami žejlčhaja, Jesucristuqui učumnacquizimi pasinsis kuzziz cjiskatča. Wejrqui kot taypiquiz kolta yokquiz želuča, Patmos cjita tii yoka. Jalla ticju preso želuča, Yooz taku parlitiquiztan, nižaza Jesucristuž puntuquiztan maztiquiztan.

JESUCRISTUZ CERTA

¹⁰ Tsjii Yooz tjuñquiziqui Yooz Espiritu Santuqui wejt kuzquiz ancha tjonchiča. Tjonžcu jalla tii watchiča. Tsjii alto jora nonzinča wir kjutñi, trompetž pekz joražtakaz nonzinča.

¹¹ Nii joraqui tuž cjichiča:

–Wejrtča primirquiztan tjappacha kalltichintqui. Nižaza wejrtča tjappacha mantiñtqui. Jaknužt tsjii litraqui “A”quiztan kallantičhaja, nižaza “Z”quin žerzaja, jalla nižtitča wejrqui tjappachtajapaqui”. Jaknužt amqui cheračhaja, jalla nii chertanaca cjiira. Nekztan nii libro pakallawk iclizanacquin apaya, Efeso iclizquin, nižaza Esmirna

iclizquin, nižaza Pérgamo iclizquin, nižaza Tiatira iclizquin, nižaza Sardis iclizquin, nižaza Filadelfia iclizquin, nižaza Laodicea iclizquin. Jalla nii Asia cjita provinciquin žejlñi iclizanacquin nii cjiirtaqui apaya.

¹² Jalla nekztanaqui wir kjutñi kjutzinča cherzjapa, jectpan nižta paljayzqui, nuž cjican. Jalla nuž kjutžcu tsjii pakallawk kor cantilero cherzinča.

¹³ Nii cantiler taypiquiz tsjii žoñižtakaz tsijtchi želatča. Niiqui tol zquitchiztača, nižaza quecquiz tsjii pal kor sinturunchiztača.

¹⁴ Nižaza niiž ach charami chiwitača, chiw chomažtakaz, nižaza chiw kjatñižtakaz. Niiž čhujcquinacaqui ujžtakaz c'ajatča.

¹⁵ Niiž kjojchanacaqui zuma llijatča jurnuquiz tjiñanta korižtakaz. Niiž joraqui wacchi kjaz pujquiz kjawñižtakaztača.

¹⁶ Niiž žew kjarquiz pakallawk warawaranaca tanzitača. Niiž atquiztan pajk ar cuchillužtakaz ulnatča, porap kjuttan archiz. Niiž yujcqui zmali tjuñižtakaz c'ajatča.

¹⁷ Jalla nii cheržcu, niiž kjojchquiz tjojtsinča, ticzižtakaz. Niižti wejr lanziča žew kjaržtan. Jalla nuž lanžcu tuž cjichiča:

—Wejr ana eksna amqui. Primirquiztanpacha asta wiricama želuča. Wejrtča juc'ant chekanaqui tjappachquiztanami.

¹⁸ Wejrtča žetiñtqui. Wejrqui ticzinča. Pero wejtquiz cherzna. Wiñayjapa žetuča. Nižaza wejrqui mantuča ticzmi, nižaza ticz yokami.

¹⁹ Jaziqi cjiiraquiča jaknužum cherčhaja, jalla nii. Cjiiraquiča tii timpu watchinacami, nižaza jazta timpu tjonanami, nii.

²⁰ Wejt žew kjarquiz pakallawk warawaranaca žejlča. Jalla nii cherchamča, nižaza pakallawk cantilerunaca cherchamča. Ninaca tuž cjiča: nii pakallawk warawaranacaqui pakallawk iclizanacž irpiñinacača. Nii pakallawk cantilerunacaqui pakallawk iclizanacača.

2

EFESO ICLIZQUIZ CHIITA TAKUNACA

¹ Efeso icliz irpiñizquin tuž cjiira: “Tsjiiqui žew kjarquiz pakallawk warawara tanža, nižaza pakallawk kor cantiler taypiquiz ojklayča. Jalla niiqui tuž cjiča:

² Ančucaž paatanacami pajuča. Ančucqui wejttajapa anča langža. Nižaza sufrichiž cjenami ančucqui tjurt'iñi kuzzizza. Nižaza ančucqui ana zum kamañchiz žoñinaca ana cherz pecča. Nižaza jakziltat ‘apostultča wejrqui’ cjican ojklayčhaja, jalla ninaca wawczinčucča ančucqui, werara ana werara jalla nii. Jalla nižtiquiztan jecnacat ana werar apóstol ojklayčhaja, jalla nii zizzinčucča.

³ Wejrqui zizuča, ančucqui pasinsis kuztan sufriča, wejtquiz criican. Nižaza wejtquiz kuzziz cjen walja awantichinčucča. Nižaza wejttajapa walja langzinčucča, ana ocha nayžcu.

⁴ Pero tsjii ujchizza ančucqui. Jaknužt ančucqui primero tjapa kuz wejttan anča munazičhaja, jalla nižta ana tira munaziča. Anz wejttan upa munaziča.

⁵ Cjuñzna, jaknužt ančucqui primero anča zuma munaziñi kuzziz cjistčhaja. Nižaza cjuñzna jaknužt anziqi upa munaziñi kuzziz cjistčhaja. Jalla nii cjuñzcu, ‘ujchizpantča wejrqui’ cjis waquiziča. Nekztan wilta anča zuma munaziñi kuzziz cjee, wilta zuma kamzjapa. Ana wilta zuma munaziñi kuzziz cjequič žiiqui, am cantileruqui kjañtaž cjequiča; nekztan ančuca icliza tjatanta cjequiča.

⁶ Pero ančucaltajapa tsjii zuma obra žejlča, ančucqui ana wal nicolaítas parti žoñinacž quinrajapa chjaawjkatča, jalla nii. Wejrqui ninacž quinrajapa zakal chjaawjkatuča.

⁷ Jakziltat nonzñi cjuñchiz cječhaja, nonžla Espíritu Santuž iclizziz zoñinacžquiz chitaqui. Jakziltat anawalinacquiztan atipačhaja, jalla nižquiz wejrqui permiso tjaa-ača, žeti tjaañi muntiquiztan lulajo. Yooz zuma yokquin žejlča nii zuma muntiqui”.

ESMIRNA ICLIZQUIZ CHIITA TAKUNACA

⁸ Esmirna icliz irpiñizquin tuž cijra: “Tsjiiqui primirquiztanpacha wiricama žejlča. Jalla ničha juc'ant chekanaqui tjappachquiztanami. Niiqui ticziča, nižaza wilita žejtñi cjišičha. Jalla niiqui tuž cjiča:

⁹ Wejrqui zizuča, ančhucqui ancha sufričha, nižaza t'akjiri žejlča. Pero ricachužtakazza ančhucqui, Yooz wajtchiz zoñinacž cijcan. Judío zoñinacaqui ančuca quintra ancha anawal takunaca chiiča. Ninacaqui anača ultim werar judionacaqui. Ninacača Satanás diabluž partiquiziqui.

¹⁰ Jaknužt ančhucqui sufračhaja, nuž sufrisquiztan ana tsuca. Cwitasu, diabluqui yekjapanaca ančucaquiztan carsilquiz chawckataquiča, ančucaž ujquiz tjojskatzjapa. Ančhucqui tunca tjuñi intiru ancha sufraquiča. Ticzcama wejtquiz tjurt'iñi kuzziz cjee. Nekztanaqui wejrqui ančucaquiz wiñayjapa žeti tjaa-ača, tsjii premiužtakaz.

¹¹ Jakziltat nonzñi cjuñchiz cječhaja, jalla niiqui nonžla, Espíritu Santuž iclizziz zoñinacžquiz chitaqui. Jakziltat ana walinacquiztan atipačhaja, jalla niiqui infiernuquin castictiquiztan liwriitaž cjequiča. Infiernuquin casticzqui curpumi animumi wiñaya sufričha. ‘Pizc ticz’ cjitača nii infiernuquin sufrisqui”.

PERGAMO ICLIZQUIZ CHIITA TAKUNACA

¹² Pergamum icliz irpiñizquin tuž cijra: “Tsjiiqui porap kjuttan ar cuchillužtakaz žejlča. Jalla niiqui tuž cjiča:

¹³ Wejrqui pajuča, tjapa ančucaž paatami. Jakziquin Satanás diabluqui mantičhaja, jalla nicju ančhuc žejlča. Jalla nižta žejlchiz cjenami tirapanž wejtquiz tjurt'iñi kuzzizza. Wejtquin kuz tjaažqui ana jaytiča, ancha sufrichiž cjenami. Nii ancha sufris timpuquiz tsjiiqui ančucaquiztan Antipas cjitaqui contataquiča. Antipasqui wejt puntuquiztan tisticu cjicanaqui zuma ticlarñičha, nižaza wejtquiz kuz tjaañipanča. Jakziquin Satanás diabluqui mantičhaja, jalla nicju Antipas contataquiča.

¹⁴ Nonžna; tsjii kjaž ujnaca ančhucž quintra tjeeznuča. Yekjap ančucaquiztan anawal tjaa jintanaca catokchinčhucča. Nii tjaa jintanacaqui Balaamž cjita tjaa jintat takazza. Tuquita timpuqui nii Balaamqui Balak cjita zoñžquiz tjaažičha, jaknužt Israel zoñinaca ujquiz tjojskatchucažlaja, jalla nii. Nekztanaqui Balak cjitaqui Israel zoñinaca ujnacquiz tjojskatchičha. Jazi qui Israel zoñinacaqui adulterio paachiča, nižaza zoñiž paata yooznacquiz tjaa ta čhjeri lujlchiča. Jalla nižta ujnacquiz tjojskatchičha Balak cjitaqui.

¹⁵ Nižaza yekjap ančucaquiztan nicolaítas tjaa jintanaca catokchinčhucča. Ninacž tjaa jinta quintra japa chjaawjkatučha.

¹⁶ Ančucaž anawali ujnaca paatiquiztan ‘ujchizpantča’ cjis waquiziča; kuz campiiz waquiziča. Ujnacquiztan ana jaytaquiz niiqui, ančhucqui castictaž cjequiča. Wejrqui ančucaquiz wajilla tjonacha, ujchiznacž quintra paazjapa. Wejt atquiztan ulanñi ar cuchillžtan ninacž quintra paa-ača.

¹⁷ Jakziltat nonzñi cjuñchiz cječhaja, nonžla, Espíritu Santuž icliz zoñinacžquiz chitaqui. Jakziltat anawalinacquiztan atipačhaja, jalla nižquin ana pajta maná tjaa-ača, lujljzapa. Nižaza nižquin tsjii chiw maz tjaa-ača. Nižaza chiw mazquiz niž ew tjuu cijrtaž cjequiča. Nii ew tjuuqui ana jakziltami zizza, nii tanzñi zoñikaz zizaquiča”.

TIATIRA ICLIZQUIZ CHIITA TAKUNACA

¹⁸ Tiatira icliz irpiñizquin tuž cijra: “Tsjiiqui žejlča, ujžtakaz c'ajñi čhujcchiz, nižaza niž kojchanacaqui jurnuquiz tjiñanta korižtakazza. Jalla ničha Yooz Majchqui. Niiqui tuž cjiča:

¹⁹ Wejrqui ančhucaž paatanacami pajuča. Ančhucqui zuma munaziñi kuzzizza, nižaza wejtquiz tjapa kuztan criičha, nižaza wejtquiz tjapa kuztan sirwičha, nižaza pasinsis kuztan sufričha. Ančhucaž primir paata obranacquiztan ančhucaž anzta paata obranaca juc'ant zumačha.

²⁰ Wejrqui cjiwčha, tii ujchizza ančhucqui. Tsjaa anawal maataka žejlčha, Jezabel cjiti maatakažtakaz. Naaqui cjiñčha, 'Wejrtčha Yooz taku parliñtqui'. Jalla nuž cjican, wejtquiz sirwiñinacžquiz incallčha. Naaža incalltiquiztanaqui criichi žoñinacaqui adulteriuquiz ojklajčha; nižaza žoñiž paata yooznacquiz tjaata čherinaca lujlčha. Jalla nuž ana zuma tjaajnan, ančhucqui naaža puntuquiztan ana kjaž cjiñčhucčha. Pero nii anawal tjaajintaž quintra chiiz waquizičha.

²¹ Wejrqui pasinsis kuz tjewzinčha, naaqui 'ujchizpantčha' cjican ujnacquiztan jaytizjapa. Pero naaqui uj paaznacquiztan anapan jaytiz pecčha; uj paaz pecčha.

²² Jalla nižtiquiztan naa sufriskatačha. Nižaza jakziltat naatan chica wejt quintra ujnaca paačhaja, jalla ninacazakaz ancha sufriskatačha. Naaža tjaajinta anawalinaca paazquiztan ana jaytaquiž niiqui, panž sufriskattaž cjequičha.

²³ Naa irat ana zum kamañchiz žoñinaca conačha. Jalla nekztan tjapa iclizanacquiz žejlñi žoñinacaqui naaznaquičha, wejrqui čhjul žoñiž kuzquiz pinsitamí zizučha. Nižaza paata obranacquiztan jama zapa maynižquiz zumanacal tjaa-ačha.

²⁴⁻²⁵ Parti ančhuc Tiatir criichinacaqui naaža tjaajinta ana catokchinčhucčha. Satanás diabluž chjozaka tjaajintanaca ana mitisñi cjišsinčhucčha. Ančhucaquiz tuž cjiwčha, jaknužt ančhucqui wejt tjaajintanaca catokčhaja, jalla nižta tirapan catokaquičha, wejr tjonzcama. Ana iya mantučha.

²⁶ Jakziltat anawalinacquiztan atipčhaja, nižaza tii muntu tucuzinzcama wejt munañpi jarupanž kamčhaja, jalla nižquiz wejrqui mantiz poder tjaačha nacionanacchiz žoñinacžquiz mantizjapa.

²⁷ Jaknužt wejt Yooz Ejpqui mantiz poder wejtquiz tjaatčhaja, jalla nižta irata wejrqui mantiz poder ninacžquiz tjaa-ačha. Jalla nižtiquiztan ninacaqui anawali paañi žoñinacžquiz zuma c'aripacha mantaquičha, tsjii ljoc mazca t'unapacha kjolsnas, jalla nižta.

²⁸ Nižaza wejrqui ninacžquiz zumanacal tjaa-ačha wenzta chawc warawaražtakaz.

²⁹ Jakziltat nonžñi cjuñchizlaja, jalla niiqui nonžla, Espíritu Santuž icliz žoñinacžquiz chiitaqui”.

3

SARDIS ICLIZQUIN CHIITA TAKUNACA

¹ Sardis icliz irpiñižquin tuž cijra: “Tsjiižta pakallawk Yooz ispiritunaca žejlčha, nižaza pakallawk warawaranaca žejlčha. Jalla niiqui tuž cjičha: Ančhucaž paata obranaca pajuča. Žoñinacaqui ančhuca puntuquiztan cjiñičha, 'Zuma kamañchizza' cjiñičha. Jalla nuž chiichiž cjenami, ultimu ana zum kamañchizza; ticzižtakazza ančhucqui.

² Ančhucqui ana zuma kamañanaca eca. Zuma kamañquiz tjurt'iñi kuzziz cjee. Tira anawali kamañchizlaj niiqui, castictaž cjequičha. Wejrqui ančhuca paata obranaca yatisinzinčha, Yooz yujcquiz anawaličha, nii.

³ Cjuñzna ančhucqui, tuqui catokta tjaajintanacami, nižaza nonztanacami panž catoka. Jaziqui nii jaru wilta zumapan kama; nižaza ančhuca ujnaca paaznacquiztan jayta, 'ujchizpantčha', cjican. Ančhucqui ana zuma kamañquiztan ana ecaquiž niiqui, castictaž cjequičha. Wejrqui tiripintit tjonácha, tsjii tjañižtakaz. Ana pinsita orquiz tjonácha, ančhuc casticzjapa.

⁴ Tsjii kjaž ančhuc Sardis žoñinacaqui zuma kamañchizza. Ančhucčha zuma ana ch'izlli zquitchiztakazqui. Jalla nižtiquiztan ančhuc zuma žoñinacaqui wejtta chicaž

juc'ant zuma kamaquiča zuma chiw limpu zquitchiztakaz. Jalla nuž waquiziča ančhucaltaqui.

⁵ Jakziltat anawalinacquiztan atipačhaja, jalla ninacaqui zuma kamañchiz cjequiča zuma chiw limpu zquitchiztakaz. Nižaza ninacž tjuunaca anal akznača žejtñi žoñinacž tjuu apuntita liwruquiztan. Nižaza wejt Yooz Ejpž yujcquiz, nižaza Yooz anjilanacž yujcquiz ninacž puntuquiztan ticlarača, ‘Wejt partiquizza tinacaqui’ cjicanaqui.

⁶ Jakziltažlaja nonžni cjuñchiz, nonžla, Espiritu Santuž icliz žoñinacžquiz chiitaqui”.

FILADELFIA ICLIZQUIZ CHIITA TAKUNACA

⁷ Filadelfia icliz irpiñizquin cijira: “Tsjiiča juc'ant zumaqui; nižaza lijitumača. Niiča David jilirž mantiz poderchizqui. Nii žoñiqui Yooz partiquiz luzkatasaz niiqui, anaž jecmi nii žoñiž luztiquiz atajasača. Nižaza Yooz partiquiz ana luzkatasaz niiqui, anaž jecmi luzkatasacha. Jalla niiqui tuž cjiča.

⁸ Wejrqui ančhucaž paata obranaca pajuča. Ančhucaltajapa trabajo tjaachinča wejtta langzjapa. Anaž jecmi ančhuc atajasača. Ančhucqui ana suti azzizza. Jalla nuž ana zuti azziz cjenami, ančhucqui wejt taku tirapanž catokchinčhucča, nižaza ančhucqui wejt puntuquiztan ana k'otchinčhucča, ‘Jesucristo anal pajuča’ cjicanaqui.

⁹ Nonžna. Yekjap žoñinacaqui cjiñiča, ‘Wejrñactča Yooztajapa judío žoñinacaqui’. Jalla nuž chiican, k'otča. Ultimu ana Yooztajapača nii žoñinacaqui. Pero Satanás diabluz partiquiz kamñi žoñinacača. Nonžna. Wejrqui ančhuca yujcquiz ninaca quillskatača, ančhucaquiz rispitzjapa. Nižaza wejrqui ninaca zizkatača, ančhucatan wejtta zuma munaziz, jalla nii.

¹⁰ Wejt mantita ortin jaru kamcan, ančhucqui pasinsis kuztan sufrichinčhucča. Jalla nižtiquiztan wejrqui ančhuc liwriyača juc'ant sufris timpuquiztanaqui. Nii timpuqui tjonaciča. Nekztan tjapa tii muntuquiz žejlñi žoñinacaqui ancha sufraciča, wawczta cjisjapa. Jalla nii sufris timpuquiztan ančhuc liwriyača.

¹¹ Nižaza wejrqui wajillal tjonaca. Yooz tjaajintanaca tirapan catokaquiča. Nekztan Yoozqui ančhucaquiz zumanaca tjaacquiča, tsjii zuma premiužtakaz. Ančhucqui ana jec žoñžquizimi tsjii kjutñi irpiskataquiča nii zumanaca ana pertisnajo.

¹² Jakziltat anawalinacquiztan atipačhaja, jalla nižquiz uchača Yooz kjuyquiz jilirižtakaz. Nižaza nii žoñinacaqui Yooz kjuychizpan cjequiča. Wejt Yooz Ejpž tjuu nižquiz cijjržinača, Yooz kjuychiz žoñipan tjeezjapa. Nižaza wejt Yooz Ejpž wajtž tjuu nižquiz cijjržinača. Wejt Yooz Ejpž wajtž tjuuqui ew Jerusalén cjiča. Yoozqui arajpachquiztan nii watja chjijunžcaquiča. Nižaza wejt ew tjuu nižquiz cijjržinača, wejt jila cjan.

¹³ Jakziltažlaj nonžni cjuñchiz niiqui, nonžla, Espiritu Santuž icliz žoñinacžquiz chiitaqui”.

LAODICEA ICLIZQUIN CHIITA TAKUNACA

¹⁴ Laodicea icliz irpiñizquin tuž cijira: “Tsjiiča juc'ant lijitumaqui. Jalla niiqui zuma razunžtanpan lijituma chiiča Yooz puntu. Primirquiztanpacha niž cjen tjapa Yooz paatanaca paatatača. Jalla niiqui tuž cjiča:

¹⁵ Wejrqui ančhucaž paata obranaca pajuča. Ančhucqui ana ancha wejt quintra paachinčhucča, nižaza ana ancha wejtajapa paachinčhucča. Wejrqui pecuča, ančhucqui ancha wejt quintra paazjapa, už ancha wejtajapa paazjapa, jalla nuž pecuča.

¹⁶ Jaziqui ana zumača ančhuca kamzqui. Jalla nižta kamtiquiztan ančhuc chatkatasacha, tsjii ana zuma jottažokaz.

¹⁷ Ančhucqui cjiñchucča, ‘Ricachutča wejrñacqui. Jaziqui walikal želuča, ana chjulumi pecuča’. Jalla nuž cjiñchucča. Jalla nuž chiichiž cjenami ančhucqui ana

naazinčhucča, t'akjirižtakaz ančhucqui, nižaza poriztakaz, zur žoñinacažtakaz, nižaza ana zquitchiz žoñinacžtakazza. Ultimu nižta kamañchizza ančhucqui.

¹⁸ Jalla nižtiquiztan wejrqui ančhucaquiz chiižinuča, wejtquiz kuzziz cjeajo. Ujquiz tjiñanta korižtakaz jalla nižta c'achja kamaña ančhucqui wejtquiztan mayz waquiziča, ultim ricachu cjisjapa. Nižaza chiw zquitinacažtakaz jalla nižta zuma kamaña wejtquiztan mayz waquiziča, ančhuca azzuca ujnaca ana cherta cjisjapa. Nižaza čhjujč kullažtakaz wejtquiztan mayz waquiziča, ančhuca ujnacquiztan čhjetinta cjisjapa, nižaza ančhuc Yooz puntu intintiñi cjisjapa.

¹⁹ Jakziltižtan wejrqui zuma munazičhaja, jalla niižquiz chiižinača. Nižaza zuma ewjt'uča, niiž kamaña azquichta cjeajo. Jalla nižtiquiztan weriž chiižintiquiztan, ančhucqui 'ujchizpantča' cjis waquiziča. Nižaza wejtquiz tjapa kuztan cjis waquiziča.

²⁰ Nonžna. Wejrqui ančhuca kuzquiz macjatžcu, kjawznuča. Jakziltat weriž kjawžta nonžaja, nižaza cazaja, jalla ninacž kuzquiz luzasača, nižaza ninacžtan chica zuma cjeeča. Nižaza ninacaqui wejtta chica zuma cjequiča.

²¹ Jakziltat anawalinacquiztan atipačhaja, jalla niižquiz zuma honora tjaa-ača, wejtta chica mantiñi cjisjapa. Jaknužt wejrqui tjapa anawalinacquiztan atipžcu, wejt Yooz Ejpžtan chica mantiñi cjissaja, jalla nižta ninacaqui wejtta chica mantiñi cjequiča.

²² Jakziltažlaja nonžñi cjuñchiz, jalla niiqui nonžla, Espiritu Santuž icliz žoñinacžquiz chiitaqui”.

4

ARAJPACHQUIN CHERTANACA

¹ Jalla nekztanaqui wejrqui tsewc kjutñi cherchinča. Arajpachquin tsjii zana cjetzi, cherchinča. Nižaza tsjii jora nonzinča, trompet pekz joražtakaz. Jaknužt primero nonžta jora, jalla nižta irata. Nii joraqui wejtquiz paljaychiča, tuž cjican:

—Tekz tjonžca. Wejrqui amquiz tjeznača, jaknužt nekztan watačhaja, jalla nii.

² Nii orapacha wejrqui Espiritu Santuž mantiz poderquiz želatuča. Jalla nuž žejlcan, arajpachquin tsjii chawc mantiz julz cherchinča. Nižaza nii julzquiz tsjii julzi želatča.

³ Nii julzi žejlñi žoñitača c'achja tsijtchiz, c'achja maznacažtakaz c'ajatča, jaspe cornalina nižta maznacažtakaz. Nižaza niiž mantiz julz muytata cumari arco iris cherchinča, esmeralda maztakaz c'ajatča.

⁴ Jalla nii chawc mantiz julz muytata paatunc pusin mantiz puestunaca cherchinča, zapa puestuquiz tsjii žoñi julzi želatča. Nižaza ninacatača chiw tol zquiti cutchi; nižaza ninacž achquiz kor pillužtakaz tewžinta.

⁵ Nii chawc mantiz julzquiztan liwjliwjñižtakaz ulanchiča, nižaza nii julzquiztan rayu jorjorñižtakaz joranaca nonzinča. Nii chawc mantiz julz yujcquiz pakallak ujñi teyas pekžtatača. Nii pakallak teyasnacaqui pakallak Yooz ispiritunacača.

⁶ Nižaza nii chawc mantiz julz yujcquiz kota želatča, ispijužtakaz c'ajatča.

Nižaza nii chawc mantiz julz muytata pajkpic latuquiztan pajkpic žejtñinaca želatča. Jalla nii žejtñinacaqui yujcquiztan tajquiztan tama čhjujčquinacchiztača.

⁷ Nii primir žejtñiqui león animalažtakaztača. Tsjii žejtñižti wac turužtakaztača. Tsjii žejtñižti žoñž yujcchiztača. Tsjii žejtñižti layñi aquilažtakaztača.

⁸ Nii pajkpic žejtñinacaqui zapa mayni sojta wežlaž kjaražtakaztača, nižaza tjapa kjuttan čhjujčquinacchiztača. Majiñami weenami tirapan Yooz wirzu tuž itscan želatča:

“Juc'ant zuma, juc'ant zuma, juc'ant zuma, Jalla nižtapanča tjapa azziz Yooz Jiliriqui.

Yooz Jiliriqui tuquitanami, anzimi, jaztanami žejlča”.

Jalla nuž itsiča.

⁹ Nii žejtñinacaqui chawc mantiz julzquiz julzita mantiñizquiz honora tjaachiča, nižaza nižquiz rispitchiča, nižaza nižquiz gracias tjaachiča. Wiñayjapača nii chawc mantiñiqui.

¹⁰ Chjulorat žejtñinacaqui nižta paatčhaja, nekztan nii paatunc pusin jilirinacaqui mantiñiz yujcquiz quillziča, nižaza nižquiz rispitchiča. Nii chawc mantiz julzñiqui wiñayjapa wiñayača. Jalla niž yujcquiz nii tuncapan pusin jilirinacaqui ninacž kor pillužtakaz nonžinchiča, tuž itsñi cjican:

¹¹ “Učhum Yooz Jiliri, amqui honorchizkaj cjila. Nižaza amqui rispittaj cjila. Nižaza amča tjapa azzizqui. Jalla nii pajtaj cjila. Amqui tjapa žejlñinaca paachamča. Amiž munaña jaru tjapa žejlñinacaqui paatatača, nižaza žejlča”.

5

TJUUZTA LIWRU CJETÑIQUI

¹ Nižaza nii julzi žejlñi mantiñiz žew kjarquiz tsjii liwru tjuužta želatča. Nii tjuužta liwruqui porap latu cjižrtatača. Nižaza nii liwruqui pakallak estampillžtan zcatžtatača. Jalla nuž cherchinča.

² Nekztanaqui cherchinča, tsjii walja azziz anjila. Jalla nii anjilaqui altu joržtan pewcznatča, tuž cjican:

—¿Jequit waquizas tii tjuužta liwru cjetzjapa? ¿Nižaza tii zcatžta estampillanaca wjajrznas? —Jalla nuž pewcznatča.

³ Arajpachquinami tii muntuquizimi, tii muntu koztanami anaž jecmi cjetz waquiziča, nii liwruquiz cjižrtanaca chertzjapa.

⁴ Jalla nuž cjetz waquiziñi ana žejlchiz cjen, wejrqui kaacan ancha llaquizatuča.

⁵ Jalla nekztanaqui tsjii jiliri qui wejtquiz paljaychiča, tuž cjican:

—Ana iya kaa. Tsjiiqui nii tjuužta liwru cjetñi waquizichiča. Niiqui Judá cjita žoñiz majchmaatiquiztan tjonñiča. Juc'ant azziz cjen, León cjitača. Nižaza niiqui Davidž majchmaatiquiztan tjonñiča. Jalla niiqui tjappacha atipchiž cjen nii liwru cjetz waquiziča, nižaza nii liwruž estampillanaca wjajržni.

⁶ Nekztanaqui tižtanaca cherchinča. Nii chawc mantiz julžtan, nii žejtñinacžtan, nii jilirinacžtan, jalla ninacž taypiquiz tsjii Uuzažtakaz tsijtchi cherchinča. Wilana jawkta Uuzažtakaz, jalla nii cherchinča. Nižaza nii Uuzaqui pakallak wajranacchiztača, nižaza pakallak čhujcquinacchiztača. Niiž pakallak čhujcquinacaqui pakallak Yooz ispiritunacča. Jalla nii Yooz ispiritunacaqui tjapa kjutñi tii muntuquiz cuchantača.

⁷ Jalla nii Uuzaqui tjuužta liwru tanziča, julzi mantiñiz žew kjarquiztan.

⁸ Nii liwru tanžtan nii pajkpic žejtñinacami nižaza nii paatunc pusin jilirinacami nii Uuzažtakaz chawc jilirž yujcquiz quillziča. Zapa mayni nii jilirinacaqui pajk guitaražtakaz arpa cjita tanzitača. Nižaza kor chuwanača chjichatča insinsuchiz chjiipi. Nii insinsuchiz chuwanačuqui Yoozquin criichinacž oracionanaca cjetča.

⁹ Ninacaqui ew wirsu itsatča, tuž cjican:

“Amqui waquizichamča nii tjuužta liwru cjetñijapa, nižaza nii liwruquiz zcatžta estampilla wjajržnijapa. Amqui contatača. Ticziž cjen am ljokžtan Yooztajapa sirwiñi žoñinaca liwriičamča. Amiž liwriita žoñinacača tjapa zarchiz žoñinacami, nižaza tjapaman takunacchiz žoñinacami, nižaza tjapaman watjanacchizimi, nižaza tjapaman nacionacchizimi.

¹⁰ Amqui amiž liwriita žoñinaca mantiñijapa utchamča. Nižaza amqui nii žoñinaca Yooztajapa sirwiñijapa utchamča, Amiž liwriita žoñinacaqui tii yokquiz mantaquiča”. Jalla nuž cjichiča nii itsñinacaqui.

¹¹ Jalla nekztanaqui nonzinča wacchi anjilanacž jora. Nižaza cherchinča mantiz julz muytata, nižaza žejtñinacž muytata, nižaza jilirinacž muytata, jalla ninacž muytata muzpa waranka waranka waranka anjilanaca želatča.

¹² Nii anjilanacaqui altu joržtan cjichiča:

“Nii conta Uzaqui waquiziča, mantiz poder tanzjapa, nižaza tjapa zuma cusasanaca tanzjapa, nižaza tjapa zizjapa, nižaza tjapa azziz cjisjapa. Nižaza nii waquiziča honora tanzjapa, nižaza rispitta cjisjapa, nižaza honora waytižinta cjisjapa. Jalla nužoj cjila. Nuž waquiziča nii conta Uzaqui”.

¹³ Nekztan tjapa arajpachquin žejlñinacžtan, nižaza tjapa tii muntuquiz žejlñinacžtan, nižaza tjapa tii yok koztan žejlñinacžtan, nižaza tjapa kotquiz žejlñinacžtan, jalla nuž tjappacha niž puntu cjichiča:

“Nii chawc mantižquizimi nii Uuzižquizimi wiñayjapa honora waytižintaj cjila; nižaza nii pucultižquiz wiñayjapa honorchiz cjila; nižaza wiñayjapa rispittaj cjila; nižaza tjapa azziz cjila watay wata”.

¹⁴ Nekztan nii pajkpic žejtñinacaqui cjetča:

—Jalla nužoj cjila. Amén.

Nižaza nii paatunc pusin jilirinacaqui quillžcu nii watay wata žejtñižquiz rispitchiča.

6

ESTAMPILLANACA WJAJRTA CHERCHINCHA

¹ Nekztanaqui wejrqui cherchinča, jalla tužu: Uzažtakaz žoñiqui tsjii estampilla wjajrziča. Nižaza nonzinča tsjii žejtñiqui jorjorñižtakaz joržtan kjawchiča:

—Pichay. Cheržca.

² Nekztan wejrqui cherchinča, jalla tužu: Tsjii chiw cawallu tjonchiča. Nii cawallž juntuñ yawchi žoñiqui flech arcu armichiz tanchiča. Niižquiz tsjii atipz poder tjaatača, tsjii coronažtakaz. Jalla nižtiquiztan atipñi ulanchiča, tirapan atipzjapa.

³ Nekztanaqui nii Uzažtakazqui segunda estampilla wjajrziča. Jalla nuž wjajrtan, segundo žejtñiqui cjichiča:

—Pichay. Cheržca.

⁴ Nekztan yekja cawalluqui ulanchiča, ljok cawallu. Nii cawallž juñtun yawchi žoñiqui poder tjaatača, žoñinacpora kichanasjapa, nižaza porapat conasjapa. Niižquiz tsjii pajk cuchillu tjaatača.

⁵ Nekztanaqui nii Uzažtakazqui tercer estampilla wjajrziča. Jalla nuž wjajrtan, nonzinča tercer žejtñiqui tuž cjican:

—Pichay. Cheržca.

Nekztan cherchinča tsok cawallu. Nižaza nii cawallž juñtun yawchi žoñiqui balanci-chiztača niž kjarquiz.

⁶ Nekztanaqui žejtñinacž taypiquiz tsjii jora nonzinča. Nii joraqui tuž cjichiča:

—Pajk paaztan tsjii kilo trigo kjayasača. Nižaza pajk paaztan čjep kilo siwatu kjayasača. Aceitimi vinumi tira želaquiča.

⁷ Nekztanaqui nii Uzažtakazqui cuarto estampilla wjajrziča. Jalla nuž wjajrtan nonzinča cuarto žejtñiqui tuž cjican:

—Pichay. Cheržca.

⁸ Jalla nekztanaqui wejrqui cherchinča, tsjii k'ill cawallu želatča, yawchi žoñchiz. Jalla nii yawchi žoñiqui Ticz cjitatača. Niiž wiruñ Ticz Yoka cjita apziča. Ninacžquiz poder tjaatača, cuarta parte tii muntuquiz žejlñi žoñinaca conzjapa. Ninacaqui žoñinaca conaquiča pajk cuchillžtan, mach'anacžtan, conanacžtan, nižaza anawal animalanacžtan.

⁹ Jalla nekztanaqui nii Uzažtakazqui quinta estampilla wjajrziča. Jalla nuž wjajrtan wejrqui cherchinča arajpach altarž koztan almanaca želatča. Nii almanacž curpunacaqui Yooz taku parlitiquiztan contatača. Ninacaqui tii muntuquiz kamcan Yooz puntu ticlarchiča. Jalla nižtiquiztan contatača.

¹⁰ Nii almanacaqui altu joržtan kjawcan tuž cjichiča:

—Zuma lijitum Jiliri. Ampanča taku cumpliñiqui. Jaziqui ¿chjulorcamat žoñinaca pjalznaquiya? ¿Chjulorcamat wejrnac conñi žoñinaca casticaquiya? —Jalla nuž cjichiča nii almanacaqui.

¹¹ Jalla nekztanaqui almanacaqui chiw tol zquiti tjaatača. Nižaza ninacžquiz cjitača, tsjii kjaž tjuñikaz jeejnaquiča. Primiruqui iya Cristužquiz sirwiñinacaqui conta cjistanča, jaknužt tuquiqui almanacž curpunaca contažlaja, jalla nižta. Nii contanaca pjojkcama, almanacaqui jeejnaquiča.

¹² Jalla nekztanaqui nii Uuzažtakazqui sexta estampilla wjajrziča. Jalla nuž wjajrtan, wejrqui cherchinča, yoka ancha chekjinskatatča. Nižaza tjuñimi tsokchi cjissiča, lut zquitižtakaz. Nižaza jizmi ljok cjissiča.

¹³ Nižaza warawaranacami yokquin tjojtquichiča, jaknužt pjursant tjami qui higo frutanaca tjojtskatčaja, jalla nižta.

¹⁴ Nekztanaqui pachaqui katchiča tjuužta papilažtakaz. Nižaza tii muntuquiz tjapa curunacami tjapa kot taypiqueiz žejlñi yokanacami kizkattatača.

¹⁵ Nekztanaqui tii muntuquiz mantiñinacami, jilirinacami, zultatž jilirinacami, ricachunacami, azziz žoñinacami, mantita žoñinacami, ana mantita žoñinacami, tjappacha chjojziča pajk maz pjetanacquizimi, nižaza cur akjinacquizimi.

¹⁶ Jalla ninacaqui kjawchiča, tuž cjican:

—Curunaca, maznaca, wejtnaca juntuñ tjojtca. Wejrnac chjojzna, julzi mantiñiž yujcquiztan. Nižaza wejrnac chjojzna nii žawjchi Uuzažtakazquiztan, ana casticta cjisjapa.

¹⁷ Ultim casticz tjuñi tjonča. ¿Ject Yoozquiztan atipas? —Jalla nuž kjawchiča ninacaqui.

7

144,000 ZOÑINACA CHIMPUTA

¹ Jalla nekztanaqui wejrqui cherchinča, pajkpic anjilanacaqui tii muntuž pajkpic latuquiztan tsijtsi želatča. Jalla nuž žejlcan pajkpic puntu tjaminacaqui atajatča, ana zinta tjamzjapa yokquizimi kotquizimi muntinacquizimi.

² Nekztanaqui tsjii anjila cherchinča, tuwanchuctan tjonñi. Nii anjilaqui žejtñi Yooz mantita ortinžtan tjonchiča. Jalla nižtiquiztan nii anjilaqui altu joržtan kjawcan paljaychiča pajkpic anjilanacžquiz. Nii pajkpic anjilanacaqui poder tjaatatača, yokami kotami anawali cjiskatzjapa.

³ Jalla nižtiquiztan nii Yooz tjaata ortinžtan anjilaqui ninacžquiz cjichiča:

—Yokami, kotami, muntinacami ana anawali cjiskata, učum Yooz sirwiñinaca chimputa cjisjapa. Yooz sirwiñinacaqui ninacž yujc ayquiz chimputa cjequiča.

⁴ Nekztanaqui nonzinča patac pusi tuncan pusin waranka žoñinaca chimputatača, tjapa Israelž familianacquiztan.

⁵ Tuncapan waranka Judáz familiaquiztan chimputatača. Tuncapan waranka Rubénž familiaquiztan chimputatača. Tuncapan waranka Gadž familiaquiztan chimputatača.

⁶ Tuncapan waranka Aserž familiaquiztan chimputatača. Tuncapan waranka Neftalíž familiaquiztan chimputatača. Tuncapan waranka Manasés familiaquiztan chimputatača.

⁷ Tuncapan waranka Simeónž familiaquiztan chimputatača. Tuncapan waranka Levíž familiaquiztan chimputatača. Tuncapan waranka Isacarž familiaquiztan chimputatača.

⁸ Tuncapan waranka Zabulónz familiaquiztan chimputatača. Tuncapan waranka Joséz familiaquiztan chimputatača. Tuncapan waranka Benjamínz familiaquiztan chimputatača.

CHIW ZQUITCHIZ ZOÑINACA

⁹ Jalla nekztanaqui cherchinča, muzpa tama zoñinacaqui chawc mantiz puesto yujcquizimi, nažaza Uuzažtakaz zoñz yujcquizimi želatča. Nii zoñinacaqui tjapa nacionanacquiztantača, nižaza tjapaman zarchiz zoñinaczquiztantača, nižaza tjapaman watjanacquiztantača, nižaza tjapaman takunacchiz zoñinaczquiztantača. Muzpa tamatača, jalla nižtiquiztan ana wira kanchucatača. Jalla nii zoñinacaqui chiw tol zquti cutchicamatača. Nižaza ninacz kjarquiz munti itzanaca tanziča, čhjanžtanpacha.

¹⁰ Jalla nii zoñinacaqui altu joržtan tuž chiyatča:

“Učhum Yoozkazza Liwriñiqui. Niiča chawc mantiz puestuquiz julžñiqui. Nižaza nii Uuzažtakaz zoñizakazza Liwriñiqui”.

¹¹ Nižaza chawc mantiz puestu muytatami, jilirnacz muytatami, pajkpic žejtñinacz muytatami, jalla ninacz muytata tjapa anjilanacaqui tsijtchi želatča. Ninaca zakaz chawc mantiz puestuž yujcquiz yokquiz puct'ichi Yooz rispitatča.

¹² Nii anjilanacaqui Yooz rispitan tuž cjichiča:

“Jalla nužoj cjila. Učhum Yooztajapa watay wata honora waytižintaj cjila, nižaza wiñaya rispittaj cjila. Učhum Yoozza zizñi zizñipanqui. Niižquiz wiñaya gracias cjila. Nižaza niižquiz honora waytižintaj cjila. Učhum Yoozqui wiñayjapa tjapa azziz cjila, nizaza poderchiz. Jalla nužoj cjila. Amén”.

¹³ Jalla nekztanaqui tsjii jiliričiqui wejr pewcziča, tuž cjican:

—¿Jecnacat tii chiw zquti cujtchinacaya? Nižaza ¿jakziquiztan tjonchi ninacataya?

¹⁴ Wejrqui niižquiz kjaazinča, tuž cjican:

—Jiliri, anal zizuča.

Nekztan niiqui cjichiča:

—Tinacaqui juc'ant sufris timpu watchiča. Nižaza tinacaqui ujnacquiztan liwri-itača, Jesucristo Uuzažtakaz cjen. Cristuž ticziž cjen, jalla nižtiquiztan tinacaqui chiw ajunta zquitčizza.

¹⁵ Jalla nižtiquiztan tinacaqui Yooz mantiz puestu yujcquiz žejlča. Tinacača majiñami weenami Yooz kjuyquiz sirwiñinacaqui. Nižaza nii chawc mantiz puestuquiz julžñiqui tinaca cwitaquiča. Niižtan tinacztan watay wata chica želaquiča.

¹⁶ Tinacaqui ana iya čhjeri eeskataquiča, nižaza anaž iya kjaz kjara pasnaquiča. Nižaza sii kjakimi ana tinaca laacjiskataquiča, nižaza čhjul kjakimi.

¹⁷ Jesucristuča mantiz puestu žcatipacha žejlñiqui. Jalla nii Uuzažtakaz Jesucristuqui tinacz awatiri cjequiča. Nižaza Jesucristuqui tinaczquiz zuma kamañchizpan ir-paquiča, jaknužt zuma awatiričiqui niiž uuzanaca zuma jalzurquiz kjaz liquinčhaja, jalla nižta. Nižaza Yoozpacha tjapa tinacz kaaj chjujžinaquiča.

8

SEPTIMA ESTAMPILLA WJAJRTA

¹ Jalla nekztanaqui Uuzažtakaz Cristuqui séptima estampilla wjajrziča. Jalla nuž wjajrtan, tsjii media ora tjapa ch'uju žejlčiča arajpachquin.

² Nekztan cherchinča, pakallawk anjilanaca želatča. Nii anjilanacaqui Yooz yujc-quiz tsijtñitača. Jalla ninaczquiz pakallawk trompet pekz tjaatatača.

³ Nekztanaqui tsjii anjilaqui tjonžcu, altar yujcquiz tsijtsičha, tsjii kor insin-sarchiz. Jalla nekztanaqui nižquiz wacchi insinsunaca tjaatatača, criichinacž oracionanacžtan t'ajzjapa. T'ajža insinsužtan oracionanacžtan kor altarquiz nonžtatača chawc mantiz puestu yujcquiz.

⁴ Nii Yooz anjilž kjarquiztan criichinacž oracionanacžtan insinsužtan t'ajža žketi waytichiča Yooz yujcquiz.

⁵ Jalla nekztanaqui nii anjilaqui insinsaru tanžcu, altarquiz uj parazižtan chji-jpziča. Nekztan nii uj parazižtan chjijpi insinsaru tii muntu yokquiz tjojtchiča. Jalla nižtiquiztan ancha pjursanti liwjliwjchiča, nižaza ancha pjursanti jorjorchiča, nižaza yoka chekjinchiča.

TROMPETCHIZ ANJILANACA

⁶ Jalla nuž watžcu pakallawk trompetchiz anjilanacaqui tjacziča trompetanaca tjawunzjapa.

⁷ Primir anjilaqui niž trompet pekz tjawunchiča. Jalla nuž tjawunžcu caranuz chijnižtan ujžtan, nižaza ljokžtan t'ajža tii muntu yokquiz cutzinchiča. Jalla nižtiquiztan tercer parti tii muntu yoka ujsiča, nižaza tercer parti muntinaca ujsiča, nižaza tercer parti pastunacami ujsiča.

⁸ Nekztan segundo anjilaqui trompet pekz tjawunchiča. Jalla nuž tjawunžcu uj peksi pajk curužtakaz pajk kotquin tjojtchiča. Nekztanaqui tercer parti kot kjazqui ljok cjišičha.

⁹ Nekztan tercer parti kotquiz žejlñi animalanacaqui ticziča, nižaza tercer parti kotquiz ojklayñi warcunacaqui akžtatača.

¹⁰ Tercer anjilaqui trompet peks tjawunchiča. Jalla nuž tjawunžcu pajk warawara arajpachquiztan tjojtsičha, uj peksi teyažtakaz. Nii warawaraqui tjojtsičha tercer parti pujunacquizimi, nižaza tercer parti tujnacquizimi nižaza wijiñanacquizimi.

¹¹ Nii warawaraž tjuuqui Ajenjo cjitača. Ajenjo cjitača tsjii jar muntiqui. Jalla nii warawaraž tjojtiquiztan tercer parti kjazqui ajenjožtakaz jaru cjišičha. Nii jar kjaz cjen walja žoñinacaqui ticziča.

¹² Cuarto anjilaqui trompet pekz tjawunchiča. Jalla nii tjawunžcu tercer parti tjuñimi jiizmi warawarami zumchi cjišičha. Nekztanaqui tercer parti majiñaqui ana kjančiča, nižaza tercer parti weenami ana kjančizakazza.

¹³ Jalla nekztanaqui wejrqui cherchinča, nižaza nonzinča, tsjii anjilaqui tseewc arajpach taypiquiz laycan altu joržtan chiichiča, tuž cjican:

—Muntu yokquiz žejlñi žoñinacžtajapa ana wali, ana wali, ana wali cjisnaquiča. Chjep parti anjilanacaqui trompet pekz tjawunzmayača. Jalla ninacaž tjawnan juc'ant ana wali cjisnaquiča.

9

QUINTO ANJILAQUI

¹ Jalla nekztanaqui quinto anjilaqui trompet pekz tjawunchiča. Jalla nuž tjawun-tiquiztan tsjii warawaražtakaz cherchinča arajpachquiztan tii yokquiz tjojtsi. Jalla nii warawaražta anawal jiliržquiz poder tjaatača, anawal koz tuj cjetzjapa.

² Jalla nekztanaqui nii anawal jiliriQUI koz tuj cjetziča. Jalla nuž cjetžtiquiztan jurnu žketižtakaz ulanchiča. Jalla nii koz tuj žketiqui tjuñimi pachami zumchi cjiskatchiča.

³ Jalla nii žketiquiztan langosta animalanaca ulanchiča tii yokquiz laylayzjapa. Jalla nii animalañacžquiz anawali paazjapa poder tjaatatača, jaknužt tsjii yek'achunca ana wali yek'antičhaja, jalla nižta cjisjapa.

⁴ Nižaza nii animalanacaqui mantitatača, anača yokquiz žejlñi pastunacžquizimi tjapa ch'ojña pajkñinacžquizimi anawali paajo. Pero yujc ayquiz ana Yooz chimputa žoñinacžquiz ana wali paasača.

⁵ Pjijska jiizcama nii anawali paañi animalanacaqui ana chimputa zoñinacžquiz sufriskatzjapa nižta poder tjaatatača. Sufriskatcanami ticzkatta poder ana tjaatatača. Jalla nuž sufriskatan, nii zoñinacaqui ancha ayinchiča, jaknužt tsjii zoñi yek'antitiquiztan ancha ayiñizlaja, jalla nižta.

⁶ Jalla nižta sufris timpuquiz zoñinacaqui ticz pecaquiča, pero anaž ticzñi ataquiča. Jalla nuž ticz peccanami, ana wira ticz tjonaquiča.

⁷ Nii langosta cjita animalanacaqui quira tjaczta cawallunacažtakaztača. Ninacž achanacžquiz kor pillunacchiztakaztača. Nii animalanacž yujnacaqui zoñinacž yujnacažtakaztača.

⁸ Nižaza ninacž charaqui maatakanacž charažtakaztača. Nižaza ninacž izkenacaqui león animalanacž izkenacažtakaztača.

⁹ Nižaza ch'iztakaz kjajpchiztača. Nii kjajpanacaqui jiružtakaztača curpunaca chjojzjapa. Laylaycan, nii animalanacaqui anchaž arnatča, jaknuž cawallunacaqui tsjii quirquiz zalzcan arančhaja, jalla nižta.

¹⁰ Nii animalanacž kjurznacaqui yek'achuncaž kjurztakaztača. Ninacž kjurznacžtan yek'antasača zoñinaca sufriskatzjapa nii pjijska jiiz intiru.

¹¹ Nii animalanacž mantiñi jiliriqiu nii koz tuj cjetñipachača. Nii jilirž tjuuqui Abadón cjitača hebreo tawkquiziqui. Griego tawkquiz Apolión cjitača. Apolión cjiča, akzñiqui, nii.

¹² Jalla nižta watžcu primir anawaliqiu watchiča. Nonžna. Imaziž iya pizc anawalinacaqui tjonča.

¹³ Jalla nekztanaqui sexto anjilaqui trompet pekz tjawunchiča. Jalla nuž tjawuntiquiztan tsjii jora nonzinča. Yooz yujcquiz žejlñi kor altarquiztan nii joraqui ulanchiča. Pajkpic wajrichiztača nii kor altaraqui.

¹⁴ Nii joraqui sexto trompetchiz anjilžquiz tuž cjichiča:

—Pajk Eufrates cjita pujquiz pajkpic anjilanaca čejlta žejlča. Jalla nii pajkpic anjilanaca cutzna, —jalla nuž cjetča.

¹⁵ Nekztanaqui nii pajkpic anjilanacaqui cutstatača, čhjep parti zoñinaca conzjapa. Jalla nižta paazjapa tjacžtatača, nii ora, nii tjuñi, nii jiiz, nii wata, jalla nii timpujapa nižta paazjapa tjacžtatača.

¹⁶ Zoñinaca conzjapa wacchi zoñiž yawchi cawallunaca želatča, paa patac millonacatača. Jalla nuž wacchi nonzinča.

¹⁷ Nii cawallunacatača jalla tižta cherchiqui. Nii yawchi zoñinacaqui queca weezinacchiztača. Nii queca weezinacaqui tižta culuranacatača, ljok, larama, k'illu, jalla nižta culuranacatača. Nii cawallunacaqui león animalanacž achanacchiztača. Jalla nii cawallunacž atquiztan uj, žketi, azupri ulanchiča.

¹⁸ Jalla nii čhjep anawalinacatača anawali paachiqui. Jalla nii uj, žketi, azupri ulantiquiztan chjep parti zoñinaca contatača.

¹⁹ Nii cawallunacž sufriskatz poderaqui ninacž atquiztača, nižaza ninacž kjurzquiztača. Nii cawallunacž kjurznacaqui zkoraztakaztača. Nii zkoranacaqui ch'atñi achchiztača, zoñinaca sufriskatzjapa.

²⁰ Nii anawalinacaž ana conta zoñinacazti Yoozquin anapanž kuz tjaachiča. Zoñiž paata yooznacžquin rispitzquiztan anapan jaytichiča. Tirapan rispitchiča zjranacžquizimi nižaza zoñiž paata yooznacžquizimi. Ninacž yooznacaqui paatatača korquiztan, paazquiztan, mazquiztan, tabliquiztan, jalla nižtanaca. Nii zoñiž paata yooznacatača ana cherñimi, nižaza ana nonzñimi, nižaza ana ojklayñimi.

²¹ Nii parti zoñinacaqui anawal kamtiquiztan anapan jaytichiča. Tirapantača zoñi conzqui, nižaza yat'iri ojklayzqui, nižaza adulteriuquiz ojklayzqui, nižaza tjañizaz ojklayzqui.

10

TSJII LIWRUCHIZ ANJILA ZELATCHA

¹ Nekztanaqui pajk azziz anjila cherchinča, arajpachquiztan tjonñi. Nii anjilaqui tsjir taypiquiz tjonchiča, tsjii arcu iris cumari niž ach juntuñ. Nii anjilž yujcqui tjuñižtakaz c'ajatča. Lisnacaqui uj asñižtakaztača.

² Niiž kjarquiz tsjii cjetžta liwru tanziča. Niiž žew kjojchaqui pajk kotquiz tjecziča, niž zkar kjojchaqui yokquiz tjecziča.

³ Nii anjilaqui altu joržtan kjawchiča, león animalažtakaz. Nekztanaqui pakallaw wilta jorjorchiča.

⁴ Jalla nuž jorjortan, wejrqui cjiirzmayatača. Pero cjiirzmaya cjen arajpachquiztan tsjii joraqui wejtquin chiižquichiča, tuž cjican:

—Nii pakallaw jorjorñiž chiitaqui chjojzna. Ana nii puntu cjiira.

⁵ Jalla nekztanaqui nii kotquizimi yokquizimi tjeczi anjilaqui žew kjara waytichiča arajpach kjutñi.

⁶ Žew kjara waytižcu, juramintu paachiča Yooz tjuu chiican.

—Watay wata žejtñi Yoozqui paachiča arajpachami, yokami, kotami; nižaza arajpachquiz žejlñinacami, yokquiz žejlñinacami, kotquiz žejlñinacami, tjappacha paachiča. Jalla nii zinta Yooz tjuu chiican juramintu paachiča, tjapa Yooz puntu parliñi profetanacž chiitanacaqui ana enenžcu cumplisjapa.

⁷ Chjulorat séptimo anjilaqui trompet pezk tjawznačhaja, jalla nii timpu Yooz chjojzaka tantiita taku cumplisnaquiča. Tuqui timpuqui Yoozqui niž sirwiñi profetanacžquiz nii chjojzaka taku mazinchiča.

⁸ Jalla nekztanaqui nii arajpachquiztan chiižquiñi joraqui wilta wejtquiz paljayžquichiča, tuž cjican:

Nii kotquizimi yokquizimi tjeczi anjilž kjarquiztan cjetta liwru tanzñi oka. Jalla nuž wejtquiz mantichiča.

⁹ Jalla nekztanaqui anjilžquin liwru mayi ojkchinča, wejtquiz nii liwru tjaajo. Nii anjilaqui wejtquiz cjichiča:

—Tanzna, nižaza lujlna. Am atquiz zuma mazk'až cjequiča. Pero am pjuchquiziqui jaruž tucaquiča.

¹⁰ Nekztan anjilž kjarquiztan liwru tanžcu lujlzinča. Wejt atquiz ancha mazk'atača. Jalla nuž lujltiquiztan wejt pjuchquiz jaru cjissiča.

¹¹ Nekztanaqui wejtquiz cjichiča:

—Wilta amqui Yooziž chiita taku paljaystanča, nacionacž puntuquiztanami, tjapaman sarchiz žoñinacž puntuquiztanami, tjapaman takunachiz žoñinacž puntuquiztanami, mantiñinacž puntuquiztanami.

11

YOOZ TAKU PALJAYÑI ZOÑINACA

¹ Jalla nekztanaqui wejtquiz tsjii caña tjaatatača tupz paražtakaz. Nekztanaqui tsjiiqui wejtquiz mantichiča tuž cjican:

—Zaazna. Yooz kjuya mirižca, altaržtanpacha. Nižaza nekz žejlñi Yooz rispitiñinaca kanzna.

² Yooz kjuy patiuqui ana miriizaquiča. Jalla nii patiuqui yekja wajtchiz žoñinacžquin intirjitača. Jalla nii žoñinacaqui Yooz zuma watja akznaquiča pusi tunc paani jiiznaca.

³ Wejrqui cuchanžcača pucultan tisticu wejtquiztan paljayajo. Lut zquiti cujtchi ojklayaquiča, 1260 tjuñicama. —Jalla nuž wejtquiz mantichiča.

⁴ Pizc olivo cjita muntinacami, nižaza pizc cantilirunacami tii yok mantiñi Yooz yujcquiz žejlča. Jalla nii muntinacami, nižaza cantilirunacami pucultan tisticu cjiča.

⁵ Jakziltat Yooz taku paljayñi žoñinacžquiz sufriskatz yanznačhaja, jalla niiqui contaž cjequiča. Nii pucultan tisticunacž atquiztan asñi uj ulnaquiča ninacž quintra žoñinaca liwj ujzjapa. Nekztan ninacžquiz sufriskatz pecñinacaqui contaž cjequiča.

⁶ Poderchizza nii pucultan tisticunacaqui ana chijinskatajo. Yooz taku paljaycan, jalla nii timpu ana chijinskataquiča. Nižaza nii pucultan tisticunacaqui kjaz ljok tuckatz poderchizzakazza. Nižaza tii yokquiz žejlñi žoñinacžquiz tjapaman anawalinacžtan sufriskatz poderchizzakazza. Chjulora peccanami žoñinaca sufriskatasacha.

⁷ Jalla nii pucultan tisticunacaqui Yooz taku paljayz žeržcu, contaž cjequiča. Tsjii anawal animalažtakaz anawal koz tujquiztan ulnaquiča. Yooz taku paljayñinacž quintra cjequiča. Nižaza nii pucultiquiztan atipaquiča, nižaza conaquiča.

⁸ Nekztanaqui ninacž ticzi curpunacaqui jakowasaquiča, Jerusalén wajt callquiz. Nii pajk wajtquiz Jesucristuqui cruzquiz ch'awctatača. Nižaza Jerusalén watjaqui Sodoma cjitacha tsjii parabolažtakaz. Nižaza Egipto cjitazakazza, tsjii parabolažtakaz.

⁹ Chjep maj chicatchiz tisticunacž ticzi curpuqui callquiz želaquiča. Jalla nuž želan žoñinacaqui ticzi curpunaca cheraquiča, tjapa nacionanacchiz žoñinacami, tjapa watjanacchiz žoñinacami, tjapaman takunacchiz žoñinacami, tjapaman saranacchiz žoñinacami, jalla ninaca. Nii cherzñi žoñinacaqui anaž nii ticzi curpunaca tjatkataquiča.

¹⁰ Nii pucultan tisticunacaqui tii yokquiz žejlñi žoñinacžquiz ancha sufriskatchitača. Jalla nuž ticžtiquiztan tii yokquiz žejlñi anawal žoñinacaqui cuntintuž cjequiča, nižaza pjijzta paaquiča, nižaza porapat onantanaca onarassaquiča.

¹¹ Nekztan čhjep maj chicatquiztan Yoozqui nii pucultan tisticunaca jacatatskataquiča, wilta žeti tjaacan. Jacatatžcu tsijsnaquiča. Nekztan nii ticziquiztan jacatatchinaca cheržcu, žoñinacaqui ancha tsuctsugaquiča.

¹² Jalla nekztanaqui arajpachquiztan tsjii altu joraqui nii pucultižquiz paljayaquiča, tuž cjican:

–Tsewc yawžca ančhucqui. Tekz želaquiča.

Jalla nekztanaqui quintra žoñinacž cheran, nii pucultan tisticunacaqui arajpachquin waytitaž cjequiča tsjir taypiquiz.

¹³ Nekztan cherchinča tužu. Jalla nii orapacha ancha yoka chekjinchiča. Jalla nuž yoka chekjintiquiztan tunca parti Jerusalén watjaqui pajlsiča. Nii yoka chekjintiquiztan pakallawk warank žoñinaca ticziča. Parti žejtñi žoñinacazti ancha tsuctsucchiča. Jalla nižtanaca wattiquiztan parti eclichi žoñinacaqui Yooz honora waytichiča.

¹⁴ Jalla nii anawali wattan, pizc anawalinacaqui watchiča. Nižaza wajillaž tjonča tercer anawaliqui.

SEPTIMO ANJILA

¹⁵ Jalla nekztanaqui séptimo anjilaqui trompet pekz tjawunchiča. Jalla nuž tjawuntiquiztan arajpachquin altu joranaca chiiñi nonzinča. Jalla tuž chiichiča:

“Tjapa tii muntuqui učhum Yooz Jiliriž mantita cjissiča. Nižaza Yooz Epiž uchta Jesucristuž mantita cjissiča. Jalla ninacača watay wata wiñaya mantiñiqui”.

¹⁶ Jalla nekztanaqui nii paa tunc pusin jilirinacaqui Yooz yujcquiz yokquiz puct'ican, Yooz rispitchiča. Jalla ninacača Yooz yujcquiz mantiz puestunacquiz julzñiqui.

¹⁷ Yooz rispitan, tuž cjichiča:

“Tjapa azziz Yooz Jiliri, amča anzimi tuquitanami žejlñiqui. Am juc'ant azi tjeezamča, nižaza anziqui tjapa mantiñi kalltichamča. Jalla nižtiquiztan amquin gracias tjaa-uča.

¹⁸ Nacionanacchiz žoñinacaqui am quintra žawjchiča. Pero ninaca casticz tjuñi tjonča. Nižaza ticzi žoñinaca pjalz tjuñi tjonča. Nižaza amquiz sirwiñinacžquiz zumanaca tjaaz tjuñi tjonča. Amquiz sirwiñinacami, am taku paljayñinacami, amquiz rispitiñinacami, amquiz kuz tjaañinacami, jalla tjapa ninacžquizimi zumanaca tjaataž cjequiča pjalz

tjuñquiziqui. Nižaza tii yoka akñinacami, tii yoka žejlñi žoñinaca akñinacami, jalla ninaca akskattaž cjequiča. Jalla nii tjuñiž tjonča”.

Nuž cjichiča nii paa tunc pusin jilirinacaqui.

¹⁹ Jalla nekztanaqui Yooz arajpach kjuya cjetžtatača. Kjuy kjuyltan tsjii cajuna chertatača. Yooziž tjaata takutača nii cajunquiziqui. Nižaza arajpachquin rayunaca želatča, nižaza jorjorñinaca želatča. Nižaza yoka chekjinskatñi želatča. Nižaza pjursanti caraniza želatča.

12

TSJAA MAATAKATAN TSJII ANAWAL ANIMALZTAN

¹ Jalla nekztanaqui arajpachquin tsjii pajk siñala parizichiča. Nii siñalaqui tižtatača. Tsjaa maataka želatča. Naa maataka zquitiqiu tjuñižtakaztača. Nižaza naaža kojch koztan jiiž želatča. Naaža achquiz tuncapan warawara tewžintatača, tsjii pillužtakaz.

² Naa maatakqui ictatača. Nuž cjen, ancha aynatča, majtzjapa.

³ Jalla nekztanaqui tsjii siñala parizichizakazza arajpachquin. Tsjii juc'ant anawal pajk ljok animala želatča. Jalla niiqui dragón cjitatača. Pakallaw achchiztača, nižaza tunca wajrichiztača. Nižaza zapa achquiz mantiñi žoñž pillunacžtan tewžintatača.

⁴ Niiž pajk kjurz wewcžcu, čhjep parti warawaranaca tjojtskatchiča yokquin. Jalla nii dragonqui maataka yujcquiz tsijtsiča, naa maataka majtz ora tjewžcan. Jalla nuž tsijtsiča, naaža majtta wawa lujljzjapa majttiquiztanpacha.

⁵ Nekztanaqui naa maatakqui lucmajch wawa majtchinča. Nii lucmajchqui tjapa nacionquiz žejlñi žoñinaca c'aripacha mantiñiž cjequiča. Pero jalla nuž majttiquiztan nii lucmajch wawaqui Yoozquin waytitatača, Yooziž tjaata puestunaca tanzjapa.

⁶ Naa maatakzti ch'ekti yokquin atipassinča. Jalla nicju Yoozqui naa maatakaltajapa tsjii yoka tjaczinchiča. Jalla nicju 1260 tjuñinaca watzcama čhjerchiz cjequiča naaqui.

⁷ Jalla nekztanaqui arajpachquin quira zaltissiča, Miguelžtan niiž mazi anjilanacžtan dragonž quintra quira zaltissiča. Nii dragonžtan niiž mazinacžtan ancha kichjassiča.

⁸ Pero atipta cjissiča. Jalla nižtiquiztan arajpachquin ana iya želasacha.

⁹ Jalla nižtiquiztan nii dragonžtan niiž mazi anjilanacžtan tii yokquiz chjatkatzquitatača. Nii dragonqui Satanás diablupantača. Niiča tuquita žkoražtakaz incallñiqui. Tuquitan nii diabluqui Evaquiz incalltiquiztan tjapa tii muntu incallchiča anawali cjiskatzjapa.

¹⁰ Jalla nekztanaqui wejrqui arajpachquin tsjii altu jora nonzinča, tuž cjiñi:

–Jaziqui ultim livriiz tjuñi tjonča, nižaza Yooz azi tjeez tjuñi tjonča, nižaza uchum Yooz tjapa mantiz tjuñi tjonča. Nižaza Yooziž uchta Jesucristuž mantiz tjuñi tjonča. Učhum criichinacž quintrariunacaqui chjatkatta cjequiča. Majiñami weenami nii anawaliqiu Yooz yujcquiz criichinacž quintra uj tjojtjuñitača.

¹¹ Pero criichinacaqui anawal diablu atipchiča, Uuzažtakaz Jesucristuž ticziž cjen, nižaza Yooz taku paljaychiž cjen. Nižaza nii criichinacaqui Yooz taku paljaycan ana jiwjatchiča ticzuca cjenami.

¹² Arajpacha, nižaza arajpachquin kamñinaca, cuntintuž cjee. Yokquiz kamñinaca, kotquiz kamñinaca, ančhucaquiz anawali cjiskataquiča. Diabluqui chjatkatzquitiquiztan ancha žawjziča. Jalla niiqui zizza, muntuquiz kamz timpuqui zkoluckazza.

¹³ Jalla nekztanaqui nii dragonqui yokquiz chjatkatzquita nayžcu, naa lucmajch maatiñ maatakaquiz apziča tanzjapa.

¹⁴ Nekztan naa maatakaquiz pizc pajk aquilž kjara tjaatkalča, ch'ekti yokquin laycan zkoraztakaz diablužquiztan atipzjapa. Yoozqui nii yoka tjacziča, maatakaquiz čhjep wata chicatchiz čhjerchiz cjisjapa. Jalla nii yokquin maatakqui layñi atipchinča.

¹⁵ Nekztanaqui žkoraztakaz diabluqui persun atquiztan wacchi kjaz jotchiča, pujužtakaz, kjaztan nii maataka tjuzjapa.

¹⁶ Nekztan yokaqui maatakaquiz yanapzjapa, c'acchiča. Jalla nii c'actiquiz dragonž jotta kjazqui luzziča.

¹⁷⁻¹⁸ Nii cheržcu, dragonqui maatakajapa juc'anti žawjchiča. Jalla nekztanaqui diabluqui naaža majchmaatinacž quintra quira zali ojkchiča. Naa maataka majchmaatinacaqui tižtanacača. Jakziltat Yooz mantitanac jaru kamčhaja, nižaza Jesucristuž tjaajinta jaru kamčhaja, jalla ninacaqui naa maataka majchmaatinaca cuntača. Nii diabluqui quira zali ojkžcu, kot atquiz tsijtsiča.

13

PIZC ANAWAL ANIMALANACA CHERCHINCHA

¹ Jalla nekztanaqui chawc kot kjazquiztan tsjii anawali pajk animala ulanžquiñi cherchinča. Jalla nii animalaqui pakallawk achchiztača, nižaza tunca wajrichiztača, nižaza zapa wajriquiz mantiñi žoñž pillunacžtan tewžintatača. Nižaza achanacquiz Yooz quintra tjuu cjižrtatača.

² Jalla nii weriž cherta animalatača tigrižtakaz tsijtchi. Nižaza nižž ataqui leonž atažtakaztača. Jalla nekztan dragonžtakaz diabluqui nii anawal animalžquiz nižž poderchiz puestu tjaachiča, walja azziz mantizjapa.

³ Tsjii achaqui nii animalž pakallawk achanacquiztan ticskatzmaya chjojrich-tažtakaztača. Pero ana ticziča. Antiz žejtchiča. Nekztanaqui ispantižcuqui tjapa tii muntuquiz žejlñi žoñinacaqui anawal animala apziča.

⁴ Žoñinacaqui nii dragón diablužquiz rispitchiča, Yoozquiztakaz. Nižaza nii dragonqui anawal animalžquiz nižž mantiz poder tjaachiča. Jalla nižtiquiztan žoñinacaqui nii animalžquiz rispitchizakazza, tuž cjan:

—¿Jakziltat tii animalžquiztan juc'ant azzizqui? ¿Jequit tii animala atipasajo?

⁵ Nekztan nii anawal animalaqui mit takunacami Yooz quintra chiita takunacami chizjapa permitta cjissiča. Nižaza puzi tunc paan jižznaca watzcama mantiz poderchiz cjequiča.

⁶ Jalla nekztanaqui anawal animalaqui Yooz quintra chiichiča, Yooz tjuu quintrami, nižaza Yooz timplu quintrami, nižaza arajpachquin kamñinacž quintrami. Jalla nižta quintra chiichiča.

⁷ Nižaza anawal animalaqui Yoozquin criichinacž quintra quira zalajo permittatača, ninaca atipzcama. Nižaza nižžquiz mantiz poder tjaatatača, tjapa zaranacchiz žoñinacžquizimi, tjapa watjanacchiz žoñinacžquizimi, tjapa takunacchiz žoñinacžquizimi, tjapa nacionanacchiz žoñinacžquizimi, jalla tjapa nii ana criichi žoñinacžquizimi mantizjapa.

⁸ Yoozquin ana criichiž cjen žoñinacaqui anawal animalžquiz rispitchiča, Yoozquiztakaz. Nii animalžquiz rispitiñi žoñinacž tjuunacaqui anaž cjižrtatača, Uuzažtakaz Jesucristuž liwruquiz. Liwriita žoñinacž tjuunaca Jesucristuž liwruquiz cjižrtatača. Jalla ninacž laycu ticziča Jesucristuqui. Ima tii muntu kalltan, jakziltižquiz Jesucristuqui wiñay žeti tjaachaja, jalla ninacž tjuunaca cjižrchiča arajpach liwruquiz.

⁹ Jakziltat nonžñi cjuñchizlaja, nonžla.

¹⁰ Jakzilta žoñit preso chjichta cječaj niiqui, panž chjichtaž cjequiča. Nižaza jakzilta žoñit pajk cuchillžtan conta cječaj niiqui, panž conta cjequiča. Jalla nižtiquiztan Yooz wajtchiz žoñinacaqui Yoozquin tjapa kuztan cjis waquiziča, nižaza pasinsis kuztan cjis waquiziča, sufrisnaca watzjapa.

SEGUNDO ANAWAL ANIMALA

¹¹ Jalla nekztanaqui yekja anawal animala cherchinča yokquiztan ulanñi. Jalla nii animalaqui pizc wajrichiztača, uuzaktakaz. Pero dragonžtakaz chiyatča.

¹² Jalla nii segundo anawal animalaqui tjapa nii primir animalž poderchiz mantichiča, primir animalžtan chica žejlcan. Nižaza segundo animalaqui tjapa tii muntuquiz žejlñi žoñinaca primir animalžquiz rispitskatchiča. Primir animalatača ticzmaya chjojrichtiquiztan žejtchiqui.

¹³ Nižaza segundo animalaqui pajk milajrunaca paachiča. Tsewctan yokquiz uj tjojtskatchiča žoñinacž cheran.

¹⁴ Jalla nižta milajrunaca payi permittatača, primir animalaž želan. Jalla nižta milajrunaca paachiž cjen, tii muntuquiz kamñi žoñinacžquiz incallchiča. Nižaza žoñinaca mantichiča, chjojrichtiquiztan žejtchi animalž irata tsjii yooz paajo. Nekztan mantichiča, nii yooz rispitažo. Nii primir animalatača pajk cuchillžtan chjojrichtaž cjenami, wilita žejtchi cjissiqui.

¹⁵ Segundo animalaqui primir animalž irata paata yooz žejtñi cjiskatchiča. Nižta poderchiz cjissiča segundo animalaqui. Jalla nuž žejtñi cjican, nii paata yoozqui chiiñi cjissiča. Nižaza jakziltat nii yooz ana rispitchaja, jalla niiqui contaj cjila, mantichiča žejtñi chiiñi yoozqui.

¹⁶ Nižaza segundo anawal animalaqui mantichiča, tjapa žoñinacž yujc ayquizimi už žew kjarquizimi chimputa cjisjapa. Koltanacami, pajkinacami, ricachunacami, porinacami, žoñž mantuquiz cjiñinacami, ana žoñž mantuquiz cjiñinacami, liwj mantichiča, chimputa cjejajo.

¹⁷ Ana chimputa cjenaqui ana kjaychucatača, nižaza ana tuychucatača. Nii chimpuqui tužutača, žoñž ayquiz anawal animalž tjuužtan už anawal animalž numeružtan cjižrtatažlaja, jalla nii.

¹⁸ Jalla nii intintisjapaqui walja zizñi cjistanča. Jakziltat zizñi cječhaja, jalla niiqui anawal animalž número tantiž waquiziča. Nižaza nii numeruqui žoñinacž numeruča. Jalla nii numeruqui sojta patac sojta tuncan sojtani, jalla niiča.

14**144,000 ŽOÑINACA CHERCHINCHA**

¹ Jalla nekztanaqui Sión cjita cur kjutñi cherchinča. Jalla nicju Uuzaktakaz Jesucristuqui tsijtchi želatča. Niižtan chica 144,000 žoñinaca želatča. Nii žoñinacž ayquiz Jesucristuž tjuumi, niiž Ejpž tjuumi, jalla nii tjuunaca cjižrtatača.

² Jalla nekztanaqui arajpachquiztan tsjii jora nonzinča, wacchi pujunacž kjaz joražtakaz, nižaza pjursanti jorjorñiž joražtakaz. Nižaza nii weriž nonžta joraqui suyniñitača, jaknužt wacchi arpa quitaranaca suyničhaja, jalla nižta.

³ Jesucristužtan žejlñi žoñinacaqui ew wirsu itsiča. Nii mantiz puestuž yujcquiz nižaza nii pajkpic žejtñinacž yujcquiz, nižaza nii jilirinacž yujcquiz itsiča. Anaž iya jakziltami nii ew wirsu catoki atatča; nii 144,000 jalla nii alaja nii wirsu catokchiča. Nii 144,000 žoñinacaqui yokquiztan liwriitatača.

⁴ Jalla ninacaqui ana zalzi nižaza ana čjul maatakatan adulteriužtakaz paachiča. Jalla ninacaqui Uuzaktakaz Jesucristo apziča, jakziquin ojektčhaja, jalla nii. Nižaza ninacatača žoñinacžquiztan primero liwriita žoñinacaqui. Yooztajapami Uuzaktakaz Jesucristužtajapami liwriitatača.

⁵ Jalla ninacatača ana zinta toscara chiichiqui, nižaza ana čjul ujchiztača.

CHJEP ANJILANACA CHERCHINCHA

⁶ Jalla nekztanaqui arajpach taypiquiz tsjii anjila layñi cherchinča. Nii anjilaqui liwriiñi tawkchiztača, tii muntuquiz kamñi žoñinacžquiz parliñijapa. Nii liwriiñi takuča wiñajjapa werar razunaqui. Nii liwriiñi takuqui tjapa žoñinacžtajapa, tjapa

nacionanacchiz zoñinacztajapami, nižaza tjapa zaranacchiz zoñinacztajapami, nižaza tjapa takunacchiz zoñinacztajapami, nižaza tjapa watjanacchiz zoñinacztajapa, jalla ninacztajapatača.

⁷ Jalla nii anjilaqui altu joržtan tuž chiichiča:

—Yoozquin rispitñiž cjee. Niižquin honora waytiñiž cjee. Niiž ultim casticz ora tjonča. Niiqui arajpachami, yokami, kot kjaznacami, nižaza kjaz jalzurinacami paachiča. Jalla nižtiquiztan niižquiz rispitñiž cjee.

⁸ Jalla nekztanaqui yekja anjilaqui apžquichiča, tuž cijcan:

—Babilonia, nii pajk watjaqui akziča, akziča. Nii watjaqui parti watjanacchiz zoñinacžquiz anawali kamañchiz cjiskatchiča, jaknužt adulteriuquiz ojklayñinacaqui ana zuma kamañchizlaja, jalla nižta.

⁹ Jalla nekztanaqui tercer anjilaqui apžquichiča, altu joržtan tuž cijcan:

—Jakziltat nii anawal animala rispitčhaja, nižaza nii zoñiž paata yooz rispitčhaja, jalla niiqui castictaž cjequiča. Nižaza jakziltat niiž ayquiz anawal animalž chimpupa cječhaja, už kjarquiz anawal chimpupa cječhaja,

¹⁰ jalla niiqui Yooziž castictaž cjequiča. Jalla nii ana ultim Yooz rispitñi zoñinacž quintra Yoozqui ancha žawjwaquiča. Yoozqui ninaca ancha casticaquiča. Ninacaqui infiernuquin nižaza asñi azupriquiz ancha t'akjizaquiča Yooz zuma anjilanacž yujcquizimi, Uzažtakaz Jesucristuž yujcquizimi.

¹¹ Infiernuquin wiñayjapa sufran, uj žketiqui žketaquiča watay wata. Nii sufrñi zoñinacača majiñami weenami jeejzqui ana žejlchuca. Ninacaqui anawal animala rispittiquiztanami nižaza nii paata yooz rispittiquiztanami jalla nižta ancha sufraquiča. Nižaza ninacaqui nii anawal animalž tjuužtan chimpupaž cjen nižta ancha sufraquiča.

¹² Jakziltat Yooz partiquiz žejlčhaja, nižaza Yooz tawk jaru kamčhaja, nižaza Jesucristužquin kuz tjaačhaja, jalla ninacaqui tii muntuquiz pruebanaca watcan pasinsis kuzziz tira tjurt'ichej cijla.

¹³ Jalla nekztanaqui wejrqui arajpachquiztan tsjii jora nonzinča. Nii joraqui tuž cjichiča:

—Jalla tiic cijra: “Tekztan nawjccchuc jakziltat Yooz Jiliržquiz tjurt'ichi kuzziz ticznačhaja, jalla niiqui cuntintuž cjequiča”. Espiritu Santuqui tuž cjiča: “Ninacaqui ninacž langzquiztan jeejnaquiča. Nižaza ninacž zuma obranacquiztanami nižaza kamtiquiztanami pactaž cjequiča. Jalla nižtiquiztan cuntintuž cjequiča”.

ZOÑINACA RICUJTA CUJICHAZTAKAZ

¹⁴ Jalla nekztanaqui tsewc kjutñi cheržcu, chiw tsjiri cherchinča. Nii tsjir juntuñ tsjii zoñižtakaz julzi želatča, kor pillu achquiz tjewzi, nižaza kjarquiz cuchillu tanzi.

¹⁵ Nekztanaqui tsjii anjilaqui arajpach Yooz timpluquiztan ulanchiča altu joržtan kjawcan. Nii tsjir juñtuñtan julzi zoñžquiz paljaychiča, tuž cijcan:

—Tii muntuquiz žejlñi cujich ora tjonchiča. Cujichaqui zuma pookchiča. Jalla nižtiquiztan am cuchillžtan pootzna, cujicha ricuja. —Nuž cjichiča anjilaqui. Tii muntuquiz žejlñi criichi zoñinacača cujichažtakazqui.

¹⁶ Jalla nekztanaqui nii tsjir juñtuñtan julzi zoñiqui cuchillžtan tii muntuquiz žejlñi cujicha ricujchiča. Jalla nižtiquiztan Yoozquin criichi zoñinacaqui ricujta cjissiča.

¹⁷ Nekztanaqui tsjii yekja anjilaqui arajpach Yooz timpluquiztan zakaz ulanchiča, cuchillžtan zakaz.

¹⁸ Nekztanaqui tsjii anjilaqui arajpach Yooz altarquiztan ulanchizakazza. Nii anjilaqui akzjapa poderchizza. Nekztanaqui nii anjilaqui segundo cuchillžtan anjilžquiz paljaychiča, altu joržtan tuž cijcan:

—Am cuchillžtan uwas cujicha ricuja. Uwasnacaqui zuma pookchiča. Jaziqui nii ricuja. —Nuž cjichiča anjilaqui. Tii muntuquiz žejlñi ana criichi žoñinacača uwas cujichažtakazqui.

¹⁹ Jalla nekztanaqui nii anjilaqui cuchillžtan ana Yoozquin criichi žoñinaca cujichažtakaz pootchiča, nižaza ricujchiča. Nekztan nii ricujta žoñinacaqui uwas cujich uyquiztakaz tjojtatača, Yooz casticta cjisjapa.

²⁰ Jalla nekztanaqui jaknužt ricujta uwasanaca tjecančhaja, jalla nižta nii ricujta žoñinacaqui castictatača Yooz wajtž tjiiquin. Jalla nuž castictaž cjen, ancha ljoc ojkchiča, cawallunacž freno irantizcama. Quinsa patac kilómetro larcuquin nižta ljoc ojkchiča.

15

PAKALLAWK ANAWALINACA

¹ Jalla nekztanaqui arajpachquin tsjii siñala cherchinča. Nii pajk siñalaqui ancha ispantichucatača. Pakallawk anjilanacaqui želatča, pakallawk anawalinacchiz. Jalla nii anawalinaca wattan Yooz casticz žerzta cjequiča.

² Nižaza llijñi kota cherchinča, ispijužtakaz ujžtan t'ajžta. Nižaza nii ispijužtakaz kot atquin žoñinaca tsijtchi želatča. Nii žoñinacaqui Yooz arpi guitarra tanzi želatča. Nii žoñinacaqui tii muntuquiz kamcan, anawal animalquiztan atipchiča, nižaza niž paata yoozquiztan atipchiča. Nižaza nii anawal animalž tjuužtan ana chimputatača.

³ Jalla nii žoñinacaqui Yooz sirwiñi Moisés itsñi itsatča, nižaza Uuzažtakaz Jesucristuž itsñi itsatča, tuž cjican:

“Tjapa azziz Yooz Jiliri, amiž paata pajk obranacača ancha zumanacaqui, nižaza ispantichucača. Am kamañaqui zuma lijitumča, werarapanča. Amča tjapa nacionchiz žoñinaca mantiñamqui.

⁴ Yooz Jiliri, ¿ject amquin ana eksnasa? ¿ject amquin honora ana tjaasa? Am alaja ancha zumampanča. Amča zuma lijituma pjalzñamqui, jalla nižtiquiztan tjapa nacionquiztan žoñinacaqui tjonaquiča, am rispitzjapa”.

⁵ Jalla nekztanaqui arajpachquin cherchinča timplu kjuyltan. Jakziquizlaj Yooz lii, jalla nekz Yooz žejlž kjuya cjetzi cherchinča.

⁶ Nekztan cherchinča, timpluquiztan pakallawk anjilanacaqui pakallawk anawalinac casticchiz tjonchiča. Ancha zuma llijñi tol zquitichiztača, nižaza kor tsjaychiztača, quecanaca jweržinta.

⁷ Jalla nekztanaqui tsjiiqui pajkpic žejtñinacžquiztan zapa mayni pakallawk anjilanacžquiz kor chuwa tjaachiča. Nii chuwanacaqui wiñay žejtñi Yooz casticunaca chjiipžtatača.

⁸ Nii timpluqui uj žketžtan chjiipžtatača, Yooz juc'ant azziz cjen, nižaza juc'ant honorchiz cjen. Nižaza anaž jecmi nii timpluquin luzi atasača, nii pakallawk anjilanacž anawalinaca watzcama.

16

ANAWALINACA CUTZTA

¹ Jalla nekztanaqui tsjii alto chiiñi jora nonzinča. Timpluquiztan nii joraqui pakallawk anjilanacžquiz paljaychiča, tuž cjican:

—Oka. Ančhucaqui nii intirjita anawalinaca cutzna. Nii anawalinacžtan Yoozqui žoñinaca casticaquiča. —Jalla nuž paljaychiča nii joraqui.

² Jalla nuž paljaytiquiztan primir anjilaqui ojkchiča nižquiz intirjita anawalinaca tii muntu yokquiz cutzjapa. Jalla nekztanaqui jakziltat anawal animalž chimputažlaja, nižaza nii anawal animalž žoñiž paata yoozquiz rispitchhaja, jalla tjapa ninacaqui anawal llajanacžtan llajchiča. Nižaza ancha kjawcan aynatča.

³ Jalla nekztanaqui segundo anjilaqui ojkchiča nižquiz intirjita anawalinaca tii muntu kotquiz cutzjapa. Nii kot kjazqui ticzi žoňž ljocnacažtakaz tucchiča. Jalla nižtiquiztan tjapa kotquiz zejlñi animalanacaqui ticziča.

⁴ Jalla nekztanaqui tercer anjilaqui nižquiz intirjita anawalinaca cutziča pujunacquizimi jalzurinacquizimi. Tjapa kjazqui ljoc tucchiča.

⁵ Jalla nekztanaqui kjaz mantiñi anjilaž chiita nonzinča. Nii anjilaqui tuž cjichiča: —Ancha zumamča Yooz Jiliri. Amqui tuquitanami jaztanami žejlča. Amqui lijitumakaz pjalžcu, casticča.

⁶ Nii casticta žoñinacaqui am parti žoñinacami, nižaza am parti parliñi žoñinacami conchiča. Jaziqui amqui nii žoñinacžquiz ljoc lickatchamča. Jalla nužupan ninacžta waquiziča.

⁷ Nižaza altarquiztan tsjii chižžquiñi jora nonzinča, tuž cjican: —Tjapa azziz Yooz Jiliri. Amqui ultim werara pjalzamča; nižaza lijitumapan pjalžñamča. Jalla nužupanča.

⁸ Jalla nekztanaqui cuarto anjilaqui nižquiz intirjita anawali cutziča tjuñquiz. Jalla nuž cutžtiquiztan, tjuñiž siiqui žoñinaca ujsiča, zmali kjakcan.

⁹ Jalla nižtiquiztan žoñinacaqui tjuñiž ujta cjissiča. Jalla nuž ujtiquiztan, žoñinacaqui ana persun uj paaznacquiztan jaytichiča, “Ujchizpantča” cjican. Nižaza Yoozquin ana honora tjaachiča. Antiz Yooz tjuu quintra chiichiča, Yooz nii anawalinaca mantizquichiž cjen.

¹⁰ Jalla nekztanaqui quinto anjilaqui nižquiz intirjita anawali cutziča, jakziquin nii anawal animalaqui mantiñi julzičhaja, jalla nicju. Jalla nekztanaqui nii mantita yokaqui ancha zumchi cjissiča. Jalla nuž cjen žoñinacaqui persun las ch'atsiča; ancha t'akjizichiča.

¹¹ Jalla nuž sufrichiž cjenami, ana jaytichiča anawali paaznacquiztan, “Ujchizpantča”, cjicanaqui. Pero arajpach Yooz quintra chiichiča, ninacaž nuž ayinskatñi llajacama cjenauqui.

¹² Jalla nekztanaqui sexto anjilaqui nižquiz intirjita anawaliqui pajk Eufrates cjita pujquiz cutziča. Jalla nuž cutztiquiztan, nii pujuqui kjonchiča, tuwantan tjonñi jilirinaca kjakžquizjapa.

¹³ Nekztanaqui cherchinča anawal dragonž atquiztan anawal ispiritu ulanchiča. Jalla nižtazakaz ulanchiča anawal animalž atquiztanami, nižaza falso profetž atquiztanami. Nii čhjep ulanchi ispiritunacaqui zcaranacažtakaztača.

¹⁴ Nii ispiritunacaqui zajra ispiritunacatača. Milajrunacaž paa-atča. Nižaza tjapa tii muntuquiz mantiñinacaž juntatča, quira zaltisjapa. Tjapa azziz Yooz Jiliriž uchta timpu pajk quira želaquiča.

¹⁵ Nonžna. Jesucristuqui tuž cjiča: “Wejrqui tjañižtakal tiripintit tjonacha. Jakzilat naazñi kuzziz cječhaja, cuntintuž cjequiča. Zquitchizpan cjee; nekztan ana k'ala okasača, žoñinacaž ombrawillta cjisjapa”.

¹⁶ Jalla nekztanaqui mantiñi jilirinacaqui juntantitaž cjissiča, tsjii yokquiz. Nii yokaqui hebreo tawkquiz Armagedón cjitača.

¹⁷ Jalla nekztanaqui séptimo anjilaqui intirjita anawaliqui querquiz cutziča. Jalla nuž cutztiquiztan altu joraqui arajpach timpluquiz mantiz puestuquiztan chiichiča, tuž cjican:

—Yooz casticz obranaca cumplita cjissa.

¹⁸ Jalla nekztanaqui rayunacami, arañinacami, jorjorñinacami želatča. Nižaza juc'anti yoka chekjinchiča. Yooziž žoñi paatiquiztan jalla nii timpuquiztan anzcama tii yokaqui ana wira juc'anti chekjinchiča. Walja tsucuñi cheknatča.

¹⁹ Jalla nuž yoka chekjinžcu, Jerusalén pajk watjaqui čhjep parti t'akžtatača. Nižaza nacionanacž capitalanacaqui k'ala pajlsiča. Nižaza Yoozqui Babilonia pajk watja

cjuñzičha. Yoozqui Babilonia wajtz quintra zawjžcu, juc'anti casticchičha, jaru vinžtan liquintažtakaz.

²⁰ Jalla nuž castican tjapa kot taypiquiz žejlñi yokanacami, nižaza curunacami katchičha.

²¹ Nižaza arajpachquiztan žoñinacž juñtuñ pajk caranuzatjojtžcu, ojkchičha. Tsji caranuzacqui quintal jilatačha, ancha liczitačha. Nekztanaqui žoñinacacqui Yooz quintra chiichičha nii caranuzaz nuž ojktiquiztan. Jalla nii anawaliquiztan ancha sufrichičha.

17

PUTIRII MAATAKA CHERCHINCHA

¹ Jalla nekztanaqui tsji nii pakallaw ana walinacchiz anjilanacžquiztan wejtquiz tjonchičha, tuž cjican:

—Pichay. Putirii maataka amquiz tjeeznačha. Naa putirii maatakaqui pajk watja cjičha. Jaknužt nii pajk watja casticta cječhaja, jalla nii zakal tjeeznačha. Jalla nii anawal watjaqui wacchi kjaznacaran žejlčha. Juc'ant anawali putirii maatakažtakazza nii watjaqui.

² Tii yokquiz mantiñi jilirinacacqui naa putiriyatan adulteriuquiz ojklaychičha. Naa irat kamañchiz pecžcu, Yoozquiztan ancha zarakchičha nii mantiñinacacqui. Jaknužt vinžtan licchi žoñiqui tsji kjutñi ojkčhaja, jalla nižta cjišičha.

³ Jalla nekztanaqui Espíritu Santuqui wejr cherkatchičha jalla tižta. Tsji anjilaqui wejr chjitchičha ch'ekti yokquin. Jalla nicju tsjaa maataka cherchinčha. Jalla naa maatakqui ljoc animalž juntuñ yawchi želatčha. Jalla nii animalaqui persun curpuquiz Yooz quintra tjuunacchiztačha. Nižaza pakallaw achchiztačha, nižaza tunca wajrichiztačha.

⁴ Naa maatakqui morat ljoc zquiti cujtchintačha. Nižaza koržtan, c'ajñi mazlanacžtan, c'achanacžtan, jalla ninacžtan alajitačha. Nižaza naaž kjarquiz kor wazu tanzinčha. Nii kor wazuquiz anawalinacžtan nižaza ana zuma kamañanacžtan chjijpžtatačha.

⁵ Nižaza naaž ayquiz tii ana intintazzuca tjuu cjiirtatačha: “Pajk Babilonia, putirii maatakanacž maa, nižaza tii yokquiz ana zuma kamañanacchiz maa”. Jalla nuž cjiirtatačha.

⁶ Nekztanaqui wejrqui naa maatak cherchinčha licchižtakaz. Naa maatakqui wacchi Yoozquin criichinaca conchinčha. Jesucristužquiz kuz tjaachiz cjen contatačha nii criichinacacqui. Ninacž ljocžtan licchižtakaz cjistkalčha. Jalla naa maataka cheržcu, wejrqui ancha ispantichinčha.

⁷ Weriz ispantitiquiztan anjilaqui wejtquiz paljaychičha, tuž cjican:

—¿Kjažtiquiztan am ispantejo? Wejrqui naa maatakaž ana intintazzuca puntu amquiz maznačha. Nižaza nii pakallaw achchiz, tunca wajrichiz animalž ana intintazzuca puntu amquiz maznačha.

⁸ Maatakaž yawta animala cherchamčha. Jalla nii animala tuqitan tii muntuquiz želatčha. Nekztan ana želatčha. Wiruñ wilta želaquičha, koz anawal tujquiztan ulanžcaquičha. Ultimquiziqui infiernuquin chjatkattaž cjequičha. Tuqitan tii muntu paatiquiztanpacha Yoozquin ana criichi žoñinacž tjuunacacqui anaž Yooz liwruquiz cjiirtatačha. Jalla nii žoñinacacqui anawal animala cheržcu ispantaquičha. Nii animalaqui žejlchičha, nekztan ana želatčha, nekztan wilta žejlčha. Jalla nižtiquiztan ana criichi žoñinacacqui ispantaquičha.

⁹ Jalla nii intintizjapa intintiñi kuzziz cjis waquizičha. Nii anawal animalž pakallaw achacqui pakallaw curunaca cjičha. Nii curunacž juntuñ tsji watja julzi žejlčha. Putirii maatakažtakazza nii watjaqui.

¹⁰ Nii pakallawk achanacaqui pakallawk mantiñi jilirinaca cjiča. Pjijzkaltan mantiñinacaqui ezziča; katchiča. Tsjii mantiča anziqúi. Nii tsjiiqui ima tjonča. Jalla nii tjonžcu upacamakaz mantaquiča.

¹¹ Nii tuqui žejlñi, nekztan ana žejlñi animalaqui octavo mantiñi jiliriča. Pero nii pakallawk mantiñinacz partiquiztankalča. Nižaza ultimquiziqui infiernuquin chjatkattaž cjequiča.

¹² Nižaza nii amiž cherta tunca wajranacaqui tunca mantiñi jilirinaca cjiča. Nii tunca mantiñinacaqui imaž mantiz poder tanža. Nii anawal animalžtan chica tsjii orakaz mantaquiča.

¹³ Nii tunca mantiñinacaqui tsjii kuzzizza; ninacz mantiz poder tjaaquiča anawal animalžquiz.

¹⁴ Nii anawal mantiñinacaqui Uuzažtakaz Jesucristuž quintra quira zaltayskataquiča. Pero Uuzažtakaz Jesucristuqui criichi žoñinacztan ninaczquiz atipaquiča. Jesucristuqui Jiliric jiliripanča, rey mantiñic mantiñipanča. Criichi žoñinacaqui nižtan chica želaquiča. Criichi žoñinacača Yooziž kjawžta, nižaza illzta, nižaza Yoozquin tjurt'iñi kuzzizpan.

¹⁵ Jalla nekztanaqui nii anjilaqui wejtquiz cjichizakazza:

—Nii amiž cherta kjaznacaqui, jakziquin naa maataka julzinžlaja, jalla nii kjaznacaqui žoñinaca cjiča. Nii žoñinacaqui tjapaman watjanacchiztača, nižaza nacionacchiztača, nižaza takunacchiztača.

¹⁶ Nižaza nii amiž cherta tunca wajranacažtakaz mantiñinacaqui anawal animalžtan naa puturii maatak quintra chjaawjkataquiča. Nekztan naa maataka akznaquiča, nižaza ana zquitchiztakaz cjiskataquiča. Nižaza naaža curpu lujlznaquiča. Nižaza ujžtan ujznaquiča.

¹⁷ Jalla nuž nii mantiñinacaqui naa maatakaquiz paaquiča. Yoozqui ninacz kuznacquiz nuž peckatchiča, Yooz muntacama paa-ajo. Jalla nuž Yooz muntacama paacan ninacaqui tsjii kuzziz cjequiča, anawal animalžquiz ninacz mantiz poder tjaažjapa, Yooz chiitacama cumpliskatzjapa.

¹⁸ Nižaza amiž cherta maatakqui pajk watja cjiča. Nii watjača tii yokquiz žejlñi mantiñi jilirinaczquiz mantiñiqui.

18

BABILONIA CJITA WATJA EZZIČHA

¹ Jalla nekztanaqui wejrqui tsjii anjila arajpachquiztan chjijwžquiñi cherchinča. Nii anjilaqui walja mantiz poderchiztača; nižaza walja kjanatča. Nuž kjanan tii yokaqui majiñažtakaz cjissiča.

² Nekztanaqui nii anjilaqui altu joržtan kjawchiča, tuž cjican:

—Babilonia pajk watja ezziča, ezziča. Nii wajtquiz zajranacaqui watja chassiča, tjapaman anawal ispiritunacztan, nižaza tjapaman chjaawjkatta wežlanacztan.

³ Nii Babilonia watjaqui tjapa nacionanaca Yoozquiztan zarakskatchiča, licchinacažtakaz. Nižaza nii watjaž cjen tjapa tii yokquiz mantiñi jilirinacaqui ana zuma kamañchiz cjissiča. Nižaza nii wajtchiz žoñinaczquiz tjapaman cusasanaca tuytiquiztan, tuyñi žoñinacaqui ricachu cjissiča.

⁴ Jalla nekztanaqui wilta tsjii jora nonzinča, arajpachquiztan chiižquiñi. Nii joraqui tuž cjichiča:

—Wejt parti žoñinaca, nii wajtquiztan ulna, ana nii wajtchiz žoñinacažtapacha uj paazjapa, nižaza nii wajtchiz žoñinacztanpacha ana casticta cjisjapa.

⁵ Nii wajtchiz žoñinacz ujnacaqui juc'anti muntunacztakaz yapchiča arajpacha irantizcamažtakaz. Juc'anti ujnaca paachiča. Jaziqui Yoozqui ninacz paata ujnaca naychiča.

⁶ Jaknužt nii wajtchiz žoñinacaqui yekja žoñinaczquiz anawali paatčhaja, jalla nii anawal paatiquiztan jama castictaj cjila. Ninacaž ujnaca paatiquiztan pizc wilta juc'anti castictaj cjila. Jaknužt yekja žoñinaca anawali cjiskatčhaja, jalla nižta irata pizc wilta juc'anti ana wali cjiskattaj cjila.

⁷ Jaknužt nii wajtchiz žoñinacaqui ancha persun honora waytitčhaja, nižaza jaknužt ninacaqui persun kuzcama kamtčhaja, jalla nuž anawali kamtiquiztan jama sufriskattaj cjila. Ninacz kuzquiz tuž cjiñitača: “Wejrnacqui juc'ant zumtča. Anawalinaca wejtquiz anapan cjisnasača. Anal wira tsjaa žewažtakaz kaaznasača”.

⁸ Jalla nižtiquiztan nii wajtchiz žoñinaczquiziqui casticu tiripintit tjonaquiča. Ninaczquiz ancha anawalinaca tjonaquiča. Jaziqui žoñinaca ticznaquiča; nižaza llacjizaquiča; nižaza čherž kjara paznaquiča; nižaza ujquin ujžtaž cjequiča. Muzpa azziz Yooz Jiliriqui nii žoñinaca pjalžcu casticaquiča. Jalla nižtiquiztan nižta anawalinaca tjonaquiča.

⁹ Jalla nii cheržcu jakzilta mantiñinacat nii wajtchiz žoñinacztan ana zuma kamañchizlaja, nižaza persun kuzcama kamchizlaja, jalla ninacaqui nii wajtchiz žoñinacz castictu cheržcu, kaaquiča, nižaza llacjizaquiča. Nii watja ujznan, nii mantiñi jilirinacaqui uj žketñi cheraquiča. Nekztan kaaquiča.

¹⁰ Jalla nuž cheržcu, nii watja nuž castictaž cjen, ažkquin tsijtchi želaquiča; ana macjatžcaquiča. Castictaž cjen tsucaquiča, tuž cjican: —¡Ay! ¡Ay! Babilonia pajk watja. Muzpa azziz cjenaqui, anawali cjissila. Tsjii ratukaz casticta cjissila.

¹¹ Nii watja castictaž cjen, tii muntuquiz žejlñi tuyñinacazakaz kaaquiča, nižaza llacjizaquiča. Ninacz cusasanaca kjayñimi ana iya želaquiča.

¹² Ninacz cusasanacaqui tižtanacača: kori, paaz, llijñi maznaca, c'achjanaca, zuma pañu, murat pañu, ser pañu, ljoc pañu, tjapaman zuma ulurchiz tablanaca, zuma marfila cjita maznaca, jila walurchiz maderanaca, korinaca, jirunaca, zuma marmol cjita llijñi maznaca,

¹³ canelanaca, zuma ulurchiznaca, insinsunaca, zuma ulurchiz mirra cjitanaca, zuma ulurchiz asitinaca, vinunaca, asitinaca, chiw llamp'u jac'unaca, trigonaca, kuzñi animalanaca, uuzanaca, cawallunaca, autunaca, tuyzjapa piyunanaca. Jalla tjapa nižtanaca tuytatača.

¹⁴ Nii tuyñinacaqui nii wajt puntuquiztanž cjequiča:

—Nii wajtquiziqui anaž iya tjapaman zumanaca želaquiča, nii ancha juztažta zumanacaqui. K'ala pertissiča, wiñayjapa. Walurchiz cusasanacaqui pertissiča, nižaza wajtquiz honora tjaañi cusasanacaqui pertissiča wiñayjapa. —Nuž chiyaquiča.

¹⁵ Nii cusasanaca tuyñinacaqui ricachu cjissiča nii wajtchiz žoñinacz kjaychiž cjen. Jaziqui tuyñinacaqui nii watja casticu cheržcu, eksñi kuztan ažkquin tsijtchi želaquiča. Nižaza altu joržtan kjawcan, kaaquiča, nižaza llacjizaquiča.

¹⁶ Nižaza ninacaqui tuž cjequiča: —¡Ay! ¡Ay! Anawali cjissila tii pajk watjaqui. Tsjaa ricach maatakažtakaz želatča, iñarato zquitchiz cujtchin, zuma pañ zquitchiz, murat pañ zquitchiz, ljoc pañ zquitchiz. Zuma iñarato želatča, koržtan, zuma walurchiz maznacžtan, zuma c'achjanacztan.

¹⁷ Tsjii ratukaz tjapa nii wajtquiz walja walurchiz cusasanaca pertissiča. —Jalla nuž cjequiča.

Jalla nii watja casticu cheržcu, warcu joojooñinacami, warcuquiz ojklajñinacami, warcuquiz langzñinacami, tjapa kot warcužtan langzñinacami ažkquin tsijtchi želaquiča.

¹⁸ Jalla nii wajtquiztan uj žketñi cheržcu, kjawaquiča, tuž cjican:

—¿Jakzilta watjat tižta chawc watjažtapacha žejljo?

¹⁹ Jalla nekztanaqui ninacaqui persun achanacquiz pjilžtan tjatznaquiča, ancha kaacan, nižaza ancha llacjizcan. Nižaza tuž cjequiča:

—¡Ay! ¡Ay! Ana wali cjissila nii chawc watjaqui. Nii wajtquin cusasanaca chjitchiž cjen, tjapa warcužtan langzñi žoñinacaqui cusa ricachu cjissičha. Nižaza tsjii ratulla akžtala.

²⁰ Arajpachquin žejlñinacazti, nii watja akžtaž cjen, cuntintuž cjee. Yoozquin criichi žoñinaca, cuntintuž cjee. Nii wajtchiz žoñinacaqui ančhucacquiz anawali paachiča. Yooz parti žoñinaca, nižaza Yooz uchta apostolonaca, nižaza Yooz puntu parliñinaca, tjapa ančhucaltajapa Yoozqui nii watja casticaquiča. Jaziqui ančhucaltajapa Yoozqui nii watja casticaquiča.

²¹ Jalla nekztanaqui tsjii walja azziz anjilaqui tsjii pajk maz tjajžtakaz waytižcu kotquiz tjojtchiča, tuž cjican:

—Tii maz tjaj tjojttažokaz Babilonia chawc watja tjojttaž cjequiča. Anaž wira iya cherta cjequiča.

²² Tii wajtž calliran anaž wira iya itsñi jora nonžtaž cjequiča, arpi guitar jorami, itsñi jorami, pincall jorami, trompet pekz jorami. Nižaza tii wajtquiz anaž wira iya oficiuchiz langzñinacami želaquiča. Nižaza tii wajtquiz anaž wira iya žoñinaca tjajžtan jawunñi jora nonžtaž cjequiča.

²³ Nižaza tii wajtquiz micha pekžta anaž iya cheraquiča. Nižaza anaž iya zalzñi pjijzta ch'ajwiñi nonznaquiča. Tuqui tii wajtquiz tuyñinacaqui žoñinacž yujcquiz pajk žoñitača. Maña paacan, tii wajtchiz žoñinacaqui tjapa nacionanacchiz žoñinacžquiz incallchiča.

²⁴ Nižaza tii wajtchiz žoñinacaqui Yooz parti žoñinaca, nižaza Yooz puntu parliñinaca conchiča. Tjapaman žoñinaca contača.

19

ARAJPACHQUIN YOOZQUI HONORCHIZZA

¹ Jalla nekztanaqui arajpachquin wacchi žoñinacž jora nonzinča, tuž cjican: “¡Aleluya! Učhum Yoozza liwriñiqui, walja azzizza, walja honorchizza.

² Učhum Yoozza lijituma pjalzñiqui. Jalla nuž Babilonia wajtchiz žoñinaca lijituma casticchiča. Nii žoñinacaqui tjapa wajtchiz žoñinacžquiz ana wali kamañchiz cjiskatchičha. Jalla nižtiquiztan casticta cjissičha. Nižaza Yoozquin sirwiñi žoñinaca conchiž cjen, Yoozqui nii žoñinaca casticchiča”.

³ Wilta nii arajpachquin žejlñinacaqui altu joržtan chiichiča, tuž cjican:

—¡Aleluya! Nii wajtquiztan uj žketi wiñaya žketaquiča.

⁴ Nekztanaqui arajpachquin paa tunc puzin jilirinacžtan pajkpic žejtñinacžtan yokquiz quillžcu, puct'ichiča. Nižaza Yoozquiz rispitchičha. Yoozqui niž mantiz puestuquiztača. Rispitcan tuž cjichiča:

—¡Nužoj cjila! ¡Aleluya! ¡Amén!

⁵ Nekztanaqui mantiz puestuquiztan tsjii jora nonzinča tuž chiižquiñi: “Tjapa Yoozquin sirwiñinaca, Yoozquiz honora waytila. Koltami pakjimi tjapa Yoozquin rispitiñinacami, Yoozquiz honora waytila”.

⁶ Nekztan wejrqui wacchi žoñinacž jora nonzinča. Wacchi kjaz pujquiz kjawñižtakaztača. Nii joranacaqui tuž cjichiča:

“¡Aleluya! Učhum tjapa azziz Yooz Jiliriñi tjapa mantiz kallantichiča.

⁷ Jalla nižtiquiztan ančaž chipžla učhumqui, cuntintuž cjila. Yoozquin honoraž tjaala. Uuzažtakaz Jesucristužtan niž parti žoñinacžtan juntu kamz ora irantižquichiča, tsjii zalz pjijsta oražtakaz. Jesucristuž parti žoñinacaqui listu tjacziča, zalziñ turažtakaz.

⁸ Finu zquitinacžtan cujtziča; anča limpu, nižaza llijñitača”.

Nii finu zquitinacžtan cujtchi tuž cjiča, Yoozquin criichinacaž zuma kamañanacchiz, jalla nii. Jalla nuž zquitinacžtan cujtzkatchičha Jesucristuž parti žoñinacžquiz.

⁹ Jalla nekztanaqui tsjii anjilaqui wejtquiz paljaychiča tuž cjican:

—Jalla tuž cijira: “Uuzažtakaz Jesucristuž zalz pjijztiquiz invittanaca cuntintoj cjila”.

Nižaza wejtquiz cjichiča:

—Jalla tii weriž chiita takunacaqui Yooz zuma werar razunanacača.

¹⁰ Jalla nižtiquiztan wejrqui nii anjilž kjojchquiz quillžcu puct'ichinča, nii rispitzjapa. Niizti wejtquiz chiižinchiča, tuž cjican:

—Ana nižta paa. Wejrqui Yooz sirwiñtča, amtan chica, nižaza am jilanacžtan chica. Tjapa ančhucča Jesucristuž puntuquiztan parliñinacaqui. Yoozquin alaja rispita amqui.

Jakziltat Jesucristuž puntuquiztan mazinčaja, jalla niča werar Yooz taku parliñiqui.

CHIW CAWALLQUIZ YAWCHI ZOŃI

¹¹ Jalla nekztanaqui arajpacha cjetzi cherchinča. Jalla nicju tsjii chiw cawallu jeczquichiča. Calwallquiz tsjii zuma žoñi yawchi cherchinča. Nii žoñiqui Zuma Lijituma cjitača, nižaza Werar Razunchiz cjitača. Jalla nii žoñiča zuma lijituma pjalzñiqui, nižaza ultim werar razunquiztanča quira zaltiñiqui.

¹² Nii žoñž čhjujcuquinacaqui ujtakaz c'ajatča. Niiž achquiz wacchi mantiñi žoñinacž pillunacchiztača. Nižaza nižquiz tsjii tjuu cijirtatača. Nii tjuuqui niikaz zuma intintiča.

¹³ Nii žoñiqui ljocžtan tinta tol zquitichiztača. Niiž tjuuqui Yooz Taku cjitača.

¹⁴ Niižquiz apzcatča arajpach zultatunaca; chiw finu zquitichiznacatača, nižaza limputača. Nii zultatunacatača chiw cawallunacquiz yawchi.

¹⁵ Nii zuma žoñž atquiztan tsjii pajk ar cuchillu ulanchiča, nacionanacchiz žoñinaca casticzjapa. Tjapa nacionanacchiz žoñinacžquiz mantaquiča, tjapa anawali paatiquiztan jama casticcan. Jaknužt tsjii uwas kujichñi žoñiqui uwas kjaz zpjičtjapa tjecančaja, jalla nižta irata nii zuma žoñiqui Yooztajapa quintra žoñinaca tjecnaquiča. Tjapa azziz Yoozza anawali žoñinacž quintra žawjchipan. Anziqui ninaca casticta cjissa.

¹⁶ Nii tjecanñi žoñž tol zquitquizimi niž lizquizimi tii tjuu cijirtatača: “Tjapa mantiñi reynacžquiztan tsjan reyča. Nižaza tjapa jilirinacžquiztan tsjan jiliriča”.

¹⁷ Jalla nekztanaqui cherchinča, tsjii anjila tjuñquiz tsijtchi. Alto joržtan arajpachquin laylayni wežlanaca kjawziča, tuž cjican:

—Tekchuc picha. Nižaza tekz ajcsca, Yooz tjaata čhjeri lujljzapa.

¹⁸ Tekz ajcsca, mantiñi reynacž janchi lujljzapa, nižaza zultatu mantiñinacž janchi lujljzapa, nižaza tjup kuzziz žoñinacž janchi lujljzapa, nižaza cawallunacž chjizwimi nii yawchi žoñinacž janchimi lujljzapa, nižaza tjapaman žoñinacž janchi lujljzapa, žoñž mantuquiz cjicjiñi žoñinacž janchimi, ana žoñž mantuquiz cjicjiñi žoñinacž janchimi, kolta žoñinacž janchimi, pajk žoñinacž janchimi; tjapaman žoñinacž janchi lulaquiča. —Nuž cjichiča anjilaqui.

¹⁹ Jalla nekztanaqui cherchinča, nii anawal animalžtan yokquiz mantiñi reynacžtanami ninacž zultatunacžtanami ajcsitača, chiw cawallquiz yawchi žoñž quintra kichjasjapa, niž zultatunacžtanpacha.

²⁰ Quira zaltižcu, nii anawal animalaqui preso tanta cjissiča, falso profetžtan chica. Jalla nii falso profetaqui animalž yujcquiz milajrunaca paachiž cjen, nii animalaž chimputa žoñinaca incallchiča; nižaza nii animalž žoñž paata yoozquiz rispitiñi žoñinaca incallchizakazza. Jalla nii pucultan anawalinacaqui azupri infernuquin tjojtatača, žejtñi sufrisjapa.

²¹ Nii chiw cawallquiz yawchi žoñiqui parti quintra žoñinaca pajk cuchillžtan conchiča. Nii pajk cuchilluča nii žoñž atquiztan ulanchiqui. Jalla nižtiquiztan tjapa nii ajcsi wežlanacaqui ninacž janchižtan, chjizwinacžtan ancha chjekchi cjissiča.

¹ Jalla nekztanaqui tsjii anjila cherchinča, arajpachquiztan tjonñi. Nii anjilaqui kjarquiz llawi tanzicha; nižaza pajk carina tanzicha. Nii llawiqui koz anawal tuj llawitača.

² Nekztan nii anjilaqui dragón tanchičha. Dragonqui žkoražtakaz Satanás diabluča. Jalla nii diabluqui warank wata watzcama čejltača.

³ Nekztan nii anjilaqui diablu tjojtžcu, koz tuj chawjcchiča. Nižaza tsjii estampillžtan žcatžinchiča, diabluž nacionanacchiz žoñinacžquiz ana iya incallajo, warank wata watzcama. Jalla nii warank watanaca wattanaqui, wilta cucta cjistanča tsjii upacamakaz.

⁴ Jalla nekztan mantiz puestunaca cherchinča. Jalla nii puestunacquin julzi žoñinacaqui pjalzjapa poderchiztača. Nižaza acha muržinta criichinaca cherchinča. Nii criichinacaqui contatača, Yooz taku parlitiquiztan, nižaza Jesucristuž puntuquiztan ticlartiquiztan. Ninacaqui anawal animalžquizimi nižaza niiž paata yooznacžquizimi ana rispitalča. Nižaza anatača anawal animalž chimputa, ana yujc ayquizimi, ana kjarquizimi. Jalla nii conta criichinacaqui jacatatchi cherchinča. Warank watanaca Cristužtan juntumantaquiča.

⁵ Jalla niiča primiru jacatatzqui. Parti ticzi žoñinacaqui ana jacatatchičha nii warank watanaca watzcama.

⁶ Nii primiru jacatatchinacaqui cuntintuž cjequiča. Ancha zuma kamañchiz cjequiča. Nii segundo ticzqui ninacžtaqui ana želaquiča. Nii segundo ticzqui tuž cjiča, infiernuquin chjatkatta wiñayjapa casticta cjisjapa. Pero nii jacatatchinacaqui Cristužtan juntumantaquiča warank watanaca. Ninacaqui Yooztajapami Cristužtajapami sirwiñinaca cjequiča.

⁷ Jalla nii warank watanaca wattiquiztan Satanás diabluqui cuctaž cjequiča koz tujquiztan.

⁸ Jalla nuž cutztiquiztan Satanás diabluqui ulnaquiča tjapa tii yokquiz žejlñi nacionanaca incallzjapa. Gog cjita naciona, nižaza Magog cjita naciona nižaza tjapa nacionanacžquiz incallžcu, quira zalzjapa ajcškataquiča. Jalla nii nacionanacchiz zultatunacaqui walja tamača, kot at pjilažtakaz. Nuž cherchinča.

⁹ Nii zultatunacaqui walja campuquin ojkcchiča, Yooz parti žoñinaca muyuntizjapa, nižaza Yooziž pecta watja muyuntizjapa. Jalla nuž muyuntan, Yoozqui arajpachquiztan uj cutzinžquichiča, ninaca k'ala ujjjapa.

¹⁰ Nekztanaqui incallñi diabluqui azuprižtan asñi uj kotquin tjojtatača. Jalla nicju tuquiqui anawal animalžtan toscar profetžtan tjojtatača. Jalla nicju majiñami weenami sufraquiča watay wata.

PAJK CHIW MANTIZ PUESTU

¹¹ Jalla nekztanaqui tsjii pajk chiw mantiz puestu cherchinča. Nižaza nii puestuquiz tsjiiqui julzi želatča. Jalla nii julzi mantiñiž nuž želan, niiž yujcquiz arajpachami yokami k'ala katchičha. Nekztan ana iya arajpachami yokami želatča.

¹² Nekztan ticzi žoñinaca cherchinča, koltami pakjimi, mantiñi Yooz yujcquiz tsijtchi. Jalla nekztanaqui Yooz liwrunaca cjetžtatača. Nižaza yekja liwru cjetžtatača; liwriita žoñinacž tjuu listichiz liwrutača. Nii Yooz liwrunacquiz tjapa žoñinacž paatanacaqui apuntitatača. Ticzinacaqui apuntita paatiquiztan jama pjalžtatača.

¹³ Jakziltat pajk kotanacquiz ticžtchaja, jalla ninacaqui Yooz yujcquiz intirjitatača. Nižaza jakziltami ticžtchaja, nižaza ticzi žoñž yokquin žejltchaja, jalla ninacaqui Yooz yujcquiz intirjitatača. Jalla nekztanaqui tjapa žoñinacaqui ninacž paatiquiztan jama pjalžtatača.

¹⁴ Ticzmi nižaza ticzi žoñinacž yokami ana iya želaquiča. Asñi ujquin tjojtatača. Nii asñi uj kotquin sufrisqui segundo ticz cjiča.

¹⁵ Jakziltiž tjuuqui liwriita žoñinacž tjuu listiquiz ana žejlčhaja, jalla niiqui asñi uj kotquin tjojtazakaztača.

21

EW ARAJPACHA EW YOKA

¹ Jalla nekztanaqui ew arajpachami ew yokami cherchinča. Primir arajpachami primir yoka katchicha, nižaza kotami.

² Nekztanaqui wejr Juanqui ew Jerusalén watja cherchinča, Yooz arajpachquiztan tjonñi. Jaknužt tsjaa zalzin turqui persun tjowažtajapa tjaczinžlaja, jalla nižta zuma tjacžtača ew watjaqui.

³ Nekztan arajpach mantiz puestuquiztan tsjii jora nonzinča. Altu tawkžtan tuž cjichiča:

—Cheržca. Yoozqui žoñinacž taypiquiz kamča. Yoozqui ninacžtan chica kamaquiča, nižaza nii žoñinacaqui Yooz wajtchiz žoñinaca cjequiča. Jalla nižtiquiztan Yoozqui ninacžtan chicaž cjequiča.

⁴ Yoozqui ninacž kjaz kaajmi chjujžinaquiča. Nižaza ninacžta anaž iya ticz želaquiča, nižaza iya kaazmi, llaquizmi, sufrismi anaž želaquiča. Jalla ninacaqui k'ala watchiča.

⁵ Nekztanaqui nii mantiz puestuquiz julžñiqui tuž cjichiča:

—Cheržca, wejrqui tjappacha ew paa-uča. Tii cijjra. Tiiča werar takunacaqui, nižaza lijitum takunaca.

⁶ Jalla nekztanaqui cjichiča:

—Tjappachaž jazic žeržta. Wejrtča primirquiztanpacha, nižaza wiricama, jaknužt tsjii litranacaqui “A”quiztan kallantičhaja, nižaza “Z”quin wiricama žerzaja, jalla nižta. Jakziltat kjaztakaz zuma kamaña ancha pecčhaja, jalla nižquiz nužullakaz zuma kamaña tjaata cjequiča, jalzurquiztan žejtñi kjaztakaz. Wejrqui nii zuma kamaña tjaača.

⁷ Jakziltat tjapa anawalinacquiztan atipačhaja, jalla nižquiz irinsažtakaz tii zumanaca weriž tjaata cjequiča. Wejrqui ninacžtajapa Yooz cjeeča. Ninacaqui wejt maatinaca cuntaž cjequiča.

⁸ Ana wejtquin kuzziz žoñinacazti azupri uj kotquin chjatkattaž cjequiča. Jalla tižta kamañchizza nii žoñinacaqui: Yooz nicñinaca, Yoozquin kuz ana tjaañinaca, ana zuma kamañchiz žoñinaca, žoñi conñinaca, adulteriuquiz ojklayñinaca, yat'irinaca, žoñiž paata yooznaca sirwiñinaca, toscara chiiñinaca. Jalla ninacaž asñi ujquin castictaž cjequiča. Jalla nii asñi uj infernuquin ojkszqui segundo ticz cjiča.

EW JERUSALEN CJITA WATJA

⁹ Tuquiqui cherchinča pakallawk anawalinacaqui pakallawk anjilanacžquiz intirji-tatača. Jalla nekztanaqui nii pakallawk anjilanacquiztan tsjiiqui wejtquin tjonchiča. Jalla tuž cjican, chiichiča:

—Pichay. Amquiz tjeeznača, Uuzažtakaz Jesucristuž tur.

¹⁰ Jalla nekztanaqui Espiritu Santuqui wejtquiz tuž cherkatchiča. Wejrqui pajk curquiz chjichtatača. Jalla niwjctan pajk zuma Jerusalén watja wejtquiz tjeeziča, arajpachquiztan Yoozquiztan tjonñi.

¹¹ Nii watjaqui Yooz honorchizza; nižaza llijatča Yooztakaz. Llijñi maztakaztača llijñatča jaspe maztakaz, nižaza ispijužtakaz.

¹² Nii wajt muytata pajk pirka želatča, tuncapan zanchiz. Zapa zanzquiz tsjii anjila želatča. Nižaza zapa zanzquiz tsjii tjuu cijjrtatača. Nii tuncapan tjuunacaqui Israel žoñinacž t'akanacž tjuutača.

¹³ Nii pirkatača tuwanchuc čhjep zanchiz, užachuc čhjep zanchiz, warchuc čhjep zanchiz, tajachuc čhjep zanchiz.

¹⁴ Nii wajt muytat pirkaqui tuncapan maz simintuchiztača. Nii tuncapan maz simintuquiz tuncapan Jesucristuž apostolunacž tjuunaca cjiirtatača.

¹⁵ Jalla nii wejtquiz chiiñi anjilaqui kor miriis parchizza, nii watja miriisjapa, zanami pirkanacami.

¹⁶ Nii watjaqui isquinatutača, porap kjuttan igualatača. Anjilaqui kor paržtan watja miriichiča, 2,200 kilometrotatača, tsewcchuc altu kjutñi, nižaza latuquin igualatača.

¹⁷ Nekztan pirka miriichiča. Nii muytat pirkaqui sojta tunc pusin metro miriichiča, žoñiž metružtan miriita, jalla nuž.

¹⁸ Muytat pirkaqui jaspe maztan pirkitatača. Watjaqui kori puru kjuyanacchiztača, limpu ispijužtakaz.

¹⁹ Nižaza wajt muytat pirkiž simintunacaqui c'achja maznacžtan alajitatača. Prim-iruiqui jaspe maztan, segunduqui zafiro maztan, terceruqui ágata maztan, cuartoqui esmeralda maztan,

²⁰ quintuqui ónice maztan, sextuqui cornalina maztan, septimuqui crisólito maztan, octavuqui berilo maztan, novenuqui topacio maztan, decimuqui crisoprasa maztan, unodecimuqui jacinto maztan, duodecimuqui amatista maztan.

²¹ Nižaza nii tuncapan zanaqui tuncapan perla maznacžtan paatatača. Zapa zanaqui tsjii perližtankaz paatatača. Wajt chawc calliqui kori puru paatatača, limpu ispijužtakaz.

²² Wajtquiz ana timplu cherchinča. Tjapa azziz Yooz Jiliržtan Uuzažtakaz Jesucristužtan, jalla ninacaqui wajt timplu cuntača.

²³ Nižaza nii wajtquiz kamcan, anaž tjuñimi jiižmi pecasača, kjanzjapa. Yoozpachaž kjanča, Jesucristužtanpacha.

²⁴ Nacionanacquistan liwriita žoñinacaqui Yooz kjanquizekaz ojklayaquiča wajtquiz kamcan. Nižaza yokquizek mantini reynacaqui nii wajtquin honora zijcaquiča.

²⁵ Majiñ zita zana cjetžtaž želaquiča. Nižaza anaž ween želaquiča.

²⁶ Tjapa nacionanacž honora chjichtaž cjequiča nii wajtquin.

²⁷ Jalla nii wajtquizek anaž anawali kamañchizqui luzasača. Nižaza Yooz ch-jaawjkatta žoñinacami ana luzasača, nižaza incallni žoñinacami ana luzasača. Jakzilitiž tjuut Uuzažtakaz Jesucristuž liwruquizek cjiirtažlaja, jalla ninacakaz Yooz wajtquizek luzasača.

22

¹ Nekztanaqui nii anjilaqui wejtquizek tsjii limpu puju tjeeziča. Nii puj kjazqui žeti tjaañi cjiča. Nii kjazqui ispijužtakaztača. Yooz mantiz puestuquizektanami, Uuzažtakaz Jesucristuž mantiz puestuquizektanami ulnatča.

² Nii puj kjazqui wajt chawc call tayıquizek okatča, puj porap kjuttan žeti tjaañi munti pakatča. Jalla nii muntiqui tuncapan wilta tsjii watquizek pookča, nižaza tuncapan frutchizza. Zapa jiižquizek fruta pookča. Nižaza nii munti chjañinacaqui watjanacchiz žoñinaca chjetinzjapača.

³ Nižaza nii wajtquizek kamañinacaqui ana iya casticz cheraquiča. Yooz Jiliriž mantiz julzmi, Jesucristuž mantiz julzmi nii wajtquizektača. Ninacž sirwiñinacaqui nii pucul-tižquizek rispitaquiča.

⁴ Nižaza Yooz wajtchiz žoñinacaqui Yooz cheraquiča. Nižaza Yooz tjuuqui nii žoñinacž ayquizek cjiirtaž cjequiča.

⁵ Nii wajtquizek ween ana želaquiča. Nižaza anaž sir kjanami, anaž lampar kjanami, anaž tjuñ kjanami pecasača. Yooz Jiliripachaž ninacžtajapa kjana cjequiča. Nižaza Yoozquizek nii wajtquizek kamañinacaqui watay wataž zuma mantaquiča.

JESUCRISTUZ TJONZ TJUÑI WAJILLACHA

⁶ Jalla nekztanaqui nii anjilaqui wejtquiz cjichiča:

—Tii chiita takunacaqui werarača, zuma lijitumapanča. Tuquitan Yooz Jiliriqiu niiz puntu parliñinaczquiz chiikatchiča. Jalla nii Yoozpachaqui niiz anjila cuchanzquichiča, niiz sirwiñinaczquiz tjeezjapa, čhjulut wajilla wataquiča, jalla nii.

⁷ Jesucristuqui wajillaj tjonla.

Jakziltat tii liwruquiz cjiirta Yooz taku catokačhaja, jalla niiqui cuntintuž cjequiča.

⁸ Wejr Juanqui jalla tinaca cherchinča, nižaza nonzinča. Jalla nii nonžcu, cheržcu, nii wejtquiz tjeezni anjilž yujcquiz quillzinča, nižquiz rispitzjapa.

⁹ Jalla nekztanaqui nii anjilaqui wejtquiz chiižinchiča, tuž cijan:

—Ana nižta paa. Wejrqui Yoozquin zakal sirwuča, am irata, nižaza Yooz parti parliñi jilanacaž irata, nižaza tii liwruquiz cjiirta Yooz taku catokñinacaž irata. Jalla nižtiquiztan Yoozquinkaz rispita.

¹⁰ Nekztanaqui wejtquin cjichizakazza:

—Tii liwruquiz cjiirta Yooz taku ana chjozaka joojoowa. Wajillaž tii taku cumplis tjuñi žcatžinžquiča.

¹¹ Jalla nii timpu tjonan, jakziltat anazuma paacan žejlčhaja, jalla niiqui anazuma kaj paala. Nižaza jakziltat anazuma kuzziz žejlčhaja, jalla niiqui anazuma kuzziz kaj kamla. Nižaza jakziltat zuma kamañchiz žejlčhaja, jalla niiqui zuma kamañchiz kaj cjila. Nižaza jakziltat Yoozquinkaz kuzziz žejlčhaja, jalla niiqui Yoozquinkaz kuzziz kaj cjila.

Nekztan tsjii joraqui cjichiča:

¹² —Nužupan wejrqui wajillal tjonacha. Jalla nuž tjoncan premiuchiz tjonacha. Zapa maynižquiz tjaa-ača, ninacaž kamtiquiztan jama.

¹³ Wejrtča primirquiztanpacha wiricama, nižaza wejrtča kalltiñtqui, nižaza žerzniñtqui, jaknužt tsjii litra “A”quiztan kalltičhaja, nižaza “Z”quin žerzaja, jalla nižta.

¹⁴ Jakziltat persun ujnacquiztan pertuntažlaja, jalla ninacaqui limpu ajunta zquitchiztakazza. Jalla nii pertunta žoñinacakaz cuntintuž cjequiča. Nižaza žeti tjaañi muntiž frutunacquiztan lulasača. Nižaza ew wajt zanquiztan luzasača.

¹⁵ Pero wajt zancu jalla tižta žoñinacaž eclaquiča: tsjii kjutni kuz tjaañi žoñinaca, yat'irinaca, adulteriuquiz ojklajñinaca, žoñi conñinaca, žoñiž paata yooznacžquin rispitiñinaca, nižaza tjapa incallñinaca, nižaza tjapa toscar taku pecñinaca. Jalla nii anazuma žoñinacaž wajt zancu eclaquiča.

¹⁶ —Wejr Jesucristučha. Wejt anjila cuchanzquichinča, tjapa icliz žoñinaczquiz tii takunaca ticlarzjapa. Wejtquiztan David jiliriqiu tjoničha. Nižaza Davidž majchmaatinaczquiztan wejrqui tjoničha. Wejrtča weenzlak kjantat llijni warawaražtakaz.

¹⁷ Espiritu Santuqui Jesucristužquiz kuzziz žoñinacztan “Jesucristuqui tjonla” cjiča.

Nižaza jakziltat tii chiita taku nonznačhaja, jalla niizakaz “Jesucristuqui tjonla” cjila.

Jakziltat kjaztakaz Yooz zuma kamaña ancha pecčhaja, picha, Yoozquiztan zuma kamaña tanzjapa. Nužullakaz tanznasača. Zuma žeti tjaañi kjaztakazza nii zuma kamañaqui.

¹⁸ Jakziltat tii liwruquiz cjiirta Yooz taku nonžaja, jalla niizquiz chiižinžcuča, tuž cijan: Jakziltat tii cjiirta Yooz taku yapačhaja, jalla ninaczquiziqiu tii liwruquiz cjiirta anawalinacaž wataquiča.

¹⁹ Nižaza jakziltat tii liwruquiz cjiirta Yooz taku t'upznačhaja, jalla niiz tjuu Yooz liwruquiztan jurtaž cjequiča; nižaza zuma Yooz wajtquiz anaž luzasača; nižaza tii liwruquiz cjiirta zumanaca ana niiztajapa cjequiča.

²⁰ Jalla tii takunaca ticlarñiqui tuž cjiča:

—Ultimupan wejrqui wajillal tjonacha.

Wejrzakaz cjiwča:

—Jalla nužoj cjila. Amén. Jesucristo Jiliri, jalla nuž tjona.

²¹ Učhum Jesucristo Jiliriqiu tjapa ančucaquiz zumaj cjiskatla. Nužoj cjila. Amén.